


El Nuevo Testamento
en mixe de Coatlán



New Testament in Mixe, Coatlán (MX:mco:Mixe, Coatlán)

El Nuevo Testamento en mixe de Coatlán
New Testament in Mixe, Coatlán (MX:mco:Mixe, Coatlán)

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

Contents

SAN MATEO	1
SAN MARCOS	54
SAN LUCAS	92
SAN JUAN	146
HECHOS	194
ROMANOS	243
1 CORINTIOS	269
2 CORINTIOS	294
GÁLATAS	311
EFESIOS	321
FILIPENSES	331
COLOSENSES	337
1 TESALONICENSES	343
2 TESALONICENSES	349
1 TIMOTEO	352
2 TIMOTEO	358
TITO	363
FILEMÓN	366
HEBREOS	368
SANTIAGO	386
1 PEDRO	392
2 PEDRO	399
1 JUAN	404
2 JUAN	411
3 JUAN	412
JUDAS	413
APOCALIPSIS	415

SAN MATEO

Jaayhui'my Jadu'n Nej Jesucristo Ytun Yjajti

Je Jesucristo ymij'ap ymijteedy

¹ Cham ngapxa'ñ nmiydäga'ñich p'in Jesucristo y'ap'ajt yteedy'ajt jadu'n nej yhui'my jaybety. Jesucristo je' oy ap'adyii teedy'adyii David etz Abraham.

² Abraham oy ung'adyii Isaac. Isaac oy ung'adyii Jacob. Jacob oy ung'adyii Judá etz y'ajchytijc y'uchytijc. ³ Judá etz Tamar oy ung'adyii Fares etz Zara. Fares oy ung'adyii Esrom. Esrom oy ung'adyii Aram. ⁴ Aram oy ung'adyii Aminadab. Aminadab oy ung'adyii Naasón. Naasón oy ung'adyii Salmón. ⁵ Salmón etz Rahab oy ung'adyii Booz. Booz etz Rut oy ung'adyii Obed. Obed oy ung'adyii Isaí. ⁶ Isaí oy ung'adyii rey David. Je rey David je' oy ytöxyijc'adyii huidi anajty Urías ytöxyijc'ajtpy. E je' ajcxy y'ung'ajti Salomón.

⁷ Salomón oy ung'adyii Roboam. Roboam oy ung'adyii Abías. Abías oy ung'adyii Asa. ⁸ Asa oy ung'adyii Josafat. Josafat oy ung'adyii Joram. Joram oy ung'adyii Uzías. ⁹ Uzías oy ung'adyii Jotam. Jotam oy ung'adyii Acáz. Acáz oy ung'adyii Ezequías. ¹⁰ Ezequías oy ung'adyii Manasés. Manasés oy ung'adyii Amón. Amón oy ung'adyii Josías. ¹¹ Josías oy ung'adyii Jeconías müid y'ajchytijc y'uchytijc. Huin'it Babilonia jäy oy mach je israelitas jäy. Chi minicxy jim Babilonia y'it.

¹² Jim ma je Babilonia y'it, jim Jeconías oy ung'adyii Salatiel. Salatiel oy ung'adyii Zorobabel. ¹³ Zorobabel oy ung'adyii Abiud. Abiud oy ung'adyii Eliaquim. Eliaquim oy ung'adyii Azor. ¹⁴ Azor oy ung'adyii Sadoc. Sadoc oy ung'adyii Aquim. Aquim oy ung'adyii Eliud. ¹⁵ Eliud oy ung'adyii Eleazar. Eleazar oy ung'adyii Matán. Matán oy ung'adyii Jacob. ¹⁶ Jacob oy ung'adyii José huidi oy ñäy'adyii María. E je María oy ung'adyii Jesús huidi yxii Cristo.

¹⁷ Jadu'n oy ñicxy majmactz najtzquëxi' Abraham ixti David. Ma je David jamajmactz najtzquëxi' chi je israelitas jäy yajtzim yajmajch ma Babilonia y'it, e nañ jamajmactz najtzquëxi' chiini oy ymiñ yja'ty je Cristo.

Jesucristo yma'xung'ajtin

¹⁸ Jadayab capxy ayuc jadu'n nej ymiñ yja'ty je Jesucristo. Jesús ytaj, huidi anajty yxii María, yi' ti anajty ycapxytungixy co ypigaangixy müid José; e ma anajty ca'ni ñaybudigiiyigixy, chi María oy y'ungdzimigy müid yi Dios yjihui'ñ ymic'ajt. ¹⁹ José, yi' ñäy, hue' anajty yi' yajpaty janch tudägy. Ca' anajty xihua'ñ María mayjäyjoty. Hue' janchtiy yhuinma'ñybaty co ixmadza'ñ ayüch ameech ca' p'in yajnejhuñhua'ñ. ²⁰ Huin'it ma jadu'n anajty nihuinmayiy, chi Huindzin Dios tüg y'ángel ñayquëxici cumäyjoty ma José, chi ñimaayi:

—José, David y'ap y'oc, ca' mijcajee mdzachhuinmay nej m'octöxyijc'adiyb María, com yi' y'ung huidibi yajma'xung'adamy hue' müid Dios yjihui'ñ ymic'ajt ycixpi. ²¹ Yi' ypadamy tüg y'ung e mximöhuipy Jesús. Jadu'n yi' xii'adiyb com jëgix co yi' yajpocyñihuädzam ñaax ycajp.

²² Tüg'óciy jada ytundaayi yjajtaayi ycijxy yca'pxy jadu'n nej je Dios anajty ti nimäy je profeta, je jäy huidi Dios y'ayuc najtzcapxyip ma anajty jadu'n yjaybetyity:

²³ Je töxyjäy huidibi ca' yëydijc müiddzinäy hue' je' ung tzimicip. Chi ypadamyb tüg je y'ung hue' je' yxii'adaanip Emanuel.

Emanuel hue' yhuimbizimy Dios müid ich ajt.

²⁴ Co José ymäyhuijy, chi cuyduñ jadu'n nej anajty Dios y'ángel ti nímäyii, chi huoy María jadu'n nej jihuüiy töxyijc'adyii. ²⁵ Per ni ca' ajcxy jadu'n chinaay jadu'n nej jäy ypicxy chinäy ixti cooni oy María y'ung yajma'xung'aty. Chi yximoy Jesús.

2

Madza' ni'ixpigüyb oy co'ixüygixy pi'c'ung

¹ Jesús yma'xung'ajty ma tüg cajp huüdi yxii Belén, jim ma Judea ñaaxjot, huin'it co anajty Herodes yrey'aty ma yi jimbü naaxjot. Chi huin'it yja'ty ma Jerusalén cajp nijëjity yëdyictijc huüdi anajty ti choñ ma xii ypidzimy, yi huüdi anajty ajcxy xii madza' ti ni'ixpigüygixy. ² Chi ajcxy yajtiy:

—¿Ma je judíojäy yrey tibi yma'xung'aty? Ti ich ajcxy n'ixi yi ymadza' jim ma xii ypidzimy, e yi ich ajcxy ya miñ nhuindzigihuaangixy.

³ Co je rey Herodes jadu'n midooy, chi ooy ytigüy tajpi maybi müd tüg'óciy cajpjäy jim Jerusalén. ⁴ Huin'it je rey huomujctay tüg'óciy teedytjic huindzindijc huüdi anajty yaj'ixpijcp yi Dios yley, chi yajtiy ma anajty yma'xung'adañ yi Cristo. ⁵ Chi ajcxy y'adzooy:

—Jim Belén ma Judea ñaaxjot, com Dios y'ayucnajtzcaxiibi jadu'n je' cojaay:

⁶ E miich Belén, mabi Judea ñaaxjot, mij'ajtp mgix'ajtp ca'ydi jac huüdi naax jac huüdi cajp, com ma miich chonañ tüg Huindzin huüdi ane' mam yi israeljäy.

⁷ Huin'it Herodes oy yajhuoyii ameech huüdi anajty ti ijxcixy yi madza'. Chi tiybijcy yajxon mina anajty oga'n ti ijxcixy je madza'. ⁸ E huin'it ajcxy quejxy jim Belén. Chi jadu'n nímay:

—Níxcix jim e ocnidü ocyajtugixy je pi'c'anäg; e co anajty ti mbatcixy, miñ miich ajcxy xyajnimáaygixyich jaydëbi ich nicxy nañ jadu'n nhuindzigiyich.

⁹ Co jadu'n rey najtzcaxiyday, chi ajcxy choñ. E je madza' tibi anajty ijxcixy ma xii ypidzimy, chi ajcxy ijxy jayjip je' anajty ñicxy ma je' ajcxy, ixti conü oy je madza' yhuäcixy ma anajty je pi'c'anäg yajpaady. ¹⁰ Co je rey ixpijctijc jadu'n ijxy yi madza', chi ajcxy oy janch jotcuje ñayjihüiyii. ¹¹ Co ajcxy ytijctigüy, chi ajcxy ijxy je pi'c'anäg müd ytaj je María. Chi jada' ajcxy ñaygojtinaydaaci huindzigüy ojadaity ajcxy je pi'c'anäg. Chi ajcxy yaj'ahuach yxuomy aguejtucy abijctucy, chi ajcxy yajpidzimy oori, poom, etz tüg tzoy huüdi yxii mirra. Chi ajcxy moy je pi'c'anäg. ¹² Chi cumäjoty ajcxy nimaayi co ca' huaad yhuimbijtcixy ma Herodes, chi ajcxy ñicxni ma ycajp, jüyöyñaxy ajcxy je Herodes, huingbi tü'aa ajcxy ycuñicx.

Co José etz María yqueegyñicxixy Egipto

¹³ Co je rey ixpijctijc ajcxy yhuimbijttaayñi, chi cumäjoty José ijxy tüg Dios y'ángel, chi ñimaayi:

—Pidig, nicx jim Egipto ñaaxjot müd yi pi'c'anäg etz müd yi ytaj, e jim mhui'mipy ixti cooni ich miich nímahuipy. Com yi Herodes y'ixtahuamy yi yi pi'c'anäg e yaj'ögañ yi'.

¹⁴ Chi huin'it José ypidigy müd tzoñ coodz je pi'c'anäg müd ytaj, chi ajcxy ñicxy jim Egipto. ¹⁵ Jim ajcxy y'ijty ixti cooni oy y'ögy je Herodes. Jada je' jadu'n yajcuydun jadu'n nej Dios anajty ti ymíañ ma yi y'ayucnajtzcaxiibi: “Jim Egipto ich n'ung ti nhuoy.”

Herodes pidacy y'ane'min co huen pi'c'anäg yaj'öctäyüi ajcxy

¹⁶ Co Herodes oy huinmañ yajyöy co ti anajty ooy yhuin'üñyüi je rey ixpijctijc ajcxy co ca' anajty ti ñihuimbidyüi, chi ooy yjot'ambijcy, chi ni'ane'mdüy co huen nicxy jim Belén etz majaty cajp mihuingon Belén, yaj'öctaaygixy tüg'óciy yi pi'c'anäg huüdi mejtz jimijt etz huüdi ca'ni nigooty mejtz jimijt. ¹⁷ E jadu'n jada yajcuyduñ jadu'n nej anajty Dios y'ayucnajtzcaxiibi, je Jeremías, anajty ti cojaay:

18 Jim Ramá yajmıdoy co anajty chachjıy chachyäxy jäy ajcxy; yi Raquel tzachjıyb tzachyaaxp mıd y'ung ajcxy ycıxpı, ca' ajcxy anajty yjotujc'aty mıd co anajty y'ung ti y'öctäy.

19 Co oy y'öcni Herodes huin'it jim Egipto, Dios tüg y'ánel ñayguëxıci cumäyjoty ma José. Chi ñımayı:

20 —Pidıg, mıdnicx yi pi'c'anäg etz yi' ytaj jim ma yi Israel ñaaxjot jadügtecy com ti y'öctaayñi yi huidibi anajty yaj'ögam yi pi'c'anäg.

21 Huin'it José ypidıgy, mıd nicxy yi pi'c'anäg etz yi' ytaj jim ma Israel ñaaxjot. 22 Per co José nejhıy co je Arquelao yi' anajty jim ane'mb jadu'n nej anajty je yteedy Herodes, ooy chıgy nej ñıcxıp jim. E co jadu'n anajty ti ycumäy co ca' jim ñıcxıp, chi ajcxy ñıcxı jim Galilea ñaaxjot. 23 Co jim yjäty, chi jim chinaydacpıjcy ma je cajp huıdı yxı Nazaret. Jadayaabi je' jadu'n tun jajtı jadu'n nej anajty ycojaayıty ma Dios y'ayucnajtzcaxıybi ñıcy co Jesús xı'adıyb Nazareno.

3

Juan el Bautista y'ayuc capxhuäcxy ma tıdz naax it

1 Huin'it tiempo nañ jadu'n Juan je Bautista (huidibi jäy yajnıbejtpı) ymiñ tüg tigıdum ma Judea ñaaxjot capxhuäcx Dios y'ayuc, 2 ymınañ:

—Jothuımbıjtcıx ma Dios com yi Dios y'ane'mın huıgonıñ yi'.

3 Jada Juan yi' je' huidibi je profeta Isaías nigapxy ymınañ:

Jim mıjtıgıdum yajmıdoy tüg ayuc mına'ñ: “Ni'ixıygıxy yi mHuıdzın ytü'aa, ni'ixıygıxy tüg tü'aa tıybi.”

4 Je Juan hue' anajty yhuit'ajtpy iyujc nıbjc (huidibi jäy ytıjpy camello) e hue' anajty yhuıñıp iyujc ac, e yi' anajty yjıcxı'ajtpy mu' etz tıjaty iyujc päg jim tüg tigıduum. 5 Chi choon jim Jerusalén jäy etz tüg'óciy huıdıjaty tzınaayb ma Judea ñaaxjot, nañ jadu'n huıdıjaty tzınaayb ma Jordán mıjnıba', ñıcx ajcxy ma Juan amıdo'ıjtıy yi' y'ayuc. 6 Co anajty ajcxy nigapxtaaygıxy yi ypcy huıdı anajty ti tundıgooygıxy, huin'it anajty ajcxy Juan yajnıbedyıı ma Jordán mıj nıı.

7 Per yi Juan y'ix co may fariseo jäy etz saduceo jäy mıñ anajty ajcxy nıbejtcıxy, chi ajcxy nımay:

—ıMiıch ajcxy, m'ajuugy m'amıgüg ahua'n iyujc! ¿Pın ti xyajni'ixıygıxy nej jėbi huaad mgögueeccıxy yi ayo'n huidibi huıgomb? 8 Yajxon jäy'ajtcıx tıydudägy huen nıguëxıgy co ti mjothuımbıjtcıxy. 9 Ca' jadu'n mdzachmınaangıxy co Abraham xy'ap'adyıı xy'oc'adyıı. İch mııch ajcxy yam ndımnımaayb co Dios ıxtı jėbi yi' yaj'ap'adyıı yaj'oc'adyıı Abraham jada tzaajot ca'ydı mııch ajcxy. 10 Yi jach ni'ixı yi' y'ıjtnı ma quıpy y'ıjx, tüg'óciy quıpy huıdı ca' oy ytım'aty yajpujxp yi', e chi jada' yajnögy jıınjoty. 11 İch, janch yajnıbejtpıch mıd nıı, yi' yi' jadu'n nej tüg ıxpejt co ti mjothuımbıjtcıxy; per jacmıamb tzojc huıdı ajcxy xyajnıbedıpy mıd Dios yjıhuı'ñ etz mıd jıın. Je' ymıd mıc'ajtn etz cötujcın, nıgı ca'ydı İch, ni xycapaadyıch nicxy ycıg nyajtecyjendügyıch. 12 Ymıd mıc'ajtn pıjchuaäcxamy yi jäy jadu'n nej jäy huımbojy moc, abıcy pıdäga'ñ actz, abıcy moc pajc. Yujcpıga'ñ moc pajc ma tze'x nıngıhua'ñ yi moc actz moc jaam jıınjoty ma je jıın huıdıbi nıcamınaaxıı ycapıch.

Co Jesús nıbejty

13 Huin'it Jesús choon ma Galilea ñaaxjot, chi ñıcxı ma Jordán mıj nıı ma anajty Juan yjäy yajnıbety, nıbedam anajty yi' nañ jadu'n. 14 Juan ca'jadım'a'ıxıy, chi nımay Jesús:

—İch mııch ıxyıpy xyajnıbejtpıch, ¿e mııch mımb ma İchı?

15 Chi Jesús y'adzooy:

—Jadachambı oc'a'ıxı jadu'n, com ooy yi' ycopıtyıty co nguydundayım tüg'óciy tııbi Dios xyaj'ane'mım.

Huin'it Juan a'ixi'y chi yajni'bejty Jesús. ¹⁶ Co Jesús ñi'bejttay, chi Jesús ijxy Dios yjihui'ñ ñigidägyii jadu'n nej tüg pi'cmuuxy. ¹⁷ E huin'it yajmido'y tzajpcíxy tüg ayuc ymína'ñ:
—Jada je' ñich n'ung'ajtypich huídibi ooy ndzocyich huídibi ooy m'iid jotcuje nayjihui'yijich.

4

Je mujcu' tuñ ijxta'ni Jesús

¹ Chi Dios yjihui'ñ yajnicxy Jesús m'ijtig'íduum jaydēbi je ca'oybi yjot'ixi'yb yhuinma'ñ'ixi'yb. ² Jim y'ijty jaygay huixchigui'px xii huixchigui'px tzuum, e huin'itni ooy yiböccodyii. ³ Chi je ca'oybi nimijhuägy Jesús ocjot'ixa'ñ oc-huinma'ñ'ixa'ñ, chi nimay:

⁴—Pen Dios miich xy'ung'ajtp, nima' jada tzaa huen naygojyii tzajcaagy.

Chi Jesús y'adzooy:

—Jaybety jadu'n ymiñ ma Dios ñecy: “Ca'p jäy tzajcaagyti'ajty nitzinähui'py, nañ jadu'n nitzinähui'py tüg'óciy y' ayuc huídibi Dios ycapxp.”

⁵ Chi je ca'oybi m'iidnicxy Jesús jim Jerusalén, chi ym'iidpejty tzajptijc cöduum. ⁶ Chi nimay:

—Pen janch co miich Dios xy'ung'adyii, cödi'pnax jii'by naaxcíxy, ca' y' nej mjadipy com jaybety jadu'n ymiñ co jadu'n ymína'ñ:

Dios yquexyp y' y'ángeles jigix xycuend'adipy xyhuídzi'py m'iid yci', ca'ydi ninej mgönepy ma tzaagop.

⁷ Chi Jesús y'adzooy:

—Nañ jadu'n ymiñ jaybety: “Ca' m'jot'ixipy mhuinma'ñ'ixipy y' mhuindzin Dios.”

⁸ Jadüg'oc je ca'oybi ym'iid'ajty Jesús ma tüg copnicx janch cijxpi, e jim yajni'ixi'yday tüg'óciy naax cajp co ooy m'iidity oy'ajtin etz mic'ajt. ⁹ E chi nimay:

—Iich jada miich nmoydähui'py tüg'óciy, pen miich cojxtina' xyhuindzig'iyich xy'ojadatyich.

¹⁰ Huin'it Jesús y'adzooy:

—Huinhuäctucich miich mujcu', com jadu'n yjaybetyity: “Tüg'pajc y' mhuindzin Dios y' mhuindzig'ihui'py m'ojadadipy.”

¹¹ Huin'it je ca'oybi huinhuäctucy Jesús, chi Jesús ñimiini ángeles ycuend'ajti.

Jesús ytung yajtzondacy jim Galilea

¹² Co Jesús nejhu'y co Juan ti anajty yajpidägy pujxtigoty, chi yhuimbijtni jadüg'oc jim Galilea. ¹³ E ni ca' yhui'mi'y jim Nazaret, chi ñicxy jim Capernaum, jim ma Zabulón etz Neftalí y'it. ¹⁴ Jada je' jadu'n tuni jajti jadu'n nej Dios y'ayucnajtzcapxi'ybi Isaías anajty ti cojaay:

¹⁵ Zabulón etz Neftalí ñaaxjot. Je tü'aa huídibi mejypa' huídibi a'oy'amy ma Jordán mij ni. Jim Galileajäy chinäy huídibi ca' yjudiojäyity.

¹⁶ Yi jäy ajcxy huídibi jim tzinaayb agootztuuby ijxpaty ajcxy tüg t'icxin jajin. Je huídijaty anajty ajcxy tzinaayb ma je jibicpi y'aniciy, chi ajcxy ycodicxi'y tugi t'icxin jajin.

¹⁷ Ixti huin'it Jesús yti'gy ayuccapxhuäcxp ymínañ:

—Jothuimbijtcix, yajmingix yajmejtzcix m'jot mhuinma'ñ ma Dios, com y' Dios y'ane'min huingonip y'.

Jesús nimay nimidaax je acxmajtzpi: “Pajamgich”

¹⁸ Jesús tüyöyb anajty ma Galilea mejypa', co ijxpaty metz yéydijc ac tüg quéxpi, hue' anajty y' je' je Simón, huídibi nañ jadu'n yxii Pedro, e je jadügpi hue' je' anajty Andrés. Acxmadzi anajty ajcxy y' ytung'ajty e jim anajty ajcxy y' tzachnigöhuich y'acxmadzi'ñ.

¹⁹ Chi Jesús nimay ajcxy:

—Pajamgich, ñich miich ajcxy nyajni'ixi'huipy nej jäy myaj'ixpigipy je Dios yti'y'ajt.

²⁰ Huin'it je' ajcxy ixmajtztay tüg'óciy y' y'acxtaay, chi ajcxy panicxy Jesús.

²¹ Hueeni jac'amijci'm Jesús ijxy janimetz Zebedeo ajcxy ymang, je Jacobo etz Juan. Jim anajty yi' ajcxy ma tüg barco müd yteedy, yi' anajty ajcxy yi' jim chach'adagiib yi huidibi mi'acxmajtzcixy. Chi ajcxy Jesús yhuoohi. ²² E huin'it ajcxy ixmajztay je barco etz yi' yteedy, chi ajcxy panicy Jesús.

Jesús yaj'ixpiy mayjäy

²³ Huidijtay Jesús ma tüg'óciy Galilea ñaaxjot, yaj'ixpiy jäy majaty je naymujctac cajp cajp. Capxhuäcxy yi' Dios ytiy'ajt etz nañ jadu'n pa'mjäy yajtzocy huen ytimyhuidipá'mity anajty ajcxy ymüid. ²⁴ Chi Jesús oy yajnejhuüyñi ma tüg'óciy yi' Siria ñaaxjot, e chi ajcxy müidmiñ ma Jesús tüg'óciy huidijaty anajty ajcxy ca'oybi müid, etz huidijaty anajty ajcxy cixuxy tecyxuxy, chi Jesús yajtzoocy. ²⁵ Huin'it Jesús ypanicxi mayjäy huidijaty anajty ajcxy tzinaayb ma Galilea ñaaxjot etz yi' Decapolis jäy, nañ jadu'n Jerusalén jäy etz huidijaty tzinaayb ma Judea ñaaxjot, nañ jadu'n huidijaty anajty ajcxy tzinaayb a'oy'amy ma Jordán mij nii.

5

Je tiy'ajt huidibi Jesús ycapx ma tüg cögop

¹ Co Jesús ijxy tüg'óciy je mayjäy, chi nicxy ma tüg copnicx, e chi jim y'ixtacy. E huin'it je' y'ixpijcpidijc ajcxy yjübigüy. ² Chi Jesús ytigüy yaj'ixpijcp ymíañ jadu'n:

Je pinjaty ajcxy jotcujc

³ —Janch jotcujc je jäy ajcxy huidibi nejhuüyb co yajmayajtpy Dios y'oy'ajt, yi' ajcxy paatip Dios y'ane'min.

⁴ Janch jotcujc je jäy ajcxy huidi yajpatp taj may, yi' ajcxy yajmöhuam jotcujc'ajtin.

⁵ Janch jotcujc je jäy ajcxy huidibi yung naxpy jäy'ajtp, yi' ajcxy padaamb tüg'óciy je huidi Dios ti yaj'ahuanüyü.

⁶ Janch jotcujc je jäy ajcxy huidibi cuydunamb huidibi Dios chojcpy, Dios yi' ajcxy pubedüb.

⁷ Janch jotcujc je jäy ajcxy huidibi pa'ayoob huenyimpinjäyity, Dios nañ jadu'n ajcxy pa'ayohüüb.

⁸ Janch jotcujc je jäy ajcxy huidibi huädz yjot yhuinma'ñ, yi' ajcxy y'ixipy yi' Dios.

⁹ Janch jotcujc je jäy ajcxy huidibi ca' ti tzip tzojccixy, com yi' ajcxy Dios ung'adüb.

¹⁰ Janch jotcujc je jäy ajcxy huidibi yajnixiicp yajnigapxp müid je Dios ytiy'ajt ycipi. Yi' ajcxy idamb ma Dios y'ane'min.

¹¹ Janch jotcujc müich ajcxy co jäy jibic xytungixy co nigoob xyñihuambejtcixy etz capxcixy huidijaty ca' ytiy'ajtiy müid üch ycipi. ¹² Xondaaccix jotcuj'ajtcix co mbadaangixy tüg oy'ajtin jüiby tzajpjoty. Nañ jadu'n ajcxy ixhuidijty pahuidijty je Dios y'ayucnajtzcapxiybi jecy'ajty.

Müich ajcxy je tudägyjäy ya naaxhuiñ

¹³ Jadu'n nej caan ca' yajpüch je tzüch jüicxy tim jadu'n müich ajcxy myajpaady ya naaxhuiñ. Pen je caan ca' müid ti xücx'ajtin, ¿nej jëbi nyajtuunim? Ca' y'oc'oyyajtunüy, chi yajnajtziidüyñi, chi yhuaani tembejt hua'cejt.

¹⁴ Oc'ix tüg je cajp jim copcix, ca' jëbi mhuijtzüdzim mgoyüdzim. ¹⁵ Co tüg jin nyajtoyicim, ca' huaad tu'tz ngöjupim. Hue janchtiy co nyajtiicxim cix, huin'it jëbi xy-codicxtaayim jadu'n nej ajt nyajpaatim ma tijc. ¹⁶ Nañ jadu'n müich ajcxy mdzinaaygixy tudägy ma ajcxy je mayjäy jaydëbi ajcxy ixipy je oybi huidi müich ajcxy mdumyb. Huin'it ajcxy ojadadipy je mDios teedy huidibi jüiby tzajpjoty.

Jesús yaj'ixpiy nej yi' yi' Dios ycötujcin

¹⁷ Ca' mhuinmay co üch ti nmiñich ya co nbügaanich je Dios y'ayuc je' huidibi anajty ti jaay Moisés etz je profetitjc. Ca' üch nyajmijaagixa'ñ je cötujcin, üch ti nmiñich co

nguyduna'ñich jadu'n nej ymiñ jaaybety. ¹⁸ Janch tiy'ajt jadu'n nej nimaaygixy, je huídibi mimb jaaybety jadu'n tundähuam jajtähuam. Ni tüg letra oy mabaad ymúdzity nicxy ycayajcuyduñ. ¹⁹ Je jäy huídibi ca' nimidooy je Dios ytiy'ajt oy yjadim mutzjaty etz yaj'ixpicy jäy jadu'n, je' ajcxy padamb je mutzpi tigiydac ma Dios y'ane'min. Paady je jäy huídibi yaj'ixpijcp jadu'n nej tiy'ajt ymina'ñ, e paduñ jadu'n nej yaj'ixpicy, je' ajcxy padamb tüg je mijpi tigiydac ma Dios y'ane'min. ²⁰ Hich miich ajcxy nimaayb, pen ca' miich ajcxy jac'oy mdungixy ca'ydi fariseos etz escribas ajcxy, ca' nimina mdigihuipy ma Dios y'ane'min.

Jesús yaj'ixpicy co ca'p huaad pin yjotmädy

²¹ Miich ajcxy mnejhuipygixy jadu'n nej yi m'ap mdeedy ajcxy ayuc yajhui'my: “Ca' jäy myaj'ögip; e pin anajty jäy yaj'öcp ypaadip je tzaachypi.” ²² Hich miich ajcxy jadu'n nimaayb pinjaty ymigügtijc mijotma'tp, je' Dios tiydunaanipy; e pin ymigüg xidijp tzuudijp, yajtiydunipy je' ma Dios tiydundac; e pin ymigüg tzuudijp locidijp ayo'ndumb, je' y'ity co ñicxip ayoodactuuby.

²³ Pen myajnicxpy miich mhuindzigi'ñ ma Dios ytiyc, e pen jim jäy metzgodyii co mmigüg ti xyhuin'innaxy ti xyhuincapxynaxy yinjaty hueenjaty, ²⁴ jim myajhui'm je huindzigi'ñ ma je altar yhuinduu, e nicx jayijp nayyaj'oyihuñ mäd je migüg, huin'it mhuimbedip e chimgiyecy je mhuindzigi'ñ.

²⁵ Tzojc naygapxjotcidägi mäd je midzip, pen yam mäd tüyöy ni'am tü'am, ca' jecyity co je midzip xyciyegip ma juez, e je juez xyciyegip ma je policia, e je' nicxy xpidägy pujxtigoty. ²⁶ Janch tiy'ajt hich miich nimäy co ca' jilby mbidzimipy ixti cooni mgüejtähuipy je meeñ.

Jesús yaj'ixpicy co ca'p ndundigóoyimipy mäd huingbi töxyjäy

²⁷ Miich ajcxy mnejhuipyb co jecyip tiy'ajt ymina'ñ: “Ca' mmidundigoyipy huingbi töxyjäy.” ²⁸ Hich miich ajcxy nimaayb, pen ji pin huindixy tüg töxyjäy, e jot'adiyb nejjaty, ti je' anajty ñitundigooyñi ma yjot yhuinma'ñ.

²⁹ Pen yi mhuin a'oy'amybi xyajtundigoyamb tim yajpidzim; jac'oy co tüg'idu'mbi mhuin ytigoyipy ca'ydi co cixyca'px mnicxipy jijnjoty. ³⁰ E pen yi mgi' a'oy'amybi xyajtundigoyamb tim ixpux etz najtzjibibi' jiguem; jac'oy co tüg mgi' ytigoyipy ca'ydi co mminicxipy metz mgi' jijnjoty.

Jesús yaj'ixpicy co jäy ca'p huaad ytöxyijc ixmach mañ'ajtingixy

³¹ Nañ jadu'n ymiñ jaaybety: “Pin ixmajtzp ytöxyijc, huen möhuipy tüg necy ti ycixpi co ñay'ixmájtzigixy.” ³² Hich miich ajcxy nimaayb, pen ji pin ixmach ytöxyijc, e ca' anajty ti ytundigooy mäd huingbi yëydijc, je yëydijc anajty nigiydeyiyb ytöxyijc co anajty ytundigooy mäd huingbi yëydijc; pin yëydijc pijcp mäd je töxyjäy huídibi anajty ti yaj'ixmach, pocytumyib je' anajty.

Jesús yaj'ixpicy nej nguyduunim tibi n'ahuaniiyim ma Dios yhuinduu

³³ Miich ajcxy mnejhuipyb nej jecy'ajty m'aptijc mdeedytjic ajcxy yajnimay: “Ca' nigo ti m'ahuanihuipy, mguydunipy jadu'n nej anajty ti mmina'ñ.” ³⁴⁻³⁶ Per hich miich ajcxy nimaayb: ni mga'ibaadip ni mgacapxpaadip; ni mgamina'ñip; “y'ijxpy tzajpjoty,” com yi' Dios chinaydac. E ni mgamina'ñip, “y'ijxpy naaxhuiñybi,” com Dios yajpatp oy ytimyaaajity. E ni mgamina'ñip; “y'ijxpy Jerusalén,” com jim je' Dios chajptijc; ni mga'ibaadip ni mgacapxpaadip mgohuajc, com ca' mjaty myaj'ahuimbity poob o tzixy tüg cöhuay. ³⁷ Hue' janchtiy, tiydudägy minaangixy: “oy” o “ca'.” E pen miich ajcxy anaxy jaccapxp jadu'n mujcu' y'ayuc je' anajty ajcxy mgapxpy.

Jesús yaj'ixpicy co ca'p huaad jibic nyajhuimbijtim

³⁸ Miich ajcxy mnejhuuyb co jecy'ajty yajmínañ: “Pen ji jäy mhuiin xyajpidzimi, nañ tim jadu'n yhuiin myajpidzimipy; pen ji migüg mdütz xyajpidzimi, nañ jadu'n myaj'ahuimbidity.” ³⁹ Per ich miich ajcxy nimaayb: Ca' myaj'ahuimbidity jibicpi ma migügtijc; pen ji pin xycoxy ma mhuiñyijp tüg adu'mbi, jac tim mo' jadüg adu'm'amybi. ⁴⁰ Pen ji pin xyxiy e xypigaani yi mnijen, najtz'ixi', huen xyajnicxi nañ jadu'n mjocx huit. ⁴¹ Pen ji pin adzip tziy xyajminicxañ tüg kilómetro jiguemity, yajnicx jac tim jadüg kilómetro. ⁴² Pen tijaty xypijctzoohui, mo'. E pen ji pin xyminuucxañ, yajnuucx.

Co ndzojcm nmidzip

⁴³ Jadu'n ymiñ jaaybety nej jecyip Moisés yjay: “Migüg'adii yi' huidibi xymigüg'ajtp, e midzip'adii yi' huidibi xymidzip'ajtp.” ⁴⁴ Ich miich ajcxy nimaayb: Tzoc yi' huidibi ajcxy xymidzip'ajtp, etz mibijctzoohui ma Dios huen y'oy'ajtin paady yi' huidibi xyñigapx xyni'ojuyb, e nañ mi'oyjäy'at yi' huidibi xyca'ixamb. ⁴⁵ Huin'it miich ajcxy xy'ung'adiiby yi' Dios tzajpjtopyi' huidibi yxi' yajticxp yajjajp ma oyjäydijc etz ma jibicjäydijc, nañ jadu'n yajtüy ma jibicjäydijc etz ma oyjäydijc. ⁴⁶ Pen miich ajcxy mdzojcpy je huidibi xychojcp, çti jäygidaacin yi' m'ocpadamyb? Nañ jadu'n yi' ajcxy yja'idützp yi' pocyjäydijc etz yi' yajcogüejtpidijc. ⁴⁷ Pen miich ajcxy mgapxpocxyp yi' mjugymigüg, çti oybi yi'? Nañ jadu'n ajcxy yi' yja'idützp yi' huidibi ajcxy ca' Dios nejhuuygixy. ⁴⁸ Jäy'ajtcix tudägy jadu'n nej ajcxy yi' mdeedy tzajpjtopyi' ytudägy.

6

Jesús yaj'ixpicy co nduunim oy yjäy'ajtin

¹ Ca' mdungixy je oybi ma jäy y'ixy yhuindicxy müid co mdzachyajhuindicxaangixy co mdungixy oybi. Pen jadu'n m'idützcixy mDios Teedy huidi jiiyby tzajpjtoty tzinaayb, ca' ajcxy xymöhuañ je oy'ajtin. ² Paady co mbubedipy mmigüg, je ayoobi jäy huidi yajmayajtpy tijaty, ca' huaad mnigapxy mnimiydägy o mnaygömayii co anajty ti mmöy tijaty. Yi' jadu'n idützp je jäy huidi mij cix nayjihuiyip huidi anidaacp co huen jäy y'ixyüi mijpidägyüi co anajty jadu'n y'idich. Janch ich miich ajcxy jadu'n nimaaygix co yi' ti patcixy je oy'ajtin. ³ Co miich mmöhuiipy mmigüg tijaty yajmayajtpy, hue' janchtiy mdunipy ca' myajnejhuuiipy huidi müid mnaymigüg'adyüi. ⁴ E co miich amoñ m'idipy, mDios Teedy huidi iixp co amoñ tijaty mduñ, je' xymöhuamb tüg oy'ajtin mayjäyduum.

Jesús yaj'ixpicy nej Dios mmibijctzoohuim

⁵ Co miich ajcxy Dios mmibijctzoy, ca' jadu'n m'idützcixy jadu'n nej je jäy huidibi capxtacp ma Dios huin aguy ahuac aguy. Yi' ajcxy capxtacp ma Dios huactina' jiiyby tzajptigoty jaydebi jäy y'ixuyb etz ymijpidägyuyb. Ich jeyi jadu'n nimaayb, co jadu'n oy'ajtin'adiiby. ⁶ E co miich Dios mmibijctzoy, nicx tigoty etz m'agihuiipy je mdijc aguu. Huin'it Dios mibijctzou. E je Dios y'ijxpy ymidooyb co jadu'n mmibijctzoy, e je' je m'oy'ajtin xymöhuiipy mayjäyduum.

⁷ Com Dios mmibijctzoy, ca' m'agapxiyo'cip je huidi anajty ti m'occapxi, jadu'n nej ajcxy y'idützcixy huidi ca' nejhuuygixy Dios ytiy'ajt. Yi' ajcxy huinmañypidägy co müid ajcxy ymay'ayuc huin'it ajcxy ymidoohuiyb. ⁸ Ca' jadu'n m'idützcixy jadu'n nej je' ajcxy; mDios ñejhuuyb ti miich ajcxy myajmayajtpy ma anajty ca'ni mbijctzooyüi. ⁹ E jadu'n miich ajcxy Dios mibijctzohuiipy, jadu'n minañip:

Dios Teedy, miich huidibi tzajpjtoty tzinaayb; huindzigy miich mxii y'ity.

¹⁰ Huen miñ ya miich yi' m'ane'min. Huen mdzojcin yajcuyduñ ma je jäy yjot yhuinmañ jadu'n nej yajcuyduñ jiiyby tzajpjtoty.

¹¹ Mooygich ajcxy ngaayin n'uucin jabom jabom.

¹² Méecxibich ajcxy nbocy ngaydey huidibi ich ajcxy ndundigooyb, jadu'n nej ich ajcxy meecxuyich huidibi ajcxy xymidundigooybich.

¹³ Ca' m'a'ixi'y co ñch ajcxy nhuinma'ñ tigoypich. Yajnihuaatzcich ajcxy ma yi jibicpi. Co miich yi' mje' je cõtujcin, je mic'ajtin etz je oy'ajtin huinixi huinitiempo. Amén.

¹⁴ Pen miich ajcxy mhuinmeecxyp je huidibi xymidundigooygixp, je mDios Teedy huidibi tzajpjoty je' nañ jadu'n xyhuinmeecxip miich ajcxy mbocy. ¹⁵ E pen miich ajcxy ca' pin jäy mhuinmeecxy nej xymidundigooygixy, nañ jadu'n mDios ca' xyhuinmeecxip ajcxy ma ti mdundigooygixy.

Jesús yaj'ixpicy nej huaad n'ijtim jaygaay

¹⁶ Com ajcxy m'ida'nip jaygaay jay'ügy (mina Dios mmibijctzoogixy), ca' mnaybidáaccigixy tajy may, jadu'n nej ajcxy iditczixy yi' huidibi ajcxy minamb co Dios mibijccixy e ca' yjanchity. Yi' ajcxy yajtigajchpy yhuiñyijp jigix jäy ajcxy oc'ixiyb co jaygaay jay'ügy y'ijtcixy; jëyi jadu'n oy'ajt'adiyb. ¹⁷ Miich ajcxy co m'idipy jaygaay jay'ügy jotcuyc naybidägii, caax mgohuajc etz puj mhuin mjijp, ¹⁸ ca'ydi myajniguëxigy mayjäyjoty co m'ity jaygaay jay'ügy, hue' janchtiy myajniguëxig ma je mDeedy huidibi ca' yaj'ixy; e je mDeedy huidibi iixp huidibi miich ajcxy ca' mduñ iixna' quëxna' yi' xymöhuipy oy'ajtin mayjäyduum.

Je jugy'ajtin tzajpjoty

¹⁹ Ca' nigi m'adzocy huidibi ya naaxhuiñ, je' co ya huindigooyb oy ytimtijity huidibi yi huech yajhuindigooyb, huidibi tougaayip etz ma je meetzpi ajcxy meetzcixy pigiccixy tijaty. ²⁰ Je' miich nijot'ajtcixy je' oy'ajt huidibi miich ajcxy Dios xymöhuamb jilby tzajpjoty ma ca' huech yajhuindigooy ni ti, e nañ ni ycatougaayii ni ti, etz ma je meetzpi ca' ajcxy meetzcixy pigiccixy tijaty. ²¹ Ma miich ajcxy midity je oy'ajt nañ jilby ajcxy mjot mhuinma'ñ pidäg.

Yi mhuin jadu'n yi' nej tüg tücxin

²² Yi mhuiin yi' yi' jadu'nip nej tüg tücxin jajin ma mninïcx, e paady pen ca' miich yi' mhuiin xyajtundigoy, tüg'óciy mjot mhuinma'ñ huadz yi'. ²³ Pen miich mhuiin xyajtundigoyb nañ jadu'n mjot mhuinma'ñ huidi miich mid ca' y'oyity, jadu'n yi' nej coodzpi jac tim nigi ca' y'oyity ca'ydi je coodzpi!

Dios etz je comeñ'ajtin

²⁴ Ni tüg pin ca' huaad mid tuñ metz huindzin com mijotma'ti tüg je', e jadügp chogipy; o ixtijipy tüg e jadüg ymigüg'adiyb. Nañ jadu'n ca' huaad miich ajcxy metz m'ojadajtcixy, Dios etz je meeñ.

Dios ycuend'ajtpy yi' yjäy

²⁵ Paady ñch miich ajcxy nimaaygixy: Ca' mdzachhuinmaaygixy ti ajcxy mnitzinähuiipy, ti ajcxy mgayipy m'ügipy o ti ajcxy mhuit'adiyb mducky'adiyb. MDios yi' ti xymooygixy je mjogy'ajtin, e paady ycixpi yi' nejhuüyb ti ajcxy myajmayajtpy. ²⁶ Oc'ix miich ajcxy yi' joon huidi queec-huidijtp. Yi' ajcxy ycaniipcixy ycatungixy, nañ ni ca' yi' ajcxy yujcpijccixy ma tze'x. Miich ajcxy mDios Teedy huidi tzajpjoty tzinaayb, je' moydaayb huidi ajcxy yi' yjicxyp. E miich ajcxy mjactzoobatp ca'ydi yi' joon. ²⁷ ¿Pin ji ma miich ajcxy, ooy mij jahuinmay, jëbi tüg nuux yjacyeegy?

²⁸ ¿E na'amy co miich ajcxy mdzachnidajy mdzachnimay mid je mhuit mducky ycixpi? Oc'ix miich ajcxy nej yoñ tüg je pijy huidi yajpatp tun nigap. Ni yi' ycatuñ ni piidy. ²⁹ Per janch tiy'ajt jadu'n nej nimaaygixy, ni je comeñyjäy huidi yxi rey Solomón, ni ycaquipxiy je' yxojxin mid je pijy. ³⁰ E pen mDios xojxpy jadu'n je aay ujtz cham etz tzojcy ytitztäy ñicxtäy, jac nigi miich ajcxy Dios xymöhua'ñ huidibi myajmayajtpy, miich ajcxy huidibi hueeni mmibijcin. ³¹ Paady ca' nigoobi mdzachhuinmaaygixy ma ajcxy mbaadip ti mgayipy m'ügipy o ti mhuit'adiyb mducky'adiyb. ³² Yi' jäy ajcxy huidibi ca' mibicy yi' Dios oy tzach nijot'ajtcixy jadayaabi, per miich mDeedy huidibi tzajpjoty je'

ñejhuüyb ti miich ajcxy myajmayjajtpy. ³³ E pen miich ajcxy mbidacpy Dios jayijp ma mjot mhuinma'ñ etz mguydun ajcxy yi' y'ane'min, huin'it miich ajcxy Dios xymöhuipy tijaty myajmayjajtpy. ³⁴ Paady ca' mhuinmaaygixy cham müd je jabom cixpi, je' co je jabombi ymimiñ je tajin mayin. Tzoc mijotcuje'ajtim je tajin mayin huidi cham nminajx nyajnajxim.

7

Ca' mbocy ixxyi mmigüg

¹ Ca' m'ix'ixpy mba'ixpy ti mmigügtijc ytundigooyb, jigix ca' Dios xytidyunipy chaachytunipy. ² Pen miich m'ix'ixpy mba'ixpy mmigügtijc ti ytundigooyb, nañ jadu'n miich Dios xytidyunipy xychaachytunipy, e yi quipxi'ñ huidibi miich mhuamyb quipxi'ñ, nañ yi' Dios yajtunamyb ma miich. ³ ¿Nej co miich m'ixy huidibi mmigüg ytumyb e hueeni ytundigooyb, e ca' mnay'ixyii huidibi miich jac mij mdundigooybi? ⁴ ¿Nej jëbi mmigüg m'ocnimäy: “Nbubedamybich miich ca'ydi mjacpocytuñ”, e miich yam m'ocmüdpj jac mij pocy? ⁵ Miich ci'm mnayhuin'ñnyii. Nicx jayijp mbocy mgaydey ocyajhuädz, huin'it jëbi mbubety je mmigüg.

⁶ Ca' mmöy yi jibicjäydijc huidibi Dios yjè'ajty co nicx camij'ix camijpidaaccixy; ni mgayegipy Dios y'ayuc ytiy'ajt ma yi jäy ajcxy huidibi ca' tzojccixy Dios y'ayuc ytiy'ajt.

Nbijctzoohuim n'amidoohuim Dios

⁷ Mibijctzougix yi Dios e yi' xymöhuipy ajcxy; ixtaaygix, huin'it mbáatcixipy; cogapxiygix e ahuädzip ajcxy mdijc aguu. ⁸ Com pin tijaty pijctzoob ypaatyp yi'; e pin tijaty ixtaayb ypaatyp yi'; e pin cogapxiyb ma tijc aguu, yaj'ahuaatzip ytiyc aguu.

⁹ ¿Nej ji jada' miich ajcxy nidügti co m'ung pijctzoohuipy tzajcaagy nej mmöhuipy tüg tzaaji? ¹⁰ ¿O pen ypijctzooby tüg acx nej mmöhuipy tüg tzañi? ¹¹ Miich ajcxy oy mjibicjäyity e mjaajtpy ajcxy nej m'ung m'anäg mmöhuipy je oybi. ¡Nigi Dios Teedy tzajpjotypi möhua'ñ je oybi pinjaty pijctzoob!

¹² Tzinaaygix tydudägy müd je mmigügtijc, pen miich ajcxy mdzojcpy co je mmigügtijc chinähuipy tudägy müd miich ajcxy; com jadu'n y'ane'my Moisés yley etz yi' Dios y'ayuc najtzcaxiyyb ajcxy ñecy.

Je xützpi tü'aa

¹³ Tigxiygix ma yi tigiyiydac xützpi: yi tigiyiydac etz yi tü'aa huidibi ja'tp ca'oydactuuby mij huin yi', e may jäy ajcxy oy ji ytigiyiygixy. ¹⁴ E janch je tigiyiydac etz yi tü'aa huidibi ja'tp ma je jugy'ajtin huinixibi, xüdz je' etz tzip naxiyni; janch tim hueeni jäy huidibi ji nicxiyb.

Yi jäy yhuinma'ñ müd ñiguëxigy pen oyyäy o pen ca'

¹⁵ Nayguend'ajtigix müd yi jäy anijjatypi huidibi ajcxy minamb co Dios ytiy'ajt yaj'ixpijcp, huidibi ajcxy huidijtp janch yung janch naxy ñaybidaaccixy nejhuüy ooy oy huinma'ñ müdity; nigooobi ajcxy jadu'n ñaybidägyii, ymüd ajcxy jibic-huinma'ñ. ¹⁶ Miich ajcxy jëbi m'ixcapy nejaty ajcxy müdity chinaayin yjugy'ajtin; ca' pin caamuxy cha'm tucy ma apy quipy, e nañ jadu'n ca' pin higo tim tucy ma jaam'apy quipy. ¹⁷ Je quipy huidibi ooy y'oyity, oy yi' ytim'aty. Je quipy huidibi ca' y'oyity, ca' yi' oy ytim'aty. ¹⁸ E je oybi quipy ca' huaad ytim'aty jibic. E je quipy huidibi ca' y'oyity ca' ytim'aty oy. ¹⁹ Tüg'óciy je quipy huidi ca' oy ytim'aty, cixy yajpujxp je'. Chi jada' yajnögy. ²⁰ Nañ jadu'n miich ajcxy jëbi mnejhuüy jadu'n nej jäy yjäy'aty co m'ixipy nej chinäy.

Ca' nidüg'óciy jäy ajcxy ytiñhuipy ma Dios

²¹ Ca' nminaanim nidüg'óciy jäy ajcxy ytiñhuipy jüby tzajpjoty huidibi xyñimaaybich: “Huindzin, Huindzin”, jëda'ajty ajcxy tiñhuamb huidibi ycapxymidooyb je Dios chojcín y'ane'min. ²² Mayjäy oy mina'na'ñ huin'it xii huin'it tiempo: “Huindzin, Huindzin”, ti ñich

ajcxy ngapxhuäcxy miich m'ayuc, e miid miich mxii ti ich ajcxy nyajpidzimy je ca'oybi; etz miid miich mxii ti nduñ ich ajcxy mij huinma'ñ. ²³ Huin'it nimahuipy: “Caminaabi miich ajcxy ti nga'ixy'adyii; huinhuäctutcich miich jibic tumbidijc ajcxy.”

Je mejtznajxpi je tiy'ajt cop

²⁴ Nidüg'óciy pinjäy huidibi xymibijcpich etz midooyb jadu'n nej ich n'ane'myich yi' ajcxy quipxyjaty miid je jäy huidibi cohuinma'ñ huidibi ytijc ycojp ma yhuingixity. ²⁵ Co ymicpojtüy etz ycomy je mij ni, ca' ypadyii nigom je tijc, je' co anajty cixy je' ycojyity. ²⁶ Per yi' ajcxy huidibi midoob e ca' cuyduñ huidibi ngapxpich, je' jadu'nip nej tüg jäy huidi janch loci huidi ytijcoj ma pu' jot. ²⁷ Co ymiñ je mic poj tuu, chi ycomy je mij ni. Chi yciday je ytijc; mij ayo'n oy yjajti.

²⁸ Co Jesús ycapxtay ymiydactay, chi je jäy ooy huinmay jadu'n nej anajty ti yaj'ixpicy. ²⁹ Com je' co Jesús anajty yaj'ixpicy nej tüg huidibi cötujcin miid, ca' yjadu'nity nej je escribas ajcxy.

8

Jesús yajtzögy tüg jibic nibützpa'mmiidpi

¹ Co Jesús oy chooni ma je cögop, chi ypagidaci mayjäy. ² Huin'it ñimiini tüg jäy jibic pützpa'mmiidpi. Chi ycojxtinay'ahuüy ma Jesús yhuinduu. Chi minañ:

—Huindzin, pen m'a'ixiyb jëbi xyajtzögyich.

³ Huin'it Jesús nidooñ je jäy. Chi nimay:

—Ndzojcpyich, jëbi mdzögy.

Co Jesús jadu'n nimay je pa'mjäy huin'ity je ypützpa'm oy ytigooy. ⁴ Chi Jesús nimay:

—Ca' pin myajnimäy; nicx janchtiy ma je teedy. Minicx tüg huindzig'iñ huidi Moisés y'ane'my. Huin'it jëbi yi' jäy ajcxy ixipy co ti m'agidägy.

Jesús yajtzögy tüg capitán romano ymang

⁵ Co Jesús yja'ty jim Capernaum huin'it tüg capitán ñimiini e ycohuanüy. ⁶ Chi ñimaayi: —Huindzin, jim ich tüg ndumbi ma ich ndijc huidi tim cöcnaayñip, ca' y'ocyücxni.

⁷ Chi Jesús minañ:

—Ich nicxy nyajtzögy.

⁸ Chi je capitán y'adzooy:

—Huindzin, ca'p ich n'oyjäyity, ca' yhuaadity mdigihuipy ma ich ndijc, jëyi miich nigoo capxy e ti anajty ich ndumbi chögy. ⁹ Ich nañ jadu'n ane'my n'ityich, e nañ nmüidich soldadtijc c'am. Co ich nimäy: “Nicx”, nicxp; e co ich nimäy: “Min”, mimb; e co n'ane'myich je nbödumbich huen tijaty tun, ytumyb.

¹⁰ Co Jesús jadu'n midooy, chi nigoo bi yciyxy ycuejty. Chi ajcxy nimay huidi pahuidijtip:

—Janch tiy'ajt jadu'n nej nimaaygixy, ma Israeljäy ymiñ, ca' jadu'n ti nbaadyich huidi oy mibicy jadu'n nej jadayaabi yëydijc. ¹¹ Ich jadu'n nimaayb co mayjäy oy miinaangixy xipidzimy'amy xicidägy'amy, chi ixtäga'ñ quipxyi miid Abraham, Isaac etz Jacob jiiy ma Dios y'ane'min. ¹² Je judíojäy huidibi ixipy ajcxy jëbi yjatzinäy jiiy tzajpjoty, je' ajcxy nicxamb agootztuuby, jiiy ajcxy yjihuiy yäxipy etz y tätzmúcxipy ytätzqueedipy.

¹³ Huin'it Jesús nimay je capitán:

—Nicx ma mdijc. Jadu'n nej miich xymibicyich, ti ich yam nguyduñ.

Chi je tumbi oy chögy tim huin'it hora.

Jesús yajtzögy Pedro ymüd töxyjäybi

¹⁴ Chi Jesús nicxy ma Pedro ytijc. Chi ixxy je Pedro ymüd co jim cijx'am ycöcnäy miid je toyba'm. ¹⁵ Co Jesús cñixajy huin'it je toyba'm ñajxy. Chi pidigy. Chi mic'amy ni'ixiy je caayin uucin.

Jesús yajtzögy mayba'mjäy

¹⁶ Co oy chu'ñyñi ycoodzyñi huin'it yajmimiñ ma Jesús may je huidi ca'oybi miiid. E miiid yi' y'ayuc yjeda'ajty ypidzimday je ca'oybi, e huin'it tüg'óciy je pa'mjäy chooctay. ¹⁷ Jadayaabi je' ytuni yjajti jigix yajcuyduñ jadu'n nej je profeta Isaías minañ: “Yi' ci'm ajt nyuu nba'm ti xyajtzoctaayim etz yi pijcin ixin ti yajnicxtäy.”

Je pinjaty anajty panicxam Jesús

¹⁸ Co Jesús ijxy janch mayjäy anajty ti yjübigiyii, chi nimay co huen nájxcixy jim'amy mejy ninaxy. ¹⁹ Huin'it ñimiini tüg escriba. Chi nimay:

—Huindzin, nbanicxamybich miich oy janch tim ma'amy ma anajty mnicxy.

²⁰ Chi Jesús y'adzooy:

—Je huaax ymiiid je' ajcxy yjut, e je joon ymiiid je' ajcxy ype'ñ. Per ich, je jäy huidibi tzoon jii by tzajpjoty, ca' nmiiididyich ma nmähuibich ma nbócxibich.

²¹ E jadügpí ydiscípulo yminañ:

—Huindzin, nicx jayijp ndeedyich n'ocyajnaaxtigiyich huin'it nbanicxip.

²² Huin'it Jesús y'adzooy:

—Pamiingich, ixmajtzcix yi öcpi huen ymii'öcpi yajnaaxtigiyii.

Jesús jipcogapxiy je micpoj etz je mejy co anajty ooy ypidigy

²³ Huin'it Jesús oy ybarcotigiyñi. Chi ypadzooni je ydiscípulos ajcxy. ²⁴ E jim anajty ytüyöy mejyhuingixy, huin'it mic poj ñaymibidzimi. Janch mic y'ocpidicni je mejy jigo jigo je barco cayajnidigoy, pero Jesús anajty chachmaab. ²⁵ Huin'it oy ymigapxyii yajmäybidigyii je' ydiscípulos ajcxy. Chi ñimaayi:

—¡Huindzin, ocyajtzoogich ajcxy! ¡Cheeby ich ajt n'ocquiinim!

²⁶ Huin'it Jesús y'adzooy:

—¿Na'amy co mdzachtzigiygixni? ¡Miich ajcxy hueeni miiidity mibijcin!

Huin'it Jesús ypidigy. Chi migapxy je poj etz je mejy. Huin'it je mejy etz je poj yhua'cxijptay. ²⁷ E je' ydiscípulos ajcxy nigoobi y'occix y'occuejtni chachminaangixy:

—¿Pin yëydijc jada jada', co je mejy je poj ti ycapxymidoyii?

Je Gadara jäy ajcxy huidibi anajty ca'oybi miiid

²⁸ Co Jesús yja'ty ma yi ñiba' ma yi Gadara ñaax ycajp, chi metz yëydijc, huidi anajty ca'oybi miiid oy yjipcoyöyiyii anajty ajcxy, ti chooñ ma je öcpi jut. Yi jäy ajcxy ooy janch ahua'n, e ca' anajty huaad jim ni pin ñaxy ma je tü'aa. ²⁹ E co anajty Jesús jim ñaxy huin'it janch ahua'n ymigapxqueeci:

—¿Ti miich mdunamyb miiid ich ajcxy, Jesús, miich Dios y'ung? ¿Nej ti mmiñ jayijp co xychaachtungixich ma ca'ni xi tiempo paady?

³⁰ Jiguem ma anajty ajcxy je' yajpaady jim anajty may'idzim y'ojccixy. ³¹ Chi je ca'oybi yminañ:

—Pen miich xyajpidzim ich ajcxy, xyaj'adigiygixy xyajjottigiygixy yi may'idzim.

³² Chi Jesús ñimay yi' ajcxy:

—Nicxcix.

Huin'it ñihuaatzi je yëydijc je ca'oybi. Chi oy ytigiygixy je ca'oybi ma je idzim. Huin'it je idzim oy ñigöboyictäy. Jiiby ajcxy yjicxtäy.

³³ E je jäy ajcxy huidibi anajty idzim ycuend'ajtp, huin'it ajcxy yqueegy miiid je tzig'iñ. Chi co ajcxy yja'ty cajpjoty, huin'it ajcxy ytigiy miydaacpi jadu'n nej anajty ti ytuñyii ti yjadyii. ³⁴ E huin'it choday je mayjäy ma je cajp. Chi ajcxy ninicxy je Jesús. E co ajcxy ijxpaty, huin'it ajcxy cohuaniiy co huen pidzimni ma je naax je cajp.

9

Jesús yajtzögy tüg jäy cämätpi tecymätpi

1 Chi Jesús ybarcitigüy. Chi ñicxy jim'amy mejyñaxy. Chi oyjäty ma yci'mgajp. 2 E jim yajmimiñ tüg yëydijc huidibi anajty cämät tecymät. Yajciy ymiñ ma'ndzaayjoty. E co Jesús ijxy co ymüd je mibjcin, chi nimay je pa'mjäy:

—Jotcugi' miich, ti je mbocy nhuinmeecxyich.

3 Huin'it nijëjity je escribas ajcxy, je ley yhuindzin, jot'ajti: “Jadayaabi yëydijc capxtigooyb yi' ma Dios co jadu'n ymina'ñ.” 4 Com Jesús ñejhuiy jadu'n nej anajty ajcxy je jäy tzachjot'ajtigixy, chi ajcxy nimay:

—¿Nej co ajcxy jibic mdzachjot'ajtigixy jotjoty huinma'ñyoty? 5 ¿Huidibi ca' chipity, co nminá'ñibich: “Ti yi mbocy nhuinmeecxich”, o co nminá'ñibich: “Pidig etz tüyöy”?

6 Hich ndzojcpyich co miich ajcxy mhujñihuihuip co hich ti ndzooñich tzajpjoty e paady nmüdich je cötujcin ya naaxhuiñ e jëbi nhuinméecxibich pocyjäy ajcxy.

Huin'it Jesús nimay je cämätpi tecymätpi:

—Pidig, huijtzig yi mdögy etz nicxni ma mdijc.

7 Chi je cämätpi tecymätpi ypidigy. Chi ñicxy ma ytijc. 8 E co je mayjäy jadu'n ijxy, huin'it ajcxy ooy jhuiy huinmay. Chi ajcxy ooy ojadaty yi Dios co anajty ti yecy je mic'ajtin ma mayjäy.

Jesús nimay Mateo: “Pajamgich”

9 Co Jesús oy chooni jim, huin'it ijxy tüg yëydijc, yxi Mateo, huidibi anajty iñaayb ma yajcogüejttac. Chi nimay:

—Pajamgich.

Huin'it Mateo ytinaygy. Chi panicxy Jesús.

10 Jadu'n ytuni yjajti co Jesús jim ycaj ma Mateo ytijc, e may nañ jadu'n ymiñ yajcogüejtpidijc etz pocyjäydijc. Chi ajcxy jim tú'ciy y'ixtactay müd Jesús etz müd yi' ydiscípulos. 11 Co je fariseos jadu'n ijxy ajcxy, chi nimay ajcxy je' ydiscípulos:

—¿Na'amy co yi mhuindzin ycaymucy müd je yajcogüejtpidijc je pocyjäydijc?

12 Co Jesús jadu'n midooy huin'it nimay ajcxy:

—Ca' yajmayjaty tzojdumbi huidi ca' ajcxy ypigyi, jëyi huidi ajcxy pijcip. 13 Nicx ixpijccixy nej ymiñ jaaybety ma Dios ñecy: “Hich ndzojcpyich co miich ajcxy müd'adipy je pa'ayo'n, ca'ydi co myajhuindzigy tijaty iyujc.” Ca' hich ti nmiñich ma je jäy ajcxy huidibi ca' pocy müdity. Hich ti nmiñich müd yi pocyjäy ycxpi co huen jothuimbijttaaygixy ma Dios.

Amidoogixy Jesús müd je' ycxpi co jaygay y'ijtcixy

14 Huin'it ajcxy ymiñ Juan ydiscípulos ma Jesús. Chi je ajcxy nimay Jesús:

—¿Na'amy co hich ajcxy etz fariseo ajcxy ayuu'ijtcixy, e yi' ajcxy huidibi xymüdhuidijtp ca' ajcxy ayuu'ijtcixy?

15 Huin'it Jesús y'adzooy:

—¿Nej jëbi yaj'ayuu'aty jäy ajcxy huidi yajpaatpi ma je pijcipi yajnixiñduñyi, pen quipxyi yam yajpaady müd je huidibi pijcp? Minamb je xii je tiempo mina je pijcipi yajtzoniyb, huin'it janchtiy ajcxy jëbi y'ayuu'ajtcixy.

16 Ni pin tuc huit ca' agiyi müd tüg pedas jemyhuit, com nigi je tuc huit ñajtzciñdzüy, chi nigi o'ctiy yjajtni. 17 Ca' pin pidägy vino ni ma tucpi cochac, yciñdzip je', e tüg'óciy anajty ti y'ayoodäy je vino ni müd ñigochac. Pidägipy ajcxy jemy vino ma jemy cochac, chi jadu'n ca' ayoohuipy je vino, ni huindigoyipy je cochac.

Je Jairo ñix, etz je töxyjäy huidibi Jesús y huit nïdoni

18 Ma anajty Jesús jim ycapxy ymiydägy huin'it ymiñ tüg mijjäy. Chi ñaygojxtinay'ahuiy ma Jesús yhuinduu. Chi yminañ:

—Nniñich ti y'ögy. Nicx ma hich ndijc etz mgñixajipy, jugypigipy ya.

¹⁹ Huin'it Jesús ypidígy. Chi ñicxy miid je ydiscípulos ajcxy. ²⁰ Ma anajty ajcxy jim ytüyöy huin'it ymiñ jixci'py'amy tüg töxyjäy huidi yxi ybo' ti mi'ijtiyñi majmetz jimijt. Chi ñidoni Jesús yhuitpa'. Huin'it ñajxy je' ypa'm. ²¹⁻²² Jadu'n anajty ti yjot'adyii: “Oy Jesús jéda'ajty yhuitpa' nnidónibich, ti ñich anajty n'agidäygiçh.” Huin'it Jesús yhuac-huimbijty. Chi huindicxpejty je töxyjäy. Chi nimay:

—Jotcuçj'at miich, ti m'agidägy jigix co xymibicyich.

E tim huin'it hora oychögy je pa'mjäy. ²³ Chi Jesús oy yjäty ma je mijjäy ytijc. Chi ijxy je xuuxpidijc miid je ymigügtijc ajcxy huidi chachyaaxcixy co anajty ti y'ögy je töxy'anäg. ²⁴ Huin'it Jesús nimay ajcxy:

—Queccix ya, yi pi'ctöxy'anäg ca' yi' ti y'ögy. Hue' yi' maab.

Huin'it ajcxy ñigo ñixiicy yajxiicy Jesús. ²⁵ Co anajty je jäy ti ixquejxtäy, chi Jesús ytijctigiiy ma anajty je töxy'anäg huijznäy. Chi majch ma yci'. Chi ypidígy. ²⁶ Chi je jäy oy yajnejhuuydaayñi ma je jimbi naax cajp nej anajty ti ytuñyii ti yjadyii.

Jesús yajtzögy metz jäy huintzpi

²⁷ Ma anajty jim ti choñ huin'it metz jäy huintzpi ypamiini. Chachñimäyii jadu'n:

—iPa'ayoogich ajcxy, miich David y'ap y'oc!

²⁸ Chi Jesús yajpajäty ma anajty ti yjättägy. Co ytigiiy tigoty, chi Jesús yajtiy:

—¿Nej mmibijcpy miich ajcxy co jëbi nyajhuindicxiçcixy?

Huin'it je' ajcxy y'adzooy:

—Mibijcy ñich ajcxy, Huindzin.

²⁹ Huin'it Jesús ñidoñ je jäy ajcxy huintzpi ma yhuiin. Chi nimay ajcxy:

—Jadu'n nej miich ajcxy mmibicy, jadu'n ytunib yjadib.

³⁰ Chi je' ajcxy y'ijxígy. Huin'it Jesús y'ane'min pidacy:

—Ca' huaad pin myajnejhuuygixy.

³¹ Co je' ajcxy ñicxni, chi ajcxy ooy nigapxy nimiydacy co Jesús anajty ti yaj'ijxiciçixy.

Jesús yajtzögy tüg jäy uumbi

³² Co anajty je' jim ti chongixy, huin'it ajcxy mimiñ ma Jesús tüg yëydijc huidibi uum huidibi anajty ca'oybi miid. ³³ E co Jesús yajpidzimy je ca'oybi, chi je mayjäy ooy yciçxy ycuejty ajcxy. Chi ajcxy minaangixy:

—Ni camina jadu'n ycayaj'ixy ya ma jada Israel naax cajp.

³⁴ Per je fariseos jadu'n yminaangixy co Jesús je' miid je ca'oybi ymic'ajt yajpidzimy ca'oybi ma jäy.

Jesús ymiid pa'ayo'n ma mayjäy

³⁵ Jesús jadu'n yhuidijty cajp cajp yaj'ixpiçy majaty tzajptijc. Yajhuingapxiy je jäy Dios y'ayuc. Etz nañ jadu'n yaj'agidacy huen ytim huidi yuu huen ytim huidi pa'mity. ³⁶ Co Jesús jadu'n ijxy je mayjäy, chi oy pa'ayooni co yi' ajcxy ca' miiidity ni pin huidibi jëbi ñajtzcapxiy Dios y'ane'min. Yi' ajcxy jadu'n yajpatp nej cöbixy huidi ca' miiidity cuend'ajtpi. Ca' nejhuuygixy pin y'ane'mip e pin ypanicxip. ³⁷ Huin'it Jesús nimay yi' ydiscípulos ajcxy:

—Ti'y'ajt yi', janch mij je tung e hueeni je tumbidijc. ³⁸ Paady pijctzou miich ajcxy ma Dios co huen quexy tumbidijc ma yi' ytung.

10

Jesús huin'ixy je majmetz ydiscípulos

¹ Huin'it Jesús huoy je nimajmetz discípulos. Chi moy ajcxy cötujcin jëbi huaad yajnihuäch je huidi ca'oybi miid. Etz nañ jadu'n yaj'agidägip huen ytim huidi yuu huen ytim huidi pa'mity.

² Jada je' je nimajmetzp yxi: Simón, huidi nañ jadu'n yajtijp Pedro, etz ymiguëx Andrés; Jacobo etz y'uch Juan, Zebedeo ymang; ³ Felipe, Bartolomé, Tomás, Mateo, je

yajcogüejtpi; Jacobo, Alfeo ymang; Lebeo, huidi nañ jadu'n yajtijp Tadeo; ⁴ Simón, je cananista; e Judas Iscariote, je huidi ycïyejc Jesús agojix.

Jesús quejxy je' ydiscípulos ajcxy ayuccapxhuäcxpi

⁵ Chi Jesús quejxy yi nimajmetzpi, e jadu'n najtzcapxiiy ajcxy:

—Ca' ajcxy mnicxipy ma je naax cajp ma ajcxy je jäy chinäy huídibi ca' ajcxy Israeljäyity. Ni mgatigihuipy ajcxy ma Samaria naax cajp. ⁶ Nigi jac'oy co ajcxy mnicxipy ma je Israeljäy huídibi ca' nejhuïy huídibi ca' paduñ Dios ytiy'ájtín. ⁷ Nicx miich ajcxy capxhuäcx Dios y'ayuc co ti yhuingoni Dios y'ane'mín. ⁸ Yaj'agidaaccixy yuujäy pa'mjäy huídijaty pützpa'm ymíid. Myajjugypijccixy tiibi ögy. Myajnihuädzip huídi ca'oybi ymíid. Ninigoobi miich jada cötujcín ti myajmoogyixy, nañ ninigoobi yejccixy.

⁹ Ca' ni ti meeñ mminicxcixy. ¹⁰ Ca' mbijty mminicxcixy tü'angixpi. Mminicxcixy jeda'ajty yi mhuit huídi míid ma mníicx. Ni mgaminicxip huingbi mgig etz mdajc; com ycopicity co je cajpjäy xyajcáaygixipy xyaj'úuccixipy miich ajcxy.

¹¹ Co anajty mjäty miich ajcxy ma tüg cajp nidíu yajtiú pinjäy jim tudäcyip. Jim ajcxy mhui'mipy ma je' ytijc ixti cooni ajcxy mdzoonip. ¹² Co anajty miich ajcxy mdigiy tigoty huin'it mgapxpcxcixipy je codijc jadu'n nej tzocy. ¹³ E pen je codijc ymíhuaad'ajtpy, yejccixy jim íbocxín capxpooxín. E pen je jäy ca' ytudägyity, ñaadigí'adip huídi anajty ti mgapxcixy. ¹⁴ E pen ca' pin xycöbigaangixy, e ni pin xycamidohuaani ajcxy m'ayuc, pidzimgix jim ma je tijc o ma je cajp. Chi ajcxy mdecy huinnebipy, je' je' je tiy'ajt co ca' miich ajcxy ti pocy míidity. ¹⁵ Janch tiy'ajt jadu'n nej nimaaygixy co anajty je xii tiempo paady ma anajty yajtiyduna'ñ je naaxhuínyjäy, jac nigí yajtzaachytuna'ñ yi' ajcxy ca'ydi yi jäy ajcxy huídibi tzinaayb ma Sodoma cajp etz ma Gomorra cajp.

Ixhuídiytín pahuídiytín

¹⁶ ¡Ocmídoogix! Íich yam miich ajcxy nguejxyp majaty yi jäy huídi jibic-huinma'ñ míid. Jadu'n nipaady nej íich nguexyich cöbixy ma je lobi. Huijy cujc ajcxy mnaypidägiib jadu'n nej tza'ñ, per yung naxy jadu'n nej muuxy. ¹⁷ Mnayguend'adib ajcxy je' co yi jäy ajcxy xyciyegaangixy ma ajcxy migtungmíidpi etz myajhuobaangixy ma je judíojäy ajcxy ñaymujctac, ¹⁸ ixti xyajnicxaangixy ajcxy ma je gobernador etz je reydiyc ajcxy míid íich ycixpi; e jim íich miich ajcxy xyñigapxipy ma je jäy ajcxy yhuinduu, e nañ jadu'n majaty anajty je jäy ajcxy huídibi ca' yjudíojäyity. ¹⁹ Co anajty ajcxy xyajcídigi'y je migtungmíidpi, ca' ajcxy oy mhuinmaayipy nej m'ocnimähuipy. Co anajty paady je tiempo, huin'it íich miich ajcxy myajnimähuipy nej ajcxy mgapxipy. ²⁰ E je ayuc huídibi miich anajty ajcxy mgapxpy, ca' miich anajty je' ajcxy m'ayuc'ájtigixy, je Dios Teedy anajty yjihuí'ñ, je Espíritu Santo, xyajcapxp miich ajcxy.

²¹ Huin'it yi jäy ajcxy ñaygíyegáanigixy miñ xyipy tüg quéxtijc co huen yaj'ögyii. E je ungdeedy ciyega'ñ y'ung; je ung'anäg mibídiga'ñ je ytaj yteedy etz yaj'ócip ajcxy.

²² Tüg'ócíy je jäy ajcxy ca' ajcxy xy'ix'anípy xychoga' nipy míid íich nxii ycixpi. E pin xymibijcpich amumdügot ixti mabaad y'ögy, yi' ajcxy y'alma tzögipy. ²³ E co anajty miich ajcxy jäy xy'ixhuíidity xypahuíidity ma tüg cajp, nicxcix ma huingbi cajp. Janch tiy'ajt jadu'n nej nimaaygixy co ca'ni anajty mgapxhuäcxtäy ayuc tiy'ajt ma tüg'ócíy je Israelcajp co nhuimbidipyich, íich, je jäy huídibi tzoón tzajpjoty.

²⁴ Tüg yaj'ixpijcpí jac nigí mij'ajtín míidity ca'ydi je huídi ixpijcp, e tüg huindzín jac nigí mij'ajtín míidity ca'ydi je' ytumbi. ²⁵ Jéb jotcuyc idípy je discípulo co jadu'n yajpaadipy jadu'n nej yhuindzín, e je tumbi jotcuyc idípy nej yhuindzín. Pen jäy minamb co íich nmíidich ca'oybi, jac nigí ymína'na'ñ co miich ajcxy míidity.

Pin jébi yajtzigíy

²⁶ Ca' ajcxy mdzigíy yi jäy ajcxy. Ca' ji ni ti yüch ity nicx ycaniguëxígy; nañ ni ti ji ycaya-tuñ ayüch ameech nicx ycayajnejhuíy. ²⁷ Huídi íich miich ajcxy ayüch nyajnimäayb,

capxpídzimgix miich yi' mayjäyjoty, e huídi ajcxy midooyb ameech, capxpídzimgix miich yi' mic ma tüg cögor. ²⁸ Ca' ajcxy mdzigihuip je jäy huídib ninícx yaj'öcp etz ca' huaad yi' ajcxy yaj'ögy je alma. Yi' miich ajcxy mdzigíygyxy je Dios huídib pídacp je alma etz je ninícx mijjínjoty.

²⁹ ¿Nej ca' jäy ajcxy toogy metz pí'cjoon míd tügpí pí'cmeeñi? Per ca' ni tüg huaad ycäy naaxhuiñ, pen ca' tzocy je mDios Teedy huídi jüby tzajpjoty. ³⁰ Miich ajcxy mgöhuay ac michoy yi'. ³¹ Paady miich ajcxy ca' mdzigíhuipy, jac nígi miich ajcxy mdzoubaady ca'ydi je joon.

Pínjaty ca'p midzöydu'ñ Jesucristo mayjäyjoty

³² Yi' jäy ajcxy huídi xymibijcpich etz xyñidíy'ajtyich ma jäy yhuinduu, nañ jadu'n íich yi' nidíy'ajtyich ma íich nDeedy huídibi jüby tzajpjoty. ³³ Per je jäy ajcxy huídi íich xycoyützpich ma mayjäy ajcxy yhuinduu, nañ jadu'n yi' ngoyützip ma íich nDeedy yhuinduu huídibi jüby tzajpjoty.

Míd Jesús ycixpi yjijity naymídzíp'adí

³⁴ Ca' miich ajcxy mhuinmay co íich ya tí nmiñich míd co nmöhuaangixy jotcuyc'ajtin ya naaxhuiñ. ³⁵ Íich tí nmiñich co nyajtziptunípyich jäy míd yteedy; töxyjäy míd ytaj etz xecy míd yxecy. ³⁶ E jadu'n miich ajcxy mdzíp'adíyb mgí'mjuugy mgí'mmígü.

³⁷ Yi' jäy ajcxy huídibi tzojcp ytaj yteedy jac nígi ca'ydi íich, ca' yi' ypaadyii co njäy'adíybich; e pín ymang o níix tzojcp nígi ca'ydi íich, ca' ypadyii co njäy'adíybich; ³⁸ e pín ca' yci'mdzojcin y'íjxmajtztäy etz ca' ñaybídágyii ycixjot huiníjot ma íich, ca' mihuaadity nícx njäy'adíybich. ³⁹ Pín yjugy'ajtin najtztzogíyb, yajtigoyípy yi'; e pín yjugy'ajtin tígooyb míd íich ycixpi, ypaadípy jugy'ajtin huiníxií tzajpjoty.

Premio nganar'ajtim

⁴⁰ Pín miich ajcxy xycöbijcp, íich yi' anajty xycöbijcp; e pín íich anajty xycöbijcp, nañ ycöbijcypy anajty je huídibi íich tí xyquejxyich ya naaxhuiñ. ⁴¹ Je huídibi cöbijcp je jäy huídibi Dios y'ayuc capxhuacxíp, je' co yi' ymiñ míd Dios ycixpi, yi' jadu'mbi je oy'ajtin ypaadípy. Nañ jadu'n je huídi cöbijcp je oybí jäy míd co oy yjäyity, yi' jadu'mbi oy'ajtin ypaadípy. ⁴² Je huídi yaj'ucp tüg vaso níi ma huenyimpínjäy míd co xymibicyich, janch íich miich nímaaygixy, ypaadípy oy'ajtin.

11

Juan je Bautista yquexyöybi

¹ E co Jesús anajty tí najtzcaxíydäy je tíyy'ajt ma je nímajmetzpi ydiscípulos ajcxy, chí Jesús nícxxy yaj'íxpíjcp etz ayuccapxhuäcxp majaty cajp huinduy agonbí.

² E Juan je Bautista hue' je' anajty yajpaady pujxtígoty. E co nejhuiy tíjaty míjhuinma'ñ anajty Jesús ytumyb, chí quejxy metz je' ydiscípulos ajcxy ma Jesús yajpaady. ³ Chí Juan ydiscípulos ajcxy y'amídooy Jesús:

—¿Nej miich je' je Cristo huídibi anajty minamb o jébi íich ajcxy huíngbí n'ahuíjxcixy?

⁴ Chí Jesús y'adzooy:

—Níxcxix miich ajcxy nímaaygix yi' Juan, je Bautista, tíjaty miich ajcxy m'íjxpy mmídooyb co ndumybich. ⁵ Miich ajcxy yajmídmíydäg je Juan, jadu'n nej je huíntzpi nyajhuíndícxígyich; je címat tecymät nyajtzoocypich; je huídibi jíbíc níbützpa'm ymíd nyajtzoocpyich; je' ajcxy huídibi cónat nyajmídohuícpich; je öcpi ajcxy nyajjügypíjcpich; etz je ayoobtíj, je huídibi yung naxy yjothuinma'ñ nyajmídmíydacypich Dios y'ayuc. ⁶ Jotcuyc yi' ajcxy pínjaty xymibijcpich amumdügjot etz ca' ní nej yjotmetzci' míd íich.

⁷ Co Juan je Bautista ydiscípulos ajcxy nícxni, chí Jesús ytígíy nímiydaccoty Juan je Bautista ytung ma je mayjäy, chí ymínañ:

—¿Ti miich ajcxy oy m'ixy jim m'ijtig'íduum? ¿Tüg nähuaax huídibi poj xijpi? ⁸ ¿Ti ajcxy oy m'ixy? ¿Ti oy m'ixy, tüg jäy huídibi ooy y'oyxöxyity? ⁹ ¿Ti miich ajcxy oy m'ixy? ¿Nej ti m'ixy tüg Dios y'ayucnajtzcaxxiybi? Janch co ti m'ijxcixy tüg jäy jac mij ca'ydi tüg Dios y'ayucnajtzcaxxiybi. ¹⁰ Je' jada je jäy huídibi Dios nigapxy ma ñecy co Dios jadu'n ym'inañ:

Cham nguexyich ñch nguexyöyp jayijp ma miich. Je' yaj'oy'ihuip je jäy yjot yhuinma'ñ miid ñch ycixpi, tim jadu'n nipaady nej jihuüy jäy tü'aa yaj'oy'iy co rey ymiina'ñ.

¹¹ Co yi jäy ajcxy huídibi ti chinaaygixy ixti chambaad ni pin ti ca' yajpaady mij jadu'n nej Juan je Bautista; per pinjaty ñch xymibijcp, yi' jac mij naxam ma Dios y'ane'my ca'ydi Juan.

¹² Maabi Juan je Bautista ytundig'iy, ixti chamni janch mayjäy amumdügjot ñejhuíhua'ñ Dios y'ayuc, je' co ajcxy ytig'ihua'ñ ma Dios y'ane'my. ¹³ Tüg'óc'iy ajcxy je Dios y'ayucnajtzcaxxiybi etz Moisés ycötujcin ñigapxy ajcxy je ané'min ixti cooni Juan oy ymiñ. ¹⁴ Pen miich ajcxy mibijcpy Moisés ycötujcin etz Dios y'ayucnajtzcaxxiybi ajcxy, Juan je Bautista je' je' je Elías huídibi anajty miinamb. ¹⁵ Pinjaty mido'n miid huen mido'mbigipy ñch n'ayuc.

¹⁶ Jesús yjacm'inañ:

—¿Pin miid n'oc'iytüg'ihuibyich yi jäy huídi ajcxy cham tzinaayb? Tim jadu'n yi' ajcxy nej pi'ctijc huídibi ajcxy iy'iyb ma mayjäy yjuygixy ytooc'ixy, miyaaxcixy midinaaygixy ym'igügtijc: ¹⁷ “Ti njayajxüxyich flauta e ni ca' ti m'ejtzcixy; ti ñch ajcxy öcpi njahuinyäxich, e miich ajcxy ca' ti myäxy.” ¹⁸ Chi Juan, je Bautista, anajty miñ, e je' ca' ycay y'ügy. E miich ajcxy m'inaangixy co Juan ca'oybi ym'idity. Jada pi'c'anäctijc nipaady nej miich ajcxy. ¹⁹ Chi ñch je' je jäy huídibi tzoon tzajpjoty nmiiñich, e caaybich uucpich, e miich ajcxy m'inaangixy: “Ijxcix, cha tüg yëydijc, janch cax janch vino'ucp huídibi migüg'ajtpy yajcuetpidijc etz pocyjäydijc.” Je Dios t'iy'ajt ji je' ñiguëxigy.

Je c'ajp huídibi ca' ycapxymidoogixy

²⁰ Chi Jesús ojcoty je maygajpjäy ma anajty may mijhuinma'ñ ti tuñ, com je mayjäy ca' anajty yjothuimbidaangixy ma Dios. Chi Jesús ym'inañ:

²¹ —¡Ay miich ayoob ajcxy huídibi tzinaayb jim Corazín! ¡Ay miich ayoob ajcxy huídibi tzinaayb jim Betsaida! Co ixypy ñch ti nduñich jecy'ajty je mijhuinma'ñ m'ijtzög'ajtin ma je Tiro etz Sidón c'ajp, jadu'n nej ñch ti nduñich ma miich ajcxy, ti ixypy je Tiro jäy etz Sidón jäy nijothuimbijtcixy etz ñaaygixy sacco n'ijen n'icuyjam ix'cuyjam, je' je t'iy'ajt co ooy y'ajcixy ymaygixy miid ypocy ycixpi. ²² Paady miich ajcxy yam n'imaaygixy. Co anajty Dios t'iyduna'ñ je naaxhuiñybi jäy, huin'it miich ajcxy Dios xychaachytuna'ñ jac n'igi, ca'ydi je jäy ajcxy huídibi jecy'ajty tz'inay jim Tiro etz Sidón.

²³ Miich ajcxy, Capernaum jäy, m'nyabidáacigixy jadu'n nej jihuüy mdig'ihuaangixy jiihy tzajpjoty. Per ca' yjadu'nity. Mdig'ihuaam miich ajcxy ayoodactuuby. Ayo'n tzaachyp' mbadaangixy. Co ixypy ñch ti nduñich jecy'ajty je mijhuinma'ñ mij tzög'ajtin ma Sodoma c'ajp, jadu'n nej ti nduñich ma miich ajcxy mgajp, chambaad ixypy ity yi jadu'mbi c'ajp, ca' ixypy Dios cayajtigooy. ²⁴ Paady ñch miich yam n'imaaygixy. Co anajty Dios t'iyduna'ñ je naaxhuiñyjäy, huin'it miich ajcxy myajtzaachytuna'ñ jac n'igi, ca'ydi je jäy huídibi jecy'ajty tz'inay ma Sodoma ñaaxjot.

Mingixy ma ñch e mbóocxixipy

²⁵ Chi Jesús ytig'iy Dios mibijctzooyb, ym'inañ:

—Dios Teedy, ñch miich n'ibaatpich ngapxpaatpich. Miich miid je mij cötujcin jiihy tzajpjoty etz ya naaxhuiñ. Com miich ti mnajtzcaxxiy yi m'ixpijcin ma je ayoobtijc huídibi tzinaayb jotxeemy, e ti myüch yi m'ixpijcin ma yi ixpicytijc cohuinma'ñydijc.

²⁶ Jadu'n, Tat, ti mduñ, com jadu'n miich ti mdzocy ti mjäyg'idägy.

²⁷ Jesús yjacm'inañ:

—Fich nDeedy ti xyajcidiydäyich tüg'óciy mic'ajt oy'ajt. Ni pin ca' ijxcapy pin je' y'ung, jëyi nDeedyich tüg'pajc. Ni pin ca' ijxcapy pin je' nDeedy'ájt'pyich, jëyi ìch, je Dios y'ung tüg'pajc, etz jacjadyii huìdibi ìch, je Dios y'ung, nyajniguëxigamyich. ²⁸ Min ma ìch nidüg'óciy miich ajcxy huìdijaty taj mayb myajpatp ma mjot mhuinma'ñ, ìch miich ajcxy nmöhuamyb jotcuyc'ajtin. ²⁹ Cöbicy miich ajcxy ìch n'ane'min ìch ngötujcin, jadu'n nej huaj yuub ajcxy cöbicy ycögi'. Ijxpicy ajcxy ìch ndiy'ajt etz cuydun ìch n'ayuc, com ìch nmüidich mecxtujcin etz ca' ìch amij agix nayjihuiyijich. ³⁰ Ca' ìch n'ane'min ymicity, e ìch ndung ca' nimijaajity.

12

Je discipulos ajcxy moc cojc yajmujcp pocxx#duum

¹ Chi tüg xii Jesús yhuìdity müid ymügütjic ma tüg camjot. E hue' anajty sábado xii, je pöocxin xii. Chi Jesús ydiscipulos ajcxy oy anajty yubögyii. Chi ajcxy ytigüy trigo tium nixajztutp etz yjicxy ajcxy je ypajc. ² E co je fariseos ajcxy ijxy nej Jesús ydiscipulos ajcxy y'idütcixy, chi ajcxy nimay Jesús:

—Oc'ix nej miich mdiscipulos ajcxy y'idüch. Hue' ajcxy tumyub huìdibi ca' huaad ma sábado xii yajtuñ.

³ Per Jesús minañ:

—¿Nej ca' miich ajcxy mgapxyñi ma Dios ñecy, jadu'n nej David etz ymügütjic ajcxy idüch jecy'ajty co yuböccoti? ⁴ Pues yi' ajcxy tigüy ma Dios ytjic. Chi cay ajcxy je tzajcaagy huìdibi anajty jäy ajcxy ti yajhuindzigüy Dios. Je' je tzajcaagy huìdibi teedy ajcxy anajty paatip cayipy. ⁵ ¿Nej ca' miich ajcxy ti mgapxyñi Moisés ycötujcin necy co je teedy ajcxy jëbi ytuñ ma Dios ytjic sábado xii, e ca' nan tundigooyb je' ajcxy?

⁶ Fich miich ajcxy nimaaygixyp, jac nigü mij cötújcin nmüididyich, ca'ydi je cötujcin huìdibi je teedy ajcxy yajtuñ ma Dios ytjic. ⁷ Pen miich ajcxy ti mhuinjihuüy nej yhuimbizimy jada Dios y'ayuc, co Dios jadu'n yminañ: “Fich ndzojcpy co miich ajcxy müid'idipy pa'ayo'n ca'ydi co ajcxy myegipy huindzigüñ.” Pen miich ajcxy ti mhuinjihuüy jada ayuc, ca' ixipy mbocy'ixy ma ìch nmügütjic huìdibi ca' ma ti ytundigooy. ⁸ Fich, je jäy huìdibi tzoön tzajpjoty, nmüidich ane'min, jaydëbi nimäyich je jäy ajcxy ti jëbi tungixy sábado xii.

Je yëydjic huìdibi anajty ycüidizip

⁹ Chi Jesús choñ jim, ñicxy ma je judíojäy ñaymujctac. ¹⁰ E jii by ma je naymujctac anajty tüg yëydjic huìdibi ycüitiz. Je fariseo ajcxy xihuamyb Jesús, paady ajcxy y'amidooy, yminañ:

—¿Nej jëbi tüg pa'mjäy chögy sábado xiiji?

¹¹ Chi Jesús y'adzooy:

—Pen ya ma miich ajcxy ji tüg jäy huìdibi cöbixy yjutcögäy sábado xii, ¿nej ca' je' nicxy yajpidzimy mic'amy? ¹² Nigü tzobaatp tüg yëydjic ca'ydi tüg cöbixy, paady Moisés ycötujcin ca' capx'aducy co tüg oy'ajtin nduunim sábado xii, je pöocxin xii.

¹³ Chi Jesús nimay je yëydjic:

—Xajtiu yi' mgi'.

¹⁴ Co xajtüy yci', chi choocy, e hui'my quipxyjaty müid je yci' oybi. Chi je fariseos ajcxy yjotmätcoty, yhuinma'ñ ixtaaygixy ajcxy nej huaad Jesús ocyaj'o'ccixy.

Tüg ayucnajtzcaxiiyin müid Jesús ycixpi

¹⁵ E co Jesús nejhuüy nej yi' ajcxy yhuinma'ñ müidity, chi jim choñ. E ooy mayjäy ypanicxi Jesús, Jesús yajtzoocpy anajty tüg'óciy pinjaty pa'm müid. ¹⁶ Jesús ane'my je pa'mjäy ajcxy co ca' huaad nigapxy nimäydägy co yi' je' je Cristo. ¹⁷ Jadu'n Jesús ane'my

je pa'mjäy jigix ycixipy yca'pxipy je ayuc huídibi je profeta Isaías yjaay jecy'ajty, co Dios jadu'n ymínañ:

¹⁸ Jada je' ñich ndumbi huídi ti nhuin'ixyich. Yi' ñich ooy ndzocyich njihuíyich etz ooy njotcujcich míid yi'. ñich yi' nmöhuamybich ñich njihuí'ñ mic'ajt. Yi' capxhuäcxip ñich n'ayuc jadu'n nej ndzaachytuna'ñich naaxhuíñjyá ajcxy míid ajcxy ypocy ycixpi.

¹⁹ Yi' ni ymígügtijc ca' oja'ñ, ni ycaýäxa'ñ, ni ycatinähua'ñ, ni pin ca' midoohuípy ma cajp cujc.

²⁰ Ca' yi' tzaachytuna'ñ ayoobitijc etz huídibi ayo'ndumb ijtp. Etz nañ ni ca' yajtigoya'ñ huídibi ayoobitijc yco'ögy'ungdíj yjijp'ijxpy. Jadu'n nej jäy cayajhuindigoy tza-jcapy huídi huídyip etz ni cayajpích je mecha huídibi uuxy uuxy tícxp. Ixti mabaad anajty yajcopicy y'ane'mín tudägypi.

²¹ E yi' mayjäy ooy yjijp'ixa'ñyíi.

Xígixy Jesús co míidity mujcu' ymic'ajt

²² Chi míid miiñ ajcxy ma Jesús tüg jäy huídibi huintzip etz uum. Je' anajty míid ca'oybi. Chi Jesús yajtzoogy, e chi y'ixgíy etz ycapxígy. ²³ Co Jesús jadu'n tuñ, chi je mayjäy ytigíy huinmay'ahuídijt, chi ajcxy ymínañ:

—¿Nej jada je', je David y'ap y'oc huídibi rey'adam?

²⁴ Per co je fariseos ajcxy nejhuíy nej je jäy huinmay, chi ajcxy ymínañ:

—Jadaabi yéydijc yajpidzimy ca'oybi míid je mujcu' huindzin ymic'ajt (ca' yi' yjéjity je Cristo).

²⁵ Per Jesús ñejhuíyb anajty ti je fariseos ajcxy yhuinmaayb, chi ymínañ:

—Pen tügpicy tungmíidpi ixipy ñaybijc-huäcxigixy, etz ñaymidziptzóonigixy ixipy ac jéyi, pues cixipy yi' ajcxy y'ane'mín. Pen tüg cajp o tügpicy jugymígüg ixipy ñaybijc-huäcxigixy, pues ca' ajcxy y'idaangixy tügmucy. ²⁶ Pen Satanás, je ca'oybi huindzin, yajpidzimy ixipy ca'oybi ma je jäy ajcxy, chi ci'm ixipy je ca'oybi ti ñaybijc-huäcxigixy, e je Satanás ymic'ajt ca' y'ida'ñ. ²⁷ Miiich ajcxy mínamb co ñich nyajpidzimyich ca'oybi míid je ca'oybi huindzin, je Beelzebú ymic'ajt. Pen tiy'ajt jadu'n nej miiich ajcxy mína'ñ, je jäy ajcxy huídibi xymijnícxpejt miiich ajcxy, ¿nej yi' ajcxy paady mic'ajt ma je mujcu' co ajcxy yajpidzimy ca'oybi ma je pa'm jäy? Pues ca', paady yi' ajcxy tiy'ajt yejcp co miiich ajcxy ti mgapxtigoy co ymínaangixy co ñich nyajpidzimyich ca'oybi míid Satanás ymic'ajt. ²⁸ Per ñich nyajpidzimyich ca'oybi ma pa'mjäy míid Dios yjihuí'ñ ymic'ajt. Paady miiich ajcxy nejhuíyb co ti ymiiñ yjaty je Dios y'ane'mín ma miiich ajcxy.

²⁹ (Dios ycötujcín jac mic ca'ydi je ca'oybi ycötujcín, paady jébi nyajpidzimyich ca'oybi.) ¿Nej jébi tüg jäy ytigíy ma tüg micpi jäy ytijc etz pígaani tijaty yi' ymíid, pen ca' jayijp yci' ytecy xojtzity? Pues ca'. Cooni jayijp yci' ytecy xojtzity, huin'it jéb píjcp tijaty ymíid. ³⁰ Pinjaty ca' xymijnícxpetyich, xymídzípich yi'. Pinjaty ca' tuñ míid ñich co jäy nyaj'ixpicyich, hue' je' ajcxy jäy yajhuinma'ñyidigooyb.

³¹ Janch ñich miiich ajcxy nimäy co Dios jébi huinmecxip tüg'óciy pocy huídibi jäy ytungixp etz tüg'óciy jibicpi huídibi jäy ycapxcixp. Jéyi janchtiy co pinjaty capxtigooyb míid je Espíritu Santo, je Dios yjihuí'ñ ymic'ajt, ca' Dios huinmecxip nimína. ³² Pinjaty jibic xyñigapxpích xyñimíydacpích, je' huinmecxam. Per je huídibi jibic ñigapxpy je Espíritu Santo, je' ca' huinmecxa'ñ ni jadachambi tiempo, etz ni camína xii.

Yi quipy yi' ytim yi' míid yaj'ijxcapy

³³ Pen miiich ajcxy mnejhuíhuamy je quipy pen oy quipy, o pen ca', jébi mnejhuíhuípy co je quipy nícxpy ytim'aty. Pen oy je ytim, miiich mína'níp co oy je quipy. E pen ca' oy ytim'aty, huin'it miiich ajcxy mína'níp co ca' y'oyity je quipy. ³⁴ Jibic jäy miiich ajcxy, jadu'n nipaady nej jihuíy ahua'n iyujc xy'ung'ajtp. Pen miiich ajcxy jibic jäy'ajtp, ¿nej jébi miiich ajcxy oybi ayuc mgapxípy? Jadu'n nej jäy ajcxy yjot yhuinma'ñ míidity, ac tim jadu'n ajcxy ycapxy. ³⁵ Je jäy huídibi oy ayuc ycapxpy, ymíid oyjot oyhuinma'ñ paady oy

ayuc capxy. Je jäy huídibi jibic ayuc capxp, ymíid jibic jot jibic huinma'ñ, paady jibic ayuc capxy. ³⁶ Ich miich ajcxy nimay co anajty paady je xii je tiempo mina Dios tiyduna'ñ je naaxhuiñyäjy, huin'it ajcxy y'adzohuipy miid huen tim huídibi ayuc huídibi anajty ajcxy ti mgapxy. ³⁷ Com nejjaty miich anajty ajcxy ti mgapxy je m'ayuc jadu'n miich ajcxy Dios xytiydunip. Com miid yi mgi'm ayuc yi' miid m'oybidzimipy mhuätzpidzimipy. E nañ jadu'n miid yi mgi'm ayuc yi' miid mbocycähuipy.

Jibicjäydijc ajcxy pijctzoogixy tüg ijxpejt mijhuinma'ñybi

³⁸ Chi nijëjity fariseos ajcxy etz escribas ajcxy Jesús nimayi:

—Huindzin, n'ixamy ich ajcxy miich tüg m'ijxpejt.

³⁹ Chi Jesús y'adzooy:

—Yi jibic jäydijc ajcxy etz ajcxy huídibi ca' mibiga'ñ Dios ypijctzooyb tüg ijxpejt huídibi tzomb tzajpjoty. Per Dios ca' yega'ñ jadüg ijxpejt. Ti Dios yecy tüg ijxpejt ma Jonás. ⁴⁰ Com jadu'n nej Jonás jecy'ajty ijxpejt yecy co y'ijty tugüg xii tugüg tzuum mejyjoty ma acx ymoxac, nañ tim jadu'n ich, je jäy huídibi tsoon tzajpjoty, nyegamy ijxpejt jadachambi tiempo co n'idipyich tugüg xim etz tugüg tzuum naaxjoty. ⁴¹ Je mayjäy huídibi anajty tzinaayb ma Nínive cajp, ti jothuimbijtcixy etz ti ixmach ajcxy huídijaty jibicpi ajcxy ytumyb co Jonás capxhuäcxy Dios y'ayuc ma yi' ajcxy. Cha ich ngapxhuäcxyich Dios y'ayuc ma miich ajcxy, etz jac nigi cötujcin nmídidyich, ca'ydi Jonás; e ca' miich ajcxy mjothuimbity. Paady co anajty Dios tiyduna'ñ je naaxhuiñyäjy, je Nínive jäy miich ajcxy xyajpocycähuam. ⁴² Nañ jadu'n je töxyjäy reina huídibi tzinaayb jadachambi tiempo, etz yajpocycähuib ajcxy. Je reina tsoon jiguëgy nicxy co amido'ida'ñ je rey Salomón ma capxhuäcxi Dios y'ayuc. Ji naaxhuiñ jadachambi tüg Dios yti'yajtmídpi jac nigi ymijity, ca'ydi Salomón anajty, e ca' je jäy ajcxy mijpidäga'ñ.

Je jibic espíritu co jadüg'oc yhuimbity

⁴³⁻⁴⁴ Yi jäy ajcxy huídibi cham tzinaayb, quipxyjaty ajcxy miid je ca'oybi. Co je ca'oybi ypidzimy ma je jäy, chi je' ñicxy jim mijtigíduum y'ijxtacy. Co ca' paty y pocxtac, huin'it ymina'ñ: “Huimbidaambich ma je jäy yjot yhuinma'ñ ma ich ti n'octzombi.” Co je ca'oybi yjaty ma anajty ti chinäy, chi paty je jäy yjot yhuinma'ñ ooy yhuätzity etz yajxon ypedigity oy oyduñ. ⁴⁵ Chi je ca'oybi ñicxy oy yajtzooñ jahuixtujc ca'oybi jac jibicpi ca'ydi je'. Chi ajcxy ytigüy ma je jäy yjot yhuinma'ñ, e chinay ajcxy jilby. Huin'it je jäy jac'öctiy oy yjajtni, ca'ydi jadu'n nej anajty jayijp'aty.

Jesús ytaj etz y'uch miguëx ajcxy

⁴⁶ Jesús yaj'ixpijcpy anajty je mayjäy, co oy yja'ty je' ytaj etz y'uch miguëx ajcxy. Hue' ajcxy yhui'my tiba'y. Je' ajcxy anajty ymigapxamy Jesús. ⁴⁷ Chi jäy yajnimay Jesús:

—Yi mdaj etz m'uch miguëx ajcxy, chiiby ajcxy tiba'y, miich xyjamigapxamb.

⁴⁸ Jesús y'adzooy, nimay je jäy huídibi ytaj y'ayuc yajnajxi ma yi':

—¿Pín jäy miich ajcxy mdijy co ich ndaj'adyii etz ich n'uch'adyii nmigüg'adyii?

⁴⁹ Huin'it Jesús nitziihuüy je' ydiscípulos ajcxy e yminañ:

—Jada ich ndiscípulos ajcxy jadu'n nipaady nej ich ndaj etz ich n'uch nmiguëx.

⁵⁰ Huen ytipinüty huídibi ytumyb ich nDeedy chojcin, huídibi jilby tzajpjoty, pues jadu'n yi' ajcxy nipaady nej ich ndaj etz ich n'uch miguëx.

13

Je ayuccapxhuäcxi y'ijxpejt (niipi ijxpejt)

¹ Je huin'it xii Jesús choñ ma je tijc. Chi ñicxy ma je mejypa' jim oy y'ñay'ihuüy. ² E co mayjäy ooy ñaymujci jim ma anajty Jesús ñay, chi Jesús ytigüy barcojoty. Per tüg'óciy je mayjäy yhui'mday ma mejypa'. ³ Jesús ytigüy jäy yaj'ixpijcp miid jihuimbity ayuc, yminañ:

—Tüg jäy chooñ trigotim huijp. ⁴E ma anajty jim ytimhuijy, huin'it je ytim oy naagity ycäy ma tü'aa. Chi jada' je joon ajcxy oy ymiñ etz ypiihuijy je tim. ⁵Nijëjity ytim ycäy ma tzaanïcx ma anajty hueeni naax. Jada tim tzojc ymujxy. ⁶Com hueeni anajty je naax ma je tzaanïcx, chi co oy xh'an ypadyii, chi ytitztay, com ca' anajty je ytictz yeegity. ⁷Nijëjity tim oy ycäy ma ujtz'aayjot ma apyjot, e ujtz'öctay je trigo mang. ⁸Per je tim huidibi ca'u ma oy ñaax, je' yon yajxon e tim'ajt may'amy; tüg ypi'cpajc iipxmajc oy yco'ity, jadüg pi'cpajc tugipx oy yco'ity, jadüg pi'cpajc migo'px oy yco'ity. ⁹Pinjaty mido'n mid huen mido'mbicy jada ayuc.

Ti ycxpi je ijxpejt

¹⁰ Chi je' ydiscípulos ajcxy nimijhua'cy Jesús, chi ajcxy yajtiy:

—¿Na'amy co myajtuñ jihuimbit ayuc co myaj'ixpicy je mayjäy?

¹¹ Chi Jesús y'adzooy, yminañ:

—Miich ajcxy jaydeb mnejhuihuipy huidibi Dios ñigapxyp ñimiydacpy coyüch'amy ma y'ane'min. Jacjadyii jäy ca' ajcxy huinjihuipy. ¹²Pinjaty ymid yajmohuip ñigi, pinjaty hueen mid yajpigipy ñigi, oy ixipy hueen jadim midity. ¹³Paady jihuimbit'amy nyajnimaaayich; jaydebi pinjaty ijxcixy, ñipatpy nejhuüy ca' ti ijxcixy; etz co ajcxy midoogixy, ca' ajcxy huinjihuüy, ñipatpy nejhuüy ca' ti midoogixy. ¹⁴Jadayaabi ytunyii yjadyii jadu'n nej je profeta Isaías jaaybejty yajhui'my ma jadu'n yminañ:

Miich ajcxy midohuamy, per ca' mhuinjihuühuangixy. Miich ajcxy m'ixamy, nañ ca' mhuinjihuühuaangixy huidibi ti m'ijxcixy.

¹⁵ Com jadayaabi jäy ooy ajcxy yjot yhuinma'ñ ti y'ahuimbity juuñ. Nej ajcxy yjamidoy, ca' ajcxy ymidohuü'ngixy. Nej ajcxy ja'ixy, ca' y'ijxhuü'ngixy. Nej ajcxy yjahuinjihuü'ngixy, per ca' yhuinjihuüy ma yjot yhuinma'ñ. Yi' ajcxy ca' yjothuimbidaangixy ma ñich, jaydeb nyajnidzögibich ajcxy.

¹⁶ Per jotcuyc miich ajcxy, co miich ajcxy ijxhuü'my mid mhuin huidibi ndumybich, e mmido'mbicy ajcxy ñich n'ayuc. ¹⁷Janch tiy'ajt jadu'n nej ñich miich nimaaygixy. Janch tiy'ajt co may profetas ajcxy etz tudägy jäy ajcxy huidibi tzinaayb jecy'ajty, ooy ajcxy ja'ixañ huidibi miich ajcxy m'ijxyp cham, per ca' ajcxy ixxy. E ooy ajcxy jamidohuañ je ayuc huidibi miich ajcxy midooyb cham, per ca' ajcxy midoy.

Jesús najtzcapxiy je ijxpejt ma je niipi

¹⁸ Amido'it miich ajcxy, jadu'n nej yhuimbizimy jada jihuimbit ayuc maabi je tim huijpi. ¹⁹Je jäy ajcxy huidibi amido'ijtp Dios y'ayuc, e mic'amy je ca'oybi yajpidzimy Dios y'ayuc ma ajcxy yjot yhuinma'ñ, jadu'n ajcxy nipaady nej trigo tim huidibi cäb tügujc, e je joon ajcxy mic'amy ypiimujctay. ²⁰⁻²¹Je jäy ajcxy huidibi amido'ijtp Dios y'ayuc janch jotcuyc, per co agapxiyb paady, co tzaachypi minaxy yajnaxy mid Dios y'ayuc ycxpi, chi mic'amy ajcxy ixmajtzn Dios y'ayuc, jadu'n ajcxy nej je trigotim huidibi ti ycäy ma tzaanïcx, huidibi ca' oy ytictz midity. ²²Je jäy ajcxy huidibi amido'ijtp Dios y'ayuc, e co ñicxni, chi jäydigooyñi Dios y'ayuc mid jotcuyc'ajtin tzinaayin, comeen'ajtin etz adzojcän. Jadu'n ajcxy nipaady nej trigotim huidibi ti ycäy ujtzjoty, e ca' ytim'aty mid co oy y'ujtzögy. ²³Je jäy ajcxy huidibi amido'ijtp etz cöbijcp yajxon Dios y'ayuc amumdügot etz Dios y'ayuc ytumyb ma ajcxy yjot yhuinma'ñ, jadu'n ajcxy nipaady nej je tim huidibi ti ycäy ma oy ñaax etz ti ytim'aty may'amy. Tüg pi'cpajc iipxmajc oy yco'ity, etz jadüg pi'cpajc tugipx oy yco'ity, etz jadüg pi'cpajc migo'px oy yco'ity.

Je ijxpejt co je jibic ujtz ymuxy ma je trigo cam

²⁴ Chi Jesús yaj'ixpijcy jadüg jihuimbit ayuc, yminañ:

—Je Dios y'ane'min jadu'n nipaady nej tüg yëdyjc huidibi trigo tim huijp ma je' ycam.

²⁵ Per co ajcxy yma'öctay nidüg'óciy je cogam, chi ytiy tüg ymidzip ma je ycamjot. Chi je midzip jibic ujtz tim oy huijy ma je trigo cam. Chi ñicxñi. ²⁶E co je trigo oy yooñ,

chi ypijy. Nañ jadu'n je jibic ujtz oy yooñ. ²⁷ Chi je ytumbidijc oy yhuindzin yajnimay: “Huindzin, ¿nej ca' ti mnipy ac trigotim? ¿Nej co jim nañ jadu'n jibic ujtz yajpaady?” ²⁸ Chi je cogam yminañ: “Huen jada' nmidzipich jadu'n ti y'idich.” Chi je tumbidijc y'amidoohui: “¿Nej mdzojcpy co ñch ajcxy nhuijxigibich je jibic ujtzi?” ²⁹ Chi je cogam yminañ: “Ca'. Pen miich ajcxy mhuijxícpy je jibic ujtz, ca' jecyity co m'ahuijxmugipy nañ jadu'n je trigo. ³⁰ Ixmatz, huen je jibic ujtz yeegy tügmucy mïd je trigo, ixti cooni anajty ypidigy je cosecha. Co cosecha paty, huin'it nguexañich je ndumbidijc co huen jayijp pujxigy je jibic ujtz etz axotzipy etz nögipy. E co yajpidictay je jibic ujtz, chi yajpidigipy je trigo e pidägipy ma je tze'x.”

Je ijxpejt ma je mostazapajc

³¹⁻³² Nañ jadu'n Jesús yaj'ixpijcy jadüg jihuimbit ayuc, yminañ:

—Je Dios y'ane'min jadu'n nipaady nej tüg mostazapajc huídibi tüg jäy ñiip ma je' ycam. E je mostaza ytüm je' jac tim mutz ca'ydi ni huídibi ujtz tım. Per co je mostaza ytüm ymujx etz yoñ, chi y'ahuimbijty jac mij ca'ydi jacjadyi ujtz. E hue' nicxy yjaty janch mij, ixti joon ajcxy oy yqueec miñ yqueec xijpy jim, pidägy je ype'ñ ma je mostaza y'aacx.

Je ijxpejt ma je levadura huídibi ca' y'oyity

³³ Nañ jadu'n Jesús yaj'ixpijcy jadüg jihuimbit ayuc, yminañ:

—Je Dios y'ane'min jadu'n nipaady nej levadura huídibi tüg töxyjäy ypidacpy mïd je harina, jigix je harina oy ypidigy.

Nej anajty Jesús yajtuñ je ijxpejt

³⁴ Tüg'óciy Jesús yaj'ixpijcy je mayjäy, jihuimbit'amy yaj'ixpijcy, e ni ti ca' jäy yaj'ixpijcy cayajnimäy jihuimbit ayuc. ³⁵ Jadu'n Jesús ytuuñ, jigix yajcuyduñ je ayuc huídibi je profeta Isaías yaayhuim' m jecy'ajty, co jadu'n yminañ: ñich ngapxamyich ac tim jihuimbit ayuc. ñich nigapxamybich tijaty huídibi ca' pin nejhuñy, mabaad Dios oga'n yajcojy je naaxhuiñybi.

Jesús capxticxni nej yhuimbizimy je jibic ujtz ma je trigo cam

³⁶ Chi Jesús capxycijxy mïd je mayjäy, chi ñicxy ma tüg tijc. Chi ytigiy tigoty mïd je ydiscípulos ajcxy. Chi Jesús ydiscípulos ajcxy nimijhua'cy Jesús, yminañ ajcxy:

—Tun may'ajt ñch ajcxy xyajhuinjihuñygy je jihuimbit ayuc co ti mnigapxy je jibic ujtz ma je trigo cam.

³⁷ Chi Jesús yajnimay:

—Ñich, je jäy huídibi tsoon tzajpjoty, jadu'n ñch nipaady nej je jäy huídibi niip je oybi tım ma je ycam. ³⁸ Je cam jadu'n nipaady nej tüg'óciy naaxhuiñyjäy. Je oybi tım jadu'n nipaady nej je jäy ajcxy huídibi cöbijcp Dios y'ane'min. Je jibic ujtz jadu'n nipaady nej je jäy ajcxy huídibi cöbijcy ajcxy je mujcu' y'ane'min. ³⁹ Je jäy huídibi niipy je jibic ujtz, jadu'n yi' nipaady nej je ca'oybi. Je jibic ujtz cosecha, jadu'n nipaady nej je tiempo co anajty je naaxhuiñ ycixy ytigoy. Je ajcxy huídibi yajpidic je cosecha, nipaady nej je ángeles ajcxy. ⁴⁰ Jadu'n nej je jibic ujtz oy yajpujxigy etz yajpidacy jinjoty, nañ tim jadu'n nicxy yjaty mïd je jäy ajcxy huídibi cöbijcp je mujcu' y'ane'min co anajty je naaxhuiñ cixy ytigoy. ⁴¹ Co anajty je naaxhuiñ ycixy ytigoy, chi ñch, je jäy huídibi tsoon tzajpjoty, nguexamyich n'ángeles huen yajmujctäy je jäy huídibi je ymügüg yajtundigooyb, etz yi huídibi ajcxy jibic-huinmañ tumb. ⁴² Co yajmujctähuipy je jibicjäydijc, chi ajcxy yajpidägipy mijjinjoty, jiliby ajcxy yäxañ etz ytitzmucxy ytitzqueecy mïd je ayo'n ycixpi. ⁴³ Per je jäy ajcxy huídibi cuydumb Dios chojcin, idam ajcxy mïd Dios Teedy jiliby tzajpjoty. Ymii'idamy ajcxy tüg oy'ajti, jadu'n nipaadip nej je xii yticxin yjajin. Pen miich ajcxy mïdo'n mïd, mïdo'mbijc ajcxy ñch n'ayuc.

Je y'ijxpejt je meeñ huídii yüchip

⁴⁴ Je Dios y'ane'min jadu'n nipaady nej meeñ huídibi yüch ijtp ma tüg cam. Per co tüg jäy paady je meeñ, chi mic'amy jadüg'oc yüdz tígach. Chi ooy yxondägy. Chi ñicxy etz tooctäy tüg'óciy huídibi ymüid etz juy je naax.

Je y'ijxpejt je perla huídibi tzoohuip

⁴⁵ Nañ jadu'n Dios y'ane'min jadu'n nipaady nej tüg ajuuyb adoocpi huídibi ijxtaayb tüg oybi perla huídibi tzoobatp. ⁴⁶ E co anajty paady tüg perla huídibi janch tzou, chi ñicxy tooctigoydäy tüg'óciy huídibi ymüid etz juy je perla.

Je acxmadzi'ñ y'ijxpejt

⁴⁷ E nañ jadu'n Dios y'ané'min jadu'n nipaady nej tüg acxmadzi'ñ huídibi jäy müid ycojibüby mejyoty. Chi jüby ytigüy huen ytim huídibi acxity. ⁴⁸ E co anajty je acxmadzi'ñ y'uch müid je acx, chi je jäy ajcxy yajpidzimy ma mejypa'áy. Chi ññay ajcxy jim mejypa'áy etz huin'ijxy ajcxy je oyjatypi acx etz pidaaccixy ma ycach. Je acx huídijaty ca' y'oyity, je' ajcxy y'ixjibijp. ⁴⁹ Tim jadu'n nej ti yjaty müid je acx, nañ jadu'n jada'ñ, co anajty ycixy ytigoy je naaxhuiñ. Huin'it je ángeles ajcxy ñicxa'ñ huindu'my naaxhuiñ huin'ixa'ñ je jibic jäydijc e pidäga'ñ ajcxy abicy, nañ jadu'n huin'ixa'ñ je oy jäydijc, e pidäga'ñ ajcxy nañ jadu'n abicy. ⁵⁰ Chi je ángeles ajcxy pidäga'ñ je jibicjäydijc mij jünjoty. Jüby jünjoty ajcxy yäxa'ñ ytinähua'ñ etz ytützmucxaangixy ytützqueedaangixy müid je ayo'n müid je tzaachypi ycixpi.

Je jäy huídibi jajtp nej oybi etz nej jibicpi yajpidzimity

⁵¹ Chi Jesús y'amidooy ajcxy:

—¿Nej mhujihuyb müich ajcxy tüg'óciy huídibi üch ti ngapxich?

Chi ajcxy y'adzooy:

—Huindzin, ti mhujihuyb üch ajcxy.

⁵² Chi Jesús ajcxy nimay:

—Nidüg nidüg escriba co ti ixpiçytäy tüg'óciy Dios ytiy'ajt y'ane'min huídibi tza-jpjoty tzoon, hue' jadu'n nipaady nej tüg codijc comeñybi huídijaty ymüid yjaty nej yajpidzimipy jemybi etz tucpi.

Jesús yajpaady jim Nazaret

⁵³ Co Jesús yaj'ixpiçtay jada jihuimbit ayuc, chi chooñ jim. ⁵⁴ Co Jesús chooñ jim, chi ñicxy ma yci'mnaax yci'mgajp. Chi Jesús ytigüy ma je judio ñaymujctac, e ytigüy yaj'ixpiçp. Chi je mayjäy jüby ooy jihuüy huinmay nej yi' yaj'ixpiçy, ymüinañ ajcxy:

—¿Ma jada' jada yëydijc ti paady jada ixpiçin? ¿Ma mic'ajt paady co ooy mijhuinma'ñ tzachtuñ? ⁵⁵ Jadayaabi yëydijc hue' yteedy'ajtpy je tzejtzpi, etz ytaj'ajtpy María. E üch ajcxy n'ix'ajtpyich je y'uch ajcxy; Jacobo, José, Simón, etz Judas. ⁵⁶ Nañ jadu'n ya chinay ma üch ajt je' y'uch ajcxy töxyjäy. ¿Ma oy ti paady jada ixpiçin jada mic'ajtin?

⁵⁷ Paady je maycogajpi ajcxy ca' ytunicuend. Paady Jesús ajcxy nimay:

—Huen ma'amyty tüg'óciy je mayjäy ajcxy ooy yajmij'aty yi' jäy ajcxy huídibi najtzcaxüyb Dios y'ayuc, ca'ydi huídibi y'ayucnajtzcaxüyb ma yci'mnaax yci'mgajp yci'mjün yci'mdjic.

⁵⁸ Ma yci'mnaax yci'mgajp Jesús ca' jaty nej mijhuinma'ñ tunip anajty, müid co je jäy ajcxy ca' mijpidägyii.

14

Juan el Bautista co y'ögy

¹ Je huin'it tiempo Herodes huídibi anajty ane'mb jim Galilea tiy'ajt paty nej Jesús ytuñ.

² E yi' nimay je ymidungmüidpidijc:

—Yijüibi jäy huídibi tzachtumb mijhuinma'ñ, yi' je' je Juan, je Bautista. Juan ti jugypicy jadüg'oc ma anajty ti y'ögy, paady mic'ajt müid jaydëb mijhuinma'ñ tuñ.

³ Herodes ti anajty ni'ane'mdiy co Juan huen yajmach, e yajpidägiipy pujxtigoty. Jadu'n Herodes tuñ miid Herodías ycixpi. Je Herodías je' anajty miid jayijp'aty ti ypicy Felipe, je Herodes y'ajch, chi ti ixmajch Felipe, chi ypijcy miid Herodes. ⁴ Juan ti anajty nimäy Herodes co ti ytundigooy co ti picy miid Herodías.

⁵ Je rey Herodes ooy anajty jayaj'öga'ñ yi Juan, per tzigiyb anajty miid je mayjäy. Com je mayjäy ti anajty mibicy ajcxy co Juan hue' anajty tügi Dios tiy'ajt miidpi, tüg profeta. ⁶ Co Herodes yjimijtpety, chi anajty ñayñixiduñyii, e chi Herodías ñix ñicxy ejtzp ma Herodes yhuinduu. Je rey ooy jäygidacy nej anajty Herodías ñix y'ejch. Paady Herodes Herodías ñix nimay:

⁷ —Dios ich yam ngapxpatpy co nmöhuamyb ti mdimypijctzooyb.

⁸ Chi Herodías nimay je' ñix co huen pijctzoohui je Juan, je Bautista, ycohuajc ma tüg txy. Chi Herodías ñix je rey nimay:

—Ndzojycpich co miich xymöhuip Juan, je Bautista, ycohuajc ma tüg txy.

⁹⁻¹⁰ Co jadu'n midooy je rey, chi ytigiy tajp maybi mij cajee. Per co ti anajty Dios capxpaatni, yminaani mayjäy yhuinduu co ymöhuamyb tijaty ypijctzooyb. Paady ane'my tüg soldado co huen nicxy yajtzoñyii Juan ycohuajc, e möhuipy Herodías ñix. ¹¹ Huin'it je soldado oy je Juan ycohuajc yajminajci jilby pujxtigoty. Chi moy je töxy'anäg, e je töxy'anäg yejcnajxni ma ytaj.

¹² Huin'it xii je Juan ydiscípulos ajcxy yja'ty. Chi ajcxy oy yajnaaxtigiy je Juan ñinix. Chi ajcxy oy Jesús yajnimäy.

Jesús yajcay migoox mil jäy

¹³ Co Jesús nejhuüy ti anajty ti ytuñyii ti yjadyii miid Juan, chi ytigiy ma tüg barco naydüg, e nicxni ma tüg it ma ca' pin chinäy. Co je mayjäy nejhuüy co Jesús ti ñicxy, chi ajcxy choday canaag agajp, nicxy ajcxy ma Jesús yajpaady, hue' tecygi'm ajcxy nicxy. ¹⁴ Co Jesús ypidzimy barcojoty, chi ijxy mayjäy. Jesús ooy pa'ayoy je mayjäy, e yajtzoocy je pa'mjäy huídibi anajty ajcxy jim ymiid miñ. ¹⁵ Com ti anajty chuu'ñi, paady je' ydiscípulos ajcxy nimijhua'cy Jesús, e nimay ajcxy:

—Ti chuu'ñi, e ca' ya pin china'y, paady capxcíxy miid jada mayjäy ajcxy, jaydeb ajcxy nicxy ixtäy ycaayin y'uucin ma yi mutz cajp ajcxy huingonbi.

¹⁶ Chi Jesús yminañ:

—Ca' ycopicyity co ajcxy nicxy jicxy ixtäy. Miich ajcxy möhuip caayin uucin.

¹⁷ Chi je' ajcxy yminañ:

—Per ich ajcxy jeyi yeeby nmidity migoox tzajcaagy etz metz acx.

¹⁸ Chi Jesús yminañ:

—Mimiingix yam'amy.

¹⁹ Chi Jesús nimay je mayjäy co huen ñay'ihuiydaaygixy ma pi'cmiyy'ung nicx. Huin'it Jesús je migooxpi tzajcaagy congy etz je metzpi acx. Chi ypa't'ijxy jilby tzajpcíxy, e yajnajxy Dioscojuyipy. Chi tujc-huäcxy je tzajcaagy etz moy je' ydiscípulos ajcxy, co huen yajhuäcxycixy ma je mayjäy. ²⁰ Nidüg'óciy je mayjäy ajcxy ycaay cüxyi. Co je mayjäy ycaayday, chi je discípulos ajcxy yajmujcy je cayduc jicxtuc, e yaj'ujch ajcxy majmetz cach. ²¹ Migoox mil anajty ajcxy je yeydijctijc huídibi cay uuc. E ca' ajcxy michoy je töxyjäydijc ajcxy etz je y'ung y'anäg ajcxy.

Jesús yöy ñahuingixy

²² Chi Jesús ane'my yi' ydiscípulos ajcxy co huen barco tigiygixy mic'amy, jigix ñicxipy ajcxy jim mejy ninaxy. Namí yi' ydiscípulos ajcxy choñ barcojoty, Jesús ycapxycíjxy miid je mayjäy huen nicxcixni. ²³ Co anajty Jesús ti ycapxycíxy miid je mayjäy, chi ñicxy naydüg ma tüg cögop Dios mibijctzoobi. Co ycoodzñ Jesús naydüg anajty yajpaady. ²⁴ Co ycoodzñ, mejy cujc anajty je barco cujc nicxy. E je ñi ooy anajty ymijjéztzpety ma je

barco, je' co ooy anajty mic yjanchpojoy. ²⁵ E co oy ymoñiy, huin'it Jesús ymijhua'cy ma je' ydiscípulos ajcxy, ñicxy adüyöyb mejyhuingíxy. ²⁶ E co je discípulos ajcxy ijxy co Jesús anajty ymiiñ mejyhuingíxy, chi ajcxy ooy ñay'adzigiíyi. Ooy ajcxy yaaxqueecy ymíñañ ajcxy:

—Hue' ñich ajt ijxmaniiyim.

²⁷ Chi Jesús mic'amy ymígapxy ajcxy etz nimay:

—Huinmic jotmic naybidáacigíxy, ñich yí'. Ca' mdzigiíygíxy.

²⁸ Chi oy Pedro Jesús ymígapxyii, nimaayi:

—Huindzin, pen janch miichity, ane'mgich co huen ñich miich ninicxip adüyöyip mejyhuingíxy.

²⁹ Chi Jesús Pedro nimay:

—Min.

Huin'it Pedro ymínajcy ma je barco etz ñicx ma Jesús adüyöyip mejyhuingíxy. ³⁰ Per co Pedro jihui'ñybicy jadu'n nej anajty ooy mic yjanchpojoy, chi ooy chigiy, chi oy oga'n ytigiiñi quimbi, chi yaaxqueecy, ymíñañ:

—¡Huindzin, ñich yajtzóocigich!

³¹ Huin'it Jesús oy yci' mimajtzi, chi nimay:

—Miich, janch hueeni mmibijcin. ¿Nej co ca' yajxon xymibicyich?

³² Co Pedro etz Jesús ytigiiy barcojoty, huin'it je mic poj ñajxy. ³³ Huin'it je' ajcxy jüby barcojoty ycojxtinay'ihuiydaay ma Jesús yhuinduu. Chi ymíñañ ajcxy:

—Janch tiy'ajt co miich Dios xy'ung'adyii.

Jesús yajtzoctay je pa'mjäy ajcxy jim Genesaret

³⁴ Co ajcxy ymejyñajxtay, chi ajcxy oy ja'ty ma je Genesaret naaxjot. ³⁵ E co je jäy ajcxy nejhuüy co Jesús ti yjäty ma yí' ajcxy naaxjot, chi ajcxy tiy'ajt quejxy ma tüg'óciy cajp etz rancho huinduy agonbi co Jesús yjimity. Chi je mayjäy miid miñ tüg'óciy je pa'mjäy ma Jesús. ³⁶ Chi ajcxy cohuaniiy Jesús, pen jëb je pa'mjäy ñidoñyii je yhuit. E tüg'óciy je huidijaty ñidonip je' yhuit, je' ajcxy chooctay y'agidactay.

15

Huidi jäy yaj'ahuimbijty janch jibic

¹ Chi ymiiñ ma Jesús nijëjity fariseo jäy ajcxy, je huindzindijc huidibi tzachpadumb judío ycostumbre. Nañ jadu'n miñ nijëjity escribas, je huindzindijc huidibi ajcxy nijaydutr anajty Dios ñecy. Je fariseos etz escribas ajcxy ti choongíxy anajty jim Jerusalén, chi ajcxy y'amidooy Jesús:

² —¿Na'amy co miich mdiscípulos ajcxy ca' cuydungíxy judío ñi'ap costumbre? Yí' ajcxy ycaaygíxy y'uuccíxy, e ca' jayijp ycibujcixy, ca' ixpujcixy ixjëtzcixy ypocy.

³ Chi Jesús y'adzooy, yajtiy:

—¿Na'amy co miich ajcxy mgapxycömidodägy Dios? Mdzachcuydungíxy mgi'mgostumbre ma yjapadyii mguydungíxy ixypy Dios ycötújin. ⁴ Com Dios ti y'ane'my ma ycötújin: “Yajmij'at mdaj mdeedy, e pinjaty jibic nigapxy ni'ojiiyb ytaj yteedy, ögipy yí'.” ⁵ Per miich ajcxy minamb co tüg je yëdjic jëbi nimäy ytaj yteedy: “Ca' ñich miich ajcxy nbubeda'ñ, com ti n'ahuaniiyich ma Dios tüg'óciy tijaty nmidich.”

⁶ Chi huen ytimpinity jadu'n minamb, ca' ocpubedaanip ytaj yteedy, e jadu'n miich ajcxy myajtigoy Dios y'ane'min com tzachtunaangíxy mgi'mgostumbre. ⁷ Miich ajcxy naybidaacip jadu'n nej jihuiy tudägy jäy, e ca' yjanchity. Janch tiy'ajt jadu'n nej jecyip Isaiás jaaybejty yajhui'my co Dios jadu'n ymíñañ:

⁸ Jadayaabi jäy xyajmij'ajtpich ahuac aguy, per ca' ajcxy xyajmij'atyich cixyot huinjot.

⁹ Naadigi' co ajcxy xyhuin'iiygíxyich xyhuinyáaxcixyich. Mnayyaj'ixpijigíxy ayuc tiy'ajt huidibi jäy ajcxy ti cojy ti maacxy.

¹⁰ Huin'it Jesús huomujctay je mayjäy, ymíñañ:

—Amídoos'ijtcixy ñich n'ayuc etz mhuinjihuüygixip. ¹¹ Ca' ji ni ti jñcxy huidi jäy ypidacpy ma y'ahuac ñicxy yajpocycäyí. Yí' janchtiy je jibic ayuc huídibi pídzim ma jäy ajcxy y'ahuac, yí' ajcxy yajpocycähuíib.

¹² Chi ymíñ ma Jesús je' ydiscípulos ajcxy, chi ajcxy ñímaayí:

—¿Nej miich mnejhuüyb co je fariseos ajcxy ñíjotma'tpy co ajcxy mídooy je ayuc jadu'n nej miich míñañ?

¹³ Chi Jesús y'adzooy, ymíñañ:

—Huen tim huídibi ane'mín huídibi ca' Dios ti pídagy, Dios yajtigoyam, tim jadu'n nej jäy ajcxy huixägy ujtz huídibi ca' y'oy'ujtziy. ¹⁴ Ixmajtzicx yí fariseos etz escribas ajcxy. Ca' ajcxy huinjihuüy Dios ytiy'ajt. Jadu'n ajcxy nipaady nej jäy huintzpi, e co tüg huintzpi huíjtzhuídity jadüg huintzpi, chi nimetz ñicxy yjutcögägixy.

¹⁵ Huin'it Pedro ñimay Jesús:

—Yajhuinjihuüyg ñich ajcxy jada jihuimbit ayuc.

¹⁶ Chi Jesús ymíñañ:

—¿Nej miich ajcxy nañ jadu'n ca' mhuinjihuüy jada jihuimbit ayuc? ¹⁷ ¿Nej ca' miich ajcxy mnejhuüy co tüg'óciy huídibi tigüyb ma miich ajcxy m'ahuac, je' ñicxp ma miich ajcxy mjot etz ypidzimy ma ajcxy mninícx? ¹⁸ Per je jäy huídibi jibic capxp, capxp je' je jibic ayuc huídibi ymíid ma yjot yhuinma'ñ. Jada jibic ayuc yajpocychimícj je jäy. ¹⁹ Yí jibicpi huídibi tzomb ma jäy ajcxy yjot yhuinma'ñ, yí' je' jáyyaj'ögí huinma'ñ, je töxyjäy migapxtigoyí huinma'ñ, meedzi huinma'ñ, je indägi huinma'ñ, je piitz capx huinma'ñ. ²⁰ Yíjadu'mbi jibic-huinma'ñ yajpocycäb jäy ajcxy ma Dios. Per co jäy ajcxy ycaay y'ügy, ma ca'ni ajcxy pocy ixpujciy jayíjp, ca' je' ypocycäy ajcxy ma Dios.

Tüg töxyjäy huídibi ca' judíojäy mibíjc Jesús

²¹ Chi Jesús jim chooñ, ñicxy ma je Tiro etz Sidón naaxjot. ²² Jim anajty tüg töxyjäy chinäy. Jada töxyjäy hue' anajty cananeajäy, canan judíojäy. Chi yí' nimíñ Jesús, chi ñimay:

—Huindzin, David y'ap y'oc, pa'ayoogích. ñich nmíidich tüg ñix huídibi ymíid ca'oybi etz oy tzaachypi paady.

²³ Per ca' ni nej Jesús y'adzoohi. Huin'it je' ydiscípulos ajcxy míñ ma Jesús, e ycohuaníy, míñañ ajcxy:

—Capxycíx míid jada töxyjäy, com nígo xypayaax xypadínaayim.

²⁴ Chi Jesús ymíñañ:

—Dios ñich ti xyquexyích jéda'ajty ma je israelitasjäy huídibi y'alma tigoyam.

²⁵ Chi je töxyjäy ymíjhua'ci ma Jesús, e ycojxtinay'ihuüy ma je yhuinduu, chi ymíñañ:

—Huindzin, tun may'ajt pubejtcich.

²⁶ Chi Jesús ymíñañ:

—Ca' jadu'n y'oyíty co n'ixmadzipich je israelitasjäy (Dios yjäy), e nbubedipich miich ajcxy. Co jadu'n ndunipich, jadu'n nipaadip nej jäy ajcxy y'idích co ajcxy píjci je ajcxy y'ung ycaagy, e möy je uc.

²⁷ Huin'it je töxyjäy y'adzooy:

—Janch tiy'ajt jadu'n nej miich míñañ, per ixti ycaayb je uc je tzajcaagy y'abu'x huídibi cäb ma yhuindzin mesa.

²⁸ Chi Jesús je töxyjäy ñimay:

—Janch mij mmíbjicín. ñich ndunaamybich jadu'n nej miich mdzocy.

Huin'it hori je töxyjäy ñix choocy.

Jesús yajtzögy mayba'mjäy

²⁹ Chi Jesús jim chooñ. Chi ñajxy ma Galilea mejypa'. Chi ypejty ma tüg cögop, jim ñay'ihuüy. ³⁰ E huiñ'tit oy mayjäy müdmüñ pa'mjäy huídibi huíntz, uum, címucy tecymucy, etz huen tím huídibi pa'mjäy. Pidacy ajcxy je pa'mjäy ma Jesús yhuínduu, e yí' yajtzoocay. ³¹ E je mayjäy ooy tzachjihuüy tzachhuinmaay ajcxy co anajty je uumbi ti capxígy, je huíntzpi ti y'ijxígy, je címucpy tecymucpyi ti yöyígy. Chi je mayjäy ytigüy ñibaady capxpaady Dios, je Dios huídibi je Israel jäy ymijpidacpy.

Jesús yajcay mídaax mil jäy

³² Chi Jesús mijhuoy je' ydiscípulos ajcxy, nimay:

—Ooy nba'ayooyich jadayaab jäy ajcxy. Com cujc midugüig xü ijtcixy ya müd ñich etz ca' ajcxy müdíty ti ycaayípy. Ca' nguexhuimbida'ñich ajcxy ayuu ma ytijc, ca' yjetyity yajpa'mgojip ajcxy tü'am.

³³ Chi je' ydiscípulos ajcxy mīnañ:

—¿Per ma n'ocpatim ti jada jäy ajcxy ycaayípy yjñcxípy ya ma jada abac it ma ca' pin chinäy? Co ooy mayjäyity.

³⁴ Chi Jesús yajtiy:

—¿Naag jüiby tzajcaagy müich ajcxy mjacmüdíty?

Chi ajcxy y'adzooy:

—Jëyi huixtujc tzajcaagy etz hueen acx.

³⁵ Chi Jesús nimay je mayjäy co huen ñay'ihuídaaygixy naaxcíxy. ³⁶ Chi Jesús conígy je huixtujcpi tzajcaagy etz je hueenip acx, e yajnajx Dioscojuyip ma Dios. Chi tujc-hua'cx etz moy je' ydiscípulos ajcxy. E yí' ajcxy yajhua'cx je jicxy pícy ma je mayjäy. ³⁷ Chi je mayjäy nidüg'ócíy ycaay cüxi. Jesús ydiscípulos ajcxy yajpidígy huixtujc cach cayduc uuctuc tübi anajty yconaxy. ³⁸ E je huídibi ajcxy cay hue' anajty naybáatigixy nimídaax mil, abicy je töxyjäydijc etz píctijc ajcxy. ³⁹ Chi Jesús ycapxycíxy müd je mayjäy huen ajcxy nícxcíxyñi ma ytijc. Chi Jesús ytigüy barcojoty etz ñicxni ma Magdala naax jot.

16

Je fariseos etz je saduceos ajcxy pijctzoogixy tüg ijxpejt mijhuinma'ñybi

¹ Chi je fariseos etz saduceos y'oy ajcxy ixxy Jesús. Yí' ajcxy ijxta'n octunaangixy müd Jesús, paady ajcxy pijctzoy co Jesús huen yaj'ixyüi ajcxy tüg ijxpejt huídibi tzomb tzajpjoty. ² Chi Jesús y'adzooy je' ajcxy:

—Co müich ajcxy m'ixy tzuu yí' tzajp tzaptz, chi müich ajcxy mīna'ñ com jabom oy tiempo yajpada'ñ. ³ Per co müich ajcxy m'ixy jopy je tzajp tzaptz etz huimbicy, chi ajcxy mīna'ñ co ca' y'oyity yí' tiempo. Müich ajcxy ooy mnaybidägyüi nejhüüy ooy m'ixpicyity ma Dios ytiy'ajt, e ca' yjanchity. Müich ajcxy jëbi yí' tzajp myajcapxy, per ca' mnejhuüygixy nej yhuimbídzimy yí' mijhuinma'ñ ijxpejt huídibi Dios ytumyb ma jadachambi xü tiempo.

⁴ Yí' jäy ajcxy huídibi cham tzinaayb, ooy yjibícjäyity ajcxy, ca' ajcxy capxymídox Dios. Yí' ajcxy chojcpy co nyaj'ixípyich tüg ijxpejt mijhuinma'ñ huídibi tzomb tzajpjoty. Ca' Dios yaj'ixa'ñ ajcxy jadüg mijhuinma'ñ, com müd müich ajcxy jaybetyity je mijhuinma'ñ ijxpejt huídibi Dios ytuun müd Jonás jecy'ajty.

Chi Jesús ixmajch je fariseos etz saduceos ajcxy, chi ñicxni.

Fariseos jäy ajcxy y'ixpícin

⁵ Co Jesús etz ydiscípulos ajcxy yja'ty ma jadüg nñiba', chi je' ajcxy yjäydgoy je tzajcaagy.

⁶ Chi Jesús ymīnañ:

—Naygüend'ájtigix müd yí' fariseos etz saduceos ajcxy, ca' mijpidaaci yí' ajcxy y'ayuc ytiy'ajt, com jadu'n yí' nipaady nej levadura.

⁷ Chi Jesús ydiscípulos ñayñimáayigixy müñ xyípy:

—Paady jadu'n ymīnañ, je' co ti ñich ajt je tzajcaagy njäydgooym.

⁸ Jesús nejhuiy nej ajcxy nayñimáayigixy miñ xyipy, chi nimay ajcxy:

—¿Na'amy co miich ajcxy mīnaangixy co ca' ajcxy tzajcaagy mīdity? Janch hueeni miich ajcxy mmībjicīn. ⁹ ¿Nej ca'nī miich ajcxy mhuinjihuīyī? ¿Nej ca' mjāyimechyī co īch mīgoox tzajcaayg nyajhuācxy etz ni mīgoox mil je yēdyictījc anajty huīdībī ajcxy cay? ¿E ni mga'ajihuīyīī ajcxy naag cach cayduc uuctuc tī myajpīdīgy? ¹⁰ ¿E ni mga'ajihuīyīī ajcxy co huixtūjc tzajcaagy nyajhuācxyīch ma nīmīdaax mil yēdyījc ajcxy huīdībī caay etz naag cach cayduc uuctuc myajpīdīgy ajcxy? ¹¹ ¿Nej co ca' miich ajcxy mhuinjihuīy, co ca' īch yam nigapxy yī tzajcaagy huīdībī miich ajcxy tī mjāyīdigoy, co tī nyajñīmaaygixy je levadura huīdībī je fariseos etz saduceos ajcxy ymīd?

¹² Huin'it Jesús ydiscípulos ajcxy huinjihuīy co Jesús ca' anajty je' tī yajñīmāyīī ajcxy co huen naygüend'ājīgixy mīd tzajcaagy levadura. Hue' janchtiy Jesús yajñīmāy ajcxy co huen naygüend'ājīgixy mīd je fariseos etz saduceos ajcxy y'ixpījicīn.

Pedro nidiy'aty co Jesús yī' je' je Cristo

¹³ Co Jesús yja'ty ma Cesarea Filipo naaxjot, chi Jesús y'amīdooy je' ydiscípulos ajcxy:

—¿Nej jāy ajcxy ymīna'ñ, pīnic īch?

¹⁴ Chi ajcxy ymīna'ñ:

—Nijējīty jāy ymīna'ñ co miich je' Juan je Bautista. Nijējīty jāy ymīna'ñ co miich je' Elías, e nijējīty ymīna'ñ co miich je' Jeremías o jadüg profeta (huīdībī tzīnay jecy'ajty).

¹⁵ Chi Jesús ymīnañ:

—¿E miich ajcxy nej mīnaangixy, pīn īch?

¹⁶ Huin'it Simón Pedro y'adzooy:

—Miich je' je Cristo, je Dios y'ung.

¹⁷ Chi Jesús y'adzooy:

—Jotcujc miich Simón, Jonás y'ung, je' co ni pīn xycayajñīmāy jada tīy'ajt, tūgpajc je Dios Teedy nDeedyīch huīdībī jīby tzajpjoty, yī' tī xyajnejhuīy jada tīy'ajt. ¹⁸ Īch miich nīmāy co miich mxī'adīyb Pedro, e hue' yhuīmbīdzīmy tzaa (hue' je', je tzaa tīja'ñ je ayuc huīdībī Simón ycapxy co je Cristo hue' je' anajty Dios), e ma jada tzaa jī ngoja'ñīch īch ndzajptījc (hue' yhuīmbīdzīmy, ma īch n'ane'mīn chondāga'ñ), e ni ca' oybī ymīc'ajt ycamīmadāgīpy. ¹⁹ Īch miich nmōhuaymīb je cōtūjcīn jadu'n nīpaady nej tūg ahuaast huīdībī mīd myaj'ahuādīpy Dios y'ayuc ytīy'ajt. Tūg'ócīy huīdībī miich mgapx'adujcpy ya naaxhuīñ, Dios nañ jadu'n capx'adugīpy jīby tzajpjoty, e huīdībī miich ya naaxhuīñ ca' capx'aducy, Dios nañ ca' capx'adugīpy jīby tzajpjoty.

²⁰ Huin'it Jesús nīmāy je' ydiscípulos ajcxy, co ca' huaad ni pīn nīmāy co yī' je' je Cristo.

Jesús nigapxy je' y'öcīn

²¹ Ixtī huīn'itnī Jesús ytīgīy yajñīmāy je' ydiscípulos ajcxy co nīcxamb jīm Jerusalén etz co jīm ooy y'ayoohua'ñ. Jīm Jerusalén je judío mījjāyījc, je teedytījc huīdībī tungmīdīpī, etz yī escribas ajcxy ooy chaachytuna'ñyīī etz yaj'ōga'ñyīī. Per codugīg xī huīn'it yjugypīga'ñ jadüg'oc. ²² Huīn'it Pedro mīdñīcxy Jesús ahuingujc, e oy ogy, ymīnañ:

—Huīndzīn, ca' Dios tzocy nīcx jadu'n mjaty. Mīd miich ca' jēbī jadu'n mjadīpy.

²³ Per Jesús yhuāc-huīmbījty, chi nīmāy Pedro:

—Huīnhuāctūtcīch Pedro, je mujcu' miich jadu'n xyajcapxp. Ca' nīgoo xy'adzīpyīch. Ca' miich mhuīnma'ñyībīdāgy nej Dios tzocy. Yī' janchtiy miich mhuīnma'ñ'ajtpy nej jāy ajcxy tzocy.

²⁴ Huīn'it Jesús je' ydiscípulos ajcxy nīmāy:

—Pen je pīnjaty xypamīna'ñīch, huen yci'mdzojicīn ixmajtztāy etz huen yhuīnma'ñypīdāgy co ayoohipy mīd īch ycīxpi, ixtī mabaad y'ögy. ²⁵ Huen pīnjāy huīdībī ca' ayoohua'ñ mīd īch ycīxpi, hue' je' yajtīgoyamy yī' yjugy'ajtīn. Per pīnjaty xypanīcxpīch oy nej ytīmījadīpy, hue' je' ypadamyb yjugy'ajtīn huīdībī ca' ycīxīpy ytīgoyīpy nīmīna. ²⁶ ¿Tī jāygīdaacīn yī' co tūg jāy y'ocnāyājpadīyb yī' mēñ etz mīc'ajtīn

huindu'my ñaaxhuiñybi, e yjugy'ajtin cixipy tigoyipy tücci'y? ¿Jadu'ñyi jëbi jäy y'alma yjugy'ajtin occojuyi? Nigi choohuity jäy ajcxy y'alma yjugy'ajtin, ca'ydi jac ni ti. ²⁷ Ich, je jäy huidibi tsoon tzajpjoty, miinaambich jadüg'oc ya naaxhuiñ miid je ángeles ajcxy etz miid nDeedyich y'oy'ajtin. Huin'it micuejtähua'ñ tüg'óciy je jäy nej anajty ti ytuungixy, pen oy, o ca' y'oyity. ²⁸ Janch tiy'ajt jadu'n nej nimaaygixy co ji ya naagity huidibi ca' y'öga'ñ ixti cooni xy'ixipyich jadüg'oc co ich anajty nmiin ane'mbi.

17

Co Jesús ñinix yajtigach

¹ Codudujc xii huin'it Jesús miidnicxy Pedro, Jacobo, etz y'uch Juan ma tüg mijcop, ma tüg cop huidibi ooy ycixity. ² E jim copcixy Jesús ñinix ñaygojtigajtzi ma Pedro, Jacobo etz Juan ajcxy yhuinduu. Jesús yhuiñyijp ytiñy adicxp nej je xii ytiñxin. E Jesús yhuít y'ahuimbijty janch poob jadu'n nej tüg tiñxin. ³ E timetiini oy ijxcixy Moisés etz Elías ycapxy miydägy anajty miid Jesús. ⁴ Chi Pedro nimay Jesús:

—Huindzin, oy y'oyity co ich ajt ya. Pen miich mdzojcpy jëbi ich ajcxy nyaj'oyiy tugiig tijcquemy. Tüg miich mje', tüg Moisés yje', etz tüg Elías yje'.

⁵ Pedro capxp anajty, tim huin'ity tüg joc yajnidigoyday je' ajcxy huidibi ooy adicxp anajty. E ma je joc yajmidoy tüg ayuc huidibi ymiñañ:

—Jadayaabi yëdyic ich je' n'ung'ajtpy huidibi ooy ndzocy njihuüyich etz yi' ich miid njotcujcity. Amidoo'it miich ajcxy yi' y'ayuc.

⁶ Co Pedro, Jacobo, etz Juan jadu'n midooy je ayuc chooñ jocjoty, chi ajcxy ooy chigiy etz ñayñitziitcidaaci ajcxy.

⁷ Huin'it ajcxy Jesús ñimiini etz ñidoñ ajcxy, e ymiñañ:

—Pidicix, ca' mdzigiygixy.

⁸ E co ajcxy y'ijxy, ca' anajty jim Elías etz Moisés. Naydügpajc Jesús yjac-hui'my miid je' ajcxy. ⁹ E co ajcxy ymiñajcy ma je cop, chi ajcxy Jesús nimay:

—Ca' ni pin miich ajcxy nyajnimähuiipy jadu'n nej ti m'ijxcixy cham, ixti cooni ich anajty ti njugypicyich jadüg'oc ma anajty ti n'ögich.

¹⁰ Huin'it je' ydiscípulos ajcxy yajtiy Jesús:

—¿Nej co yi escribas, yi' ajcxy huidibi nijaydutp etz yajniñuejp Dios y'ayuc, ymiñangixy co Elías yi' miinaam jayijp etz axam je Cristo?

¹¹ Chi Jesús y'adzooy:

—Janch tiy'ajt co Elías ymiñañ etz yaj'oyiydähuamy tüg'óciy miid Dios ycixpi. ¹² Per ich miich ajcxy nimaayb co Elías ti y'oy. E je jäy ajcxy ca' nejhuüy pin yi', e ooy jibic tuuñ ajcxy, nej tim tzojccixy. E ñañ jadu'n ich, je jäy huidibi tsoon tzajpjoty ayoohuaambich ma yi' ajcxy.

¹³ Huin'it je' ydiscípulos ajcxy huinjihuüy co Jesús hue' anajty ñigapxyp je Juan, el Bautista.

Jesús yajtzögy tüg jäy mo'tpa'mmiidpi

¹⁴ Co Jesús, Pedro, Jacobo etz Juan yjaty jim ma je mayjäy ajcxy, chi ñimiini tüg jäy. Chi je jäy ycoxtinay'ihuiy ma Jesús yhuinduu, chi ymiñañ:

¹⁵ —Huindzin, ich nmang pa'ayoohuc. Je' co ymiid mo'tpa'm etz oy yaj'iyoooyii. Canaag'oc ti ycäy jinjoty niñjoty. ¹⁶ Paady ich ti nmidmiñich ma miich mdiscípulos ajcxy, per ca' ajcxy ymadacy yajtzögipy.

¹⁷ Chi Jesús y'adzooy:

—Miich ajcxy huidibi jugy'ajtp jadachambi xii tiempo, ca' miich ajcxy mmibigañ Dios, ca' miich ajcxy mgapxymidoohua'ñ Dios. ¿Naag xii naag tiempo ich miich ajcxy njacmimexctugipy? Yajmiingix yi' yeeg'anäg.

18 Co je yeeg'anäg yajmüdja'ty ma Jesús, huin'it Jesús ane'my je ca'oybi co huen pidzim ma je yeeg'anäg. E mic'amy je' chögy.

19 Jac co hueeñi, je' ydiscípulos ajcxy müdmüdac Jesús ahuingujc, chi ajcxy yajtüy ma Jesús:

—¿Nej co ñich ajcxy ca' ti nmadägy nicx nyajpidzümgyxyich je ca'oybi ma je yeeg'anäg?

20 Chi Jesús yminañ:

—Je' co miich ajcxy hueeni mmibijcin. Janch tüy'ajt jadu'n nej nnimaaygixy, co ixypy miich ajcxy xy'ocmibicyich, ooy ixypy jëda'ajty jadu'n nej je jac mutzpi ujtz tium, huin'it jëbi ixypy mnimäy jadayaabi cop co huen jihuäcy ya etz huen nicxy huingduum, chi ñicxip je cop. Ni ti ji ycatzipy pen janch miich ajcxy müdity mibijcin. 21 Jadayaabi picy ca'oybi pidzimipy co Dios nmibijctzoohuim müctägy etz ayuu'ijt, ca' jac ti huinma'ñ.

Jesús nigapxy jadüg'oc y'öcin

22-23 Co anajty ajcxy yhuidity tügmucy jim ma Galilea y'it, chi Jesús nimay je' ydiscípulos ajcxy:

—Ich, je jäy huidibi tsoon tzajpjoty, yajcüyegipyich ma jäy. E yi' ajcxy xyaj'ögibich etz codugüg xü njugypigipyich jadüg'oc. Co je' ydiscípulos ajcxy jadu'n müdooy, chi ajcxy ooy yjotmaybaty.

Je cogüejtin ma je tzajptijc

24 Co Jesús yja'ty müd je' ydiscípulos ajcxy jim ma je Capernaum cajp, chi huidi anajty ajcxy meeñ yajmujcp müd tzajptijc ycixpi, oy ajcxy ijxcixy je Pedro, chi ajcxy y'amüdooy:

—¿Nej miich mhuindzin ycuejcpy meeñ müd tzajptijc ycixpi?

25 Chi Pedro y'adzooy:

—Cuejtpy.

E huin'it hora co anajty Pedro ytigüy tigoty, chi Jesús jayijp ymigapxy, ñimay:

—Simón, ¿nej mmina'ñ? ¿Pin je rey ajcxy yajcuejcpy? ¿Yi' yjäy o huingjäy?

26 Chi Pedro y'adzooy:

—Ma huingjäy huidibi ane'my ijtp.

Chi Jesús y'adzooy:

—Ah, ca'tz yi' yjäy huaad ti cuejtcixy. 27 Per ca' ndzocyich co je cogüejtpi nyajcapx-mayiyim, nicx miich ma yi mij laguun e cohuidzi' jiihy mxu'ñ, e je acx huidibi anajty jayijp huomb, je' myajpidzimipy, e ma y'ahuac jiihy mbaadipy tüg meeñ, yajpidzim je meeñ e nicx cuet müd ñich ycixpi etz müd miich ycixpi.

18

¿Pin je' jac nigü mijip?

1 Je huin'it hora je' ydiscípulos ajcxy ymijhuäctay Jesús etz yajtüy:

—¿Pinjäy je'jac nig ymüd je mij'ajtin ma Dios y'ane'my jiihy tzajpjoty?

2 Chi Jesús mijhuoy tüg je pi'c'anäg. Chi pidacy je pi'c'anäg cujc'amy ma yi' ajcxy. 3 Chi Jesús yminañ:

—Janch tüy'ajt ñich miich ajcxy nimäy, pen ca' miich ajcxy jothuimbijtcixy etz naybidaaccixy mhuinma'ñ jadu'n nej jada pi'c'anäg huinma'ñ müd, pues ca' mdigihuipy ma Dios Teedy y'ane'my jiihy tzajpjoty. 4 Paady, pinjaty müd yhuinma'ñ yung nax jadu'n nej jadayaabi pi'c'anäg müd yhuinma'ñ yung nax, je' je' je huidiib jac nigü mij'ajtin ymüd jiihy ma Dios y'ane'my. 5 Hueñypinity huidibi müd ñich ycixpi cöbigipy etz tzogipy tüg pi'c'anäg, jadu'n nej jada pi'c'anäg ti ndzocyich ti ngöbicyich, hue' jadu'n nipaady nej jihüiy ti xycöbicyich ti xychocyich.

Je huidibi ooycojotmayity co nbocähüim

⁶ Hueñypinity huídibi jibic-huinmañ ymibidzimy, e yajpocycäy yí jadu'mbi pi'ctijc huídibi ajcxy xymijnicxpejtpich, jac'oy ixypy co yí jadu'mbi jäy ytimyñayyöcxodziyüü tüg paandzaa etz ñayñajtzjibibihiipy meyyoty. ⁷ Ooy ayo'ñity ooy jibicity co ji naaxhuiñybi yajpaady tijaty huídibi yajtundigooby jäy ajcxy. Ni mina xii ca' tigooy y'idipy tijaty huídibi yajtundigoy je jäy ajcxy. Per mij ayo'n padañ miiid yí Dios pinjaty cojp tundigooyii. ⁸ Pen miich mgi' o miich mdecy xyajtundigooyb, jac'oy ixypy co mdim'ixpuxy etz ixjibipy jiguem. Nigi oy co mdigihuipy ciduc tecytuc jiiiby tzajpjoty etz ca'ydí co mdigihuipy miiid metz mgi' etz metz mdecy mijjinjoty huídibi nimina ycapich. ⁹ E pen yí mhuiin tug xyajpocycähuamb, tim yajpidzim etz ixcätz jiguem. Com jac'oy mdigihuipy miiid tüg mhuiin ma jugy'ájtín huinixiibi, ca'ydí co mdigihuipy miiid metz mhuiin ma yí jin huídibi camina xii ycapich.

Je y'ijxpejt, je cöbixy huídibi tigooy

¹⁰ Ca' m'ixtjicxy ni tüg pi'c'anäg huídibi xymibijcpich. Yi' ajcxy je' y'ángeles tim ijtüb jiiiby tzajpjoty ma Dios Teedy, ich nDeedy yhuinduu. ¹¹ Ich je jäy huídibi tzoön tzajpjoty, ti nmiiñich ya naaxhuiñ, je' co nyajnitzöga'ñich je jäy ajcxy y'alma huídibi tigooyam. ¹² ¿Nej miich ajcxy mina'ñ? Pen tüg jäy ymiiid migo'px cöbixy, etz pen yöydigooyb nidügti cöbixy, ¿nej ca' jébi ixmach je nimida'px majmocx midaax cöbixy etz nicxy ixtäy je jadügpí huídibi yöydigooy? ¹³ E pen ypatpy je tügpí huídibi yöydigooyb, chi ooy xondägy miiid co anajty ti paady huídibi anajty ti ytigooy, ca' jadu'n yxondägy miiid je nimida'px majmocx midaax huídibi ca' anajty ti yöytigooygixy. ¹⁴ Tim jadu'n nipaady miiid Dios Teedy jiiiby tzajpjoty, ca' tzocy co ni tüg jäy y'alma tigooyipy.

Nej huaad tüg mmigüg nhuinmeecxim

¹⁵ Pen miich mmigüg xytuñ jibic, miiidmiydac ahuingujc e yajhuinjihuí' ma ti ytundigooy, pen xy'ayuchuinjihuüy ti anajty mmínaymigügpiigyüü je mmigüg. ¹⁶ Pen ca' xy'ayuc-huinjihuüy, chi huoominipy tüg o metz mmigüg huídibi jébi nidiy'ajt'adipy miich m'ayuc. ¹⁷ E pen nañ ca' je' ajcxy ayuc-huinjihuühuañ, miiidnicxip ma mibijcpidijc yöymujctac e jim ajcxy myajnaxipy jadu'n nej tüg huídibi ca' Dios mibicy etz jadu'n nej tüg yajcogüejtpi huídibi ooy pocymiidity. ¹⁸ Janch tiy'ajt ich miich ajcxy nimäy, tüg'óciy huídibi miich ajcxy mgapx'adujcipy ya naaxhuiñ, Dios nañ jadu'n capx'adugipy jiiiby tzajpjoty, e huídibi miich ajcxy ya naaxhuiñ ca' capx'aducy, Dios nañ ca' capx'adugipy jiiiby tzajpjoty. ¹⁹ E nañ jadu'n ich miich ajcxy nimäy, pen ya naaxhuiñ miich ajcxy nimetz mnaygápaxigixy co tijaty mmibijctzohuaangixy ma Dios, Dios, ich nDeedy huídibi jiiiby tzajpjoty, xymöhuipy huídibi ajcxy mbijctzooyb. ²⁰ Com ma miich ajcxy nimetz o nidugüg naymújciigixy, jim ich n'ity cujc'amy ma miich ajcxy.

²¹ Chi Pedro y'amidooy Jesús yminañ:

—Huindzin, ¿naag'oc huaad nhuinmeecxych yí ajcxy huídibi xymiidundigooybich? ¿Nej nméecxibich ixti cooni huixtujc'oci?

²² Chi Jesús y'adzooy:

—Ca' yhuixtujc'ócity, hue' meecxipy midaax migo'px jamida'px majmocx midaax'oc.

Je tumbi y'ijxpejt huídibi ca'p ymigüg huinmeecxym

²³ Dios y'ane'min jiiiby tzajpjoty jadu'n nipaady nej tüg rey huídibi huijtz'oyiiyb miiid je ytumbidijc jajadu'ñi ajcxy yjacmínucxy'adyii. ²⁴ Je rey ytimyhuijtz'oyiiychondacyñi anajty cuentas, co oy yjädy tüg ytumbi huídibi anajty minucxy'ajtip canaag millón. ²⁵ Com je' ytumbi ca' anajty miiidity ti miiid migüediib je' yhuindzin. Huin'it je huindzin ane'my co huen je' ytumbi yajtoocnax quipxyi miiid y'ungdöxyijc etz tüg'óciy tijaty ymiiid, jaydeb ñuucxy y'adujctähuipy. ²⁶ Huin'it ytumbi ycoxtinay'ihuüy ma yhuindzin yhuinduu etz nimay: “Huindzin, pa'ayoogich, etz ich miich nmigüejtähuiipy.” ²⁷ Chi je tumbi yhuindzin yajtuñ pa'ayo'n, chi huinmeecxip je nuucxy, e yajpidzimy pujxtigoty. ²⁸ E mic'amy co je'

ypidzimy pujxtigoty, chi yminaybatí tüg ymigüg huidibi anajty mïd quipxyi ti ytuñ. Je' anajty minuucx'ajtip tim hueeni, chi je' yöcmimadziy je' ymigüg huidibi mïd ytuuñ, chi nimay: “Cuet huidibi mnuucx'ajtpy ma ñich.” ²⁹ Huin'it ymigüg ycojxtinay'ihuïy ma je' yhuinduu. Chi minuucx'taacy nimay: “Pa'ayoogich. ñich miich nmigüejtãhuïpy.” ³⁰ Chi je jadügpí ca' mecxtujcin yajtuuñ. Chi oy ymigüg pidägy pujxtigoty, ixti cooni anajty micuedyïi. ³¹ Co je jacjadyïi ymidumbidijc oy ixy jadu'n nej ti yajtuñ je' ymigüg, chi ooy ajcxy jihuiy. Chi ajcxy nicx ma je yhuindzin etz yajnimayday tüg'óciy nejyaty anajty ti ijxcixy. ³² Huin'it je' ajcxy yhuindzin oy yajhuoyii je huidibi minuucx'ajtip canaag millón. Chi nimay: “Miich ooy mdzachjibicjãyity. Ti ñich miich nhuinmeecxi tüg'óciy je mnuucxy, mïd co miich pa'ayoohuin mbijctzooy ma ñich. ³³ E miich nañ jadu'n ixyipy ti mba'ayoy je migüg huidibi mïd mmïduñ, huidibi xyminuucxy'ajtp, jadu'n nej ñich miich ti nba'ayooy.” ³⁴ Chi je huindzin ooy chachjotma'ty, chi pidacy ane'min co huen yajtzaachytuñ je' ytumbi mabaad cuejtãy tüg'óciy huidibi ñuucxy'ajtpy. ³⁵ Chi Jesús ycapxycijxni, minañ:

—Tim jadu'n nej jada rey ti tuñ mïd je ytumbi, nañ tim jadu'n Dios tunipy mïd miich ajcxy, pen ca' nidüg nidügti miich ajcxy ca' mhuinmeecxy je mmigügtijc amumdügjot.

19

Jesús yaj'ixpicy mïd co jäy ytöxyijc ixmach

¹ E co Jesús capxtay jada ayuc, chi choñ Galilea, chi oy yjädy ma Judea it jim Jordán mij niñ nïnaxy. ² Chi ooy mayjäy ypanicxi, e jim yajtzoocy huidijaty anajty yuu mïd pa'm mïd.

³ Huin'it nijëjty je fariseos ajcxy nimiiñ Jesús co yajmachcãhuaangixy anajty. Chi ajcxy y'amidooy:

—¿Nej janch co Dios ti xymooyim cõtujcin co jëbi tüg yëydijc ixmadzip ytöxyijc mïd tim hueeni ti capxy ti ayuc?

⁴ Chi Jesús y'adzooy:

—¿Nej ca'ni miich ajcxy m'ixy mgapxy ma ymiiñ jaybety ma Dios ñecy co je naaxhuiñybi chondacy, co Dios oga ñ yajcojy tüg'óciy tijaty huidibi ji'ajtp co “Dios yajcojy tüg yëydijc etz tüg töxyjäy”? ⁵ Nañ jadu'n Dios yminañ: “Je yëydijc y'ixmadzip ytaj yteedy etz pudigihuïpy je' ytöxyijc. E je yëydijc etz ytöxyijc tú'ciy idaangixy.” ⁶ Paady ca' ñimetziy ajcxy, com je yëydijc etz ytöxyijc tügmucy y'idaangixy. Com Dios ti huijtmucy je yëydijc mïd je töxyjäy, paady ca' huaadity co jäy ajcxy huijtzhuäcxyp tãibi Dios huijtmucy.

⁷ Huin'it je fariseos ajcxy y'amidooy Jesús:

—¿Na'amy co Moisés cõtujcin ti yejcy jecy'ajty co tüg yëydijc jëbi huaad ixmach ytöxyijc, e möhuïpy ñinecy ñidiy'ajt e jadu'n jëbi ixmach?

⁸ Chi Jesús yminañ:

—Moisés jada cõtujcin ti xymooygixy co jëbi m'ixmajtcixy mdöxyijc mïd co miich ajcxy mdzachcõjuuñity, ca' mgapxymidohuaangixy Dios. Per co je naaxhuiñybi chondacy ca' anajty jadu'nity. ⁹ Janch tiy'ajt jadu'n nej ñich miich ajcxy nimaaygixy co je yëydijc huidibi yajjayhuäcxp mïd je ytöxyjäy, e je ytöxyjäy ca' anajty ti ytundigooyb mïd huingbi yëydijc, hue' je' yëydijc ytundigooy co ixmach ytöxyijc etz ypijctigach mïd huingbi. Nañ tim jadu'n pen tüg yëydijc ypiy mïd tüg töxyjäy huidibi ñäy ti y'ixmachyïi, hue' tundigooyb anajty je yëydijc.

¹⁰ Co Jesús ydiscípulos ajcxy midooy jada ayuc, chi ajcxy yminañ:

—Pen jadu'n jëdu'n je tiy'ajt co je yëydijc ca' huaad ixmadzip ytoxyjäy, jac'oy co ca' nbijcim.

¹¹ Chi Jesús yminañ:

—Ca' tüg'óciy je jäy huinjihuïy jadayaabi tiy'ajt. Jëyi ajcxy huinjihuïp pin ajcxy Dios pidaaci co huinjihuïp. ¹² Ji canaagnax je ayuc je huinma'ñ nej ca' yjëbity ypijpy

je yëydijc. Naagity pi'ctijc yma'xung'aty e ca' yca'pxity ñinicy, paady ca' picy ajcxy. E nijëjity je yëydijc ca' huaad ypic, mïid jëgixpi co anajty je' ti ymijaapigiyi. E nijëjity yëydijc hui'my jaybicy mïid jëgixp co ajcxy ytuñ ma Dios ytung, je Dios huïdibi ane'myb tzajpjoty. Pinjaty cöbigamy ïch n'ayuc huen cöbicy.

Jesús conucxy maybi'ctijc

¹³ Chi naagity je jäy mïidnicxy y'ung y'anäg ma Jesús jaydëb yajcñixajipy etz Dios mïbijctzoy mïid yi' ajcxy ycixpi. Chi Jesús ydiscípulos ajcxy ogy je jäy ajcxy huïdibi anajty mïid miimb je y'ung y'anäg, nïmaaygixy co ca' jadu'n y'oyity. ¹⁴ Per Jesús ymïnañ:

—Huen mïid mïiñ ajcxy pi'c'anäg ma ïch, ca' mjijpcogapxiygixy. Com pinjaty ymïbijcp ïch ngapxy n'ayuc, jadu'n nej jadyaabi pi'c'anäg ajcxy ymïbicy, je' ajcxy tigihuaam ma Dios y'ane'my jïby tzajpjoty.

¹⁵ Chi Jesús cñixajy je pi'c'anäg ajcxy. Chi ñicxni.

Tüg yeeg'anägnip comeeñybi mïidmïydägy Jesús

¹⁶ Chi tüg yëydijc oy icy Jesús. Chi y'amidooy:

—Huïndzin, ¿ti jada' co oy ïch ndunipyich jaydëb nbaadibich jugy'ajtin huïdibi ca' ycixipy ytigoyipy?

¹⁷ Chi Jesús y'adzooy:

—¿Na'amy co xyñimäyich co oy huïndzin ïch? Dios tügpajc oyip, ca' jac pin. Pen miich mdzojcpy co mbada'ñ jugy'ajtin huïdibi ca' ycixipy ytigoyipy nïmïna mguydunipy je Dios ycötujcïn huïdibi Moïses ycojaay jecy'ajty.

¹⁸ Chi je yeeg'anäg yajtihuimbijty:

—¿Huïdibi cötujcïn miich mdijp?

Chi Jesús ymïnañ:

—Ca' migüg myaj'ögipy. Ca' migüg ytöxyjc migapxtigooyipy. Ca' mmeedzip. Ca' mmigüg mhuïn'ïnip. ¹⁹ Yajmij'at mdaj mdeedy. Mdzogipy mjihuihuip miich mmigügtijc, tim jadu'n nej miich ci'm mnaychogyi.

²⁰ Chi je yeeg'anäg Jesús nïmaayi:

—Ti nguydündäyich jadyaabi cötujcïn ajcxy maabi ïch nbi'c'atyich. ¿Ti jada nja-cyajtigoy'ijtpyich?

²¹ Chi Jesús jadüg'oc y'adzooy:

—Pen miich m'idam tudägy, nicx tooctigoyda' huïdijaty miich mïd, etz mo' je meeñ je jäy ajcxy huïdijaty ayoob. Co jadu'n mdunipy, chi mbaadipy oy'ajtin jïby tzajpjoty. Co jadu'n mdooctähuipy tijaty miich mïd, chi miinip jadüg'oc ma ïch nyajpaadyich, e pajamgich.

²² Co je yeeg'anäg jadu'n mïdooy, chi ñicxni taj may com ooy anajty chachcomeeñity.

²³ Huïn'it Jesús nïmay je' ydiscípulos ajcxy:

—Janch tïy'ajt jadu'n nej nïmaaygixy co ooy ymïjhuïnma'ñity co tüg comeeñyjäy ytigihuiipy ma Dios y'ane'my jïby tzajpjoty. ²⁴ Jadüg'oc nïmïna'ñich co ooy chipity co tüg comeeñyjäy tigihuiipy ma Dios y'ane'my, nïgi ca' chipity co tüg camello ñaxipy ma tüg xu'ñ'ijx yxutity.

²⁵ Co Jesús ydiscípulos ajcxy jadu'n mïdoy, chi ajcxy ooy jihuiy huïnmay. Chi ajcxy ñay'amïdoohui mïñ xyipy:

—¿Pin jëbi paady je' y'alma nïdzocïn?

²⁶ Chi Jesús ajcxy huïdicxpejty etz nïmay:

—Je huïdibi jäy ajcxy chipjihuïyb, mïd Dios ca' ni ti chipity.

²⁷ Huïn'it Pedro ymïna'ñ:

—Huïndzin, ïch ajcxy ti n'ixmajtztäyich tüg'ócy huïdijaty anajty ïch ajcxy nmïd etz nbanicx ïch ajcxy miich. ¿E ti jada' ïch ajcxy nbaadaamybich?

²⁸ Chi Jesús y'adzooy:

—Janch tiy'ajt nmina'ñich co anajty je xii je tiempo paady mina Dios yajtigajztähüpy je tzajp etz naaxhuiñybi, co anajty ñich, je jäy huidibi tsoon tzajpjoty, n'ityich ma ngötujctacich oybi jiiby tzajpjoty, chi miich ajcxy huidi ti xypahuidityich, miich ajcxy mbadamy majmetz cötujctac, e miich ajcxy mdiydunipy je majmetz picypí Israeljäy ajcxy. ²⁹ E tüg'óciy jäy ajcxy huidibi ti ixmajtztäy yjin ytijc, y'uch ymígüg, y'ung ytöxyijc, y'ung y'anäg, ytaj yteedy, o ycam ytu' müd ñich ycixpi, yi' ajcxy ypadamyb migo'px'oc, ca'ydí huidibi ti ixmach. E ypadamy je jugy'ajtin huidibi ca' ycixipy ytigoyipy ni mina. ³⁰ Mayjäy ajcxy huidibi cham ymüd mij'ajtin cötujcin, tzajpjoty ca' ajcxy müd'adañ mij'ajtin cötujcin. E mayjäy huidibi cham ca' müdity ajcxy mij'ajtin cötujcin, tzajpjoty ymüd'adamy ajcxy mij'ajtin cötujcin.

20

Je naymiduniptijc y'ijxpejt

¹ Jadu'n Jesús yminañ:

—Je Dios y'ane'min jiiby tzajpjoty jadu'n nipaady nej tüg cogambi huidibi ooy mij cam müdity. Chi je cogam jopyñi choñ ma oy nicxy ixtäy tumbidijc ajcxy huidibi yajpidigipy yi uva cosecha. ² Chi ycapxytuñ müd nidüg nidüg ytumbi co mujuya'ñ tüg denario meen tüg xibi. Chi quejxy nidüg nidüg ytumbi ma je uva cam. ³ Chi petyxii je cogam ñicxy jadüg'oc tumbi ixtaayb. Chi paty cajp cujc nijëjity tumbi huidibi ca' ti tung müdity. ⁴ Chi je cogam je tumbi ajcxy nimay: “Ñicx miich ajcxy tuñ ma ñich ngosecha. Cham nmujuyipy jadu'n nej ytiy'ajtity.” Chi ñicxy ajcxy midumbi. ⁵ Chi je cogam ñicxy jadüg'oc cujcxii tumbi ixtaayb. Nañ jadu'n nicxy jadüg'oc minacyxii. ⁶ Nañ tim jadu'n tzuu jadüg'oc je cogam ñicxy tumbi ixtaayb, chi paty nijëjity cajpcujc huidibi ca' ti tung müdity ajcxy, chi ajcxy nimay: “¿Na'amy co miich ajcxy myaajity? ¿Nej co ca' mnicxy mdungixy?” ⁷ Chi je' ajcxy y'adzooy: “Je' co ca' ñich ajcxy pin ti xycapxytuñ.” Chi je cogam ajcxy nimay: “Ñicx miich ajcxy tun ma ñich nnaaxjot. Cham iya nmujuyipy jadu'n nej ypaadyii.” ⁸ Co oy ycodziyñi, chi je huindzin nimay je huidibi nigop'ajtp je tung: “Ñicx mijhuoodäy je tumbidijc etz mujuyipy. Mujuy jayijp huidibi ti ymiñ axam tumbi etz jim nicxy myajcogixiy ma huidibi anajty ti miñ jayijp tumbi.” ⁹ Chi ajcxy jayijp yajmujuy je tumbi ajcxy huidibi anajty ti ytiñy tumbi axam. Chi yajmujuy ajcxy jadu'n nej anajty jäy ñaymujuyii je tüg xibi. ¹⁰ Co miñ je tumbi ajcxy je huidibi ajcxy jayijp tigiy tumb. Chi ajcxy jot'ajti co jac'anaxy yajmujuya'ñ. Per quipxyjaty ajcxy paty tüg meen nidüg'óciy je tumbidijc. ¹¹ E co ajcxy quipxyjaty yajmujuy, chi ajcxy ytiñy jotma'tpi. ¹² Chi ajcxy nimay je cam huindzin: “¿Na'amy co quipxyjaty ñich ajcxy ti xymujuyich müd je huidibi ti miñ axam tumbi? Yi' ajcxy tüg jaxigy ti ytuñ, e ñich ajcxy tüg xii je anbi ti ngöbicyich.” ¹³ Chi je cam huindzin y'adzooy, nimay nidügti je' ajcxy: “Miich, ñich nmígüg, ca' ñich jibic ti nduñich müd miich. ¿Nej ca' ñich ajt ngapxytuunim co jadu'n nmujuya'ñ tüg denario meeni? ¹⁴ Con yi mmeen, e nicxni. Jadu'n ndzocyich co quipxyjaty nmujuya'ñich miich müd huidibi ti ymiñ axam ma je tung. ¹⁵ ¿Nej ca' huaad ñich nduñich müd ñich nmeen nej ndzocyichi? ¿O co xyajca'oy'ixyich, co ñich ooy n'oyjäyity?” ¹⁶ E huidibi ajcxy jaccogixiyb, yi' ajcxy jayijp'adam. E huidibi ajcxy jayijp'ajtp cham, yi' ajcxy yjaccogixihuamb. May ooy yjayjhuoomiñ e hueeni huidi huin'ijxipy.

Jesús capxyidzimy jadüg'oc co y'ögañ

¹⁷ E co Jesús anajty ñicxy ma Jerusalén tü'aa, chi müd nicxy ahuingujc je nimajmetzpi ydiscípulos. Chi ajcxy nimay:

¹⁸ —Jadu'n nej miich ajcxy m'ijxy mnejhuñy cham ñich ajt nba'ttigüym jim Jerusalén. Jim Jerusalén ñich, je jäy huidibi tsoon tzajpjoty, xyajcýyegaamich je teedy mjtungmüdpí etz escribas ajcxy. Nyajtyduna'ñich etz pidäga'ñ ajcxy ané'min co n'ögibich. ¹⁹ E yi' ajcxy

xyciyega'ñich ma je huídibi ca' yjudiojáyity, jigix xyñixigibich xyajxigibich, xycoxipich, etz xyajcruutzpedipich ajcxy. E co n'ögibich, chi njugypigipyich codugüg xii.

Huidibi Jacobo etz Juan ytaj ypijctzou

²⁰ Chi je Zebedeo ytöxyijc nimiiñ Jesús mïd metz je ymang; Jacobo etz Juan. Huin'it je ungdaj huingojxtinay'ihuüy Jesús, pijctzoy may'ajt. ²¹ Chi yajtüy Jesús:

—¿Ti mdzojcpy?

Chi je ungdaj y'adzooy:

—Tun may'ajt möhuipy ñich metzpi yi nmang yi jacmijtung ma miich m'ane'min, jaydëb ññahuipy ma miich mmijc, tüg a'oy'amy etz jadüg anajty'amy.

²² Chi Jesús y'adzooy:

—Miich ajcxy ca' mhujnjihuüy ti ajcxy mbijctzooyb. ¿Nej mmínaxa'ñ myajnaxa'ñ miich ajcxy je tzaachypi huídibi ñich nmínaxamy nyajnaxamyich? Jadu'n nej jihuüy m'üga'ñ ajcxy je ta'm ñi huídibi ñich n'ügamy e mbaada'ñ je ñibejtin huídibi ñich nbadamyb.

Chi je' ajcxy y'adzooy:

—Jëbi.

²³ Chi Jesús ymina'ñ:

—Janch tiy'ajt nej miich ajcxy mina'ñ co mmínájxcixipy myajnájxcixipy je tzaachypi huídibi nnaxa'ñich. Per ca' ñich cötujcin nmïdidyich co ñich miich ajcxy nbidägipy mijtungmïd, co myajpaadip tüg ma ñich nmijc a'oy'amy e jadüg anajty'amy. Hue' janchtiy Dios Teedy ymïd ni'ixi' pinjaty ti huin'ixy jaydëb yajnicxip je mijtung ma ñich n'ane'mdac.

²⁴ Co je nimajcpi ydiscípulos ajcxy nejhuüy jadu'n nej Jacobo etz Juan pijctzooy may'ajt ma Jesús, chi ajcxy ooy mijotma'ty Jacobo etz Juan.

²⁵ Huin'it Jesús mijcapxy je' ydiscípulos ajcxy, chi nimay jadu'n:

—Miich ajcxy mnejhuüy co yi jáy ajcxy huídibi mijtungmïdipi ma je maybi naax cajp, mic ajcxy ane'my je naax cajp. Nañ jadu'n yi' ajcxy huídibi mic'ajt mïd ma je maybi naax cajp, mic ajcxy ane'my je jáy ajcxy. ²⁶ Per miich ajcxy ca' mjadu'nity nej je mijtungmïdipi ma je maybi naax cajp. Pinjaty miich ajcxy je mij tung yajnicxip, copicy ñaybidägüyb nej tüg tumbi. ²⁷ Pen ji miich ajcxy nidüg nigohuajc'ada'ñ, copicy ñaybidägüyb nej tüg tumbi. ²⁸ Com ñich nañ jadu'n, je jáy huídibi tsoon tzajpjoty, ti nmiiñich ya naaxhuñ jaydëbi nbubedipyich yi mayjáy ajcxy. E canan yi' ajcxy xpubedipich. Ngüyegaamyich njugy'ajtin ma yi o'cin mïd je mayjáy ycixpi, jaydëbi ngohua'ñich jáy ajcxy y'alma huídibi tigoyam.

Jesús yajtzoocy metz jay huintzpi

²⁹ E co Jesús etz ydiscípulos ajcxy ycajppidzimy jim Jericó, chi ypanicxi ajcxy mayjáy.

³⁰ E jim anajty ñaay nimetz huintzpi tüba'áy. E co ajcxy nejhuüy co jim anajty ñaxy Jesús, chi ajcxy yaaxpi jojcp:

—Huindzin, David y'ap y'oc, tun may'ajt ñich pa'ayoog.

³¹ Chi je mayjáy ajcxy ojcooty je metzpi jáy huintzpi, nimay ajcxy co huen amoñ. Per je huintzpi ñigi minan'idich:

—Huindzin, David y'ap y'oc, tun may'ajt ñich pa'ayoog.

³² Huin'it Jesús ytinayxijp, e yminañ:

—Ocmín miich ajcxy ya.

Huin'it yajtüy:

—¿Ti mdzojcpy ndunipyich mïd miich?

³³ Chi ajcxy ñimaayi:

—Huindzin, ndzojcpyich co xyajhuindicxigibich.

³⁴ Huin'it Jesús pa'ayoogoty ajcxy. Chi ajcxy ñidoní ma je' yhuin, e mic'amy je huintzpi ajcxy y'ijxígy. Chi Jesús ajcxy panicxy.

21

Jesús ytigüy jim Jerusalén

¹ E co anajty Jesús etz je mayjäy ajcxy ti mihuingoni Jerusalén, chi yja'ty ma Betfagé cajt mihuingon je Olivos cögop. E jim Jesús quejxy nimetz ydiscípulos ajcxy. ² Chi ajcxy nimay:

—Níxcix ma je cajt huidibi jim'amy. E jim tüg burro ycoxochity müid y'ung. Coguetjtüdüp ajcxy je burro e yajmiingix ya ma ich. ³ E pen jim pin nej xyñimäy, nima' co je Huindzin yajtunam, e yajhuimbida'ñ mic'amy.

⁴ Jadayaabi oy jadu'n ytuñyüi yjadyüi ycixy yca'pxy jadu'n nej je profeta jecyüp jaay, co jadu'n ymïnañ:

⁵ Yajnimay je jäy ajcxy huidibi tzinaayb jim Siön (Jerusalén), oc'ijxcix, chi miiñ ajcxy je mrey, yung nax yjot yhuinma'ñ müidity je mrey, etz burrocixy miiñ. Ma tüg burro mang huidibi ytaj tzimay yajyöyp.

⁶ Chi je metz ydiscípulos ajcxy cuyduñ nej anajty Jesús ti y'ane'myüi. ⁷ Yajja'ty ajcxy je burro müid ymang. Chi Jesús ydiscípulos ajcxy jibe'ñ je metzpi burro müid ajcxy yjocxhuit, chi Jesús yaj'ñay je burro mang. ⁸ E je mayjäy ooy yajhuinyëby ajcxy je tü'aa müid yhuít, chi ajcxy oy ypuxy quipy y'aacx. Chi ajcxy pidacy ma je tü'aa. ⁹ E jim ñajxy je burro, e je mayjäy huidibi nícxp jayjip, e nañ jadu'n huidibi anajty mimb axam, ooy ajcxy ytigüy huambi jihuiyb, chach mïnaangixy:

—¡Hosana! ¡Gloria a Dios! ¡Ooy ycomayty Dios! Huen capxpaady idipy jada yëdyjc huidibi mimb ma y nHuindzin Dios yxü etz müid ymic'ajt. ¡Gloria a Dios!

¹⁰ Co Jesús ytigüy jim Jerusalén, chi tüg'ócüy je mayjäy huinmay'ahuídyty, chi ñay'amidóohuigixy miñ xyipy:

—¿Pin yí yjüibi jäy?

¹¹ Chi mayjäy y'adzooy:

—Yí je' je profeta Jesús huidibi tsoon ma Nazaret cajt ma Galilea it.

¹² Huin'it Jesús ytigüy ma Dios ytijc. Chi ixquejxtay tüg'ócüy je ajuybi adoocpi huidibi anajty yajpatp jüby. Chi tijhuimbijttay tüg'ócüy je mesa ma anajty jäy jim ymeeñyhuingogongixy, etz nañ jadu'n tijhuimbijttay je muuxytoocpi ñaybejt. ¹³ Chi jadu'n nimay ajcxy:

—Jaaybety jadu'n ymiiñ ma Dios ñecy: “Ích ndijc je' yí ma jäy ajcxy Dios mibijctzoy”, per müich ajcxy hue' yí mhua'ñ meetzpi tijc.

¹⁴ E co anajty jüby tzajptigoty Jesús, chi jüby ñimiini huídyaty anajty huíntz, huídyaty anajty cïma'ty tecyma'ty, chi Jesús yajtzoocytay. ¹⁵ Per je teedy ajcxy huidibi müitungmüid etz je escribas ajcxy ooy müjotma'ty Jesús co ajcxy ijxy nejhuüy jadu'n nej Jesús anajty tuñ müjhuinma'ñ. Etz nañ jadu'n ajcxy ijxy co je pi'c'anäg anajty ajcxy yhuaangixy yjihuüygixy jüby tzajptigoty, ymïnaangixy: “¡Huen cömay'idipy je rey David y'ap y'oc!”

¹⁶ Chi je teedy etz escribas ajcxy Jesús nimay:

—¿Nej ca' müich mmidooy nej je pi'c'anäg chach mïnaangixy?

Chi Jesús y'adzooy:

—Nmidooybich. ¿Nej ca' müich ajcxy mgapxyñi Dios ñecy ma ymiiñ jaaybety co jadu'n ymïna'ñyí?:

Ti myaj'ixpicy üy ma je pi'ctijc ma'xungdjic jaydëbi ajcxy übaadip capxpaadip Dios.

¹⁷ Chi Jesús ycapxycixy müid je teedy etz escribas ajcxy etz choon jüby tzajptigoty. Chi ñicxy ma Betania cajt, e jim yajnaxxy je tzumbi.

Jesús capxpojcy je higeri ca'p anajty ytïm'aty

¹⁸ E co yxüimiy ytücxüy, chi Jesús yhuimbijty Jerusalén. E ma anajty tim ytüyöy, jim yuuböccooti. ¹⁹ E jim ijxy ma tüba' tüg cop je higeri quipy. Chi ninicxy. Chi pä't'ijxy, per ca' anajty ni tüg ytïm, jëda'ajty je' y'aay. Chi Jesús nimay je higeri quipy:

—¡Ni ca mīnaa xii mdūm'adipy!

E mic mīciyi je higueri quipy ytīch. ²⁰ E co je' ydiscípulos ajcxy jadu'n ijxy, chi ajcxy ooy huinmay. Chi ajcxy y'amidooy Jesús:

—¿Na'amy co yi higueri quipy mic'amy ti ytīch?

²¹ Chi Jesús y'adzooy:

—Janch tiy'ajt jadu'n nej nīmaaygixy. Pen miich ajcxy mīd je mībijcīn, etz ca' ajcxy mmībicy aametz jotmetz, jēbi mijhuinma'n mdungixy nej īch ti nduñīch. E nañ jadu'n jēbi jac mījpi mijhuinma'ñ mdunipy ajcxy. Jēbi ajcxy tun cop mnīmāy: “Quēg ya, tīgī' mejjoty” e xycapxymīdohūipy ajcxy je tun je cop. ²² E tūg'óciy tijaty miich ajcxy mbījctzooyb huen ytimytijyity, pen mmībijcp ajcxy, mbaadip ajcxy.

Jesús ycōtūjcīn

²³ Co Jesús yja'ty Jerusalén, chi ytīgīy jadūg'oc ma Dios ytījc. E jīby anajty yaj'ixpicy je mayjāy, chi ñīmīni je teedy mījtungmīdipi etz judío mījjāydīc ajcxy. Chi ajcxy y'amidoohūi:

—¿Ma cōtūjcīn ti mbaady co jadu'n mduñ tzajtīgoty? ¿Pīn jada cōtūjcīn ti xymōy?

²⁴ Chi Jesús y'adzooy:

—Nañ jadu'n īch miich ajcxy nyaj'amīdoohuamy tūg ayuc. Pen m'adzooyb ajcxy jada ayuc, huin'it īch miich ajcxy nyajnīmāhuipy ti cōtūjcīn īch mīd nduñ hūidījaty. ²⁵ ¿Pīn quejxy je Juan, je Bautista, yajñībējtpi, Dios o jāy ajcxy?

Chi ajcxy ñayñīmāyigixy miñ xyipy:

—Co ixipy ajt n'adzoohūim co Dios Juan quejx, huin'it xy'adzoohūim: “¿Na'amy co miich ajcxy ca' mmībijcy Juan?” ²⁶ Per nañ jadu'n ca' huaad nmīnaanīm co jāy ajcxy yajñībīcy Juan, com nejhūyīm co yi mayjāy mībijccīxy co je' anajty Dios tūg y'ayucnajtzcāpxīybi.

²⁷ E paady ajcxy jadu'n adzooy Jesús:

—Ca' īch ajcxy nejhūyīgixy.

Huin'it Jesús ymīnañ:

—Nañ jadu'n īch ca' nigapxa'ñīch pīn je' ycōtūjcīn mīd nduñīch hūidījaty.

Je metzpi ung ijpējt

²⁸ Chi Jesús ymīnañ:

—¿Nej m'oc'ixy m'ocjaygugi' jadaayaabi ixpejt? Tūg je yēydīc ymīd anajty metz je' ymang. Chi nīmay je mījpi: “Nīcx cham m'octuñ ma īch n'uva cam.” ²⁹ Huin'it je' ymang y'adzoohūi: “¡Ca' nīcxa'ñīch!” Chi jaccōhueñyi je' ymang yhuinmaydigajch, chi ñīcxy tumbi. ³⁰ Chi je ungdeedy oy ixy je ymang mutzpi. Chi nañ jadu'n nīmaay co huen nīcxy tuñ. Chi je' ymang mutzpi y'adzooy: “Oy, cham nīcxībīch.” Per ca' ñīcxy. ³¹ ¿Hūidi je' nidūgti ycuyduuñ nej anajty yteedy tzocy?

Chi ajcxy ymīnañ:

—Je' ymang mījpi hūidībi jāyīp nīmay.

Huin'it Jesús nīmay ajcxy:

—Janch tiy'ajt jadu'n nej nīmaaygixy co je hūidībi ajcxy yajcōgūējtpi etz je tōxyjāy ajcxy hūidībi tundīgooyb mīd yēydīc, je' ajcxy tīgīhuamb jāyīp ma Dios y'ane'my jīby tzajpjoty, ca'ydī miich ajcxy. ³² Paady ycīxpi oy ymīñ je Juan hūidībi jāy ajcxy yajñībējt, Juan yajñī'ixīygixy je mayjāy nej ajcxy jēbi yjothūimbīdīpy ma Dios. E miich ajcxy ca' mībijcy jadu'n nej Juan ymīnañ. Per je' ajcxy hūidībi yajcōgūējtp etz je tōxyjāydīc hūidībi tundīgooyb mīd yēydīctījc, ymībijc je' ajcxy Juan. Oy miich ajcxy mja'ījxy, per ca' mjothūimbīdaangixy etz ca' mībigaangixy.

Je naymīduunīptījc jībīcjāybi ajcxy y'ijpējt

³³ Chi Jesús ymīnañ:

—Oc'amidoo'ijtcix jadayaabi iixpejt. Ji anajty tüg je huídibi nihuindzin'ajtp mijpi je tundac. Chi je cogam uvas cojy ma je ytundac etz jügajy. Chi yaj'oyiyy ma anajty jébi je uvas ñi yajniğidägaani. Nañ jadu'n cojy tüg tzaaboch cixpi, jigix jébi cuend'aty ycam. Co yaj'oyiyday, chi je cogam yejcy pijctzoy je ycam ma je jäy ajcxy huídibi naymidunaanip. Chi oy chooni je cogam nicxy viaje tumbi. ³⁴ Je huin'it tiempo co yhuaad'ajtni je cosecha, chi je cogam quejxy nijējity ytumbi jim ma huídibi anajty ti yajpijctzoy je ñaax co huen möyii je huídibi yi' paadaanip. ³⁵ Per je jäy huídibi anajty ti naax pijctzoy, chi ajcxy majch je tumbi. Chi ajcxy ooy huínhuojpy jiphuojpy tüg. Chi ajcxy huingäch jipcäch jadüg. Chi ajcxy je midugiipi yaj'o'cy. ³⁶ Chi je conaax cogam huingbi ytumbidijc quejxy. E nañ jadu'n ajcxy oy tungixy jadu'n nej anajty ti tungixy je jayijp'atypi. ³⁷ Chi yci'm'ung oy quejx cogixiyñi. Hue' jot'ajti co yajmij'adiyb je' y'ung. ³⁸ Per co ajcxy je tumbidijc iixpaty je cogam je' y'ung, chi ajcxy ñaygapxi: “Tzoc ajt yaj'o'cim je cogam ymang, com yi' je' mihui'mamb je' yteedy je yjugy'ajtin je ypidägy. E co ajt nyaj'o'cim, chi ñch ajt nmihui'mim je cam.” ³⁹ Chi ajcxy majch je cogam ymang. Chi ajcxy huijtzpidzimy ma je tundac. Chi oy yaj'öccixy.

⁴⁰ Huin'it Jesús yminañ:

—Co anajty ti miiñ je conaax je cogam, ¿ti jada' y'octunipy miid je tumbidijc ajcxy?

⁴¹ Chi je teedytjic etz mijjäydijc y'adzooy:

—Je cogam yaj'ögiipy yjiibi jibicjäydijc, ca' ajcxy pa'ayoohuipy, etz yegipy je uvas cam pijctzoy ma je huingbi jäy huídibi yegipy je pidägy huídibi cogam paatip.

⁴² Chi Jesús yminañ:

—¿Nej ca'ni miich ajcxy mgapxy ma miiñ jaaybety ma Dios ñecyi? Jadu'n yminañ:

Je yēydijc huídibi je jäy ajcxy ca' anajty tzocy, Dios ti pidägy mij'ane'mbi. Tim jadu'n nipaady nej tüg tzaa oybi huídibi je pojtzpidijc ca' ajcxy yajtunañ, e je' je' oy ti yhuimni ma anajty yjaccopicyty. Je Huindzin Dios jada tung ti tuñ, e ooy oy n'ijxim yi' ytung.

⁴³ E paady jadu'n ñch miich ajcxy nimäy co miich ajcxy myajpiga'ñ yi m'it mlugar jii by tzajpjoty ma Dios y'ane'my etz yajmöhua'ñ je huingbi jäy je huídibi amuumdügjet naygiyejcp ma Dios. ⁴⁴ Pinjaty ca' cöbiga'ñ jada mij'ane'mbi, ayo'n ypadaamb, ytimnipatp nej jihuüy jim ycixciday ma je tzaa nicx, tijhuüdiz yjaitahuipy. O pen je mij'ane'mbi midziptzoñ je jäy, chi ytigoydähuipy ajcxy, tim jadu'n nej jihuüy je tzaa ñigidaagoodyii ajcxy, e janch jaam pux nicxy yjaty.

⁴⁵ Co ajcxy midooy, chi je teedytjic etz je fariseostijc huinjihuüy co yi' ajcxy yajni-gapxyp, ⁴⁶ chi Jesús ajcxy jamadzaañ. Per tzigiyyb anajty ajcxy miid je mayjäy, je' co je mayjäy anajty mibijccixy co Jesús najtzcapxiyb Dios ytiy'ajt.

22

Je iixpejt ma jäy anajty pijcpidijc nixiuduñ

¹ Chi Jesús jadüg'oc ytiğiyy capxp miid iixpejt, yminañ jadu'n:

² —Je Dios y'ane'min jadu'n nipaady nej je rey ymang ocnixiuduñ co ti ypicy. ³ Chi je rey quejxhuäcxtay je ytumbi co huen nicxy huoomujctaaigyxy je huídijaty anajty ti yaj'nimaaygixy co míngixipy ma ytuna'ñyii yjada'ñyii je pijcin. Per ca' je' ajcxy ymiina'ñ ma je pijcin nixiuduñ. ⁴ Chi quejxnip huingbi ytumbi, nimay ajcxy: “Nimaaygix je tiibi oy jayijp'aty mnimaaygix jadu'n co huen mmiingixy ma yam je caayin uucin ni'ixi' y'ity. Ti je huaj nicxpi nyaj'ögyich. E ni'ixi' ijtaayñi, huen miiñ ajcxy ma je pijcin ytuna'ñyii yjada'ñyii.” ⁵ E je' ajcxy tiibi anajty yaj'nimaaygixy, ca' ajcxy je' ytimy tuñ cuendi. Nijējity ajcxy ñicxy ma ytundac. Nijējity ajcxy ñicxy toocp yejcp; ⁶ e nijējity ajcxy majch je rey yquejxyöybi ajcxy, chi ajcxy oy chaachytuñ, chi yaj'o'cy. ⁷ Chi je rey ooy chachjotma'ty. Chi je soldados ajcxy quejxy co huen nicxy yaj'öctäyii je jäyyaj'öcp ajcxy

etz ytoydähuip je ycajp. ⁸ Chi je rey nimay je ytumbi ajcxy: “Ni'ixi' ijtäy ma jadayaabi je pijcin yajnixidunañ. Per je huídibi ajcxy ti yajnimäy ca' ajcxy mihuaadity co ymingixipy. ⁹ Nicx miich ajcxy majaty jäy yjin ytijc. Nimaaygixy tüg'óciy pinjaty ajcxy mbaty, co huen miingixy ma je pijcpi.” ¹⁰ Chi ñicxy je rey ytumbi ajcxy. Chi ajcxy miidmiinday je mayjäy, je oyyäybi etz je jibicjäybi. Chi y'ujztay je rey ytijc miid je mayjäy. ¹¹ Huin'it je rey ytigüy mayjäyjoty, ixañ anajty huídijaty ti yajhuomiñ. E jii by tüg yëydijc ti ijxpaty huídibi ca' anajty ti ñayxoxyii, jadu'n nej jäy nayxóxi gixy co ajcxy nicxy ma tüg pijcin. ¹² Huin'it je rey minañ: “Migüg, ¿nej ya ti mdigüy tigoty, e ca' mxojx miidity nej ypaadyii?” E je yëydijc amoñyi je' yhuimy. ¹³ Chi je rey nimay huídibi anajty jim pubejtp: “Cixotz tecyxotz jada yëydijc etz pidäg agootztuuby. E jii by yjihuiipy yäxipy, jii by ytütz huinqueedip miid jotmay.” ¹⁴ Com may je jäy ajcxy huídibi ti yajhuooy, e hueeni ajcxy huídibi ti yajhuin'ixy.

Je cogüejtin ñimiydägy

¹⁵ Je huin'it tiempo je fariseos ajcxy tuuñ quipxycapxy co anajty xihuaangixy nihuambedaangixy Jesús. ¹⁶ E jadu'n ajcxy quejxy ma Jesús yajpaady naagity huídibi minicxpejt je fariseos ajcxy ytiy'ajt etz naagity huídibi mijnicxpejt je Herodes ytiy'ajt. Chi ajcxy Jesús nimay:

—Huindzin, nejhuiybich ich ajcxy co miich mgapxy je tiy'ajt. Tudägy myaj'ixpicy jäy ajcxy jadu'n nej huaad ajcxy cuychinaaygixy Dios ytiy'ajt. E ca' mgüendituñ nej jäy ajcxy yminaangixy. Tú'ciy miich mduñ miid comeñyjäy etz miid ayoobtijc, ca' huin'ixpety myaj'ixpicy. ¹⁷ Nejhuihuamy ich ajcxy nej miich minañ pen tiy'ajt jadu'n: ¿Nej ndundigooyim ma Dios ycötujcin, co ngüejtim ma César, je romano mij'ane'mbi?

¹⁸ Per Jesús ñejhuuyb anajty ajcxy yjibic-huinmañ, e chi ajcxy nimay:

—Ooy miich ajcxy naybidáacigixy nej jihuiy ooy mdudägyity, e ca' yjanchity. ¿Na'amy co ajcxy xychachjot'ixy xychachhuinmañ'ixyich? ¹⁹ Yaj'ijxcich tüg meen huídi miid migüejtigixy César.

Chi ajcxy mimiñ tüg meen. ²⁰ Chi co Jesús y'ijxy je meen, chi yajtiy:

—¿Pin y'ahuinax e pin yxi cixjaay ma jada meen?

²¹ Chi ajcxy y'adzooy:

—Je romano mij'ane'mbi y'ahuinax etz yi' yxi.

Huin'it Jesús je' ajcxy nimay:

—Mo' je César huídibi yi' yjë'ajtpy, etz mo' Dios huídibi Dios yjë'ajtpy.

²² E co ajcxy jadu'n midooy, chi ajcxy ooy jihuiy huinmay. Chi ajcxy ixmajch Jesús, e ñicxni ajcxy.

Yaj'amidooy ajcxy je jugypijcin co pin ti y'ögy

²³ Je huin'it xii je saduceos ajcxy oy ixxy Jesús. Yi' ajcxy yminañ co ca' yjugypigañ je öcpi ajcxy. E jadu'n ajcxy huinmañ pidägy, e yminaangixy:

²⁴ —Huindzin, jadu'n miiñ ma Moisés ycötújcin co je yëydijc huídibi ypijychinaayb miid ytöxyijc, e pen öcp je yëydijc, e ca' ni tüg y'ung yajhui'my, copicy co co'öcytöxyjäy ypijctigadzipy miid je yëydijc ymiguëx. ²⁵ Pues jii ma ich ajcxy anajty tüg quëx je yëydijc nihiixtujc. Je ungoob ypijcy, e chi ix'ögy ytöxyijc, e ca' ni tüg y'ung yajhui'my. Chi je miguëx ypijctigajch miid je töxyjäy. ²⁶ Nañ jadu'n je mimetzpi yëydijc ix'o'cy ytöxyijc. Nañ jadu'n je midugügpí yëydijc ix'o'cy ytöxyijc. E jadu'n oytuñyii yjadyii miid je töxyjäy co ti anajty miiddzinay'abidzimdäy je nihiixtujcpi yëydijc tüg quëxpi. E je nihiixtujcpi ajcxy ix'o'cy je töxyjäy, e ca' ni tüg y'ung ajcxy yajhui'my. ²⁷ Chi nañ jadu'n oy y'öcni je töxyjäy. ²⁸ E co anajty xii tiempo paty, co anajty Dios yajjugypicy yi' tiibi ajcxy y'ögy, ¿huídibi jada' ajcxy nidügti je yëydijc töxyijc'adaanip je töxyjäy? Com ti ajcxy jadu'n nihiixtujcpi miiddzinay'abidzimgixy.

²⁹ Chi Jesús je' ajcxy y'adzooy:

—Miich ajcxy ca' mhuinjihuïy je tïy'ajt, com ca' mnejhuïygixy Dios y'ayuc ytiy'ajt, e com ni ca' mnejhuïygixy je mic'ajt huidibi Dios ymïd. ³⁰ Pues co anajty yjugypijccixy je jïy tïibi y'öccixy, chi ca' ajcxy ypïga'ñ, e nañ jadu'n ni ca' ajcxy ñaymöhuiïyb y'ung huen pijccixy. Hue' ajcxy yjugy'adaangixy chinähuaangixy jïlby tzajpjoty, tim jadu'n nej je ángeles ajcxy chinaaygixy jugy'ajtcixy. ³¹ Per je tïy'ajt co jïy ajcxy tïibi y'öccixy yjucypïgaangixy jadüg'oc, jëbi mbaatcixy jada tïy'ajt ma Dios ñecy. Dios ci'm jadu'n mïnañ: ³² “Íich je' je Dios huidibi Abraham, Isaac etz Jacob yDios'ajtpy.” Com yi Dios ca' yi' yDios'aty ma yi öcpi ajcxy. Yi Dios Dios'ajtp yi' ma yi juugypi ajcxy.

³³ E co je mayjïy jadu'n mïdooy, chi ajcxy ooy tzachjihuïy tzachhuinmaay je Jesús y'ixpijcin.

Je ane'mïn huïdibi ooy ycopicyty

³⁴ E co je fariseos ajcxy nejhuïy co Jesús anajty ti yaj'amoñyïi je saduceos ajcxy, chi ajcxy ñayyömujectaayi. ³⁵ E jim anajty tüg leyhuindzin huïdibi Jesús anajty jot'ixyp huinma'ñ'ixyp, chi y'amïdooy:

³⁶ —Huindzin, ¿ma yi maybi Dios ycötujcin, huïdibi yi' jaccopicyip?

³⁷ Chi Jesús y'adzooy:

—Tzoc jihuï' etz yajmïj'at nHuindzin'ajtim Dios mïd tüg'óciy m'aa mjot, etz mïd tüg'óciy m'alma, etz mïd tüg'óciy mhuinma'ñ. ³⁸ Jada je' jadu'n je Dios ycötujcin huïdibi jaccopicyip, etz huïdibi tim jayijpïp. ³⁹ Je mïmetzpi Dios ycötujcin jahueengi tú'ciy ñaybadyïi mïd je jayijpi, yi' huïdibi jadu'n mïnamb: “Tzojccix jihuïygix yi mmïgügtïc, tim jadu'n nej mnaychogyïi nayjihuïyïi ci'm.” ⁴⁰ Jada Dios metzpi ycötujcin jaccopicy jacmic'ajt mïd ca' jac huïdibi cötujcin huïdibi Moisés etz je profetas ajcxy yejc.

¿Pïn je' y'ung je Cristo?

⁴¹ E ma anajty jim tüg mucy yjac'ijtcixy je fariseos, huin'it Jesús yajtiïy:

⁴² —¿Nej miich ajcxy huinmay mïd Cristo? ¿Pïn je' y'apmang?

Chi ajcxy y'adzooy:

—Je David je' y'apmang.

⁴³ Chi Jesús ajcxy nïmay:

—¿Na'amy co David anajty ti ymïna'ñ co Cristo hue' je' yi' yhuindzin? Jadu'n ti capxy David anajty mïd je Dios yjihuï'ñ ymic'ajt, ymïnañ:

⁴⁴ Je Huindzin Dios nïmay ïch nHuindzin: “Íña' ma ïch n'a'oy'amy, ixti cooni ïch miich nyajmïmadägïp ma je mmïdzip ajcxy.”

⁴⁵ ¿Nej jëbi David ymïj'ap'adyïi je Cristo? Com David ci'm ymïnañ co Cristo yi' je' yhuindzin.

⁴⁶ E nitüg'aa ajcxy yca'adzohuimbijty. E jadu'n nej je xï tiempo yjacnicx anajty ca' ni pïn ocjacyajtiïyñï huïdijaty ayuc.

23

Jesús xïy ajcxy je fariseos etz escribas

¹ Chi Jesús nïmay je mayjïy etz yi' ydiscípulos ajcxy:

² —Je escribas etz je fariseos ajcxy chachnaygömáayigixy co yi' ajcxy jajtp nej capxti'cxipy je cötujcin huïdibi Moisés yjaay jecy'ajty. ³ Oy co ajcxy mguydunipy jadu'n nej yi' ajcxy xyaj'ixpijccixy Dios y'ayuc, capxymïdoogix nej xyñïmaaygixy per ca' mdungixy huïdibi yi' ajcxy ytumb, com yi' ajcxy oy ycapxcixy e ca' ajcxy cuydungixy.

⁴ Yi' ajcxy nïgo yajcojcxixy canaag costumbre huïdi je jïy ajcxy ca' mïmadäga'ñ, e ca' ajcxy pa'ayoy je jïy, tim jadu'n nipaady nej jihuïy tüg tzïmy ti mooygixy jemxypi huïdibi ca' je jïy ajcxy mïmadäga'ñ, e yi' escribas etz fariseos ajcxy ni ca' ycihuäx yajpaadaangixy je tzïmy. ⁵ Tüg'óciy huïdi yi' ajcxy ytumyb, je' ajcxy ytumyb co huen jïy ajcxy ixïyï,

jaydēbi yajcōmay ajcxy. Yi' ajcxy yajhuimboc-huiniyigixy etz ñayyajcihuiniyigixy Dios y'ayuc. Nayxojxcixy miid huit yooñjatypi co chachcōmayaangixy. ⁶ Ooy ajcxy tzocy iñaybejt ma je' iñay je ane'mbi ma jāy ajcxy yxiduñ. Ooy ajcxy tzocy yi cōdumbi iñaybejt ma je naymujctac. ⁷ Yi escribas etz fariseos ajcxy oy tzojccixy co ajcxy yajcapxpooxip huindzig'iñ'amy mayjāyduum. Etz nañ jadu'n ajcxy tzocy co jāy ajcxy yajmij'adñyb nej huindzindijc ixpiçytijc. ⁸ Miich ajcxy ca' jadu'n m'a'ixihuipy co ajcxy xytijipy huindzin com nidüg'ócay miich ajcxy mnaymigüg'ajtigixy, etz tügpajc je' huidibi miich ajcxy mhuindzin'ajtpy yi' je' Cristo. ⁹ E nañ jadu'n miich ajcxy ya naaxhuiñ, ca' oy ni pin mdeedy'adñyb co miid miich ajcxy tügpajc je mDeedy, huidibi jiiby tzajpjoty. ¹⁰ E nañ ni mganaydijñyb ajcxy mij ane'mbi, com yi' Cristo je' tügpajc miich ajcxy mmij'ane'mbi. ¹¹ Je pin jaccapxymidoob ymigügtijc, je' je' mij'ajtñ miid ma miich ajcxy. ¹² Pinjaty huidibi ci'm naygōmayip, tzöydu'nbaadip je', e pinjaty naybidaacip nicy xeemy, je' je' capxpaady y'idipy.

¹³ ¡Ay miich ayoob ajcxy fariseos etz escribas ajcxy! Miich ajcxy mnaybidáacigixy nej jihuñy ooy mdudägyjāy, e ca' yjanchity. Miich ajcxy mgoyüchpy je Dios ytiy'ajtñ nej huaad jāy ajcxy ytiğy jiiby tzajpjoty ma Dios y'ane'my. Ni miich ajcxy mgatigiygixy, e nañ ni mga'a'ixiygixy co huingbi ytiğihuip.

¹⁴ ¡Ay miich ayoob ajcxy fariseos etz escribas ajcxy! ¡Miich ajcxy m'aanidacp! Miich ajcxy myajcijxtaayi yi' co'ögy ytöxyjāy ypidägy miid ajcxy m'adzojcin, e mdungixy ooy jecy tzajpcapxycapxi, jigix capxpaady mbidzimipy. Dios nig'i chaachytunip miich ajcxy miid mbocy yciçpi, ca'ydi jac pin jāy.

¹⁵ ¡Ay miich ayoob ajcxy fariseos etz escribas, miich ajcxy naybidaacigixy tudägy, e ca' yjanchity! Mhuinyöy'abidzimyb miich ajcxy je naaxhuiñybi, co mgapxhuäcxa'ñ je m'ixpiçcin ma je tügp'i jāy. E co ajcxy je' myajmibicy, huin'it mejtz jadu'ñyi je pocy anajty miidity je jāy, ca'ydi miich ajcxy.

¹⁶ ¡Ay miich ayoob ajcxy huidibi jadu'n iditzp nej tügi huintzpi huinhuoy! Miich ajcxy minamb co pen tüg jāy tuñ yhuandaacin, e ñbaati capxpaati Dios ytiç, chi ca' cuyduñ je huandaacin. Per pen ñbatpy capxpatpy je oori huidibi jiiby ma Dios ytiç, huin'it janchity cuyduñ je huandaacin. ¹⁷ Tzuudijc locidijc huidibi ca' huinjihuñy je tiy'ajt. ¿Huidibi jaccopicyip: je oori o je Dios ytiç ma je oori yoxy ity?

¹⁸ Nañ jadu'n miich ajcxy mina'ñ: “Pen tüg jāy huandaacin tuñ, e capxpaady je altar ma Dios yajhuindzigiy, chi ca' cuyduñ je huandaacin. Per pen capxpaady je huindzig'iñ tzüch ma je altar ma Dios yajhuindzigiy, chi cuyduñ yhuandaacin.” ¹⁹ ¡Tzuudijc locidijc huidibi ca' huinjihuñy je tiy'ajt! ¿Huidibi jacmij'ajtñ ymiid je huidibi ti yajyoxo o je altar? ²⁰ Pinjaty capxpatp je Dios ytiç ma Dios yajhuindzigiy y'agapxmuctaayb anajty huidijaty jiiby yajpaatp ma Dios yajhuindzigiy. ²¹ Pinjaty capxpatp je Dios ytiç, ca' anajty jeyi capxpaady Dios ytiç, nañ ycapxpatp anajty Dios huidibi jiiby tzinaayb. ²² Pinjaty capxpatp je tzajp, nañ capxpatp anajty Dios y'ane'mdac quipxyi miid Dios huidi tzinaayb jiiby.

²³ ¡Ay miich ayoob ajcxy fariseos etz escribas ajcxy, huidi naybidaacip tudägy, e ca' yjanchity! Miich ajcxy mooyb Dios je tügpicy je majcpi huidibi je' paatip, ixti yi tzajnimang, yi ruda etz je pi'c'ujtz'ay ung. Per ca' ajcxy mduñcuenti je cōtujcin huidibi jaccopicyity. Miich ajcxy ca' mdzināy tiydudägy miid je migügtijc. Miich ajcxy ca' mmidity pa'ayo'n miid je' ajcxy huidibi ayoob jottigooyb, etz ca' mmibijccixy Dios. Jada ixyipy ajcxy mbaadumyby, e mooygixy Dios je tügpicy je majcpi. ²⁴ ¡Tzuudijc locitijc! Miich ajcxy ti m'anajxyp je uux, e mgojñnaaxcixy je camello, je mijpi iyujc.

²⁵ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jāy, e ca' yjanchity! Jiiby jotjoty huinma'ñyoty miich ajcxy miidity jibicpi. Miich ajcxy miid je ca'oy'ixi etz je adzojcin. Tim jadu'n nipaady nej jihuñy myajhuächpy ajcxy yi tasi

ninïcx yî texy ninïcx, e chi myajhuï'my jibïcpi ma tasijot ma texyjot. ²⁶ ¡Tzuudijc miich ajcxy! Jayijp yajhuadz jilby jotjoty texy tasi, huin'it huï'm nañ jadu'n huadz nigix'amy.

²⁷ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Jadu'n miich ajcxy nipaady nej öcpi jut. Je öcpi jut nigix janch oy yquëxiggy, per jilby jutjoty utz jilby müd je öcpi pajc etz müd jibïcpi. ²⁸ Jadu'n ajcxy mguëxiggy mayjäyduum nej jihuiy ooy m'oyjäyity, per jilby jotjoty müd jibïc-huinma'ñ.

²⁹ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Miich ajcxy mgo'abojtzicxy yajxon je öcpi jut ma profeta ajcxy ñaaxtigüy, etz mxoxy ajcxy müd je pijy ma ñaaxtigüy je tudägy jäy ajcxy, ³⁰ e miich ajcxy nayñimaayigixy miñ xyipy: “Co ixipy anajty n'octzinaayim jecy'ajty ca' ngapubejtim co ajt nmij'ap nmijteedy yaj'ögy je profetas ajcxy etz je tudägy jäy ajcxy.” ³¹ Müd jada ycixpi miich ajcxy nejhuïyb co miich ajcxy m'ap'adyii mdeedy'adyii je jibïcjäydijc ajcxy huïdibi yaj'oc je profetas. ³² ¡Miich ajcxy yajcïxcixy je jibïcpi huïdibi ajcxy mmij'ap mmijteedy yajtzondac!

³³ ¡Jadu'n miich ajcxy nipaady nej mayxoox! Ca' miich ajcxy madägipy cöguëgipy je tzaachypï jilby ayoodactuuby. ³⁴ E paady nguexaamybich ma miich ajcxy profetas etz huïdibi ixpicyip ma Dios y'ayuc, etz huïdibi xyaj'ixpigamb ajcxy yî Dios ñecy. Per miich ajcxy myaj'ögamyb myajcruutzpedamyb nijëjity, etz nijëjity mgoxamyb mhuobamyb ajcxy jilby tzajtigoty etz m'ixhuïdida'ñ mbahuïdida'ñ ajcxy cajp cajp. ³⁵ Je mijpocy xyñigidaccoda'ñ miich ajcxy, jadu'n nej je oyyäy ñi'py temy vojcy jecy'ajty, oga'ñ chondacy müd je oyyäy Abel etz ycogixiy müd Zacarías, je Berequías y'ung huïdibi miich ajcxy mmij'ap mmijteedy myaj'o'c jilby tzajtigoty ma altar. ³⁶ Janch tïy'ajt jadu'n nej nimaaygixy co je mijpocy ñigidaccoda'ñ je jäy ajcxy huïdibi tzinaayb jadachambi tiempo.

Jesús yäxy müd Jerusalén cajp ycixpi

³⁷ ¡Miich ajcxy Jerusalén jäy! ¡Miich ajcxy Jerusalén jäy! Jerusalén jäy huïdibi jecy'ajty yaj'ögy je profetitjc etz ycögächpy ajcxy je Dios ycogapxy. Canaag'oc ti njaya-jtügmujectähua'ñich miich ajcxy, jadu'n nej tzeydaj yajtügmujectäy je' y'ung ma yqueec pät, per miich ca' m'a'ixiygixy. ³⁸ Oc'ix miich ajcxy nej mdijc abac yhuï'maangixy. ³⁹ Janch tïy'ajt jadu'n nej nimaaygixy co camina miich ajcxy xy'ixipyich jadüg'oc, ixti cooni paadipy je xii je tiempo co jäy ajcxy ymina'niy: “Cömay yî huïdibi miimb müd nhuindzin Dios yxii etz ymic'ajt.”

24

Jesús ymina'ñ co Dios ytijc yhuïdigoyipy

¹ Ma anajty Jesús ti ypidzimni ma Dios ytijc, nicxp anajty, huin'it Jesús ydiscípulos ajcxy ñimijhuäci. Yi' ajcxy anajty yaj'ixiydähuamyb je Dios ytijc, com ooy anajty chachmijtjicity.

² Chi Jesús ymina'ñ:

—Huïdicx miich ajcxy jada maybi mijjaty ytijc. Miinipy xii tiempo mina tüg'óciy jada tijc nicxy yhuï'my taj xit, ca' ma tzaamacxy. Huïdigoydähuipy tüg'óciy.

Je tïy'ajt ma ca'ni naaxhuiñybi ycixa'ñyi ytigoya'ñyi

³ Chi oy ñicxni ajcxy ma Olivos cögop. E co anajty jim, Jesús y'ñäy, chi ñimaayi ameech je' ydiscípulos ajcxy:

—Ich ajcxy nejhuïhuamyb mina jëdu'n ytuna'ñyii yjada'ñyii. ¿Ti je' quëxigamb co anajty miich mhuimbida'ñ ya naaxhuiñ, e co anajty je naaxhuiñybi ytigoya'ñ?

⁴ Chi Jesús nimay ajcxy:

—Mnaygüend'adiib ajcxy, ca'ydi pin xyhuin'ingixy. ⁵ Ooy mayjäy ñaybidägáanigixy müd ich nxii, naybidägáanigixy co je' ajcxy je Cristo, ymina'na'ñ ajcxy: “Ich je' je Cristo.”

⁶ Co miich ajcxy ayuc midohuipy co jäy ajcxy chachtziptungixy ñayñibidigigixy xi ya,

chi ca' ajcxy mdzigíygyixip, com ooy ycopicyity co jadu'n jayijp ytuníyb yjadíyb. Ca' nan hue' je' anajty tim cijxp tim tigooyb je xii je tiempo. ⁷ Nayñibidígíib naax cajp miid huíngbi naax huíngbi cajp, e gobierno miid huíngbi gobierno. E miinip mic'ujx canaag'it etz mij yuu etz mij pa'm xi ya. ⁸ Jada tzaachypi ayo'n oga'ni anajty chondägy huidibi nminaxaanim nyajnaxaanim. ⁹ Huin'it xii huin'it tiempo miich ajcxy myajcäyegipy, jigix xychaachytúngixipy e xyaj'ögixipy. E tüg'óciy je maynaaxhuiñjáy xyca'ixáangixipy, miid íich nxii ycixpi. ¹⁰ Je huin'it tiempo may je jáy ajcxy yajtigoya'ñ ymibijcin. E nañ jadu'n ñayca'oy'ixáanigixy etz ñayñigapxáanigixy ñi'ojíhuáanigixy miñ xyipy. ¹¹ Ooy may quëxígaangixy aaniidaacpidijc mina'naangixy co Dios y'ayuc ytiy'ajt nimiydaci, e mayjáy oy huin'inaangixy. ¹² E je' co ajcxy xii jimíjt ñajtninixxiyñi jac tim nígi jibicpi tunaangixy, ca' ajcxy y'ocnaychójcinipy miñ xyipy. ¹³ Per pinjaty tiydudägy panixp je mibijcin, je' ajcxy ypaadip y'alma nízoozin. ¹⁴ Copicy co jayijp yajcapxhuäcxa'ñ huindu'ñybi naaxhuiñybi Dios y'ayuc ytiy'ajt jemybi, jaydëbi jáy ajcxy nidüg'ocíy nejhuíy Dios ytiy'ajt. Huin'it je naaxhuiñybi ycijxni ytigooyñi.

¹⁵⁻¹⁶ Je profeta Daniel jaay jecy'ajty jada ayuc (miich ajcxy pinjaty capx jada necy huinjihuíygyixy) ma minañ: Miich ajcxy co m'ixy pinjaty jibic-huinma'ñ tumb nej ca' ypanyi ma Dios ytiyc, huidibi ooy ycodzigíjity, chi miich ajcxy huidibi tzinaayb jim Judea, co jadu'n m'ijxcixy, chi nicx mgueectzóocixipy mic'amy ma tungop. ¹⁷ Pinjaty huidibi yajpatp ma ytijcnícx ca' nicxy tijaty yajpidzimy ma ytijc. ¹⁸ Yi jáy ajcxy huidibi yajpatp camjoty, ca' ajcxy huimbidity co yajpidzimipy tijaty ma ytijc. ¹⁹ Huin'it tiempo ayo'n ypadamy je töxyjáy ajcxy huidibi anajty y'ungdzim'ijt, e nañ jadu'n je' ajcxy huidibi miid y'ungma'xung. ²⁰ May'ajt ajcxy mbijctzoohuipy yi Dios co jada jadu'mbi ayo'n ca' ytuníyb yjadíyb ma anajty ytíchtiepojt, etz ma anajty pocxinxiijoty. ²¹ Huin'it oy ayo'n jotmay ytuna'ñyii yjada'ñyii huidibi nicamina ycatuñyii ycajadyiini mabi naaxhuiñybi chondägy e nicamina jadu'n ycajactuníyb ycajacjadíyb. ²² Pen ca' Dios capx'aduga'ñ yijibi ayo'n xii ayo'n tiempo, ni pin ca' chögipy. Per Dios ycapx'adugamy yijibi ayo'n tiempo miid je mibijcpidijc ycixpi huidibi Dios ti huin'ixy. ²³ Co yi jadu'mbi xii tiempo anajty ymiñ, ca' mmibíjccixipy, pen ji pinjaty xyñimaaygixy: "Ijxcix, cha yajpaady je Cristo", o "Jim'amy yajpaady je Cristo." Ca' mmibíjccixipy. ²⁴ Pues miinip jáy ajcxy huidibi huin'inaangixy ymigügtijc. Ci'm ñayajnaxáanigixy jadu'n nej jihuíy je' yCrístity, e ymináangixipy co capxhuäcxy ajcxy Dios y'ayuc, e ca' yjánchity. Ytunip ajcxy mijhuinma'ñ etz mijpi ijxpejt, ixti jëbi jahuin'ingixip je mayjáy huidibi Dios ti yhuin'ixyii. Per ca' Dios a'ixíhuipy co yhuin'iníyb yi' yjáy. ²⁵ Ti íich yi' jayijpni nigapxich. ²⁶ E co pinjaty ajcxy xyñimáhuipy: "Chim je' je Cristo migtigídumb", ca' ajcxy mninixip. O co pinjaty ajcxy xyñimáhuipy: "Chilby je' tigoty yhuingoyüch", ca' ajcxy mmibigipy. ²⁷ Íich je' je jáy huidibi tsoon tzajpjoty, nhuimbidaambich ya naaxhuiñ miid je tícxin je jájin, jadu'n nej je huídzuc huídi tícxp xibidzimyb ixti xígídägy. ²⁸ Ma je öcp ninícx yajpaady jim ñimujctähua'ñ je luud ajcxy.

Nejjada' je' Dios y'ung ymiinipy

²⁹ Co anajty ti ñaxy je ayo'n xii ayo'n tiempo, huin'it je xii ycoodzygidäga'ñ, je po' ca' ytícxan'ñ, je madza' ycadähua'ñ etz janch mic' je tzajp yücxa'ñ. ³⁰ Co yi jadu'mbi ytuníyb yjadíyb, chi quëxíga'ñ tzajpjoty je ijxpejt co íich, je jáy huidibi tsoon tzajpjoty, nhuimbida'ñich ya naaxhuiñ. E chi tüg'óciy je mayjáy tájip máyip yjihuíhuipy yäxipy, chi ajcxy ixipy je jáy huídi tsoon tzajpjoty miñ anajty jocjoty miid ymic'ajt y'oy'ajt. ³¹ Chi nguexipyich ángeles ajcxy co huen mic' yajxüxy ajcxy ytrompeta, jigix yöymujctähuipy tüg'óciy pinjaty huin'ijxyp xi ya ma ajcxy yajpaady ya naaxhuiñ; ma xii pidzimyb, ma xii cidägy, ma jinboj pidzimyb, ma tíchpoj pidzimyb.

³² Jim miich ajcxy ijxpejt mbigipy ma je higueri quipy jadu'n nej je xii tiempo ymiiñ cidägy. Co je higueri quipy jadüg'oc pidägipy je' y'aay'ung, huin'it miich ajcxy nejhuñhuipy co yhuingoni mina ypottigiyñi. ³³ Tim jadu'n nej tiy'ajt mbijccixy ma je higueri quipy co jada ajcxy jadu'n ixipy nejhuñhuipy co yhuingoni anajty je xii je tiempo jiiñ'aguy tijc'aguy. ³⁴ Janch tiy'ajt jadu'n nej nimaaygixy co tüg'óciy ytuna'ñyii yjada'ñyii ma ca'ni anajty je jäy y'öctäy huidibi anajty jactzinaayb huin'it tiempo. ³⁵ Je tzajp etz je naaxhuiñybi cixam tigoyam yi', per iich n'ayuc ca' ycixa'ñ ytigoya'ñ nimina.

³⁶ Ca' ni pin nejhuñy je xii je hora mina nhuimbida'ñich ya naaxhuiñybi. Ni je ángeles ajcxy canejuñy, ni je Dios y'ung canejuñy. Tügpaic je Dios Teedy nejhuñy.

³⁷ Com jadu'n nej yjajti ya naaxhuiñ jecy'ajty, co je Noé chinay, nañ tim jadu'n yjadipy co anajty nhuimbityich, yi jäy huidibi tzoon tzajpjoty, ya naaxhuiñ. ³⁸ Jecy'ajty co anajty ca'ni je ayo'nduu ymiiñ ya naaxhuiñybi, hue' je' mayjäy ajcxy chinay agujc jotcuic, ycaaygixy y'uuccixy etz yajpijccixy je y'ung y'anäg, ixti cooni paty je xii tzuu co ytigiy Noé barcojoty. ³⁹ Je mayjäy ajcxy ca' ajcxy cuenttuñ co ayo'n miina'ñ anajty, ixti cooni je ayo'nduu miin e öctay ajcxy je jäy nijoty. Jadu'n nej yjajty jecy'ajty miid je mayjäy huidibi tzinaayb anajty quipxy miid Noé, nañ tim jadu'n yjada'ñ miid je jäy ajcxy huidibi tzinaayb jac jiini co iich anajty nhuimbityich ya naaxhuiñ jadüg'oc. ⁴⁰ Je huin'it tiempo co nhuimbidityich jadüg'oc ya naaxhuiñ, chi metz yëydijc yajpaadipy ma ytundac, tüg je' yajminicxa'ñ, e tüg je' yhui'ma'ñ. ⁴¹ E mejtz töxyjäy yajpaadip anajty yjich, tüg je' yajminicxa'ñ, e tüg je' yhui'ma'ñ.

⁴² E paady miich ajcxy ni'ixi ijtcix, xyjijp'ixipyich com ca' mnejhuñygyixy mina miich ajcxy je mHuindzin ymiina'ñ. ⁴³ Mnejhuñygyixy miich jada co ixipy je ungededy nejhuñy ti hora je meetzpi miina'ñ, ca'p je' ymähuiipy, e ca'p a'ixihuipy co je meetzpi ytigihuipy tigoty. ⁴⁴ Nañ tim jadu'n miich ajcxy ni'ixi ijtcix, je' co iich, je jäy huidibi tzoon tzajpjoty, nhuimbida'ñich ma ca' ni pin anajty nejhuñy.

Je tumbi tudägyi etz je huidibi ca'p ytudägyity

⁴⁵ ¿Huidibi tumbi je' ya huidibi tumb miid yhuindzin janch cixyot huinijot huidibi miid ixpijcin, huidibi je' yhuindzin moopypy ane'min ma ytijc, huidibi yajnidagihuipy ma ymigügtijc caayin uucin mina ypadyii? ⁴⁶ Janch jotcuic je tumbi co yhuimbidity je' yhuindzin, e je' cuyduñ jadu'n nej je' yhuindzin ti ñimäy. ⁴⁷ Janch tiy'ajt jadu'n nej nimaaygixy co je huindzin ytumbi yajnidoguaic'adyii tüg'óciy huidibi ymiid. ⁴⁸ Pen je tumbi jibicjäybi mina'ñ jotjoty huinma'ñyoty: "Huäcxijpni iich je nhuindzin." ⁴⁹ E chi ñimajztägip ymigügtijc, e ytigihuip caaybi uucpi miid amügyjäydijc; ⁵⁰ chi je tumbi yhuindzin minipy ma ytijc huidi xii mina je tumbi ca' anajty aa'ixy jijp'ixy e ni je hora anajty canejuñy. ⁵¹ Chi huindzin tzaachytunip je' ytumbi, etz ypidägipy miid je jacjadyii jäy ajcxy yajpaady huidibi naybidäacigixp nej tudägyjäyity e ca' yjanchity. Jiiy ayoodactuuby yjihua'ñ yäxa'ñ etz huinmucxa'ñ huingueeda'ñ ytäzt miid jotmay.

25

Je ijxpejt ma je majcpi töxy'anäg

¹ Co anajty nhuimbityich jadüg'oc ya naaxhuiñybi jadu'n nipaadip nej je nimajcpi töxy'anäg co ñicxy ajcxy ñayjipcobadihuáanigixy miid je yëydijc huidi pigamb. Chi minicxy ajcxy aceite lámpara co yajticxaangixy. ²⁻⁴ Nimigoox je töxy'anäg huidi co huinma'ñity etz ahuing minicxy jadüg quiiig ujtz miid aceite. E nimigoox je töxy'anäg ca'pi ajcxy cohuinma'ñity, e ca' ajcxy ahuing minicxy jadüg quiiig aceite. ⁵ E je yëydijc huidibi anajty pigamb huäcxijpni ooy, chi je töxy'anäg ajcxy ooy ytigiyñi mä'uuybi. ⁶ E mijcuctz ajcxy midoy co tüg jäy mic mina'ñ: "Chi miin je yëydijc huidibi pigamb, nicx jijpcobadiygixy." ⁷ E huin'it je nimajcpi töxy'anäg ajcxy ypidictay. Chi ajcxy yjin

ni'ixi'y nidüg nidüg. ⁸ Chi je nimigooxpi huidibi ca' ycohuinma'ñity nimay je nimigooxpi huidibi cohuinma'ñip: "ñich ajcxy hueeni mooygich yi m'aceite, co pidzaanip ñich ajcxy njiin." ⁹ Chi y'adzooy je cohuinma'ñybi ajcxy: "Ca' nyega'ñich, je' co ca' ñich ajcxy nje' yhuaadñhua'ñ. Nicx miich ajcxy juy jim ma ytoogyii." ¹⁰ E ti anajty ajcxy ñicxy aceite juuyb je huidibi ajcxy ca' ycohuinma'ñity, co oy yjaty je yëydijc huidibi pigaanip. Chi je cohuinma'ñybi ajcxy müd tigiy tigoty je yëydijc huidibi pigaanip. Chi tijc yaj'agiiy. ¹¹ E com jecyñi oy yhuimbity ajcxy je huidibi ca' ycohuinma'ñity. Chi ajcxy yminañ: "¡Huindzin, Huindzin, ocyaj'ahuadz mdijc!" ¹² Chi je' y'adzooy: "Ca' ñich miich ajcxy n'ixy'adyii."

¹³ Chi Jesús yminañ:

—Nayñi'ixiiyigix, je' co ca' mnejhuüygixy mina ñich nhuimbida'ñich jadüg'oc ya naaxhuiñ.

Je ijxpejt ma je meeñ

¹⁴ Co ñich anajty nhuimbida'ñich jadüg'oc ya naaxhuiñybi, jadu'n nipaadip nej jadaaabi ijxpejt, co anajty tüg comeeñyjäy chona'ñ viajetumbi, chi je' ytumbi ajcxy mooy je meeñ co huen cuend'ajtcixy. ¹⁵ Je ymidügpi tumbi moy migoox mil meeñ. Je mimetzpi moy mejtz mil. E je ymidugüppi moy tüg mil. E jadu'n ajcxy moy nije' nije' nej huaad cuend'ajtcixy. Chi choñ je huindzin viajetumbi. ¹⁶ Je tumbi huidibi cidigiiyi migoox mil meeñ, ytigiy ajuybi adoocpi. Chi je' ymeeñ y'ung'ajty jamigoox mil. ¹⁷ Nañ jadu'n huidibi cidigiiy mejtz mil, ytigiiy tumbi müd je meeñ. Chi je' ymeeñ y'ung'ajty ja mejtz mil. ¹⁸ Je huidibi cidigiiy tüg mil hue' oy pidägy je meeñ tützjoty. Chi tajiy, e yützi je yhuindzin ymeeñ. ¹⁹ E com jecyñi oy yhuimbity je huindzin. Chi ytigiiy cuenta yaj'oyiiyb müd je ytumbi ajcxy. ²⁰ Chi miiñ jayijp je huidibi anajty ti cidigiiyi migoox mil meeñ. Chi je tumbi yajcidigiiy je' yhuindzin majc mil meeñ. Chi yminañ: "Miich ti xymooyich migoox mil meeñ, e ñich ti nyaj'ung'atyich jamigoox mil."

²¹ Chi je' yhuindzin minaañ: "Janch jotcuyc ñich cham co jadu'n ti mduñ müd je hueenbi meeñ. Miich ooy mdudägy etz oy ti mduñ, e paady njacmöhuamyb jacmay. Tigí' ma ñich, e xondäg müd ñich." ²² Chi ymiñ je huidibi anajty ti cidigiiyi mejtz mil meeñ. Chi nimay je yhuindzin: "Miich xymooyich mejtz mil meeñ, e ti nyaj'ung'atyich jamejtz mil." ²³ Huin'it je' yhuindzin ñimaayi: "Janch jotcuyc ñich cham, co jadu'n oy ti mduñ müd ñich nmeeñ, e paady njacmöhuamyb jacmay. Tigí' xondäg müd ñich."

²⁴ E co oy yja'ty je huidibi cidigiiyb tüg mil meeñ, chi nimay je' yhuindzin: "Huindzin, hue' ndijyich miich myëydijc'aty janch jibic jäy. Miich cosecha myajpidicpy ma ca' ti mnipy etz miich mgosecha myajpidicpy ma ca' ti ti mhuijy. ²⁵ Paady ooy ndzigiiyich co je meeñ ngayaj'ung'adipyich. E co miich mhuiimbida'ñ, mdzogamy je mmeeñ, e paady je mgi'mmeeñ ti nyüchich, je' co ndzigiiyich co nicxy nyajtigooyich miich mmeeñ. Cha je meeñ huidibi ti xymooyich."

²⁶ Chi je' yhuindzin ñimaayi: "Jibic tumbi miich, ooy mnuuxity. ¿Nej ti mnejhuüy miich co ñich cosecha nyajpidigyich ma ca' ti ti nnibyich, etz cosecha nyajpidigyich ma ca' ti ti nhuijyich? ²⁷ Oy co ixipy miich je ñich nmeeñ ti myejc'anuucxy, e jim ixipy y'ung'at. E cham co ti nhuimbityich cham ixipy je nmeeñich xycidigiiyich müd nimeeñ'ung."

²⁸ Chi je huindzin nimay je jacjadyii tumbidijc: "Pijci ajcxy yi meeñ huidi ymüd, e mooygix yi huidibi majc mil ymüd. ²⁹ Je huidibi oy tumb jacyajmöhuamb je' anaxy, e ymüd'adamy je' conaxpi. Je' huidibi hueen müd yajpigamb je' huidi ymüd, je' co ca' oy ti ytuñ müd je hueenbi. ³⁰ Yi jibi tumbi huidibi ca' oy ytuñ, pidäg ajcxy agootztuuby ma yjhuipy yäxy, ma ytütz huinmuucx huinguedip müd jotmay."

Co anajty naaxhuiñyjäy ajcxy yajtyduñ

³¹ Co ñich, je jäy huidibi tsoon tzajpjoty, nhuimbity ñich anajty jadüg'oc ya naaxhuiñybi, huin'it n'ixtägä'ñich ma ñich n'ane'mdac etz ane'ma'ñich müd ñich nmij'ájtin etz n'oy'ajtin.

³² Chi tüg'óciy je naaxhuiñyäjy yajtügmutähua'ñ ma ñch. Nhuäcxamybich jadüg jadüg jadu'n nej jäy ajcxy huäcxy je cöbixy etz je chiibo ajcxy. ³³ Nbidägaamybich a'oy'amy je jäy ajcxy huídibi oy ti ytungixy müd ñch. E yi' ajcxy jadu'n nipaadip nej cöbixy. Nbidägaamybich anajty'amy yi jäy ajcxy huídibi jibic ti ytungixy müd ñch. E yi' ajcxy jadu'n nipaadip nej chiibi.

³⁴ Chi nnimähuibich yi jäy ajcxy huídibi a'oy'amy: “Miingix miich ajcxy huídibi Dios Teedy ti xyconuucxy ajcxy. Je'ájtigix ane'mdac huídibi ijtp ni'ixí müd miich ajcxy ycixpi maabi naaxhuiñybi chondägy. ³⁵ Ma anajty ñch nyuubögyii miich ajcxy ti xyajcaayich; ma anajty ñch ndidzïyii, miich ajcxy ti xyajñ'ügyich; ma anajty ñch nihuidityich, miich ajcxy jättac ti xymöyich; ³⁶ ma anajty ñch je nhuit ti nyajmayjatyich, miich ajcxy ti xymöyich je huit; ma anajty ñch nbigyijich, miich ajcxy ti xycuend'átyich; etz co anajty ñch pujxtigoty nyajpaady, miich ajcxy ti xycogapxïyich.”

³⁷ Huin'it ymina'na'ñ je jäy ajcxy huídibi oy ti ytungixy müd ñch: “Huindzin, ¿mina ñch miich ajcxy ti n'ixy ayuu, e ti nyajcay? O ¿mina ñch miich ajcxy ti n'ixy co mdidzïyii, e ti nyajñ'ügy? ³⁸ ¿Mina ñch miich ajcxy ti n'ixy co miich mnihuidity, e ti nmöy jättac? O ¿mina mhuit ti myajmayjaty, e ti nmöy je mhuit? ³⁹ ¿Mina ñch miich ajcxy ti n'ixy, co miich mbigyii, e oy ti ngüend'aty? etz ¿mina ñch miich ajcxy ti n'ixy co pujxtigoty myajpaady, e oy ti ngogapxïy?” ⁴⁰ ñch, je mij'ane'mbi, n'adzohuimbidityich: “Janch tiy'ajt jadu'n nej nnimaaygixy co yi jäy ajcxy huídibi oy ti ytungixy müd pinjaty huídibi xymijnicxpejtpich, nañ jadu'n oy ti ytungixy müd ñch. Ca' ñejity co jäy ajcxy yminañ co ca' ypinity je jäy huídibi xymijnicxpejtpich.”

⁴¹ Chi ñch, je mij'ane'mbi, nimähuibich je jäy ajcxy huídibi yajpatp: “Huinhuäctuutcich miich ajcxy jibicjäydijc. Nicxy miich ajcxy mijñnjoty, huídibi ijtp ni'ixí müd je mujcu' ycixpi etz müd je' y'angeles ajcxy ycixpi. ⁴² Ma anajty ñch nyuubögyii, ca' miich ajcxy xyajcaayich; ma anajty ñch ndidzïyii, ca' miich ajcxy xyajñ'ucyich; ⁴³ ma anajty nihuidityich, ca' miich ajcxy xyajjättägyich; ma anajty ñch nhuit xytigoy'jtigich, ca' miich ajcxy huit xymooyich; etz ma anajty ñch nbigyii e nyajpaadyich pujxtigoty, ca' miich ajcxy xycogapxïyich.” ⁴⁴ E chi je' ajcxy ymina'na'ñ: “Huindzin, ¿mina ñch ajcxy miich ti n'ijxcixy co anajty miich yubögyii tidzïyii, o co anajty mnihuidity? ¿Mina ti n'ijxcixy co ca' mhuit müdity, o co mbigyii, o co anajty pujxtigoty myajpaady, e ca' ñch ajcxy miich nbubejty?”

⁴⁵ Chi ñch, je mij'ane'mbi, n'adzohua'ñich: “Janch tiy'ajt jadu'n nej nnimaaygixy. Huen tim pinity huídibi ca' müdity pa'ayo'n müd je' ajcxy huídibi xymijnicxpejtpich, oy jäy yjamina'ñ co ca' ypinity, ñch miich ajcxy anajty jadu'n ti xytuñich.” ⁴⁶ E jada ajcxy nicxip huinixi ayoodactuuby, e yi tudägyi ajcxy nicxip ma yi jugy'ajtin huinixibi.

26

Je huinma'ñ nej anajty Jesús madzaangixy

¹ Co Jesús nigapxtay tüg'óciy jadayaabi ayuc, chi nimay yi' ydiscípulos ajcxy:

² —Miich ajcxy mnejhuib co huixtic je amayxi, je pascua xi. Pascua xijoty ñch, je jäy huídibi tzoon tzajpjoty, nyajcïyega'ñich ma nmidzipich etz xyajcruutzpeda'ñich, xyaj'oga'ñich ajcxy.

³ Je huin'it xi je teedy huídibi tungmüd ajcxy, je escribas, etz je mijjäydijc ajcxy ñayöymujtayi ma je' ytiba' je teedy huídi jacmijtungmüd huídi anajty yxi Caifás. ⁴ E jim ma Caifás ytiba' jim ajcxy huinma'ñy'ixtay nej jëbi yajmachycägixy Jesús müd anñ etz yaj'ogaangixy. ⁵ Chi ajcxy ñayñimaayi miñ xyipy:

—Ca' y'oyity co xijoty nmajtzim Jesús. Ca' jecyity co je mayjäy xymijotma'ttayim etz ytigihuij ajcxy huambi jihuïybi.

Tüg töxyjäy pidacy aceite ma Jesús ycohuajc

⁶ Jesús anajty yajpaady Betania ma Simón ytijc, je Simón huídibí anajty ymíid je jibíic nübúdz pa'm. ⁷ E ma anajty Jesús ycaý, huin'it ymiññ tüg töxyjäy míid tüg quiig ujtz míid perfume huídibí ooy oy yxuugy, jada perfume ooy anajty choohuítý. Chi je töxyjäy yaj'ahuäch je quiig, e yajcöyogiy Jesús je perfume huídibí ooy oy yxuugy. ⁸ Co Jesús ydiscípulos ajcxy jadu'n ijxy, chí ajcxy mijotma'ty je töxyjäy. Chi ajcxy ñayñimaayi miñ xyipy:

—¿Ti co jada perfume huídibí ooy oy xuugy ayoy? ⁹ Tzou ixypy ooy jada yajtoocy, jaydebí ixypy míid yajpubet je ayoobitijc.

¹⁰ E co Jesús nejhuíy nej ajcxy ymíañ, chí nimay:

—¿Na'amy co m'amayíy jadayaabi töxyjäy? Yi' huídibí tí tuñ, je' yi' tüg oybí. ¹¹ Je ayoobitijc ca' ytigoy'ida'ñ ma miích ajcxy nimíina. Huen huídibí xíi huen huídibí tiempo jébi miích ajcxy mbubedipy ayoobitijc. Íich ca' n'ida'ñich jecy ya míid miích ajcxy. ¹² Jada töxyjäy tí pidägy ma íich nninícx perfume huídibí ooy oy xuugy, jayíjp ca'ni nnaaxtigíyich. Jadu'n je' jíjp'ijxpy míina nnaaxtigíhua'ñich. ¹³ E huentimma'amyity je Dios y'ayuc anajty yajcapxhuächxy huindu'my naaxhuiñ jim yajnigapxa'ñ jadu'n nej je töxyjäy tí tuñ cham míid íich, e jadu'n je mayjäy jäymedzípy jada töxyjäy.

Judas cüyecy yi Jesús ma ymidzip agojix

¹⁴ Chi nidüg je' ydiscípulos huídibí yxíi Judas Iscariote oy nimäy je teedy mijtungmíidpi, ¹⁵ nimay ajcxy:

—¿Ti ajcxy xymöhuíbich co ngíyegípyich Jesús?

Chi ajcxy moy iipxmajc plata meeñ. ¹⁶ Co ajcxy meeñ ymooy, chí mic'amy Judas yhuinma'ñ'ixtay nej jébi cüyecy Jesús ma ymidzip.

Jesús y'adzuu'ajty pascua xíjoty

¹⁷ Je ymidügpi xíi, je amayxíi, je pascua xíi ma anajty yajcaý je tzajcaagy huídi ca' levadura míidíty, huin'it je' ydiscípulos ajcxy nimíiñ Jesús. Chi ajcxy yajtíy:

—¿Ma mdzocy co íich ajcxy ni'ixíhuíp huídi mgayamy je pascua xíi cixpi?

¹⁸ Chi Jesús y'adzooy:

—Nícx miích ajcxy jim Jerusalén ma tüg jäy ytijc, e mnímähuíp: “Íich nHuindzin jadu'n mínamb co yhuingoñ je' yxíi yhora, e paady ma miích mdíjc yi' tuna'ñ je pascua xíi adzu'ajtin míid ydiscípulos ajcxy.”

¹⁹ Huin'it Jesús ydiscípulos ajcxy cuyduñ jadu'n nej Jesús anajty tí ñimäyíi. Chi ni'ixíy ajcxy je pascua adzuu'íbi.

²⁰ E co chu'íy, chí Jesús y'ixtacy ma je mesa míid je nimajmetzpi ydiscípulos. ²¹ E ma anajty ycaagyxy, huin'it nimay je nimajmetzpi:

—Nidügti miích ajcxy huídibí xycíyegaambich ma nmíidzipich.

²² Huin'it ajcxy yajtay taj may. Chi ajcxy yajtíy:

—Huindzin, ¿nej íich jada'jí?

²³ Chi Jesús y'adzooy:

—Yi huídi míid ndocxmucyich, yi' je' jadu'n xycíyegaambich ma nmíidzipich. ²⁴ Janch tíy'ajt co íich n'öga'ñich, jadu'n nej je profeta jaay jecy'ajty. ¡Ay ayoob je yéydíjc huídi xycíyegaambich! Jac'oy co ca' ycama'xung'aty je huídibí xycíyegaambich.

²⁵ Chi Judas ymíañ:

—Huindzin, ¿nej íich jada'jí?

Chi Jesús y'adzooy:

—Miích jadu'n mínamb.

²⁶ E ma anajty ajcxy ycaý, huin'it Jesús tzajcaagy conígy. Chi yajnaxxy Dioscojuyip. E chí jada' tujchuächxy je tzajcaagy. Chí moy je nimajmetzpi ajcxy je tzajcaagy, e ymíañ:

—Cay miích ajcxy jadayaabi tzajcaagy, yi' je' íich je nninícxich.

²⁷ Huin'it Jesús ciy'igy je y'ügy. Chi yajnajxy Dioscojuyip. E huin'it moy je ügy je nimajmetzpi ajcxy, e yminañ:

—Üc miich ajcxy jadayaabi ügy, ²⁸ yi' je' ich je nni'pyich. Yi' ñigapxy co Dios ti yaj'aducy je jemybi ayuc. E ich nni'py ytemañ yoga'ñ mïd je mayjäy ycixpi, jaydëbi ajcxy paadip je huinmeecxin mïd je ypocy ycixpi. ²⁹ Janch tiy'ajt jadu'n nej nnimaaygixy, co ca' n'oc'ügaanich jadüg'oc je pascua xii ügy, ixti cooni je xii tiempo paadip co ich ajt n'uucim huinjemybi je pascua xii ügy ma ich nDeedy y'ane'min.

Jesús nigapxy co Pedro ycoyütza'ñyii

³⁰ E co ti y'idäy, chi ajcxy choon'ñicxy ma Olivos cögop. ³¹ Chi Jesús je' ydiscípulos ajcxy nimay:

—Nidüg'óciy miich ajcxy xy'ixmajtztähua'ñich cham coodz. Je' co jaaybejty jadu'n miiñ ma je Dios ñecy: “Ögip je cuend'ajtpi, huin'it je cöbixy yöyhuäcxtähua'ñ.” ³² E co anajty ich njugypicyich jadüg'oc ma anajty ti n'ögyich, chi jayijpni ñicxa'ñich ma Galilea, e jim naybaatim nidüg'óciy.

³³ Chi Pedro yminañ:

—Oy yi jacjadyibi migügtijcich xyjadim'ixmajtztäy, per ni camina xii ich miich n'ixmadzipy.

³⁴ Chi Jesús Pedro nimay:

—Janch tiy'ajt jadu'n nimäyich, cham coodz ca'ni anajty je tzey yaxigy, miich tugig'oc mina'nip co ca' xy'ixy'adyijich.

³⁵ Chi Pedro yminañ:

—Oy ich ndim'ögip mïd miich, ni camina ngaminá'nibich co ca' miich n'ix'adyii. E nidüg'óciy je' ydiscípulos ac tim jadu'n yminañ.

Jesús mibijctzoy Dios jim Getsemaní

³⁶ Chi Jesús ñicxy mïd je' ydiscípulos ajcxy, oy yja'tcixy jim Getsemaní. Chi jim Jesús nimay je ydiscípulos ajcxy:

—Ya miich ajcxy oc'iña', miin ich n'ocnicxyich jim'amy Dios mibijctzoobi.

³⁷ E chi Jesús ñicxy mïd Pedro etz nañ jadu'n mïd je Zebedeo ymang nimetzpi. E jim Jesús ñayjihuiyi janch tajy may mij cajee. ³⁸ E chi jim yajnimay je nidugüigpi discípulos:

—Nayjihuiybich taj may ma njot nhuinma'ñ, ixti mabaad anajty n'ögich mïd tájin máyin. Hui'm miich ajcxy ya mïd ich etz ca' mmaagixy.

³⁹ Huin'it Jesús ñajtzyöyiy mijci'm jahu'. Chi jim ñaygojxtinaydaci naaxcixy, e ytiigiy Dios mibijctzoobi, yminañ:

—Dios Teedy, ich nDios, pen jëbi jadu'n, mduñ may'ajt píjcgich jadayaabi tzaachypí ayo'n, per ca' yjadu'nity nej ich ndzojcin mdunipy, jadu'n mdunipy janchtiy nej miich mdzojcin.

⁴⁰ Huin'it Jesús yhuimbijty jim ma anajty ti yajhui'my je nidugüigpi. E oy paady ac tim maab anajty ajcxy. Chi nimay je Pedro:

—¿Nej ca' madäga'ñ miich ajcxy co m'idipy juugy tüg hora mïd ich ycixpi? ⁴¹ Hui'mi' ya, juugy m'idipy etz mibijctzoo Dios, jaydëb ca' je ca'oybi xymimadägip. Janch tiy'ajt co jotjoty ooy mnijot'ajtcixy com tunaangixy yi oybi. Per yi mnin'cx ca' ymadäga'ñ nicxy tuñ oybi.

⁴² Chi mimetz'oc Jesús ñicxy oy Dios mibijctzoy, yminañ:

—Dios Teedy, pen copicy co ich nbaadibich je ayo'n, huen jadu'n yjadüyb mïd ich nej miich mdzojcin.

⁴³ Chi jadüg'oc Jesús huimbijty ma je nidugüigpi discípulos, e oy pátnibi maab ajcxy, je' co ca' anajty ajcxy mimadägy mähuü. ⁴⁴ Chi yajhui'my ajcxy, e midugüig'oc ñicxy Dios mibijctzoobi. E nañ tim jadu'n oy minaanip jadu'n nej anajty ti y'ocminamb. ⁴⁵ Chi jadüg'oc huimbijtni jim ma je nidugüigpi, chi nimay ajcxy:

—¿Máagixni? Pócxci x jadachambi. Ti je tiempo yhuaad'ajtni mina ich, je jäy huídibi tzoon tzajpjoty, nyajciyegañich ma yi jibicjäydijc ajcxy. ⁴⁶ Pidiccix, tzoc jámim, chi ymiñ je huídibi xyciyegaambich ma nmídzipich.

Tzумы mach ajcxy Jesús yajnicxy

⁴⁷ Jesús capxni anajty jim co yjäty je Judas. Judas hue' je' nidügti je majmetzpi discipulos huídibi Jesús yhuin'ijx. E je Judas míd ja'ty mayjäy, je huídibi anajty ti quexy je judío teedy mįtungmídpí etz je mįjjäydijc. E je mayjäy hue' anajty ajcxy míd ypujx etz quipy. ⁴⁸ Judas, je huídibi anajty ciyejcp Jesús, ti anajty jayijp yecy tüg ijxpejt huídibi míd jébi ajcxy ijxcapy Jesús. Jadu'n jayijp Judas ycapxtuñ míd je' ajcxy, e yminañ:

—Je jäy huídibi anajty ndzücxpich, yi' je' Jesús. Májtzcix.

⁴⁹ Huin'it Judas nimijhuägy Jesús co capxpocxa'ñ, chi yminañ:

—¡Huindzin!

Chi tzücxxy.

⁵⁰ Chi Jesús ñimayí:

—Migüg, ¿na'amy co xyñimijhuägyich?

E co jadu'n ñimay, chi mic'amy yi' ajcxy majch Jesús. Chi ajcxy yajnicxy tzумы mach.

⁵¹ E huin'it nidüg je Jesús ymigüg, juudy je ypujx. Chi tatzpujxtucy je teedy mįtungmídpí ytumbi. ⁵² Chi Jesús ñimay je' ydiscípulo:

—Pidäg yi mbujx ma ytijc. Com pinjaty tziptumb míd pujx, nañ jadu'n y'ögipy míd pujx. ⁵³ ¿Nej ca' mnejhuíy co ich jébi nbijctzooyich cham adzu'x may ángeles, je huídibi xyñihuá'nibich ma nmídzipich? ⁵⁴ ¿Per nej ycixipy yca'pxipy nej miñ jaaybety, jadu'n nej cham ytuñyí yjadyí míd ich ycixpi?

⁵⁵ Chi Jesús ñimay je mayjäy:

—Miich ajcxy ti xyñidzoníyich míd je pujx míd je quiipy. ¿Nej mdiy ich meetzpi o jäy yaj'öcpich? Ich jabom jabom anajty inäyich nyaj'ixpicyich miich ajcxy jii by ma Dios ytijc. E ca' miich ajcxy xymajchich. ⁵⁶ Huinjihu' miich ajcxy co tüg'óciy yam ytuñyí yjadyí ca'px tim jadu'n nej je profeta ajcxy cojaay jecy'ajty.

Huin'it nidüg'óciy je' ydiscípulos ajcxy yqueectay. Chi Jesús yhui'my naydügpajc.

Jesús ma naymujcpidijc yhuinduu

⁵⁷ Je' ajcxy huídibi anajty ti mach Jesús, yajnicx ajcxy jim ma Caifás ytijc. E jim ma Caifás ytijc ma anajty ti ñayöymujctáayigixy je escribas etz je mįjjäydijc ajcxy. ⁵⁸ E je Pedro anajty axam nicxy jiguëgy jihuíy, ixti cooni yajja'ty ma Caifás ytiba'. Chi jim ytigiy. Chi ixtacy míd je cuend'ajtpí ajcxy, je' co oc'ixa'ñ ocnejhuíhua'ñ nej Jesús yjadañ.

⁵⁹ Je teedy ajcxy mįtungmídpí etz tüg'óciy je judíojäy mįtungmídpí ajcxy huinmañ ixtaaygixy nej jébi Jesús yajpocycägixy míd ajcxy xihuin, e jadu'n jébi mooygixy yi o'cin.

⁶⁰ Mayjäy ñihuambejty Jesús míd aní, per ni pin anajty ca' mídity tiy'ajt co Jesús anajty ti ytundigooy míd judíojäy ajcxy ycötujcin. Jac com jecy miin metz testigos míd aaní.

⁶¹ Je' ajcxy yminañ:

—Jadayaabi yëydijc mínañ co jébi nyajhuindigooyich Dios ymįtzajptijc, e codugüg xii ti anajty nyaj'oyíyich jadüg'oc.

⁶² Huin'it je teedy mįtungmídpí ytinayígy, e ñimay Jesús:

—¿Nej co ca' m'adzooy? ¿Nej janch tiy'ajt nej jadayaabi metzpi testigo ymina'ñ?

⁶³ Per Jesús ca' y'adzooy. E huin'it je teedy mįtungmídpí ñimaayí:

—Ñimaayg ich ajcxy Dios ycixpi, pen janch miich je' je Cristo je Dios y'ung.

⁶⁴ Chi Jesús yminañ:

—Miich jadu'n minamb. Nañ jadu'n ich miich ajcxy ñimäy, co ich je jäy huídibi tzoon tzajpjoty, miich ajcxy xy'ixipyich tzajpjoty ma Dios ymijc a'oy'amy. Nañ jadu'n miich ajcxy xy'ixipyich jocjoty co anajty nhuimbityich jadüg'oc ya naaxhuiñ.

⁶⁵ Chi je teedy jacmijtungmüdpí oy yhuít huindzecxy huinma'ch, chi ymíñañ:
 —Jadayaabi yéydíjc tí capxtigooy Dios. ¿Tí testigo njac-huaanim? Míich ajcxy cí'm tí mmídoogíxy co yí' tí ycapxytígooy ma Dios, e míñañ: ⁶⁶ ¿Nej míich ajcxy míñaangíxy? Chi ajcxy ymíñañ:
 —Tí ycapxytígooy, copícy co y'ögípy.
⁶⁷ Chi ajcxy huindzujy jíjptzujy etz cojxy ajcxy. Chi jacjadyíi huíngojxy jíjpcójxy. ⁶⁸ E chí ajcxy nímay:
 —Pen janch co míich je' je Cristo octíygapx píñ tí xycoxy.

Pedro ymíñañ co ca'p Jesús íxy'adyíi

⁶⁹ Je huín'ít moñí Pedro anajty íñay tíbägujc. Chí ñímíini tüg töxy'anäg tumbí, chí ñímaayi:
 —Míich nañ jadu'n tí mhuidity míid Jesús je Galilea jäy.
⁷⁰ Chí Pedro ymíñañ mayjäyjoty:
 —Ca' nhuíñjihuíyíich tí mgapxpy.
⁷¹ Pedro hue' anajty pídzímñíp co ñímíini huíngbí töxy'anäg. Chí je töxy'anäg nímay je' ymígügtíjc:
 —Jadayaabi yéydíjc tí yhuidity nañ jadu'n míid Jesús je Nazaretpí.
⁷² Chí Pedro jadüg'oc coyüch je Jesús cíxyjot huíníjot ymíñañ:
 —Ca' n'íxy'adyíijíich yíjibí yéydíjc.
⁷³ Jac co hueení, je jäy huídibí anajty ajcxy jíímíp nímay ajcxy je Pedro:
 —Janch co míich nañ jadu'n anajty míid mhuidity yí Jesús, com yí m'ayuc yí' xya-jníquëxícp.
⁷⁴ Chí Pedro tígíy capxpí janch oy ñínej míñañ huíníjot:
 —Ca' n'ix'adyíijíich yí yéydíjc.
 E tím huín'ítíy je tzey yaxígy. ⁷⁵ Chí Pedro jäymejtzcoody jadu'n nej anajty Jesús tí ñímáyíi: “Ma ca'ní anajty tzey yaxígy cham coodz, míich tugí'g'oc xycoyützibíich.” Chí Pedro pídzímíy tíba', e jíiby oy yäxy míbaad yjotcídagy.

27

Chi Jesús yajcíyeycy ma Pilato

¹ E co oy yxímíy yticxíy, chí je teedy míjtungmüdpí etz je míjjäydíjc ajcxy quípxycapxy co yaj'ögaangíxy Jesús. ² Chí ajcxy yajnícxíy cíxoch oy ajcxy cíyeycy ma Poncio Pilato je gobernador.

Judas ñayöctíyí

³ Co je Judas je huídibí anajty tí cíyeycy Jesús, co íjxy co yaj'ögaaníp Jesús, chí oy yjotmaybaatní. Chí conhúimbíjty je ípxmajcpí plata meéñ ma je teedy míjtungmüdpí etz míjjäydíjc ajcxy. ⁴ Chí Judas nímay je teedy míjtungmüdpí etz je míjjäydíjc ajcxy:
 —Íich tí ndundígooyíich co tí ngíyeycíich yí tudägyjäy ma míich ajcxy.
 Chí je' ajcxy y'adzooy:
 —Tí íich ajcxy n'occuent. Míich yí' mnígíxp tíbí mduñ.
⁵ Huín'ít Judas cohúijíy je meéñ jíiby tzajtígoty. Chí ñícxíy. Chí ñayöctíyí.
⁶ Huín'ít je teedy míjtungmüdpí yajpídígy je meéñ. Chí ajcxy ñayñímaayi míñ xyípy:
 —Jadayaabi meéñ ca' yjébity co nbídaacím ma ofrenda ñígídägy. Je' co yí' yjéjity je huídí ní'py tí tzoo'adyíi.
⁷ Huín'ít je teedy ajcxy tuñ je quípxycapxy co júyaangíxy míid je meéñ tüg naax huídibí jäy ytíjp, tútznaax ít, ma ajcxy yajnaxtígíhuípy píñjaty ca' ycogajpíty jíim Jerusalén. ⁸ Íxtí chambaad jadu'n xí'adyíi jejímí it: Ní'py naax. ⁹ E jadu'n ycíjx yca'px nej je profeta Jeremías ymíñañ: “E jadu'n ajcxy je' yajpídígy meéñ ípx majcpí plata meéñ (je' choou

nej anajty ajcxy Israeljäy ti yajnigödugïy), ¹⁰ e miid je meeñ ajcxy juy je tütznaax it, jadu'n nej anajty ti xy'ane'myich Dios.”

Pilato y'amidooy Jesús

¹¹ Jesús yajpaady jim anajty ytinäy ma je gobernador Poncio Pilato yhuinduu, chi y'amidoohui:

—¿Nej miich je' judíos jäy xyrey'ajtp?

Chi Jesús y'adzooy:

—Miich jadu'n minamb.

¹² Je judío teedy ajcxy huídibi mijtungmüdpï etz je mijjäydijc tzachxigixy Jesús ma je gobernador. Ni jadu'ñyi Jesús ca' y'adzooy. ¹³ Chi je Pilato ñimay Jesús:

—¿Nej ca' mmidooy nej yi' ajcxy yxïyi?

¹⁴ Per Jesús ni jadu'ñyi ca' y'adzooy. E paady je gobernador oy mij huinmay, ni ca' ocnejhuïyñi ti ycapxipy.

Jesús ycödujcy y'o'cin

¹⁵ Je gobernador jadu'n anajty ycostumbre müdity co jimijt jimijt najtzmazziy tüg machyjäy pascua xijoty, je huídibi je mayjäy ti ytimychojcpy. ¹⁶ E jim anajty tüg je machjäy huídibi anajty ajcxy ix'yajtaayb, e yxijity Barrabás. ¹⁷ E co anajty jim ti ytügmujctaaygixy, chi Pilato ajcxy y'amidooy:

—¿Pïn miich ajcxy mdzojcpy co ñich nnajtzmazzihuibichï? ¿Najtzmazziyich Barrabás o Jesús huídibi jäy ajcxy ytipy je Cristo? ¹⁸ Pilato ñejhuïyb anajty co mañ'ájtingix anajty ti çïyejccixy Jesús.

¹⁹ Jimni anajty iñäy Pilato me je ycötujctac co je ytöxyijc tiy'ajt quejxy ma yi', yminañ: “Ca' huaad myajtzaachytuñ yi tudägyjäy. Je' co ñich amygoodz ti ngumäyich janch jibic miid yi' ycixpi.”

²⁰ Per je teedy ajcxy etz je mijjäydijc ti anajty capxyjotçidaaccixy je mayjäy co huen yajnajtzmazziy Barrabás etz huen yaj'öccixy Jesús. ²¹ Paady co jadüg'oc je gobernador y'amidooy je mayjäy:

—¿Huídibi machyjäy mdzojcpy co nnajtzmazzihuibich?

Chi je mayjäy y'adzooy:

—Najtzmazzi' Barrabás.

²² Chi Pilato y'amidooy je mayjäy:

—¿E nej ndunipyich yi Jesús, huídibi jäy ytipy Cristo?

Huin'it ajcxy nidüg'óciy y'adzoday:

—¡Yajcruutzpet yi Jesús!

²³ Chi Pilato yminañ:

—Pues, ¿nej ti ytundigooy?

Per je mayjäy ñigoob y'adzoday:

—¡Yajcruutzpet! ¡Yajcruutzpet!

²⁴ Pilato yjapubedaan Jesús, per co ijxy nejhuïy co je mayjäy ca' ni nej niducy. Hue' ajcxy oy ytigïy huambi jihuiybi, chach ñayñajztijyigixy müd jot'an. Huin'it Pilato capxyñiguejxy je huädz ñi. Chi ytigïy çibujp ma je mayjäy yhuinduu, e yminañ:

—Ca' ñich ngo'adzohuipyich jadyaabi tudägyyëydijc y'o'cin. Miich ajcxy yi' mgo'adzoohuipy.

²⁵ Chi je mayjäy y'adzoday:

—Ñich ajcxy ngo'adzohuipyich yi' y'o'cin müd n'ung anäg etz n'ap n'oc.

²⁶ Chi Pilato najtzmazziy je Barrabás. Per Pilato ane'my co huen Jesús yajhuojp. E co yajhuojptay, chi çïyejcy, co huen yajcruutzpedyii. ²⁷ Chi Pilato ysoldados ajcxy yajnicxy Jesús ma agujctijc. E jiiby tüg'óciy soldadtijc ñayyöymujci ma Jesús. ²⁸ Chi je

soldado ajcxy je' yhuit yajniñenducy. Chi ajcxy yajniñeny je tzapx huit huídibi je rey ajcxy yajtuumy. ²⁹ Chi ajcxy tacy tüg corona mïd apy. Chi ajcxy yajcöjeny ma Jesús. E huin'it ajcxy a'oy'amy yajcigabiiy tüg je paxy. Chi ajcxy huingojxtinay'ahuüy. Chi ajcxy nixiicy yajxiicy, e ymïnaangixy:

—¡Ooy ymijity yjanchity, je judíos ajcxy yrey!

³⁰ Chi ajcxy huindzujy jijptzujy. Chi ajcxy yajcigajptucy je paxy, e yajcöhuojpïgy ajcxy. ³¹ E co ajcxy nixiictay yajxiictay, chi yajniñenducy je rey yhuit etz yajniñeny je yci'm huit. Chi ajcxy yajnicxy ma yajcruutzpedaangixy.

Co Jesús yajcruutzpejti

³² E jim ma anajty hueeni ti ytüyöy, jim ti paty tüg Cirene yëydijc anajty yxijity Simón. Chi ajcxy adzip nimay Simón co huen jaccapi Jesús ycrudz.

³³ E co ajcxy yja'ty ma tüg je it yxijip Gólgota, jadu'n yhuimbizim Öcpi Cohuajc Cögop. ³⁴ E jim ajcxy Jesús jayaj'üga'ñ vino temhuidity mïd tzooy, jigix ca' jihuihuip je tzaachypi. Per co uucmajch, chi jihui'ñybijc co ca' y'oy'uucnity.

³⁵ E co anajty ajcxy yajcruutzpety Jesús, chi je soldadtijc suerte ijxy, pin jëbi ocjè'adyii Jesús yhuit, chi yciyxy yca'pxy jadu'n nej je profeta cojaay jecy'ajty: “Yajhuäcxipy ajcxy ñich nhuit e mïd ñich nhuit ycixpi ixipy ajcxy suerte.” ³⁶ E jim anajty ajcxy ñaaygixy cuend'ajtcixy. ³⁷ Je xihuín ayuc huídibi ajcxy yjaay ma Jesús ycöduu jadu'n ymïnañ: “Jadayaabi je' Jesús, je judíos ajcxy je yrey.”

³⁸ Quipxy mïd Jesús ajcxy yajcruutzpejty metz meetzpi. Tüg a'oy'amy, e jadüg anajty'amy. ³⁹ Je mayjäy huídibi ajcxy naxiyyb anajty ma Jesús, ooy anajty oy ycöjigñ, nixigy yajxigy ajcxy Jesús, ⁴⁰ ymïna'ñ ajcxy:

—Bah, miich huídibi Dios ytijc jidaanip, e codugig xñ huingbi myajpidiga'ñ. Miich ci'm cham naygohuäñi, e minac cruudzcixy, pen janch miich Dios xy'ung'adyii.

⁴¹ Nañ jadu'n je teedy ajcxy huídibi mijtungmïdpi, etz je escribas, etz je fariseos ajcxy etz je mijjäydijc nixiicy yajxiicy ajcxy Jesús, ñayñimáayigixy miñ xyipy:

⁴² —Huingbi ti cohua'ñ, e ca' jaty nej ci'm ñaygohua'ñiyyb. Pen janch co yí jëjity je Cristo je Israel jäy rey, huen minacy jadachambi ma cruudz, huin'it nmibijcim. ⁴³ Yí ti pidägy ymibijcin ma Dios; huen jadachambi je Dios yajniñdzögyii, pen janch Dios chogyii; yí ti ymïna'ñ co Dios y'ung'adyii.

⁴⁴ Nañ jadu'n je metzpi meetzpi ajcxy huídibi cruudzpejt quipxy mïd Jesús nixiicy yajxiicy ajcxy ooy Jesús.

Jesús y'ögy cruudzcixy

⁴⁵ Co ycuycxijiiy, chi ycoodziyday tüg'óciy naaxhuiñybi. E jadu'n je naaxhuiñybi y'ijty coodz, ixti minacy yxi. ⁴⁶ Huin'ity Jesús ycapxyqueecy janch mic ymïnañ:

—Elí, Elí, ¿lama sabactani? —yí jadu'mbi ayuc hue' yhuimbizimy: Dios Teedy, Dios Teedy, ¿ti co ti xy'ixmachich?

⁴⁷ Nijëjity jäy huídibi anajty jim yajpatp huingon ma Jesús co jadu'n midoogixy Jesús y'ayuc, chi ajcxy ymïnañ:

—Jadayaabi yëydijc cham yaaxtaayb je profeta Elías.

⁴⁸ Huin'it nidüg jäy ñicxy janch poyigy etz oy yajtzoof je pixy. Chi je pixy yajxoogy mïd je xun vino. Chi pidacy je pixy ma je paxyjip. Chi yujctijy ma Jesús y'ahuac co huen ügy.

⁴⁹ Huin'it nijëjity ajcxy ymïnañ:

—Ixmatz, tzoc ajt oc'ixim, pen nimiinip Elías, pen janch yajniñdzögyii.

⁵⁰ Jadüg'oc Jesús yaaxqueegy janch mic. Chi oy y'o'cni. ⁵¹ Co Jesús y'o'cy, tim huin'ity jim ma Dios ytijc je mapxy yhuit yci'tzhua'cxy tinä'amy. E nañ jadu'n je naaxhuiñybi ooy chuyuy mïd uyx micpi etz je mijjatychaa oy jiitzhua'cxy. ⁵² May öcpi jut y'ahuach etz yjugypijcy mayjäy tiibi anajty y'o'ccixy tiibi anajty mibijccixy Dios. ⁵³ Co Jesús yjugypijcy,

chi je may'öcpi tiibi anajty jugypijccixy etz tiibi anajty pidzimgixy ma öcpi jut, chi ajcxy ytigüy ma je Dios ycajp, je Jerusalén. E mayjäy ajcxy ijxy. ⁵⁴ Co je mic ujx oy ñaxy etz jac tijaty anajty ti ytuñyii ti yjadyii, chi je capitán etz müd jadyii ymigügtijc huidibi anajty cuend'ajtp Jesús ooy ajcxy chigiy yjihuiy, e minaangixy:

—Janch tiy'ajt co yjiibi yëydijc Dios yi' anajty y'ung.

⁵⁵ May anajty nañ jadu'n töxyjäydijc ymij'ijxcixy jiguem huidibi anajty ajcxy Jesús ti müddzoon jim Galilea. Yi' anajty ajcxy Jesús ypubejtp. ⁵⁶ E ma je' ajcxy jim anajty chooñity, María Magdalena, María huidibi Jacobo etz José ytaj'ajtpy, etz je huidibi Zebedeo y'ung ytaj'ajtpy.

Jesús yajnaaxtigüy

⁵⁷ Co oy chuu'iyñi ycoodzüyñi, huin'it chooñ ma Arimatea tüg comeeñyjäy huidibi yxii José. E je' ymijnicxpejty anajty Jesús. ⁵⁸ Chi José ninicxy Pilato oy pijctzou Jesús ñinicx. Huin'it Pilato pidacy y'ane'min co huen möyii. ⁵⁹ Chi José ycüdigüy Jesús ñinicx. Chi huinmojch müd tüg poob sábana. ⁶⁰ Chi yajnaaxtigüy ma je yci'm jut jemybi huidibi anajty ti yajtzejtütüy ti yajpädütüy ma tüg tzahuingueetz. Chi adiguejctujcy je öcpi jut müd tüg tzaa. ⁶¹ Chi José ñicxni. E jim yhui'my María Magdalena etz je jadügpí María, y'ihñäy ajcxy ymihuingon öcpi jut.

Je cuend'ajtpi ajcxy ma Jesús ñaaxtigüy

⁶² E com jabom ma anajty Jesús ixiiybi ti y'ögy, ma anajty ti ni'ixiydäy müd je sábado xii ycxipi, chi je teedy ajcxy huidibi tungmüd etz je fariseos ajcxy ñayyöymujci ma je Pilato.

⁶³ Chi ajcxy yminañ:

—Huindzin, yi' ich ajcxy njäymejchpyich co je anüdacpi yminañ ma anajty yjuugyity co codugüg xii jugypiga'ñ jadüg'oc co anajty ti y'ögy. ⁶⁴ E paady tunmay'ajt quexipy soldados ajcxy ma Jesús ti ñaaxtigüy huen cuend'ajtcixy ixti cooni tugiig xibi paadipy. Ca' yjegyity co ñiminiib adzuum agoodz je' ajcxy huidibi mijnicxpejtíp etz tzimguëgipy ajcxy Jesús ñinicx. E chi nicxy jäy ymina'ñ: “Ti yjugypicy je öcpi.” Chi anajty jac'anaxy je anü ti yjajtni ca'ydí je jayjipi.

⁶⁵ Chi Pilato ajcxy nimay:

—Miich ajcxy müd tüg picy soldados huidib cuend'ajtp ma miich ajcxy. Nicxcix miich ajcxy yaj'adujccixy je öcpi jut, jadu'n nej m'a'ixiiygixy.

⁶⁶ Chi ajcxy choni ma je Pilato. Chi ajcxy quejxy je tüg picypí soldados ma je öcpi jut. Chi ajcxy pidacy ijxhui'min ma je tzaa huidibi ajcxy je jut yaj'adiguejctujcy.

28

Co Jesús yjugypicy

¹ E com jabom co yximüy yticxigy je domingo xii, huin'it ñicxy María Magdalena etz je jadügpí María ma Jesús ñaaxtigüy. ² Chi tüg mij ujx ñajxy. Huin'it ycidacy Dios tüg y'ángel huidibi tzomb tzajpjoty. Chi jidigejcy je tzaa ma je öcpi jut aguu. Chi y'ixtacy ma tzaa ñicx. ³ Janch adücxp je ángel anajty yhuinjip jadu'n nej huidzuc, e je yhuit janch poob'ögy. ⁴ E co je soldados ajcxy ijxpaty je ángel, chi ajcxy ooy chuyuygooty. Chi ajcxy yhui'my jahuengi ögy. ⁵ Huin'it je ángel y'adzooy je metz töxyjäy:

—Ca' miich ajcxy mdzigüy. Ich nejhuüybich co miich ajcxy m'ixtäy Jesús je huidibi ajcxy yajcruudzpejty. ⁶ Per ca' je' cham ya. Ti je' yjugypicy, jadu'n nej yminañ. Min miich ajcxy oc'ix ma ñaaxtigüy. ⁷ Nicx miich ajcxy jottigooyb ma je' ydiscípulos ajcxy e nima': “Ti Jesús yjugypicy jadüg'oc, e yi' ñicxip jim Galilea e jim ajcxy mmüdnaybadüyb.” Ich miich ajcxy yam nnimaaygixy.

⁸ Huin'it je töxyjäy ajcxy chooñ janch poyigy ma anajty ti ñaaxtigüy Jesús. Chi ajcxy ñicxy müd tzigüñ, per agujc jotcujc. Poyigy ajcxy oy tiy'ajt yecy ma je discípulos ajcxy.

⁹ E jim anajty je metzpi töxyjäy ytüyöy, timetini Jesús ñayguëxíci ma je' ajcxy yhuinduu. Chi Jesús ajcxy capxpocxy. Chi je' ajcxy mihuingoñ Jesús etz mineeni je' ytecy. Chi ajcxy huindzigíygyxy. ¹⁰ Jesús minañ:

—Ca' mdzigíygyxy. Nicx miich ajcxy nima' je nmigügtjicich co huen ajcxy nicxy jim Galilea, e jim naybadíybych mïd yí' ajcxy.

Huidibi ajcxy je soldadotjic ñigapx

¹¹ E tüyöybñi anajty je töxyjäy nimetzpi co nijëjity je soldados ajcxy chooñ ma Jesús ñaaxtigíy ñicxy jim Jerusalén, mïdmïydäga'ñ je teedy huidibi tungmïdipi nej anajty ti ytuñyii ti yjadyii ma Jesús ñaaxtigíy. ¹² E huin'it je teedy ajcxy ñayöymujctayi mïd je mijjädijc, tunaangixy quipxy capxy. Huin'it je teedy ajcxy etz je mijjädijc moy ajcxy je soldados may meeñ. ¹³ Chi ajcxy nimay:

—Miich ajcxy mina'nip co maab anajty miich ajcxy mijcoodz co ymiiñ Jesús ydiscípulos ajcxy etz tzingueeci Jesús ñinicx. ¹⁴ Etz pen ymidooyb anajty yí gobernador, ñich ajcxy ngapxjotcidägich, jigix ca' nej xytúngixipy.

¹⁵ E huin'it ajcxy je soldados ycidigíyí je meeñ. Chi ajcxy ñicxy cuyduñ jadu'n nej anajty ajcxy ti ñimäyii. E ixti chambaad jadu'n judíojäy capx je ayuc.

Huidibi Jesús yajnibijc ydiscípulos ajcxy

¹⁶ E jadu'n ajcxy ñicxy je nimajctügpí Jesús ydiscípulos ajcxy jim Galilea. Chi ajcxy ñicxy ma je cögop jadu'n nej anajty Jesús ti ñimáayigixy. ¹⁷ E co ajcxy ijxpaty Jesús, chi ajcxy oy huindzigíy. Per jim nijëjity huidibi ca' mibijcy co anajty yjëjity. ¹⁸ Huin'it Jesús ymijhua'cy ma yí' ajcxy, e nimay:

—Ñich ti nyajmöyich je cötujcin jiiby tzajpjoty etz ya naaxhuiñ. ñich ti nyajmöyich je mij cötujcin, jaydëbi n'ane'myich jiiby tzajpjoty etz ya naaxhuiñ. ¹⁹ E paady nicx miich ajcxy huindu'my naaxhuiñ capxhuäcxix je ayuc, jaydëbi jäy ajcxy xymibigipyich. Tüg'óciy jäy ajcxy huidibi xymibijcpich myajñibedipy ajcxy mïd Dios yxii, Dios y'ung yxii, etz mïd je Espíritu Santo yxii. ²⁰ Miich ajcxy myaj'ixpigipy je mayjäy co copicy cuydunipy ajcxy ñich ngötujcin tüg'óciy jadu'n nej ti n'ane'myich miich ajcxy. E miich ajcxy mnejhuñyb co nmïd'ityich miich ajcxy huinixii huinítiempo, ixti mabaad naaxhuiñybi anajty ycxipi ytigooy. Jibaad ycixy. Amén.

SAN MARCOS Jaayhui'my Jadu'n Nej Jesucristo Ytun Yjajti

¹ Jadu'n oga'ñ chondacy je oybi ayuc tiy'ajt jadu'n nej Jesucristo, je Dios y'ung ytun etz yjajti.

² Je Dios y'ayucnajtzcaxhuybi je Isaías jecy'ajty jayhui'my jadu'n nej Dios nimay je Cristo:

Nguexaamyich ñch ngogapxy jayijp ma nidüg nidüg cajp ma miich mñicxa'ñ jac'axam, jigix jëb je cogapxy nimähuipy je jäy ajcxy co huen nayñi'ixiyyigixy ma yjot yhuinma'ñ mñid miich ycixpi, jadu'n nipaady nej jihuüy jäy ajcxy ni'ixiy tü'aa co tüg rey yjada'ñ.

³ Nañ jadu'n jadüg it Isaías jayhui'my jada ayuc ma jadu'n ymínañ:

Jim mñitigüduum jäy ajcxy midoy co tüg jäy y'ayuccapxhuäcxy, jadu'n ymínañ: "Nayñi'ixiyyigix ma mjot mhuinma'ñ ajcxy jaydëb naybaatim mñid ajt nHuindzin Dios. Ixmájtzcixy yi mjibicjot mjibic-huinma'ñ. Jadu'n nipaady nej jäy ajcxy yajtiy tü'aa huídibi ooy y'adijy y'a'och."

⁴ Jim mñitigüduum anajty Juan je Bautista miñ e ytiigiy mayjäy yajñibejtpi. Chi Juan capxhuäcxy Dios y'ayuc ma je mayjäy ajcxy huídibi anajty mimb ñibejtp. Juan ayuc capxhuäcx co copicy co jäy ajcxy huen jothuimbíjtcixy etz ixmájtzcixy ajcxy je yjibichuinma'ñ, etz ñibéjtcixy, jigix jëbi Dios yhuinmecxñib ajcxy ypocy. ⁵ Tüg'ócay je mayjäy ajcxy huídibi anajty tzinaayb jim Judea ñaaxjot etz jim Jerusalén mimb anajty ajcxy ma Juan, e y'amidoo'ijty anajty ajcxy je y'ayuc. Co je jäy ajcxy capxpídzñmy nej anajty ypocytungixy, chi Juan yajñibejty ajcxy ma je Jordán mijñi.

⁶ Juan hue' anajty yhuít'ajtpy camello ñibijc, e nañ jëyim anajty mñid ñayhuññiyii, e hue' anajty yjicx'ajtpy mu' etz uxpäg. ⁷ Juan ycapxhuäcxyp anajty Dios y'ayuc ma je mayjäy, e ymínañ:

—Ich jayijp ti nmiñich ngapxhuäcxy Dios y'ayuc. Jac'axam minipy tüg jäy huídibi jacñigi mic'ajt mñidity ca'ydi ñch, ca' xypaadyich ñicxy nguejyich yi' ycighuin. ⁸ Ich ti nyajñibetyich miich ajcxy mñid ñi. Per je jäy huídibi yjacmñid Dios ymic'ajt, ca'ydi ñch. Yi' xyaj'adigihuip xyajjotigihuip Dios yjihuí'ñ ymic'ajt, jadu'n nipaadip nej jihuüy xyajñibedip mñid Dios yjihuí'ñ ymic'ajt.

Co Jesús ñibejty

⁹ Je huin'it xi huin'it tiempo Jesús chooñ ma je cajp huídibi yxi Nazaret, jim Galilea ñaaxjot, e ymiñ ma Juan el Bautista anajty yajpaady. Huin'it xi Juan yajñibejty Jesús ma je Jordán mijñi. ¹⁰ Pidzimb anajty Jesús ma je mijñi, e tim huin'ityi Jesús iix co je tzajp anajty y'ahuäch, e iix je Espíritu Santo chooñ tzajpjoty, e ycidägy ma yi'. Jadu'n je Espíritu Santo yquëxigy anajty nej tüg muuxy. ¹¹ Chi Jesús midooy capxy ayuc choñ tzajpjoty, nimäyii:

—Ich miich n'ung'ajtpy. Ooy ñch miich ndzocy njihuüy. Ooy jotcuyc nayjihuüyijich mñid miich.

Je mujcu' tuñ ijxta'ni ma Jesús

¹² Huin'it mic'amy je Espíritu Santo yajñicxy Jesús mñitigüduum. ¹³ E hue' Jesús yhuí'miy jim mñitigüduum huixchiguipx xi ahua'n iyujc agujc. Huin'it je mujcu' jot'ijxy yhuinma'ñ'ijxy je Jesús. Chi je ángeles ajcxy miñ ypubejty ypuđigiy je Jesús.

Jesús ytung yajtzondägy jim Galilea

¹⁴ Ti anajty Juan yajpidägy pujxtigoty, jac'axam Jesús ñicxy jim Galilea. Jim Galilea Jesús capxhuäcxy Dios y'ayuc etz yi Dios y'ané'min. ¹⁵ Jesús ymínañ:

—Ti je xii je tiempo yhuaad'ajtni. Ti nigoody je xii je tiempo mina Dios pidäga'ñ yí' y'ané'min ya naaxhuiñ. Jothuimbijtcix ajcxy, etz ixmajtzcix ajcxy mjibicjot mjibic-huinma'ñ. Mibijccix Dios y'ayuc jadu'n nej jëb ajcxy m'alma ñidzögipy.

Jesús huodzoñ mīdaax jāy huīdibī anajty acxmajtzp

¹⁶ Jesús huīdijtp anajty ma je mejypa' huīdib yxii Galilea mejy, co oy'ijxpaady Simón etz y'uch Andrés. Simón etz Andrés acxmadziī anajty ytung'ajtpy, yimpīdacpy anajty y'acxmadzi'ñ mejyjoty co ajcxy Jesús ixpaty. ¹⁷ Chi Jesús nimay Simón etz Andrés:

—Min mīd ñch. ñch miich ajcxy huīngbī tung nmōhuīpy. Jadu'n mdung nipaadip nej jihuīy mjāymājtzciīpy.

¹⁸ Mīc'amy Simón etz Andrés ajcxy ixmajch y'acxmadzi'ñ, e ñicxy ajcxy mīd Jesús.

¹⁹ Chi Jesús yjacyōy anajty hueen, e ixpaty Jacobo etz y'uch Juan, je Zebedeo ajcxy ymang. Je Jacobo etz Juan tumb anajty barcojoty. Hue' anajty ajcxy yaj'oyñyb je' y'acxmadzi'ñ. ²⁰ Chi Jesús mijhuooy ajcxy Jacobo etz Juan, e nimay co huen ñicxy mīd yí'. Mīc'amy je' ajcxy ixmajch yteedy, je Zebedeo, barcojoty mīd ytumbi, chi ajcxy ñicxy mīd Jesús.

Tüg jāy huīdibī anajty jibīc espīritu mīd

²¹ Huin'it Jesús mīd ymīgūgtīc yja'ty jim Capernaum. Je huin'it sábadō, je pōocxin xii, Jesús ytīgñy ma je judío jāy ajcxy ñaymujctac jim Capernaum, chi yjāyay'ixpījctzondacy.

²² Je mayjāy ooy ajcxy jihuīy huīnmay je ayuc huīdibī Jesús anajty ajcxy yaj'ixpījcp. Com Jesús hue' anajty yaj'ixpīcy jadu'n nej jihuīy yci'm'ané'min mīdity. Ca' Jesús anajty yaj'ixpīcy jadu'n nej je jāy ajcxy huīdibī yaj'ixpījcp anajty Moisés ycōtūjcin je jécyp.

²³ E ma je naymujctac tüg yēydīc huīdibī mīd anajty ca'oybī. Chi je ca'oybī ooy mīc ycapxcoody, e ymīañ:

²⁴ —¿Ti co xy'amayñy ñch ajcxy, Jesús huīdibī tzomb jim Nazaret? ¿Nej ti mmiñ co xyajhuīndīgoyāngixyīchi? ñch n'ixcajpy miich, e nejhuñybich co miich je' je Huātzpi Dios.

²⁵ Chi Jesús ix'ojy je ca'oybī, e nimay:

—Amon miich, e pidzimb ma jada yēydīc.

²⁶ Huin'it je ca'oybī yajyajch yajquīdy je yēydīc, e mīc yaaxqueegy, e ypidzimy ma je yēydīc. ²⁷ Tüg'óciy je mayjāy jūlby ma je naymujctac ooy ajcxy ñay'adzīgñy, e ñayñīmaayī ajcxy mīñ xyīpy:

—¿Ti jada' yí? Jada yēydīc ymīd jemybī ixpījcin. Yí' mīd mīc'ajt etz ane'm'ajt, paady yciīpī yí' ane'my yí' ca'oybī, e ycapxmīdoohūp.

²⁸ Mīc'amy je mayjāy ajcxy huīdijaty tzīnaayb ma tüg tüg cajp jim Galilea nejhuīy ajcxy nej Jesús ytuñ, e cōmaaygixy Jesús.

Jesús yajtzōgy Simón Pedro ymīd tōxyjāybi

²⁹ Tim huin'ítīy Jesús ypidzimy ma je naymujctac, chi ñicxy mīd Jacobo etz Juan jim ma Simón etz Andrés ytīc. ³⁰ Simón ymīd tōxyjāybi pījcp anajty. Cijx'am anajty y'ity, e mīc anajty ooy ytoyī. Tim huin'ítīy Jesús ñīmaayī co Simón ymīd ooy mīc ypigyī. ³¹ Chi Jesús nimijhuāgy je pa'mjāy. Chi majtzī yci', e huījtzīgy. Tim huin'ítīy yí' toyī y'ixmajtzī, e chi yajcay yaj'uucy Jesús etz ymīgūgtīc.

Jesús yajtzōgy may pa'mjāy

³² Co xii oy ycidacni, e chuu'ñyñi, chi je mayjāy mīd mīñ ajcxy ma Jesús tüg'óciy pa'mjāydīc, etz huīdijaty ajcxy ca'oybī ymīd. ³³ Tüg'óciy je mayjāy ajcxy ma je jimbī mij cajp nimujcy je tīc ma Jesús anajty ti yjāttāgy. ³⁴ Jesús yajtzōoctay tüg'óciy je may pa'mjāy huēnytimyībā'mīty, etz yajpidzimy may ca'oybī majaty jāy ajcxy. Per Jesús ca' anajty a'ixīy ñicxy je ca'oybī ñīgapxyī, com y'ixy'ajttaayb anajty ajcxy Jesús.

Jesús y'ayuc t'iy'ajt capxhuäcxy j'im Galilea

³⁵ Tim mooñi Jesús ymaybid'igy, ca' anajty yxiiim'iyñi, e ypidzimy ma je cajp. Chi ñicxy ma tüg m'ijti'giduum Dios m'ibijctzoobi. ³⁶ Huin'it je Simón etz je ym'igügtijc ooy ajcxy ja'ijxtäy Jesús. ³⁷ Co ajcxy paty je Jesús, chi ajcxy nimay:

—Tüg'óciy je mayjäy xyjadim'ixtäy.

³⁸ Chi Jesús nimay Simón etz je ym'igügtijc ajcxy:

—Tzoc ajt jámim ma yi jacjadyii cajp huinduy agonbi, jaydëb ngapxhuäcxibich Dios y'ayuc nañ jadu'n ma yi jäy ajcxy j'im. Paady ycixpi ndzooñich tzajpjoty, jigix jëbi ngapxhuäcxibich Dios y'ayuc.

³⁹ Jesús nicxp anajty ma nidüg nidüg cajp j'im Galilea ycapxhuäcx anajty Dios y'ayuc ma nidüg nidüg judíojäy ñaymujctac, e yajpidzimy anajty ca'oybi majaty jäy.

Jesús yajtzögy tüg jäy n'ibützpa'mm'üdp'i

⁴⁰ Tüg jäy huidibi ym'iid anajty jibic pützpa'm, je micpi, chi nimijhuägy Jesús, e ycojtinay'ahu'iy ma Jesús yhuinduu, ym'inañ:

—Pen miich jadu'n tzojcpy, jëb xyajtzögich.

⁴¹ Chi Jesús pa'ayoy je pa'mjäy, e pidacy yci' ma je pa'mjäy ñinicx, e ym'inañ:

—Ndzojcpyich, cham nyajtzögy.

⁴² Co Jesús jadu'n ym'inañ, chi mic'amy je jäy huidibi anajty m'iid je jibic püdz chögy.

⁴³⁻⁴⁴ Mic'amy Jesús ycapxc'ijxy m'iid je jäy huidibi anajty ti chögy, e nimay:

—Ix pin myajnimäy co ti mdzögy. Nicx jayijp jiiiby ma Dios ytijc ma je judío teedy ajcxy, e mo' Dios yhuindzigi'ñ jadu'n nej Moisés ycötújc'in ane'my, jigix jëbi huädz mbidzimipy ma Dios ycötújc'in. Cuydun miich huidibi Moisés ñajtz'ane'm'iy jecy'ajty, jigix jëbi je mayjäy ajcxy nejhu'huip co ti mdzögy.

⁴⁵ Per je yëydijc ca' capxymidoy Jesús. Co ñicxy, chi ytig'iy capxy yajyöybi jadu'n nej anajty ti yajtzögyii. Com je mayjäy nejhu'iyb huidibi anajty Jesús ti tuñ, paady ycixpi Jesús ca' anajty ocjajtni nej ytig'ihuipy iixna' jigue'xna' majaty cajp. Hue' anajty huidity ma ca' pin chinäy. Per miñ anajty y'oy'ixyii huenytimyp'injäyity, chooñ ma nidüg'óciy cajp huinduy agonbi.

2

Jesús yajtzögy tüg jäy c'ima'tpi tecy'ma'tpi

¹ Ti anajty xii tiempo ñajtnin'icx'iyñi co Jesús yhuimbijty jadüg'oc j'im Capernaum. Je mayjäy ñejhu'iyb anajty co Jesús yajpaady ma tüg tijc. ² Chi mic'amy mayjäy ñayyöymujci ma anajty Jesús yajpaady, e ca' anajty tigiydac ma je tijc, m'iid co tzach mayjäy anajty ti miingixy. Y'adujctaayb anajty ajcxy je tijc'aguu. E Jesús ycapxhua'xyp anajty Dios y'ayuc. ³ Huin'it xii, m'idaax yëydijc c'iymin' c'ix'am ma Jesús yajpaady tüg pa'mjäy huidibi yci' ytecy ti yxujxtäy anajty. ⁴ E com ca' anajty ni nej y'oy'iy nej yajjädip ajcxy ma Jesús je pa'mjäy, je' co anajty chach újtzy je tijc m'iid je mayjäy, chi ajcxy yajcöhuaach hueeni je tijcn'icx ma anajty Jesús yajpaady. Chi ajcxy cödiyñajxy je pa'mjäy c'ix'am. ⁵ Co Jesús ijxy je jäy ajcxy ym'ibijcin, chi nimay je pa'mjäy:

—Migügich, yi mbocy ti yajhuinmecxtäy.

⁶ Per nijëjty huindzindijc huidibi ajcxy nijaydutp anajty Dios ñecy co ajcxy midoy nej Jesús ym'ina'ñ, chi ajcxy ym'ina'ñ jotjoty huinma'ñyoty: ⁷ “¿Nej co jada jäy jadu'n ym'ina'ñ co ti yajhuinmecxy jada pa'mjäy ypocy? Capxtigooyb yi' m'iid Dios. Com ca' nip'injäy jëb ypocyhuinmecxy. Tüg'ajc Dios yi' huidibi jëb ypocyhuinmecxy.” ⁸ Per Jesús ñejhu'iyb anajty nej je' ajcxy chachm'ina'ñ jotjoty huinma'ñyoty, paady mic'amy ym'inañ:

—¿Na'amy co mdzachhuinmaaygixy? ⁹ ¿Huidibi jada jac'ooy co nnimäyich yi pa'mjäy: “Ti mbocy yajhuinmecxytäy.” O jac'ooy co nnimähuibich: “Pid'ig, e yajpid'ig yi mdögy, e tüyöy?” Tú'ciy yi'.

¹⁰ Chi Jesús yjacmínañ:

—Jadachambi janchtiy nyajquëxíga ñich co ñich, je jáy huídibí tzoon tzajpjoty, e huídibí cham yajpaady ya naaxhuiñ, nmíidich mic'ajt jaydëb nhuinmecxyích jáy ypocy.

Co Jesús jadu'n ymínañ, chi nímáy je pa'mjáy huídibí yci' ytecy anajty xuxy:

¹¹ —Ñich miich yam jadu'n nímáy: “Tinayíy, yajpidíy yí mmabejt e nícx ma mdíj.”

¹² E mic'amy je pa'mjáy ypidíy, e yajpidíy ymabejt, chi ytüyöychoñ jiiby ma je mayjáy ajcxy anajty y'ixy yhuíndíxxy. Paady ycxpí tüg'óciy je mayjáy ooy jihuíy huinmay etz jáymejch ojadajty ajcxy Dios, ymínaangíxy:

—Nímínaabi ajt jadu'n nga'íjxim míjhuinma'ñ jadu'n nej cham tí n'íjxim.

Jesús nímáy je Leví: “Pajamgích”

¹³ Chi jadüg'oc Jesús ycajppídzímy, ñícxxy jím ma mejypa'. E co mayjáy ñayöymujcy jím ma Jesús anajty yajpaady, chi Jesús yaj'ixpíjx je mayjáy. ¹⁴ Co Jesús yjactüyöy anajty, chi íjxpaady Leví je Alfeo ymang. E Leví íñaayb anajty ma je yajcogüejttac jáy yajcogüejtp anajty. Chi Jesús nímáy Leví:

—Pajamgích.

Tím huin'ítíy Leví ytínayíy, íxmajch ytung, e panícxxy Jesús.

¹⁵ Jadu'n yjajti co tüg xí Jesús caayb anajty me Leví ytíjx. Mayjáy huídibí ytung'ajtpy anajty yajcogüedí, etz jacjadyí jáy huídibí anajty tundígooyb míid judío jáy ycostumbre y'íñaaygíxy ma je caydac quípxy míid Jesús etz je' ydiscípulos ajcxy. Com may jáy anajty ooy Jesús tzach míid huídíjtcíxy. ¹⁶ Jím anajty ma Leví ytíjx níjéjty fariseojáy, je huíndzíndíjx huídibí tzach padumb judío jáy ycostumbre. E co je' ajcxy íjxy co Jesús caayb uucp anajty tüg'mucy míid tüg'óciy je mayjáy ajcxy huídibí tundígooyb míid judío jáy ytíy'ajt ycötújcin, etz yajcogüejtpídjx, chi ajcxy mígápxy Jesús ydiscípulos, je' ajcxy huídibí míjnícxpejtp anajty Jesús, nímáy ajcxy:

—¿Nej co Jesús miich ajcxy mHuíndzín ycaymucy y'ucmucy míid yí yajcogüejtpídjx ajcxy, etz jacjadyí jáy ajcxy huídibí tundígooyb míid judío jáy ycötújcin?

¹⁷ Co Jesús jadu'n mídoy nej je fariseo jáy nígapxyí, chi ajcxy nímáy:

—Ca' tzocy tzozdumbí yí jáy ajcxy huídibí mic'ajtp oy'ajtp. Yí' janchtiy yí huídibí ajcxy yuuba'm ymíid chojcpy ajcxy tzozdumbí. Nañ tím jadu'n yí jáy ajcxy huídibí ca' ypocymíidíty, ca' ajcxy tzocy pocyhuinmeecxín. Ñich tí nmiñích co nyajjothuimbidípyích pocyjáydíjx. Ñich ca' tí nmiñích co nyajjothuimbidípyích oyjáydíjx tudágyjáydíjx.

Jesús yaj'amídoogíxy nej co jáy y'ity jaygay

¹⁸ Jadu'n yjajti tüg tiempo ayuu'íjtp anajty je jáy ajcxy huídibí míjnícxpejtp anajty Juan je Bautista. Nañ jadu'n ayuu'ajtp anajty je fariseojáy ajcxy. Chi níjéjty ajcxy ymíñ ma Jesús e amídoy:

—¿Nej co yí jáy ajcxy huídibí míjnícxpejtp ajcxy Juan etz nañ jadu'n yí fariseojáy ajcxy ayuu'ajtp ajcxy, e je jáy ajcxy huídibí miich xymíjnícxpejtp, ca' y'ayuu'ájtíxy?

¹⁹ Chi Jesús y'adzooy:

—Co ya nyajpaadyích ya naaxhuiñ, ca' ycopícity co ñich ndiscípulos ajcxy y'ayuu'adíy. Jadu'n nipaady nej jáy ajcxy huídibí píjcin níxíidumy ca' ajcxy y'ayuu'aty ma yam yí píjcin níxíiduñ, e pení ca'ni je píjcpí ymígügtíjx y'íxmajtztáyí. Namí je píjcpí ca'ni choñ, chi ca' pín y'ayuu'ada'ñ huídibí níxíidum je píjcin. ²⁰ E paadíy je xí je tiempo mína ca' nmíid'ída'ñích ya naaxhuiñ yí' huídibí ajcxy xymíjnícxpejtpích, e huín'it ajcxy y'ayuu'adaangíxy.

²¹ Com jemybí Dios y'ayuc nyaj'ixpícpyích, paady ca' ytügíy míid je jécyíy ayuc huídibí je fariseo jáy ajcxy yaj'ixpíjcpy. Jadu'n nej miich ajcxy mnejhuíy co ní pín ca' agíyíy tuc huit míid tüg pedaas jemy huit, con je' co je jemy huit nímujcp je', e chi nígí najtzcídzíhuíp je tuc huit. ²² E nañ ní pín ca' jëb huaad pídagy jemy vino ma tuc cochac.

Je' co je vino jemybi yciidzamy je tuc cochac, e chi y'ixyojctähuip je vino etz je cochac ñitigoydähuip. Hue' janchtiy jëb ajcxy pidacy jemy vino ma jemy cochac.

Je discípulos ajcxy yajmújicixy je moc cojc sábado xii

²³ Tüg sábado xii Jesús miiid ydiscípulos ajcxy ñaxiiy ma tüg trigo cam. E huin'ítiiy je ydiscípulos ajcxy ytigiiy je trigo tujcp. ²⁴ Co je fariseo jäy ajcxy ijxy jadu'n nej Jesús ydiscípulos ajcxy anajty tujcmujc trigo tiiim, chi ajcxy nimay Jesús:

—Ix miich. ¿Na'amy co miich mdiscípulos túngixy huidibi judío ycötújcín capx'adujcpy sábado xii?

²⁵ Per Jesús ymíñañ:

—¿Nej ca'miich ajcxy mguendtuñ Dios y'ayuc co mnecycapxy, jadu'n nej David ytuñ tügtecy jecy'ajty, co David etz ymígügtijc yuu'ögaangixy anajty? ²⁶ Je huin'it tiempo jecy'ajty co je judío teedy Abiatar miijtungmiiidpi anajty ma Dios ytijc, chi David ytigiiy ma Dios ytijc, e caay je tzajcaagy huidibi ti anajty yoxy ma Dios yhuinduu. Dios ycötújcín ymíñañ co je teedy ajcxy ycaagy'ajtpy jada tzajcaagy, ca' jac'ooyñipin. Nañ jadu'n David moy je tzajcaagy je jäy huidib anajty ajcxy ymiiid.

²⁷ Nañ jadu'n Jesús yjacmíñañ:

—Iich, je jäy huidibi tzoon tzajpjoty, nmiiidich ané'min, jaydëb nimäyich je jäy ajcxy ti jëb túngixy sábado xii. ²⁸ Com Dios ti ixmach je sábado xii, paady ycixpi, iich je jäy huidibi tzoon tzajpjoty, nmiiidich ané'min jaydëb nimayich jäy ajcxy co jëb tijaty tuñ sábado xii.

3

Je yëydijc huidibi anajty yci' tüzip

¹ Jesús ytigiiy jadüg'oc ma je judío naymujctac. Jiiby anajty tüg yëydijc huidibi anajty ymiiid tüg yci' tüz. ² Je fariseojäy jiiby ma je naymujctac y'ijx'ijtpy anajty Jesús, co anajty nejhuñhua'ñ pen Jesús yajtzögamy je pa'mjäy sábado xii, jigix jëbi ajcxy xihuip Jesús co ti ytundigoy miiid judíojäy ycötújcín. ³ Jesús nimay je jäy huidibi miiid tüg yci' tüz:

—Pidig, min ya ma iich.

⁴ Huin'it Jesús y'amidoy je jäy ajcxy e nimay:

—¿Nej miich ajcxy miiinaangixy: Nej jëbi jada nduñich je oybi o je jibicpi sábado xii joty? ¿Jëbi nyajtzögich jäy o jëbi nyajtigoyich jugy'ájtín?

Per je jäy amoñ ajcxy ijty, ca' ajcxy je' y'adzooy. ⁵ Huin'it Jesús huindicxpejty je jäy ajcxy miiid chip y'ahua'n, e miiid jotmay, je' co ooy ajcxy jotjuuñity, e chi nimay je yëydijc:

—Xajtiu yi mgi'.

Chi je yëydijc xajtiy yci', e chi yci' oy chögy. ⁶ Chi je fariseojäy ypidzimday ma je naymujctac, ooy yjotmädy ajcxy, e ñicxy ajcxy ñaymújcip miiid je jadügpiy judío huindizindijc huidibi ymijnicxpejt je rey Herodes. Huinma'ñ ixtaayb anajty ajcxy nej jëb ocyaj'ögip Jesús.

Mayjäy ma tüg niiiba'

⁷ Per Jesús chooñ miiid yi' ydiscípulos ajcxy, ñicxy ma mejypa'. E ooy mayjäy huidibi ajcxy tzomb Galilea ñaaxjot etz Judea ñaaxjot panicxy ajcxy Jesús. ⁸ Nañ jadu'n mayjäy panicx ajcxy Jesús huidibi ajcxy tzomb jim Jerusalén, huidibi ajcxy tzomb jim Idumea ñaaxjot, huidibi ajcxy tzomb jim Jordán miijnii nínaxy ma xii ypidzimyb, huidibi ajcxy tzomb jim Tiro etz Sidón ñaaxjot. Ñicxtäy je mayjäy ma Jesús yajpaady, com ñejhuñyb anajty ajcxy je miijhuinma'ñ huidibi Jesús anajty ytumyb. ⁹ Com tzach mayjäy anajty ymiingixy, paady Jesús ni'ane'mdiy ma yi' ydiscípulos ajcxy tüg barco ma jëb iñäy, ca'ty je mayjäy ooy y'adijiiy y'agodiiy. ¹⁰ Com Jesús ti anajty yajtzögy may jäy, paady ycixpi tüg'óciy je pa'mjäy nimujcxy Jesús, adzip tzachnidonaangixy. ¹¹ Co je jäy ajcxy huidibi ca'oybi ymiiid ijxpaty Jesús, chi ajcxy ñayhuiojtaci ma Jesús yhuinduu, e mic ycapxcooty, ymiiinaangixy:

—Miich je' Dios y'ung.

¹² Per Jesús nimay mictägy je ca'oybi ajcxy co ca' huaad nigapxcixy nimiydaaccixy pin je' anajty.

Jesús huin'ixy majmetzpi discípulos

¹³ Huin'it Jesús ypejty ma tüg cögop, e capxyñiguexy co huen miñ ma yi' je ymigügtijc huídibi yhuin'ixamy co ytunam miid yi'. Chi ajcxy ymiñ ma Jesús. ¹⁴ Chi Jesús yhuin'ijx majmetz ajcxy huídibi ymiid'idamy, e huídibi yquexamy y'ayuccapxhuäcxp. ¹⁵ Jesús moy je majmetzpi discípulos ajcxy huídibi anajty ti yhuin'ixy mic'ajt jaydëb yajtzögip pa'mjäy ajcxy, e ymoy ajcxy ymic'ajt jaydëb ca'oybi yajpidzimy ma jäy ajcxy. ¹⁶⁻¹⁷ Jada je nimajmetzpi discípulos ajcxy yx# nidüg nidüg: Simón, je huídibi Jesús yx#moy Pedro; Jacobo miid y'uch Juan, yi Zebedeo y'ung y'anäg, je huídibi ajcxy Jesús yx#moy Boanerges (je ayuc Boanerges jadu'n yhuimbizimy: “Enee ymang”). ¹⁸ E jacjadyii huídib Jesús ti anajty huin'ixy: Andrés; Felipe; Bartolomé; Mateo; Tomás; Jacobo je huídibi Alfeo ymang'ajtpy; Tadeo; e je jadügp# Simón, je cananista. ¹⁹ Nañ jadu'n Jesús huin'ijxy Judas Iscariote, je huídibi agoj#x c#y#ejc Jesús ma ymidzip.

Yajñibjccixy Jesús co miidity mujcu' ymic'ajt

(Co jadu'n huin'ijxtaay je majcmetzpi discípulos ajcxy), Jesús ytig#y ma tügtijc miid yi' ajcxy. ²⁰ Huin'it#y tzach mayjäy ñayyöym#j#igixy ma je tijc ma Jesús y'ity, ixti Jesús etz ymigügtijc ca' y'oy#y nej jëb ycaaygixy y'uuccixy. ²¹ Co Jesús y'amigügtijc jadu'n nejhu#y, chi ajcxy nimiiñ Jesús yajñicxaangixy anajty mach, com hue' anajty tijcixy co Jesús yloci#b.

²² Nijëjity escribas ajcxy, je huindz#ndijc huídibi nijaydutp anajty Dios ñecy, miin ma Jesús co choñ ajcxy Jesusalén, yminaangixy:

—Jada Jesús ymiid Beelzebú, je ca'oybi yhuindzin, ma y'aa yjot. E yi' yajpidzimy je ca'oybi ajcxy ma jäy ajcxy yjothuinma'ñ miid Beelzebú ymic'ajt.

²³ Chi Jesús huoomiñ ma yi' je escribas ajcxy, e yajmiidmiydacy ajcxy tüg jihuimbit ayuc. Chi Jesús yminañ:

—¿Nej tiy'ajt jada nej miich ajcxy mina'ñ co Satanás jëb ci'm ñayyajpidzimyii ma jäy ajcxy y'aa yjot? Ca' tiy'ajt nej miich ajcxy mina'ñ. ²⁴ Pen tügpicy tungmiidpi ixypy ñaybijc-huá'cxigixy, etz ñaymidziptzóonigixy ixypy ac jëyi. Pues cixip yi' ajcxy y'ané'min. ²⁵ Nañ jadu'n pen tügpicy tüg juugy tüg migüg ixypy ñaybijc-huá'cxigixy, ca' ajcxy y'idaangixy tügmucy. ²⁶ Nañ jadu'n pen Satanás ixypy ti ñaybijc-huäcxyii, e ci'm ixypy ti nayñibidigyii, ca' ixypy yi' ymic'ajt ida'ñ. Hue' janchtiy Satanás cixipy tigoyipy. (Paady ca'tiy'ajtity nej miich ajcxy yminañ.) ²⁷ Ca' ni pin jëb huaad ytig#huip ma tüg micpi jäy ytijc etz meedzipy tijaty ymiid, pen ca' jayijp c#xoch tecyxoch je jäy micpi. Pen ti c#xoch tecyxoch ixypy je micjäy, huin'it janchtiy mimadägipy, e pijcip tijaty ymiid.

²⁸ Janch #ch miich ajcxy nimäy co Dios jëb huinmecxip tüg'óciy pocy huídibi jäy ytúngxip etz tüg'óciy jibicpi huídibi jäy ycapxp. ²⁹ Jëyi janchtiy co pinjaty capxtigooyb miid je Esp#ritu Santo, je Dios yjihu#ñ ymic'ajt, ca' Dios huinmecx# nimina. Huinix#i y'ida'ñ pocymiid.

³⁰ Miid co jäy ajcxy chach yminaangixy co Jesús anajty miidity ca'oybi, paady Jesús jadu'n yminañ.

Jesús ytaj etz y'uch migüexy ajcxy

³¹ Jesús ytaj etz y'uch ajcxy oy yja'ty ma anajty Jesús yajpaady. Chi Jesús ytaj etz y'uch ajcxy anajty ytinaaygixy tiba'y, e chi ajcxy capx#ñig#exy Jesús. ³² Je mayjäy huídibi anajty ajcxy iñaayb j#huíditi ma Jesús, yminañ ajcxy:

—Miich mdaj etz m'uch cheeby ajcxy tiba'y miich ixtaayb.

³³ Chi Jesús yminañ:

—¿Pinjäy miich ajcxy mdijy co ñich ndaj'adyii etz ñich n'uch'adyii?

³⁴ Huin'it Jesús huindicxpejty je jäy ajcxy huídibi anajty ñaayb ajcxy jühuídity ma je', e ymíñañ:

—Tüg'ócíy jada jäy ya jadu'n ajcxy nipaady nej ñich ndaj etz ñich n'uch.

³⁵ Huenytipínity huídibi ajcxy cuydumb yi Dios chójcín, yi' je' jadu'n nipaady nej ñich n'uch, ñich n'ajch, ñich ndzi' etz ñich ndaj.

4

Je niipi y'ixpejt

¹ Jadüg'oc Jesús ytigíy yaj'ixpijcpí ma mejypa'. E ooy mayjäy ymujcpejty ma anajty Jesús yajpaady. Míid co ooy anajty chachmayjäyíty, paady Jesús ytigíy ma tüg barco jahuengi mejyjoty. Jesús ñaayb anajty barcojoty, e je mayjäy ñaayb anajty ajcxy ma mejypa'. ² Huin'it Jesús yaj'ixpijcy je mayjäy míid canaag jihuimbit ayuc. Co yaj'ixpijcy, chí ymíñañ:

³ —Amídooy'ijtcix miich ajcxy ñich jada n'ayuc. Tüg jäy chooñ niipi. ⁴ Co je niipi yhuíjpy anajty trigo tíim, chí je trigo tíim nijéjity oy ycäy tím tügujc. Chí je joon ajcxy ymíñ jíjcy je trigo tíim huídibi tügujc tí ycäy. ⁵⁻⁶ E nijéjity trigo tíim oycäy ma tzaanícx, ma nihueeñ oyñaax yajpaady. E je trigo tíim ca' tzip mujx je', je'co ca'anajty ooy naax mápxity. E co je xii ypidzimy, chí no'cy je trigo mang, com ca' anajty ytictz míidity naaxjoty, chí ytíich. ⁷ E nijéjity trigo tíim oycäy ma apyjot. Co jada trigo tíim ymujxy, chí y'ujtz'ögtäy je trigo mang, e ca' ytíim'ajty. ⁸ Per jacjadyii trigo tíim oycäy ma oyñaax, chí ymujxy, e ytíim'ajt may'amy: tüg pí'c pajc iipxmajc oyco'ity, jadüg pí'c pajc tugi'px oyco'ity, jadüg pí'c pajc migo'px oyco'ity.

⁹ Co Jesús je míydägi yajmay, chí ymíñañ:

—Pinjaty míid ytätzac, pín mídohuamy, huen mído'mbícy jada ayuc.

Ti yi' ñigapxyp yi iixpejt

¹⁰ Co je mayjäy ñícxni, e Jesús yhuí'my naydüg, chí je nimajmetzpi ydiscípulos ajcxy etz jacjadyii huídib míjnicxpejt Jesús ñimíjhua'cy, e amídooy nej yhuimbidzimy je jihuimbit ayuc. ¹¹ E Jesús ymíñañ:

—Míich ajcxy jaydéb mnejhuíhuípy huídibi Dios ñigapxyp ñimíydacpy coyüch'amy ma y'ané'mín ycötújcín. Jacjadyii jäy ajcxy jihuimbit'amy nyajmídmíydaacyíich. ¹² Jadu'n jihuimbit'amy nyaj'ixpijcpyíich je mayjäy, jaydéb co pínjaty iixp, ca' ajcxy ixipy; etz pínjaty mídoob, ca' ajcxy mído'mbígiipy. E jadu'n ca' ajcxy yjothuimbidip, e nañ ni ycayajmeecxipy ajcxy ypocy.

Jesús najtcapxíy nej yhuimbidzimy je niipi y'ixpejt

¹³ Chí Jesús yjacmíñañ:

—¿Nej ca' miich ajcxy mhuinjihuíy jada jihuimbit ayuc? Pen ca' miich ajcxy mhuinjihuíy jada jihuimbit ayuc, ca' miich ajcxy mhuinjihuíhuip yi jacjadyii jihuimbit ayuc. ¹⁴ Je huídibi capxhuäcxp Dios y'ayuc, jadu'n yi' nipaady nej je huídibi niip trigo tíim. ¹⁵ Je jäy ajcxy huídibi amídooy'ijtp Dios y'ayuc, e mic'amy je ca'oybí yajpidzimy Dios y'ayuc ma ajcxy yjot yhuinma'ñ, jadu'n ajcxy nipaady nej trigo tíim huídibi cáb tügujc, e je joon ajcxy mic'amy píimujctay. ¹⁶⁻¹⁷ Je jäy ajcxy huídibi amídooy'ijtp Dios y'ayuc janch jotcuje, e míbíjccíxy tzojccíx, chí ajcxy ixmajtzi Dios y'ayuc co agapxíy paady, e co tzaachypí mínaxy yajnaxy míid Dios y'ayuc ycíxpi. Jadu'n ajcxy nipaady nej je trigo tíim huídibi tí ycäy ma tzaanícx. ¹⁸⁻¹⁹ Je jäy ajcxy huídibi amídooy'ijtp Dios y'ayuc, e co ñícxni, chí jäy digooyñi Dios y'ayuc míid jotcuje'ájtín tziñaayín, etz comeeñ'ájtín etz adzójcín. Jadu'n ajcxy nipaady nej trigo tíim huídibi tí ycäy ujtzjoty, e ca' ytíim'aty míid co oy y'ujtz'ögy. ²⁰ Je jäy ajcxy huídibi amídooy'ijtp etz cöbíjcp Dios y'ayuc amumdüjot etz Dios y'ayuc

tumb ma ajcxy yjot yhuinma'ñ, jadu'n ajcxy nipaady nej je trigo t̄im huídibì tì cãb ma oyñaax etz yt̄im'aty may'amy: t̄üg pi'cpajc īpxmajc, etz jadüg pi'cpajc tugì'px, etz jadüg pi'cpajc m̄igo'px.

Je lámpara ñi'ijxpejt

²¹ Chi Jesús yjacm̄inañ:

—Co j̄äy ajcxy j̄indicxi'ñ n̄öctzoy, chi canan ajcxy c̄öjup̄y m̄iid tu'tz, ni ca' ajcxy p̄idacy cijxpa'tci'py, hue' janchtiy p̄idaaccixy ma j̄indicxpejt jayd̄eb mij yt̄icxy. ²² E nañ ni ca' ni pin ni tì j̄eb ameech tunipy, e nicxy ycajajnejhuïy. E ca' ni pin ni tì ayüch tunipy, e nicxy ycajajnejhuïy. ²³ Pinjaty yt̄atzac ym̄iid, pin m̄idoohuamb, huen m̄ido'mb̄ijccixy ìch n'ayuc.

²⁴ Nañ jadu'n Jesús ym̄inañ:

—Cuendt̄ungix jada ayuc huídibì miich ajcxy yam mm̄idooyb. Yi quipxi'ñ huídibì ajcxy myajquipx̄iyb, nañ jadu'n yì' m̄iid Dios ajcxy xyquipxyhuimbìdipy, e ixti jacyajm̄ohuip ajcxy huídijaty m̄idoob ìch n'ayuc. ²⁵ Pinjaty ym̄iid, yajm̄ohuip nigì, pinjaty hueen m̄iid, yajpigipy nigì (oy ixyipy hueen jadim m̄idity).

Je t̄im huídibì yeecp ñi'ijxpejt

²⁶ Nañ jadu'n Jesús ym̄inañ:

—Yi Dios y'ané'min jadu'n yì' nej co t̄üg j̄äy nicxy ñipy ma ycamjot. ²⁷ Chi jada' co ñiip̄tay ñicxni ma yt̄ijc e ym̄i'o'cni ym̄äybid̄igni com jabom, e jadu'n yajnaxy canaag x̄ī tzuu. E je moc pajc mujxp je' etz yomb. Per je cogam ni ca' nejhuïy nej je moc yoñ, ma mic'ajt paady. ²⁸ Je' co yì' naax ci'm mic'ajt m̄idity jayd̄eb yajyoñ je moc. Jayijp yp̄idz̄imy je moc ung, jac'axam yp̄idz̄imy yì' moc pijy, e chi jada' yt̄im'ajtni. ²⁹ Co je moc ymajaani, chi je j̄äy ajcxy nicxy moc tzijcp, com tì yhuindiy je moc.

Ijxpejt ma je mostazì pajc

³⁰ Nañ jadu'n Jesús ym̄inañ:

—¿Nej m'oc'a'ix̄iygixy yì' Dios y'ané'min? ¿Tì m̄iid n'ocyajquipyx̄ihuibich? ³¹ Jadu'n Dios y'ané'min nipaady nej mostaza pajc huídibì t̄üg j̄äy nicxy niipy ma ycam. Yi mostaza pajc jacnigì ym̄útz̄ity ca'ydi jacjadyii ujtzpajc huídibì yajpatp ya naaxhuin. ³² E co yajnipy je mostaza pajc, chi yoñ, e chi yeegy ooy janch mij, ca'ydi jacjadyii ujtz. E janch mij yeegy t̄üg'óc̄iy yci' y'aacx, ixti joon ajcxy pe'mb ma je yci'y'aacx y'anic̄iy.

Nej anajty Jesús yecy je t̄iy'ajt m̄id je ijxpejt ycxpi

³³ Jadu'n anajty Jesús yaj'ixp̄icy je mayj̄äy ajcxy Dios yt̄iy'ajt m̄iid canaag j̄ihuimbit ayuc, ixti m̄ibaad ajcxy j̄eb huinj̄ihuïy. ³⁴ Ac j̄ihuimbit ayuc Jesús yajnimay je mayj̄äy. Per m̄iid yì'ydiscípulos Jesús ycapxt̄icx̄taayb anajty je j̄ihuimbit ayuc.

Jesús capxt̄icx nej huimb̄idz̄imy je ijxpejt

³⁵ Je huin'it x̄ī co ycoodz̄iy, chi Jesús nimay yì' ydiscípulos ajcxy:

—Tzoc ajt j̄ámim j̄im'amy ahuin ma yì' jadügpi mejypa'.

³⁶ Huin'it Jesús ydiscípulos ajcxy ixmajtz̄tay je mayj̄äy, e m̄iid t̄zooñ Jesús barcojoty. Nañ jadu'n jacjadyii barco ajcxy choñ quipxy m̄iid Jesús ydiscípulos ajcxy ybarco. ³⁷ Je huin'it coodz̄ t̄üg poj miñ janch mic. E je mejy nigoo anajty y'ocp̄id̄igni. Janch tiḡiyb anajty nīi barcojoty, jagoo jagoo yca'ujtz̄tay je barco m̄iid nīi. ³⁸ Jesús maab anajty ma je barco īx ma t̄üg mabejt. Chi yajm̄äybid̄igi, e nimay ajcxy:

—Huindz̄in, ¿nej ca'mduñcuend co ìch ajt yam nguinaanim?

³⁹ Huin'it Jesús ym̄äybid̄igy, e j̄ijpcogapxiy je poj. Etz nimay je mejy:

—¡Amon! ¡Huäcxip!

Chi mic'amy je poj ymongidactay yhuäcxij̄ptay jadu'ñyi. ⁴⁰ Huin'it Jesús ym̄inañ:

—¿Na'amy co mdzacht̄ziḡiygixy ajcxy? ¿Nej ca' mm̄ib̄ijccixy co mm̄idich Dios ymic'ajt?

⁴¹ Jesús ydiscípulos ajcxy ooy chigñy, e ñayñimaayí ajcxy miñ xyipy:
—¿Pín jáy jada' jada Jesús? Ooy chachmijhuinma'ñ co yí poj etz je mejy ycapxymidooyi.

5

Je Gadarajäy huidibi anajty ca'oybi mïd

¹ Chi Jesús mïd ydiscípulos ajcxy oyja'tcixy ma je mejypa' ma je Gadara jáy ñaaxjot. ² Tim mic'amy co Jesús ybarcobidzimy, chi nimiiñ tüg jáy huidibi ca'oybi mïd anajty. Hue' anajty choñ ma öcpi jut. ³ Je yëydijc, ca'oybimïdpi, tzinaayb anajty ma öcpi jut. E ni pín anajty ycamimadägyii. Ni pín camimadacy nicx cïxoch tecyxoch jada je ca'oybimïdpi, e ni ca' ajcxy mimadacy mïd cadena. ⁴ Canaag'oc ajcxy jacïxojch jatecyxojch mïd cadena, e ypojtaayb anajty je cadena. Ni pín camihuinma'ñybaady nej jëb ocmimadaaccixy je ca'oybimïdpi. ⁵ Je ca'oybimïdpi xïm tzuum anajty yhuidity tüg yuugjot etz ma öcpi it, janch mic anajty yäxytinäy. E chachnayajtzaachiyii anajty mïd tzaa.

⁶ Jiguëgy anajty je ca'oybimïdpi ymiiñ, co ijxpaty Jesús, chi poyïgy ninicxy Jesús, e ycojtinay'ahuïy ma Jesús yhuinduu. ⁷ Je ca'oybimïdpi mic migapxcooty Jesús, e nimay:
—Jesús, je mijpi Dios y'ung, ¿na'amy co xymidziptzooñich? May'ajt nbijctzooybich ma Dios co ca' ñich jëb huaad xychaachytuñich. ⁸ Je ca'oybi jadu'n yminañ, com Jesús ti anajty nimäy:

—Ca'oybi, pidzim ma jada yëydijc.

⁹ Jesús y'amidooy je ca'oybi:

—¿Ti mxii?

Chi je ca'oybi y'adzooy:

—Ich nxii hue' je "ni may", com ni may ñich ajcxy huidibi yajpatp ma jada yëydijc.

¹⁰ Huin'it je may ca'oybi may'ajt pijctzoy ma Jesús co ca' ajcxy jëb huaad ixquexyii ma huingbi it lugar. ¹¹ Huingon anajty je cop ma anajty may idzim yjicxcixy. ¹² Chi je ca'oybi ajcxy may'ajt pijctzoy, e nimay ajcxy:

—Najtzquexiyg ma yí may idzim, jigix jëbi n'adigiyich njottigiyich yí may idzim.

¹³ Chi Jesús jadu'n a'ixiy co jëbi adigiygixy jotigiygixy je may idzim. Chi je ca'oybi ypidzimday ma je yëydijc, e yajtigiyday je may idzim ajcxy. Jim anajty yajpaady jahuengi mejtz mil idzim. Chi je idzim ylociydaay, e ycögänaxtaay ajcxy ma tüg tzajijp, e oy ycädaaygixy ñijoty, e chi ajcxy ñii'ögtay.

¹⁴ Je idzim cuend'ajtp ajcxy ooy ajcxy ñay'adzigiyi, e nicxtay ajcxy poyïgy ma ytijc. E oy nimiydaaccixy cajpjoty etz majaty tundac nej anajty ajcxy y'idzim y'öctaaygixy. Mayjáy ajcxy choñ mic'amy oy ijxcixy nej anajty ti ytunyii ti yjadyii. ¹⁵ Co je mayjáy ajcxy yja'ty ma Jesús yajpaady, chi ajcxy ijxy je yëydijc huidibi anajty mayca'oybi ymïd. Ijxy ajcxy co ñây huit mïd etz huijycujc, ti anajty y'oyïy. E huin'it ooy ajcxy je mayjáy ñay'adzigiyi. ¹⁶ Je jáy ajcxy huidibi anajty huindixp co anajty je ca'oybimïdpi ti y'oyïy, etz ijxcixy nej ti ytunyii ti yjadyii mïd je may idzim, chi yajmiydactay je maycajppáy jadu'n nej anajty ti ijxcixy. ¹⁷ Huin'it ajcxy pijctzoy may'ajt ma je Jesús, co huen tzooñ ma ajcxy je ñaaxjot.

¹⁸ Co Jesús ytigiy jadüg'oc ma je barco, chi je yëydijc huidibi anajty ca'oybi ti ñibidzimyii ti ycöbidzimyii, pijctzoy may'ajt ma Jesús co huen a'ixiy möhuip co huen mïd'idyii Jesús.

¹⁹ Per Jesús ca' a'ixiy co ymïd'idyii, chi nimay:

—Huimbit ma mdijc etz mjugymigüg, e yajmïdmïdydäg jada mijpi tung mijpi huinma'ñ huidibi je Huindzin Dios ti tuñ mïd miich. Mïdmïdydägipy jadu'n nej je Huindzin Dios ti xypa'ayoy.

²⁰ Chi je yëydijc yhuimbijtni, e huidijtp anajty cajp cajp jim Decápolis ñaaxjot, e nimiydactay tüg'ócïy jadu'n nej Jesús ti yajtzögyii, e tüg'ócïy je mayjáy ooy jihuïy huinmay.

Je Jairo ñix etz je töxyjäy huidibi Jesús yhuït nidoni

²¹ Co Jesús huimbijty barcojoty ma je mejypa' ma anajty ti chooñ, chi mayjäy ymiñ ma Jesús yajpaady, chi Jesús yhuäcxijpy ma je mejypa'. ²² Huin'it Jesús ñija'ti tüg mijtungmüdpí ma yí judíojäy ajcxy ñaymujctac. Je yéydíjc hue' anajty xijity Jairo. Co Jairo ijxpaty Jesús, chi ñayhuijojtac ma Jesús yhuinduu. ²³ Jairo may'ajt píjctzoy, ymíñañ:

—Huindzin, ögaaníp ích nníx. Tun may'ajt nícxý ma ích ndíjc, e mgíñíxájíp ma ích nníx, jígix jébi mayjtzögíp, e yjactzináhuíp.

²⁴ E Jesús nícxp anajty müd Jairo, e mayjäy panícxý anajty Jesús. E je mayjäy ooy anajty tzach'adíj'y tzach'agodí'y Jesús. ²⁵ E ma je mayjäy ymiñ anajty tüg töxyjäy pa'm müd, jécýñ anajty ymíjtacní. Majmetz jímijt yxí ybo' anajty cujc payöy, ca' anajty y'oc-huäcxijpni je ní'py. ²⁶ Jada töxyjäy ti anajty yajtzoyduñ müd may tzoymüdbi, ti anajty ymeeñ yajtundäy ma je tzoymüdbi ajcxy. E je'ní anajty ypa'm'ity. Ní ti pubéjtín ti capaady, íxti nígi anajty ypa'm míjhua'ñ.

²⁷ Jada töxyjäy ti anajty ayuc müdoy nej Jesús anajty pa'mjäy yajtzögy, paady nimíñ etz nimíjhüägy jíxcí'py'amy, chi nídooni Jesús yhuitpa'. ²⁸ Jada töxyjäy nayñímaayí jotjoty huinma'ñyoty: “Co nnídóníbcíh Jesús yhuitpa', müd tím yí'yí ndzögíbcíh.” ²⁹ Co je töxyjäy nidoñ Jesús yhuitpa', tím huin'ítíy mic'amy yhuäcxijp je ní'py. Huin'it je töxyjäy jíhuíy co anajty ti chögy.

³⁰ E Jesús jíhuíy co anajty ti yajtzögy tüg jäy müd ymic'ajt, paady ní'íjxhuimbijty je mayjäy hüidíbi anajty pamíñíp, y'amídooy ajcxy:

—¿Pín ích nhuit ti xyñídoni?

³¹ Huin'it Jesús ñímaayí ajcxy ydiscípulos:

—Míich m'íjxpy co yí mayjäy xychach'adíjý xychach'agodíy, e míich míña'ñ: “¿Pín ti xyñídóñích?”

³² Per Jesús huindícxypejty je mayjäy júhüidíty ma yí', oc'íxa'ñ ocnejhuíhua'ñ pín anajty ti ñídonýí. ³³ Huin'it je töxyjäy, com ñejhuíyb anajty jadu'n nej Jesús ti yajtzögyí, paady nimíjhua'cy Jesús janch tziyuuýb müd tzigí'ñ ñayhuijojtací ma yí' yhuinduu.

³⁴ Jesús ymíñañ:

—Töxyjäy hüidíbi ooy ndzócyích, ti mdzögy müd co ti xymíbcícyích. Nícx agujc jotcujc, ti mba'm ñaxy.

³⁵ Capxp míydacp anajty Jesús müd je töxyjäy co níjéjity jäy ñímiíni, choñ ma je judío jäy ñaymujctac mijtungmüdpí ytíjc, e nímay je töxy'anäg yteedy:

—Yí mníx ti je y'ögy. Ca' huaad mjac'amayíy níg yí Huindzin Jesús.

³⁶ Per Jesús ca' tuñcuend jadu'n nej ajcxy yjamíña'ñ, chi nímay je naymujctac huindzin:

—Ca' mdzigíy, míbic nígoda'ajty.

³⁷ E ní ca' jac'a'íxíy nícxý yjacmüdnícxýí jácínjaty. Jéda'ajty müdnícxý je Pedro, Jacobo etz Juan, je Jacobo y'uch. ³⁸ E co Jesús ytíctígíy ma yí naymujctac huindzin ytíjc, chí íjxy jadu'n nej jäy jíiby chachne'mgíxy chachjúygíxy chachyaaxcíxy. ³⁹ Co Jesús tíjctígíy, chí nímay je jäy ajcxy:

—¿Nej co nígoó ajcxy mdzachne'mní, e mdzachyáaxcíxni? Yí pí'c töxy'anäg ca' yí' ti y'ögy, maab yí'.

⁴⁰ Per nígoob ajcxy Jesús níxíicy co jadu'n ymíña'ñ. Huin'it Jesús yajpídzímday tüg'ócíy pínjaty anajty jíiby tígoty, e müd tíjc tígíy jéda'ajty je ungedeedy etz ungdaj, e nañ je tugígíy ydiscípulos hüidíbi anajty ti müd míñ. Chí ajcxy ytígíy jíiby ma anajty je töxy'anäg yajpaady. ⁴¹ Chí Jesús májtzíy yí töxy'anäg ycí', e chí nímay:

—Talita, cumni —jadayaab ayuc hue' yí' yhuimbídzímy: Töxy'anäg, ích míich yam nímaayb, pídíg.

⁴² Huin'ítíy je töxy'anäg, je hüidíbi anajty majmetz yjímijt, ypidígy e ytüyöychoñ. E tüg'ócíy yí mayjäy ooy ajcxy jíhuíy huinmay. ⁴³ Huin'it Jesús najtzcapxíy co ca' huaad pín

yajnimay jadu'n nej je töxy'anäg ti chögy, nañ jadu'n ni'ane'mdiy co huen ajcxy yajcay je pi'c töxy'anäg.

6

Jesús yajpaady jim Nazaret

¹ Huin'it Jesús choon ma je jimbi it lugar, e yhuimbijty ma yci'mgajp. E müd ñicxy yi' ydiscípulos ajcxy. ² Sábado xiijoty Jesús ytigiy yaj'ixpijcp ma je mayjäy huidibi yöymújccixp ma je judío jäy ñaymujctac. E je mayjäy huidibi amidoo'ijtp anajty ooy jihuiy huinmay ajcxy, e ñayñimaayi ajcxy miñ xyipy:

—¿Ma jada' jadyaab jäy ti ni'ixpigiy jadyaab ixpíjcin? ¿Ma ti paady jada huijy'ajt cujc'ajt huidibi ymüid? ¿Ma jada' ti paady yi mic'ajt huidibi müd mijhuima'ñ tumyb? ³ Je' jada je tzejtzpi, yi María y'ung. Yi' y'uch ymigüg, yi Jacobo, yi José, yi Judas, etz yi Simón. Nañ jadu'n yi' y'uch töxyjäybi cha ajcxy chinäy quipxy müd ñich ajt.

E je mayjäy ca'ajcxy anajty ixa'ñ cöbiga'ñ Jesús. ⁴ Huin'it Jesús nimay je mayjäy ajcxy:

—Huenma'amyity tüg'óciy je mayjäy ooy yajmij'aty je jäy ajcxy huidibi najtzcapxiiyb Dios y'ayuc. Jëyi janchtiy, ma yci'm naax ma yci'mgajp ca' je jäy ajcxy yajmij'adyii, etz nañ ytim jadu'n yi' y'amigügtijc etz ymijün ymidijc.

⁵ Ma yci'm naax yci'm gajp Jesús ca' jaty nej mijhuinma'ñ tunipy müd co ca' ajcxy mijpidägyii. Jëyi ycipidacy ma nijëjity pa'mjäy etz yajtzoocy. ⁶ Jesús ooy jihuiy huinmay nej je jäy ajcxy ca' ymijpidägyii ma yci'm naax yci'm gajp. Chi Jesús choon jim ñicxy ma jacjadyii cajp huinduy agonbi, e yaj'ixpijcy anajty je mayjäy ajcxy.

Jesús quexy ydiscípulos ayuccapxhuäcxp

⁷ Huin'it Jesús mijhuoy je majmetz ydiscípulos ajcxy, e chi quejxhuäcxy nimetz nimetz ma canaag cajp. E chi mooy mic'ajt, jigix jëb yajpidzimy ajcxy ca'oybi ma jäy ajcxy. ⁸ Nañ jadu'n y'ane'my Jesús je' ydiscípulos ajcxy co ca' huaad ti miníxcixy tü'amgixpi, jëyi jëb miníxcixy tüg tajc nidüg nidügti. Ca' huaad miníxcixy ymorral, e ca' huaad miníxcixy ycaagy, e ca' huaad miníxcixy ymeeñ. ⁹ Jëyi je ycig etz je yhuit huidibi anajty ajcxy ymüid huen miníxcixy. ¹⁰ Chi Jesús yminañ:

—Co anajty ajcxy mjättaccixy ma tüg tijc, jim ajcxy mhuí'mipy ixti coon mdzóonip ma yijimbi cajp. ¹¹ Pen mdigiiygixp ma tüg cajp, e je jäy ajcxy ca' ajcxy xycöbiga'ñ, ca' ajcxy amido'ida'ñ miich m'ayuc, mbidzimgix ma je cajp, chi mhuinhuópcixipy mgig. Jada je' je tiy'ajt co ca' ajcxy mjotcújcity. Janch ñich miich ajcxy nimäy co Dios anajty ytiyduñ jada naaxhuiñ jäy, jacniği tzaachypi paada'ñ yi jäy ajcxy huidibi ajcxy anajty ca' xycöbúccixy, ca'ydi je' ajcxy huidibi tzinaay jecy'aty ma Sodoma etz Gomorra cajp.

¹² Chi je nimajmetzpi ajcxy chon Dios y'ayuccapxhuäcxy co huen jäy ajcxy jothuimbújtcixy, huen ixmajtzaaygixy yi pocytunii. ¹³ Nañ jadu'n ajcxy yajpidzimy ca'oybi majaty jäy, e pidaaccixy aceite majaty pa'mjäy, e yajtzóoccixy anajty.

Co Juan je Bautista y'ögy

¹⁴ Huin'it je rey Herodes nejhuüy co Jesús canaag mijhuinma'ñ tzachytuñ anajty, com tüg'óciy je mayjäy anajty nimiydaaccixy Jesús. Herodes yminañ co Juan je Bautista ti yjugypicy jadüg'oc ma anajty ti y'ögy, paady mic'ajt müdity jaydeb mijhuinma'ñ tuñ.

¹⁵ Nijëjity jäy yminaangixy:

—Jesús yi' je' Elías.

E naagity jäy yminángixy:

—Yi' je' tüg Dios tiy'ajtmüdpi huidibi quipxyiiyb müd je Dios ytiy'ajtmüdpi huidibi tzinay jecy'ajty.

¹⁶ Co Herodes nejhuüy nej je mayjäy nimiydaaccixy Jesús, chi yminañ:

—Janch jada co Juan ti yjugypicy, je huídibi nni'ane'mdiyich co huen yajminagyii ycohuajc.

¹⁷ Miid Herodías, Herodes ytöxytjic ycixpi, Herodes n'ane'mdiy co Juan yajmach, e pidägyii pujxtigoty. Jada Herodías jayijp ypijcy miid je rey Herodes y'ajch Felipe, per ti anajty ixmach Felipe, e ypijctigajch miid je ycapy Herodes. ¹⁸ Hue' anajty Juan ti nimay Herodes:

—Ca' jadu'n paadyii co yi m'ajch Felipe ytöxytjic miich miiddzinaayi.

¹⁹ Paady ycixpi Herodías mijotma'ty Juan, e ytimy yaj'ögamy anajty. Per ca' mic'amy yhuinma'nybaty nej ocyaj'ögip; ²⁰ com je rey Herodes ñejhuiyb co tudägy jäy huädz jäy anajty je Juan, e tzigüyb anajty miid Juan. Paady ycixpi anajty je rey Herodes Juan miidity cuend'aty pujxtigoty. Naag'oc naag'oc anajty Herodes nicxy amido'ity Juan y'ayuc, ooy anajty huinmay nej yhuimbizimy, per jotcujc anajty amido'ijty.

²¹ Huin'it Herodías ypat huinma'ñ nej jëb yaj'ögy Juan je huin'it xii co je rey Herodes anajty ñayñixiduñyii. Hue' yajcay yaj'uucy je gobierno ytumbi ajcxy, je soldado huindzin ajcxy, etz tüg'óciy yi mic jäydjic huídibi ajcxy tzinaayb naag naag cajp jim Galilea. ²² Xiđuñyoty anajty co Herodías ñix oy y'ech ma je rey anajty yajpaady miid je may jäy huídibi anajty yajcaayb yaj'uucpy. E jadu'n nej je Herodías ñix y'eich, ooy je rey jadu'n jäygidacy, etz tüg'óciy je jäy je huídijaty anajty miid ajcxy ycaaygixy y'uuccixy. Chi je rey nimay je töxy'anäg:

—Pijctzóhuigich ti mdimdzojcpy, ich miich nmöhuipy.

²³ Je rey ñigi capxcödujcy janch cixyot huinijot co möhua'ñ ti ytimy ypijctzooyb, ixti jëb jamöy cujuhäcxy yi' y'ané'min, mibaad anajty ane'my je naaxjot. ²⁴ Chi je töxy'anäg ñicxy ma ytaj oy amidoy, nimay:

—¿Ti nbijctzohuipich?

Chi je' ytaj y'adzooy:

—Pijctzoohui yi Juan je Bautista ycohuajc.

²⁵ Mic'amy je Herodías ñix nihuimbity je rey e yminañ:

—Ndzojcpich co xymöhuibich mic'amy je Juan je Bautista ycohuajc ma tüg texy.

²⁶ Co jadu'n midoy je rey, chi ytigüy tajp mayb janch mijcajee. Per ti y'octunipy. Com ti anajty jadu'n capxcöducy, ti anajty mayjäy midoy ti anajty ti yaj'ahuanüy je töxy'anäg, ca' y'ayuc yajxiicy. ²⁷ Paady ycixpi je rey mic'amy ane'my tüg soldado, co huen nicxy yajtzoni Juan ycohuajc. ²⁸ Chi je soldado ñicxy ma pujxtjic, e yöcpujxtuuty Juan. Chi je soldado mimiiñ Juan ycohuajc ma tüg texy, e yajc'idigiy je töxy'anäg, e je töxy'anäg yajc'idigiy ytaj.

²⁹ Co je jäy ajcxy huídibi anajty mijnicxpejtp Juan ñejhuiyb ajcxy co je rey ti yaj'ögy Juan, chi ajcxy y'oy e yajpidici Juan ñinix, e yajnaaxtigüy ajcxy.

Jesús yajcaay migoox mil yëydjic

³⁰ Co je majmetzpi apóstoles ajcxy yhuimbijty huídibi anajty Jesús ti quexy y'ayuccapxhuäcxi ma canaag cajp, chi ajcxy yajmüdmüydacy Jesús tüg'óciy tijaty anajty ti túngixy, etz tüg'óciy ayuc huídijaty ti yaj'ixpijccixy. ³¹ Huin'it Jesús nimay je nimajmetzpi huídibi anajty ti quexy y'ayuccapxhuäcxi:

—Tzoc jámim ma tüg it ma ca' pin, jaydëb nbócxim tüg xii metz xii.

Paady ycixpi Jesús jadu'n yminañ, com tzach mayjäy ja'ttiib tzondiib ma Jesús yajpaady, e ca' ajcxy tiempo anajty miidity mina ycaaygixipy y'uuccixipy miid je mayjäy ycixpi. ³² E Jesús miid ydiscipulos ajcxy ñicxy barcojoty ma ca' pin. Ac jëyi ajcxy nicxy ca' jac pin jäy miid nicxy. ³³ E mayjäy ijxy co Jesús ajcxy choñ, e nañ ijxajpy pin anajty tzoñ barcojoty. Paady mayjäy choñ ma canaag cajp tegyi'm, ñicxcixy poýgy anajty ma Jesús ñicxa'ñ. Mayjäy oy yja'ty jayijp ca'ydi Jesús ajcxy, e jim ajcxy yöymujctay. ³⁴ Co Jesús ybarcopizimy, chi ixty janch mayjäy, e Jesús ooy pa'ayoy je mayjäy, com jadu'n anajty

ajcxy nej maycöbixy huídibi ca' mîidity ycuend'ajtpi. Chi Jesús ytigiy yaj'ixpijcp, canaag nax íxpíjcin anajty yecy. ³⁵⁻³⁶ Co anajty ti chu'íyñi, chi Jesús ydiscípulos ajcxy ñimaayi:

—Ca' ni pin chinäy ma jada yaabi it lugar, e ti chu'íyñi. Capxycíx mîid jada mayjäy ajcxy, jaydëb ñíxcixyñi ma yi cajp huinduy agonbi, huen nicxy júygixipy ycaayin y'uucin.

³⁷ Huin'it Jesús y'adzooy yi' ydiscípulos ajcxy:

—Miich ajcxy móoygix jada mayjäy caayin úcin.

Chi ajcxy Jesús y'adzooy:

—¿Huaad ích ajcxy nicxy njuy mejtz migo'px denario tzajcaagy, jigix ycaaypy y'ügipy jada mayjäy?

³⁸ Chi Jesús y'amidooy ydiscípulos ajcxy:

—¿Naag tzajcaagy miich ajcxy mîidity ya? Nicx íxcix.

Co ajcxy tíy'ajt paty, chi ajcxy Jesús ñimay:

—Ích ajcxy nmîid migoox tzajcaagy etz metz acx.

³⁹ Chi Jesús ni'ane'mdiy co je mayjäy huen ixtaaccixy naaxcíxy tügpicyjaty. ⁴⁰ Chi je mayjäy y'ixtactay canaagpicy. Canaagpicy migo'px jatypi, e canaagpicy huixchiguípxmajcjatypi.

⁴¹ Chi Jesús conígy je migooxpi tzajcaagy etz je metzpi acx, e ypa't'ijxy tzajpcíxy, e yajnajxy Dios cojuyip ma Dios mîid je tzajcaagy etz je acx ycxpi. Huin'it Jesús tujc-huäcxy je migooxpi tzajcaagy, e yajcídigi y je' ydiscípulos ajcxy, jaydëb ajcxy yajhuäcxip ma je mayjäy. Nañ jadu'n Jesús yajcídigi y je metzpi acx je' ydiscípulos ajcxy, jaydëb yajhuäcxip ma je mayjäy. ⁴² Nidüg'óciy je mayjäy ajcxy ycaay y'uucy cüxyi. ⁴³ Co je mayjäy ycaayday, chi je discípulos ajcxy yajmujcy je cayduc tzütztuc, e yaj'ujch ajcxy majmetz cach. ⁴⁴ Migoox mil anajty ajcxy je yëydíctijc huídibi cay uuc.

Jesús yöy ñíhuingíxy

⁴⁵ Huin'it Jesús ane'my je' ydiscípulos ajcxy co huen barcotigíygyxy mic'amy. Huen nicxíccixy jayijp jim Betsaida jim mejy ñinajxy. Co yi discípulos ajcxy ybarcotigíyday, chi Jesús ycapxycíjxy mîid je mayjäy. ⁴⁶ Co anajty Jesús ti ycapxycíxy mîid je mayjäy, chi ñicxy ma tüg cögop Dios mibíjctzooob. ⁴⁷ Co ycoodziyñi je discípulos ajcxy anajty yajpaady mejyjoty ma je barco. Jesús naydüg anajty yajpaady mejypa'. ⁴⁸ Jesús y'ijx co je'ydiscípulos ajcxy anajty ti y'anucxiygyxy mîid mejycabi, je' co je barco anajty chachijpcoboíy. E co oy moñy, chi Jesús ymijhuägy ma je barco. Jesús yöyp anajty mejyhuingíxy, e hue' anajty jüyöyñaxamy je discípulos ajcxy. ⁴⁹ Co ajcxy ijxpaty Jesús yöyp anajty mejyhuingíxy, chi ajcxy ooy yaxqueegy, com hue' anajty ajcxy tijy co nigo y'ijxmañíygyxy. ⁵⁰ Com tüg'óciy yi discípulos ajcxy anajty ti íxcixy Jesús, e ooy ajcxy chigíy, paady mic'amy Jesús migapxy je' ydiscípulos ajcxy, e ñimay:

—Jotmic naybidáacigíxy, ca' mdzigíygyxy. Ích yi'.

⁵¹ Huin'it Jesús ybarcotigíy, e mic'amy je poj yxeemy, e je discípulos ajcxy ooy jihuiy huinmay. ⁵² Ooy ajcxy jihuiygyxy huinmaaygyxy, com ca' ajcxy huinjihuíygyxy anajty nej Jesús je mayjäy yajcay mîid je migooxpi tzajcaagy. Com je'ni anajty ajcxy ooy yjotjuuñity ycöjuuñity.

Jesús yajtzögy pa'mjäy ajcxy jim Genesaret

⁵³ Chi ajcxy ymejch ma je mejypa' ma je Genesaret ñaaxjot. E coxojch ajcxy je barco ma mejypa'. ⁵⁴ Co ajcxy ybarcopídzimy, chi mic'amy je mayjäy ajcxy jim íjxcaypy Jesús. ⁵⁵ Poyígy je jäy ajcxy chooñ, e yajyöyñajxtay je cajp ajcxy huinduy agonbi, capxhuäccixy co Jesús anajty ti yjädy jim. E jäy ajcxy yajmiindzondacy may pa'mjäy cijx'am jim ma anajty Jesús yajpaady. ⁵⁶ E hueñytim ma'amyty anajty Jesús ñicxy majaty mij cajp, mutz cajp, o majaty jäy y'ujtztzinäy, ooy anajty ajcxy pidáccixy pa'mjäy majaty majaty yi mij

tüba', e cohuanñygixy Jesús co huen nidoñyí yí yhuitpa', e tüg'óciy huídijaty anajty ajcxy nídomb, najxp ajcxy anajty je' ypa'm.

7

Huidi jäy yaj'ahuimbijt pocyjayity

¹ Huin'it ymiiñ ma Jesús nijëjity fariseojäy ajcxy, je huindzindijc huídibi tzachpadumb judío ycostumbre. Nañ jadu'n mïd miiñ nijëjity escribas, je huindzindijc huídibi ajcxy nijaydutr anajty Dios ñecy. Hue' je fariseos etz escribas ajcxy anajty ti choongixy Jerusalén. ² Je fariseos etz escribas ajcxy ijxy co Jesús ydiscípulos ajcxy ytiñy caaybi uucpi jaygibujy, ca' anajty cuydúngxixy judíojäy ycostumbre. ³ (Com yí fariseojäy etz jacjadyi judíojäy ajcxy cuydumby anajty ajcxy ñi'ap costumbre, e ixpocypújcixy jayijp ma ca'ni ytiñygixy caaybi uucpi. Com yí judíojäy ajcxy co ajcxy ñicxy mayjäyjoty etz yhuimbijtcixy jadüg'oc ma ytiç, ca' ajcxy yca yixti cooni jayijp ajcxy ycibújcixy canaag'oc. ⁴ Yí judíojäy ymïd canaagnax costumbre huídibi cuydúngxixyp jadu'n nej ajcxy yajhuaatzcixy ajcxy ytaasi ytexy ytütz etz ypujxtexy.) ⁵ Chi je fariseos etz escribas ajcxy y'amidooy Jesús, nimaayi:

—¿Na'amy co miich mdiscípulos ajcxy ca' cuydúngxixy judíojäy ñi'ap costumbre? ¿Na'amy co ajcxy ycaaygixy y'úccixy, e ca' jayijp ixpújcixy yí' ypocyi?

⁶ Chi Jesús y'adzooy:

—Janch tiy'ajt jadu'n nej je Dios ytiy'ajtmïdipi Isaías jayhui'my jecy'ajty mïd miich ajcxy ycipi. Miich ajcxy huídibi naybidaacip jadu'n nej jihuüy ajcxy tudägyjäy, e ca' yjánchity. Com jadu'n Isaías jaybejty co Dios jadu'n ymïnañ:

Jada jäy jadu'n ajcxy ycapxcixy ymïydaaccixy jadu'n nej jihuüy xyajmij'atyich. Per ca' ajcxy xyajmij'atyich cixyjot huinijot.

⁷ Naadigí co ajcxy xyhuin'igixich xyhuinyáaxcixich. Ñayyaj'ixpíjcixy ayuc tiy'ajt huídibi jäy ajcxy ti cojy ti macxy.

⁸ Chi Jesús ymïnañ:

—Miich ajcxy ti m'ixmájtzcixy Dios ycötújcïn, e myajmij'ájtzcixy ayuc huinma'ñ huídibi jäy ci'm ti cojy ti macxy. ⁹ Miich ajcxy ca' mgüendtúngxixy Dios ycötújcïn Dios ytiy'ajt jigix jëbi cuydúngxixy mgi'm costumbre. ¹⁰ Com Moisés je cötújcïn ypidac jecy'ajty: “Yajmij'at mdaj mdeedy”, e “Pïnjaty jibic nigapx ni'ojiiyb ytaj yteedy, copicy y'ögip.” ¹¹ E miich ajcxy mïnañ co tüg jäy nimähuip ytaj yteedy co ca' pubeda'ñ ajcxy jadu'n nej padyii, mïd co tüg'óciy tijaty yí' ymïd huídibi ytaj yteedy jë'adániç, hue' ti ahuanüy nigoo ma Dios. ¹² E pen jadu'n mïnañ, chi miich ajcxy mïnaangixy co ca' copicyity mbubéjtcixipy mdaj mdeedy. ¹³ Miich ajcxy midundigooyb Dios ycötújcïn mïd mgostumbre huídibi myajnaxyp myajtiñy, etz jacjadyii jibic-huinma'ñ myaj'ixpíjccixy.

¹⁴ Jadüg'oc Jesús mijhuoy yí mayjäy ajcxy, e chi nimay:

—Mido'mbíjccix miich ajcxy ñch n'ayuc, e mhuinjihuüip ajcxy. ¹⁵ Ca' yí' yajpocycähuüy huídibi jäy ajcxy ypidacy ma yhuin y'ahuac. Yí' janchtiy huídibi pidzim ma jäy ajcxy yjot yhuinma'ñ, yí' yí' yajpocycähuüib. ¹⁶ Miich ajcxy mmïd mdätzac, mido'mbíjccix ñch n'ayuc.

¹⁷ Co Jesús ixmajch je mayjäy, e ytiçtiñy, chi je discípulos ajcxy yaj'amidoohi nej yhuimbizim yada ayuc. ¹⁸ Chi Jesús ydiscípulos ajcxy nimay:

—¿Nej nañ jadu'n miich ajcxy ca' mhuinjihuüy jada ayuc? ¿Nej ca' mhuinjihuüy co huídibi tiñy ma yí jäy y'ahuac (yí caayin uucïn), ca' yí' yajpocycäy yí jäy? ¹⁹ Yí caayin uucïn hue' yí jäy ypidägy ma y'aa ymoox ca' nan ma yjot yhuinma'ñ, e co ñax ma y'aa ymoox, chi ypidzimni.

Co Jesús jadu'n ymína'ñ, chi nejhuiyim co Dios ca' capx'aducy ni ti caayin ni ti uucin.
²⁰ E Jesús yjacmínañ:

—Dios yajpocycáhuip jāy ajcxy mīd huídibí pídzim ma ajcxy yhuinma'ñ. ²¹⁻²² Ma yí jāy ajcxy yhuinma'ñ jīby chooñ jībīc-huinma'ñ; jīby chooñ migapxtigoyī tōxyjāy yhuinma'ñ; jīby chooñ je tundigooyī yēdyjc mīd tōxyjāy etz tōxyjāy mīd yēdyjc huinma'ñ; jīby chooñ jāyyaj'ōgī huinma'ñ; jīby chooñ meedzī huinma'ñ; jīby chooñ mūgī huídīdī huinma'ñ; jīby chooñ jībīc-huinma'ñ; jīby chooñ je huin'ñnī huinma'ñ; jīby choñ nayca'oy'ixī huinma'ñ; jīby chooñ je piitzcapxī huinma'ñ; jīby chooñ je amij agix huinma'ñ; jīby chooñ je tzuu huinma'ñ je loci huinma'ñ. ²³ Yí jadu'mbī jībīcpi jīby chooñ ma jāy ajcxy yjot yhuinma'ñ, paady jībīcpi jāy ajcxy túngixy, e ypocycāy ajcxy ma Dios.

Tüg tōxyjāy huídī ca' yjudío jāyīty mībījc Jesús

²⁴ Chooñ Jesús ma yjīmbī it, e ñīcxy jīm ma Tiro etz Sidón ñāaxjot. Jesús ytīgīy ma tūg jāy ytījc, e ca' anajty tzocy co je mayjāy ñejhuīhuīyb ma y'ity. Per ca' jajty ñīcx yhuingoyūch.
²⁵ Mīc'amy tūg tōxyjāy nejhuiy ma Jesús anajty yajpaady. Hue' je tōxyjāy ypi'cnīx ymīd anajty ca'oybī. Je tōxyjāy ymīñ ma Jesús, e ycojxtīnay'ahuīy ma yí yhuīnduu. ²⁶ Je tōxyjāy hue' anajty ycocājpitī Sirofenicia (e hue' anajty griego jāy). Yí tōxyjāy may'ajt pījctzoy ma Jesús co huen yajpīdzīmy je ca'oybī ma ypi'cnīx yjot yhuinma'ñ. ²⁷ Chi Jesús je tōxyjāy ñīmay:

—Ooy ycopīcyīty co nbubedīpyīch jāyījp Dios yjāy (yí judío jāy). Jadu'n nīpaady nej tūg ungedeedy. Tīm copīcy co je ungedeedy yajcayīpy jāyījp yci'm ung, e ca' mōhuīp uc je huídibī y'ung yajjīcxaamy.

²⁸ Chi je tōxyjāy y'adzooy:

—Huīndzīn, tīy'ajt nej mīich mīna'ñ, per ñāñ jadu'n yí uc ajcxy yjīcxyp je caagy abu'x huídī cāb ñāaxcīxy ma mesīpa't ma je jāy y'ung ajcxy ycaay.

²⁹ Chi Jesús je tōxyjāy ñīmay:

—Tīy'ajt jadu'n nej ñīch mīich tī xy'adzooy, paady yci'xpi jēb mhuīmbīdīpy ma mdījc jotcujc, je ca'oybī tī ypidzīmy ma mñīx yjot yhuinma'ñ.

³⁰ Co je tōxyjāy huīmbījty ma ytījc, chi paty ypi'cnīx cijx'am, tī anajty je ca'oybī ñībīdzīmyī ycocīdzīmyī.

Jesús yajtzōgy tūg jāy huídibī cōnat etz ahuī'mb

³¹ Chi Jesús jīm tzojci choonī Tiro ñāaxjot. Chi chooñ jīm ñīcxy anajty Galilea, e ñīcxy ma je tū'aa huídibī najxp Sidón etz je cajp huídibī yajpatp jīm Decápolis ñāaxjot, chi yja'ty ma Galilea mīj laguunba'. ³² Jīm ajcxy mīd mīñ tūg jāy huídibī cōnatīp etz ahuī'mb. Chi ajcxy may'ajt pījctzooy ma Jesús huen cīñīxajy je pa'mjāy. ³³ Chi Jesús mīdñīcxy je pa'mjāy ahuīngujc ma ca' mayjāy, e pīdacy ycihua'x ma je pa'mjāy ytātzac. Chi chuīy, e huīn'it ñīdonī je ytoodz. ³⁴ Chi Jesús ypa't'ijxy tzajpcīx, e ymīcxejy, e chi ymīnañ Aramaico'amy:

—Efata —jada ayuc hue' yhuīmbīdzīmy: Ahuādz.

³⁵ E mīc'amy je jāy cōnatpī ytātzac y'ahuaach etz ytoodz yungīy etz ycapxni yajxon.
³⁶ Chi Jesús ane'my je pa'mjāy etz ymīgūgtījc co ca' huaad ni pīn yajmīdmīydāgīpy jadu'n nej anajty tī chōgy. Co Jesús jadu'n mīctāgy ane'my co ca' huaad ni pīn yajmīdmīydāgīpy je mījhuīnma'ñ huídibī ytumyb, chi ñīgī je pa'mjāy etz ymīgūgtījc mīdmīydaaccīxy hueñypīnīty. ³⁷ Je mayjāy ooy tzachjīhuīy huīnmay ajcxy, ñāyñīmaayī ajcxy mīñ xyīpy:

—Jada Jesús ooy oy chachtuñ. Ymīmadactaayb yí huēnytīmytījīty, ixtī yajmīdohūīcpy yí' yí cōnatpī etz yajcapxīgy yí uumbī.

8

Jesús yajcay midax mil yëydijc

¹ Je huin'it xii je huin'it tiempo mayjäy anajty ti ñaymújcigixy ma Jesús yajpaady, e ca' anajty je mayjäy ajcxy miidity ti ycaaygixipy y'úuccixipy. Jesús capxyñiguejxy je' ydiscípulos ajcxy, co huen miingixy ma yi' yajpaady. Co ajcxy ymiin, chi nimay:

² —Ooy nba'ayooyich yi mayjäy. Yi' co cham midugüg xii maabi ya miid y'ityich je mayjäy, e ni ca' ajcxy miidity ti ycaipy. ³ Co ixipy nguexhuimbityich ajcxy ma ytijc ayuu, ca' yjéyity yajpa'mgójipy ajcxy tü'am, com nijéjity ajcxy jigüegy ti choongixy.

⁴ Chi je discípulos ajcxy Jesús adzooy:

—¿Ma ich ajt nbaatim je caayin uucin huidibi jëb miid nyajcaayim nyaj'úucim jada mayjäy? Com mijtigüduum ya nyajpaatim ma ca' pin chinäy.

⁵ Chi Jesús y'amidooy je' ydiscípulos ajcxy:

—¿Naag tzajcaagy miich ajcxy miidity?

Chi je' ajcxy y'adzooy:

—Huixtujc tzajcaagy.

⁶ Chi Jesús ane'my je mayjäy, co huen ñay'ahuüygixy naaxcixy. Huin'it Jesús conigy je huixtujc tzajcaagy, e yajnajxy Dioscojuyip ma Dios miid tzajcaagy ycxpi. Chi tujc-huäcxy je tzajcaagy, e moy je' ydiscípulos ajcxy, e je' ydiscípulos ajcxy yajhuäcxy je tzajcaagy ma je mayjäy. ⁷ Je Jesús ydiscípulos ajcxy ymiid anajty nijéjity pi'c acx. Chi Jesús yajnajxy Dioscojuyip ma Dios miid je pi'c acx ycxpi, e moy je' ydiscípulos ajcxy huen yajhuäcxtaygixy ma je mayjäy. ⁸ Chi je mayjäy nidüg'óciy ycaay cüxyi, e co ajcxy ycaayday, chi je Jesús ydiscípulos ajcxy yajpidigy huixtujc cach cayduc jücxatuc tübi anajty yconaxy. ⁹ Jahueeni anajty ycamidaaxmility je jäy huidibi ajcxy cay uuc cüxyi. Chi Jesús ycapxy ycijxy miid je mayjäy, e nimay ajcxy co huen nicxcixy ma ytijc. ¹⁰ E mic'amy Jesús ybarcotigiy miid ydiscípulos ajcxy, e chi ñicxy ajcxy jim Dalmanuta ñaaxjot.

Yi fariseos ajcxy tüg ijxpejt pijctzooob mijhuinma'ñybi

¹¹ Nijéjity fariseos ajcxy, je huindzindijc huidibi padumb judío ycostumbre, ymiin ajcxy ma Jesús yajpaady, e ytigiy ajcxy ijxquípxcixy y'ixpijcin miid Jesús. Pijctzoogixy co Jesús huen yaj'ixyii ajcxy tüg ijxpejt huidibi tzomb tzajpjoty. Ijxta'n octunaangixy miid Jesús. ¹² Chi Jesús tajy may ñayjihüyijotjoty huinma'ñyoty, chi ymicxejy, e ymiinañ:

—¿Na'amy co jada jäy ajcxy huidibi jugy'ajtp cham, pijctzoogixy ijxpejt huidibi tzomb tzajpjoty? Janch ich miich nimaaygixy co ca' nyaj'ixaangixy ijxpejt huidibi tzomb tzajpjoty.

¹³ E Jesús ytimycapxycixy miid je fariseos ajcxy, e chi puyöduuty ajcxy. Chi Jesús ybarcotigiy, e ñicxy miid ydiscípulos ajcxy ma mij laguun ñinaxy.

Fariseojäy ajcxy yaj'ixpijcin

¹⁴ Je' ydiscípulos ajcxy ti anajty jaydigoygixy je jücxypicy co ajcxy ybarcotigiy. Jëyi ajcxy mimiin tüg pi'c tzajcaagy. ¹⁵ Chi Jesús ane'myb je' ydiscípulos ajcxy, e ymiinañ:

—Ca' mmijpidaaccixy yi fariseojäy ajcxy y'ayuc ytij'ajt etz ni rey Herodes y'ayuc ytij'ajt, com jadu'n ajcxy y'ayuc nipaady nej levadura huidibi ca' y'óyity.

¹⁶ E je Jesús ydiscípulos ajcxy nimiydaaccixy Jesús y'ayuc ñayñimáayigixy ajcxy miñ xyipy:

—Je' co ca' ich ajt nmimiinim caayin uucin.

¹⁷ E Jesús ñejhuüyb anajty nej je' ydiscípulos ajcxy ñayñimaayi miñ xyipy, paady ymiinañ:

—¿Na'amy co mdzachnimiydaaccixy je caayin uucin huidibi ti mjäydigooygixy? ¿Nej ca' mhuinjihuüygixy e ca' mguenditungixy ich n'ayuc? ¿Nej co ajcxy mdzachcöjuuñity?

¹⁸ Miich ajcxy miid mhuiin: ¿Nej co ca' m'ijxcixy huidibi ndumyich? Miich ajcxy miid

mdädzac: ¿Nej co ca' mmido'mbíjccixy ñich n'ayuc? ¿Nej co ca' mjäyméjtzcxixy ti ti nduñich?
 19 Jayhuin co ndujc-huäcxyich je migooxpi tzajcaagy e nyajcaayich migoox mil jäy: ¿Naag cach cayduc jicxtuc ti ajcxy myajpidígy?

Chi ajcxy y'adzooy:

—Hue' ñich ajcxy nyajpidígyich majmetz cach cayduc jicxtuc.

20 Chi Jesús yminañ:

—E jayhuin co ndujc-huäcxyich je huixtujcpi tzajcaagy, e nyajcaayich mídaax mil jäy: ¿Naag cach cayduc ti ajcxy myajpidígy?

Chi ajcxy y'adzooy:

—Hue' ñich ajcxy nyajpidígyich huixtujc cach cayduc jicxtuc.

21 Chi Jesús yminañ:

—¿Nej chambaad miich ajcxy ca' mhuinjihuñy?

Jesús yajtzögy tüg jäy huintzpi jim Betsaida

22 Jesús etz ydiscípulos ajcxy oy yjá'tcixy jim Betsaida. Jim Betsaida nijéjity jäy mïid miñ ma Jesús tüg huintzpi, e pijctzoy ajcxy may'ajt co huen nidoñ jigix je huintzpi y'ijxigipy.
 23 Huin'it Jesús huijtztzoñ je huintzpi ma yci', chi mïid cajppidzimy. E chi Jesús yajjaaxy yi chujyñi je huintzpi yhuiin, etz cñixajy, e chi amidooy pen y'ijxpy anajty tigati yinjaty huenjaty. 24 Chi je huintzpi huindicxpejty Jesús, e nimay:

—N'ijxypich yéydijctijc, e jadu'n ajcxy yquëxígy nej quipy, per yöyp ajcxy.

25 E jadüg'oc Jesús yci' pidacy ma je huintzpi yhuiin, e chi je huintzpi yhuindicxpejty anajty, e chi yhuiin y'oyñy yajxon, huin'it oy huädz y'ijxy. 26 E Jesús ycapxycíjxy mïid je', e quejxhuimbijty ma ytijc. Chi yminañ:

—Ca' mdigihuíp cajpjoty, e ni pin jada mgayajmïidmïydägipy.

Pedro capxypidzimy co Jesús yi' je' je Cristo

27 Chi Jesús ñicxy mïid ydiscípulos ajcxy jim ma nijéjity mutz cajp mihuingon je mij cajp Cesarea Filipo. E tü'am Jesús amidooy ajcxy ydiscípulos, nimay:

—¿Nej jäy yminaangixy pin ñich?

28 Chi ajcxy je' ydiscípulos y'adzooy:

—Nijéjity jäy yminaangixy co miich je' je Juan, je Bautista. E nijéjity yminaangixy co miich je' je Elías. E jacjadyii yminaangixy co miich je' tüg Dios y'ayucnajtzcaxñybi huídibi tügñy mïid nijéjity Dios ytiy'ajtmïidpi huídibi tzinaay jecy'ajty.

29 Jesús y'amidooy je' ydiscípulos ajcxy:

—Miich ajcxy, ¿nej miich mminaangixy pin ñich?

Chi Pedro y'adzooy:

—Miich je' je Cristo.

30 Chi Jesús nimay je' ydiscípulos ajcxy co ca' huaad ni pin nimaangixy, co yi' je' je Cristo.

Jesús capxypidzimy co y'öga'ñ

31 Chi Jesús jacyaj'ixpijcy je' ydiscípulos ajcxy, e yminañ:

—Copicy co ñich, je jäy huídi tzoon tzajpjoty, nyajnaxipyich mij tzaachpyi etz mij ayo'n. Yi mijjäydijc ajcxy, yi judío teedy mïitungmïidpi, etz yi escribas, je huindzindijc huídibi nijayduutcxyp Dios necy, ca' ajcxy xy'ixa'ñich, e xyaj'öga'ñ ajcxy, e codugñg xiñ njugypigipyich jadüg'oc co ñich anajty ti n'ögy. 32 Co Jesús jadu'n nigapxy nimïydacy huädz huädz nej yjada'ñyii anajty, chi Pedro huobibzimy Jesús ahuingujc, chi ooy ooy. 33 Chi Jesús ni'ijxhuimbijty ydiscípulos ajcxy, e ooy je Pedro, ñimay:

—Huinhuäctuatcich, miich Satanás. Com miich ca' mhuinma'ñ mbidägy nej Dios tzocy. Yi' janchtiy miich mhuinma'ñ'ajtpy nej jäy ajcxy tzocy.

34 Huin'it Jesús huomiñ yi' ydiscípulos ajcxy etz yi mayjäy, e chi nimay:

—Pen ji pinjaty xypanicxa'ñich, huen jäydigoydäy yci'mdzócin etz huen xypanicxich jabom jabom. Oy nej ytimyjadipy ytimy'ayoohuipy. Jadu'n nipaady nej jihuiy ajcxy anajty mgruudz mgabiccixy, etz naygiyéjicigixy ma yi ó'cin huen ytimyñéjity mïd ïch ycixpi. ³⁵ Huenpinjäy huidibi ca' yega'ñ yi yjugy'ájtín ma yi ó'cin mïd ïch ycixpi, hue' je' yajtigoyamy yi'yjugy'ájtín. E huenpinjäy huidibi yegamy yjugy'ájtín ma yi ó'cin mïd ïch ycixpi etz ïch y'ayuc oybi ycixpi, hue' je' ypadamyb yi jugy'ájtín huidibi ca' cixipy tigoyipy ni minaa. ³⁶ ¿Ti oy'ájtín yi' co tüg jäy y'ocnayyajpadüyb yi meëñ etz mic'ájtín (huidi yajpaatp ya ñaaxhuiñybi) e y'alma yjugy'ájtín cixipy tigoyipy tügçiy? ³⁷ ¿Jadu'ñy jëb jäy y'alma yjugy'ájtín occojuyi? Nigi tzoohuin mïdity jäy ajcxy y'alma yjugy'ájtín, ca' jac ti. ³⁸ Huentimpínity yi huidibi xymidzo'ydúnibich yi n'ayucich ndiy'ájtich ma yi pocyjäydic yhuinduu huidibi tzinaayb cham ma jada naaxhuiñybi. Pues nañ jadu'n ïch, je jäy huidibi tsoon tzajpjoty, nmidzo'ydúnibich yi jadu'mbi jäy co ïch anajty nhuimbity ya naaxhuiñybi mïd ïch nDeedy, je Dios Teedy, ymic'ajt y'oy'ajt etz mïd tüg'óciy yi may'ángeles ajcxy tudägypi.

9

¹ Jadu'n Jesús yjacminañ:

—Janch tiy'ajt jadu'n nej ïch miich ajcxy cham nimäy, co nijëjity miich ajcxy huidibi cham ma ïch yhuinduu, ca' m'ögaangixy, ixti cooni ajcxy jayijp m'ixipy je Dios y'ané'min etz ymic'ajt.

Co Jesús ñinïcx yajtigajch

² Co tuctujc xii naxy, chi Jesús mïd tzoon Pedro, Santiago etz Juan, e mïdpa'ttigüy ma tüg mijcop ma tüg it ooy ycixity. E jim copcixy Jesús ñinïcx naygojtigajtzní ma Pedro ajcxy yhuinduu. ³ Chi Jesús yhuít oy y'ahuimbity janch poob, e janch adücxp. E ni pin jadu'n yhuít cayajhuäch janch poob jadu'n nej je' anajty yhuít mïdity. ⁴ E chi oy nayguëxigüyí ma ajcxy yhuindu Elías etz Moisés. Elías etz Moisés mïydacp anajty ajcxy mïd Jesús. ⁵ Huin'it Pedro nimay Jesús:

—Huindzin, janch oy jadu'n co ïch nyáajity. N'occojyich ajcxy tugüig tijcquemy: tüg miich mje'; tüg Moisés yje'; etz tüg Elías yje'.

⁶ Com Pedro, Jacobo etz Juan ooy anajty chigüygixy, paady Pedro ca' anajty nejhuüy ti ycapxyp. ⁷ Tim huin'ítüy tüg joc yajnädigoy je' ajcxy, e mïdooy ajcxy ayuc jocjoty, e je ayuc yminañ:

—Jada je' ïch n'ung, huidibi ooy ndzocyich. Mïdo'mbic miich ajcxy Jesús y'ayuc.

⁸ E tim huin'ítüy Pedro, Jacobo etz Juan ajcxy yujc'ijxy, e yja'ijxhuidijty ajcxy, e ca' ni pin ma ocjac'ijxni, jëda'ajty Jesús naydügpajc.

⁹⁻¹⁰ Ti anajty choongixy copcixy, e cidacp anajty ajcxy, co Jesús nimay Pedro, Jacobo etz Juan, co ca' huaad yajmïdmïydaaccixy pinjaty huidibi ajcxy anajty ti ijxcixy, ixti cooni ïch, je jäy huidibi tsoon tzajpjoty, n'ögibich etz njugypigipyich jadüg'oc. Pedro, Jacobo, etz Juan ca' yjacmïydägy mïd jacpinjaty huidibi anajty ti ijxcixy. Per ooy ajcxy huinmay etz naymïdmïydáacigixy miñ xyipy ti Jesús ytijamy co yminañ: “N'ögibich etz njugypigipyich jadüg'oc.” ¹¹ Huin'it ajcxy Jesús y'amidooy:

—¿Na'amy co yi escribas yminañ co yi Elías huidibi chinay jecy'ajty jayijp miina'ñ ca'ydi je Cristo?

¹² Chi Jesús y'adzooy:

—Tiy'ajt jadu'n co miñ jaybety ma Dios ñecy jecy'ajty co Elías yhuimbidity jacjayijp ca'ydi je Cristo, e yaj'oyiydähuiipy huinjemybi tüg'óciy mïd Dios ycixpi. E nañ tiy'ajt jadu'n co jaybety ymiñ ma Dios ñecy co je Cristo, je jäy huidib tsoon tzajpjoty, yajnaxa'ñ ayo'n etz tzaachypí etz mayjäy ca' y'ixa'nüby. ¹³ ïch miich ajcxy nimaayb co je Elías ti je'

yhuimbity ya naaxhuiñ, e je mayjäy ti túngixy mïid Elías nej anajty tim tzójcixy. E cuyduñ ajcxy nej jaybety miiñ ma Dios ñecy mïid Elías ycïxpi.

Jesús yajtzögy tüg mutz'anäg huïdibi ca'oybi mïid

¹⁴ Co Jesús, Pedro, Jacobo etz Juan yhuimbity ma je jacjadyii Jesús ydiscípulos ajcxy anajty ti yhuï'mïy, chi ajcxy ijxy mayjäy jühuidity ma Jesús ydiscípulos ajcxy. Etz ijxy ajcxy nijëjity escribas huïdibi ayuc tzachyajtziyb mïid Jesús ydiscípulos ajcxy. ¹⁵ E co je mayjäy íjxcixy nejhuygixy co Jesús ti yhuimbity anajty, chi mic'amy ajcxy ninicxy Jesús poyïgy, e capxpocxcixy, e may je' ajcxy ooy jihuïy huinmay. ¹⁶ Chi Jesús y'amidooy je mayjäy, nimay:

—¿Ti ayuc miich ajcxy mdzachyajyomyb mïid ñich ndiscípulos ajcxy?

¹⁷ Chi nidüg je jäy ajcxy y'adzooy:

—Huindzin, ti nmïidmiiñ ñich nmang huïdibi ymïid ca'oybi, e je ca'oybi ti yaj'umïyii.

¹⁸ E janam jadozoc je ca'oybi yajyachyii yajquïdyii ñich nmang, e oy cäy naaxcïxy, e ooy y'aa'opy ypidzimy, e nañ jadu'n oy ytïtz queety etz ñinicx janch ögy yhuï'my. Ti nbijctzoyich may'ajt mïid miich mdiscípulos ajcxy co huen yajpidzimngixy je ca'oybi ma ñich nmang, e ca' ajcxy ymadacy nicxy yajpidzimngixy.

¹⁹ Jesús nimay je mayjäy:

—Miich ajcxy huïdibi jugy'ajtp jadachambi xïi tiempo huïdibi ca' mijpidägy Dios y'ayuc, ¿naag xïi naag po' ñich njac-huï'mmïhuïbich mïid miich ajcxy? ¿Naag xïi naag po' n'ocmïmecxtuguipich miich ajcxy? Mïidmiin yi mmang ya ma ñich nhuinduu.

²⁰ Chi ajcxy mïidmiñ je pa'mjäy ma Jesús yhuinduu. E co je ca'oybi ijxpaady Jesús, chi mic'amy yajyajch yajquïdy je pa'mjäy, e chi oy ciday naaxcïxy, e ooy yajch yquïdy, yajpidzimy ooy y'aa'opy ma y'ahuac. ²¹⁻²² Jesús y'amidooy je pa'mjäy yteedy:

—¿Minaag jimïjt cujc yöy maabi mmang ypa'mbety?

Chi je ungededy y'adzooy:

—Ma'xung anajty co pa'mbetyii. Canaag'oc je ca'oybi yajyachyii yajquïdyii ñich nmang, ixti ti oy ycogidahuïy jïnjoty etz niïjoty. Je ca'oybi canaag'oc jayaj'ögy ñich nmang. Pen miich mïid tzöc'ajt mic'ajt jaydëb xypubedipyich, tun may'ajt pa'ayoogich etz pubejtcich.

²³ Chi Jesús y'adzooy nimay je pa'mjäy yteedy:

—Pen miich mïbijcpi, ca' ti chípity ma pin mïbijcp.

²⁴ Mic'amy je pa'mjäy yteedy mic ycapxy ymïnañ:

—Nmïbijcyich, pubéjtcich nej huaad jacmïj nmïbijcyich.

²⁵ E co Jesús ijxy co ñigi mayjäy chach ymïñ poyïgy ma yi', chi ix'ojoy je ca'oybi, e ymïnañ:

—Miich ca'oybi huïdib ti yajhuï'my jada pi'c'anäg uum etz nat, ñich miich yam n'ane'myb: “Pidzim ma yi pa'mjäy, e ca' mjactigïhuïpy ma yi' yjot yhuinma'ñ jadüg'oc.”

²⁶ Jayijp je ca'oybi yaaxqueecy janch mic, yajyajch yajquïdy je pa'mjäy. Co jadu'n tuñ, chi ypidzimy. Je pa'mjäy oy ñinicx yhuï'my nej jihuïy ti y'o'cni. Je mayjäy huïdibi anajty ajcxy jim huïdicxp ymïnaangixy:

—Ti ayoob y'ögy.

²⁷ Chi Jesús majtz je pa'mjäy yci', e yajpidïgy e huin'it je pa'mjäy ytinayïgy mic oy.

²⁸ Co Jesús ytigïy ma tüg tijc, chi je' ydiscípulos ajcxy y'amidou ameech, minañ ajcxy:

—¿Na'amy co ñich ajcxy ca' ti nmadägyich nej nyajpidzimip ñich ajcxy yi ca'oybi?

²⁹ Chi Jesús y'adzooy:

—Yijïibi ca'oybi ca' yi' huaad ypidzimy jadu'ñyi. Hue' janchtiy copicy mïbijctzou Dios mïctägy, e huin'it ypidzimipy je ca'oybi ma je pa'mjäy. Ca' jac ni nej huaad ypidzimy yi jadu'mbi ca'oybi, jëyi co Dios nmïbijctzoohuim n'ïjtim ayuu.

Jesús capxpídzimníp jadüg'oc co y'öga'ñ

³⁰ Chi Jesús miid yí' ydiscípulos ajcxy choñ ma je jimbi it, e yajyöyñajxtay ajcxy Galilea naaxjot. Jesús ca' anajty tzocy co je mayjäy ñejhuñhuñyib ma yí' ñicxy. ³¹ Com Jesús hue' anajty yaj'ixpícy yí' ydiscípulos ajcxy, co ooy ycopícyity co yí' jäy huídibi tzoon tzajpjoty, yajcüyegipy ma yí' ymidzip, etz yaj'ögüiyb, e co anajty ti y'ögy codugüig xii jadüg'oc yjugypigipy. ³² Jesús ydiscípulos ajcxy ca' huinjihuñy anajty Jesús y'ayuc, e nañ jadu'n tzigüiyb anajty ajcxy co Jesús yaj'ójip, paady ca' ajcxy amidoy nej huimbídzimy yjiibi ayuc.

¿Pín je' ñigi jacmújip?

³³ E Jesús miid ydiscípulos ajcxy oyjäty jim Capernaum. Co ajcxy ytiçtigüy, chi Jesús yaj'amidoy ydiscípulos ajcxy, nimay:

—¿Ti ayuc miich ajcxy naymiidmiydáacigixy jim ma anajty mdüyöygyxy?

³⁴ Per amonday ajcxy, com jégixpi co anajty ajcxy ooy ti ñaymiidmiydáacigixy tüyöyjoty co pín jada' ajcxy nidügti ocjaccopícyip. ³⁵ Huin'it Jesús y'ixtacy, e chi mijhuoy je nimajmetzpi ydiscípulos ajcxy, chi ajcxy nimay:

—Pín nayyajnaxaaníp mij, huen ity nej jihuñy ca' ytiijity e huen capxmídooy ymígügtijc.

³⁶ Chi Jesús tzenügy tüg pi'c'anäg, e chi pidacy cujc'amy ma yí' ydiscípulos ajcxy. Chi tzenügy jadüg'oc, e nimay ajcxy:

³⁷ —Pín cöbije tügpajc pi'c'anäg jadu'n nej jada pi'c'anäg miid iich nxii ycixpi, iich yí' anajty ti xycöbicyich, e pín iich xycöbijcpich, ca nan iich anajty naydügpajc ti xycöbijcyich, nañ jadu'n anajty ti cöbicy huídí ti xyquejxich.

Pín iich ajt xycamidzip'ájtím, iich ajt je' míd y'ity

³⁸ Juan Jesús nimay:

—Huindzin, ti iich ajcxy n'ijxpaady tüg jäy co ca'oybi yajpidzimy miid miich mxii, e ti ngapx'aducyich miid co ca' yí' iich ajt xypahuidíjtím.

³⁹ Per Jesús yminañ:

—Ca' mgapx'adugipy yí' jadu'mbi jäy, com huenpínity huídibi mijhuinma'ñ tumb miid iich nxii, ca' yí' jibic xyñigapxich. ⁴⁰ Com yí' huídibi ajt ca' xymidzip'ájtím, yí' yí' miid iich ajt nbídzímim. ⁴¹ Janch janch iich miich ajcxy jadu'n nimäy co huenpínjáy huídibi ixyipy miich ajcxy xyajnii'uucp tüg vaso nii miid co miich ajcxy ti mmijnicxpety je Cristo, yí' jadu'mbi jäy ypadamy yí' y'oy'ájtín ma Dios.

Je huídibi ooy ycojotmáyity co nicxy nbocycähuim

⁴² Huenpínity huídibi jibic-huinma'ñ mibídzimb, e yajpocycäy yí' jadu'mbi pi'ctijc huídibi ajcxy xymijnicxpejtpich, jac'oy ixyipy co yí' jadu'mbi jäy ytimyñayyayjöcxodzyii tüg paandzaa etz ñayñajtzjibibihuñyib mejyjoty. ⁴³ Pen miich mgi' xyajtundigoyamb jac'oy co mdím'ixpuxipy, com jac'oy co mdigihuipy ma yí' jugy'ájtín huinixiibi ciduc, ca'ydi co Dios xypidägip miid metz mgi' jiiby jijnjoty ca'oydactuuby, ma yí' jijn ni camina ycapich. ⁴⁴ Jiiby ca'oydactuuby yí' ucxyting ca' y'ögy etz ni jijn ycapich nicaminaaxii. ⁴⁵ E pen miich yí' mdecy xyajpocycähuamb, ixpux, com jac'oy co mdigihuip ma yí' jugy'ájtín huinixiibi tecytuc ca'ydi co mdigihuip miid metz mdecy jiiby ca'oydactuuby, ma yí' jijn ni camina ycapich. ⁴⁶ Jiiby ca'oydactuuby yí' ucxyting ca' y'ögy etz ni jijn ycapich ni caminaaxii. ⁴⁷ E pen yí' mhuiin tüg xyajpocycähuamb, tím yajpidzim, jac'oy yí' co mdigihuip ma yí' Dios y'ane'mdac miid tügpajc mhuiin, ca'ydi co mdigihuip ca'oydactuuby miid metz mhuiin. ⁴⁸ Ma yí' ucxyting ni caminaaxii yca'ögy etz yí' jijn ni caminaaxii ycapich, ⁴⁹ e ma nidüg'ócüy ñi'cägooda'ñ jijn xut jijn ye'n tím jadu'n nej jäy tzüch caan xiducy. ⁵⁰ Yí' caan ooy yí' y'óyity, pen ymiid xücx'ájtín. Co je caan ytigoy yxücx'ájtín, ca' ji ni ti huídibi jeb miid

nyajxücxiiyim. Mïd'ájtci x ñch n'ayuc ma mjot mhuinma'ñ, jadu'n ñch n'ayuc nipaady nej caan, e tzina' miich ajcxy jotcujc mïd mmigügtijc nidüg nidüg.

10

Jesús yaj'ixpiicy mïd co jäy ytöxyijc ixmach

¹ Chi Jesús chooñ jim Capernaum, nicxy jim Judea ñaaxjot ma je it lugar Jordán mijñi ñinaxy xii ypidzimy'amy. E mayjäy ooy ñayyöymujci ma Jesús anajty yajpaady. E Jesús yaj'ixpiicy je mayjäy jadu'n nej anajty yaj'ixpiicy'adyii. ² Chi nijëjity fariseos ajcxy ñicxy ma Jesús anajty yajpaady. Hue' ajcxy yhuinma'ñ pidaaccixy co anajty Jesús tzu'ixaangixy. Chi ajcxy y'amidooy, pen huaad tüg yëydijc ixmach ytöxyijc. ³ Chi Jesús y'adzooy, yminañ:

—¿Nej Moisés ymina'ñ ma yi' ycötújcïn ñecy?

⁴ Chi je fariseos ajcxy Jesús y'adzooy:

—Moisés cötújcïn yecy co tüg yëydijc jëb huaad ixmach ytöxyijc, e möhuipy ñinecy ñidiy'ajt co nej ñay'ixmájtzigixy, e jadu'n anajty ti y'oyiy nej jëb yi' ytöxyijc ixmach.

⁵ Chi Jesús yminañ:

—Moisés cojaay jada ycötújcïn mïd miich ajcxy ycixpi, co ooy miich ajcxy mdzach-capxycömídodaaccixy ca' mgapxymídohuaangixy Dios. ⁶ Per co je naaxhuiñybi chondacy, co Dios oga'n yajcojy tüg'óciy tijaty huidi ji'ajtp, chi Dios yajcojy yëydijc etz töxyjäy. ⁷ E je yëydijc ixmadziy pytaj yteedy etz pudigihuipy yi' ytöxyijc. ⁸ E je yëydijc etz ytöxyijc tú'ciy idaangixy. Paady je yëydijc tügmucy yajpaady mïd ytöxyijc. ⁹ Com yi' huidibi Dios ti huijtzmucy, ca' ni pin huaad huijtzhuägy.

¹⁰ Co Jesús mïd ydiscípulos ajcxy yhuimbijit ma anajty ti yjättáccixy, chi Jesús ydiscípulos ajcxy yajtihuimbijitciy je ayuc huidibi anajty ti yaj'ixpiicy ma je píjcïn. ¹¹ Chi Jesús yminañ:

—Je yëydijc huidibi ti ixmach yi' ytöxyijc, e piicy mïd huingbi, hue' yi' anajty ymidundigooyb yi' ytöxyijc huidibi mïd jayijp ypijcy. ¹² Nañ tim jadu'n co tüg töxyjäy ixmach je yëydijc huidibi mïd ti ypiicy jayijp, e ypijctigach mïd huingbi yëydijc, hue' ymidundigooyb je yëydijc huidibi mïd ti ypiicy jayijp.

Jesús conucxy pi'ctijc

¹³ Je huin'it tiempo jäy ajcxy mïd miñ pi'ctijc ma Jesús, jaydëb cñixajy etz conuucxip. Co Jesús ydiscípulos ajcxy jadu'n ijxy co jäy ajcxy nimijhuägy Jesús mïd ajcxy ypi'c'ung, chi je' ydiscípulos ajcxy ix'ojoy je jäy ajcxy. ¹⁴ Co Jesús jadu'n ijxy nejhuüy nej yi' ydiscípulos ajcxy y'idich, chi ojoy ajcxy, yminañ:

—Ooy y'óyity co je pi'ctijc ajcxy xyñimijhuägyich, ca' miich ajcxy mgapx'aducy. Com yi' jäy ajcxy huidibi yajpatp ma Dios y'ané'min, jadu'n ajcxy nipaady nej pi'ctijc. ¹⁵ Janch ñch miich ajcxy nimäy co pinjaty huidibi ca' cöbiga'ñ Dios y'ané'min, jadu'n nej pi'ctijc cöbíjccixy Dios y'ané'min, hue' yi' jadu'mbi jäy ajcxy ca' ytigihua'ñ ma yi' Dios y'it lugar.

¹⁶ Chi Jesús aminenmujctay je pi'ctijc ajcxy, e chi cñixajiy etz conuucxixy.

Tüg mutz'anäg comeeñybi ymïydägy mïd Jesús

¹⁷ Co Jesús chooñ jadüg'oc, chi ñimiini poyigy tüg yëydijc, ycojxtinay'ahuüy ma Jesús yhuinduu, e yminañ:

—Miich, oybi Huindzin, ¿ti huaad ndunipyich jigix jëbi nbadipyich jugy'ájtin huidibi ca' ycixipy ytigoyipy?

¹⁸ Chi Jesús yminañ:

—¿Na'amy co xyñimäyich co oy huindzin ñch? Dios tügpajc óyip, ca' jac ni pin. ¹⁹ Miich mnejhuüy Dios ycötújcïn huidibi jadu'n minaam: “Ca' mmigapxtigoyip töxyjäydijc; ca'

mjäyyaj'ögipy; ca' mmeedzip; ca' m'indaacip; ca' pin mhuin'inip; etz myajmij'adip mdaj mdeedy."

²⁰ Chi je jäy Jesús nimay:

—Huindzin, ti nguydundäyich jadyaab cötújcín ajcxy maabi ich nbi'c'atyich.

²¹ Chi Jesús huindixpejty je yédyjc mñid tzójcín jihuiyín, e chi nimay:

—Per jactigoy'ijtni jadügnax. Nicx toog tüg'óciy huudijaty miich mñid, etz mo' yi ayoohtijc. Co jadu'n mdunipy, chi mbaadipy oy'ájtín jüby tzajpjoty. Co jadu'n mdooctähuipy tijaty miich mñid, chi minip jadüg'oc ma nyajpaadyich, e xypanícxibich, e mnaybidägñib cixyot huinjot oy nej mdimyjadipy mñid ich ycixpi.

²² Co jadu'n je yédyjc midoy nej anajty Jesús ti ñimäyíi, chi yhuí'my taj may e co ñicxni, chi ooy ytajy ymay, com hue' je' anajty ooy ycomeeñity.

²³ Co Jesús jadu'n ixty co je comeeñybi taj may yhuimbijtni, chi huindixpejty je' ydiscípulos ajcxy huudibi tinaayb jühuudity ma yi', e ymíñañ:

—Ooy chachtzípity co tüg comeeñybi ytigíhuipy ma Dios y'it lugar.

²⁴ Jesús ydiscípulos ajcxy ooy tzachhuinmay'ahuudity mñid jada ayuc nej Jesús anajty ti ymíñañ. Paady Jesús yjacmíñañ jadüg'oc:

—Miich ajcxy migügtijc huudibi ooy ndzocyich, ooy chachtzípity co ytigíhuip ma Dios y'ane'mdac tüg comeeñjyay huudibi tzachnijot'ajt ycomeeñ'adñ. ²⁵ Nígi chípity co tüg comeeñ jäy ytigíhuip ma Dios y'ane'my, ca'ydí co tüg camello ñaxipy ma tüg xu'ñ'ijx yxútity.

²⁶ Co jadu'n ajcxy midoy nej Jesús ymíñañ, chi ooy ajcxy yhuinmay'ahuudijty, e nayñimáayigixy miñ xyipy:

—Pen janch t'y'ajt jadu'n, ¿pinjäy jada' huaad jeb y'alma ñídzögipy?

²⁷ Je huudibi jäy ajcxy ca' ni minaxñ huaad ca' yaj'oyíy, Dios yi' yaj'oyíhuip, com mñid Dios ca' yi' ni ti chípity.

²⁸ Chi Pedro ymíñañ:

—Huindzin, occuendtun, ich ajcxy ti n'ixmajtztäyich tüg'óciy tijaty anajty nmñidich, e ich ajcxy nbanícxpich miich.

²⁹⁻³⁰ Chi Jesús y'adzooy, minañ:

—Janch t'y'ajt nej ich miich ajcxy nimäy co huenpínity huudibi mñid ich ycixpi ti ixmach ytijc, ti ixmach y'uch ymigüg ajcxy etz ytaj yteedy, etz ytöxyijc, etz y'ung ajcxy, etz nañ jadu'n ti ixmach ycam ich ycixpi, etz ich n'ayucich etz mñid Dios yt'y'ajt ycixpi, yi' ypadamy nígi oy'ájtín ya naaxhuiñ, ixti ypadamy migo'px jadu'nyí ytijc ajcxy, y'uch ajcxy, ytaj ajcxy, y'ung ajcxy, etz ypadamy nígi ymij cam, mñid tzaachypi mñid ayo'n mñid ich n'ayuc ycixpi. Etz nañ jadu'n ma je xñ tiempo huudibi mimb cidacpi ypadamy jugy'ájtín huudibi ca' ycixipy ytigoyipy. ³¹ Ji yajpaady ya naaxhuiñ nijéjity jäy huudibi cömay ijtp, e co yjaty ajcxy tzajpjoty, chi ca' ajcxy cömay ida'ñ. Nañ jadu'n ji yajpaady ya naaxhuiñ nijéjity huudibi ca' cömay y'ity, e co ajcxy yjadipy tzajpjoty, chi jüby ajcxy cömay y'idipy.

Jadüg'oc Jesús capxidzímñip co y'ögañ

³² Jesús mñid ydiscípulos tüyöyp anajty ajcxy, hue' anajty ypättigíygyixy jim Jerusalén. Jesús jayijp anajty ñicxy, e je' ydiscípulos ajcxy etz nañ jadu'n mayjäy panícxty anajty ajcxy Jesús. Je Jesús ydiscípulos ajcxy ooy chachhuinmay'ahuudíjtcixy, e jacjadyíi jäy huudibi anajty ypanícxty Jesús ooy ajcxy chígygyixy. Chi Jesús huodzooñ abicy je majmetzpi ajcxy, e yajmñidmiydactay je' ajcxy jadu'n nej ytuna'nyíi yjada'nyíi jim Jerusalén co anajty ajcxy jim yja'tcixy. ³³ Jesús je nimajmetzpi nimay:

—Miich ajcxy m'ijxpy mnejhuíyb co nnícxim cham jim Jerusalén. E jim Jerusalén, ich je jäy huudibi tsoon tzajpjoty, nyajcíyega'ñich mach ma yi Teedy mjtungmñidpi, etz ma yi escribas ajcxy. E chi ajcxy ane'mín pidäga'ñ co huen xyaj'ócixich. Nañ jadu'n

xyçiyegaangixich mach ma yi' ajcxy huidibi ca' yjudiojâyity. ³⁴ Yi' ajcxy xyñixigipy xyajxigibych, xyhuobipyich ajcxy müd coochac, xyhuindzuj xyjijptzújibich ajcxy, e xyaj'ögibich ajcxy. Codugig xii maabi anajty xyaj'öccixyich, chi njugypigipyich jadüg'oc.

Jacobo etz Juan pijctzóogixy tüg may'ajt

³⁵ Huin'it Jacobo etz Juan, yi Zebedeo ajcxy ymang, nimijhuägy Jesús, nimay:

—Huindzin, ndzojcpyich ajcxy co mdunipy may'ajt jadu'n nej yam nimaaygixy.

³⁶ E Jesús yminañ:

—¿Ti mdzojcpy co ndunipich müd miich ajcxy yçixpi?

³⁷ Chi ajcxy yminañ:

—Tun may'ajt co anajty mbaady yi m'ané'min etz m'oy'ájtín, xymöhuibich yi mij tung ma m'ané'min jaydeb n'iñähuibich ma miich mmijc. Nidügti ich ajcxy n'iñähuiipy a'oy'amy ma miich etz jadüg anajty'amy.

³⁸ Chi Jesús nimay Jacobo etz Juan:

—Ca' miich ajcxy mnejhuüy ti ti mbijctzoogixy. ¿Nej myajnaxamyb miich ajcxy je tzaachypi ayo'n huidibi nyajnaxaamybich, jadu'n nej jihuüy m'üga'ñ ajcxy ich n'ügy e mbaada'ñ ajcxy ich nnibéjtín?

³⁹ Jacobo etz Juan y'adzooy:

—Ich ajcxy nmimadägibich minaxipyich nyajnaxipyich ajcxy yi tzaachypi huidibi mminaxamyb myajnaxamyb.

Chi Jesús yminañ:

—Janch tiy'ajt jadu'n nej miich ajcxy mina'ñ co mminaxaangixy myajnaxaangixy yi tzaachypi jadu'n nej ich mminaxaamyich nyajnaxaamyich yi tzaachypi, tim jadu'n nej jihuüy m'ügaangixy ich n'ügy, e mbadaangixy ich nnibéjtín. ⁴⁰ Per ca' ich cötújcin nmüdidyich co ich miich ajcxy nbidägipy tungmüd, co myajpaadip tüg ma ich mmijc a'oy'amy, e jadüg anajty'amy. Hue' janchtiy Dios Teedy ymüd ni'ixi' pinjaty ti huin'ixy jaydeb yajnicxip je mijtung ma ich n'ané'min.

⁴¹ Co je jacjadyii Jesús ydiscípulos ajcxy nejhuüy jadu'n nej Jacobo etz Juan may'ajt pijctzoy ma Jesús, chi ajcxy ooy mijotmäty Jacobo etz Juan. ⁴² Per Jesús huomiñ yi jacjadyii ydiscípulos ajcxy, e yminañ:

—Jadu'n nej miich ajcxy mnejhuüygyixy, yi jäy ajcxy huidibi mijtungmüd ma je maybi naax cajp, mic ajcxy ane'my je naax cajp. Nañ jadu'n yi' ajcxy huidibi mic'ajt müd ma je maybi naax cajp, mic ajcxy ane'my je jäy ajcxy. ⁴³ Per miich ajcxy ca' mjadú'nity nej mijtungmüdpi ma je maybi naax cajp. Pinjaty ma miich ajcxy mijtung yajnicxaamb, copicy ñaybidägüyb nej tüg tumbi. ⁴⁴ Pinjaty miich ajcxy huidibi nigohuajc'ajtp, copicy ñaybidägüyb nej tüg tumbi. ⁴⁵ Com ich nañ jadu'n, je jäy huidibi tsoon tzajpjoty, ti nmiiñich ya naaxhuiñ jaydeb nbubedipyich yi mayjäy ajcxy, e ca' nan yi mayjäy ich xypubedipy. Ti nmiiñich jaydeb nyegipyich njugy'ájtín ma yi o'cin. E co jadu'n nyegipyich njugy'ájtín ma yi o'cin, chi ngohua'nañich yi jäy ajcxy y'alma.

Jesús yajtzögy Bartimeo huidi anajty huíntzíp

⁴⁶ Chi oy jäty Jesús müd ydiscípulos ajcxy jim Jericó. E co Jesús tzooñ Jericó ytübijcy jadüg'oc, chi yi' ydiscípulos ajcxy etz janch mayjäy ñicxcixy anajty müd Jesús. Co ajcxy ycajp pidzimy, chi tüba'ay anajty yajpaady tüg huíntzipi huidibi limosna anajty ypijctzooyb jabom jabom. Hue' anajty yxii Bartimeo, e Timeo anajty xijity yi' yteedy.

⁴⁷ Co Bartimeo nejhuüy co Jesús je Nazaretpi najxp anajty ma je tü'aa, chi mic yaaxqueegy yminañ:

—Jesús, David y'ap y'oc, tun may'ajt ich pa'ayoog.

⁴⁸ Chi je mayjäy ajcxy ogy je huíntzipi, nimay ajcxy co huen amoñ. Per je huíntzipi nigü yminan'idich:

—Miich, David y'ap y'oc, tun may'ajt ñich pa'ayoog.

⁴⁹ Chi Jesús ytinayxijpy, e ymínañ:

—Huomiingix yi huintzpi.

Chi je jäy ajcxy oy yajtzoongixy je huintzpi, nimaaygixy:

—Jotcugi', e pidig, com Jesús xyaaxtzoob.

⁵⁰ Chi mic'amy je huintzpi, najtz'oxiyy je ñibe'ñ, chi ypidigy, e ninicxy Jesús. ⁵¹ Chi Jesús je huintzpi y'amidooy:

—¿Ti mdzojcpy ndunipyich mñd miich ycixpi?

Chi je huintzpi ymínañ:

—Huindzin, ndzójcpyich co xyajhuindicxigibich.

⁵² Chi Jesús je huintzpi nimay:

—Jëb mnicxy ma mdijc. Com ti xymibicyich, paady ti mhuindicxigy.

Tim huin'it je huintzpi yhuin'oyiyy, e yhuindicxigy, e panicxy Jesús co ytübicy jadüg'oc.

11

Jesús ytigüy jim Jerusalén

¹ Co Jesús etz je mayjäy oyjá'tcixy huigon ma je Jerusalén cajp ma yajpaady mejtz mutz cajp huidi xiijpy Betfagé etz Betania, huigon ma je cop huidibi xiijp Olivos, chi Jesús quejxy metz ydiscípulos huen nicxy jayijp. ² Jesús nimay je metzpi ydiscípulos:

—Nix miich ajcxy ma yijimbi cajp huigonbi. Co jim mjädipy, chi mic'amy mbaadip tüg burro ycoxóchity huidibi ca' pin yaj'iñayñi chambaad. Coguejtuutcix je burro e yajmiingix ya ma ñich. ³ Pen jim pinjaty xy'amidoogixy: “¿Na'amy co mmidzonaangixy yi burro?” Chi miich ajcxy mnimähuiy: “Je Huindzin (Jesús) yajtunamyb tzojc, e yajhuimbidamy mic'amy.”

⁴ Chi je metzpi ydiscípulos ñicxy ma je cajp huigonbi, e oypaatcixy tüg burro ycoxóchity huigon ma tüg tijc'aguu. Chi ajcxy coguejtuuty je burro.

⁵ Ycoguejtuutyp anajty ajcxy je burro co nijëjity jäy jim huigon ymínañ:

—¿Ti mdungixyp? ¿Na'amy co mgoguejtuutcixy yi burro?

⁶ Chi je metzpi Jesús ydiscípulos je jäy ajcxy yajmñdmíydacy Jesús y'ayuc nej anajty ti ñimäyii. Je jäy ajcxy ymínaangixy co jëb yajñicxcixy je burro. ⁷ Mic'amy ajcxy mija'ty je burro ma Jesús yajpaady. Je Jesús ydiscípulos ajcxy jibe'ñ je burro ajcxy mñd yjocxhuit, chi Jesús yaj'iñay je burro. ⁸ Mayjäy ajcxy ooy yëby yhuit tügujc ma Jesús anajty ñaxa'ñ, e jacjadyii jäy pujxy ajcxy quipy'aacx, e pidaaccixy tügujc.

⁹ Je mayjäy huidibi anajty ajcxy nicxp jayijp etz axam ma Jesús, chi ajcxy ytigüy capxp mic, ymínaangixy:

—¡Hosana! ¡Gloria a Dios, ooy ycömáyity Dios! Huen capxpaady y'idipy jada yëydijc huidibi mimb mñd yi nHuindzin Dios yxi etz ymic'ajt. ¹⁰ Huen capxpaady y'idipy je ané'min huidibi jada Jesús yajtzondacp cham. Jada je' je ané'min huidibi nmij'ap nmijteedy David anajty ymñd. Hosana, huen je tzajpjoty tzinaayb ajcxy ñbaatcixy capxpaatcixy jada mij'ane'mbi.

¹¹ E jadu'ñyi Jesús ycajptigüy jim Jerusalén, e ytigüy tigoty ma Dios ytijc. Co huindicxtay tüg'ócüy tijaty jiiy tzajtigoty, chi chooñ jiiy, e ñicxy jim ma je cajp huidibi yxi Betania. Chi Jesús je majmetz ydiscípulos ajcxy mñdnicxy.

Jesús capxpocy je higeri ca'pi anajty ytim

¹² Je com jabom co ajcxy chooñ jim Betania, chi Jesús yuböccooti. ¹³ Chi Jesús ijxpaty jiguëgy tüg higeri ooy anajty yco'aayity. Chi Jesús ñicxy ma je higeri yajpaady, ixa'ñ pen ymñd ytim. Co Jesús ymech ma je higeri, chi ijxy co je higeri ca' anajty ytim mñdity, jëyi mñdity anajty y'aay, com ca' anajty ni tiempity mña higo ytim'aty. ¹⁴ Chi Jesús migapxy je higeri nimay:

—Jadu'n nej tiempo yjacnicxni, ni pin cajacpaadipy higo tim ma miich.
Chi Jesús ydiscípulos ajcxy midoy nej Jesús nimay je higuera.

Jesús quejpidzimiday ajuybi adoocpi ma Dios ytijc

¹⁵ Co ajcxy oy yjady jim Jerusalén, co Jesús ytigiy jadüg'oc jiiby ma Dios ytijc, chi Jesús yajpidzimiday je ajuuybi adoocpi ajcxy jiiby tzajptigoty. Chi Jesús tijhuimbijtay je mesa ajcxy me je meñ yajhuäcxpi ytuñ ajcxy. Nañ jadu'n tijhuimbijty je jäy ajcxy iñaybejt huidibi muuxy toocp. ¹⁶ Jesús ca' anajty tzocy co pinjaty midigihuiipy juydoogy ma Dios ytijc. ¹⁷ Jesús yaj'ixpijcpy anajty je mayjäy, e ymíañ:

—Ma Dios y'ayuc necy Dios jadu'n ymíañ: “ñich ndijc hue' je' tzajpcapxapxtac ma tüg'óciy jäy ajcxy choon ma nidüg'óciy naax cajp ymiingixy Dios ojadajtp”, per miich ajcxy hue' yi' mhua'ñ meetzpitijc.

¹⁸ Co ajcxy je teedy mjtungmüdpí etz je escribas nejhuñy nej anajty Jesús ti y'idich jiiby ma Dios ytijc, chi ajcxy ooy ixtaaygixy nej ajcxy jëb yaj'ögipy Jesús. Per ca' ajcxy yhuinma'ñybaady mic'amy nej yaj'ögipy, tzigñyb ajcxy müd je mayjäy com je mayjäy ooy tzachjihuiy huinmay jadu'n nej Jesús yaj'ixpijcgixy. ¹⁹ Co oycoodzhuyñi, chi Jesús ycajppidzimy.

Je higuera ytitzni

²⁰ Je com jabom Jesús müd ydiscípulos ajcxy najxp anajty tim jopyñi ma je higuera anajty ytinäy. E je higuera ti anajty ytitztay mabaad ytictz. ²¹ Huin'it Pedro jäymejtzcooty nej Jesús nimay je higuera, chi Pedro Jesús nimay:

—Huindzin, ix jada higuera huidibi ixiy mgapxpoj, ti yi' ytich.

²² Chi Jesús Pedro nimay:

—Mibic yi' Dios. ²³ Janch ñch miich ajcxy nimäy, co ixipy pin migapxy jada huigonbi cop, e nimäy ixipy: “Miich cop pidig, e nicx cidäg mejyoty”, pen ca' ti mijotmetzcñy, e mibicy co jadaanip nej yi' ti ane'my je cop, chi jadu'n ytunñyb yjadiyb. ²⁴ Paady ñch miich ajcxy nimäy co tüg'óciy tijaty miich ajcxy mbijctzooyb ma Dios, chi Dios xymöhuipy ajcxy huidibi ti mbijctzoogixy. Pen janch miich ajcxy mibicy co Dios ti xymoogixy ajcxy je huidibi ti mbijctzooyb. ²⁵ Co miich ajcxy mgapxtaaccixy, pen ca' oy m'ity ajcxy müd tüg jäy, huinméxcix yi' mmidzip tim jayjip, jigix jëbi Dios Teedy huidib jiiby tzajpjoty xyhuinmeecxip miich ajcxy ma ti mdundigoogixy. ²⁶ Pen ca' miich ajcxy mhuinmecxy yi' mmidzip huidibi ti xymidundigoogixy, ca' miich ajcxy xyhuinmecxañ Dios Teedy huidibi yajpatp tzajpjoty.

Jesús je' ycötújcín

²⁷⁻²⁸ Je huin'it tiempo Jesús müd je' ydiscípulos ajcxy yhuimbijty jim Jerusalén. E co Jesús anajty yhuidity tzajptigoty, chi nijëjity huindzindijc huidibi nigohuajc'ajtp anajty je teedytjic etz escribas ajcxy huidibi nijayduutpi Dios ñecy, nimíñ ajcxy Jesús, e ymíañ ajcxy:

—¿Pin cötújcín ti xymöy huidibi ti mduñ ya tzajptigoty? ¿Ma cötújcín ti mbaady co jëb m'ane'my ya tzajptigoty?

²⁹⁻³⁰ Chi Jesús ymíañ:

—ñich miich ajcxy nañ jadu'n nyaj'amidohuamyb tüg ayuc. E pen mni'adzooyb ajcxy, huin'it ajcxy nyajnimähuipy ma ñch ti nbaady yi' mic'ajt etz yi' cötújcín, co jadu'n nduñich jiiby tigoty ma Dios ytijc. ¿Pin yajñibijc Juan, je Bautista, co huen jäy yajñibety? ¿Dios, o naaxhuiñyjäy? Adzoogich ajcxy.

³¹ Chi ajcxy ytigiy huinmay'ahuidijtpi, ñayñimáayigixy miñ xyipy:

—Pen mñaanim co Dios tzajpjoty ti yajñibicy Juan, chi Jesús xyñimáayimipy: “¿Nej co ca' miich ajcxy mibijcy Juan y'ayuc?” ³² Nañ ni ca' jëbi ñch ajt mñaanim co jäy ajcxy ti quejxy Juan.

Com chigüyb anajty jäy com ñejhuüyb anajty ajcxy co Juan je Bautista Dios anajty ytiy'ajt ymüid. ³³ Chi ajcxy Jesús nimay:

—Ca' üich ajcxy nejhüiy pin ti yajnübicy Juan.

Chi Jesús yminañ:

—Üich nañ jadu'n ca' nnigapxa'ñich pin ti xycötujcmöyich co jëb nduñich huidibi ndumybüch.

12

Je naymidúntijc jibicjäybi ajcxy y'ixpejt

¹ Je huin'it xii Jesús jacmügapxy je mayjäy müid jihuimbit ayuc, yminañ:

—Ji yajpaady tüg yëydijc huidibi camuuxy ti cojy ma ycam, e ti co'aguemy je camuuxy cam, e yaj'oyüy tügi tang ma huinmücxa'ñ je camuuxy. Nañ jadu'n je yëydijc tüg poch yajpidügy ma ycamuuxy yaj'ixühua'ñ co cuent'aty. Co anajty ti ni'ixüdüy ti a'ixüdüy, chi ycamuuxy cam yejcy ajuyducy ma nijëjity tumbidijc. Chi chooñ viaje tumbi jigüegy it. ² Je huin'it tiempo co yhuaad'ajtni je cosechi, chi je cogam quejxy tüg ytumbi jim ma je' ycam yajpaady, co hueen je tumbidijc yéjccixy je cosechi, jadu'n nej anajty ti ycapxytuñ müid je' ajcxy. ³ Chi je cam tumbidijc ajcxy majch je cogam yquexyöyp, chi huinhuojpy jijphuojpy ajcxy. Chi ajcxy quejxhuimbijty jadu'ñyi, ni ti ajcxy camoy. ⁴ Chi je cogam quejxy jadüg ytumbi ma je ycam yajpaady. Chi tumbidijc ajcxy tzaagäch je mimetzpi quexyöyp etz yajtzachiy ajcxy ma ycohuajc, chi ajcxy ooy ogy oyñinej. ⁵ Chi je cogam jacquejxy jadüg ytumbi e ajcxy tumbidijc yaj'o'cy je müdugügpü quexyöpy. Chi je cogam jac tim quejxy jadyii ytumbi. Chi je tumbidijc ajcxy je cogam ytumbi huinhuojpi jijphuojpi nijëjity, e nijëjity ajcxy yaj'o'cy.

⁶ Je cogam ymüid anajty tügpajc ymang huidibi anajty ooy tzocy jihuüy. Je' oy quejxcogixüy ma je ycam yajpaady. Je cogam huinmay jadu'n co je tumbidijc ajcxy yajmij'adüyb je' ymang. ⁷ Chi je tumbidijc ajcxy ñayñimaayi miñ xyipy: “Jada yëydijc je cogam jada ymang huidibi jë'adaanip je yteedy ypidägy. Tzoc yaj'ó'cim, e jadu'n je cam një'ájtüm.” ⁸ E jadu'n ajcxy majch je cogam ymang yaj'ögy ajcxy. Chi ajcxy yajpidzimy camjoty, e jibijptacy agajjixci'py.

⁹ Co Jesús jadu'n müydactay je jihuimbit ayuc, chi yminañ:

—¿Ti ytunamyb je cogam müid je tumbidijc ajcxy? Hue' min ci'm ma je' ycam, e yaj'öctähuipy je tumbidijc ajcxy huidibi tundigoy. E yegipy pijctzoy je' ycam müid huingbi jäy ajcxy.

¹⁰ ¿Nej ca'ni miich ajcxy mgapxy yi Dios ñecy ma jadu'n yminañ?

Je yëydijc huidibi je jäy ajcxy ca' anajty tzocy, Dios ti pidägy mij'ane'mbi. Tim jadu'n nipaady nej tzaa oyjatypi huidibi je pojtzpidijc ca' ajcxy yajtuna'ñ, e je' oy ti yhuimni ma anajty yjaccopicyty.

¹¹ Jada tung je Huindzin Dios ti tuñ, e ooy oy n'ixim njäygidaacim.

¹² E huin'it je judíojäy ajcxy ytungmüdpü ooy jamadzaañ anajty Jesús, com ñejhuüyb anajty ajcxy co Jesús ñigapxyii yi' ajcxy. Com tzigüyb anajty ajcxy müid je mayjäy, chi ajcxy tim huinyöyducy, chi ñicxcixni.

Yajnidügyixy pen jëbi cogüéjtin yajyecy o pen ca'

¹³ Jac'axam je judíojäy ajcxy ytungmüdpü quejxy ajcxy ma Jesús yajpaady mejtzpicy ixpicytijc. Tügüicy anajty ñaygomájtzigixy müid yi fariseos ajcxy, etz jadügüicy ma je rey Herodes. Hue' anajty ajcxy huinma'ñ ixtaayb nej ajcxy ocxühuipy Jesús. ¹⁴ Jada mejtzpicypi ixpicytijc ñicxy ajcxy ma Jesús, e yminañ ajcxy:

—Huindzin, üich ajcxy nejhüüyb co myaj'ixpicy je tiy'ajt, ca' jäy mdzigüy, com ca' huin'ixpety myaj'ixpicy. Tú'ciy miich mduñ müid mic jäy, müid comeeñjyay, etz müid ayoob jäy. Tudägy jäy ajcxy myaj'ixpicy jadu'n nej huaad ajcxy cuychinaaygixy Dios

ytíy'ajt. Nejhuñhuaamybich ajcxy nej miich yaj'ixpijcpy je mayjäy. ¿Nej tundigooyim miid yi Dios ycötújcín co nmigüéjtím César, je romano jäy mij'ane'mbi, o ca'ji? ¿Nej jëb nmigüéjtím, o ca'ji?

¹⁵ Per Jesús ñejhuñyb anajty ajcxy yjibic-huinma'ñ, e chi ajcxy nimay:

—¿Na'amy co miich ajcxy xyjot'ixy xyhuinma'ñ'ixyich? Yajmiingix tüg meen jigix n'oc'ixipyich.

¹⁶ Chi ajcxy mimiñ tüg meen e co Jesús ijxy je meen, chi yminañ:

—¿Pín y'ahuanax etz pín yxí ijtp ma jada meen?

Chi ajcxy y'adzooy:

—Hue' yi' César.

¹⁷ Chi Jesús yminañ:

—Mo' je César huídibi yi' yjë'ajtpy, e mo' Dios huídibi Dios yjë'ajtpy.

Chi ajcxy ooy jihuñ huinmay jadu'n nej anajty Jesús ti y'adzooy.

Yajnidíygixy pen je tübi öccíxy jugypigípy jadüg'oc

¹⁸ Je huin'it tiempo nijëjty saduceos ajcxy ymiiñ ma Jesús. Yi saduceos ajcxy yminaangixy co ca' pín yjugypiga'ñ tübi y'o'ccíxy. ¹⁹ Chi je saduceos ajcxy Jesús nimay:

—Huindzin, Moisés jayhui'my je cötújcín co tüg yëydíjc y'ögy, e co'ögy yhui'my je ytöxyíjc e ca'ni ytöxyíjc ung'ixy. Pues copícy je co'ögy ytöxyjäy ypigípy miid ña'y y'uch yëydíjcpí jigix jëbi je töxyjäy y'ung'ixipy huídibi hui'mihuñ jadu'n nej codíjc cobidägy ma je yteedy y'ajch ypidägy. ²⁰ Pues jim ma tüg cajp anajty chinäy huixtujc yëydíjc tüg que'x. Je ungoob ypijcy, e chi ix'o'cy ytöxyíjc, e ca' ni tüg y'ung yajhui'my. ²¹ Je mimetzpi yëydíjc ypijcy miid je co'ögytöxyjäy, e nañ jadu'n ix'o'cy ytöxyíjc e ca' ni tüg ung yajhui'my. E nañ jadu'n je midugigpi miid ypijcy je töxyjäy, e nañ jadu'n ix'o'cy je ytöxyíjc, e ca' ni tüg y'ung yajhui'my. ²² E jadu'n oytuñyí yjadyí miid je töxyjäy co ti anajty miiddzinay'abidzimdäy je nihuixtujcpí yëydíjc tüg que'xpi. E je nihuixtujcpí ix'o'cy ajcxy je töxyjäy, e ca' ni tüg y'ung ajcxy yajhui'my. E chi je töxyjäy oy y'öcni. ²³ E co anajty xí tiempo paaty, co anajty Dios yajjugypicy yi tübi ajcxy y'ögy, ¿huídibi jada' ajcxy nidücti je yëydíjc töxyíjc'adaanip je töxyjäy? Com ti ajcxy jadu'n nihuixtujcpí miid tzínay'abidzimgixy.

²⁴ Chi Jesús je saduceos ajcxy nimay:

—Miich ajcxy ca' mhujñhuñy je tiy'ajt, com ca' mhujñhuñygixy Dios y'ayuc ytíy'ajt, e com ni ca' mnejhuñygixy je mic'ajt huídibi Dios ymiid. ²⁵ Pues co anajty yjugypíccíxy je jäy tübi y'ó'ccíxy, chi ca' ajcxy ypiğa'ñ, e nañ jadu'n ni ca' ajcxy ñaymöhuyb y'ung huen píjccíxy. Hue' ajcxy yjugy'adaangixy chinähuaangixy jii by tzajpjoty, tím jadu'n nej je ángel ajcxy chinaangixy yjugy'ajtcíxy. ²⁶ Per je tiy'ajt co jäy ajcxy tübi y'o'ccíxy yjugypigaangixy, ¿nej ca'ni mgapxyñi Moisés ytíy'ajt ma anajty Dios ymígapxyí co je aay ujtz anajty chachtoy? Chi yminañ: “Íich je' je Dios huídib Abraham, Isaac etz Jacob yDios'ajtpy.” ²⁷ Com yi Dios ca' yi' yDios'aty ma yi öcpi ajcxy huídibi y'alma ti ycíxy ti ytíyoy. Yi Dios Dios'ajtp yi' ma yi juugypí ajcxy. Paady miich ajcxy ooy mij mdundigooygixy co ca' mhujñhuñygixy Dios ytíy'ajt.

Je ané'mín huídibi ooy nīgi ycopícyity

²⁸ Nañ jadu'n je huin'it tiempo nimiiñ Jesús tüg escriba. E yi' anajty y'amido'ijtpy co Jesús adzooy je jäy huídibi ca' mibicy co yi öcpi yjugypigípy ajcxy jadüg'oc. Jada escriba ñejhuñyb co Jesús ooy oy ti y'adzooy je saduceos ajcxy, paady yi' Jesús amidooyi:

—¿Huídibi je' Dios y'ané'mín jacmíjpi?

²⁹ Chi Jesús y'adzooy:

—Yi Dios ycötújcín huídibi jaccopícyip, yi' je' huídibi minamb: “Midoogix Israel jäy, je Huindzin Dios huídibi nDios'ajtím, yi' je' ajt nHuindzin Dios tügpajcpí. ³⁰ Tzoc jihuñ' etz yajmíjat mHuindzin Dios miid tüg'óciy m'aa mjot etz miid tüg'óciy m'alma, etz

müid tüg'óciy mhuinma'ñ, etz müid tüg'óciy mmic'ajt.” Jada je' je jaccopícyip ané'min. ³¹ Je mímetzpi Dios ycötújcín jahueengi tú'ciy ñaybadyii müid je jayijpi, yi' huidibi jadu'n minamb: “Tzojccix jihuüygix yi mmigügtijc tim jadu'n nej mnaychogyii mnayjihüiyii cí'm.” Jada metz Dios ycötújcín jaccopícy jacmic'ajt müid ca'ydi jac huidibi cötújcín.

³² Chi je escriba ymíñañ:

—Ooy oy tí m'adzooy. Janch tíy'ajt jadu'n nej müich míñañ, co jí yajpaady tügpajcpi Dios, e ca' jí jadüg Dios mic'ajt müidpi. ³³ E janch tíy'ajt co copícy nmíjpídaacím nyajmíj'ájtím Dios cíxyjot huíníjot müid tüg'óciy ajt nhuinma'ñ, müid tüg'óciy ajt n'alma, etz müid tüg'óciy ajt nmic'ajt. E copícy ndzójcím njihuüyím nmigügtijc tim jadu'n nej naychójcím nayjihüiyím cí'm. Jactzoobatp jada ca'ydi co tüg'óciy yi huindzigi'ñ huidibi anajty yajno'cpi müid Dios ycíxpi.

³⁴ Co Jesús íjxy jadu'n nej je escriba tíydudägy anajty tí y'adzoyii, chí ymíñañ:

—Jahuenjaty müich mmíbíjcín ytígoy'ityñi jaydeb mdígíhuipy ma Dios y'ane'my.

Co Jesús anajty jadu'n tí y'adzooy je escriba, chí ca' jac pín tí ayuc yjacyaj'amídoohüi.

¿Pín je' y'ung je Cristo?

³⁵ Jesús yaj'ixpijcpy anajty je mayjäy jíiby ma Dios ytíjc, e ymíñañ:

—¿Na'amy co yi escribas ajcxy ymíñaangíxy co Cristo hue' je' David y'ap y'oc? ³⁶ Com je Espíritu Santo ymoy David jada ayuc huidibi jaybety ma je Salmo necy ma jadu'n ymíñañ:

Yi Huindzín Dios nímay ích nHuindzín: “Íña' ya a'oy'amy ma ích nmíjc, íxti cooní anajty müich mmídzíp tí nmímadactäyích, jadu'n nípaadípy nej jíhuüyí tí nbídägyích müich mmídzíp jadu'n nej tüg' tinaybejt.”

³⁷ ¿Per nej co yjadu'níty co jäy ajcxy ymíñaangíxy co je Cristo David je' y'ap y'oc? ¿E David cí'm ymíñañ co je Cristo yi' yHuindzín'ajtpy?

Jotcuyc anajty je mayjäy amídoo'íjti Jesús y'ayuc.

Jesús ca'p jäygidaci leyhuindzín ajcxy yhuinma'ñ

³⁸ Jesús yaj'ixpijcpy anajty je mayjäy, e ymíñañ:

—Naycuend'ájtígix müid yi escribas ajcxy. Com yi escribas ajcxy ooy jotcuyc co nayxójxígy müid yhuít oyjatypí yoñjatypí. Ooy ajcxy tzocy co yajcapxpócxíxípy huindzigi'ñ'amy mayjäyduum. ³⁹ Yi escribas ooy ajcxy tzójccíxy yi cödumbi íñaybejt ma je naymujectac, etz ooy ajcxy tzójccíxy íñaybejt ma yi cömaybí jäy íñay ma jäy ajcxy yxííduñ.

⁴⁰ Yi escribas ajcxy yajcíjxtaayıpy yi co'ögy ytöxyjäy ypidägy müid ajcxy y'adzójcín. Yi' ajcxy ooy túngíxy jecy tzajpcapxycapxií jígix ajcxy capxpaady ídípy. Dios nígi tzaachytunípy yi escribas ajcxy müid ypocy ycíxpi, ca'ydi jac ní pín.

Je ayoobi töxyjäy y'ofrendi

⁴¹ Tüg xíí anajty Jesús íñay jíiby tígoty ma Dios ytíjc. Íñayb anajty ma je limosna caja huinduu. Jesús yhuindícxyp anajty je jäy ajcxy huidibi meen pídaaccíxp ma je ofrenda caja. E maycomeñyjäy ooy ymeen pídaaccíxy janch may. ⁴² Tim huín'ítíy yja'ty tüg co'ögy töxyjäy janch ayoob pídacıy metz pí'c meenhuäcxy, huidibi ca' ooy choobaady.

⁴³ Chi Jesús huomujcy je' ydiscípulos, e nímay ajcxy:

—Janch tíy'ajt jadu'n nímaaygíxy co jada co'ögy ytöxyjäy ayoob jac'anaxy jada tí pídagy ofrenda, ca'ydi jac ní pín. ⁴⁴ Tüg'óciy comeñyđíjc ajcxy ypidacpy ma y'ofrenda yi meen huidibi yajconajxyp. Jadayaabi co'ögytöxyjäy tí pídacıy tüg'óciy huidibi anajty ymíid, je meen tüg'óciy huidibi anajty nígayamy yi' ymooyb Dios.

Jesús ymíñañ co Dios ytíjc yhuindígooyípy

13

¹ Co Jesús ypidzímıy ma Dios ytíjc, chí nídügti ydiscípulos nímayi:

—Huindzin, ix jada maychaa mijjatypi etz jada maybi tijc ooy y'oy'oydũñity.

² Per Jesús y'adzooy, ymínañ:

—Huindicx miich ajcxy jada maybi mijjaty ytijc. Minip tiempo mina tũg'óciy jada tijc nicxy yhuim'y taj xit, ca' ma tzaa macxy. Huindigoydãhuip tũg'óciy.

Je t'y'ajt ma ca'ni naaxhuiñybi ycixa'ñi ytigoya'ñi

³ Jesús miid ydiscípulos ajcxy ñicxy ma je cop huídibi xijip Olivos. Jim ajcxy co'ijxnaxy je Dios ytijc. Hñaayb anajty Jesús jim copcíxy co Pedro, Jacob, Juan etz Andrés ameech migapxy Jesús, ymínaangixy:

⁴ —Tun may'ajt ich ajcxy yajnimaaayg mina jada ytuna'ñyii yjada'ñyii co huindigoydãhuip Jerusalén cajp. ¿Ti ijxpejt'adam co anajty jadayaabi jadu'n ytuna'ñyii yjada'ñyii?

⁵ Chi Jesús y'adzooy ajcxy je' ydiscípulos ymínañ:

—Ix pinjaty xyhuin'ingixy. ⁶ Ooy jãy may ymínañ miid ich nxi. Ñaydíáangixy co je' ajcxy je' je Cristo, ymína'na'ñ ajcxy: “ñich je' je Cristo.” E ooy jãy may huin'inaangixy.

⁷ Co miich ajcxy ayuc mmídohuipy co jãy chachchiptungixy xii ya, ca' mdzigíyigixip, com ooy ycopícyity co jada jadu'n jayijp ytuníyb yjadíyb. Ca' nan hue' je' anajty tim cijxp tim tigooyb je xii je tiempo. ⁸ Nayñibidigíib tũg naax cajp miid huingbi naax cajp, e gobierno miid huingbi gobierno. E minipy mic ujx canaag'it etz mij yuu mijpa'm xii ya. E jãy ajcxy ooy yhuãniipy yjihuíhuipy ycanaymijotcujc'ájtigixipy. Jada tzaachypi ayo'n tzondacni yi' anajty.

⁹ Chi Jesús yjacmínañ:

—Nayguend'ájtigix miich ajcxy, com yi mmídzip ajcxy xymájtzcixip, e xycíyéjccixip ma tungmídpídjic, e xychachytungixip xyhuójpícxip ma yi judíojáy ñaymujctac ajcxy. Xyajnicxcixip mach ma rey etz ma gobernador ajcxy yhuinduu miid ich ycixpi com miich ajcxy xymibicyich. E miich ajcxy t'y'ajt myegipy miid ich ycixpi, ixti ma rey ajcxy etz ma gobernador ajcxy yhuinduu. ¹⁰ Ca' anajty xii tiempo paady mina ycixa'ñ naaxhuiñybi, chi ajcxy capxhuãcxtãhuipy ich n'ayuc huindu'myb ñaaxhuiñ ma tũg'óciy naax cajp. ¹¹ Co jãy ajcxy xyajnicxip mach ma codungdjic co xytíydungixipy, chi ca' ni nej mjot'adíyb, ni ca' mhuinmayipy nej m'adzógixipy. Mgápxcixipy je ayuc huídibi Dios xymóoygixipy, com je ayuc huídibi mgápxcixip, ca' nan miich je' anajty ajcxy m'ayuc. Hue' je' je Espíritu Santo xymóoygixipy capxy ayuc. ¹² Yëydijc ajcxy ycíyegamyb ma tungmídpi yci'm y'uch ajcxy co huen yaj'ögyii. E nañ jadu'n je ungedeedy ycíyegamy yci'm y'ung ajcxy ma tungmídpi. Nañ jadu'n yi' y'ung ajcxy cíyegipy yci'mdeedy co huen yaj'ögyii. ¹³ May naaxhuiñjãy ca' xychogipy xyjihuíhuipy miich ajcxy miid ich ycixpi. Pen miich ajcxy mmíctinaayb ma mmíbíjcin, ypaadip miich ajcxy m'alma nídzoocin.

¹⁴ Chi Jesús yjacmínañ:

—Co anajty m'íjxcixy je huídibi Daniel ñimíydac jecy'ajty, co pinjaty jibic-huinmañ tumb ma ca' ypanyii ma Dios ytijc, huídibi ooy ycodzigíjity. Miich ajcxy huídibi tzinaayb jim Judea, co jadu'n m'íjxcixipy, chi nicx mgueectzoocix ma tungop. ¹⁵ Yi jãy ajcxy huídibi yajpatp ma ytícnícxycy ca' ñícxity tigoty ma ytijc. E ni ti jiiyb cayajpídzimipy. ¹⁶ Yi jãy ajcxy huídibi yajpatp camjoty, ca' ajcxy nihuimbídy je' yjocxy huit huídibi ymíid. ¹⁷ Huin'it xii huin'it tiempo ayo'n pada'ñ je tőxyjãy huídibi anajty ti y'ungtzimígy, e nañ jadu'n yi' ajcxy huídib miid y'ung ma'xung yajtzítzp. ¹⁸ May'ajt ajcxy mbíjctzoohuipy ma Dios, co jada jadu'mbi ayo'n ca' ytuníyb yjadíyb ma anajty ytích tíempity. ¹⁹ Yi jadu'mbi xii tiempo jãy ajcxy ayo'n tzaachypi minaxipy yajnaxipy. Ni caminaaxii jãy jadu'n tzaachypi mijcajee ti minaxy ti yajnaxy maabi Dios cojy naaxhuiñybi oga'n, ixti chambaad. E caminaaxii jadũg'oc ycajadíyb jadu'n. ²⁰ Pen ca' Dios capx'aduga'ñ yjiiibi

ayo'n xii ayo'n tiempo, ca' ni pin chögipy. Per Dios ycapx'adugamyb yjiibi ayo'n tiempo miiid je mibijcpidijc ycixpi huidibi Dios ti huin'ixy.

²¹ Co yi jadu'mbi xii tiempo anajty ymiiñ, ca' mmibigipy, pen ji pinjaty xyñimaaygixy: "Ijxcix, cha yajpaady je Cristo", o "jim'amy yajpaady je Cristo." Ca' mmibijccixipy jäy y'ayuc. ²² Minip jäy ajcxy huidibi ñayyajnaxáanigixy nej Cristo, e ymináangixipy co capxhuäcxy ajcxy Dios y'ayuc, e ca' yjanchity. Ytunipy ajcxy mij huinma'ñ etz mijpi ijxpejt, ixti jahuin'ina'ñ je mayjäy ajcxy huidibi Dios ti yhuin'ixyii. ²³ Nayquend'ájtigix miiid yi jadu'mbi jäy ajcxy, com jayijp iich miich ajcxy yi' ti nyajmiiidmiydägy.

Nejjada' je Dios y'ung yminipy jadüg'oc

²⁴ Chi Jesús yjacmíñañ:

—Co anajty yi jadu'mbi ayo'n tiempo ti ñaxy, ycoodzihua'ñ etz je po' ca' y'ana'ñ. ²⁵ Maymadza' ycähuip, e nañ yücxiip huidijaty mic'ajt miiid tzajpjoty. ²⁶ Je huin'it xii je huin'it tiempo co jadu'n anajty ytunyii yjadyii, huin'it ajcxy m'ixipy, iich je jäy huidibi tzoon tzajpjoty, co iich anajty nmiiñich jocjoty miiid tüg'óciy nmic'ajt n'oy'ajtich. ²⁷ Co jadu'n anajty nmiiñich, chi mic'amy nguexipyich iich n'ángeles ajcxy ma xii ypidzimy, ma xii ycidägy, ma jiiimboj ypidzimy etz ma tichpoj ypidzimy. N'ángeles ajcxy yajmuga'ñ tüg'óciy iich njäy, huidibi ti nhuin'ixyich, xim yam ma ajcxy yajpaady ya naaxhuiñ, etz jiiiby tzajpjoty.

²⁸ Chi Jesús yjacmíñañ:

—Jëb miich ajcxy tiy'ajt mbigipy ma yi higueri jadu'n nej je xii je tiempo mimb cidaacni. Co je higueri jadüg'oc ñihuamiy, chi miich ajcxy mnejhuüy co ti yhuingoni mina ypottigiiyñi. ²⁹ Nañ tim jadu'n co m'ixipy tuniiyb yjadiyb tüg'óciy ijxpejt nej ti nnimaaygixy, chi mnejhuühuip co ti yhuingoni je tiempo mina nhuimbidiipyich jadüg'oc ya naaxhuiñybi. ³⁰ Janch iich miich ajcxy nimäy co jada huidibi ti nnimiydacyich tuniib jadiib ca'ni anajty y'öctay je jäy ajcxy huidibi jacjugy'ajtp jadachambi xii jadachambi tiempo. ³¹ Je tzajp etz je naaxhuiñybi cixipy tigoyipy. Iich n'ayuc huidibi ngapxyich, ca' ycixipy ytigoyipy ni caminaxii. ³² Ca' ni pin nejhuüy je xii je tiempo mina ytuna'ñyii yjada'ñyii jadu'n nej ti iich miich ajcxy nnimaaygixy. Ni je ángeles ajcxy jiiiby tzajpjoty ca' nejhuüyigixy, nañ ni iich, Dios y'ung', ca' nejhuüyich. Jëyi Dios Teedy tügpajc nejhuüy.

³³ Ni'ixi' ahuíjxcix. Mibijctzoogix Dios jabom jabom, com ca' mnejhuüyigixy mina anajty ytuna'ñyii yjada'ñyii yi huidibi ti nyajniimaaygixy. ³⁴ Yi xii yi tiempo huidibi minip jadu'n nipaady nej tüg comeñyjäy huidibi ñicxa'ñ ma tüg it lugar huidibi jigüegy yajpatp. Jayijp ca'ni anajty chooñ, chi yajniibjcy je ytumbi ajcxy nidüg nidüg je' ytung. E nimay je' ytumbi huidibi cuend'ajtp je tijc'aguu co huen ni'ixi' y'idipy ma tijc'aguu. ³⁵ Ni'ixi' m'idipy miich ajcxy. Com ca' mnejhuüyigixy mina je codijc yhuimbida'ñ ma ytijc, pen namgodziy, o mij coodz, o moñi, o ma anajty ti yximiiyñi. ³⁶ Ca' jécyity co yjadipy timetiini, e xyajyöybéjtcixipy anajty mdzachmaagixy. ³⁷ Yi huidibi iich miich ajcxy ti nyajniimaaygixy, nañ jadu'n nimäyich tüg'óciy jäy co huen ajcxy nidüg'óciy ahuíjxcixip ni'ixi' je xii je tiempo mina nhuimbidiipich jadüg'oc ya naaxhuiñ.

14

Xicmujccixy capxmujccixy co Jesús madzaangixy

¹ Tigoy'ijtni anajty mejtz xii co judíojäy ajcxy nixiiduna'ñ je pascua xii, mina ajcxy tzajcaagy cay huidibi ca' levadura miiidity. Je judío teedy ajcxy huidibi jacmijtungmiiid etz je escribas ajcxy huinma'ñ'ixtaaygixy nej jëb ameech májtzcixipy Jesús, e yaj'ögaangixy, ca'ydi je mayjäy nejhuüy. ² Chi ajcxy ñayñimayi miñ xyipy:

—Ca' y'óyity co nmájtzim Jesús xiiijoty. Com ca' yjécyity co je mayjäy yjotmätcottähuipy, e ytigihuip huambi jihuüyb ajcxy.

Tüg töxyjäy pidacy aceite ma Jesús ycohuajc

³ E Jesús jim anajty yajpaady jim Betania. Hue' Jesús anajty yajpaady ma Simón ytijc, je Simón huidibi anajty ymüid nibüdz pa'm. Jesús ññaayb anajty ma caydac co ymiñ tüg töxyjäy müid tüg tzaadüdz quiig ujtz müid perfume huidibi ooy oy yxuugy. Jada perfume ooy anajty chóohuity. Chi je töxyjäy yaj'ahuäch je quiig, e yajcöyogy Jesús je perfume huidibi ooy oy yxuugy. ⁴ E nijëjity jäy ajcxy huidibi anajty jim, ca' anajty ajcxy yjotcújcity müid huidibi je töxyjäy ti tuñ, e ñayñimayi ajcxy miñ xyipy:

—¿Nej jada co ocyaj'ayooni yi perfume huidibi ooy oy yxuugy? ⁵ Jac'oy co ixypy yajtoogy yi perfume tugüig migo'px peexy, jigix yajpubedipy ayoohtijc.

E ca' jadu'n ajcxy tim jäygidacy nej je töxyjäy ytuuñ müid Jesús, chi ix'ooy ajcxy je töxyjäy ayooob.

⁶ Chi Jesús yminañ:

—Ixmajtzcix jada töxyjäy. ¿Nej co m'amayigixy? Yi huidibi ti tuñ müid ñich, ooy yi' y'óyity. ⁷ Je ayoohtijc ca' ytigoy'idipy ma miich ajcxy nimina. Huen huidibi xii huen huidibi tiempo jëb mbubedip ajcxy ayoohtijc. Per ñich ca' n'ida'ñich ya jecy müid miich ajcxy. ⁸ Jada töxyjäy ti tuñ müid ñich jadu'n nej ti ymadägy. Yi' ti pidägy ma ñich nninix perfume huidibi ooy oy yxuugy. Yi' jip'ijxpy mina naaxtigihua'ñich. ⁹ Janch ñich miich ajcxy nimayigixy co huen yma'amyity ya naaxhuiñ ma anajty yaj'ihuäcxy yajcapxhuäcxy jada ayuc jada tiy'ajt huidibi nidzoocin müid, yajnimiydägipy huidi jada töxyjäy ti tuñ, jigix capxpaady y'idipy.

Judas cïyecy yi Jesús ma ymidzip

¹⁰ Huin'it tiempo je Judas Iscariote, nidüg je nimajmetzpi huidibi Jesús anajty ti huin'ixy, oy müid ñaygapxyii je teedy mijtungmüidpi nej jëb cïyeycy Jesús ma yi teedy ajcxy. ¹¹ Co je teedy mijtungmüidpi ajcxy jadu'n midoy, co je Judas cïyega'ñ Jesús ma yi' ajcxy, chi ajcxy ooy yjotcugixy. Chi ajcxy Judas meeñ yajhuinhuanixy. Chi Judas yhuinma'ñixtay nej jëb occïyecy Jesús ma yi' ajcxy.

Co Jesús y'adzu'ajty pascua xijoty

¹² Chi paty je mij xii mina je xii'ajtpidijc tzajcaagy cay huidibi ca'p levadura müidity, e yaj'öccixy je cöbixy huidibi ajcxy yajhuindzigixy anajty Dios. Chi ydiscipulos ajcxy y'amidooy Jesús:

—¿Ma'amy mdzocy co ni'ixiyim je pascua xii adzu'ájtin?

¹³ Chi Jesús quejxy metz ydiscipulos ajcxy cajpjoty, chi nimay:

—Jim müid mnaybadixy tüg yëydijc huidibi nii tzimnicxp ma tüg majt. Miich ajcxy mbanicxiyb je yëydijc. ¹⁴ Mbanicxipy ajcxy je yëydijc, ixti coon mbajädipy ma ytijc. E miich ajcxy mnimähuipy je codijc: “Je Huindzin Jesús ñejhuñhuam ma miich müidity tüg cuarto ma je Huindzin Jesús müid ydiscipulos ajcxy jëb caaygixy yi pascua xii adzu'ájtin.”

¹⁵ Je codijc ci'm xyajni'ixiygixyip tüg cuarto mijpi ma je mimetz piso huidibi ti yajni'ixiy. Ma yijimbü cuarto miich ajcxy mni'ixihuipy yi pascua xii adzu'ájtin.

¹⁶ Chi je metz Jesús ydiscipulos ajcxy tüyöychooñ. Co ajcxy yja'ty cajpjoty, chi ajcxy paty je cuarto, tim jadu'n nej Jesús jayijp yminañ. E jim ajcxy ni'ixiy je pascua xii adzu'ibi.

¹⁷ Nam coodzixyñi anajty co Jesús yja'ty ma je cuarto müid jacjadyii ydiscipulos ajcxy.

¹⁸ Co anajty jim ycaaygixy ma je caydac, chi Jesús yminañ:

—Janch ñich miich ajcxy nimay co nidüg miich ajcxy huidibi cham caayb müid ñich, xycïyegaambich ma nmidzipich.

¹⁹ Co je Jesús ydiscipulos jadu'n midooy, chi ooy ytigixy tajpi maybi ajcxy, e ñay'amidóohuigixy miñ xyipy, e tüg yminañ:

—¿Nej ñich jada'ji?

E jadüg yminañ:

—¿Nej ñich jada'ji?

²⁰ Chi Jesús ymíñañ:

—Yi' yi' nidügti yi nimajmetzp huídibi tocxmujcp mïd ñich ma tügpi texy. ²¹ Pues janch ñich je', je jäy huídibi tzoön tzajpjoty, nbadaamybich tzaachypi ayo'n jadu'n nej yjaybétyity ma yi Dios ñecy. Per mij ayo'n pada'ñ je jäy huídibi xycíyegaamich ma ñich nmídzip. Jac'oy co ca' ycadímma'xung'ajty jada yéydijc.

²² Caayb ajcxy anajty, co Jesús conígy tüg tzajcaagy, e jayijp yajnax Dioscojuyip ma Dios, e chi tujc-huäcxy je tzajcaagy, moy je' ydiscípulos ajcxy. E co Jesús jadu'n tuñ, chi ymíñañ:

—Caaygix jada tzajcaagy. Jada tzajcaagy ñich jada nninícx.

²³ Chi Jesús conígy je ügy vaso, e co Dioscojuyip yajnaxxy, chi moyday ajcxy je ügy, e nidüg'ócíy ajcxy uucy je ügy. ²⁴ Chi Jesús ymíñañ:

—Jada ügy ñich nni'py'ajtpy huídibi temamb yogamb. Je' jada jemybi Dios ycötújcín huídibi Dios yejc mïd jäy ajcxy ycixpi. ²⁵ Janch tiy'ajt jadu'n nej ñich miich ajcxy nimaaygixy, co ca' jadüg'oc n'üga'ñich vino ñi, ixti cooni anajty njädyich tzajpjoty ma yi Dios y'ane'my.

Jesús capxpídzimy co Pedro ymíña'na'ñ co ca' y'ixy'adyii

²⁶ E co Jesús etz ydiscípulos ajcxy ñy tüg himno, chi ñicxy ajcxy ma je cop huídibi xíijp Olivos. ²⁷ Chi Jesús ymíñañ:

—Cham coodz xycöguëgaambich miich ajcxy, com jaybety jadu'n ma Dios ñecy ma jadu'n ymíñañ: “Nyaj'ögaamybich je cöbixy cuend'ajtpi, e huin'it je cöbixy queeg-huäcxtähuiip.” ²⁸ Per co ñich anajty njugypícyich jadüg'oc, co ñich anajty ti n'ögyich, nícxibich jim Galilea jacjayijp, ca'ydi miich ajcxy.

²⁹ Chi Pedro Jesús nimaayi:

—Oy ixypy yi jacjadyii miich mdiscípulos ajcxy xycöguectäy, per ñich ca' miich ngöguëga'ñ.

³⁰ Per Jesús nimay Pedro:

—Janch tiy'ajt jadu'n nej yam nimäy, jadachambi coodz ma ca'ni anajty tzeyyaxígy mejtz'oc miich xycoyüdzá'ñich tugígg'oc, mína'na'ñ co miich ca' xy'ixy'adyiijich.

³¹ E Pedro ca' anajty cöbiga'ñ nej Jesús ymíñañ, chi mictägy mínañ:

—Ca' ñich miich ngoyüdzá'ñ, oy ixypy ndim'o'cich quipxy mïd miich.

E nañ actim jadu'n jacjadyii Jesús ydiscípulos ajcxy ymíñañ nej Pedro ti ymíñañ.

Jesús mibijctzoy Dios jim Getsemaní

³² Jesús mïd ydiscípulos ajcxy oyja'ty ma tüg it huídibi xíijp Getsemaní, chi Jesús je ydiscípulos ajcxy nimay:

—Ñña' miich ajcxy ya, nami n'ocnicxyich jim'amy Dios mibijctzoob.

³³ Chi Jesús mïd nicxy jëda'ajty Pedro, Jacobo etz Juan ma tüg it ahuingujc. Chi Jesús ytígy tajpi maybi jihuñy jotmay. ³⁴ Chi Jesús ymíñañ:

—Njihuybich tüg jotmay nej n'öga'ñich. Huí'mgíx miich ajcxy ya etz juugy m'íjtcixipy, ca' mmáagixipy.

³⁵ Chi Jesús ñicxy jac'amijci'm, Dios mibijctzoy, e may'ajt pijctzoy co ixypy ca' minaxy yajnaxy je tzaachypi huídi anajty ypadamy je huin'it hora. ³⁶ E Jesús anajty Dios mibijctzoy ymíñañ:

—Dios, mïd miich ca' ni ti chípity. Píjcgíxich jadyaabi tzaachypi ayo'n, per ca' yjadú'nity nej ñich ndzójcín, huen tuñyii jadu'n nej miich mdzójcín.

³⁷ Co Jesús nihuimbijty Pedro, Juan, etz Jacobo, chi oy ajcxy paady ti anajty ymi'ó'ccixy. Chi Jesús Pedro nimay:

—Simón, ¿nej ti mmi'ögy? ¿Nej ca' mmadäga'ñ m'idipy juugy tüg hora? ³⁸ Jugy'íjtcix, e mibijctzoogix Dios ca'ydi jibictuuyb mdigüygixy. Janch t'iy'ajt co jotjoty ooy mnijot'ájtciyx mdunaangixy yi oybi. Per yi mninícx oy amaayity.

³⁹ Chi Jesús jadüg'oc huinhuäctuuity je' ydiscípulos ajcxy, e jadüg'oc ñicxy Dios mibijctzoob. May'ajt pijctzoy tim jadu'n nej je jayjip'atypí anajty ti ymína'ñ. ⁴⁰ Chi Jesús yhuimbijty ma anajty ajcxy ydiscípulos yajpaady, e jadüg'oc oy pátcixy ti anajty ymi'öccixy, com ca' ajcxy mímadağy máhuí, e ni ca' ajcxy jayty nej adzohuipy Jesús. ⁴¹ Midugüig'oc Jesús ñicxy ma je' ydiscípulos ajcxy, e ymína'ñ:

—¿Nej ya mjacmáagixp mjacpooxcixp? Maagix pooxcix jadachambi. Ti mñid jadu'ñyi. Ti je tiempo huaad'ájtñi mña íich, je jáy huídibi tsoon tzajpjoty, xyciyegipy ajcxy ma yi jibic jáydiyc. ⁴² Maybidígicix, tzoc jámim. Chi ymíñ je jáy huídibi xyciyegaambich ma nmídzípich.

Mach ajcxy Jesús yajñicxixy

⁴³ Capxp anajty Jesús, co Judas oyjaty ma Jesús yajpaady. Judas hue' je' nidügti je majmetzpi huídibi Jesús yhuin'ijx. Judas mñid mñíñ mayjáy huídibi ajcxy mñid pujx etz quipy. Je teedy mñitungmñidpi, je escribas ajcxy, etz je mñijáydiyc ajcxy ti anajty quexy je mayjáy huídibi anajty madzamb Jesús. ⁴⁴ Judas, je huídibi anajty cñyegamb Jesús, hue' anajty jayjip ti moy je mayjáy tüg iixpejt huídibi mñid jéb ajcxy iixcabip Jesús. Jadu'n jayjip Judas ycapxytuñ mñid yi' ajcxy, e ymína'ñ:

—Je jáy huídibi anajty ndzücxypich, yi' je' anajty Jesús. Madzipy ajcxy, e myajñicxip miich ajcxy yajxon cuend'aty.

⁴⁵ Míic'amy co Judas oyjady ma Jesús yajpaady, chi nimíjhua'cy, e nimay:

—Huindzin, Huindzin.

E co jadu'n ymína'ñ, chi Judas Jesús tzücxyc. ⁴⁶ Chi míic'amy je mayjáy Jesús mach, e yajñicxy ajcxy mach.

⁴⁷ Per nidügti Jesús ydiscípulos juudy ypujxy ma ytíjc, chi je teedy mñitungmñidpi tüg ytumbi yajtzaachüiyi, quejtzpujxi tüg ytátzac. ⁴⁸ Chi Jesús je mayjáy nimay:

—¿Ti co miich ajcxy xyñimíñich mñid pujx etz quipy, jadu'n nej jihuüy íich tüg meetzpi? ⁴⁹ Jabom jabom nyaj'ixpijcyich jáy jiiiby ma Dios ytíjc ma miich ajcxy myajpaady, e ni ca' miich ajcxy xymajchich. Paady jadu'n ytunyii yjadyii jigix yi' yajcuydumb nej ity jaybety ma Dios ñecy.

⁵⁰ Chi je' ydiscípulos ajcxy yajhuí'my Jesús naydügpajc. Chi je' ajcxy yqueegy.

Je jáy mutz'anägnip huídibi quectzög

⁵¹ Per tüg yujcyeeeg anäg huídibi anajty payöy Jesús nímóchity anajty mñid tüg sávana. Chi Jesús ymidzip ajcxy majch je yujcyeeepí. ⁵² Chi je yujcyeeepí cñqueegtuty je mayjáy, yajhuí'my ysávana, e yquecytzögý níhuädz íxhuädz.

Jesús mij juntijoty

⁵³ Chi ajcxy yajñicxy Jesús mach ma je teedy mñitungmñidpi yajpaady. Chi míic'amy ñaymujci tüg'óciy teedy ajcxy huídibi mñitungmñidpi, e tüg'óciy mñijáydiyc, etz tüg'óciy escribas ajcxy. ⁵⁴ Chi Pedro jigüegy anajty panícxyc je mayjáy ajcxy ixti oy yja'ty ma je teedy mñitungmñidpi ytíba'. E jím ixtacy quipxy mñid policía ajcxy agujc, yxaamgixy anajty ma jñnba'.

⁵⁵ Je teedy ajcxy mñitungmñidpi etz tüg'óciy je judíoğy ytungmñidpi ajcxy yhuinma'ñ'ixtaaygixy nej ajcxy jéb Jesús yajpocyc'a' mñid ajcxy yxíhuin, e jadu'n jéb mooygixy yi öcín. Per ca' ajcxy paady huinma'ñ. ⁵⁶ Mayjáy níhuambejty Jesús mñid aní, e ca' ajcxy y'ayuc ytügy. ⁵⁷ Nijéjity jáy ytínayígy juntajoty, e níhuambety ajcxy Jesús, ymínaangixy:

58 —Hich ajcxy amido'ijt Jesús y'ayuc tüg tecy, co jadu'n ymïnañ: “Njidaamybich jada Dios ytijc huïdibi jäy ti cójcxixy, e codugüg xii gojtigadzipich huingbi huïdibi ca' jäy cojy.”

59 Per ni ca' ytügüiy ajcxy y'ayuc nej ajcxy Jesús nihuambejty, ac tigachjaty nidüg nidüg ymïnañ ajcxy.

60 Chi je teedy huïdibi je jacmijtungmïd ytïnayïgy juntajoty, chi y'amïdooy Jesús e nimay:

—Jesús, ¿ca' nej m'adzohua'ñyi? ¿Ca' mmïdoy nej xychachxïgixy?

61 Per Jesús amon y'ijty. Ca' ti ayuc adzohuimbijty. Chi je teedy jadüg'oc migapxy Jesús nimay:

—¿Nej miich je' je Cristo, je Dios y'ung?

62 Chi Jesús ymïnañ:

—Janch jadu'n, ïch je' je Cristo, je jäy huïdibi tzoön tzajpjoty, e miich ajcxy xy'ixipich ñäyich ma je mijpi Dios ymïc a'oy'amy. Nañ jadu'n xy'ixipyich miich ajcxy jocjoty co anajty nhuimbityich jadüg'oc ya naaxhuiñ.

63 Chi je teedy huindzech huinhuocy yci'm yhuit, je' je' tïy'ájtïp co ca' anajty yjotcúcity mïd Jesús y'ayuc, chi ymïnañ:

—¿Ti testigo njac-huaanïm? 64 Miich ajcxy ci'm ti mmïdoogixy yi' y'ayuc, jadu'n nej ycapxtigoy mïd Dios. ¿Nej miich ajcxy mïnaangixy?

Chi nidüg'ócïy ajcxy ymïnañ co janch jadu'n Jesús mij oy ti ycapxtigoy mïd Dios ytïy'ajt, paady huaad mooygixy yi' o'cin.

65 Chi nijëjty jäy yhuindzujïgy Jesús. Chi ajcxy huingoxodzïy, cójcxixy, e chi ajcxy nimay:

—Octïygapx. ¿Pin ti xycójxy?

E je policiatïjc ajcxy cojxy Jesús ma yhuiñyjïp.

Pedro ycoyüch Jesús

66 Pedro tibäy anajty y'ahuixy. Chi ñimijhuäci tüg tumbi töxyjäybi huïdibi anajty tumb ma je teedy ytijc. 67 Co je töxyjäy ijxpaty Pedro ñäy anajty jïnba'áy, yxaamb anajty. Chi huïdïcxpejty Pedro, e nimay:

—Miich nañ mïdhuïdijtpy anajty je Jesús yi' Nazaretpi.

68 Per Pedro ca' cöbijcy je töxyjäy y'ayuc, e ymïnañ:

—Ca' n'ixy'adyïijich jada Jesús. Ni ca' nhuinjïhuïyich ti miich nimïydacpy.

E mic'amy Pedro ypïdzïmy jïiby, e tim huin'itïy tüg tzeyñi'aa oy yaaxïgy. 69 Chi jadüg'oc je tumbi töxyjäybi huïdïcxpejty Pedro, e nimay je jäy ajcxy huïdibi jim yajpatp huingon, e ymïnañ:

—Jada je' nidügti huïdi anajty mïd huïdity Jesús.

70 Chi Pedro jadüg'oc ymïnañ co ca' ix'adyii. Co hueeñi, je jäy ajcxy jadüg'oc Pedro nimay:

—Janch co miich je' nidügti ma Jesús yjäy miñ, Galileo jäy miich, com nmïdooybich miich m'ayuc nej Galileo jäy ycapxcixy.

71 Co ajcxy jadu'n ymïnañ, chi Pedro mïctägy ñaygogapxi co ca' yi' mïdhuïdity Jesús, ymïnañ:

—Dios y'ijxpy ñejhuïyb co tïy'ajt ngapxyich, co ca' n'ixy'adyïijich yi' Jesús huïdibi miich ajcxy mnigapxyp.

72 Co Pedro ycapxymaayi tim huin'itïy tüg tzeyñi'aa yaaxïgy mïmejtz'ocpi. Huin'it Pedro jäymetzcoody nej Jesús ñimäyïi: “Cham coodz jayïjp ca'ni anajty tzeyñi'aa yaaxïgy metz'oc, ti anajty miich mïna'ñ tugüg'oc co ca' xy'ix'adyïijich.” Co Pedro jadu'n jäymejtzcoody Jesús y'ayuc, chi tajy may ñayjïhuïyi, e ytigüiy yaaxpi.

¹ Co yximiiy, chi je teedy ajcxy huudibi mij tung miiid, je mijjädijc, je escribas ajcxy, etz tüg'óciy judíojäy huudibi mij tung miiid yöymujctay ajcxy. Chi nidüg'óciy ajcxy yajnicxcixy Jesús cixoch ma Pilato, je gobernador. ² Pilato Jesús y'amidooy, nimay:

—¿Nej miich rey'ajtp ma yi judíojäy ajcxyi?

Chi Jesús yminañ:

—Miich jadu'n minamb.

³ Je judío teedy ajcxy huudibi mijtungmiiidpi mictägy tzachxigixy Jesús miiid canaagnax xihuin. ⁴ Chi Pilato jadüg'oc Jesús y'amidooy, nimay:

—¿Ca' nej m'adzohua'ñi? Ix nej yi mmidzip ajcxy xychachxigixy.

⁵ Chi Jesús ca' ni nej y'adzooy. E Pilato ooy chachhuinmay'ahuudijty.

Jesús yajmoy sentenciam co y'ögipy

⁶ Com xiioty anajty, je gobernador Pilato najtzmaziiy tüg machyjäy, je huudibi je mayjäy anajty ypijctzoogixyp. ⁷ Pujxtijc iñaayb anajty jim Jerusalén tüg machyjäy huudibi anajty yxi Barrabás. Barrabás pujxtijc iñaayb anajty quipxy miiid jacjadyii jäy huudibi anajty ti midziptzoon je gobierno romano, e ti anajty yjääy'ó'ccixy. ⁸⁻⁹ Co anajty je may yxi'ajtpidijc may'ajt pijctzoogixy ma Pilato co najtzmaziihuip tüg machyjäy, chi Pilato yminañ:

—¿Nej mdzojccixyp co nnajtzmaziihuibich je judíojäy ajcxy yrey?

¹⁰ Pilato ñejhuuyb anajty co mañ'ajtingixy anajty ajcxy je teedy mijtungmiiidpi ti ciiyejccixy Jesús. ¹¹ Per co Pilato jadu'n yminañ, chi je teedy ajcxy mijtungmiiidpi ooy ajcxy yajhuamgoty yajjihuiygoty je mayjäy co huen je Pilato najtzmaziiy je Barrabás.

¹² Chi Pilato y'amidooy je mayjäy jadüg'oc:

—¿Nej miich ajcxy mdzocy ndunipyich miiid jada yëydijc huudibi jäy ajcxy ytiypy co yrey'aty ma yi judíojäy ajcxy?

¹³ Chi je mayjäy mic yminangottay:

—Yajcruutzpet.

¹⁴ Chi Pilato yminañ:

—Per ¿ti yi' ti tundigoy?

Huin'it je mayjäy ñigi mic yminañ:

—¡Yajcruutzpet!

¹⁵ Co jadu'n je mayjäy ajcxy mictägy yminanday, chi Pilato anajty yajjotcuyc'adaangixy je mayjäy, chi najtzmaziiy je Barrabás. E co yajci'ajttay yi Jesús, chi ciiyejcní co huen yajcruutzpedyíi.

¹⁶ Chi je soldados ajcxy yajnicxy Jesús ma je agujctijc tiba', e jim ñaymujci tüg'óciy soldados ajcxy huudibi yajpatp anajty jim Jerusalén. ¹⁷ Chi ajcxy yajñijeniiy je Jesús tüg rey yhuít, color ucypí e yajcojeniiy ajcxy apy corona. ¹⁸ Chi je soldados ajcxy yminañ:

—¡Viva jada judío rey!

¹⁹ Chi je soldados ajcxy huoypy Jesús ma ycohuajc miiid paxy, e huindzuj jiiptzujcixy ooy, e huingojxtinay'ahuuygixy janch ypaad nej jihuiy ooy huindzigiiygixy. ²⁰ Co je soldados ajcxy nixiictay yajxiictay Jesús, chi ajcxy jeeni je yreyhuít color ucypí, e yajñijeniiy ajcxy yci'm yhuít jadüg'oc. Chi ajcxy Jesús miiidcajppidzimy co anajty yajcruutzpedaangixy.

Co Jesús yajcruutzpejti

²¹ Tü'am ajcxy tüg jäy miiidnaybati, hue' anajty yxi, Simón, ycojájpity jim Cirene, Alejandro etz Rufo je' anajty yteedy. Hue' anajty choñ camjoty. Chi ajcxy adzip nimay Simón co huen jacajpi Jesús ycruudz.

²² Chi ajcxy yajnicxy Jesús ma tüg it lugar huudibi yxi Gólgota, je ayuc Gólgota jadu'n yhuimbizimy o'cpi cohuajc. ²³ Chi ajcxy moy Jesús vino huen ügy tem huudity miiid

mirra tzoy. Per ca' Jesús cöbijcy je vino n̄i. ²⁴ Chi ajcxy yajcruutzpejty Jesús. E huin'it je soldados ajcxy suerte ijxy, co anajty ajcxy Jesús yhuít yajhuäcxaani, oc'ixaangixy p̄in anajty ocjē'ájt̄p.

²⁵ Petyx̄i anajty co ajcxy yajcruutzpejty Jesús. ²⁶ Je ayuc huídibi ajcxy yjaay ma Jesús cruudz, jadu'n ym̄inañ:

—Je judíoꝝy ajcxy yRey. ²⁷ Quipxy m̄id Jesús ajcxy yajcruutzpejty metz meetzpi. Tüg meetzpi ajcxy yajcruutzpejty a'oy'amy ma Jesús ym̄ic, e jadüg anajty'amy. ²⁸ Yajcuyduñ nej anajty jaybety miñ ma Dios ñecy, ma jadu'n ym̄inañ: “Yaj'amichoomujc je Cristo m̄id je pocyjäy ajcxy.”

²⁹⁻³⁰ Je mayjäy huídibi ajcxy nax̄iyb anajty ma Jesús yajpaady cruutzc̄ixy, ooy anajty ajcxy ycöjiḡiyñ, nix̄iicy yajxiicy ajcxy Jesús, ym̄inañ ajcxy:

—Bah, miich huídibi Dios yt̄ic mjidaan̄p, e coduḡig x̄i huingbi myajp̄id̄iga'ñ, miich c̄i'm cham naygohuaani, e minac cruutzc̄ixy.

³¹⁻³² Nañ jadu'n je teedy ajcxy m̄jtungm̄idp̄i etz je escribas ajcxy nix̄iicy yajxiicy ajcxy Jesús ñayñimaȳi miñ xȳipy:

—Jada Jesús ti cohua'ñ jacjadyii jäy, e ca' jaty nej c̄i'm ñaygohua'n̄iyb. Pen janch, co jada Jesús yjējity je Cristo huídibi rey'adamb ma ȳi judíoꝝy ajcxy, ym̄id ix̄yipy m̄ic'ajt jaydēb c̄i'm ym̄inagipy cruutzc̄ixy. Co jadu'n ix̄yipy n'lj̄xim co c̄i'm ti ym̄inacy cruutzc̄ixy, huin'it m̄ib̄jcm̄ co janch jada jējity je Cristo huídibi rey'ajtp ma ȳi Israel jäy.

Nañ jadu'n je metz meetzpi ajcxy huídibi cruutzpejt quipxy m̄id Jesús nix̄iicy yajxiicy ajcxy je Jesús.

Co Jesús y'ögy

³³ Co ycuꝝx̄ij̄iy, chi ycoodz̄iyḡiday tüg'óc̄iy naaxhuiñ. E jadu'n je naaxhuiñ y'ijty coodz̄ix̄i minacyx̄i. ³⁴ Minacyx̄i Jesús m̄ic ym̄inañ m̄id aramaico ayuc:

—Eloi, Eloi, ¿lama sabactani? —ȳi jadu'mbi ayuc hue' yhuimb̄idz̄imy: Tat Dios. Tat Dios. ¿Na'amy co ti xy'ix'ix̄yich?

³⁵ Nijējity jäy huídibi anajty j̄im yajpatp huingon ma Jesús, co m̄idoo jadu'n ajcxy Jesús y'ayuc, chi ajcxy ym̄inañ:

—Midooḡix, Elías ȳi yaaxtaayb.

³⁶ Chi nidügt̄i ajcxy ninicxy Jesús poȳgy, ti anajty yajxoogy pixy m̄id vinon̄i ta'mbi, e yajj̄ixpodz̄iy je pixy ma tüg paxy, e jadu'n yajja'ty je vino n̄i ta'mbi ma Jesús y'ahuac, huen muuc̄ip je vino n̄i ta'mbi. Co jadu'n tuñ, chi ym̄inañ:

—Tzoc oc'ahuíxim pen mimb Elías, e miñ yajm̄inagyii ma ȳi cruudz.

³⁷ Chi Jesús m̄ic ycapxqueegy, chi y'o'cy. ³⁸ Co Jesús y'o'cy, chi je mapxhuit yc̄itzhua'cxy tinä'amy huídibi anajty m̄id y'adyd̄utȳity je Dios ycuarto ma je teedy m̄jtungm̄idp̄i yt̄iḡiy tüg tecypajc̄ j̄imijt̄ j̄imijt̄. ³⁹ Je soldado huindzin huídibi anajty tinaayb ma Jesús yhuinduu, co jadu'n m̄idoy nej Jesús m̄ic yaaxqueegy, e ijxy nej y'ögy, chi ym̄inañ:

—Janch co jadayaabi yēyd̄ijc anajty Dios ung'adyii.

⁴⁰ Nañ j̄im anajty nijējity töxyjäyd̄ijc ym̄ij'lj̄xcixy j̄iguēgy. J̄im anajty yajpaady María Magdalena, etz je jadüḡpi María, Jacobo je mutz'anägn̄ip ytaj, etz José ytaj. Nañ j̄im anajty yajpaady Salomé. ⁴¹ Jadayaabi töxyjäy ajcxy m̄idhuídij̄t Jesús, e ti anajty pubējt̄cixy taabi anajty Jesús yajpaady j̄im Galilea ñaaxjot. Nañ jadu'n anajty j̄im yajpaady jacnaagity töxyjäyd̄ijc ajcxy huídibi anajty ti ycoody j̄im Jerusalén quipxy m̄id Jesús.

Jesús yajnaaxtiḡiyii

⁴²⁻⁴³ Paady co chu'iyñi hue' anajty viernes mina judíoꝝy ñayyajpocyñ̄ihuáatzigixy, jaydēb anajty amay'adaangixy je sábado x̄i je com jabom. Chi José huídibi anajty cogajp Arimatea yjotmictuñ, chi yt̄iḡiy ma je gobernador Pilato, p̄ijctzooy may'ajt co yajnaaxtiḡihuaani Jesús ñin̄icx. E hue' je' José anajty tungm̄id ma ȳi judíoꝝy ajcxy.

José yjijp'ijxpy anajty mina Dios pidäga'ñ yí y'ané'min ya naaxhuiñ. ⁴⁴ Pilato ooy tzachhuinmay co Jesús tim mic'amy ti y'ögy anajty, paady huoodzoy je soldado huindzin, e tiy'ajt pijctzoy pen janch co Jesús ti anajty y'ögy. ⁴⁵ Co je soldado huindzin tiy'ajt yejcy co Jesús ti anajty y'ögy, chi nimay José co huen yajnaxtigihuijpy Jesús. ⁴⁶ Chi José juy poob huit, e co yajminajcy Jesús ñinicx, chi mo'ñ mïd je poob huit, e chi pidacy ma tüg tzaajut huidibi anajty ti yajtzejtztüdy ti yajpadüdy ma tüg tzaahuingueetz. E chi yaj'adujcy je öcpi jut mïd tüg mij tzaa. ⁴⁷ E je metzpi töxyjäy María Magdalena etz je jadügpí María huidibi José ytaj'ajtpy huindicxp anajty ajcxy co Jesús ñaaxtigihy.

16

Jesús yjugypicy jadüg'oc

¹ Com jabom jopy, domingo, chi je tugüg töxyjäy ajcxy María Magdalena, María Jacobo ytaj etz Salomé juy ajcxy tzoy huidibi ooy oy xuugy, pidägaangixy anajty ma Jesús ñinicx. ² Je tugügpi töxyjäy chooñ domingo, seaman ixtigi', tim jopyñi. Ti anajty ypidzimni je xii co ajcxy ooyädy ma je öcpi jut. ³ Chi je tugügpi töxyjäy ajcxy nayñimaayi miñ xyipy:

—¿Pin xy'ocpubéjtim jigihuijpy je mij tzaa huidibi mïd agihyity je öcpi jut?

⁴ Per co ajcxy ijxy je öcpi jut, chi ajcxy ijxy ahuingujc je mij tzaa anajty ytiguejcnäy huidibi je öcpi jut anajty agihydujcp. ⁵ Chi ajcxy ytigihy jutjoty. E chi ajcxy ijxy tüg yeeg'anäg iñäy anajty a'oy'amy ma je' ajcxy. E je yeeg'anäg poob huit anajty ymïd. Co ajcxy jadu'n ijxy je yeeg'anäg jüby jutjoty, chi je töxyjäy ajcxy ooy chigihy. ⁶ Chi je yeeg'anäg nimay je töxyjäy ajcxy:

—Ca' ooy mdzigihyixy. Miich ajcxy je' m'ijxtaaygixp je Jesús huidibi cogajp Nazaret, je huidibi jäy ajcxy yajcruutzpejt. Ti je' yjugypicy. Ca' je' ya. Oc'ijxcix ya ma ajcxy pidaacci. ⁷ Níxcix, nimaaygix Pedro etz yí jacjadyi Jesús ydiscípulos ajcxy co Jesús níxcip jayijp jim Galilea, e jim Galilea ñaybadihyb ajcxy mïd Jesús, jadu'n nej ajcxy ñimaayi jayijp'aty.

⁸ Chi je töxyjäy ajcxy jim yqueegy ma je öcpi jut, com ti anajty ooy chigihyixy. Ooy anajty ajcxy chiyuy mïd tzig'iñ. E ni ca' ajcxy nimay ni pin nej anajty ti íjxcixy, com ooy anajty chigihyixy.

Jesús ñayguëxici ma María Magdalena

⁹ Je domingo, semana ixtigi', co Jesús yjugypicy, chi ñayguëxici jayijp ma María Magdalena, je' je' je töxyjäy huidibi anajty Jesús ti yajpidzimi huixtujc ca'oybi ma yjot yhuinma'ñ. ¹⁰ Chi María Magdalena ñicxy ma Jesús ydiscípulos ajcxy huidibi mïd yhuidijty, e nimaaygixy nej anajty yí ti ixy Jesús co ti yjugypicy jadüg'oc. E Jesús ydiscípulos ajcxy ooy anajty ytájycixy ymáygixy etz yaaxcixy. ¹¹ E co ajcxy midoohui je María y'ayuc, co anajty ti ixy Jesús juugy, chi ca' ajcxy mijpidaaci y'ayuc.

Jesús nayguëxici ma metz ydiscípulos

¹² Co hueeñi, Jesús ñayguëxici nañ jadu'n ma metz je' ydiscípulos huidibi ñicxp anajty ajcxy camjoty. ¹³ Chi je metzpi discípulos ñicxy ajcxy mic'amy oy nimaaygixy je jacjadyi discípulos ajcxy co ti íjxcixy Jesús. E je jacjadyi discípulos ca' ajcxy mijpidaaci je metzpi discípulos y'ayuc.

Huidi Jesús ydiscípulos yajnibijc

¹⁴ Jac com jecy, Jesús ñayguëxici ma je majctügpi discípulos ajcxy ma anajty y'ñaaaygixy ma caydac. Chi Jesús ooy ajcxy co ca' ajcxy mibijccixy co ooy ajcxy yjot yjuuñity, ca' ajcxy mijpidägy jacjadyi pin anajty ti y'íjxcixy Jesús. ¹⁵ Jesús je' ydiscípulos ajcxy nimay:

—Níxcix miich ajcxy ma tüg'óciy naaxhuiñyjäy, ma tüg'óciy naax cajn, e capxhuäccix ajcxy je oybi ayuc nej jäy ajcxy jëb y'almanidzögipy. ¹⁶ Pinjaty mibijc etz ñibejtcixy, ypaadip ajcxy y'almanidzoocin. Per, pinjaty ca' mijpidägy tiy'ajt hue' ajcxy y'alma tigoyip mïd ypocy ycixpi. ¹⁷ Yi jäy ajcxy huidibi mibijcp, ooy ajcxy ijxpejt túngixipy. Mïd ich

nxii ñich nmic'ajt yajpidzimipy ajcxy ca'oybi ma jäy ajcxy yjot yhuinma'ñ. Nañ jadu'n ycapxgixipy huingbi ayuc. ¹⁸ Ymadzipy ajcxy tza'ñ, e ca' nej yjajtcixipy. E co ajcxy veneno ügip, ca' ajcxy ypa'mdunib. E co ajcxy cinixáipy pa'mjäy, tzögip je pa'mjäy.

Jesús ypätigiyñi tzajpjoty

¹⁹ E co je Huindzin Jesús ycapxy ycijxy miid je' ydiscípulos ajcxy, chi ypätigiyñi tzajpjoty. Jiiby tzajpjoty Jesús yajpaady ma Dios ymijc a'oy'amy, miid mij'ane'min.

²⁰ Chi Jesús ydiscípulos ajcxy choon ñicxcixy cajp cajp capxhuäcxy ajcxy Jesús y'ayuc ma nidüg'óciy naax cajp. E je Huindzin Jesús ooy ajcxy ypubejti ypuđigiyi, mic'ajt moy je' ajcxy miid je iixpejt je mijhuinma'ñ huidibi ajcxy tumyb. Jadu'ñyi jadu'n. Amén.

SAN LUCAS

Jaayhui'my Jadu'n Nej Jesucristo Ytun Yjajti

¹ Mayjäy ti cojaay je ayuc je tiy'ajt huidi ñich ajt nejhuñiyim co janch ytiy'ájtity, tüg'óciy jadu'n nej Jesús chondacy yjugy'ájtin ya naaxhuiñ ixti mabaad ycocixiyy. ² Tüg'óciy je tiy'ajt jadu'n nej ajt xyñimaayim huidi ci'm iix midou nej chondacy ixti mabaad ycocixiyy, je' ajcxy huidibi capxhuäcxy Jesús y'ayuc ytiy'ajt. ³ ñich nañ jadu'n ti nyajciyöyich ti nyajtecyöyich yajxon je tiy'ajt nej Jesús chondacy je' chinaayin ya naaxhuiñ ixti mabaad ycocixiyy. Paady yciixpi ñich nhuinmañ pidägy co ñich miich nyajnijayihuañ tüg'óciy je tiy'ajt, miich oyjäybi, Teófilo. ⁴ Jigix miich nañ jadu'n mnejhuñhuipy yajxon je tiy'ajt, jadu'n nej miich ti m'ixpiy.

Tüg'ángel nigapxy co Juan el Bautista ypi'c'adañ

⁵ Jadu'n ytuni yjajti co anajty Herodes yrey'aty ma Judea naax cajp, jim anajty tüg judío teedy hue' anajty yxii Zacarías. Je' anajty semandumb mñid Abías y'ajugytijc y'amigügtijc. Je Zacarías ypijcy mñid Aarón y'ocnñx, hue' je' anajty yxii Elisabet. ⁶ Dios y'ixxyp ñejhuñiyb co je' anajty ajcxy ytudägyjäyity nimetz. Je' ajcxy ycuydumyib tüg'óciy yi Huindzin Dios ycapxy y'ané'min. ⁷ Je' ca'p anajty ajcxy y'ung ni tüg, e jadu'n ajcxy ymijäyññ nimetz.

⁸ Chi tügtecy Zacarías mñid y'ajugy y'amigüg yteedy'ájtciy anajty ma Dios ytijc. ⁹ Jadu'n nej teedy ajcxy ycostumbre mñidity, chi ñigooti tung je Zacarías mina ypoomjogipy jiiiby ma yi Huindzin Dios ytijc. ¹⁰ Tüg'óciy je mayjäy ooy anajty Dios mibijctzoogixy tiba'y. Yam Zacarías tzajtigoty ypoomjocy, ¹¹ co ñayquëxiçi Huindzin Dios y'ángel tüg ytinäy a'oy'amy ma je poomjocac. ¹² Co Zacarías ijxy je ángel, chi ooy chigiiy. ¹³ Chi je ángel nimaay Zacarías:

—Ca' mdziigiy, ti Dios midooy yi mjuydácin mnucxtácin. Yi mdöxyijc Elisabet ypaadipy tüg ung yëydijcpi, e mxñimöhuipy Juan. ¹⁴ Mjotcuyc'adip mxondägip miich etz mdöxyijc, nañ may yi jäy yjotcugihuiipy co anajty m'ung ti ypi'c'aty. ¹⁵ Chi yi m'ung ycomay'idañ ma Dios. Ni ca' ügipy vino ni jocni. Ma ca'ni anajty yma'xung'aty ymñid'adipy yi Dios yjihui'ñ ymic'ajt. ¹⁶ Yi' yajjothuimbidip may Israel jäy ma yi' ajcxy yHuindzin Dios. ¹⁷ Je' nicxy ycocapxy'aty ma yi jäy ajcxy huinmic jotmic mñid Dios yjihui'ñ ymic'ajt, tim jadu'n nej Elías jecy'ajty ycocapxy'ajty huinmic jotmic mñid Dios yjihui'ñ ymic'ajt. Je' m'ung yajjothuimbidipy je ungedeedy ajcxy huidibi ca' y'ung ixaangixy, nañ yajjothuimbidipy je jäy ajcxy huidibi ca' capxycöbicy yi Dios, jigix ajcxy paadipy oyjot oyhuinmañ. Nañ m'ung ñimähuipy je jäy ajcxy huen nayñi'ixiiyigixy mñid yHuindzin Dios yciixpi.

¹⁸ Chi Zacarías nimaay je ángel:

—¿Nej jada ñich nejhuñhuipy peni janch huidibi xyajnimaaaybich? Ti nmijjäyññich, cham ndöxyijcñich nañ ti ymijjäyññi.

¹⁹ Chi je ángel y'adzooy:

—Ñich Gabriel, ma Dios yhuinduu ni'ixi' n'ityich. Dios ti xyquexyich cogapxy'ajtpi ma miich co nyajnimähuipy jada oybi ayuc. ²⁰ Jadachambi miich mhui'mipy uum, ni ca' m'ocjajtnip nej mgápxiy, mñid co ca' mmibicy jada ñich n'ayuc huidibi yajcuydunip co anajty tiempo patni.

²¹ Yam je mayjäy ooy ja'ahuíxcixy Zacarías, ooy anajty ajcxy tzachhuinmaaygixy ti co chachhuäcxiy jiiiby ma Dios ytijc. ²² Co Zacarías ypidziimy, chi ca' anajty y'occapxni. Chi je jäy ajcxy huinjihuñy co ti anajty ixy tijaty jiiiby ma Dios ytijc. Hue' je' yjacmiydacy a'ixiy'amy, e oyhuimñy uum.

²³ Co je semandung yajmay, chi Zacarías ñicxni ma ytijc. ²⁴⁻²⁵ Co jadu'n yjajty, chi Elisabet jihuiy co ti anajty y'ung tzimägy ciyí gy. Chi yüch'ijty migoox po', e ymñinañ:

“Jadu'n yí Huindzin Dios tí ytuñ mïid ñich jadachambi tiempo, tí xyjäy mecich tí yajquëgy ñich ndzöydu'n ma yí mayjäy ajcxy.”

Tüg ángel nigapxy co Jesús ypi'c'adañ

²⁶ Co tudujc po' maabi Elisabet anajty y'ungtzimëgy, chi Dios quejxy je' y'ángel Gabriel jim Galilea naaxjot ma je cajp huïdi anajty yxii Nazaret. ²⁷ Chi Dios quejxy Gabriel ma anajty tüg töxy'anäg y'ity huïdibi anajty ca'ni midzinäy yëydijc. Je töxy'anäg tí anajty co'adzoy co pigañ mïid tüg yëydijc huïdi yxii José. José hue' anajty David y'ap y'oc. Je töxy'anäg hue' anajty yxii jity María. ²⁸ Co je ángel ytigëy ma anajty María, chi nïmay:

—María, Dios tí xy'ijxtiy, je Huindzin Dios y'oy'ajt mïid miich. Miich je' cömay y'idip ma tüg'óciy töxyjäydijc.

²⁹ Chi María co y'ijxy je ángel, chi chigëy mïid je' y'ayuc, chi huinmay ooy mïid jada copxpócxin nej co yjadú'ñity. ³⁰ Chi je ángel ymïnañ:

—María, ca' mdzigëy, miich Dios tí xy'ijxtiy. ³¹ Jadachambi, m'ungdzimëgip, myajpi'c'adipy tüg mang, huïdibi mximöhuiipy JESUS. ³² Je Jesús mij y'idipy, hue' je' yajtjipy Dios tzajpjotypi y'ung. Chi je Huindzin Dios möhuïyb je ané'min huïdi yí ymij'ap ymijteedy David ymïd anajty. ³³ Je Jesús ané'mip huinixii ma yí Jacob y'ap y'oc. Je' y'ané'min camina ycixipy.

³⁴ Chi María je ángel nïmaay:

—¿Nej jada co yjadú'ñity? ñich ca'ni nyëydijc mïid tzinäy.

³⁵ Chi je ángel y'adzooy:

—Je Dios yjihui'ñ ymic'ajt minip ma miich, je Dios tzajpjotypi ymic'ájtin xya-jnidujttähui, je oyjäyb jäy huïdi pi'c'adam, hue' yajtjipy Dios y'ung. ³⁶ E cham Elisabet miich m'amigüg nañ jadu'n yajpi'c'adamy tüg mang ma tí ymijjäyñi. Cham midudujc po'bi maabi y'ung tzimëgy je huïdibi jäy ytijpy ca' y'ung'ixaani, ³⁷ com mïidi Dios ca'ni tí chípity.

³⁸ Chi María ymïnañ:

—Jotcuyc nguydunipyich yí Huindzin Dios chójcïn, huen jadu'n tuñyii jadyii ma ñich jadu'n nej miich m'ayuc xymöyich.

Chi je ángel ñicxni.

María y'oy cogapxy Elisabet

³⁹ Huin'it xii María choñ, ñicxy jottigoy ma yugjot, ma tüg cajp jim Judea naaxjot. ⁴⁰ Chi ytigëy ma Zacarías ytijc, e capxpocxy Elisabet. ⁴¹ Chi jadu'n yajty co Elisabet midoohui María ycapxpócxin, chi jihuiy co y'ung yücxy ma yjot. E chi je Elisabet ooy yjotcugiy mïid je Dios yjihui'ñ ymic'ajt. ⁴² Chi ymïnañ janch mic:

—Cömay miich ma tüg'óciy töxyjäydijc, e cömay y'ida'ñ m'ung huïdibi pi'c'adamb. ⁴³ ¿Nej ñich jada co jadu'n tí n'ahuägëy co nHuindzinich ytaj miñ xycó'ixiyich? ⁴⁴ Co tí nmidooyich yí mgapxpócxin, tí ñich n'ung yücxy ma ñich njot co chachjotcújcity. ⁴⁵ Jotcuyc'adip pinjaty tí ymibicy, co cuyduñ y'ida'ñ je ayuc mïid je Huindzin Dios ycixpi. ⁴⁶ Chi María ymïnañ: Ooy mij n'ojadatyich yí Huindzin Dios.

⁴⁷ Ooy nxondägyich mïid Dios ycixpi, ñich nnihuambi nyajtzoocpi,

⁴⁸ co yí' tí xyñi'ijxidägyich, co ñich ayoobi xytumbi'adyijich. Jadachambi etz jacnicxp xii tiempo, tüg'óciy jäy ajcxy oy mïna'nip co jotcuyc'ájtich.

⁴⁹ Yí Dios tügpaic mijip, tibi tun mïid ñich, ooy yí' yxii ymijity.

⁵⁰ Dios ypa'ayooyb hueñypinity huïdibi huindzigëyip jadachambi etz jacnicxni xii tiempo.

⁵¹ Dios tí ooy tuñ mijpi huinma'ñ, tí jibicy pinjaty amij agix nayjihuiyip ma yjot yhuinma'ñ.

⁵² Dios tí yajpidzimy yí mijpi rey ma y'ane'my, tí mij'ajt möy ayoobidijc.

53 Pinjaty ayuu'ijtp anajty ymooy ti m̄id yjotcujc'adip, etz yī comeeñyjäydijc ajcxy ti ixmach ca' ni ti.

54 Dios ti pubety yī Israel jäy, yī' ajcxy ytumbi, m̄id co anajty ti pa'ayogoty je' ajcxy,

55 jadu'n nej jecy'ajty Dios yajnimay je' n'ap ndeedy, je Abraham etz je'y'ap y'oc, co tunamb m̄id je' ajcxy huinix̄i.

56 Chi María tuḡig po' jim y'ijty m̄id Elisabet, chi yhuimbijtni ma ytijc.

Juan el Bautista co ypi'c'ajty

57 Co je Elisabet oy yajhuaad'ajtni x̄i tiempo, chi yajpi'c'ajty t̄üg ymang. 58 Chi ayuc m̄idooy ajcxy je ym̄ij̄in ym̄idijc etz y'ajugy y'amiḡüg jadu'n nej Dios may'ajt ti tuñ m̄id Elisabet. Chi ajcxy ooy yjotcugiy m̄id je' ycixpi. 59 Chi jadu'n yjajty coductujc x̄i je ym̄ij̄in ym̄idijc etz y'ajugy y'amiḡüg miñ ma Zacarías ytijc co anajty t̄iy'ajtt̄ihuaangixy je pi'c'anäg. Chi ajcxy yajx̄i'ada'ñyii anajty jadu'n nej yteedy yx̄i Zacarías. 60 Chi ytaj ym̄inañ:

—Ca' x̄i'adiȳyb Zacarías, hue' yī' huen x̄i'adyii Juan.

61 Chi je' ym̄iḡügtijc ajcxy ym̄inañ:

—¿Na'amy? Ni t̄üg miich m'amiḡüg jadu'n ca' x̄ijity.

62 Chi ajcxy y'am̄idoohui je' yteedy jadu'n a'ix̄iy'amy, nej yī' yajx̄i'ada'ñyii. 63 Chi Zacarías pijtzooy t̄üg necy, e jaay jadu'n: “Juan huen x̄i'adyii.” Chi je ym̄iḡügtijc ajcxy nidüg'óc̄iy ooy j̄ihūiy huinmaay. 64 Chi mic'amy Zacarías y'ahuac ahua'cxy e ytoodz yunḡiy, chi oy ycapx̄igy e jäymejch cōmay yī Dios. 65 Chi t̄üg'óc̄iy ym̄ij̄in ym̄idijc ooy chiḡiy. Chi ajcxy nim̄iydactay nej Zacarías ti yjaty ma t̄üg'óc̄iy jäy hūidibi tzinaayb Judea yuugjotypi tzinaaydac. 66 T̄üg'óc̄iy pinjaty anajty m̄idoob je ayuc, chi jäymejtzhui'm ajcxy ma yjot yhuinma'ñ, chi ñayñim̄aayigixy:

—¿Ti jada' ytunamyb jada pi'c'anäg?

Com je Huindzin Dios je' m̄id y'ity.

Je Zacarías y'iy

67 Chi je ungedeedy Zacarías m̄id je Dios yj̄ihui'ñ ymic'ajt Dios y'ayuc najtzcax̄iyi ym̄inañ:

68 Cōmay yī Israel jäy yHuindzin Dios, co ti ni'ijxcidägy, ti cohua'ñ yī' ñaax ycajp,

69 Dios ti quexy t̄üg mij nihuaambi yajtzoocpi, ma yī' ytumbi, David y'ap y'oc ajcxy.

70 Com Dios jadu'n ym̄inañ jecy'ajty m̄id yī' y'ayuc najtzcax̄iyb hūidibi huätzjäyip;

71 je' xyñihuānaanim ma ñch ajt nm̄idzip, nañ xypubedaanim xypudiḡihuaanim ca'ydi xyciḡähūiyim hūidibi ca' xy'ixaanim xychogaanim.

72 Jaydēbi pa'ayoohuipy ñch ajt nm̄ij'ap nm̄ijteedy, etz jäymedziyb jadu'n nej ayuc ahuan̄iy m̄id je' ajcxy.

73 Jadu'n nej Dios janch huinijot y'ayuc ahuan̄iy m̄id ñch ajt nm̄ij'ap nm̄ijteedy Abraham jecy'ajty hūidi anajty xymōhuaanim.

74 Co nihuätzictuutim ma nm̄idzip, huin'it jaydēbi miyaaxim n'ojadajtim ca' ma tzigi'ñ j̄ihu'ñ,

75 m̄id huätzhuinma'ñ etz tudägy huinma'ñ ma yī' yhuinduu jabom jabom ixti m̄ibaad ndzinaayim.

76 Miich ma'xung, jäy hue' myajtijip mijpi Dios y'ayucnajtzcax̄iybi. Miich n̄icxip cogapxy, n̄icx yajni'ix̄i jäy m̄id Huindzin Dios ycixpi.

77 Yajni'ix̄i' yī' cajpjäy jadu'n nej huaad ajcxy y'alma paadipy nihuaanim yajn̄idzoocin, etz jadu'n nej huaad ajcxy ypocy huinmecx̄iyb.

78 Jadu'n nej Dios ñch ajt ti xypa'ayoohuim co ti xyñi'ijxcidaacim etz xymooyim t̄icxin jájin hūidibi tzomb tzajpjoty,

⁷⁹ jaydëbi yajmöhuiipy jäy ajcxy Dios ytiy'ajt huídibi ajcxy tzinaayb agootztuum etz o'c jijp'am, jigix ajcxy xytümooyim ma je tudägyipi tü'aa.

⁸⁰ Je pi'c'anäg yeeg yjodijy huinmic jotmic müd yi Dios yjihui'ñ ymic'ajt. Chi chinaay adügtuum ma ca' pin, ixti cooni xii tiempo paty mina ñicxipy cogapxy ma Israeljäy ajcxy.

2

Jesús yma'xung'ajty

¹ Huin'it xii Augusto César pidacy y'ané'min huen tüg'óciy jäy nicxy necypejttaaygixy. ² Je jayijp'atypi padrón hue' je'yaj'oyiiy Cirenio huídibi anajty gobernador'ajtp jím Siria ñaaxjot. ³ Chi jäy ajcxy nidüg'óciy ñicxtay yajcojayiiybi nidüg nidüg ma yci'mgajp. ⁴ Chi José choon jím Galilea naaxjot ma je cajp huídi yxii Nazaret, ñicxy ajcxy jím Judea naaxjot ma je David ycajp, huídi yxii Belén. Yi José ñicxy jím Belén com ymij'ap'ajtpy ymijteedy'ajtpy je David. ⁵ Chi José yajcojayiiy padrónjoty müd María, je töxyjäy huídibi anajty ymüid capxytuñ, huídi anajty ung tzi'm'ijtp. ⁶ Chi jadu'n yjajty co ajcxy anajty yjimity Belén, chi oyhuaad'aty co María paadípy y'ung. ⁷ Chi yma'xung'ajty je ungoob, e chi nibe'ñ nümüxy müd ymotz, e chi agögiiy ma iyujc pëcxí'ñ, co ca' anajty ti paady jättac.

Je ángeles ajcxy etz je cöbixycuend'ajtpi ajcxy

⁸ Chi mihuingon je cajp anajty jäy ycöbixycuend'aty. Hue' anajty ajcxy yhuin'iñaayb huintzuumnajxyp je' ycöbixy ajcxy. ⁹ Chi Huindzin Dios tüg y'ángel ñigidaaci je' ajcxy, e yi Huindzin Dios y'oy'ájtín y'adicxcoody júhuídity ma je' anajty ajcxy ymijc, chi ajcxy ooy chigiiy. ¹⁰ Huin'it je ángel ymíñañ:

—Ca' mdzigiiygixy, cham ñich miich nyajnimaaaygixy oybi ayuc huídibi yajjotcugiihuipy tüg'óciy naax cajp. ¹¹ Müd miich ajcxy yciixpi ti ypi'c'aty cham ma je David ycajp tüg jäy huídibi miich ajcxy xyñihuánaam xycohuánaam ma ajcxy mmidzip. Hue' je' je CRISTO, je Huindzin Dios. ¹² Yi' je' ijxpéjtíp huídi müd m'ijxcabipy. Mbáadípy ajcxy je ung ma'xung ñimóchity müd ymotz, ycöcnäy ma iyujc pëcxí'ñ.

¹³ Chi janch mic'amy ñayguëxíci müd je ángel may yi tzajpjotychinaaybi, chach Dios ojadájtciy ymíñaangixy:

¹⁴ ¡Ooy ycömáyity ooy ymíjity yi Dios tzajpjotypi, ji naaxhuiñ jotcuje'ajt müd jäy ajcxy yciixpi huídibi Dios yjäygidacpy!

¹⁵ Jadu'n yjajty co je ángel ajcxy ñicxtay tzajpjoty, chi je cöbixy cuend'ajtpi ajcxy ñayñimayi:

—Tzoc jámim jím Belén, jaydëbi n'íxim ti ti ytunyii ti yjadyii huídibi nHuindzin'ájtím Dios ti xyajnimáayim.

¹⁶ Chi ajcxy ñicxy jottigoy, chi oy pátcixy María, José etz je ung ma'xung y'agögiiyity ma je iyujc pëcxí'ñ. ¹⁷ Co ajcxy ijxy je María etz je ung ma'xung, huin'it ajcxy nigapxtay nimíydactay jadu'n nej je ángel ajcxy ñimayi müd je pi'c'anäg yciixpi. ¹⁸ Tüg'óciy jäy huídi midou ooy jihuiy huinmay jadu'n nej je cöbixycuend'ajtpi ajcxy ymíñañ. ¹⁹ Chi María mido'mbijctay, e yajhui'my ma yjot yhuinma'ñ. ²⁰ Chi yhuimbijty je cöbixycuend'ajtpi ajcxy cömay jäymech ajcxy yi Dios, etz ooy alabanza ajcxy iiy müd Dios yciixpi müd tüg'óciy jadu'n nej anajty ti íjxcixy ti midóogixy, etz jadu'n nej anajty ti ñimáayigixy.

Pi'c Jesús yajcapxquëxígy ma Dios ytiyc

²¹ Coductujc xii maabi anajty yma'xung'aty, huin'it je' ajcxy tiy'ajttiy je ung ma'xung. Chi ajcxy yximoy JESUS, jadu'n nej je ángel anajty jayijp ti ymíñañ ca'ni anajty chimígyii yciyígyii.

²² Co je xii oypaatni mina je María anajty yhuätzpidzimaamni, jadu'n nej Moisés ycötújcín je jécyp ymíñañ. Chi ajcxy müdnicxy je ung ma'xung jím Jerusalén

capxquëxigaangixy ma yi Huindzin Dios yhuinduu. ²³ Com jadu'n anajty yjaybétyity ma Huindzin Dios ñecy:

Tüg'óciy ungoob yëydijcpi huidi ma'xung'ajtp, abicy yhuimipy müd je Huindzin Dios ycipi.

²⁴ José etz María oy yéjccixy huindzigi'ñ jadu'n nej Huindzin Dios ñecy ymina'ñ co jëbi yecy metzc jam muuxy o pajtza'm muuxy.

²⁵ Jim Jerusalén anajty chinäy tüg jäy huidi anajty yxii Simeón, tudägyjäy je', etz ooy Dios jäyech. Simeón y'ahuijxyp anajty mina Dios miñ yajjotcujc'ada'ñ Israeljäy ajcxy, e müd je' anajty Dios yjihu'ñ ymic'ajt. ²⁶ Dios yjihu'ñ ymic'ajt ti anajty yajnejhuüyii co ca' chojc öga'ñ, jayijpni oc'ixipy je Huindzin Dios yCristo. ²⁷ Je Dios yjihu'ñ ymic'ajt yajmin yajmejtzi Simeón yhuinma'ñ huen nicxy ma Dios ytijc; huin'it Jesús ytaj yteedy ymüdnicxi ma Dios ytijc, cuyduñ ajcxy jadu'n nej Dios ñecy y'ane'my. ²⁸ Chi Simeón tzendzoy etz capxpaady je ung ma'xung, e chi Dios mibijctzoy müd je' ycipi, chi ymina'ñ: ²⁹ Jadachambi capxcix jotcujc, Huindzin Dios, müd hch miich mdumbi, com ti mguyduñ jadu'n nej ti xyñimäyich co n'ixipyich je Cristo.

³⁰ Cham ti n'ixyich je nihuambi cohuambi,

³¹ huidibi ti mni'ixiy ma tüg'óciy jäy ajcxy yhuinduu.

³² Jada ung ma'xung ytiy'ajt yegip ma yi jäy ajcxy huidi ca' yjudiojäyity. Jadu'n yi' nipaady nej tüg jün huidi codiicxp je jäy. Cömay y'idipy yi Israel jäy müd yi' ycipi.

³³ José etz Jesús ytaj ooy jihuüy huinmaay jadu'n nej Simeón ñigapxy je pi'c ma'xung.

³⁴⁻³⁵ Chi Simeón conuucx yi' ajcxy, e nimay María, Jesús ytaj:

—Jadayaabi pi'c'anäg hue' jada aminiy co may Israel jäy yjothuinma'ñ yaj'oyihuipy müd yi Dios etz nañ jadu'n may Israel jäy yjothuinma'ñ ca' yaj'oyihuipy müd yi Dios. Yi' je' tüg ijxpejt co ca' jäy y'ixa'nnyb choga'nnyb, e jadu'n tüg'óciy yajnejhuüy nej ajcxy nidüg nidüg yjothuinma'ñ müdity. E miich m'idipy jotmaymüd jadu'n nejihuüy tüg espada ti xyajtzaachiy.

³⁶⁻³⁷ Nañ jim Jerusalén anajty tüg töxyjäy huidibi anajty yxii Ana, Dios je' anajty y'ayucnajtzcapxybi. Fanuel anajty yteedy'ajtpy, hue' je' Aser y'ap y'oc, mij jäy anajty ooy. Janch mutz'anägni ypijcy e jeyi huixtujc jimijt chinay müd yña'y, mada'px midaax jimijt anajty cujc co'ögy chinäy, e ca' anajty ytigoy'ity ma Dios ytijc. Ana ytumb anajty tzajtigoty xim tzuum jopy ayuu anajty ycapxtägy. ³⁸ Chi Ana nimiñ José etz María jiiy ma Dios ytijc, e quipxy müd ajcxy huingapxtacy je Huindzin Dios. Chi je Ana nimydacy je pi'c Jesús müd tüg'óciy jäy jim Jerusalén huidi anajty ajcxy jip'ijxp mina Dios cohua'na'ñ Jerusalén ma ymidzip.

Co ajcxy nicxni jim Nazaret

³⁹ Co oy yajcuydundäy tüg'óciy jadu'n nej je Huindzin Dios ñecy ymina'ñ, chi José etz María ñicxcixni jim Galilea ma ajcxy yci'mgajp Nazaret. ⁴⁰ Je pi'c Jesús anajty yeegy mic ooy müd huijy'ajt cujc'ajt, etz ymüd je' Dios ymay'ájtin y'oy'ájtin.

Je pi'c Jesús yajpaady ma Dios ytijc

⁴¹ Jimijt jimijt yi ungdaj ungedeedy nicxy anajty ajcxy jim Jerusalén co anajty je Pascua xii paady. ⁴² Co Jesús anajty ymajmetzjimijt'ajty, chi ajcxy ypättigiy jim Jerusalén jadu'n anajty ajcxy costumbre müdity co xii paady. ⁴³ Co je xii ñaxtäy, chi ajcxy huimbíjtcixni, e Jesús yhuimiy je' jim Jerusalén. Ca' José etz ytaj nejhuüy ajcxy co ti anajty yhuimiy. ⁴⁴ Hue' ajcxy anajty tijy je' ymiñ axaam müd ymigügtijc. Co tüg xii yöyixni, chi ajcxy ixtay je' y'ung ma y'amigügtijc ajcxy, etz huidi müd ñay'ixy'adyii ñaymigüg'adyii. ⁴⁵ Co ca' ajcxy y'ung paady, chi yhuimbíjtcixni jim Jerusalén ung ixtaaybi.

⁴⁶ Chi jadu'n yajty codugig xii oypaatcixy jim ma Dios ytijc, Jesús y'ñäy anajty agujc'amy ma je huindzindijc. Yi' anajty y'amido'ijtyp yi huindzindijc y'ayuc, e nañ

yaj'amidooy anajty tijaty. ⁴⁷ Tüg'óciy je huindzindijc huidibi midou Jesús y'ayuc, chi ooy ajcxy huinmay etz jihu'y jadu'n nej je Jesús huinjihu'ydyäy etz jadu'n nej anajty tiydudägy y'adzooy. ⁴⁸ Co Jesús ytaj yteedy y'ijxpati, chi ooy ajcxy tzachjihuiy. Chi ungdaj yminañ:

—Aay ung, ¿nej co miich jadu'n xytúngixyich? Yi mdeedy etz ich yam tzachjottigooyb nay'adzigi'yijich n'ixtáaygixich miich.

⁴⁹ Chi Jesús y'adzooy:

—¿Na'amy co miich xy'ixtáaygixyich? ¿Ca' mnejhu'iygixy co copity n'idañich ma nDéedyich ytung?

⁵⁰ Chi ajcxy ca' huinjihu'yí Jesús y'ayuc huidibi ycapxy.

⁵¹ Chi Jesús miid nicxy je' ajcxy jim Nazaret. Chi Jesús capxymidoy ytaj yteedy. Chi yi' ytaj yajhui'mday ma yjot yhuinma'ñ tüg'óciy nej ytunyí yjadyí. ⁵² Chi Jesús ixpijc'adiitp anajty ooy, etz yeegy yjáygojy huijycujc. E yi Dios etz jáy ajcxy ooy anajty jáygidaaccxy.

3

Juan el Bautista y'ayuccapxhuäcxy mijtig'iduum

¹ Ma anajty je Tiberio César yjimijjtoty, mimajmocx jimijt anajty maabi y'ane'mtigíy, chi je Poncio Pilato anajty gobernador'ajtp jim Judea, je Herodes anajty rey'ajtp jim Galilea, je' y'uch Felipe anajty rey'ajtp jim Iturea etz jim Traconite ñaaxjot. Chi Lisancias anajty rey'ajtp jim Abilina. ² Chi je Anás etz Caifás je' ajcxy anajty teedy mijtungmiid ma Dios ytijc. Je huin'it tiempo Dios y'ayuc yja'ty ma je Juan, Zacarías ymang, huidibi anajty tzinaayb mijtig'iduum. ³ Chi Juan choñ ñicxy ma tüg'óciy cajp mihuingon je Jordán mijñi, capxhuijy je jáy ajcxy, co huen jothuimbijttaaygixy etz huen niibejtcixy jigix ajcxy ypocy yajhuinmeecxip. ⁴ Jada jadu'n tuni jajtí nej je ayucnajtzcaxi'ybi Isaías anajty ti cojaay: Jim mijtig'iduum yajmidooy tüg jáy mina'ñ: “Yaj'oyiygix yi Dios ytü'aa, tim jadu'n nej jáy ajcxy yaj'oyiygixy yi jibic tü'aa co tüg rey mina'ñ.” Yajtíiygixy yi tü'aa huidibi ooy y'adijy y'a'och.

⁵ Tüg'óciy aní ahuoc huen joyíydäy, tüg'óciy tungop huen nañ jadu'n joyíydäy. Tüg'óciy ni'aa tü'aa huidibi tijmin tijxijp huen tíydäy. Yi tü'aa huidibi ca' quipxyjatyty huen quipxyjaty tíydäy.

⁶ Tüg'óciy yi jáy ajcxy ixipy ñejhu'ihipy nej Dios yega'ñ je nihuambi cohuambi.

⁷ Chi Juan ooy ajcxy je jáy pinjaty anajty miimb niibejtpi, yminañ:

—¿Miich ajcxy tza'ñ ajcxy y'ajugy y'amigüg! ¿Pin miich ajcxy ti xynimäy quëg ma yi ayo'n huidibi Dios yquexaamy? ⁸ Túngix oybi, jothuimbíjtcix, ca' ajcxy minaangixy miñ xyipy: “Abraham ich ajcxy n'ap'ajtpy ndeedy'ajtpy”. Ich miich ajcxy nimaayb co Dios ixti jébi yi' yaj'ung'adyii yaj'anäg'adyii Abraham jada tzaa ca'ydi miich ajcxy. ⁹ Dios ni'ixí y'ity jaydëbi yajcödigoyipy jáy ajcxy y'alma huidibi jibic-huinma'ñ miid. Tim jadu'n nipaady nej jáy ni'ixí y'ity miid jacha co pujxíga'ñ tüg quipy huídi ca' oy ytim'aty, etz yajnögtähua'ñ.

¹⁰ Chi je mayjáy ajcxy y'amidooy je Juan:

—¿Ti ich ajcxy jébi nduñ?

¹¹ Chi je Juan y'adzooy, yminañ:

—Pinjaty yhuít miid metz, jaydëbi möy pin ca' miidity ni tüg. Etz pinjaty caagy miid nañ jadu'n möhuipy pinjaty ca' miidity.

¹² Chi miñ jadyii yajcogüejtpi co anajty ñiibedaangixy, yminañ ajcxy:

—¿Ti huaad ich ajcxy nduñ (jigix Dios xymijotcujc'adipyich)?

¹³ Chi Juan y'adzooy:

—Ca' ñigi anaxy myajcogüety jadu'n nej je cötújcín y'ane'my.

¹⁴ Chi soldado ajcxy yminañ:

—¿Ti ich ajcxy ndunipy (jigix Dios xymijotcujc'adipyich)?

Chi Juan y'adzooy:

—Ni pin ajcxy ti mgapíjciipy, ni mganíhuambedípy ajcxy. Nañ jadu'n mijotcuyc'ájtciixy nej myajmujuuuygíxy.

¹⁵ Je mayjáy yjijp'ijxyp anajty ajcxy ooy, etz ooy jihuñy huinmaay nejhuíhuaangíxy pen yi Juan je' anajty Cristo. ¹⁶ Chi Juan nimay ajcxy nidüg'óciy:

—Íich janch nyajniibéjtypich jáy miiid nií. Miimb je' axaam huídibi jacmij ca'ydi íich, ca' huaad yi' ycíghuin ngejich. Je' miích ajcxy xyajniibedípy miiidi Dios yjihu'ñ ymic'ajt etz miiidi jín. ¹⁷ Je Cristo ni'ixi' y'ity co oybi móhua'ñ je jáy huídibi ajcxy oyhuinma'ñ miiid, etz ymóhuaamy tzaachypi je jáy ajcxy huídibi jibic-huinma'ñ miiid, tzaachypi huídibi nicamina ycixípy. Tim jadu'n nipaady nej tüg jáy ni'ixi' y'ity co ymoc-huimboja'n, e chi je oybi mocpajc pidäga'ñ ma che'x, etz je mocjaam ninögíhua'ñ, e caminaxi ycapidza'ñ je jín.

¹⁸ Je Juan ooy jáy capxhuijy, etz canaagnax oybi ayuc capxhuäcxy. ¹⁹ Chi yi' ogy je rey Herodes, co y'uch Felipe ytóxyijc Herodías miiid tzinaayi, etz jacjaydiiby jibic-huinma'ñ tiibi Herodes anajty tuñ. ²⁰ Chi je rey Herodes nigí pocytuñ co Juan pidacy pujxtigoty.

Je Jesús ñiibejtín

²¹⁻²² Chi jadu'n yjajty co jadu'n tüg'óciy jáy ñiibejttay nañ jadu'n Jesús ñiibejty. Yam anajty Jesús ycapxtägy co je tzajp y'ahuaach, etz je Dios yjihu'ñ ymic'ajt yminajcy ma Jesús ycöduu miiid ñiniícx jadu'n nej muuxy ñiniícx. Nañ jadu'n yajmidoy tüg ayuc choñ tzajpjoty yminañ:

—Miích n'ung'ajtpy, ooy íich miích ndzocy ooy njihuíy, ooy njotcújcidyich miiid miích.

Jesús ymij'ap ymijteedy

²³ Jesús hue' anajty yjimijt oy ni iipxmajc co ytungtigíy. Hue' je' anajty jadu'n jáy tijy José ymang, José yteedy hue' je' Elí, ²⁴ Elí yteedy hue' je' Matat, Matat yteedy hue' je' Leví, je Leví yteedy hue' je' Melqui, je Melqui yteedy hue' je' Jana, je Jana yteedy hue' je' José, ²⁵ Je José yteedy hue' je' Matatías, je Matatías yteedy hue' je' Amós, je Amós yteedy hue' je' Nahum, je Nahum yteedy hue' je' Esli, je Esli yteedy hue' je' Nagai, ²⁶ je Nagai yteedy hue' je' Maat, je Maat yteedy hue' je' Matatías, je Matatías yteedy hue' je' Semei, je Semei yteedy hue' je' José, je José yteedy hue' je' Judá, ²⁷ je Judá yteedy hue' je' Joana, je Joana yteedy hue' je' Resa, je Resa yteedy hue' je' Zorobabel, je Zorobabel yteedy hue' je' Salatiel, je Salatiel yteedy hue' je' Neri, ²⁸ je Neri yteedy hue' je' Melqui, je Melqui yteedy hue' je' Adi, je Adi yteedy hue' je' Cosam, je Cosam yteedy hue' je' Elmodam, je Elmodam yteedy hue' je' Er, ²⁹ je Er yteedy hue' je' Josué, je Josué yteedy hue' je' Eliezer, je Eliezer yteedy hue' je' Jorim, je Jorim yteedy hue' je' Matat, ³⁰ je Matat yteedy hue' je' Leví, je Leví yteedy hue' je' Simeón, je Simeón yteedy hue' je' Judá, je Judá yteedy hue' je' José, je José yteedy hue' je' Jonán, je Jonán yteedy hue' je' Eliaquim, ³¹ je Eliaquim yteedy hue' je' Melea, je Melea yteedy hue' je' Mainán, je Mainán yteedy hue' je' Matata, je Matata yteedy hue' je' Natán, ³² je Natán yteedy hue' je' David, je David yteedy hue' je' Isaí, je Isaí yteedy hue' je' Obed, je Obed yteedy hue' je' Booz, je Booz yteedy hue' je' Salmón, je Salmón yteedy hue' je' Naasón, ³³ je Naasón yteedy hue' je' Aminadab, je Aminadab yteedy hue' je' Aram, je Aram yteedy hue' je' Esrom, je Esrom yteedy hue' je' Fares, je Fares yteedy hue' je' Judá, ³⁴ je Judá yteedy hue' je' Jacob, je Jacob yteedy hue' je' Isaac, je Isaac yteedy hue' je' Abraham, je Abraham yteedy hue' je' Taré, je Taré yteedy hue' je' Nacor, ³⁵ je Nacor yteedy hue' je' Serug, je Serug yteedy hue' je' Ragau, je Ragau yteedy hue' je' Peleg, je Peleg yteedy hue' je' Heber, je Heber yteedy hue' je' Sala, ³⁶ je Sala yteedy hue' je' Cainán, je Cainán yteedy hue' je' Arfaxad, je Arfaxad yteedy hue' je' Sem, je Sem yteedy hue' je' Noé, je Noé yteedy hue' je' Lamec, ³⁷ je Lamec yteedy hue' je' Matusalén, je Matusalén yteedy hue' je' Enoc, je Enoc yteedy hue' je' Jared, je Jared yteedy hue' je'

Mahalaleel, je Mahalaleel yteedy hue' je' Cainán, ³⁸ je Cainán yteedy hue' je' Enós, je Enós yteedy hue' je' Set, je Set yteedy hue' je' Adán, je Adán yteedy hue' je' Dios.

4

Je mujcu' tuñ ijxta'ni ma Jesús

¹ Jesús ymíid'ajtpy anajty je Dios yjihui'ñ ymic'ajt. Co Jesús jim choñ ma Jordán mij niñ, chi je Dios yjihui'ñ ymic'ajt yajnicxi mijtigíduum. ² Jesús y'ijty huixchigui'px xii jim mijtigíduum. Chi je mujcu' yjot'ijxi huinma'ñ'ijxi. Jaygay jim y'ijty, e co huixchigui'px xii ñajxni, chi oy yuuböccodyii. ³ Chi je mujcu' nimay:

—Peni janch miich Dios xy'ung'adyii, nimay jada tzaa huen ahuimbity tzajcaagy.

⁴ Chi Jesús y'adzooy:

—Jaybety ity ma Dios ñecy co ca'nan miid tzajcaagy ti'ajty jäy ajcxy yjugy'aty, nañ jadu'n tzocy tüg'óciy Dios y'ayuc.

⁵ Chi je mujcu' mídpejty Jesús ma tüg cop janch cixpi, chi tüg jaxígy yajni'ixiiy tüg'óciy je naax cajp huidi jii naaxhuiñbi. ⁶ Chi je mujcu' yminañ:

—Íich miich möhuipy tüg'óciy mic'ájtín ané'mín etz oy'ájtín, com íich ngí'am y'ity tüg'óciy, e nmöhuibích hueñyimpínity. ⁷ Pen xyhuingoxtinäaybích xy'ojadajtpích miich, ac miich jada mje' tüg'óciy.

⁸ Chi Jesús y'adzooy, yminañ:

—Huinhuägtuutích miich mujcu', com jadu'n jaybéty y'ity: “Co yi Huindzín miich mDios mhuingoxtinähuipy m'ojadapíy, etz yi' je' tüg pajc myajmij'adipy.”

⁹ Chi je mujcu' mídnicxy Jesús jim Jerusalén, chi míd pejty ma Dios ytíjc coduu, e nimay:

—Pen Dios miich xy'ung'ajtp cōdijpnax naaxcíxy, ¹⁰ com jaybety jadu'n y'ity ma Dios ñecy co quexipy Dios yi' y'ángeles ajcxy e xycuend'adipy. ¹¹ Cígíxy ajcxy xyhuidzipy, ca'ydi mdzaachiy ma tzaajot.

¹² Chi Jesús yminañ:

—Ji Dios y'ayuc huidi jadu'n minam co ca' mjot'ixipy mhuinma'ñ'ixipy yi mHuindzín Dios.

¹³ Co je mujcu' yajcixy jadu'n nej anajty jot'ixa'ñ huinma'ñ'ixa'ñ Jesús, chi huinhuägtuuty tüg tiempo.

Jesús yajtzondägy je' ytung jim Galilea

¹⁴ Chi Jesús nicxy jim Galilea, e Jesús miid'ajtpy je Dios yjihui'ñ ymic'ajt. Chi Jesús ooy cōmay y'ijty ma tüg'óciy cajp huinduy agonbi. ¹⁵ Hue' Jesús anajty yaj'ixpicy majaty je' ajcxy naymujctac. Chi je jäy ajcxy tüg'óciy ooy cōmay Jesús.

Jesús yajpaady jim Nazaret

¹⁶ Chi Jesús ymiiñ Nazaret ma anajty ti yeegy. Chi Jesús ytigíy ma naymujctac, jadu'n nej costumbre anajty mídity pocxíduum. Chi ytinaay'ahuíy, chi ytigíy necycapxpi.

¹⁷ Chi ajcxy mooy je necy huídibi je Dios y'ayucnajtzcapxíybi Isaías yjaay. Chi cihuäcxy je necy, paty jiiyby tüg it ma anajty yjaybétyity jadu'n:

¹⁸ Je Huindzín Dios yjihui'ñ ymic'ajt xymíid'ajtpích, co xyajniñbicyích co nyajnimähuibích ayoobitíjc je oybi ayuc. Ti xyquexyích co nyajjotcugíhuibích je jäy ajcxy huidi jotmay ymíid, etz nhuinméecxibích huídibi ajcxy pujxtigótyip, nañ jadu'n ajcxy je huídibi huiintzip nyajhuindícxigibích, e nbidägibích ahuätztuum huídibi yajtzaachytumb.

¹⁹ Ti xyquexyích co ngapxhuäcxibích je tiempo mina Huindzín Dios may'ajt oy'ajt tuna'ñ miid je jäy ajcxy ycixpi.

²⁰ Chi jada' Jesús abidiŋty je ñecy, yajcidiŋty je tungmüdpí, huin'it y'ixtacy. Chi tüg'óciy mayjáy jiiŋby ma naymujctac ooy ajcxy huindicxy je Jesús. ²¹ Chi Jesús ymínandacy:

—Cham yajcuydun je' huidi jaybety ma Dios ñecy jadu'n nej miich ajcxy cham ti mmidooy.

²² Chi nidüg'óciy ajcxy ooy jäygidacy nej Jesús mína'ñ, etz huinmay ajcxy ooy je ayuc huidibi Jesús ycapxy, chi ñayñimáayigixy:

—¿Nej ca'y José jada jada' y'ung?

²³ Chi Jesús ymínaañ:

—Ca' yjécyty miich ajcxy xyajnimáhuibich jada ayuc: “Tzoydumbi naychoyihuñ ci'm. Tüg'óciy jadu'n nej ñich ajcxy nmidooyich ti mduñ jim Capernaum, nañ jadu'n miich octun ma mgi'mgajp.”

²⁴ Chi Jesús yjacmínañ:

—Janch ñich miich ajcxy nnimäy co ni tüg jäy huidibi Dios y'ayucnajtzcaxiyb ca' jäy ajcxy cöbicy ma yci'mgajp. ²⁵ Janch ñich miich ajcxy nimäy co ooy anajty may co'ögy ytöxyjäy ya Israel jecy'ajty co Elías chinaay, co je tzajp adujcy tugig jimijt jatudujc po', co oy yuu miñ ma tüg'óciy naax cajp. ²⁶ E Dios ca' quejxy je Elías ma yi Israeljäy co'ögy töxyjäy ajcxy. Hue' janch quejxy huinduum jim Sarepta ma Sidón naaxjot ma tüg co'ögy töxyjäy huidi jim. ²⁷ Nañ jadu'n anajty ooy mayjáy püdz pa'm müdity ya Israel jecy'ajty co je Dios y'ayucnajtzcaxiybi Eliseo chinay. Chi ni tüg jäy huin'it catzoocy, jeyi tügpajc choocy pa'mjäy huidibi anajty yxi Naamán huidi tsoon Siria naaxjot.

²⁸ Huin'it tüg'óciy jäy huidi anajty jiiŋby ma naymujctac ooy yjotma'tcoty co jadayaab ayuc ajcxy midooy. ²⁹ Chi je mayjáy ajcxy nibidiŋy Jesús etz yajpidzimy ma je cajp. Chi ajcxy yajnicxy jim ma je tzaahuingueetz, co je cajp copcíxy anajty yajpaady, e jim anajty cödiŋpnaxaangixy. ³⁰ Chi Jesús ñajxy cujc'amy ma je' ajcxy, chi ñicxni.

Tüg yëydijc huidibi anajty müd jibic espíritu

³¹ Chi Jesús y'idacy jim Capernaum, tüg cajp jim Galilea naaxjot, chi Jesús jäy ajcxy yaj'ixpijcy pocxxiduum. ³² Huinmay ooy ajcxy jadu'n nej je' yaj'ixpijcy. Ñayñimáayigixy co je Jesús yaj'ixpijcy nejihuñy mijtung mij'ané'min müdity.

³³ Jiiŋby ma je naymujctac jiiŋby anajty tüg yëydijc huidibi müd tüg ca'oybi, chi je ca'oybi mic yaaxqueecy ymínañ:

³⁴ —Ixmajtzcich ajcxy, ¿ti mdunamy müd ñich ajcxy Jesús je nazaretpi? ¿Nej ti mmiñ co xyajhuindigoyáanigixyich? ñich miich n'ijxcapy co miich je' je Huätzpi Dios.

³⁵ Chi Jesús je ca'oybi ooy, nimay:

—Amon, pidzim ma yi jäy.

Chi je ca'oybi najtztijty je yëydijc agujc'amy ma je jäy ajcxy, huin'it ypidzimy, e ca' ni nej jactuuñ. ³⁶ Tüg'óciy jäy jim ooy ajcxy ñay'adzigiyi miñ xyipy yjanayñimáayigixy:

—¿Ti ayuc jada' yi? Co müd y'ané'min etz mic'ajt ane'my ca'oybi etz yajpidzimy ma jäy.

³⁷ Chi Jesús capxpaady y'ijty ma tüg'óciy cajp huidi huinduy agónip.

Jesús yajtzoocy Pedro ymüd töxyjäybi

³⁸ Chi Jesús ypidigy choñ ma naymujctac, ytigiy ma Simón ytijc. Jadu'n anajty Simón ymüd töxyjäybi mic ytoyii. Chi ajcxy cohuaniy Jesús müd je' yciŋpi. ³⁹ Chi Jesús yhuindacy ma je' yhuinduu, ix'ooy je toyi, e jadu'ñi ñajxy. Chi je' mic'amy ypidigy, yajcay yaj'uucy ajcxy.

Jesús yajtzoocy mayba'mjäy

⁴⁰ Tzuu tzuu anajty jäy ajcxy yajnicxy tüg'óciy jäy ajcxy pa'mmüdpí ma Jesús. Chi Jesús cñixajy nidüg nidüg, e jadu'n anajty ajcxy chögy. ⁴¹ Chi nañ jadu'n je' ca'oybi yajpidzimy ma mayjäy, mic je ca'oybi anajty yhua'ñ yjihuiy, ymína'ñ:

—Miich je' Dios xy'ung'ajtp.

Chi Jesús ñigi ix'ojy, ca' anajty yajhuäcxipy ñicxy yjaccapxy, com ti anajty nejhuüiygixy co yi' je' je Cristo.

Jesús y'ayuccapxhuäcxy jim Galilea

⁴² Co yximñy, chi chooñ Jesús, ñicxy mjtig'íduum. Ooy jäy yja'ixtäyii, chi ajcxy oy paatcixy, yajhuäcxipy ajcxy ooy, ca' anajty oc'ixmadzáangixni. ⁴³ Chi Jesús yminañ:

—Ooy jada chachcopícyity co canaag agajp ñich jada ngapxhuäcxibich je oybi ayuc jadu'n nej Dios y'ane'my. Paady Dios ti xyquexyich ya naaxhuiñ.

⁴⁴ Jadu'n anajty je' capxhuäcxy majaty jäy ñaymujctac jim Galilea.

5

Je acxmajtzin mijhuinma'ñybi

¹ Tügtecy jadu'n yjajti, jim anajty Jesús ma je Genesaret mejypa', co jäy ñimiini janch ñay'adijñy ñay'agodñiyigixy, tzach'amidohuaangixy Dios y'ayuc. ² Chi yi' ijxpaty mejtz barco jahueengi mejypa'áy. Je acxmajtzpidijc ti anajty ypidzimgixy ma je barco, jim anajty y'acxxuumy púccixy. ³ Chi Jesús yajtigiyñy tüg barco huidi Simón anajty je'ajtpy. Chi may'ajt pijctzoy co huen yajjihuägy hueeni yi' barco mejypa'áy. Chi Jesús y'ixtacy barcojoty, e jadu'n yaj'ixpijcy je mayjäy ajcxy. ⁴ Co ycapxymaayi, chi Jesús Simón ñimay:

—Ñicx pidäg m'acxmadzi'ñ mejyjoty, jaydëbi májtzcixipy acx.

⁵ Chi Simón y'adzooy:

—Huindzin, ti ñich ajcxy ooy njatuñ tüg tzuum, ni ti ti ngapáatcixyich. Per mñid miich m'ayuc ycixpi yi' acxmadzi'ñ nbidägibich mejyjoty.

⁶ Co ajcxy pidacy je acxmadzi'ñ mejyjoty, chi yajco'adujcy ooy may acx, jahueeni acxmadzi'ñ ycacñich mñid je may acx ycixpi. ⁷ Chi Pedro yemi ymüggtijc huidi anajty jim ma je jadügpí barco, huen miñ ajcxy pubedyii. Chi ajcxy ymiñ pubejtp, yaj'ujch ajcxy metzpi barco mñid may acx, jagoo jagoo ycaquiñ je barco mñid may acx ycixpi. ⁸ Co Simón Pedro ijxy jadu'n, chi ycojxtinaay'ahuñy ma Jesús yhuinduu, ñimay:

—Huinhuaütútcich, Huindzin, com ñich pocyjäy ñich.

⁹ Com Pedro janch tzigñyb anajty, etz nañ tzigñyb tüg'óciy huidi anajty mñid ti ytuñ, co anajty ooy may acx tzachyajnibéjtcixy. ¹⁰ Nañ jadu'n tzigñyb anajty je Jacobo etz Juan je Zebedeo ymang ajcxy huidibi Simón anajty ti pubety. Chi Jesús ñimay Simón:

—Ca' mdzigñy, jadachambi etz jacñicxni xñ tiempo mdunipy jäymadzñ.

¹¹ Co je barco yajmejpídzimy, chi ajcxy y'ixmajch tüg'óciy, chi ajcxy panicxy Jesús.

Jesús yajtzögy tüg jäy nübützpa'mmñdpi

¹² Chi jadu'n yjajti co anajty Jesús yjimñy ma tüg cajp, co ñimiini tüg yëydijc ymñid anajty pützpa'm. Co je pa'mjäy ijxy Jesús, chi nihuindacy ma yhuinduu, minucxtacy, ñimay:

—Huindzin, pen mdzojcpy jëbi xyajtzögibich.

¹³ Chi Jesús yci' najtzxajñy nidooñ, ñimay:

—Ndzojcpyich, hui'm huädz.

Chi mic'amy je jäy choocy. ¹⁴ Chi Jesús ane'my, ñimay:

—Ca' ni pin myajnimähuipy, ñicx janchtiy nayguëxigñib ma teedy, jaydëbi möhuipy Dios huindzigi'ñ, jadu'n nej Moisés ycötújcin je jécyip y'ane'my, mñid yi' ycixpi co ti mhuätzpidzimy, jaydëbi jäy ajcxy nejhuñhuipy co ti mdzögy.

¹⁵ Je capxy'ayuc ñigi y'oc-huäcx'adñitzi, e janch mayjäy y'ocnimújcin, jim pin ayuc midohuaam, e jim huidi tzögaam. ¹⁶ Jesús ycögueecpy anajty je mayjäy, ñicxy anajty mjtig'íduum Dios ojadajtpi.

Jesús yajtzögy tüg jäy cñuxypi tecyxuxypi

17 Tüg tecy yjãiti, Jesús anajty yaj'ixpijcp, e jim anajty ajcxy iñây ma Jesús yhuinduu fariseojây ajcxy, etz huïdi jây yaj'ixpijcp Dios ñecy huïdijaty anajty ti choongixy canaag agajp ma Galilea naaxjot Judea naaxjot, etz cham huïdijaty anajty ti choon Jerusalén. E Jesús ymïid anajty Huïndzin Dios ymic'ajt co jây yajtzögipy. 18 Chi nijëjity jây yajja'ty cijx'am tüg pa'mjäy yëydijcpi huïdi ca' anajty yci' ytecy yücxy. Chi ajcxy ixtaay ma yajtijctigihuiipy pidäga'ñ anajty ajcxy je pa'mjäy ma Jesús yhuinduu. 19 Com ca' anajty ni ma tigiyiydac müid co je tijc anajty ooy y'újtzy müid mayjäy. Chi ajcxy müidpejty tijc nigíxy, chi ajcxy tijc yajcöhuach, e chi ajcxy cödiyñajxy cijx'am je pa'mjäy ma Jesús yhuinduu. 20 Co Jesús ijxy jadu'n nej je' ajcxy ymibicy, chi nimay:

—Yëydijc, yajmeecxp mbocy.

21 Chi je' ajcxy huïdi yaj'ixpijcpy Dios ñecy etz je judío ixpicytijc huïdi naydíjigixp fariseojây huïnmaygoty, ñayñimáayigixy: “Jada Jesús ooy ycapxtigoy müid Dios. Ni pin yëydijc huaad ca' ti pocymeeecxy. Tügpajc nHuïndzin'ájtım Dios huïdi pocyhuïnmeecxp.”

22 Jesús ñejhuïy je' ajcxy yjot yhuïnma'ñ, paady ajcxy nimay:

—¿Ti mdzachuïnmaayb ajcxy ma mjot mhuïnma'ñ? 23 ¿Ti jactzip co minaanım co ti mbocy yajmeecxy o minaanım: “Pidíg etz nicxni”? 24 Jaydëbi müich ajcxy mnejhuïhuipy co ñch je' je jây huïdi tzoön tzajpjoty, nmüidich ané'mın etz mic'ajt ya naaxhuïñ jëbi jây nbocyhuïnmeecxyich, paady cham nnimäyich yi pa'mjäy: “Pidíg etz yajpidíg mmaabejt, nicx ma mdijc.”

25 Chi mic'amy je pa'mjäy ytınayigy ma je jây ajcxy yhuinduu, etz yajpidigy je' ymaabejt ma anajty ycögnây. Chi ñicxni ma ytijc, chi ooy cömay jäymejch Dios. 26 Huïn'it nidüg'ócıy je mayjäy ooy ajcxy jihuiy, e chi ajcxy ooy cömay etz jäymejch Dios. Chi ajcxy ooy chigiyigixy, yminaangixy:

—Cham janchtiy n'íxim mijhuïnma'ñ.

Jesús huodzoñ je Leví

27 Co jadu'n ytuni yjãiti, chi Jesús jim choñ, chi ijxy tüg yajcogüejtpi huïdi anajty yxiï Leví. Leví jim anajty iñây ma yajcogüejttac. Chi Jesús nimay je Leví:

—Pajaamgich.

28 Chi je Leví ixmajtztay huïdi anajty ytuumyb etz padzoñ je Jesús.

29 Chi Leví mayjäy yajcay yaj'uucy ma ytijc, cham may yajcogüejtpi ajcxy etz jacjadyii jây huïdi iñayb ma yi mesa müid Jesús etz yi' ydiscípulos ajcxy. 30 Chi je' ajcxy huïdibi yaj'ixpijcp Dios ñecy etz je ixpicytijc huïdi naydíjigixp fariseojây tzachni'ameechycápxcixy ni'ojigixy je Jesús ydiscípulos ajcxy, yminaangixy:

—¿Na'amy co mgaayigixy m'uuccixy müid yajcogüejtpi etz müid pocyjäy ajcxy?

31 Chi Jesús yminañ:

—Ca' yajmayjaty tzoydumbi huïdibi ca' ajcxy ypigiyi, jëyi huïdi ajcxy pijcip. 32 Ca' ñch ti nmiñich ma je jây ajcxy huïdibi ca' pocy müidity. ñich ti nmiñich müid yi pocyjäy ycixpi co huen jothuimbijttaayigixy ma Dios.

Yaj'amidooy ajcxy Jesús ti co jây ajcxy y'ayunas'ájtıxy

33 Chi je mayjäy ajcxy Jesús nimay:

—Nej co yi' (Juan) ydiscípulos ajcxy janam jadojc jaygay y'íjtıxy etz ycapxtáccıxy, nañ jadu'n je fariseojây ydiscípulos ajcxy janam jadojc jaygay y'íjtıxy. Chi müich mdiscípulos ajcxy ca' ajcxy jaygay y'íjtıxy, caaby uucp ajcxy jabom jabom.

34 Chi Jesús yminañ:

—¿Nej jëbi yaj'ayuu'aty jây ajcxy huïdi yajpatpi ma je pijcpi yajnixıduñ, pen quipxyi yam yajpaady müid je huïdibi pijcp? 35 Minamb je xiı je tiempo mina je pijcpi yajtzonıyib, huïn'it janchtiy ajcxy jëbi y'ayuu'ájtıxy.

36 Nañ jadu'n ajcxy yajnimay tüg jihuibit ayuc:

—Ni pin ca' huaad agiyi' tüc-huit miid jemyhuit, canaan jëyi yciidzip yi jemybi, nañ jadu'n je tucpi ca' oy yhui'mañ miid je jemyhuit agiyi'ñ. ³⁷ Ni pin ca' pidägy jemy vino ma je tucpi cochac, pen janch jadu'n octuñ, je vino jemybi yciidzip je tucpi cochac, chi y'ixyojctähuipy je vino etz je cochac ñitigoydähuipy. ³⁸ Pidägyipy ajcxy jemy vino ma tüg jemybi cochac, chi jadu'n ca' ytigoyipy je vino ni je cochac. ³⁹ Ca' ni pin tzocy vino jemybi, pen ti anajty ügy vino tüibi yjejcni, co jadu'n ymïna'ñ co jac oy je tüibi yjejcni.

6

Je discipulos ajcxy yajmúccixy trigo cojc pocxxi#duum

¹ Chi jadu'n yjajti tüg pocxxi#duum co Jesús oy ñaxy ma tüg trigo cam, e yi' ydiscipulos ajcxy oy anajty yajminájccixy trigo tïm, chi ajcxy nïxajztüdy, e chi ajcxy jüccxy. ² Chi nidügti fariseojäy ymïnañ:

—¿Ti co ajcxy jadu'n mdundigooy co mdúngixy huidi ca' ñigodúcyity ajcxy mdunipy pocxin xiiduum?

³ Chi Jesús ymïnañ:

—¿Nej ca'ni miich ajcxy mgapxy Dios ñecy nijadu'ñyi? ¿Nej ca' mnejhuuygixy ti David ytuun co anajty yuubögyii etz nañ co ymigügtijc anajty yuubögyii? ⁴ David ytigüiy ma Dios ytijc, chi conigy je tzajcaagy huidibi anajty jiiiby ma Dios yhuinduu, chi caay, nañ jadu'n moy je ymigügtijc ajcxy. Je' tzajcaagy ca' anajty ypadyii nïcxy je' ajcxy cay. Teedy je' anajty ajcxy paatip cáaygixip.

⁵ Chi Jesús yjacmïnañ:

—Iich je' je jäy huidibi tzoon tzajpjoty, jëbi nñimäyich je jäy ajcxy ti jëbi huaad ytúngixy sábado xii.

Je yëydijc huidibi anajty yci' tidzip

⁶ Chi jadügtecy yjajti tüg pocxxi#duum, co Jesús ytigüiy ma tüg naymujctac, chi jäy yaj'ixpijcy. Jiiiby anajty tüg yëydijc huidi y'a'oygi' anajty tidzip. ⁷ Chi huidi ajcxy yaj'ixpijcp Dios ñecy etz fariseojäy ajcxy ix'ijxy pa'ljxcixy Jesús nej pen jäy yajtzögam pocxxi#duum, e je' ajcxy anajty miid yciixpi xihua'ñ. ⁸ Jesús ñejhuuyb je' anajty ajcxy yjot yhuinma'ñ. Chi Jesús nïmay je yëydijc huidibi anajty yci' tidzip:

—Pidig, tinayig mayjäy'agujc.

Chi je' ytinaayigy. ⁹ Chi Jesús ymïnañ:

—Nyaj'amidohuaamybich miich ajcxy tüg ayuc. ¿Nej Dios ñecy ymïna'ñ, jëbi oybi nduunim pocxxi#duum o jëbi jibicpi nduunim, nyajtzoocim jäy o nyajtgooyim jäy yjugy'ajt?

¹⁰ Chi Jesús ajcxy huindicxpejttay nidüg'óciy, chi nïmay je pa'mjäy:

—Xajtiu mgi'.

Chi je' yci' xajtiy, huin'it je' yci' choocy. ¹¹ Chi je' ajcxy huidi yaj'ixpijcp Dios ñecy etz je ixpijcytjic huidi ajcxy mijpidacp judío ycostumbre ooy ajcxy yjot'ambijcy, ñayñimáayigixy miñ xyipy:

—¿Nej ajt n'octuunim jada Jesús?

Jesús huin'ixy je majmetzpi discipulos ajcxy

¹² Jadu'n yjajti huin'it xii Jesús ñicxy mijtigüiduum Dios ojadajtpi. Tüg tzuum ooy Dios mibijctzooy. ¹³ Co yximüy, chi Jesús huoomiñ yi' ydiscipulos ajcxy. Chi huin'ijxy je majmetzpi, etz yximoy ajcxy, apóstoles. ¹⁴⁻¹⁶ Chi Jesús yhuin'ijxy je Simón huidi yximoy Pedro; je Andrés, Pedro y'uch; Jacobo etz Juan; Felipe etz Bartolomé; Mateo etz Tomás, Jacobo hue' je' Alfeo ymang; etz Simón huidi jäy ytijpy Zelote; Judas, Jacobo y'uch; etz Judas Iscariote huidibi nañ jadu'n Jesús cïyeyc ma ymidzip.

Jesús yaj'ixpijcy mayjäy

17 Chi Jesús m̄id'idacy je disc̄ipulos ajcxy, chi oy yhuäcxipy ma t̄üg ajoy m̄id ydisc̄ipulos ajcxy etz mayj̄äy hūidi anajty ti choongixy Judea naaxjot, etz Jerusalén, etz ma mejypa' jim Tiro etz Sidón. Ymiñ ajcxy je mayj̄äy co am̄idoo'idáani Jesús y'ayuc etz nañ chōgaangixy je pa'm hūidi ajcxy ym̄id. 18 Cham je hūidi anajty ayo'n tzachpaatp m̄id ca'oybi, nañ tzoocp je' anajty ajcxy. 19 Chi t̄üg'óciy je j̄äy ajcxy janch ñidonamy anajty ajcxy je Jesús, co ym̄id mic'ajt co j̄äy t̄üg'óciy yajtzög.

Je jotcuyc'ajt etz je cajotcuyc'ajt

20 Chi Jesús hūindicxpejtay je mayj̄äy hūidi ajcxy ixp̄igaam yi' y'ayuc, e ym̄inañ:

—Jotcuyc miich ajcxy ayoobt̄ijc, com miich ajcxy cham xypaat Dios y'ané'm̄in.

21 Jotcuyc miich ajcxy hūidi cham yuubó'cip, co mḡüxiib miich ajcxy. Jotcuyc miich ajcxy hūidi cham jotmay m̄id, co yp̄aadip x̄ii tiempo m̄ina mxondáaccixipy.

22 Jotcuyc miich ajcxy m̄ina anajty j̄äy ca' xy'ixáangixy, co p̄in xy'ixt̄ijcixipy, e co j̄äy ajcxy j̄ibic xyñigapxa'ñ xyñixiga'ñ m̄id ñch yc̄ixpi, je j̄äy hūidi tzoon tzajpjoty. 23 Mxondäg miich ajcxy hūin'it x̄ii, etz mjotcuḡiygixip, com ooy chachm̄ij̄ity hūidi ajcxy mbadaamy tzajpjoty. Com jadu'n anajty jecy'ajty miich mm̄ij'ap mm̄ijteedy ca' ixaangixy je hūidi anajty Dios y'ayucnajtzcax̄iyipy.

24 Miich ayoob ajcxy comeñȳj̄äy, com ca' ti jotcuyc'ajt̄in m̄jacpadaangixy hūin'it x̄ii (co Dios t̄iydunip je naaxhuiñȳj̄äy).

25 Miich ayoob ajcxy hūidi cham oc'agujc'ajtp ocjotcuyc'ajtp, ayo'n jotmay ajcxy mbaadip, e myajmayjadipy miich ajcxy tijaty.

26 Miich ayoob ajcxy co ajcxy myajnigapxipy myajnim̄iydägipy, com jadu'n jecy'ajty miich ajcxy mm̄ij'ap mm̄ijteedy n̄imay je j̄äy ajcxy co ooy y'oyj̄äy hūidi ajcxy anajty najtzcapx̄iyb ayuc hūidibi ca' yt̄iy yj̄anchity.

Nej huaad nmigüg ndzójcim

27 Chi Jesús yjacm̄inañ:

—Miich ajcxy hūidi cham am̄ido'ijtp ñch n'ayuc, ñch miich ajcxy n̄imaayb: Tzójccix mm̄idzip, m̄i'oyj̄äy'ajt̄icix hūidijaty ca' xy'ixaangixy. 28 Migapx je j̄äy ajcxy m̄id oyjot oyhūinma'ñ hūidi ajcxy j̄ibic xyñigapxp xyñi'oj̄iyb. Mib̄ijctzoogixy yi' Dios m̄id je' ajcxy yc̄ixpi hūidibi xyñigapxp xyñi'oj̄iyb. 29 Pen ji p̄in xycojxy ma yi' m̄huinj̄ijp, mo' jadüg adu'm'amy ahūin hueñ coxy. Pen ji p̄in xyp̄igaani yi' mjocxhuit, jact̄immo' m̄ñjen huen yajnicx. 30 P̄in xyp̄ijctzohuip tijaty, mo'. P̄in xyp̄ijcip hūidi miich mjē'ajtpy, ca' m̄b̄ijctzohuipy jadüg'oc. 31 Nej mdzocy tunipy j̄äy m̄id miich ajcxy, nañ jadu'n miich ajcxy mdunipy m̄id yi' ajcxy.

32 Pen miich ajcxy j̄eyi mdzojccixpy p̄injaty xychojccixp, ¿ti oyj̄äy'ajt̄in jada' miich ajcxy m'ocpaadipy? Nañ jadu'n je pocyj̄äy ajcxy chojcpy p̄injaty yi' ajcxy tzójcip. 33 Pen mdumyb oybi hūidijaty mm̄id ooy mnaym̄igüg'adyii. ¿Ti oyj̄äy'ajt̄in jada' miich ajcxy m'ocp̄aadip? Nañ jadu'n je pocyj̄äy ajcxy tuñ oybi m̄id ym̄igügt̄ijc. 34 Pen myejcp̄ijctzou m̄id je j̄äy hūidibi miich ajcxy mj̄ijp'ijxpy co nañ jadu'n xym̄ohuipy tigatii, ¿ti oyj̄äy'ajt̄in miich ajcxy mdumyb? Nañ jadu'n yi' j̄ibic j̄äyd̄ijc jayejcp̄i tijaty p̄ijctzoy co nañ jadu'n j̄ijp'ijxcixy co ym̄ohuipy tigatii. 35 Miich ajcxy, tzójccix mm̄idzip, m̄i'oyj̄äy'ajt̄icix mm̄idzip, yajp̄ijctzoogix tijaty, e ca' ni ti mj̄ijp'ijxcixipy co ajcxy jac m̄ij mbaadip. Jadu'n miich ajcxy m̄ij mbaadip oy'ajt̄in e mnayd̄ij̄iyb ajcxy je m̄ijpi Dios y'ung. Com Dios pa'ayoodaayb t̄üg'óciy yi' j̄äy ajcxy hūidibi ca' ti j̄äygidägy, etz hūidi j̄ibicj̄äy. 36 Miich ajcxy pa'ayoo migügt̄ijc ajcxy, jadu'n nej mDios Teedy tzajpjoty p̄i ypa'ayoo huenȳt̄im̄p̄inity.

Ca' mmigüg ni ti myaj'ix'ixipy myajpa'ixipy

37 Ca' mmigüg ni ti myaj'ix'ixipy myajpa'ixipy, hūin'it ca' p̄in xy'ix'ixipy xypa'ixipy. Ca' mmigüg mbocy'ixipy, e hūin'it ca' p̄in xypocy'ixipy. Hūinmecx mmigüg, e hūin'it nañ jadu'n Dios myajhūinmeecxip. 38 Mo' mmigüg etz hūin'it miich ajcxy Dios xym̄ohuipy

quipxy ooy tijtäch etz janch yajxon y'újtzity cödinaayb. Com yi quipxi'ñ tibi myajquipxíy, nañ yi' mïd xyquipxhuimbidity.

³⁹ Chi Jesús yajnimay je mayjäy tüg jihuimbit ayuc:

—¿Nej jëbi tüg jäy huintzpi ymigüg huintzpi huijtzyöyñi? ¿Nej ca' mdijy nimetz yjutcögäxixipy? ⁴⁰ Ca' ji ni tüg ixpijcpí huïdi nigí ixpícyip ca'ydi yhuindzin, pen ji pin huädz yjadim'ixpicy najtzpadihuipy yhuindzin.

⁴¹ ¿Na'amy co mic'amy mbocy'ixy mmigüg co hueeni ytundigoy, e miich jac mij ooy mdundigoy, e ca' mjihu'iñybicy? Tim jadu'n nipaady nej jihuïy ti m'ixy pi'cpüx ma mmigüg yhuin, e ma miich mgi'mhuin jac jii by mij quipy, e ca' m'ixy je quipy ma mgi'mhuin. ⁴² Ca' huaad mnimähuipy mmigüg: “Nayyegü miñich püx n'ocyajpidzim maabi mhuin”, e miich ca' m'ixy mij quipy ma mgi'mhuin. Jibicjäy miich. Jayijp miich myajhuädzip mjot mhuinma'ñ, huin'it jëbi mmigüg m'ihuïjip mgapxhuïjip, jadu'n nipaady nej jihuïy ti myajpidzimy je quipy maabi mhuin, jachuädz m'ixigipy e chi jëbi yi pi'cpüx myajpidzimipy maabi mmigüg yhuin.

Je quipy je ytim, yi' mïd ycixpi yaj'ijxcapy

⁴³ Ca' yi' y'oyjäyity huïdi jibic tuumb, nañ jadu'n ca' jibicjäy huïdi oy tuum, tim jadu'n nipaady nej tüg quipy. Ca' ji yi' oyguipy huïdi jibic tim'ajt, nañ jadu'n ni ca' yjibicquipyity huïdi oy tim'ajtp. ⁴⁴ Com ni je' quipy yaj'ijxcap mïd ytim ycixpi. Ca' pin higeri tim tucy ma quipy apymidpi. Nañ ni pin ca' uvas cha'm piy ma aadz apymidpi. ⁴⁵ Je jäy oyjäybi ma yjot yhuinma'ñ yajpidzimy oybi. Je jibicjäybi ma yjot yhuinma'ñ yajpidzimy jibicpi. Huïdibi yhuinmaayb jotjoty huinma'ñjoty yi' ycapxyp.

Je mejtznajxpi poch y'ijx

⁴⁶ Chi Jesús yjacmïañ:

—¿Nej co nigo mïnaangixy: “Huindzin, Huindzin”, ni ca' ajcxy mdúngixy huïdi nyajnimaygixpy? ⁴⁷ Tüg'óciy jäy huïdi xyñimimbich etz xymidoohuï ñch n'ayuc etz cuyduñ, ñch nyajni'ixihuipy pin je' ymidügnax. ⁴⁸ Quipxyiyb tüg yëydijc huïdibi ytijccoyp ma tzaa nïcxy, chi nidajiy ooy cïcy, chi pidägy poch'ijx tzaa nïgixy, co mijñi ycomy nimiñ je tijc, mïd tüg'óciy ymijaa jayajpidiga'ñ je tijc, e ni ca' jadu'ñyi yajyücxy, com tzaagixy anajty ypojtztzooñity. ⁴⁹ Yi jäy huïdi midoob ñch n'ayuc e ca' cuyduñ, mïdquipxy jadu'n yi' nej tüg yëydijc co ti ytijccojy. Ni ca' poch cïcy ypojtztzooñity, jëyi naaxhuingixy nidajiy hueeni. Co je mijñi ymiñ mïd ymijaa, chi yajpidigy je tijc, chi oy yhuindigoydäy.

7

Jesús yajtzögy tüg mijtungmïdpi Romano ytumbi

¹ Co Jesús ycapxtaay ymiydactaay mïd je mayjäy huïdi anajty jim amido'ijtp, chi ytigiy jim Capernaum. ² Jim anajty tüg Capitán tüg ytumbi hue' anajty píjcp, janch tim ögaanip anajty, e je soldado huindzin ooy anajty tzocy je ytumbi. ³ Co je capitán ayuc midooy jadu'n nej Jesús ytuñ, chi quejxy judío mijjäydijc, huen nïcxy minuucxtaaccixy Jesús co je ymïipy ma ytijc yajtzögüyb je' ytumbi. ⁴⁻⁵ Chi je mijjäydijc ajcxy ymiñ ma Jesús, chi ajcxy cohuaniy ooy, pijctzou may'ajt, nimay:

—Jadayaabi capitán ymïhuaad co mbubedipy, com yajmij'ajtpy ñch ajcxy ngajp, ti cojy ñch ajt naymujctac.

⁶ Chi Jesús ñcxy mïd je' ajcxy. Co ajcxy mïhuingooñ je tijc, chi je capitán quejxy ymigüg huen nïcxy jipcobadiy Jesús, nimähuipy:

—Huindzin, ca' nej mnayjihuïy, ca' ñch mïhuaadity co mdigihuipy ma ñch ndijc.

⁷ E paady ca' ñch njot ti mïctuñ co ñch miich ci'm nïcx n'ixtäy. Jëda'ajty miich nigoo capx, e ti anajty ndumbich chögy. ⁸ Nañ jadu'n ñch nmïdich soldados ajcxy huïdi

ajcxy xycapxcöbïjcpïch. Nïmäyïch tüg: “Nïcx”, e nïcxp; nïmäyïch jadüg: “Min”, e mimb; nïmäyïch ndumbï: “Tun jada”, e ytumyb.

⁹ Co Jesús midoy nej je capitán ymïnañ, chi jïhuïy ooy, chi ni'ïjxhuimbïjty nïmay ajcxy huïdi pamiïnïp:

—Ich miich yim nïmaaygïxyp co ca' nbaadyïch Israel jäy huïdibi xymïbïjcpïch jadu'n nej jadayaab agatz jäy.

¹⁰ Co ajcxy je quexyöybï yhuimbïjtcïxni ma je tïjc, chi oy páatcïxni je tumbï ti anajty y'agïdägy.

Jesús yajjugypïjcy tüg co'ögytöxyjäy y'ung tïbï anajty y'ögy

¹¹ Chi jadu'n yajty huïn'tï xï co Jesús anajty nïcxy ma tüg cajp huïdi anajty yxï Naïn. Mïïd anajty nïcxy jadyï ydiscïpulos ajcxy etz mayjäy. ¹² Co yhuïngooñ ma anajty ycajp tïgïhuaani, chi minaybaati jäy ajcxy, nïcxy anajty ajcxy tüg öcpi yajnaaxtïgïygyxy, huïdi anajty ungdaï tügpajc y'ung'ajtpy. Hue' je' anajty co'ögy je töxyjäy, e mïïd anajty nïcxy maycajppjäy. ¹³ Co je Huïndzin Jesús ijxy, chi pa'ayogoty je töxyjäy, chi nïmay:

—Ca' myäxy.

¹⁴ Chi Jesús ymïjhua'cy, nïdoñ je öcpi cajón. Chi ajcxy ytïnayxïjpy je huïdi anajty ajcxy öcpi cïyñïcxp. Chi Jesús ymïnañ:

—Yëdyjc, ïch miich yam nïmaayb, pïdïg.

¹⁵ Chi je yëdyjc ïñayïgy huïdi anajty ti y'ögy, e ytïgïy mïydaacp. Chi Jesús yajcïdïgïyñï je' ytaj. ¹⁶ Chi ajcxy nidüg'ócïy ooy ñay'adzïgïygotï, e Dios jäymejch cömay, ymïnaangïxy:

—Tüg mïjpi Dios tïy'ajtmïtpï cham yajpatp ma ïch ajt.

Nañ jadu'n ajcxy ymïnaangïxy:

—Ti Dios ni'ïjxcïdägy yï yñaax ycajp.

¹⁷ Ooy Jesús yajcömay ma tüg'ócïy Judea naaxjot, etz ma tüg'ócïy jac huïnduy agonbï naax cajp.

Je Juan je Bautista yquexyöybï

¹⁸⁻¹⁹ Chi je jäy ajcxy huïdi anajty Juan je Bautista yaj'ïxpïjcpy nïmïydactay jadu'n nej mïïd ytunï yjajti Jesús. Chi Juan huooy metz yï' ydiscïpulos ajcxy, e quejxy ma Jesús yajpaady. Chi Juan nïmay co huen nïcxy amïdoogïxy Jesús, pen yï' je' je Cristo huïdi anajty mïinaam, o pen n'ahuïjxpy ajcxy huïngbï. ²⁰ Chi je Juan yquejxyöybï mïïñ ma Jesús nïmay:

—Yï Juan je Bautista ïch ajcxy ti xyquéxyïch ma miich amïdohua'ñ pen miich je' je Cristo huïdi mïnaamb, o ¿n'ahuïjxypïch ajcxy huïngbï?

²¹ Tïm huïn'ïtïy Jesús ooy mayba'mjäy yajtzoocy. Yajtzoocy nañ jadu'n huïdi anajty ajcxy ooy mïj yuu mïj pa'm yaj'ayoyïï, etz nañ yajtzoocy pïnjaty anajty ca'oybï mïïd ma yjot yhuïnma'ñ. ²² Chi Jesús je Juan yquejxyöybï nïmaayï:

—Nïcx nïmaaygïx je Juan jadu'n nej ti m'ïjxcïxy ti mmïdoogïxy, co yï huïntzpi ti yhuïndïcxïgy, yï tecyma'tpi ti yöyïgy, yï nïbützpa'mmïïdpi ti chögy, je cönatpi ti ymïdohuïccïxy, je öcpi ajcxy ti yjugypïjcy, e ngapxhuäcxyïch oybï ayuc ma ayooobtïjc. ²³ Jotcuyc yï' ajcxy huïdi ca' huïnma'ñyïtïgooygïxy mïïd ïch ycïxpi.

²⁴ Co je Juan yquexyöybï yhuïmbïjttay, chi Jesús nïmïydaccoty je Juan ma je mayjäy ajcxy, ymïnañ:

—Co ajcxy ti m'oy mïjtgïdïdum, ¿ti ti m'ïjxcïxy? ¿Nej ti m'ïjxcïxy tüg jäy ametz jotmetz, jadu'n nejhuïy tüg nãhuaax huïdi pojmiïmb pojxïj? ²⁵ Chi jada', ¿ti oy ti m'ïjxcïxy? ¿Tüg yëdyjc huïdi mïïd oy yhuït yxöxyïty? Yï jäy ajcxy oy yxojxypï huïdi agujc jotcuyc tzïnaaygïxp hue' ajcxy yajpaady ma yï rey ytïjc. ²⁶ ¿Ti ajcxy ti m'ïxy jïm mïjtgïdïdum? ¿Tüg jäy huïdi Dios ytïy'ajt mïïd? Janch ti m'ïjxcïxy tüg Dios ytïy'ajtmïïdpi, etz jacnïgï

ymíjity je' ca'ydi Dios y'ayucnajtzcaxi'iybi huidi jecy'ajty tzinay. ²⁷ Je' jada je jäy huidi Dios ñigapxyp ma ñecy ma Dios jadu'n ymínañ:

Cham nguejxyich ñch nguexyöybi jayijp ma miich, je' yaj'oyíhuip je jäy ajcxy yjot yhuinma'ñ mïd ñch ycixp, tim jadu'n nipaady nej jihuüy jäy tü'aa yaj'oyíy co rey ymina'ñ yjäda'ñ.

²⁸ ñch miich ajcxy yam nimaayb co huudijaty ajcxy töxyjäydijc yajpi'c'ajtpy, ca' ji ni tüg Dios y'ayucnajtzcaxi'iybi huudibi jacnigi ymí jity ca'ydi Juan, je Bautista. Chi jada' je jac mutzpi huidi jüby tzajpjoty yajpaatp ma Dios y'ane'my, jacmij je' ca'ydi Juan.

²⁹ Co ajcxy je mayjäy jadu'n midoy nañ jadu'n je yajcogüejtpidijc ajcxy huidi anajty nübéjtcixy ma Juan, chi ajcxy mínañ co Dios ytudägyity. ³⁰ E je fariseos ajcxy etz je escribas ajcxy huidi anajty ca' nübéjtcixy ma Juan, ca' ajcxy mijpidacy huidi anajty Dios ytunamy mïd je' ajcxy ycixpi. ³¹ Chi je Huindzin Jesús ymínañ:

—¿Ti mïd nyajquipxíhuibich jadayaabi jäy huidi tzinayb ma jadachambi tiempo? ¿Huidi mïd nyajtügíhuibich? ³² Jadu'n nej pi'ctijc huidi ajcxy iyíyb ma jäy yjuygixy ytooccixy. Mijhuan mijjihuygixy ymígügtijc: “Ti njayajxüxich flauta e ni ca' ti m'éjtzciy; ti nja'ñhuí ajcxy ñy jotmaymïdpi, e ca' ti myaaxciy.” ³³ Chi Juan je Bautista ymíñ, e je' ca' anajty cay, ni ca' vino ügy, chi miich ajcxy mínaangixy co Juan ymïd ca'oybi. ³⁴ Chi ñch, je jäy huidi tsoon tzajpjoty, nmiñich, chi caaybich uucpich, e miich ajcxy mínaangixy: “Ijxcix, cha tüg yéydijc janch cax janch vino uucp, huidi migüg'ajtpy yajcuéjtpidijc etz pocyjäydijc.” ³⁵ Je t'y'ajt ji je' ñiguëxigy ma je pinjaty nigapxp nimíydaacp t'y'ajt.

Jesús ma Simón je fariseojäy ytijc

³⁶ Chi tüg fariseojäy may'ajt pijctzoy, co Jesús anajty mïd ycaya'ñ. Chi Jesús ytigíy ma je fariseojäy ytijc, chi ññay'ahuíy ma mesa. ³⁷ Chi jim anajty tüg töxyjäy huudibi anajty jibic tzinaayb jibic jugy'ajtp ma je jimbi cajp. Co je' nejhuíy jüby Jesús ma fariseojäy ytijc ññay ma mesa, chi mímíñ tüg quiig aceite huudibi ooy oy xuugy, chi midigíy tigoty. ³⁸ Chi ypiguetz'ahuíy ma Jesús ytecy ymíj, e chi yajxooci Jesús ytecy mïd huinní e yajpöt mïd ycöhuay, chi yajjaaxy je aceite huidi ooy oy xuugy. ³⁹ Co jadu'n ijxy je fariseojäy, je' huudibi anajty ti huoy Jesús, chi jot'ajti ymínañ:

—Co ixypy jada Jesús y'ocjéjity Dios yt'y'ajtmïdpi, y'ijxcajpy ixypy pin jäy nejpy jäy yí töxyjäy huudibi nidoonip co yí yjibictzinäy yjibicjugy'aty.

⁴⁰ Chi Jesús ymínañ:

—Simón, cham ñch tüg ayuc nmídidyich huidi nyajnimähuamy.

Chi je' y'adzooy:

—Yajnimaaaygich, Huindzin.

⁴¹ Chi Jesús ymínañ:

—Tüg comeñjyay ymïd anajty metz jäy huidi ti ñuucxy. Tüg jäy anuucxy migoox migo'px denario meeñ, e je jadügpí anuucxy huixchigui'px majc. ⁴² Com je' ajcxy ca' anajty mïdity ti mïd cuedip, chi je comeñjyay huinmecxy nimetz. Miich ocnímaaygich, ¿je metzpi jäy huidi nuucxy, huudibi je' nigi chojpy?

⁴³ Chi Simón y'adzooy:

—Hue' n'a'ixíyich je tibi huinmecxy jac'anaxy.

Chi Jesús ymínañ:

—Ti mdiygapxy.

⁴⁴ Chi Jesús ni'ijxhuimbijty je töxyjäy, e nimay Simón:

—¿Nej m'ijxyp jadayaabi töxyjäy? Co ndigíyich ma mdiyc, ca' miich nñ xymooyich co ndecy nbújibich. Jadayaabi töxyjäy ñch ndecy ti xypújip mïd yhuinní, e ti xyméexyich ndecy mïd ycöhuay. ⁴⁵ Ca' ñch miich ti xychücy. Jada töxyjäy jadu'n nej ti ytijc tigíy, xychüxtíy ñch ndecy. ⁴⁶ ñch miich ca' aceite mbidägy ma ñch ngohuajc. Jada töxyjäy ti xyajjaaxi ndecyich aceite huidi ooy oy xuugy. ⁴⁷ Paady ñch miich nyajnimäy co jada

töxyjäy huinmeecxi yi' ymaybocy, co tibi oyhuinma'ñ yajtuñ cixyjot huinijot. Pinjaty hueeni ypocy yajhuinmecxi, hueeni yi' chójcin yajniquëxígy.

⁴⁸ Chi Jesús je töxyjäy nimay:

—Ti miich mbocy yajhuinmecxtäy.

⁴⁹ Pinjaty anajty iñaayb ma je mesa ñayñimáayigixy miñ xyipy:

—¿Pin jäy jada jada' co nañ yhuinmeecxipy jäy ypocy?

⁵⁰ Chi Jesús nimay je töxyjäy:

—Ti m'alma ñidzögy co ti xymibicyich. Nicx jotcuyc.

8

Töxyjäydijc huidibi anajty Jesús pubejtp

¹ Co jadu'n yjajti, chi Jesús ñicxy ma tüg'óciy je mij cajp etz mutz cajp, capxhuäcxy je oybi ayuc maabi Dios y'ané'min. Je nimajmetzpi ydiscípulos ajcxy mïd ñicxy. ²⁻³ Etz nañ ymïdnicx nijëjity töxyjäydijc huidi anajty Jesús ti yajtzögy huidi ca'oybi anajty ymïd etz jac tijaty pa'm. Hue' je' ajcxy anajty je María je töxyjäy huidi anajty xijip Magdalena, je huidibi Jesús yajpidzimi huixtujc ca'oybi ma je'; etz Juana, je huidibi ñäy anajty xijip Chuza, e je Chuza hue' je' je rey Herodes ytungmïdpi; etz Susana, etz jacjadyii ajcxy huidi anajty ajcxy pubejt Jesús mïd tijaty anajty ajcxy ymïd.

Je niipi y'ijxpejt

⁴ Co mayjäy ooy ñayyöymujc ma Jesús yhuinduu huidi tsoon ma tüg tüg cajp, chi Jesús nimay je mayjäy ajcxy:

⁵ —Cha tüg ayuc nyajnimähuaangixy. Jadu'n jäy tüg choñ niipi, ñicxy trigo tïm huijpi. Co je trigo tïm huijy, chi nijëjity ypajc oy ycäy mïjtügujc, chi je jäy ajcxy yajhuägpejty, e huidi ca' yajhuägpejty, chi joon piihuígy. ⁶ Chi nijëjity trigo pajc oycäy ma tzaa ñicx. Co ymujxy chi je' ytich, je' co anajty naax ca' yxoogity. ⁷ Chi nijëjity trigo pajc oycäy ma apyjot, chi ymujxy quipxy mïd apy'ung, chi y'ujtz'o'ctay. ⁸ Chi nijëjity trigo pajc oycäy ma je naax oybi huinnätzcujc, chi ymujxy, chi yeectzooñ, ytïm'ajty oyjaty, tüg trigo pajc migo'px oyco'ity.

Co Jesús je miydägi yajmay chi yjactimcapxcoty, yminañ:

—Pin midohuamb jada ayuc, huen midooy.

Nej yhuimbizimy je niipi y'ijxpejt

⁹ Chi je discípulos ajcxy y'amidooy:

—¿Nej jada jadu'mbi jihuimbit ayuc yhuimbizimy?

¹⁰ Chi Jesús yminañ:

—Miich ajcxy jaydëbi mnejhuíhuipy huidi Dios ñigapxpy ñimiydacpy coyüch'amy ma y'ané'min ycötúcin. Jacjadyiibi jäy jihuimbit'amy nyajnimayich, jaydëbi pinjaty huidi ijxp ca' ajcxy y'ixipy, etz pinjaty midoob, ca' ajcxy mido'mbigipy.

Jesús capxticxy je niipi y'ijxpejt

¹¹ Jadu'n je jihuimbit ayuc yhuimbizimy: Je trigo pajc Dios je' y'ayuc. ¹² Je trigo pajc tibi tüguc ycäy, je' je' jadu'n nej jäy huidi midoob Dios y'ayuc, chi mic'amy ñiminyii je ca'oybi, e piibidzimdäy je Dios y'ayuc ma yjot yhuinma'ñ, ca'ydi mibic etz ca'ydi y'alma yajnidzögyii. ¹³ Je trigopajc huidi cähuí ma tzaajot, je' yi' ajcxy huidi je ayuc midoob, chi cöbicy jotcuyc, chi je' ca' ytictztigiy, tzojccixy y'ocmibicy, co agapxíyb paaty chi ixmajtzní. ¹⁴ Je trigo pajc huidi ti cähuí apy'agujc, je' je' ajcxy huidibi midoob, chi co ñicxni jäy digooyni Dios y'ayuc mïd jotcuyc'ájtïn tzinaayin etz jugy'ájtïn etz comeeñ'ájtïn, e chi ca' Dios y'ayuc yhui'my ma yjot yhuinma'ñ. ¹⁵ Je trigo pajc huidi cähuí ma oyñaax huinnätzcujc, je' ajcxy huidi oy etz tudägy yjot yhuinma'ñ mïdity. Chi je Dios y'ayuc midohuim'y, e oñdägy'amy Dios y'ayuc ymayiy ma yjot yhuinma'ñ.

Je lámpara ñi'ijxpejt

¹⁶ Co jáy ajcxy jündicxi'ñ nöctzoy, chi ca' ajcxy cöjupy müid tu'tz, nañ ca' huaad pidägy cijx pätcip'py, hue' janchtiy pidaaccixy ma jündicxpejt, co pin ytigiy jëbi icy je jin. ¹⁷ Ca' ni pin ayüch tunipy e nicxy ycayajnejhuïy, ca' ni pin ti tunipy ameech e nicxy ycaniquëxigy. ¹⁸ Paady miich ajcxy midoogix yajxon co pin tijaty müid, jacyajmöhuiy yí. Pin ti camüid, yajpigipy je' huidi anajty yjamüid.

Jesús ytaj etz je jugymigüg

¹⁹ Chi Jesús ytaj etz y'uch ajcxy ñimiini, ca' ajcxy nimejch Jesús yajxon müid mayjäy ycixpi. ²⁰ Chi Jesús yñimaayi:

—Cheeby mdaj etz m'uch ajcxy tiba'y, miich ajcxy xyjamigapxam.

²¹ Chi Jesús yminañ:

—Yi jáy ajcxy huidibi Dios ayuc midoohuiy etz cuyduunip, yí ich ndaj'ájtypich etz n'uch'ájtypich.

Jesús yajxemy je poj etz je ñi co anajty chachpidigy

²² Chi tüg tecy yajti Jesús ytigiy ma tüg barco müid ydiscípulos ajcxy, chi Jesús yminañ:

—Tzoc jim'amy ñinaxy náxim.

Chi ajcxy choñ. ²³ Chi ñigujc anajty nícxcixy co Jesús ymi'ögy. Chi tüg mic poj miñ ma je mejy. Chi je barco ñi yajtigiyiyi, janch yinjaty jahueenjaty ycaquiñ. ²⁴ Chi ajcxy Jesús nimijhuägy, tijyücx yajcxy nimaaygixy:

—¡Huindzin! ¡Huindzin! Cham ajt n'ocquuinim.

Co Jesús oy ymäyhuiy, chi jipcogapxiy je poj etz je mejy co anajty chachmijjëtzpety ma barco. Chi je poj yhuäcxijptay, y'amoonday. ²⁵ Chi Jesús yminañ:

—¿Ma miich ajcxy je mmibícin?

Chi ajcxy yjanchchigygoty janch yhuinmay ajcxy ñayñimáayigixy miñ xyipy:

—Pin yëdyjc jada jada' co je poj etz ñi jiguexy, etz yajhuäcxipy, etz ycapxycöbigyii.

Je Gadarajäy huidibi anajty ca'oybi müid

²⁶ Chi ajcxy ymejch ma je gadarenos naaxjot, huidi hui'm jim'amy ñinaxy ma je Galilea mijlaguunba'. ²⁷ Co Jesús ñibidzimy, chi jipcobadiy tüg yëdyjc huidi anajty ti choñ ma je Gadara cajp. Je' anajty ymüid ca'oybi, ti anajty yjejni maabi ypadyii. Ca' je' anajty huit yajtuñ, nañ ni ca' anajty chinäy ma yijc, öcpijut anajty yajtzinähuiyb. ²⁸ Co je' ixpaty Jesús, chi yaaxqueecy, e ycoxtinay'ahuïy ma Jesús yhuinduu, yminañ janch mic:

—¿Ti ich miich co xyñimiiñich, Jesús, tügpajc mijpi Dios y'ung? Tun may'ajt ca' nijot xychachchaachtúñich.

²⁹ Jadu'n minañ com co anajty Jesús ixquexy je ca'oybi ma je jäy, ti anajty yjejni ma je ca'oybi anajty tzach'ane'my je jäy. Coxoch anajty ymigügtijc ymüid'adyii müid cadena. Janch ypojtpy cadena, chi ca'oybi anajty yajnicxyii mijtigüduum. ³⁰ Chi Jesús y'amidooy je locijäy:

—¿Ti miich mxii?

Chi je ca'oybi yminañ:

—Ich nxii Legión (hue' yhuimbidzimy nimay).

Jadu'n minañ com nimay anajty ca'oybi ti ytigiygixy ma je jäy. ³¹ Chi je ca'oybi may'ajt pijctzoy ma Jesús co ca'ydi yquexyii ma ayoodactuuby. ³² Jim anajty tüg quepy idzim chachjüxcixy ma je ujtzjot. Chi je ca'oybi may'ajt pijctzoy co huen yajtigiyihuiy je' idzim. Chi Jesús ni'adzooy. ³³ Co je ca'oybi ypidzimy ma je jäy, chi ytigiy ma je may'idzim. Huin'it je may'idzim ñayñajtzibibiydaayi ajcxy ma tüg ahuoc, chi oy ajcxy ycadäy nijoty, chi y'ögtay.

34 Chi je idzim cuend'ajtpi ajcxy co ixxy jadu'n nej ti yjadyii mïid ajcxy y'idzim, chi ajcxy yqueecy, oy nimiyaaccixy cajpjoty etz majaty tundac. 35 Chi mayjây ajcxy chooñ oy ijxcixy jadu'n nej anajty ti ytunyii ti jadyii, oyja'tcixy ma Jesús. Chi je mayjây ajcxy paty je yëydijc, tiibi anajty ca'oybi ñibidzimyii ycöbidzimyii, iñây ma Jesús yhuinduu, huit mïid etz huijy quejy, chi ooy je jây ajcxy chigiiy. 36 Chi pinjaty ajcxy ixx mïid miydacy jadu'n nej yi' choocy, je jây huidi anajty ca'oybi mïid. 37 Huin'it tüg'óciy je mayjây ma gadarenos naaxjot etz jadyii cajp huinduy agonbi, chi ajcxy may'ajt pijctzoy ma Jesús co huen jihuägy ma je' ajcxy, co anajty ooy chigiiygixy. Chi Jesús ytigiiyñi barcojoty yhuimbijtni. 38 Chi je jây tiibi anajty ca'oybi ñibidzimyii ycöbidzimyii pijctzoy may'ajt co mïid'idan Jesús. Chi Jesús mïid capxycijxy, nimay:

39 —Nihuimbit mdijc, etz nimiydäg jada mijpi tung huidibi Dios ti tuñ mïid miich ycixpi.

Chi je' ñicxy capxhuäcxy je tiy'ajt cajp cajp jadu'n nej anajty mijhuinma'ñ Jesús ti tuñ mïid je' ycixpi.

Je Jairo ñixx etz je töxyjäy huidibi Jesús yhuitpa' nïdoni

40 Jadu'n yjajti co Jesús yhuimbijty co chooñ Galilea, chi je jây ajcxy cöbijcy Jesús janch agujc jotcujc, com nidüg'óciy anajty ooy jïjp'ijxcixy. 41 Chi tüg yëydijc huidi anajty yxii Jairo huidibi anajty mijtungmïid ma judiojäy ñaymujctac ymiiñ ma Jesús, chi minucxtacy Jesús pijctzoy may'ajt co huen nicxy ma je' ytijc. 42 Jairo ymïid anajty tügpaic ñixx, hue' anajty yjimijt majmetz, janch tim ögaanip anajty. Co Jesús ñicxy mïid je', chi janch mayjây anajty chach'adijiiy chach'agodiiy.

43 Chi tüg töxyjäy huidi anajty yxii ybo', ca' anajty y'oc-huäcxijpni, mimajmetz jimijt anajty cujc jadu'n mi'ijtni. Ti anajty ymeeñ yajtundäy ma je tzojdumbi ajcxy, etz ni pin anajty ycayajtzögyii. 44 Chi je töxyjäy nimijhuägy je Jesús, chi nïdoni yhuitpä. Janch mic mic je yxii ybo' oy yhuäcxipy.

45 Chi Jesús yminañ:

—¿Pin xyñidoñ ich nhuit?

Chi ajcxy y'adzooy co ca' pin. Chi Pedro etz tüg'óciy mïid je' yminañ:

—Huindzin, jây ti xy'adijiiy ti xy'abodiiy etz miich mina'ñ: “¿Pin ti xyñidoñich?”

46 Chi Jesús yminañ:

—Nidügti ti xyñidoñich. Nnejhuüybich co mïid nmic'ájtich ti nyajtzögyich pinjaty.

47 Co je töxyjäy jihuüy co ca' coyüch yhuima'ñ, chi nimiiñ janch tziyuuyb. Chi yhuindacy ma Jesús yhuinduu, chi capxpizimiy mayjây'agujc ti ycixpi anajty co ti nïdooni Jesús yhuitpa', e co anajty mic'amy ti chögy. 48 Chi Jesús nimay je töxyjäy:

—Töxyjäy, ti mdzögy co ti xymibicyich, nicx jotcujc.

49 Yam Jesús anajty ycapxpy, co ymiiñ tüg jây huidi anajty ti chooñ ma Jairo ytijc; je Jairo nihuindzin'ajtp anajty je judiojäy naymujctac, chi nimaayi:

—Ti y'ögy miich mnixx, ca' mjac'amayiiy nigii yi Huindzin Jesús.

50 Co Jesús jadu'n mïdooy, chi yminañ:

—Ca' mdzigiiy, mibijcich janchtiy, etz tzögip yi mnixx.

51 Co Jesús ytigiiy ma je tijc, chi ca' a'ixiiy nicxy ytigiiy hueñypinity mïid je'. Jëyi Pedro, Jacobo, Juan etz je töxy'anäg ytaj yteedy ytigiiy mïid Jesús. 52 Chi tüg'óciy je mayjây ajcxy janch yaaxp, janch ñé'mgixy mïid je töxy'anäg ycixpi. Chi Jesús yminañ:

—Ca' myaaxcixy, ca' yi' ögity, maab yi'.

53 Chi nigoob ajcxy nixiicy com ti anajty nejhuüygixy co ti y'ögni. 54 Chi Jesús majch je töxy'anäg ma yci', chi migapxy mic, yminañ:

—Töxy'anäg pidig.

⁵⁵ Chi je' yjugypijcy, e mic'amy ypidägy. Chi Jesús ymíañ co huen yajcaaygixy yaj'uuccixy. ⁵⁶ Chi ytaj yteedy ajcxy ooy chigíy yjihuíy. Chi Jesús nímáy co ca' huaad pinjaty miidmiydägy jadu'n nej ti ytuñyí yjadyí.

9

Jesús quejxy ayuccapxhuäcxp je nimajmetzpi ydiscípulos ajcxy

¹ Co Jesús yajyöymujctay je ni majmetzpi ydiscípulos ajcxy, chi moy je mic'ajt jaydëbi yajtzögipy pa'mjäy, etz moy ajcxy nañ jadu'n cötújcín co ajcxy ixquexipy je ca'oybi. ² Chi quejxy je' ajcxy ñicxy capxhuäcxixy jadu'n nej Dios y'ane'my, etz yajtzoocixy pa'mjäy. ³ Chi Jesús ymíañ:

—Ca' ni ti tü'amgixpi mminíxcixy; ni mgaminícxip mdajc, ni mmorral, ni mgaagy, ni meeñ, e ni mgaminíxcixipy ajcxy metz mhuit. ⁴ Huen tím huídi tíjc ma anajty mdigíygixy, jim ajcxy huí'mgixipy, e jim ajcxy nayoöyhuäcxíyb. ⁵ Hueñyama'amyíty ma ca' jäy xycöbíccixy, co ajcxy mbídzímgixipy ma je' cajp mhuinnéjpcixipy mhujnáaxcixipy je naaxjoc ma mdecy. Jada je' tíy'ájtíp co Dios tzaachytunipy yí jadu'mbi jäy ajcxy.

⁶ Chi ajcxy ñayoöyhuäcxtaayi, ñicxy ajcxy cajp cajp capxhuäcxixy je oybi ayuc, etz yajtzoocixy pa'mjäy hueñytimma'ámyíty.

Co Juan el Bautista y'ögy

⁷ Je rey Herodes co nejhúy jadu'n nej Jesús anajty mijhuinma'ñ tuñ, chi ooy anajty tzachnejhuíhua'ñ pín je' anajty. Com nijéjity jäy anajty ymíañgixy co ti Juan jugypicy. ⁸ Chi jacnaagíty ymíañgixy co Elías ti ñayguëxígyí, e jacnaagíty ymíañgixy co tüg Dios y'ayucnajtzcaxíybí je' ti yjugypicy huídi jecy'ajty octzínaybi. ⁹ Chi Herodes ymíañ:

—Ích yí ni'ane'mdíy co huen ajcxy Juan ycohuajc yajmíñajci. ¿Pín jada jada' huídi ích nmídooybích co tzachnimíydaaccixy?

Herodes ooy anajty ja'ixa'ñ Jesús.

Jesús yajcay migoox mil jäy

¹⁰ Co je apóstoles ajcxy yhuimbijty, chi yajmídmíydactay ajcxy Jesús tüg'óciy tíbi anajty túngixy. Chi ac jëyí ydiscípulos míd'ajty Jesús migtigíduum huígon ma tüg cajp huídi yxí Betsaida. ¹¹ Co je mayjäy ajcxy nejhúy, chi ajcxy panícxí Jesús. Chi Jesús je mayjäy cöbíctay etz yajmídmíydacy ajcxy Dios y'ayuc y'tíy'ajt nej ané'mín cötújcín mídity. Jesús nañ yajtzöcipy anajty huídijaty yajtzoíhuáam.

¹² Co oy chu'íyñí, chi ymíjhuägy je nimajmetzpi ydiscípulos ajcxy ma Jesús, chi ajcxy nímáy:

—Capxycíxni míd jadayaabi mayjäy ajcxy, jaydëbi ajcxy ñicxipy ma yí cajp huídi huínduy agon yajpaatpi, huen nícxy ixtaaygixy játtac etz jim ajcxy paadípy caayín uucín. Com hue' jada it ma ích ajt yam nyajpaatím migtigíduum.

¹³ Chi Jesús ymíañ:

—Mooygíx miích yí' ajcxy ycaayín y'uucín.

Chi je' ajcxy y'adzooy:

—Jëyí ích ajcxy nmídidyích migoox tzajcaagy e mejtz acx, nígo co ca' ích ajcxy njuy caayín uucín míd jadayaab mayjäy.

¹⁴ Hue' anajty oy nímigoox mil je jäy. Chi Jesús nímáy je discípulos:

—Yaj'ixtaaccix ajcxy yí mayjäy.

¹⁵ Chi ajcxy jadu'n cuyduuñ, yaj'ixtactay ajcxy je mayjäy. ¹⁶ Chi Jesús conígy je migooxpi tzajcaagy, etz je metzpi acx, chi ypa'tíjxy tzajpcíxy conuucxy je tzajcaagy etz acx, huín'it tújc-huäcxy moy je' ydiscípulos ajcxy, huen yajhuäcxixy ma tüg'óciy mayjäy.

17 Chi ajcxy ycaý cüxyi, huin'it ajcxy yajmujcy je tzajcaagy yconaxy etz je acx yconaxy majmetz cach.

Pedro capxypidzimy co Jesús yi' je' je Cristo

18 Chi jadu'n yjajti co Jesús anajty ycapxtägy ahuingujc müid je' ydiscípulos ajcxy, chi Jesús je' ajcxy y'amidoý:

—¿Pin ich jäy xytijy?

19 Chi ajcxy y'adzooy:

—Nijëjity jäy xytijy co müich je Juan je Bautista; nijëjity ymınaangixy co müich je' Dios y'ayucnajtzcaxiibi huidi jecy'ajty tzınay e ti yjugypicy.

20 Chi Jesús ymınañ:

—¿Müich ajcxy, pin ich müich ajcxy xytijcixy?

Chi Pedro y'adzooy:

—Dios yCristo.

Jesús capxypidzimy co y'öga'ñ

21 Chi Jesús pidacy ané'mın etz cötújcın co ca' ajcxy ni pin yajnimähuip co yi' je' Cristo.

22 Chi Jesús ymınañ:

—Ooy ycopícyity co ich, je jäy huidi tzoön tzajpjoty, canaag nax ayo'n nbáadibich, ca' xymijpidägibich je mijjäydijc, je teedy tungmüidpi, etz je' ajcxy huidi yaj'ixpicy Dios ñecy, e co n'ögip njugypigípyich codugüg xii.

23 Chi Jesús nimay ajcxy nidüg'óciy:

—Pen ji pin xypanicxa'ñich, huen jäydgoydäy yci'm tzójcın etz huen xypanicxyich jabom jabom, oy nej ytimyjadipy ytimy'ayoohuipy, tim nipaady nej jihuiy ti cabigy mgruudz jabom jabom etz pajamgich. 24 Huen pinjäy huidibi ca' yega'ñ yi yjugy'ájtın ma yi o'cın müid ich ycixpi, hue' je' yajtigoyamy yi' yjugy'ájtın. E huen pinjäy huidibi yegamy yjugy'ájtın ma yi o'cın müid ich ycixpi hue' je' ypadamy yi jugy'ájtın. 25 ¿Ti tüg jäy ypatpy, pen ti paady tüg'óciy cohuit'ájtın comeñ'ájtın ya naaxhuiñ e nayyajtigoyii, etz ca' y'alma yajnidzögy? 26 Yi jäy ajcxy pinjaty xymidzöydünibich n'ayuc, ich je' je jäy huidi tzoön tzajpjoty, nañ nmıdzöydunıybich je' ajcxy co anajty nhuimbityich ya naaxhuiñ, müid ich n'ané'mın etz nmic'ajtich etz nDéedyich y'ane'm'ajt, etz ymic'ajt, etz müid je ángeles ajcxy ymic'ajt huidibi huadz yjot yhuinma'ñ. 27 Janch ich müich ajcxy nimäy co ji jäy ma müich ajcxy huidibi ixipy Dios y'ané'mın jayıjp ca'ni anajty y'ögy.

Jesús yajtigach je ñinıcx

28 Chi miductujc xibi maabi anajty jada ayuc jadu'n capxy, Jesús huodzooñ Pedro, Juan etz Jacobo, chi müid'ajtpy jim ma tüg copjıjp Dios mübijctzoob. 29 Yam anajty Dios ooy mübijctzoy, co Jesús yhuiñyjıjp oytigach, e je yhuıt yjajty janch poob janch adıcxp.

30 Chi metz jäy ñayguëxici, müidgapxy müdmıydägy Jesús, Moisés je' anajty etz Elías.

31 Huidi ajcxy naygëxici janch jühuidityi anajty ajcxy je tücxın jájın müidity, nigapxcixy nimıydaaccixy je o'cın huidi Jesús ypadamy jim Jerusalén. 32 Pedro, Jacobo etz Juan ooy anajty ajcxy chachmähuanı, chi ajcxy mü'ögtigooy. Co oy ymäyhuijicixy, ijxy ajcxy Jesús y'adıcxın y'ajajın, etz nañ jadu'n ijxy ajcxy je nimetzpi jäy ajcxy huidi anajty Jesús müdmıydäcpy. 33 Jadu'n yjajty co yi jäy ajcxy puyöyduutni Jesús. Chi Pedro Jesús nimay:

—Huıdzın, jotcuyc ich ajt ya. Tzoc tugüg tijc yaj'oyıym, tüg müich mjëdüby, jadüg Moisés jëdüby, etz jadüg yi Elías jëdüby.

Pedro ca' anajty nejhuıy ti ycapxpy. 34 Yam niği anajty ycapxy co joc ñaaxcidacy huidi yajnidıgoy je' ajcxy. Chi ajcxy ooy chıgıy co oy joc yajnidıgoydáayıgıxy. 35 Chi tüg ayuc yajmıdooy ma je joc ymınañ:

—Ich jada n'ung'ajtpy, ooy ndzocyich njihuiyich. Amıdo'ıjti müich ajcxy yi' y'ayuc.

³⁶ Co je ayuc y'amoñ, chi ajcxy ijxy Jesús naydüg yhui'my, chi ajcxy nañ jadu'n amoñ. Huin'it xii ni ca' ajcxy miydacy miid ni pin jadu'n nej anajty ti y'ijxcixy ti ymidoogixy.

Jesús yajtzögy tüg yeegy'anäg huidibi anajty ca'oybi miid

³⁷ Com jabom co Jesús, Pedro, Jacobo etz Juan ajcxy yminajcy ma je copjijp, chi ooy mayjäy chooñ oyjijpcobadiyii. ³⁸ Chi nidügti jäy ycapxy janch mic, yminañ:

—Huindzin tun may'ajt ix ich n'ung, yi' ich tügpajc n'ung'ajtpy. ³⁹ Huen mináajity ca'oybi ymachyii, chi timetiini yaaxquëgy yajyachyii yajquidyii, etz yajpidzimy oy yhuin'opy y'aa'opy e adzaach y'ixmachyii. ⁴⁰ Ti ich may'ajt nbijctzooyich ma yi mdiscípulos ajcxy, co huen yajpidzimy je ca'oybi, per ca' yi' ajcxy ti mimadägy.

⁴¹ Chi Jesús yminañ:

—Miich jäy ajcxy huidibi ca' mibijcp ca' ajcxy mmijpidäga'ñ yi tiy'ajt! ¿Naag xii ich njac'idipy ma miich ajcxy nmimecxtújccixipy? Mimin m'ung ya.

⁴² Co anajty yhuingoñ, chi je ca'oybi yajcidaay je yeeg'anäg, chi ooy yajyatzcooti. Chi Jesús ix'ojoy je ca'oybi, e yajtzoocy je yeeg'anäg, chi yteedy yajcidiigyñi. ⁴³ Chi tüg'óciy je mayjäy ajcxy ooy chigiy miid je mijhuinma'ñ huidi Dios ytuun.

Jesús capxpídzimy jadüg'oc co y'öga'ñ

Jesús ydiscípulos ajcxy ooy jihuigyixy huinmaaygixy co Jesús jadu'n yminañ:

⁴⁴ —Miich ajcxy yajxon mido'mbijccix jada ayuc. Ich je' je jäy huidi tzoon tzajpjoty, hue' nyajcüyega'ñich ma pocyjäydijc ajcxy yci'am.

⁴⁵ Je' ydiscípulos ajcxy ni ca' anajty huinjihuigyixy, tzigiyb anajty ajcxy, paady ca' ajcxy jaty nej yaj'amidóogixipy.

¿Pin je' nigí jacmijip?

⁴⁶ Chi Jesús ydiscípulos ajcxy ytigiy huinmay'ahuidijtp, nejhuíhuaangixy pin je' jacmij'idam. ⁴⁷ Jesús nejhuíy je' ajcxy yjot yhuinma'ñ huidi nayyajmídmíydáacip ajcxy, chi tüg pi'c'anäg huijtzigy, ypidacy ma ymijc. ⁴⁸ Chi Jesús yminañ:

—Pinjaty xycöbicipich jadu'n nej jada pi'c'anäg xycöbicyich miid ich nxi ycipi, ich yi' anajty ti xycöbicyich; je huidibi ich xycöbicipich, cöbigüib je huidi ti xyquexyich ya naaxhuiñ. Yi' huidibi jacmútzip ma miich ajcxy, yi' je' jacmijpi.

Pin ich ajt ca'p xymijotma'tim, je' ajt xymijnicpejtím

⁴⁹ Chi Juan yminañ:

—Huindzin, ti ich ajcxy n'ijxcixy co tüg jäy ti yajpidzimy ca'oybi miid miich mxii miich mmic'ajt. Ti ich ajcxy yi' nyaj'ojoyich com ca' yi' ich ajt xypahuidijtim.

⁵⁰ Chi Jesús yminañ:

—Ca' myaj'ójcixy yi'; pinjaty ca' xymidzip'ajtim, ich ajt yi' nmíid.

Jesús jijpcogapxiy Jacobo etz Juan

⁵¹ Jadu'n yjaiti co tiempo yhuingoni mina Jesús ñicxip tzajpjoty, chi yhuinma'ñ pidacy co nicxa'ñ jim Jerusalén. ⁵² Chi Jesús quejxy cogapxy jayijp jättac pijctzoobi. Chi je cogapxy'ajtpi ñicxy ytigiy ma je samaritano jäy ajcxy ycajp, jättac pijctzoobi. ⁵³ Chi je' samaritano jäy ajcxy ca' yega'ñ jättac, com ñejhuíygyixyp co Jesús etz ymigügtijc ñicxy anajty ajcxy jim Jerusalén. ⁵⁴ Co jadu'n Jesús ymigüg ajcxy nejhuíy co je samaritano jäy ca' jättac yega'ñ, chi Jacobo etz Juan nimay Jesús:

—Huindzin, ¿nej m'a'ixiyb ich ajcxy n'ocni'ane'mdiyich huen jin cäy huidibi tzomb tzajpjoty, jigix yi' samaritano jäy ajcxy ycijtähüpy jadu'n nej je profeta Elías ytuuñ jecy'ajty?

⁵⁵ Chi Jesús y'ijxhuimbijty, ooy Jacobo etz Juan, nimay:

—Miich ajcxy ca' mnejhuüygixy ti jot ti huinma'ñ miich ajcxy müd. ⁵⁶ Hich, je jäy huidi tzoon tzajpjoty, ca' ti nmiñich ya naaxhuiñ co jäy yjugy'ajt miñ nyajtigooyich, hue' jánchtiy ti nmiñich co jäy yjugy'ajt nyajtzóogibich.

Chi ajcxy ñicxni huingbi cajp jättacp.

Je pinjaty anajty Jesús panicxam

⁵⁷ Jadu'n yjajti co anajty ñicxcixy ma tüg tü'aa, chi tüg jäy Jesús nimay:

—Huindzin, ich miich nbanicxaamy oy tim ma'amy miich mnicxy.

⁵⁸ Chi Jesús y'adzooy:

—Yi huaax ymüid yí' ajcxy yjut, etz yí'joon ajcxy ymüid ajcxy ype'ñ, ich je jäy huidi tzoon tzajpjoty ca' nmüididyich ma nmähuibich ma nbócxibich.

⁵⁹ Chi Jesús nimay jadüg jäy:

—Pajamgich.

Chi je jäy y'adzooy:

—Huindzin, jayijp ich ndeedy n'ocyajnaaxtigihuiipy.

⁶⁰ Chi Jesús yminañ:

—Jëbi yajnaaxtigihuiipy huidibi ca' xypanicxa'ñich. Nicx miich capxhuäcxi Dios y'ayuc y'ané'min.

⁶¹ Chi jadüg jäy yminañ:

—Huindzin, nbanicxamy yam. Tun may'ajt ocnajtzmadzüygich nicxy n'ocmüdcapxycixyich njuugy nmigügich huidi jim ma ich ndijc.

⁶² Chi Jesús yminañ:

—Pinjaty yhuinma'ñ ti pidägy co Dios ytung tunaani, ca' huaad ixmach je tung, tim jadu'n nipaady nejihuüy tüg jäy ti ytigü naaxjüdzijtzpi müd arado, e ca' huaad y'ijxhuimbity com co huinduum arado nicxihuiipy.

10

Jesús quejxhuäcxy je nidugü'pxmajcpi

¹ Huin'it co jada jadu'n ti ñaxy, chi je Huindzin Jesús huin'ijxy jatugi'pxmajc y'ixpijcpidijc, chi quejxügy cogapxy metz metz ma tüg tüg cajp majaty ñicxa'ñ. ² Chi Jesús nimay yí' ajcxy:

—Janch je cosecha ooy ti yhuindüy, yí' midumbi janchtiy hueeni. Chojcpy co nbijctzóohüm ma nHuindzin Dios co huen quexy ytumbidijc ma yí' cosecha. ³ Nicxcix, ich miich ajcxy nguejxpy jadu'n nej cöbixy y'ung yhuidity pa'uc agujc. ⁴ Ca' mminicxcixy mbijty, ni mxäcxuamy, ni mgig, e ni pin ca' mgapxpócxixipy tü'am. ⁵ Co ajcxy mdigihuiipy huenytimtitijcity, jayijp ajcxy minángixipy: “Ji jotcuje'ájin ma jada tijc.” ⁶ Pen yung naxy je' ajcxy yajpaady, miich ajcxy je mgapxpooxin jotcuje'ajt myegipy ma je' ajcxy; pen ca' ajcxy yjadú'nity, naadigü'adip huidi anajty ti mgápxcixy. ⁷ Nañ hui'mgix ma je tijc, chi ajcxy mgayipy m'ügipy huidi je jäy anajty ajcxy xymooyb, com je tumbi paatip je' je ymuju'ñ. Ca' ajcxy mhuididipy jayjin jaydijc. ⁸ Huenytimyhuidi cájpity ma anajty mdigüygixy, pen je jäy ajcxy xycöbijcp, caaygix uuccix huidi anajty jäy ajcxy xymooyb. ⁹ Yajtzóocxix yuujäy pa'mjäy huidijaty jim ma je' ajcxy yajpaady, etz yajnimaaygix: “Je Dios y'ané'min huingóniñ yí' ma miich ajcxy.” ¹⁰⁻¹¹ Huenytimyhuidicájpity ma anajty mdigüygixy, e ca' anajty jäy xycöbigaangixy, co ajcxy mdzonaanip, nimaaygix: “Yí' mgajp naaxjoc huidi ti ypety ma ich ndecy nhuinnebáamyich, yí' je' ijxpejt co Dios ajcxy xychaachtunipy. Chi nejhuüygix miich ajcxy jada co je Dios y'ané'min ti ymihuingoni.” ¹² Hich miich ajcxy nimayb co huin'it xü co anajty yajhuaad'aty, Dios nigü tzaachtunaangixy je jäy huidi ajcxy ca' miich ajcxy xycöbiga'ñ, ca'ydi Sodoma cajpjäy.

Je cajp huidijaty ca'p ycapxymidooy

13 Chi Jesús yjacmínañ:

—¡Miich ayoob ajcxy Corozín jáy! ¡Miich ayoob ajcxy Betsaida jáy! Co jim ma je Tiro cajp etz Sidón cajp caytuni cayjajti je Dios ymíhuinma'ñ huídi ti ytunyíi ti yjadyíi ma miich ajcxy, jécyíi ixíyipy ajcxy yjothuimbijtni, etz ti yajniquëxíccíxy ixíyipy míid je yhuít íñaaygíxy saci nijen nícuyjam íxcuyjam (je' je tíy'ajt co ooy ytajcíxy ymaygíxy míid ypocy ycíxpi). 14 Janch jadu'n yjadípy co anajty Dios yajniögödugíy, nígi o'ctíy miich ajcxy ayo'n mbaadíyb ca'ydi jadu'n nej Tiro jáy etz Sidón jáy. 15 E miich ajcxy Capernaum jáy ajcxy, ¿nej mmínaangíxy mjátcíxy tzejpjotyí? Hue' m'ídaaccíxyp miich ajcxy ma yí ayoodactuuby.

16 Je jáy ajcxy huídi miich ajcxy m'ayuc xymídoohuíp, nañ xymídoohuíb yí' ajcxy íich n'ayuc. Je jáy ajcxy huídibi miich ajcxy ca' xy'íxa'ñ, nañ ca' je' ajcxy xy'íxa'ñich; e pínjaty ca' xy'íxa'ñich, nañ ni ca' yí' íxaangíxy je Dios je huídi ti xyquexyích ya naaxhuíñ.

Chi ajcxy je nidugí'pxmajcpi yhuimbíjtcíxni

17 Chi je nidugí'pxmajcpi huídi Jesús yquejx ayuccapxhuäcxpi yhuimbijttay ajcxy janch jotcujc, ymínaangíxy:

—Íxti je ca'oybi ti íich ajcxy xycapxycöbíjccíxy míid miich mxíi.

18 Chi Jesús ymínañ:

—Ti n'íxyích nej je ca'oybi yhuíndzín ti ycäy, jadu'n nej jíhuíy ti ycäy ti ycödígíy tzejpcíxy, jadu'n nej tüg huídzc. 19 Íich miich ajcxy mic'ájtín ti nmooygíxy, jaydëbi ca'oybi ca' xymímadáaccíxípy, tím jadu'n nipaady nej jíhuíy tza'ñ etz ca'ty myajhuäcpéjtcíxy e ca' nej mjátcíxy. 20 Nígi miich ajcxy jotcujc'ájtíx co ajcxy mxíi y'íjtcíxy cojay jíiby tzejpjoty, ca'ydi co ajcxy ca'oybi xycapxymídoogíxy.

Chi ooy Jesús yjotcugíy

21 Huín'ít Jesús yjotcugíy míid je Dios yjíhuí'ñ ymí'ajt, ymínañ:

—Nyajnajxypích Dioscojuyip ma miich, Dios Teedy, tzejpjotyí Huíndzín etz je naaxhuíñybi Huíndzín, co ti myüch jada mjíhuinma'ñ ma yí cohúinma'ñ jáydíj, etz ti myajnejhuíy je jáy huídi ca' y'íxpícyíty. Dios Teedy, jadu'n miich ti mduñ com jadu'n miich ti mjáygidacy.

22 Ndéedyích ti xyajcídigíydäyích tüg'ócy tíjaty mic'ajt oy'ajt. Ni pín ca' íjxcajp pín je' Dios y'ung'ajtpy, jéyí nDéedyích tügpaíci pín xy'íjxcajpích. Ni pín ca' íjxcapy pín je' nDéedy'ájtíyích, jéyí je Dios ung tügpaíci huídi íjxcajp, etz jacjadyíi ma je ung yajniquëxíga'ñ.

23 Chi Jesús ní'íjxhuimbijty yí' ydiscípulos ajcxy, ahuingujc ajcxy nímay:

—Jotcujc ajcxy je jáy ajcxy huídi íjxcíxp jadu'n nej miich ajcxy ti m'íjxcíxy. 24 Íich miich ajcxy nímayb co ooy may Dios y'ayucnajtzcapxíyb etz rey ajcxy ja'íxa'ñ huídibi miich ajcxy m'íjxpy, e ni ca' ajcxy íxy; etz jamídoó'ída'ñ huídi miich ajcxy mídooyb, e ni ca' ajcxy mídooy.

Íjxpejt ma tüg samaritano oyjäybi

25 Chi tüg jáy huídi yaj'íxpíjcp Dios ñecy ytínaay'ahuíy jot'íxy huínma'ñ'íxy Jesús, chi y'amídooy:

—Huíndzín, ¿ti huaad nduníyích co íich jugy'ajtín huínixíbi nbáadibích?

26 Chi Jesús y'adzooy:

—¿Ti jaybétyíy ma yí Dios ñecy? ¿Nej mhúinjíhuíy co mnecycapxy?

27 Chi je ley huíndzín y'adzooy:

—Mdzogípy mjíhuíhuípy mHuíndzín Dios míid tüg'ócy m'aa mjot, míid tüg'ócy m'alma, míid tüg'ócy mmíjaa, etz míid tüg'ócy mjot mhúinma'ñ, e mdzogípy yí mjíñ midíj jadu'n nej miich cí'm naychogyíi.

28 Chi Jesús y'adzooy:

—Ti ooy yajxon m'adzooy. Tun yi', e mdzinähuiip huinixii.

²⁹ E je' nañ jadu'n tim tiy ñejhuñhua'ñ, nimay Jesús:

—¿Pin ñich nmidiyc'ajtpy?

³⁰ Chi Jesús y'adzooy:

—Tüg jäy choñ jim Jerusalén ycidägy anajty jim Jericó, chi oy meetzpi minaybadyii. Chi ajcxy tüg'óciy yhuít e tijaty yi' anajty ymüd pijctaayi. Chi ajcxy ooy huinhuoipy jipphuoipy huingoipy jipcojxy, chi ajcxy ixmach jahueengi ögy, chi ajcxy ñicxni. ³¹ Tüg judío teedy yminagiiy ma je jimbi tü'aa. Co y'ijxy je tzaachijäy, chi jüyöyñajxy. ³² Nañ jadu'n yminagiiy ma je jimbi tü'aa tüg levita jäy huídi tuumb ma Dios ytijc, co jim yjaty mihuingon je tzaachijäy, co oy ixy, nañ chi jüyöyñajxy (ca' pa'ayooy). ³³ Chi tüg samaritano jäy anajty jim naxiy, co mihuingoñ je tzaachijäy, co oy ixy, huin'it ooy pa'ayogooty je tzaachijäy. ³⁴ Chi je' nimijhuägy, chi puji e xojtzi je chaachi'au, nañ tzoyiiy chaachi'au mäd aceite etz vino. Chi yaj'iyujcpey, e yajnicxy jim ma yjättac, e jim cuend'ajty. ³⁵ Com jabom co anajty ñicxaani, chi yajpidzimy mejtz denario meeñ, moy je codijc nimay: “Cuend'at jadaaabi tzaachijäy, jadu'n nej anajty mjacmeeñyajtuñ, co ñich anajty nhuimbityich huin'it nmigüedipy.” ³⁶ ¿Ma je nidugiiipi jäy pin je oybi ti tuñ mäd je jäy huídi anajty je meetzpi ti ymeechyii ti yajtzaachiyii?

³⁷ Chi je jäy huídi Dios ñecy yaj'ixpijcp Jesús y'adzooy:

—Je huídi ti yajtuñ je pa'ayo'ñ.

Chi Jesús yminañ:

—Ñicx miich, e tun nañ jadu'n pa'ayo'n.

Jesús yajpaady ma Marta etz María ytijc

³⁸ Chi jadu'n yajty co Jesús anajty ytüyöy, chi ytigiiy ma tüg mutz cajp. Jim anajty tüg töxyjäy huídi anajty yxi Marta, yi' yajjättaci ma ytijc. ³⁹ Je Marta ymüd anajty tüg y'uch töxyjäybi huídi anajty yxi María, chi je' y'ixtacy ma Jesús ymijc, amidoo'ijti je' y'ayuc. ⁴⁰ Chi je Marta ooy anajty jim chachjottigoy tuñ anajty tigatii ma ytijc, chi nimijhua'cy je Jesús nimay:

—Huindzin, ¿ca' nej mnayjihuiiyii co ñich naydüg yam tzach nayyajtuñyijich? Nima' yi María co huen xypubétyich.

⁴¹ Chi Jesús yminañ:

—Marta, Marta, yi maytung miich mdzachmijottigooyb. ⁴² Tügpaic ji, huídibi ooy ycopicyip. Yi María ti yi' huin'ixy je oybi huídi ni pin ca' ypigiiyb.

11

Jesús yaj'ixpijc nej jëbi mibijctzoohuim Dios

¹ Jadu'n yajti co Jesús anajty Dios mibijctzoy ma tüg it lugar, co yajmay, chi tüg discípulo ñimaayi:

—Huindzin, yajni'ixiiygiich ajcxy tzajcapxycapxi, jadu'n nej Juan yajni'ixiiy yi' ydiscípulos ajcxy.

² Chi Jesús yminañ:

—Co ajcxy Dios mmibijctzohuipy, jadu'n mináangixipy:

Dios Teedy, miich huídi tzajpjoty tzinaayb, huindzigiy miich mxii y'ity. Huen miñ ya miich yi m'ané'min. Huen mdzójcín yajcuyduñ ma je jäy yjot yhuinma'ñ jadu'n nej yajcuyduñ jiiyby tzajpjoty.

³ Mooygich ajcxy ngaayin n'uucin jabom jabom.

⁴ Méecxibich ajcxy nbocy ngaydey huídibi ñich ajcxy ndundigooyb, jadu'n nej ñich ajcxy nmecxyich huídibi ajcxy xymidundigooybich. Ca' m'a'ixiiy co ñich ajcxy huinma'ñ tigoyipich. Yajnihuaatzcich ajcxy ma yi jibicpi.

⁵ Chi Jesús yjacminañ:

—Pinjaty ji ma miich ajcxy huidi tüg ymügüg mïid, co ninícxipy mijcoodz e mnimáhuipy: “Migüg, tun may'ajt yajpíjctzoogich tugüg mdzajcaagy. ⁶ Tüg ñch nmügüg ti xyñimiñich huidi tüyöyp, etz ca' nmíididyich ti nmöhuibich.” ⁷ Chi je jäy y'adzooy jüby tigoty, ymínañ: “Ca' xy'amayíyich. Ti ñch ndíjc n'agíyñi, etz n'ungich yam nmíidich cijx'am; ca' njatyich nej nbídígibich etz nmöhuipy huidi mbíjctzooyb.” ⁸ ñch miich nimaayb, oy ca' tzojc nípídígá'ñ ymöhuamy huidi píjctzou co migüg'adyii, hue' ymöhuamy jaydëbi ca'ydi yjac'amayíyii, chi yegípy tüg'óciy huidi yajmayjajtpy. ⁹ ñch miich ajcxy nimaayb: Píjctzóogíx, e myajmöhuipy ajcxy. Ixtaaygíx, e mbaadípy ajcxy; cogapxíyíx, ahuádzip ajcxy mdíjc'aguu. ¹⁰ Tüg'óciy je' pín píjctzoob tijaty ma Dios, cídígíhuib; pín y'ixtaayb, ypaadípy; pín cogapxíyíx, yaj'ahuatzíib yti'c'aguu.

¹¹ ¿Pín ungededy ji ma miich ajcxy pen y'ung ypijctzoob tzajcaagy, nej mmöhuipy tüg tzaaji? ¿E pín ypijctzooyb acx, nej jëbi mmöhuipy tüg tza'ñi? ¹² ¿Pen ypijctzooyb tzeydüty, nej jëbi mmöhuipy ca'ty? ¹³ Pen miich jíbícjáy ajcxy mnejhuíy nej oybi m'ung móoygíxípy, ¿nej ca' mdíjy yjánchíty co mDios Teedy tzajpjtopy xymóoygíxípy je Espíritu Santo, pen miich ajcxy mmíbíjctzohuípy?

Yajñíbíjccíxy Jesús co míidíty mujcu' ymí'ajt

¹⁴ Chi Jesús anajty yajpídzímy tüg ca'oybi ma tüg jäy huidi anajty uumíp. Jadu'n yjajty co je ca'oybi ypidzímy, chi je uum ycapxígy. Chi je mayjäy ooy jihuíy huinmay. ¹⁵ Nijéjity jäy ymínaangíxy:

—Jesús mijhuinma'ñ ytumyb mïid je Beelzebú ymí'ajt, je ca'oybi yhuindzín, paady ca'oybi yajpídzímdäy.

¹⁶ Jacjaydiibi jäy ajcxy co jot'íxaangíxy huinma'ñ'íxaangíxy Jesús, píjctzooy ajcxy Dios tüg ymíjhuinma'ñ. ¹⁷ Co Jesús nejhuíy nej je' ajcxy jot'adyii huinma'ñ'adyii, chi nímáy:

—Co tüg gobierno ñaybíjc-huácxíyí, chi ñaychiptúnígíxy miñ xyípy; ñayyajcíjxígy ñayyajtígóoyígy; co tüg quëx jäy ñaybíjc-huácxíyí, nañ jadu'n je' ñayyajcíjxígy ñayyajtígóoyígy. ¹⁸ Pen je mujcu' ajcxy ñaybíjc-huácxíp, ¿nej jada je mujcu' y'ané'mín yjac'idípy? Miich ajcxy mínamb co ñch mïid ndúñich je Beelzebú ymí'ajt co ñch ca'oybi nyajpídzímy. ¹⁹ Pen jadu'n yí', ¿pín je míc'ajt mooyb huidi miich ajcxy xypahuídíjtp co yajpídzímy je ca'oybi? Paady yí' ajcxy cí'm yajniquëxícp co miich ajcxy mdundígooygíxy mgapxtígooygíxy. ²⁰ Pen ñch mïid Dios y'ané'mín nyajpídzímyich ca'oybi, janch jada co Dios y'ané'mín ti yjáty ma miich ajcxy.

²¹ Co tüg mícjáybi míidíty maydujt, e ñaycuend'adyii yajxon, ca' je' ytigoyípy tijaty ymíid.

²² Co yjáty jadüg jäy jacmícpi ca'ydi je', chi ymímadágyii, e ypijctáyí tüg'óciy ytujt huidi anajty ooy jot'amíj'adyii, e yajhuácxípy tijaty anajty ymíid.

²³ Pinjaty ca' xymíjncxpétyich, nmídzípich yí'. Pinjaty ca' ytuñ mïid ñch co jäy nyaj'ixpícyich Dios yti'y'ajt, hue' je' ajcxy jäy yajhuinma'ñydígooyb.

Je ca'oybi co jadüg'oc yhuimbíjty

²⁴ Co je ca'oybi ypidzímy ma je jäy, chi je' ñícxíy jím títznaax íjxtágy co ypocxa'ñ. Co ca' paty ypocxtac, huin'it ymína'ñ: “Huimbídaambich ma je jäy yjot yhuinma'ñ ma ñch ti n'octzombi.” ²⁵ Co je ca'oybi yja'ty ma anajty ti chináy, chi paady je jäy yhuinma'ñ janch yhuádzity janch ooy jadu'n nej tüg tíjc huidi janch huádz pedígity. ²⁶ Chi je ca'oybi ñícxíy, e mïid miñ jahuixtujc ca'oybi jacjibícpí ca'ydi je'; chi ajcxy ytigíy ma je jäy yjot yhuinma'ñ, e chináy ajcxy jüby; huin'it je jäy jac'o'ctíy oy yjajtní ca'ydi jadu'n nej anajty jayíj'aty.

Huidi ajcxy janch jotcújcp

²⁷ Co Jesús jadu'n anajty ymína'ñ, chi tüg töxyjäy mayjäy agujc míc ymínañ:

—Jotcujc je töxyjäy huidi ti xyajpi'c'aty etz huidi xyajyeegy.

²⁸ Chi Jesús ymínañ:

—Je' jacjotcujc pínjaty Dios y'ayuc mídoohuíp etz cuyduuníp.

Jibicjäydijc pijctzoogixy tüg tiy'ajt mijhuinma'ñybi

²⁹ Co je mayjäy ajcxy jübigiyy, chi Jesús yminandacy:

—Jadachambi jäy ooy ajcxy yjibicjäyity, ypijctzooyb ajcxy mijhuinma'ñ ijxpejt. Ni camina Dios ajcxy ycamöhuüyb ijxpejt, jëyi tügpajc Jonás y'ijxpejt yajmöhuiip. ³⁰ Com jadu'n nej je Jonás jecy'ajty ijxpejt yejcy ma je Nínive jäy, nañ jadu'n ñich, je jäy huidi tzoon tzajpjoty, nyegaamyich ijxpejt jadachambi tiempo mïd jäy ycixpi. ³¹ Je töxyjäy reina huidi tzinay jecy'ajty ma madzäcruudz ypidzimy, yi' je' xidähuam jadachambi tiempo jäy co anajty Dios tiyduna'ñ mayjäy, etz yajpocycähuipy ajcxy. Ixti ma naaxhuiñybi ycoigixy jim je reina chooñ co anajty amido'idani je rey Salomón ycapxy y'ayuc. Ji naaxhuiñ jadachambi tüg Dios ytiy'ajtmïdpci jacniği ymijity ca'ydi Salomón anajty. ³² Co anajty Dios tiyduna'ñ yi may naaxhuiñyjäy, chi je jäy ajcxy huidibi anajty cogajpïp jim Nínive pidägaangixy etz yajpocycähuaangixy jadachambi naaxhuiñyjäy. Com je Nínive jäy jothuimbijt je' ajcxy co Jonás Dios y'ayucnajtzcapxïyi. Ji jadachambi tüg Dios y'ayucnajtzcapxïybi jacniği ymijity ca'ydi jadu'n nej anajty je Jonás.

Je tiy'ajt huidibi nipaady nej lámpara ma ajt nninïcx

³³ Ni pïn ca' yüch je jïin huidi ti nögpity, ni ca' pidägy jiiiby cajón pa'tci'py, jëyi janchtiy pidägy je jïin ma jïindïcxpejt, jaydëbi co pinjaty ytiğihuipy tigoty, codicxïb je jïin. ³⁴ Je jïin ma miich ajcxy mninïcx je' yi' miich ajcxy mhuiin. Pen oy miich ajcxy mhuiin, nañ jadu'n tüg'óciy miich ajcxy mninïcx ymïd yi' tïcxïn. Pen ca' y'óyity mhuiin, nañ jadu'n ajcxy yi mninïcx yajpaty agootztuum. ³⁵ Cuend'ájtciy yi tiy'ajt huidi miich ajcxy mïd, ca' mgoyützcixy, com co jadu'n nicxy y'ahuimbity nej cootzpi. ³⁶ Pen miich mdiy'ajt codicxxy y'ity mïd Dios ytiy'ajt, tüg'óciy quëxigtähua'ñ janch huädz.

Jesús ca'p jäygidaci je fariseos etz je escribas ajcxy yhuinma'ñ

³⁷ Co Jesús ycapxtay, chi tüg fariseojäy may'ajt pijctzoy huen nicxy mïd cayii. Co Jesús ytiçtigiiy, chi y'ixtacy ma je caybejt. ³⁸ Co je fariseojäy ijxy jadu'n nej Jesús ytuñ, chi ooy huinmay nej co Jesús ca' ñayyajpocyhuächyïi mïd nï jayijpni ma anajty ca'ni ycaayñi. ³⁹ Chi je Huindzin Jesús ymïnañ:

—Miich ajcxy fariseojäy, ooy mnaybïdaaccixy tudägyjäy ma jäy ajcxy yhuinduu e ca' yjanchity; chi jada' ma mjot mhuiinma'ñ miich ajcxy ooy m'adzocy, etz mïd ajcxy jibic-huinma'ñ; tim jadu'n nipaady nej myajhuäch ajcxy yi tasi ninïcx, yi texyñinïcx e chi ajcxy yajhuí'ngixy jibicpi je tasioty je texyoty. ⁴⁰ ¡Miich ajcxy ca' Dios y'ayuc huinjihuüybi! ¿Ca' mnejhuüygiy co yi pïn ti texyñinïcx yajcojy nañ ti yajcojy texyoty? ⁴¹ Tun miich ajcxy ooyjäy'ájtïn, huin'it janchtiy anajty ajcxy mhüädzity ma mjot mhuiinma'ñ.

⁴² ¡Ay miich ayoobi ajcxy fariseojäy! Com mbïdaaccixy abicy tüg picy je majcpi mïd yi Dios ycixpi ixti yi tzajnimang, yi ruda, etz tüg'óciy aay ujtz. Chi jada' ca' mduñ je ooyjäy'ájtïn etz tiy'ájtïn jadu'n nej Dios tzocy. Hue' je' oy mduñ co tijaty abicy mbïdägy mïd Dios ycixpi, nañ jadu'n copicy ooyjäy'ájtïn mdunipy etz Dios ytiy'ajt mguydunipy.

⁴³ ¡Ay miich ayoobi fariseojäy ajcxy! Co ooy m'adzójccixy je ñaybejt huidi cöduum ma naymujctac, etz ooy m'adzójccixy co huen jäy ajcxy xycapxpooxcixy oy huindzigiy mayjäy agujc.

⁴⁴ ¡Ay miich ayoobi ajcxy huidi yaj'ixpijcp Dios yley etz miich fariseojäy ajcxy! Oy mjanaybïdáacigixy ooyjäy e ca' yjanchity, ca' mguydungixy Dios ytiy'ajt, jadu'n nipaady miich ajcxy nej öcpi jut huidi ca' yquëxigy, chi jäy yöy nigix, com co ca' ñiguëxigy.

⁴⁵ Chi tüg jäy huidibi yaj'ixpijcp Dios y'ayuc ymïnañ:

—Huindzin, co jadu'n miich mïnañ, nañ jadu'n ñich ajcxy ooy jibic nayjihuíyigixy.

⁴⁶ Chi Jesús ymïnañ:

—¡Ay ayoob miich ajcxy Dios y'ayuc huindzin! Miich ajcxy mgójcixyp canaag costum-bre huidi je jäy ajcxy ca' mïmadäga'ñ, e ca' ajcxy mba'ayoogixy, tim jadu'n nipaady nej

jihuïy tüg tzimyy ti mmooygixy jemxypï huïdi ca' je jäy ajcxy mïmadäga'ñ, e miich ajcxy ni ca' mgïhuäx jëda'ajty mgayajpadaangixy je tzimyy.

⁴⁷ ¡Ay miich ayoob ajcxy! com myajcojcixy je ögpï jut ma je Dios ayucnajtzcapxïybi naaxtigïy, je huïdi m'ap mdeedy ajcxy yaj'o'c. ⁴⁸ Jadu'n yajhuinjihuïy nej jihuïy miich ajcxy ooy mjäygidägy jadu'n nej ajcxy m'ap mdeedy ytundïgoy. Janch yi' ajcxy yaj'ögy Dios y'ayucnajtzcapxïybi, e miich ajcxy myajcoj je öcpï jut ma ajcxy je' ñaaxtigïy.

⁴⁹ Paady yi' Dios jadu'n huinmay, e mïnañ: Nyajnigüexïpyich miich ajcxy profetas etz y'ayuccapxhuäcxpi, e miich ajcxy myaj'ögïp nijëjity, etz jacnaagity mbahuïdijttäccixïpy. ⁵⁰ Dios yajcomïdohuïpy jadachambi tiempo jäy ajcxy je ypocy huïdi y'ap yteedy ajcxy ytuñ, com maabi naaxhuïñ chondägy, yi' ajcxy yaj'ögy Dios ytiy'ajtmïdipi. ⁵¹ Janch nïmaaybïch miich ajcxy co Dios yajcomïdohuïpy jadachambi tiempo jäy ajcxy je y'ap yteedy ypocy co ajcxy yaj'o'cy Dios ytiy'ajtmïdipi chondägy ma Abel, ixti Zacarías huïdi jäy yaj'o'c ma Dios ytiyc tïba'gujc.

⁵² ¡Ay miich ayoob ajcxy Dios y'ayuc huindzin! Ca' miich ajcxy m'ixpïga'ñ Dios ytiy'ajt, nañ ca' mdzocy co yi' jäy ajcxy ixpïgïpy; tim jadu'n nipaady nejihuïy ti mbicy je tiyc ahuaast e ca' miich ajcxy mdigïhua'ñ, e ni mgatzojccixy co huingbi nicxy ytiygy.

⁵³ Co Jesús anajty jadaaab ayuc yajnimaaaygixy, chi je Dios y'ayuc huindzin etz yi' fariseojäy ajcxy jotmätcooty chi yaj'amïdogoty ajcxy may ayuc. ⁵⁴ Ñayñimáayigixy miñ xyïpy co huen amïdo'ijt Jesús y'ayuc, jigix jëb páatcixïpy huïdi jëb mïd xïgixïpy.

12

Jesús yaj'ixpïcy co ca' huaad pinjaty naybidaaci oyjäy pen ca' yjánchity

¹ Chi je mayjäy ooy nimujcy Jesús, janch jadu'n ñay'adijty ñay'agodïyigixy, chi Jesús nïmaydacy je' ydiscïpulos jayïjp:

—Nigüendi mïd yi' fariseojäy ajcxy nej ajcxy yjäyyaj'ixpïjccixy. Yajxon yi' ajcxy ycapxy ymïydägy, chi ca' cuydungixy. ² Ca' ji ti huïdi ijtp ayüch nicxy ycayajnejhuïy, nañ ni ca' ji ti huïdi ijtp ameech nicxy ycanigüëxïgy. ³ Huen huïdi ayuc miich ajcxy ameech mgapxy, yajnejhuïhuïp yi'. Huen huïdibi ayuc huïdi ti mnayyajnimáayigixy ameech jüby tigoty, mic yajcapxhuäcxip tiyc nigïxy.

Pin jëbi huaad ndzigïyïm

⁴ Chi Jesús yjacmïnañ:

—Miich ajcxy nmïgügtïyc, ñich miich ajcxy nïmaayb co ca' mdzigïygyxy yi' jäy ajcxy huïdibi ninïcx yaj'o'cp, com ca' jac ni ti ajcxy tunïpy. ⁵ ñich miich ajcxy nyajni'ixïhuïpy pin huaad jëbi mdzigïygyxy. Yi' janch mdzigïygyxy yi' Dios huïdibi jugy'ajt pijcp, e huin'it mïd je' ymic'ajt jëbi quexïpy m'alma ma je mij jïin. Yi' janch mdzigïygyxy yi'.

⁶ ¿Nej ca' jäy ajcxy ytoogyii mïgoox joon mïd metz pi'cmeen? Dios ni tüg yi' ajcxy ca' jäy digooity. ⁷ Ixti mgöhuay ajcxy ac michoy Dios mïdity. Ca' mdzigïygyxy, jactzou nigï miich ajcxy ma Dios ca'ydi pi'cjoon ajcxy.

Je pinjaty ca'p midzöyduñyï Jesús mayjäyjoty

⁸ ñich miich ajcxy nïmaayb co pinjaty ma miich ajcxy huïdi capxpïdzïmp mayjäyjoty co xymïbicyich xymïjpidägyich, ñich, je jäy huïdi tzoön tzajpjoty, ngapxpïdzïmïpyich co ti ngöbicyich jadu'mbi jäy ma Dios y'ángeles ajcxy yhuinduu. ⁹ Pinjaty ca' xycöbicyich mayjäy'agujc, nañ jadu'n ñich yi' ca' ngöbigïpyich jüby ma Dios y'ángeles ajcxy yhuinduu.

¹⁰ Tüg'ócïy jäy huïdi jadu'n ñich, je jäy huïdi tzoön tzajpjoty, xyñigapxp xyñi'ojïybïch Dios huinmecxïb. Chi jada' pinjaty nigapxp ni'ojïyb je' Dios yjihuï'ñ (je Espíritu Santo), yi' janchty Dios ca' yhuinmecxïyb.

11 Co mmidzip ajcxy xyajnícxip ma naymujctac, ma codungdíjc, etz tungmídpi yhuindu, ca' mdájip mmáyip nej m'adzóogixipy, e ca' mhuinmayipy nej ajcxy m'adzohuipy.
12 Com je Dios yjihuí'ñ huin'ítiy ajcxy xyajni'ixihuip nej huaad m'adzoogixy.

Naygüend'ajtigixy ca'p adzojccixy comeeñ'adii

13 Chi nidügti je mayjäy ymíñañ:

—Huindzin, nima' n'ajchich co huen yajhuäcxy míid ñich huídi ndaj ndeedyich ñidungiy.

14 Chi Jesús ymíñañ:

—Yéydíjc, ca' ñich ni pín ti xypidägyich ane'mbi ma miich ajcxy etz yajhuäcxpi.

15 Chi Jesús nimay je jäy ajcxy:

—Ijxcix naygüend'ajtigix, ca' m'adzojccixy comeeñ'adii, com je m'alma yjugy'ájtín ca' je' nídzoocin'adyii huídijaty miich ajcxy míid.

16 Chi ajcxy yajnimay tüg ayuc, ymíñañ:

—Jim anajty tüg comeeñjäy huídibi anajty ooy mij ypidägy yajpidígy. 17 Je comeeñjäy anajty ooy c'i'm huinmay ma yjot yhuinma'ñ, ymíñañ: “¿Ti n'octunipich com ca' nmíididyich ma nyajnígidägibich yi tüibi y'ity?” 18 Chi ymíñañ jotjoty huinma'ñjoty: “Nyajpidícnibich ndzëx, e ngójbich jacmíjpi, chi tüg'óciy jíiby nbídactähuibich tüibi y'ity.”

19 Co jadu'n ndunipyich, chi jébi jotcuyc ndzinähuibich, com ooy anajty nmíididyich pidägy yujpcicy, jébi canaag jimíjt niboocxyich etz jébi ngay n'ügyich jotcuyc. 20 Chi Dios nimay je comeeñjäy: “Ooy jibic-huinma'ñ miich mídity. Cham coodz ñich miich nibíjctzohuíhuaaníy yi m'alma (m'ögip), e co anajty ti m'ögy yi huídibi ti myujpcicy, ¿pín yi' je'adíib?” 21 Jadu'n yjajty yi' ajcxy huídibi ymeeñ'idi'ñ c'i'm yujpcijcp, ca' yi' ajcxy jíiby ycomeeñyity ma Dios yhuindu.

Dios ycuend'ajtpy y'ung y'anäg

22 Chi Jesús nimay je y'ixpijcpidíjc:

—Paady ajcxy nimaaygixy co ca' huaad mjottigooygixy ma yi mdzináayín yi mjogy'ájtín, huídi mjíicxcixipy mgáaygixipy, huídi míid mninícx mxójxcixipy. 23 Yi jugy'ajt jacnígi tzou yi', ca'ydi yi caayín uucín, etz je mninícx jacnígi choohuít y ca'ydi huit. 24 Ijxcix yi joogy ni ca' ñípy, ni ca' chijccixy, ni ca' mídity ytíjc ni chëx, e Dios yi' ajcxy mooyipy huídi yjíicxcixyp, ¿nej cayjacnígi miich ajcxy mdzoohuít y ca'ydi joon ajcxy? 25 Ca' ji ni pín ma miich ajcxy pín jadípy nej ñayjíjptzomíhuíb jadüg cínúux. 26 Pen ca' mjaítcixy nej mdúngixipy huídi hueen huinma'ñ, ¿nej co mdzachmíjottigooygixy yi tzinaayín yi comeeñ'ájtín?

27 Ijxcix yi aaybíjy nej xóxyity, ca' ytaaccixy ni ca' yxuuygixy. ñich miich ajcxy nimaayb, co ni je rey Salomón míid tüg'óciy ymeeñ' ca' ñayxojxi jadu'n nej jada aaybíjy ujtzpijy.

28 Pen jadu'n Dios xoxy yi aay yi ujtz huídibi cham jajtip ma yi tungop, e com jabom ti anajty ñíicxni, Dios xypubedípy xypudígíhuipy nígi miich ajcxy huídi hueen mibíjcp.

29 Ca' miich ajcxy mhuinmay'ahuídíjtcixipy ajcxy ti mgáaygixipy m'úuccixipy. 30 Yi naaxhuíñjäy ajcxy ymíjottigoyb anaxy tüg'óciy caayín uucín, huit etz tijaty. Miich ajcxy huídi míjpidacp Dios, Dios Teedy ñejhuíyb co copicy ajcxy míid'adípy caayín uucín etz huit tucxy. 31 Jayíj míjottigooygix Dios y'ayuc ytiy'ajt, chi jada' tüg'óciy huídi ajcxy myajmajjaty mbáatcixipy yi'.

Jugy'ájtín míjpi jíiby tzajpjoty

32 Chi Jesús yjacmíñañ:

—Ca' miich ajcxy mdzígíygixy, miich ajcxy mñihueeñíty, per mDios Teedy yega'ñ ane'mdac tzajpjoty míid miich ajcxy ycixpi. 33 Toocix tijaty miich ajcxy míid, nimooygix ayooobitíjc. Yaj'oyíygix meeñ'idi'ñ huídi ca' y'amíjihuipy ni camína. Yaj'oyíygix tüg pidägy, janch mij e janch oy, jíiby tzajpjoty huídi ca' ycixipy ytígoyipy, ma ca' meetzpi huaad ytígíy, ni ucxyting ca' yajhuíndígoyipy. 34 Pen miich ajcxy míid mgomeeñ'ájtín

ya naaxhuiñ, yaayi je m jot mhuinma'ñ ajcxy. Pen mdzojcpy ajcxy je oybi huídibi Dios yegamy, nañ miid'ájtci xy jim jabom jabom m jot mhuinma'ñ ajcxy ma Dios.

Tzoc íjtím ni'ixi'

³⁵ Chi Jesús yjacmínañ:

—Ni'ixiiygix m jot mhuinma'ñ jadu'n nej jihuïy mhuit myujc'ameetcixy co mdunaangixy, etz jadu'n nej jihuïy lámpara mnögpíjccixy co mdzumnaxaangixy m'ahuixaangixy je huindzin. ³⁶ Ni'ixi'íjtci xy jadu'n nej jáy huídi yhuindzin ahuijxp, co anajty yhuimbity co anajty ti y'oy ma jáy ti ypicxy, chi co anajty minípy ycogapxiy, mic'amy myaj'ahuádzity ytijc. ³⁷ Jotcuyc ajcxy je tumbi co je yhuindzin anajty yjady, e paady chumnajx juugy. Janch nimaaybich miich ajcxy co je tumbi ajcxy yhuindzin anajty yjady, chi yhuít yujc'ameedípy, chi ajcxy yaj'ixtägípy ma caybejt, yajcayípy yaj'ügípy. ³⁸ Oy minípy je huindzin mijcoodz o moñyi, e páadip je tumbidíj c ajcxy jim chumnájxcixy juugy, jotcuyc je' ajcxy je jadu'mbi tumbidíj c. ³⁹ Nejhuïygix jada co je codíj c ixypípy nejhuíhuípy ti hora ymína'ñ je meetzpi, chi juugy ixypípy chuumnaxa'ñ, e ca' cíyegípy ytijc nicxy jáy tigoty ymeech. ⁴⁰ Miich ajcxy nañ jadu'n íjtci xy ni'ixi', mína anajty ca' ti mhuinmaaygixy, huín'it miína'ñich ích, je jáy huídi tzoon tzajpjoty.

Je tumbi tudägyipi etz je tumbi ca'pi ytudägyity

⁴¹ Chi Pedro Jesús ním ay:

—¿Pín jada ti myajnimayb jada ayuc huídi ti mgapxy, ích ajcxy, o nidüg'óciy jáy?

⁴² Chi je Huindzin Jesús ymínañ:

—Huídibi tumbi je' ya huídi tumb miid yhuindzin janch cíxyjot huínijot huídi miid yhuíjy'ajt ycuyc'ajt huídi je yhuindzin mooyip ané'mín ma ytijc, huídi yajnigídägíyb tumbidíj c nej ypaadyii. ⁴³ Jotcuyc je tumbi co anajty je' yhuindzin yhuimbity e padíyb ti cuyduñ jadu'n nej anajty ti ñimäyíi. ⁴⁴ Janch ích miich ajcxy nímäy co je tumbi huindzin yajmíhuí'mdáhuípy jada ytumbi tüg'óciy pídagy huídi ymiid. ⁴⁵ Pen je tumbi yhuinmaayb jotjoty huínma'ñjoty co je yhuindzin yhuácxíjpní mína ymína'ñ, chi mídziptzooní jacjadyii tumbidíj c ajcxy, huojpni, cojxni, nañ ytigíyñí caayb uucp anaxy etz ymügíyíi. ⁴⁶ Chi je tumbi yhuindzin minípy ma je xíi hora anajty ca' jíj'ixy e ni canejhuíy anajty, e huín'it ooy tzaachytunípy yí tumbi e chi pídagípy ma je huídi ajcxy ca' ytudägyity.

⁴⁷ Je tumbi huídi nejhuíyb nej yhuindzin chójcín, e ca' cuyduñ, ni ca' ycapxymído y, ni ca' ni'ixi' ity co yhuindzin anajty yhuimbity, je' je' nígi yajtzaachytunípy. ⁴⁸ Je tumbi huídi ca' yajxon huínjihuíy nejjiihuíy yhuindzin chójcín, hueení je' yajtzaachytunípy. Huenpínity huídi may yajmooyb, may yí' yajmíbíjctzohuíyb; etz huenpínity huídi ti mihuí'my ooy, yajmíbíjctzohuíb nígi.

Jesús ycixpi ñaybíj c-huäcxyii jáy

⁴⁹ Chi Jesús yjacmínañ:

—Ích ti nmíiñich ya naaxhuiñ co jín nbídägíbi ch. ¡Ooy njadzocyích jí ixypípy ñitooyñí! ⁵⁰ Nyajnaxípyích tüg tzaachypí, e ¡ooy ndajy nmayích íxti mabaad yajcuydundäy! ⁵¹ ¿Nej miich ajcxy mdíjy co ti nmíiñich ya naaxhuiñ co nyajcíxípyích je tzipí? Ích miich ajcxy nimaayb co ca'. Hue' janchtiy nyajnaybíj c-huäcxáaníbich jáy ajcxy. ⁵² Jadachambi etz yjacnicxni xíi tiempo jí mígoox tüg quëxjáydíj c huídibi ajcxy ñaybíj c-huäcxíib, tugíj c miid je metzpi, e metzpi miid je tugíj cpi. ⁵³ Je ungedeedy tziptunípy miid ymang etz je mang miid yteedy. Nañ je ungdaj tziptunípy miid yñíx etz je níx miid ytaj. Nañ jadu'n je xecy tziptunípy miid yxecy.

Je xíi tiempo ytíy'ajt

⁵⁴ Chi Jesús ním ay je mayjáy ajcxy:

—Co ajcxy m'ixy je joc ypidígy ma xíi ycidägy, chi mínaangixy co túhuaam, e janch jadu'n yjadyii. ⁵⁵ Co ymíiñ je jínboj, chi miich ajcxy mínaangixy co ambígaamb, chi

janch jadu'n yjadyii. ⁵⁶ ¡Miich jibic jäy ajcxy! Ooy mjajtcixy nej myajcapxcixy yi xii tiempo huidi ajcxy m'ijxpy tzajpcixy etz ya naaxhuiñ: ¿Nej co ca' mjajtcixy nej myajcápxcixipy xii tiempo ymiñ ycidägy?

Naymi'oyihui miid midzip

⁵⁷ ¿Nej co miich ajcxy ca' ci'm mnaydiydúunigixy nej ytudägyity je tiy'ajt? ⁵⁸ Co mnícxipy ma yi codung miid yi mmidzip jac'oy co mnayyaj'oyihuipy miid yi mmidzip tü'am, ca'ydi miid mjädip ma yi codung, e chi je codung xyciyegipy ma je xueetz, e je xueetz xypidägip pujxtigoty. ⁵⁹ Ich miich nimaayb co ca' jiiby mbidzimipy, ixti cooni mgüejttähuiipy tüg'ócíy.

13

Ooy ycopícyity nyajtigajtzim nhuinmañ

¹ Huin'it jäy miidmiydacy Jesús jadu'n nej je gobernador Pilato yaj'ögy nijëjity jäy jim Galilea, chi tem huidiyti ajcxy ñi'py miid iyujc ñi'py huidi je' ajcxy miid huindzigi'ñ tuuñ.

² Chi Jesús y'adzooy nimay ajcxy:

—¿Nej mdiyy, nigí anajty ypcymiidity je galileojäy ajcxy huidi jadu'n ayo'n patp, ca'ydi nidüg'ócíy galileojäy? ³ Ich miich ajcxy nimaayb co ca'. Pen miich ajcxy ca' mjothuimbijtcixy ma Dios etz nay'adzigi'yigixy ma Dios, nidüg'ócíy miich ajcxy mgijxtähuiip mdigoydähuiip. ⁴ E je' ajcxy je majmocxtugigpi huidi je mijtjic jim Siloé nigidaagootti, yaj'öci ajcxy. ¿Nej mdiyy nigí ajcxy ypcymiidity, ca'ydi nidüg'ócíy je jäy huidi tzinayb jim Jerusalén? ⁵ Ich miich ajcxy nimaayb co ca'. Pen miich ajcxy ca' mjothuimbijtcixy, nañ mgijxtähuiip mdigoydähuiip miich ajcxy nidüg'ócíy, jadu'n nej je' ajcxy.

Ijxpejt ma je higuere ca'pi anajty ytüm'aty

⁶ Chi Jesús yajnimay ajcxy jada ayuc:

—Tüg jäy anajty miidity higuere cojy ma y'aguemy, chi ñicxy jiiby ma y'aguemy higuere tiim ijxtaaybi, ni ca' paty. ⁷ Chi nimay je' ytumbi: “Cham midugig jimijt miñich ya higuere tiim ijxtayb ma jada higuere cop, ni tüg ngapaadyich. Huen yajpujxciday jada higuere cop, nej co nigoobi ñaaxnihua'ñ.” ⁸ Chi je' ytumbi y'adzooy: “Huindzin, oc'ixmatz. Huen jadüg jimijt jëyi ocjactinäy, octajyich jayijp yi naax jühuidityi, etz oc'abonijyich. ⁹ Pen tiim'ajt ca' nyajpuxipy, pen ca' ytüm'aty jëbi nbújxigipy.”

Jesús yajtzögy pocxxiduum tüg töxyjäy jigojojpyi

¹⁰ Chi Jesús anajty yaj'ixpicy ma tüg naymujctac pocxxiduum. ¹¹ Jim anajty tüg töxyjäy huidi anajty mimajmocxtugig jimijt cujc mi'ijtni yjibojpa'm, agojojoy anajty yöy, ni nej anajty yca'oyiy nej ytinaaygugihuipy. ¹² Co Jesús ijxy, chi yaaxi, e nimay:

—Töxyjäy, ti mdzögy.

¹³ Chi yci' cijxxajy ma je töxyjäy yjix, e chi je' yjix ytüy, huin'it ytigiy Dios ojada-jtpi. ¹⁴ Huin'it je naymujctac huindzin ooy yjotmäty miid co anajty Jesús jäy ti tzojy pocxxiduum. Chi je naymujctac huindzin nimay ajcxy je mayjäy:

—Jëyi tudujc xii jäy huaad ytuñ, huen miñ seamanjoty pin yajtzoyihuan, ca' ypcxxiduumity.

¹⁵ Chi je huindzin Jesús ymiñañ:

—¡Miich ajcxy naybidaacip nej tudägyjäy, e ca' yjanchity! ¿Nej ca'miich ajcxy mmigüejiy mhuajyuubi, etz mburro ma ypécxtac pocxxiduum, e myajnicxy ajcxy ni'ucpi? ¹⁶ E jada Abraham y'ap y'oc huidi Satanás ca' y'ixmachii majmocxtugig jimijt, ¿nej ca' ypadyii nyajtzögibich pocxxiduum?

17 Co Jesús jadu'n y'adzoy, chi yajtzöyduuñ ymidzip. Chi tüg'óciy cajpjäy oy ajcxy yjotcugiiygixy miid je oybi huidi Jesús ytuun.

Ijxpejt ma je mostaza pájc

18 Chi Jesús yminañ:

—¿Nej m'oc'a'ixiiygixy yi Dios y'ané'min? ¿Huidi miid n'ocyajquipxiñhuibich? 19 Jadu'n Dios y'ané'min nipaady nej mostaza pajc huidibi tüg jäy ñiip ma y'aguemy, chi ymujxy etz yeegy ooy janch mij, chi je joon ajcxy oy ype'ñ pidaaccixy ma je mostaza quipy aacxy.

Ijxpejt ma je levadura ca'p óyity

20 Chi Jesús jadüg'oc yminañ:

—¿Huidibi miid n'ocyajquipxiñhuibich yi Dios y'ané'min? 21 Jadu'n Dios y'ané'min ni paady nej levadura huidi tüg töxyjäy ytiñhuidijt miid tugüig quipxi'ñ harina ixti cooni yajxunday je harina.

Je tü'aa xützpi

22 Co Jesús anajty ñicxy jim Jerusalén, chi yaj'ixpicxy anajty Dios y'ayuc ytiy'ajt cajp cajp majaty ñaxy. 23 Chi tüg jäy Jesús amidoy:

—Huindzin, ¿nej hueeni yi jäy ajcxy huidi y'alma nüdögip?

Chi Jesús y'adzooy:

24 —Mijpidaaccix Dios ytiy'ajt amuumdügijot, jëbi ajcxy m'alma ñüdögipy, jadu'n nipaady nej jäy ajcxy ñaymic'ixigixy co ytiñhuaangixy ma je tijc aguu xützpi. Jadu'n ñich miich nimaayb co mayjäy ooy ja'a'ixiy ytiñhuaangixy ma Dios y'ane'my e ca' ajcxy jadipy nej ytiñyigixipy. 25 Co je codijc ypidigipy etz agiiyñip ytiñc, huin'it miich ajcxy pinjaty tibäy hui'm, chi jilby tibäy miich ajcxy mmñandägipy: “Huindzin, yaj'ahuädz”, e chi je tijc huindzin miich ajcxy xy'adzohuipy: “Ca' ñich miich ajcxy nejhuiyich ma miich ajcxy mdzoongixy.” 26 Chi huin'it miich ajcxy minandägipy: “Miid ñich ajcxy miich ti nmüidgaaygixy ti nmüid'uuccixy, e miich ti myaj'ixpicxy ma ñich ajcxy ngajp.” 27 Chi je Huindzin y'adzohuipy ajcxy: “Ñich miich ajcxy nimayb co ca' nnejhuiyich ma miich ajcxy mdzoongixy. Jihuäccix ma ñich nhuinduu, miich ajcxy pocy ytumbi.” 28 Chi miich ajcxy jim ooy mdajcixipy mmáyigixipy, myáaxcixipy mdützquéetcixipy, co miich ajcxy m'ixipy Abraham, Isaac, Jacob etz tüg'óciy yi Dios y'ayucnajtzcaxxiybi jilby ma Dios y'ane'my, e miich ajcxy tibäy anajty ti mhui'mgixy. 29 Minip yi jäy ajcxy huidibi tzoomb ma xii ypidzimy, ma xii ycidägy, ma jayhuixtuyc ypidzimy, etz cham ma madzäcruudz ytinaay'ahuüy, chi y'ixtáaccixipy ma je caydac jilby ma Dios y'ane'my. 30 Paady ji jäy ajcxy huidi cham axam'ajtp, je' ajcxy jayijp'adip, etz ji jäy ajcxy huidibi cham jayijp'ajtp, etz je' ajcxy axam'adip.

Jesús taj may miid Jerusalén ycixpi

31 Chi nijëjity fariseojäy nimay Jesús:

—Quëg ya com yi rey Herodes xyaj'ögaam.

32 Chi Jesús y'adzooy:

—Ñicx nimaaygix yjiibi huaax co nyajpidzimybich ca'oybi etz nyajtzoocypich jäy cham etz jabom, codugüig xii ti ndung mayíjich. 33 Ooy ycopicyity co ñich njactüyöyibich cham, jabom etz huixtic. Com ypaadyii co Dios y'ayuccapxhuäcxpi y'ögip ajcxy jim Jerusalén.

Chi Jesús yjacmínaañ:

34 —¡Jerusalén jáy! ¡Jerusalén jäy! huidibi yaj'o'cp Dios y'ayucnajtzcaxxiy ajcxy, etz ycögädz ajcxy je jäy huidibi Dios ti xyajniguéjx ajcxy. Janch canaag'oc ñich miich ajcxy njahuijtzmuga'ñ jadu'n nej tzeydaj y'ung yajmucy queecpätcipy, chi ni ca' jadu'n ti m'a'ixiiygixy. 35 Chi jada' ijxcix cuenditungix, com jadachambi mgajp yhui'my najtz'ixi'.

hich miich ajcxy nimayb co ca' xy'ixipyich jadügtecy, ixti cooni anajty tiempo paaty mina mmínángixipy: “Capxpaaty je' huidi miimb miid Huindzin'ájtín Dios ycixpi.”

14

Jesús yajtzögy tüg yëydijc quixypa'mmüdpí

¹ Chi jadu'n yjajti co tüg pocxxüduum Jesús ytiy ycaya'n anajty ma tüg fariseojäy ytiyc, hue' anajty judío tungmüdpí. Chi yi judío ixpiyitiyc ajcxy tzach'ix'ijtcixy Jesús, amídooy'ijtcixy Jesús y'ayuc. ² Huin'it tüg jäy huídibi ymüd anajty quixypa'm miñ ma Jesús yhuinduu. ³ Chi Jesús ymígapxi je' ajcxy huídibi yaj'ixpiyc Dios ñecy etz yi fariseojäy ajcxy, nimay:

—¿Nej je Dios ytiy'ajt ymíñañ? ¿Huaad o ca' huaad chögy jäy pocxxüduum?

⁴ Chi ajcxy y'amonday. Huin'it Jesús cñixajñy je pa'm jäy, chi yajtzöocy. ⁵ Chi Jesús nimay je fariseos ajcxy:

—¿Nej miich ajcxy pen ñijutcögäp ajcxy mhuaajuubi o mburro pocxxüduum, nej ca' mic'amy nicxy yajpidzimgixy oy y pocxxüduumí?

⁶ Chi ca' ajcxy jajty nej y'adzohuimbíjtcixipy.

Je pinjaty huodzooñyip ma je pijcpi yajnixüduñyi

⁷ Co Jesús ijxy jadu'n nej yi' ajcxy jac'oybi iñaybejt huin'ijxcixy jim ma je caybejt, chi ajcxy tüg ayuc yajnimaañyi, je tiibi anajty yajhuomiingixy:

⁸ —Co miich myajhuoohuipy ma pijcpi yajnixüduñ, ca' m'ixtägipy ma je iñaybejt cödumbi, ca' jécyity co yajhuoomiñ huidi je' iñaybejt ymíhuaad. ⁹ Chi jada' xyñimähuiipy je huídibi anajty ti xyhuoomiñ: “Mo' jada migüg jada iñaybejt cödumbi.” Chi miich tzöydu'n miid mñicxpy ma je' iñaybejt axambi. ¹⁰ Co jäy xyhuoohuipy ma je pijcpi yajnixüduñ, jim m'ixtägip ma je axambi iñaybejt, e co ymíniy je huídibi anajty ti xyhuoomiñ, chi xyñimähuiipy: “Migüg, nax ma yi iñaybejt cödumbi.” Huin'it capxpaady m'idipy ma je' ajcxy huídibi anajty iñayb ma caybejthuinduu miid miich. ¹¹ Pinjaty c'i'm naygömáñy, tzöydu'nbaadip je'. Pinjaty naybidaacip nicy xeemy je' je' capxpaady y'idip.

¹² Chi Jesús nimay pinjaty huidi anajty ti yhuoomiñyii:

—Co miich mxüduunipy ca' mhuoohuipy je jäy ajcxy huídibi ooy miid mnaymigüg'ájtigixy, ni mmídügquëx, ni m'ajuugy m'amigüg, ni mmídijc comeeñybi, ca' jécyity co nañ jadu'n xyhuoohuipy, e chi anajty jac mij yejc-huimbijty. ¹³ Co mxüduunipy, chi huoohuipy ayoobitijc, tzaachijäy ajcxy, tecymätpi ajcxy, etz jäy huiintzpi. ¹⁴ Huin'it miich mjotcuyc'adipy co yi' ajcxy ca' jadipy nej yejc-huimbíjtcixipy. Jiini Dios xymigüedipy co anajty yajjugypicy je tudägypí jäy ajcxy.

Je ijxpejt ma tüg adzoo'ájtín mijpi

¹⁵ Tüg jäy huidi anajty iñayb miid Jesús ma caybejt huinduu co midooy nej Jesús ymíñañ, chi nimay Jesús:

—Jotcuyc je jäy ajcxy huidi cayip jiiy ma Dios y'ane'my.

¹⁶ Chi Jesús y'adzooy:

—Tüg jäy may anajty jäy yaj'adzu'adañ, chi jayijpni oy mayjäy nimay co anajty yaj'adzu'adañ. ¹⁷ Co je adzoo'íbi paty, chi quejxy tüg cogapxy huen nicxy huogixy je tiibi anajty ajcxy yajnimäy, nimay ajcxy: “Jámgiç, ti jim yajni'ixiy je caayin uucin.” ¹⁸ Chi ajcxy nidüg'ócay ymínanacy: “Tun may'ajt meecxcich, ca' y'oyiy nej nyajnícxibich.” Chi je' jayijp jäy y'adzoy: “Ti njuyich tüg rancho je' copicy jayijp nicxy n'ixyich, paady ca' nicxa'ñich; tun may'ajt meecxcich.” ¹⁹ Chi jadüg jäy ymíñañ: “Ti njuyich migoox par huaj yuubi, nicxy n'oc'ijxmadzañich jayijp, paady ca' y'oyiy nej nícxibyich, tun may'ajt meecxcich.” ²⁰ Chi jadüg jäy ymíñañ: “Tim chamni nbicyich, paady ca' oyiy nej nícxibyich.” ²¹ Co je cogapxy yhuimbijty, chi yajnimay je' yhuindzin jadu'n nej je jäy

ajcxy y'adzooy huidi anajty oy ti huoy. Huin'it je huindzin ooy yjotmätcoty, chi nimay je ytumbi: “Nícx tzojcyi cajpjoty ma yi jäy ajcxy yöygyxy ñajxcixy etz ma yi mij tü, e chi huomiinipy pin mdimypaatyp ayoobitijc, yi tzaachijäy etz huiintzpi.” ²² Chi je' ytumbi ymínañ: “Huindzin, ti nduñich jadu'n nej ti xyñimäyich, etz jac chiini ñaybejt.” ²³ Chi je huindzin nimay je' ytumbi: “Nícx ma yi mij ni mij tü yajmin je jäy ajcxy adzip, huen ñich ndijc uch. ²⁴ Chi ñich miich nimäy co ni tüg yi jäy ajcxy huidi jayijp yajnimay, ca' ajcxy y'adzuu'adipy miid ñich.”

Nej ooy chípity co Cristo nbanicxim

²⁵ Chi may anajty jäy ñícxxy miid Jesús, chi Jesús yhuäc-huimbijty, nimay ajcxy:

²⁶ —Pen ji pin xypamiñich, e ooy ñigi tzocy yi' ytaj yteedy, yi' ytöxyijc, yi' y'ung, y'ajch o chi', etz nañ ooy ñigi tzocy yi' yjugy'ájtín, ca' ñich yi' huaad ndiscípulo'adyiijich. ²⁷ Yi jäy ajcxy huidi xypamiimbich huidi ñich ndiscípulo'adaanip, copicy yajnaxipy ajcxy ayo'n, jadu'n nipaady nejjihuüy ycrudz ti cabíccixy e nícxxy yajcruudzpeda'ñyii. ²⁸ Co miich ajcxy mmijtijc mgoja'ñ, chi miich ajcxy jayijp m'ixtaaccixy e m'a'ixiygyxy jadu'ñyi meeñydunaangixy, nej pen miid ajcxy huidi jébi miid myajmaaygyxy je mmijtijc, o peni ca'. ²⁹ Ca' yjécyity co anajty je tijc ti yajpojtzygy, chi anajty ca' m'ocjajtni nej myajmayipy, e pinjaty anajty ti xy'ixy, chi ooy xyñixigipy xyajxigipy. ³⁰ Chi jäy ajcxy ymína'nip: “Jadayaabi yéydijc nigoo ti yajtzondägy tijc poch, e ca' ti ocyajmaayñi.” ³¹ O huidi rey ji co chona'ñ tziptumbi miid huingbi rey, ¿ca' jayijp huinmayipy pen jébi chiptuñ miid majc mil jäy, pen je ymidzip miimb miid iipx mil jäy? ³² Ca' yjécyity co je tügpi rey jiguemni anajty miñ, chi quexipy tüg huingapxpi pijctzohuipy may'ajt ca'ydí yi tzip yjadyii. ³³ Hueñypínity ma miich ajcxy pen ca' m'ixmájtzcixy tüg'óciy tijaty miich ajcxy mmíid, ca' ñich yi' huaad ndiscípulo'adyii.

Co je caan ytamtz'ajt ytigooyñi

³⁴ Yi caan ooy yi' y'óyity pen ymiid ytamtz'ájtín. Co je caan ytigoy ytamtz'ájtín ca' ji ni ti xücx'ájtín yegipy. ³⁵ Yi caan huidi ti ytigoy ytamtz'ájtín ni ca' y'oybidägnity ma je naax, ni ma je püx huidi aboon'ajtp. Hue' janchtiy yaj'ixjidejtp tibäy. Pinjaty ñich n'ayuc xymidohuaanip huen mido'mbicy.

15

Ijxpejt ma je cöbixy huidibi tigooy

¹ Chi ajcxy je yajcujtpidijc etz pocyjäydijc nimijhuägtay ajcxy Jesús tzach'amídooidaani ajcxy je' y'ayuc. ² Chi ajcxy huidi ooy tzachmijpidägy judíojäy ytiy'ajt etz huidi ajcxy yaj'ixpijc Dios ñecy ameech nigapxcixy ni'oñiygyxy je Jesús, chi ajcxy ymínañ:

—Yi Jesús pocyjäydijc ajcxy ymígüg'ajtpy, e yi' miid ycaaygyxy.

³⁻⁴ Chi Jesús jadayaabi ayuc ajcxy yajnimay:

—Huidi jäy ji ma miich ajcxy pen ymiid migo'px cöbixy co ytigoy nidügti, ¿nej ca' yajhui'mipy je mada'px majmocx mídaaxpi jim ma chinaaydac, chi nícxxy ixtäy huidi anajty ti ytigoy ixti cooni paadip? ⁵ Co paadip, chi mic'amy pidägip ma quejycop janch jotcujc. ⁶ Co yajjadip ma ytijc, chi huomucy ymígügtijc etz ymijin ymidijc, nimähuipy ajcxy: “Jotcugiygyx miid ñich, ti ñich ngöbixy nbaady huidi anajty ti ytigooy.” ⁷ ñich miich ajcxy nimaayb co nañ jadu'n tzajpjoty ooy jotcujc'ájtín ñigi miid co tüg pocyjäy yjothuimbity, ca'ydí miid mada'px majmocx madaax tudägypi jäy huidi ca' ytundigoy.

Ijxpejt ma je meeñ huidibi tigooy

⁸ Chi Jesús yjacmínañ:

—¿Huidi töxyjäy ji pen ymiid majc ymeeñ, co ytigooy tüg meeñ, nej ca' jin nöctzohuipy, e ytigihuipy pedigpi ixtähuipy ymeeñ oñydägy ixti cooni paadipy? ⁹ Co paady, chi huomucy

ymigügtijc etz ymijün ymidijc, e chi nimähuipy: “Xondaaccix müd ich, ti ich nmeen nbaty huidibi ich anajty ti nyajtigoy.” ¹⁰ Jadu'n ich müch ajcxy nimäy co nañ jadu'n Dios y'angeles ajcxy ooy yjotcúcity co yjothuimbity tüg pocyjäy.

Ijxpejt ma je ung huidibi ymeen yajtixctay

¹¹ Nañ jadu'n Jesús yjacmīnañ:

—Tüg yēydijc ymūd anajty metz ymang. ¹² Chi je jacmutzpi nimay yteedy: “Tat, mooygich yi pidägy huidi xypaatpich.” Chi je' yteedy je pidägy yajhuäcxy. ¹³ Hueeni anajty xii tzuu cujc ñicxy, co je' ymang mutzpi yajmujctay tüg'óciy huidi yi yjē'ajtpy, chi chooñ ñicxy huingnaax huinggajp. Chi jim mic'amy yajtunday yajtigoyday tüg'óciy huidi anajty ymūd. ¹⁴ Co anajty ymeen tüg'óciy yajtundäy, chi miiñ tüg mij yuu ma je cajp. Chi ooy je mang mutzpi caayin uucin huit meen jayajmayjajtni. ¹⁵ Chi je' ninicxy tüg jäy ma je jimbi naaxjot ymidunañ anajty. Chi yquejxi ma yrancho idzim cuend'ajtpi. ¹⁶ Ooy anajty janijot'aty ycüxa'ñyii müd je pētztim huidi anajty idzim y'ojcpy. Chi ni pin anajty ni ti ycamöyii. ¹⁷ Co yhuinmañ yajmejch, chi ymīnañ ma yjot yhuinmañ: “Jim janch maytumbi ma ich ndeedy ytijc, ymūd ajcxy jicxy picy janch may'amy. Ich ya tzach'ayoob müd yuu xii. ¹⁸ Tzonaambich ya, nicxañich ma ich ndeedy, nimähuibich: Tat, ti ndundigóyich müd Dios tzajpjotypi etz müd müch. ¹⁹ Cham ca' ypadyii müch mīnañip co müch xy'ung'adyijich. Yajtungich jadu'n nej mdumbidijc.” ²⁰ Chi je' choñ, ñicxy ma yteedy. Jeguēgyñi anajty ymiñ co yteedy y'ijxpaati. Chi yteedy ypa'ayogoti, e ñicxy poyigy oy jipcobadiy. Chi yögminennajxy etz tzücxy. ²¹ Chi je ung ymīnañ: “Tat, ti ndundigooyich müd Dios tzajpjotypi etz müd müch. Cham ca' ypadyii nicxy müch mīnañ co ich müch xy'ung'adyii.” ²² Chi je ungedeedy nimay je' ytumbi: “Yajpidzim je huit oybi, mic'amy yajnjeniygix jada n'ungich, chi mooygix yi cijiitz etz ycig. ²³ Nicx yajtzoongix yi huaj mang nicxpi, yaj'occix, chi ngaayim n'uucim e nxiduunim. ²⁴ Jada n'ungich jadu'n nipaady nejjuhuüy anajty ti y'ögy, e chi ti yjugypicy. Tigooy yi' anajty e ti yjäd.” Chi ajcxy ooy yjotcugiiy.

²⁵ Chi je ymang mijpi camjoty je' anajty. Co yja'ty mihuingon je ytijc, chi midoy co jäy ooy yxüxy etz y'ech. ²⁶ Chi yaaxi tüg ytumbi y'amidooy: “¿Ti yi' tünip jajtíp?” ²⁷ Chi je tumbi y'adzooy: “Ti yjäd m'uch, ti mdeedy yaj'ögy tüg huaj nicxpi, co ymang ti huimbity juugy.” ²⁸ Chi je ungoob ooy yjotmäty, ca' anajty ytigihuañ tigoty. Huin'it je yteedy ñibidzimi, ycohuanii co huen tigiy tigoty. ²⁹ Chi je' y'adzooy, nimay yteedy: “Janch micanaag jimijt ich müch müd nduñ, ni ca' ngapxhuimbityich. Ca' chambaad müch ni xycamooyich tüg pi'ccöbixy jaydeb njotcujc'adipyich nxidunipyich müd nmigügtijcich. ³⁰ Per co yi mmang ti yjäd huidi oy ti yajtundäy yi ymeen müd jibic-huinmañ müd jibic töxyjäydijc ajcxy, chi ti myaj'ögy huaj mang nicxpi müd yi' ycixpi.” ³¹ Chi je ungedeedy nimay je' ymang: “Müch ung huinixi ya müd n'ity. Tüg'óciy huidi nmüdich müch yi' mje'. ³² Ooy ycopicyity co nxiduunim etz njotcugiiyim, co yi m'uch jadu'n anajty nej ti y'ögni, e jadachambi ti yjugypicy, ti anajty ytigoy, e cham ti yajpaady.”

16

Je ijxpejt ma je mayordomo huidibi ca' yhuindzin mīduñ tudägy

¹ Nañ jadu'n Jesús nimay yi' ydiscipulos:

—Jim anajty tügjäy comeenybi, ymūd tüg ytumbi huidi yi' ypidägy cuend'ajtpi. Chi oy nimäyii co tüg je ytumbi nigoo anajty tzachyajtuñ je meen ma ycapadyii. ² Chi je huindzin oy yajhuoyii je' ytumbi, chi nimay: “¿Nej jada co ich jadu'n nimäyijich müd müch ycixpi? Ya yi cuenti cimoydaaygich nej ti mduñ, etz ca' ich müch n'ocjactumbi'adaañ.” ³ Chi je pidägy cuend'ajtpi jot'ajti: “¿Ti ndunipich? co yi' nhuindzin xyajpidzimañich ma yi ytung. Juttajii ca' njatyich, co limosna nbijctzohuipyich tzöydümbich. ⁴ Nejhuibich ti ndunipich jaydeb jäy ajcxy xycöbigipyich

ma ajcxy ytijc.” ⁵ Chi tüg tüg huoy pin anajty minuucx'ajtp je' yhuindzin; chi y'amidooy je jayijpi: “¿Jadu'ñyi miich minuucxy'adyii ñich nhuindzin?” ⁶ Chi je' y'adzooy: “Migo'px garafón aceite.” Chi nimay: “Matz mnecy, ñña' mic'amy, e cojayi' huixchiguipxmajc.” ⁷ Chi jadüg nimay: “¿Miich jadu'ñi mmínuucxy'adyii?” Chi je' y'adzooy: “Migo'px quipxi'ñ trigo.” Chi nimay: “Matz mnecy, cojayi' mída'px.” ⁸ Chi je pidägy huindzin capxpaaty je jibicjäybi huidi cuend'ajtp yi' ypidägy co oy yhuinma'ñybaady mij; co jadachambi naaxhuiñjäy huidi ca' mibicy Dios, ñigi ajcxy ypëgyity mïd yhuinma'ñ, ca'ydi yi jäy ajcxy huidi huinjihuñyb Dios ytiy'ajt.

⁹ Ñich miich ajcxy yam nimaayb migüg'ájtigixy yi jäy ajcxy mïd yi meen huídibi ca' ytimytiyity, jigix co je meen anajty myajmayajtcixy ji pin miich ajcxy xycöbigip ma jugy'ajttac huinixibi.

¹⁰ Je' jäy ajcxy huídibi yajxon cuydunam je ané'min huidi hueeni, nañ ycuydunamy je ané'min huídibi mijip. Je jäy ajcxy huídibi ca' cuydunaangixy je ané'min huidi hueeni, nañ ca' cuydunaangixy je mijpi ané'min. ¹¹ Pen ca' mjaajtcixy nej mgüend'ájtixipy yi jugy'ájtin huídibi ya naaxhuiñ yajpatp, ¿pin miich ajcxy m'ocyajmihui'mamy je jugy'ájtin je riqueza oybi janchypi? ¹² Pen ca' mjaajtcixy nej mgüend'ájtixipy tiibi mihuí'ngixy huidi huingjäy yje'ajtpy, ¿pin miich ajcxy xymöhuip huídibi ajcxy yje'ajtpy?

¹³ Ni tüg tumbi ca' jëbi ytuñ mïd metz yhuindzin; com tüg je' ixtijipy etz jadüg mijnicxpedipy; o tüg huidi ycapxycöbigipy, etz jadüg ca'. Miich ajcxy ca' huaad mijpidägy Dios etz nañ jadu'n mijpidägy yi comeen'ájtin.

¹⁴ Nañ jadu'n mïdooy jada ayuc yi fariseojäy ajcxy, com ooy anajty ajcxy meen adzójccixy. Chi ajcxy ooy nixiici yajxiici Jesús y'ayuc. ¹⁵ Chi Jesús yminañ:

—Miich ajcxy fariseojäy jadu'n mnaybidáacigixy ma jäy ajcxy yhuinduu nejjihuñy ajcxy ooy m'oyjäyity. Dios ñejhuñydaayb co miich ajcxy mïd jibicpi ma mjot mhuinma'ñ. Tijaty huinma'ñ huidi jäy ya naaxhuiñ y'oy'ijxyp, Dios ca' yi' oy'ixy.

Je Dios ycötújcín etz je Dios y'ane'mdac

¹⁶ Chi Jesús yjacminañ:

—Je taabi je Juan anajty yjiijity, jii'ajtp anajty Moisés ycötújcín etz je y'ayucnajtcapxñybi ajcxy y'ixpijcín. Huin'it tiempo etz ixti jadachambi jadu'n yajnajtcapxiy je Dios y'ané'min, e mayjäy ooy ñaybidáacigixy co ytiñhuaangixy ma Dios y'ane'my.

¹⁷ Ca'chípity co je tzajp etz naaxhuiñybi ñajxtähuipy, pero je Dios ycuydundähuamy tüg'óciy jadu'n nej ñecy ymina'ñ. Ni tügi letra oy mabaad ymúdzity nicxy ycayajcuyduñ.

Jesús capxticxy nej ypöcyity co jäy ytöxyijc ixmach

¹⁸ Chi Jesús yjacminañ:

—Huenpinjäyity co ytöxyijc ixmach etz ypicy mïd huingbi töxyjäy, ooy anajty mij pocy tuñ. Nañ huenpinjäyity huídibi pijcp mïd je töxyjäy huidi ñäy ti y'ixmachyii, nañ mij anajty ypocytuñ.

Je comeñyjäy etz je Lázaro

¹⁹ Chi Jesús yjacminañ:

—Ji anajty tüg jäy comeñybi ñayxoxyii anajty janch ooy mïd oyjatypi huit, etz janch oy ycay y'ügy jabom jabom. ²⁰ Nañ ji anajty tüg ayoobi jäy huidi limosna pijctzoob, hue' anajty yxi Lázaro. Lázaro jabom jabom anajty ycögnäy ma je comeñyjäy ytijc'aguu, janch nibuutzp anajty ooy. ²¹ Lázaro ooy anajty jani'ixy caya'ñ je cayduc tzütztuc huídibi cáb ma je comeñyjäy ycaybejt. Oy uc anajty ymiñ yhueyii je ñübüdz. ²² Chi jadu'n yjajti co oy y'o'cni je jäy huidi limosna pijctzoob, chi je ángeles ajcxy yajnicxy Lázaro ma je Abraham yajpaady. Chi je comeñybi nañ jadu'n y'o'cni, e oy yajnaaxtigiyii.

²³ Chi je comeñybi jiiy ca'oydactuuby tzaachypi anajty jihuñy, chi mij'ijxy jigüegy

je Abraham etz je Lázaro. ²⁴ Chi je comeeñybi ycapxy janch mic, yminañ: “Apteedy Abraham, ñich pa'ayoog. Tun may'ajt quex Lázaro, huen yi' ycihuax yajxoogy miid nii etz xyajtíjtziwich ndootz, co ñich ooy ayo'n nbaadyich ma jada mij jin.” ²⁵ Chi Abraham y'adzooy: “Oc'ungich, ajihuñhuñ co ti mdzinäy ti mjugy'aty miid mhuit mmeeñ agujc jotcuyc, e yi Lázaro ooy ayo'n paty. Jadachambi Lázaro yjotcuyc'aty, etz miich jiiby mbatpy tzaachypi. ²⁶ E jadügnax, ji tüg mij huoc ma ñich ajcxy etz miich ajcxy. Pen ñich jim'amy janaxam ma miich, ca' njadipyich, nañ jadu'n miich ajcxy ni pin ca' jadipy nej ñaxipy ma ñich nyajpaadyich.” ²⁷ Chi je comeeñybi jacnimay Abraham: “Apteedy Abraham, tun may'ajt quex yi Lázaro ma ñich ndeedy ytijc. ²⁸ Jim ma ñich ndeedy ytijc jim migoox miguëx nmídidyich, huen nicxy yajmídmíydaaccixy, ca'ydi je' ajcxy nañ jadu'n ya minipy ma jada ayoodac.” ²⁹ Chi Abraham y'adzooy: “Yi' ajcxy ymiid necy huídibi Moisés etz Dios y'ayucnajtzcaxiybi ycojaay, huen cuydungixy.” ³⁰ Chi je comeeñybi yminañ: “Janch jadu'n apteedy Abraham. Pen nidüg yi ögpi ñicxy ma je' ajcxy, jothuimbidi y' ajcxy.” ³¹ Chi Abraham yminañ: “Pen ca' je' ajcxy mijpidägy Moisés y'ayuc je jécyip etz huídi ajcxy jecy'ajt Dios y'ayucnajtzcaxiy, nañ ni ca' mibíjccixipy pen nidüg ögpi yjugypicy.”

17

Huidibi ooy ycodzigijity co n'agänáxim ma pocy

¹ Chi Jesús nimay yi' ydiscípulos:

—Janch tiy'ajt jadu'n co yminip jäy ajcxy huídi yajhuinma'ñydigoyip yi mayjäy ajcxy miid aaní. ¡Ay yi' ayooob ajcxy! pinjaty jäy ajcxy yajhuinma'ñydigoyaangixy. ² Nigi y'óyity co ixypy yajyo'cxodziyi tüg tzaa janch mijpi, e chi yajcöjibijpnaxipy mejyjoty, ca'ydi co yajhuinma'ñydigoyipy jada jäy ajcxy huídibi ixpijcin hueeni miid ma Dios ytiy'ajt. ³ Naygüend'ájtigix miich ajcxy co ca' mgapxtigóoygixipy.

Co m'uch xymidundigooyipy, e chi mgapxhuíjip, e pen jothuimbijt, chi mbocymeecxipy. ⁴ Pen m'uch huixtujc'oc xymidundigooy tüg xiibi, nañ huixtujc'oc xyñimíñ tüg xiibi, e ymina'niipy: “Ti njothuimbityich”, huinmeecxipy miich yi', chi jada' miich huixtujc'oc mbocymeecxip.

Je mibíjcin ymic'ajt

⁵ Chi je apóstoles ajcxy nimay je Huindzin Jesús:

—Yajyeeg ñich ajcxy nmibíjcin.

⁶ Chi je Huindzin Jesús y'adzooy:

—Co ixypy miich ajcxy mmibicy Dios jadu'n nej tüg pi'c mostaza pajc, e mníma' ixypy jada paadzim quipy: “Nayyajpidigí, nicx tina' mejyjoty, e xycapxymídohuip yi'.”

Ti huaad tuñ je pin yajcaayb yaj'uuc

⁷ Pen ji miich ajcxy nidüg pin ymiid tüg ytumbi huídi tumb ñaaxjidzitzí o yhuaj cuend'aty, co yja'ty ma mdijc, ¿nej jébi nimay: “Tigi', ixtäg ma mesa etz adzu'at?”

⁸ Hue' janchtiy mnimähuipy: “Yaj'oyíyigich n'adzuu'íbi, co'amedí' mhuit, e xymooygich ngaayin n'uucin. E huin'it miich mgayipy m'ügipy.” ⁹ ¿Nej yajnaxipy je' Dioscojuyip miid co je' anajty ti tuñ huídibi yaj'ane'my? Hich minamb co ca'. ¹⁰ Nañ jadu'n miich ajcxy co ti mguydungixy tüg'óciy tibi Dios xyaj'ane'mgixy, chi mmináangixipy: “Je' ñich ajcxy je tumbi huídibi ca'p ycapxpaadyity, jéyi ti ndúngixich huídibi ñich ajcxy huaad ndungixy.”

Jesús yajtzögy majc jäy jibic pützpa'mmídpi

¹¹ Nicxp jim Jerusalén anajty Jesús, chi ñaxiy ma Samaria etz Galilea ñaymidziba'n'ájtigixy. ¹² Co anajty mihuingoñ tüg cajp, chi jipcoyöyiy majc jäy pützpa'mmídpi. Chi ajcxy yhuäcxipy jiguëgyñi. ¹³ Chi ajcxy mic ycapxcoody yminaangixy:

—Huindzin Jesús, pa'ayoog ñich ajcxy.

¹⁴ Co Jesús je' ajcxy ijxy, chi ñimay ajcxy:

—Ñicx nayguëxícigix ma yi teedy ajcxy.

Chi jadu'n yjajti, co ajcxy ñicxy, chi tüyöyjoty oy choocixy. ¹⁵ Nidügti je' ajcxy co ñay'ijxi co ti anajty chögy, chi nihuimbijty Jesús, ooy Dios jäymech cömay janch cixygot huinijot.

¹⁶ Chi je' ycojxtinay'ahuüy ma Jesús ytecymijc, chi pidacpy yhuinijijp naaxcixy yajnaxy Dioscojuyipy. Samaritanojäy je' anajty. ¹⁷ Chi Jesús ymíañ:

—¿Nej ca' nimajc miich ajcxy huidi ti mdzoocixy? ¿Ma ajcxy je' janidaxtucpi? ¹⁸ ¿Nej ca' pin jac yhuimbijty miñ jäymedza'ñ cömaya'ñ Dios, jëyi tügpajc ti yhuimbity jada samaritanojäy?

¹⁹ Chi Jesús ñimay je jäy:

—Pidig, nicxni. Yi mmibíjcín ti xyajtzögy.

Nej je' yminípy Dios y'ané'mín

²⁰ Chi je fariseojäy ajcxy y'amidooy Jesús mína anajty yi Dios ya miñ ya naaxhuiñ y'ane'mañ. Chi Jesús y'adzooy:

—Je Dios y'ané'mín ca' je' yminípy jadu'n nej ti yaj'ixy o yajmidooy. ²¹ Ni mgamináangixipy co cha je' o jim'amy je'. Dios y'ané'mín ya je' cham ma miich ajcxy.

²² Chi Jesús ñimay yi' ydiscípulos ajcxy:

—Miim je xii je tiempo ma miich ajcxy anajty ooy xyjamíid'idáangixich tüg xii, e ca' ñich miich ajcxy xy'ixipy, ñich je jäy huidi tzoön tzajpjoty. ²³ Chi jäy ajcxy ymíná'nip: “Chaa'amy je', je Cristo”, o “Chim'amy je'.” Ca' miich ajcxy yi' mniníxcixipy, e ni mgabaníxcixipy. ²⁴ Co anajty nmiñich jadügtecy ya naaxhuiñ, ñich, je jäy huidi tzoön tzajpjoty, co ñich anajty nmimiñ n'ané'mín, jadu'n je' yjadipy nej huizuc co y'aa'an ma tüg tzajp'ijx e nañ jadu'n y'aa'an jadüg tzajp'ijx. ²⁵ Nañ ooy ycopícyty co jayijp ocpáadibich ayo'n, e chi jada xyca'ixa'nibich xycatzoga'nibich yi jäy ajcxy huidi tzinaayb jugy'ajtp jadachambi tiempo. ²⁶ Com jadu'n nej yjajti jecy'ajty, co je Noé chinaay, nañ jadu'n yjadipy co anajty ñich, je jäy huidi tzoön tzajpjoty, co anajty nxii ndiempo paty mína anajty nmiñich ane'mbi. ²⁷ Janch caayb janch uucp anajty je jäy ajcxy agujc jotcujc co je Noé ytigüy ma ymijcajoon. Chi je ayo'nduu ymiñ huidi cijx yaj'ögtigoydäy je mayjäy. ²⁸ Nañ jadu'n yjajti jecy'ajty co Lot chinaay. Je jäy ajcxy jim Sodoma etz Gomorra ycaaygixy y'uuccixy yjuuygixy ytoocixy, etz ytijcojciy. ²⁹ Huin'it xii co Lot chooni jim Sodoma, chi ycäy tzajpjoty jin etz huidi jindzaa miiid conhuidity ytoy, chi cajp ytigoyday. ³⁰ Jadu'n nej ayo'n yjajti taabi chinaay Noé etz Lot ya naaxhuiñ, nañ jadu'n yjadíyby ayo'n co anajty nmiñich jadüg'oc ya naaxhuiñ, ñich je jäy huidi tzoön tzajpjoty.

³¹ Je huin'it xii huin'it tiempo pin anajty iñaayb ma ytijccop, e ymiid anajty ypidägy jiiiby tigoty, ca' niminagipy nicxy ti yajpidzimy, e huidi jäy anajty jim camjoty nañ ni ca' yhuimbidity ma ytijc. ³² Ajihuüygix jadu'n nej Lot ytöxyijc ayo'n paty. ³³ Tüg'óciy jäy ajcxy pinjaty yjugy'ajt tzögam, tigoyipy yjugy'ajt. Tüg'óciy jäy ajcxy pinjaty yjugy'ajt tigooyb (miid ñich ycixpi), hue' je' yjugy'ajt ypaadipy chögipy.

³⁴ ñich miich ajcxy ñimaayb co je huin'it coodz nimetz jäy anajty ajcxy ma cijx, tüg yajnicxiyb etz jadüg yajhui'míyb. ³⁵ Nimetz töxyjäy anajty yjijtzciy, tüg yajnicxiyb, etz jadüg yajhui'míyb. ³⁶ Nimetz yëdyjc anajty ytungixy camjoty, tüg yajnicxiyb etz jadüg yajhui'míyb.

³⁷ Chi je jäy ajcxy huidi ixpijcp Jesús y'ayuc ymíañ ajcxy:

—¿Ma jadu'n yjadíyby nej miich ti mínañ, Huindzin?

Chi Jesús ymíañ:

—Ma anajty je ögpi yajpaady, jim yi luud ajcxy ñümuga'ñ.

18

Je ijxpejt ma je ayoobitöxyjäy etz je juez

¹ Chi Jesús yajnimay ajcxy tüg ayuc huudijaty ixpijcp ma yi' co ooy ycopícyity Dios nmibijctzoohuim jabom jabom, ni ca' nmidziipim. ² Chi Jesús yminañ:

—Ji anajty tüg juez ma tüg cajp, ni Dios anajty ca' tzigíy, etz ni jäy ajcxy anajty ca' huindzigíy. ³ Nañ ma je cajp jim anajty tüg co'ögy ytöxyjäy. Je' anajty yminög janam jadojoc ma je juez, nimäy anajty: “Nihuaangich ma je nmidzipich.” ⁴⁻⁵ Chi je codung ca' co'adzoy ca' a'ixiy tzojc. Chi je juez jot'ajti, yminañ jotjoty huinma'ñyoty: “Oy Dios ca' ndzigíyich, ni jäy ca' nhuindzigíyich, per com jada co'ögytöxyjäy nīgi xychach'amayíyich, miñ n'ocnihua'ñich, ca'ydi jadüg'oc ymiñ e xyajcijxich anajty nmecxtújcín.”

⁶ Chi je Huindzin Jesús yminañ:

—Mido'mbic miich ajcxy nej je juez jibicjäybi ti nihuañ je töxyjäy co anajty ti yajtzibyii. ⁷ ¿Nej ca' Dios ñihuaanip yi huudibi ti huin'ixy, huudibi mibijctzoob xim tzuum? ¿Huäcxibip, nicx ca' tzojc adzooyi? ⁸ Ich miich ajcxy nimaayb co Dios ñihuänamy mic'amy yi' yjäy. Co anajty nhuimbity ya naaxhuiñ, ich, je jäy huudi tsoon tzajpjoty, ¿nej nbáadibich mibijcín ya naaxhuiñ?

Je ijxpejt ma je fariseo etz ma je yajcogüejtpi

⁹ Jesús ñimiydac je jäy ajcxy huudi ci'm ooy ñaygömayyii co ooy y'oyjäyity, etz pejxy yi' jacjadyiibi jäy ajcxy, chi yajnimay ajcxy tüg jihuimbit ayuc:

¹⁰ —Mejtz jäy ajcxy ytigíy ma Dios ytijc capxtacpi. Tüg hue' je' fariseojäy, e jadüg yajcogüejtpi. ¹¹ Chi je fariseojäy ytinay'ahuüy ycapxtägy, chachminañ jadu'n: “Dios Teedy, Dioscojuyip yajnaxpich com co ca' ich nbocytuñich jadu'n nej jacjadyii jäy ypocytünngixy, ca' nmeechich, ca' njibicjäyidyich, ca' nmigapxich huingjäy ytöxyjic, ca' nbocytuñich jadu'n nej jada yajcogüejtpi. ¹² Mejtz xii n'ityich jaygay tügpi se-maan. Chi huen ytim ti nmüdich ngüejtpyich ma Dios majcjaty.” ¹³ Per je yajcogüejtpi jiguem ytinay'ahuüy, ni ycapät'ixy tzajpcijx, jëyi ycaachtzachcoxy yminañ: “Dios Teedy, pa'ayoogich, ich pocyjäyich.” ¹⁴ Ich miich ajcxy nimaayb co jada yajcogüejtpi y'idacy ma ytijc ti anajty yajhuinmecxy ypocy, e je fariseojäy ca' yajpocyhuinmecxy. Huenpínity huudi ci'm naygömayipy, Dios yajtzöydunib; e pinjaty ca' ñaygömayyii ci'm, Dios ycomayib.

Jesús conucxy je pi'ctijc ajcxy

¹⁵ Chi jäy ajcxy müdmiñ pi'c'anäg ma Jesús huen nidoñyii. Co je' ydiscípulos ajcxy ijxy, chi ajcxy ogy undaj. ¹⁶ Chi Jesús yaaxi ymügügtijc nimay ajcxy:

—Ixmatz, huen yi' pi'ctijc xyñimiñich, ca' ajcxy mjijpcogapxíyigixy, com yi' jäy ajcxy huudibi yajpatp ma Dios y'ané'min, jadu'n ajcxy nipaady nej pi'ctijc. ¹⁷ Janch ich miich ajcxy nimäy co hueñypínity huudi ca' cöbijci yi' Dios y'ayuc ytiy'ajt jadu'n nej yi' pi'ctijc ajcxy cöbijcy Dios y'ayuc ytiy'ajt, ca' yi' ajcxy ytigíhuipy ma Dios y'ané'min.

Tüg comeñ'anäg ymüydägy müd Jesús

¹⁸ Chi tüg micjäy y'amidooy Jesús, nimay:

—Miich oyjäybi Huindzin, ¿ti huaad nduñich co ich n'alma nidozocín paadipy?

¹⁹ Chi Jesús y'adzooy:

—¿Nej co xytíjich oyjäy? Ni pin ya yca'oyjäyity, je'yi Dios tügpajc y'oyjäyity. ²⁰ Miich mnejhuüybi yi' Dios ycotújcín. Ca' mmigapxtigoyipy huingbi töxyjäy, ca' jäyyaj'ögipy, ca' mmeedzip, ca' mmigüg nihuambedipy, yajmij'at mdaj mdeedy.

²¹ Chi je' y'adzooy:

—Ti tüg'öciy nguydundäyich jada cotújcín maabi nyecpidzimyich.

²² Co Jesús jadu'n midooy, chi nimay:

—Tigoy'ijtni ja tög huidi ca' mduñi. Toocta' tög'óciy tijaty miich miid, e mo' je meen' ayoobtijc, huin'it mgomeen'adipy jiiby tzajpjoty; miin, e pajamgich.

²³ Co je comeeñybi jadu'n ayuc midoy, chi ooy yjottigoygoty com ooy anajty ycomeeñity. ²⁴ Co Jesús ijxy co je comeeñybi anajty ti yjotmaybicy, chi minañ:

—Ooy chachchípity ytigihuipy tög comeeñyäjy ma Dios y'ané'min. ²⁵ Jac ca' chípity co ñaxipy tög camello ma yi xu'ñ yxútity, ca'ydí co tög comeeñyäjy ytigihuipy ma Dios y'ané'min.

²⁶ Chi je jäy ajcxy anajty tiibi ajcxy midoogixy Jesús y'ayuc, yminaangixy:

—¿Pin jada' jëbi y'alma paadipy nidzoocin?

²⁷ Chi Jesús y'adzooy:

—Huidibi naaxhuiñyäjy ajcxy ca' jaty nej yaj'oyihuipy, Dios jëbi yaj'oyiy.

²⁸ Chi Pedro yminañ:

—Ich ajcxy ti nbidägy n'ixmajtzaaygixy, co nbanicxaangixy.

²⁹⁻³⁰ Chi Jesús y'adzooy:

—Janch ich miich ajcxy nnimaaygixy co yi jäy ajcxy huidi ytijc ixmajtz etz ytaj yteedy, ymiguëx, etz y'ung y'anäg miid Dios y'ané'min ycixpi, ypáadipy ajcxy ya naaxhuiñ nigí oy'ájtín, etz ypaadipy ajcxy tzajpjoty tzinaayin huidi ca' ycixipy ytigoyipy nimina.

Jesús capxypidzimy jadüg'oc co y'öga'ñ

³¹ Chi Jesús huodzon je nimajmetzpi, nimay ajcxy:

—Jadachambi tzoc jámim jim Jerusalén. Nguydunaamyich tög'óciy jadu'n nej yi Dios y'ayucnajtzcaxiybi ajcxy jaybejty jecy'ajty miid ich ycixpi, ich, je jäy huidi tsoon tzajpjoty. ³² Chi nyajcüyega'ñich ma je romano gobernador, xycamij'ixipy xycamijpidägibich ajcxy. Xy'ójibich xyhuindzújibich xyjijptzújibich ajcxy.

³³ Xychaachytunipyich ajcxy, xyaj'ögibich ajcxy, e codugüg xii njugypigipyich jadüg'oc.

³⁴ Chi yi majmetzpi ajcxy ni jadu'ñyi ca' huinjihuüy ajcxy nej yhuimbidzimy Jesús y'ayuc. Yüch anajty jada ayuc miid yi' ajcxy ycixpi, paady ca' huinjihuüy nej anajty yajnimaaaygixy.

Jesús yajhuindicxigy tög huintzpi jim Jericó

³⁵ Chi jadu'n yjaiti co Jesús mihuingoñ je cajp huidi yxii Jericó, chi tög huintzpi anajty iñäy tüba'áy pijctzoy anajty limosna. ³⁶ Co midooy mayjäy ñaxy, chi je' yajty:

—¿Pin yi' ñajxp?

³⁷ Chi ajcxy nimay co Jesús nazareno najxp. ³⁸ Huin'it je huintzpi mic yminañ:

—Jesús, David y'ap y'oc, ich pa'ayoog.

³⁹ Je jäy ajcxy huidi anajty jayijp nicxp ooy ogy je huintzpi, nimay co huen amoñ. E je' nigí mic yminan'idich:

—David y'ap y'oc, ich pa'ayoog.

⁴⁰ Chi Jesús ytinayxijpy oy yajhuoyii. Co je' jim ymejch, chi amidoy, nimay:

⁴¹ —¿Ti mdzojcpy ndunipyich miid miich?

Chi je' y'adzooy:

—Huindzin, yajhuindicxëccich.

⁴² Chi Jesús minañ:

—Huindicxig, yi mmibíjcin ti xyajtzögy.

⁴³ Chi je huintzpi mic'amy yhuin y'ijxigy, chi panicxy Jesús, chi ooy jäymejch cömay yi Dios. Cham tög'óciy je cajp jäy co ajcxy jadu'n ijxy, nañ ycömay yjäymejtz yi ajcxy Dios.

¹ Co Jesús ytiḡiḡy jim Jericó, ñajxy cajpcujc anajty. ² Chi jadu'n yjajty jim anajty tüg jäy hue' anajty yxi Zaqueo. Hue' je' anajty yajcogüejtpi huindzin, e comeeñ anajty. ³ Ooy yí' anajty tzach'ixa'ñ Jesús, nejhuñhua'ñ pin jäy je', chi ca' jajty nej ixipy, je' co anajty ñaxity, etz co anajty ooy mayjäy jim. ⁴ Chi je' ñicxy poyigy jayijp, chi ypejty ma tüg sicómoro quipy, yco'ijxnaxa'ñ co anajty Jesús jim ñaxy. ⁵ Co Jesús jim ymejch, chi pä't'ijxy je Zaqueo, e ñimay:

—Zaqueo, tzojc minac, com copicy co nicxy njättäga'ñich ma mdijc.

⁶ Chi je' yminajty janch jottigoy, e jotcujc cöbijcy Jesús. ⁷ Co jadu'n ijxy, chi je mayjäy ajcxy nigapxy ni'ojigyixy Jesús, yminaangixy:

—Ti ñicxy jättacpi ma tüg pocyjäy ytijc.

⁸ Chi Zaqueo ytinayigy, ñimay Jesús:

—Huindzin Jesús, cha je' je njugy'ajtich huidi cup nbijc-huäcxaamyich nmöhua'ñich ayoobitijc. Pen ti ñich nyajcuetnaxy, nyajhuimbidityich midaax jadu'ñyi.

⁹ Chi Jesús yminañ:

—Jadachambi jada jäy ma jadayaabi tijc ti y'alma ñidzögy, com co yí' nañ jadu'n Abraham y'ap'adyii y'oc'adyii. ¹⁰ ñich, je jäy huidi tsoon tzajpjoty, ti nmiiñich ya naaxhuiñ co n'ixtähuibich etz nyajnizdögibich tiibi anajty ytiḡooy.

Je ijxpejt ma je majci meeñ

¹¹ Co je jäy ajcxy midooy jadu'n, chi Jesús jacyajnimay ajcxy tüg ayuc, com ytimymihuingónip anajty Jerusalén, etz je jäy ajcxy tzachhuinmaaygixy co Jesús mic'amy anajty pidäga'ñ y'ané'min. ¹² Chi Jesús yminañ:

—Tüg micjäy, comeeñjäy anajty, ñicxy ma tüg naaxjot jiguembi, nicxy anajty ytungbicy co yrey'ada'ñ, e chi anajty yhuimbidaani. ¹³ Chi je micjäy mijhuooy nimajc ytumbi, chi moy ajcxy majc meeñ nidüg nidüg, chi ajcxy ñimay: “Meeñ yaj'ung'ajtcix ji ixti cooni ñich anajty nhuimbityich.” ¹⁴ Chi je ymigogajp ajcxy ca' anajty ixa'ñyii ajcxy je comeeñybi, chi ajcxy yajpaguejxy huingapxpi ma anajty je comeeñybi ñicxy, chi je huingapxpi yminañ: “Ca' ñich ajcxy ndzocy co jada comeeñjäy rey'adipy ma ñich ajcxy.”

¹⁵ Chi jadu'n yjajty co je comeeñjäy yhuimbijty ti anajty yreytigiy. Chi oy yajhuoyii je ytumbi ajcxy, je huidi anajty je meeñ ti yajmihui'mgixy, nejhuñhua'ñ anajty jadu'ñi ti yaj'ung'ajtcixy je meeñ nidüg nidüg. ¹⁶ Chi tüg jayijp ymiñ yminañ: “Huindzin, yi meeñ majcjadu'ñi ti nyaj'ung'atyich.” ¹⁷ Chi je rey y'adzooy: “Ooy miich oy mduñ. Jadu'n nej ti mgapxycöbicy mid huidi hueeni, cham m'ané'mipy majc ciudad.” ¹⁸ Chi je mimetzpi ymiñ, yminañ: “Huindzin, yi mmeeñ migoox jadu'ñyi ti nyaj'ung'atyich.” ¹⁹ Chi je rey ñimay je mimetzpi: “Cham m'ané'mipy migoox ciudad.” ²⁰⁻²¹ Chi je midugigpi ymiñ, yminañ: “Huindzin, cha je mmeeñ huidi ti nmi'ityich, ti nyujpcicyich ma tüg paayi. Ndzigiybich miich co miich mjäy'aty ahua'ñ, myajpidigtäy huidi ca' mjé'adyii, nañ mdzijcpy huidi ca' ti mnipy.”

²² Chi je rey yminañ: “Miich jibic ti mduñ, cham ndiyduna'ñ mid mgi'mayuc ycixpi. Miich mnejhuib co nyajpidigyich huidi ca' njé'adyijich, e ndzicyich huidi ca' ti nnibyich. ²³ ¿Nej co ca' ti mbidägy ñich mmeeñ ma je banco, jigix co ixipy nhuimbityich, may meeñ ixipy xycidigiyich mid meeñ'ung?” ²⁴ Chi je rey ñimay huidi anajty ajcxy jimip: “Pijci ajcxy yí' ymeeñ, etz mooygixy yí' tiibi meeñ yaj'ung'aty majc jadu'ñyi.” ²⁵ Chi je jäy ajcxy y'adzooy: “Huindzin, ymid yí' cham majc jadu'ñyi meeñ.” ²⁶ Chi je rey y'adzooy: “Ñich minaam co tüg'óciy pinjaty mid, jacyajmöhup; e huidi ca' ti midity, oy jamidity yajpictähup huidi ymid. ²⁷ Nañ jadu'n ajcxy je nmizipich huidi ca' anajty tzojccixy co ñich nrey'adipyich ma yí' ajcxy, yajmiingix ya, yo'cpujxtutaaygix ma ñich nhuinduu.”

Jesús ytiḡiḡy Jerusalén

²⁸ Co Jesús jadu'n yminanday, chi choñ jim, ñicxy Jerusalén. Jesús jayijp anajty ytüyöy ma je mayjäy. ²⁹⁻³⁰ Jadu'n yjajty co jim yja'ty mihuingon Betfagé etz Betania ma je cop huidi yxii Olivos, chi Jesús quejxy metz ydiscípulos, nimay ajcxy:

—Ñicxcix ma yjiibi cajp huidi ji huigon. Co ajcxy mgajptugihuij mbáatcixipy tüg burro mang ycoxochity, huidi ca' ni pin yaj'iñaayñi. Mgoguejtútcixipy, etz mmimíngixipy. ³¹ Pen jim pin xy'amidoogixy, ¿nej co yi burro mgoguejtüdy? Chi ajcxy jadu'n m'adzohuipy: “Je nhuindzinich jim tzojcp.”

³² Chi je' ajcxy ñicxy huidi Jesús yquejx. Chi ajcxy paty je burro jadu'n nej Jesús anajty ajcxy ti ñimäyii. ³³ Jim anajty ajcxy je burro mang coguejtuutcixy, co ñihuindzin ñimaayí ajcxy:

—¿Nej co yi burro mang mgoguejtuutcixy?

³⁴ Chi je' ajcxy y'adzooy:

—Je nhuindzinich jim tzojcp.

³⁵ Chi ajcxy huijtz miñ je burro ma Jesús. Chi ajcxy jibe'ñ mïd yhuit, chi ajcxy Jesús yajburripejty. ³⁶ Co Jesús anajty ytüyöy, chi je mayjäy ajcxy yhuit yé'pcixy tügujc. ³⁷ Co ajcxy mihuingoñ je minac ma je cop huidi yxii Olivos, chi tüg'óciy je mayjäy yjotcugiyday, e ytigüy ajcxy ooy alabanza iibi Dios ojadajtpi mïd je mij huinma'ñ ycixpi co anajty ti ijxcixy huidi anajty Jesús ti tuñ. ³⁸ Chachmínaangixy:

—¡Capxpaady je rey huidi miimb mïd Huindzin Dios yxii ycixpi! ¡Jotcujc'ajt jilby tzajpjoty etz cömáyin ma Dios!

³⁹ Huin'it nijéjty fariseojäy huidi anajty ajcxy jilby jäy agujc nimay ajcxy je Jesús:

—Oj yi mjäy ajcxy.

⁴⁰ Chi Jesús y'adzooy:

—Fich miich ajcxy nimaayb pen yi' ajcxy amomb, yi tzaa tigihuij mic capxp.

⁴¹ Co Jesús yja'ty jim mihuingon Jerusalén cajp, e co ijxy, chi yaaxy mïd je cajpjäy ycixpi. ⁴² Chi Jesús ymíañ:

—¡Pen mhujnihuiyb ixipy miich ajcxy nej mbáatcixipy mjotcujc'ájtín jadachambi xii tiempo! Yüch jada tiy'ajt cham ity ma miich ajcxy, ca' huaad m'ijxcixy. ⁴³ Minip je xii je tiempo ma miich ajcxy je mmidzip ajcxy xyajjüdugipy mgajp mïd tzaamacxy, e tziptunipy ajcxy mïd miich, yaxxon xyajco'adugipy ajcxy jühuidity ma je mgajp.

⁴⁴ Xyñigidaagoodip mdzaaboch ni'ung ni'anäg, ni ca' yhuí'mip tzaagop tzaamacxy, jadu'n yjadipy com miich ajcxy ca' mnejhuij je tiempo mina je Dios xyñigidägy.

Jesús yajpidzimy je jibicjäydijc ma Dios ytijc

⁴⁵ Chi Jesús ytigüy ma Dios ytijc yajpidzimday tüg'óciy jäy huidi anajty jilby ajuuyb adoocp. ⁴⁶ Chi Jesús nimay je jäy ajcxy:

—Jadu'n mína'ñ ma jaybétyity: “Fich ndijci tzajpcapxycapxtäg'iñ yi'.” E miich ajcxy hue' mhuaangixy jadu'n nej meetzpi y'ang.

⁴⁷ Jesús anajty yaj'ixpijc jabom jabom ma Dios ytijc, chi je teedy tungmïdipi, etz huidi ajcxy yaj'ixpijcp anajty Dios ñecy, etz mijjäydijc ajcxy nihuinmayiygixy co yaj'ögaangixy Jesús. ⁴⁸ Chi ajcxy ca' ni nej nihuinma'ñybaty nej yaj'öccixy, com tüg'óciy jäy anajty ooy tzach'amidoo'ijt Jesús y'ayuc.

20

Jesús ycötújcín

¹ Chi jadu'n yjajty tüg xii anajty Jesús yaj'ixpijcy je cajpjäy ma Dios ytijc, capxhuäcxy anajty oybi ayuc. Chi ñimiini je teedy tungmïdipi ajcxy etz huidi ajcxy yaj'ixpijcp Dios ñecy etz mijjäydijc ajcxy. ² Chi ajcxy migapxy Jesús nimay:

—Yajnimaaaygich, ¿ma cötújcín ti mbaady co jäy myaj'ixpijcy ya ma Dios ytijc? ¿Pin je' tiibi xycötujc möy?

³ Chi Jesús y'adzooy:

—Íich nañ jadu'n nyaj'amídohuamy íich miich ajcxy tüg ayuc, e m'adzóogixíp. ⁴ Co Juan (je Bautista) jáy yajniíbejty, ¿pín je' cötújcín moy, je Dios tzajpjotyí o jáy ajcxy?

⁵ Chi ajcxy ytigíy huinmay'ahuidijtpí ñayñimáayigíxy miñ xyípy:

—Pen mínaaním co tzajpjoty choñ je Juan ycötújcín, Jesús xyñimaayímip ya: “¿Nej co ca' miich ajcxy mijpidacy yí' y'ayuc?” ⁶ Pen mínaaním ajt co jáy cötújcín moy je Juan, chi tüg'óciy cajpjáy tzojc xycógádzím, com ymíbajcxy co yí Juan, Dios yí' y'ayucnajtzcapxiybi.

⁷ Chi ajcxy y'adzooy co ca' ajcxy nejhuíyigíxy pín Juan tí quexyí. ⁸ Chi Jesús nímay je' ajcxy:

—Íich nañ jadu'n ca' nigapxa'ñich pín tí xycötujcmöyich.

Je íjxpejt ma je tumbidíjc ajcxy jibícjäybi

⁹ Chi Jesús ymínandacy yajnímay tüg'óciy je jáy ajcxy tüg ayuc, ymínañ:

—Tüg jáy pídacý tüg camuuxy ycam, chi yajpíjctzoy ytumbidíjc, co anajty chonañ ñícxan'ñ jíguem jecy jecy. ¹⁰ Co cosecha paty, chi quejxy tüg ytumbí ma je ytumbidíjc, huen címöyíí huídibí je' anajty paatíp. Chi je ytumbidíjc huínhuojpy jípíhuojpy je quejxyöybí yajhuimbijty ca' ní tí mooy. ¹¹ Chi huíngbí ytumbí quejxy, nañ jadu'n ajcxy je' tuñ, huín'ojoy jíp'ojoy ajcxy, yajhuimbijty ajcxy, ca' ajcxy ní tí mooy. ¹² Chi mídugígpí ytumbí quejxy, nañ jadu'n ajcxy je' yajtzaachíy etz yajhuimbijty ajcxy.

¹³ Huín'ít je camuuxycam huíndzín ymínañ: “¿Tí ndunípyích? Ocquejxyích nmang huídibí ooy ndzocyích. Ca' jécyíty co ajcxy íxípy nmangích, yajmíj'adípy ajcxy.” ¹⁴ Chi je ytumbidíjc co ajcxy íjxy je' yhuíndzín ymang, chi ajcxy huínmaygoty nayñimáayigíxy miñ xyípy: “Tí ymíñ je cogam ymang, yí' je' jada cam jédaaníp. Tzoc yaj'o'cim jígíx íich ajt jada cam njé'ajtím.” ¹⁵ Chi ajcxy je cogam ymang yajpídzímí camjoty, chi ajcxy yaj'o'cy.

Chi Jesús y'amídooy:

—¿Tí jada' ytunípy je cam huíndzín? ¹⁶ Míni je', miñ yajtigoydáy je ytumbidíjc ajcxy, e chí je' je ycam yegípy míd huíngbí tumbí.

Co je jáy ajcxy jadu'n mídoy, chí ajcxy ymínañ:

—Ní catzogípy Dios, nícxý jadu'n njajtím.

¹⁷ Chi Jesús huíndícxpejty je mayjáy nímay ajcxy:

—¿Tí tíjamy huídí yjaybétyíp ma Dios ñecy?

Jadu'n:

Je yéydíjc huídí je jáy ajcxy ca' anajty tzocy, tí Dios pídacý míj'ane'mbí. Tím jadu'n nípaady nejíhuíy je tzaa oyjatypí huídibí je pojtzpídíjc ajcxy ca' yajtuna'ñ, je' oy tí yhuí'mní ma anajty yjaccopícyíty.

¹⁸ Pínjaty ca' cöbígá'ñ jada míj'ane'mbí, ayo'n ypadamy, tím jadu'n nípaady nej íjhuíy jíím ycíjxcíday ma je tzaa nícx e tíjhuítz yjajtáhuípy; e pen je tzaa nígidagoty, je' ajcxy janch jaam púx nícxý yjajtcíxy.

Yajnidíyigíxy pen jébi cogüéjtín yajyecy o pen ca'

¹⁹ Je teedy tungmídpí etz huídí ajcxy yaj'íxpíjc Dios ñecy ooy anajty níhuínmayíyigíxy madzaangíxy je Jesús míc'amy, co ajcxy huínjíhuíy co Jesús nímydáacígíxy míd je jíhuímbít ayuc, e chígíy anajty ajcxy je cajp jáy. ²⁰ Chi ajcxy chachhuínma'ñ'íxtaaygíxy nej huaad xígíxy Jesús, chí quejxy ajcxy íjx'íjtpí ma Jesús yajpaady huídí naybídaacíp janch ypaat tudägyjäy; chí amídoó'íjtcíxy Jesús y'ayuc huídí míd xíhuaangíxy, chí cíyegaangíxy ma je gobernador. ²¹ Chí je íjx'íjtpí ajcxy y'amídooy Jesús nímay ajcxy:

—Huíndzín, nejhuíyíb íich ajcxy co miich m'ayuc ooy y'óyíty, etz myaj'íxpícy yajxon, ca' huín'íxpety jáy myaj'íxpícy, etz myaj'íxpícy Dios yty'ajt nej jáy jébi huaad chínaaygíxy.

²² ¿Nej copícy íich ajcxy mígüedípy je César je romanojáy míj'ane'mbí, o ca'íjí?

²³ Chi Jesús huinjihuüy yi' ajcxy yjibic-huinma'ñ, paady ajcxy nimay:

—¿Ti co miich ajcxy xyjot'ixy xyhuinma'ñ'ixyich? ²⁴ Yaj'ijxcich tüg meeñ. ¿Pin y'ahuinax etz pin yxii mimb ma jada meeñ?

Chi ajcxy y'adzooy:

—Yi César.

²⁵ Chi Jesús nimay ajcxy:

—Cuet ma César huidi César paatip, e ma Dios huidi Dios paatip.

²⁶ Ca' mimadacy ajcxy nej tzu'ijxcixy ma mayjäy yhuinduu. Chi ajcxy ooy huinmaay jadu'n nej anajty Jesús ti y'adzóohuigixy, chi ajcxy amoñyi.

Yajnidüygixy je jugy'ájtín ycixpi

²⁷ Chi ñija'tti Jesús tüg saduceojäy, e yi saduceojäy ajcxy yminañ co jäy ögy ca' y'ocjuyucni. Chi je' yajty:

²⁸ —Huindzin, Moisés jaybety ma yi' ñecy, je jécyp, co tüg yëydijc ytöxyijc yahui'my ix'ögp, e ca' ymang ti paatcixy. Jëbi je yëydijc y'uch müdtzinäy je töxyjäy jaydëbi yaj'ung'ixip müid y'ajch ycixpi. ²⁹ Jadu'n anajty tügpicy jäy, nihiuxtujc ajcxy ytügquëx'ájtixy, ac yëydijc ajcxy. Je mijpi müdtzinay töxyjäy, chi ix'o'cy, e ca' ymang paty.

³⁰ Chi je mimetzpi ypijcy müid je töxyjäy, e ni ca' ajcxy ung paty. ³¹ Chi je midugügpi ypijcy müid je töxyjäy, e jadu'n je nihiuxtujcpi müdtzinay ajcxy je töxyjäy, ix'o'cy ajcxy, ni ca' ajcxy ung paty. ³² Chi nañ jadu'n je töxyjäy y'ögni. ³³ Co anajty je nihiuxtujcpi jugypijccixy, ¿huidi jada' octöxijc'adüyb je töxyjäy? Com nihiuxtujc ajcxy ti töxyijc'ájtigixy.

³⁴ Chi Jesús y'adzooy:

—Jadachambi jäy pijccixp, ñaymooyigixy y'ung huen pijccixy. ³⁵ Je jäy ajcxy huidibi paatip anajty chinähuiip ma je tiempo huidi mimb co ögpi yjugypijccixipy, ni ca' ajcxy ypijipy, ni ca' ajcxy ñaymóoyigixipy y'ung huen pijccixy. ³⁶ Co jäy ajcxy yjugypicy, chi ca' huaad y'ögcixy jadüg'oc, quipxyjaty ajcxy müid je ángeles ajcxy, e Dios yi' ajcxy ung'adüib co yjugypigipy müid jemybi jugy'ájtín. ³⁷ Janch co yi' ögpi yjugypigipy, jëbi mbaadip je tiy'ajt ma Moisés ñecy ma jadu'n yjaybétyity, je taab anajty aay'ujtz ytoy, co je Huindzin Dios migapxy Moisés, nimay: “Íich Abraham yDios, Isaac yDios, Jacob yDios.” ³⁸ Je ögpi ca' müidity Dios. Je jäy ajcxy huidi juugyp janchty ajcxy ymüid Dios, com co müid Dios ycixpi tüg'óciy jäy ajcxy ymüid yjugy'ajt.

³⁹ Chi jäy ajcxy huidi yaj'ixpijcp Dios ñecy nimay Jesús:

—Oy ti m'adzoy, Huindzin.

⁴⁰ Ca' ajcxy ocjajtni nej jac nimáaygixipy.

Pin je' y'ung je Cristo

⁴¹ Chi Jesús je' ajcxy nimay:

—¿Nej co miich ajcxy mina'ñ co Cristo David y'ap y'oc? ⁴² David ci'm mina'ñ ma je Salmo necy:

Yi Huindzin Dios nimay ich nHuindzin: “Íña' ya a'oy'amy ma ich.

⁴³ Ixti cooni anajty miich mmidzip ti nmimadactäyich, jadu'n nej jihuüy ti nbidägyich yi mmidzip ma miich mdécypocxpejt.”

⁴⁴ Co David yximoy Cristo ich nHuindzin, ¿nejtz yi' co y'ap'adyii y'oc'adyii?

Jesús xiy je escribas ajcxy

⁴⁵ Chi tüg'óciy cajpjäy jim anajty y'amido'ijtcixy co Jesús nimay je' ydiscípulos ajcxy:

⁴⁶ —Naygüend'ájtigix müid yi' escribas ajcxy ydiscípulos, co ajcxy ooy tzojccixy yhuididaangixy müid yhuít oyjatypi, ooy ajcxy tzojccixy co huen capxocxyii ma jäy y'amugiy, e ooy ajcxy tzojccixy yi cödumbi ñaybejt ma naymujctac, etz ooy ajcxy tzojccixy cödumbi ñaybejt ma jäy ajcxy yxidungixy. ⁴⁷ Chi ajcxy yajcijxtay yi' co'ögytöxyjäy ypidägy,

e tungixy ooy jecy tzajpcapxycapxi ma jäy yhuinduu. Yi jadu'mbi jäy ajcxy nigi ajcxy Dios chaachytuniyb müd ypocy ycixpi ca'ydi jacnipin.

21

Je ayoobitöxyjäy co'ögypiy'ofrenda

¹ Jiiby anajty Jesús ma Dios ytijc co ijxy comeñyjäy may'amy ofrenda pidaaccixy ma meeñygaax. ² E nañ ijxy co tüg co'ögytöxyjäy pidägy anajty metz pi'cmeñ. ³ Chi Jesús yminañ:

—Janch ich miich ajcxy nimäy co jadyaabi co'ögytöxyjäy ayoob jac anaxy jada, ti pidägy ofrenda ca'ydi jacnipin. ⁴ Tüg'óciy comeñydiy ajcxy ypidacyp ma ofrenda je meñ huidi conajxp. Jadyaabi co'ögytöxyjäy ti pidägy huidi anajty ñigayamy.

Jesús yminañ co je Dios ytijc yhuindigoyañ

⁵ Nijëjity jäy co ytigiiy ma Dios ytijc nimiydacy ajcxy co Dios ytijc ooy chach'oy'oydúñity müd tzaa oyjatpyi, e müd tübi jiiby yojxcixy. Chi Jesús yminañ:

⁶ —Tüg'óciy jada huidi ajcxy m'ixpy ma Dios ytijc, minip xii tiempo mina jada nicxy yhu'i'my taj xit jada tzaa, ca' ma pochycop.

Je tiy'ajt ma ca'ni naaxhuiñybi ycixa'ñi ytigoya'ñi

⁷ Chi ajcxy y'amidooy Jesús:

—Huindzin, ¿mina jada jadu'n ytuniyb yjadüyb nej miich ti mminañ? ¿Ti tiy'ajt ji vaj'ixip co jada anajty jadu'n ytuna'ñyii yjada'ñyii?

⁸ Chi Jesús y'adzooy:

—Ix mgayajhuin'ingix. Ooy mayjäy yminañ ñaybidägáanigixy co je' ajcxy je Cristo, yminañ ajcxy: “Ich je' je Cristo; huingóniñ anajty je xii je tiempo mina je naaxhuiñybi ycixa'ñ ytigoya'ñ.” Ca' ajcxy axam mbanicxipy. ⁹ Co miich ajcxy ayuc midohuipy co jäy chachchiptungixy, e ñayñibidícigixy, ca' mdzigiiygixipy, com ooy ycopícyity co jada jadu'n jayjip ytuniyb yjadüyb, ca'nan hue' je' anajty tim cijxp tim tigooyb (je naaxhuiñybi).

¹⁰ Chi Jesús yjacminañ:

—Nayñibidägüib naax cajp müd huingbi naax huingbi cajp. ¹¹ E minip mic'ujx, etz mij yuu mij pa'm xii yaa. E jadiib mij'adzigi'ñ, etz ooy ijxpejt huidi qüexigip tzajpcixy.

¹² Ma ca'ni anajty jadu'n jadyii, xypahuidijtcóotcixipy jäy, xymájtzcixipy, xyciyéjicixipy ma judíojäy ñaymujctac. Chi jäy ajcxy xypidägipy pujxtigoty, xyajnicxixipy mach ma rey etz ma gobernador ajcxy yhuinduu. Jadu'n jäy ajcxy jibic xytunipy müd miich ajcxy com co anajty ti xymijpidáaccixyich. ¹³ Miich ajcxy tiy'ajt myegipy müd ich nxii ycixpi. ¹⁴ Co jäy ajcxy yxihuipy ma codungdiy, ca' ni nej ajcxy mjot'adiyb, ni ca' ajcxy mhuinmayipy nej m'adzógixipy. ¹⁵ Nyegipyich ayuc etz tiy'ajt nej huaad mmidzip m'adzoogixy. Ca' mmidzip ajcxy jadyipy nej xy'adzógixipy, e nej xyjacxigixipy. ¹⁶ Miich ajcxy mgi'mdeedy, mgi'm'uch, mgi'm'ajch, etz mgi'm'ajuugy amigüg xyciyéjicixipy ma cötujctac. Nijëjity miich ajcxy m'ögipy müd co anajty ti mmijpidaaccixy ich n'ayuc. ¹⁷ Mayjäy ajcxy ca' xy'ixaanipy xychogaanipy müd co anajty ti mmijpidaaccixy ich nxii. ¹⁸ Ni tüg miich ajcxy mgöhuay ca' ytigoyipy. ¹⁹ Pen ooy ajcxy mmecxtucy, chi m'alma ñidzögipy huinixii.

²⁰ Co ajcxy m'ixipy Jerusalén anajty ti ñaducy müd ymidzip, huin'it ajcxy mnejhuihuipy co huingon je'anajty ma yhuindigoyaani. ²¹ Huin'it tiempo je jäy ajcxy huidi jim Judea naaxjot yquécixipy ñicxixipy ajcxy yuugjoty, etz je jäy ajcxy huidi jim Jerusalén queegipy ajcxy, etz je jäy ajcxy huidi camjoty ca' huaad y'ocajptigiiyñi ma je Jerusalén cajp. ²² Je tiempo mina yjadüyb ayo'n müd co anajty judío jäy ti ytundigooygixy, je' jada yajcuydundaayb jadu'n nej yjaaybétyity ma Dios ñecy. ²³ ¡Ayoob yi töxyjäy ajcxy huidi anajty ung tzim'ijtp huin'it xii, etz huidi anajty müd y'ungma'xung! Ooy jadiib mij ayo'n ya naaxhuin etz tzip écin ma jada cajp. ²⁴ Nijëjity ajcxy y'ögipy tzijoty, e nijëjity

yajnicxip tzумы mach ma huingbi cajp huingbi naax. E Jerusalén naxmihuägıydähuııb yi jäy huıdı ca' yjudıojäyıtı, mııpy je tiempo mına anajty Dios yajcıxaanı yajtıgıyaanı yi' ajcxy y'ané'mın.

Nejjada' ymııpy je Dios y'ung

²⁵ Huın'ıt xıı huın'ıt tiempo quëxıgıp ıjxpejt ma xıı po' etz ma yi madza', ya naaxhuııñ ooy jäy ajcxy jotmay mıı'ıdıpy. Je jäy ajcxy ooy chıgıhuııpy yjıhuııhuııpy yhuınmay'ahııdıdıpy ajcxy ooy, mııd je meıy ycıxpı co anajty chachpıdıgy chachnögy chachmına'ñ. ²⁶ Yi jäy ajcxy anucxı'ñ yajcıdahııb co anajty ajcxy ıxy nej yjadyıı huııdu'mybi naaxhuııñ; e huıdıjaty mıc'ajt yajpatp jııby tzajpjoty yücxtähuııpy yi'. ²⁷ Huın'ıt mııch ajcxy xy'ıxıpyıch, ııch je jäy huıdı tzoön tzajpjoty, nmııñıch jıcjoty mııd je nmıc'ajtıch, nmııñıch mııd ııch ngötújcin etz ııch n'oy'ájtın mıjpi. ²⁸ Co je ayo'n tiempo jadu'n yjatzondägıpy, chí mba't'ıjxcıxıpy com huııgonıñ anajty mına Dios xyñıhuáangıxıpy ycohuáangıxıpy.

²⁹ Chi Jesús yajnimay ajcxy tüg ayuc, ymınañ:

—İjxcıx yi hıgueri etz tüg'ócıy quıpy, ³⁰ co yhuamıgy huın'ıt mııch ajcxy nejhuııy co tı yhuııgonı mına ypottıgıyñı. ³¹ Tım jadu'n nej mııch ajcxy ıjxpejt mbıcy ma hıgueri quıpy co pottıempo ytıgıyñı, nañ jadu'n co mııch ajcxy m'ıxıpy je ıjxpejt tzajpcıxy jadu'n nej yam nyajnimaygy, mnejhuııhuııpy ajcxy co huııgónıp je tiempo mına Dios y'ane'ma'ñ ya naaxhuııñ.

³² Janch nımaaybıch mııch ajcxy co jadu'n yjadııyb ytunııyb jayıjp, ca' anajty o'ctäy je jäy ajcxy huıdıbı tzınaayb jugy'ájtıcxıyp jadachambı xıı tiempo. ³³ Yi tzajp etz naaxhuııñybi naxıp tıgıoyıp yi'. İıch n'ayuc ca' ñaxıpy ytıgıoyıpy nı camına.

³⁴ Naygüend'ájtıgıx mııch ajcxy ca' mnıjot'ájtıcxıy yi jıcnıı yi mügıı, etz yi tzınaayın jugy'ájtın, jıgıx ca' ajcxy xynımııpy jıtcömoñyı je ayo'n xıı je ayo'n tiempo. ³⁵ Tımetııni mııpy je ayo'n tiempo mııd jäy ajcxy ycıxpı huıdı ya tzınaayb ma tüg'ócıy naaxhuııñybi. Tım jadu'n nej tüg ıyujc ayo'nbaady co tımetııni yajtıxuuch. ³⁶ Nı'ıxı' ıjtcıx, mıbıjctzoogıx Dios, ca'ydı ayo'n ajcxy mbaatcıxy huıdı jadaanıp, jıgıx jııby myajpáatcıxıpy tzajpjoty ma ııch nhuııduu, ııch, je jäy huıdı tzoön tzajpjoty.

³⁷ Xıım anajty Jesús yaj'ıxıpy ma Dios ytıjc, e coodz anajty chooñ ñıcxıy jım ma cögop huıdı yxıı Olıvos. ³⁸ Jabom jabom jopy jopy ñıminyıı tüg'ócıy cajpjäy jııby ma Dios ytıjc tıbäy co y'amıdoo'ıdaanı ajcxy Jesús y'ayuc.

22

Xııcyögyıxy capxyögyıxy nej huaad Jesús májtcıxy

¹ Huııgon anajty je xıı mına jäy tzajcaagy caaygyıxy huıdı ca' ylevadura mııdıty, huıdı jäy ytıjpy pascua xıı. ² Chi je teedy mıjtıngmııdıpı etz je escribas yhuınma'ñ'ıxtaaygyıxy nej ajcxy ocyaj'ögıpy Jesús. Chıgııyb anajty ajcxy je cajpjäy.

³ Chi je mıjcu' ytıgıy ma Judas yjot yhuınma'ñ. Je Judas hue' anajty ymımetz xıı İscariote, je' nıdügtı je mıjmetzıpı dıscıpus. ⁴ Chi Judas ñıcxıy oy mıgapxy je teedy mıjtıngmııdıpı etz tzajptıjc soldado huııdzın, e ycapxytuñ mııd je' ajcxy nej jėbı cıyecy Jesús. ⁵ Huın'ıt je Jesús ymıdzıp ooy ajcxy yxoondaccottay. Chi ajcxy ñaygapxı co meeñ möhuangıxy je Judas. ⁶ Chi Judas cöbıjcy je meeñ, chí yhuınma'ñ'ıxtay nej jėbı cıyegıpy Jesús ma ca'p mayjäy y'ıxyıı yhuıındıcxıyıı.

Je huııdzın Dios y'adzu'ájtın

⁷ Chi paty je xıı mına jäy cay je tzajcaagy huıdı ca' ylevadura mııdıty com huın'ıt anajty ajcxy yaj'ögy cöbıxy ymang pascua xııgıxp. ⁸ Chi Jesús quejxy Pedro etz Juan, nımay:

—Nıcx mııch ajcxy yaj'oyı' je pascua adzu'ıbı, jaydėbı ajt ngaayım.

⁹ Chi ajcxy y'amıdooy:

—¿Ma mdzocy co nyaj'oyihuibich ajcxy?

¹⁰ Chi Jesús yminañ:

—Co mdigihuiipy ajcxy cajpjoty, mbaadipy tüg yëydijc huidi yajnicxp tüg majt nii. Mbanicxyp ajcxy je yëydijc cooni yjadipy ma ytijc. ¹¹ Co miich ajcxy mjädipy ma je jäy ytijc, chi ajcxy mnimähuiipy je codijc: “Nhuindzinich jadu'n minaam: ¿Ma yaj'ahuädz yajpaady ma ngayipyich je pascua adzu'ibi miid ich ndiscípulotijci?” ¹² Je codijc miich ajcxy xyajni'ixihuiip tüg cuarto ma mimejtzpi piso. Ni'ixi' jim je adzu'ibi. ¹³ Chi Pedro etz Juan ñicxy, chi paty jadu'n nej anajty ti ñimäyii, e jim ajcxy ni'ixiy je pascua caayin uucin.

¹⁴ Co je hora paty, chi Jesús y'ixtacy ma je mesa miid je' ydiscípulos ajcxy. ¹⁵ Chi Jesús yminañ:

—Ti ooy nijot'atyich co nmüd गयाangixy jada pascua adzu'ibi ma ca'ni n'ögyñich. ¹⁶ Ich miich ajcxy jadu'n nimaayb co ich ni mina ca' njaccayipyich jadüg'oc je pascua adzu'ibi, ixti cooni yajcuydundähuiipy je pascua xi ytij'ajt ma Dios y'ané'min.

¹⁷ Chi Jesús conigy je ügy co Dioscojuyip yajnaxy, huin'it yminañ:

—Uccix jada ügy, naymóoyigixy miich ajcxy. ¹⁸ Cham ich miich ajcxy nimäy co jadu'n nej yajnicxa'ñ xi tiempo ca' vino nii üga'ñich ixti cooni Dios y'ané'min yminipy ya naaxhuiñ.

¹⁹ Nañ yconigy Jesús tüg tzajcaagy co mibijctzooy Dios, huin'it tujc-huäcxy moy discípulos ajcxy, e chi ajcxy nimay:

—Jada tzajcaagy ich nninix'ajtpyich huidi ngiyejcpyich ma yi o'cin miid miich ajcxy mbocy ycixpi. Jada ijxpejt miich ajcxy mi'idipy oy jäymech miid ich ycixpi.

²⁰ Co anajty ti ycaaydaagyixy, chi Jesús conigy je ügy jadüg'oc, chi yminañ:

—Jada vino je' jada Dios y'ayuc ytij'ajt jemybi jadu'n yi' nej ich nni'py huidi tamam yogam miid miich ajcxy ycixpi.

²¹ Jadachambi yi jäy huidi xyciyegaambich ma nmidzipich, ya je' cham miid'inäyich ma jada mesa. ²² Janch jadu'n njada'ñ n'ayoohua'ñich jadu'n nej ti nyajnigodugiyijich. ¡Ayo'n padamy je jäy ayoob huidi xyciyegaamyich ma nmidzipich!

²³ Chi je nimajmetzpi ajcxy ñayñimaayi miñ xyipy:

—¿Pin jada' yi' ma ich ajt huidi jadu'n tundigoyam?

Yajcapxcójixy pin jada' jacnigi ymijity

²⁴ Chi je nimajmetzpi huidi Jesús anajty ti huin'ixy ca' ajcxy ñay'ayuc-huinjihuiyi pin jada' jac mijpi oc'idipy. ²⁵ Chi Jesús nimay ajcxy:

—Yi reyes ajcxy y'ane'myb ajcxy naax cajp jadu'n nej tüg huindzin, yi' ajcxy huidibi ane'mb yajtijcixy co ooy oytuungixy. ²⁶ Miid miich ajcxy ca'ydi yjadú'nity. Hue' janchtiy je mijpi ma miich ajcxy huen ñaybidägyii nej jihuiy ymútzity. E je huidi nigohuajc'ajtp huen ñaybidägyii nej jihuiy je' je' je tumbi. ²⁷ ¿Pin je' jacmijip? ¿Huidi ñaybi ma mesa, o huidi ni'ixiyb a'ixiyb caayin uucin? Yi' je' jacmijip huidi ñaayb ma mesa. Per ich ijtpich miid miich ajcxy jadu'n nej huidi ni'ixiyb aa'ixiyb caayin uucin.

²⁸ Miich ajcxy ti m'ijtcixy miid ich ma anajty ayo'n ti nyajnaxyich. ²⁹ Paady ich miich ajcxy tüg ané'min nmooyb, jadu'n nej ich ndeedy ti xymöyich. ³⁰ Jaydëbi miich ajcxy mgáaygixipy m'uuccixipy ma ich nmesa jiiyby ma ich n'ané'min e m'inähuiipy ajcxy ma je ane'mdac, e mdiydúngixipy m'ané'mgixipy je nimajmetz picy Israel ñaax ycajp.

Jesús capxidzimy co Pedro ymina'nañ co ca'p Jesús ix'y'adyii

³¹ Nañ jadu'n je huindzin Jesús yminañ:

—Simón, Simón, jadachambi je mujcu' xyjot'ixaangixy xyhuinma'ñ'ixaangixy jadu'n nej jäy trigo huimbojy co yajhuätzaangixy. ³² Per ich Dios nmibijctzooyich miid miich

ycixpi, jigix miich ca'ydi mmibíjcin ytigoy'ity. Mina anajty miich ti mjothuimbity, jotmic migápxipy yi mmigügtijc ajcxy.

³³ Chi Pedro yminañ:

—Huindzin, jotcuyc ich nnicxa'ñich mïd miich oy pujxtigótyity, etz oy ndimy'ögibich mïd miich.

³⁴ Huin'it Jesús nimay Pedro:

—Ich miich nimaayb co ca'ni anajty tzey yaxigy jabom jopy co miich miná'nip tugig'oc co miich ca' xy'ix'adyiijich.

Huingomb horí ma Jesús y'ocyaj'ijxmadza'ñ

³⁵ Chi Jesús nimay ydiscípulos ajcxy:

—Co ich miich ajcxy jayhuin nguejxy, ni mmoral, ni ca' mmeenydjic, ni mgig ti mmi'oygixy, ¿nej myajtigoy'ijt ajcxy ti jatyí?

Chi ajcxy y'adzooy:

—Ni ti.

³⁶ Chi Jesús yminañ:

—Jadachambi pin ymeeñydjic etz ymorral mïd, huen minicx; nañ pin ca' mïdity y'espada, huen toogy yjocx huit, chi juyipy y'espada. ³⁷ Ich miich ajcxy nimaayb co copicy jada yajcuydunipy huidibi mimb jaybety mïd ich ycixpi ma Dios ñecy ma jadu'n yminañ: “Yaj'amichomujc (je Cristo) mïd yí' ajcxy huidi jibicjäyip.” Tüg'óciy mimb jaybéty ma Dios ñecy mïd ich ycixpi, yajcuydunipy yí'.

³⁸ Chi Jesús ydiscípulos ajcxy yminañ:

—Huindzin, cha metz espada.

Chi Jesús y'adzooy:

—Huen mïd yí'yí.

Jesús Dios mibijctzoy jim Getsemani

³⁹ Chi Jesús jim choñ ñicxy ma je cop huidi yxii Olivos, com jim anajty nicxy coodz coodz, chi je' ydiscípulos ajcxy ypanicxi. ⁴⁰ Co ajcxy yja'ty ma je cop, chi Jesús yminañ:

—Mibijctzoogix Dios huen xypubedipy xypudigihuipy ajcxy ca'ydi mdigiygixy jibic tuum.

⁴¹ Chi Jesús huinhuäctuty je discípulos ajcxy tüg tzaagäch yjiguëgyity, chi ycoxtinay'ahuüy ytigüy Dios mibijctzoob. ⁴² Chi Jesús yminañ:

—Dios Teedy, pen miich m'a'ixiyyb píjigich jada tzaachypi, ca' ich huaad nyajnaxyich, per ca' ich huaad ngí'mdzójcin nguyduñich, miich mdzójcin huen myajcuyduñ.

⁴³ Chi ñayguëxici tüg ángel tzajpjoty choñ, jotmic migapxy je Jesús. ⁴⁴ Yam anajty Jesús ooy ytaj ymay, chi Dios mibijctzooyb jacmictägy. E je yxibitni ypidzimy janch jadu'n yí' anajty nej ni'py janch mijjaty y'ocnajtza'cxiiyñi.

⁴⁵ Co ypidigy ma anajty Dios mibijctzoy, chi nihuimbijty je' ydiscípulos ajcxy, chi oy paatcixy maab anajty ajcxy mïd jotmay. ⁴⁶ Chi Jesús nimay ymigügtijc ajcxy:

—¿Ti co mdzachmaagixy? Pidicxix mibijctzoogix Dios, ca'ydi jibic tuum mdigiygixy.

Yajnicxcixy mach je Jesús

⁴⁷ Jim Jesús anajty ymigügtijc ajcxy mïdcapxy mïdmïydägy, co je mayjäy oy yjäty. Jayip anajty ymiñ je huidi anajty xiiip Judas, yí' je'anajty nidügti ma je nimajmetzpi Jesús ydiscípulos ajcxy. Chi Judas mihuingoñ Jesús co anajty tzücxan'ñ. ⁴⁸ Chi Jesús yminañ:

—Judas, ¿nej mïd tüg tzücxin mgïyecy ma ymidzip, je jäy huidi tzoon tzajpjotyí?

⁴⁹ E je' ajcxy huidi anajty Jesús ymïd, co ajcxy ijxy jadu'n nej ytuñyii yjadyii, chi ajcxy yminañ:

—Huindzin, ¿tzoc ajt mihuimbijtim?

⁵⁰ Chi nidüg je' ajcxy yajtzaachüy je teedy mǎjtungmǎidpǎi tüg ytumbi, quejtzpujxi tüg ytätz'ac a'oy'amybi. ⁵¹ Huin'it Jesús ymǎnañ:

—Ixmajtzcix, huen jadu'ñyi.

Chi nǎdoni je jäy ytätz'ac, e jadu'n yajtzoocy. ⁵² Chi Jesús nǎmay ajcxy huǎdi nimiini, yi teedy tungmǎidpǎi ajcxy, yi Dios ytǎjc policǎa huindzǎn etz mǎjjäydǎjc:

—¿Nej co xyñimǎngixyǎch mǎid pujx etz mguipyjǎjpxu'ñ jadu'n nej jǎhuǎy ñch tüg meetzpi? ⁵³ Jiiby ñch anajty jabom jabom ma Dios ytǎjc, e ca' miich ajcxy ti ti mduñ mǎid ñch. Per cham jǎdu'n je tiempo mǎna miich ajcxy xy'ane'myǎch etz je jǎbǎcpǎi xymǎmadägyǎch.

Pedro ymǎnañ co ca' icy'adyii Jesús

⁵⁴ Chi ajcxy majch je Jesús, yajnicxy ajcxy, e pidacy ma teedy mǎjtungmǎidpǎi ytǎjc. Je Pedro jǎguägüyjǎhui' anajty ypanǎcxyii. ⁵⁵ Jim ajcxy jǎn yajmǎjy tǎbägujç chi ajcxy y'ixtactay nidüg'óciy. Pedro y'ixtacy nañ jadu'n ma je jäy ajcxy. ⁵⁶ Huin'it tüg pödumbi ijxy Pedro ññäy ma jǎmba', chi huindǎcxpejty nǎmay:

—Jada yëydǎjc nañ ymǎid anajty Jesús.

⁵⁷ Chi Pedro ca' cöbǎjcy, ymǎnañ:

—Töxyjäy, ca' ñch yi' n'ixy'adyii.

⁵⁸ Nañ jahueengi huin'it jadüg jäy Pedro yhuindǎcxpejti, ññmaayi:

—Miich, yi Jesús ajcxy anajty mǎid m'ity.

Chi Pedro ymǎnañ:

—Ca' n'ñchǎty.

⁵⁹ Ti anajty tüg horǎ nǎnaxni co oy huingbǎi ymǎnandägy:

—Janch co jada yëydǎjc yi' anajty mǎid y'ity Jesús. Com nañ galileojäy yi'.

⁶⁰ Chi Pedro ymǎnañ:

—Ca' ñch nhuinjǎhuǎy nej miich mmǎna'ñ.

Capxni anajty je Pedro co tzey oy yaaxǎgy. ⁶¹ Chi je Huindzǎn Jesús ni'ixxhuimbijty je Pedro. Huin'it Pedro jäymetzcootti je' ayuc nej anajty yHuindzǎn Jesús ti ññmäyii: “Ni ca'nǎ anajty tzey yaaxǎgy cham coodz co miich tugǎg'oc xycoyüdzǎbyǎch.” ⁶² Chi Pedro ypidzǎmy tǎbäy, oy jiiby yäxy mǎid tǎjǎn máyǎn.

Nixiiccixy yajxiiccixy yi Jesús

⁶³ Je jäy ajcxy huǎdi anajty Jesús cuend'ajtp, ooy ajcxy nǎxiicy nǎyaaxy, etz nañ ooy ajcxy huingojxy jǎjpcojxy. ⁶⁴ Chi ajcxy huingoxodzǎy, e cojxy ajcxy ma yhuinǎyjǎj, nǎmaaygixy:

—Octǎygapx, ¿pǎn ti xycoxy?

⁶⁵ E ooy anajty mǎid yjǎbǎc ayuc cixy cuety nǎmaaygixy.

Jesús mǎjjuntajoty yajpaady

⁶⁶ Co yxǎmǎy, chi yöymujcy yi teedy mǎjtungmǎidpǎi ajcxy, yi mǎjjäydǎjc ajcxy, etz yi escribas ajcxy, chi ajcxy y'amǎdooy:

⁶⁷ —Nǎmaaygǎch ajcxy ¿nej miich je' je Cristo?

Chi Jesús y'adzooy:

—Co ixypy nǎnigapxǎch, ca' miich ajcxy mǎibǎgǎpy. ⁶⁸ E pen ñch miich ajcxy n'amǎdooyb, ca' miich ajcxy xy'adzohuǎpyǎch, etz canan huin'it xyñajtmadzǎhuibǎch miich ajcxy.

⁶⁹ Jadachambi e ññcxa'ññ ñch, je jäy huǎdi tsoon tzajpjoty, n'ixtägä'ññch a'oy'amy ma Dios mic'ajtmǎidpǎi.

⁷⁰ Chi nidüg'óciy je' ajcxy y'amǎdooy:

—¿Nej janch co miich Dios xy'ung'adyii?

Chi Jesús y'adzooy:

—Miich ajcxy jadu'n mǎnamb co ñch njǎjty.

⁷¹ Chi ajcxy ymǎnañ:

—¿Ti ajt njac-huáanim testigo? Ti ajt yam ci'm nmidoohuim nej mina'n.

23

Jesús ma Pilato yhuinduu

¹ Chi tüg'ócay je mayjäy ajcxy ypidigy, chi yajnicxy ajcxy Jesús ma je gobernador Pilato.

² Chi ajcxy ytigüy xibi yminaangixy:

—Jada jäy naax cajp yaj'ixpijcp huidi ca' ytiy'ájtity. Yi' adujctáhuam co ca' huaad nmigüéjtim César, e ymina'n ci'm co yi' je' je Cristo huidi rey'ajtpi.

³ Chi Pilato y'amidooy Jesús:

—¿Nej miich je' judío jäy xyrey'ajtp?

Chi Jesús y'adzooy:

—Miich jadu'n minamb.

⁴ Chi Pilato nimay je teedy tungmüdpí ajcxy etz je mayjäy:

—Ca' ñich ti pocy nbaadyich ma jadayaabi yëydijc.

⁵ Chi Jesús ymidzip nigi anajty ajcxy yminan'adütcixy:

—Jada Jesús naax cajp tzachyajqueec-huäcxtaayb je judíojäy müd yi' y'ayuc. Yajtzondacy Galilea, e jadachambi ya Judea jadu'n idich.

Jesús ma Herodes yhuinduu

⁶ Co Pilato midoy Jesús ymidzip ajcxy nigapxy Galilea, chi y'amidooy pen galileojäy je Jesús anajty. ⁷ Chi mic'amy huinjihuiy co yi' jim anajty yajpaady ma Herodes y'ane'my, chi jim quejxy ma Herodes huidi nañ jadu'n anajty yajpatp jim Jerusalén huin'it xi.

⁸ Co Herodes ijxy Jesús, chi oy jotcugüy com tüyip anajty ooy ja'ixa'n, ti anajty may ayuc midoohui, e ahuixy anajty co mijhuinma'n tunipy. ⁹ Janch may ayuc ooy jayaj'amidooy, e Jesús ni tüg'aa ca' y'adzooy. ¹⁰ Jim anajty teedy mijtungmüdpí etz je escribas ajcxy, tzachnigüéjtcixy müctägy. ¹¹ Chi Herodes müd yjäy ooy nixiicy yajxiicy Jesús, ca' mij'ijxy mijpidacy. Chi xojxy müd oyhuit etz quejxhuimbijty jim ma Pilato. ¹² Huin'it xi Herodes etz Pilato ajcxy ñaymigügpíci, com naymijotma'tip anajty ajcxy huin'it tiempo.

Jesús yajmoy ysentencia co y'ögipy

¹³ Chi Pilato huomujcy yi' teedy mijtungmüdpí, yi' cajptungmüdpí, etz yi' naax cajp.

¹⁴ Chi ajcxy nimay:

—Ti miich ajcxy xyajnimíngixyich jadayaabi yëydijc, jadu'n miich ajcxy minamb co ooy jäy yajqueec-huäcxtay. Ti ñich yi' jatiyduñich ma miich ajcxy mhuindu, ca' ñich yi' ni ma ypocy ti nbaati, jadu'n nej miich ajcxy mxigixy. ¹⁵ Nañ ni ca' Herodes ti pocy ti paady ma jada jäy, com ti njayajniquexyich, ni ti pocy jada Jesús ca' ti tuñ huidi huaad nyajco'ögüyich. ¹⁶ Miñ n'octzaachytuñich, jaydëbi nnajtmadzihuibich.

¹⁷ Jadu'n je gobernador anajty costumbre müdity co najtmadzüy tüg machyjäy mijxüjoty. ¹⁸ Chi je mayjäy tügmucy ajcxy yminaandacy:

—¡Yaj'ög jadayaab Jesús! ¡Najtmadzi' yi' Barrabás!

¹⁹ Je Barrabás anajty pujxtigoty ti ypidägyii co anajty ti nibidigy je gobierno, nañ ti anajty yjäyyaj'ögy. ²⁰ Chi Pilato nimay ajcxy jadüg'oc co najtmadzihua'n Jesús. ²¹ Chi je mayjäy janch mic yminañ:

—¡Yajcruudzpet miich yi'! ¡Yajcruudzpet miich yi'!

²² Chi Pilato yminañ je midugüig'ocpi:

—¿Ti Jesús ti tundigoy? Ca' yi' ma ypocy nbaatich. Miñ n'octzaachytuñich, e najtmadzihuibich.

²³ Je jäy ajcxy nigi anajty yminaan'adütcixy janch mic, co huen yajcruudzpejty. Chi ajcxy jadu'n mimadacy Jesús co chachne'mgixy je teedy tungmüdpí, etz je cajpjäy ajcxy. ²⁴ Chi jada' Pilato cuyduñ jadu'n nej je jäy ajcxy anajty pijctzoy. ²⁵ Chi Pilato

najtzmadziy je Barrabás huidi anajty pujxtigótyip, co anajty chach jäy yajqueec-huäcxy, etz yjäyyaj'ögy, je' huidi yi jäy ajcxy ypíjctzou. Chi Pilato ciyejcy Jesús ma yi' ajcxy huen tungixy nej tzojccixy.

Jesús yajcruudzpejtí

²⁶ Chi je judíojäy ajcxy yajnicxy Jesús. Jim tü'am ajcxy minaybaati tüg jäy huidi anajty ti chooñ camjoty, huidi anajty yxi Simón, e ycogájpity anajty Cirene. Chi adzip ajcxy Simón yajquejycabi y Jesús ycruudz, e yajpanicxy ajcxy Jesús.

²⁷ Jac'axam anajty naax cajp panicxcixy, etz nañ may töxyjäydijc ajcxy chachyaaxcixy miid jotmay miid yi' ycixpi. ²⁸ Chi Jesús ni'ijxhuimbijty je töxyjäydijc ajcxy, chi nimay ajcxy:

—Miich Jerusalén töxyjäydijc ajcxy, ca' xyñiyáaxcixich. Nayñiyaaxigix miich ajcxy ci'm etz m'ung ajcxy ycixpi. ²⁹ Chi ypaadipy tiempo co jäy ajcxy ymína'nipy: “Jotcuje je töxyjäy ajcxy huidi ca' y'ung ixxy, huidi ca' ti y'ungtzimígy, etz huidi ca' ti y'ung yajtzitzcixy.” ³⁰ Chi je jäy ajcxy nimaydägipy mijtun mijcop: “Nigídagótcich ajcxy”; etz je mutztun mutzcop: “Yajtigooygích ajcxy.” ³¹ Pen jäy ajcxy tzaachypi ayo'n mooyb Dios y'ung, nigí ajcxy jacjiini ytundigoya'n miid Dios yjäy, tim jadu'n nipaady nej pin puxam tzuxy quipy nañ puxamy quipy títzpi.

³² Nañ jim anajty yajnicxcixy miid Jesús jametz pocyjäy. Tú'ciy miid Jesús anajty yaj'ögaangixy. ³³ Co ajcxy ojjäty jim ma tüg it huidi jäy ytijpy ögpi cohuajc, chi ajcxy jim Jesús yajcruudzpejty miid metz pocyjäy: tüg pocyjäy a'oy'amy, jadüg anajty'amy. ³⁴ Chi Jesús ymínañ:

—Dios Teedy, mecxi ajcxy ypocy, com ca' nejhuígyixy ti ytungixyp.

Co je soldados anajty ajcxy yajhuäcxaani ac je'y Jesús yhuit, chi ajcxy ijxy suerte pin ocjediib. ³⁵ Jim je cajpjäy anajty yhuindicxcixy, yam je tungmiidpi nixígy yajxígy Jesús, ymínañ ajcxy:

—Jada Jesús huingjäy ti yajtzögy, huen cham ci'm nayyajtzögyii, pen yi' je' je Cristo, je huidi Dios ti huin'ixyi.

³⁶ Nañ jadu'n je soldados ajcxy nixiicixy yajxiicixy Jesús, nimijhuägy ajcxy möhuaangixy anajty vino ta'mbi. ³⁷ Chi je soldados ajcxy ymínañ:

—Pen miich Rey'ajt ma yi judíojäy ajcxy, nayñihuäni ci'm.

³⁸ Ma Jesús ycödu jim anajty yjaayity griego'amy, latin'amy, etz hebreo'amy: JADA JE' YI JUDIOJÄY AJCXY YREY.

³⁹ Chi tüg pocyjäy huidi anajty cruudzcixy ooy nixiicy yajxiicy Jesús ymínañ:

—Pen miich je' je Cristo, naygohuäni ci'm, e cohuaangích ích ajcxy nañ jadu'n.

⁴⁰ Chi je jadügpí pocyjäy oy y'adzooy, ogy ymígüg, nimay:

—¿Nej ca' miich Dios mdzigíy. Ca' m'ixy co tú'ciy ti nbócycahuim? ⁴¹ Ích ajt janch paatip jadu'n, co jadu'n jada ngóbíjcm tzaachypi je tübi ndundigooyim. Jadayaabi Jesús janch ni ti jibicpi jada ti catuñ.

⁴² Chi je pocyjäy nimay Jesús:

—Tun may'ajt xyjäymedzipich co anajty mjäty jiiby ma m'ane'mdac.

⁴³ Chi Jesús oy y'adzooy:

—Janch ích miich yam nimäy co cham ích miich miid'íjtnipy ma je oybi it.

Jesús y'o'cni

⁴⁴ Co cujcxibi paty, chi oy ycoodzíy tüg'óciy naaxhuiñ ixti minacyxiini. ⁴⁵ Chi xii ca' y'oc'ani. Chi je huit oy yciitzhuäcxy huidi anajty adíydujcp je Dios y'it jiiby ma Dios ytijc.

⁴⁶ Huin'it Jesús mic ypätcapxy ymínañ:

—Dios Teedy, cham nyajcídígíy ích n'alma.

Co Jesús jadu'n ymínañ chi y'ögy.

47 Co je soldado huindzin ijxy jadu'n nej anajty ti ytunyii ti yjadyii, chi ooy jäymejch yi Dios yminañ:

—Janch co jadayaabi yëydijc anajty tudägy yjäyity.

48 Chi je mayjäy tibi anajty jim yöymújccixy yhuindicxcixy, co ajcxy ijxy jadu'n nej ytuuni yjajti, chi ajcxy huimbijttaayni cajpjoty yam ycaach tzachcójxcixy mid jotmay ycixpi. 49 Cham tüg'óciy Jesús ymigügtijc ajcxy huidi anajty mid ñay'ixy'adyii, etz töxyjäydijc ajcxy huidi anajty Jesús ti ypadzonyii jim Galilea, jigüegy je' anajty ajcxy yhuindicxcixy.

Yajnaaxtigiy ajcxy Jesús

50 Jim anajty tüg yëydijc huidi anajty yxi José, hue' anajty ycocájpity Arimatea ma Judea naaxjot. Je' anajty judío mijtungmidpi, e je' ooy anajty chach'oyjäyity etz ytudägyjäyity. 51 Je' nañ yjijp'ijxy anajty co yminipy je Dios y'ané'min, e ca' je' anajty jijptigiyi mid jacnaagity mijtungmidpi co ajcxy yaj'ögy Jesús. 52 Chi José ñicxy ma Pilato oy pijtzoohi Jesús ñinix. 53 Chi yajminajcy ma cruudz, e moñ mid tüg sábana, chi pidacy ma ögpi jut, ma tüg tzaahuinguetzmijc ma ca'ni anajty ni tüg ögpi jii by yajpidägy. 54 Je' anajty ajcxy ni'ixiyb a'ixiyb je pascua xi e je' anajty tim tzondägan je pócxin xi.

55 Chi je töxyjäydijc huidi anajty ti ypadzoñyii Jesús jim Galilea, panicxy ajcxy je José axam. Chi ajcxy nañ jadu'n ijxy je ögpi jut, etz je ninix jadu'n nej jii by yajpidacy.

56 Chi ajcxy yhuimbijttay cajpjoty. Chi ajcxy yaj'oyiy ujtz xuucpi, tzooy, etz ungüento, chi amay'ajty je pocxinxi, jadu'n nej anajty cötújcín y'ane'my.

24

Co Jesús y'ögy chi yjugypicy

1 Co je seaman y'ixtigiy janch tim ticxip je töxyjäydijc ajcxy ymiiñ ma je o'cpi jut, chi mimiñ ajcxy ujtz xuucpi, etz tzooy huidibi anajty ti yaj'oyiygixy. Nañ jadu'n midjadyii töxyjäydijc miiñ. 2 Chi ajcxy paty je tzaa ti anajty yjidigüegyii ma je o'cpi jut'aguu. 3 Co ajcxy ytigiy jutjoty, chi ca' ajcxy paty je Huindzin Jesús ñinix. 4 Chi jadu'n yjajty, jii by anajty ajcxy jutjoty huinmaaygixy, co ñayguëxigi ma ajcxy ymijc metz yëydijc janch adicxp anajty yhuit. 5 Chi ajcxy ooy chigiy, chi ajcxy yhuindactay, chi je metzpi yëydijc yminañ:

—¿Na'amy co m'ixtaaygixy yi jugypí ma yi tibi y'ögy? 6-7 Ca' je' ya, ti je' yjugypicy. Jäyméjtzcix jadu'n nej minañ jim Galilea, co yminañ:

—Ooy ycopícyty co ich, je jäy huidi tzooy tzajpjoty, nyajcüyegipy pocyjäy c'am. Yi' ajcxy xyajcruudzpedipyich, chi njugypigipyich codugig xi.

8 Chi ajcxy oy jäymejtzcooty nej anajty Jesús ti yminañ. 9 Chi je töxyjäydijc ajcxy yhuimbijttay ma o'cpi jut. Chi ajcxy yajmidmíydactay jadu'n nej anajty ti íjxcixy ti midoogixy mid Jesús ydiscípulos ajcxy je nimajmetzpi etz jacjadyii jäy huidi yajpaatp ma je' ajcxy. 10 Je töxyjäy ajcxy huidi ooy ma Jesús ñaaxtigiy, je' je' anajty ajcxy: María Magdalena, Juana, etz María Jacobo ytaj, e cham jacnaagity ymidöxyjäydijc. 11 Chi Jesús ydiscípulos ca' ajcxy tim mijpidacy je töxyjäydijc ajcxy ayuc, hue' ajcxy tijy nigo y'occapxcixy y'ocmíydaaccix, paady ca' ajcxy mijijcy.

12 Chi Pedro ypidigy ñicxy poyigy ma anajty Jesús ti ñaaxtigiy. Chi Pedro yco'ixiy ma je o'cpi jut, chi ijxy co ca' jii by ni ti, jeyi Jesús yhuit abicy y'ooxnäy. Chi Pedro yhuimbijty ma ytijc jihuüy ooy jadu'n nej ti ytuñyii yjadyii.

Ma Emaús tü'aa

13 Huin'it xi metz Jesús ydiscípulos ajcxy ñicxy ma tüg cajp mutzpi hue' anajty yxi je cajp Emaús, hue' yjigüemyity mid Jerusalén tugi'px estadios (majmetz kilómetro). 14 Chi amíydaacip anajty ajcxy ñicxy. Nigapxcixy nimíydaaccixy nej Jesús ti yjaty ti y'ayoy. 15 E jadu'n yjaty ma anajty ycapxcixy ymíydaaccixy je nimetzpi, chi Jesús ci'm nimijhua'cy

je metzpi, chi m̄id ñicxy ajcxy yquipxyi. ¹⁶ Oy anajty ja'ijxcixy, ca' ajcxy tuñcuend pin je' anajty. ¹⁷ Chi Jesús y'amidooy je' ajcxy:

—¿Ti miich ajcxy miydacpy ma yam mdüyöygyxy? ¿Nej co mdájicixy mmáygixy?

¹⁸ Chi tüg huidi anajty yxii Cleofas y'adzooy:

—Janch tüg'óciy mayjäy nejhuïydäy je ayo'n ti ytunyii ti yjadyii. ¿E miich naydüg jim jättac Jerusalén, e jadu'n tijy ca' mnejhuïy?

¹⁹ Chi Jesús je' ajcxy nimay:

—¿Ti ti ytuñyii ti yjadyii?

Chi je' ajcxy ymīnañ:

—Jesús Nazaretpi, huidi Dios y'ayucnajtzcaxiyp, yi' anajty mij jánchip ma yi ayuc etz huinma'ñ ma Dios yhuinduu, etz cham ma tüg'óciy naax cajp. ²⁰ Chi yi' ajcxy je teedy m̄itungm̄idpi etz ñich ajt ndungm̄idpi Jesús yajc̄idiḡiyy je gobernador co huen yaj'ögyii. Chi ajcxy yajcruudzpejty. ²¹ Hue' ñich ajcxy anajty ndzach'ahuijxyp co yi' je' huidi Israeljäy ajcxy cohuānaam ma ymidzip. Jadachambi jada' ymiduḡiḡixii ma jadu'n ti ytunyii ti yjadyii. ²² Cham ñich ajcxy ndöxyjäydijc ajcxy ooy xy'adziḡiyygyxyich. Ti y'oygyxy janch ticx̄icp ma o'cpi jut. ²³ E com ca' ajcxy paaty je ñaaxñicx, chi ajcxy yhuimbijtni ymīnaangixy co ti ijxcixy yi' ángeles ajcxy, hue' je ángeles ajcxy ymīnañ co Jesús yjuugyity. ²⁴ Huin'it nijējty nm̄iḡgtijc̄ich ooy ma o'cpi jut, paty ajcxy janch jadu'n nej töxyjäydijc anajty ymīnaangixy. Ca' je' ajcxy ijxy Jesús.

²⁵ Chi Jesús ymīnañ:

—Miich jäy ajcxy ooy ajcxy m'aaajuuñity m̄jotjuuñity, ca' ajcxy ti mdzojcm̄ibijccixy co ajcxy m̄jam̄ibigá'n̄ip huidibi y'ayuc najtzcaxiypbi ajcxy ycapxy! ²⁶ ¿Nej ca' anajty ycop̄icyity co je Cristo ayo'n paadip, e huin'it ytiḡihuip tzajpjoty ma yi' y'it oybi?

²⁷ Chi Jesús yajn̄imaay ajcxy Dios ytiy'ajt, chondägy ma Moisés ñecy, etz tüg'óciy jacjadyii necy huidi Dios y'ayucnajtzcaxiypbi yjaay, yajxon ajcxy yajni'ixiyday jadu'n nej yjaybétyity m̄id je Cristo ycip̄i.

²⁸ Chi ajcxy m̄huingoñ je mutz cajp ma anajty ñicxcixy, je Jesús jadu'n ñaybidaaci jadu'n nej jihuïy jacjiguem ñicxy. ²⁹ Huin'it ajcxy nimay adzip:

—Hui'm miich m̄id ñich ajcxy, n̄igi jada chuu'ñy'ad̄ich.

Chi Jesús ytiḡiyy cajpjoty yhui'my m̄id je' ajcxy. ³⁰ Chi jadu'n yjajty co anajty ti y'ixtaaccixy caaybi, chi Jesús tüg tzajcaagy con̄igy, e yajn̄ajxy Dios cojuyip, huin'it tujc-huäcxy moy ajcxy. ³¹ Huin'it ajcxy ijxcajpy Jesús. Chi Jesús m̄ic m̄iciy yaj'ijxtigoy. ³² Chi ajcxy ñayñimaayi:

—¿Nej ca' yjánchity co ñich ajt ooy njihuïyim jotjoty huinma'ñjoty co anajty ajt jim xym̄idm̄iydacim tū'am, etz co ajt xyñajtzcaxiyp̄im je huidi jaybety ma Dios ñecy?

³³ E tim huin'it̄iy ajcxy t̄üb̄ijccixy, chi ajcxy ñicxcixni jim Jerusalén. Ni'amugi' ajcxy paty je majctüḡpi Jesús ydisc̄ipulos ajcxy e jacjadyii jäy ajcxy. ³⁴ Chi ajcxy m̄inaangixy:

—Janch yi' co ti yjugypicy je Huindzin Jesús, com ti oy ñayguëx̄igyii ma Simón.

³⁵ Chi Cleofas nim̄iydacy jadu'n nej tū'ay anajty ajcxy ti ñaybátigixy m̄id Jesús, etz jadu'n nej ajcxy Jesús ijxcajpy co tzajcaagy ti tujc-huäcxy.

Jesús ñayguëx̄ici ma je' ydisc̄ipulos ajcxy

³⁶ Jiiby anajty ajcxy tzachnim̄ydaaccixy co Jesús oy ñayguëx̄igyii ma je' ajcxy. Chi ytinay'ahuïy cujc'amy ma je' ajcxy, chi ymīnañ:

—Jotcugi' miich ajcxy.

³⁷ Chi je' ajcxy ooy ñay'adziḡiyi ooy huinmaaygyxy, hue' ajcxy tijy ijxmaññyb. ³⁸ Chi Jesús nimay je' ajcxy:

—¿Na'amy co mjot mhuinma'ñ ti ytigoydaaygixy? ¿Nej co m'aa'ájtigixy mjot'ájtigixy pin ñich? ³⁹ Ijxcix miich ajcxy ñich ngi' ñich ndecy, ñich jëni ñich. Nidongich etz íjxcich ajcxy. Tüg espíritu ca' mñidity chüch ni ypajc, jadu'n nej m'ijxcixy ñich nmñidity.

⁴⁰ Co Jesús jadu'n ymíñañ, chi ajcxy yaj'ijxy yci' ytecy. ⁴¹ Per ca'ni ajcxy mibijcy mñid co anajty ajcxy chachjotcújcity, chi Jesús ajcxy nimaayí:

—¿Mñid ajcxy ti ii mgayipy?

⁴² Chi ajcxy moy Jesús acxtzäy, etz tüg jñidy serpäg. ⁴³ Chi cöbijcy, chi ycaay y'uucy jim ma je' ajcxy yhuinduu. ⁴⁴ Huin'it Jesús ymíñañ:

—Huidi m'ijxyp cham je' je' huidi nyajnimay jayhuin, co ñich miich ajcxy anajty mñid'ijtcixy, co copicy nguýdundähuibich jadu'n nej yjaybétyity ma je Moisés ñecy je jëcyip, etz jacjadyü Dios y'ayucnajtzcaxñybi ñecy, etz yi salmo necy.

⁴⁵ Huin'it je' ajcxy yjot yhuinma'ñ ymiñ ymejch, jaydëbi huinjihuñygyixipy huidi jaybétyip. ⁴⁶ Chi Jesús yjacmíñañ:

—Jadu'n jaybety y'ity ma Dios ñecy co copicy co je Cristo paadip ayo'n e yjugypigipy codugñg xñ, maabi anajty y'ögy. ⁴⁷ Huen ajcxy yajcapxhuäcxy Dios ytiy'ajt huindu'my naaxhuiñ, chondägip Jerusalén, co ooy ycopícyity huen jäy ajcxy jothuimbijtcix jaydëbi ajcxy paadip pocyhuinmeecxin. ⁴⁸ Miich ajcxy nidiy'ajt'adipy tüg'óciy jadu'n nej cham ti m'ijxcixy ti mnejhuñygyixy. ⁴⁹ Jadachambi nguexipyich ma miich ajcxy je huidi nDeedyich ti xyaj'ahuanñygyixy. Hui'mgix ya Jerusalén ixti cooni ajcxy xyñidigihuij xycödigihuij je Dios yjihui'ñ ymic'ajt huidi tzonam tzajpjoty.

Jesús ypa'ttigñyñ tzajpjoty

⁵⁰ Huin'it xñ Jesús mñid tzoñ je' ydiscípulos ajcxy, chi ajcxy ycajppidzimy, ñicxy ajcxy mihuingon je Betania. Chi Jesús xajhuäcxy yci' mibijctzoy Dios mñid je ymígtijc ajcxy yci xpi. ⁵¹ Chi jadu'n yjajty ma anajty Dios mibijctzoy mñid yi' ajcxy yci xpi, chi abicy yajhu'i'mni je' ajcxy e je' ypättigñyñi jñiby tzajpjoty. ⁵² Chi yi' ajcxy jim yjac-huäcxijpy Dios ojadajtcixy. Chi ajcxy yhuimbijttaayñi jim Jerusalén janch jotcuyc. ⁵³ Chi ajcxy jabom jabom anajty ñicxcixy ma Dios ytiyc chajpcapxycapxcixy, ojadajtcixy jäymejtcixy yi Dios, janch jadu'n jada. Amén.

SAN JUAN

Jaayhui'my Jada'n Nej Jesucristo Ytun Yjajti

Dios y'ung huidibi y'oy ya naaxhuiñ yejci Dios y'ayuc tiy'ajt

¹ Co naaxhuiñybi oga'n chondacy jiiyim anajty Dios y'ung, e yi' yajnejhuuy jay ajcxy Dios y'ayuc ytiy'ajt. Dios y'ung tú'ciy anajty yajpaady ma Dios. ² Je' tim oga'n'aty anajty yajpatp ma Dios. ³ Tüg'óciy huidijaty yaj'ixp yajpatp ya naaxhuiñ, yi' yaj'oyiyday yajcojtay. Tüg'óciy huidijaty Dios yajcojy, tú'ciy ytuñ mïd y'ung. ⁴ Dios y'ung yi' jugy'ajtyejtaayb ma tüg'óciy naaxhuiñyây. Mïd co jugy'ajtyejtäy ma tüg'óciy naaxhuiñyây, je' je' tiy'ajt co Dios y'ung ymïd Dios ymic'ajt. Jada'n nipaady nej tüg'jïñ huidibi jây codïc xp. ⁵ Ya naaxhuiñ yajpaady anï. Yi anï jada'n yi' nej coodzpi. Yi Dios y'ung ti mïmiñ ya naaxhuiñ Dios y'ayuc ytiy'ajt. Jada'n Dios y'ayuc ytiy'ajt ma jây yjot yhuinmañ nej tüg'jïñ ytïcxy agoodztuuyb. Yi anï ca' ñaygodigïyï mïd Dios ytiy'ajt.

⁶ Ma'xung'ajt tüg'yëdyjc huidibi Dios anajty ti yajñibicy. Hue' anajty yxï Juan. ⁷ Yi' oga'n tiy'ajt yejci co Dios ymic'ajt etz ytiy'ajt yajpaady ma Dios y'ung, jigix tüg'óciy je jây ajcxy camibijctähuipy je Dios y'ung. Dios y'ung jada'n nipaady nej tüg'jïñ huidibi codïc xp ma jây ytüyöy. ⁸ Je Juan ca' je' anajty yjëjty je Cristo, je huidibi capxhuäc xp Dios y'ayuc ytiy'ajt. Hue' janchtiy je Juan ñidiy'ajt'ajt je Cristo. ⁹ Je Dios y'ung hue' je' ma'xung'ajty ya naaxhuiñ. Je' je' anajty je Dios ymic'ajt etz ytiy'ajt ymïd, je janchypi, ma jëb tüg'óciy jây ya naaxhuiñ patcixy Dios ytiy'ajt.

¹⁰ Je Dios y'ung ya anajty yhuidity naaxhuiñygyxy. E jada naaxhuiñ yi' yaj'oyiyday. E may je naaxhuiñyây ca' ajcxy ijxcaypy. ¹¹ Je ymïgügtïjc, je judiojây, je' ajcxy nimiini, e may ajcxy je ymïgügtïjc ca' ajcxy ycöbijci. ¹² Tüg'óciy je jây ajcxy pinjaty mijpidac yi' yxï yi' ymic'ajt, yi' ajcxy yajmoy Dios ymic'ajt, e jada'n nipaty nejjihuïy ajcxy Dios y'ung'adyï. ¹³ Canan hue' je' co naydijïyb Dios y'ung co ti yma'xung'aty jada'n nej jây ajcxy y'ocma'xung'aty. Nañ ni ca' yjada'nity nej jây tijy, nej jây jïjp'ixy, ni canan jây jada'n ti huinmay. Hue' janchtiy Dios jada'n ti huinmay.

¹⁴ Je Dios y'ung ya naaxhuiñ je' yma'xung'ajty mïd ñinïcx etz chinay mïd naaxhuiñyây. E ñch ajcxy n'ixxich yi' y'oy'ajt etz ymic'ajt, jada'n nej Dios Teedy y'ung tüg'pajc oy'ajt etz mic'ajt mïdity. ¹⁵ Juan ñidiy'ajt'ajt je Dios y'ung, e chi capxypïdzïmy, e jada'n ymïnañ:

—Jada je' je jây huidibi ñch jada'n nimïydaacïch ma miich ajcxy. Je huidibi miimb jac'axam ma ñch, jac mic'ajt mïd yi' ca'ydi ñch, com jacjayïjp yi' jugy'ajt paty ca'ydi ñch.

¹⁶ Je Dios y'ung oy xychojcm xyjihuiyim mijcayee, paady je' tuuñ may'ajt oy'ajt mijcayee mïd ñch ajt ycïxpi. ¹⁷ Com Dios y'ané'mïn ycötujcïn micpi hue' Dios yajnigüeïx je Moisés. Co Dios quejxy Jesucristo ya naaxhuiñ, chi may'ajt oy'ajt tuñ mïd je jây ajcxy ycïxpi, e nañ je' ytiy'ajt yajnigüeïx je Jesucristo. ¹⁸ Je Dios ni camïnaabi pin ca'ixyñi, je y'ung tüg'pajci yajpatp ma Dios Teedy ity. Je Dios y'ung ti xyajnejhuuyim nej Dios yajpaady.

Juan el Bautista je' tiy'ajt yejci Jesús je' anajty Dios y'ung

¹⁹ Jadaabi je' je tiy'ajt huidibi Juan yejci, co judío jây ajcxy quejxy nijëjty teedytïjc etz tzajptïjc tungmïdipi. Jïm ajcxy chooñ Jerusalén nicxy ma anajty Juan yajpaady, chi ajcxy y'amïdooy:

—¿Mbin miich? ¿Nej miich je' je Cristo huidibi Dios yquexamy?

²⁰ Je' ñigapx je tiy'ajt, ca' ñaygoyützi, chi ymïnañ:

—Ca' ñch njëjty je Cristo.

²¹ Chi ajcxy jac'amïdooy:

—¿E pin miich mnaydiyii? Pen ca' mjëjity je Cristo. ¿Nej miich je' je Elías?

Chi Juan y'adzooy:

—Ca' je' n'ichity.

Chi ajcxy jac'amidooy:

—¿Nej miich je' je Dios y'ayuccapxhuäcxpi, je huídibi ñigapxy ma Dios ñecy co ymiinañ ya naaxhuiñ?

Chi Juan y'adzooy:

—Ca'.

²² Chi y'amidooy ajcxy jadüg'oc:

—¿Mbin miich? Jigix ñch ajcxy tÿ'ajt nyajñicxibich ma yi tibi ñch ajcxy xyquexyich. ¿Ti miich nayxigoyäxyii?

²³ Chi Juan yminañ:

—Ich je' je jäy huídibi Dios y'ayuccapxhuäcxip ma tüg mijtig'íduum, tim jadu'n nej jilby jaybety ymiiñ ma Isaías ñecy, nañ tim jadu'n ñch nmína'ñich co copicy nayñi'ixiyigix ma yi mjot yi mhuinma'ñ, jëbi naybátigixy m'id mHuindzin Dios. Jadu'n nej jäy ixypy tü'aa yaj'oyy co tüg huindzin ymiina'ñ.

²⁴ Je teedytjic etz tzajptjic tungm'idpi huídibi oy migapxy Juan, hue' anajty ajcxy fariseojäy ti yquexyii. ²⁵ Chi ajcxy jactim'amidooy Juan:

—¿Ti miich co mjäyyajñibety? Peni ca' miich mjëjity je Cristo, ni mgajëjity je Elías, ni mgajëjity huídibi Dios y'ayuc najzcapxyip.

²⁶⁻²⁷ Chi Juan y'adzooy:

—Ich hue' jäy nyajñibetyich m'id ñi. Ya naaxhuiñ ji tüg jäy huídibi miich ajcxy ca' m'ixy'adyii. Je' huídibi jac'axam mimb ma ñch, je huídibi ca' mihuaadity nicxy yi' xytumbi'adyiijich, nicxyich yc'ighuin nguejich.

²⁸ Jadu'n ytuni yjajti jim Betábara, jim'amy ahuin ma Jordán mij ñi, jim anajty Juan jäy yajñibety. Juan tÿ'ajt yejc co Jesús je' anajty yjugy'ajt yegam m'id ñch ajt nbocy ycixpi.

Jesús nayyajhuindzig'ihuaanip ma Dios m'id jäy ajcxy ypocy ycixpi

²⁹ Chi je com jabom co ijxy Jesús anajty ñimiñyii, chi Juan ñimay je jäy ajcxy:

—Cha je' ymiñ je Dios yjäy huídibi Dios nayyajhuindzig'ihuaanip m'id naaxhuiñyjäy ajcxy ypocy ycixpi. Tim jadu'n nej judíojäy ajcxy Dios huindzig'iy m'id ypocy ycixpi.

³⁰ Jada je' huídibi ñch nnigapxypich co jac'axam ymiina'ñ ma ñch tüg yëdyjc huídibi ñig' Dios ymic'ajt y'oy'ajt m'idity ca'ydí ñch. Com jiiyim anajty yi' yjugy'aty co oga'n naaxhuiñybi chondacy. ³¹ Oy ñch anajty ca' yi' n'ixy'adyiijich huingíxy jipcíxy, nyajñibejtich jäy, jigix yi judíojäy nejhuñhuip ajcxy co ji yajpaady je Cristo je huídibi Dios ymic'ajt m'id.

³² Chi Juan nigodiy'ajt'ajty je Cristo co ymiina'ñ:

—Ich ti n'ixyich yi Espíritu Santo jilby choñ tzajpjoty, jadu'n yquëxígy nej tüg muuxy, e chi y'ixtacy ma Jesucristo. ³³ Tiydudägy ca' ñch anajty n'ixy'adyiijich. Je Dios huídibi xyquejxich jäy yajñibejtpi, je' ñch anajty jadu'n ti xyñimäyich co je jäy ma anajty n'ixyich je Espíritu Santo ñigidägyii anajty etz yhui'my ma je'. Je' je' jadu'n anajty huídibi y'adig'ihuipy yjottig'ihuipy Dios yjihu'iñ ymic'ajt ma je jäy ajcxy. ³⁴ Cham nnigapxpetyich co ñch ti n'ixyich je jäy, e nyejcpyich tÿ'ajt co je' je' je Dios y'ung.

Jesús yhuin'ijx nijëjity jäy huídibi anajty ydiscípulo'andaanipy

³⁵ Chi je com jabom jopy jim anajty Juan yajpaady m'id metz jäy huídibi ixpijcp ma yi'.

³⁶ Chi anajty ajcxy tzachhuindicxy Jesús co anajty jim ñaxy, chi Juan ñimay je metzpi jäy: —Oc'ijxcix ocnejhuñyigix, cha je jäy huídibi Dios nayyajhuindzig'ihuaanip m'id naaxhuiñyjäy ypocy ycixpi.

³⁷ E je metzpi jäy huidibi anajty ajcxy ixpijcp ma Juan, co jadu'n ajcxy midoy nej Juan ymíñañ, chi ajcxy Jesús padzooñ. ³⁸ Chi Jesús y'ijxhuimbijty, chi ijxy co anajty ajcxy ypanicxyii, chi jada' nimay ajcxy:

—¿Ti ajcxy m'ixtaayb?

Chi ajcxy y'adzooy:

—Huindzin, ¿ma tiyi ti mja'ttägy?

³⁹ Chi Jesús y'adzooy:

—Miingix, jigix ajcxy m'ixipy ma ti nja'ttägyich.

Chi jada' ajcxy panicxy, e chi ajcxy ijxy ma anajty ti yja'ttägy. Je huin'it ximbi chi jim je' mid yhui'miy, com mijminacyxi anajty co ajcxy jim ymejch.

⁴⁰ Andrés, je Simón Pedro ymiguëx, je' anajty tüg tzoonip huidibi nimetz ajcxy midou jadu'n nej Juan ymíñañ, etz je' anajty ajcxy ti padzooñ Jesús. ⁴¹ Chi jada' Andrés oy ixtäy y'uch Simón tim jayijp, chi nimay:

—Ti ich ajcxy nbaady je Mesías —jadu'n je ayuc Mesías yhuimbizimañ Cristo.

⁴² Chi Andrés midnicxy Simón ma Jesús, e chi Jesús huindicpejty, nimay:

—Miich je' Simón, Jonás miich xy'ung'ajtp. Miich je' mxii'adüyb Cefas —huidibi ayuc'amy huimbizimb tzaa.

Jesús je' yhuin'ijx Felipe etz Natanael

⁴³ Chi com jabom Jesús chooñ ñicxy jim Galilea, chi minaybaati Felipe, chi jadu'n nimay:

—Pajamgich.

⁴⁴ Felipe jim anajty ycogajpity Betsaida, ñañ je' je' je' cajp ma anajty ajcxy ycogajpity Andrés etz Pedro. ⁴⁵ Chi Felipe minaybaati je jäy huidibiyxi Natanael, chi jadu'n nimay:

—Ti ich ajcxy je' nbaadyich je jäy huidibi yajni gapxp yajnimiydacp ma Moisés ñecy, etz yi Dios y'ayucnajtzcapyibi ñecy. Yi' je' je' Jesús, José y'ung huidibi cogajpity jim Nazaret.

⁴⁶ Chi Natanael y'adzohuimbijty:

—¿Nej jim Nazaret ti choñ tüg oyjäy? Com ac jadu'n jäy ymíñañ co ac jibicjäydijc jim tzinaayb.

Chi Felipe ymíñañ:

—Jam ci'm octim'ix.

⁴⁷ Co Jesús ijxy co Natanael ñimiñyii, chi jadu'n ymíñañ:

—Cha tüg judíojäy huidibi ca' pin huin'inipy.

⁴⁸ Chi Natanael ymíñañ:

—¿Nej miich ti xy'ijxcapyich pin jäy ich?

Chi Jesús nimay Natanael:

—Ca'ni anajty Felipe xyñimaayñi: “Jam íxim je Jesús” co anajty miich jiiy'emy ma je higueri quipypa't, huin'it ich miich ti n'ijxcapy.

⁴⁹ Chi Natanael y'adzooy:

—Huindzin, miich je' Dios y'ung. Miich je' Rey'adam ma je judíojäy ajcxy.

⁵⁰ Chi Jesús y'adzooy:

—Mid co ti nnimäy co jiiy'emy anajty miich ma je higueri quipypa't co ich miich ti n'ijxcapy. ¿E ti mdimjanimibicy? Jactimmijhuinmañ etz jactimmij'oy'ajt m'ixamyb mbadamyb.

⁵¹ Chi Jesús jadu'n ymíñañ:

—Janch tim tiy ich miich ajcxy yam jadu'n nimäy co m'ixipy ajcxy yi tzajp y'ahuäch etz Dios y'ángeles ajcxy chooñ tzajpjoty xyñigidägyich, e ypa'ttigiygixy jadüg'oc tzajpjoty. Choongixy yja'tcixy ma ich je jäy huidibi tzoon tzajpjoty.

2

Jesús y'oy ma anajty jäy nix#duñ tüg pijcin jim Caná

¹ Midugüigxibi anajty maabi ajcxy Jesús minaymigápzigixy, ma je cajp huídibi yxii Caná ma je Galilea naaxjot jim anajty huinxüidungixy tüg jäy huídibi anajty ti ypicy. E jim anajty nañ jadu'n Jesús ytaj. ² Chi Jesús müid je' ydiscípulos ajcxy yajhuooy jim ma je xii anajty ytuñyii yjadyii. ³ Ti anajty vino ycijxtaayñi, huin'it Jesús ytaj ñimayñi:

—Ca'p ajcxy müidiñ vino.

⁴ Chi Jesús y'adzooy ytaj nimay:

—Ca' ti jotmay nmüdidyich müid miich töxyäy. Hich nhorí ca'ni paady mina jäy ajcxy nyajnejhuíhuibich pin ich.

⁵ Chi je ytaj nimay je tumbidijc ajcxy:

—Mdúngixipy nej anajty ajcxy Jesús xyñimaaygixy.

⁶ Jim anajty tudujc tzaadu'tz ma anajty ñi y'ity. Je ñi anajty ajcxy yajtumyb co anajty ajcxy ycibujcixy jadu'n nej ypocy ixpujcixy, jadu'n anajty ajcxy judíojäy costumbre müidity. Tügpí tzaadu'tz ymüid anajty yjot metz majt tugüg majt ñi. ⁷ Chi Jesús nimay je tumbidijc ajcxy:

—Yaj'ujtzcix yi tzaadu'tz müid ñi.

E chi ajcxy yaj'ujztay mabaat y'a'ujznaxy je tzaadu'tz. ⁸ Chi Jesús yminañ:

—Yajpidzimgix cham yi ñi, e yajnicxcix jiiyby ma huídibi ane'mb ma yi caydac uctac.

Chi ajcxy yajnicxy je ñi. ⁹ Co jada' je ane'mbi jihuiymajch je ñi ti anajty yvinocojy, chi mijhuoy je yéydijc huídibi anajty ti ypicy. Je ane'mbi ca' anajty nejhuíy ma anajty je vino ti choñ. Jéyi anajty je ytumbidijc ñejhuíy co ñi anajty ajcxy yajpidzimgixy ma je tzaadu'tz. ¹⁰ Chi je ane'mbi nimay je huídibi anajty ti ypicy:

—Tüg'ócíy jäy ajcxy huídibi xüidumb, hue' ajcxy yajtumyb jayjip je vino oybi. E co jäy ajcxy ooy yxondaacni, chi oyñihuídibi vino ñi jacyajtungixy. Miich janchtiy, ti m'amay'aty yi vinonii oybi ixti chamni myajtuñ.

¹¹ Je' je' je oga'nibi mijhuinma'ñ huídibi Jesús ytuun jim Caná ma Galilea ñaaxjot. Chi yajniguéxigy je ymic'ajt etz y'oyjäy'ajt. E je huídibi anajty ajcxy yaj'ixpijcpy, chi ajcxy ooy mibijcy mijpidacy je Jesús.

¹² Co jadu'n tüg'ócíy ytuni yjajti, chi Jesús y'idacy jim ma je cajp huídi yxii Capernaum müid ytaj etz y'uch ajcxy, etz huídibi anajty yaj'ixpijcpy. Jim ajcxy yhuäcxijpy tüg xii mejtz xii.

Jesús yajpidzim ajuuybi adoocpi ma Dios ytijc

¹³ Tim huíngon anajty je pascua xii huídibi judío ajcxy ytumy jim Jerusalén, paady Jesús ñicxy jim. ¹⁴ Jim ma Dios ytijc Jesús paty je' huídibi anajty ajcxy ajuuybi adoocpi, jadu'n nej ma ymiiñ huaj, borregi, etz muuxy (huídibi jäy ajcxy Dios yajhuindzigíy). Nañ jim meeñyhuíngogombidijc anajty ajcxy y'íñaaygixy ma ymesa. ¹⁵ Chi Jesús yaj'oyíy tüg cochac huojp. E chi ixhuojppidzimday je ajuuybi adoocpi ajcxy ma Dios ytijc ñihuaj etz ñiborrego. Chi yi meeñyhuíngogombidijc ymeeñ cöxijtnajxtayi, e chi ymesa tijhuimbijttaayi. ¹⁶ Chi nimay je muuxytoocpidijc ajcxy:

—Yajpidzimgix jada muuxy ya. Ca' ich nDeedy ytijc yhuaani ajcxy ajuydac adoocpac.

¹⁷ Je' ajcxy huídibi anajty Jesús yaj'ixpijcpy chi ajihuíygooti ajcxy je ayuc, jadu'n nej jaybety ymiñ ma Dios ñecy: “Ooy ndzocy njihuíyich Dios ytijc, paady ooy nnijottigoyich Dios ytijc.”

¹⁸ Chi je judío ixpijctijc ajcxy y'amidooy Jesús:

—¿Ti mijhuinma'ñ miich xy'ocyaj'ixambich ajcxy nej tüg iixpejt, pen janch müidity cötujcin co m'ixhuojppidzimday yi ajuuybi adoocpi ajcxy?

¹⁹ Chi Jesús y'adzooy:

—Yajhuindigoogyix jada Dios ytijc, e codugüg xii ich yi' jadüg'oc nyajpidgipy.

²⁰ Chi jada' je judío ixpijctijc ajcxy y'adzooy:

—Huixchigüipx tudujc jimijt yhuäcxijpy co jäy cojy jada Dios ytjic. ¿E miich tijy myajpidigamy codugüigxiiji?

²¹ Per ca' je' anajty nigapxy je Dios ytjic. Hue' je' anajty ci'm ñayñigapxyii co anajty y'öga'ñ, etz co yjugypigipy jadüg'oc codugüig xii. ²² Chi jada' co Jesús yjugypijcy codugüig xii maabi anajty y'ögy, je huidibi anajty ajcxy ti yaj'ixpicy, ajihuiygooti ajcxy huidibi Jesús anajty ti yajnimäyüigixy. Chi jada' ajcxy mibijcy ooy jadu'n nej anajty ycojaayity ma Dios ylibro, etz com nañ jadu'n anajty Jesús ti ymina'ñ.

Jesús ñejhuüy nej jäy ajcxy yjot yhuinma'ñ müidity

²³ Co anajty Jesús yjimity Jerusalén pascua xiioty, mayjäy ooy ymibijci co ajcxy ijxy je mijhuinma'ñ huidibi anajty ytumyb. ²⁴ Jesús ca' anajty yjaty ñaygüyegyii ma je mayjäy ajcxy (hue' anajty ajcxy chachyajrey'adamy). ²⁵ Com Jesús ñejhuidydaayb anajty nej jäy ajcxy nidüg nidüg yjot yhuinma'ñ müidity ca' tzocy pin yajnimähuüyb ti anajty ajcxy ytunamy, com ñejhuidydaayb nej jäy ajcxy yjot yhuinma'ñ müidity.

3

Nicodemo oy ytiy'ajtpicy ma Jesús

¹ Jim anajty tüg yëdyjc, fariseojäy y'ixpicin anajty yajtuunipy. Hue' anajty yxii Nicodemo. Je' anajty ñigohuajc'ajtyp ma je judíojäy ajcxy ymiiñ. ² Chi jada' Nicodemo ymiñ coodz ma Jesús anajty y'ity, chi nimay:

—Huindzin, nejhuüyb ich ajcxy co miich tüg huindzin huidibi tzomb ma Dios. Com ca' ni pin jaty nej tunipy je mijhuinma'ñ huidibi miich mdumyb, pen ca' Dios ymic'ajt müidity.

³ Chi Jesús y'adzooy:

—Janch janch ich miich yam jadu'n nimäy, co ca' ni pin ixipy Dios y'it, pen ca' jadüg'oc yma'xung'ajttigach.

⁴ Chi Nicodemo yajtiy:

—Per, ¿nej tüg jäy tiibi ymij'anäccüyñi y'ocnima'xung'ajttigájtzpity jadüg'oc? ¿Nej jëbi jadüg'oc ytigüy ma ytaj y'aa yjot, e chi yma'xung'adity jadüg'oc?

⁵ Chi Jesús y'adzooy:

—Janch janch ich miich yam jadu'n nimäy pen ca' jäy yjothuimbity etz ñüibety, pen ca' Dios yjihui'ñ ymic'ajt y'adigüyüi yjottigüyüi, ca' jëbi ytigüy ma Dios chinäy. ⁶ Je jäy huidibi ajcxy ma'xung'ajtp ma töxyjäy, ymüd ajcxy ñinücx yjugy'ajtin. Je jäy ajcxy huidibi Dios yjihui'ñ ymic'ajt adigüyüipy jottigüyüipy ymüd ajcxy Dios yjugy'ajtin. ⁷ Ca' nej mnayjihuihuüyb co ti nnimäy co copicy mma'xung'adipy huinjemy, co Dios yjihui'ñ ymic'ajt xy'adigühuüipy xyjottigühuüipy. ⁸ Com je poj miinüyb hueñytimyma'amyity, e nmidoohuim co y'a'ich, e ca' nnejhuüyüm ma choñ e ma ñicxy. Jadu'n nej je poj ypojy e nganejhuüyüm ma choñ, nañ tim jadu'n yjaty müid je Espíritu Santo, ca' nejhuüyüm nej yjaty co adigüy jottigüy jäy.

⁹ Chi Nicodemo yajtihuimbijty:

—¿Nej tijy co yjadu'nity? Ca' nhuinjihuüyich.

¹⁰ Chi Jesús y'adzooy:

—Miich huindzin'ajtp ma yi judíojäy, ¿ti co ca' mhujinjuüy jadayaabi tiy'ajt? ¹¹ Janch janch ich miich yam jadu'n nnimäy co ich etz nDeedich ngapxyp yi huidibi nejhüüyigixypich, e nyejcpyich ajcxy tiy'ajt yi huidijaty ich ti n'ixcixyich. Miich ajcxy judío ixpicytjic ca' ajcxy mgöbijccixy ich ajcxy ndiy'ajt. ¹² Pen ca' miich ajcxy mibijccixy jada tiy'ajt huidibi njanimiydacypich huidibi yajpatp ya naaxhuiñ, ca' ajcxy mmibigipy co njanimiydägibich yi tiy'ajt huidibi tzajpjoty yajpatp.

¹³ Ca' ni pin ti y'oy tzajpjoty, ich je jäy tügpaic huidibi ti ndzoñich tzajpjoty, ti ngidägyich ya naaxhuiñ. ¹⁴ Jadu'n nej Moisés yaj'oyiy je pujx tza'ñ, e chi yajcruudzpety jim

mijtig'ituduum jigix chögipy je jäy ajcxy ma je ahua'n iyujc chüchyii. Nañ tim jadu'n jäy ajcxy xyajcruudzpeda'ñich. ¹⁵ E tüg'óciy jäy ajcxy pinjaty xymijpidaacpich, ca' yi' jugy'ajtin ycixy ytigooy ni mina.

Dios ooy mijcajee tzocy jihuüy yi naaxhuiñjyäy

¹⁶ Ooy mijcajee Dios tzocy jihuüy yi naaxhuiñjyäy co yecy y'ung tügpajcpi müd jäy ajcxy ypocy ycixpi. Paady pinjaty mibijcp mijpidacp yi' y'ung, ca' yjugy'ajtin ycixipy ytigoyipy tücci'yi. Hue' janchtiy y'alma ypaadipy tüg jugy'ajtin huidibi ca' ni mina ycixipy ytigoyipy. ¹⁷ Dios ca' quejxy y'ung ya naaxhuiñ co tzaachytunipy yi naaxhuiñjyäy ajcxy müd ypocy ycixpi. Paady y'ung quejxy co yajpocynñihuáatzcixipy.

¹⁸ Je jäy ajcxy pinjaty mibijcp mijpidacp Dios y'ung, ca' ajcxy Dios chaachytunipy müd ypocy ycixpi. Je jäy ajcxy pinjaty ca' mibicy ca' mijpidägy Dios y'ung, pocycähuiy ajcxy ma Dios, co ca' mijpidaci ajcxy Dios y'ung tügpajcpi. ¹⁹ Paady ycixpi Dios tzaachytuna'ñ mayjäy müd ypocy ycixpi, com co Dios quejxy y'ung müd yti'y'ajt ya naaxhuiñ, e ca' ajcxy mibijcy Dios y'ung, jadu'n je' anajty nej tüg jün hui di codicxip jäy ajcxy ma chinaayin yjugy'ajtin. Per ca'p ajcxy je naaxhuiñjyäy mijpidacy je jün, jadu'n nej jihuüy ajcxy anajty yjacjotcujcity co chinaaygixy agoodztuuyb, com je' co nigi tzachnijot'ajtcixy jibic-huinma'ñ. ²⁰ Com je jäy ajcxy huidibi jibic-huinma'ñ tzach nijot'ajtcixp, ca' ajcxy tzojci Dios yti'y'ajt, jadu'n nej jihuüy ca' chinähuaangixy ma jün yti'cxin. Ca' ajcxy y'amidoo'idani Dios y'ayuc, ca'ydi ñiguëxigy je jibicpi huidibi ajcxy ytumy. ²¹ Je jäy ajcxy huidibi cuydumb Dios yti'y'ajt, je' ajcxy ñiminipy Dios y'ung yti'y'ajt, jadu'n nej jihuüy jün nimiingixy ma yti'cxy, huen jatymy niguëxigy co oy ytungixy etz co Dios yti'y'ajt ajcxy müdity ma yjot yhuinma'ñ.

Juan (el Bautista) tiy'ajt yejc ma jäy ajcxy müd Jesús ycixpi

²² Co jadu'n ytuni yjajti, chi Jesús ñicxy jim Judea naaxjot müd ydiscípulos ajcxy. Chi ajcxy jim yhuäcxijpy. Jim ajcxy jäy yajnñibety. ²³ Nañ jadu'n Juan anajty yjääyajnñibety jim Enón, com jim anajty ooy comni, e jim anajty jäy ymingixy etz ññibetcity. ²⁴ Hue' jada jadu'n ytuni yjajti ca'ni anajty je Juan pidaaccixy pujxtigoty.

²⁵ Ca' ajcxy ñay'ayuc-huinjihuüy ni jējity huidibi anajty Juan yaj'ixpijcy etz tüg jäy nej jēbi huaad ypocy ñayyajñihuädziyb ajcxy. ²⁶ Chi jada' ajcxy Juan nidzooñ, oy ajcxy paty, e chi ajcxy nimay:

—Huindzin, je jäy huidibi anajty müch jim müd jim'amy Jordán mijñnaxy, je huidibi müch anajty mnidiy'ajt'ajtpy co je' je' je Cristo, nañ ooy chachjäyajnñibety. E janch mayjäy y'ocnimujcin.

²⁷ Chi Juan y'adzooy:

—Ca' ni pin ni ti mic'ajt müdity, pen ca' Dios ni ti mic'ajt ymöy. ²⁸ Müch ajcxy mnejhuüy co nmīnaañich co ñich ca' njējity je Cristo. Hue' janchtiy Dios xyquejxich jayijp co nnidiy'ajt'adipyich je Cristo. ²⁹ Co jäy ypiy je yēydijc je' je' müd'idam je ytōxyjic. E je tōxycapxpi huidibi ti yaj'oyiy je pijcin, ca' je' müd'ida'ñ je tōxyjäy, jēy co yjotcugiy co yōcmidoohui je tōxyjäy ñäy co yjädy ma je' yti'c co ypi'gaani. Cristo jadu'n je' nipaady nej tüg tōxyjäy ñäy, e je tōxyjäy jadu'n je' nipaady nej Dios yjäy. Je Cristo ymüd'idaanipy Dios yjäy. Jadu'n ñich nipaady nej tüg tōxycapxpi, ti Dios yjäy nyajni'ixiyich jigix mijpidáaccixipy je Cristo. Jotcujcich cham co je Cristo ti ymiñ, e ñicxy yi jäy ajcxy ma yi'. ³⁰ Ooy ytimycopyity co Jesús ymij'ajt paatnipy, e ñich ndung ycixnipy ymayñipy.

Dios y'ung tzoon jüby ma Dios

³¹ Chi Juan yjacmīnañ:

—Je Cristo huidibi jüby tzoon ma Dios jacmij xpijcin müdity ca'ydi naaxhuiñjyäy ajcxy. Je jäy ajcxy huidibi ya naaxhuiñ ijtp, ymīnaaxhuiñjyäy ti yaj'ixpijcity, e je' ajcxy

ñidiy'ajt'ajtpy je naaxhuiñjyá y'ixpijcin. Je Cristo tzoon jüby tzajpjoty, jacmijcajee yi' ma y'ayuc ytiy'ajt ca'dyi pin. ³² Je Cristo ñigapxyp huídibi ti ixy e ti midooy, e yi'y'ayuc ytiy'ajt ca' jäy ajcxy cöbigangixy. ³³ Je jäy ajcxy huídibi cöbijcp Dios y'ung y'ayuc ytiy'ajt, je' ajcxy ñigapxpejtyp co Dios ytiy'ajt janch yi'. ³⁴ Je Jesús huídibi Dios yquejx, ca'pxy Dios ytiy'ajt ñigapxpejti, com Dios ti möy yi' y'ung yi' yjihui'ñ ymicc'ajt mijcajee. ³⁵ Dios Teedy chojcyp yjihuiyb y'ung, e tüg'óciy ymic'ajt ytiy'ajt yi'ti yajmigo'ixiydäy. ³⁶ Je jäy ajcxy pinjaty mibijcp Dios y'ung, ymüd'ajtpy ajcxy y'alma je jugy'ajtin huídibi ca' ycixy ytiigooy. Je jäy ajcxy pinjaty ca' capxymidooy Dios y'ung, ca' ajcxy y'alma müd'adipy je jugy'ajtin huídibi ca' ycixy ytiigooy. Je'yi ypaadipy ajcxy Dios chip y'ejcín.

4

Jesús ñaybaati müd tüg töxyjäy jim Samaria

¹ Chi je Huindzin Jesús ayuc midoy jadu'n nej anajty je fariseojäy ajcxy ycapxcixy ymiydaaccixy co je Jesús jacmayjäy anajty yaj'ixpiy etz yajñibety ca'ydi Juan. ² Oy Jesús ca' anajty jäy yajñibety ci'm. Hue' janchtiy je' ydiscípulos anajty ajcxy jäy yajñibejtp. ³ E co Jesús jada nejhuiy, chi jim Judea choni, yhuimbijtni jim Galilea.

⁴ Co yhuimbijty, hue' anajty yjatytimyñaxihua'ñ jim Samaria. ⁵ Chi jada' yja'ty huington ma je mij cajp huídi xijip Samaria, jim ma anajty tüg pi'ccajp huídi xijip Sicar, mihuington je naax huídibi Jacob anajty ti möy y'ung José. ⁶ Jim anajty Jesús yajpaady ma je Jacob ñigondac. Com ti anajty Jesús y'anucxiiyñi müd je tüyöyü, chi y'ijxtacy jim ma je ñigondac anajty. Hue' anajty xii jim cugihuaanip. ⁷ Chi jim yja'ty ñigombi tüg töxyjäy. Chi Jesús ymínañ:

—Íich yajñi'uucc. ⁸ Com je' ydiscípulos ajcxy huídibi anajty Jesús yjaymüd'ajtip, ti anajty ñicxcixy cajpjoty juuyb pijcp.

⁹ Chi je töxyjäy y'adzooy huídibi anajty cogajpíp Samaria:

—¿Na'amy co íich ñi xypijctzoohuich? com müich hue' müich judíojäy, e samariajäy íich. (Co yi judíojäy etz samariajäy ca' ajcxy ñaygodigíyigixy.)

¹⁰ Huin'it Jesús y'adzooy:

—Co ixipy m'ocnejhuíy je oybi huídibi Dios yejcyp müd müich ycixpi, e m'ocnejhuíy ixipy nañ jadu'n pin xypijctzoohuipy yi ñi, janch co müich ixipy xyñimäyich: “Íich yajñi'uucc”. E íich müich ixipy nmooyb ñi huídibi jugy'ajt yegipy huinixii.

¹¹ Chi je töxyjäy y'adzooy ñimay Jesús:

—Huindzin, müich ca' mmüidity ti müd myajpidzimipy yi ñi, e yi ñijut cücy yi' ooy. ¿Ma tijy m'ocpada'ñ yi ñi huídibi yajjugy'ajtp? ¹² ¿Nej jacñigi tijy müich mij mnayyajnaxyii, ca'ydi íich ajt n'apndeedy Jacob? Je'je' huídibi jada ñigop yaj'oyüy. Jacob etz y'ung y'anäg ñi'uucc ma jada ñigop, e nañ jadu'n yajñi'uucy yhuaj y'iyujc ajcxy ya.

¹³ Chi Jesús y'adzooy ñimay je töxyjäy:

—Tüg'óciy pinjaty ñi'uucp ma jada ñigop tidzi huíib ajcxy jadüg'oc. ¹⁴ Yi jäy ajcxy pinjaty ñi'uucp huídibi nmooybich, ca' ni mina ytidzihuíyb, com hue' yi ñi huídibi nyejcypich, ahuimbidipy ma je jäy jadu'n nej tüg ñigop huídibi yegam jugy'ajtin huídibi ni ca' ycixy ytiigooy.

¹⁵ Chi je töxyjäy y'adzooy:

—Huindzin, íich mooyg yi ñi, ca'ydi jabom jabom ndidziyijich, e ca'ydi n'ocjacmíinibich ma jada ñigop ñi yajpidzimbi.

¹⁶ Chi Jesús y'adzooy:

—Nícx yajtzon mñäy, e müd miin.

¹⁷ Chi je töxyjäy y'adzooy:

—Ca' nmüidityich nñäyich.

Chi Jesús y'adzooy:

—Janch tɨy'ajt jadu'n nej miich mɨna'ñ, co ca' mmɨdɨty mñäy. ¹⁸ Com tɨ mɨddzɨnäy mɨgoox yëydɨc, e huɨdɨbɨ cham mmɨd, ca' mñäy'adyɨ. Janch tɨy'ajt jadu'n nej tɨ m'adzooy.

¹⁹ Chi je töxyjäy ymɨnañ:

—Huɨndzɨn, cham nhuɨnjɨhuɨyɨch co miich je' tög huɨdɨbɨ Dios yhuɨj'ajt ycuɨc'ajt mɨɨd. ²⁰ Hɨch ajcxy n'ap ndeedyɨch hue' je' ymɨnañ co jëbɨ ya huaad hɨch ajcxy nDios'ojadajtcɨxyɨch ma jadayaabɨ huɨngombɨ copjɨjp. E miich ajcxy judíojäy ymɨnaangɨxy co jɨm Jerusalén je' ma huaad jëbɨ nDios'ojadajtm, ca' jac ma.

²¹ Chi Jesús y'adzooy nɨmay je töxyjäy:

—Töxyjäy mɨjpɨdäg hɨch n'ayuc. Co ypadamy je xɨ je tiempo co ni ya ma miich ajcxy mDios'ojadajttac, e ni jɨm Jerusalén jäy ca' ojadadɨpy ajcxy yɨ Dios Teedy. ²² Miich ajcxy ca' tɨy'ajt mnejhuɨyɨgɨxy nej jëbɨ huaad mDios'ojadajtcɨxyɨpy. Hɨch ajcxy judíojäy nejhuɨyɨbɨch ajcxy je tɨy'ajt nej jëbɨ huaad nDios'ojadajtm. Com tög judíojäy je huɨdɨbɨ yajnɨdzoocɨhuam je jäy ajcxy y'alma ma Dios. ²³ Ypadamy je xɨ je tiempo, e jada jëdu'n je tiempo co je huɨdɨbɨ ajcxy tɨydudägy Dios ojadajtp, y'ojadadɨpy ajcxy Dios mɨɨd oyjot oyhuɨnma'ñ etz mɨɨd Dios ytɨy'ajt. Com yɨ Dios Teedy y'ixtaayb yɨ jadu'mbɨ jäy huɨdɨbɨ ojadadɨb mɨɨd oyjot oyhuɨnma'ñ. ²⁴ Dios ca' ñɨnɨcx mɨdɨty, jadu'n je' nej poj ca' yaj'ixy. Je jäy ajcxy pɨnjaty ojadajtp Dios, copɨcy co huen ojadajtcɨxy mɨɨd tudägyjot tudägyhuɨnma'ñ, etz mɨɨd Dios ytɨy'ajt.

²⁵ Chi je töxyjäy ymɨnañ:

—Hɨch nejhuɨyɨb co je Mesías ymɨna'ñ huɨdɨbɨ naydɨjaanɨp Cristo, co je' ymɨnɨpy, huɨn'it xyajni'ixɨhuaanɨm tög'ócɨy tɨy'ajt.

²⁶ Chi Jesús y'adzooy:

—Hɨch jëdu'n je Cristo huɨdɨbɨ miich mɨɨdmɨydacyp.

²⁷ Chi jada' yja'ty ajcxy Jesús ydiscípulos ajcxy. Chi ajcxy ooy jɨhuɨy tɨ anajty co Jesús je töxyjäy mɨɨdmɨydägy, e ni pɨn ca' yaj'amɨdooy tɨ anajty chojcyp tɨ anajty yñɨmɨydacyp mɨɨd yɨ töxyjäy. ²⁸ Chi je töxyjäy jɨm ymajt ixmajch, chi ñɨcxy cajpjoty oy mayjäy nɨmay:

²⁹ —Mɨngɨx, jam tög yëydɨc ɨxm. Tɨ hɨch yɨ' xyajni'maydäyɨch tög'ócɨy tɨjaty tɨ nduñɨch. ¿Nej ca' jada' yɨ' jëjɨty je Cristo?

³⁰ Chi choñ ooy mayjäy cajpjoty, nɨnɨcxy ajcxy Jesús. ³¹ Yam anajty ajcxy Jesús ydiscípulos chachnɨmäyɨ adzip:

—Huɨndzɨn, occaay.

³² Chi Jesús y'adzooy:

—Hɨch nmɨdɨch tög caayɨn uucɨn huɨdɨbɨ miich ajcxy ca' mnejhuɨyɨgɨxy.

³³ Paady je' ydiscípulos ajcxy tzachhuɨnmay, ac jëyɨ ajcxy, nayñɨmayɨgɨxy mɨñ xɨpy:

—¿Nej tɨ pɨnjaty yajcayyɨ yaj'ügyɨ?

³⁴ Chi Jesús ymɨnañ:

—Jotcuɨc nayjɨhuɨyɨjɨch co tɨ nguydunɨch Dios chojcɨn. Com yɨ' tɨ xyquexyɨch ya naaxhuɨñ, e nguydúunɨbɨch yɨ' y'ané'mɨn. ³⁵ Miich ajcxy mɨnaangɨxp co jactɨgoy'ɨjtnɨ jamɨdaax po' mɨna cosecha nyajpɨdɨcɨm. Oc-huɨnmay miich ajcxy, hɨch nmɨna'ñɨch, jëbɨ nyajpɨdɨcɨm yɨ cosecha cham cham. Huɨndɨcxɨcɨx yɨ mayjäy huɨdɨbɨ xyñɨgɨdaacɨm chooñ cajpjoty. Ni'ixɨ yɨ' ajcxy y'ity co amɨdo'idaangɨxy Dios y'ayuc. Jadu'n ajcxy nɨpaty nej tögɨ cosecha huɨdɨbɨ tɨ ymɨjaanɨ, jëbɨ nyajpɨdɨcɨm. ³⁶ E pɨnjaty cosecha yajpɨdɨcp ypaatyp ajcxy ymuju'ñ. Nañ tɨm jadu'n miich ajcxy huɨdɨbɨ myajmɨbɨjcy yɨ jäy ajcxy co hɨch je' je Cristo, mbaadɨpy ajcxy jotcuɨc'ajtm, etz huɨdɨbɨ ajcxy xymɨbɨjcpɨch xymɨjpɨdaacpɨch ypadamy ajcxy y'alma jugy'ajtm huɨdɨbɨ ca' ycɨxy ytɨgooy. Tɨm jadu'n nej je jäy ajcxy huɨdɨbɨ nɨip etz huɨdɨbɨ cosecha yajpɨdɨcp yjotcugɨyɨgɨxy mɨɨd co je cosecha tɨ y'ity, nañ tɨm jadu'n je jäy ajcxy huɨdɨ cojaay jecy'ajty jada Dios y'ayuc etz miich ajcxy jotcugɨyɨgɨxy aguɨpxy co yɨ jäy ajcxy xymɨjpɨdägyɨch. ³⁷ Paady tɨy'ajt je ayuc huɨdɨbɨ mɨnam: “Tög jäy nɨip etz jadög jäy cosecha yajpɨdɨcp.” ³⁸ Hɨch tɨ nguexyɨch miich ajcxy myajmɨbɨgɨpy jäy huɨdɨbɨ tɨ paady

Cristo ytiy'ajt ma Dios ñecy. Yi Dios y'ayuc ycojaaybi ti möy je jäy Dios ytiy'ajt, e miich ajcxy je' mbubedipy co myajmibigipy co ñich je' je Cristo.

³⁹ Mayjäy huidibi cogajpíp jim Samaria ymijpidac ajcxy je Jesús co je' je' je Cristo, miid co je töxyjäy anajty ti ymina'ñ: “Ti yi' xyajnimaydäyich tijaty ñich ti nduñich.” ⁴⁰ Co je samariajäy ajcxy yjädy ma Jesús yhuinduu, chi ajcxy cohuanñy huen hui'my. Chi Jesús jim yhui'mñy mejtz xi. ⁴¹ Janch mayjäy ooy nigi mibijcy mijpidacy Jesús, co je' je' je Cristo co ajcxy ci'm midomiydacy je Jesús. ⁴² Chi ajcxy nimay je töxyjäy:

—Canan jëyi co miich ti xyajnimäy ñich ajcxy, paady yci'xpí ñich ajcxy yam nmibicyich. Nañ ti ñich ajcxy yam ci'm n'amido'ityich, paady ñich ajcxy nejhuñy co janch jada yjējity je Cristo huidibi yajnidzögam yi naaxhuiñyjäy ajcxy y'alma ma Dios.

Jesús yajtzooc tüg gobierno mijtungmñdipi ymang

⁴³ Mimejtz xiibi anajty co Jesús chooñ jim, ñicxy jim Galilea. ⁴⁴ Jesús ci'm anajty ti ymina'ñ:

—Co jäy ajcxy huidibi miid Dios yhuij'ajt ycujc'ajt yajpaady ma yci'mgajp, ca' pin yajmij'adyii. ⁴⁵ Co Jesús yja'ty jim Galilea naaxjot, huidi anajty ajcxy jimip agujc jotcuyc ajcxy cöbijcy Jesús, com ti anajty ajcxy ijxcixy tijaty mijhuinma'ñ anajty ti tuñ jim Jerusalén xiijoty, com nañ ti je' anajty ajcxy jim y'oygixy xi'ajtpi.

⁴⁶ Chi yhuimbijty Jesús jadüg'oc jim Caná ma Galilea ñaaxjot, ma je nñ yajvinocojy. Jim Capernaum anajty tüg rey mijtungmñdipi huidibi anajty y'ung píjci'p. ⁴⁷ Co je' nejhuñy co Jesús anajty ti yhuimbity Galilea co anajty ti y 'oy Judea, chi ñicxy, e chi cohuanñy co Jesús huen ñicxy y'ung tzoyiyii huidibi anajty ögaanip. ⁴⁸ Huin'it Jesús ymina'ñ:

—Pen ca' ixypy ti m'ixy mijhuinma'ñ etz tijaty ijxpejt, ca' ixypy mmibicy.

⁴⁹ Chi y'adzoy je rey ymijtungmñdipi:

—Huindzin, tun may'ajt ñicx ñich n'ung ma ca'ni y'o'cyñi.

⁵⁰ Chi Jesús ymina'ñ:

—Huimbit ma mdijc, je m'ung jugy'ajtni je'.

Chi je yëdyjc mibijcy Jesús nej anajty ti ñimäyii, chi ñicxy jadüg'oc ma ytijc. ⁵¹ Ñicxnip anajty co ytumbi ajcxy oy yjijpcobadäyii, e chi ñimaayi co je' y'ung ti anajty y'agidägy.

⁵² Chi yaj'amidooy ajcxy ti hora anajty ti yhuaadjihuñy, chi ajcxy y'adzooy:

—Ixñy cujc yxi naxy je toyñ y'ixmajtzn.

⁵³ Paady je ungededy jihui'ñybijcy co huin'it je' jada' je tiempo co anajty Jesús ti ñimäyii: “Je m'ung jugy'ajtni je'.” Chi jada' mibijcy mijpidacy Jesús miid tüg'óciy jäy huidijaty anajty yajpat ma yjin ytijc.

⁵⁴ Je' je' je mimetzpi mijhuinma'ñ mij'oy'ajt huidibi Jesús ytun co chooñ jim Judea ñicxy jim Galilea ñaaxjot.

5

Jesús yajtzooc tüg jäy huidibi anajty yci' ytecy xuuxy

¹ Co jadu'n ytuni yajti jim Jerusalén anajty ajcxy judíojäy tungixy tüg mijxi. Huin'it Jesús jim ñicxy jim Jerusalén. ² E jim Jerusalén jim anajty nñ abojtzig y'ity, mihuington je poch aguu huidi xiijip puerta de las ovejas. Je it hue' anajty yajtijy hebreo'amy Betesda, e ymiid anajty migoox it yhuinguembetpa't. ³ Ma je huinguembetpa't mayba'mjäy anajty jim chachcöгнаaygixy; je huintzpi, ciducp tecytucpi, cixuxy tecyxuxypi, huidibi anajty ajcxy jim tzach'ahuijxp mina je nñ y'ocpu'xhuimbity. ⁴ Com tüg ángel anajty yhuimbety y'adijy ma je nñ abojtzig y'ity, chi je nñ yajyücx. E je jäy pinjaty anajty jayijp jüby nñijoty tigñyb co je nñ yücx, huin'it anajty ajcxy choocixy, oy ixypy ti pa'm ajcxy tim miidty. ⁵ Jim anajty tüg yëdyjc hue' anajty ti ypa'mgögnäy iipx majmocx tugñg jimijt. ⁶ Co Jesús ijxy jim ycögnäy, ijxajpy co anajty je' jecyip chachmijtacni, chi nimay:

—¿Nej mdzögambi?

⁷ Chi je pa'mjäy y'adzooy:

—Huindzin, ca' nmüididyich tüg yëydijc pin ñich xypidägiipy jüby nüjoty co anajty nüi y'ahuidijtcoty. E paady ycixpi co oy ñich jim njamechich ma yi nüi, ti huingbi ñitigiñi.

⁸ Chi Jesús ymíñañ:

—Pidig, yajpidig yi mmaabejt, etz tüyöychon.

⁹ Chi mic'amy choocy, chi je' ymaabejt yajpidigy ytigüy yöybi najxpi janch mic oy. Hue' anajty tüg sábado xü co choocy. ¹⁰ Paady je judíoñäy ixpicytije ajcxy nimay je huidibi anajty ti chögy:

—Hue' yam sábado xü, paady ca' jadu'n ñigo'aducyity jadu'n nej m'idich co mmaabejt mdzimhuidity.

¹¹ Chi y'adzooy je':

—Je jäy tübi ñich xyajtzögy, yi' ñich jadu'n ti xyñimäy: “Yajpidig yi mmaabejt etz tüyöychoon.”

¹² Chi ajcxy y'amidooy:

—¿Pin müich jadu'n ti xyñimäy: “Yajpidi yi mmaabejt etz tüyöychoon?”

¹³ Per je tübi anajty chögy, ca' anajty je' nejhüy pin je' anajty. Com ti anajty Jesús niyöydogooyñi ma je mayjäy huidibi anajty ajcxy jim tzachjajtíp ma je it. ¹⁴ Chi jada' jacomjocy minaybaatti Jesús jim ma Dios ytije, e chi Jesús ymíñañ:

—Cuentipic nej ti mdzögy, ca' ni ti bocy mjactunipy. Co pocy mjactunipy ca' yjegyity co tim nigü jibic nicxy mjaty.

¹⁵ Chi je yëydijc ñicxy oy je' yajnimäy je judío ixpicytije co hue' je' anajty Jesús, je huidibi anajty ti yajtzögyii. ¹⁶ Paady ycixpi je judío ixpicytije anajty tzach'ixhuidijtcixy tzachpahuidijtcixy je Jesús, e yaj'ogaangixy müid co anajty jäy ti yajtzögy sábado xü. ¹⁷ Chi Jesús ymíñañ:

—Ñich nDeedy tumb je' cham, ca' ypooocy, paady ycixp ñich nañ jadu'n nduñich cham ma müich ajcxy sábado xü.

¹⁸ Co Jesús jadu'n ymíñañ, paady ycixpi je judío y'ixpicytije ajcxy nigü yjactotma'tcoty, ytimy yaj'ögamy anajty aj y Jesús. Ca' ajcxy jadu'n yjotcujcity co anajty Jesús ca' cuyduñ judíoñäy ajcxy ytiy'ajt nej ajcxy sábado xü yajmij'ajtcixy, etz co jadu'n ymíñañ: “Dios yi' nDeedy'ajtypich.” Paady ycixpi ajcxy judío y'ixpicytije ymíñañ co Jesús ci'm anajty ytügihua'ñ müid Dios.

Dios ymooy je y'ung ymic'ajt

¹⁹ Chi Jesús ymíñañ:

—Janch janch ñich müich ajcxy yam jadu'n nimaaygixy co ñich Dios nDeedy'ajtypich. Ca' huaad ti nduñich müid ngi'mjot ngi'mhuinma'ñich. Jëbi janchtiy nduñich huidibi n'ixxpyich Dios Teedy ytumy. Huidibi Dios Teedy ytumyb, ndumybich com Dios yi' nDeedy'ajtypich. ²⁰ Com yi' Dios Teedy ooy yi' tzocy jihuñ yci'm'ung, paady xya-jni'ixiydaaybich tüg'óciy yi' huidibi ytumyb. E nañ xyajni'ixihuaambich jacmijjatypí mijhuinma'ñ, ca'ydi' jadayaabi mijhuinma'ñ nej ajcxy ti m'ixxycixy nej jada pa'mjäy ti chögy, paady ycixpi nigü mhuinmayipy ajcxy. ²¹ Jadu'n nej Dios Teedy yajjugypicy yi' o'cpi, e chi yajtzinäy jadüg'oc. Nañ jadu'n ñich anajty ndimymöhuamyb. ²² Com je Dios Teedy ca' je' ci'm ocyajciyöyaani ocyajtecyöyaani jäy ajcxy ypocy. Hue' tüg'óciy je ymic'ajt xyajcidiydaayich co ñich ndiydunipyich tüg'óciy naaxhuiñyjäy, com Dios nDeedy'ajtypich. ²³ Hue' tüg'óciy je ymic'ajt xyajcidiydaayich, jigix tüg'óciy jäy xyajmij'adipyich. Je jäy ajcxy huidibi ca' xyajmij'ada'ñich, nañ ca' ajcxy yajmij'ada'ñ Dios Teedy huidibi xyquejxich ya naaxhuiñ.

²⁴ Janch janch ñich müich ajcxy yam jadu'n nimaaygixy: Co hueñypinjäyity, pinjaty xy'amido'ijtibich n'ayuc, e ymibijcyp ymijpidacyp je tübi xyquejxyich ya naaxhuiñ, ymüid je'je y'alma jugy'ajtin huidibi ca'ycixipy ytigoyipy, e ca' Dios Teedy chaachytuna'ñyü müid

ypocy ycixpi. Hue' janchtiy co y'ögipy, chi janchtiy jadügtecy yjugypigipy. ²⁵ Janch janch ñich miich ajcxy jadu'n nimaaygixy co yi xii tiempo paatniy, e cham jedu'n ti paady, co yi jäy ajcxy tiibi y'o'ccixy ymidohuipy yi n'ayucich, co anajty ngapxyich, com Dios yi nDeedy'ajtpyich. Pin jäy anajty midoob n'ayucich jugypigip jadüg'oc ajcxy. ²⁶ Com yi Dios Teedy mic'ajt miid jëbi yajjugypicy jäy tiibi y'o'ccixy. Nañ Dios ti xymöyich ymic'ajt jëbi huaad nyajjugypicyich jäy tiibi y'o'ccixy, com Dios ñich nDeedy'ajtpyich. ²⁷ Ti Dios xymöyich ymic'ajt jëbi ndiyduñich je jäy ajcxy miid ypocy ycixpi, com ñich je' je jäy huidibi tzoön tzajpjoty. ²⁸ Ca' ooy jada ayuc tiy'ajt mhuinmaaygixy. Com ypaadipy je xii je tiempo co je huidijaty ajcxy yajpatp ma naaxtigiydac, ymidohuipy ajcxy n'ayucich co ñich anajty nmigapxyich ajcxy. ²⁹ Chi ypidzimipy ajcxy ma ñaaxtigiy. Je' ajcxy huidibi anajty oybi ti tungixy, jugy'adip ajcxy y'alma jadüg'oc. Je' ajcxy huidibi anajty jibicpi ti tungixy ypaadipy ajcxy tzaachypi miid ypocy ycixpi.

Dios tiy'ajt yejc co Jesús ymiid anajty mic'ajt

³⁰ Ca' ni ti huaad nduñich miid ngi'mmic'ajtich ngi'm'ayucich. Je ayuc tiy'ajt huidibi nmidooybich ma Dios Teedy, jada ayuc tiy'ajt miid nyajcüyöya'ñich nyajtecyöya'ñich jäy ajcxy ypocy. Jadu'n tiydudägy nduna'ñich, com ca' ñich nduñich ngi'mdzójcinich. Yi' ñich ndumyb nej Dios Teedy tzocy, yi huidibi xyquejxich ya naaxhuiñ. ³¹ Co ixypy ñich ci'm nayñigodiy'ajt'adyiijich, ca' ixypy miich ajcxy mmijpidägy n'ayuc ndiy'ajtich. ³² Com huingbi yi' huidi xyñigodiy'ajt'ajtpich co ñich Dios ymic'ajt nmüdidyich, e nejhuuybich co janch yi' huidibi xyñigodiy'ajt'ajtpich. ³³ Miich ajcxy ti mguexy je migügtijc ajcxy tiy'ajtpijcpi ma Juan. E je' yejc tiydudägy ayuc tiy'ajt janchypi pin ñich. ³⁴ Co jadu'n nmına'ñich co Juan xyajnidiy'ajt'atyich co ñich je' je Cristo, ca' jadu'n nmına'ñich co ooy ycopicyity co tüg jäy xyñidiy'ajt'adipyich. Com Dios ci'm xyñidiy'ajt'ajtpich. Jadu'n ajcxy nyajnimäy jada tiy'ajt, jigix ajcxy m'alma nidzoocin paadipy ma Dios. ³⁵ Je Juan mictägy ooy Dios y'ayuc najtzcapxiyi, jadu'n je' anajty nej tüg jin huidibi tixcp jajp, e miich ajcxy tüg jaxigy ti mxondaaccixy miid yi' y'ayuc ytiy'ajt. ³⁶ Nigi ñich Dios y'ayuc ytiy'ajt nmüdidyich ca'ydí Juan. Yi' mijhuinma'ñ huidibi ndumybich miid Dios Teedy ymic'ajt. yi' xyajnigüexigibich co ñich ya naaxhuiñ Dios Teedy xyquejxich. ³⁷ Yi' Dios Teedy tiibi xyquexyich, yi' ci'm yejc tiy'ajt co ñich je' je Cristo. E ni caminaabi miich ajcxy yi' mgamidohui ycapxin, nañ ni caminaabi miich ajcxy Dios Teedy yhuiñyijp maga'ixi. ³⁸ Ni ca' miich ajcxy mmüdidy yi' y'ayuc ma mjot mhuinma'ñ, miid co miich ajcxy ca' xymijpidägyich co ñich je' je jäy huidibi Dios ti quexy ya naaxhuiñ. ³⁹ Ijxtaaygixy jada tiy'ajt ma Dios ylibro, com jiiby mdiy miich ajcxy mbaadipy tiy'ajt nej jëbi ajcxy mjogy'adipy co anajty ti m'o'ccixy, e yi' Dios ylibro nañ ñich yi' xyñigapxp. ⁴⁰ E ca' miich ajcxy mgöbigaangixy ñich n'ayuc ñich ndiy'ajt, jigix ajcxy jugy'ajti mbaadipy huidibi ca' ycixy ytigooy.

⁴¹ Dios xycömayipyich, ca' ngöbigipyich co naaxhuiñjäy ajcxy xycömayipyich. ⁴² Nnejhuuybich, nej miich ajcxy mjot mhuinma'ñ mmüdidy, co ca' ajcxy Dios ytiy'ajt mguyduuni. Ca' ajcxy migüg mdzojccixy mjihuuygixy jadu'n nej Dios tzocy jihuüy jäy ajcxy. ⁴³ ñich ti nmiñich miid nDeedyich ymic'ajt. Miich ajcxy ni ca' xycöbicyich. Pen ji huingbi jäy ymiñ miid yci'mmic'ajt, ca' müdidy Dios ymic'ajt, je' janchtiy miich ajcxy ooy mijpidägaangixy. ⁴⁴ Ca' mjájtciixipy nej ñich miich ajcxy xymijpidägyibich, miid co ajcxy ci'm mdzachnaygömayáangixy ac miich ajcxy jëyi. E co ixypy miich ajcxy xycöbiga'ñich, huin'it ajcxy Dios xycömayipy. ⁴⁵ Ca' ajcxy nmına'nipy co ñich miich ajcxy nxihuaamy ma Dios Teedy yhuinduu. Je Moisés miich ajcxy yxihuaam ma Dios, je huidibi miich ajcxy mdzachmijpidaacip ytiy'ajt. ⁴⁶ Pen mmijpidaacyp ixypy ajcxy je Moisés y'ayuc ytiy'ajt, nañ jadu'n ixypy ñich miich ajcxy xymijpidägyich. Com Moisés ñich yi' xychachñimiydaacich ma yi' ñecy. ⁴⁷ Pen ca' mmijpidaaccixy Moisés ñecy, ca' mjájtciixipy nej ajcxy mijpidáaccixy ñich n'ayuc.

6

Jesús y moy jāy jicxy picxy migoox mil

¹ Co jadu'n ytuni yjajti, chi Jesús ñicxy jim Galilea mejy ninaxy, huídibi nañ jadu'n xiiip Tiberias mejy. ² Janch mayjäy anajty Jesús ypanicxyii axam co anajty ajcxy icy je mijhuinma'ñ tijaty anajty Jesús ytumyb ma mayba'mjäy. ³ Chi Jesús ypejty ma tüg cögop, chi jim y'ixtacy müid je' ydiscípulos ajcxy. ⁴ Tim huingonip anajty je pascuaxii huídibi anajty judíojäy ajcxy ytumyb. ⁵ Chi Jesús ijxy co janch mayjäy ti ypamiinyii, chi nimay Felipe:

—¿Ma jada' caayin uucin n'ocjuyim, ti nyajcaayim jada mayjäy huídibi ti xypamiinim?

⁶ Hue' anajty y'oc'ijxmadzamy nej Felipe y'oc'adzooy. Jesús anajty ñejhuuyb yajxon ti anajty ytunamy. ⁷ Chi Felipe y'adzooy:

—Ni ycahuaadihup mejtz mil peso meeñ, co icyipy ajt n'ocjuyaanim caayin uucin, e nmöhuaanim cijp tüg'aa cijp mejtz'aa jëyi.

⁸ Tüg Jesús ydiscípulo, hue' anajty yxii Andrés, Simón Pedro y'uch, je' jadu'n nimay Jesús:

⁹ —Cha tüg pi'c'anäg huídibi müid migoox cebada tzajcaagy, e mejtz acx ung. E ni ycatijity yi' yi migooxpi tzajcaagy, etz mejtz acx ung müid jada mayjäy.

¹⁰ Chi Jesús nimay je' ydiscípulos ajcxy:

—Yaj'ixtacta' yi mayjäy.

Miiyjot anajty ooy ma je it.

Chi ajcxy y'ixtactay. Hue' jada' anajty ajcxy ñaybadyii migoox mil ac yëydijctijc, abicy yi töxyjäydijc etz y'ung y'anäg ajcxy. ¹¹ Chi Jesús je tzajcaagy conigy, chi yajnajxy Dioscojuyip, chi yajnidagiiyday je jāy ajcxy huídijaty anajty jim iñaayb, mooy jadu'n nej pin tim tzocy je tzajcaagy etz je acx. ¹² Co je mayjäy cayday, chi Jesús nimay je' ydiscípulos ajcxy:

—Yajmujcta' ajcxy yi cayduc, ca'ydi huaad ni ti y'iyoy.

¹³ Chi ajcxy yajmujctay je cayduc, e yaj'ujch ajcxy majmetz mijjaty cach müid je tiiibi anajty yconaxy je migooxpi tzajcaagy. Je' anajty jadu'n ti yjacconaxy. ¹⁴ Co ajcxy y'ijxy je mijhuinma'ñ huídibi anajty Jesús ti tuñ, chi je jāy ajcxy ymíñañ:

—Janch jëdim jada je yëydijc huídibi Dios y'oy'ajt ymic'ajt müid, je huídibi anajty miinam ya naaxhuiñ.

¹⁵ Co Jesús nejhuuy co ajcxy anajty yajrey'ada'ñyii, chi jada' jadüg'oc huinhuäctuttay je mayjäy. Chi ñicxy naydüg ma tüg yuugjot.

Jesús yöy ñihuingíxy

¹⁶ Co oy chu'iiyñi, chi Jesús ydiscípulos ajcxy y'idaacni ma mejypa'. ¹⁷ Chi ajcxy ybarcotigiiy, ñicxy ajcxy jim Capernaum jadügpi mejypa'. E ti anajty ycoodziiyñi, e ca'ni anajty Jesús ajcxy ñihuimbidiini. ¹⁸ Chi tüg mijpoj ymiñ, chi je mejy ytigiiy oy yücxi. ¹⁹ Ti anajty ajcxy ytüyöy oy migoox tudujc kilómetro co ajcxy ijxy Jesús yhuingoñ ma je barco, hue' anajty ytüyöy mejyhuingíxy. Chi ajcxy ooy ñay'adzigiiyi. ²⁰ Chi Jesús ymíñañ:

—Ich yi', ca' mdzigiiyigxy.

²¹ Chi ajcxy jotcuje Jesús yajbarcotigiiy. Chi tim mic'amy ajcxy ymejch jim ma mejypa' ma anajty ajcxy ñicxcixy.

Mayjäy ixtaay Jesús

²² Je mayjäy huídibi anajty ajcxy ti yhui'miiy jim'amy y'ahuin, y'ijx ajcxy co ac jëyi Jesús ydiscípulos ajcxy ytigiiy ma tüg barco, e Jesús ca' anajty ti ytigiiy barcojoty müid je' ajcxy. Ac jëyi anajty ajcxy ti choongixy barcojoty. ²³ Je com jabom nijejty barco huídibi anajty jim tzomb Tiberias, ti anajty yjädy mihuingon ma je it, ma anajty Jesús ti yajcaagyixy je mayjäy müid je Huindzin Dios ymic'ajt, huin'it co Dios miijctzoy. ²⁴ Chi je mayjäy ajcxy

ijxy co ca' anajty jim Jesús, ni ca' anajty jim je' ydiscípulos ajcxy. Chi ajcxy ybarcotigiyday, chi ajcxy oy ixtaaygixy Jesús jim Capernaum.

Jesús ymōhuamy jāy ajcxy jugy'ajtin huídibí ca' ycixipy ytigoyipy

²⁵ Co ajcxy minaybaati Jesús me jy ñinaxy, chi ajcxy nimay:

—Huindzin, ¿mína miich ya ti mmiñ?

²⁶ Chi Jesús y'adzooy nimay je mayjāy ajcxy:

—Janch janch co ñich miich ajcxy yam jadu'n nimaaygixy co miich ajcxy xy'ixtaaybich, canan yí' ycixpi co ajcxy ti m'oc'ixy yí' mijhuinma'ñ huídibí ti nduñich, paady ycixpi miich ajcxy xy'ixtāyich co ajcxy nyajcay cūxyi mīd tzajcaagy.

²⁷ Chi Jesús yjacmīnañ:

—Ca' myajjotmaygojcixy yí' jīcxy pīcy huídibí cīxp tigooyb. Yí' janchtiy mijottigooygixy yí' jīcxy pīcy huídibí xymōhuipy yí' jugy'ajtin huídibí ca' ycixipy ytigoyipy tüccí'yí. ñich miich ajcxy je jugy'ajtin nmōhuibich huídibí ca' ycixipy ytigoyipy tüccí'yí, com ñich je' je jāy huídibí tzoon tzajpjoty, e Dios Teedy xymic'ajtmooyich, jēbī ñich miich ajcxy nmōy jugy'ajtin huídibí ca' ycixipy ytigoyipy tüccí'yí.

²⁸ Chi ajcxy nimay Jesús:

—¿Ti ñich ajcxy jēbī huaad nduñ, nej jēbī ñich ajcxy Dios xymijotcuyc'aty?

²⁹ Chi Jesús y'adzooy:

—Dios chojcpy co miich ajcxy xymibicyich, com Dios xyquejxich ya naaxhuiñ.

³⁰ Chi ajcxy nimay Jesús:

—¿Ti ijxpejt mdunamy mīd ñich ajcxy, jēbī ñich ajcxy n'ixipy Dios ymic'ajt etz ñich ajcxy nmībigipy co miich je' je Cristo? ¿Ti mijhuinma'ñ mdunamy? ³¹ ñich ajt nmij'ap nmijteedy ajcxy jecy'ajty yjīcxy pīc ajcxy je maná jim ma tītznaax'it. Jadu'n ymīñ jaybety ma jadu'n ymīna'ñ: “Dios yejcpy jīcxy pīcy huídibí tzoon tzajpjoty.”

³² Chi Jesús y'adzooy:

—Janch janch ñich miich ajcxy yam jadu'n nimaaygixy co canan je' je' je Moisés huídibí miich ajcxy xymooyb je jīcxy pīcy janchypí huídibí tzomb tzajpjoty. ³³ Je jīcxy pīcy huídibí Dios yejcpy huídibí tzomb tzajpjoty, je' je' huídibí jugy'ajtin moy je naaxhuiñy-jāy huídibí ca' ycixipy ytigoyipy tüccí'yí.

³⁴ Chi ajcxy nimay Jesús:

—Huindzin, ñich ajcxy mooyg je jīcxy pīcy janchypí jabom jabom huinixī.

³⁵ Chi Jesús ymīnañ:

—Ñich jēdu'n je jīcxy pīcy huídibí miich ajcxy xymōhuip jugy'ajtin huídibí ca' ycixipy ytigoyipy tüccí'yí. Co jāy ajcxy xyñimiinich, e xymijpidāgyich, huin'it ca' yí' ajcxy yubōccoda'ñyīi nimīnaxī, e co jāy ajcxy xymibicyich, ca' yí' ajcxy ytidzihua'ñyīi nimīnaxī.

³⁶ Com ti ñich miich ajcxy nīmāy, oy ñich miich ajcxy ti xyja'ijxycixy, per ca' mībijccixy.

³⁷ Tüg'ócīy pīnjaty ñich nDeedy yquexyp ma ñich, xyñimimbich yí' ajcxy. E pīnjaty xyñimimbich etz xymijpīdaacpīch, ca' ñich yí' ajcxy n'ixtīy. ³⁸ Canan paady ycixpi ñich ti ndzooñ tzajpjoty ngīdāgīch ya naaxhuiñ co nduna'ñich ngī'mhuinma'ñ. Hue' janchtiy yí' ndunaamyich nDeedyich y'ayuc ytiy'ajt, com yí' xyquejxich ya naaxhuiñ. ³⁹ Yí' jadu'n tzojcp ñich nDeedy huídibí xyquejxich ya, co ñich ca' ni pīn nyajtigoyipyich, yí' huídijaty xymooybich. Hue' janchtiy yí' ajcxy nyajjugypīgīpyich jadüg'oc co anajty naaxhuiñybi ti yhuaad'ajtni mīna ytigadzīpy. ⁴⁰ Dios Teedy ti xyquexyich ya naaxhuiñ e yí' jadu'n tzojcp co pīn jāy ñich anajty xy'ijxpīch, e xymijpīdaacpīch, ymīd'adīpy je' ajcxy jugy'ajtin huídibí ca' tüccí'y ycixipy ytigoyipy. Hue' janchtiy nyajjugypīgīpyich ajcxy jadüg'oc co anajty je naaxhuiñybi ti yhuaad'ajtni mīna anajty ytigadza'ñ.

⁴¹ Chi je judío jāy ajcxy ooy yajtzībīy yajcapxīy co anajty Jesús jadu'n ti ymīna'ñ: “Ñich je' je jīcxy pīcy huídibí tzoon tzajpjoty.” ⁴² Jadu'n anajty ajcxy chachmīna'ñ:

—¿Nej ca' je' yjadaajity je Jesús, je José y'ung, je huídibi ajt ytaj yteedy n'ixy'ajtim? ¿Nej co jadu'n ymína'ñ: “ñich ti ndzooñich tzajpjoty”?

⁴³ Chi Jesús y'adzooy:

—Ca' myajtzibíygyxy myajcapxíygyxy ac miichiy ajcxy. ⁴⁴ Ni pin jáy xycaniminípyich, pen ca' jayijp Dios Teedy huinma'ñ ymóyii co xymijpidägibich. E co xymijpidägibich, chi nyajjugypigípyich jadüg'oc co anajty naaxhuiñbyi ti yhuaad'ajtni mína ytigadzípy. ⁴⁵ Com jadu'n ymíñ jaybety ma Dios ñecy huídibi je jáy ajcxy anajty Dios ytiy'ajt míd huídibi jecy'ajty yjaay co Dios yaj'ixpigamy je jáy ajcxy tüg'óciy. Paady ycipxi tüg'óciy jáy huídibi midoob Dios y'ayuc etz y'ixpijcp Dios ytiy'ajt xymijpidägibich ajcxy.

⁴⁶ Ca' ni tüg jáy ti ixxy yí Dios Teedy. Jéyi je jáy tügpaic huídibi ti choñ ma Dios, yí je' ti ixxy yí Dios. ⁴⁷ Janch janch ñich miich ajcxy yam jadu'n nimaaygíxy co pinjaty xymibijcpich xymijpidaacpich, ymíd yí' ajcxy yjugy'ajtin huídibi ca' ycipípy ytigoyípy tüccí'yí. ⁴⁸ ñich jédu'n je jicxy pícy huídibi jugy'ajt mooyb je jáy huídibi ca' ycipípy ytigoyípy tüccí'yí. ⁴⁹ Miich ajcxy mmij'ap mmijteedy yjicxy'ajti ycaagy'ajti ajcxy je maná jim títznaaxtuum'it jecy'ajty. E chi ajcxy y'o'ctay. E ni ca' ajcxy jugy'ajtin paty huinixíbi. ⁵⁰ Je jicxy pícy huídibi nnigapxypich huídibi tzoon tzajpjoty, co jáy ajcxy jicxípy, ymíd'adípy ajcxy je jugy'ajtin huídibi ca' ycipípy ytigoyípy tüccí'yí. ⁵¹ ñich jédu'n je jicxy pícy huídibi ti choñ tzajpjoty, etz ti ycidägy ya naaxhuiñ huídibi jugy'ajtin yejcp. Co jáy ajcxy jicxyp je jicxy pícy, ymíd'adípy ajcxy je jugy'ajtin huídibi ca' ycipípy ytigoyípy tüccí'yí. Je jicxy pícy huídibi nyegaamyich míd naaxhuiñjáy ajcxy ycipxi, je' je' je nninícxich.

⁵² Chi je judío y'ixpijtyic ajcxy ooy yaj'ayucyooñ yajcapxyooñ, ac je'yí ajcxy ñayñimáayigíxy:

—¿Nej jada yéydíjc tíjy yí' ñinícx njicxy'ajtim?

⁵³ Chi Jesús ymína'ñ:

—Janch janch co ñich miich ajcxy yam jadu'n nimaaygíxy, pen ca' miich ajcxy mdzüdzcíxy ñich nninícx, e pen ca' m'uuccíxy ñich nni'py, ñich je jáy tügpaic huídibi tzoon tzajpjoty, ca' miich ajcxy míd'adípy yí Dios yjugy'ajtin. ⁵⁴ Com pinjaty ñich nninícx xychu'tzíp etz ñich nni'py xy'uucibich, ca' je ajcxy yjugy'ajtin ycipípy ytigoyípy tüccí'yí, oy ajcxy yja'o'ccíxy. Nyajjugypigípyich je' ajcxy jadüg'oc co anajty naaxhuiñbyi ti yhuaad'ajtni mína ytigadzípy. ⁵⁵ ñich nninícx janchypi jicxy pícy yí', etz ñich nni'py janchypi ügy yí'. ⁵⁶ Co yí jáy ajcxy xymibicyich xymijpidägyich jadu'n ni paady nej jihuíy ñich nninícx xychüdzí, etz ñich nni'py xy'uuci. Chi y'idípy ajcxy huinixí ma ñich, etz ñich n'idípyich huinixí ma je' ajcxy. ⁵⁷ Dios Teedy huídibi xyquejxich ya naaxhuiñ ymíd jugy'ajtin huídibi ca' ycipípy ytigoooy. ñich ti nbaadyich ma Dios Teedy je jugy'ajt huídibi ca' ycipípy ytigoooy. Nañ mbadamy miich ajcxy jugy'ajtin huídibi ca' ycipípy ytigoooy ma ñich. Co miich ajcxy xymijpidägibyich, jadu'n anajty nipaady nej jihuíy mjicxy'ajtigíxy ñich nninícx. ⁵⁸ Je jicxy huídibi tzoon tzajpjoty, e ycidacy ya naaxhuiñ co jáy ajcxy jicxy'adyii, yajtzinähuiñ je ajcxy, ca' ajcxy yjugy'ajtin ycipípy ytigoyípy tüccí'yí. Yí mmij'ap mmijteedy huídibi jicx'ajtigíxy je maná jecy'ajty, o'ctay ajcxy, ca' ajcxy paty je jugy'ajtin huinixíbi.

⁵⁹ Jadu'n Jesús ymíydacy jim ma je judío jáy ajcxy ñaymujctac jim Capernaum co anajty jim yaj'ixpijty.

Mayjáy ca' mijotcujc'ajty Jesús y'ayuc

⁶⁰ Co ajcxy Jesús y'ayuc mídodaayi, nigujc-huäcxy je huídibi anajty ixpijcp ma Jesús. Chi ajcxy capxpídzímy, e jadu'n ajcxy ymína'ñ:

—Ooy chachchipity je Jesús y'ayuc. Ca' huaad ji pin huinjihuíyday.

⁶¹ Com Jesús ñejhuíyb nej ajcxy anajty yajtzibíy yajcapxíy, chi ymína'ñ:

—¿Nej ca' miich ajcxy mijotcuyc'aty je tzip ayuc jadu'n nej cham ajcxy ti nyajnimäy?
⁶² ¿Nej xymijpidägbich ajcxy, pen m'ixpy ixypy ajcxy co anajty nba'ttigiyich jadüg'oc
 jiiby tzajpjoty ma ndzooñich? Com ñich je' je jäy huidibi tsoon tzajpjoty. ⁶³ Je jäy ajcxy
 yjihu'iñ, yí' je' ñinicx yajjugy'ajtíp, e je jäy ajcxy ninicx ca' yí' ni ma chobaady, pen ca'
 m'idity yjihu'iñ. Co miich ajcxy mgöbigipy yí' ayuc tibi ngapxyich, huin'it ajcxy mbaadipy
 Dios yjihu'iñ (je Espíritu Santo), etz mbaadipy ajcxy jugy'ajtin huidibi ca' tücci'yí' ycixy
 ytigooy, oy mja'o'ccixy. ⁶⁴ Per nigujc-huäcxy ma miich ajcxy pinjaty ca' mibicy ñich n'ayuc.

Com Jesús ñejhuñyb anajty jayijpni pinjaty ca' ymibigyii y'ayuc, etz pinjaty anajty
 cïyegaanip ma ymidzip. ⁶⁵ Chi Jesús yjacmíañ:

—Paady ycixpi jayijp ti mñina'ñich, co ca' ni pin jëbi ñich xymijpidägy, pen ca' Dios Teedy
 jayijp yhuinma'ñ ymöyii co cöbiga'ñ ymöyii co cöbiga'ñ ñich n'ayuc.

⁶⁶ Huin'it mayjäy ajcxy, je huidibi anajty ixpijcp ma Jesús, chi ajcxy huinhuäctut
 ixmajtzní ajcxy Jesús. Ca' ajcxy y'ocjacpanicxni. ⁶⁷ Chi jada' Jesús nimay je nimajmetz
 discípulos ajcxy:

—¿Nej nañ xy'ixmadzaambich miich ajcxyí'?

⁶⁸ Chi y'adzooy Simón Pedro:

—Huindzin, ca' jac ni pin ñich ajcxy jëbi huaad nmijpidägyich, com miich tügpajc m'id
 je ayuc huidibi xyajni'ixiyich ajcxy nej jëbi huaad ñich ajcxy nbaadipy jugy'ajtin huidibi
 ca' ycixipy ytigoyipy tücci'yí'. ⁶⁹ ñich ajcxy nmibijcypich e nnejhuñybich co miich je' je jäy
 huidibi tsoon ma Dios huidibi huädz yhuinma'ñ ym'id.

⁷⁰ Chi Jesús ymíañ:

—Miich ajcxy je' ti nhuin'ixyich nimajmetzpi, e nidügti miich ajcxy mujcu' huinma'ñ
 mm'idity.

⁷¹ Je Judas Iscariote, Simón ymang, anajty ytijpy. Com je' je' anajty cïyegam Jesús ma
 ymidzip, oy je' anajty yajjëjity nidüg ma je nimajmetzpi.

7

Jesús y'uch ajcxy nañ ca' anajty jaty mijpidaaci Jesús y'ayuc

¹ Co jadu'n ytundaayi yjajtaayi, jim anajty Jesús yhuidity Galilea naaxjot, ca' anajty
 ñicxa'ñ jim Judea naaxjot, co anajty yí' judíojäy ajcxy huidibi midzip'ajtíp yaj'öga'ñyíi.

² Tim huington anajty je judíojäy yxíi, hue' anajty ajcxy yxigoyäxy Tabernáculo xíi. ³ Chi
 Jesús ñimaayi y'amigüg y'uch yëydijcpi:

—Tzon miich ya, nicx jim Judea naaxjot nayguëxigíi mayjäyjoty. ⁴ Com huenpinity
 huidibi nayguëxígaanip mayjäyjoty, ca' ajcxy naygoyüchyíi. Mdunipy miich mijhuinma'ñ
 xíijoty, jigix je mayjäy xycömayipy.

⁵ Ni Jesús y'amigüg ajcxy ca' anajty yjaty ymijpidägyii y'ayuc. ⁶ Paady Jesús y'adzooy:

—Ñich nxíi ndiempo ca'ni paty mña ndigíhua'ñich jim Jerusalén jadu'n nej je Mesías.
 Janch miich ajcxy oytimymínaajity jëbi mnayguëxícigixy ma je mayjäy ajcxy. ⁷ Ca' huaad
 jëbi miich ajcxy, naaxhuiñyjäy ajcxy, xymidziptzoñ. Janch ñich xymidzip'ajtpich ajcxy
 yí', je' co ngapxpídzimyich yí' yjibic-huinma'ñ huidibi ajcxy ytumyib. ⁸ Nicx miich ajcxy
 jim ma xíi yjadyíi. ñich ca' nñicxa'ñich cham, com ca'ni ñich ndiempo yhuaad'aty mña
 ndigíhuibyich jim Jerusalén jadu'n nej je Mesías.

⁹ Jadu'ñydi jëda'ajty ymíañ, chi yhui'míy jim Galilea.

Jesús ñicxy jim Jerusalén xíijoty

¹⁰ Co Jesús y'amigügtijc ajcxy jayijp ñicxtay xíi'ajtpi jim Jerusalén, chi Jesús nicxy nañ
 jadu'n ayüch ameech ma anajty xíi yjadyíi. ¹¹ Xíijoty je judíojäy ooy ajcxy ja'ixtay Jesús, e
 chi ajcxy ymíañ:

—¿Ma jada' je Jesús?

¹² Ma je mayjäy ajcxy may anajty ajcxy tzachnigapxcixy tzachnimiydaaccixy Jesús. Nijëjity anajty ymînaangixy: “Tüg yëydijc oyjäybi yi’”; e nañ nijëjity ymînaangixy: “Ca’p yi’ y’oyjäyity, nigo jäy tzachhuin’iñ.”

¹³ E ni pin anajty ca’ capxpîdzîmy mayjäyjoty co y’oyjäyity anajty Jesús, mîd co anajty ajcxy je judío ixpicytîjc ajcxy tzachtzigîygixy.

¹⁴ E mijxîjoty Jesús ñicxy jim ma Dios ytîjc, chi jim ytîgîy yaj’ixpîjci. ¹⁵ Je judío y’ixpicytîjc tzachmaañyhuindîxcixy anajty je Jesús, chachmînaangixy anajty:

—¿Nej jada’ tijy jada chach’ixpicyity? e ca’ ni ma ti y’escuel’aty.

¹⁶ Chi Jesús y’adzooy:

—Jada ixpîjcin ca’ ñich jada një’adyii. Yi’ jada yje’ je huîdibi xyquejxich ya naaxhuiñ.

¹⁷ E pen ji pinjaty cuydunaanî yi’ ytîy’ajt je huîdibi xyquejxich, huînjihuîhuîpy yi’ jada ixpîjcin, pen janch Dios yi’ ytîy’ajt, o pen ñich yi’ ngî’m ayuc huîdibi ngapxypich. ¹⁸ Je jäy huîdibi yci’m’ayuc yci’m’diy’ajt mîd yaj’ixpîcy, ci’m je’ ñaygômaya’ñyîi. Janch pinjaty tzojcp co ycômâyîyb je’ yhuîndzin huîdibi ti yquexyîi, tiydudägy je’, ca’ je’ y’anîjity.

¹⁹ Janch co Moisés miich ajcxy xymoy Dios ytîy’ajt. E ni tüg miich ajcxy mgacuydungixy je tiy’ajt. ¿Ti ycîxpi co miich ajcxy xyaj’ög’a’nich?

²⁰ Chi je jäy ajcxy y’adzooy:

—Mujcu’ miich mîd ma mjot mhuînma’ñ. ¿Pin miich yam xyaj’ög’am?

²¹ Chi je’ ajcxy nimay:

—Mîd tügpajc mijhuînma’ñ tiibi nduñich sábado xîi, yi’ miich ajcxy mij mdzachjihuîyb mdzachhuînmaayb. ²² Moisés miich ajcxy xyajnajtz’ane’mîy je cõtujcin co ajcxy m’ung mdiy’ajttîygixy (oy je’ ca’ yajtzondac, miich janchtiy ajcxy mmîj’ap mmîjteedy Abraham yajtzondac), e paady ycîxpi miich ajcxy m’ung mdiy’ajttîygixy oy yjapocxxîidumity.

²³ E chi jada’ ca’ydi miich ajcxy Moisés ytîy’ajt mnîxiici myajxiici, paady ajcxy m’ung mdiy’ajttîygixy oy sábado xîijoty. ¿Ti miich ajcxy co xymîjotma’tcîxich co tüg jäy ti nyajtzögyich sábado xîijoty? ²⁴ Ca’ m’ix’ijxcixy mba’ijxcixy mmîgüg mîd anîi. Yajcîyöyi yajtecyöyi miich ajcxy jäy ypocy mîd tiy’ajt.

Ooy ajcxy tzachhuînmay je jäy, penî Jesús je’ je’ anajty je Cristo

²⁵ Chi ajcxy nijëjity Jerusalénjäy ymînañ:

—¿Nej ca’ jada jada’ yjëjity je huîdibi ajcxy yjayaj’ögamyi? ²⁶ Oc’ix ajcxy, ta ycapxy ymiydägy îxna’ que’xna’, e ca’ ajcxy huam nimäy. ¿Nej ti jada ajcxy îxcajpcixy yajxon tungmîdpi ajcxy co jada yjëjity je Mesías? ²⁷ ñich ajt nnejhuîyim ma jada yëydijc chooñ. Per je Cristo co anajty je’ ymiñ, ni pin je’ canejhuîhuîpy ma je’ anajty choñ ma ycogajpity.

²⁸ Co Jesús jadu’n mîdooy, co anajty yaj’ixpîcy ma Dios ytîjc, huîn’it Jesús mîc ymînañ:

—Mnejhuîyb miich ajcxy pin ñich, e ma ndzooñich. Per ca’p ñich ti nmiñich ya naaxhuiñ mîd ñich ngî’m’dzojcin. Yi’ huîdibi ñich ti xyquexyich, tiydudägy yi’ ytuñ, e ca’ miich ajcxy yi’ m’ixy’ajtîygixy. ²⁹ ñich janchtiy n’ixy’ajtypich je’. Je’ co jim ndzooñich ma je’, e je’ ñich xyquejxich.

³⁰ Huîn’it ajcxy jamadzaañ, per ca’ ni pin cîñîxajîy, com ca’ni anajty paady je xîi je tiempo mîna ñaygîyegîyb ma ymidzip ajcxy. ³¹ Per mayjäy ooy mîbijcy je Jesús y’ayuc, e ymînañ ajcxy:

—Co anajty je Cristo ymiñ, ca’ jada’ nîgi mijhuînma’ñ tuna’ñ ca’ydi jadyaabi yëydijc.

Je teedy mîjtungmîdpi yquejx ajcxy soldadotîjc huen majtcixy Jesús

³² Co je fariseojäy ajcxy ayuc mîdooy co jäy chachmînaangixy jadu’n co je Jesús je’ je’ je Cristo, chi ajcxy quejxy tungmîdpi huen Jesús yajmach. ³³ Paady Jesús ymînañ:

—ñich jac-huäcxîjpcich hueeni ma miich ajcxy, chi nñicxa’ñich jadüg’oc jîiby tzajpjoty ma huîdibi xyquejxich. ³⁴ Xy’ixtâhuîbich miich ajcxy, e ca’ ñich miich ajcxy xypaadîpy. Ma anajty ñich nñicxyich, miich ajcxy ca’ jaydëbi jîiby mñicxcixy.

³⁵ Huîn’it je judíojäy ixpicytîjc acjëyi ajcxy ñay’amîdoohui:

—¿Ma jada jada' y'ocnicxa'ñ, e nicxy iich ajt ngapaatim? ¿Nej nicxiib jada' ma je judíojäy ajcxy huídibi yajpaatcixy yxi yaa ma yi griegojäy ajcxy, e yaj'ixpigaangixy yi griegos ajcxyi? ³⁶ ¿Nej jada' yajhuimbizimy? co ymina'ñ: “Xy'ixtahuibich miich ajcxy, e ca' xypaadibich, e ma anajty iich nyajpaady, ca' miich ajcxy jaydebi jiiby mnicxcixy.”

Je nã huídibi jugy'ajt yejcp huídibi ca' ycixy ytigoy

³⁷ Co je mijxi ycodicxni, chi Jesús ytinay'ahuiy, chi mic ymina'ñ:

—Pen ji pinjaty tiy'ajt nejhuihua'ñ jadu'n nej ixypy jäy ytidziyii tzocy yi nã, huen xyñimiiñich, etz nmöhuibich tiy'ajt. ³⁸ Je jäy ajcxy pinjaty xymibijcpich xymijpidaacpich, ytunipy ajcxy jadu'n nej Dios ñecy ymina'ñ ma jadu'n yjaybetyity: “Ycapxypidzimipy je' ajcxy Dios ytiy'ajt, etz mayjäy jotcuyc'ajtin etz jugy'ajtin pada'ñ huinixi, ytimyñipaaty jadu'n nej nã ypidzimy janch com ma tüg niigop.”

³⁹ Je' anajty jadu'n Jesús ytiyyp pinjaty je' anajty mibijcip, je' anajty ajcxy adigihuaanip jottigihuaanip je Espíritu Santo. Ca' ni anajty je Espíritu ymini ma je discípulos ajcxy com ca'ni anajty Jesús yhuimbityñi tzajpjoty.

Jäy ajcxy ca' ñay'ayuc-huinjihuüy mäd Jesús ycixpi

⁴⁰ Je mayjäy ajcxy huídibi anajty ti midooy nej Jesús anajty ti ymina'ñ, nidüg nimetz ymina'ñ:

—Jadaabi je' je tiydudägypi jäy huídibi Dios y'ayuc najtzcaxiyip.

⁴¹ Jacjadyii ymina'ñ ajcxy:

—Je' yi' je Mesías.

Per nijëjity ajcxy huídibi ca' ymibijccixy chachminaangixy:

—Ca' jim Galilea naaxjot chona'ñ je Mesías. ⁴² Com jadu'n yjaybetyity ma Dios ñecy co je Mesías jim chona'ñ ma David y'ap y'oc, jim ma je cajp huídi xiijip Belén ma David ycogajpity.

⁴³ Je mayjäy ca' anajty ajcxy ñay'ayuc-huinjihuüygyxy mäd Jesús ycixpi. ⁴⁴ Nijëjity anajty ajcxy ytimymadzamy Jesús, per ca' ni pin ymajtzi.

Judío ixpicytjic ca' ajcxy mijpidacy Jesús

⁴⁵ Chi ajcxy policías huídibi tumb ma tzajptjic nihuimbijty ajcxy je teedy mijtungmädpi etz je fariseojäy ajcxy, chi ajcxy ñimaayi:

—¿Nej ajcxy co ca' ti mmajtzcixy je Jesús?

⁴⁶ Chi ajcxy je' y'adzooy:

—Nicaminaaxi tüg yëydjic jadu'n ti ymydägy jadu'n nej yijibi yëydjic.

⁴⁷ Chi je fariseojäy ajcxy ymina'ñ:

—¿Nej nañ ti miich ajcxy myajhuin'ñinixy? ⁴⁸ Ca' nminaanim ti ajcxy teedy mijtungmädpi o fariseojäy ajcxy mibijccixy Jesús. ⁴⁹ Je mayjäy huídibi mijpidaaci Jesús y'ayuc, ca' ajcxy y'ixpicyity ma Dios ycötujcin. Dios yi' ajcxy tzaachytunib.

⁵⁰ Nidügti ajcxy je' anajty je Nicodemo huídibi oga'n'aty ni'oy Jesús coodz, je' ymigügtjic jadu'n nimay:

⁵¹ —Jadu'n iich ajt ngötujcin xy'ane'mim co ca' huaad ndzaachytuunim pinjäy, pen ca'p jayjip n'ixyöyim nbayöyim ti anajty ti tuñ.

⁵² Chi ajcxy ymigügtjic y'adzohuimbijty oyñinej:

—¿Nej miich nañ jadu'n galileojäyi? Ixta' yajxon ma Dios ñecy, com jiiby mnejhuihuipy co jim Galilea ca' jim chona'ñ pinjäy huídibi Dios y'ayucnajtzcaxiyip.

⁵³ Chi ajcxy ñicxtay nidüg nidüg ma yjin ydjic.

8

¹ Chi Jesús ypa'ttigüy ma je cögop huídibi xiijip Olivos. ² Com jabom jopyñi Jesús yquidacy jadüg'oc ma Dios ytjic. Chi mayjäy ñimiini. Chi y'ixtacy, e chi ytigüy yaj'ixpjcpi.

³ Je jāy ajcxy huídibi Dios ycötujcín yaj'ixpijcp etz je fariseojāy ajcxy m̄idmiiñ tūg töxyjāy ma Jesús huídibi anajty ti ytundigooy m̄id huingbi yēydijc. Chi ajcxy pidacy cujc'amy ma je mayjāy. ⁴ Chi ajcxy nimay Jesús:

—Huindzin, jadaayaabi töxyjāy huingbi yēydijc m̄id ti ytundigoy. ⁵ Moisés ytiy'ajt ñch ajcxy xyñajtz'ane'miy jecy'ajty co yajtzaagögädziipy jada jadu'mbi töxyjāy. ¿Nej miich m'ocminambi?

⁶ Jadu'n ajcxy nimay co anajty ajcxy oc-huinma'ñ'ixa'ñ. Hue' anajty ajcxy ixtaayb nej jēbi huaad yajpocycāy Jesús. Chi Jesús yhuindacy, chi jada' ytiñiy jaaybi m̄id ycihuāx naaxcīxy. ⁷ Com je' anajty ajcxy chachyaj'amidooyb, chi Jesús ytinayigy. Chi ajcxy nimay:

—Pín jāy ji ma miich ajcxy ca' ti pocy m̄idity, huen yi' jayijp tzaagäch jada töxyjāy.

⁸ Chi Jesús yhuindacy jadüg'oc. Chi ytiñiy jaaybi jadüg'oc naaxcīxy. ⁹ Co ajcxy jadu'n ayuc yajhuinjihuیداای, chi ajcxy ooy chöyduñ, com yjihuiy ajcxy ypocy. Chi ajcxy yjihüactay. Chi je mijjāydiy ajcxy ñaybattzundayi. Jesús yhuim̄iy nimetz m̄id je töxyjāy huídibi jim anajty tinaayb huingon. ¹⁰ Chi Jesús yhuäccugiy jadüg'oc nimay je töxyjāy jada':

—¿Ma ajcxy je jāy? ¿Ca' ni pín ti xychaachytuñ m̄id mbocy ycixpi?

¹¹ Chi je töxyjāy y'adzooy:

—Huindzin, ca' ni pín.

Chi Jesús yminañ:

—Ni ñch miich ngatzaachytunipy m̄id mbocy ycixpi. Nicx, e ca' m'ocjacpocytuunip.

Jesús jadu'n nipaady nej tūg jin huídibi t̄icxp̄i

¹² Chi jadüg'oc Jesús yjactigiy miydacp yminañ:

—Ñich je tiy'ajt nm̄id ya ma naaxhuiñyāy, jadu'n ñch nipaady nej tūg jin huídibi t̄icxp̄i ma jāy ajcxy. Pínjāy xymijpidaacp̄ich ym̄id tiy'ajt nej jēbi huaad tudāgy chināhuipy, jadu'n nipaady nej jihuiy ytüyöy ma jin yt̄icxin.

¹³ Chi je fariseojāy ajcxy nimay Jesús:

—Miich ci'm nayñidiy'ajtip co miich je' je Cristo, e ca' mdiy'ajt chobaady.

¹⁴ Chi Jesús y'adzooy:

—Janch co ñch ci'm nayñidiy'ajt'adyiijich co ñch je' je Cristo. E ñch ndiy'ajt janch yi'. Com nnejhuñyibich ma ti ndzooñich, e ma nnicxa'ñich. E miich ajcxy ca' mnejhuñyigixy ma ndzooñich, e ma nnicxa'ñich. ¹⁵ Miich ajcxy mm̄igüg mbocy'ijxyp m̄id mḡi'mhuinma'ñ. Ca' ni pín nbocy'ixyich m̄id nḡi'mhuinma'ñich. ¹⁶ Pen ñch anajty nyajciyöybich nyajtecyöybich jāy ypocy, tiydudāgy anajty jadu'n nduñich. Com ñch ca' nyajpaadyich naydüg. Je' xym̄id'ijtp̄ich je Dios Teedy huídibi ti xyquexyich. ¹⁷ Com cojaay jadu'n y'ity ma miich ajcxy mgötujcín ñecy: “Pen nimetz jāy nigodiy'ajt'aty huentiijity, tzoobatp ajcxy y'ayuc.” ¹⁸ Ñich ci'm ñayñidiy'ajt'adyiijich co ndzooñich tzajpjoty, etz nDeedyich nañ jadu'n xyñidiy'ajt'ajtp̄ich, co je' ya ti xyquexyich.

¹⁹ Chi ajcxy y'amidooy:

—¿Ma miich mdeedy yajpaady?

Chi Jesús y'adzooy:

—Com co ca' ñch miich ajcxy xy'ijxcapy co ñch je' je Cristo, nañ ca' ajcxy m'ixy'adyii ñch nDeedy. Co ixypy ajcxy xy'ijxcapyich, nañ jaydēbi ixypy ajcxy nejhuñy pín ñch nDeedy'ajtyp.

²⁰ Jim jadu'n Jesús ycapxy ymiydacy ma je meeñ'ijttac, co anajty yjāy yaj'ixpicy ma Dios ytiyc. E ca' ni pín ymajtzi. Com ca'ni anajty yxi yhora anajty paadyñi mina ñaygiyegñy ma ymidzip.

Jesús ñimay ym̄igügtijc co ca' huaad ñicxy ma je' anajty ñicxy

²¹ Chi Jesús yjacnimaay ajcxy:

—Hich nnicxaanip ñich, miich ajcxy xy'ixtähuibich. Mñid ajcxy mbocy ycixpi m'ögaangixy, com ma nnicxa'ñich ca' huaad miich ajcxy jëbi mnicxcixy mñid mbocy ycixpi.

²² Huin'it je judíojäy ajcxy ac jëyi ñayñimaayi:

—¿Nej nicxy jada' ci'm ñayyaj'öga'ñiyiji? Com jadu'n ymïna'ñ co ma yi' ñicxy, ca' huaad ñich ajt jëbi nnicxim.

²³ E Jesús nigi nimay'idich anajty:

—Miich ajcxy ya naaxhuiñ mmïdity mdiy'ajtcop. Hich tzajpjoty nmïdidyich ndiy'ajtcopich. Miich ajcxy naaxhuiñyjäy ajcxy ytiy'ajt mmïjpidaacipy. Hich ca' mmïjpidaagyich naaxhuiñyjäy ytiy'ajt. ²⁴ Hich miich ajcxy jadu'n nñimaayb co m'ögam miich ajcxy, e ca' ajcxy Dios mbocy xyhuinmeecxip. Copicy ajcxy m'ögipy, e ca' Dios mbocy ajcxy xyhuinmeecxip, pen ca' xymibigáangixyich co ñich je' je huïdibi jëbi mbocy ajcxy xyhuinmeecxip.

²⁵ Chi ajcxy nimay Jesús:

—¿E miich, pin miich?

Chi Jesús y'adzooy:

—Ti ajcxy nyajnimaaagyixy pin ñich, co oga'n ndigiiyich jäy yaj'ixpijcpï. Cham jadüg'oc nyajnimaaagyixy. ²⁶ May ooy tijaty ayuc nyajnimähuaangixy nej ti mdundigoogyixy ma Dios ytiy'ajt. Cham ca' ajcxy nyajnimaydähuipy. Je huïdibi ti xyquexyich ya naaxhuiñ je' tüg'óciy tiy'ajt mñid. E ngapxpïdzimiyich je ayuc je tiy'ajt jëyi huïdibi ti nmïdooyich ma je'.

²⁷ Je jäy ca' ajcxy huinjihuïy co Dios Teedy anajty Jesús ñigapxyp. ²⁸ Paady Jesús nimay ajcxy:

—Co anajty miich ajcxy ti xyajcruudzpetyich, ñich je jäy huïdibi tzoön tzajpjoty, huin'it miich ajcxy mnejhuïhuïp co ñich je' je Cristo. E co ñich ca' ngi'mhuinma'ñ nduñich. Yi' ñich ya nmiydacypich huïdibi Dios Teedy ti xyaj'ane'myich. ²⁹ Je Dios Teedy huïdibi ti xyquexyich, yi' ñich mñid n'ityich. Ca' ñich yi' xy'ixmachich. Com co ñich njatytimytumybich jabom jabom huïdibi yi' chojcyp.

³⁰ Co Jesús jadu'n ymïnañ, chi mayjäy ooy ymibijcy.

Jäy huïdibi mibijcp Jesús ycuychinaayipy yi' ytiy'ajt

³¹ Chi Jesús nimay je judíojäy ajcxy huïdijaty anajty ti ymibicy:

—Pen mmibijc ajcxy cixyjot huinijot tüg'óciy ñich n'ayuc, e ca' m'ijxmadzipy ajcxy ñich n'ayuc, huin'it ñich miich ajcxy jëbi njäy'adyii. ³² Huin'it jëbi ajcxy mnejhuïhuïpy Dios ytiy'ajt. E. Dios ytiy'ajt xyñihuaángixip ma je mjibic-huinma'ñ ooy xy'ané'mgixy.

³³ Chi ajcxy y'adzooy:

—Abraham ñich ajcxy nmij'ap nmijteedy'ajtpy. Ca' ñich ajcxy huaad ni pinjäy xyjac'ane'my. ¿Nej co miich jadu'n mïna'ñ: “Dios ajcxy xyñihua'nip ma yi' mjibic-huinma'ñ xy'ane'mgixy”?

³⁴ Chi Jesús y'adzooy:

—Janch janch ñich miich ajcxy jadu'n nimaagyixy co tüg'óciy pinjaty pocy ytundïb, jibicp yi' ane'mip. Tim jadu'n nipaady nej tüg tumbi huïdi codoogï y ijtp, yi' yhuindzin jatytim'y'ane'mip. ³⁵ Yi' tumbi huïdibi codoogïy ijtp, ca' yhui'ma'ñ ma je jäy ytiyc huinixii. Yi' jäy y'ung janchtiy huï'mam huinixii ma yteedy ytiyc. ³⁶ Pen Dios y'ung miich ajcxy xyajpïdzimgixp ma je jibicpi xy'ane'mgixy, janch huinixii m'idaangixy, ca' ma ti jibicpi xy'oc'ané'mgixnipy. Tim jadu'n nej Dios y'ung y'ity, ca' ti jibicpi y'ane'myii.

³⁷ Nejhuïybich co miich ajcxy Abraham mmij'ap'adyii mmijteedy'adyii. Per miich ajcxy chachyaj'ögaambich. Je' co ca' mijpidaaccixy ñich n'ayuc huïdibi njayajnimaaagyixyp.

³⁸ Hich miich ajcxy nyajmïdmïydaacyp tïibi n'ixyich huïdibi ndeedyich ytumyb. E miich ajcxy yi' mdumyb nej m'ap mdeedy ti xyajnimaaagyixy.

³⁹ Chi ajcxy y'adzooy:

—Hue' ñich ajcxy nmij'ap'ajtyp nmijteedy'ajtyp je Abraham.

Chi Jesús y'adzooy:

—Pen janch ajcxy Abraham mmij'ap'adyii mmijteedy'adyii, yí' ixyipy ajcxy mdungixyp jadu'n nej Abraham tuuñ. ⁴⁰ Janch ñich miich ajcxy xychachyaj'ögáangixyich, e ti ajcxy njayajnimäy je huidibi ñich ti nmidooyich ma Dios. Ca' Abraham yaj'ögy je jäy ajcxy huidijaty anajty Dios ytiy'ajt mïd, jadu'n nej miich ajcxy m'iditzaangixy. ⁴¹ Miich ajcxy jibic-huinma'ñ mdungixyp, tim jadu'n nej m'ap mdeedy jibic huinma'ñ ajcxy tuñ jecy'ajty.

Chi ajcxy Jesús adzooy:

—Ca'ñich ajcxy ndigoy'ungity. Je' tügpajc ñich ajcxy ndeedy'ajtyp Dios Teedy.

⁴² Chi Jesús yminañ:

—Peni Dios ixyipy ajcxy mdeedy'ajtyp, xychojcpich xymijpidaacpich ixyipy ajcxy. Com Dios ti xyquexyich ya naaxhuiñ, e jüby ndzooñich ma Dios. Ca'ñich ngi'mdzojcin ycixpi nmiiñich ya naaxhuiñ. Yi' je' jadu'n tzojcp pin ti xyquexyich. ⁴³ ¿Ti co ca' miich ajcxy mhuinjihuiy ñich n'ayuc? Je' co ca' ajcxy midohuaangixy ñich n'ayuc. ⁴⁴ Je' miich ajcxy mdeedy'ajtyp je mujcu'. Mïd mgi'mdzojcin mguydungixy je mujcu' chójcin. Je mujcu'yaj'öctiyb yí' jäy maabi naaxhuiñybi chondägy. Je mujcu' ca' je' ixaani Dios ytiy'ajt. Ca' ni ti tiy'ajt yajpaady ma je', com je' mujcu' indaacp je', chi ci'm ooy nijot y'idich. Je' ooy indacy, e je' oga'n anii yajtzondac. ⁴⁵ Com miich ajcxy mujcu' yhuinma'ñ mïd, paady miich ajcxy ca' xymibijci xymijpidaaci n'ayucich co ñich tiy'ajt njamiydägy. ⁴⁶ Ni pin miich ajcxy xycayajpocycähuipy. Peni tiy'ajt ñich miich ajcxy nyajnimaaayb, ¿ti co ca' mmijpidaaccixy ñich n'ayuc? ⁴⁷ Je' jäy ajcxy huidibi yajpatp ma Dios, y'amido'ijtyp ajcxy Dios y'ayuc. Paady miich ajcxy ca' m'amido'ijtcixy Dios y'ayuc, com ca' ajcxy Dios mDeedy'ájtigixy.

Jesús jiiyim anajty yjugy'aty ca'ydí Abraham

⁴⁸ Chi je judío ixpicytije ajcxy y'adzooy:

—Ti ñich ajcxy yajxon nmina'ñ co miich mgogajpity jim Samaria, e mujcu' miich mïd ma mjot mhuinma'ñ.

⁴⁹ Chi Jesús y'adzooy:

—Ca' ñich mujcu' nmidity ma njot nhuinma'ñ, com nyajmij'ajtypich nDeedy, e miich ajcxy xy'ixtijpich. ⁵⁰ ñich ca' ci'm naygömayiijich. Dios Teedy ñich xycömaayb, com yí' je' huidibi ixyöyp payöyp jäy ajcxy ypocy. ⁵¹ Janch janch ñich miich ajcxy nimaaygixy co ji nijëjity jäy huidibi ñich n'ayuc cuydumb, e ca' yí' ajcxy yjugy'ajtin ycixipy ytigoyipy tücci'yí co y'ó'ccixipy.

⁵² Chi je judío ixpicytije ajcxy y'adzooy:

—Cham ñich ajcxy janchtiy ti nnejhuiyich tiydudägy co miich mujcu' midity ma mjot mhuinma'ñ. Abraham o'c je', nañ jadu'n o'c ajcxy je' huidibi anajty Dios ytiy'ajt capxhuäcxip, e miich mmina'ñ co pen ji pinjaty miich m'ayuc xymibijcip xymijpidaacip, ca' je' y'ögipy. ⁵³ ¿Nej mjacmïd miich mic'ajt, ca'ydí Abraham, ñich ajt nmij'ap nmijteedy huidibi o'ci? ¿Nej mjacmïd miich mic'ajt, ca'ydí ajcxy huidibi Dios y'ayucnajtzcaxiy, huidibi ajcxy o'ci? ¿Pin miich mdimnaydijyii?

⁵⁴ Chi Jesús y'adzooy:

—Pen ñich nnaygömayibich ci'm, ca' n'ayucich chobaadipy. ñich nDeedy yí' xycömayipich, je' huidibi miich ajcxy mdijpy co ajcxy mDios'adyii. ⁵⁵ Per miich ajcxy ca' Dios m'ixy'adyii. ñich janchtiy n'ixy'ajtypich Dios. E co ixyipy nmina'ñich co ca' ñich Dios n'ixy'adyii, indaacpich ixyipy, jadu'n nej miich ajcxy m'indaaccixy. Janch ñich n'ixyich Dios, e nguydumyibich yí' y'ayuc. ⁵⁶ Je' Abraham, miich ajcxy mmij'ap mmijteedy, jotcuyc ooy ñayjihuuyi co anajty ixa'ñ ñich nxii ndiempo ya naaxhuiñ. E co ijxy co ñich nmiiñich, chi ooy yjotcugiy.

⁵⁷ Chi je judío ixpicytjic ajcxy nimay Jesús:

—Ni mgamíidity huixchigui'px majc jimíjt, e ¿mmina'ñ co m'ijxy Abraham? (Ca' m'ixy'ajti je Abraham, naxy tüg mil jimíjt maabi je' y'o'cni.)

⁵⁸ Chi Jesús y'adzooy:

—Janch janch ñch miich ajcxy jadu'n nimäy co ji anajty ñch co ca'ni anajty Abraham yma'xung'aty.

⁵⁹ Chi ajcxy tzaa conígy tzaagäda'ñ anajty ajcxy. Chi Jesús yhuingoyüch, e ypidzimy ma Dios ytjic.

9

Jesús yajtzooc tüg huintzpi

¹ Hue' anajty Jesús huídijtp co ijxy tüg huintz, jadu'n anajty huíintz ti yma'xung'aty.

² Chi ydiscípulos ajcxy y'amídoohui:

—Huindzin, ¿pín pocy ytuun, jada huintzpi o ytaj yteedy, co huintz yma'xung'aty?

³ Chi Jesús y'adzooy:

—Ca' yi' ypocytuuñ, ni ytaj yteedy, hue' janchtiy paady ycixp jadu'n yajty, jigix Dios ymic'ajt ñiguëxigity ma yi'. ⁴ Copicy njactúunibich yi' ytung huídibi ti xyquexyich ya naaxhuiñ. Miinip je xii tiempo ma ca' pín Dios y'ayuc tunaani. Jadu'n nej jihuüy ixypy je ximbi ti ñaxy etz je coodzpí ti ymiñ. ⁵ Jadu'n nej n'ityich ya naaxhuiñ nmíidich Dios ytiy'ajt, jadu'n ñch nipaady nej tüg jiiñ huídibi codícxp yi' naaxhuiñyjáy.

⁶ Co Jesús jadu'n yminanday, chi nidzujíy naax, chi mo'ntz yaj'oyíy míid chujñi, chi jada' yajjaaxi je jáy yhuin míid je mo'ntz. ⁷ Chi nimay jada':

—Ñicx quejtzpuj yi' mo'ntz jim ma yi' Siloé ñi' y'abojtzigity —je ayuc Siloé jadu'n yhuimbídzimy: quexyöybi.

Chi je jáy huintzpi ñicxy jim, chi oy quejtz puji je mo'ntz, chi oy huimbity ti anajty yhuindícxígy. ⁸ Je ymíjiiñ ymíidijc ajcxy etz tüg'ócíy huídijaty anajty ajcxy ti ixty je huintzpi co jabom jabom ññay limosna yajmucy, chi ajcxy ñay'amídoohui miñ xyipy:

—¿Nej ca' jada yjéjity je huintzpi huídibi anajty jabom jabom limosna yajmujcpi?

⁹ Nijéjity ajcxy ymíinañ:

—Je' yi'.

E jacjadyii ajcxy ymíinañ:

—Huingbi yi', nígoob jadu'n yquëxígy nej je'.

E je' ymíinañ ci'm:

—Ñich jédu'n huídibi anajty huintz.

¹⁰ Jadu'n anajty ajcxy tzach'amídooy:

—¿Nej yi' mhuiin ti ñay'ahuäcxyii?

¹¹ E je' anajty y'adzooy:

—Yi' yëydijc huídibi ajcxy ytijyp Jesús, yi' mo'ntz yaj'oyíy xyajjaaxich nhuiin, e chi xyñímaayich: “Ñicx quejtzpuj ma yi' Siloé ñi'.” Chi nnicxyich, e oy nguejtzpujyich, e chi nhuindícxí'cyich.

¹² Chi ajcxy je' nimay:

—¿Ma je' je yëydijc?

Chi je huintzpi y'adzooy:

—Ca' nnejhuíyich.

Fariseojäy tiy'ajt pijcy nej je huintzpi anajty ti chögy

¹³ Chi ajcxy yajnicxy ma fariseojäy ajcxy yhuinduu, je huídibi anajty huintz yajpatp.

¹⁴ Hue' anajty tüg sábado xii (judíojäy ajcxy amayxii) co Jesús mo'ntz yaj'oyíy, e yajhuindícxígy je huintzpi. ¹⁵ Chi je fariseojäy ajcxy jadüg'oc yajty nej anajty je jáy ti yhuindícxígy. Chi je jáy y'adzooy:

—Mo'ntz ti pidägy ma ñch nhuiin, chi ñch ti nguejtzpujy, e cham n'ijxnibich.

¹⁶ Nijëjity fariseojäy ajcxy ymïnañ:

—Yi yëdyjc huidibi jada jadu'n ti tuñ, ca' yi' Dios ytiy'ajt mïdity, com ca' yi' amay'aty sábadó xïi.

Chi ajcxy jacjadyii y'adzooy:

—¿Nej tijy jada mijhuinma'ñ octuñ, pen hue' yi' pocyjäy?

Ca' ajcxy nay'ayuc-huinjihuïyigixy. ¹⁷ Chi ajcxy jadü'oc nimay je jäy huidibi anajty ti y'ijxigy:

—E miich, ¿nej m'ocmïnambi? ¿Pïn jäy yi' tiibi xyajhuindicxigy?

Chi je jäy y'adzooy:

—Tüg jäy huidibi Dios y'ayuc etz ymic'ajt mïid.

¹⁸ Chi je judío ixpicytjic ajcxy ca' anajty tim mïbigaangixy co je yëdyjc anajty huintz yajpaady, e co anajty ti yhuindicxigy, ixti cooni ajcxy ytaj yteedy mijhuoohui. ¹⁹ Chi ajcxy amïdoohui ytaj yteedy:

—¿Nej je' jada miich ajcxy m'ung huidibi huintz ma'xung'ajti? ¿Nej jada ti yhuindicxigy?

²⁰ Chi je' ytaj yteedy ajcxy y'adzooy:

—Iich ajcxy nnejhuïyb co ñch ajcxy yi' n'ung, e co yma'xung'ajty huintz. ²¹ Per jadu'n nej cham ti yhuindicxigy, e pïn yi' yhuin ti yajhuäcxyii, ca' ñch ajcxy yi' nnejhuïygixy. Amïdoo miich ajcxy yi' ci'm. Mij'anäciñ yi', ñigapxipy yi' ci'm.

²² Jadu'n ajcxy ytaj yteedy y'adzooy, mïid co ajcxy tzachtzigïygixy je judío ixpicytjic ajcxy. Com je judío ixpicytjic ajcxy ti anajty ñaygäpxigixy co anajty yajpidzimaangixy ma ajcxy ñaymujtac je jäy ajcxy pïnjaty anajty mïbijcp co Jesús anajty yjëjity je Cristo.

²³ Paady ajcxy ytaj yteedy ymïnañ:

—Mij'anäciñ yi', amïdoogix miich ajcxy yi' ci'm.

²⁴ Chi ajcxy y'amïdooy mïmejtz'oc je yëdyjc huidibi anajty ti y'ijxigy, e chi ajcxy nimay:

—Cömay capxpat yi' Dios co ti mdzögy. Ca' mgömay mgapxpaady je Jesús. Com ñch ajcxy nejhuïyb co yi' Jesús, tüg yi' pocytumbi. Ca' yi' Dios y'ayuc ytiy'ajt mïdity.

²⁵ Chi je jäy y'adzooy:

—Pen tüg pocytumbi yi' Jesús, ca' nejhuïyich. Huidibi janchtiy nnejhuïybich, co anajty ñch nhuintzity etz co cham huindicxnibich.

²⁶ Chi ajcxy y'amïdooy jadü'oc:

—¿Nej ti xytuñ? ¿Ti ti tuñ co ti xyaj'ijxici yi' mhuin?

²⁷ Chi je' y'adzooy:

—Ti ajcxy nyajnimayyigixy, e ca' ajcxy ti m'amïdo'idaangixy. ¿Nej nañ ixpigaangixy miich ajcxy ma yi'ji?

²⁸ Chi ajcxy je' ogy, nimay ajcxy jadu'n:

—Miich ixpjc ma yi', ñch ajcxy n'ixpjcpiich ma Moisés ytiy'ajt. ²⁹ Iich ajcxy nejhuïyb co Dios Moisés migapxy. Janch yi' Jesús ca' ñch ajcxy nnejhuïygixy ma yi' chooñ (ma mic'ajt ti paady).

³⁰ Chi je jäy y'adzooy:

—Ooy yi' y'oychigïyñity y'oyhuinma'ñity co miich ajcxy ca' mnejhuïygixy ma yi' chooñ (ma mic'ajt ti paady), e ti ñch yi' xyajhuindicxigyich. ³¹ Yajxon yajnejhuïy co Dios ca' yi' mïdoohui pocyjädyjc y'ayuc. Pen oy jäy ñch ajt, e nguyduunim Dios ytiy'ajt, huin'it ajt Dios n'ayuc xymïdoohuim. ³² Ni caminaaxii ycayajmïdoy, co pïnjäy tüg huintzpi ti yaj'ijxigy huidibi jadu'n ti yma'xung'aty huintz. ³³ Co ixypy je Jesús ca' jiiiby chooñ ma Dios, ca' ixypy jaty nej ti tunipy.

³⁴ Huin'it ajcxy y'adzooy:

—Miich jadu'n ti mma'xung'aty pocymïid. Ca' miich huaad ti xyaj'ixpïjccixyich.

E chi ajcxy yajpidzimy tibäy'tücci'yi (ma ajcxy ñaymujctac etz ma Dios ytijc).

Je jäy ajcxy huidibi ca' cöbijccixy Dios ytij'ajt jadu'n nipaady ajcxy nej jihuüy huintzity

³⁵ Chi Jesús nejhuüy jadu'n co anajty ti yajpidzimy tiba'y tücci'yi ma Dios ytijc. Co minaaaybaati chi nimay:

—¿Nej mmibijcyp mijpidaacyp miich je jäy huidibi tzoon tzajpjoty?

³⁶ Chi je' y'adzooy:

—Huindzin, nimaaygich pin je', jigix nmibicyich.

³⁷ Chi Jesús je' y'adzooy:

—M'ijxyp yi'du'n yam. Yi je' je' huidibi xymidmiydacp.

³⁸ Chi jada' huingoxtinay'ahuüy ma Jesús yhuinduu, je huintzpi huidibi Jesús ti yajtzögy nimay:

—Nmibijcypich, huindzin.

³⁹ Chi jada' Jesús ymïnañ:

—Ich ti nmiñ ya naaxhuiñ co n'ixyöyaanich nbayöyaanich jäy ypocy, jigix nya-pocycähuibich pin ca' ypocymidity, etz nyajpocyñihuädzibich pin ypocy miid. Jadu'n nej jihuüy nyajhuindziyich je jäy huidibi ijxp, etz jadu'n nej jihuüy nyajhuindicxigiyich yi huintzpi.

⁴⁰ Chi nijëjity fariseojäy huidibi anajty jim ma Jesús ymijc jadu'n midoy nej Jesús ymïnañ, chi ajcxy nimay Jesús:

—¿Nej nañ jadu'n miich mdiy ich ajcxy ca' Dios ytij'ajt nejhuüyich, jadu'n nej jihuüy ich ajcxy nhuintzity?

⁴¹ Chi Jesús y'adzooy:

—Co ixypiy miich ajcxy janch janch ca' mnejhuüyigixy Dios ytij'ajt, ca' ixypiy ti pocy ajcxy mmidity. Per miich ajcxy minam co Dios ytij'ajt mguyduuniy, e ca' yjanchity. Paady ajcxy mbocymidity. Nipaaty jadu'n nej jihuüy miich ajcxy mhuintzity, e mminangixy co m'ijxcixy.

10

Jesús yaj'ixpijc jihuimbit ayuc

¹ Chi Jesús jacnimay je judío y'ixpicytjic, je fariseojäy ajcxy:

—Janch janch ich miich ajcxy yam jadu'n nimaaygixy co je jäy ajcxy huidibi ca' ytigihuaangixy ma borregi agaj aguu (ma je cuend'ajtpi ycuend'aty), huidibi huingduum ameech tzach tigihuaam ma yborregi agaj, je' je' je meetzpi huidibi meedzam je borregi ajcxy ameech. ² Je jäy huidibi tigihuam ma yborregi agaj aguu, je' je' je borregi cuend'ajtpi. ³ Co je borregi cuend'ajtpi ymiñ ma agaj aguu, chi je agaj aguu cuend'ajtpi yaj'ahuäch je agaj aguu. Chi yborregi ajcxy yöcmidoyii, chi je' migapxy xibety xibety, chi yajpidzimy ajcxy. ⁴ Co ajcxy yajpidzimdäy, ac je' yje', chi jayijp ñicxy, e axam ajcxy ypanicxyii, com je' co yöcmidoyii. ⁵ Ca' je borregi ajcxy jëbi panicxy tüg huingjäy. Nigi ajcxy cöguëgy, com yöcmidooyb ajcxy co yhuingjäyity.

⁶ Jadu'n Jesús mayjäy yaj'ixpijcy jihuimbit'amy, jaygue' ajcxy ca' huaad huinjihuüy nej anajty Jesús yjaminäna'ñ.

Jesús je oybi cuend'ajtpi

⁷ Chi ajcxy Jesús jadüg'oc ñimaayi:

—Janch janch ich miich ajcxy yam jadu'n nimaaygixy, co je Dios nDeedy'ajtypich. Jëbi jäy ajcxy paady Dios ytij'ajt ma ich, e huin'it ytigiyigixipy ma Dios y'it. Jadu'n nipaady nej jihuüy ich je agaj aguu ma borregi ajcxy ytigiyigixy. ⁸ Tüg'ócay je huindzindijc huidibi ajcxy miin jayijp ca'ni ich anajty nmiñich, e ymïnaangixy anajty co ajcxy mid'ajti Dios ytij'ajt, jadu'n je' anajty ajcxy nej meetzpi huidibi meedzaanip Dios yjäy. Per je Dios yjäy

ca'p je' ajcxy tuuñ cuendi, jadu'n nej je borregi ca' yöcmidoogixy je meetzpi. ⁹ Jadu'n nej je borregi ajcxy ytigiygixy ma agaj aguu, nañ tim jadu'n jäy ajcxy paady Dios ytiy'ajt ma ñich. Je jäy ajcxy huidibi ypaatyp Dios ytiy'ajt ma ñich, nañ ypadaamy jugy'ajtin huidibi ca' ycixipy ytigoyipy tücci'yi. E huidibi je' ajcxy yajmayajtyp ma yi chinaayin, nmöhuiyich. Tim jadu'n nej borregi ajcxy jabom jabom ypidzimgixy ma agaj aguu nicxcixy miy'ojcpi, etz yhuimbijtcixy tzuu tzuu.

¹⁰ Yi meetzpi ajcxy mimb co ymeedzaangixy yaj'ögaangixy yajhuindigoyaangixy. Hich ti nmiiñich, jigix miich ajcxy mbáatcixipy jugy'ajtin mijcajee huidibi ca' tücci'yi ycixipy ytigoyipy.

¹¹ Chi Jesús yjacmíañ:

—Hich jadu'n nipaady nej tüg borregi cuend'ajtpi oybi. Je oybi borregi cuend'ajtpi yciyejcy y' yjugy'ajt ma yi o'cin miiid yborregi ycixpi. ¹² Je borregi cuend'ajtpi huidibi mujuy tumb, huidibi ca' yci'mborregi cuend'aty, ni ycajējity je borregi yhuindzin, co ixycaa ymiñ, chi cöguēgy je borregi, e yajqueec-huäcxtäy. ¹³ Com je' co mujuy ytuñ, paady cöguēgy je borregi ajcxy, ca' tzocy jihuñ borregi.

¹⁴ Tim jadu'n nej je oybi borregi cuend'ajtpi ijxcajptäy je' yborregi, nañ tim jadu'n ñich n'ijxcajptäy je njäyich (huidibi xymijpidaacpich), etz je' ajcxy xy'ixy'ajtpich. ¹⁵ Tim jadu'n nej Dios Teedy xy'ixy'adyiijich, nañ tim jadu'n n'ixy'adyiijich Dios Teedy. Tim jadu'n je' nej je oybi borregi cuend'ajtpi yciyegamy yjugy'ajtin miiid yborregi ycixpi. Nañ tim jadu'n ñich ngi'yegamyich njugy'ajtin miiid ñich njäy ajcxy ycixpi. ¹⁶ Nmiiidich jadügpicy jäy, ca' ajcxy yjudiojäyity, je' ajcxy nañ jadu'n nmiiid'idaamyich tügmucy (miiid je judío jäy ajcxy huidibi xymijpidaacpich). Tim jadu'n nej je cuend'ajtpi ymiiid'ajtyp je' yborregi ajcxy tügmucy. E je' ajcxy y'amidoo'idaamy ñich n'ayuc, tim jadu'n nej borregi ajcxy yöcmidoogixy yhuindzin. Ji y'idipy tügmucy jäy (huidibi xymijpidägibich), etz tüg cuend'ajtpi (ñich jēdu'n).

¹⁷ Chi Jesús yjacmíañ:

—Paady ycixp Dios Teedy ooy xychocyich xyjihuiyich, co ngi'yegaamyich njugy'ajtin ma yi ó'cin (miiid jäy ajcxy ypocy ycixpi), etz njugypigipyich jadüg'oc. ¹⁸ Ca' ni pin xypijcibich yi njugy'ajtin, ñich yi' ci'm ngi'yegamy. Nmiiidich mic'ajt nej ngi'yegipyich njugy'ajtin, etz nañ nmiiidich mic'ajt nej njugypigipyich jadüg'oc. Jadu'n nDeedyich ti xy'ane'myich co jadu'n ndunipyich, n'ögibich, njugypigipyich jadüg'oc.

¹⁹ Chi jadüg'oc ajcxy ca' nay'ayuc-huinjihuiyiyi je judíojäy ajcxy miiid Jesús y'ayuc ycixpi. ²⁰ Mayjäy ymíañ:

—Ca'oybi yi' ymiiid, locjiyib yi', ¿nej co ajt n'amido'ijtim y'ayuc?

²¹ E jacjadyii ajcxy ymíañangixy:

—Jadayaabi tiy'ajt etz mic'ajt ca' yajpaady ma tüg jäy huidibi mujcu' ymiiid. Ca' jēbi tüg mujcu' jäy huinzpi yaj'ixgy.

May judíojäy ajcxy ca' cöbijcy Jesús

²² Jim Jerusalén anajty xii yjadyii, je' anajty ajcxy ñixiidumyib jimij Dios ytiyc. ²³ E hue' anajty tñich tiempo. Chi jim anajty Jesús yhuidity ma Dios ytiyc, ma je Salomón ytiyc-huinduu. ²⁴ Chi ajcxy je judío y'ixpicytiyc nimujcy ooy Jesús, nimay ajcxy:

—¿Ixti míañani miich ñich ajcxy tiydudägy xyajhuinjihuñhuáangixyich pen miich je' je Cristo? Yajhuinjihuñgyich ajcxy tiydudägy.

²⁵ Chi Jesús y'adzooy:

—Ti ajcxy nyajnimaaaygixy, e ca' miich ajcxy ti nmibijccixy. Je mijhuinma'ñ huidibi ndumyibich nmiiidich nDeedy ymic'ajt, yi' je' nidiy'ajt'ajtp co ñich je' je Cristo. ²⁶ Paady ycixp miich ajcxy ca' mmibijccixy, com ca' miich ajcxy njäy'adyiijich. ²⁷ Hich njäy ajcxy ymijpidaacyp ñich n'ayuc, e n'ijxcajpich ajcxy je', e je' ajcxy xypanicxpich. Tim jadu'n nej je borregi ajcxy yöcmidoy je yhuindzin, jadu'n nej je huindzin ijxcapy je' yborregi,

e jadu'n nej yi yborregi ypanicxyii. ²⁸ Hich njäy ajcxy nmooybich yi jugy'ajtin huídibi ca' tücc'i'yi ycixa'ñ ytigoya'ñ. Ca' je' ajcxy yjugy'ajtin ytigoyipy ni camina, e ni pin ca' huaad je' ajcxy xypijcich. Je' ajcxy ci'am nmüidyich. ²⁹ Yi Dios Teedy huídibi ich njäy ti xymöy, tügpajc yi' ymijity, e ni pin huaad ni ti capijciy huídibi Dios Teedy ymüid ci'am. ³⁰ Dios Teedy etz ich tú'ciy ich ajcxy.

³¹ Chi je judío jäy ajcxy jadüg'oc tzaa conig cädzaangixy anajty ajcxy. ³² Chi Jesús je' ajcxy nimay:

—Ti ich ooy mij oybi nduñich ma miich mhuinduu müid je nDeedyich ymic'ajt ycixpi. ¿Huídibi ycixpi miich ajcxy xychaagädzaangixyich?

³³ Chi je judío ixpicytije ajcxy y'adzooy:

—Ca' nmīnaanīm paady ich ajcxy miich ndzaagädzaangixy müid je oybi tiibi mduñ, hue' janchtiy ycixpi ndzaagädzaangixy müid co ooy Dios myajjotmädy. Com miich nañ jäy, e mnayyajnaxyii Dios.

³⁴ Huin'it Jesús je' ajcxy nimay:

—Jadu'n ycojaayity ma yi judío jäy ajcxy ytiy'ajtnecy, ma Dios jadu'n ymīna'ñ: “Jadu'n nej dios miich ajcxy.” ³⁵ Paady ca' ngapxtigooyich, com Dios ci'm jadu'n minamb ma ñecy, co jadu'n nej Dios je' ajcxy huídibi Dios y'ayuc cöbicip (e ca' huaad pinjäy ymīna'ñ co Dios ñecy ca' yjanchity). ³⁶ Dios ti xyajñibicyich jada tung, e xyquejxyich ya naaxhuiñ. ¿Nej co mmīnaangixy co ich ngapxtigooyich co nmīna'ñich co Dios xy'ung'adyijich?

³⁷ Pen ca' nduñich nDeedyich ytung, ca' ich ajcxy huaad n'ayuc xymibijcich. ³⁸ E pen ndumybich nDeedyich ytung, oy ixypiy miich ajcxy ca' xymijpidaacich n'ayuc, jēbi ixypiy mijpidägy ajcxy je mijhuinma'ñ huídibi ndumybich. E chi mnejhuñhuipy miich ajcxy, etz mmijpidägipy miich ajcxy co je Dios Teedy yajpaady ma ich, e ich nyajpaadyich ma Dios Teedy.

³⁹ Ooy ajcxy jamadzaañ Jesús, e chi Jesús oy choni, ca' ajcxy majch.

⁴⁰ Chi Jesús ñicxy jadüg'oc jim Jordán mij ñi ñinaxy ma Juan yjäy yajñibejty oga'n'aty, chi jim yhui'miyy. ⁴¹ Mayjäy Jesús ooy ñimujci, e ymīnañ ajcxy:

—Je Juan el Bautista ca' jadu'n ooy mijhuinma'ñ tuuñ, per tüg'óciy yi tiy'ajt jadu'n nej nimiydactay jada Jesús, janch tiy'ajt je'.

⁴² E janch mayjäy ooy mibijcy Jesús jim ma je jimbi it.

11

Co Lázaro y'o'cy

¹ Jim Betania anajty tüg pa'mjäy, hue' anajty yxiñ Lázaro. Hue' je' anajty chinäy ma María etz Marta ycogajpity. ² María je' anajty huídibi je Huindzin Jesús anajty ti yajjaxy je ujtzipiyñi huídibi ooy oy yxuugy, etz po'ti Jesús ytecy müid ycöhuay. Hue' je' anajty María etz Marta ymidügquëx Lázaro huídibi anajty pijcip. ³ Chi Lázaro ymidügquëx ajcxy ycapxyquejxy ma je Huindzin Jesús anajty yajpaady, e chi oy yajñimäyii:

—Je mmigüg huídibi ooy mdzocy, pijcip je'.

⁴ Co Jesús jadu'n midooy, chi ymīnañ:

—Je' ypa'm ca' yaj'öga'ñyüi tücc'i'yi. Je' ypa'm hue' yajñiguëxigamy Dios ymic'ajt, jaydëb Dios ycömaybidzimipy, e nañ ich nyajcömayipyich, ich je jäy huídibi tzoön tzajpjoty.

⁵ Jesús ooy anajty tzocy jihuñy je Marta, María etz je Lázaro. ⁶ Oy jadu'n Jesús nejhuñy co anajty Lázaro ypigyii, jamejtz xiñ jim yjacxñnajxy ma anajty yajpaady. ⁷ Huin'it Jesús nimay ydiscípulos ajcxy:

—Tzoc jamim jim Judea naaxjot.

⁸ Chi je' ydiscípulos ajcxy y'adzooy:

—Huindzin, namni jäy ajcxy jim Judea ti xy'ocjaccögädzambi, e ¿mnicxaanip jim jadüg'oci?

⁹ Chi Jesús y'adzooy:

—Majmetz hora tüg ximbi müdity. Pinjäy müd Dios ytiy'ajt, ca' ayo'n pada'ñ, tim jadu'n nej jihuïy yhudity xim, e ca' ycönepy, com co xim codicxy jada naaxhuiñybi. ¹⁰ Pinjäy ca' müdity Dios ytiy'ajt, ca' je' nejhuïy ti anajty jadaanip, chi ayo'n pada'ñ, tim jadu'n nej jäy ycoodzhuidity, e chi ycönepy müd co ca' anajty ixy ma ñicxy.

¹¹ Huin'it Jesús je' ajcxy nimay:

—Ich ajt nmigüg Lázaro maab je', nicxy nyajpidiga'ñich.

¹² Chi je' ydiscípulos ajcxy y'adzooy:

—Huindzin, pen maab, huaadjihuïjihuip yi', ci'm yi' ymäyhuijipy.

¹³ Je' Jesús anajty ñimiydaacyp je o'cin, e je' ajcxy tijy Jesús ñimiydaacyp je mähui. ¹⁴ Chi Jesús yajmüdmüydacy ajcxy tiydudägy, ymïnañ:

—Lázaro ti je' y'o'cy. ¹⁵ E ooy njotcúcidyich müd miich ajcxy ycixpi co anajty ich ca' njimity, jigix ajcxy mmibigipy co Dios ymic'ajt nmüdidyich. Tzoc ajt jamim jim Betania.

¹⁶ Tomás huidibi anajty ajcxy yxigoyaaxyp Dídimó, huidi ayuc-huimbizim: cuate, nimay jacjadyi Jesús ydiscípulos ajcxy:

—Tzoc ajt nañ jadu'n jamim, huen jäy jim xyaj'o'cim quipxy müd Jesús.

Jesús yajjugypigipy je jäy ajcxy etz möhuipy ajcxy jugy'ajtin

¹⁷ Co ajcxy jim yja'ty, chi ajcxy paty tiy'ajt co mimidaaxxiibi anajty maabi Lázaro ñaaxtigiy. ¹⁸ Betania ca' anajty ooy yjiguëgyity müd Jerusalén, jëyi jada' anajty müdity tugig kilómetro. ¹⁹ May judíojäy ajcxy anajty ti ymiñgixy ma Marta etz María, yajjotcugihua'ñ ajcxy müd je' ymiguëx ycixpi co anajty ti y'ögy. ²⁰ Co nejhuïy Marta co Jesús anajty jim ymiñ, chi nidzooñ oy jipcobadiy. E María jim yhuimüy ma ytijc, tigoty anajty iñäy. ²¹ Chi Marta Jesús nimay:

—Huindzin, co ixypy miich ya anajty myajpaady, ca' ixypy ti y'ögy nmiguëxich. ²² Per nnejhuïybich co miich cham jëbi Dios mmibijctzoy, e xymöhuip ti mdimdojcyp.

²³ Chi Jesús y'adzooy:

—Je mmiguëx jugypigip jadüg'oc.

²⁴ Chi Marta y'adzooy:

—Nnejhuïybich co yjugypigipy jadüg'oc co anajty naaxhuiñybi ti yhuaad'ajtni co Dios anajty yajtigadza'ñ.

²⁵ Per huin'it Jesús y'adzooy:

—Ich je' nyajjugypigipyich je jäy ajcxy, e nmöhuibyich ajcxy jugy'ajtin. Pinjäy ajcxy xymibijcpich xymijpidaacpich, oy anajty yja'ögy ajcxy, jugy'ajtcixip ajcxy jadüg'oc. ²⁶ E tüg'óciy pinjaty ajcxy xymibijcp xymijpidaacpich juugyñi, ca' y'ögipy ajcxy tücci'yi. ¿Nej mibijcyp miich jadaaji?

²⁷ Chi Marta y'adzooy:

—Nmibijcypich, Huindzin. Nmibijcypich co miich je' je Cristo, Dios y'ung, huidibi anajty miinam ya naaxhuiñ.

Jesús taj may ooy müd Lázaro ycixpi

²⁸ Co Marta jadu'n ymïnañ, chi jada' oy huoy y'uch María, e yajnimay ameech:

—Je Huindzin chiiby je', e miich jiiby xymüdmüydägamb.

²⁹ Co María jadu'n müdooy, chi ypidigy mic'amy, e chi ñicxy ma Jesús. ³⁰ Ca'ni anajty Jesús yja'ty cajpjoty. Jimni anajty yhuäcxijp ma anajty Marta ti yijpcobaadiy. ³¹ Co ajcxy ijxy co María ypidigy, e ypidizimy janch mic'amy, je judíojäy huidibi anajty ajcxy jim ma je tijc müd je', hue' ajcxy tijy María ñicxy yaaxpi ma anajty ti ñaaxtigiy je Lázaro. Chi ajcxy panicy.

³² Co yjädy María ma je it ma anajty Jesús, co ijxpaty, chi ycojxtinaay'ahuïy ma Jesús yhuinduu, chi nimay:

—Huindzin, co ixypy miich anajty m'ocyajity, ich n'ay ca' je' ixypy y'ögy.

³³ Co Jesús ijxy yäxy je María etz je judíojäy ajcxy huidibi anajty yjajm'id'ajtip, chi ooy jihuüy etz ytaj ymaay. ³⁴ Chi jada' Jesús yajty:

—¿Ma ajcxy Lázaro ti myajnaaxtigí?

Chi ajcxy nimay:

—Huindzin, jam iJimmy.

³⁵ Chi Jesús yaaxy. ³⁶ Chi judíojäy ajcxy ñayñimaayi miñ xyipy:

—Ooydim anajty tzocy je Lázaro.

³⁷ Per nijëjity ajcxy ymíañ:

—Jadayaabi jäy huidibi huintzjäy yajhuindicxigy, ¿nej ca' jada' ixypy mic'ajt m'idity jëbi ixypy ti yajtzögy je Lázaro, e ca'ydi ixypy ti y'ögy?

Jesús yajjugypijc Lázaro

³⁸ Chi Jesús jadüg'oc yjotmaybaty, chi ymijhuägy ma je o'cpi jut. Hue' je' anajty tüg ang m'id tüg mij tzaa y'agiyducyity je jut aguu. ³⁹ Chi Jesús ymíañ:

—Jügi' ajcxy jada tzaa.

E chi Marta je o'cpi y'uch y'adzooy:

—Huindzin, xuucnip yi', com cham yi' mimidaaxxiibiñ maabi ñaaxtigíy.

⁴⁰ Chi Jesús ymíañ:

—¿Nej cay ti jadu'n nímäyi? Pen xymibíjcbich yi' n'ayuc, m'ixipy Dios ymic'ajt y'oy'ajt.

⁴¹ Chi ajcxy je tzaa jügiy, chi Jesús cix ypa't'ijxy, ymíañ:

—Dios Teedy, jäygidacín nyajnajxypich ma miich, co miich xymidoohui n'ayucich

⁴² Yajxon nnejhuüyich co miich xy'amido'ijtpich jabom jabom, paady ycixp miich jadu'n ti nímäy m'id jadayaabi jäy ajcxy ycixpi ma ich nhuinduu, huen ajcxy mibicy co miich xyquejxich ya naaxhuiñ.

⁴³ Co Jesús jadu'n ymíañ, chi jada' mic ycapxy:

—Lázaro, pidzim tibäy.

⁴⁴ Hue' je o'cpi mic'amy ypidzimy ymo'nity yajxon tüg'óciy ñinícx etz huingoyebíyity m'id huit, chi Jesús ymíañ:

—Huimbidiittuutxixy, e najtzmazzygix, huen yöychooñ.

Judío xpicytijc ymadzamy anajty Jesús

⁴⁵ May je judíojäy ajcxy ymibijcy huidibi anajty María yjajm'id'ajtyp, co ajcxy ijxy je huidibi anajty Jesús ti tuñ. ⁴⁶ Per jadyii judíojäy ajcxy oy ixtäy je fariseojäy ajcxy, chi ajcxy yajm'idm'iydacy huidibi anajty Jesús ti tuñ. ⁴⁷ Je teedy tungm'idpi ajcxy, etz je fariseojäy ajcxy, chi ajcxy ñayhuoomujctayi je tungm'idpi ajcxy nidüg'óciy, chi ajcxy ymíañ:

—¿Nej ajt Jesús n'octuunim? Yijibi yëydijc ooy yi' mijhuinma'ñ tzachtuuni. ⁴⁸ Pen najtz'ixíyim jadu'ñyi, tüg'óciy jäy mibijctähua'ñ yi'. Chi ajcxy ymiinipy je Romano tungm'idpi huidibi ajt xy'ané'mim, e chi yajhuindigoyipy ich ajt nDios y'it, e ñañ yajhuindigoyipy ich ajt ndzinaayin njugy'ajtin.

⁴⁹ Nidügti ajcxy je jäy, hue' anajty yxí Caifás, hue' anajty mijtungm'id, je' anajty teedy huindzin, je' jadu'n jäy nimayday:

—Miich ajcxy ca' ti mhujhuüygyxy. ⁵⁰ Ca' ajcxy mnejhuüy co jac'oy nyaj'o'cim je Jesús tüg'pajc, huen yi' codinaydähuiip naax cajp, jigix ca'ydi ich ajt nnaax ngajp yhuindiooyim.

⁵¹ Canan ycim'huinma'ñ jadu'n ycixpi ymíañ je'. Hue' janchty com je' anajty mijtungm'idity je huin'it jimijt ma teedy ajcxy ymiñ, paady Dios huinma'ñ jadu'n yejcy, co jadu'n najtzcapxy co Jesús anajty y'öga'ñ m'id tüg'óciy ajcxy naax cajp ycixpi.

⁵² E ca' nmínaaním m'id jëda'ajty m'id je judío ajcxy ñaax ycajp ycixpi, ñañ jëgíx co huoomujctähua'ñ tüg'óciy Dios y'ung huidijaty anajty ajcxy yajpatp xi ya. ⁵³ Huin'it oga'n ajcxy je tungm'idpi yajnidugíy co yaj'ögaangixy Jesús.

⁵⁴ Jesús ca' anajty ma y'ocyaj'ijxni mayjäyjoty ma je judíojäy ajcxy. Chi jada' ñicxy jiguem mihungon ma je títznaax'it, ma anajty tüg cajp xijity Efraín. Chi jim yhui'miy miid ydiscipulos ajcxy.

⁵⁵ Huingoonip anajty je pascua xii huídibi anajty judíojäy ytumyb. Ti anajty may judíojäy ajcxy ñinicxni jim Jerusalén xii'ajtp huídibi anajty jiguëgyjaty tzomb. Jayijpni ajcxy ñicxy ca' anajty xii paady, co anajty ajcxy ñayyajpocyñihuádza'nyii. ⁵⁶ Ooy anajty jäy ajcxy ijxtäy Jesús huiñ'it. Paady anajty chachnayñimáayigixy nidüg nidüg miñ xyipy, co ajcxy ytinay'ahuüy ma Dios ytijc, jadu'n ajcxy yminañ:

—¿Nej m'ocminaangixy? ¿Minipy jada' Jesús xii'ijxpi, o ca'ji?

⁵⁷ Je teedy ajcxy je' yhuindzin etz fariseojäy ajcxy ti anajty yejccixy cötujcin co huentimpinity huídibi anajty nejhuüyb ma je Jesús, huen nigapxy jigix ajcxy madzipy.

12

María yajjaax aceite Jesús ytecy

¹ Jatudujcxini anajty pascuaxii ca' paady, co Jesús ñicxy jim Betania, jim ma anajty Lázaro yajpaady, je huídi anajty ti yajjugypicy jadüg'oc. ² Chi ajcxy jim yaj'oyüy tüg adzu'ibi. Marta anajty jim yajcaayb yaj'uucp je jäy ajcxy. Lázaro anajty miid Jesús iñäy ma je mesi. ³ Chi María conigy tüg libra ujtzpíjyñii huídibi anajty ooy oy yxuugy. Tzou je' anajty ooy, je' miid Jesús ytecy yajjaaxtaayi. Chi jada' miid ycöhuay po'ttich. Chi ac ujtzpíjyñii yxuugítay tigoty. ⁴ Huiñ'it je Judas Iscariote je Simón ymang huídibi anajty yhuindzin cïyegam ma ymidzip, je' jadu'n yminañ:

⁵ —Jac'oy co ixypy ti ndoocim jada ujtzpíjyñii oy migo'pxpeexyti jadüüb ixypy ajt ayoobtijc nbubejtim.

⁶ Canan paady Judas jadu'n yminañ co ayoobitijc tzachpa'ayoy. Paady jadu'n yminañ co ajcxy chachmeedzañ. Com je' anajty meeñybijty cuend'ajtp, e chachpuugomyb huídijaty anajty jiiby ajcxy yjapidaacyp. ⁷ Chi Jesús nimay je Judas:

—Ixmatz miich yi', hue' yi' yi' María ti yujcpicy jada ujtzpíjyñii co yajtunañ co anajty naaxtigíyich. ⁸ Com yi' ayoobitijc ajcxy huiñixii yi' miich ajcxy miid'idipy. Janch ich ca' ich miich ajcxy miid n'idipy huiñixii (ya naaxhuiñ).

Judío ixpicytjic yaj'ögamy anajty Lázaro

⁹ Co ajcxy nejhuüy may judíojäy ajcxy co anajty Jesús yjimity Betania, chi ajcxy nimiiñ. E canan miid Jesús ycixpi jéda'ajty, je' anajty ajcxy nañ jadu'n chach'ixaamy je Lázaro huídibi anajty ti jugypicy jadüg'oc. ¹⁰ Chi je teedy ajcxy yhuindzindijc ñaygapxi, co yaj'ögaangixy Jesús etz nañ jadu'n je Lázaro, ¹¹ com may judíojäy ajcxy anajty ñayjibijcin, etz tzachmibijccixni Jesús.

Jesús tigiy Jerusalén jadu'n nej tüg rey

¹² Je com jabom je mayjäy huídibi anajty ajcxy ti ymiingixy xii'ajtpi ñejhuüy ajcxy co Jesús anajty yminañ jim Jerusalén. ¹³ Chi ajcxy cabigy may ytixy y'aacx, chi ajcxy nidzooñ Jesús, chachminaangixy:

—¡Dios ajt xyñihuaanim xyajtzoocim! Mimb tüg jäy huídibi Dios ti yconucxyii. Ymiid yi' Dios ymic'ajt, je' je' je' judíojäy yrey.

¹⁴ Co Jesús paty tüg burro mang huídibi ca' ni pin yaj'iñaayñi, chi yajpejty, chi cuyduuñ jadu'n nej anajty jaybety y'ity ma Dios ñecy co jadu'n yminañ:

¹⁵ —Ca' mdzigíy miich ajcxy huídibi tzinaayb ma Sión cajp (Jerusalén). Cha je mrey ymiñ y'iñäy ma tüg burro mang.

¹⁶ Je huídibi anajty ajcxy Jesús discípulo'ajtyp, ca' anajty ajcxy huiñihuüyigixy ixti cooni Jesús paty jadüg'oc yi' y'oy'ajtin ymij'ajtin jiiby tzajpjoty. Huiñ'it ajcxy ajihuüygooti co

jadu'n anajty ycojaayity müd Jesús ycixpi, e nañ co je' anajty Jesús ti yajtunyii ti yajjadyii jadu'n nej jaybety ymiñ.

¹⁷ Je jäy ajcxy huidibi anajty ajcxy ymiid Jesús, huin'it co Lázaro ypidzimy ma yaj-naaxtigiiyi, e yajjugypijci jadüg'oc, chachyejcyp anajty ajcxy tiy'ajt nañ jadu'n huidibi anajty ajcxy ti ijxcixy. ¹⁸ Nañ paady ycixpi je mayjäy oy nañ jadu'n yjijpcobadiyii, co ajcxy nejhuiy je mijhuinmañ huidibi anajty Jesús ytumyb. ¹⁹ Paady je fariseojäy ajcxy ñayñimaayi miñ xyipy:

—Ix ajcxy, ca' jada' ninej nmimadaacim Jesús, com tüg'óciy yi mayjäy axam ajcxy je' panixcixy.

Nijëjity anajty griegojäy müdmidyägaangixy Jesús

²⁰ Nijëjity griegojäy nañ ti anajty ñicxcixy jim Jerusalén Dios ojadajtpi xijoty. ²¹ Chi jada' je griegojäy ajcxy nimijhuägy Felipe, huidibi anajty Betsaida cogajp jim Galilea naaxjot, e chi ajcxy minucxtaacy nimay:

—Migüg, tun may'ajt pubejtcich, Jesús ich ajcxy nja'ixamy.

²² Chi Felipe oy yajnimay Andrés, chi ajcxy Felipe etz Andrés oy Jesús yajnimay. ²³ Chi Jesús ymiñ:

—Ti je tiempo paady co ich je jäy huidibi tsoon tzajpjoty nyajcömayipyich. ²⁴ Janch janch ich miich ajcxy jadu'n nimaaygixy co jäy niby tüg mocpajc, e co je mocpajc ymuxy, huin'it yhuindigoy, e chi ytim'ajtñi may'amy. Pen ca' ni pin niby jada mocpajc, ca' ytim'adañ. Jadu'n ich nipaady nej je mocpajc. Copicy n'ögibyich, huin'it mayjäy jugy'ajtin paadaangixy huidibi ca' ycixipy ytigoyipy ni mina. ²⁵ Je jäy huidibi ooy nigü nixondägy yi chinaayin ya naaxhuiñ, yajtigoyamy je' yjugy'ajtin tücciyi. Per je pin ca'p ooy nijot'aty je chinaayin ya naaxhuiñ, e nixondaaci ooy nigü Dios y'ayuc, je' y'alma nidoocin paadip ma Dios. ²⁶ Pen ji jäy huidibi naybidaacip ma ich, copicy ajcxy xypaníxibich. Ma ich nyajpaady, nañ jim yi' yajpaadipy nañ jadu'n. Yi jäy pinjaty naybidaacip ma ich, Dios Teedy yi' cömayib.

Jesús capxidzimy co y'ögañ

²⁷ Chi Jesús yjacmiñ:

—Tájñibich mayñibich cham jotjoty huinma'ñjoty. ¿Nej nmimähuibich nDeedyich? ¿Nihuaangich ma jada ayo'n tzaachypi huidibi ti yhuaad'ajtñi? Ca' yjadu'nity. Com paady ycixp ti nmiiñich ma jada xii tiempo, jëbi ayo'n nyajnajxich müd jäy ajcxy ypocy ycixpi. ²⁸ Dios Teedy tun huidibi copicy, jëbi jäy ajcxy ijxcixy miich mmic'ajt etz miich m'oy'ajt.

Huin'it je jäy ajcxy huidi anajty jim ma Jesús yajpaady midooy tüg ayuc choñ tzajpjoty ymiñ:

—Ti nduñich mijhuinmañ, e ti jäy icy ich nmic'ajt n'oy'ajt. E nañ jadüg'oc ndunipyich mijhuinmañ, jigix jäy ajcxy íjxcixipy jadüg'oc ich nmic'ajt ich n'oy'ajt (jadu'n Dios y'adzooy y'ung Jesús).

²⁹ Je mayjäy huidibi anajty ajcxy jim, je tiibi anajty ajcxy midoogixy je ayuc huidibi tsoon tzajpjoty, ymiñ ajcxy:

—Enee yi' ti yjidity.

Jacjadyii ajcxy ymiñ:

—Tüg ángel ti ymigapxyii.

³⁰ Chi Jesús nimay je mayjäy ajcxy:

—Ca' nminaanim müd ich ycixpi jadu'n ti yajmidoy jadayaabi ayuc huidibi ti choñ tzajpjoty. ³¹ Jadachambi jada' Dios yajpocycähuañ naaxhuiñjyäy, e nañ ypigaaipy je mujcu' ymic'ajt huidibi ane'mb naaxhuiñjyäy ajcxy. ³² Co ich anajty jäy ti xyajcru-udzpetyich, e co ich anajty ti njugypicyich jadügtecy, e co ich anajty ti nhuimbityich tzajpjoty, huin'it tüg'óciy jäy ajcxy huidibi xymibijcpich, nyajpa'ttigihuibich jiiyby tzajpjoty ma nyajpaadyich.

³³ Paady jadu'n Jesús ymínañ, jébi huaad tüg'óciy jáy ajcxy huinjihuñhuip ti o'cin anajty ypadamy. ³⁴ Chi je mayjáy ajcxy ymínañ:

—Ma Dios ñecy jilby jadu'n ymiñ jaybety co je Cristo huinixii je' y'ida'ñ. E ¿nej miich co cham jadu'n mína'ñ co copicy co yi jáy huídibi tzoon tzajpjoty, huimbidam jadügtecy tzajpjoty? ¿Pín jédu'n mdijyp huídibi tzomb tzajpjoty?

³⁵ Chi Jesús nimay je jáy ajcxy:

—Jahueeni xii tiempo njac'ida'ñich mñd miich ajcxy. Jadu'n ñch ndiy'ajt nej tüg jñn huídibi codicxp jáy co ytüyöy. Cuychinäy ñch ndiy'ajt, co tzojc nhuimbida'ñich tzajpjoty, e miich ajcxy mhui'mañ jadu'n nej jáy huídibi ca' jñn mñdity. Je jáy ajcxy huídibi ca' cuychinaaygixy ñch ndiy'ajt, ca' ajcxy nejhuñyigixy ma ñicxcixy. Jadu'n ajcxy nej jihuñy yöygixy coodz, e ca' ijxcixy ma ñicxcixy. ³⁶ Com occhaani ñch ma miich ajcxy, nyaj'ixpijy ñch miich ajcxy Dios ytiy'ajt. Pen xymibijccixpich, m'ljtcixip ixpiy ma Dios ytiy'ajtin.

Co Jesús jadu'n je jáy ajcxy nimayday, huin'it Jesús je' ajcxy puhua'ctuutni, chi ñicxni, e ca' ma y'ocjac'ijxin.

Je judío jáy ca' mibiga'ñ Jesús

³⁷ Ooy anajty canaag mijhuinma'ñ Jesús ti jatuuñ ma jáy ajcxy yhuinduu, e ca' anajty ajcxy ni ti tim mibijccixy. ³⁸ Huídibi Jesús ytun ycapx, jilby anajty jadu'n ycojayity ma je Dios y'ayuc necy, je Isaías ñecy, co Isaías jadu'n ymínañ:

Huindzin, ca' ni pín ajt n'ayuc ndiy'ajt ti xymibijcim. Ca' ni pín huídibi huinjihuñyib je Huindzin Dios ymic'ajt.

³⁹ Ca' anajty ajcxy huaad ymibijccixy, com nañ ti anajty jadu'n Isaías jay ma jadu'n ymínañ:

⁴⁰ Jadu'n yi' ajcxy nej jihuñy Dios ti yajhuindziygixy, e ti yajjotjunyigixy, jigix ca' y'ijxcixipy mñd yhuin, e mñd yjot yhuinma'ñ ca' huinjihuñyigixyipy, ni yca-jothuimbijtcixipy nej jébi Cristo yajtzóocigixy.

⁴¹ Paady jadu'n Isaías ymínañ je' co anajty ti ijxi Cristo y'oy'ajt, e chi cojay nej anajty ti icy.

⁴² Ca' nidüg'óciy judío ixpiyctijc mijotmädy anajty Jesús. Jim anajty nijejity huindzindijc huídibi mibijcp Jesús. Per mñd je fariseojäy ycixpi co chachjotma'tcixy, paady anajty ajcxy ca' capxidzimigixy co mijpidaaccixy Jesús. Je' co chigiyigixy co jim yajpidzimiyb ajcxy tücci'yi ma Dios ytiy'ajt, etz ma yi judío ñaymujctac. ⁴³ Jacnigi anajty tzojccixy co huen jáy cömáayigixy, ca'ydi co ajcxy Dios ycömáayiyb.

Dios yajpocycähuip je mayjáy mñd Jesús y'ayuc

⁴⁴ Chi jada' Jesús ymínañ mic:

—Je jáy ajcxy huídibi xymibijcpich xymijpidaacpich, caminaanim ñch naydüg xymibijcpich xymijpidaacpich, nañ ymibijcyp ymijpidacyp ajcxy je tiibi ñch ya naaxhuiñ xyquexyich. ⁴⁵ E je jáy huídibi xy'ijxpich, tim jadu'n nipaady nej jihuñy ti icy je huídibi ti xyquexyich. ⁴⁶ ñch ti nmimiñich ya naaxhuiñ Dios ytiy'ajt, jadu'n ñch nipaady nej jihuñy tüg jñn huídibi codicx je jáy ajcxy. Je jáy ajcxy huídibi xymibijcpich ca' ajcxy yhuimipy jibictuuby, jadu'n nej jihuñy ca' ajcxy chinaaygixy agootztuuby. ⁴⁷ Je jáy ajcxy huídibi midoob ñch n'ayuc, e ca' cuydungixy, ca'p je' ñch je' ypocy ajcxy n'ixyöyaani nbayöyaani cham. Ca'p ñch ti nmimiñich ya naaxhuiñ mñd co jáy ajcxy ndzaachytunipyich mñd ypocy ycixpi. Paady ñch ti nmimiñich ya naaxhuiñ co nyajpocynñhuadza'ñich yi jáy ajcxy. ⁴⁸ Je jáy ajcxy huídibi xycapxhuimbijtibich n'ayuc, e ca' xycöbigañich, ymñd ajcxy huídibi yajpocycähuib. Yi ayuc huídibi ti ngapxyich, yi' yajpocycähuib ajcxy co anajty naaxhuiñybi ti yhuaad'ajtni co Dios anajty yajtigatzaani. ⁴⁹ Com ñch ca' ngi'm'ayuc ngapxhuäcxyich. Je' je' Dios Teedy y'ayuc, je huídibi ti xyquexyich, yi' ngapxhuäcxyibich y'ayuc. Je huídibi ti xyquexyich ya naaxhuiñ ti xyñajtzcapxiyich yi' y'ayuc, jada ayuc

ngapxhuäcxypich nyajniimaaygixyp. ⁵⁰ E nejhuüybich co Dios y'ayuc ytiy'ajt ymimimyb yi' tzinaayin jugy'ajtin huidibi ca' tücci'yi ycixy ytigoy. Paady ycix je ayuc huidibi ajcxy nyajmüdmüydacyp, jadu'n nyajmüdmüydaaccixy nej Dios Teedy ti xyajnajtz'ane'müyich.

13

Jesús ypuji ydiscípulos ajcxy ytecy

¹ Ca'ni anajty xii paady, pascuaxii anajty ajcxy tijy. Chi Jesús ñejhuüyb co anajty yxii ytiempo yhuaad'ajtni mina chonaani ya naaxhuiñ yhuimbidaani ma Dios Teedy. E Jesús ooy anajty tzocy jihuüy ymügügtijc ajcxy huidibi ya naaxhuiñ anajty ajcxy hui'mañ. Jadu'n tzocy jihuüy huinixii.

² Chi jada' Jesús etz ymügügtijc ytiüy ajcxy adzuu'ajtp (je pascuaxii adzu'ajtin). Ti anajty je mujcu' huinma'ñymöy Judas Iscariote, Simón ymang, co anajty Jesús cüyegañ ma ymidzip ajcxy. ³ Ñejhuüyb anajty Jesús co je Dios Teedy ti yajcüdügüyüi tüg'óciy ymüc'ajt, e Jesús nañ ñejhuüyb anajty co je' ti chooñ ma Dios y'it, e nañ jii by anajty jadüg'oc yhuimbida'ñ. ⁴ Chi ypidügy ma mesi, chi je yoñybi yhuít ñayajniñjenduutti. Chi huijtzügy tüg huit huidibi müid ñaymextütti nayböttütti, ñayajmijxojtzpejti yhuindüy. ⁵ Co jadu'n ñayñi'ixüy, chi pidacy ni ma tüg cübuji'ñyoc. Chi nihuägüy ydiscípulos ajcxy ytecy. Chi yajtzondacy tecypujii tüg tüg, e mextüch pöttüch müid je huit huidibi anajty ti ñayajhuindüyüi.

⁶ Co nihuägüy Simón Pedro ytecy, chi Pedro yminañ:

—Huindzin, ca' huaad miich ndecy xypujich.

⁷ Chi Jesús y'adzooy:

—Huidibi üch ndumyb ca' yi' miich ajcxy mhuiñjihuüygyxy jadachambi, jacomjegy miich ajcxy mhuiñjihuüpy.

⁸ Chi Pedro y'adzooy:

—Miich ca' huaad üch ndecy xypujich ni caminaabi.

Chi Jesús y'adzohuimbijty:

—Pen ca' mdecy nbuji, ca' üch miich jëbi njäy'adyii.

⁹ E huin'it Pedro nimay Jesús:

—Huindzin, ca' üch jëda'ajty ndecy xypüjibich, hue' janchtiy tüg'óciy ngüjich etz ngo-huajcich.

¹⁰ Chi Jesús nimay Pedro:

—Com tübi mjet mhuiñma'ñ yajhuäch, ca' yi' ocjactzojcnü yajhuädzüpy mjet mhuiñma'ñ jadügtecy. Tim jadu'n nej jihuüy naamni chiy, e cham ca' tzojcnü yajtzihuüyich jadügtecy. Jëda'ajty mdecy nbujich cham. Miich ajcxy huädz mjet mhuiñma'ñ ajcxy mmüdiñ, oy ca' miich ajcxy nidüg'óciy.

¹¹ Com Jesús ñejhuüyb anajty pinjäy cüyegaanip ma ymidzip, e paady jadu'n yminañ:

—Ca' ni tüg'óciy miich ajcxy mjet mhuiñma'ñ yhuädzüty.

¹² Chi jada' co yajtecypujtay, chi jada' yoñyhuit yajtiüy jadüg'oc. Y'ixtacy ma mesi, e chi jada' nimay ajcxy:

—¿Nej mhuiñjihuüyb ajcxy ti üch ti nduñich müid miich ajcxy? ¹³ Miich ajcxy jadu'n minamb co üch miich ajcxy myaj'ixpijcy, etz üch miich xyhuindzin'ajtpich. E tiydudägy miich ajcxy mina'ñ com üch jëdu'n miich ajcxy mhuindzin. ¹⁴ Pen üch miich ajcxy nyaj'ixpijcy etz xyhuindzin'ajtpich, e ti üch miich ajcxy nyajtecypujy, nañ jadu'n miich ajcxy myajtecypujyib miñ xyipy. ¹⁵ Üch miich ajcxy ti nmöy tüg ijpajt, jigix ajcxy jadu'n mdunipy jadu'n nej ti nduñich, e huin'it ca' amij agix nayjihuüyb ajcxy. ¹⁶ Janch janch üch miich ajcxy yam jadu'n nnimäy co je huindzin jac mij je' ca'ydi yi' ytumbi. E nañ je' huidibi yajquejxyöyb jac mij je' ca'ydi huidibi quejxyöyb. ¹⁷ Co ajcxy tiy'ajt mnejhuüpy, chi jotcujc ajcxy müdipy, pen mbadumyb ajcxy jadu'n nej nduñich.

¹⁸ Ca' nmına'ñich co nidüg'óciy miich ajcxy mbocymüdüty. Ti ñich yí' nnejhuüy pín ti nhuin'ixyich. Ti nhuin'ixyich tüg huidibi pocymüdü, jigix cuyduunip nej anajty yjay-betyity ma Dios ñecy ma je Cristo jadu'n ymına'ñ: “Yí' huidibi caymujcp müdü ñich, ti ñich yí' xymibidügy.” ¹⁹ Ti ñich yam miich ajcxy jayjip nyajñimaaygixy, jigix co anajty jadu'n ytunyii yjadyii, mmibigipy ajcxy co ñich jedu'n je Cristo. ²⁰ Janch janch yam ajcxy jadu'n nnimaaygixy co je jäy ajcxy huidibi cöbijcp je huidibi anajty nguejxypich, tim jadu'n nipaady jadu'n nej ñich anajty xycöbijcyich. E je jäy ajcxy huidibi xycöbijcpich, je' ajcxy anajty ycöbijcyp je' huidibi xyquejxich ya naaxhuiñ.

Jesús ñimay ymigügtijc co je Judas anajty cüyegaanip ma ymidzip

²¹ Co jadu'n Jesús ymına'ñ, chi tajñip mayñip anajty ooy jotjoty huinma'ñyoty, chi capxypidzimy:

—Janch janch ñich miich ajcxy yam jadu'n nimäy co nidügti miich ajcxy xycüyega'ñich ma nmidzipich.

²² Chi Jesús ydiscípulos ajcxy ñayhuindicxpejttaayi nidüg nidüg. Ca' anajty ajcxy nejhuüy pín anajty jedu'n Jesús ytijyp. ²³ Nidügti je' ajcxy huidibi anajty Jesús ooy müdü ñaychogyii ñäy anajty ma mesi tim huington ma Jesús yhuinduu. ²⁴ Chi Simón Pedro yci' yaj'ijxy yajhuinjihuüy co huen yaj'amidooy Jesús pín anajty jadu'n ytijyp. ²⁵ Chi je discípulos ajcxy huidibi anajty ñaayb ma Jesús yhuinduu nimay yhuindzin:

—¿Pín jadu'n mdijyp?

²⁶ Chi Jesús y'adzooy:

—Yí' je' pín anajty ñich nmooybich yí' tzajcaagy huidibi anajty nyajxoocpyich ma je ügy.

Chi yajxoogy tüg pedasi tzajcaagy, chi moy je Judas, je Simón Iscariote ymang. ²⁷ Tim huin'itüy co Judas je tzajcaagy cöbijcy, chi je mujcu' ytigüy ma je' y'ay yjot. Chi Jesús nimay Judas:

—Yí' huidibi mdunamyb, tungo jadu'n mic'amy.

²⁸ Huidijaty anajty ajcxy jim caayb, ni pín cahuinjihuüy je ayuc huidibi Jesús yajñimay Judas, nej je ayuc yhuimbüdzimy. ²⁹ Com je Judas anajty müdü je meeñybijty, paady ajcxy nijjëjty huinjihuüy co anajty tijy ñimäyii:

—Ñicx juy yí' huidibi ajt nyajmayjajtim yí' xügixpi.

Jacjadyii ajcxy anajty tijy ñimäyii:

—Mo' tigatii ayoobitijc. ³⁰ Tim huin'itüy co je tzajcaagy cayday, chi ypidzimy Judas tiba'y, e ti anajty ycoodzüyñi.

Jesús ñajtz'ane'miy jemybi cötujcín

³¹ Co Judas ypidzimy, chi Jesús ymına'ñ:

—Cham je jäy ajcxy ixa'ñ ñich nmic'ajt ñich n'oy'ajt, ñich je jäy huidibi tzoön tzajpjoty. Etz nañ ma ñich je jäy ajcxy ixa'ñ Dios ymic'ajt Dios y'oy'ajt. ³² Jadu'n nej je jäy ajcxy ti ijxcixy Dios ymic'ajt ma ñich, nañ tim jadu'n Dios yajnigüexigipy yí' nmic'ajtich n'oy'ajtich tim mic'amy. ³³ Migügtijc huidibi ooy ndzocy njihuüyich, ca' n'ochuäcxibaanich jecy müdü miich ajcxy. Xy'ixtähuibich miich ajcxy. Jadu'n nej ti nnimáaygixyich yí' jacjadyii judíojäy ajcxy, nañ jadu'n ñich miich ajcxy yam njacñimaaygixy co ma nnicxa'ñich, ca' huaad miich ajcxy jiiby mnicxcixy. ³⁴ Cham ajcxy nmöhua'ñ tüg ané'min huinjemybi. Cham miich ajcxy nyajnajtz'ane'mihuaangixy jadüg'oc jadayaabi tüy'ajt: Naychójcigix nayjihüüyigix ajcxy nidüg nidüg, tim jadu'n nej ñich miich ajcxy ti ndzocy ti njihuüy. Naychójcigix nayjihüüyigix aguipxyi. ³⁵ Müdü jada ycixpi ñejhuühipy tüg'óciy jäy co ñich miich ajcxy ti nyaj'ixpijccixy co ajcxy nidüg nidüg mnaychogüyb mnayjihüühyb.

Jesús ñimay ymigügtijc co je Pedro anajty coyüdzanip

³⁶ Chi Pedro nimay:

—Huindzin, ¿ma miich mnicxa'ñ?

Huin'it Jesús y'adzooy:

—Ma ñich nñicxa'ñich miich ca' huaad xypanicxyich. Jac'axam xypanicxybyich.

³⁷ Chi Pedro yminañ:

—E ¿nej co ca' huaad jëbi ñich miich nbanicxy? com ñich ngïyegamyich njugy'ajtin ma yi o'cin mïid miich ycixpi.

³⁸ Chi jada' Jesús y'adzooy:

—¿Nej janch co mgïyega'ñ yi mjugy'ajtin ma yi o'cin mïid ñich ycixpi? Janch janch ñich miich ajcxy yam jadu'n nïmây, co ni ca'ni anajty jabom tugig'oc tzey yaaxigy, co ñich miich anajty tugig'oc ti xycoyüchich.

14

Pinjaty mibijcp Jesús nicxip ma Dios Teedy yajpaady

¹ Chi Jesús yjacminañ:

—Ca' ajcxy jotmay mjihuïy ma m'aa mjot mïid jada ayuc. Mibic ajcxy Dios etz ñich nañ jadu'n mibijccich. ² Jiiby ma ñich nDeedy chinây, jiiby mïjtigiydac. Co ixypy ca' yjadu'nity, ca' ixypy ti nnïmaaygixy co nñicxyich ma nDeedyich n'ocni'ixiy tzinaaydac mïid miich ajcxy ycixpi. ³ E co ñich anajty ti nba'ttigïyich, e ti ni'ixïyich tzinaaydac jayijp mïid miich ajcxy ycixpi, huin'it ajcxy nihuimbidity, jëbi ñich ajt naydügmujcim, jigix ma anajty n'ityich, nañ jiiby miich ajcxy m'idipy. ⁴ Miich ajcxy mnejhuïyb nej jëbi ajcxy mjädip ma nñicxyich oyduuby.

⁵ Chi Tomás yminañ:

—Huindzin, ca' ñich ajcxy nejhuïygixy ma miich mñicxa'ñ, e ca' ñich ajcxy nnejhuïygixy nej jëbi njá'tcixibyich jiiby.

⁶ Chi Jesús y'adzooy:

—Jadu'n nej ti ndzinäyich jada je' je ijxpejt nej Dios tzocy co miich ajcxy mdzinähuïpy. Nyejcpyich je tiy'ajt huïdibi jëbi huaad mguychinaaygixy. Co jadu'n mguydundäygixipy ñich ndiy'ajt, chi mjá'tcixipy ma Dios. Nyejcpyich je jugy'ajtin huïdibi ca' tücci'yi ycixy ytigoy. Ca' ni pinjäy yjadipy ma Dios Teedy, peni ca' cuydundäy ñich ndiy'ajt. ⁷ Jadachambi etz nej xii tiempo yjacnicxa'ñ miich ajcxy m'ixy'ajty Dios Teedy. Pen xy'ixy'ajtpich miich ajcxy, nañ m'ixy'ajtyp miich ajcxy Dios Teedy.

⁸ Chi Felipe y'adzoy:

—Huindzin, ñich ajcxy yi Dios Teedy yaj'ijxcich cham cham, e mïid tim yi'yi jotcujc'adipyich ajcxy.

⁹ Paady Jesús nïmay je Felipe:

—Cham xii jimïjt ñicxni maabi ñich nja'ityich mïid miich ajcxy, e ¿ca'ni miich xytïmy'ijxhui'myich Felipe? Yi jäy ajcxy tiibi xy'ijxcixyich, nañ y'ijxyp ajcxy yi' Dios Teedy. E chi jada', ¿nej miich co jadu'n xyñimäyich: “Yaj'ijxcich je Dios Teedy?” ¹⁰ ¿Nej ca' mmibicy co ñich n'ity ma Dios Teedy, e Dios Teedy ijtp ma ñich? Yi ayuc huïdibi ngapxhuäcxypich, ca' yi' ngi'm'ayuc'adyiijich ngi'mdiy'ajt'adyiijich. Yi mijhuinmañ huïdibi ajcxy m'ijxyp ndumybich, yi Dios Teedy huïdibi ijt ma ñich, yi' jadu'n tumb. ¹¹ Mibijccich ajcxy co ñich n'ityich ma Dios Teedy, e Dios Teedy ijtp ma ñich. Peni ca' mdimmibigaangixy, mibic ajcxy mïid je mijhuinmañ ycixpi huïdibi ti nduñich. ¹² Janch janch ñich miich ajcxy jadu'n nïmaaygixy co je jäy ajcxy huïdibi xymibijcpich, nañ ytunipy ajcxy nañ jadu'n yi mijhuinmañ huïdibi ti nduñich. Jac tim nïgi tunipy mijhuinmañ, com ñich nñicxaambich ma Dios Teedy y'ity. ¹³ E tüg'óciy ti miich ajcxy mibijctzooyb ma Dios Teedy mïid ñich nxii, ndunipyich yi'. Dios Teedy huïdibi nDeedy'ajtypich, je' cömay y'idip mïid huïdibi miich anajty ajcxy mdumyb mïid ñich nñic'ajt. ¹⁴ Co myajmibijctzohuïpy tijaty, xycapxpáatibich nxii, huin'it nguydunipyich huïdibi anajty ti mbijctzoogixy.

Jesús yquexamy Dios yjihui'ñ ymic'ajt

¹⁵ Peni xychojcpich miich ajcxy, cuydúnigich ajcxy tüg'óciy n'ayuc ndiy'ajt, jadu'n nej anajty ti nnajtz'ane'mäyich. ¹⁶ E co ndzóonibyich, chi nbijctzóohuibyich yí Dios Teedy jadüg yjaymüd huidibi ajcxy xyjaymüd'adiib. Dios ajcxy xymöhuipy jadüg jaymüd huidibi ajcxy xycapxhuijip, je huidibi ajcxy mjot'amij'adiyb, e je' xymüd'idipy ajcxy huinixi. ¹⁷ Je huidibi xycapxhuijip, je' jada'ajty Dios yjihui'ñ ymic'ajt, je Espíritu Santo. Je' Dios ytiy'ajt ymüd. Dios yjihui'ñ ymic'ajt ca' adigihua'ñ yí naaxhuiñjáy huidibi ca' xymibicyich. Com ca' ajcxy ixu, e nañ ca' ajcxy ixu'adyii je Espíritu Santo. Miich ajcxy m'ixu'ajtyp je Espíritu Santo, com je' tzinaayb ma miich ajcxy, e nañ xy'adigihuiipy xyjottigihuiipy ajcxy. ¹⁸ Ca' miich ajcxy nyajhu'maangixy naydüg jadu'n nej co'ögy'ung. Nnihuibidipyich miich ajcxy jadügtecy. ¹⁹ Tim huingónip yí xii tiempo mina yí jacjadyii naaxhuiñjáy ajcxy ca' xy'ocjac'ixnibich. Com jadu'n nej ich njactzinähua'ñ, ca' ich njugy'ajtin yciixipy ytigoyipy tücci'yí. Nañ jadu'n miich ajcxy mjactzinähua'ñ, ca' mjugy'ajtin ajcxy yciixipy ytigoyipy tücci'yí. ²⁰ Co anajty Dios yjihui'ñ ymic'ajt ajcxy xy'adigiy xyjottigiy, huin'it ajcxy mnejhuihuipy co nyajpaadyich ma nDeedyich, yí Dios Teedy, e miich ajcxy myajpaady ma ich, e ich nañ jadu'n yajpatpich ma miich ajcxy. ²¹ Je jáy ajcxy huidibi ich n'ayuc ndiy'ajtich xycöbijcip, e cuydungixy, je' je' jadu'n xychojcpich, e tzogüib je' ich nDeedy. E ich nañ jadu'n ndzogipy njihuihuibyich je' ajcxy, e nnayyajniguëxigiybich ma je' ajcxy.

²² Je jadügpí Judas, ca' nmīnaanīm Judas Iscariote, nīmay Jesús:

—Huindzin, ¿nej co mnayyajniguëxiga'ñyī ma ich ajcxy, e ca' mnayyajniguëxiga'ñyī ma je jáy ajcxy huidibi ca' xymijpidägy?

²³ Chi Jesús je' y'adzooy:

—Yí jáy ajcxy huidibi xychojcpich xyajmij'ajtpich, xycuydúnibich yí' ajcxy ich n'ayuc ndiy'ajt. E huin'it yí' ajcxy chogüyb ich nDeedy. Je nDeedyich etz ich miinip ich ajcxy ma je jáy ajcxy huidibi xycuyduunip ich ndiy'ajt, e tzinaydacpigipyich ma yí' ajcxy yjot yhuinma'ñ. ²⁴ Je jáy ajcxy pinjaty ca' xychocyich, nañ ca' ajcxy ich n'ayuc xycuyduunich. Paady ca' nnayyajniguëxiga'ñyīijich ma je' ajcxy. Com yí ayuc huidibich miich ajcxy nyaj'amido'ijtyp, ca' yí' ich ngi'm'ayuc'adyii. Yí' je' Dios Teedy y'ayuc ytiy'ajt, com yí' ich ya naaxhuiñ xyquejxich.

²⁵ Jadayaabi ayuc ajcxy cham jadu'n njacyajnimayb, jadu'n nej njacyaanigyich ya naaxhuiñ müd miich ajcxy, ma ca'ni ndzooñich. ²⁶ Per je Espíritu Santo huidi miinam, je' ajcxy xycapxhuijip. Dios Teedy yquexamy je Espíritu Santo müd ich nxi. Je Espíritu Santo xyajnejhuīydāhuipy miich ajcxy tüg'óciy tiy'ajt, e nañ xyaj'ajihuīhuīb tüg'óciy jadu'n nej ich miich ajcxy nnīmaaygixy.

²⁷ Ich miich ajcxy nyajmihui'my jotcuje'ajtin. Jadu'n nej ich njotcuje'atyich, nañ nya-jjotcuje'adipyich miich ajcxy. Yí jotcuje'ajtin huidibi nyajmihūmaamyich miich ajcxy, ca' yí' yjadu'nity nej je jotcuje'ajtin huidibi yajpaatp ya naaxhuiñ. Ca' mdajcixy maygixy, nañ ca' mdzigüygixy. ²⁸ Ti ich miich ajcxy nnīmaaygixy jayijp'aty co ndzona'ñich ma miich ajcxy, e nhuimbida'ñich jadüg'oc ma miich ajcxy. Peni xychojcpich miich ajcxy, mxondägipy ajcxy co nnīcxa'ñich ma Dios Teedy, com yí Dios Teedy jac mij yí' ca'ydi ich. ²⁹ Ti ich jada tiy'ajt jayijp nīmydägyich ma ca'ni ndzooñich, jigix co anajty je tiempo paady mina jadayaabi ytunīyb yjadūyb, huin'it ajcxy mmībigipy ich n'ayuc.

³⁰ E ca' ich miich ajcxy mijcajee ooy njacmüdmīydāgaangixy yam. Com tim huingónip mina je mujcu' huidibi ane'mb ya naaxhuiñ xyñimīna'ñich. Ca' ich yí' huaad jēbi xymīmadägyich. ³¹ Per copicy yí' nguydunipyich Dios Teedy y'ayuc nej xyaj-najtz'ane'mūyich, jigix je naaxhuiñjáy nejhuīhuipy co nyajmij'atyich yí Dios Teedy. Pidëccix, tzoc'ajt huingduum jamim.

15

Je camuuxy'aadz etz y'aacx

¹ Chi Jesús jacnimay ydiscípulos ajcxy:

—Jadu'n ñch nipaady nej camuux'aadz ma tüg muuxy'aadz cam. Hich nDeedy, yi Dios Teedy, jadu'n yi' nipaady nej je muuxy'aadz cam cuend'ajtpi. ² Tüg'óciy jäy jadu'n ajcxy nipaady nej muuxy'aadz y'aacx. Je jäy ajcxy huidibi ca' cuychinäy ñch ndiy'ajt, yi Dios Teedy yajcödigoyñb, jadu'n nej je muuxy'aadz cam cuend'ajtpi quejtzpuxy je muuxy'aadz y'aacx huidibi ca' ytiim'aty. Je jäy ajcxy huidibi cuydundaayb ñch ndiy'ajt, Dios yaj'oyñb je' ajcxy yjot yhuinmañ, jëbi oybi tuñ, jadu'n nej je muuxy'aadz cam cuend'ajtpi huijtz'oyiy je muuxy'aadz y'aacx, jigix jëbi ñgi ytiim'aty. ³ Yi ayuc huidibi ti nyajnimaaaygixy, yi' ti yajhuäch yi jibicpi ma miich ajcxy mjot mhuinmañ. ⁴ Mibijccich ajcxy, panícxigich ajcxy ndiy'ajt huinixii. Co ajcxy jadu'n mdunipy, ñch miich ajcxy miid'idipy huinixii. Jadu'n nej ixypy camuuxy'aadz y'aacx co ca' ytiim'aty co ahuinggujc y'ity, e ca' mic'ajt paady ma ycop. Nañ tim jadu'n miich ajcxy pen ca' mmic'ajt mbaadipy ma ñch, ca' mmimadáaccixipy mguychináaygixipy ñch ndiy'ajt.

⁵ Jadu'n ñch nipaady nej camuuxy'aadz cop, e miich ajcxy jadu'n nipaady nej camuuxy'aadz y'aacx. Je jäy ajcxy huidibi yajpatp ma ñch, e ñch nyajpaady ma je' ajcxy, je' ajcxy oyhuinmañ tunam mij cajee, tim jadu'n nej camuuxy'aadz huidibi tiim'ajtp may'amy. Co ixypy ñch ca' nyajpaady ma miich ajcxy, ca' miich ajcxy huaad ti mdungixy. ⁶ Co jäy ajcxy ndiy'ajt xy'ixmájtzibich, Dios ajcxy yajcödigoyñb, tim jadu'n nej jäy yajcödigoy miid jün yi muuxy'aadz y'aacx huidibi ymibuxñyb co ca' ytiim'ajtni. Co je y'aacx ytidzity, chi ajcxy yajmucy, e pidaaccixy jünjoty, e jadu'n jiiy ñidooyiy jünjoty.

⁷ Co miich ajcxy m'ijtcixy ma ñch, e co ñch n'ayuc nañ jadu'n ijtp ma miich ajcxy mjot mhuinmañ, jëbi mbijctzoogixy ti ajcxy mdzojcyp ma Dios, e nguydunipyich miid miich ajcxy ycixpi. ⁸ Chi je jäy ajcxy cömayipy Dios co miich ajcxy mguydunipy ñch ndiy'ajt tiydudägy, tim jadu'n nej camuuxy'aadz y'aacx ytiim'aty may'amy. Co je jäy ajcxy ixypy nej tudägy mguydungixy ñch ndiy'ajt, chi je jäy ajcxy tiydudägy nejhuñhuipy co ti nyaj'ixpicyich miich ajcxy. ⁹ Jadu'n nej Dios Teedy xychocyich xyjihuiyich, nañ tim jadu'n ñch miich ajcxy ti ndzocy ti njihuñyich. Ndzogipy njihuñhuibyich miich ajcxy huinixii co ca' ajcxy xy'ixmájtzibyich ndiy'ajtich. ¹⁰ Co mguydunähuipy ajcxy jadu'n nej nyajnajtz'ane'müygixy, ndzogipyich njihuñhuibyich miich ajcxy huinixii. Tim jadu'n nej nguyduñich yi huidibi Dios Teedy xyajnajtz'ane'müybich, e yi' xychojcpich xyjihuiybich huinixii.

¹¹ Cham jadaaabi ayuc nyajnajtz'ane'müygixy, jigix jotcuyc m'ijtcixipy. Jadu'n nej jotcuyc ti n'ityich, e nañ jadu'n miich ajcxy mjotcuyc'adipy anaxy. ¹² Jadaabi ayuc ñch miich ajcxy nyajnajtz'ane'müybich co naychójcigix nayjihuiyigix nidüg nidüg, tim jadu'n nej ñch miich ajcxy ndzocy njihuñy. ¹³ Je tiy'ajt jac'oybi co migügtijc ajcxy naychogñyb nayjihuihuñyb, co tüg jäy cýegipy yjugy'ajtn miid ymigügtijc ycixpi. ¹⁴ Hich miich ajcxy migüg'ajtyp, pen mguydumyb nej ajcxy nyajnajtz'ane'müygixy. ¹⁵ Jadu'n nej xii tiempo yjacñxañ, ca' miich ajcxy n'ocnaydijnip ñch ndumbi. Com je tumbi ca' huinjihuñy huidibi yhuindzin ytumyb. Hue' miich ajcxy nyajnaxyich nmigügtijcich, com tüg'óciy tiy'ajt tiibi nmidooyich ma ñch nDeedy, yi Dios Teedy, ti ñch miich ajcxy nnimaaygixy. ¹⁶ Ca' nminaanim ñch miich ajcxy ti xyhuin'ixy. Hich miich janchtiy ajcxy ti nhuin'ixy. E ti ñch miich ajcxy nyajñibicy co ñicxy mgapxhuäcxixy ñch n'ayuc. E nañ mayjäy mijpidägipy je ayuc huidibi miich ajcxy mgapxhuäcxipy. E nañ ñch n'ayuc, huidibi miich ajcxy mgapxhuäcxipy, y'idipy ma je jäy ajcxy yjot yhuinmañ huinixii. Paady ycix tüg'óciy tijaty miich ajcxy mbijctzooyb ma Dios Teedy miid ñch nxii, yi' ajcxy xymöhuipy. ¹⁷ Jada ayuc ajcxy yam nyajnajtz'ane'müyb co ajcxy mnaychogñyb mnayjihuihuñyb miñ xyipy.

Je maybi naaxhuiñy jäy ca' ajcxy ixaangixy Jesús etz cham je' yjäy

¹⁸ Co je may naaxhuiñjyäy ca' xy'ixaangixy miich ajcxy, ca' ajcxy ooy mhuinmayipy, com mnejhuiyb ajcxy co ñich nañ jadu'n jac jayijp ca' yi' ajcxy ti xy'ixáangixyich. ¹⁹ Co ixyipy ytügüy miich ajcxy m'ayuc mdiy'ajt müid je jacjadyii naaxhuiñjyäy y'ayuc ytiy'ajt, huin'it ixyipy ajcxy xychojccixy xyjihuiygyxy, com tú'ciy miich ajcxy mhuinma'ñ ixyipy müid yi' ajcxy yhuinma'ñ. Janch com co ca' ytügüy miich ajcxy m'ayuc mdiy'ajt müid je jacjadyii naaxhuiñjyäy y'ayuc ytiy'ajt, paady je jacjadyii naaxhuiñjyäy ca' ajcxy xy'ixa'nip. Com ñich miich ajcxy ti nyajjihphuijtztüdy, jadu'n nej yi' jacjadyii naaxhuiñjyäy ajcxy chinaaygixy yjugy'ajtcixy. ²⁰ M'ajihuihuib ajcxy jadu'n nej ti nnimaaygixy co ñich miich ajcxy xyhuindzin'ajtpich, paady jac mij ñich ca'ydi miich ajcxy. Jadu'n nej naaxhuiñjyäy ajcxy ti xy'ixhuidityich ti xypahuidityich, nañ jadu'n miich ajcxy yi' xy'ixhuidida'ñ xypahuidida'ñ. Nañ may je jäy huidibi ca' ti xycapxymidooyich, nañ jadu'n may je jäy huidibi miich ajcxy ca' xycapxymidohuaangixy. ²¹ Nijot ajcxy y'iditzaangixy müid miich ajcxy ycixpi, com ca' ajcxy ix'yadyii Dios Teedy huidibi xyquejxyich ya naaxhuiñ.

²² Co ixyipy ca' ti nmiiñich ya naaxhuiñ nyajnimäyich je jäy ajcxy Dios ytiy'ajt, ca' ixyipy ajcxy pocy müidity. Per com ti nmiiñich ya naaxhuiñ, paady cham ypocy ajcxy müidity co ca' ajcxy xy'ixa'ñich. ²³ Je jäy ajcxy huidibi ca' xy'ixa'ñich, jadu'n nipaady nej ñich nDeedy ca' ajcxy ixaangixy. ²⁴ Co ixyipy ñich ca' ti nduñich ma yi' ajcxy yhuinduu mijhuinma'ñ, huidibi ca' ni pin jäy tuñi, ca' ixyipy ajcxy pocy müidity. E janch ti ajcxy ooy ja'ijxcixy je mijhuinma'ñ, e ca' ñich yi' ajcxy xy'ixa'ñ, e nañ ca' ixaangixy ñich nDeedy. ²⁵ Paady jada jadu'n ytuñyii yjadyii, jigix yajcuydunipy jadu'n nej ycojaayity ma yi' judíojäy ajcxy ley ñecy, ma jadu'n ymina'ñ: “Ni ti tiy'ajt ycaca'ty, co ñich yi' ajcxy ca' xy'ixa'ñich.”

²⁶ E co anajty xyñigidaaccixy yi' Espíritu Santo, yi' huidibi xycapxhuijip ajcxy, je huidibi miich ajcxy nyajniguexam, chon ma Dios Teedy, je huidibi Dios ytiy'ajt müid. Yi' xyñidiy'ajt'adaambich co Dios ytiy'ajt nmüidityich. ²⁷ E miich ajcxy nañ jadu'n xyñidiy'ajt'adipich co Dios ytiy'ajt nmüidityich. Com ñich miich ajcxy jayijp nyaj'ixpijctzondac Dios y'ayuc ytiy'ajt.

16

¹ Ti ajcxy yam tiy'ajt njacyajnimaaaygixy, jigix ca' ajcxy m'ixtigihuägipy. ² Com judíojäy ajcxy xy'ixhuidzipy ajcxy ma ajcxy yi' ñaymujctac. Ypadaamy yi' xii tiempo co miich ajcxy jäy xyaj'ögipy, hue' ajcxy tijipy co Dios anajty ooy jadu'n jäygidägy tibi anajty ajcxy tuñ. ³ Paady ajcxy jadu'n xytunipy jibic, je' co ajcxy ca' ix'yadyii yi' Dios Teedy, etz nañ jadu'n ca' xy'ixy'adyiijich. ⁴ Paady ñich miich ajcxy jadachambi jadu'n nnimaaygixy, jigix co anajty je xii tiempo paady, chi m'ajihuihuib ajcxy co ti anajty jayijp nnimaaygixy co ayo'n tzaachypi mminaxa'ñ myajnaxa'ñ ajcxy.

Dios yjihui'ñ ymic'ajt tunam ma jäy yjot yhuinma'ñ

Ca' anajty ajcxy jada ti nyajnimäy müid jëgix nmüidity ajcxy. ⁵ E cham janchtiy nnicxáanibich ma yi' huidibi ti xyquexyich ya naaxhuiñ. E ni tüg miich ajcxy xyca'amidooyich: “¿Ma mnicxa'ñ?” ⁶ Paady miich ajcxy mdajy mmay ma m'aa mjot, co ajcxy cham jadu'n jada ayuc ti nyajhuinjihuiygyxy. ⁷ Oy ixyipy miich ajcxy cham mjatajy mjamay, tiy'ajt nej mmina'ñich co jac'oy müid miich ajcxy ycixpi co nhuimbidityich ma Dios Teedy. Co ixyipy ca' jii by nnicxa'ñich tzajpjoty, ca' ixyipy xyñiminaangixy Dios yjihui'ñ ymic'ajt, je Espíritu Santo, je huidibi ajcxy xycapxhuijip. Per co ñich anajty tzajpjoty ti nhuimbity, huin'it ñich yi' miich ajcxy nyajniguexipy. ⁸ E co anajty je Espíritu Santo miiñ ya naaxhuiñ, huin'it yi' yajjihui'ñybigipy jäy ajcxy ypocy. E nañ yajni'ixihuipy je jäy ajcxy co Dios tiydunib müid ypocy ycixpi. ⁹ Yi' Espíritu Santo yajjihui'ñybigipy jäy ajcxy ypocy, co ñich ca' ajcxy ti xymibicy ca' ajcxy ti xymijpidägyich. ¹⁰ Je Espíritu Santo yajnejhuihuipy jäy ajcxy nej huaad cuychinaaygixy Dios y'ayuc ytiy'ajt. Com co ñich

nba'ttigihuañich ma Dios Teedy, e miich ajcxy ca' xy'ocjac'íjxnibich. ¹¹ Je Espíritu Santo yajhuinjihuip je jáy ajcxy co Dios tiydunib ajcxy miid ypocy ycixpi huídibi ajcxy ca' tiydudägy chinaaygixy. Com yi Dios ti yi' mujcu' tiyduñ miid ypocy ycixpi.

¹² Ooy may ayuc ich nmüidity huídibi njayajnimähuamyich ajcxy per ca' miich ajcxy mhujnjihuipy cham. ¹³ Jacjiini mhujnjihuipy ajcxy je ayuc huídibi njayajnimähuamy ajcxy, co Dios quexipy je Espíritu Santo ya naaxhuiñ huídibi tiy'ajt miid. Yi' je' miich ajcxy xyajhuinjihuipy tüg'óciy Dios ytiy'ajt. Com yi' ca' yci'mhujnmañ tunipy. Yi' janchtiy ñigapxtähuipy tüg'óciy ayuc tiy'ajt huídijaty anajty ymidooyb ma Dios Teedy, e nañ yajniguëxictähuipy tüg'óciy tiy'ajt huídibi mimb cidaacp. ¹⁴ Je Espíritu Santo ich yi' capxpaady xyaj'idipyich, com yi' ich ndiy'ajt miich ajcxy xyajhuinjihuipyaam. ¹⁵ Tüg'óciy huídibi Dios Teedy ymiid, nañ një'ajtypich yi', paady jadu'n ti nminañich co je Espíritu Santo xyajhuinjihuipydäaygixipy ajcxy ich yi' n'ayuc yi' ndiy'ajtich.

Jesús ñimay ymügügtjc co ajcxy yjotmay ahuimbidipy jotcujc'ajtn

¹⁶ Tim huaad'ajtp xii tiempo, co ich miich ajcxy ca' xy'ocjac'íjxip. Chi co xii tiempo yjacnajtznüicxihuip, huin'it ich miich ajcxy xyjac'ixipy jadüg'oc.

¹⁷ E huin'it ajcxy nijëjity Jesús ydiscípulos ajcxy ñayñimaayi miñ xyipy ac jëyi:

—¿Ti jadu'n ytijyp? Co jadu'n yminañ, co tim huaad'ajtnip xii tiempo mina ich miich ajcxy ca' xy'ocjac'íjxnibyich, e co yjacnajtznüicxihuip xii tiempo, huin'it miich ajcxy xyjac'ixipyich jadüg'oc, com nñicxaamich ma Dios Teedy. ¹⁸ Chi ajcxy jadu'n ñayñimaayi miñ xyipy:

—¿Ti jadu'n ytijamy? Co jadu'n yminañ co tim huaad'ajtnip xii tiempo. Ca' ich ajt nhujnjihuipim ti jadu'n ytijamy.

¹⁹ Com Jesús ñejhuipb anajty nej ajcxy yja'amidoohuañyii, chi ñimay ajcxy:

—Yi' miich ajcxy ooy mjayajtihuañ. ¿Nej co jadu'n ti nminañich? Tim huaad'ajtnip xii tiempo co ich miich ajcxy ca' xy'ocjac'íjxnipy. E chi yjacnajtznüicxihuip xii tiempo, e chi miich ajcxy xyjac'ixipyich jadüg'oc. ²⁰ Janch janch ich miich yam nñimaaygixy co mjotmaybaadip ajcxy, e nañ myäxip ajcxy miid jotmay. Chi je naaxhuiñyjäy ajcxy huídibi ca' xymijpidägyich, xondägam ajcxy, e miich ajcxy nañ mjotmaybaadip. Per yi' mjotmay ajcxy ahuimbidipy tüg xondaacin. ²¹ Jadu'n ajcxy mjadañ jadu'n nej tüg töxyjäy tzaachypi jihuip co y'ung yma'xung'adañ. E co ti yma'xung'aty ypi'c'ung, chi jäydgoy yi' tzaachypi miid xondaacin co tüg jäy ti ymiiñ ya naaxhuiñ. ²² Tim jadu'n nej yjaty miid je töxyjäy, nañ jadu'n yjadañ miid miich ajcxy. Cham ajcxy jotmay mjihuip ma m'aa mjot, e chi co xy'ixipyich jadüg'oc miich ajcxy, huin'it ajcxy m'aa mjot yxondägañ. E ni pin huaad mxondaacin ajcxy xycapijcipy.

²³ Je huin'it ximbi (co anajty je Espíritu Santo ti ymiiñ ya naaxhuiñ) ca' ich miich ajcxy ni ti xyjacyajmbijctzohuipyich, com janch ich miich ajcxy yam jadu'n nimaaygixy co tüg'óciy huídijaty myajmayajtcixyp, chi ajcxy mbijctzohuipy ma Dios Teedy miid ich nxi, e xymöhuipy ajcxy yi'. ²⁴ Chambaadni ca'ni ni ti ajcxy mbijctzoy ma Dios miid ich nxi. Pijctzoogix, e xymöhuipy ajcxy yi', jigix mjotcugihuip ajcxy anaxy.

Jesucristo ymimadac je jibic-huinmañ ya naaxhuiñ

²⁵ Tüg'óciy jada ayuc tiy'ajt ac jihuimbit miich ajcxy ti nyajnimäy. Huingomb xii tiempo mina tiydudägy ajcxy nyajmiidmüydactähuipy yi' Dios Teedy y'ayuc ytiy'ajt yajxon, e ca' y'ocjihuimbitiñ. ²⁶ Je huin'it xii co anajty ich ti nhuimbityich ma Dios Teedy, jëbi miich ajcxy mbijctzoogixy ma Dios Teedy tijaty ajcxy myajmayajtyp. Co ti mbijctzóogixipy miid ich nxi, xymóoygixipy yi' Dios Teedy. Ca' ycopicyity co ich yi' nmibijctzohuipy miid miich ajcxy ycixpi. ²⁷ Com yi' Dios Teedy nañ xychojcp xyjihuipb yi' miich ajcxy. Com miich ajcxy jayjip ti xychocyich ti xyjihuyich, e ti

mmibicy ajcxy co ti ndzooñich ma Dios Teedy, paady Dios miich ajcxy xymöhuipy tijaty anajty myajmibijctzooyb. ²⁸ Jiiby ñich ndzooñ ma Dios Teedy yajpaady, co nmiñich ya naaxhuiñ, per jadachambi n'ixmájtznibyich jada naaxhuiñybi, e nhuimbijtnich ma Dios Teedy.

²⁹ Huin'it je' ydiscípulos ajcxy ymínañ:

—Cham janchtiy tudägy miydägy, ca' m'ocyajtuuni jñhuimbit ayuc. ³⁰ Cham ñich ajcxy nnejhuüy co miich mnejhuüyday tüg'óciy tiy'ajt. E ti xyajnimaydäyich co anajty ca' ti tiy'ajt ñich ajcxy nmibicy co miich mdzooñ ma Dios.

³¹ Chi Jesús y'adzooy:

—¿Nej mmibijcyp cham jada ayuc jadu'n nej ti nnimáaygixy? ³² Jihui'ñybijccix co huingtonip je xi tiempo, e ti tim paady mína miich ajcxy mgueec-huäcxtáaygixipy nidüg nidüg ma pin timdzocy, e xyajhuí'ngixich naydüg. Per ca'p ñich nnaydügity, com yi Dios Teedy yí' ijtp mñd ñich. ³³ Miich ajcxy yam jada ayuc nyajnimayyb, jigix ajcxy jotcujc'ajtin mbaadip ma ñich. Ya naaxhuiñ mbadamy ajcxy ayo'n etz tzaachypi. Jotcugñyigix, ca' mdajcixy maygixy, com ti nmimadägyich yi jibicpi ya naaxhuiñ.

17

Jesús ymibijctzou Dios mñd ydiscípulos ajcxy ycixpi

¹ Co Jesús jadu'n ymínañ jayijp, chi ypa't'ijxy tzajpcíxy, chi Dios Teedy pa'tcapxy nimay:

—Dios Teedy, ti hora paady mína ayo'n nyajnaxa'ñich jadu'n nej miich jayijp'aty myajnihuinmayñy. Yajniguëxig ñich nmic'ajt ñich n'oy'ajt, com ñich miich nDeedy'ajtypich, jigix ñich nañ jadu'n nyajniguëxigibyich miich nmic'ajt miich m'oy'ajt ma yi jäy ajcxy.

² Com miich ti xymöyich mic'ajt ma tüg'óciy jäy, jëbi nmöyich ajcxy jugy'ajtin huidibi ca' ycixipy ytigoyipy. Nmöhuibyich jada jugy'ajtin tüg'óciy jäy ajcxy huidibi miich ti xymöyich. ³ Je jäy ajcxy huidibi ix'y'ajtp je Dios janchypi, je Dios tügpajcpi etz y'ixy'ajtyp nañ jadu'n Jesucristo huidibi ti mguexy ya naaxhuiñ, ymñd ajcxy jugy'ajtin huidibi ca'ycixipy ytigoyipy nimínaa.

⁴ Ti ñich nyajniguëxigyich miich ajcxy yi nmic'ajt ya naaxhuiñ, co ñich ti nduñ yi mdung huidibi miich xyajniñijcich. ⁵ Jadachambi Dios Teedy yajmijtigñyigich miich, mñd je mic'ajtin huidibi anajty mñdich ma miich mhuinduu co anajty ca'ni naaxhuiñybi chondacyñi.

⁶ Ti ñich miich ya naaxhuiñ nyajniguëxici yi nmic'ajt ma yi jäy ajcxy huidibi miich xymooyich, huidibi miich mhuin'ijx ma naaxhuiñyjäy ajcxy. Miich yí' ajcxy mjäy, e miich ti xymöyich, e ti ajcxy miich m'ayuc cuydungixy. ⁷ Jadachambi ñejhuñyñip yí' ajcxy, co tüg'óciy tijaty tiy'ajt ñich miich yí' xymooyb, jiiby yí' chooñ tzajpjoty ma miich. ⁸ Com yi ayuc huidibi miich ti xymöyich, ti ñich yí' ajcxy nyajnimaydäy, e ti yí' ajcxy cöbijccixy. E nañ ti ajcxy huinjhuñyigixy tiydudägy co ñich jiiby ndzooñich ma miich, e nañ ti ajcxy mibijccixy co miich ya naaxhuiñ xyquejxyich.

⁹ Mñd yí' ycixpi ajcxy miich Dios Teedy nmibijctzooy, ca' nmínaaním mñd jacjadyii naaxhuiñyjäy ajcxy ycixpi nmibijctzoy. Mñd yí'ada'ajty ycixpi ajcxy huidibi miich ti xymöyich, com nañ mjé'ajtyp miich yí' ajcxy. ¹⁰ Tüg'óciy tijaty ñich njé'ajtyp, nañ mjé'ajtyp miich yí', e tijaty miich mjé'ajtyp nañ njé'ajtyp ñich yí'; e ñich nmic'ajt niguëxi'cp yí' ma yí' ajcxy chinaayin yjugy'ajtin.

¹¹ E ca' n'ocjacyajpadaanich ya naaxhuiñ. ñich njäy ajcxy jacyajpadam ya naaxhuiñ. Nñicxnibich jiiby tzajpjoty ma miich. Dios Teedy, cuend'at ñich ndiscípulos ajcxy mñd miich nmic'ajt huidibi miich ti xymöyich, jigix yí' ajcxy tú'ciy yjot yhuinma'ñ yajpaadipy ma miich, tím jadu'n nej ñich ajt tú'ciy njot yhuinma'ñ nyajpaatím. ¹² Co anajty ñich njac'yaajity naaxhuiñ mñd ñich njäy ajcxy, ti ngüend'atyich anajty ajcxy mñd je mic'ajt huidibi miich xymooyich. E ni tüg'ajcxy ca' yhuinma'ñyidigooy. Abicy ñich n'octimpidägy

je huidibi nayyajhuinma'ñydygooyi (je Judas Iscariote), co yi' anajty jadu'n yajcuydunam jadu'n nej jaybety ymiiñ miiid yi' ycixpi etz miiid ich ycixpi.

¹³ Cham ich miich niba'ttigihuaani jada'. Miich m'ayuc mdiy'ajt nyajnimaaaybich jada naaxhuiñyäjy ajcxy huidibi nyaj'ixpijcyich, jigix aguyc jotcuyc yhui'mip ajcxy. ¹⁴ Ti ich ajcxy yi' nyajnimaydäyich miich m'ayuc mdiy'ajt. E ca' ajcxy y'ixa'ñyii yi' naaxhuiñyäjy ajcxy huidibi ca' xymijpidägyich. Com je' co ajcxy yjot yhuinma'ñ ti yajtigach, ca' ytügüy miiid yi' jacjadyii naaxhuiñyäjy yjot yhuinma'ñ. Jadu'n nej ich ca' ytügüy njot nhuinma'ñ miiid naaxhuiñyäjy ajcxy yjot yhuinma'ñ. ¹⁵ Ca' ich cham miich nmibijctzoy co myajpidzimipy ich ndiscípulos ajcxy ma jada naaxhuiñybi. Hue' janchtiy tun may'ajt cuend'at ajcxy ma yi' ca'oybi ymiiñ. ¹⁶ Yi' ajcxy yjot yhuinma'ñ ca' ytügüy miiid yi' jacjadyii naaxhuiñyäjy ajcxy yjot yhuinma'ñ. Tim jadu'n nej ich ca' ytügüy njot nhuinma'ñ miiid yi' jacjadyii naaxhuiñyäjy ajcxy yjot yhuinma'ñ. ¹⁷ Yajhuaatzä ajcxy yjot yhuinma'ñ miiid miich m'ayuc, com yi' m'ayuc yi' je' tiy'ajt miiid. ¹⁸ Jadu'n nej miich xyquejxyich ya naaxhuiñ, nañ jadu'n ich yi' ajcxy nguejxhuäcxyich ya naaxhuiñ. ¹⁹ Miiid yi' ajcxy ycixpi ti nnaygyeygyiijich amuumdüg'jot ma miich, jigix yi' ajcxy nañ jadu'n ñaygyeygyib amuumdüg'jot ma miich, co ajcxy cuydunipy miich m'ayuc mdiy'ajt.

²⁰ E ca' ich jada'ajty ajcxy nibijctzohuüyich. Hue' ich janchtiy nibijctzohuüydaaybich tüg'óciy jäy ajcxy huidibi xymibijcibich xymijpidägibich miiid yi' ayuc huidibi ich ndiscípulos ajcxy ycapxhuäcxyipy. ²¹ Huen ajcxy nidüg'óciy yjot yhuinma'ñ yajtügüy, jadu'n nej miich Dios Teedy mjot mhuinma'ñ yajpaady ma ich, e ich njot nhuinma'ñ yajpaady ma miich. Co yi' ajcxy yjot yhuinma'ñ yajtügühuipy miiid ich ajt njot nhuinma'ñ, huin'it jacjadyii naaxhuiñyäjy ajcxy mibigipy co miich xyquejxyich ya naaxhuiñ. ²² Ti ich ajcxy nmöyich je tiy'ajt etz je oy'ajt huidibi ich miich ti xymöy, jigix ajcxy yjot yhuinma'ñ jatymy yajtügühuipy ajcxy, jadu'n nej ich ajt njot nhuinma'ñ yajpaatim tú'ciy. ²³ Ich yajpatpich ma ich njäy, e miich nañ myajpatp ma ich, jigix tiydudägy ajcxy tüg'mucy y'idipy, e nañ jigix naaxhuiñyäjy ajcxy jatymy nejhuühuipy co miich xyquejxyich ya naaxhuiñ, e nañ co yi' ajcxy ti mdzocy ti mjihuüy jadu'n nej ich miich xychocy xyjihuüyich.

²⁴ Dios Teedy ndzojcpyich co yi' jäy ajcxy huidibi miich ti xymöyich y'idipy ajcxy nañ jadu'n ma anajty n'ityich jüby tzajpjoty, jaydëbi ajcxy ixipy ich nmic'ajt ich n'oy'ajt huidibi miich ti xymöyich. Com miich ti xychocy ti xyjihuüyich jacjayijp ca'ni anajty naaxhuiñybi myajcojyñi. ²⁵ Dios Teedy, miich ooy mmijity mjanchity, e yi' jacjadyii naaxhuiñyäjy ca' ajcxy yi' xy'ixy'ajtyp. Ich miich n'ixy'ajtyp. Ich njäy ajcxy ti mibicy ti mijpidägy co miich xyquejxyich ya naaxhuiñ. ²⁶ Ti nyajnimaaayich yi' ajcxy pin miich, co miich je' Diosip. E njacyajnimähuaamyich yi' ajcxy tiydudägy, jigix yi' ajcxy nañ jadu'n ñaychogüyb ñayjihuühuüyb nidüg nidüg, jadu'n nej miich xychocyich xyjihuüyich, e nañ jadu'n jigix ich ndiy'ajt yajpaadipy ma yi' ajcxy yjot yhuinma'ñ.

18

Ymajtz ajcxy Jesús

¹ Co jadu'n Jesús ycapxymiydacy jayijp, chi jada' ñicxy miiid je jäy ajcxy huidibi anajty ajcxy yaj'ixpijcy. Ñicxy ajcxy jim'amy huoc ninaxy, je huoc hue' anajty xijity Cedrón. Ñicxy ajcxy jim ma anajty tüg aguemy. Chi Jesús ytigüy ma je aguemy miiid ydiscípulos ajcxy. ² Judas huidibi anajty ciyegam Jesús, ñejhuüyb anajty ma je it ma anajty miiid'oy canaag'oc je' ydiscípulos ajcxy. ³ Chi jada' Judas miiidzooñ soldados ajcxy etz jacjadyii tungmiiidpi huidibi je teedy yhuindzin ajcxy etz fariseojäy ajcxy yquejx. Chi ajcxy yja'ty ma je it ma anajty Jesús yajpaady, ymiiid ajcxy linterna, ymiiid ajcxy chinjin etz

canaagnax tijaty huídibi anajty ajcxy m̄id chiptuñ. ⁴ E Jesús com ñejhuydaayb anajty t̄üg'óciy nej anajty yjada'ñ y'ayohua'ñ, chi j̄jpcohuäḡiy je ymaym̄idzip ajcxy, e ñimay:

—¿P̄in ajcxy m'ijxtaayb?

⁵ Chi je' ym̄idzip ajcxy y'adzooy:

—Yi' ñch ajcxy n'ixtaayb je Jesús, je Nazaret j̄äy.

Chi Jesús ym̄inañ:

—Ñich j̄ëdu'n.

Je Judas huídibi anajty c̄ıyejcp Jesús, j̄im anajty ytinäy m̄id Jesús ym̄idzip. ⁶ Co Jesús jadu'n ym̄inañ: “Ñich j̄ëdu'n.” Chi ajcxy ȳëphuimbijtay jadu'ñyi. ⁷ Chi Jesús jad̄üg'oc y'am̄idooy ajcxy:

—¿P̄in ajcxy m'ijxtaayb?

Chi ajcxy jad̄üg'oc y'adzooy:

—Yi Jesús, je Nazaret j̄äy. ⁸ Chi Jesús ym̄inañ:

—Ti ajcxy njanim̄äy co ñch j̄ëdu'n. Pen janch ñch miich ajcxy xy'ijxtaayb, najtz-madziydäy jadayaab ñch nm̄iḡügt̄ijc ajcxy, huen ñicxc̄ıxy.

⁹ E jadu'n yajcuyduñ je ayuc co anajty Jesús c̄ı'm ti ym̄inañ: “T̄üg'óciy j̄äy huídibi nDeedy ti xym̄öyich, ca' ni t̄üg'j̄ëbi huaad yt̄ıgooy.” ¹⁰ Chi jada' je Simón Pedro huídibi anajty m̄id t̄üg'espada, juudy je y'espada ma ñid̄ıjc, e chi yajtzaach̄ıyi je Teedy m̄ıjtungm̄ıdp̄ı ytumbi, t̄üg' yta'tz'ac aa'oy'amybi yajm̄ınáj̄ıcy. Je tumbi hue' anajty x̄ıj̄ıty Malco. ¹¹ Chi Jesús ñimay Pedro:

—P̄ıdäg' m'espada ma ñid̄ıjc. Ca' mnejhūıy co cop̄ıcy nyajnax̄ıpyich je tzaachyp̄ı je ayo'n huídibi Dios Teedy ti xyajnigo'aduḡıyich. Min n'ocm̄ınaxy n'ocyajnaxyich jada tzaachyp̄ı jadu'n nej ix̄ıpy t̄üg' tasi ta'm'ujtzn̄ı ngo'uucnaxyich.

Jesús ma je Teedy m̄ıjtungm̄ıdp̄ı yhuinduu

¹² Chi je soldados ajcxy, je soldado yhuindzin etz judıoj̄äy ajcxy ytungm̄ıdp̄ı huingo-huäḡıy ajcxy Jesús. Chi ajcxy majch, e chi ajcxy c̄ıxojch. ¹³ Chi ajcxy jaȳıjp̄ı yajnıcx̄ıy Jesús ma Anás yajpaady, je' anajty Caifás ym̄ıd'ajtyp, je huídibi anajty m̄ıjtungm̄ıd ma teedyt̄ıjc ajcxy ym̄ıñ je huin'it j̄ım̄ıjt. ¹⁴ Je Caifás je' anajty ti yecy je capxhuij̄ın ma yi judıoj̄äy ajcxy co t̄üg'tecy ym̄inañ: jac'oy co t̄üg' j̄äy y'öḡıpy m̄ıd t̄üg'óciy naax cajp̄ı yc̄ıxp̄ı.

Pedro ym̄inañ co ca' ix̄ı'adyii Jesús

¹⁵ Simón Pedro m̄ıd jad̄ügp̄ı ydiscípulo ypanıcx̄ı ajcxy Jesús (co je ym̄idzip yajnıcx̄ı mach). E je jad̄ügp̄ı ydiscípulo ix̄ı'ajtip anajty yajxon je teedy m̄ıjtungm̄ıdp̄ı, paady yt̄ıḡıy axam huin'it co Jesús ym̄idzip yajt̄ıḡıy ma je teedy m̄ıjtungm̄ıdp̄ı yt̄ıjc. ¹⁶ E je Pedro j̄ııby je' yhui'm̄ıy ma t̄ıjc aguü. E je jad̄ügp̄ı ydiscípulo co anajty ajcxy ñay'ix̄ı'adyii m̄ıd je teedy m̄ıjtungm̄ıdp̄ı, chi ypidzımy m̄ıgapxy je t̄ıjc aguü adınaayb, chi Pedro ajcxy yajt̄ıḡıy j̄ııby t̄ıgoty. ¹⁷ Chi jada' je töxy'anäg huídibi anajty t̄ıjc'aguü adınaayb, ñimay je Pedro:

—¿Nej ca' miich nañ jadu'n Jesús xydiscípulo'adyii?

Chi Pedro y'adzooy:

—Ca'.

¹⁸ Je tumbid̄ıjc ajcxy etz je soldadt̄ıjc ajcxy ti anajty ajcxy oy j̄ın yajm̄ıj̄ıygȳıxy co anajty chacht̄ıchıty, e Pedro nañ j̄ım̄ı anajty nañ jadu'n m̄ıd xamy ajcxy.

Je teedy m̄ıjtungm̄ıdp̄ı yajcom̄ıdou Jesús ypocy

¹⁹ Chi je teedy m̄ıjtungm̄ıdp̄ı y'am̄idooy Jesús p̄ınjaty anajty ti yaj'ix̄ıpy etz tijaty anajty ti yaj'ix̄ıpy. ²⁰ Chi Jesús y'adzooy:

—Ti ñch oy njacapxy njam̄ıydägy mayj̄äyoty. E ti ñch njatyımy nyaj'ix̄ıpyich ma miich ajcxy mnaymujctacın etz ma Dios yt̄ıjc, ma yi judıoj̄äy ajcxy nid̄üg'óciy ñaymugyii. Ca' ni ti ameech ti nnıgapxyich. ²¹ ¿Na'amy co xyjactim'am̄idooyich ti anajty ti nyaj'ix̄ıpyich?

Yi' ajcxy amidou pinjaty ti xy'amido'ijtich n'ayucich, yi' ajcxy nejhuiyb ti ich jadu'n ti nyaj'ixpicich. Yi' ajcxy tüg'óciy ñejhuiydaayb nejaty ich ti m'ina'ñich.

²² Co jadu'n y'adzooy Jesús, huin'it tüg judío tungm'ídpí huídibi anajty jim huington tinaayb ma Jesús, chi tüg ci' acojxígy Jesús, chi m'inañ:

—¿Nej co jadu'n jibic m'adzooy yi teedy m'itungm'ídpí?

²³ Chi Jesús y'adzooy:

—Pen jibic ich ti n'adzooy yec tiy'ajt nej co yjibicity. Pen oy ich ti n'adzooy, ¿nej co xycoxyich?

²⁴ Chi Anás nimay soldadtijc co huen Jesús yajnicxy c'íxoch jim ma yi Caifás ytijc, je teedy m'itungm'ídpí.

Chi Pedro jadüg'oc ym'inañ co ca'ixy'adyi Jesús

²⁵ Simón Pedro jimni anajty ytinäy ma jimba' yxamy anajty, chi ajcxy amidoy jadüg'oc:

—¿Nej cay yi' miich xyaj'ixpijcp nañ jadu'n?

Chi Pedro jadüg'oc coyüch Jesús ym'inañ:

—Ca' je' n'ichity.

²⁶ Nidügti ajcxy je teedy m'itungm'ídpí ytumbi, je' anajty y'amigüg yi Malco, huídibi Pedro yta'tz'ac quejtzpujxi, chi jadu'n ym'inañ:

—¿Nej ca' mdijy n'ixxyi jim ma je aguemy m'íd Jesús?

²⁷ Chi Pedro midug'íg'oc oy coyüch yhuindzin, e tim huin'itiy tzey oy yaaxígy.

Jesús ma je gobernador yhuinduu

²⁸ Chi ajcxy jim yajzooñ Jesús ma Caifás ytijc yajnicxy ajcxy ma agujctijc, tim jopyñi anajty. Chi je judiojáy ca' ajcxy ytigíy ma agujctijc, com ca' anajty ytundigoyaangixy m'íd judiojáy ycostumbre. Ca' ajcxy ytigíhua'ñ anajty ma je romanojáy gobernador ytijc amayxíjoty, e ca' anajty ajcxy ñayyajjibic'íhua'ñyí. Com co jadu'n ycanayyajjibicityi ajcxy, e huin'it ca' ajcxy ycacaay ma je pascua xi' adzuu'ajtin. ²⁹ Co ca' ajcxy ytigíhua'ñ anajty ma je agujctijc, chi je gobernador Pilato nibidzimy ajcxy t'iba'y ma anajty ajcxy m'ídití Jesús cuend'aty. Chi Pilato ym'inañ:

—¿Ti x'íhuin ajcxy m'íd, m'íd jadayaabi yéydijc?

³⁰ Chi ajcxy y'adzooy:

—Co ixypy ca' ti jibicpi tuñ, ca' ixypy ich ajcxy ya yi' nyajmiñ ma miich.

³¹ Chi Pilato ym'inañ:

—Yajnicxcix miich ajcxy. Nicx tiydungix jadu'n nej miich ajcxy mley y'ané'my.

Chi je judiojáy ajcxy y'adzooy:

—Ich ajcxy ca' ni ti mic'ajt m'ídití nicxy ich ajcxy njäyyaj'ögy.

³² Co jadu'n ajcxy ym'inañ, chi jadu'n ajcxy cuyduñ je Jesús yci'm'ayuc jadu'n nej anajty ti ym'inañ ti o'cin anajty ypadamy. ³³ Chi Pilato jadüg'oc ytigíy jüby agujctigoty, chi coyaaxíy Jesús, chi nimay:

—¿Nej miich je' rey'ajtp ma yi judiojáy ajcxy?

³⁴ Chi Jesús y'adzooy:

—¿Nej mgi'mhuinma'ñ m'íd xy'amidooyich pen ich nrey'ajtpich, o huingjáy ti xyajnimäy co nrey'atyich?

³⁵ Chi jada' Pilato y'adzooy:

—¿Nej nañ judiojáy jada' ichi? Mgi'mnaax mgi'mgajp etz je teedy m'itungm'ídpí ti xyciyecy ma ich. ¿Ti ti mdundigooy?

³⁶ Chi Jesús y'adzooy:

—Ich ca' n'ane'myich ya naaxhuiñ. Huingduum ich n'ané'min m'ídidyich. Co ixypy ya naaxhuiñ n'oc'ane'myich, tüg'óciy ich nmigügtijc ajcxy ti ixypy ajcxy tziptungixy, ti ixypy ajcxy xyñihua'ñich. E ca' ixypy ti naygíyegyijich ma yi judiojáy tungm'ídpí ajcxy. Per janch ich ca' ich ya naaxhuiñ n'ane'myich.

³⁷ Chi Pilato y'adzooy:

—¿Nej mrey miichí?

Chi Jesús ymínañ:

—Miich jadu'n xytijypich co nrey'atyich. Paady ti nmiñich ya naaxhuiñ, e ti nma'xung'atyich, jigix nyecyich tiy'ajt tiydudägy. Tüg'óciy yi jäy pinjaty tiy'ajt cuydumb xy'amido'íjtibich yi' n'ayucich.

Pilato y'ane'my huen Jesús yaj'ögyii

³⁸ Chi Pilato y'adzooy:

—¿Ti jadu'n mdiy tiy'ajt tiydudägypí?

Jadu'ñyi je' jada'ajty yjacmínañ, chi pidzimy jadüg'oc tiba'y ma anajty je judíojäy ajcxy. Chi ajcxy nimay:

—Ca' ñich ni ti bocy nbaadyich ma jada jäy ma yi romanojäy yley. ³⁹ E com miich ajcxy miid tüg costumbre co tüg nnajtmadzíyím machyjäy miid jada pascua xí ycixpi, ¿nej mdzojcy ajcxy co nnajtmadzíhuíbyich jada judíojäy reyí?

⁴⁰ Chi ajcxy nidüg'óciy minanday:

—Jadayaabi jäy ca' mnajtmadzíhuípy, yi' janchtiy mnajtmadzi' yi Barrabás.

Barrabás hue' je' anajty tüg meetzpi.

19

¹ Chi jada' Pilato ané'min pidacy co huen ajcxy Jesús huinhuopy jipphuopy. ² Chi jada' je soldados ajcxy yaj'oyíy tüg corona mij'apy pa'apy, chi ajcxy yajcojeniy Jesús. Chi ajcxy yajnijeníy tüg rey yhuit ucypí ycolor. ³ Chi soldados ajcxy huingohuägíy jadüg'oc capxpooxcixy yajxígy'amy, nimaaygixy:

—¡Viva miich judíojäy rey!

Chi ajcxy ooy huingojxy jipcojxy.

⁴ Chi Pilato jadüg'oc ypidzimy tiba'y. Chi nimay je mayjäy:

—Cham ajcxy nyajpidzimy tiba'y jada Jesús, jigix ajcxy mnejhuíhuíp co ca' ni ti pocy ti nbaadyich ma yi'.

⁵ Co Jesús ypidzimy tiba'y miid je apy corona ma ycohuajc etz je rey yhuit ucypí ycolor. Huin'it Pilato ymínañ:

—Ijxcix, cha je yéydíjc.

⁶ Co je teedy tungmídpí etz je judíojäy ajcxy ijxy, chi ajcxy yminanday nidüg'óciy aguipxyjatyi:

—Yajcruudzpet, yajcruudzpet.

Chi Pilato ymínañ:

—Yajcruudzpejtcix miich ajcxy, janch ñich ca' ni ti tiy'ajt nbaadyich nej ñich yi' nyajcruudzpedípy.

⁷ Chi je judíojäy ajcxy y'adzooy:

—Ñich ajcxy miid tüg cötujcín, jébi y'ögy miid ñich ajcxy ngötujcín ycixpi, com ti ycapxtigooy co ymínañ co yi Dios yteedy'ajtyp.

⁸ Co jada ayuc midooy Pilato, chi nígi chigíygoty. ⁹ Chi ytigíy jadüg'oc ma je cötujctac miid Jesús, chi nimay:

—¿Ma miich tíyi mgogajpity?

E Jesús ca' y'adzooy.

¹⁰ Paady Pilato ymínañ:

—¿Ñich miich ca' xy'adzohua'ñ? ¿Ca' mnejhuíy co nmídidyich mic'ajt jébi nnajtmadzíy etz nañ jébi nyajcruudzpety?

¹¹ Chi Jesús y'adzooy:

—Ni ti mic'ajt ixypy mgamüdüty ma ich, pen ca' ixypy mic'ajt ti xymöyich yi huídibi ane'mb jüby tzajpoty. E paady ycixpi yi tübi ich xycüyecyich nigi yi' pocy müdüty ca'ydi miich.

¹² E huin'it Pilato ooy yjahuinma'n ixtay nej huaad ca' jëbi ocnajtzmazüy Jesús. E je judíojäy, je Jesús ymidzip, nigi anajty ajcxy chachx'i'dich:

—Pen miich mnajtzmazüyb jada Jesús, huin'it ca' m'ocjacnaymüg'ájtinipy müd yi mhuindzin je César huídibi ané'min ti xymöy. Com tüg'óciy pinjaty naydijip rey, ca' yi' müd nay'ixa'nyii je César.

¹³ Co Pilato jadu'n ayuc müdooy, chi yajpidzimy Jesús tiba'y. Chi Pilato y'ixtacy jim ma je' y'ane'mdac ycötujctac, jim ma je it huídibi anajty xijip Empedrado, hebreo'amy xijity Gabata. ¹⁴ Hue' tim cujcxü anajty, e chi com jabom anajty je pascuaxü ycodücxni, co Pilato jadu'n nimay judíojäy ajcxy:

—Cha ajcxy jada mrey.

¹⁵ E je' ajcxy y'adzooy:

—Huen ögy, huen ögy. Yajcruudzpet.

Chi Pilato yminañ:

—Miich ajcxy mrey, ¿miñ n'ocyajcruudzpétyichi?

Chi je teedy tungmüdpi ajcxy y'adzooy:

—Ich ajcxy ca' ich ajcxy huingbi rey nmüdüty, jëyi César ich ajt nrey'ajtim.

¹⁶ Chi Pilato cüeycy Jesús ma je judíojäy ajcxy, huen ajcxy ci'm yajcruudzpety. Huin'it ajcxy Jesús nihuägüy. Chi ajcxy yajtzoñ.

Yajcruudzpejty ajcxy Jesús

¹⁷ Chi ajcxy je cruudz Jesús ci'm yajquejycabiüy. Müd nicx ajcxy ma je it xijity o'cpi cohujc, hebreo'amy xijity Gólgota. ¹⁸ Jim ajcxy yajcruudzpejty quipxy müd jametz jäy, tüg anajty'amy, jadüg a'oy'amy etz Jesús cujc'amy. ¹⁹ Chi Pilato ane'my huen cijxjay ayuc ma je cruudz, e jadu'n je ayuc ajcxy jay: “Jesús, Nazaret jäy, je judíojäy ajcxy yrey.”

²⁰ May ajcxy ooy je judíojäy capxy je ayuc huídibi anajty cijxjay ma je cruudz. Com je it ma anajty ajcxy Jesús ti yajcruudzpétcixy mihuingon anajty Jerusalén. Hue' anajty yjayty: hebreo'amy, latin'amy etz griego'amy. ²¹ Chi je teedy mijtungmüdpi ajcxy nimay je Pilato:

—Ca' ixypy jadu'n ti mjay: “Judíojäy yrey”. Hue' ixypy ti mjay: “Yi' jadu'n naydijip ich judíojäy xyrey'ajtpich.”

²² Chi Pilato y'adzooy:

—Yi tübi njaayich, ti ich yi' njaay, ca' nyajtigadza'nich.

²³ Co soldados ajcxy yajcruudzpejtay je Jesús, huin'it je' y huit ajcxy huijtzi'ci. Chi ajcxy je huit yajhuäcxy müdaaxpicy. Chi soldados ajcxy cijptüg cüchypijcy. Yi' yjocxhuit jadu'n nej anajty ytügjipxuyity. ²⁴ Chi ajcxy ñayñimay ac jëyi soldadtijc:

—Ca' huaad ajt n'agüdzüyim jada jocxhuit. Tzoc ajt suerte n'oc'ijxim, jigix ajt nnejhuüyim pin anajty suerte'ajtip.

E jadu'n ajcxy cuyduñ nej anajty ycojaayity ma Dios ñecy, ma Cristo jadu'n yminañ: “Yajhuäcx ajcxy ich nhuit, e ma ich njocxnijen jim ajcxy suerte ijxy.” Je' je' huídibi soldadtijc ajcxy ycuuyduun.

²⁵ Jim ma Jesús ycruudzmijc, jim anajty ajcxy ytinäy: Jesús ytaj, je ytaj chi', je María (Cleofas ytöxyijc), etz María Magdalena. ²⁶ Co Jesús ijxpaty ytaj etz je ydiscípulo huídibi anajty ooy nigi tzocy ma ytaj ymijc, chi nimay ytaj:

—Nan, ich nmügüg huídibi tinaayb ma miich mmijc, yi' xycuend'adip jadu'n nej jihuüy miich yi' xytaj'adyii.

²⁷ Chi Jesús nimay je' ydiscípulo:

—Ich ndaj miich mgüend'adipy, jadu'n nej ixypy mgi'mdaj'adyii.

Jadu'n nej xii tiempo jac nicxni Jesús ytaj tzinaydacpicy ma jada discípulo ytiic.

O'c Jesús

²⁸ Co jadu'n ytundaayi yajtaayi, chi Jesús nejhuüy co ti anajty tüg'óciy ytundäyii yajtäyii jadu'n nej Dios tzocy. Huin'it jadu'n ymíñañ:

—Tidziíyiniibich.

Co jadu'n ymíñañ, je' anajty ycuydundaayb nej anajty ycojayity ma Dios ñecy müid yi' ycixpi.

²⁹ Jim anajty tüg pi'c uugi'ñ müid anajty vinoxunni. Chi ajcxy je' yajxoogy tüg esponja (jadu'n yi' nej po't) müid vinoxunni, e chi yajjiip'eedziy tüg paxyjiip, je' müid yajjady je vinoxunni ma Jesús y'ahuac. ³⁰ Co jada' Jesús co'uucnajxy je vinoxunni, huin'it jadu'n ymíñañ:

—Ti tüg'óciy nguydundäyich.

Chi ñaax'ijxy, e chi y'o'cni.

Tüg soldado cumy Jesús ma ycaachyjiip

³¹ Com jabom anajty je pascua mijxii (amayxii ooy), e nañ sábado xii anajty. Paady copicy anajty co ajcxy yajmináicipy ajcxy je jäy ninicx je tiibi anajty yajcruudzpejticy. Müid je' ycixpi je judíojäy ajcxy ñicxy ma Pilato pijctzoy may'ajt co huen ane'my yi' soldados ajcxy, co huen nicxy yajtijy je jäy ytecy ajcxy huidibi ti yajcruudzpety. ³² E chi ajcxy je soldados yja'ty ma je it ma ajcxy yajcruudzpejty Jesús. E je metzpi jäy ajcxy ytecy tiji huidibi ajcxy yajcruudzpejt tú'ciy müid Jesús. ³³ Co je soldados ajcxy ymijhuägy ma Jesús, huin'it ajcxy ijxy co ti anajty y'o'cni, paady ca' ajcxy tiji ytecy.

³⁴ Chi tüg soldado cumy Jesús ma ycaachyjiip müid quipy jipxu'ñybi. E huin'it tim mic'amy ni'py etz nii ypidzimy. ³⁵ Tüg jäy jim anajty ixxy nej ytuni yajti, e nañ yejc tiy'ajt. E je' ytiy'ajt janch je', e je' nejhuüyb co yjanchity. Müid je' tiy'ajt ycixpi jëbi müich ajcxy nañ jadu'n mmibijctähuip. ³⁶ Paady je' jadu'n ytuni yajti, co jadu'n anajty yajcuyduna'ñ jadu'n nej yjaybetyity ma Dios ñecy, co jadu'n ymíñañ: “Ca' huaad ni tüg ypajc yajtijy.” ³⁷ E jadüg'it anajty ycojaayity ma Dios ñecy, ma jadu'n ymíñañ: “Y'ixipy ajcxy je jäy huidibi ajcxy ycuum.”

Yajnaaxtigiiy Jesús

³⁸ Jim anajty José huidibi anajty cogájpip Arimatea. Yi' je' huidibi anajty mijpidacp Jesús, oy anajty ca' capxidzimy, müid co anajty chigii müid je judíojäy ajcxy huidibi anajty midzip'ajtp Jesús. Co Jesús y'o'cy huin'it José oy pijctzoy may'ajt ma Pilato, co jëbi nicxy yajtzooni Jesús ñaaxnicx ma anajty ti yajcruudzpedyii. Co Pilato a'ixiy, chi José ñicxy jim oy yajminajci je Jesús ñaaxnicx, e chi yajnicxy. ³⁹ Nañ müid ñicxy José je Nicodemo, je huidibi anajty jayijp ti ni'oy Jesús coodz. Nicodemo yminicx oy nimigo'px libra mirra etz áloes tzooy huidibi ooy oy yxuugy. ⁴⁰ Chi ajcxy yajpidici Jesús ñaaxnicx, chi ajcxy mo'ñ müid poob huit, chi tzoyiy ajcxy müid mirra etz áloes tzooy, jadu'n nej je judíojäy ajcxy ycostumbre müidity co o'cpi yajnaaxtigiiygyxy. ⁴¹ Huingon ma je it ma ajcxy yajcruudzpejty Jesús, jim anajty tüg aguemy, e jim ma je aguemy jim anajty tüg o'cpi jut jemybi ma anajty ca'ni pin ñaaxtigiiy. ⁴² Jim ajcxy Jesús ñaaxnicx yajnaaxtigiiyi, co anajty jim yjac-huingonity, e janch jottigooy ajcxy yajnaaxtigiiy, müid co anajty ti chu'iiyñi, e je judíojäy ajcxy tzachni'ixiiyñi tzach'a'ixiiyñi co je amayxii anajty chondägaani com jabom.

20

Jesús jugypijc jadüg'oc co anajty ti y'oc'o'cni

¹ Tim seman ixtigi', moñyi anajty, ca' anajty oy ximiiyñi. Huin'it María Magdalena ñicxy ma Jesús anajty ti ñaaxtigiiy. E chi jim ijxy co je tzaa ti anajty jim yajjidiguency ma je

jut aguu. ² Co ajcxy ijxy je jut ahuädz, chi jada' mic'amy poyígyi ninicxy Simón Pedro, etz je jadügpí ydiscípulo huídibi anajty Jesús mïd ooy naychogyi, chi nimay:

—Ti yajtzoongixy ñich ajt nHuindzin ñaaxnicx ma ajcxy yajnaaxtigiy, e ca' nejhuíyim ma ajcxy ti pidaaccixy.

³ Huin'it ajcxy nimetz chooñ poyígyi Pedro etz je jadügpí discípulo, ñicxy ajcxy ma je o'cpi anajty ñaaxtigíy. ⁴ Poyígyi ajcxy ñicxy nimetz, per je jadügpí discípulo jayijp ñajxy, e jayijp jim oyja'ty ma je naaxtigíydac. ⁵ Chi yco'ixíy jutjoty, huin'it jim oy ixxy je mo'nhuit jiiiby jutjoty y'ooxnäy, per ca' yí' jiiiby ytigíy jutjoty. ⁶ Simón Pedro co ymiñ jac'axam, tim janitigíy jutjoty, chi ijxy je mo'nhuit y'ooxnäy jiiiby jutjoty. ⁷ E chi ijxy je cöxotz, je huídibi anajty mïd ycohuajc yxochity, abicy je' anajty, ca' anajty tú'ciy y'ooxnäy mïd ymo'nhuit. Y'ijx ajcxy je cöxotz yajxon y'anëgyity abicy. ⁸ Huin'it ytigíy jutjoty je jadügpí discípulo huídibi jacjayijp ja't. Chi ijxy, e huin'it mibijcy co Jesús ñaaxnicx ca' anajty jiiiby. ⁹ Ca'ni anajty ajcxy yajxon huinjihuíy co anajty jadu'n ycojaayity ma Dios ñecy, co anajty je Cristo yjugypíga'ñ. ¹⁰ Chi je metzpi ajcxy ydiscípulos yhuimbijty ma ytijc.

Jesús nayguëxici ma María Magdalena

¹¹ E je María jim yhuí'miy ma je o'cpi jut ayaaxip. Chi ayaaxip yco'ixíy ma je jut. ¹² E chi ijxy metz ángel, poob huit ajcxy ymïd, y'ñaaygixy jiiiby ma je Jesús ñaaxnicx anajty yhuijtznäy, y'ñaaygixy tüg cöduy, jadüg tecz íxaay. ¹³ Chi je ángel ajcxy nimay je María:

—¿Miich töxyjäy na'amy co myäxy?

Chi je María y'adzooy:

—Ti ajcxy nHuindzin ñaaxnicx yajnicxi, e ca' nnejhuíyich ma ajcxy ti pidägy.

¹⁴ Jadu'n anajty ymïna'ñ, co ñayji'ijxi, chi ijxy Jesús ytinäy ma yjix, e ca' íjxajpy pen Jesús je' anajty. ¹⁵ Chi Jesús ymïnañ:

—Töxyjäy, ¿ti co myäxy? ¿Pin m'ixtaayb?

María hue' anajty tijy je aguemy cuend'ajtpi migapxip, paady jadu'n ymïnañ:

—Huindzin, pen ti myajnicxy Jesús ñaaxnicx, nigapx ma ti mbidägy, e ñich nicxy nyajtzooñich.

¹⁶ Chi Jesús ymïnañ:

—María.

Chi jada' María yhuäg-huimbijty, chi yajxon huindicxpejty, chi nimay:

—¡Raboni! —jada hebreo ayuc yhuimbidzimy Huindzin.

¹⁷ Chi Jesús nimay María Magdalena:

—Ca' xyñidooñich, com ca'ni ñich nba'ttigíy ma Dios Teedy yajpaady. Nicx miich ixta' nmigügtijcich, e nima' co nnicxaamich ma Dios Teedy, ñich nDeedy etz miich ajcxy mDeedy, ñich nDios, etz miich ajcxy mDios nañ jadu'n.

¹⁸ Chi María Magdalena oy yajnimäy je discípulos ajcxy, chi jadu'n nimay:

—Ti n'ixyich je Huindzin Jesús, e jadu'n yí' ti xycapxymöyich co nyajnimähuiyich miich ajcxy.

Jesús nayguëxici ma ydiscípulos ajcxy

¹⁹ Co je huin'it ximbi chuu'íy seman ixtigí', aducy anajty tijc'aguu y'ity ma anajty je discípulos ajcxy yajpatcixy, mïd co anajty ajcxy tzigíy je judíojäy ajcxy huídibi anajty midzip'ajtp Jesús. Chi Jesús ytigíy cujc'amy ma je' ajcxy, e chi jada' capxpocxy ajcxy, nimay:

—Jotcugi' miich ajcxy.

²⁰ Yam jadu'n anajty ymïna'ñ, chi ajcxy yaj'ijxy je' yci' ma je clavo ytigíy, etz ycaachyjip ma anajty jäy ti ycumyí. Chi yjotcugíy ajcxy co ajcxy ijxy je yHuindzin.

²¹ Chi jada' Jesús jadüg'oc capxpocx, nimay ajcxy:

—Jotcugi' miich ajcxy. Jadu'n nej ñich nDeedy xyquejxyich ya naaxhuiñ, nañ jadu'n ñich miich ajcxy yam nguejxhuäcxy mïd ñich n'ayuc.

²² Co Jesús jadu'n ymīnañ, chi jada' ajcxy nībuxujy cōbuxujy nīmay:

—Huen Dios yjihu'i'ñ ymic'ajt xy'adigiy xyjottigiy ajcxy. ²³ Huenpinjäyity huídibi miich ajcxy mbocyhuinmeecxyp, nañ ypocyhuinmeecxipy Dios Teedy. Huenpinjäyity huídibi miich ajcxy ca' ypocy mhuinmeecxaani, nañ jadu'n Dios Teedy ca' yí' ypocyhuinmeecxa'ñyii.

Tomás ymibijc co yHuindzin yjugypijcy

²⁴ Tomás je' huídibi anajty mīd majmetz yca'pxy Jesús ydiscípulos ajcxy, je huídibi anajty yajtijp Dídimó, ca' je' anajty jim choonity co Jesús ymiñ oga'n. ²⁵ Chi je jacjadyii ajcxy ymīgüg ñīmaayi:

—Ti ñich ajcxy n'ixy je Huindzin Jesús.

E chi je' y'adzooy:

—Pen ca' n'ixyich ma yí' yci' je clavo'au, e pen ca' ngīhuāxich ngodijiyich ma clavo'au, e ngi' nbidāgyich ma ycaachyjijp ma anajty ycumyity, ca' nmibigipyich co yjanchity.

²⁶ Chi jacoductujc xī ajcxy jadüg'oc anajty yajpaady tigoty nidüg'óciy je discípulos ajcxy. Tzooñ anajty Tomás nañ jadu'n. Chi Jesús ymiñ. Agiy anajty tijc co Jesús ytinay'ahuīy cujc'amy ma je' ajcxy. Huin'it ycapxopocy, chi nīmay:

—Jotcugi' miich ajcxy.

²⁷ Chi jada' nīmay je Tomás:

—Pidāg ya mgīhuāx ma clavo'au ma ngījich. Najtzxaji' mgi' etz pidāg ma ñich ngaach ma jāy xycumyich, e mībic yajxon tiydudāgy.

²⁸ Chi Tomás y'adzooy:

—Ñich miich nHuindzin'ajtyp etz ñich miich nDios'ajtyp.

²⁹ Chi Jesús Tomás nīmay:

—Mīd co miich ti xy'ixyich, paady miich ti mmibicy. Jotcuyc yí' ajcxy huídibi ca' xy'ixyich, e ti ymibicy co ti njugypicyich co n'o'gyich.

Jada ayuc ngojaaybich ma jada necy, jigix miich ajcxy mmibigipy co Jesús je' yí' je Cristo, je Dios y'ung

³⁰ Ti anajty Jesús ooy tuñ mījhuinma'ñ ma ydiscípulos ajcxy yhuinduu huídibi ca' ycojaayity ma jadayaabi necy. ³¹ Paady ycix jada ngojaayich jigix ajcxy mmibigipy co Jesús je' yí' je Cristo je Dios y'ung. E co miich ajcxy mmibigipy, huin'it mbaadip jugy'ajtin huídibi ca' tücciyi ycixipy ytigoyipy mīd Jesucristo yxī ycixpi.

21

Jesús ñayguēxīgyii ma ydiscípulos ajcxy nihuixtujcpi

¹ Co jadu'n jayijp ytunī yjajti, huin'it jadüg'oc Jesús ñayguēxīci ma je' ydiscípulos ajcxy jim ma mejypa', je huídibi anajty xījip Tiberias mejy. E jadu'n ñayguēxīci: ² Jim anajty ajcxy Simón Pedro mīd Tomás huídibi jāy ytijyp Dídimó. Nañ jim Natanael huídibi anajty cogajp jim Caná Galilea naaxjot. E nañ jim anajty je Zebedeo ymang ajcxy etz jametz discípulos ajcxy. ³ Chi Simón Pedro ymīnañ:

—Ñicxy n'oc'acxmāchich.

Chi ymīgūgtijc ajcxy ymīnañ:

—Tzoc ajt jāmīm.

Chi ajcxy ytigīy ma tūg barco. E je huin'it tzuu ca' ni ti ajcxy majch. ⁴ Co yjobīy jim Jesús anajty ytināy ma mejypa'. Je' ydiscípulos ajcxy ca' anajty ajcxy nejhuīy co Jesús je' anajty.

⁵ Chi Jesús ymīnañ:

—Mīgūgtijc, ¿nej ca' ajcxy mbaadyñi acxi?

Chi ajcxy y'adzooy:

—Ca' ni ti.

⁶ Chi Jesús yminañ:

—Pidaaccix ajcxy je huídibi m̄id m'acxmajtzcixy aa'oy'amy ma yi barco, e huin'it ajcxy mbaadipy acx.

Chi ajcxy pidacy je acxmadzi'ñ aa'oy'amy, e huin'it janch adzaach ajcxy yajpidzimy, co janch may acx anajty ti ytig̃y. ⁷ Je ymig̃üg huídibi m̄id Jesús ooy anajty ñaychogyii, chi ñimay Pedro:

—Je' yi', ñch ajt nHuindzin.

Co jadu'n midooy Simón Pedro co anajty yjējty je Huindzin Jesús, huin'it yhuit yajtig̃y. Com ti anajty yhuit jeñ, com jadu'n anajty jac'oy ytuñ. Chi ytig̃y meyyoty huitm̄id.

⁸ Jacjadyii ajcxy ymig̃ügtjic yjady ma mejypa' m̄id je barco, pahuich pajugucy ajcxy je y'acxmadzi'ñ janch ujtz m̄id acx. Hue' anajty ca' ooy yjiguemyity ma mejypa', jēyi anajty migo'px metro yjiguemyity. ⁹ E co ajcxy ymejch ma mejypa', chi ajcxy ijxy co jim anajty j̄imbajc y'ity ni'ixi', e jim anajty acx j̄imbajc ñigix huídibi yajtzaayb, e nañ jim anajty tzajcaagy. ¹⁰ Chi Jesús ñimay je' ydiscípulos ajcxy:

—Yajmiingix yi acx tiibi ajcxy mmajtzcixy.

¹¹ Chi Simón Pedro ypejty barcojoty, chi yajpidzimy huind̄itztuum y'acxmadzi'ñ ujtz m̄id may'acx. Chi ajcxy michoy migo'px jahuixchigi'px majctug̃g acx mijatypi, e jadu'n ca' je acxmadzi'ñ yc̄ich m̄id tzachmay'acx. ¹² Chi Jesús ñimay ajcxy:

—Min ajop'ajtcix.

E ni t̄üg ydiscípulos ajcxy ca' y'amidoohui:

—¿Pin miich?

Com ñejhūyib anajty ajcxy co je' anajty Huindzin Jesús. ¹³ Chi Jesús ymijhūägy ma je acx ci' etz tzajcaagy anajty y'ity, e chi yajhūäcxy, chi moyday ymig̃ügtjic ajcxy.

¹⁴ E je' je' anajty je midug̃g'ocpi co Jesús ñaygūx̄ici ma je' ydiscípulos ajcxy, huin'it co yjugypijcy co y'o'cy.

Jesús yajni'ix̄y Simón Pedro ti ytunipy

¹⁵ Co ajcxy y'ajop'ajttay, chi Jesús ñimay je Simón Pedro:

—Simón, Jonás y'ung, ¿nej xyjactzojcpich miich, ca'ydi jada jacjadyii ndiscípulo'ichi?

Chi y'adzooy Pedro:

—Huindzin mnejhūyib miich co ndzojcpich njihūyibich miich.

Chi Jesús ñimay:

—Cuend'at ñch njäy, jadu'n nej jihūy borregi cuend'ajtpi yaj'ocy yi' yborregi.

¹⁶ Chi Jesús m̄imejtz'oc yminañ:

—Simón, Jonás y'ung, ¿nej xychojcpich xyjih̄yibich miich?

Chi Simón y'adzooy:

—Huindzin, mnejhūyib miich co ndzojcpich njihūyibich miich.

Chi Jesús ñimay:

—Cuend'ajtig̃ich njäy, jadu'n nej yi borregi cuend'ajtpi cuend'aty yborregi.

¹⁷ Co midug̃g'ocpi oy y'amidooy:

—Simón, Jonás y'ung, ¿nej xychojcpich xyjih̄yibich?

Chi Pedro yjotmaybijcni co midug̃g'ocpi y'amidoohui: “¿Nej xychojcpich xyjih̄yibich?”

Chi Simón yjac'adzooy:

—Huindzin, miich mnejhūyidaayb t̄üg'óciy, e nañ mnejhūyib co ñch ndzojcpich njihūyibich miich.

Chi Jesús jacñimay:

—Cuend'ajtig̃ich njäy, jadu'n nej borregi cuend'ajtpi cuend'aty yborregi. ¹⁸ Janch janch ñch miich yam jadu'n ñimay: “Co anajty miich mjac'anägnity, ci'm anajty mhuit

nayyajñijenyii, e mñicxp anajty ma mdimdzocy. E co mñacmijjähuiipy, huin'it mgi' mnajtzxajihuiipy, e huingbi mhuit xyajñijenyihuiipy, e xyajñicxyipy ma anajty ca' mdzocy.”

¹⁹ Co Jesús jadu'n ymíñañ, chi Pedro yajhuinjihuiiy jadu'n nej anajty jäy ajcxy yaj'öga'ñyii mñid Jesús y'ayuc ytiy'ajt ycixpi, e nañ ma yi y'o'cin tiy'ajt yegipy co ymñid Dios ytiy'ajt.

Je discípulo huídibi anajty Jesús ooy tzocy jihuüy

²⁰ Chi Pedro ñayji'ijxi, chi ijxy co anajty tú'ciy anajty ymiingixy je' ydiscípulo huídibi anajty Jesús ooy tzocy jihuüy je huídibi anajty iñaayb huigon ma Jesús ma je mesa co anajty y'adzuu'ajtcixy. Je huídibi ñimay je' yHuindzin:

—Huindzin, ¿pín miich yi' xyciyegam ma yi mmidzip? ²¹ Co Pedro ijxy je jadügpí discípulo axam Jesús ypanicxyii, chi ymíñañ:

—Huindzin, e jada yaabi migüg, ¿ti yi' jadaanip?

²² Chi Jesús y'adzooy:

—Co ixipy ndzocyich co yi' huen jugy'aty ixti mabaad nhuimbityich, ca' miich xypaady mnejhuíhuipy ti yi' jadam. Panicxcich miich.

²³ Paady ycixp huinjihuiiy je ymigügtijc ajcxy co je ymigüg huídibi Jesús ooy tzocy jihuüy ca' anajty y'öga'ñ. Per Jesús canan je' anajty jadu'n ytiyyp co ca' y'öga'ñ. Hue' anajty ti ymíña'ñ janchtiy:

—Pen ndzojcpich ixipy co jada migüg yhui'mipy ixti mabaad nhuimbityich, ca' miich xypaady mnejhuíhuipy ti yi' ytunamy.

²⁴ Je' je' je Jesús ydiscípulo huídibi tiy'ajt yejcp jadu'n nej Jesús ytuñ y'ayoy etz yjajty y'ayoy, e nañ yi' je' huídibi cojay nej Jesús ytuñ y'ayoy, yjajty y'ayoy. E ñich ajt nejhuíyim co janch yi' je tiy'ajt huídibi ti yecy.

²⁵ May ooy tijaty mij huinma'ñ Jesús jactuñ. Co ixipy yajcojaydäy tüg'óciy, ca' yi' naaxhuiñybi ixipy yhuaadiy mñid maylibro tzachpidägiy. Jadu'n n'aa'ixiyich.

LOS HECHOS

Jadu'n Nej Jesús Y'ayuccapxhuäcxpi Ytuun Yjajti

¹⁻² Ma je jayijp'atypi necy, migüg Teófilo, ti nyajnijayiy tüg'óciy jadu'n nej Jesús ytuuñ etz jadu'n nej yaj'ixpijctzondacy oga'n'aty, ixti cooni ypättigiy tzajpjoty. Ca'ni Jesús anajty ypättigiy tzajpjoty co huin'ijxy je' yjáy huídibi yi' y'ayuc ytiy'ajt capxhuäcxhib, e chi miid je Espíritu Santo najtztuniy najtz'ane'miyy nej huaad ajcxy ytunipy. ³ Co anajty Jesús y'ögy, chi ñayguëxíci canaag'oc ma je' ydiscípulos ajcxy, e huixchiguipx xii ñayquëxígo'ci ma je' ajcxy, yajniquëxígy huädz co anajty yjuugyity, etz nañ yajmiidmiydacy je' yjáy je Dios y'ayuc etz Dios y'ané'min.

⁴ Co anajty jim ijtcixy tügmucy miid Jesús, chi Jesús je' ydiscípulos ajcxy ane'my co ca' huaad jim choongixy jim Jerusalén. Chi ajcxy nimay:

—Ahuijxcix tiibi Dios nDeedy ahuaníy ma miich ajcxy, je huídibi miich ajcxy nyajmiidmiydägy. ⁵ Janch Juan je Bautista jäy yajniibejt miid nii, tzojc miich ajcxy xy'adigíhuipy xyjottigíhuipy yi Espíritu Santo.

Jesús ypättigiyñi tzajpjoty

⁶ Ni'amugí anajty ajcxy jim miid Jesús, chi ajcxy yajtiyy:

—¿Huindzin, nej myajcödigoyamy je Israeljäy ymidzip jadachambi?

⁷ Chi Jesús y'adzooy:

—Ca' xypaatcixy mnejhuüygixy je xii je tiempo mina anajty ti yhuaad'ajtni, mina Dios Teedy tuna'ñ tijaty, je' tügpajc miid cötújcín tijaty ytunamy. ⁸ Co anajty je Espíritu Santo chinaydacpicy ma ajcxy mjot mhuinma'ñ mbaatcixp mic'ajt. E chi mdzoongixp ayuc capxhuäcxpi miid ich ycixpi ya Jerusalén, etz tüg'óciy Judea ñaaxjot, etz jim Samaria, etz huindu'my ñaaxhuiñybi.

⁹ Ti jada ajcxy jadu'n yajnimäy, jim anajty ajcxy yhuindüxcixy, chi Jesús chajppejtni. Chi miñ joc yeeg huídi Jesús yajniidigoyday, chi ajcxy ca' ocjac'ijxni. ¹⁰ Jadu'n anajty ajcxy chachpät'ijxcixy tzajpcíxy, co Jesús ypättigíy. Huin'it mejtz yëydijc ñayguëxíci ma je' ajcxy ymijc, poob huit miid, ¹¹ chi ajcxy ñimaayi:

—Galilea jäy ajcxy, ¿nej co mdzachpät'ijxcixy tzajpcíxy? Yi Jesús huídibi ti chajppety, ti chooñ ma miich ajcxy, minaamb jadüg'oc jadu'n nej ti m'ijxcixy co ti ypättigíy.

Matías yajhuin'ijxy co Judas ytung jijptuníyipy

¹² Huin'it Jesús ydiscípulos ajcxy chooni ma je cögop huídi xiijp Olivos, yhuimbíjtcixni jim Jerusalén, ca' ooy yjiguëgyity, jëbi yajyöy sábado xii, jadu'n nej Moisés ycötújcín y'ane'my. ¹³ Co ajcxy yja'ty ma je cajp, chi ajcxy ypejty ma je cuarto mimetz nihuijtzpetypí ma ajcxy anajty miidity yjättac. Jim yi' anajty ajcxy: Pedro, Jacobo, Juan, Andrés, Felipe, Tomás, Bartolomé, Mateo, Alfeo ymang Jacobo, Simón je Zelote etz Judas Jacobo ymiguëx. ¹⁴ Tüg'óciy anajty ajcxy y'ijtcixy tügmucy Dios mibijctzoogixy chajpcapxy-capxcixy. Ymiid ajcxy anajty Jesús y'uch etz María Jesús ytaj, etz jacjadyi töxyjäydijc.

¹⁵ Huin'it xii Pedro ytinayígy agujc'amy ma je ymigügtijc ajcxy huídibi yajmij'ajtp Jesús, huídi anajty ajcxy naybaatip migo'px ja'iipxti jäy, chi nimay ajcxy:

¹⁶ —Migügtijc, copicy co jada yajcuydünipy nej Dios yminañ ma ñecy huídi jaybety ijtp, ma David jaay Dios y'ayuc, ma Dios nigapxy Judas. Je'huídi coduu'ajt taabi je judíojäy ajcxy majch Jesús. ¹⁷ Je Judas yaj'amichomujcp je' anajty miid ich ajt, paatip anajty Dios ytung tú'ciy miid ich ajt. ¹⁸ Chi Judas ñicxy juy tüg naax miid je muju'ñ huídibi anajty ti paady miid yjibic-huinma'ñ. Chi jim mic'amy ycäy tzuxcödeeñ, chi ytopxy ymooxac, e chi ytiinch ypidzimday. ¹⁹ Je jäy ajcxy huídibi anajty tzinaayb jim Jerusalén, co nejhuíy, chi

ajcxy yxii moy je naax Acéldama, hue' je' yhuimbídzim y ma je' ajcxy ayuc, ni'py ñaaxjot.
 20 Jada je' je ayuc huídibi David yjaay ma je Salmo necy:

Hui'mip najtz'ixiy yí chinaaydac. E ca' pin yajtunipy.

Nañ jadu'n ymína'ñ:

Huingbi huen yajnicxyii je' ytung.

21-22 Copicy co tüg yëydijc huídibi miiid ti yhuídity nHuindzin Jesús quipxyi miiid iich ajt, huen tunipy je tung huídibi Judas anajty ytumy, maab Juan yajniibety ixti taabi xypuyöduutim co pättigiy tzajpjot, tüg jëbi testig'aty miiid iich ajt co Jesús yjugypijcy.

23 Chi Jesús ydiscípulos ajcxy huin'ijxy mejtz jäy: tüg jäy huídibi anajty yxii José, huídibi yxii anajty yajtijy Barsabás etz nañ jadu'n anajty yajtijy Justo. E huin'ijxy ajcxy nañ jadu'n Matías. 24-25 Chi Jesús ydiscípulos ajcxy Dios mibijctzoy, ymínañ ajcxy:

—Huindzin Dios, m'ijxyp mnejhuíyib tüg'óciy jäy yjot yhuinma'ñ, yajni'ixiiygich jada metzpi jäy huídibi miich nidügti ti nhuin'ixy, je huídibi jëbi jijptigiyiy miich mdung tú'ciy miiid iich ajcxy, etz huídibi apóstol'adip. Huen jada jäy jijptigiyiy je tung huídibi Judas ti yajtigooy, co ytundigooy e ñicxy ma ypaadyii.

26 Chi ajcxy suerte ijxy, e je suerte ñibídzimni je Matías. E huin'ítiy je Matías oy ymicho'ndigiy ma je nimajtügpi ajcxy huídibi ycapxhuäcxy Jesús y'ayuc.

2

Co je Espíritu Santo ycidacy choñ tzajpjoty

1 Co oy je Pentecostés xii paady, jim anajty Jesús ydiscípulos ajcxy ni'amugi' tú'ciy ijtcixy.

2 Huin'it janch timitiini yajmidoy tüg ne'min, choñ tzajpjoty, jadu'n nej poj micpi. Chi yaj'ujtzaay je tigot ma anajty iñaaygixy. 3 Chi nigidaaci nidüg nidügti toodz jadu'n nej jii nye'n. 4 Chi je Espíritu Santo nidüg nidügti ajcxy y'adigiiyi yjottigiiyi. Chi ytigiiygixni capxy miydaacp nije' nije' ayuc jadu'n nej je Espíritu ajcxy yajcapxyii.

5 Jim Jerusalén anajty je huin'it xii may judíojäy ajcxy huídibi tzoomb canaag agajp. Hue' ajcxy chachcuydumb judíojäy ycostumbre. 6 Co je cajpjäy ajcxy midooy je ne'min, chi ajcxy ooy yömujcy. Chi je mayjäy ooy yhuinmay'ahuídijty, co ajcxy midooy chachcapxcixy chachmiydaaccixy ma yci'm'ayuc. 7 Je mayjäy ajcxy ooy chigiiy jihuüy, chi ajcxy ñayñimaayi miñ xyipy:

—Ix ¿nej cay Galilea jäy jada ajcxy nidüg'óciy huídibi jadu'n tzachcapxcixy tzachmiydaaccixy iich ajt ngi'm'ayuc? 8 ¿Nej iich ajt co nmido'mbójcim co tzachmiydaaccixy iich ajt n'ayuc huídibi ti nmibi'c'ájtím? 9 Ya anajty ajcxy Partia jäy, Media jäy, Elam jäy, Mesopotamia jäy, Judea jäy, Capadocia jäy, Ponto jäy, etz cham huídibi tzinaayb ajcxy jim Asia ñaaxjot, 10 etz huídibi ajcxy tzomb jim Frigia, etz Panfilia, huídibi tzomb jim Egipto, etz huídibi tzomb jim ma yí Africa ñaaxjot Cirene ninaxy. Nañ jadu'n jim romanojäy huídibi ya adzinaayb. May ajcxy jim huídibi judíojäy etz nijëjity huídibi ca' yjudíojäyity huídibi judíojäy ycostumbre ajcxy ti yjijptigiyiiyi. 11 Ya nañ jadu'n Creta jäy etz Arabia jäy; e iich ajt tüg'óciy nmidoohuim jada jäy ajcxy nigapxcixy nimiydaaccixy huídibi Dios ti tuñ mijcajee ma iich ajt ngi'm'ayuc.

12 Nidüg'óciy ajcxy ooy jihuüy, e chi ajcxy ooy yhuinmay'ahuídijty, miñ xyipy ñay'amidóohuigixy:

—¿Nej jada yhuimbídzima'ñ?

13 E nijëjity jäy jëyi nixigy yajxigy, ymínaangixy:

—Muucip jada yí ajcxy.

Pedro yaj'ixpijcy je mayjäy

14 Huin'it Pedro ytinayigy miiid je nimajctügpi apóstoles, e ytigiiy capxpi mic ymínañ:

—Yëydijctijc ajcxy huídibi tzinaayb Judea etz tüg'óciy huídibi tzinaayb ya Jerusalén, nejhuíhuipy miich ajcxy jada e midou ajcxy yajxon huídibi ajcxy nyajnimähuamyb.

- 15 Jada jäy ajcxy ca' ajcxy ymügyii jadu'n nej miich ajcxy mīnaangixy. Tīm petyxīni jada cham. 16 Jada je' huiḍibi ñigapxy je Joel, Dios y'ayuc najtzcapxybyi, co jadu'n mīnañ:
- 17 Je huin'it xī mīna anajty je naaxhuiñybi cīxa'ñ, jadu'n Dios mīnañ, nyajhuäcxtāhuībich je nEspīritu ma tūg'óciy naaxhuiñyāy. Miich mnīx etz mmang ajcxy capxhuäcxip ḥich n'ayuc ndiy'ajt, e je yujcyecpidijc ajcxy yhuin'ixipy ooy mījhuinma'ñ, e je mījjāydijc cumāhuipy ajcxy.
- 18 Nyajhuäcxtāhuip ḥich je nEspīritu huin'it xī ma ḥich ndumbi yēydijcpi tōxyjāybi, e yī' ajcxy capxhuäcxip ḥich n'ayuc ndiy'ajt.
- 19 Nyajquēxīgībich tzajpcīxy huiḍijaty oy chīgīyñi, e ya naaxhuiñ nyegīpyich tiy'ajt: ni'py, jīn etz jīnjoc.
- 20 Yi xī ahuimbīḍipy coodz, etz je po' ahuimbīḍipy nej ni'py, ma anajty ca' miñ je xī je tiempo mīna anajty mīnañ je Huindzīn Dios. Mīj ayo'n jī tunaanip jadaanip iixna' quēxna'.
- 21 E tūg'óciy jāy huiḍi mīyaaxp ojadaḗtp je Huindzīn Dios, Dios ajcxy yajñīdzögīb y'alma.
- 22 Chi Pedro yjacmīnañ:
—Amīdo'ijtcīx, miich judío jāy ajcxy, jadu'n nej cham nmīna'nañich. Je Jesús huiḍibi tzoon jīm Nazaret ti xyaj'ijxcīxy Dios ymīc'ajt, mījhuinma'ñ, etz iixpejt, jadu'n nej miich ajcxy ti m'ijxcīxy ti mnejhuīygixy. 23 Jada yajcīyejc ma miich ajcxy, jadu'n nej anajty Dios ti yajñigōdugīy, e ti huinmay. Ajcxy mmajch je Jesús e myaj'ōgy ajcxy, chi ajcxy myajcruudzpejty mīd jībīc jāydijc y'ané'mīn. 24 Chi Dios yajjugypījcy yajñīhuädzīctuty ma yī ó'cīn, ca' huaad yhuī'my ōgy huinīxī. 25 Je David ñīmīydac Jesús chi ymīnañ: Nejhuiybīch co je nHuindzīn Dios y'ity ma ḥich nhuinduu. Yī' ijt ma ḥich n'a'oy, jīgīx ca'yḍi pīn xy'adzīgīyīch xyajhuinma'ñyḍigooyīch.
- 26 Paady ti njotcugīyīch, e ti ngapxypīdzīmyīch co ooy njotcujcīch. Paady co oy n'ōgībīch etz nīnīcx ñāaxtigīhuipy, ca' ndajy mayīch.
- 27 Co miich Dios ca' myajhuī'ma'ñ ḥich n'alma ma ñāaxtigīydac. Ni mga'aa'ixīhuipy, co miich mdumbi huiḍibi ooy mdzocy, co nīcxy ñīnīcx ñāaxhuindīgoydāy.
- 28 Miich Dios, ti xyajñī'ixīyīch yī tzīnaayīn huiḍibi ymīd jugy'ājtin huinīxībī. Xya-jjotcugīhuībīch mīd co xymīd'idīpyīch.
- 29 Chi Pedro yjacmīnañ:
—Mīgūgtījc ajcxy, huädz miich mnejhuīygixy co ḥich ajt nmīj'ap David y'o'cy etz yajnaaxtigīyī. E ma ñāaxtigīy nmīdñi jē'ajt chambaad. 30 Je David hue' je' anajty Dios y'ayuc ñajtzcapxybyi, e ñejhuīyb anajty co ti Dios yajñīmāyīi huiḍibi ca' y'anījty. David ñejhuīyb anajty co ma y'ap y'oc ma'xung'adīpy Cristo, jāyḍēbi ané'mīpy ma David y'ane'mdac. 31 Jadu'n co David jecy'ajty huinjīhuīy e nejhuiy etz nigapxy jadu'n nej yjugypīga'ñ je Cristo co anajty ti y'ōgy. E ymīnañ co ca' yī' y'alma yhuī'mīpy jutjoty etz ñīnīcx ca' ypūdzīpy. 32 Dios yajjugypījcy je Jesús co y'o'cy. Jada tiy'ajt ḥich ajcxy nidūg'óciy nidiy'ajt'ajtpy. 33 Jadu'n Dios Jesús mooy mīj'ajt jīby tzajpjoty, chi yajcīdīgīyī je Espīritu Santo huiḍibi Dios Teedy y'ahuanīy e tūg'óciy huiḍibi miich ajcxy ti m'ijxcīxy ti mmīdoogīxy jīby yī' chooñ ma yī'. 34 Com David ca' je' chajppejty, je David cī'm ymīnañ: Je Huindzīn Dios nīmay ḥich nHuindzīn: “ñīa' ma ḥich a'oy'amy,
- 35 ixti coonī nmīmadactāhuībīch yī mmīdzīp, jadu'n anajty nīpaady nej jīhuīy mde-cypocxpejt'adyīi.”
- 36 Chi Pedro yjacmīnañ:
—Ñejhuīhuipy nidūg'óciy yī Israel jāy ajcxy co janch janch co je Jesús huiḍibi miich ajcxy myajcruudzpejt, Dios yajñībīc co yhuindzīn'adīpy ma miich ajcxy, etz Cristo huiḍibi xyñīhua'nīpy xyajtzōgīpy ajcxy.
- 37 Co je mayjāy ajcxy jadu'n mīdoy, chi ajcxy yjotyungīy, e amīdoy ajcxy je Pedro etz jacjadyīi jāy huiḍi Jesús y'ayuc capxhuäcxī anajty, chi ajcxy ymīnañ:

—Migügtijc, ¿ti ñich ajcxy jëbi huaad nduñ?

³⁸ Huin'it Pedro y'adzooy:

—Jothuimbijtcix e ñiibejtciix nidüg nidüg miid Jesucristo yxi, jigix Dios miich ajcxy mbocy xyhuinmeecxipy. E jadu'n Dios xymöhuipy je Espíritu Santo. ³⁹ Huidibi Dios y'ahuanñy miich yi' ajcxy mje' etz m'ung ajcxy, etz m'ap m'oc ajcxy, etz nañ jadu'n je jäy ajcxy huidi jiguémip, etz jacjadyii jäy ajcxy huidi Dios huin'ixamy.

⁴⁰ Miid jadyaab ayuc etz jacjadyii ayuc Pedro yajnimay capxhuijy je mayjäy ymíñañ:

—Ca' mmijpidaaccix je jäy ajcxy y'ayuc huidibi ca' capxymido Dios.

⁴¹ Jadu'n yjati, je jäy ajcxy huidijaty mibijc Pedro y'ayuc, chi ajcxy ñiibejtay huin'it xii. Ñimayñy ajcxy huidibi mijpidac Jesús y'ayuc oy nidugüg mildi jäy. ⁴² Tüg'óciy ajcxy anajty panixcixy yi' ixpíjcin jadu'n nej yi' Jesús y'apóstoles ajcxy yaj'ixpijcy. Chinaaygixy yquipxyjot yquipxyhuinma'ñ. Etz Dios mibijctzoogixy e ñayyöymújciy co anajty ajcxy chajcaagy tujc-huäcxaangixy.

Jadu'n nej je mibijpidijc chinaaygixy jugy'ajtcixy

⁴³ Nidüg'óciy ajcxy anajty ooy mijcajee jihuñy. E Jesús y'apóstoles ajcxy ijxpejt etz mijhuinma'ñ ooy anajty tungixy. ⁴⁴ Nidüg'óciy je jäy ajcxy huidibi anajty ti ymibijccixy ijtp anajty ajcxy tüg mucy, e yajhuäcxcixy tijaty ajcxy anajty ymiid, mooygixy ymigügtijc.

⁴⁵ Ytoocpy anajty ajcxy yi' ypidägy huidibi anajty ymiid, e chi anajty yajhuäcxcixy yi' meeñ nije' nije' nej pin ti yajmayjaty. ⁴⁶ Jabom jabom anajty ajcxy ñayyöymugyii ma Dios ytijc, etz nañ ñayyöymugyii ajcxy ma ytijc tzajcaagy tujc-huäcxcixy etz ycaaygixy y'uuccixy ni'amugi' jotcuyc miid ajcxy y'oyjot y'oyhuinma'ñ. ⁴⁷ Ñi'igixy niyaaxcixy yi' Dios, e tüg'óciy jäy nayyajmij'ájtíp anajty ajcxy. Chi je Huindzin Dios yajmayñy jabom jabom yi' mibijcpidijc, yi' huidibi anajty patp nidzoocin.

3

Tüg tecyma'tpi chögy

¹ Tüg xii Pedro etz Juan ypättigñy ajcxy tú'ciy ma Dios ytijc, mijminacy xii anajty, je' je' anajty je hori mina ajcxy Dios mibijctzoogixy. ² Jabom jabom anajty jäy yajnicxcixy ma je Dios ytijc'aguu tüg tecyma'tpi, jadu'n je' anajty ti yma'xung'aty. Chi ajcxy pidägy je tecyma'tpi ma je Dios ytijc'aguu huidi anajty yxi la Hermosa, jigix jim pijctzohuipy meeñ ma je jäy ajcxy huidibi tigñyb ma Dios ytijc. ³ Co je jäy tecyma'tpi ijxy Pedro etz Juan ytiñhuaangixy anajty ma Dios ytijc, chi pijctzoy meeñ. ⁴ Co Pedro etz Juan ijxy je tecyma'tpi, chi Pedro ymíñañ:

—Huindixpejtcih.

⁵ Chi je jäy huindixpejty, yjijp'ijxpy anajty ti möhuanip. ⁶ Chi Pedro je tecyma'tpi nimay:

—Ca' nmídidyich plata, oori, huidibi janchtiy nmídidich je' nmöhuip. Miid Jesucristo je Nazaretpi ymic'ajt ñich miich nimaayb: Tinaayg etz yöy.

⁷ Huin'it Pedro majch je tecyma'tpi ma a'oygi', e yajtinaygugñy. Huin'ítty y'oyñy ymicpijcy je ytecy etz ytecyöy. ⁸ Chi je tecyma'tpi ytinaygugñy etz chi ñajztibñy. Chi jada' yöychoñ e ytiñy ma Dios ytijc miid Pedro etz Juan yöyñip ñidijcni yujctijcni, yam Dios ooy jäymeç. ⁹ Tüg'óciy je mayjäy ijxy co anajty yöyñip etz jäymeç yi' Dios. ¹⁰ Je jäy ajcxy y'ijxy'ajtpy anajty ajcxy je tecyma'tpi e ñehuiygixyp co je' anajty je' huidibi pijctzohuo'cp pi'c meeñ ma Dios ytijc'aguu huidi anajty yxi la Hermosa. Paady je jäy ajcxy ooy chigñy jihuñy, co ajcxy ijxy nej anajty yam ti ytunyii ti yjadyii.

Pedro nimydacy nej anajty je tecyma't ti chögy

¹¹ Je tecyma'tpi huidibi anajty ti chögy ca' anajty ixmach Pedro etz Juan, e tüg'óciy yi' jäy anajty ooy jihuñygy huinmaaygixy. Chi mic'amy mayjäy nimujcy Pedro etz Juan

jim ma yi Dios ytijc huinduu huindibi jäy ytijpy Salomón. ¹² Pedro co jadu'n ijxy je mayjay, chi ymínañ:

—Judío yëydijctijc, ¿nej co mdzachuinmaaygixy mijcajee? ¿Nej co ñich miich ajcxy xy-chachhuindicxcixy jadu'n nej jihuïy ñich ajcxy jada jäy ti nyajtzögyich ti nyajyöychooñich miid ngimmic'ajtich, o miid co ñich ajcxy ooy nDios'ojadaty? ¹³ ñich'ajt nDios, je Dios huidi nmij'ap nmijteedy, je Abraham, je Isaac, etz je Jacob y'ojadajt, yi' ti yajtzögy jada tecyma'tpi, jigix yajcömayipy yi' y'ung Jesús huindibi miich ajcxy mgïyejc ma je tungmïdipi. E co je gobernador Pilato je' najtzmadzïhua'ñ, miich ajcxy ca' m'aa'axïy. ¹⁴ Ma yjapadyii ajcxy mgapijctzoy co huen yajnajtzmazïy, je huidi anajty yajpaatp huadz etz tudägy, chi miich ajcxy mbijctzoy co huen yajnajtzmazïy tüg jäy huindibi anajty ti yjäyyaj'o'cy. ¹⁵ Jadu'n je jäy ajcxy yaj'o'cy je' huindibi anajty jugy'ajt yejcp. Je huindibi Dios yajjugypijcy ma anajty ti y'ögy e jada tïy'ajt ñich ajcxy nidiy'ajt'ajtpyich. ¹⁶ Miid co ti mibicy Jesús yxii, je mijhuinma'ñ huindibi Jesús ymic'ajt ti tuñ miid jada pa'mjäy huindibi miich ajcxy m'ijxyp mnejhuïyb. Com ti mibicy Jesús paady ti chögy janch yajxondicni, jadu'n nej miich ajcxy nidüg'ócïy ti m'ijxcixy.

¹⁷ Chi Pedro yjacmínañ:

—Nmigügtijcïch, nejhuïybïch co miich ajcxy etz mhuidzindijc yaj'o'cy Jesús, miid co anajty mganejhuïygixy ti anajty ajcxy mduungixy. ¹⁸ Jadu'n cham Dios ti cuyduñ jadu'n nej Dios y'ayucnajtzcaxïybi ymínañ co copicy co yi Cristo yajnaxipy ayo'n. ¹⁹ Paady játyim jothuimbijctix miich ajcxy ma Dios, jigix ajcxy mbocy yajjötztähuipy. Huin'it je Huindzin Dios xyajniguexipy ajcxy jotcujc'ajtïn huinixii, ²⁰ e yi' quexamb je Jesús, je Cristo, je huindibi Dios jayijp'aty yhuin'ijx co quexa'ñ ma miich ajcxy. ²¹ Oy jadachambi Jesucristo y'oc-huí'mipy jibby tzajpjoty ixti cooni Dios anajty yaj'oyïdyäy tijaty, co jadu'n yjaay yi' y'ayucnajtzcaxïybi huindibi miid huadz yjot yhuinma'ñ huindibi ajcxy jecy'ajty tzinay. ²² Jadu'n Moisés nimay ñich ajt nmij'ap nmijteedy jecy'ajty: “Je Huindzin Dios xyajniguexaan miich ajcxy tüg yi' y'ayucnajtzcaxïybi, huindibi pidzimamyb ma miich ajcxy mjuugy mmigüg jadu'n nej ñich yi' xyguejxy. M'amido'idipy miich ajcxy yi' y'ayuc. ²³ Jadu'n yjadipy co tüg'ócïy jäy huindibi anajty ca' capxymidooy je Dios y'ayucnajtzcaxïybi, huadz ajcxy ytigoydähuipy, e tüg jibicy ajcxy idipy ma judíojäy ajcxy yajpaady.”

²⁴ Chi Pedro yjacmínañ:

—Jadu'n jada tüg'ócïy Dios y'ayucnajtzcaxïybi, chondacy ma Samuel ixti ma jacjadyiini ajcxy, ñigapxtay ajcxy jadu'n nej cham ytuñyïi yjadyii. ²⁵ Yi Dios y'ayucnajtzcaxïybi ajcxy, miich je' anajty ajcxy mmij'ap mmijteedy. E je ayuc huindibi Dios yajnimay Abraham ycuydunaamyb miid miich ajcxy co jadu'n ymínañ: “Ngonúucxibich tüg'ócïy naaxhuïñyjäy miid tüg miich m'ap m'oc.” ²⁶ Co Dios y'ung y'o'cy, chi Dios yajjugypijcy jadüg'oc, e quejxy jayijp ma miich ajcxy, jigix xyconúucxixipy, etz jigix nidüg'ócïy miich ajcxy m'ixmazipy yi' mjbïchuinma'ñ.

4

Pedro etz Juan ma tungmïdipi yhuinduu

¹ Pedro etz Juan jimni anajty tzachmïdmïydaaccixy je mayjäy ajcxy, co oy miingixy je judío teedy ajcxy, miid je soldado huindzin, je tzajptijc cuend'ajtpi etz miid saduceojäy. ² Ooy ajcxy anajty yjotmätcixy co Pedro etz Juan yaj'ixpijccixy anajty je mayjäy etz nimaaygixy co yi öcpi jugypigipy yi' ajcxy, com co Jesús yjugypicy co y'o'cy. ³ Chi je tungmïdipi ajcxy majch Pedro etz Juan, e chi ajcxy pidacy pujxtigoty ixti com jabomni, com ti anajty chu'ñ. ⁴ Mayjäy ajcxy huindibi anajty ti amido'ijtcixy je Pedro y'ayuc ymibicy ajcxy. E hue' je mibijcpidijc, ac yëydijctijcpi, yajmichomujcy jahueen ycamigoox mility.

⁵ Je com jabom ajcxy ñaymújcci jim Jerusalén judíoáy tungmüdpí, je mijjädijc etz yí escribas. ⁶ Nañ jadu'n jim anajty Anás huidibi anajty ane'mb je teedy ajcxy, etz je Caifás, je Juan, je Alejandro, etz tüg'óciy teedy mijtungmüdpí yjugymigüg. ⁷ Chi ajcxy pidacy Pedro etz Juan cujc'amy ma anajty ajcxy ñaymugyii, chi ajcxy y'amidooy:

—¿Pín miich ajcxy ti xymöy cötujcín co jada jadu'n ti mdungixy?

⁸ Huin'it Pedro ymüid anajty Espíritu Santo ma yjot yhuinma'ñ, chi ymínañ:

—Miich ajcxy tungmüdpí etz judíoáy mijjädijc, ⁹ yí' ñich miich ajcxy cham xyaj'amidoob yí oybi tibi yajtuñ ma tüg pa'mjäy e nejhuñhuaangixy nej ti chögy. ¹⁰ Cham nimydactäyich ma miich ajcxy mhuinduu, jaydëbi ajcxy nejhuñydhüipy tüg'óciy judíoáy, co jadayaabi jäy huidibi anajty tecyma'tpi, cham yajpaady ya ma miich ajcxy mhuinduu mic oy, müid je mic'ajt huidibi Jesucristo je Nazaretpí yejcpy, je jäy huidibi miich ajcxy myajcruudzpejt, huidibi Dios yajjugypijc co y'o'cy. ¹¹ Yí Jesús jadu'n nipaady nej tüg tzaa oybi, huidibi ajcxy potzpidijc, ca' yajtúngixy co ytijcojciy. Jesús cham ti paady mijtung ma Dios, jadu'n yí' ni paady nej tüg mij tzaa huidibi ytungbaatp ma poch ytaatz. ¹² Ca' jac ni pín huidibi jëbi xyajnidzoocím ajt n'alma. Jesucristo yí' je' tügpaajc huidibi Dios yejc ma jäy ya naaxhuiñ huidibi jëbi xyajnidzoocím ajt n'alma.

¹³ Co je mijtungmüdpí ajcxy ijxy midoy jadu'n nej Pedro etz Juan ajcxy huinmic jotmic ycapxcixy, etz nejhuñy co ca' ajcxy y'ixpicjyáity, chi ajcxy ooy jihuiy huinmay. Nañ yí' ijxajp ajcxy co je' anajty huidibi ajcxy ti müid huidity Jesús. ¹⁴ Cha co yjactimjimity anajty je jäy huidibi anajty ti chögy ytinäy müid Pedro etz Juan, paady ajcxy ca'jajty nej midziptzoonipy. ¹⁵ Chi je tungmüdpí ni'ane'mdiy huen yajpidzimyii Pedro etz Juan ma je mayjäy anajty ñaymugyii, jigix ac jëyi tungmüdpídjic ñyöyaangixy capxyöyaangixy Pedro etz Juan ypocy. ¹⁶ Chi ajcxy ymínañ:

—¿Ti cham nduunim müid yijibi jäy ajcxy? Com tüg'óciy jäy huidibi tzinaayb ya Jerusalén ñejhuñyb ajcxy co ti túngixy mijhuinma'ñ, e ca' huaad ñich ajt nmínaaním co ca' yjanchity. ¹⁷ Tzoc capx'adujcim co ca' huaad ajcxy jacnimíydägipy Jesús jadachambi etz jacnixpi xi tiempo.

¹⁸ Chi ajcxy mijhuoy Pedro etz Juan, chi ajcxy nimay co ca' huaad ajcxy ni nej ocnimíydaacñp, ni ca' jacyaj'ixpigipy müid Jesús yxi. ¹⁹ Huin'it Pedro etz Juan y'adzooy:

—Huinmaaygix miich ajcxy ci'm pen ti'yajt jada ma Dios co ñich miich ajcxy ngapxycöbigipy jayijp, ca'ydi yí Dios. ²⁰ Com ñich ajcxy ca' nni'amonaangixy jadu'n nej ñich ajcxy ti n'ixy ti nmídooy.

²¹ Huin'it je tungmüdpí ajcxy adzigi'ñ migapxy Pedro etz Juan, e najtzmazhiy ajcxy. Ca' ajcxy mihuinma'ñybaty nej tzaachytunipy Pedro etz Juan. Com tüg'óciy jäy yjäymejchpy ycömaayb anajty yí Dios jadu'n nej anajty ti ytuñyí ti yjadyí. ²² Je jäy tecyma'tpi huidibi tzooc co Dios mijhuinma'ñ ytuñ, ymüid anajty yjimíjt huixchigüipx naxy.

Je mibijcpídjic ajcxy pijctzoogixy ma Dios jotmic'ajt

²³ Chi Pedro etz Juan co yajnajtzmazhiy, chi ajcxy ñicxy ma ymígügtijc anajty, yajmüdmíydactay tüg'óciy jadu'n nej teedy huindzin etz mijjädijc anajty ti ñimáayigixy.

²⁴ Co jada ayuc ajcxy midoy nidüg'óciy ajcxy tú'ciy yjot yhuinma'ñ pidacy, chi ajcxy Dios mibijctzoy ymínañ ajcxy:

—Huindzin Dios, miich je' ti m'oyduñ je tzajp, je naaxhuiñybi, je mejy etz tüg'óciy tijaty.

²⁵ Miich müid mEspíritu je David myajcapxy, e yí' jadu'n ymínañ:

¿Nej co jada naaxhuiñybi jäy chachhuaangixy chachjihuygixy, e yí jäy ajcxy huinmaaygixy huidibi ca' ytimytiijity?

²⁶ Yí reydijc ya naaxhuiñybi midziptzooñ ajcxy yí Dios. Etz je tungmüdpí cajp cajp ñaymujci ajcxy, midziptzoñ ajcxy Huindzin Dios, etz midziptzoñ ajcxy Cristo.

²⁷ Com janch co je rey Herodes etz yí gobernador Poncio Pilato ñaymujci ya ma jada cajp müid huidibi ca' yjudíoáyity ajcxy etz müid judíoáy ajcxy, midziptzoñ ajcxy yí

m'ung Jesús huidi anajty ti mhuin'ixy. ²⁸ Yi' ajcxy ti cuydungixy tüg'óciy jadu'n nej miich, Huindzin Dios, ti myajniögügiy jadu'n nej ytunüyb yjadüyb. ²⁹ Jadachambi Huindzin Dios, ix jadu'n nej yi tungmütpi xychachmijotmá'tcixyich. Mo' yi mdumbi ajcxy jotmic'ájtín, jigix m'ayuc ajcxy capxhuäcxipy amic jotmic, ³⁰ e müd miich mmic'ájtín chögipy pa'mjäydijc, tunipy ajcxy tijaty ijxpejt etz mijhuinma'n müd yi m'ung Jesús yxi, huidibi müd huädz yjot yhuinma'n.

³¹ Co ajcxy mibijctzoday, chi je naax chuyuuy ma anajty ajcxy tügmucy yajpaatcixy, etz nidüg'óciy yi' ajcxy ymic'ajt mooyi je Espiritu Santo, e yi Dios y'ayuc capxhuäcxixy anajty amic jotmic.

Je mibijcpidijc tú'ciy anajty ajcxy yjot yhuinma'n

³² Je mayjäy huidibi anajty ti mibicy, tú'ciy ajcxy yjot yhuinma'n. Ni pin anajty ycamina'n co naydüg jé'adyii. Hue' anajty ymínaangixy co tú'ciy jé'ájtigixy. ³³ Je majmetzpi Jesús y'ayuccapxhuäcxpi amic jotmic capxhuäcxxy je tiy'ajt jadu'n nej je Huindzin Jesús yjugypijcy co y'o'cy. E mij ajcxy Dios ypubejti. ³⁴ Ma je' ajcxy ca' ni ti yajmayjajtcixy, com tüg'óciy tijaty anajty ajcxy ymüd ñaax o ytijc ytoocpy anajty ajcxy, e yejccixy anajty meeñ. ³⁵ Chi je meeñ yajcídigiigixy je apóstoles ajcxy e yi' ajcxy moy nidüg nidüg pinjaty yajmayjajtp. ³⁶ Jim anajty müd je' ajcxy tüg levita jäy huidi anajty yxi José, huidibi ma'xung'ajt ma yi ñaaxjot mejy agujc huidibi yxi Chipre, je huidibi je majmetzpi Jesús y'ayuccapxhuäcxpi, yxi moy Bernabé, huidibi huimbídzim je yajjotcujc'ajtpi. ³⁷ Je Bernabé tocy ytundac huidibi anajty ymüd, e chi mímiiñ je meeñ, e yajcídigiy je apóstoles ajcxy.

5

Je Ananías etz Safira ajcxy Dios midundigoy

¹ Chi jadüg yéydijc, huidi anajty yxi Ananías, müd ytöxyijc, Safira, toogy ajcxy tüg it ytundac. ² Ananías ñayyajnihui'mi jac'anaxy je meeñ, e yajninicxy Jesús y'apóstoles ajcxy je jac-hueenip, jadu'n nej jihuüy yejctay tüg'óciy, etz yi' ytöxyijc ñejhuüyb anajty. ³ Chi Pedro nimay Ananías:

—Ananías, ¿nej co myajtuñ je mujcu' yhuinma'n, e mhuin'ina'n je Espiritu Santo, e ti mbugoñ jac'anaxypi meeñ nej ti tzoo'adyii yi pidägy tübi mdoogy? ⁴ ¿Nej ca' anajty yi' miich mdundac'adyii? E co ti mdoogy, ¿nej ca' anajty je' miich mmeeñ'adyii? ¿Nej co jadu'n ti mdundigooy? Dios ti mhuin'iiñ, canan jäy.

⁵ Co jadu'n midoy, Jiménez Ananías yciday, e chi y'o'cy. E tüg'óciy jäy ajcxy huidijaty nejhuüy, ooy ajcxy chigüy. ⁶ Huin'it ymiiñ jadyii yujcyecpidijc, chi ajcxy mo'ñ Ananías ñinícx, e oy ajcxy yajnaaxtigüy.

⁷ Codugüg hori naxy, oy ytigüy je Ananías ytöxyijc, e ni ca' nejhuüy anajty ti ti ytuñyii ti yjadyii je ñäy. ⁸ Pedro y'amidoohui:

—Yajniimaaygich, ¿nej janch jadu'n ti mdoocixy yi mdundac jadu'n nej ti mgapxcixy?

Chi je töxyjäy y'adzooy:

—Janch jadu'n ti ndoogyich.

⁹ Chi Pedro ymínañ:

—¿Nej co ti mnaygápxiigixy mhuin'ina'n yi Espiritu Santo? Cha ma tijc'aguu je jäy ajcxy ytinäy huidi oy ti yajnaaxtigüy mñäy, e jadachambi miich ajcxy xyajnicxaam nañ jadu'n.

¹⁰ Tim huin'itiy Ananías ytöxiijc yciday, e chi y'o'cy. E chi oy ycidägy ma Pedro ytecymijc. Co je yujcyecpidijc ytigüy, chi ajcxy je' paaty ögy. Chi ajcxy yajpidzimy etz oy yajnaaxtigüy ma ñäy ymijc. ¹¹ Chi tüg'óciy je jäy ajcxy huidibi Jesús mibijcp etz tüg'óciy huidibi midou jada nej ti yjadyii ti ytunyii, chi ajcxy ooy chigüy.

Canaag mij'ijxpejt etz tiy'ajt

¹² Je majmetzpi Jesús y'ayuccapxhuäcxpi ooy anajty ajcxy Dios ymic'ajt yajniguëxici etz ijxpejt yejccixy ma yi jäy ajcxy. E tüg'ócüy jäy ajcxy huidibi Jesús mibijc jabom jabom anajty ñayyöymújcigixy ma Dios ytjc huinduu huidibi yxii Salomón. ¹³ Ca' jac ni pin anajty mñnicxpeda'ñ mijyöypeda'ñ je' ajcxy. E je jäy ajcxy yjacyajmij'ajtpy huidi Jesús anajty ooy mibijccixyp. ¹⁴ Mayjäy oy mibijcni Jesús y'ayuc, yëydijctijc etz töxyjäydijc. ¹⁵ Etz ixti pa'mjäydijc anajty ajcxy yajnicxy mñjtüguj cix'aam pidaaccixy, jigix co Pedro ñaxipy jim ycadimjegyity co nicxy y'aa'ap yjäty ma je pa'mjäy. ¹⁶ Nañ jadu'n mayjäy chooñ anajty huidijaty huington ycajp, ymiingixy Jerusalén, mñidmiingixy pa'mjäy, etz huidibi ca'oybi mñid ma yjot yhuinma'ñ, e tüg'ócüy yajtzoocaaayb anajty ajcxy.

Pedro etz Juan yaj'ixhuidijtcixy yajpahuidijtcixy

¹⁷ Huin'it je teedy mñjtungmñdipi etz huidibi saduceo ijxpíjcín ymijpidacp ooy ajcxy yajca'oy'ijxy, ¹⁸ e co ajcxy majch je apóstoles ajcxy, chi ajcxy pidacy ma je mñjpujxtijc. ¹⁹ Chi Huindzin Dios tüg y'ángel je huin'it coodz yaj'ahuaach je pujxtijc aguü, yajpidzimy ajcxy, chi ajcxy nimay:

²⁰ —Níxcix, tinay'ahuiiygix tzajtigoty, yajmñdmñydaaccix yi mayjäy ajcxy Jesucristo yt'y'ajt nej jëbi jäy ajcxy paadipy jugy'ájtín jemybi.

²¹ Co jadu'n midoy, chi com jabom ytigñy ajcxy jopyñi tzajtigoty. Jiiby je' ajcxy anajty ñiyaj'ixpijcco'ni.

Chi je teedy mñjtungmñdipi etz jacpinjaty mñid, chi ajcxy capxyñiguejxy yi judíojäy ymijjäydijc etz ixpicytjic co huen junta jadyii. Chi ajcxy capxyñiguejxy huen nicxy yajpidzimyii jiiby pujxtigoty yi apóstoles ajcxy. ²² Co je policías ajcxy ymejch ma je pujxtijc, ca' ajcxy paady je apóstoles ajcxy. Chi ajcxy huimbijtni mñid t'y'ajt, ²³ chi ajcxy nimay:

—Hue' ñich ajcxy ti nbaadcixy yi pujxtijc aducy, etz je soldadtijc jim tijc aguüy yjac-cuend'ajtcixy. Chi co ñich ajcxy nyaj'ahuäch je pujxtijc, ca' ñich ajcxy ni pin ti nbaatyich jiiby pujxtigoty.

²⁴ Co jadu'n ajcxy midoy, je teedy mñjtungmñdipi etz je soldado huindzin, etz jacjadyii teedy huindzin ajcxy, chi ajcxy ooy huinmay nej jada y'ocogixihuip. ²⁵ Huin'it tüg jäy mñiñ huidibi nimaayi ajcxy:

—Je jäy huidibi miich ajcxy mñidac pujxtigoty, chim je' ajcxy tzajtigoty yaj'ixpijccixy yi mayjäy.

²⁶ Chi je soldado huindzin mñid soldadtijc ñicxy ma yi apóstoles ajcxy jäy yaj'ixpijccixy, chi ajcxy yajnicxy oy'amy, com tzigñyb anajty ajcxy co je mayjäy chaagädziyb.

²⁷ Co ajcxy yajmñiñ, chi ajcxy pidacy ma je maytungmñdipi yhuinduu. Chi je teedy mñjtungmñdipi je apóstoles ajcxy nimay:

²⁸ —Ñich ajcxy ti ngapx'aducy co ca' huaad m'ocjacyaj'ixpijccixni ma Jesús yxii. E ¿ti ti mdungixy? Ti myajhuäcxtaaygixy yi m'ixpijcin ma Jerusaléngajp, e ñich ajcxy miich pocy xyjátym yajmñihuimam co Jesús y'o'cy.

²⁹ Chi Pedro etz jacjadyii apóstoles ajcxy y'adzooy:

—Copicy ñich ajcxy ngapxycöbigipyich yi Dios jayjip ca'ydi jäy. ³⁰ Je Dios huidibi ñich ajt nmij'ap nmijteedy y'ojadajt, yi' yajjugypijc je Jesús huidibi miich ajcxy myaj'óc cruudzcixy. ³¹ Je Dios Teedy jadachambi hue' Jesús mñidity aa'oy'amy jiiby tzajpjoty, e ti pidägy ane'mbi etz yajnñdzoocpi jigix yi judío jäy ajcxy yjothuimbidity e yajhuinmeecxipy ajcxy ypocy. ³² Ñich ajcxy t'y'ajt nyejcpy mñid jada ycixpi, etz nañ jadu'n je Espíritu Santo huidibi Dios ymooyb pinjaty capxymidoohuip.

³³ Co je jäy ajcxy jadu'n midoy, chi ajcxy ooy yjotmätcoty, chi ajcxy jayaj'öga'ñ. ³⁴ Huin'it ytinaigy ma je naymujctac tüg fariseojäy, hue' anajty yxii Gamaliel, hue' je' anajty Moisés yley ñihuindzin'ájtíp. E jäy ajcxy ooy anajty yajmij'ajtcixy je Gamaliel. Chi je'

ni'ane'mdiy co huen yajpidzimyii tzojcyi jiiby tiba'y je apóstoles ajcxy. ³⁵ Chi Gamaliel nimay yi tungmüdpí ajcxy:

—Judío yëydijctijc ajcxy, íxcim ti mdungixy müd jada jäy ajcxy. ³⁶ Jäymetz müch ajcxy co jecy'ajty je Teudas ypidígy ymínañ co je' ymijity yjanchity, e chi ypanícxí oy nimídaax migo'pxti yëydijc. Chi ajcxy yaj'o'ci, chi tüg'óciy huidibi anajty ti ypanícxíyí yöyhuäcxtay, e jadu'ñyi je' ajcxy ñitigoyday. ³⁷ Jacnamni je huin'it xii mína cajpjäy anajty ñecypejtcixy, ypidígy Judas huidibi tzon Galilea. Mayjäy ypanícxí; nañ jadu'n ajcxy yaj'o'cy, e tüg'óciy jäy huidibi panícxí jadu'ñyi ajcxy yöyhuäcxtay. ³⁸ Paady ñich müch ajcxy jadu'n nimaaygixy, ixmajtzcix yi apóstoles ajcxy, e ca' mmijyöybejtcixy. Peni jäy yi y'ayuc ytiy'ajt huidibi ajcxy ymüd, cixip tigoyip yi'. ³⁹ Pen Dios y'ayuc ytiy'ajt yi' ajcxy ymüd, ca' ajcxy mjadipy nej myajcödigóoygixyipy. Jaty nayguend'ajtigixy, ca' jecyity co Dios anajty müd mdziptungixy.

⁴⁰ Nidüg'óciy ajcxy jäygidacy Gamaliel ycapxhuíjn. Huin'it ajcxy mijhuoy yi apóstoles ajcxy. Chi ajcxy tzaachytuñ, chi ajcxy c'ajty, etz capx'adujcy co ca' huaad Jesús y'ayuc jaccapxhuäcxip. Huin'it ajcxy najtzmazhiy. ⁴¹ Je apóstoles ajcxy ypidzimy ajcxy ma tungmüdpí ajcxy yhuinduu ooy yjotcujcity co Dios jadu'n ti aa'ixíy co huen tzaachytuñyí müd Jesús yxii ycixpi. ⁴² E ooy ajcxy yaj'ixpijccixy etz nimiyaaccixy Jesucristo jabom jabom jadu'n tzajtigoty nañ jadu'n majaty tijc.

6

Chi ajcxy yajñibejty huixtujc mutztungmüdpí

¹ Je huin'it xii ajcxy huidibi ixpijcp Jesús y'ayuc nigi anajty ñimayiy'aditzcixy. E huidibi anajty capxp griego ayuc ytiyíy nayñigápxip müd huidibi judío y'ayuc capxp. Ymínaangixy co yi griegojäy co'ögy töxyjädjic, ca' anajty ajcxy paady quipxyjaty müd je judíojäy co'ögy töxyjädjic caayin uucin jabom jabom. ² Huin'it yi majmetzpi apóstoles ajcxy yajnaymujctayí je jäy huidibi Jesús mibijcp, chi ajcxy ymínañ:

—Ca' huaad ñich ajcxy Dios y'ayuccapxhuäcxin n'ixmajch, e nicxyich caayin uucin yajhuäcxixy. ³ Paady müch ajcxy migügtijc nayhuin'íxigix huixtujc yëydijctijc huidibi oy yajmij'ajtni Dios, huidibi huadz oy yhuinma'ñ ymüd, huidibi je Dios yjihu'ñ ymic'ajt müd, e huen ajcxy tung'adüb jada tung. ⁴ ñich ajcxy njacmibijctzohuamy Dios, etz ñich ajcxy njacyaj'ixpigamy Dios y'ayuc.

⁵ Tüg'óciy ajcxy jäygidacy je' ayuc. Chi je mayjäy huin'ijxy Esteban huidibi ymüd ooy ymibijcin, etz ymüd Espíritu Santo. Nañ huin'ijxy ajcxy Felipe, Prócoro, Nicanor, Timón, Parmenas, etz Nicolás. Nicolás ca' je' anajty yjudíojäyity. Hue' je' anajty choon jim Antioquía, jécyip anajty jijptigiyíyñi judíojäy ytiy'ajt. ⁶ Chi ajcxy yajnicxy je jäy ma je apóstoles ajcxy. Chi ajcxy je apóstoles Dios mibijctzoy e cñixajy ajcxy.

⁷ Je Huindzin Jesús y'ayuc nigi anajty jäy tzachnejhuíyñi. E je mibijcpidijc nigi anajty ajcxy chachnimayíyñi jim Jerusalén, ixti may judío teedy ajcxy ymibijcy.

Majch ajcxy Esteban

⁸ Je Esteban ymüd anajty Dios ymic'ajt etz y'oy'ajt e oy mijhuinma'ñ tuuñ, etz yejcy ijxpejt ma jäy ajcxy. ⁹ Huin'it xii nijëjity ixpijctijc ooy ñay'ixquípxigixy y'ixpijcin müd Esteban jim ma judíojäy ajcxy ñaymujctac huidi anajty yxii Libertados. E jim anajty Cirene jäy, Alejandría jäy, Cilicia jäy, etz huidibi tzomb jim Asia ñaaxjot. ¹⁰ Ca' ajcxy mímadacy Esteban com hue' je' anajty ycapxy müd yhuijy'ajt ycujc'ajt huidibi je Espíritu Santo anajty mooyip. ¹¹ Chi Esteban ymídzip ajcxy mujuy jäy huidibi jëbi nihuambety Esteban, co ti anajty ooy ycapxtigooy etz ni'ojíy Moisés etz Dios. ¹² Jadu'n ajcxy yajyuumígy yaj'oxígy yi jäy mijjäydijc, etz huidibi ajcxy yaj'ixpijcp Moisés yley. Chi ajcxy mímadacy majch ajcxy Esteban, yajnicxy ajcxy ma je judíojäy ymijtungmüdpí etz ixpijctijc ñaymújcgixy. ¹³ Chi ajcxy ixtaayí jäy huidibi nihuambedüb, chi ajcxy ymínañ:

—Jada Esteban jibic nigapxy yi Dios ytijc etz Moisés ytiy'ajt. ¹⁴ Ti ich ajcxy midoy co ymina'n co Jesús je Nazaretpi yjidamy je Dios ytijc, e yajtigadza'n Dios ytiy'ajt jadu'n nej Moisés ajt xymooyim.

¹⁵ Huin'it je judíoJay tungmüdpí e tüg'óciy jäy nej anajty ajcxy jim ñaaygixy huindicxpejty ajcxy Esteban. E chi ajcxy ixi yhuiñyijp jadu'n anajty quëxigy nej y'ángel yhuiñyijp.

7

Esteban ñaygohuaani ma tungmüdpí yhuinduu

¹ Huin'it je teedy mjtungmüdpí yaj'amidooy Esteban:

—¿Nej janch jadají?

² Chi Esteban y'adzooy:

—Migügtijc ajcxy etz mijjäydijc ocmidoogix. Ich ajt nDios mijpi janchypí nayquëxici ma ich ajt nmij'ap nmijteedy Abraham jecy'ajty co anajty jim ity Mesopotamia ñaaxjot, ca'ni anajty chinaydacpiy jim Harán. ³ Chi Abraham Dios ñimaayi: “Ixmatz mnaax mgajp etz tüg'óciy m'amigügtijc, e nicx ma yi naaxjot huídibi myajnixihuamyb.” ⁴ Chi Abraham choñ ma yi Caldea ñaaxjot, e nicxy tzinaydacpijcpí jim Harán. Co yteedy oy y'o'cni, chi Dios Abraham yajmiiñ ma jada naaxjot ma müch ajcxy cham mdzinäy. ⁵ E ca' Dios moy Abraham jada naaxjot ya, ni ca' ma yhuäcxtägipy. Hue' je' janchtiy yaj'ahuaniiy co möhuaaniiy y'ap y'oc, e co anajty je' ajcxy jëdiib. Oyñi anajty Abraham ca' y'ung müdity co Dios ymigapxi. ⁶ Nimaayi Dios co y'ap y'oc y'adzinähuiipy ajcxy ma huingjäy ñaaxjot, etz chi ajcxy ytumbi'adiyb etz chaachytuniiyb midaax migo'px jimijt. ⁷ Nañ jadu'n Dios nimay Abraham: “Ndzaachytunipyich je naax cajp ma yi m'ap m'oc anajty ytumbi'adyii. Chi choonip ajcxy jim, e chi xymidunipyich ma jadayaabi it.” ⁸ Dios ytuun tüg capxytuunin müd Abraham, co huen ajcxy yajtiy'ajttühip. Paady co Abraham y'ung Isaac yma'xung'ajty conductujc xii ajcxy oy tiy'ajttiy. Nañ jadu'n Isaac ymang Jacob, e Jacob yi ymang nimajmetzpi ajcxy, huídibi ajcxy ñi'ap'ajty yi nimajmetzpicypí Israel ycajp.

⁹ Chi Esteban yjacmíñañ:

—Je' ajcxy Jacob ymang, ich ajt nmij'ap nmijteedy, ymi'ijxtinaayb anajty ajcxy y'uch José. Chi ajcxy José toocy, chi je' yajnicxi jim Egipto, per Dios müd anajty y'ity José, ¹⁰ etz nihuaañ yajzoocy ma ayo'n jotmay. Chi Dios moy ixpijcin jigix cömay ypidzimipy ma Faraón, je Egipto jäy yrey. Chi je rey José tung moy huen ane'my je Egipto naaxjot etz ane'mipy je rey ytijc.

¹¹ Huin'it xii ymiiñ mijyuu mij'ayo'n jim Egipto etz jim Canaán ñaaxjot. Je huin'it xii ich ajt nmij'ap nmijteedy ca' anajty ajcxy paady ti ycayipy. ¹² Co Jacob oy nejhuüy co jim Egipto yajpaady jim trigo, chi jim quejxy ymang ajcxy trigo juuybi. Je' ajcxy huídibi ich ajt nmij'ap'ajtim nmijteedy'ajtim. Chi ajcxy y'oy tügtecy trigo juuyb. ¹³ Je mimejtz'ocpi co ajcxy oy trigo juy, huin'it José ñayñigapxi ma y'ajch ajcxy. E chi je rey nejhuüy pinjäy je' anajty je José. ¹⁴ Chi José capxyñiguejxy huen cidaaccixy jim Egipto yi' yteedy Jacob müd tüg'óciy yjuugy ymigüg. Hue' anajty ajcxy ñaybaattáayigixy nidugi'px majmox jäy. ¹⁵ E jadu'n yajty co Jacobo oy chinaydacpiy jim Egipto. Jim oy comjey y'o'cni. Nañ jadu'n jim ajcxy y'o'cy may ich ajt nmij'ap nmijteedy. ¹⁶ E chi Jacob yjuugy ymigüg com jecy yajpidzimy Jacob ypajc ma ñaaxtigiy, e chi ajcxy yajnicxy jim Siquem, oy pidaaccixy ma je o'cpi jut huídibi Abraham anajty ti juy meeñyigixy ma Hamor ymang jim Siquem.

¹⁷ Chi Esteban yjacmíñañ:

—Ytimypadaanipy anajty tiempo nej anajty Dios ti yaj'ahuaniiy Abraham. Ti anajty yi judíoJay ooy ymayiiñi jim Egipto. ¹⁸ Chi oy jadüg rey ytigiiy ane'mbi huídibi ca' ix'y'adyii José. ¹⁹ Je rey yhuin'iiñ ich ajt nmij'ap nmijteedy, e oy ajcxy chaachytuun. E chi ane'my

co huen y'ung ajcxy niguecytaaygixy huídibi anajty ajcxy ma'xung'ajtp, jigix y'ó'ccixipy. ²⁰ Huin'it tiempo oy yma'xung'ajty Moisés, je huídibi ooy Dios jäygidacy. Chi Moisés ytaj yteedy tugüig po' yajyeeci ma ytijc. ²¹ Co ajcxy yajnigueeci, chi je rey ñix je' agondigüy, e yajyeegy jadu'n nej yci'm'ung. ²² Paady Moisés ixpijcy tüg'óciy jadu'n nej Egipto jäy anajty ajcxy y'ixpijcyty, e ooy ymadacy müd y'ayuc etz müd ytung.

²³ Co Moisés anajty müdity huixchiguüpx jimijt, chi pidacy yhuinma'ñ co ñicxy ixa'ñ je' y'amigügtijc je Israel y'ap y'oc. ²⁴ Chi Moisés ijxy co tüg egipciojäy chaachytuñyüi tüg je' y'amigüg. Chi Moisés yaj'o'cy je egipciojäy, yaj'ahuimbijty nej anajty y'amigüg yajtzaachytuñ. ²⁵ Hue' Moisés tijy co je' y'amigügtijc ajcxy huen nejhuüy huiñjihuüy co Dios nihua'naanip ma ymidzip müd Moisés ycixpi. Chi ajcxy ca' huiñjihuüy co Moisés nihua'naanip. ²⁶ Com jabom Moisés paty mejtz Israel jäy chachtziptungixy. Chi Moisés jayajxemaañ je tzip, chi nimay: “Miich ajcxy nay'amigüg'ajtip, ¿nej co mdziptungixy müich ajcxy miñ xyipy?” ²⁷ Je huídibi anajty ymügüg tzaachytuumb huin'it najtztijüy Moisés, nimay: “¿Pin ti xypidägy huindzin etz tydumbi ma ich ajcxy? ²⁸ ¿Nej xyaj'ogaamich jadu'n nej axiy myaj'o'cy yi egipciojäy?” ²⁹ Co Moisés jadu'n midoy, chi yqueegy, ñicxy jim ma Madián naaxjot. Moisés jecy y'adzinaay jim Madián naaxjot, e jim oy ypicy. Chi ytöxyijc paty metz ymang.

³⁰ Huixchiguüpx jimijt naxy, huin'it jim adügtuum ma je cop huídibi yxi Sinaí, ñayguëxici tüg ángel jinjoty ma tüg quipymang huídibi anajty tzachtooyb. ³¹ Chi Moisés ooy jihüüy huinmaay müd je' ycixpi huídibi anajty y'ijxyp. Co oy mihuingoñ, chi midoy co je Huindzin Dios ñimäyüi: ³² “Ich Dios huídibi mmij'ap mmijteedy ajcxy Abraham, Isaac etz Jacobo Dios'ajtpy.” Chi Moisés chiyuygoty, ca' anajty ocjac-huindixpedaani. ³³ E je Huindzin Dios nimaayi: “Jen mgig, com je it ma müich mdinäy, Dios yi' y'it. ³⁴ Ich ti n'ixyich njäyich nej tzaachypi paatcixy jim Egipto. Ti nmidooyich co yi'ajcxy yäxy ytinäy müd je tzaachypi ycixpi. Ti ngidägyich co ajcxy ngohuaanip. Ich müich nguexamyb jim Egipto ma yi Israel jäy ajcxy.”

³⁵ Chi Esteban yjacmínañ:

—Co Moisés oga'n ñicxy ma ich ajt nmij'ap nmijteedy ca' ajcxy cöbijcy huen y'ane'müyb, chi ajcxy ymínañ: “¿Pin ti xyñimäy co ich müich ajcxy nhuindzin'adüyb?” Co mimetz'ocpi Moisés ñicxy ma yi Israel jäy, je taabi anajty je ángel ti ymigapxyüi jinye'ñ agujc, chi ajcxy cöbijcy. ³⁶ Je Moisés je' yajpidzim ich ajt nmij'ap nmijteedy jecy'ajty jim Egipto. Moisés ytuun oy mijhuinma'ñ etz ijxpejt huixchiguüpx jimijt jim Egipto, jim ma tzaptz mejy, etz jim ma mijtigüduum. ³⁷ Je Moisés huídibi jecy'ajty nimay je Israel jäy: “Dios y'ijxtihuüpy tüg jäy ma müich ajcxy m'ap m'oc huídibi najtzcaxihuüpy yi' y'ayuc, jadu'n nej ti xy'ijxtiyich ma müich ajcxy. M'amido'ijtip ajcxy yi' y'ayuc.” ³⁸ Je Moisés jim je' anajty mijtigüduum müd je mayjäy. Chi jim je Dios y'ángel müd midacy ma je cop huídi yxi Sinaí, etz Moisés yajnax Dios y'ayuc ma ich ajt nmij'ap nmijteedy. Moisés ycöbijc Dios y'ayuc huídibi jugy'ájtín huiñixibi müd, etz jayhui'my müd ich ajt ycixpi.

³⁹ Chi ich ajt nmij'ap nmijteedy ajcxy jecy'ajtpy ca' anajty ajcxy capxcöbigaangixy Moisés, ca' anajty cöbijccixy je' y'ané'mín, chachhuimbidaangixy jim Egipto. ⁴⁰ Chi ajcxy Aarón nimay: “Ndzojcypich ajcxy co müich oyduun tüg Dios huídibi ich ajcxy xyhuinhuoohüp, com ca' nnejhuüyüm ti jada' ti yjadyüi je Moisés huídibi ajt xyajtzoönim Egipto ñaaxjot.” ⁴¹ Chi oyduñ ajcxy tüg huajmang. Chi huindzigüy ajcxy je huajmang huídibi anajty ti yajcojcxxy, e ooy ajcxy mijotcuje'ajty huídibi ci'm anajty ti yajcojy. ⁴² Huin'it xi ajcxy Dios y'ixmajtzi, huen ajcxy ojadaty yi xi, yi po' etz madza'. Com jadu'n Dios y'ayuc cojaaybi cojaay co Dios jadu'n ymínañ:

Israel jäy ajcxy canan ich je' huídibi ti mhuindzigüygixy jim mijtigüduum huixchiguüpx jimijt.

⁴³ Ti mgiynícxcixy Moloc ytijc etz yi Renfán ymadza', tzadzech, quipychech etz oori oyduñ huídibi miich ajcxy ci'm myajcoj huídibi anajty ajcxy m'ojadadamy. Paady ñich miich ajcxy nyajpidzimaangixy ma yi mnaaxjot, e nguexaangixy jiguem jim Babilonia ninaxy.

⁴⁴ Chi Esteban yjacmīnañ:

—Jim mijtigīduum ñich ajt nmij'ap nmijteedy ymīd anajty cochactijc ma anajty ajcxy Dios huindzigīy. Jiiby anajty ajcxy yujccīy je tzaa ma Dios ytiy'ajt ycojaayity. Je cochactijc ajcxy ycoj jadu'n nej anajty ti yaj'ane'myii Moisés, e nej anajty yajni'ixīyīi nej tunipy.

⁴⁵ ñich ajt nmij'ap nmijteedy mihuim je cochactijc, e ñich ajt nmij'ap nmijteedy huídibi mīñ ma jada naaxjot mīd Josué, chi mīñ ajcxy je cochactijc je taab ajcxy mīmadacy je ymīdzip canaag'agajp. Dios yajpidzim je' ajcxy ymīdzip ma je naaxjot, jigix yajcīdigīhuip ñich ajt nmij'ap nmijteedy. Yajtuñ ajcxy je cochactijc, ixti cooni David ytigīy ane'mbi.

⁴⁶ Dios yjāygidāac je rey David, e David yjacoja'ñ anajty tūg tijc oyduñ ma jēbi yaj'ojadaty yajhuindzigīy Dios, je Dios huídī Jacob mīpidac jecy'ajty. ⁴⁷ Per Salomón je' oy cojy Dios ytijc. ⁴⁸ Oy yi Dios tzajpjoty pi ca' chināy ma yi tijc tiibi jāy cojy. Jadu'n nej je Dios y'ayucnajtzcaxīybi jecy'ajty jaybety co Dios jadu'n ymīnañ:

⁴⁹ Je tzajp hue' je' ñich n'ane'mdac, jada naaxhuīñybi ñich ndecypocxtac. ¿Ti tijc ñich miich ajcxy xycojaanip? ¿Ma je it huídibi it ma ñich jēbi nbocxy?

⁵⁰ ¿Nej cay ñich ti n'oyduñy tūg'ócīy?

⁵¹ Miich ajcxy ooy mjtjuuñity, ca' mgapxymīdoy Dios. Jadu'n Esteban yjacmīnañ:

—Jadu'n miich ajcxy mjt mhuinma'ñ mīdity jadu'n nej jāy ajcxy huídibi ca' Dios ytiy'ajt nejhuīyī. Miich ajcxy jāyīm mīdzip'ajty je Espīritu Santo. Mdūgīyb ajcxy mīd mmij'ap mmijteedy. ⁵² Miich ajcxy mmij'ap mmijteedy chaachytuun tūg'ócīy Dios y'ayucnajtzcaxīybi. Yi' ajcxy yaj'o'c Dios y'ayucnajtzcaxīybi huídibi jayīp'aty najtzcaxīy co ymīnañ tūg jāy huídibi tudāgyip. E co je tudāgy jāy ymīñ, chi miich ajcxy agojix myaj'o'cy. ⁵³ Je Dios y'āngel miich ajcxy xymooy je Dios ytiy'ajt, e ca' ajcxy mgōbijcy.

Yajtzaagōgātzcixy Esteban

⁵⁴ Co je mayjāy mīdoy jadu'n nej Esteban ymīnañ, chi ajcxy mījotmātcoty Esteban, chi ytigīy ajcxy tītz mucxpi tītz queetpi. ⁵⁵ E chi je Esteban jihūy je Espīritu Santo ma yjot yhuinma'ñ, chi chajp'ijxy, e ijxy yi Dios y'oy'ajtīn etz ijxy Jesús ytināy a'oy'amy ma Dios Teedy. ⁵⁶ Chi Esteban nīmay je mayjāy:

—¡Ijxcix! N'ijxypich yi tzajp ahuād, e n'ijxypich je jāy huídibi tzoon tzajpjoty ytināy a'oy'amy ma Dios Teedy.

⁵⁷ E chi je mayjāy ajcxy ytāt'ac amo'cxy, chi ajcxy ytigīy huambi jihūybi, e chi ajcxy nīmujcy yajmujcy Esteban. ⁵⁸ Chi ajcxy yajpidzīmy Esteban cajppa', je' oy cōgātzcixy. Je tiy'ajt yecpi huídibi jadu'n idītz, chi yjocxhuit ajcxy yajmīhui'my tūg yeeg'anāg huídibi anajty yxī Saulo. ⁵⁹ Jim anajty ajcxy Esteban tzachātzcixy. Chi Esteban Dios mībijctzoy, ymīnañ:

—Huindzīn Jesús, cōbīcīgich n'alma.

⁶⁰ Huin'it ycoxtīnay'ahuīy, e chi yaaxqueegy mīc ymīnañ:

—Huindzīn, ca' mbocy ixīpy nej ajcxy xytuñich.

Co jadu'n Esteban ymīnanday, chi oy y'ōgy.

8

Saulo pahuidijttāgy ooy mībijcpīdijc

¹ Saulo ytuun quipxycapxy mīd huídibi ajcxy yaj'o'c Esteban.

Huin'it xī yaj'ixhuídijc yajpahuidijc pīnjaty anajty Jesús mībijcp jim Jerusalén. Tūg'ócīy je jāy ajcxy huídibi Jesús mībijcp anajty yqueec-huācxtay, ñīcxy ajcxy jim Judea ñaaxjot etz

Samaria ñaaxjot. Jëyi je majmetzpi apóstoles ajcxy jac-hui'mäy. ² Nijëjity yëydijc huídibi Dios huindzigüyb oy yajnaxtigüy Esteban. E ooy ajcxy jotmay jihuiy, yaaxy ajcxy müd je' ycixpi. ³ Chi Saulo ooy ixhuídijtcoty pahuídijtcoty huídijaty Jesús mibíjçip etz tijc tijc anajty yajpidzimy pahuich pajuguty yëydijctijc etz töxyjäydijc, e pidaaccixy anajty pujxtigoty.

Jim Samaria ajcxy capxhuäcxy Dios y'ayuc

⁴ Je huídi ajcxy queec-huäcxtay ycapxhuäcxyp anajty ajcxy Jesús y'ayuc huen tim ma'amy huídijtcixy. ⁵ Nidügüti huídibi anajty yxii Felipe ñicxy jim Samaria, ytigüy y'ayuccapxhuäcxpi, yajnimay ajcxy Cristo ytí'ajt. ⁶ E je jäy ajcxy ñayyöymujci nidüg'óciy ajcxy y'amído'ijtcixy janch amóñyi jadu'n nej Felipe anajty ymiydägy e ijxyp anajty ajcxy je mijhuinma'ñ huídibi Felipe anajty ytumyb. ⁷ Com may anajty jäy jim huídibi müd ca'oybi ma yjot yhuinma'ñ, e tzoocp anajty ajcxy. E co je ca'oybi anajty ypidzimy ma je jäy, chi je jäy ooy yjacyaaxqueecy. Etz nañ mayjäy anajty chögy huídibi ca' yci' ytecy yücxy etz tecyma'tpi. ⁸ E jadu'n je mayjäy ajcxy anajty jim ooy yjotcujcity.

⁹ Jim anajty tüg yëydijc huídibi anajty yxii Simón huídibi anajty ti ni'ixpigüy huijy jäy huinma'ñ, e ooy anajty may Samaria jäy huinma'ñ, ymína'ñ co je' anajty ymijity yjanchity. ¹⁰ Tüg'óciy jäy anajty oy amído'ijtcixy Simón y'ayuc, pi'ctijc etz mij'anäctijc, e ymínaangixy:

—Jadayaabi yëydijc ymíid jada Dios ymic'ajt.

¹¹ Ooy anajty je jäy ajcxy Simón mijnicxpejtcixy, com müd je mañ'ajt anajty jecy ti chachhuin'ünigixy. ¹² Co je Samaria jäy mibijcy je ayuc jadu'n nej Felipe ñimiydacy Dios y'ané'min etz Jesucristo, chi ajcxy ñibejty yëydijctijc etz töxyjäydijc. ¹³ Etz je Simón, je huijy jäy, nañ jadu'n mibijcy e ñibejty. Chi Simón puyöyiy Felipe, ooy jihuiy huinmaay jadu'n nej je mijhuinma'ñ huídibi anajty Felipe ytumyb etz jadu'n nej anajty Dios ymic'ajt ijxi.

¹⁴ Co ajcxy je majmetzpi apóstoles ajcxy, huídi anajty jim Jerusalén, nejhuüy co je Samaria jäy anajty ti cöbijccixy Dios y'ayuc, chi ajcxy quejxy jim je Pedro etz Juan. ¹⁵ Co Pedro etz Juan yja'ty jim Samaria, chi ajcxy Dios mibijctzoy müd je mibijcpidijc ycixpi, jigix ajcxy ymöhüiyb je Espíritu Santo. ¹⁶ Com ca'ni anajty je' ajcxy ñicidägyii, jëyi anajty ti ñibejtcixy ma Huindzin Jesús yxii. ¹⁷ Huin'it Pedro etz Juan cñixajy ajcxy, e chi je Espíritu Santo y'adigüy yjottigüy ajcxy.

¹⁸⁻¹⁹ Co Simón ijxy co je Espíritu Santo y'adigüy yjottigüy co yi apóstoles ajcxy y'adigüy, chi Simón yaj'ahuanüy je' ajcxy meeñ, ymínañ:

—Mooygich nañ jadu'n yi mic'ajt jigix co ngñixájibich hueñypinity nañ jadu'n jëbi ajcxy je Espíritu Santo y'adigüy yjottigüy.

²⁰ Chi Pedro nimay Simón:

—Mi'ögühuipy müch mmeñ, müd co mhuinma'ñ ti mbidägy co meeñyigix mbada'ñ je huídibi Dios ñiyejcp. ²¹ Com müch ca' xypaady jadayaabi tung, com müch mjot mhuinma'ñ ca' ytudägy ma Dios. ²² Jothuimbit e ixmatz yi mjibic-huinma'ñ, e mibijctzou Dios, ca' jécyty xyhuinmeecxipy jadu'n nej jibic mjot mhuinma'ñ mmüidity. ²³ Com janch ta'm müch mjot mhuinma'ñ, e yi jibicpi hue' xymüidity mach.

²⁴ Chi Simón y'adzooy:

—Mibijctzou je Huindzin Dios müd üch ycixpi, jigix ca' ti xyjadipyich jadu'n nej müch ti xyñimäyich.

²⁵ Co Pedro etz Juan tíy'ajt yejcy etz capxhuäcxy Dios y'ayuc jim Samaria, chi ajcxy yhuimbijty jim Jerusalén. Chi ajcxy canaag agajp ñaxüy jim Samaria ñaaxjot, e capxhuäcxy Dios y'ayuc nej ajcxy y'alma nidzoocin paadipy.

Felipe müd je Etiopía jäy

²⁶ Huin'it xii Huindzin Dios y'ángel migapxy je Felipe, nimay:

—Tzoon ya, nicx ma madzäcruudz ypidzimy, ma je tü'aa huidi tzomb jim Jerusalén huidibi nicxp jim Gaza.

Je' je' je tü'aa huidibi adügtuum najxp. ²⁷ Felipe tim janitzon e ñicxy, e tü'am naybaatti müd tüg Etiopía jäy. Hue' je' anajty eunuco, migtungmüd jim Etiopía. Yi' je' tesorero'ajt anajty ma je töxyjäy huidibi anajty yxii Candace huidibi anajty ane'mb jim. Je eunuco jim anajty ti y'oy Jerusalén Dios ojadajtp. ²⁸ E chi yhuimbijtni anajty ma ycajp, iñaayb anajty carretijoty yam chachnecycapxy. Hue' anajty chachcapxyp je Dios y'ayuc huidibi Isaías ycojaay. ²⁹ Chi je Espíritu ñimay Felipe co huen nicxy najtzpadäy je carreti ma je eunuco anajty y'ñaäy.

³⁰ Co Felipe mihuingoñ je carreti, chi midoy co je jäy anajty capxy je necy huidi Isaías yjaay, chi y'amidooy:

—¿Nej mhujñihuyb huidibi mgapxyp?

³¹ Chi je jäy y'adzooy:

—¿Nej ñich nhujñihuyb py pen ca' pin xyajnimäyich?

Chi je eunuco nimay je Felipe co huen müd iñäyii carretijoty.

³² Je huidibi anajty je eunuco chachcapxyp jadu'n je' anajty ymina'ñ:

Jadu'n ajcxy nicxy yaj'ögy nej jäy borregi nicxy yaj'ögy. Je' amoñ'ijty jadu'n nej borregi amoñ'ity co jäy nime'pxy. Ni tüg'aa huam ycaminañ.

³³ Ti jäy yajtzöyduñyii, ca' ajcxy a'ixii co yjanayñigapxtüdaani. Ni y'ap y'oc ycaca'ty pin ocnigapxtüdb. Co yaj'öci, chi chooni ya naaxhuiñ.

³⁴ Chi je eunuco y'amidooy Felipe:

—Tunmay'ajt yajnimaygich pin jada ayucnajtzcapxybi ñimiydacy, ¿ci'm ñayñimidyägyii o ji jada huingbi pin nimiydacy?

³⁵ Chi Felipe yajtzondacy je ayuc capxticxin ma jadyaabi Dios y'ayucjojaaybi ñecy. Chi yajmüdmidaaci nej Jesús yajty y'ayoy. ³⁶ Co ajcxy ñajx ma tüg ñii, chi je eunuco ymina'ñ:

—Cha ñii, ¿nej ca' ñich jëbi huaad nnibetyi?

³⁷ Chi Felipe y'adzooy:

—Pen mmibijcyp Jesús müd tüg'óciy yi mjot mhujñihuyb jëbi mnibety.

Chi je jäy y'adzooy:

—Nmibijcypich co Jesucristo Dios yi' y'ung.

³⁸ Chi je eunuco nimay je carreti huindzin co huen yajtinayxipy je' carreti. Chi nimetz ajcxy ñicxy ma ñii, e chi Felipe yajñibejty je eunuco. ³⁹ Co ajcxy ñibidzimy, chi je eunuco ijxtigoy je Felipe. Jadu'ñyi je Huindzin Dios y'Espíritu yajnicxi. E chi je eunuco ytü yajyöyñi jotcujc. ⁴⁰ Felipe yajpaty jim Azoto, chi ñajxy cajp cajp capxhuäcxii Jesucristo y'ayuc ixti yja'ty jim Cesarea.

9

Saulo yjothuibijty

¹ Ooy Saulo tzach'ixhuidijty pahuidijty Jesús yjäy, y'ahuändacy ooy, e yaj'öga'ñ anajty ajcxy. Paady oy ixty je teedy migtungmüdpi, ² pijctzoy cötújcin, co anajty ñicxa'ñ jim Damasco ma yi judíojäy ajcxy ñaymujctac, madza'ñ pinjaty Jesús y'ayuc mibijcip. Saulo yajmiina'ñ anajty ajcxy mach jim Jerusalén huen yëdijctijcity huen töxyjäydijcity. ³ Jim anajty Saulo ñicxy mihuingoñ je Damasco cajp. Huin'it jotcömoñyi je ticxin huidi tzomb tzajpjoty, ñigidaaci jühuidity je Saulo. ⁴ Huin'it Saulo yciday, e midoy co ñimäyii:

—Saulo, Saulo, ¿na'amy co xychachpahuidijttägyich?

⁵ Chi Saulo yajtyy:

—¿Mbin miich, Huindzin?

Chi midoy co y'adzoyii:

—Ich je' Jesús, je huidibi miich mdzachpahuidijttacpy, ci'm naysajtzaachytunyii jadu'n nej huajyuub co jipconebe'y huidi mid ñuumygyumyii.

⁶ Chi Saulo chiyuygoty chachchigiiy, e yminañ:

—Huindzin, ¿ti mdzojcpy ndunipyich?

Chi je Huindzin Jesús ñimaayi:

—Pidig etz nicx cajpjoty, e jim nyajnimähuipy ti jëbi mduñ.

⁷ Je yëydijctijc huidibi anajty Saulo ymid ooy ajcxy ñay'adzigiiyi, co midoy je' ajcxy ayuc e ca' ajcxy ni pin ma y'ijxy. ⁸ Chi Saulo ypidigy, e co huindicxici ca' pin ma oc'ijxni. Chi ajcxy majch Saulo ma yci', e chi ajcxy huijtznicxy jim Damasco. ⁹ Tugig xii Pablo jim y'ijty huiintz, ca' ycaay y'uucy.

¹⁰ Jim Damasco anajty tug yëydijc chinäy huidibi Jesús y'ayuc mibijcip, huidi anajty yxii Ananías, cumäyjoty Dios ñimaayi:

—¡Ananías!

E chi je' y'adzooy:

—Cha ich, Huindzin Dios.

¹¹⁻¹² Chi je Huindzin Dios ñimaayi:

—Pidig, nicx ma je tü huidibi yxii Derecha, e jim ma Judas ytijc yajtiü tüg Tarso jäy, huidi yxii Saulo. Dios mibijctzoob je' jim cham, cumäyjoty ti huin'ijxy tüg yëydijc huidi yxii Ananías, co oy ñimiñyii, e ycinixajiiy jigix y'ijxigip jadüg'oc.

¹³ Chi Ananías y'adzooy:

—Huindzin Jesús, mayjäy ti xyajmidmüydägyich ajcxy jadu'n nej yi Saulo jibic y'idich jim Jerusalén mid miich mjäy ajcxy. ¹⁴ Jadachambi ti mimiñ ya je necy, ma teedy mijtungmidpi ti ycötujcmöyii, co huen majtztäy je jäy, e yajnicxtähuipy jim Jerusalén, tüg'óciy pinjaty ojadajtp miich mxii.

¹⁵ Chi je Huindzin Jesús nimay Ananías:

—Nicx, com ti ich huin'ixy yijibi yëydijc, jigix ich nxii etz n'ayucich capxhuäcxipy ma tüg'óciy naax cajp huidi ca' yjudíojäyity, etz ma yi reydiy, etz nañ jadu'n ma yi judíojäy ajcxy. ¹⁶ Ich yi' nyajnimähuipy tüg'óciy, nej ayo'n yajnaxipy mid ich nxii ycixpi.

¹⁷ Chi Ananías nicxy ma Saulo anajty ti yjättägy, co ytigiiy tigoty, chi cinixajy Saulo, e chi nimay:

—Migüg Saulo, je Huindzin Jesús huidibi nayguëxici jim tü'am ma miich anajty miiñ, yi' ti xyquexyich jigix m'ijxigipy jadüg'oc, etz je Espiritu Santo xyñidigihuip xycodigihuip.

¹⁸ Mic'amy ycäy ma Saulo yhuin jadu'n nej acx ñimeñ, chi y'ijxigy. Huin'it Saulo ypidigy e chi yajniibejti. ¹⁹ Chi Saulo ycaay y'uucy, e chi ymic'pijcy jadüg'oc. Chi jim mid'ijty jecy huidibi ajcxy xpijicp Jesús y'ayuc jim Damasco.

Saulo capxhuäcxy Dios y'ayuc jim Damasco

²⁰ Chi janch mic'amy Saulo ytigiiy Dios y'ayuccapxhuäcxp ma je judíojäy ajcxy ñaymujctac jim Damasco, yminañ co je Jesús hue' je' Dios y'ung. ²¹ Tüg'óciy pinjaty anajty midoohuip Saulo y'ayuc, ooy ajcxy jihuiy huinmaay, etz ñayñimáayigixy:

—¿Nej ca' jada' yjëjity je huidibi tzachyajcödigoyam yi jäy ajcxy huidibi Jesús yxii miyaax ojadajtip jim Jerusalén? ¿Nej ca' jada' yjëjity huidi anajty ti ymiiñ ya jäy ymajtzpi, e nicxy ciyega'ñ ma teedy mijtungmidpi?

²² Je Saulo capxhuäcxp anajty Jesús y'ayuc huinmic jotmic, e nigapxtäy co Jesús hue' je' je Cristo, chi yi judíojäy ajcxy huidi anajty jim tzinaayb Damasco cijx ajcxy yhuinmañ tigoydäy.

Saulo yqueecy ma judíojäy ajcxy

²³ Ti anajty hueeni xii tiempo ñajtzniñicxiñi, chi je judíojäy ajcxy ñaygapxi co yaj'ogaangixy je Saulo. ²⁴ Saulo ñejhuuiy co anajty yaj'oga'ñyii. Chi jim anajty ajcxy

y'ahuixyii xii'm tzuum ma je poch aguu cajppäbi, jim anajty yaj'öga'ñyii. ²⁵ E je jäy ajcxy huídibi anajty ymijpidacpy Jesús, chi je' ajcxy codiñajxy je Saulo mijcachjoty ma je pochycop huídi je cajp müd jübojtz'ahuídityi, e jadu'n je' choocy.

Saulo yajpaady jim Jerusalén

²⁶ Co Saulo yja'ty jim Jerusalén, oy japuyöyihuaañ je mibijcpidijc ajcxy. Nidüg'óciy anajty ajcxy ooy tzigiygixy anajty com ca' anajty mibijccixy co je Saulo ti anajty yjothuimbity. ²⁷ Chi Bernabé yajnicxy Saulo ma je nimajmetzp apóstoles ajcxy yajpaady, e chi yajmüdmüydactay nej Saulo anajty ti ixy je Huindzin Jesús tü'am, e nej anajty Saulo Jesús y'ayuc ti capxhuäcxi huinmic jotmic jim Damasco. ²⁸ Huin'it Saulo yhuí'my jim Jerusalén, e müd huídity anajty ajcxy. ²⁹ Aamic jotmic capxhuäcxy je Huindzin Jesús y'ayuc, etz müd müydaaccixy e ñaymicmígápxigixy müd je judíojäy huídibi griego ayuc caxp. E je' ajcxy nihuinmayiib co yaj'ögaangixy. ³⁰ Co je mibijcpidijc nejhuíy, chi ajcxy yajnicxy je Saulo jim Cesarea, e chi ajcxy quejxnajxy huen nicxy jim Tarso.

³¹ Huin'it tiempo je' ajcxy huídijaty mijpidacp Jesús, jotcujc anajty chinaaygixy, e ñigi anajty ixpij'ídich Dios y'ayuc ytiy'ajt, jadu'n nej yi huídibi ajcxy tzinaayb ma yi Judea ñaaxjot, Galilea ñaaxjot, etz Samaria ñaaxjot. Chi ajcxy ooy yajmij'ajtcixy je Huindzin Jesús, e müd je Espíritu Santo ypubéjtin, ñigi anajty yjacmayiygixy.

Pedro yajtzoocy Eneas

³² Co anajty Pedro yhuídijty cogapxiy cajp cajp je mibijcpidijc ajcxy, y'oy nañ jadu'n ma je mibijcpidijc ajcxy huídibi tzinaayb jim Lida. ³³ Jim minaybaatti tüg yéydijc huídibi anajty yxii Eneas, huídibi anajty ti ypa'm'ijtni tuctujc jimijt, hue' je' anajty ycixuxy ytecyxuxy. ³⁴ Chi Pedro nimay:

—Eneas, Jesucristo xyajtzoocp, pidíg, etz yajpidíg yi mmaabejt.

Chi Eneas mic'amy ypidígy. ³⁵ Chi ijxy tüg'óciy jäy huídibi tzinaayb jim Lida etz Sarón. Chi ajcxy yjothuimbijttay nidüg'óciy, ixmajtztay tüg'óciy yi ñi'ap huinma'ñ e jijptigiyiy yi Huindzin Jesús y'ixpijcin.

Co Dorcas y'o'cy, chi yjugypijcy jadüg'oc

³⁶ Je huin'it tiempo jim Jope, jim anajty tüg töxyjäy chinäy huídibi mibijcp Jesús, hue' anajty yxii Tabita, je' huídi griegojäy ytiyjp Dorcas. E je Dorcas oy xii tiempo anajty yajnaxy mi'oyjäy'aty yi jäy ajcxy. ³⁷ Jadu'n yjajti huin'it tiempo Dorcas ypa'mbejty, e chi ytimy'o'cy. Co ajcxy yajtziiday, chi ajcxy je öcpi yajnicxy ma je tijc mimejtnihuijtzpetypí. ³⁸ Je Jope cajp naymihuingon'ájtíp anajty müd Lida cajp ma anajty Pedro yajpaady, co mibijcpidijc ajcxy anajty nejhuíy co je' anajty yjimíty, chi ajcxy mejtz yéydijc quejxy co huen nimäyii:

—Min tzojc ya Jope.

³⁹ Huin'it Pedro ñicxy müd je' ajcxy. Co jim yja'ty, chi ajcxy yajnicxy ma je tijc mimejtnihuijtzpetypí, e jim anajty ajcxy je co'ögy töxyjäydijc ajcxy ytinayjúhuídityi ma je öcpi, chachyaaxcixy. Chi ajcxy Pedro yaj'ijxy je huit ñijen huídibi Dorcas anajty ti yaj'oyíy co anajty yjugy'atyñi. ⁴⁰ Mic'amy je Pedro quejxpídzimday je jäy ajcxy. Chi ycoxtinay'ahuíy, e Dios mibijctzoy. Chi huindixpejty je öcpi, nimay:

—Tabita, pidíg.

Huin'it Tabita yhuindixgígy, e ijxy je Pedro, chi iñaygugíy. ⁴¹ Chi Pedro majtzi yci', e chi huijtzígy. Chi yaaxi ymigügtijc etz co'ögytöxyjäydijc ajcxy, chi ajcxy yajcídigiíy juugy. ⁴² Tüg'óciy jäy ajcxy jim Jope nejhuíyday co Pedro yajjugypijcy je Dorcas. E mayjäy mibijcy je Huindzin Jesús. ⁴³ Jadu'n yjajty co Pedro y'ijty jim Jope canaag xii ma je coodzpi ytiyc huídi anajty yxii Simón.

10

Pedro etz Cornelio

¹ Jim Cesarea anajty tög tungmiidpi huidi anajty yxi Cornelio, hue' je' anajty capitán'ajtp ma tög batallón soldado ajcxy yxiijip, la Italiana. ² Je Cornelio ooy anajty ytudägyity, etz je' miid tög'óciy y'ung ytöxyijc ooy anajty yajmij'ajtcixy Dios. Je Cornelio nañ jadu'n ypubety miid meñ je judíojäy ayoobtjic, e je' Dios ojadajt anajty jabom jabom. ³ Tög xii, minacyxi anajty, Cornelio huin'ijxy janch huädz Dios tög y'ánel ñigidaaci, e ñimaayi:

—¡Cornelio!

⁴ Chi Cornelio huindicxpejty je ánel janch tzigiiyb anajty, e chi yajtiy:

—¿Ti Huindzin?

Huin'it je ánel y'adzooy:

—Jadu'n nej mDios'ojadaty etz jadu'n nej mbubety ayoobtjic ti Dios jäygidägy. ⁵ Quex mjäy jim Jope, huen nicxy yajtzoñ Simón, huidibi nañ jadu'n yajtijp Pedro. ⁶ Jim je' yja'ttacy ma jadügpí Simón, je cootzpí huidi ytjic mihuingon mejypa'. Je Pedro xyajnimähuipy ti mdunipy.

⁷ Co je ánel ñicxni huidi anajty ti ymígapxyii, chi Cornelio yaaxi mejtz ytumbi, etz tög soldado huidi Dios capxymidoob, etz huidibi je Cornelio ooy ymíjnicxpedyii. ⁸ Chi yajmiidmiydactay nej je ánel ñimaayi, chi ajcxy quejxy jim Jope.

⁹ Com jabom jim anajty je quejxyöybi ajcxy ñicxy mihuingon Jope, cujc yxi anajty, e chi Pedro ypejty ma tijcnicx Dios ojadajtp. ¹⁰⁻¹¹ Ooy Pedro anajty yuubögyii, e ooy jacaya'ñ, jimni anajty yjicxy yaj'oyiyii. Chi Pedro huin'ixy je tzajp ahuädz, e huin'it ijxy quidägy jadu'n nej poob huit mijpi yxóchity majaty ytaatz. ¹² Jiiby ma je poob huit, jiiby anajty canaagnax iyujc huidijaty midaax yci' ytecy etz tza'ñ etz joon. ¹³ Huin'it Pedro midoy co anajty ñimäyii:

—Pedro, pidig nicxy yaj'ög yi iyujc etz tzüd.

¹⁴ Chi Pedro y'adzooy:

—Ca', Huindzin, caminaabi ich ti njicxy huidibi jibícip etz huidibi ca' ñigödúcyity nicxy judíojäy jicxcixy.

¹⁵ Huin'it jadüg'oc ayuc midoy ñimäyii:

—Huidibi Dios yajhuäch ca' huaad mdiy co yi' yjibicity.

¹⁶ Tugüg'oc jadu'n yajti, chi je poob huit ypättigiiyñi tzajpjoty. ¹⁷ Jim anajty Pedro tzachhuinmay nej anajty yhuimbizimy je tibi ixy co yja'ty ma tijc aguü je Cornelio yquexyöybi huidi ajcxy anajty nidihuip yajtihuip je Simón ytjic. ¹⁸ Chi ajcxy mic ycgapxiy yajtiy pen jim anajty yjättägy Simón huidibi anajty nañ jadu'n yajtijp Pedro. ¹⁹ E je Pedro je' anajty chachhuinmaayb tibi ixy, chi je Espíritu Santo Pedro ñimaayi:

—Tugüg yëydijc ji xy'ixtäy. ²⁰ Pidig e minac, nicx miid je' ajcxy, e ca' ti mhuinmay, com ich jadu'n ti nnimäy co huen xy'ixtäy.

²¹ Huin'it Pedro yminajcy ma je' ajcxy, je Cornelio quexyöybi, nimay ajcxy:

—Ich je' huidibi miich ajcxy m'ixtaayb, ¿ti ycixpi co ti mmiingixy?

²² Chi ajcxy y'adzooy:

—Yi' ich ajcxy ti xyquexyich yi Cornelio huidibi capitán'ajtpi, je' tudägy jäy huidibi Dios yajmij'ajtp, je huidibi tög'óciy judíojäy ooy tzójccixy, etz cōmaaygixy. Huindzin Dios tög y'ánel ñimay Cornelio co miich miñ nyajhuoy, jigix mñicxip ma yi' ytjic, e y'amido'ida'ñ ajcxy nej miich myaj'ixpiga'ñ.

²³ Chi Pedro yajtiictigiiy je' ajcxy. Chi ajcxy jim ymaahu'i'my. Com jabom Pedro ñicxy miid je' ajcxy, e chi nijëjty ypanicxi huidibi mijpidacp Jesús huidi anajty ajcxy tzinaayb jim Jope.

²⁴ Com jabom ajcxy yja'ty jim Cesarea ma Cornelio anajty y'ahuixy tügmucy mïid yjugymigüg, etz nijëjity pin ooy mïid ñaymigüg'adyii, huidijaty anajty ajcxy jayijp ti nimäy. ²⁵ Co Pedro oyjäty ma je tijc, chi Cornelio ytijcpidzimy oy yjijpcobadiy je Pedro, e chi ycoxtinay'ahuixy yajmij'ada'ñ anajty je Pedro. ²⁶ Chi Pedro huijztinayigy je Cornelio, e nimay:

—Tinayig, ca' xyajmij'ida'ñich, nañ jadu'n ñich njäyity nej miich.

²⁷ Mïid anajty ycapxy ymiydägy co ytijctigy, jüby anajty mayjäy ni'amugi'ahuixcixy. ²⁸ Chi Pedro nimay ajcxy:

—Miich ajcxy mnejhuixyb co yi judíojäy ycostumbre capx'aducy ca' huaad judíojäy yöymucy mïid huidibi ca' yjudíojäyity, ca' huaad ytigiygixy ma ajcxy ytijc. Per Dios ti xyajni'ixiyich co ca' huaad nmïna'ñich ca' oyjäyity huädzjäyity pinjaty. ²⁹ Paady co oy ti xyajhuoyijich ti nmïñich, ni ca' huam ti nmïna'ñich. Nnejhuixhuaamyich na'amy co oy ti xyajhuoyijich.

³⁰ Chi Cornelio y'adzooy:

—Cham ymimidaaxxiijiy, jadu'n nej jadachambi hora, ya ñich anajty ma ndijcich, jaygay jay'ügy nDios'ojadatyich. Com hue' anajty mijminacy xii mïna judíojäy ajcxy ycapxtaaccixy, co tüg ñayguëxici jadu'n nej jäy mïid ypoob huit janch adicxp. ³¹ E je ángel xyñimaayich: “Cornelio, Dios ti xymidoohui m'oración e ti jadu'n jäygidägy jadu'n nej mbubety yi ayoobtjic ajcxy. ³² Quex mdumbi jim Jope, huen nicxy yajtzoñ Simón huidi nañ jadu'n yajtijp Pedro. Jim Pedro yja'ttägy ma je cotzpi ytijc huidibi yxii Simón, huidibi tzinaayb mihuingon mejypa'. Co je' ymiinipy, chi xymïdmïydägy.” ³³ Paady nguejxyich janch mic'amy huen nicxy xy'ijxtäy. E ti may'ajt mduñ co ti mmiñ. Jadachambi cha ñich ajcxy nidüg'óciy ma Dios yhuinduu. E n'amïdo'idángixyich tüg'óciy je y'ayuc huidibi je Huindzin Dios ti xyaj'ane'my jëbi xyajniimaaygixy.

Pedro Dios ytiy'ajt nigapxy nimïydacy ma Cornelio ytijc

³⁴ Huin'it Pedro ytigiy y'ayuccapxhuäcxpi, nimay ajcxy:

—Jadachambi huinjihuixybich, co yi Dios ca' ni tüg ix'yixy jäy, y'actzojctaayb hueñypinity. ³⁵ Dios ycöbijcipy hueñypinjäyity huidibi tzinaayb huen huidibi naax huen huidibi cajpity, pen chigiyb ajcxy Dios, pen tumyb oybi. ³⁶ Dios ti quexy yi' ytiy'ajt ma yi Israel jäy ajcxy, yajnimay co ji cham jotcuje'ájtin mïid Jesucristo ñich ajt nHuindzin. ³⁷ Miich ajcxy mnejhuixyb yajxon nej ti ytunyii ti yjadyii ma judíojäy ajcxy ñaax ycajp chondacy jim Galilea, Juan el Bautista ti anajty capxhuäcxii Dios y'ayuc ytiy'ajt etz yjäyajniibety. ³⁸ E mnejhuixyb miich ajcxy co Dios yejc je Jesús je Nazaretpi je Espiritu Santo, e nej Jesús yhuidijty e tuuñ oy'ájtin, etz mihuinma'ñ, jadu'n nej yajtzocy je jäy ajcxy huidi anajty ane'm'ijtp ma yi mujcu'. Com Dios anajty mïd y'ity je Jesús. ³⁹ ñich ajcxy je tiy'ajt nmïdich tüg'óciy jadu'n nej Jesús yjajty y'ayoy jim Judea naaxjot etz jim Jerusalén. Huin'it ajcxy Jesús yaj'o'cy cruudzcixy. ⁴⁰ E Dios yajjugypijcy codugüg xii, e chi yajnayguëxici ma ñich ajcxy. ⁴¹ Ca' ti yajnayguëxigyii ma tüg'óciy jäy, jëyi ma ñich ajcxy huidi jayijp Dios yhuin'ijx jigix tiy'ajt nyegipyich. ñich ajcxy caaymujc uucmujc huin'it co yjugypijcy ma y'o'cy. ⁴² Ti xyquexy ñich ajcxy ayuc ngapxhuäcxpi ma mayjäy ajcxy etz nidiy'ajt'adipyich ajcxy co Dios Jesús ti pidägy mij'ane'mbi ma yi juugypii etz ma yi ögypii. ⁴³ Nañ jadu'n jecy'ajty tüg'óciy Dios y'ayucnajtzcaxxiybii ñimïydac ajcxy Jesús, e ymïnañ ajcxy co tüg'óciy je jäy ajcxy pinjaty mibijc je Cristo, Dios huinmecxiiib ajcxy ypocy.

Je Espiritu Santo ycidacy ma je ca'pi ajcxy yjudíojäyity

⁴⁴ Yam anajty Pedro ycapxyñi co je Espiritu Santo ñidigiiyi ycödigiiyi ajcxy nidüg'óciy huidijaty y'amïdo'ijt Pedro y'ayuc. ⁴⁵ E je judío mibijcpidijc ajcxy tibi anajty miiñ mïd Pedro, ooy ajcxy jihuiy huinmay co Dios quejx Espiritu Santo ma je jäy ajcxy huidibi ca'

yjudíojäyity, ⁴⁶ co midoy ycapxcixy mïid huingbi ayuc, etz cömaygixy jäymejtzcxixy Dios.

⁴⁷ Chi Pedro yminañ:

—¿Nej ca' jada' y'óyity co ñiibedipy ajcxy huidibi Dios ti ymóoyigixy je yEspíritu Santo jadu'n nej ñich ajt xymooyim?

⁴⁸ Chi Pedro ni'ane'mdïiy huen ñibejtcixy ma Huindzin Jesucristo yxii. Huin'it ajcxy Pedro cohuanïiy huen hui'my tüg xii mejtz xii mïid je' ajcxy.

11

Pedro yajmïidmïydacy jim Jerusalén nej anajty ti ytuñyïi ti yjadyïi

¹ Je apóstoles ajcxy etz je mïbijcpidijc ajcxy huïdi anajty ajcxy jim Judea, midoy ajcxy ayuc co nijëjity jäy huïdi ca' yjudíojäyity ti anajty ajcxy cöbïjciy Dios y'ayuc. ² E co Pedro yhuimbijty Jerusalén, chi nijëjity judíojäy ajcxy ogy Pedro, je' ajcxy huidibi tzachmïjpïdaaccixp judíojäy ycostumbre jadu'n nej ajcxy tiy'ajttïyigixy ymang. ³ Je' ajcxy nimay Pedro:

—¿Na'amy co oy ti mgo'ixïiy jäy ajcxy huïdi ca' yjudíojäyity, etz ti mgay m'ügy mïid je' ajcxy?

⁴ Chi Pedro nimïydactay tüg'óciy jadu'n nej anajty ti yjaty, chi yminañ:

⁵ —Jim ñich anajty Jope nDios'ojadatyich. Chi nhuin'ijxyich jadu'n nej tüg mij poob huit chooñ tzajpjoty, cidägy ma ñich nhuinduu, xóchity anajty ma mïdaax ytaatz. ⁶ Co nnimïjhuägyich n'ixa'ñich ti jiiiby, chi n'ijxyich may iyujc, jiiiby iyujc mïdaaxpi yci' ytecy, jiiiby ahua'nbi iyujc, jiiiby tza'ñ, etz joon. ⁷ Chi nmïdooyich tüg ayuc huidibi xyñïmaaybich: “Pedro, pïdig, yaj'ög yi iyujc etz tzüdz.” ⁸ Chi n'adzooyich: “Ca' Huindzin, com caminaabi ndzüchich iyujc huidibi ca' ñigo'adúcyity judíojäy ajcxy tzüdzïpy.” ⁹ Chi mïmetz'ocpi tüg ayuc tzajpcïxy xyñïmäyich: “Huïdi Dios ti yajhuäch, ca' huaad mdijy co ca' y'oychú'tznity.” ¹⁰ Tugïg'oc jadu'n yjajti, chi je poob huit ypättigïyñi tzajpjoty. ¹¹ Huin'it xyñïmïñich je quexyöybi nidugïg, chooñ ajcxy jim Cesarea. ¹² Chi je Espïritu xyñïmaayich, co min n'ocnicxich mïid je' ajcxy, ca' ma ni ti nhuinmayïpyich. Mïid nicxyich nidugïg nmïgügtïjcich. Chi ñich ajcxy ndigïy ma je jäy ytïjc. ¹³ Je codijc xyajmïidmïydaacich co je' anajty ti huin'ixy tüg ángel ma ytïjc, ñïmäyïi: “Quex mdumbi ajcxy jim Jope huen nicxy yajtzoongixy Simón huïdibi jäy ytïjpy Pedro, ¹⁴ e je' xyajnimähuip nej jëbi Dios m'alma xyajnidzoocip, miich etz tüg'óciy mjïin mdijc mjuugy-mïgüg.” ¹⁵ Co Jesús y'ayuc ngapxhuäcxtzondaacich, chi je Espïritu Santo ñïdigïyï ycodigïyï je' ajcxy. Tim jadu'n nej xyñïdigïyïm xycodigïyïm je jayïp'atypi. ¹⁶ Huin'it njäymejtzcoodyich nej je Huindzin Jesús yminañ: “Janch Juan, je Bautista, jäy yajñibejt mïid ñi, e Dios jäy ajcxy y'adigïhuïyb yjottigïhuïyb je Espïritu Santo.” ¹⁷ Pen Dios ti ymöyïi je jäy ajcxy huïdibi ca' yjudíojäyity tú'ciy mïid huïdibi ñich ajt ti xymooyim co nmïbijcim Jesucristo. ¿Ocjectim pin ñich co Dios nmïdzïp'adïybich?

¹⁸ Je mïbijcpidijc ajcxy jim Jerusalén, co ajcxy midoy Pedro y'ayuc, chi ajcxy y'amoday. Chi ajcxy Dios jäymejch cömay, chi ajcxy yminaangixy: “Dios jadu'n ti ymina'ñ co je' ajcxy huïdibi ca' yjudíojäyity jëbi yjothuimbijtcixy, jigix Dios ymöhüïyb jugy'ájtïn huinixïibi.”

Antioquía jäy ymïdoo ajcxy Dios y'ayuc

¹⁹ Taabi jäy yaj'o'cy Esteban, chi jäy ajcxy ooy ixhuïdijtcoty pahuïdijtcoty Jesús yjäy jim Jerusalén. Chi nijëjity ajcxy yqueecy, nicxy ajcxy jim Fenicia ñaaxjot, etz jim Chipre, etz jim Antioquía. E capxhuäcxy ajcxy je oybi ayuc ma jadyïi judíojäy, ca' ajcxy jac ni pin yajnimay. ²⁰ E nijëjity mïbijcpidijc huïdibi jim anajty ajcxy yconaaxip ycocájpïp Chipre etz Cirene, chi ajcxy ñicxy jim Antioquía. Chi yajmïidmïydacy ajcxy je Huindzin Jesús y'ayuc mïid griegojäy ajcxy. ²¹ E je Huindzin Dios ooy ypubejti je' ajcxy, e ooy mayjäy ixmajch je jïbic-huinma'ñ etz mïjpïdaaccixy yi Huindzin Jesús ytïy'ajt.

²² Co je mibijcpidijc ajcxy jim Jerusalén midoogixy jada ayuc, chi ajcxy quejxy Bernabé jim Antioquía. ²³ Co Bernabé jim yja'ty, chi ijxy jadu'n nej Dios anajty oy'ájtín ti tuñ, chi oy yjotcugiiy je Bernabé. Chi capxhuijy tüg'óciy co huen ajcxy janch cixyjot huinjot cuyduuni yi Huindzin Jesús y'ayuc ytiy'ajt. ²⁴ Com Bernabé oyjäy je' anajty, e ooy mijpidägy Dios y'ayuc etz ooy miiidity je Espíritu Santo jotjoty huinma'ñyjoty. Ymiiid je' ycapxhuijin ooy mayjäy mijpidacy Jesús y'ayuc ytiy'ajt.

²⁵ Co jadu'n yjajti, chi Bernabé oy ixtay Saulo jim Tarso, e co paty, chi miiidmiiñ Antioquía. ²⁶ Jadu'n yjajty jim ajcxy y'ijty tüg jimijt, yaj'ixpijccixy je mayjäy huidibi ajcxy jijptigiyiiy je Jesús y'ixpijcin. Jim Antioquía oga'n yximoy cristiano, je jäy ajcxy huidibi mijpidacp Jesús.

²⁷ Huin'it tiempo nijejity tiy'ajtnajtzcapxiybi chooñ Jerusalén ñicxy ajcxy jim Antioquía. ²⁸ Tüg huidi anajty yxi Agabo ytinay'ahuüy mayjäyjoty, e chi je Espíritu Santo yajcapxi, e yminañ co mijyuu anajty ñaxcidäga'ñ huindu'ñybi naaxhuiñ. E janch jadu'n yjajti taab anajty Claudio y'ane'my. ²⁹ Huin'it je mibijcpidijc ajcxy jim Antioquía pidacy ajcxy yhuinma'ñ co quexaangixy pubéjtín ma ymigügtijc ajcxy huidi tzinaayb jim Judea, jadu'n nej pubéjtín pin tim yega'ñ. ³⁰ E jadu'n ajcxy tuuñ. E je meeñ tiibi anajty ymucy yajmiguejxy ajcxy je Bernabé etz Saulo ma je mibijcpidijc tungmiiidpi jim Judea.

12

Co Jacobo y'o'cy etz co Pedro yajpujxtijctigiyi

¹ Huin'it tiempo je rey Herodes yajmajtzij nijejity Jesús yjäy, e chi yajtzaachytuuni. ² Chi ni'ane'mdiy huen yaj'ögyii miiid espada je Jacobo, je Juan y'uch. ³ Co je rey nejhuüy co je judíojäy ajcxy jadu'n ooy jäygidaaccixy, chi ymajtzij Pedro nañ jadu'n. Hue' jadu'n yjajti xijoty, je xii mina tzajcaagy caaygixy huidi ca'pi ylevadura miiidity. ⁴ Co Pedro yajmajch, chi yajpidacy pujxtigoty. E chi je rey ane'my co huen midaaxpicy soldado ajcxy cuend'adyii, tügpicyjaty miiidaax soldado ajcxy. Hue' anajty je rey ti huinmay xiiinaxy anajty tiyduna'ñ Pedro mayjäy agujc. ⁵ Pedro jiiiby anajty pujxtigoty janch oy cuend'aty. E je mibijcpidijc janch Dios mibijctzodiiib anajty ajcxy miiid Pedro ycixpi.

Dios y'ángel yajpidzimy Pedro pujxtigoty

⁶ Huin'it coodz ma ca'ni anajty yximiiy, ma je Herodes anajty tiyduna'ñ Pedro mayjäyjoty com jabom, Pedro maab anajty, e soldado agujc ajcxy cíxoch tecyxoch anajty miiid cadena, e jadügpicy soldado ajcxy pujxtijc'aguy anajty ajcxy ycuend'aty. ⁷ Chi janch timetiini yHuindzin Dios tüg y'ángel ñayguëxici ytinäy ma Pedro yhuinduu, e je pujxtijc yaj'anayday. E chi je ángel tijyücxxy Pedro ma ycaach, chi yajmäyhuijy, e nimay:

—Pidig mic'amy.

Chi je cadena ycäday ma Pedro yci'. ⁸ Chi je ángel nimay Pedro:

—Ñayhuini, yajtigij' mgig.

Co Pedro yajtigiyday ycig, chi je ángel ñimaayi:

—Yajtigij' mjocxhuit, e pajamgich.

⁹ Chi Pedro pujxtijc pidzimy axam ma je ángel, ni ca' nejhuüy pen janch anajty huidibi je ángel tumyb, hue' jihuiy jadu'n nej ycumäy. ¹⁰ Chi ñajxy ajcxy ma tügpicy cuend'ajtpi, mic'amy ajcxy miiimetzpi ninajxy. Co ajcxy yjäty ma mijpujxtijc aguu, ma miijtüba', chi je' ci'm'ahuaach. Chi ajcxy ypidzimy. Ti anajty mijyögyixni co je ángel ixmajtzini Pedro.

¹¹ Huin'it Pedro yhuinma'ñymejch, chi yminañ:

—Jadachambi njihuüybiich co janch jada' co je Huindzin Dios ti quexy y'ángel, e yi' ti xyñihua'ñich ma Herodes, etz jadu'n nej tüg'óciy judíojäy ajcxy anajty xytuna'ñich.

¹² Co Pedro yjot yhuinma'ñ ymejch, chi ñicxy ma María ytiyc, je Juan ytaj, je Juan huidi jäy ytiipy Marcos, ma anajty ajcxy jim mayjäy tügmucy y'ijtcixy Dios mibijctzoogixy. ¹³ Co Pedro tijc'aguu cojxnojcy, je tiba'y'amybi, chi tüg töxy'anäg ypidzimy huidi anajty yxi

Rode, ixañ pin je' tijc'aguu cojxnojcy. ¹⁴ Co oy yögmıdoy co Pedro je' anajty, chi ca' ytijc'aguu yaj'ahuaach. Jëyi co poyıgy ñıxy tigoty co anajty tzachjotcújcity, nigapxy co Pedro je' anajty ma tijc'aguu.

¹⁵ Chi je jäy ajcxy nimay Roda:

—Mloocjıyb jada' miich.

Chi je töxy'anäg y'adzooy co janch je' anajty. E je jäy ajcxy ymınaangıxy co ca' yi' yjējıty, hue' jada' Pedro y'áγγελ.

¹⁶ Yam Pedro anajty tijc'aguu tzachcojxnocy co ajcxy yaj'ahuaach, chi ajcxy ijxy, chi ajcxy ooy chıgıy yjıhuıy. ¹⁷ Pedro cımıd ytıy'ajtyejcy co huen amoñ ajcxy. Chi yajmıdmıydacy nej je Huındzın Dios anajty ti yajpidzımyii pujxtıgoty. E nimay ajcxy co huen ñıxy yajmıdmıydägy jada je Jacobo etz jacjadyii mıbjıcpıdjı.

Chi Pedro ñıxy huingbi cajp.

¹⁸ Co yxımıy, huin'it soldadtıjı ajcxy ooy ytıgıy huambi jıhuıybi huinmay'ahuidıjty, com ca' nejhıygyıxy nej je' anajty ti ytunyii ti yjadyii mıd Pedro ycıxpı. ¹⁹ Chi Herodes ni'ane'mdıy huen ñıxy yaj'ıxtäy Pedro. E co ca' yajpaty, chi pijctzoy tıy'ajt ma soldado ajcxy huıdı anajty Pedro ti ycuend'adyii. Chi ni'ane'mdıy huen ajcxy ñıxy yaj'ögyii. Chi Herodes chooñ jım Judea, chi oy chinaydacpıcy jım Cesarea.

Herodes y'ögy

²⁰ Herodes janch ymıjotmätpy anajty je jäy huıdıbi tzınaayb jım Tiro etz Sidón. Chi je Tiro etz Sidón jäy ajcxy ñaygapxi nej jëbi huingohuägıhuaangıxy je rey. E ymımıdac ajcxy co mıgapxy je Blasto je mıjtungmıdpy maabi rey Herodes ytıjı. E chi ajcxy pijctzoy co huen tzip cıxy naxy, com co ajcxy xıjı mooc jım anajty yajtzoongıxy ma rey ñaaxjot.

²¹ Chi Herodes agapxtujcy tög xıı, chi je reyhuıt yajtıgıy, chi ñıyadac paty ma ycötujctac, chi mıgapxy ajcxy je jäy. ²² Chi je mayjäy ajcxy ytıgıy mıc capxp mıydaacp, chi ajcxy ymınaangıxy:

—Jada jäy huıdıbi capxp, ca' jada yjäyıty, jadu'n yi' nej tög dıos!

²³ E huin'ıtıy Huındzın Dios y'áγγελ yajpa'mbejty Herodes, com ca' anajty huındzıgıy cömay je Dios. Chi y'o'cy, ting je' tzütztıayı.

²⁴ Je Huındzın Dios y'ayuc mıbjıc'ıdıchpy anajty jäy, e yajcapxhuäcxp anajty hueñytımma'ámyıty.

²⁵ Co Bernabé etz Saulo ajcxy ytungmay jım Jerusalén, huin'it chooni ajcxy jım ymıdñıxy huıdıbi anajty yxıı Marcos.

13

Bernabé etz Saulo yajtzondaaccıxy ytung huıdıbi ajcxy pátıp

¹ Ma je' ajcxy huıdı mıjpidacp Jesús jım Antioquía, jım anajty jadyii huıdı Dios y'ayuc yaj'ıxpıjcp anajty, etz nañ huıdıbi tıy'ajt najtzcıpxıyb. Jım anajty Bernabé etz Simón, huıdı anajty ajcxy ytıjpy el Negro, etz Lucio huıdı tzoon Cirene ñaaxjot, etz Manaén huıdı tög yeectac mıd Herodes, huıdıbi ane'm jım Galilea, etz Saulo. ² Tög xıı ajcxy ñayyöymıjıgıxy jaygay jay'ügy Dios ojadaıtcıxy. E chi je Espıritu Santo ñımaayı:

—Huen pidáacıgıch ajcxy Bernabé etz Saulo ahuing jıgıx ajcxy ytunıpy ma je tung tııbi nyajnihuohıyıch.

³ Chi ajcxy yjacDıos'ojadaıty etz yjac'ayuu'ajty, e chi je jäy ajcxy cınıxajy Bernabé etz Saulo, e chi ycapxycıjxy mıd je' ajcxy.

Je apóstoles ajcxy capxhuäccıxy Dios y'ayuc jım Chipre

⁴ Chi jada' je Espıritu Santo yquejı Bernabé etz Saulo huen ñıxy Seleucia, e jım ajcxy ybarcotıgıy ñıxy ajcxy jım Chipre mejy agujcpı. ⁵ Co jım ajcxy yja'ty ma barco yjättac huıdı yxıı Salamina, chi ytıgıy Jesús y'ayuccıpxhuäcxp ma je judıojäy ajcxy naymujctac. Tzooñ je Juan anajty nañ jadu'n je' anajty Bernabé etz Saulo pubéjtıp. ⁶ Huıdıjtıy

ajcxy ma je naax mejy'agujcpi, e yja'ty ajcxy ma je cajp huidi yxii Pafos. Jim ajcxy paty tüg judíojäy huidi anajty yxii Barjesús, hue' je' anajty huijyjäy, e ñaydiyii anajty co Dios ytiy'ajt najtzcapxiiyi, e ca' anajty yjanchity. ⁷ Je huijyjäy ooy miid ñaymigüg'adyii anajty je huidibi ane'm jim, hue' anajty yxii Sergio Paulo. Je Sergio Paulo ooy anajty ycohuinmañity, ooy y'ixpícyity. Chi ni'ane'mdiy co huen nicxy yajtzonyii Bernabé etz Saulo. Com je Sergio Paulo anajty midoohuaani je Dios y'ayuc. ⁸ Je huijyjäy, huidi nañ jadu'n yajtijp Elimas, midziptzoñ Pablo etz Bernabé, e tücciy capx'adugañ ca'ydi je gobernador ymibicy. ⁹⁻¹⁰ Chi Saulo, huidibi nañ jadu'n yajtijpy Pablo, miid je Espiritu Santo huindicxpejty je huijy jäy, e nimay:

—¡Ooy mjibicjäyity miich, ooy m'anijity, mujcu' miich xy'ung'ajtp, ooy mmidzip'aty pinjaty oyjot oyhuinmañ miid! ¿Mina m'ixmadzañ nej mdzachyajtigoyañ je Huindzin Dios ytiy'ajt? ¹¹ Jadachambi je Huindzin Jesús xychachytunaamb, e mhui'mip huiintz, etz ni ca' je ximbi tzojc m'ixipy.

Chi je huijyjäy mic'amy yhuim'y huiintz coodz, chi ixtay pin oc-huijtznicxib com ca' anajty y'oc'ixni. ¹² Co je gobernador jadu'n ijxy, chi mijpidacy Jesús y'ayuc, e chi ooy jihuiy huinmaay nej Pablo nimiydägy je Huindzin Jesús y'ayuc ytiy'ajt.

Pablo etz Bernabé yajpátcixy jim Antioquía etz Pisidia

¹³ Chi Pablo etz ymigügtijc ajcxy miid ybarcotigüy, chi ajcxy ñicxy Perge ma Panflia ñaaxjot. Chi Juan puyöyduutni Pablo etz Bernabé, e chi ñicxni Jerusalén. ¹⁴ Pablo etz Bernabé ñajxy jim Perge oyja'tcixy jim Antioquía ma Pisidia naaxjot. Sábado xii ajcxy ytigüy ma je judíojäy ajcxy ñaymujctac, chi ajcxy ixtactay. ¹⁵ Co ñecycapxtay ma Moisés ñecy etz Dios y'ayucnajtzcapxiiyi ñecy, chi je naymujctac huindzin quejxy ayuc ma Pablo ajcxy, ñimaayi:

—Migügtijc, pen mmid ayuc tiy'ajt miid jäy ycixpi jëbi cham myajnimäy ajcxy.

¹⁶ Chi Pablo ytinayigy, yci' miid ytiy'ajt yecy co huen amoongixy, e nimay ajcxy:

—Midoogix, miich Israel jäy ajcxy, etz huidibi Dios yajmij'ajtp. ¹⁷ Je Israel jäy Dios huin'ijxy ich'ajt nmij'ap nmijteedy jecy'ajty etz yajyujcpejt ajcxy micho'n co anajty ajcxy jim yjactzinäy Egipto ñaaxjot. Chi ajcxy yajpidziimni miid Dios ymic'ajt. ¹⁸ Dios je' ajcxy mihuindinay huixchigüipx jimijt jim mijtigüduum. ¹⁹ Je Dios huixtuyc it naax cajp yajtigoy huidi anajty jim tzinaayb Canaán ñaaxjot, etz yajmoy je naax ich'ajt nmij'ap nmijteedy jecy'ajty jigix ajcxy jim chinähuipy. ²⁰ Midaax migo'px jahuixchigüipx majc jimijt Dios mic'ajt mooy juez ajcxy huen ane'myii Israel jäy ixti mabaad Samuel je Dios y'ayucnajtzcapxiiyb ytungbijcy. ²¹ Huin'it ajcxy tüg rey pijctzoy huidi ane'miib ajcxy. Chi Dios yajreytigüy Saul huidi tuun huixchigüipx jimijt. Je Saul yteedy hue' je' anajty yxii Cis, hue' je' anajty Benjamín y'ap y'oc. ²² Chi Dios tungbijcy Saul e yajreytigüy David, chi Dios yminañ: “Ti nbaadyich David, Isaí ymang, tüg yëdyjc huidibi cuydundähuipy nej ndimdzocyich.” ²³ Ma David y'ap y'oc Dios yajnibicy Jesús, jigix nihuänipy yajndzögipy je Israel jäy ajcxy, jadu'n nej anajty jécyip Dios yaj'ahuanüy ajcxy. ²⁴ Ca'ni anajty Jesús miiñ co Juan, je Bautista, capxhuäcxy Dios y'ayuc ma je Israel jäy ajcxy, nimaaygixy co copicy huen jothuimbijtcixy ma Dios, e huin'it jëbi ñibéjtcixipy. ²⁵ Co anajty Juan y'o'cin huington, chi yminañ: “Ca' ich' njëjity je Cristo, jadu'n nej mminaangixy. Jayijp ti nmiiñich, jac'axam miinañ je Cristo; jacmic'ajt miid je' ca'ydi ich. Ca' xypaadyich nicxy yi' ycighuin nguejich.”

²⁶ Chi Pablo yjacminañ:

—Migügtijc, Abraham y'ijx y'oc etz pinjaty yajmij'ajtp Dios, Dios ti xyajniguexy jada ayuc nej ajcxy jëbi m'alma nidzoocin paady. ²⁷ Je jäy ajcxy huidi anajty ajcxy tzinaayb jim Jerusalén etz tungmüdpí ajcxy, ca' ajcxy nejhuüy pin je' anajty je Jesús, ni ca' anajty huinjihuüygyxy y'ayucnajtzcapxiiyb ajcxy y'ayuc huidibi anajty yajcapxp ma ajcxy ñaymujctac huindüg sábado. E je' ajcxy ci'm yajpocycäy Jesús, e cuyduñ nej anajty

ajcxy yjaybetyity ma Dios ñecy. ²⁸ Oy ajcxy ca' paty pocy nej yaj'öccixipy Jesús, chi ajcxy nibijctzohuiy ma Pilato co huen nicxy yaj'ögyii. ²⁹ Co je jäy ajcxy cuydunday jadu'n nej anajty yjaybétyity ma Dios y'ayuc müd je' ycixpi, chi ajcxy yajminajcy cruudzcíxy, etz oy yajnaaxtigiiygixy. ³⁰ E Dios je Jesús yajjugypijc co anajty ti y'ögy. ³¹ Chi canaag'oc ñayguëxigo'ci ma ymügügtijc huidi anajty ti ymüdhuididyii co chooñ Galilea ñicxy Jerusalén. Jadachambi yi' je' ajcxy huidi tiy'ajt yejcpy ma je jäy ajcxy.

³² Je oybi ayuc iich miich ajcxy nyajmüdmüydacpy cham, huidi Dios yajnimay iich'ajt nmij'ap nmijteedy jecy'ajty. ³³ Je oybi ayuc ti Dios cuyduñ cham ma iich'ajt co yajjugypijcy Jesús co y'o'cy. Jadu'n yi' Dios y'ayuccojaaybi jaay jecy'ajty ma je Salmo necy mümetzpi ma Dios jadu'n ymíñañ: “N'ungich cham ti nyajjuugypicyich.” ³⁴ Müd jadaabi ycixpi co Dios ti yajjugypicy Jesús co y'o'cy, jigix ñinícx ca yhuindigooyipy jadu'n anajty jaybétyity ma Dios ñecy ma Dios jadu'n ymíñañ: “Nmöhuaamyich miich ajcxy je conúcxin huidibi nyajnimaaayich je David.” ³⁵ Paady nañ jadu'n Dios y'ayuccojaaybi jaay jadüg'it, ma ymíñañ: “Ca' Dios a'ixiy nicxy y'ung ñinícx yhuindigooy, je y'ung huidibi müd huadz jot huinmañ.” ³⁶ Com janch co je David Dios huin'ijxy, jigix ane'mipy yi' yjuugy ymügü ajcxy. E co ytung yajmay, chi y'o'cy, e je' y'alma ñaybaatti müd je y'ap yteedy y'alma, e je' ñinícx huindigooy je'. ³⁷ Je Jesús huidibi Dios yajjugypijc ca' je' ñinícx yhuindigooy. ³⁸ Migügtijc, jëbi mnejhuüygixy, co je pocyhuinmeecxin yaj'ihuäcxy yajcapxhuäcxy müd Jesús ycixpi. ³⁹ Müd je' ycixpi pinjaty mibijcp ti ypocyyajhuinmeecxcixy huidibi Moisés yley anajty ca'p pocyhuinmeecxin yecy. ⁴⁰ Nayguend'ájtigix, ix xyajcidacpejtcix je mij ayo'n jadu'n nej Dios y'ayuccojaaybi jaay jecy'ajty co Dios jadu'n ymíñañ:

⁴¹ Midoogix iich n'ayuc, miich ajcxy nixiicpi yajxiicpi, nay'adzígiiygixy, ix m'alma myajtigooygixy. Com iich Dios ndumyich tüg mijhuinmañ ma miich ajcxy mxii mdiempo. May miich ajcxy ca' mmibigipy, oy pin xyjayajmüdmüydáaccixipy.

⁴² Co Pablo ajcxy ypidzimy ma yi judíojäy ñaymujctac, chi je jäy huidibi ca' yjudíojäyity nimay je Pablo co huen nañ jadu'n yajmüdmüydägiiyb ma je jadügpí sábado. ⁴³ Co ajcxy yöyhuäcxni ma nayyöymujctac may judíojäy etz mayjäy huidi ca' yjudíojäyity huidibi jijptigiiy je judíojäy y'ixpijcin, panícxxy ajcxy je Pablo etz Bernabé. Pablo etz Bernabé capxhuijy ajcxy co huen panícxxy je tiy'ajt jadu'n nej Dios tübi tuñ may'ajt müd jäy ycixpi, e ca' ajcxy ixmadzipy.

⁴⁴ Co sábado yxii paty, chi jäy ñayyöymujci jahuenjaty cajp jäy ycanicxtay co anajty tzachmidoohuaangixy Dios y'ayuc. ⁴⁵ Ca' anajty ajcxy yjotcújcity co je judíojäy ajcxy ijxy je mayjäy. Chi ajcxy ooy yjot'ambijccoty ni'ojiiygixy etz nimaaygixy oy ni nej Pablo. ⁴⁶ Chi Pablo etz Bernabé ytigiiy miccapxpi ymíñañ ajcxy:

—Copicy anajty co iich miich nyajnimähuipy Dios y'ayuc jayijp. Com ca' mgöbígaaangixy Dios y'ayuc, e co ca' mnaybidáacigixy tudägy ma jugy'ájtin müd huinixiibi, nicxyich n'ocyajnimäy ajcxy Dios y'ayuc huidibi ca' yjudíojäyity. ⁴⁷ Com jadu'n xy'ane'myich ajcxy yi Huindzin Jesús, e xyñimaayich ajcxy:

Ti iich miich nbidägy jadu'n nej tüg tücxin jajin ma tüg'óciy naaxhuiñybi jäy jigix myajnejhuühuipy ajcxy je nüzoozin jiguembaad huindu'my naaxhuiñ.

⁴⁸ Co ajcxy jadu'n midoy huidibi ca' yjudíojäyity, chi ajcxy ooy nigí yjotcugiiy, e chi ajcxy yminandacy co je Huindzin Jesús y'ayuc ooy anajty y'óyity. E may ajcxy mibijcy huidibi anajty Dios ti yajnigödungiy co paatip jugy'ájtin huinixiibi. ⁴⁹ E jadu'n jim yajcapxhuäcxy Jesús y'ayuc ma je jimbi naax cajp. ⁵⁰ E je judíojäy ajcxy minaygapxi nijéjity töxyjäydijc ajcxy tudägypí huidibi Dios yajmij'ajtp, etz je mijjäydijc, e je' ajcxy müd mibidigy Pablo etz Bernabé co pahuojpquëgaangixy ma jejimbi naaxjot. ⁵¹ Chi Pablo etz Bernabé ycig huinhuojpy, je' je' tiy'ajtip co ca' jäygidacy ajcxy nej jäy anajty ytungixy. Chi ajcxy ñicxni

jim Iconio. ⁵² E je' ajcxy huídibi mijpidaacp Jesús ooy anajty ajcxy yjotcuycity. E ymíid anajty ajcxy je Espíritu Santo ma yjot yhuinma'ñ.

14

Pablo míid Bernabé jim Iconio

¹ Jim Iconio Pablo etz Bernabé ytigíy ajcxy yquipxyi ma je judíoáy ñaymujctac, e oy yajxon ajcxy capxhuäcxy Jesús y'ayuc. E may judío etz griegoáy ajcxy ymíbijcy. ² Je judíoáy ajcxy huídibi anajty ca' ymíbijccixy nigapxcoty ni'ojygoty ajcxy huídibi ca' yjudíoáyity huen je cajp jáy ajcxy mijotmáipy je mibijcpidjc. ³ Míid jada ycixpi Pablo etz Bernabé yhui'my je' ajcxy jecy etz capxhuäccixy ajcxy Dios y'ayuc huinmic jotmic etz je Huindzin mijotcuyc'ajtcixy ooy, e mooyi ajcxy je mic'ajt jébi ajcxy pa'mjáy yajtzögipy etz mijhuinma'ñ tungixy huídibi iixpejt'ajtp ma Dios ymic'ajt. ⁴ E je cajpjáy mejtzpicy je' anajty ajcxy, nijéjity ymijpidacpy ajcxy yi judíoáy, etz nijéjity ymijpidacpy ajcxy je Dios y'ayuccapxhuäcxi. ⁵ Chi nijéjity judíoáy etz huídibi ca' yjudíoáyity ñaygapxi míid tungmíidpi co mijotmátcodaangixy etz tim tzaagögädzaangixy Pablo etz Bernabé. ⁶ Co Pablo etz Bernabé nejhuíy, chi ajcxy yqueecy ñicxy ajcxy jim Listra etz Derbe jim Licaonia, e majaty naax cajp huídi huinduy'agonbi. ⁷ Jim ajcxy capxhuäcxy Jesucristo ytiy'ajt nej jébi ajcxy huaad y'alma nídzoocin paatcixy majaty cajp huingonbi.

Tzaagätzcixy Pablo jim Listra

⁸ Jim Listra anajty tüg yéydijc iñáy tecyma'tpi, caminaabi anajty yöy, com jadu'n anajty yma'xung'aty. ⁹ Je tecyma'tpi amído'ijtpy anajty Pablo y'ayuc, e Pablo iixpy anajty co ymíid mibijcin nej jébi chögy. ¹⁰ Chi Pablo mic nimay:

—Tinaayig.

Chi je tecyma'tpi tüg tipy ytinaygugíy, e chi ytigíy yöyb. ¹¹ Co je mayjáy ajcxy iixy nej Pablo anajty pa'mjáy ti yajtzögy, huin'it ajcxy ytigíy huambi jihuíybi míid Licaonia ayuc chachmíinaangixy:

—¡Dios ajcxy jadu'n nej jáy ti ycidaaccixy ma íich ajt!

¹² Ymíinaangixy co Bernabé je' anajty Júpiter, e je Pablo je' anajty Mercurio, com je' anajty capxp. ¹³ E je Júpiter teedy huídibi anajty tumb jim ma je Júpiter chajptijc cajppäbi, mímíiñ toro ajcxy etz pijy. E je teedy míid je jáy ajcxy yhuindzigíhuaangixy etz ojadadaangixy anajty Pablo etz Bernabé, yaj'ögaangixy je toro ajcxy. ¹⁴ Co Pablo etz Bernabé nejhuíy, ca' ajcxy jáygidacy nej jáy anajty ajcxy y'idíidzaangixy, chi ajcxy cí'm yhuít agíidziy, e ytigíy ajcxy mayjáy'agujc yam chachmíinaangixy:

¹⁵ —¡Yéydijctijc ajcxy! ¿Nej co jada jadu'n m'idíidzcixy? Nañ jadu'n íich ajcxy jáyity, jadu'n nej míich ajcxy. Paady íich ajcxy ti nmingixy ma míich ajcxy mgajp jigix ajcxy m'ixmadzipy jada jadu'mbi huinma'ñ huídibi ca' choobaady ma Dios. E mijpidaaccixp je Dios juugypí huídi oyduñ tzajp etz naaxhuiñybi, je mejy etz tüg'óciy tijaty ya n'íxim. ¹⁶ Jecy'ajty Dios ixmajch je jáy ajcxy huen túngixy nej tzojccixy. ¹⁷ Oy Dios anajty jayecy tiy'ajt co je' Diosity, jatuñ jadu'n yi oybi míid míich ajcxy ycixpi. Dios yi' yajtuub etz yecy oybi cosecha e xymooyim mijcajee huídi ngaayim n'uucim e xyajjotcugíyim.

¹⁸ Oy anajty Pablo jadu'n jadim tzachnímaangixy, ca'p ajcxy mimadacy co yi jáy ajcxy ca'p yaj'ó'ccixipy je toro co anajty yhuindzigíhuaangixy.

¹⁹ Huin'it xíi nijéjity judíoáy yja'ty, chooñ jim Antioquía etz Iconio. Chi ajcxy yajnimay je mayjáy co huen midziptzoongixy Pablo etz Bernabé. Chi mic'amy je mayjáy midziptzooñ Pablo etz cögäch ajcxy. Hue' ajcxy tijy ti anajty yaj'öccixy. Chi ajcxy oy ixjugucy cajppa'. ²⁰ Chi je apóstoles ajcxy júbigíy je Pablo, chi je' ypidígy, e ñicxy jadüg'oc cajpjoty. Com jabom Pablo etz Bernabé chooñ, ñicxy ajcxy jim Derbe.

²¹ Co Pablo etz Bernabé jadu'n capxhuäcxy je Jesucristo y'ayuc oybi jim Derbe, chi mayjáy ajcxy mijpidacy Jesús. Chi Pablo etz Bernabé ajcxy yhuimbijty Listra, Iconio,

etz Antioquía. ²² Jim ajcxy jotmicmigapxy je mibijcpidijc ajcxy, e capxhuijy huen tügjiip mibijccixy Dios y'ayuc, nimaaygixy:

—Co ndigihuaanim ma Dios y'ane'my copicy co nyajnáxim may ayo'n. ²³ Cajp cajp majaty mibijcpidijc yajpaady jim Pablo etz Bernabé yajníbijcy nijéjity yéydijctijc huen nigohuajc'ajtcixy je jäy ajcxy huídibi mijpidacp Jesús. Co anajty ti yajníbicy je' ajcxy huídibi nigohuajc'adipy, chi jaygay ajcxy y'ijty etz Dios mibijctzoy muid je' ajcxy ycixpi.

Pablo muid Bernabé yhuimbijtcixy Antioquía jim Siria naaxjot

²⁴ Pablo etz Bernabé ñajxy ajcxy Pisidia oy ajcxy yja'ty jim Panflia. ²⁵ Chi Pablo etz Bernabé Jesús y'ayuc capxhuäcxi jim Perge, chi ajcxy ñicxy jim Atalia. ²⁶ Chi ajcxy jim ybarcotigiiy ñicxcixy jadügtecy jim Antioquía ma anajty ajcxy ti yajníbigyii Dios chójcín muid je tung huídibi anajty ti yajcixcixy. ²⁷ Co ajcxy yja'ty jim Antioquía, chi ajcxy huoomujcy je jäy ajcxy huídibi anajty mijpidaacp Jesús, e yajmuidmíydactay tüg'óciy nej anajty Dios ti ytuñ muid je' ajcxy ycixpi, nej anajty Dios ti yaj'ahuäch je tü'aa nej huaad mibicy ajcxy je huídibi ca' yjudíojäyity. ²⁸ Pablo etz Bernabé ijt ajcxy ooy jim jecy muid je mibijcpidijc ajcxy.

15

Mibijcpidijc ñayyöymujci ajcxy jim Jerusalén

¹ Je huin'it tiempo nijéjity jäy huídi tsoon Judea yja'ty ajcxy jim Antioquía, e ytigiiy yaj'ixpijcp ma ajcxy je huídibi mijpidaacp Jesús, ymínaangixy: “Pen myajnídzögamy ajcxy yi m'alma, copicy co ajcxy myajtiy'ajttíhuipy jadu'n nej Moisés y'ane'my.” ² Chi Pablo etz Bernabé ñaymidziptzongooti ajcxy muid huídi anajty ajcxy tzomb jim Judea, e ca' ajcxy ñay'ayuc-huinjihuiiyi. Chi jada' yajníbejti Pablo etz Bernabé etz jacjadyii mibijcpidijc huen nicxy ajcxy Jerusalén yajtydigiiy ma je apóstoles ajcxy etz huídibi ajcxy nigohuajc'ajt je mibijcpidijc jim Jerusalén.

³ Je mibijcpidijc huídibi anajty ajcxy jim Antioquía oy ajcxy tujíjphuohuiy Pablo etz je' ajcxy huídi nicx muid Pablo. Chi Pablo etz muid yjajmídtijc ajcxy ñicxy, e ñajxy ajcxy Fenicia ñaaxjot etz Samaria ñaaxjot. Yajmuidmíydaaccixy je mibijcpidijc cajp cajp jadu'n nej jäy ajcxy huídibi ca' yjudíojäyity ti yjothuimbijtcixy etz yajmí'adaangixy Dios. E tüg'óciy mibijcpidijc ooy ajcxy jäygidacy je Pablo y'ayuc.

⁴ Co Pablo etz Bernabé ajcxy yja'ty jim Jerusalén, chi je mibijcpidijc ajcxy cöbijci je apóstoles ajcxy, etz je' ajcxy huídi nigohuajc'ajtp anajty je mibijcpidijc. Chi Pablo yajmuidmíydactay nej anajty Dios ti ytuñ muid je' ajcxy. ⁵ Chi nijéjity fariseojäy, tiibi anajty mibijccixy Jesús, ytinayigy ajcxy juntijoty, e ymínañ ajcxy:

—Copicy co huen yajtiy'ajttiy je jäy huídibi mibijcp Jesús huídi ca' yjudíojäyity, e copicy nyaj'ané'mim co huen ajcxy Moisés ycötújcín cuyduuni.

⁶ Chi ñayyöymujci je apóstoles ajcxy etz huídi ajcxy nigohuajc'ajtp je mibijcpidijc, co capxyöyaangixy je fariseojäy y'ayuc nej yhuí'mip. ⁷ Ca' ajcxy tzojc ñay'ayuc-huinjihuiiyi, chi Pedro ytinayigy ymínañ:

—Migügtijc, mnejhuiyb ajcxy co jayhuin Dios ti xyhuin'ixyich ma miich ajcxy, jigix nyajnimähuibich jäy ajcxy huídibi ca' yjudíojäyity je Jesús ytiy'ajt oybi nej ajcxy y'alma nízooicín paadipy. ⁸ E Dios huídi nejhuiyb jäy yjot yhuinma'ñ xyaj'ijxich je tiy'ajt co yejcy Espíritu Santo ma yi' ajcxy nañ tím jadu'n nej ytuuñ ma ñch ajt. ⁹ Dios tú'ciy ytuñ muid ñch ajt etz muid yi' ajcxy, muid co yi' ajcxy mibicy Jesús paady Dios yajhuaatzi ajcxy yjot yhuinma'ñ. ¹⁰ Jadachambi, ¿nej co ca' mhuinjihuihuaangixy mibigaangixy nej Dios ytuñ muid huídibi ca' yjudíojäyity? ¿Nej co adzip myajníhuidzaangixy je costumbre huídi ni ñch ajt ni n'ap ndeedy ca' ti mímadaägy nicxy cuydundaaygixy? ¹¹ Janch ñch ajt nmibijcim co muid je may'ajt huídi Jesús ti tuñ muid ñch ajt ycixpi ti nbaatim n'alma nízooicín. Nañ

tim jadu'n je' ajcxy huidi mibijc Jesús huidi ca' yjudíojäyity ypaat y'alma nüdzoocin müid je may'ajt huidi Jesús ti tuñ.

¹² Huin'it je jäy ajcxy y'amunday, y'amido'ijtcixy nej Bernabé etz Pablo nimiydaaccixy nej anajty Dios ti tuñ müid yi' ajcxy, jadu'n nej ajcxy ti yajtzögy pa'mjäy müid Dios ymic'ajt, etz jac tijaty mijhuinma'ñ huidi ti tuñ ma yi' jäy ajcxy huidi ca' yjudíojäyity. ¹³ Co Pablo etz Bernabé ajcxy miydactay, chi Jacobo yminañ:

—Migügtijc mido'mbijcigich ajcxy ich n'ayuc. ¹⁴ Simón Pedro ti xyajmüidmiydaacim nej Dios may'ajt ti tuñ oga'n ma huidibi ca' yjudíojäyity, co huin'ijxy huidi yi' yjäy'adaanip ma yi' ajcxy. ¹⁵ Quipxy jada ñaybadyii müid huidi je Dios y'ayucnajtzcaxhuybi jecy'ajty ycojay, ¹⁶ co jadu'n yminañ:

Co anajty jadu'n ti y'ocjadyii, chi nhuimbidityich ya naaxhuiñ. Nyaj'oyihuibich jadüg'oc je naax cajp huidi David anajty y'ane'myb huidi anajty ti y'octigooybi jadu'n nej tüg'tijc huidi ti yciday. Ma David y'ap y'oc nyaj'a'oyihuibich jadüg'naax cajp, jadu'n nej jäy ytijc cojy huinjemybi.

¹⁷ Jigix jacjadyii jäy y'ojadadipy ajcxy yi' Dios. Nañ jadu'n je' ajcxy huidi ca' yjudíojäyity, huidi ich njäy'adaanip.

¹⁸ Jadu'n je Huindzin Dios jécyp jada tity'ajt jadu'n yejcy.

¹⁹ Chi Jacobo yjacminañ:

—Paady ich jadu'n nmina'ñich co ca' huaad n'amayiyim ajcxy huidi ca' yjudíojäyity huidi ajcxy ti mijpidägy Dios. ²⁰ Hue' janchtiy tzoc nijayiyim co ajcxy ca' tzüdzipy huidi jäy yajhuindziguyb ídolos, etz ni ca' huaad migapxcixy huingbi töxyjäy, etz ni ca' huaad tzützcixy iyujc huidijaty jäy yöc-huidyipi, etz ni ca' huaad jicxcixy tijaty iyujc ni'py. ²¹ Jecy'ajty ixti chamni tüg tüg cajp, ji pin ihua'cxp capxhua'cxp Moisés yley majaty nayoymujctac naag naag pocxinxi.

²² Chi je apóstoles ajcxy etz je huidi nigohuajc'ajt yi' mibijcpidijc, müid tüg'óciy Jesús yjäy pidacy ajcxy yhuinma'ñ co huin'ixaangixy nijjity jäy ma je' ajcxy etz quexaangixy jim Antioquía quipxy müid Pablo etz Bernabé. Chi ajcxy yajniibejty Judas, huidi nañ jadu'n yajtijpy Barsabás, etz müid Silas, yëdyictijc huidi ajcxy capxpaadip. ²³ E je' ajcxy yajmiguejxy necy nej anajty ti jaay: “Ich ajcxy apóstoldijc, etz huidi nigohuajc'ajt yi' mibijcpidijc, etz nidüg'óciy mibijcpidijc, cham ich ajcxy nguexy capxpocxin ma ajcxy mibijcpidijc huidi ca' yjudíojäyity huidi ajcxy tzinaayb jim Antioquía, etz huidi ajcxy tzinaayb Siria etz Cilicia ñaaxjot. ²⁴ Ti ich ajcxy nejhuüyich co nijjity jäy ti xyñinixcixy, choñ ma ich ajcxy, ca' ich ajcxy ngötujcin mooy, e xy'amayiygixy jim müid y'ayuc, e xyajhuinma'ñytigoya'ñ ajcxy, co ajcxy xyñimaaygixy co copicy co myajtiy'ajttihup ajcxy m'ung, etz mbayöipy ajcxy je Moisés ycötújin. ²⁵ Paady ich ajcxy ti nnyagápaxigixy nidüg'óciy co nyajnibedipyich nijjity jäy huidi yajpaatp ma ich ajcxy co huen nicxy xy'ijxcixy niguipxy müid nmigügtijcich huidi ooy ndzocyich, je Bernabé etz je Pablo. ²⁶ Je huidi ajcxy yjugy'ajt ti yoxy ti toogy müid ajt nHuindzin Jesucristo ycixpi. ²⁷ E jadu'n yam nguexyich ajcxy Judas etz Silas, e yi' ajcxy ci'm xyajmüidmiydägy tüg'óciy ich ajcxy n'ayuc. ²⁸ Ti je Espíritu Santo huinma'ñ pidägy ma ich ajcxy nhuinma'ñ etz ich ajcxy ti nhuinma'ñ nbidägyich, co ca' nyajnibigipy ajcxy tijaty ayuc tzaachypi, jëyi janchtiy je huidi copicyip. ²⁹ Copicy co ca' ajcxy mdzüdzipy huidi jäy yajhuindziguyb ídolos, ca' ajcxy ni'py mjicxcixipy, ni ca' ajcxy mdzüdzipy iyujc huidi yöc-huicity ti yögy, e ca' ajcxy mmigapxtigooygixipy huingbi töxyjäy. Pen mguydundaayb ajcxy jada ané'min, oy anajty mdungixy. E Dios ajcxy xpubedipy xypudigihuipy.”

³⁰ Jadu'n je' ajcxy huidi ti yajquexy nicxy ajcxy jim Antioquía. Jim ajcxy huoomujcy je mibijcpidijc, e yajcidiguy ajcxy je necy. ³¹ Co je mibijcpidijc je necy capxy, chi ajcxy ooy yjotcuguy müid je oybi ayuc tüibi anajty ajcxy yajniuguexy. ³² Com Judas etz Silas hue' je' anajty Dios y'ayucnajtzcaxhuybi, paady ajcxy yajjotcuguy jot'amij moy je mibijcpidijc

müid je ayuc. ³³ Jecy ajcxy jim yhuäcxijpy, chi je mibijcpidijc müid ajcxy ycapxycijxy, yajmihuanüy ajcxy Dios, chi ajcxy yhuimbijtni ma anajty ti choongixy. ³⁴ Chi Silas yhuinma'ñypidacy co anajty yhui'ma'ñ. ³⁵ Nañ jadu'n Pablo etz Bernabé ijt ajcxy jim Antioquía, etz müid jac nijëjity ymügügtijc yaj'ixpijc'idüitzcixy etz capxhuäcx'idüitzcixy je Huindzin Jesús y'ayuc ytiy'ajt.

Pablo mümetz viaje

³⁶ Ti xü tiempo anajty ñajznünicxüyñi co Pablo nimay Bernabé:

—Jam'ajt nmügügtijc co'ixüym cajp cajp majaty ti ngapxhuäcxim Huindzin Jesús y'ayuc. Ooy njanejhuñhua'ñich nej ajcxy yajpaady. ³⁷ Bernabé ymüid nicxaamy anajty je Juan huüdi yajtijp Marcos. ³⁸ E je Pablo ca' a'ixü co müid nicxip Juan, com ti anajty y'ocpuyöydütibi jim Panfilia, e ca' anajty ti yjacmüidyajtüyöyüi je tung. ³⁹ E ca' ajcxy ñay'ayuc-huinjihuüyüi miñ xyipy. Chi Bernabé müidnicxy Marcos e ybarcotigüy ajcxy, chi ajcxy ñicxy jim Chipre. ⁴⁰ E je Pablo abicy huin'ijxy Silas huüdi anajty müid ñicxa'ñ. Chi je mibijcpidijc müid ycapxycijxy, chi chooni ti anajty je mibijcpidijc yajmihuanüyüi Dios, ⁴¹ chi ñajxy jim Siria ñaaxjot etz Cilicia ñaaxjot jot'amijmooy je mibijcpidijc.

16

Timoteo mijhuäcpejty je Pablo etz Silas

¹ Chi Pablo etz Silas yja'ty ajcxy jim Derbe etz Listra. Jim ajcxy paty tüg jäy huüdi anajty yxü Timoteo huüdi anajty mijpidaacp Jesús. Judíojäy anajty ytaj'ajtpy, e griegojäy anajty yteedy'ajtpy. Je' ytaj nañ ymibijcpy anajty Jesús. ² Je jäy ajcxy huüdi yajmij'ajtp Jesús jim Listra etz jim Iconio ooy anajty oy nimiydaaccixy Timoteo. ³ Pablo ooy jatzojcy co Timoteo ycajäymüid'ajti. Chi Pablo yajtiy'ajttüyüi Timoteo, jigix ca' ymijotmädüyb je judíojäy huüdi anajty ajcxy jim tzinaayb, com tüg'óciy ajcxy nejhuüy co griegojäy teedy'adyüi. ⁴ Cajp cajp ma anajty ajcxy ñaxy yajmüidmüidaaccixy ajcxy je mibijcpidijc je cötujcün huüdi je apóstoles ajcxy, etz huüdi nigohuajc'ajt je mibijcpidijc jim Jerusalén. ⁵ Je' ajcxy huüdi yajmij'ajtp Jesús cajp cajp nigü anajty yjotmücpijccixy, etz mijpidaaccixy Dios y'ayuc, etz ñimayiy'idüitzcixy jabom jabom.

Pablo yhuin'ijx tüg Macedonia jäy

⁶ Je Espíritu Santo ca' a'ixüy nicx capxhuäcxixy Dios y'ayuc jim Asia ñaaxjot. Paady ajcxy huingduum ñicxy yajyöyñajxy ajcxy Frigia ñaaxjot etz Galacia ñaaxjot. ⁷ Chi ajcxy jim yja'ty ma Misia ñaaxtziba'n. Chi huinmay co ñicxa'ñ ajcxy Bitinia ñaaxjot. E je Espíritu yajnejhuüy ajcxy co ca' yü' tzocy co jim nícxcixipy. ⁸ Chi ajcxy jüyöyñajxy Misia ñaaxjot, chi ajcxy y'idacy jim Troas. ⁹ Chi Pablo cumäyjoty huin'ijxy tüg yëdyjc, huüdibi yconaaxity anajty Macedonia, ytinay'ahuüy ma Pablo yhuinduu, e ycohuanüyüi, ñimäyüi: “Tun may'ajt nicx jim Macedonia, e jim xypubedipy üch ajcxy.” ¹⁰ Co Pablo jadu'n huin'ijxy cumäyjoty, chi üch ajcxy n'ixtay barco huüdi nicxamb jim Macedonia. Nhuinjihuüy üch ajcxy co jim Dios xyquéjxcixyich jigix jim ngapxhuäcxibich Jesucristo ytiy'ajt je oybi nej jëbi ajcxy alma nidzooün paadipy.

Pablo etz Silas jim Filipos

¹¹ Chi üch ajcxy nbarcotigüy jim Troas nicxy üch ajcxy tüyüi ma naax mejy'agujcpi huüdibi anajty yxü Samotracia. Chi com jabom ajcxy nja'tyich jim Neápolis. ¹² Co üch ajcxy jim ndzooñ, chi üch ajcxy nicxy jim Filipos. Filipos hue' je' romanojäy ycajp. Je' je cajp jac mijpi ma je Macedonia ñaaxpa'. Jim üch ajcxy nhuäcxijpy jecy. ¹³ Tüg sábado nicxy üch ajcxy cajppa', mühuingon tüg mijñüi, ma anajty judíojäy ajcxy müidity Dios ojadajtac. Chi üch ajcxy n'ixtacy jim, e ngapxhuäcxich ajcxy Jesús y'ayuc ma je töxyjädyjc ajcxy huüdi jim anajty ajcxy ti yöymujccixy. ¹⁴ Je Lidia anajty y'amido'ijtp. Hue' je' anajty Lidia ycgajpity jim Tiatira, e ytocpy anajty ucy huit oy jatypi. Lidia yajmij'ajtpy anajty Dios,

e je Huindzin Dios yajyungñiyi yjot yhuinmañ, jigix amido'idipy nej Pablo Dios y'ayuc capxhuäcxi. ¹⁵ Je Lidia nibejt mïd tüg'óciy yjuugy ymígüg, chi ñich ajcxy xycohuaniy, e xyñimáaygixich:

—Pen minamb ajcxy co nmibicyich je Huindzin Jesús, miin jättaaccix ma ñich ndijc.

Chi ooy xycohuaniy ñich ajcxy, ixti cooni jim xyajhui'myich ajcxy.

¹⁶ Jadu'n yjajti tüg tecy co ñich ajcxy anajty ñicxy ma Dios ojadajtac, chi ñich ajcxy nbaty tüg tumbi töxy'anäg mañ'ajt mïdipi huïdi ooy ytiygapxy. Ymïd anajty yhuindzin ma ytuñ, e je' yhuindzin ooy anajty ymeeñybaaty co je töxy'anäg ytiygapxy. ¹⁷ Je töxy'anäg ypanicxy chach yam Pablo etz ñich ajcxy yminañ:

—Jada yëydijc Dios tzajpjotypi ajcxy ymidumyb. Capxhuäcxi ajcxy Dios y'ayuc jadu'n nej jëbi ñich ajt n'alma nïdzoocin paady.

¹⁸ Canaag xii jadu'n ñich ajcxy xychach'amayiy. Co Pablo chiipin, chi yhuäc-huimbijty nimay je mañ'ajtmïdipi:

—Mïd Jesucristo yxii n'ane'myich, pidzim ma jada töxy'anäg.

Tim huin'itiy je ca'oybi yajyöyduuty je töxy'anäg.

¹⁹ Co je töxy'anäg yhuindzin jadu'n ijxy co ca' y'ocmeeñybadaani, chi mïd je' ycixpi ajcxy majch Pablo etz Silas, e yajnicxy ajcxy ma je tungmïdipi ma je' ajcxy y'agujctijc. ²⁰ Co ajcxy jiiby mïdja'ty ma je tungmïdipi, chi yminañ:

—Jada yëydijc ajcxy judíojäy jada, nigoo ajcxy ñaax yajmäty ycajp yajmäty, ²¹ etz yaj'ixpicxy ajcxy costumbre huïdi ca' huaad ñich ajt ngöbijcim, e nihuaad ngatuunim, com hue' ñich ajt romanojäy.

²² Chi je mayjäy ajcxy mïddziptzoon Pablo etz Silas, e je tungmïdipi ni'ane'mdiy co huen ajcxy yajñijeñ yaj'ixjeñ huen yajhuojpcixy mïd matz. ²³ Co ajcxy huojptay, chi pidacy ajcxy pujxtigoty, e ane'my ajcxy pujxtijc huindzin co huen cuend'ajtcixy yajxon. ²⁴ Co je pujxtijc huindzin ypaati je cötujcin, chi pidacy Pablo etz Silas jac jiiby öc'am, e chi ajcxy ixmajch co'adzity ytecy ma je quipy huïdi yxii cepo.

²⁵ Chi jadu'n yjajty mïjcuctz anajty, co Pablo etz Silas chach Dios ojadajtacixy chach huin'igixy yi Dios, e jacjadyii machyjäy chach amidoo'ijtcixy. ²⁶ Chi timitiini uyx huinxijty pujxtijc poch. Chi y'ahuaatztay je pujxtijc agi', e y'adzittuttay je cadena ma tüg'óciy machyjäy. ²⁷ Chi oy ymahuijy je pujxtijc huindzin. Co jadu'n ijxy ac'ahuädz pujxtijc aguu, chi yajpidzimy y'espada ñayyaj'öga'ñiyi anajty. Com hue' anajty tijy ti je machyjäy yqueectäy. ²⁸ Huin'it Pablo mic'amy migapxy je pujxtijc huindzin nimay:

—Ix nej mnyduuni, cheeby ajcxy nidüg'óciy.

²⁹ Chi je pujxtijc huindzin pijctzoy jin, e ytiygy poyigy pujxtigoty, janch tziyuuyb mïd tzig'iñ. Chi ycoxtinay'ahuñy ma Pablo etz Silas ajcxy yhuinduu. ³⁰ Chi yajpidzimy Pablo etz Silas, e yaj'amidooy:

—Huindzin, ¿ti ñich jëbi nduñ jigix nïdzoocin nbáadibich?

³¹ Chi je' ajcxy minañ:

—Mibic Huindzin Jesús etz mbaadipy nïdzoocin, miich etz m'ungdöxyijc.

³² Chi ajcxy yajnimay je Huindzin Jesús y'ayuc tüg'óciy pinjaty anajty jim ma je pujxtijc huindzin ytijc. ³³ Mïjcuctz je pujxtijc huindzin puji je Pablo ajcxy chaach'au, e chi je pujxtijc huindzin ñibejtay ajcxy mïd y'ung ytöxyijc. ³⁴ Chi je pujxtijc huindzin yajnicxy Pablo etz Silas ma ytijc, yajcaay yaj'uucy ajcxy. Ooy anajty ajcxy yjotcujcity nidüg'óciy, com ti anajty mibijccixy Dios.

³⁵ Com jabom je mïjtungmïdipi quejxy mutztungmïdipi jim ma pujxtijc huindzin mïd cötujcin huen najtzmazdygyxy Pablo etz Silas. ³⁶ Chi je pujxtijc huindzin nimay Pablo:

—Ti je tungmïdipi quexy cötujcin co jëbi nnajtzmazdyyich miich ajcxy. Nicxcix jotcujc.

³⁷ Chi Pablo migapxy je mutztungmïdipi, e chi nimay:

—Romanojäy ñich ajcxy. Yi cajptungmïdipi ti xyhuopyich mïd matz mayjäy agujc, ni ca' jayjip ti xytidyduñich, e ti xypidägyich pujxtigoty. ¿Nej co jadachambi

xyñajtzmadzihua'ñich ameechi? Ca' jadu'n y'óyity. Huen mijtungmüdpí ci'm miññ xyajpidzimigixich ñich ajcxy.

³⁸ Chi je mutztungmüdpí cijx nimiydactäy ma mijtungmüdpí tüg'óciy Pablo y'ayuc. Chi ajcxy ñay'adzigüy co nejhüy co Pablo etz Silas hue' je' anajty ajcxy romanojy. ³⁹ Chi je mijtungmüdpí ñicxy ci'm oy capxjotcidägy je Pablo etz Silas. Chi yajpidzimy pujxtigoty, e pijctzoy may'ajt huen huingduum ñicxcixni. ⁴⁰ Co Pablo etz Silas ypujxtijcpidzimy, chi ajcxy ñicxy ma Lidia ytijc. Jim ajcxy jadu'n ijxy mibijcpidijc, e jot'amijmoy ajcxy. Chi ñicxcixni.

17

Jim Tesalónica yjajti ooy capxy ayuc, ca' nay'ayuc-huinjihüñhüñ

¹ Pablo etz Silas ajcxy ñajxy Anfípolis, etz Apolonia, chi ajcxy yja'ty Tesalónica. Jim anajty judíojäy ajcxy tüg ñaymujctac. ² Com jadu'n anajty costumbre müdity, Pablo ñicxp anajty ma judíojäy ajcxy ñaymujctac sábado xü. E tugüig sábado xü jim capxy miydacy müd je' jim Tesalónica. ³ Hue' anajty müd miydaaccixy jadu'n nej jaybecyity ma Dios ñecy co Cristo copicy ayo'n yajnaxtähuip, e chi y'ögipy, huin'it yjugypigipy. Chi Pablo yminañ:

—Je Jesús huidibi y'ayuc ngapxhuäcxibich, je' je' je Cristo.

⁴ Nijëjity judíojäy ymibijc ajcxy e mijyöybejty ajcxy Pablo etz Silas. Nañ jadu'n may griegojäy huidi anajty Dios yajmij'ajtp, etz maytöxyjäydijc huidijaty oy ymijpidacni ymijnicxpejt etz mibijc ajcxy Pablo etz Silas y'ayuc. ⁵ Je judíojäy huidi anajty ca' ymibicy, yjotmätcoty ajcxy. Huomujcy ajcxy amügy jäydijc etz jibic jäydijc, etz naax cajp yajmättay, anejptuuti agojxtuuti ajcxy Jasón ytijc'aguu tzach'ixtaaygixy Pablo etz Silas. ⁶ E co ca' ajcxy paty Pablo etz Silas, chi ajcxy majch Jasón etz jacjadyii mibijcpidijc. Adzip ajcxy yajnicxy pahuijch pajugujcy ajcxy jim ma cajp tungmüdpí. Yam chachmínaangixy mic:

—Jada jäy ajcxy je' huidi tzachyajhuinma'ñyidigooyb tüg'óciy naax cajp, nañ iyabaad ajcxy ti ymiingixy. ⁷ Jada Jasón ti Pablo etz Silas jim yajjättägy ma ytijc, tüg'óciy ajcxy müddzip'adyii je César huidi ane'mb, yminaangixy co ji jadüg rey, je' je' je Jesús.

⁸ Co jadu'n midoy, chi ajcxy ooy yajyumigy yaj'oxigy cajpjäy etz je tungmüdpí ajcxy.

⁹ Chi Jasón etz ymügügtijc yajmeeñeyjcy, chi najtzmadziy ajcxy.

Pablo etz Silas jim Berea

¹⁰ Co oy ycodziy mic'amy yi mibijcpidijc yajpidzimy ajcxy cajpjoty Pablo etz Silas, e quejxy ajcxy jim Berea. Co ajcxy jim yja'ty, chi ajcxy ñicxy ma judíojäy ñaymujctac. ¹¹ Jim Berea judíojäy ajcxy yjacmüd oyjot oyhuinma'ñ, ca'ydi judíojäy ajcxy jim Tesalónica. Je Berea jäy ajcxy ycöbijc ajcxy Jesús y'ayuc ymüid oyjot oyhuinma'ñ. Jabom jabom ixtaaygixy ma yjaybetyity ma Dios y'ayuc pen janch jadu'n ymina'ñ nej Pablo yaj'ixpicy. ¹² May judíojäy ymibijcy etz may griegojäy huidibi ooy ymijpidaacni nañ jadu'n ymibijcy, töxyjäydijc etz yëydijctijc. ¹³ Co yi judíojäy jim Tesalónica nejhüy co Pablo nañ jadu'n Dios y'ayuc capxhuäcxí jim Berea, chi ajcxy jim ñicxy, etz yajyumigy yaj'oxigy je cajp jäy ajcxy. ¹⁴ Mic'amy ajcxy, je mijpidaacpi Jesús, yquejx Pablo mic'amy, huen nicxy jim ma mejypa'. Chi Timoteo etz Silas yjac-hui'my ajcxy jim Berea. ¹⁵ Je huidibi ajcxy Pablo jaymüid'ajt ymüidnicxy, müd ñicxy ajcxy ixti cooni yja'ty jim Atenas. Huin'it ajcxy yhuimbijty müd tüg ayuc co huen Timoteo etz Silas nicxy minaybadyii Pablo jim Atenas janch mic'amy.

Pablo jim Atenas ahuijxy Silas etz Timoteo

¹⁶ Co anajty Pablo ahuijxy je Silas etz Timoteo jim Atenas, ooy anajty ytajy ymay co ijxy nejhüy co je cajp müd ooy may quipychech, tzaadzech, etz oori oyduñ huidi ajcxy dios'ajtpy. ¹⁷ Paady Pablo nimiydacy Jesús ma yi judíojäy ñaymujctac müd je judíojäy etz jacjadyii jäy huidi Dios miyaaxp ojadajtp. E jabom jabom müd miydaaccixy pinjaty y'oymujcp cajp cujc. ¹⁸ Nijëjity ixpicytijc ñay'ijxquípaxigixy y'ixpijcin müd Pablo. Jim

huidibi ni'ixpigiiyb epicúreo ixpijcin, etz cham huidi ni'ixpigiiyb estoico ixpijcin. Chi ajcxy nijëjity ymînaangixy:

—¿Ti jada jada' ajt xyajniimaayim jada yëydijc capxymaayibi?

Chi jadyii ymînaangixy:

—Hue' jada ycapxhuäcxyp huingbi dios y'ayuc.

Jadu'n ajcxy ymînañ co Pablo nimiydacy Jesús etz jadu'n nej jäy yjugypicy huidi jaty ti y'öccixyp. ¹⁹ Chi ajcxy müdnicy Pablo ma je it ma je ixpijcytjic ñaymugyii huidi anajty yxii Areópago, chi ajcxy Pablo nimay:

—¿Nej jëbi njajtcixich jada jemybi ixpijcin huidi miich mmimimb? ²⁰ Com ti ñch miich xyajniimaaygich ayuc ca'pi yhuinjihuinyñity, e nejhuihuaamyich ajcxy nej yhuimbizimy tüg'óciy jada ayuc.

²¹ Tüg'óciy Atenas jäy etz nañ jadu'n huidi ajcxy jim adzinaayb, ca' anajty ni ti tungixy, jëyi nigoobi amido'itcixy etz miydaaccixy jemybi ayuc tiy'ajt.

²² Huin'it Pablo ytinayigy mayjäy agujc jim Areópago, e ymînañ:

—Atenas jäy, n'ixypich co miich ajcxy ooy myajmij'ajtcixy canaagnax huidi miich ajcxy mdios'ajtpy. ²³ Com ti xii ya n'ixyich canaagnax huidi ajcxy m'ojadajtpy, chi ti nbaatyich tüg altar ma jadu'n yaayity: “Je Dios huidi ca' pin ix'yadyii.” Je Dios huidi miich ajcxy m'ojadajtpy, e ca' ajcxy m'ixy'adyii, jada je' huidi nyajniimaayb ajcxy.

²⁴ Je Dios huidi oyduñ naaxhuiñybi etz tzajp etz jac tijaty, yi' je' nihuindzin'ajttayb tüg'óciy. Je Dios ca' chinäy ma tzajptjic huidi jäy ajcxy cojpy. ²⁵ Dios ca' ni ti yajtigoy'ity huidi naaxhuiñyjäy jamöhuaanip. Dios yi' yejcp jugy'ajtin etz huidi nxejim, etz tüg'óciy tijaty.

²⁶ E tügpî ni'py tügpî jot ti yaj'oyiy tüg'óciy yi jäy, jigix huen tzinaaygixy huindu'my naaxhuiñ. Dios tiy'ajt yejcp nej xii tiempo yöyipy, e ma jäy jëbi huaad chinaaygixy,

²⁷ jigix ixtaaygixipy Dios, jadu'n nej jihuüy ixtaaygixy tondäy xajtäy, com ca' je' jiguemity ma ñch ajt nidüg nidüg. ²⁸ Dios ycxipi ñch ajt ndzinaayim nyücxim etz nji'ajtim,

com jadu'n mînañ miich ajcxy mboeta, huidi ñy yajcojp: “Dios ñch ajt xy'ung'ajtim xy'anäg'ajtim.” ²⁹ Pen Dios ñch ajt xy'ap'ajt xy'oc'ajtim ca' huaad nhuinma'ñ nbidaacim

co Dios yjadu'ñity nej oorî oyduñ, plata oyduñ, etz tzaadzech quipychech huidi jäy ti yaj'oyiy müd yci'mhulinma'ñ. ³⁰ Dios ca' müdity jotcöduuyb je jäy chuuhulinma'ñ tibi ñajxni. Jadachambi ane'mb Dios hueñytimma'amyity huen jäy ajcxy jothuimbijtcixy.

³¹ Com ti Dios yajnihuinmayiy tüg xii mîna tiyduna'ñ yi naaxhuiñybi jäy müd je yëydijc huidi ti huin'ixy, jada tiy'ajt Dios ti yaj'ixy yajnejhuüy tüg'óciy jäy co ti yajjugypicy Jesús co y'o'cy.

³² Co ajcxy jadu'n midoy co yi öcpi yjugypigipy, chi nijëjity ytigy nixiicpi yajxiicpi. Chi jacjadyii ymînaangixy:

—Huaad ñch ajcxy n'amido'idipyich miich m'ayuc mîna anajty jadüg'oc.

³³ Chi Pablo jim chooni ma je' anajty ajcxy. ³⁴ Chi nijëjity jäy ypadzooni huidi anajty ti mibicy Pablo y'ayuc. Ma je' ajcxy jim anajty tüg jäy huidi anajty yxii Dionisio, yi' je' anajty tungmüd jim Areópago. Nañ jadu'n tüg töxyjäy huidi anajty yxii Dámaris ypadzooni, etz jacjadyii jäy.

18

Chi Pablo ñicxy jim Corinto

¹ Co jada jadu'n ytuni yjajti, chi Pablo chooni jim Atenas, ñicxi jim Corinto. ² Jim minaybaati tüg judíojäy huidi anajty yxii Aquila, Ponto anajty ycocajpity, namja'tni anajty müd ytöxyjic Priscila. Jim anajty ti chongixy Italia ñaaxjot, jëgixpi co je mij'ane'mbi, Claudio, pidacy cötujcin co huen tüg'óciy judíojäy pidzimdaaygixy jim Roma. Chi Pablo oy cogapxy Aquila. ³ Aquila etz Priscila ytung'ajtpy anajty cochactjcxuyii,

com nañ cochactijcxuuyb anajty Pablo, paady Pablo jim yhui'my miid je' ajcxy. Chi ajcxy tú'ciy ytuuñ. ⁴ Tüg tüg sábado xii Pablo ñicxy ma je judíojäy ajcxy ñaymujctac yajmiidmiydaaccixy Jesús y'ayuc ytiy'ajt etz capxjotcidaaccixy judíojäy etz nañ huidi ca' yjudíojäyity.

⁵ Co ajcxy Silas etz Timoteo yja'ty jim Corinto, chooñ ajcxy Macedonia, chi Pablo adügiijp ytiigi ayuccapxhuäcxpi ma judíojäy ajcxy co Jesús je' je' je Cristo huidi je' ajcxy chach'ahuijxyp. ⁶ E je judíojäy ajcxy ytiigi jotma'tpi, tzipcapxpi ahua'ngapxpi. Chi Pablo yhuit huinxijty, je' je' je tiy'ajt co puyöydüdaani ajcxy, e chi Pablo yminañ:

—Miich ajcxy miid mgi'mbocy ajcxy myajtigoya'ñ yi m'alma. Hich ca' ti pocy nmíididyich ma miich ajcxy. Cham nicxy Dios y'ayuc ngapxhuäcxich ma huidi ca' yjudíojäyity ajcxy.

⁷ Chi Pablo yöybojtni ma judíojäy naymujctac, chi ñicxy ma Justo ytijc. Justo ooy anajty Dios miyäxy ojadaty, e ymiid anajty ytijc mihuingon je judíojäy ñaymujctac. ⁸ E Crispo, je judíojäy ñaymujctac huindzin, ymibijc je' je Huindzin Jesús y'ayuc ytiy'ajt, miid tüg'óciy y'ung y'anäg, yjuugy ymigüg. Nañ jadu'n nijéjity Corinto jäy co midoy Jesús y'ayuc, chi mibijcy e ñibejty ajcxy. ⁹ Chi je Huindzin Dios nimay Pablo cumäyjoty:

—Ca' mdzigä, capxhuäcx'aditz n'ayucich, e ca' mni'amoñ. ¹⁰ Com hich miich nbubedipy, ca' pin jot miid'adipy nicxy nejaty xytuñy. Hich may hich ya nmíidity jäy ma jada cajp.

¹¹ Chi Pablo yhui'my jim Corinto tüg jimijt jacup, yaj'ixpijcy jäy je Huindzin Dios y'ayuc ytiy'ajt.

¹² Huin'it tiempo co Galión ygobernador'ajty jim Acaya ñaaxjot, chi judíojäy ajcxy midziptzoñ je Pablo, yajnicxy ajcxy ma cötujctac. ¹³ Chi ajcxy nimay je gobernador:

—Jada yëdyjc tzach jäy yaj'ixpijcp co ca' ycopicyity yajcuydunipy Moisés ycötujcin huidi jaybety ijtp.

¹⁴ Pablo capxamb anajty co oy yi Galión nimäy ajcxy je judíojäy:

—Pen yi Pablo ti ytundigooy o mijpocy ti tuñ, huin'it nmijpidägibich miich ajcxy m'ayuc, miich ajcxy judíojäy. ¹⁵ Pen je Cristo y'ayuc etz miich ajcxy mgötujcin myajtzibiiyb myajcapxyiiyb, ca' hich huaad nyajtiyiyich yjiibi huinma'ñ.

¹⁶ Chi je gobernador y'ané'min pidacy co huen judíojäy ajcxy yajpidzimäyii ma je cötujctac. ¹⁷ Huin'it tüg'óciy griegojäy ma je cötujctac huijtzpidziimyb je Sóstenes, yi judíojäy naymujctac huindzin, e chi ajcxy cujy jibijpy huingoxy jipcojxy ma gobernador yhuinduu, e Galión ca' tuñycuenti.

Pablo yhuimbijtni Antioquía, e yajtzondacy midugigpi viaje

¹⁸ Jac-huäcxijp Pablo jecy jim Corinto. Chi yhuinma'ñpidacy co chonaani. Chi ycapxycijxni miid je mibijcpidijc, e chi ybarcotigiiyñi ñicxni jim Siria ñaaxjot. Ñicxni quipxyi miid Priscila etz Aquila. Jim Cencrea, ca'ni anajty ybarcotigiiyi, Pablo yajcöme'px cödza'm co anajty cuyduñ yhuandaacin. ¹⁹ Co ajcxy yja'ty jim Efeso, chi Pablo ñay'ixmajtz ajcxy miid Priscila etz Aquila, e ñicxy ma je judíojäy ajcxy ñaymujctac. Chi miidmiydacy je judíojäy ajcxy huidi jim anajty ti ñayyöymújcigixy. ²⁰ Chi je judíojäy ajcxy jim Efeso cohuaniiy co huen jac-hui'my, e Pablo ca' a'ixiiy co yhui'mipy. ²¹ Chi Pablo ycapxycijxni miid je Efeso jäy, chi yminañ:

—Copicy co jim xii nyajnaxa'ñyich Jerusalén, e nhuimbidipyich jadüg'oc ma miich ajcxy, pen Dios jadu'n tzojcp.

Chi Pablo ybarcotigiiy chooni jim Efeso. ²² Co anajty ti ypättigiy jim Cesarea, Pablo nicxy Jerusalén co anajty capxpocxaangixy je mibijcpidijc, chi mic'amy idaacni jim Antioquía. ²³ Jim hueeni yhuäcxijpy, chi choñ jadüg'oc ñicxy cajp cajp ma Galacia ñaaxjot etz Frigia ñaaxjot jotmicmigapxcixy tüg'óciy yi mibijcpidijc.

Apolos Dios y'ayuc capxhuäcxii jim Efeso

²⁴ Huin'it tiempo yja'ty jim Efeso tög jay huidi anajty yxii Apolos, hue' anajty ycocogájpity Alejandría. Ooy anajty oy ayuc capxhuäcxy. E yajxon nejhuiydäy Dios y'ayuc huidi jaybety ijtp. ²⁵ Apolos ooy anajty ixpicyity ma Huindzin Jesús y'ayuc e ooy yjotmiccapxy, oy anajty yaj'ixpicy nej je Huindzin Jesús yjajty y'ayoy. Oy jëda'ajty anajty janejhuiy nej Juan, je Bautista, jay ajcxy yajniibejty. ²⁶ Chi Apolos ytigiy capxpi miydaacpi ma je judíoJay ajcxy ñaymujctac janch ni ca' chigiy chöyduñ. Chi co Priscila etz Aquila ajcxy midooy Apolos y'ayuc, chi ajcxy yajnicxy ahuingujc, chi ajcxy oy yajmiidmiydägy jac-huadz Dios y'ayuc ytiy'ajt. ²⁷ Chi co Apolos anajty ñicxa'ñ jim Acaya ñaaxjot, chi je mibijcpidijc jotmicmigapxy, e pubejty ajcxy. Chi ajcxy nijayiy je mibijcpidijc huidi ajcxy jim Acaya, huen ajcxy cöbigipy yajxon je Apolos. Co Apolos yja'ty jim Acaya ñaaxjot, chi ypubejti ooy pin anajty mibijcp Jesús y'ayuc, com Dios anajty may'ajt ti tuñ ma je' ajcxy. ²⁸ Chi je Apolos oy capxpídzimiy mayjäy agujc co ca' yjanchity nej anajty ajcxy judíoJay yhuinma'ñ miidity, co Jesús ca' je' yjējity je Cristo. Je Apolos jim je' mic'ajt tzachpaady ma Dios y'ayuc ycojaayity co Jesús je' je' anajty je Cristo huidi anajty ajcxy y'ahuijxyp.

19

Pablo may mibijcpidijc minaybaati jim Efeso

¹ Jim Corinto anajty Apolos, co Pablo tegyi'm yajyöyñajxy mijyuugjot, chi oy yja'ty jim Efeso. Chi jim paty may mibijcpidijc. ² Chi Pablo y'amidooy je mibijcpidijc:

—¿Nej ti xy'adigiy xyjottigiy je Espíritu Santo taab ajcxy mmibijcy Jesús?

Chi ajcxy y'adzohuimbijty:

—Ni ngamidooyñi ich ajcxy pen ji Espíritu Santo.

³ Chi Pablo y'amidooy ajcxy:

—¿Ti niibejtin miich ajcxy mbaad?

Chi je' ajcxy y'adzooy:

—Je Juan, je Bautista, niibejtin.

⁴ Chi Pablo yminañ:

—Juan jay yajniibejt je', je' je' je tiy'ajt co huen jothuimbijtcixy. E nimaaygixy anajty co huen ajcxy mibigipy je Cristo huidi jacmiinamni. Je' je' je Jesús, je Cristo.

⁵ Co jada ajcxy jadu'n midoy, chi ajcxy oy niibety miid je Huindzin Jesús yxii. ⁶ E co Pablo cñixajy ajcxy, huin'it je Espíritu Santo y'adigiy yjottigiy ajcxy. Chi ajcxy ytigiy capxpi miydaacpi tigachyaty ayuc, e capxhuäcxy anajty ajcxy Dios y'ayuc. ⁷ Jëyi anajty nimajmetz yëydijctijc huidibi ajcxy niibejt.

⁸ Tugig po' Pablo jim yhuäcxijpy, e yöydib anajty ma judíoJay ajcxy ñaymujctac capxhuäcxy Dios ytiy'ajt janch huinmic jotmic. Chi capxjotcidägy mayjäy miid Dios ytiy'ajt.

⁹ Nijējity jotjuuñdijc ca' ajcxy ymibijcy, jëyi ajcxy jibic tzachnigapxy Jesús ytiy'ajt ma jay ajcxy yhuinduu. Chi Pablo puyöydúutcxni. Chi abicy yajnicxy je mibijcpidijc ma tög escueltijc. Hue' je' je escuela huindzin anajty yxii Tirano, e jim Pablo Dios y'ayuc anajty capxhuäcxi jabom jabom. ¹⁰ Mejtz jimijt jadu'n jim chachyaj'ixpicy, e tög'óciy jay ma je Asia ñaaxjot ymidoday ajcxy je Huindzin Jesús y'ayuc, je judíoJay etz huidi ca' yjudíoJayity.

¹¹ E Pablo mayba'mjäy yajtzoocy miid Dios ymic'ajt etz ooy mijhuinma'ñ ytuñ. ¹² Ixti yajnicxy anajty ajcxy yhuít etz ypaayi huidi Pablo ñinix anajty ti ypanyi, e yajpaatcixy anajty pa'mjäy, e je' anajty miid choocixy, e nañ je' anajty miid ca'oybi ypidzimiy ma jay ajcxy y'ay yjot.

¹³ Chi nijējity judíoJay huidi anajty huidijtp tzoydumbi, huidibi anajty yajpidzimigixyp ajcxy ca'oybi, jayajtzögaañ tög pa'mjäy miid je Huindzin Jesús yxii co huen yajyöydüdyii je ca'oybi. Chi ajcxy nimaaygixy je ca'oybi:

—Ich miich yam nimaayb miid Jesús yxii, je huidi Pablo ycapxhuäcxp, yajyöydüt jada jay.

¹⁴ Jadu'n anajty y'iditczixy je Esceva ymang ajcxy, je nihuixtujcpi ajcxy. Je Esceva hue' je' anajty judíojäy etz nihuindzin'aty teedy'adi. ¹⁵ Co je Esceva ymang ajcxy migapx je ca'oybi, chi je ca'oybi y'adzooy:

—N'ix'atypich je Jesús, e nnejhuuybich pin je' Pablo, e miich ajcxy, ¿mbin miich ajcxy?

¹⁶ Chi je yëdyjc huidi ca'oybi anajty müid, ytijcpigy tüg ma je' ajcxy, ymimadactay je nihuixtujcpi, e yqueectay ajcxy ma je tijc nihuädz ixhuädz etz tzaachi. ¹⁷ Tüg'óciy jäy ajcxy huidi anajty tzinaayb jim Efeso, judíojäy etz huidi ca' yjudíojäyity nejhuyday ajcxy, chi ooy ajcxy chigiy e nimydaaccixy e cömaaygixy je Huindzin Jesús yxi.

¹⁸ E mayjäy huidi mibijc Jesús y'ayuc ooy ajcxy ypocy nigapxtay, jadu'n nej anajty yi jibic mañ'ajt ajcxy ti mi'ijtcixy. ¹⁹ E mayjäy tiibi anajty capxy je mañ'ajt necy yajminday tüg'óciy e no'ctay je necy ma jäy ajcxy yhuinduu. E co ajcxy maymujcy je libro tzou, chi naybaati jada' huixchigüipx majc mil plata meeñ (moneda mexicana naybaati jacnaxy jahueenjaty ycatüg migo'px jamajmocx tüg mil). ²⁰ E je Huindzin Jesús y'ayuc nigä anajty yhuäcx'idich, nigä ymijtigiy'idich.

²¹ Co anajty jadu'n ti ytuñyii ti yjadyii, chi Pablo yhuinma'ñypidacy co nicxy cogapxihuañ je mibijcpidijc jim Macedonia etz Acaya. Chi anajty yjacnicxañ Jerusalén e jadu'n yminañ co jim chondägañ jadügtecy e ñicxañ jim Roma. ²² Chi quejxy jim Macedonia mejtz je ypubejtpi, Timoteo etz Erasto. Chi Pablo je' yjac-hu'my jecy jim Asia.

Canay'ayuc-huinjihuihuü jim Efeso müd Dios y'ayuc ycixpi

²³ Huin'it tiempo tzip oy pidicni jäy y'ocyumigni y'oc'oxigni müid Huindzin Jesús y'ayuc ycixpi. ²⁴ Co je', je plateri huidi anajty yxi Demetrio, yaj'oyiy anajty ac plata Diana chajptijc'ung, e jadu'n anajty Demetrio etz jacjadyii jäy oy ymeeñybaatcixy müid je ytung. ²⁵ Chi Demetrio huomujcy ymigügtijc je huidi jadu'mbi tung tumb, nimay ajcxy:

—Migügtijc, mnejhuuyb ajcxy co müid jadayaabi tung huidi ich ajt nduunim, jada müid jotcuyc ndzinaayim njugy'ajtim. ²⁶ E miich ajcxy m'ijxpy mnejhuuyb co je Pablo chach yaj'ixpijcy co ca' yi' diosity huidi jäy ajcxy yajcojpy. E Pablo ti ooy mayjäy capxjotcidägy, canan yaayi Efeso, nañ jadu'n ma tüg'óciy Asia naaxjot. ²⁷ Mij jada xyajtigoyaanim ma ich ajt n'adogii e nañ jadu'n je mijpi dios, je Diana, ytigoyipy, ca' ni pin occapxpaatnipy, je huidi cham mayjäy y'ojadajtpy tüg'óciy ya Asia ñaaxjot etz huindu'my naaxhuiñybi.

²⁸ Co jadu'n ajcxy midoy, chi ajcxy ooy yjotmätcooty, chi ytigiy ajcxy huambi jihuiyb, chachminaangixy:

—¡Cömay jada Diana, yi efesiojäy ydiosa!

²⁹ Chi ajcxy yajhuinmänydigoyday je cajp jäy e majch ajcxy je Gayo etz Aristarco, huidi tzoon Macedonia, metz yëdyjc, huidi Pablo anajty ajcxy ymüid huidijtpy. Chi je cajpjäy ooy pahuijch pajugujcy ajcxy je Gayo etz Aristarco, yajnicxy ajcxy ma agujctijc huinduu ma jäy ñaymugyii. ³⁰ Chi Pablo yjatigihuaañ jäy agujc, müdcapxañ müdmidyägañ anajty je mayjäy. E je mibijcpidijc ca' ajcxy a'ixiy nicxy jüby ytigiy. ³¹ Nañ jadu'n nijëjity Asia mijtungmüdpä huidi anajty Pablo müid ñaymigüg'adyii, yajniguejxy ayuc, co ca' huaad ñicxy ma jäy ñaymújcigixy. ³² Je mayjäy tügmucy anajty ijtcixy, ooy anajty yhuaangixy yjihuygixy, ca' anajty ajcxy ñay'ayuc-huinjihuiygixy. E je jacmaaybi ni ca' anajty nejhuiygixy ti co chachnaymújcigixy. ³³ Nijëjity jäy huidibi anajty ajcxy mayjäy agujc, je ajcxy yajmüdmidyactay je Alejandro ti anajty tuunip jajtíp. Chi je judío jäy ajcxy tijpidzimy je Alejandro ma mayjäy agujc. Chi Alejandro címüid tiy'ajt yejcy co huen amongixy. Je' anajty ñigapxtüdamy judíojäy ajcxy. ³⁴ Co je mayjäy nejhuy co je' je' yjudíojäyity, chi ajcxy ytigiy huaambi jihuiybi jahueenjaty ycamejtzhority, yminaangixy:

—¡Cömay ooy yi Diana, yi Efeso jäy ydiosa!

³⁵ Chi je cajp jaaybi co anajty je jäy ti yaj'amoongixy hueeni, chi ajcxy nimay:

—Efeso jäy, tüg'óciy yi naaxhuiñjáy nejhuíy co jada Efeso cajp yi' cuend'ajtp yi Diana chajptijc, je' Diana huídi ooy ti yajcōmay, etz yi Diana ñinicx huídi cá'u tzajpcíxy. ³⁶ Ca' huaad ni pín ymína'ñ co ca' yjánchity. Amongix, ca' ti mdúngixipy pen ca' jayijp yajxon mhuintaaygixy. ³⁷ Com jada yéydijc ajcxy tibi myajmiingixy, ca' ma ytundigooygixy, ca' yi' ma ajcxy jibic capxcixy ma miich ajcxy mdiosa Diana. ³⁸ Pen Demetrio etz huídjaty miid ytuñ pen ymiid xihuín miid pinjaty, paady tungmüdpí etz tiydundac jiiijity. Jébi nigapxy ma tungmüdpí, jébi miñ xyipy ñayñigapxtúutigixy. ³⁹ E pen huingbi ayuc huídi miich ajcxy mbijctzooyb, copity jada y'oyihuipy ma jäy naymugyíi. ⁴⁰ Ymiid jada ayo'n co nicxy nayyajxihuim co jäy cham ñaymihuídidiyíi miid jada ycixpi nej yam ytunyíi yjadyíi e ni ti tiy'ajt ich ajt nganejhuíyím nej nmínaanim pen ji anajty xyaj'amídoohuim miid co jäy cham chachhuaangixy chachjihuuygixy.

⁴¹ Co jadu'n miydactay, chi ycapxycijxy miid je naymujcpidijc.

20

Pablo ñicxy jim Macedonia etz Grecia

¹ Co je cajp jäy ycapxy'ayuc xeemy, chi Pablo huoomujcy je mibijcpidijc, e jaccapxhuijy ajcxy chi ycapxycijxni, chi chooni Efeso ñicxy jim Macedonia ñaaxjot. ² Cajp cajp Pablo oy co'ixiy je mibijcpidijc jaccapxhuijy ajcxy. Chi Pablo yja'ty jim Grecia ñaaxjot. ³ Chi Pablo yhuäcxijpy jim tugüg po'. Jim Grecia Pablo anajty ybarcotigihua'ñ ñicxa'ñ Siria. Co Pablo oy nejhuíy co judíojäy ajcxy ti yajnihuinmayíyíi yaj'oga'ñyíi barcojoty, chi yhuinma'ñybaty co huimbida'ñ tegyi'm, ñaxa'ñ jadüg'oc Macedonia. ⁴ Pablo mayjäy miid ñicxy, miidnicxy je Sópater huídi anajty cogajp Berea, etz Aristarco, etz Segundo huídi anajty cogajp Tesalónica, etz Gayo huídi anajty cogajp Derbe, etz Timoteo, etz nañ jadu'n Tíquico, etz Trófimo huídi tzoón jim Asia ñaaxjot. ⁵ Co jada mibijcpidijc ajcxy ñicxy jayijp, chi ajcxy xy'ahuijxyich jim ma je cajp huídi xii Troas. ⁶ Co xii ñajxtay mína yajcaay je tzajcaagy je huídi ca' miidity levadura, chi ich ajcxy ndzooni jim Filipos barcojoty. Co migoox xii, oy ich ajcxy naybátigixy jim Troas. Jim ich ajcxy yhuäcxijpy huixtujc xii.

Pablo co'ixiy je mibijcpidijc jim Troas

⁷ Domingo xii ajcxy ñayyöymujci je mibijcpidijc chajcaagy ytujc-huäcxaangixy, e Pablo anajty ymigügtijc yjacyaj'ixpijcpy. Je' co anajty com jabom chonaani, paady oy ayuc jacyajyoñ ixti ycuyc-hua'cxchumíy. ⁸ Jiiby anajty canaag lámpara ytíxcy ma ajcxy anajty ti yöymujccixy ma tüg cuarto huídi anajty oy ycixity. ⁹ E tüg yeeg'anäg huídi anajty yxii Eutico, ma ventana aguu anajty y'iñäy. Com Pablo jecy oy yaj'ixpijcy, chi je yeeg'anäg ymäymajtzi, e tugüg ñihuijtzpety anajty ycixity je tijc ma ycäy. Chi ajcxy yajpidigy ögy. ¹⁰ Co Pablo yminajcy, chi ñaygixnajaji amíneenmujcy je yeeg'anäg huídi anajty ti ycäy. Chi Pablo nimay ymigügtijc:

—Ca' mdzigíygy, juugy jada.

¹¹ Chi Pablo jadüg'oc ypejty ma je cuarto cixpi, chi chajcaagy tujc-huäcxy e yajcaay ajcxy, e jadu'n Pablo yjacmiydacy co oy ximíyñ. Chi ycapxycijxni miid je' ajcxy, chi ñicxni. ¹² E je yeeg'anäg huídi anajty ti ycäy, chi ajcxy yajnicxy juugy, e ooy ajcxy yjotcugiy nidüg'óciy.

Choñ ajcxy Troas ñicxcixy Mileto

¹³ Chi ich ajcxy jayijp nicxigy barcojoty jim Asón co anajty jim nyajtzonángixich Pablo, com ti anajty jadu'n miidnayñimáayigixich co je' tegyi'm anajty ñicxa'ñ. ¹⁴ Co ich ajcxy naybaatti jim Asón, chi Pablo ybarcotigíy miid ich ajcxy. Chi ich ajcxy ñicxy jim Mitilene. ¹⁵ Chi ich ajcxy jim ndzoñ, chi com jabom ich ajcxy najxy mihuingon Quío, comaax ich ajcxy nja'ty jim ma barco jättac huídi anajty yxii Samos. Jim Trogilio ich ajcxy nbocxy, com jabom ich ajcxy nja'ty jim Mileto. ¹⁶ Chi Pablo ca' ñicxa'ñ jim Efeso

co ca' yhuäcxiba'ñ jim Asia ñaaxjot, com tzojc anajty yjada'ñ Jerusalén, com jim anajty vajnaxa'ñ Pentecostés xii.

Pablo yajm#dm#yacy je hu#dibi ajcxy ane'mb je m#b#jcp#d#j#

¹⁷ Jim Mileto anajty Pablo, chi capxyñiguejxy hu#di ajcxy nigohuajc'ajtp je m#b#jcp#d#j# hu#di ajcxy jim Efeso. ¹⁸ E co ajcxy miñ, chi Pablo ym#nañ:

—Miich ajcxy mnejhu#y#b#jadu'n nej #ch ti njäy'atyich ma miich ajcxy tüg'ócy je xii je tiempo nej oga'n nja'tyich ya Asia. ¹⁹ Jecy #ch ooy ti n'ityich m#d miich ajcxy, nduñich ma nHu#dzin Jesús ytung m#d yung naxy njot nhuinma'ñich, etz m#d huinn#jotmay, etz ti may ayo'n nyajnaxyich ma yi judío#jäy ajcxy. ²⁰ Ca' ti n'ixmachich je ngapx'ayuc hu#di oyip m#d miich ajcxy yc#xpi. Ti nyaj'ixpic#yich mayjäy'agujc etz tijc tijc. ²¹ Ti ndiy'ajt yecyich ma judío#jäy etz cham ma hu#di ca' yjudío#jäy#ty. Nnimaydaayich co huen jothuimbijtc#xy ma Dios, etz huen m#b#jcc#xy #ch ajt nHu#dzin Jesucristo. ²² Jadachambi nicxpich jim Jerusalén; adzip je Esp#ritu Santo xyquexyich e ni nganejhuiyich ti #ch jim xyjadamy. ²³ Co #ch cajp cajp ma nnicxyich, je Esp#ritu Santo xyajnejhu#y#b#ch co jim Jerusalén jäy ajcxy xypidäga'ñich pujxtigoty etz jim ajcxy xychaachytuna'ñich. ²⁴ Yi jadu'mb# ayuc ca' #ch nduñich cuendi, jada njugy'ajtich ca' ti tzoohu#ty. Jëyi janchtiy co nyajc#x#pyich jada tung jotcu#j, e nguydun#pyich je Hu#dzin Jesús y'ayuc, je ti#bi xyajn#b#cyich jada tung. Ngapxhuäcxibich yi oybi Jesucristo y'ayuc ytiy'ajt jadu'n nej Dios may'ajt ti tuñ m#d jäy ajcxy yc#xpi.

²⁵ E jadachambi nnejhu#y#b#ch co miich ajcxy ma ti ngapxhuäcx#yich Dios y'ayuc, ca' miich ajcxy xy'ocjac'ixc#xni jadügtecy. ²⁶ Paady cham nnimäyich miich ajcxy, ca' ni ti ngo'adzohu#pyich m#d miich ajcxy yc#xpi. ²⁷ Com ti ngapxhuäcx#yich ma miich ajcxy tüg'ócy je Dios y'ayuc je Dios yhuinma'ñ. Ni ti ayuc ni ti ytiy'ajt ti ngacoyüchich ma miich ajcxy. ²⁸ Naycuend'ajtigixy ci'm etz cuend'ajtc#xy tüg'ócy jäy ajcxy hu#di yajm#j'ajtp je Hu#dzin Jesús, jadu'n ajcxy nipaady nej tüg#icy cöbixy, etz miich ajcxy hu#di nigohuajc'ajtp je m#b#jcp#d#j# jadu'n miich ajcxy nipaady nej cöbixy cuend'ajtpi. Je Esp#ritu Santo ti xyajn#b#jcc#xy co mgüend'ad#py ajcxy yi Jesús yjäy, hu#di ti cojuuy ajcxy ypoc#y m#d yci'mni'py co y'o'cy.

²⁹ Chi Pablo yjacm#nañ:

—Nejhu#y#b#ch co ya ndzóon#b#ch miin#p huingb# jäy hu#di yajhuinma'ñy#digoyam m#b#jcp#d#j#, jadu'n nej ahua'n iyujc hu#di cöbixy tzüd#z#p. ³⁰ Ji ma miich ajcxy ji jäy yaj'ixp#gam an# ma yjapadyi yaj'ixp#g#py tiy'ajt oybi jigix yi m#b#jcp#d#j# ypan#cx#y#b. ³¹ Naygüend'ajtigix, mjäymedz#y#b ajcxy jadu'n nej #ch tug#g jimijt ti nyaj'ixpic#yich xim tzuum jabom jabom, m#d huinn#jotmay ti nyaj'ixp#jcc#xy miich ajcxy nidüg nidüg.

³² Jadachambi #ch, nm#g#gt#j#ch ajcxy, Dios miich ajcxy nyajpuhuan#y#b, nyajm#hui'maamyich miich ajcxy Dios y'ayuc jadu'n nej Dios ajt xychojcm xyjihuiy#m. Ma Dios y'ayuc miich ajcxy mbaad#py mic'ajt ma yi m#b#jcin, e mbaad#py ajcxy it lugar ma Dios quipxy# m#d ajcxy nidüg'ócy ti#bi yajhuäch yjot yhuinma'ñ. ³³ Ni ti #ch ti nga'adzoc#y, ni pin yhuit ymeeñ hu#dibi n'oc#j#d#y#b#ch. ³⁴ Miich ajcxy mnejhu#y#b co ti nduñich, m#d ngi'mg#j#ch ci'm ti nnaymöy#j#ch hu#di nyajmayajtpyich etz nañ jadu'n ti nbubetyich nm#g#gt#j#ch hu#di #ch anajty nm#d. ³⁵ #ch miich ajcxy ti nyajni'ix#y#gixy nej jëbi mdungixy, nej jëbi mbubéjtc#xy m#g#gt#j# hu#di pa'm'ijtp, etz hu#di tijaty yajmayajtp. Jäymedz# ajcxy je Hu#dzin Dios y'ayuc co ym#nañ: “Jacjotcu#j je' hu#di yejcp, ca'ydi hu#dibi yajmooyb.”

³⁶ Co jadu'n ycapxtay, chi Pablo ycoxtinay'ahu#y m#d je' ajcxy, e m#b#jctzoy ajcxy Dios. ³⁷ Ytig#y ajcxy yaaxpi nidüg'ócy, e mineeñ ajcxy Pablo etz tzücx#y. ³⁸ Ooy ajcxy jihuiy nej anajty ti ñimäyigixy ajcxy co ca' yjac'ix#y#b ajcxy jadügtecy. Chi ajcxy oy najt#zhuohu#y jim ma barco.

21

Pablo ñicxy jim Jerusalén

¹ Co ñich ajcxy ngapxycijxy mïd je mibijcpidijc, chi ñich ajcxy nbarcotigïy, tïyï ñicxy ñich ajcxy jim Cos. Com jabom ndzooñich Cos ñicxy ñich ajcxy jim Rodas. Chi ñich ajcxy ndzooñ Rodas ñicx ñich ajcxy jim Pátara. ² Jim Pátara ñich ajcxy nbaaty tüg barco huïdi anajty najxp Fenicia ñaaxjot. Jim ñich ajcxy nbarcotigïy jadüg'oc, chi ñich ajcxy nnicxni. ³ Chi ñich ajcxy mmij'ijxy Chipre je naax mejy'agujcpi, anajty'amy je' yhui'my. Jacnicxy ñich ajcxy Siria ñaaxjot, chi je barco ytigïy ma yjättac jim Tiro co jim anajty chimydajc yajhuïma'ñ. ⁴ Jim ñich ajcxy nbaty jäy huïdi anajty yajmij'ajtp Jesús, chi nmïdhuäcxijpich ajcxy huixtujc xï. Je' ajcxy je Espíritu Santo yajnejhuïyï co Pablo ayo'n pada'ñ Jerusalén, paady ajcxy nimay Pablo co ca' huaad jim ñicxy. ⁵ Co huixtujc xïbi yca'pxy, chi ñich ajcxy ndzooni. E tüg'ócïy mibijcpidijc mïd y'ung ytöxyijc oy xytüjijphuohuïyigixyich cajppa'. Jim ma mejypa' ngoxtinay'ahuïy ñich ajcxy, chi ñich ajcxy nmibijctzoy Dios. ⁶ Huin'it ñich ajcxy ngapxycijxni, chi nbarcotigïyñi ñich ajcxy e je mibijcpidijc yhuimbijtni ajcxy ma ytijc.

⁷ Co ñich ajcxy ndzooñ Tiro, chi ñicxy ñich ajcxy Tolemaida. Jim ñich ajcxy ngapxpocxich je huïdi anajty ajcxy mijpidaacp Jesús, e nmïdhuï'my ñich ajcxy jim tüg xï. ⁸ Com jabom ñich ajcxy ndzooñ Tolemaida mïd Pablo etz pinjaty ñich ajcxy anajty nmïd. Chi ñich ajcxy nja'ty jim Cesarea. E chi ñich ajcxy ñicx ma Felipe ytijc, je huïdibi anajty capxhuäcxy Jesucristo ytïy'ajt je oybi. Je' je' huïdi tuun je nihuixtujcpi taabi ajcxy caayin uucin yajhuäcxy jim Jerusalén oga'n. Chi ñich ajcxy nhuï'my mïd je'. ⁹ Felipe mïdaax anajty ñïx mïdity, ca'ni anajty ajcxy ypijccixy. E je' ñïx ajcxy anajty Dios y'ayucnajtzcaxïyipy. ¹⁰ Ti anajty ñich ajcxy jim nhuäcxipy canaag xï co oy yjätty tüg ayucnajtzcaxïybi huïdi anajty yxï Agabo, jim anajty ti chooñ Judea. ¹¹ Chi Agabo y'oy xycogapxïyigixy ma ñich ajcxy njättac. Chi Agabo Pablo yhuïn huijtz'icci, e je' mïd ñaygïxojtz ñaydecyxojtzi, chi ymïnañ:

—Je Espíritu Santo jadu'n mïnamb co jim Jerusalén jadu'n judíojäy ajcxy cïxodza'ñ tecyxodza'ñ jada huïn yhuindzin, e nañ cïyega'ñ ajcxy ma huïdi ca' yjudíojäyity.

¹² Co jadu'n yajmïdoy, ñich ajcxy etz je Cesarea jäy ngohuanïy ñich ajcxy Pablo co ca' huaad ñicxy jim Jerusalén. ¹³ Huin'it Pablo y'adzooy:

—¿Nej co myaaxcixy mïd ñich ycixpi? ¿Nej ñich miich ajcxy co njot nhuinma'ñ xyaj'amutzcïyï? ñich nayyëjcbïch mïd naygïxodzï naydecyxodzï, nañ jëbi n'ögïbïch jim Jerusalén mïd je Huindzin Jesús ycixpi.

¹⁴ Co ca' ñich ajcxy mïmadacy ñicxy nyajhuï'mgixyich Pablo, chi ñich ajcxy n'amooni, chi ñich ajcxy ñayñïmaayï:

—Huen cuyduñ je Huindzin Jesús chojcïn.

¹⁵ Co jadu'n yjajti, chi ñich ajcxy ndzonï ni'ixïy e chi ñich ajcxy ñicxy jim Jerusalén.

¹⁶ Mïd ñicxy ñich ajcxy nijëjity mibijcpidijc huïdi tzoon Cesarea, e nañ tzoon anajty tüg Chipre jäy huïdi anajty yxï Mnasón, jecyïp anajty jijptigïyïyñi jada mibijcïn e je' ñich ajcxy ñicxy xyajjättägaangixy.

Pablo oy cogapxïy Jacobo

¹⁷ Co ñich ajcxy nja'ty jim Jerusalén, chi je mibijcpidijc ñich ajcxy xycöbijcxy janch jotcujc. ¹⁸ Com jabom ñich ajcxy ñicxy mïd Pablo, y'oy ñich ajcxy ngogapxïy Jacobo, e jim anajty tüg'ócïy huïdi nigohuajc'ajtp je mibijcpidijc. ¹⁹ Chi Pablo ymigügtijc capxpocxy, e yajmïdmïydacy ti anajty Dios ti tuñ mïd yï' ma yï jäy ajcxy huïdi ca' yjudíojäyity. ²⁰ Co ajcxy jadu'n mïdooy, chi ajcxy huin'ïy jäymejch yï Dios, chi ajcxy Pablo nimay:

—Migüg Pablo, miich mnejhuïyb co ya canaag mil jäy ti mibicy Jesús, e yjactïmmïna'ñ ajcxy co copicy nguyduunim Moisés ycötujcïn je jecyïp. ²¹ Ti ajcxy yajmïdmïydägyii co miich mdzachjäyayaj'ixpicy ma tüg'ócïy judíojäy huïdi ajcxy jigügy adzïnaayb co ca'

huaad tuñycuenti Moisés ycötújcín je jecyíp, etz ca' ycopicyity co tiy'ajttíygyixipy y'ung, etz ni ca' ycopicyity payöyipy ñich ajt ngostumbre. ²² ¿Ti huaad nduunim? Jotmädám ajcxy co nejhuñhuipy co ya miich ti mjäty. ²³ Hue' janchtiy jadu'n miich mdunipy: cha mídaax yëydijc huidi cuydunamy tüg huandaacin. ²⁴ Míidnicxy je' ajcxy, nicx nayyajpocyñihuaatzi míd yí' ajcxy, e miich mgojuydayipy nej anajty ajcxy ypanyi je meeñyduní. E chi ajcxy myajcöme'pxipy cödza'm, e jadu'n je jäy ajcxy huinjihuñydähuipy co ca' yjanchity jadu'n nej xyñimiydaaccixy, jëyi co miich nañ jadu'n mguydun je Moisés ycötújcín je jecyíp. ²⁵ Huidibi janchtiy jadu'n nej yí' huídibi ajcxy ca' yjudíojäyity, e ti mijpídaaccixy Jesús, ti ñich yí' ajcxy nijayíygyixich co ca' túngixipy cuenti jada jadu'mbi judíojäy ycostumbre. Je' janchtiy co ca' huaad tzützcixipy je tiibi jäy yajhuindzigíy ídolos, ni ca' huaad jícxcixipy ni'py, etz ni ca' ajcxy tzüdzipy huidi yo'c-huúdy ti y'ögy, etz ca' ajcxy huingbi töxyjäy migapxtigóoygyixipy.

Chi ajcxy majch je Pablo ma Dios ytjic

²⁶ Chi Pablo míd nicxy je nimídaaxpi yëydijc, com jabom ajcxy nayyajpocyñihuaatzi ajcxy, chi ajcxy ytigíy ma Dios ytjic, e chi ajcxy ytíy'ajt yejcy ma judío teedy ti xí ycíxa'ñ je nayyajpocyñihuaadzi, etz ti xí huindzigi'ñ iyujc cýyegaangixy nidüg nidüg.

²⁷ Ma anajty yca'pxaani je mihuixtujcxiibi nijëjity judíojäy, choon jim Asia, chi ajcxy ijxy Pablo ma Dios ytjic. Huin'it ajcxy je mayjäy majch Pablo, yajhuangoty yajjihuygoty, ²⁸ chi ajcxy yam chachmínaangixy:

—¡Israel jäy ajcxy, pubejtcich ñich ajcxy! Jada je' je yëydijc huidi xi ya tzach nigapxp ni'oñiyb judíojäy ycostumbre, Moisés ycötújcín, etz nDios ytjic. E jadüg nax ti yajtigíygyixy griegojäy ma Dios ytjic, yajjibicíygyixy jada it lugar huätzpi. (Com ca' ñigödúcyity nicxy griegojäy ytigíy ma Dios ytjic.)

²⁹ Paady anajty jadu'n ymínaangixy je huidi ajcxy majtz je Pablo, com co ijxy ajcxy Pablo mídhuidity cajpjoty je Trófimo, huidi anajty cogajp Efeso. Hue' anajty tijcixy co Pablo ti mídtigíy Trófimo tzajtigoty.

³⁰ Tüg'ócíy je cajpjäy yjotmätcottay, miiñ ajcxy poyígy majch ajcxy je Pablo yajpídzimy tzajtigoty pahujch pajugujcy. Chi ajcxy mic'amy agíy Dios ytjic. ³¹ Yaj'ögamyb anajty ajcxy Pablo. Chi je soldado huindzín ayuc mídoy co tüg'ócíy je cajp jäy ajcxy ti chachhuaangixy chachjihuygyixy. ³² Je soldado huindzín huodzonday ysoldado ajcxy, e chi ajcxy ñicxy poyígy ma je mayjäy yhuaangixy yjihuygyixy. Co je mayjäy ajcxy ijxy miñ soldado ajcxy míd yhuindzín, chi ajcxy ixmajch Pablo ca' ocjaccójxcíxni. ³³ Co je soldado huindzín jim ja'ty, chi yajmajtzi je Pablo, ni'anëmdiy co huen cíxochyíi míd mejtz cadena. Chi yajtiy pin je' anajty, e ti ti tuñ. ³⁴ Chi je mayjäy ajcxy ytigíy huaambi jihuybi, e jadu'n je soldado huindzín ca' ni nej huinjihuñy míd je ne'mbi. Chi ni'ane'mdiy co huen Pablo yajnicxyíi ma cuartel. ³⁵ Co jim ya'ty ma cuartel pedíydac, chi je soldado ajcxy cýígy Pablo, co anajty je mayjäy chachjottigoyñájxcixy tzachyaj'ögaangixy anajty Pablo. ³⁶ Tüg'ócíy je mayjäy pamiingixy axam je soldado ajcxy, yam chachmínaangixy:

—¡Huen ögy!

Pablo ñaygohuaani ma je mayjäy

³⁷ Co anajty yajtigíhua'ñyíi cuartel tigoty, chi Pablo migapxy je soldado huindzín míd griego ayuc, ymínañ:

—¿Nej jëbi ii nmídmíydägy tüg'aa metz'aaji?

Chi je soldado huindzín y'adzooy:

—¿Nej majtpy miich griego y'ayuc? ³⁸ ¿Nej ca' jada' miich jëjity je egipcio jäy huidi namni tzip yajpídicp, e huobídzimy mídaax mil jäy yaj'öcpí, míd nicxy ajcxy jim mijtigíduum?

³⁹ Chi Pablo nimay je soldado huindzín:

—Ich judíojäy ïch, jim ngogájpídyich Tarso, tüg mijcajp huídi yajpatpi jim Cilicia ñaaxjot. Tun may'ajt miñ mayjäy n'ocmigapxich.

⁴⁰ Co je soldado huindzin a'ixiïy, chi Pablo ytinay'ahuïy ma je cuartel pediydac, e cïmïd ytiy'ajt yecy co huen amoongixy. Co je mayjäy ajcxy y'amonday, chi migapxcoty mïd hebreo ayuc ymïnañ:

22

¹ —Migügtijc etz mij'anäctijc, midoogixy jadu'n nej ïch yam nnayñigapxtüdyii.

² Co je mayjäy ajcxy midoy co ymigápxigixy mïd hebreo y'ayuc, chi ajcxy y'amonday, chi Pablo ymïnañ:

³ —Judíojäy ïch. Jim Tarso nma'xung'ajtyich, Cilicia ñaaxjot. E ya Jerusalén ti nyeegyich. Ixpíjcich ya ma Gamaliel, etz yajxon Gamaliel ti xyaj'ixpíjcyich ajt nmij'ap nmijteedy ytiy'ajt etz ycötújcïn. Njatyim nyajmij'ajtpyich Dios jadu'n nej miich ajcxy Dios myajmij'ajtcixy cham. ⁴ Jecy ti n'ixhuidity ti nbahuidityich je jäy ajcxy huídi anajty mijpidaacp Jesús y'ayuc, nyaj'öctähuaamyich anajty, e nyajnicxpyich anajty mach yëdyictijc etz töxyjäydijc, nbidägyich anajty ajcxy pujxtigoty. ⁵ Je teedy mijtungmïdipi etz tüg'óciy mij'anäctijc ymïd tiy'ajt, co ïch ajcxy xymooyich cötujcïn, e nnicxyich anajty jim Damasco ma nmigügtijcich yi judío jäy ajcxy. N'ixtäyich anajty je jäy ajcxy huídi Jesús y'ayuc mijpidaacp, madza'ñich anajty ajcxy, e nyajmiina'ñich anajty ajcxy ya Jerusalén huen yajtzaachytunggixy.

Pablo nimïydacy nej yjothuimbijty

⁶ Co ïch anajty ndüyöyich mihuingon Damasco, cujc yxï anajty, chi janch timitiini ytiicxïgy jühuidity jadu'n nej jin ma ïch, hue' anajty choon tzajpjoty. ⁷ Chi jim ngidaayich, huin'it nmidooyich tüg ayuc xyñimäyich: “Saulo, Saulo, ¿ti co xy-pahuidijttägyich?” ⁸ Huin'it n'amidooyich: “¿Mbin miich, Huindzin?” Chi xy'adzooyich: “Ïch je' je Jesús je huídi cogajp jim Nazaret, je huídi miich mdzachpahuidijttacpy.” ⁹ Pinjaty ïch anajty nmïd y'ijx je' ajcxy je tiicxin, chi ajcxy ooy chigïy, e ca' ajcxy huinjihuïy je ayuc huídi anajty nmigapxyiïjich. ¹⁰ Huin'it nnimaayich: “¿Ti jëbi nduñich, Huindzin?” Chi je Huindzin Jesús xy'adzooyich: “Pidïg e yajyöy mdu', nicxy jim Damasco, jim myajnimähuïyb tüg'óciy ti jëbi mduñ.” ¹¹ Je tiicxin hue' je' xy'ixmajchich huiintz. E chi je nmigügtijcich xyhuitzoonich ajcxy cïgixy, xyajja'tyich ajcxy jim Damasco.

¹² Jim Damasco anajty chinäy tüg yëdyic huídi anajty yxï Ananías, je huídi anajty ooy cuyduñ Moisés ycötújcïn je jécyp. E judíojäy ajcxy huídi jim tzinaayb ooy cömaaygixy co ooy y'oyjäyity. ¹³ Chi Ananías ymïñ ma njättaacich, e ytinay'ihuïy ma ïch nmijc, chi xyñimaayich: “Migüg Saulo, ixxïgich jadüg'oc huinjemy.” Tim huin'itïy n'ixxïgyich. ¹⁴ Chi Ananías xyñimaayich: “Je Dios huídi ajt nmij'ap nmijteedy ojadajt, je' ti xyhuin'ixy jigix mnejhuïhuïpy Dios yhuinma'ñ, etz m'ixipy je tudäcypï jäy, e mmidohuïpy yci'm ayuc huídi ycapxpy. ¹⁵ Dios ti xyhuin'ixy jigix nicxy mdiy'ajt yecy ma tüg'óciy naaxhuiñyjäy, etz mnimïydägyipy nej ti m'ixy ti mmidooy. ¹⁶ Jadachambi, ¿nej co mhüäcxipy? Pidïg etz niïbet. Mibijctzou Dios jigix mbocy ñihuädziipy.”

Pablo nimïydacy nej oy yajquexy ma je huídibi anajty ajcxy ca'p yjudíojäyity

¹⁷ Co nicxnich jadüg'oc Jerusalén, chi nnicxich ma Dios ytiïc, oy Dios nmibijctzooyich. Chi ïch jilby tzajtigoty n'ixmañyïyich. ¹⁸ N'ijxyich je Huindzin Jesús e xyñimaayich: “Pidzim ya Jerusalén mic'amy, ca' je Jerusalén jäy ajcxy cöbigipy miich m'ayuc jadu'n nej xyñigapxa'ñich.” ¹⁹ Huin'it n'adzooyich: “Huindzin Jesús, yi jäy ajcxy ñejhuïyb co ïch anajty nnicxich huen huídi judíojäy naymujctac n'ixtäyich yi jäy ajcxy huídi miich m'ayuc xymibijcip, ti nbidägyich anajty ajcxy pujxtigoty, ooy ïch ajcxy yi' ti ndzaachytuñ ti nga'oyduuñich. ²⁰ Co ajcxy yaj'ögy je Esteban, miich mdumbi, huídi miich m'ayuc xycapxhuäcxip, jim ïch anajty nañ jadu'n yajpaady. E ooy njäygidacyich co ajcxy

yaj'o'cy, ixti ngüend'ajtich je' ajcxy yjocxhuit huidi Esteban yaj'o'c.” ²¹ Chi ñich nHuindzin Jesús xyñimay: “Cham ñich miich nguexy jiguëgy it ma yi jäy ajcxy huidi ca' yjudíojäyity.”

Pablo, ma je comandante yci'am

²² E yabaad je mayjäy y'amido'ijty Pablo y'ayuc, chi ytigüy ajcxy huambi jihuüybi chachminaangixy:

—¡Huen öc yijibi yëydijc! ¡Ca' huaad yjactzinäy!

²³ Yam yhuaangixy yjihuüygixy, yam yjocxhuit tzachjengixy, etz naaxhuaay tzachyujc-huüjcixy. ²⁴ Chi je soldado huindzin ni'ane'mdüy co huen Pablo yajnicxyii cuartel tigoty, e ni'ane'mdüy co huen ci'adyii jigix nigapxip ti ti tuñ co je jäy ti ymibidügyii. ²⁵ Ti anajty ajcxy cïxojtcixy, e chi anajty ajcxy tzaachytunaangixy co Pablo nimay je capitán huidi anajty huinduy:

—¿Ti cötújcin miich ajcxy müd co mdzaachytuna'ñ tüg romanojäy, ni ca' ajcxy jayijp mdüyduñ?

²⁶ Co jadu'n müdooy je capitán, chi ñicxy oy yajnimäy je comandante:

—Ixcim nej mduñ yi jäy, com hue' yi' romanojäy.

²⁷ Huin'it je comandante ymijhuägy ma je Pablo, chi y'amidooy:

—¿Nej janch co miich mromanojäyity?

Chi Pablo y'adzooy:

—Janch.

²⁸ Huin'it je comandante nimay Pablo:

—Meeñygyxy ñich jada nbaaty co naydijyijich romanojäy.

E chi Pablo y'adzooy:

—Ñich ti nmübi'c'ajtich yi'.

²⁹ Müd jëyi, je huidibi anajty ajcxy ci'adam je Pablo, chi puyöyduútcixni. Nañ jadu'n je comandante ooy ñay'adzigiyyi, müd co cïxojch Pablo müd cadena.

Pablo ma je judíojäy ajcxy yjuntitungixy

³⁰ Com jabom je comandante co anajty nejhuühua'ñ ti ycixpi co ti yxüyii je Pablo yi judíojäy, huen yajminagyii cadena ma Pablo yci'. Chi ane'my co yajhuomujci je teedy tungmüdpí etz je judío mij'anäctijc. Huin'it je comandante yajnicxy Pablo ma je huindzindijc etz ixpiçytijc anajty ti ñaymüjciçixy.

23

¹ Huin'it Pablo yaj'ijxpejty je mayjäy huidi anajty ti nyyöymüjciçixy, e chi ajcxy nimay:
—Migügtijc, Dios y'ijxpy ñejhuüyb nej ñich ti nduñ maabi nyeecpidzimyich, tudägy n'ityich ixti chambaadni.

² Huin'it je Ananías, je teedy mijtungmüdpí, ni'ane'mdüy Pablo co huen yaj'accojxügy.

³ Chi Pablo ymíañ:

—¡Dios xychaachtunipy miich huidibi mnaybidaacip nej jihuüy ooy mdudägyjäyity, e ca' yjanchity! Paady miich m'ñäy ma cötujctac jigix nyajtüydunipyich nej je ley y'ane'my. Chi mmidundigooy je ley co ti xyajcojxyijich.

⁴ Je jäy ajcxy huidi anajty jim míañ:

—¿Jadu'n miich mmigapxtigoy yi Dios ymijtungmüdpí?

⁵ Chi Pablo ymíañ:

—Migügtijc, ñich ca' anajty nejhuüyich, pen yi' je' Dios ymijtungmüdpí. Com jaybety jadu'n ma Dios ñecy: “Ca' huaad jibic mnigapxipy huidi tungmüdpí itp ma miich mjäy.”

⁶ Huin'it Pablo ijxy nejhuüy co jim junti'joty mejtzpicy ixpiçytijc anajty jim, jim huidi saduceo y'ixpiçin ymijpidacp etz nañ jadu'n jim huidi fariseo y'ixpiçin ymijpidacp, chi Pablo ymíañ mic:

—Migügtjicich, fariseojäy ñich, nañ jadu'n ndeedyich fariseojäy je'. Cham nyajtiyduñich miid jëgixpi co nmibicyich co Dios yajjugypigipy jäy tñibi y'öccixy.

⁷ Co Pablo jadu'n yminanday, chi fariseojäy etz saduceojäy miñ xyipy ajcxy ca' ñay'ayuc-huinjihuñyi. Chi je naymujcpidijc ajcxy ñaybijc-huäcxi. ⁸ Je' co je saduceojäy yminaangixy co o'cpi ca' yjugypigipy, ni ca' ji ángel ajcxy, nañ ca' jäy y'alma, nañ ca' ji je Espíritu Santo, etz ni ca' ji mujcu' ajcxy. Je fariseojäy ymibijcpi je' ajcxy co yjiijity ángel ajcxy, co öcpi jugypigaangixy, co je Espíritu Santo yjiijity, co jäy ajcxy miidity y'alma, etz co mujcu' ajcxy yjiijity. ⁹ Tüg'óciy jäy ajcxy ma je naymujctac ytiñiy huambi jihuñybi. Chi nijëjity fariseojäy huidi nihuindzin'ajtpy je Moisés ycötújcín ñigapxtuty Pablo yminañ:

—Jadayaabi jäy ca' ti pocy ti tuñ. Ca' yjecyity ti jada' ymígapxyii tüg espíritu o tüg ángel.

¹⁰ Chi je mayjäy anajty ooy mic ti ñayyajjot'ambijcigixy. Je soldado huindzin tzigiiyb anajty co Pablo y'ahuoonñihuñyb y'agidziñhuñyb, paady ni'ane'mdiy huen yi soldado ajcxy yajpidzimigixy juntijoty e yajnicxcixipy yi Pablo jadüg'oc ma cuartel.

¹¹ Huin'it coodz ñayguëxici je Huindzin Jesús ma Pablo ymijc, nimaayi:

—Jotmicpic Pablo, com jadu'n nej ya Jerusalén ti xyñigodiy'ajt'átyich, nañ jadu'n xyñigodiy'ajt'adipyich jim Roma.

Ixtaaygixy huinmañ nej huaad Pablo yaj'öccixy

¹² Com jabom nijëjity judíojäy ñaygapxi co yaj'ögaangixy Pablo. E chi ajcxy capxycödujcy ñay'ñbojci ñaygapxpojci co ca' ycayaangixy y'ügaangixy ixti cooni ajcxy yaj'öccixipy Pablo.

¹³ Nihuixchiguipx naxy anajty yëydijctijc huidi ajcxy jadu'n naygapxi. ¹⁴ Chi ajcxy ninicxy je teedy ajcxy huidibi mijtungmiid etz judío mij'anäctijc, nimay ajcxy:

—Ñich ajcxy ti ngapxycödujccixy co ca' ngayáangixyich n'ügaangixyich ixti cooni ñich ajcxy nyaj'öcip Pablo. ¹⁵ Jadachambi miich ajcxy, etz jacjadyii ixpiyctijc mij'anäctijc nidungiygixy ma je soldado huindzin, co huen jabom yajminyii Pablo jadügtecy ma miich ajcxy. E aanñdaaccixy co jacyajxon yajtiydunañ, e ni'ixi ñich ajcxy anajty n'ijtcixy co Pablo nyaj'ögibich ca'ni anajty yjäty ma naymujctac.

¹⁶ Pablo chi' ymang nejhuñy nej je' anajty ti ñaygápxigixy, chi ñicxy ma cuartel oy Pablo yajnimäy. ¹⁷ Huin'it Pablo yaaxi tüg soldado huindzin, e chi nimay:

—Yajnicx jada yeeg'anäg ma je comandante, ymiid yi' ayuc ti nigapxaamy.

¹⁸ Chi je soldado huindzin yajnicxy je yeeg'anäg ma je comandante, e chi nimay:

—Pablo, je machyjäy, ti xyaaxyich, ti xyñimäyich co nmídmínipyich jada yeeg'anäg, ymiid yi' ayuc huidi ñigapxaamy ma miich.

¹⁹ Chi je comandante majch je yeeg'anäg ma yci', e yajnicxy abicy, chi yaj'amidooy:

—¿Ti xyajnimähuaamyich?

²⁰ Chi je yeeg'anäg yminañ:

—Yi judíojäy ajcxy ti ñaygápxigixy co xyñimähuaangixy co jabom Pablo myajnicxipy jim ma ñayyöymugáangixy, y'aanñdägaangixy co jacyajxon tiydunaangixy. ²¹ Ca' miich yi' mmibigipy; com nihuixchiguipx naxy yëydijctijc jim yi' ajcxy ahuixy yüch. Ti capxycödujccixy co ca' ajcxy ycayañ y'ügañ ixti cooni ajcxy yaj'ögipy je Pablo. Jadachambi ni'ixi jim y'ijtcixy, jëyi miich m'ayuc ajcxy xyjamídohuaani, pen mni'adzooyb.

²² Chi je comandante ycapxycijxy miid je yeeg'anäg. Chi nimay co ca' huaad ymiydägy miid jacpinjaty jadu'n nej anajty ti ymiydaaccixy.

Yajnicxy ajcxy Pablo ma je gobernador Félix

²³ Chi je comandante yaaxi metz capitán moy cötújcín huen nayñi'ixiiyigixy nimejtzmigo'px soldado huidi nicxip tegyi'm, etz tugi'pxmajc huidi nicxip cohuaaygixy, etz mejtz migo'px quipyjipxu'ñmiidpi, huen nicxcixy jim Cesarea mijcoodz. ²⁴ Nañ ni'ane'mdiy co huen cohuañ ni'ixi pidägyii huidi Pablo yaj'iñahuipy, e moy cötújcín co

huen oy yajxon ajcxy Pablo yajjadipy ma je gobernador Félix. ²⁵ Chi yajmiguejxy tüg necy yjaayity jadu'n:

²⁶ “Ich comandante, Claudio Lisias, cham nguejxyich jada necy ma miich, mijpi gobernador Félix, e nguejxpyich capxpoocxin. ²⁷ Je judíojäy ajcxy ti anajty majtcixy jada yaabi yeydijc, yaj'ögamy anajty ajcxy co ich oy nejhuüy co je' yromanojäyity, chi nninixich müd soldadtijc etz nnihuaañich. ²⁸ Co ich ooy anajty nejhuühua'ñich ti anajty co ti xigixy, chi nyajnicxich ma anajty ajcxy tungmüdpí etz mij'anäctijc ti ñayyöymújcigixy. ²⁹ Hue' anajty yí' ycixpi ti yajxiy co anajty ti ytundigooy ma yí' ajcxy ycötújcín. Ca' anajty ytiy'ájtity co yaj'öccixipy, e ni ca' huaad ymach'íñäy. ³⁰ Co ich oy nejhuüy co yí' judíojäy anajty ti nihuinmayiygixy co yaj'ögaangixy, cham ich miich yí' nyajnigüexy. E ti ich nañ jadu'n nimay huídi ti yxiyíi huen nixcixy ma miich, e jébi ajcxy jim nigapxy ti ycixpi co midzip'ajtcixy. Ji naybaatim.”

³¹ Je soldadtijc nej anajty ti ycötújcín möyíi tim huin'ítity müd tzoón je Pablo mijcoodz ixti yajja'ty ajcxy Antípatris. ³² Je soldadtijc huídi ajcxy tegyí'm nixcp, com jabom huimbíjtcixni, chi yjá'tcixni ma cuartel. E je soldadtijc cohuaygixpi jacnicxy je' ajcxy müd Pablo. ³³ Co je' ajcxy yja'ty jim Cesarea, chi ajcxy je gobernador necy yajcídigiíy, chi ajcxy nañ jadu'n yajquëxigy je Pablo ma je' yhuinduu. ³⁴ Co ñecy capxtay, chi je gobernador y'amidooy Pablo ma anajty yconaaxity. Co nejhuüy co yCiliciajäyity, ³⁵ chi nimay:

—Jiini nejhuühubich je tiy'ajt co anajty miingixy huídi ti xyxigixy.
Huin'it ni'ane'mdíy co huen cuend'adyii ma je Herodes ymíjtijc.

24

Pablo ñaygohua'ñyíi ma je gobernador Félix yhuinduu

¹ Co migoox xii Ananías je teedy ajcxy ymíjtungmüdpí yja'ty jim Cesarea müd judío mij'anäctijc ajcxy etz müd tüg huingapxpí huídi anajty yxii Tértulo, chi ajcxy ñayguëxíci ma gobernador co xihuaangixy Pablo. ² Co ajcxy Pablo yajmiñ, chi Tértulo ytigíy xibi, nimay Félix:

—Müd miich ycixpi jotcuyc je naaxcajp y'íjty, ca' ma tzip, je' co yajxon m'ane'mdäy müd oyhuinma'ñ. ³ Tüg'óciy ich ajcxy njäygidacpyich hueñyima'ámyity, miich mijtungmüdpí Félix. ⁴ Ca'ydi mdiempo nyajtigooyí mij, tun may'ajt amido'íjtigich n'ayuc tüg jaxigyí. ⁵ Com ti nnejhuüyigixich co jada Pablo, ooy ayo'n yecy hueñytimma'ámyity. Xi ya judíojäy tzach pijc-huäcxy müd y'ayuc huídi ymüd. Yí' je' nigohuajc'ajtp tüg pícy jäy huídi jäy ytiipy Nazaret jäy. ⁶ Com tundigoy ma ich ajcxy nDios ytijc nej ca' ypadyii, chi ich ajcxy nmajch, e chi ich ajcxy njatydunaañich jadu'n nej ich ajcxy ngötújcín y'ane'my. ⁷ Per je comandante Lisias je' yajtigiyíy mictägy, chi ich ajcxy xypíci jada Pablo. ⁸ E Lisias ymínañ co pinjaty anajty ti yxiyíi huen miíñ ma miich. Miich cí'm jébi myajtiy, e mnejhuühup tüg'óciy je tiy'ajt jadu'n nej ich ajcxy yí' ti nxíy.

⁹ E je judíojäy ajcxy huídi anajty jim gobernador yhuinduu, ac jadu'n ajcxy ymínaangixy co yjanchity jadu'n nej Tértulo ymínañ. ¹⁰ Huin'it je gobernador tiy'ajt moy Pablo cí'müd co huen capxy, chi Pablo ymínañ:

—Janch jotcuyc jébi nayñigapxtüdyíjich ma miich Félix, com nejhuüyibich co miich mijtungmüd ma jada naaxcajp cham xii jimíjt ñicxni. ¹¹ Miich cí'm jéb mnejhuüy je tiy'ajt, jéyí anajty ñimajcmetzxíjy maabi anajty nbättigíyich jim Jerusalén Dios ojadajtpí. ¹² Ca' ich yí' ajcxy xypaty ndzipcapxy n'ahua'ngapxyich müd pinjaty. E ni ich ngajäy'axiigíy ngajäy'agapxiy ma Dios ytijc, etz ni ma naymujctac etz ni ma Jerusaléncajp. ¹³ Jada jäy ajcxy ca' ajcxy müdity pinjaty tiy'ajt yegipy nej ich yí' ajcxy yxiy. ¹⁴ Huídi janch ngapxypídzímybich ma miich jadu'n nej je tzínaayín, je jemybí xpijcín huídibi yí' ajcxy ytiipy ca' y'óyity, je' je' je' xpijcín huídi ich müd n'ojadajtpích Dios, je Dios huídi ich ajcxy

nmij'ap nmijteedy y'ojadajt. Nmibijcpiych tüg'óciy jadu'n nej yjaybetyity ma Moisés ñecy, etz je Dios y'ayucnajtzcaxiibi ñecy. ¹⁵ Nañ nmibijcpiych co Dios yajjugypigipy pinjaty ti y'ögy, tibi oybi tuñ etz tibi jibicpi tuñ. ¹⁶ Paady ycixpi naymijottigoyiijich co njothuinma'ñich huädz ooy nmüid'idipyich ma Dios etz ma jäy.

¹⁷ Canaag jimijt ich anajty ti nhuidityich huingduum, chi nhuimbijtyich ma ich ngajp limosna cuejtp etz nhuindzigihua'ñich anajty Dios. ¹⁸ Jadu'n ich anajty nduñ co nijëjity judíojäy xypatyich ma Dios ytijc huidi anajty tzoomb Asia ñaaxjot. Ti anajty naybocyñihuächyijich, ti anajty nguyduñich costumbre, ca' anajty mayjäy pin yhua'ñ yjihuiy. ¹⁹ Je jäy ajcxy huidi xy'ijxyich ma Dios ytijc, je' ajcxy ixypity ti ymiingixy ya tiy'ajt yejcp. ²⁰ Co ca' ajcxy ti miiñ, huen jada jäy ajcxy huidi ya nigapxcixy pen ypaat ajcxy nbocyich je taabi ajcxy xytidyduñich ma judío jäy tungmüdpi etz huinmij'anäctijc ajcxy ñaymujci. ²¹ Jëyi co ich mic ngapxyich juntijoty, chi nminaañich: “Xytidydumbich miich ajcxy cham müid co nmibicyich co Dios yajjugypigipy pinjaty ti y'o'cy.”

²² Co Félix jadu'n midodaay, com ñejhuiydaayb anajty nej tüyöy je mibijcpidijc y'ayuc yhuinma'ñ, chi capxhui'my je ayuc, nimay ajcxy:

—Co anajty miiñ je comandante Lisias, huin'it njacnejhuiydähuibich nyajtydigihuibich miich ajcxy m'ayuc.

²³ Huin'it Félix ane'mdüy je capitán co huen yajcuend'aty yi Pablo, e huen a'ixihuij co pidzim tibiñ tibäy e pen ji ymigügtijc miiñ co'ixihuañyii, huen möyii huidi yajmayjajtpy.

²⁴ Ti anajty xii ñajtninixiyyi co Félix jadüg'oc miiñ müid ytöxyijc Drusila. Je Drusila judíojäy je' anajty. Chi Félix capxyñiguejxy Pablo huen miiñ müidmüydägyii nej jäy mibicy Jesucristo. ²⁵ E co Pablo yajnimay je tiy'ajt nej Dios tzocy co huen jäy tudägy tzinäy, etz yajnimay jadu'n nej Dios jiini jäy tiyduna'ñ tüg'óciy, chi Félix ñay'adzigiiyi, ymínañ:

—Nícx miich jadachambi, co ich anajty xyñibadüyigixy huin'it nícxny nyajhuooyii.

²⁶ Nañ jadu'n Félix y'ahuijxpy anajty mina Pablo y'ocmeeñmöyii, e huin'it anajty najtzmazdihua'ñ. Paady anajty janam jadojcx nícxny yajhuoyii, e müid müydägy anajty.

²⁷ Mejtz jimijt jadu'n yjajty, huin'it Félix ygobernadorbidzimy. Chi Porcio Festo ygobernador tigiiy ma Félix anajty ytuñ. Co Félix anajty nayyajhui'mañyii ooy müid je judíojäy ajcxy, paady ixmajch Pablo mach.

25

Pablo ma Festo yhuinduu

¹ Jadu'n yjajty co Festo anajty ti ygobernador tigiiy, chi codugüj xii choñ Cesarea, ypättigiiy Jerusalén. ² E jim Jerusalén je teedy mijtungmüdpi etz nijëjity huinmij'anäctijc jactimxiiy Pablo ma Festo. ³ Chi ajcxy may'ajt pijctzoy ma je gobernador Festo co huen quexy Pablo jim Jerusalén. Hue' anajty ti huinmaaygixy co yaj'ögaangixy tü'am. ⁴ Chi Festo y'adzooy co Pablo cuend'aty anajty y'ity Cesarea, e je' anajty nícxañ janch tim tzojcx jim. ⁵ Chi ajcxy nimay:

—Jëbi nijëjity miich ajcxy mdungmüdpidijc etz huinmij'anäctijc quipxy nícxibich müid ich. Pen ti je Pablo ytundigooy jëbi miich ajcxy mxiiy jim Cesarea.

⁶ Festo jëyi jim y'ijty tuctujc xii taxtujc xii Jerusalén, chi yhuimbijtni Cesarea. Com jabom nícxny ma tiydundac, huin'it capxyñiguejxy Pablo co huen yajminyii. ⁷ Co Pablo ytigiiy ma tiydundac, chi mic'amy je judíojäy ajcxy yjübigiydäy huidi anajty ti choongixy jim Jerusalén. Chi ajcxy oxyii Pablo co mij anajty ti ytundigoy. E ca' ni ti tiy'ajt ajcxy miguëxigy. ⁸ Chi Pablo ñaygogapxi ymínañ:

—Ich ca' ni ti ndundigooyich, ni ngamidundigooyich yi judío jäy ycötújcín, etz ni ngamidundigooyich Dios ytijc, etz ni ngamidundigooyich je mij'ane'mbi jim Roma.

⁹ Co Festo anajty jatytimayajcömaya'ñ ma judíojäy ajcxy, chi y'amidooy Pablo:

—¿Nej mñicxam jim Jerusalén, jigix jim ndiydunípiy?

¹⁰ Chi Pablo y'adzooy:

—Cha ñich cham ma je cõtujctac huïdi je romano codung y'ane'myb e ma jëbi yajtiyduñich. Yajxon miich mnejhuïy co ca' ti ti ndundigooyich ma yi judíojaý ajcxy.

¹¹ Pen ti ndundigooyich huïdi jëbi co'ögïyich, ca' nminá'nibich co ñich ca' n'oga'ñ. Pen ca' ji ni ti tiy'ajt jadu'n nej yi' ajcxy ti xyxïyich, ni pin cõtújcïn camiidity nicxy xycïyecyich ma yi' ajcxy. ñich nbijctzoy co nyajtiyduñich ma César, je emperador, jim Roma.

¹² Co Festo capxyöyday müid ymidungmüidpi, chi nimay Pablo:

—Pen miich jadu'n minamb co jim nicxy myajtiyduna'ñ ma je César ycõtujctac, nguexipyich miich jim. Miich ti mbijctzoy co je emperador xytiyduna'ñ. Pis jim mnicxipy miich.

Pablo ma je rey Agripa yhuinduu

¹³ Chi yi xii tiempo ñajtninixiiyñi co je rey Agripa etz Berenice ycidacy Cesarea, co gapxihua'ñ anajty Festo. ¹⁴ Co ajcxy jim yhuäcxijpy canaag xii, chi Festo yajmüidmüydacy je rey Agripa je Pablo ayo'n, e nimay:

—Ji tüg yëydijc huïdi Félix y'ixmajtz mach. ¹⁵ Co n'oyich jim Jerusalén, chi je teedy mijtungmüidpi etz judío mij'anäctijc xymixïyich, nibijctzohuïy co Pablo nyaj'ögibich.

¹⁶ Chi n'adzooyich co romanojaý ca' cõtújcïn jadu'n müidity nicxy yaj'ögy yi machyjäy ma ca'ni ñayhuindináayigixy müid je huïdi müid ñayxïyii, jigix ñaygogapxiiyb nej anajty ti yxïyii.

¹⁷ Paady co je judíojaý ajcxy y'oy ya ca' nigoob tiempo nyajtigooyich com jabom nnicxich ma ngötujctaacich, e nni'ane'mdüyich co huen yajmiñyii je Pablo. ¹⁸ Co ajcxy ñayguëxi'ci, je huïdi anajty ti xïy, ca' jac ni ti ayuc anajty ajcxy müidity jadu'n nej ñich anajty ti ndijyich. ¹⁹ Jëyi janchtiy co jadu'n anajty yminaangixy co Pablo ti ytundigooy ma yi' ajcxy ycostumbre huinma'ñ, etz Pablo capxhuäcxy co je Jesús huïdi o'c, juugyñi je'. ²⁰ Com ñich ca' nnejhuïy nej ndunipich müid jada jadu'mbi huinma'ñ, chi n'amidooyich Pablo, pen nicxam anajty Jerusalén, jigix jim ngatiyduñich müid jadayaabi ycixpi. ²¹ Pablo ci'm minañ co nigi oy yajtiydunipy jim ma je emperador huïdi ane'm jim Roma. Chi nni'ane'mdüyich co huen jacmach'ñäy, ixti cooni nguexipyich jim Roma ma César.

²² Chi je rey Agripa yminañ:

—Nañ ooy ñich nja'amido'idaani Pablo y'ayuc.

Chi Festo y'adzooy:

—Jabom jëbi ayuc midohuipy.

²³ Com jabom miñ Agripa etz Berenice müid mayjäy etz xuuxpidijc, chi ytigiiy ajcxy ma tiydundac müid je soldado huindzin ajcxy, etz huinmij'anäctijc. Chi Festo capxyñigüejxy co huen Pablo nicxy yajtzonyii. ²⁴ Chi Festo yminañ:

—Rey Agripa, etz tüg'óciy mij'anäctijc huindzindijc huïdi ya ti mnayyöymújcigixy müid ñich ajcxy, cha je' je yëydijc huïdi oy yi judíojaý ti yxïyii ma ñich. Xymixïyich jim Jerusalén, e nañ ya Cesarea, e jatymyminaangixy co jëbi y'ögy. ²⁵ Ca' ti ti tundigooy, paady ca' huaad nyaj'ögyich. Com ti ci'm ñayñibijctzohuïyii co jim yajtiyduna'ñ ma je emperador jim Roma, paady ti n'a'ixïyich co nguexaañich. ²⁶ E com ca' ni ti tiy'ajt nej nijayihuibich nhuindzinich, je emperador César, müid yi' ycixpi, paady nyajmiñich ma miich ajcxy, etz tim jayijp ma miich mhuinduu, rey Agripa, jigix jëbi m'amidohuipy e nmüid'idipyich ti ii njáayibich. ²⁷ Ca' jadu'n y'óyity nicxy nguexyich tüg machyjäy jim ma je mij'ane'mbi e ca' ni ti tiy'ajt müidity nej ti yxïyii.

26

Pablo nimiydägy nej anajty yjatyin ma je rey Agripa

¹ Chi je rey Agripa nimay Pablo:

—Jëbi ci'm mnayñimiydägyii.

Chi Pablo yujcxajy yci' e ytigiiy nayñigapxtuutip, yminañ:

² —Jotcuje nayjihuüyijich, co jëbi nmïydägyich ma miich, rey Agripa, jigix nayñigapxtüdiybich tüg'óciy jadu'n nej judío jäy ti xyxüyich. ³ Com miich mnejhuüyb yajxon nej judíojäy ajcxy yhuinma'ñ müidity, etz tijaty tzip yi' ajcxy ymüid, etz jadu'n nej yi' ajcxy y'ixpüjcin oy ñay'ijxquüipxigixy.

Pablo nigapxy nej anajty chinäy ma anajty ca'ni yjothuimbity

⁴ Tüg'óciy judíojäy ñejhuüyb nej ti ndzinäyich ma yi' ajcxy jim ma nnaaxjotich etz jim Jerusalén maabi nyeecpidzimyich. ⁵ E yi' ajcxy ñejhuüyb nañ jadu'n, e jëbi nigapxcixy jadu'n nej ti nyujcyeecpi'atyich. Hue' naydijyijich anajty fariseojäy, je tügpicpyi jäy huüdi mictägy je judío jäy ycostumbre etz ycötüjcin payöyip. ⁶ E jadachambi xtytyduñich müid co njjip'ixyich co Dios yajjugypiga'ñ yi jäy ajcxy tübi y'o'ccixy, jadu'n nej Dios yajnimay nmij'ap nmijteedy jecy'ajty. ⁷ Je majmetzpicypí Israel ymang y'ap y'oc y'ahuixpy mina Dios cuyduna'ñ nej anajty ti yajnimäyii je' ajcxy ymij'ap ymijteedy. Paady ajcxy Dios ojadaty huindzigüy xim tzuum. Miich, rey Agripa, nmibicyich co Dios yajjugypigipy je jäy tübi y'öccixy, paady ycixpi yi judíojäy yxüyich. ⁸ ¿Na'amy co ca' miich ajcxy mübiga'ñ co jëbi Dios yajjugypicy je tübi ajcxy y'ögy?

Nej anajty Pablo jayjip'aty mübijcpidijc ixhuüidity pahüidity

⁹ Jecyip üich hue' ndijyich oy nduñich co anajty ndzachmidzip'adyijich je Jesús je Nazaretpi. ¹⁰ E jadu'n nduñich jim Jerusalén. Müid je teedy müitungmüidpi ycötüjcin nbidaacich Jesús yjäy may pujxtigoty. E co ajcxy yaj'o'cy, nañ nigapxpejt üich co huen yaj'öccixy. ¹¹ E nnicyyich anajty majaty judío ñaymujctac jim ndzaachytuñich huüdi ajcxy müjpidacp anajty Jesús, jigix ajcxy y'ixmadzipy je' ymübijcin co Jesús je' je' je Cristo. Nigi anajty nmijotmätcootyich ixti nbahuüidijttacyich huingnaax huinggajp.

Pablo nimïydägy jadüg'oc nej yjothuimbijty

¹² Müid yi jadu'mbi huinma'ñ nnicyyich anajty jim Damasco. Je teedy müitungmüidpi anajty xyquejxpih, e xymöyich anajty cötüjcin. ¹³ E tü'am, señor rey, üich anajty nicyy, cuje xü anajty co n'ijxyich tügi tücxin jacmic ca'ydi xü ytücxin chooñ tzajpjoty, xyñigidacyich etz nañ jadu'n huüdi anajty ajcxy xymüidnicych. ¹⁴ Huin'it nidüg'óciy üich ajcxy ngidaday, e nmidooyich tüg ayuc xymigapxich müid hebreo y'ayuc, xyñimäyich: “Saulo, Saulo, ¿nej co chach xpahüidijttägyich? Ci'm naysajtzaachüyii jadu'n nej huaj yuub co jipconebüy huüdi müid ñumygumyüi.” ¹⁵ Huin'it n'adzooyich, nnimaayich: “¿Mbin miich Huindzin?” E je Huindzin xyñimaayich: “Üich je' Jesús je huüdi müich mdzachpahüidijttacpy. ¹⁶ Pidig e tinaaygugi', com ti nnyguëxigüyijich ma miich jigix xymidunipyich etz mgodiy'ajt'adipy jadu'n nej cham ti nyajnimäy ti nyajnejhuüy, etz jadu'n nej jini njacyaj'ixa'ñ njacyajnejhuühua'ñ. ¹⁷ Üich müich nnihuänip nyajtzögip ma yi judíojäy, etz nañ ma huüdi ca' yjudíojäyity. Üich müich jim nguejxpy ma huüdi ca' yjudíojäyity. ¹⁸ Nicx jim myajhuinjihuüygixy üich ndiy'ajt, huen ixmach ajcxy yi jibic-huinma'ñ e jadu'n ypidzimipy ajcxy ma je mujcu' y'ané'migixy, etz müjnicxpedipy ajcxy Dios yty'ajt. Co ajcxy mübigipy müjpidägipy üich ndiy'ajt huin'it nmöhuübich tigiydac tzajpjoty ma yi oyjäydijc ity tübi Dios yajpocynühuächyüi.”

Pablo cuyduñ nej anajty ti y'ijxmañüyün

¹⁹ Rey Agripa, jadu'n ti ngapxymidooyich huüdi n'ijxich nmidoohüich tzoön tzajpjoty. ²⁰ Jayjip ngapxhuäcxich Dios y'ayuc jim Damasco, chi ngapxhuäcxich jim Jerusalén etz tüg'óciy Judea ñaaxjot, etz cham ngapxhuäcxich Dios y'ayuc ma huüdi ca' yjudíojäyity. Nyajnimäyigixyich huen jothuimbijtcixy, huen mübijccixy Dios y'ayuc yty'ajt, etz huen yajtungixy oyjot oyhuinma'ñ jigix ñiguëxigipy co ti yjothuimbijtcixy. ²¹ Müid jada ycixpi xymajchich ajcxy je judíojäy ajcxy ma Dios ytiç, e xyaj'ögängixyich anajty. ²² Müid co Dios ti xypubety ti xypudigüyich cha nyajpaadyich juugy. Ngapxhuäcxich Dios

y'ayuc ytiy'ajt ma tüg'óciy ayoobtijc etz ixpicytijc. Tüg'óciy huidi ngapxpyich je Dios y'ayucnajtzcaxhiybi jaay jecy'ajty, etz je Moisés nañ jadu'n jaay jecy'ajty co jadu'n ytuna'ñyii yjada'ñyii. ²³ Hue' yajmínañ co je Cristo copicy ayo'n tzaachypí yajnaxipy, e y'ögipy e huin'it jugypigipy, e je' je' je jayijp jäy huidi jugypigip co anajty ti y'ögy. E yajcaxhuäcxip je ayuc ytiy'ajt ma ich ajcxy judíojäy, etz ma huidi ca' yjudíojäyity.

Pablo jahueeni cayajjothuimbijty Agripa

²⁴ Co Pablo jadu'n ymínañ ma anajty ñayñigapxtüdyii, chi Festo mic mínañ:

—¡Mlocjiyb miich Pablo! Míid je ixpíjcin nigí m'ahuimbity loci.

²⁵ Chi Pablo y'adzooy:

—Ca' ich nlocijiy, miich mijtungmíidpi Festo. Yi huidi ich ngapxpyich je' je' tiy'ajtíp etz janchip. ²⁶ Yi rey Agripa ñejhuíydaayb yi' tüg'óciy jada, paady nmíydägich aamic jotmic ma yi' yhuinduu; com nnejhuíybich co yi' ñejhuíydaayb jada tüg'óciy, com canan hue' jada yajtuuñ yajmíydacy ayüchytuum. ²⁷ ¿Nej mmíbicy, miich rey Agripa, jadu'n nej ajcxy ymínañ yi Dios y'ayuccojaaybi? Nnejhuíybich co miich mmíbicy.

²⁸ Chi je rey Agripa y'adzooy, ymínañ:

—Janch tim jayinjaty jahuenjaty miich xycayajmíbicyich Jesucristo.

²⁹ Chi Pablo ymínañ:

—Oy yjayinjaty yjahuenjatyity ooy mijcajee mgamíbicy, chojcpy Dios co miich mmíbicy Jesucristo etz nañ jadu'n tüg'óciy jäy huidi cham xy'amído'o'ítíp ich n'ayuc. Dios chojcpy co mmíbicy Jesucristo jadu'n nej ich nmíbicyich, jëyi janchtiy co ca' mmach'idipy jadu'n nej ich nmach'ityich.

³⁰ Co je Pablo ymíydactay, chi je rey etz gobernador ytinayigy quipxyi míid Berenice etz jacjadyii huidi anajty ajcxy jim. ³¹ Chi ajcxy ahuingujc oy capxyögyixy Pablo ypocy, ñayñimáayigixy miñ xyipy:

—Jada yëydijc ca' jada ti tundigoy, ca' ypadyii nicxy y'ögy, ni ca' ypadyii nicxy ymach'íñäy pujxtigoty.

³² Chi Agripa nimay Festo:

—Jëbi ixypy nnajtzmazhiyim Pablo co ca' ci'm ycanayñibijctzohuiyi co huen tiyduyii je emperador César jim Roma.

27

Pablo yajnicxi jim Roma

¹ Co ajcxy yajnihuinmayiy co xyquexáangixyich jim Italia, chi Pablo yajciyejc míid jacjadyii machyjäy ma tüg capitán huidi anajty yxí Julio, je' huidi nihuindzin'ajtp tügpiy soldadtijc huidi anajty yxí batallón Augusto. ² Chi ich ajcxy ndigiy ma tüg barco huidi yhuindzin cogajpíp jim Adramitio. Je barco hue' anajty ñicxa'ñ ma nijëjity barco jättac jim Asia ñaaxjot. Chi ich ajcxy ndzooni. Míid ich anajty ajcxy Aristarco huidi anajty cogajpíp Tesalónica jim Macedonia. ³ Com jabom ich ajcxy nja'ty ma barco jättac jim Sidón. Jim je Julio pa'ayoy Pablo, e ahuaatzí ytu' co huen nicxy co'ixiy ymigügtijc, etz huen je' ajcxy yajcayyíi yaj'ügyii. ⁴ Co ich ajcxy ndzooñ jim Sidón, chi je naax mejy'agujcpi yhuí'mni anajty'amy huidi yxí Chipre, míid co je poj anajty jipcobojiy je barco. ⁵ Chi je barco huinyöñajxy je Cilicia ñaaxjot etz Panfilia ñaaxjot, oy njädyich ajcxy jim Mira, tüg cajp jim Licia ñaaxjot.

⁶ Jim je capitán paty tüg Alejandría ybarco hue' anajty ñicxy jim Italia. Chi je capitán ich ajcxy xyajbarcotigiiy. ⁷ Canaag xí ich nyöy janch oñdägy, adzaach ich ajcxy nja'ty mihuingon je Gnido co anajty je poj tzach jipcobojiy je barco. Najx ich ajcxy mihuingon Salmón, etz njüyö'ahuídiytyich ajcxy Creta je mejy'agujcpi naax. ⁸ Adzaach ich ajcxy nja'ty ma barco jättac huidi anajty yxí Buenos Puertos, mihuingon Lasea.

⁹ Ti ñich ajcxy ooy anajty nxñidigoy, e ooy anajty ycodzigijity je barco yajyöyñ. Ti anajty je ayuuxñ ñajxñi, e ti mihuingon anajty je poj tuu tiempo huidi jäy ytijpy invierno. Paady Pablo je soldado huindzin jaccapxhuijy, ¹⁰ chi Pablo ymñañ:

—Huindzindijc, jadu'n nej yam codzigi' jada ooy co njacñicxim barcojoty, ca' yjecyity co nicxy ndigooyim miid barco etz miid ñidzimy etz n'o'ctaayim.

¹¹ E je soldado huindzin yjacmijpidac oy je barco yajyöybi y'ayuc etz je barco capitán y'ayuc, ca'ydi Pablo y'ayuc. ¹² Com je' co je barco yjättac ca' anajty y'öyity, nicxy jim yajnaxcixy je poj tuu tiempo, chi je jacmaybi ajcxy yhuinma'ñypidacy, co jëbi barco yjacyöy, oc'ixaangixy pen yjätcixy jim Fenice ma Creta ñaaxjot. Jim ma tüg barco yjättac huidi y'aguu najtz'ixñiyb ma xñ pidzimy, e jim anajty je poj tuu tiempo yajnaxaangixy.

Je mijpoj mijtigoy ma je mejy

¹³ Jadu'n yajty co je jinboj hueeni ypidzimy, huin'it huinmay ajcxy co jëbi yjactüyöy je barco. Chi ajcxy yajpidigy je mij pujx huidi barco yajtinayxijp, e yajyöychooñ je barco. Chi ñicxy je barco mejypa' mejypa' ma Creta ñaaxjot. ¹⁴ Huin'it hueeni tiempo ñajx, chi je micpoj miññ ma tñichpoj pidzimy, huidi jäy ytijpy Euroclidón, jadu'n yhuimbidzim, Noreste. ¹⁵ Chi je mic poj yajtütigajch je barco, e com ca' anajty ndimdüyöygiñi miid je poj ycixpi, chi je mic poj ñich ajcxy xyajnicxy adzip ma anajty tzocy. ¹⁶ Najx ñich ajcxy mihuingon tüg naax mutzpi mejy agujcpi huidi yxñ Clauda, e adzaach ñich ajcxy nyujcjugujcy je mutz barco huidi anajty miimb ixhodzïy ma je mijpi. ¹⁷ Co ajcxy jugujcpidzimy je mutz barco, chi ajcxy yajtuuñ maychaay e xojtmujcy je barco aguu. Chi ajcxy yajminajcy je huit huidi anajty poj mic tzach ymajchyp. Je' co chigñygyixy co chimñicñiyb je barco jim ma mejy huidi ca' y'agomity, ma püjot huidi yxñ Sirte. Chi ajcxy ñayyejci huen poj yajnñicxiyixy. ¹⁸ Com jabom, com ooy mic anajty je poj, chi ajcxy je chimy mejy cöjibijptaayi. ¹⁹ Je midugñig xñibi, chi ñich ajcxy nmejycöjibijptay je tungbejt huidi yajtumyib ma je barco. ²⁰ Ti anajty canaagxñ ñajxñi e ñich ajcxy ca' ma xñ madza' n'oc'ijxcixni, miid je mij poj ycixpi huidi anajty ñich ajcxy xychachyajtüyöyp. Hue' ñich ajcxy ndijcixy co ti ndigóoygyixyich, ca' ndijy ñich ajcxy ndzögipy.

²¹ Ti anajty xñ tiempo ñich ajcxy nyajnaxcixy jaygay, chi Pablo ytinaygy, nimay je jäy ajcxy:

—Yëydijctijc, co ñich miich ajcxy xycacapxymidoy ca' ngatzoonim jim Creta ñaaxjot, e ca' ixyipy jada ayo'n yam jadu'n nbaatim. ²² Jadachambi ca' mdajcixy mmaygyixy, ca' ni pin ytigoya'ñ, oy je barco yjatigoy. ²³ Amygoodz je nHuindzin Dios tüg y'ángel ti ñayguëxigyii ma ñich, je Dios huidi ñich ngapxymidooybich, y' ti quexy. ²⁴ Je ángel ti xyñimäyich: “Ca' mdzigiy, Pablo, copicy co mjatyjadipy ma je mij'ane'mbi, je César yhuinduu. Miid miich ycixpi, Dios ñihuänamy yajtzögamy tüg'öciy huidi ji barcojoty, ca' ni tüg y'ögipy.” ²⁵ Paady nayjot'amijmóoyigix, yëydijctijc, nmibijcpiych Dios co jadu'n yjada'ñ jadu'n nej y' y'ángel ti xyñimäyich. ²⁶ Ooy ycopicyity nicxy nmijpojpejtñ ma tüg naax mejy agujcpi.

²⁷ Majmactz xñ je mic poj anajty yajyöyii je barco oyñinej jim ma je mejy huidi yxñ Adria, chi mijcutz je barco yajyöybi jihui'ñybijcy co anajty ti mihuingoñ naax. ²⁸ Chi ajcxy quipxy je ññ jadu'ñi anajty ycicyity, e hue' ajcxy quipxy iipx xap ycicyity. Jahuengi huin'it jadüg'oc ajcxy quipxy je ññ, e hue' oy quipxcixy majmox xap ycicyity. ²⁹ E co anajty chigñygyixy co tijy je barco jipcobonñhuipy ma tzaagop, chi ajcxy pidacy ñijoty midaax pujx ma barco y'ijx, je huidi yxñijp anclas, janch tzigñiyb anajty ajcxy y'ahuixcixy cooni xñimñhuipy. ³⁰ Chi je' ajcxy huidi anajty barco yajyöyp yhuinma'ñybaty co yquëga'ñ ameech. Chi ajcxy pidacy ññhuingixy je mutz barco. Chi ajcxy ñaybidaaci jadu'n nej jihuiy je ancla jac yajminagaangixy jim ma barco yhuinduu. ³¹ Huin'it Pablo nimay je soldado huindzin etz je soldadtijc:

—Pen ca' jada huimñgixy ma barco, ca' miich ajcxy mejy ypidzimipy.

³² Huin'it ajcxy tzujctujcy je tzaay huidi je mutz barco anajty m̄id ycoxochity, chi ajcxy yajcäy je mutz barco n̄ijoty, e chi je mejy yajnicxyi.

³³ Moñyi Pablo migapxy je jäy ajcxy, chi ajcxy nimay co huen huingayñajxcixy, chi Pablo yminañ:

—Cham majmactz x̄i ma miich ajcxy ca' mmaagixy, e ni ca' mgaaygixy m'uuccixy.

³⁴ Tun may'ajt caaygixy oy jadu'ñyi, copicy jada co njatyñidzooctähuaanim, ni tüg ngöhuay ca' ytigoyaanim.

³⁵ Co Pablo jadu'n yminanday, chi tüg tzajcaagy con̄igy, chi jayijp Dioscojuyip yajnajxy mayjäy agujc, chi tujc-huäcxy etz ytiḡiy ajcxy caaybi. ³⁶ Mic'amy je jäy ajcxy yjotmigiyday nidüg'óciy, e chi ajcxy ytiḡiy caaybi. ³⁷ Hue' anajty ñaybáatigixy barcojoty mejtz migo'px jatugi'px majmocxtüg jäy. ³⁸ Co ajcxy ycayday, chi jacn̄igöjibijpy je trigo, jigix huen cöminacy je barco chimy.

Chi barco tüg yquiñ

³⁹ Co yx̄im̄iy, chi je barco yajyöybi ca' ijxcapy je naax, e y'ijxpaty tüg it ma mejy huen ycogueḡiy, e jim anajty p̄ujot. Chi ajcxy yhuinma'ñybaty co'ixaangixy pen jēbi jim yjätý je barco. ⁴⁰ Chi ajcxy tzujctujcy je tzaay huidi anajty m̄id yxochity je anclas, e chi anclas yhui'mni n̄ijoty, huin'it ajcxy miguej̄iy je n̄igaap huidi tumb co tümöy je barco. Chi huit jadüg'oc ajcxy p̄idacy huidibi pojmajtzp. Chi je barco ytiḡiy yöyb, t̄iy ajcxy yajnicxy ma p̄ujot. ⁴¹ E chi oy minaybadyi ma anajty je mejy mejtz it oy mic ycujiñ, chi oy yjēpxy p̄ujoty. Je barco j̄ijp oy ytiḡiy tätzpicy ca' huaad y'ocyücxni, e je barco ijx oy ytiḡiyñ aguejthuaäcxpi ym̄id je mejy p̄ujoty ym̄ijaa. ⁴² Chi je soldado yjayaj'ögaañ je machyjäy ca'yd̄i yqueeccixy ayaahuip. ⁴³ Je soldado huindzin ca' a'ix̄iy nicxy yaj'ögyi Pablo, chi nimay soldado ajcxy co huen ixmajtzcixy yi machyjäy. Chi je soldado huindzin nimay je jäy ajcxy co huen n̄idiḡiygixy pinjaty jajtp yau. ⁴⁴ E huidi ca' jajtcixy yau jaydēbi n̄idiḡiygixy m̄id pu'y etz m̄id barco pedasi. Jadu'n ajcxy nidüg'óciy ymejy yp̄idzimday.

28

Pablo yjädý ma tüg naax mejy'agujcpi huidibi yx̄i Malta

¹ Co ñch ajcxy n̄ibidzimday, chi ñch ajcxy nejhūiy co je naax mejy agujcpi hue' anajty yx̄i Malta. ² Je conaax ajcxy ooy oyjäy'ajtin tuuñ m̄id ñch ajcxy, chi ajcxy yajm̄ij̄iy j̄in mij, m̄id co anajty ooy yt̄ichity, etz co anajty ooy ytuubojy. Chi xyñimay ñch ajcxy co miñ n'ocxáamgixyich. ³ Chi Pablo ytiḡiy j̄axycajpmujcpi, e chi p̄idacy j̄injoty. Chi tüg ahua'n iyujc p̄idzimy, yquēgy anajty m̄id je anbi, chi Pablo ymajtz̄i ma yci'. ⁴ Co je cogajp ajcxy ijxy je ahua'n iyujc yt̄iyñäy ma Pablo yci', chi ajcxy ñayñimaaȳi miñ xyipy:

—Jadayaabi yēydijc, jäy yaj'öcpi jada. Oy ca' ti y'ögy mejyjoty, je t̄ydumbi tzajp̄joty ca' a'ix̄iy nicxy yjactzinäy.

⁵ Chi Pablo yci' huinxidicxy, e j̄injoty oy ycäy je ahua'n iyujc, e ca' Pablo ni nej yjajty.

⁶ E tüg'óciy je jäy tzach'ahuijxcixy mina anajty y'ocquiix̄igy, o mina anajty y'oc'ögy. T̄i anajty ooy y'ahuijxcixy jecy; co ajcxy ijxy ca' ni nej yjaty, chi ajcxy yhuinma'ñ yajtigajch. Yminañ ajcxy co Pablo hue' jada' yi' tüg dios.

⁷ E m̄ihungon anajty je Publio yt̄ijc, je huidi nigohuajc'ajty je jimbi naax mejy'agujcpi. Je Publio xyajjättacich ajcxy, e xyajcaay xyaj'uucich ñch ajcxy yajxon tuḡig x̄i. ⁸ Jadu'n yjajti co je Publio anajty yteedy yp̄igyii m̄id tooy gohuajc etz m̄id̄ity anajty ni'pypa'm. Chi Pablo oy ixy je pa'mjäy. Chi Pablo Dios mib̄ijctzoy, e chi c̄in̄ixajy, e yajtzoocy. ⁹ M̄id jadaay miñ ajcxy nijējity pa'mjäy huidi anajty ajcxy tzinaayb ma je naax mejy'agujcpi e chi ajcxy chooctäy. ¹⁰ M̄id jada ycxpi nyajcömay ñch ajcxy, e nyajmooyich ñch ajcxy tijaty huidi ñch ajcxy nidüyöyipy barcojoty.

Chi Pablo oy yjädý jim Roma

¹¹ Tugüig po' ich ajcxy anajty ti n'ijtni jim. Chi ich ajcxy nbarcotigüy ma tüg barco huidi anajty je tuuboj tiempo ti yajnaxy jim Malta. E je barco capitán jim anajty y cogajpity Alejandría. E je barco ymüd anajty ahuinax huidi anajty yxii Cástor etz Pólux huidi ajcxy dios'ajtpy. ¹² Chi ich ajcxy oy njäty ma je barco jättac huidi anajty yxii Siracusa. E jim ich ajcxy nhui'müy tugüig xii. ¹³ Ndzoñich ajcxy Siracusa barcojoty, nicxy ich ajcxy mejypa' mejypa', ixti nja'tyich ajcxy jim Regio. Com jabom oy ypidzimy jinboj, chi co maax oy nja'ty ich ajcxy Puteoli. ¹⁴ E jim ich ajcxy nbaaty nijëjity jäy huidi anajty mijpidaacp Jesús. Je' ajcxy xycohuanüyich co ich ajcxy jim hui'müpy tüg semaan. Chi ich ajcxy jadüg'oc ndzoñ, nnicxyich ajcxy jim Roma. ¹⁵ Je mibijcpidijc ajcxy huidi anajty jim Roma ymidou ajcxy ayuc co ich anajty ajcxy jim nicxy, chi ajcxy chooñ nijëjity oy xyjijpcobadüygixyich ma je cajp mercado müid huidi anajty yxii Foro de Apio. Jacjadyii mibijcpidijc oy xyjijpcobadüyich ma tüg jättac huidi anajty yxii, Tres Tabernas. Co Pablo jijpco'ixüy je mibijcpidijc ajcxy, chi Dioscojuyip yajnaxy etz ñayjihuüy janch jotcuic. ¹⁶ Co ich ajcxy nja'ty jim Roma, chi je soldado huindzin cëyeyc je machyjäy ma je comandante, per a'ixüyb co Pablo tzinäy ahuinguic ma tüg pijctzoydijc, jëyi anajty tüg soldado ycuend'adyii.

Chi Pablo Dios y'ayuc capxhuäcxi jim Roma

¹⁷ Tugüig xii maabi Pablo anajty yjäty jim Roma co capxyñiguejxy je judío huinmij'anäctijc huidi anajty ajcxy tzinaayb jim Roma. E co ajcxy ñaymujci, chi Pablo yminañ:

—Migügtijc ajcxy, oy ich ca' ti ndundigooyich müidi judío jäy ajcxy etz müid ajt nmij'ap nmijteedy ycötüjcin, chi je judíojäy ajcxy xymajchich etz xyciyejchich ma romano tungmüidpi jim Jerusalén. ¹⁸ Co je romano tungmüidpi ajcxy xy'amidooyich, huin'it ajcxy xyjanajtzmadzihuaañich, ca' ti ajcxy paaty ma ich huidi ajcxy xyajco'ögihuibich. ¹⁹ Co je judíojäy yjotmätcoty ajcxy, ca' ajcxy a'ixüy co nyajnajtzmadzihuibich, chi nayñibijctzohüyich co nyajtiydunüpyich ma je mij'ane'mbi ya Roma, oy ich ca' ti xihuin nmüidity müid ich nmigonaax nmigogajpich. ²⁰ Paady ti ngapxyñiguejxcixy co nyajmüidmüydäga'ñ ajcxy tigix co nmach'ityich. Müid co ich ajt n'ahuixim co Dios ni-huäna'ñ yajnidzöga'ñ yi Israel jäy etz yajjugypiga'ñ je jäy tüibi y'öccixy. Paady jadachambi nyajpaadyich mach.

²¹ Chi ajcxy y'adzooy:

—Ca'ni ich ajcxy ni ti necy xyñijäty huidi tzoomb jim Judea müid müich ycixpi. E ni tüg ajt nmigügtijc ca' jibic xyñimüydägy. ²² Nja'amido'idaamyich jadu'n nej müich mmiydägy, com nnejhuüybich co huen yma'amyity jäy ymidzip'ajty je jemybi y'ijxpjcin.

²³ Chi tüg xii ajcxy agapxtujcy. Co oy paady mina anajty ti agapxtujccixy, chi mayjäy ñayyöymujci ma je Pablo anajty jättac müidity. Jopy ajcxy yajtzondacy capxii müydägi ixti ycootztzuu'üy, jadu'n Pablo tzachyajnimaaygixy je Dios y'ayuc nej Dios yhuinma'ñ müidity. E yajjothuimbidaangixy anajty ma je Jesús müid co capxticxy je Moisés ycötujcin nej anajty yjaybetyity, etz jacjadyii ayuc cojaaybi ñecy. ²⁴ Nijëjity cöbije ajcxy nej Pablo anajty ymina'ñ, etz nijëjity ca' ajcxy mibijcy. ²⁵ Co ca' anajty ajcxy miñ xyipy yajtügüy yhuinma'ñ, chi ajcxy icy ca'ixy yöychóongixni. Chi Pablo yminañ:

—Tiytudägy je Espíritu Santo nimay je nmij'ap nmijteedy ajt co yajcapxy je profeta Isaías co yminañ:

²⁶ Nicx nima' je jäy ajcxy: Müich ajcxy oy mjamidohüpy n'ayucich, per ca' ajcxy mhujnjihuüip; oy mjahuindüxcixipy, e ca' ajcxy mhujnjihuüipy.

²⁷ Com jada jäy ajcxy hue' yjot'ahuimbijtcixy janch juuñ, e ymidoogixy oyñinej, jadu'n nej jihüy yhuimbüdz'ijtcixy, e ni ca' y'oc'ijxcixy müid yhuin e ni ca' ocmidoogixy müid yta'tz'ac, ni ca' huinjihuüygixy müid yjot yhuinma'ñ, ni ca' minüpy ajcxy ma ich jigix myajtzögibich.

²⁸ Nejhuíygixy miich ajcxy co jadachambi etz jacnicxpi xií tiempo Dios y'ahuaníyb y'ayuc ytiy'ajt nej jébi jáy y'alma ajcxy yajnīdzögipy ma je jáy ajcxy huídi ca' yjudíojáyity, e je' ajcxy y'amido'idipy.

²⁹ Co Pablo jadu'n nimay ajcxy, chi ajcxy ñicxtáaygixni chach ñayhuin'ñbéjtigixy ñayhuingapxpéjtigixy miñ xyipy.

³⁰ Pablo mejtz jimijt jim chinay ma je pijctzoydijc jim Roma, e yajxon xiic'adzoy capx'adzoy pin miñ ycogapxyii. ³¹ Janch agujc jotcuje anajty capxhuäcxy je Dios y'ané'min, e yaj'ixpicy je Huindzin Jesús ytiy'ajt, e ni pin ma ycapx'adugyii.

ROMANOS

Yi Necy Huidi San Pablo Yajniejx Je Mibijcpidijc Jim Roma

¹ Hich Pablo tumbich ma Jesucristo ytung. Jesucristo ti xyajnbicyich co nduna'ñich ma yi' ytung quipxy müd yi' y'apóstol ajcxy. Ti xypidägyich ma jada tung tügijp co ngapxhuäcxibich Dios y'ayuc ytiy'ajt oybi.

² Dios jecy'ajty y'ayuc yajhui'my cojay ma yi' y'ayucnajtzcaxhybi ñecy co quexañ anajty je Cristo ya naaxhuiñ. ³ Ngapxhuäcxich jada ayuc jadu'n nej ajt nHuindzin Jesucristo, je Dios y'ung, yma'xung'ajty ya naaxhuiñ. Hue' yi' ñinicx paty ma ytaj. E yi' ytaj je rey David je' ymij'ap'ajti ymijteedy'ajti. ⁴ Per Jesucristo ti paady ma Dios yi' yjihui'ñ ymic'ajt. Co Dios yajjugypijcy y'ung ma anajty ti y'ögy müd yjihui'ñ ymic'ajt, chi ti yajnejhuiy anajty je naaxhuiñyäj co Jesucristo hue' je' Dios y'ung, huidibi müd huädz yjot huädz yhuinma'ñ, etz nañ ymüd Dios yjihui'ñ ymic'ajt. ⁵ Co Dios yajjugypijcy Jesucristo ma anajty ti y'ögy, chi mijmay'ajt tuñ müd ñich ajt ycixpi. E nañ müd Jesucristo ycixpi Dios ti xyajnbicyich co ngapxhuäcxibich yi' y'ayuc ytiy'ajt ma yi' mayjäy ajcxy ma tüg'óciy naax cajp, jigix jébi mayjäy mibijccixy e nañ capxymidoogixy Jesucristo. ⁶ E müch ajcxy huidibi tzinaayb jim ma yi' cajp huidibi xijip Roma, nañ jadu'n Dios müch ajcxy ti xyhuin'ijxcixy jébi ajcxy Jesucristo xyjäy'adyii.

⁷ Jada necy nguejxypich ma müch ajcxy nidüg'óciy huidibi jim yajpatcixp ma yi' cajp huidibi xijip Roma. Dios müch xychojccixp xyjihuiyigixp, e nañ Dios ti xyhuin'ijxcixy jaydëbi yi' xyjäy'adyii, etz nañ jaydëbi mdzinaaygixy müd huädz mjot huädz mhuinma'ñ. Huen ñich ajt nDios Teedy etz ajt nHuindzin Jesucristo may'ajt oy'ajt tunipy müd müch ajcxy etz nañ xyajjotcugihuiip ajcxy.

Pablo nicxy mibijcpidijc cogapxihua'ñ jim Roma

⁸ Tim jayijp nyajnajxpich jäygidaacin ma Dios, müd Jesucristo yxi, co müch ajcxy ti mmibijccixy Jesucristo. Mayjäy ma nidüg'óciy naax cajp ti nejhuuygixy jadu'n nej müch ajcxy ti mmijpidaaccixy Jesucristo. ⁹ Hich tumbich cixyjot huinijot ma Dios ytung, co ngapxhuäcxich Dios y'ayuc ytiy'ajt müd Jesucristo ycixpi. Dios yi' tiy'ajt yegip jadu'n nej jabom jabom Dios nmibijctzooyich müd müch ajcxy ycixpi. ¹⁰ Dios nmibijctzooybich pen yi' jadu'n tzojcp co jébi nnicxyich cham tiempo jim ma müch ajcxy myajpaady. Canaag'oc ñich müch ajcxy nicxy nja'ixaangixy, e ca' y'oyiy nej nícxibich. ¹¹ Ooy njanijot'atych co ñich müch ajcxy nicxy n'ixaangixy, jaydëbi ngapxhuäcxibich Dios y'ayuc ma müch ajcxy müd Dios yjihui'ñ ymic'ajt, e nañ ngapxhuäcxibich Dios y'ayuc ma müch ajcxy jaydëbi tiydudägy mmibigipy ajcxy Jesucristo. ¹² Pen oyiyb nej nícxibich ma müch ajcxy myajpaady, chi jébi njotcugihuiyich co anajty n'ixyich nej müch ajcxy mibijccixy Jesucristo, e nañ jaydëbi njotcugihuiipy müch ajcxy co anajty m'ijxcixy nej ñich nmibicyich Jesucristo, e jadu'n nayyajjotcugiyim miñ xyipy.

¹³ Ndojocypich co müch ajcxy mnejhuihuipy co canaag'oc ti njapidägyich nhuinma'ñich co anajty nnicxa'ñich ma müch ajcxy myajpaady, e ca' y'oyiy nej nícxibyich. Njijp'ijxypich co oyihuip jadachambi tiempo jadu'n nej jébi nnícxibyich jim ma müch ajcxy. Com njacyaj'ixpigaamybich müch ajcxy, e nañ njacyajmibigaamybich ajcxy Dios y'ayuc. Tim jadu'n nej nduñich canaag agajp ma chinaaygixy yi' jacjadyii jäy huidibi ajcxy ca' yjudíojäyity. ¹⁴ Dios jadu'n xyajnbijcich jada tung, paady copicy co ngapxhuäcxibich yi' y'ayuc ma tüg'óciy jäy, etz majaty naax cajp. Ngapxhuäcxamybich Dios y'ayuc ma yi' jäy ajcxy huidibi griego ayuc cápccixp, etz ñan ma yi' jäy ajcxy huidibi ca' griego y'ayuc capccixy. Ngapxhuäcxamybich Dios y'ayuc ma yi' ixpicy jäy ajcxy, etz

nañ ma yi jäy ajcxy huídibi ca' y'ixpicyity. ¹⁵ Paady ycixpi ooy ndzachcapxhuäcxa'ñich Dios y'ayuc ma müch ajcxy huídibi yajpatp jim Roma nañ jadu'n.

Je ayuc tity'ajt oybi

¹⁶ Ca' nmídzoydunyijich Cristo y'ayuc ytiy'ajt. Com je' jada je oybi ayuc huídibi tzoon ma Dios, ymíid yi' Dios ymic'ajt jigix jébi tüg'óciy jäy ajcxy paadípy pocy huinmeecxin, pinjaty cöbígamb Cristo y'ayuc. Tim jayijp ti ngapxhuäcxy Jesucristo y'ayuc ytiy'ajt ma yi judíojäy ajcxy, e jac'axam ma yi huídibi ajcxy ca' yjudíojäyity. ¹⁷ Jesucristo ytiy'ajt xyajnejhuüyim co nmíbijcim co Cristo ti jöch ajt nbocy etz nxihuín, chi Dios xycöbíganim jadu'n nejjuhuüy tudägyjäy. Ca' ji jadüg huinma'ñ nej Dios jébi xycöbígim jadu'n nej juhuüy tudägyjäy. Com jadu'n jaybety y'ity ma Dios ñecy ma jadu'n yminañ: “Pinjaty tudägy'ajtin ti paady müd co ti mijpidägy Dios y'ayuc, hue' je' tzinähuip, ca' yjugy'ajtin ycixipy ytigoyipy.”

Je naaxhuiñyäjy ajcxy ypocy

¹⁸ Copicy nbaatim tudägy'ajtin ma Dios, com je Dios huídibi tzinaayb tzejpjoty ti xyajnejhuüyim co yi' tzaachytuna'ñ mictägy tüg'óciy jäy ajcxy huídibi midundigooyb yi' ytiy'ajt, tüg'óciy huídijaty jibic huinma'ñ ymíid, tüg'óciy yi' ajcxy huídibi yajtigooyb Dios ytiy'ajt müd je jibicpi huídibi ajcxy ytumyib. ¹⁹ Com yi jäy ajcxy huídibi jibicjot jibic-huinma'ñ müd, y'ixpxy ñejhuüyib ajcxy Dios ytiy'ajt, com Dios ti pidägy yi' ytiy'ajt ma yi' ajcxy yjot yhuinma'ñ. ²⁰ Ñejhuüyib jäy ajcxy Dios ytiy'ajt, com mabaad oga'n Dios yajcojy naaxhuiñyibi ixti chambaad, quëxícip ya naaxhuiñ Dios ymic'ajt y'ixxpejt, oy ca' pin Dios ixu, huídibi Dios ti cojy ti macxy yejcpy ixxpejt co Dios yjijity, etz Dios ymic'ajt huinixi huinítiempo ijtp yi', ca' ycixipy ytigoyipy nimina. Co anajty Dios tzaachytuna'ñ yi pocyjäy ajcxy, ca' ajcxy ni ti ayuc müd huaad adzohuimbip Dios müd ajcxy ypocy ycixpi. ²¹ Com ñejhuüyib ajcxy co ji Dios yajpaady, e ca' ajcxy ojadajtcixy ca' ajcxy huindzigüygixy Dios. E nañ ni ca' ajcxy yajnaxy Dioscojuyip ma Dios. E nañ jadu'n ajcxy ñaybidáacigixy amij agix, yhuinma'ñ ixtaaygixy huídibi ca' ytiy'ajtity. Yajtigooyi ajcxy Dios ytiy'ajt ma ajcxy yjot yhuinma'ñ, e nañ müd'ajtcixy tzuuhuinma'ñ. ²² Yi jadu'mbi jäy ajcxy hue' yhuinma'ñ pidaaccixy co ajcxy ooy ycohuinma'ñity, co ajcxy ooy y'ixpicyity, e ca' yjanchity, tzuu huinma'ñ ajcxy ymíid. ²³ Ma yjapadyii ojadajtcixipy huindzigüygixipy Dios huídibi ymic'ajtin y'oy'ajtin ca' ycixipy ytigoyipy nimina. Chi ajcxy yajtigach yjot yhuinma'ñ, e huindzigüygixy jäy y'ahuinax e jäy ajcxy yjugy'ajtin etz y'oy'ajtin cixaamb tigoayaamb. Ixti mijpidaaccixy nañ jadu'n joon y'ahuinax, iyujc y'ahuinax etz tza'ñ y'ahuinax.

²⁴ Co jäy ajcxy jadu'n ytundigoy, paady Dios ñajtz'ixiyyin ajcxy, huen tundigooygixy nej anajty ci'm jibichuinma'ñ nijot'ajtcixy. Ñaymidundigóoyigixy ñinícx miñ xyipy huídibi janch oy midzo'yduuni. ²⁵ Ma yjapadyii ixypy mijpidaaccixy je tity'ajt tiydudägypi nej Dios ti yecy, huin'it ajcxy mijpidaaccixy aní huídijaty jäy ti cojy ti macxy. Ma yjapadyii ixypy huindzigüygixy Dios, huídibi ci'm ti yajcojtäy tüg'óciy tijaty ji yajpaatp, huin'it ajcxy huindzigüygixy jäy y'ahuinax joon y'ahuinax, etz iyujc y'ahuinax huídijaty ca' ti mic'ajt müdity. Copicy n'ojadajtim ngömaayim Dios huinixi huinítiempo. Amén.

²⁶ Müd co jäy ajcxy tzachhuindzigüygixy jäy y'ahuinax etz jactijaty ahuinax, paady ycixpi Dios ajcxy ñajtz'ixiyii, chi ajcxy tungixy yi' jibic-huinma'ñ huídibi ci'm ñijot'ajtcixyp huídibi oy ymidzo'yduuni. Töxyjäy ajcxy ma yjapadyii chináaygixipy tudägy müd ñäy, chi ajcxy ñaymíiddzináayigixy e ñaymíiddundigóoyigixy actöxyjäydijc. ²⁷ Yëydijctijc ajcxy nañ jadu'n ñaymíiddundigóoyigixy miñ xyipy. Ñaymíiddzináayigixy ma yjapadyii ixypy chináaygixy müd töxyjäy ajcxy, huin'it ytundigooygixy ma Dios ytiy'ajt. Ci'm nijot'ajtcixy jibic-huinma'ñ huídibi oymidzo'yduuni, ypátcixipy ma ajcxy ñinícx je tzaachypí huídibi Dios ypidacpy müd yi' ajcxy ypocy ycixpi.

²⁸ Co yí jáy ajcxy jadu'n ci'm yhuinma'nñ ti pidaaccixy co ca' yajmij'ada'nñ Dios, paady ycixpi Dios ñajtz'ixiyii ajcxy. Huen tim tungixy huidibi ajcxy ci'm ñijot'ajtpy, huidibi Dios ca' jáygidägy. ²⁹ Jáy ajcxy ooy mij jibic-huinma'nñ canaagnax nijot'ajtcixy; yëydijctijc ooy ajcxy jibic-huinma'nñ tungixy; ooy ajcxy migapxtigoy töxyjäy ajcxy; ooy ajcxy adzojccixy comeen'ajtin; ooy mi'ijxtinaaygixy ymigügtijc; ca' ajcxy ymigüg ixaangixy; ooy ajcxy yjäyyaj'öccixy; ooy ajcxy chiptunaangixy; ca' ajcxy ycapxymidohuaangixy; ooy ajcxy ymigüg huin'ingixy; ooy ajcxy ypiitzcapxcixy; ca'p ajcxy ymigüg ixaangixy. ³⁰ Jáy ajcxy ooy nigapxy ni'ojjy ymigügtijc; ca' ajcxy ixaangixy Dios; ca' ti jáygidaccixy; ooy ajcxy amij agix ñayjihuiygixy; ooy ajcxy ci'm ñaygömáayigixy; ooy ajcxy cojy macxy jibic-huinma'nñ, ca' ajcxy capxymidoogixy ytaj yteedy. ³¹ Jáy ajcxy ca' y'ayuc-huinjihuiygixy; ca' ajcxy cuydungixy yci'm'ayuc; ca' ajcxy ni pin tzojccixy jihuiygixy; ca' ajcxy ni pin pa'ayoogixy. ³² Jadayaabi jáy ajcxy ñejhuib co Dios ti cojy ti macxy ycötujcin co pinjaty tundigooyb jadu'n miid Dios ytiy'ajt, tigooyip ajcxy yjugy'ajtin. Oy ixyipy yí jáy ajcxy janejihuiygixy co padaangixy y'o'cin, huin'it ajcxy jactimtungixy jibic-huinma'nñ, e nañ jadu'n jotcuyc ajcxy co jac pinjaty jibic-huinma'nñ tungixy.

2

Dios tiydumb jadu'n nej yí' tzocy

¹ Paady co miich migüg m'ix'ixy mba'ixy ti ytumyb, ti migüg ycapxyp ti anajty pocy mnaymöyii, oy ixyipy ypinjäy ñejpyjäyity. Miich ooy ti pocy m'ixy ma huing jáy, e nañ jadu'n miich ooy mij mdundigoy, tim jadu'n nej yí' ajcxy ytundigooygixy. ² Nejhuiyim co Dios tudägy ytuñ co tzaachytuñ tüg'óciy pinjaty tundigooyb. ³ E miich co migüg m'ix'ixy mba'ixy ti ytumyb ti migüg ycapxyp, nañ jadu'n miich Dios xychaachytuna'nñ. ¿Nej mdijy mdzögip co anajty Dios xytiyduna'nñ? ⁴ ¿Nej ca' mjäygidägy nej Dios mij ooy may'ajt oy'ajt ti tuñ miid miich, nej ooy mij ti xypa'ayoy, mij ti xymimecxtucy? ¿Nej ca' mnejhuib co Dios mij ooy xypa'ayoy xymimecxtucy, jigix mjothuimbidity nej mdundigoy ma Dios ytiy'ajt? ⁵ Miid co ooy mjetjuuñity mgöjuuñity, ca' ajcxy mjothuimbida'nñ, ca' ajcxy m'ixmadza'nñ nej ajcxy mdundigooygixy. Paady ycixpi Dios huidibi tudägy tumb nigí miich yí' ooy mij xychaachytuna'nñ co anajty xii tiempo ycixy ytigoy, e Dios chaachytunamyb jáy ajcxy miid ypocy ycixpi. ⁶ Co anajty Dios tiyduñ yí naaxhuiñ jáy, chi yajnidagihua'nñ nidüg nidüg nej anajty ti chinäy. ⁷ Nijjity jáy ajcxy oyjot oyhuinma'nñ tungixy jabom jabom, yjijp'ijxpy ajcxy co Dios oybi ymöhuaangixy, nañ yjijp'ijxpy ajcxy co Dios ycömayiyb, yjijp'ijxpy ajcxy yjugy'ajtin huidibi ca' ycixipy ytigoyipy nimina. Yí jadu'mbi jáy Dios ymöhuaamyb jugy'ajtin huidibi ca' ycixipy ytigoyipy nimina. ⁸ Per Dios chaachytunamyb mijcajee yí jáy ajcxy huidibi ca' ycapxymidohuaangixy, huidibi ca' cuydungixy Dios ytiy'ajt, huidibi ajcxy tumb jibic-huinma'nñ. ⁹ Ayo'n tzaachypí ypadamyb tüg'óciy jáy ajcxy huidibi jibic-huinma'nñ ti tuñ. Nañ jadu'n miich judíojäy ajcxy tim jayijp mbadaangixy tzaachypí, pen mdundigooygixp, e chiini yí jacjadyii jáy padaangixy tzaachypí, pen tundigooygixp. ¹⁰ Tüg'óciy pinjaty oyjot oyhuinma'nñ tungixp, Dios ymöhuaamyb yí' ajcxy oy'ajtin, nañ cömayaanip yí' ajcxy Dios, etz nañ yajjotcugihuib ajcxy. Tim jayijp yí judíojäy pada'nñ ajcxy oybi, etz jac'axam yí jacjadyii jáy ajcxy.

¹¹ Dios ca' tiyduna'nñ jáy ajcxy huin'ijxpety, quipxyjaty tiyduna'nñ nidüg'óciy jáy ajcxy. ¹² Nidüg'óciy jáy ajcxy huidibi tundigooygixp, Dios yajtigoyaaniip ajcxy yjugy'ajtin. Yí jáy ajcxy huidibi ca' m'idity Dios ycötujcin huidibi cojaayip, Dios yajpocycähuaaniip ajcxy, com ymiid ajcxy Dios ytiy'ajt ma yjot yhuinma'nñ. Yí jáy ajcxy huidibi miid Dios ycötujcin cojay, Dios yajpocycähuaaniip ajcxy miid yí' ycötujcin huidibi cojaayip. ¹³ Yí jáy ajcxy huidibi nigooob amido'ijtp co yajcapxy Dios ycötujcin, e ca' ycapxymidoogixy, ca' ycöbiga'nñyii Dios jadu'n nej jihuiy ytudägyjäyity. Yí jáy ajcxy huidibi capxymidoob Dios ycötujcin, Dios cöbigaanip co ajcxy ytudägyjäyity. ¹⁴ Yí jáy ajcxy huidibi ca' m'idity Dios

ycötujcín huídibi cojayíp, co ajcxy nijot'ajtcixy oyjot oyhuinma'ñ jadu'n nej Dios tzocy, jadu'n nipaady nej jihuïy ajcxy mïidity Dios ycötujcín. ¹⁵ Co je jäy ajcxy oyjot oyhuinma'ñ tungixy, huin'it yajniguëxíccixy co ajcxy ymïid Dios ycötujcín ma ajcxy yjot yhuinma'ñ. E co paatcixy jibic jot jibic-huinma'ñ, huin'it jibic ñayjihuiyigixy. E co patcixy oyjot oyhuinma'ñ, huin'it ooy oy ñayjihuiyigixy. ¹⁶ Jada je'du'n je jemybi oybi ayuc huídibi ngapxhuäcxypich co miinip je xii je tiempo co Jesucristo, mïid Dios ycötujcín, tiydunip tüg'óciy jäy ajcxy nej anajty yjot yhuinma'ñ ajcxy mïidity, tüg'óciy pinjaty ti tuñ ayüch ameech tijaty.

Je Dios ycötujcín huídibi Moisés yjay jecy'ajty

¹⁷ Miich ajcxy huídibi minamb co mjudíojäyity, miich ajcxy mmijpidaaccixyp Dios ycötujcín, je jecyíp huídibi jaybetyíp. Miich ajcxy mneygömáayigixy co miich ajcxy Dios xyjäy'adyii. ¹⁸ Miich ajcxy mnejhuïyb nej Dios tzocy nej huaad mjäy'ajtcixy. E nañ ti m'ixpicy Dios ycötujcín huídibi ti xyajnejhuïygixy huídibi tiy'ajt jac'oyíp. ¹⁹ Miich ajcxy minamb co janch janch co miich ajcxy Dios ytiy'ajt myejci ma yi jäy ajcxy huídibi ca' Dios ytiy'ajt mïidity, jadu'n nipaady nej jihuïy tüg huintzpi mhuijtzöy, e nañ jadu'n nipaady nej jihuïy mgodixy je jäy ajcxy huídibi agootztuum tzinaayb. ²⁰ Miich ajcxy judíojäy myaj'ixpijcpy yi jäy ajcxy huídibi ayoob, huídibi ca' ti tiy'ajt nejhuïygixy, e mgapxhuijy yi jäy ajcxy huídibi ca' yhuinma'ñymejtzcixy. Miich ajcxy minamb co m'ayuc etz mdiy'ajt mbaatcixy ma Dios ycötujcín huídibi jaybetyíp. ²¹ Miich ajcxy myaj'ixpijcpy jacjadyii jäy ajcxy Dios ytiy'ajt. ¿Nej co ca' ci'm mguydungixy nej ti myaj'ixpijccixy? Myaj'ixpijcpy ajcxy jacjadyii jäy co ca' huaad ymeetzcixy, e miich ci'm ajcxy meetzp. ²² Miich ajcxy myaj'ixpijcpy jacjadyii jäy co ca' huaad migapxtigoy töxyjäy ajcxy, e ¿miich ajcxy nej co mmigapxtigooygixy töxyjäy ajcxy? Miich ajcxy ci'm minamb co ca' huaad yajhuindzigiy tzaaboch quipychech, e miich ajcxy ci'm mdzachmeech je meeñ ma je tzajptijc ma je quipychech y'ity. ²³ Miich ajcxy mdzachnaygömáayigixy co mguydungixy Dios ycötujcín. Miich ajcxy m'ixtijy Dios mïid co ca' ajcxy mguyduni yi' ytiy'ajt. ²⁴ Paady jadu'n jaybety miiñ ma Dios ñecy, ma jadu'n ymïna'ñ: “Com co miich ajcxy mdundigooygixy, paady ycixpi yi jacjadyii jäy ajcxy nigapxy ni'ojiy Dios yxii.”

²⁵ Co ajcxy mguyduunip Dios ycötujcín, huin'it Dios xytunipcuendi co miich ajcxy mïidity je tiy'ajt ma mninïcx co Dios xyjäy'adyii. Co ca' ajcxy mguyduunip Dios ycötujcín, huin'it Dios ca' xytunipcuendi co miich mïidity je tiy'ajt ma mninïcx co Dios xyjäy'adyii. Jadu'n nipaady nej jihuïy ca' mdiy'ajttiyity. ²⁶ Co yi jacjadyii jäy ajcxy huídibi ca' mïidity tiy'ajt ma ñinïcx, e cuyduni ajcxy Dios ytiy'ajt, jadu'n nej ajcxy ytiy'ajttiyity. ²⁷ Yi jacjadyii jäy co ajcxy cuyduñ Dios ytiy'ajt, yi' ajcxy capxpaady'idipy ma Dios. E miich ajcxy judíojäy mbocycähuip miich ajcxy, oy miich ajcxy mjamïidity ixypy Dios ycötujcín huídibi cojaayíp, pen ca' mguydungixy. ²⁸ Je iixpejt janchypi co pinjaty Dios yjäy'ajtyp, canan je' je iixpejt huídibi ymïid ma ninïcx. E nañ jadu'n canan je' je tiy'ajttihuïi cötujcín huídibi jäy cuydun jecy'ajty. ²⁹ Je iixpejt janchypi co pinjaty Dios yjäy'ajtyp, je' je' je iixpejt huídibi ymïid ma yjot yhuinma'ñ, je oyjot oyhuinma'ñ huídibi ymïid, je iixpejt co je Espiritu Santo ti yajhuächyii yjot yhuinma'ñ, canan je' je tiy'ajt co ti cuyduñ je jecyíp cötujcín huídibi cojay ijtp. Yi jadu'mbi jäy ajcxy cömay'idipy ma Dios, e ca' ycömay'ida'ñ ma jäy ajcxy.

3

¹ Pen tiy'ajt jadu'n nej nmïna'ñich, ¿ti jäygidaacín yi judíojäy ajcxy ymïid ma Dios huídibi yi jacjadyii jäy ajcxy ca' mïidity? ¿Ti jäygidaacín ajcxy ypatpy co ajcxy mïidity tiy'ajt ma ñinïcx co Dios yjäy'adyii? ² Yi judíojäy ooy canaagnax oy'ajtin jamïidity. Tim jayijp Dios yajnibijci ajcxy yi' ycötujcín yi' y'ayuc huídibi cojaayíp. ³ ¿Nej mdiy co Dios ca' cuyduna'ñ yi' y'ayuc mïid yi' judíojäy ajcxy mïid co nijejity judíojäy ca' cuyduñ yi' ycötujcín? ⁴ Dios ca' jadu'n huinma'ñ mïidity nej jäy ajcxy huinma'ñ mïidity. Oy ixypy

nidüg'óciy jäy y'anidaaccixy, Dios ca' y'anidäga'ñ nimina. Paady jadu'n jaybety miiñ ma Dios y'ayuc co David jadu'n ymïnañ:

Ñejhuñhuipy jäy ajcxy co miich, Huindzin Dios, tudägy mguyduñ yï m'ayuc. Ca' huaad pinjaty ymïna'nip co ca' miich mguyduñ yï m'ayuc.

⁵ Pen Dios cömaybidzimipy müd ajt nbocy ycixpi, ¿nej tiy'ajt jadu'n nej jäy ymïnaangixy co Dios ca' oy ytuñ, co xychaachytuunim müd ajt nbocy ycixpi? ⁶ Ca' yjadu'nity. Co ixypy yjadu'nity, Dios ca' yï tiydunipy naaxhuiñjây müd ajcxy ypocy ycixpi.

⁷ Co ixypy ytiy'ajtiy jadu'n nej jäy ymïnaangixy co Dios ooy yjotujcity co ca' xychaachtunipyich müd nbocyich ycixpi, jac'oy co ixypy ndundigooyich, jigix Dios janch ycömaybidzimipy. ⁸ Jac'oy ixypy nmïnaanım: “Tzoc tundigooyım jigix jëbi Dios cömay ypidzimipy.” Ixti nijëjity jäy ti xyñihuambetyich co ñich jadu'n ti nmïna'ñich. Ca' jadu'n nmïna'ñich co Dios jäy tzaachtunipy ninigoob. Dios chaachtunipy pocyjäy ajcxy, com paatip ajcxy jadu'n yï tzaachypi.

Nidüg'óciy ñch ajt nbocymüidity

⁹ ¿Nej janch jadu'n co ñich ajcxy huídibi judíojäy, jac'oyjäy ñch ajcxy ca'ydi yï jacjadyii jäy ajcxy? Ca' yjadu'nity, ca' ñich ajcxy njac'oyjäyity. Com ti jayijp nyaj'ixpicyich co tüg'óciy jäy ajcxy yajpaady pocymüid, yï judíojäy, etz nañ jadu'n jacjadyii jäy ajcxy. ¹⁰ Com jadu'n jaybety miiñ ma Dios ñecy ma jadu'n ymïna'ñ:

Ca' ji ni tüg jäy tudäcpi, ni tüg.

¹¹ Ca' ji ni pin huídibi huinjhuñyb Dios ytiy'ajt. Ni pin huídibi ixtaayb Dios ytiy'ajt.

¹² Nidüg'óciy jäy ti ixmajtcixy Dios ytiy'ajt. Quipxy ycapxy ajcxy ytumyb co ytundigoogyixy. Ca' ji ni pin, pin huädz oy yjot oy yhuinma'ñ tumb, ca' ji ni tüg.

¹³ Yï jäy ajcxy ooy ycapxtigoogyixy, oy ajcxy yhuin'ñ müd y'ayuc. Jadu'n ajcxy yöcpajc nipaady nej tüg öcpi jut huídibi ahuädz. Ooy ajcxy yajtzachïy müd y'ayuc jadu'n nej jihuïy tza'ñ chüch.

¹⁴ Ooy ajcxy ycapxtigoogyixy. Ooy ajcxy jibic ayuc capxcixy.

¹⁵ Müd yinjaty huenjatypi ayuc, mic'amy ymigüg yaj'o'ccixy.

¹⁶ Ma ajcxy yhuidity ooy midundigoogyixy ymigüg, e nañ yecy ajcxy tajin mayın.

¹⁷ Ca' ajcxy nejhuñyixy nej huaad chinaaygixy jotcujc, ca' ma ti tzip ti capxy.

¹⁸ Ni cahuinmaaygixy nej Dios tzigüygixipy.

¹⁹ Tüg'óciy ayuc ycojaayity ma Dios ycötujcin necy, mic'ajt müdpi müd yï jäy ajcxy huídibi yajmij'ajtp je cötujcin. Dios ti pidägy yï ycötujcin, jaydëbi pinjaty tundigooyb, huaad ca' ti anñ tuñ ma Dios. Dios ytiydunipy tüg'óciy jäy ajcxy müd yï ycötujcin. ²⁰ Dios ca' capxpada'ñ co ytudägyity, müd co ti cuydunyii ycötujcin. Dios ti pidägy ycötujcin jaydëbi nejhuñyım co ajt nbocymüidity.

Yï alma nidzoocin, hue' yajpaady müd mibijcin

²¹ Jadachambi Dios xyajnejhuñyım jemybi tiy'ajt jadu'n nej tudägy'ajtin jëb nbaatım ma yï', e jada jemybi tudägy'ajtin tiy'ajt, ca' yï' yjadu'nity nej yï tiy'ajt huídibi yajpatp ma Dios ycötujcin jecy'ajtpyi. Per yï Dios y'ayucnajtcapxıybi ñecy etz Dios ycötujcin necy yecy tiy'ajt jecy'ajty co Dios xymöhuaanım tudägy'ajtin. ²² Jadu'n Dios yaj'ahuimbidaangixy tudägy tüg'óciy jäy huídibi mibijcp Jesucristo, ca' ñejity pinjäy ajcxy, pen judíojäy o pen ca' judíojäy ajcxy. ²³ Com nidüg'óciy naaxhuiñjây ti ytundigoogyixy. Ni tüg jäy yhuädz'ajtin ycanaybadyii müd Dios yhuädz'ajtin y'oy'ajtin.

²⁴ (Müd co nidüg'óciy jäy ytundigoogyixy), paady ycixpi Dios mijmay'ajt mij'oy'ajt tuñ ninigoob müd tüg'óciy jäy ajcxy, e Jesucristo ti cojuydäy tüg'óciy ajcxy ypocy, e jadu'n yaj'ahuimbity tudägy nidüg'óciy jäy ajcxy huídijaty mibijccixp Jesucristo. ²⁵ Dios yquejx y'ung ya naaxhuiñ, jaydëbi huinmeecxip jäy ajcxy ypocy, müd co Jesucristo ti y'ögy müd ajcxy ypocy ycixpi. Dios yhuinmeecxip jäy ajcxy ypocy co ajcxy mibigipy Jesucristo. Jayijp ca'ni anajty Jesucristo miiñ ya naaxhuiñ, Dios ooy mımecxtujcy jäy ajcxy, ca'

anajty m̄id̄ity jotcöduuyb jäy ajcxy ypocy. ²⁶ Jadachambi x̄i tiempo Dios ti yaj'oȳiy jadu'n nej jēb huinmeecxipy jäy ajcxy ypocy, e jadu'n yaj'ahuimbidity ajcxy tudägy ma yí yhuinduu. Jadu'n Dios tuñ jigix ñiguëxigipy co Dios tudägy yí, e tudägy'adaamni yí, co cöbicy jäy, yí pinjaty mibijcp Jesucristo.

²⁷ ¿Ti huaad jäy ajcxy tungixy huidibi jēbi m̄id̄ ñaygömayiyb ma Dios? Ca' ni ti. ¿Na'amy co yjadu'nity? ¿Nej jēbi ajcxy ñaygömayiyb m̄id̄ co yajmij'ajtcixy Dios ycötujc̄in? Ca' yjadu'nity. Ca' huaad ñaygömáygixy c̄i'm, com Dios ti yaj'ahuimbity jäy ajcxy tudägy huidibi mijpidacp Jesús. ²⁸ Paady nm̄ina'ñich co jäy ajcxy y'ahuimbity tudägy co ajcxy mibicy Jesucristo, e canan co janch ypaad jacuydungixy canaag cötujc̄in.

²⁹ ¿Nej miich ajcxy mdijcixy Dios ytuñ m̄id̄ ac yí yí judíojäy ajcxy, e ca' jacm̄id̄ pinjaty? Ca' yjadu'nity. Dios tuumb m̄id̄ janch nidüg'óciy jäy ajcxy. ³⁰ Ji tūgpajc Dios, e yí tú'ciy ytuñ m̄id̄ judíojäy, etz nañ jadu'n jacjadyii jäy ajcxy. Dios yaj'ahuimbijtaayb tudägy nidüg'óciy jäy ajcxy co ajcxy mibijcixy Jesucristo. ³¹ Co jadu'n nbaatim ndudägy'ajtin m̄id̄ co nm̄ibijc̄im Jesucristo, ca' nm̄inaanim Dios anajty yí ycötujc̄in je jecyip nya-jcödigooyim. Hue' janchtiy ñigi anajty nm̄ic'ajtmooyim Dios ycötujc̄in.

4

Je ijxpejt huidi Abraham yejc

¹ ¿Nej n'ocm̄inaanim? ¿Ti oybi ti paady ma Dios je Abraham ñich ajt nm̄ij'ap nm̄ijteedy? ² Co ixipy Dios Abraham tudägy ti ix̄y, m̄id̄ co oybi ti tuñ, jēbi Abraham ixipy ñaygömayii. Per ca' huaad c̄i'm ñaygömayii ma Dios. ³ Jadu'n jaybety ymiñ ma Dios ñecy ma jadu'n ym̄ina'ñ: “Abraham ym̄ijpidaaci Dios, e paady Dios jadu'n cöbijcy Abraham jadu'n nej tūg tudägyjäy.” ⁴ Je jäy huidibi ymuju'ñ patp m̄id̄ ytung ycixpi, jada meeñ huidibi ymuju'ñ'ajtpy ca' ñigoo ñimöyii, hue' tim paatip jadu'n m̄id̄ ytung ycixpi. ⁵ Yí jäy huidibi ca' jijp'ixy co tudägy'ajtin pada'ñ ma Dios m̄id̄ oy'ajtin ycixpi huidibi ytumyib, jēyí ym̄ibijc̄py ym̄ijpidacpy co Dios yaj'ahuimbida'ñyii tudägy. Yí jadu'mbi jäy tudägy'ajtin ypadamy m̄id̄ ym̄ibijc̄in ycixpi. ⁶ Jaybety ymiñ ma Dios ñecy co je David jecy'ajty nim̄ydacy tūg jäy huidibi ooy anajty jotcujc ñayjihuiyii m̄id̄ co Dios ti y'ixyii jadu'n nej jihuiy ytudägyjayity m̄id̄ ym̄ibijc̄in ycixpi, e ca' nm̄inaanim m̄id̄ oyjäy'ajtin ycixpi huidibi ytumyib. ⁷ David jadu'n ym̄inañ:

Jotcujc je jäy ajcxy huidibi ypocy ti yhuinmecxyii, huidibi ypocy ti yajtigoyii.

⁸ Jotcujc je jäy huidibi Dios cöbijc̄ip jadu'n nej jihuiy ca' ypocy ym̄id̄ity.

⁹ ¿Nej janch tiy'ajt jadu'n co jada jotcujc'ajtin huidibi David ñim̄ydac jecy'ajty, co ac yí judíojäy yí ajcxy padaamb huidijaty m̄id̄ tiy'ajt ma ñin̄icx co Dios yjäy'adyii? Ca' yjadu'nity, yí jacjadyii jäy nañ jadu'n yí ajcxy pada'ñ jotcujc'ajtin. Ti nm̄ináangixyich co Abraham ym̄ibijc̄i Dios, e Dios ycöbijc̄i jadu'n nej jihuiy ytudägyity. ¹⁰ ¿Nej mdijy Dios ycöbijc̄i Abraham jayijp ca' anajty yajtiy'ajttiyñi? o ¿ti anajty yajtiy'ajttiy? Dios ycöbijc̄i Abraham jadu'n nej jihuiy ytudägyjäyity ca'ni anajty pidacy tiy'ajt ma ñin̄icx co Dios yjäy'adyii. ¹¹ Jayijp anajty Abraham ti mibicy Dios, e ti anajty Dios ycöbigyii. Jac'axam Dios Abraham je cötujc̄in mooy co huen tiy'ajttihuiy y'ung etz y'ap y'oc. Je' je' ijxpejt'ajtp co Dios anajty jayijp ti ycöbigyii jadu'n nej jihuiy ytudägyjäyity, ca'ni anajty ym̄öyii cötujc̄in. Co Dios jadu'n ytuñ m̄id̄ Abraham jadu'n nipaady nej jihuiy Abraham nm̄ijteedy'ajtim ñich ajt nidüg'óciy huidibi cham mibijcp Jesús. ¹² Abraham nañ jadu'n ñim̄ijteedy'ajtyp yí judíojäy huidibi mibijcp mijpidacp Dios tim jadu'n nej yí mibicy anajty Dios, jayijp ca'ni anajty m̄id̄ity tiy'ajt ma ñin̄icx co Dios yjäy'adyii. Jadu'n nipaady nej jihuiy Abraham ca' nm̄ijteedy'aty yí judíojäy huidibi ca' mibicy Dios.

Je huidibi Dios ti xyaj'ahuan̄iyim ti ycixy yca'px m̄id̄ je mibijc̄in

¹³ M̄id̄ co Abraham etz y'ap y'oc ym̄ibijc̄py ym̄ijpidacpy anajty ajcxy Dios, e paady ana-jty Dios yaj'ahuimbida'anigixy tudägy, e paady Dios nimay Abraham co yí naaxhuiñybi

yí' ajcxy je' adaanip. Canan jadu'n ajcxy Dios ñimayi co ymöhüaanigixy je naaxhuiñybi müid co anajty nidüg'óciy ajcxy ti cuydungixy Dios ycötujcín. ¹⁴ Co Abraham etz y'ap y'oc padaangixy je naaxhuiñybi huidibi yaj'ahuaniiyi, müid co ajcxy ti cuydundaayi Dios ycötujcín, paady naadigi'ajtp ixypy co nmibijcim co Dios xyaj'ahuimbidaaním tudägy. E nañ naadigi'ajtp ixypy co Dios je Abraham ñimay: “Je naaxhuiñybi miich je' mje'adaanip, com ti xymibicyich.” ¹⁵ Je pinjaty mijpidaacp Dios ycötujcín je jecyip, Dios yi' tzaachytunaanip, com ca' cuydundaaygixy. Pinjaty ca' müidity Dios ycötujcín huidibi jaybetyip, ca' yi' midundigooygixy jadayaabi cötujcín.

¹⁶ Müid co Abraham anajty Dios ti mibicy, paady ycixpi Dios ñimaayi co je naaxhuiñybi yi' je'adaanip. Jadu'n Dios may'ajt tuñ müid Abraham, jaydëbi tüg'óciy pinjaty mibijcp Dios, tím jadu'n nej Abraham mibijcy Dios, jëbi ajcxy paatcixy yi' oy'ajtin huidibi Dios yajnimay Abraham co möhua'ñ je oy'ajtin huidibi yegamyb ninigoobi. Dios ycuydunamyb yi' y'ayuc müid tüg'óciy jäy huidibi mibijcp Dios, tím jadu'n nej Abraham anajty mibicy Dios, canan yí'yi judíojäy ajcxy padam oy'ajtin, com Abraham ijxpejt yejc ma tüg'óciy jäy ajcxy. ¹⁷ Ma Dios yhuinduu jadu'n nipaady nej jihuüy Abraham ñich ajt nmij'ap'ajtim nmijteedy'ajtim nidüg'óciy huidibi mibijcp Dios, com Abraham nañ jadu'n ymibijcypy anajty Dios. Com jadu'n jaybety ymiiñ ma Dios ñecy co Dios jecy'ajty jadu'n ñimay Abraham: “ñich miich nyajñibijcypy co miich mnimij'ap'adamyb mnimijteedy'adamyb tüg'óciy je mayjäy huindu'mybi naax huindu'mybi cajp.” E Dios ycuydunipy yi' y'ayuc com mic'ajt müid, ixti jaydëbi yajjugypigipy jadüg'oc jäy tüibi y'ó'ccixy. E nañ mic'ajt müid jaydëbi ane'min pidägy co huen yjii'adipy huidijaty ca' ca'tni.

¹⁸ Müid co Dios anajty ti ñimäyii co ymüid'adamyb may y'ap y'oc, paady ycixpi Abraham ti jipp'ixy anajty co Sara anajty y'ung'ixa'ñ. Canaag jimijt anajty jajjip'ixy co huen y'ung paadip. Ti anajty tiempo ñajxni mina y'ung'ixipy. Hue' Abraham ymibijc huidibi anajty Dios ti yajnimäyii co yi' müid'idamyb may'amy y'ap y'oc. Paady ti ni'ap'aty ti nideedy'aty may'amy y'ap y'oc. ¹⁹ Abraham ti anajty ymic'ajt ycixni com ti anajty ymijäyñi. Ymüid anajty migo'px jimijt, e nañ yi' ytöxyjc Sara ni tüg anajty ti yca'ung'ixy, per Abraham yjacmibijcyp anajty co Dios cuyduna'ñ y'ayuc müid yi'. ²⁰ Abraham ca' anajty ixmach yi' ymibijcín jadu'n nej anajty Dios ymüidity ymic'ajt jaydëbi cuydunip yi'y'ayuc. Chi Abraham ñibaty capxpaty Dios. ²¹ Com Abraham ti anajty huinma'ñ ypidägy ma Dios co yi' ymüid ymic'ajt jaydëbi ycuyduniyb yi' y'ayuc huidibi yaj'ahuaniiy. ²² Com Abraham ymijpidaacip anajty Dios y'ayuc, paady Dios anajty ti cöbicy Abraham, e jadu'n anajty ti yajnaxy nej jihuüy ytudägyjäyity.

²³ Dios ymoy Abraham jada y'ayuc huidibi jaybety, canan jëda'ajty Abraham yajmoy, nañ yajmoyday mayjäy. ²⁴ Nañ jadu'n jaybety miñ jada ayuc müid ñich ajt ycixpi. Dios nañ xycöbiganím jadu'n nej jihuüy ajt ndudägyjäyity müid co nmibijcim Dios huidibi ti yajjugypijcy anajty jadüg'oc ajt nHuindzin Jesucristo. ²⁵ Dios ycíyejc Jesús huen yaj'ögyii müid ajt nbocy ycixpi. E nañ Dios yajjugypijc Jesús jadüg'oc jaydëbi xyaj'ahuimbijtim tudägy ma Dios.

Je nej yhuimbizimni co Dios xycöbijcim tudägyjäy

5

¹ Müid co nmibijcim nmijpidaacim ajt nHuindzin Jesucristo, paady Dios ti xyaj'ahuimbijtim tudägy. E müid co Dios ti xyaj'ahuimbijtim tudägy, paady jotcujc n'ijtim müid Dios. ² Co nmibijcim nmijpidaacim Cristo, chi nbaatim je may'ajt je oy'ajt huidibi Dios ytumyb müid ñich ajt, e jadu'n oy n'ijtim müid Dios, ca' ma ti tzip. Nañ ooy njotcugiiyim, müid co njjip'ixxim co nbadaaním Dios y'oy'ajtin. ³ Canan jëda'ajty nmijotcujc'ajtim co nbadaaním Dios y'oy'ajtin, nañ jadu'n tzoc mijotcujc'ajtim ayo'n tzaachypi. Com nejhuüyim co nminajxim nyajnajxim tzaachypi, huin'it jëbi nyajtuním

mecxtujcin. ⁴ E co nyajtunim mecxtujcin, cömay najxim ma Dios, e co anajty cömay ti nnajxim, chi njijp'ijxim co nbadaanim oy'ajtin ma Dios. ⁵ Com njijp'ijxim co nbadaanim Dios y'oy'ajtin, chi ca' ndajim nmayim com Dios ti yi' yEspíritu Santo xy'adigüyim xyjottigüyim huidibi xyajnejhuiyim jadu'n nej Dios xychojcin xyjihuiyim.

⁶ Jecy'ajty co anajty ca'ni Jesucristo ymiñ, je naaxhuiñjyäy ca' anajty mic'ajt müdity nej ci'm y'ahuimbijtcixipy tudägy. Co yhuaad'ajtni je xii je tiempo huidibi Dios ti yaj'ixtägy, huin'it Cristo y'o'cy müd ich ajt nbocy ycixpi müd co ndigooyim müd Dios ytiy'ajt. ⁷ Co ixyipy n'ijxtaayim pinjaty codinähuij tüg jäy tudägy ma yi' o'cin, ca' ni pin nbaatim. Co ixyipy n'ijxtaayim pinjaty codinähuaamyb tüg jäy huidibi ooy ycomayity ma yi' o'cin, ca' yjegyty co nbaatim tüg metz. ⁸ Per Dios yajniquëxicy jadu'n nej xychojcin xyjihuiyim mijcajee co quejxy Cristo huen o'cy müd ajt nbocy ycixpi, oy anajty ich ajt ooy njacpocytunim. ⁹ Cristo ti xyaj'ahuimbijtim tudägy co ñi'py ti temy ti yocy müd ajt nbocy ycixpi, e nañ Cristo niği may'ajt tunañ müd ich ajt ycixpi co anajty xyajnidzögaanim ajt n'alma, jadu'n nej Dios tzaachytunañ naaxhuiñjyäy müd ajcxy ypocy ycixpi. ¹⁰ Co anajty ca' Cristo ymiñi ya naaxhuiñ, huin'it anajty nmidzip'ajtim Dios. Je tzip capxy ti Dios yaj'oyiy co quejxy y'ung ya naaxhuiñ, e y'o'cy müd ajt nbocy ycixpi. Müd co Cristo xycodinaayim ma yi' o'cin, paady niği xypubejtim xypudigüyim cham co yajpaady juugy. ¹¹ Canan jada'ajty co Jesucristo xyajnidzögaanim ajt n'alma, nañ jadu'n tzoc xondaacim müd co n'ijtim müd Dios, müd je may'ajt huidibi ajt nHuindzin Jesucristo ti tuñ müd ich ajt ycixpi co yaj'oyiy je tzip nej anajty Dios nmidzip'ajtim, jëbi jotcujc n'ijtim müd Dios.

Adán etz Cristo

¹² Müd jada ycixpi co yi' pocytunii chondacy jecy'ajty ya naaxhuiñ müd tügpi jäy. E co jäy ytundigoy oga'n müd Dios, paady ycixpi je o'cin ytigüy ya naaxhuiñ. Müd co tüg'óciy jäy midundigooygixy Dios, paady tüg'óciy jäy patcixy yi' o'cin. ¹³ Janch tiy'ajt jadu'n co jäy ajcxy ytundigooy jecy'ajty jayijp ca'ni anajty Dios yecy yi' ycötujcin cojaaybi, e co ca' jäy anajty ajcxy cötujcin müdity jecy'ajty, paady ca'pin tiyduñ ajcxy nej ajcxy ytundigooy. ¹⁴ Ca' ñejity, oy ajcxy anajty ca' müdity Dios ycötujcin, nañ jadu'n y'o'ctay ajcxy, chondacy müd Adán, ixti yja'ty ma Moisés yxi ytiempo. Nañ o'ctay jäy ajcxy huidibi tigachjaty tundigooy, ca' yjadu'nity nej Adán oga'n ytundigooy. Ich ajt nninix ymiid je jibicpi huidibi nbaatim ma Adán. Per ajt njemyjot njemyhuinmañ nbaatim ma Cristo.

¹⁵ Je pocytunii huidibi Adán yajtzondac, ca' naybadyii müd je tudägy'ajtin huidibi Dios ti xyñimooyim. Müd je pocytunii ycixpi huidibi tüg jäy ti yajtzondägy, tüg'óciy jäy öcin ti paady. Dios müd tüg yëdjic, je Jesucristo, mijmay'ajt tuñ müd jäy ajcxy ycixpi co yaj'ahuimbijtcixy tudägy, chi mayjäy tudägy'ajtin ti paady. ¹⁶ Per je tudägy'ajtin huidibi Dios xyñimooyim, ca' jadu'n naybadyii müd huidibi Adán ytuun. Müd co Adán ytundigoy tügtecy müd Dios, paady ycixpi mayjäy o'cin ti paady müd tüg pocy ycixpi. Müd co Dios ti xyñimooyim tudägy'ajtin müd Jesucristo, paady mayjäy tudägy'ajtin y'oy'ajtin ti patcixy huidibi mibijcp Cristo. ¹⁷ Müd co tüg jäy capxycömidodacy Dios, paady tüg'óciy jäy ti patcixy yi' o'cin. Müd co tüg jäy, je Jesucristo, may'ajt oy'ajt tuñ co xyaj'ahuimbijtim tudägy, paady tüg'óciy jäy ajcxy huidibi mibijcp Jesucristo ypadaangixyp jotcujc'ajtin etz nañ chinähuaangixy jüby tzajpjoty ma Jesús y'ane'my.

¹⁸ Müd co tüg jäy ytundigoy oga'n, paady nidüg'óciy je mayjäy ypocycäy ajcxy, e patcixy yi' o'cin. Nañ tim jadu'n müd tüg jäy huidibi ti chinäy tudägy, Dios mayjäy yaj'ahuimbijty ajcxy tudägy, e ti patcixy yjugy'ajtin huidibi ca' ycixipy ytigoyipy nimina xii. ¹⁹ Müd co tüg jäy capxycömidodacy Dios, paady tüg'óciy jäy ti patcixy je pocy. Nañ müd co tügpi jäy capxymidoy Dios, paady je mayjäy tudägy'ajtin ti patcixy huidibi mibijcpi Jesucristo.

²⁰ Co Dios moy jäy ajcxy yi' ycötujcin huidibi cojaayip, chi niği jäy ajcxy nejhuiyigixy co ypocytungixy. Je may'ajt oy'ajt huidibi Dios ytumy, niği yi' y'oyity, ca'ydi je mijpocy huidibi jäy ajcxy ytungixyp. ²¹ Tim jadu'n nej co jäy ypocytungixy, huin'it ajcxy pocymid chinäyigixy, ixti mabaad anajty y'öccixy müd pocy ycixpi. Nañ tim jadu'n co Dios

may'ajt tuuñ co yaj'ahuimbity jäy ajcxy tudägy, huin'it Dios ane'my yí' ajcxy chinaayin müid tudägy huinma'ñ, etz nañ xymöhuaanim jugy'ajtin huídibi ca' ycixipy ytigoyipy nimina, co nmijpidaacim ajt nHuindzin Jesucristo huídibi yjugy'ajtin yejc müid ajt nbocy ycixpi.

O'cy müid yí' pocy ycixpi, jugy'aty müid Cristo ycixpi

6

¹ ¿Nej n'ocmīnaanīm? ¿Tzoc ooy nīgī tundīgooyīm jīgīx Dios nīgī may'ajt tunīpy müid ĩch ajt? ² Ca' jadu'n ytiy'ajtiy, ca' huaad njacpocytuunīm. Co nmībijcīm Jesucristo, chi jadu'n nipaady nejhuīy ti n'o'cim, e cham ca' n'ijtim pocymüid. ³ ¿Nej ca' mnejhuīyīgīxy jada tiy'ajt? Co nmībejtīm müid Jesucristo yxī, chi n'ijtim müid Jesucristo. Jadu'n nipaady nej jihuīy ti n'o'cim quipxy müid Cristo co yí' y'o'cy müid ajt nbocy ycixpi. ⁴ Co ĩch ajt nmībejtīm jadu'n nipaady nej jihuīy ti n'o'cim, e ti nnaaxtigīyīm quipxy müid Jesucristo. Dios Teedy müid ymic'ajtin oybi yajjugypījcy Cristo co anajty ti y'ögy, chi Cristo paty jemybi jugy'ajtin, nañ jadu'n ĩch ajt ti nbaatīm jemybi jugy'ajtin quipxy müid yí', paady copīcy ndzīnaayīm müid jemybi jot jemybi huinma'ñ.

⁵ Co nmībijcīm Jesucristo, chi n'ijtim müid yí', co yí' ti y'ögy, jadu'n nipaady nej jihuīy ti n'o'cim quipxy müid yí'. Co Jesucristo yjugypījcy müid jemybi yjugy'ajtin, nañ jadu'n ĩch ajt nbaatīm jemybi jugy'ajtin quipxy müid yí'. ⁶ Nejhuīyīm ĩch ajt nej anajty jībic-jot jībic-huinma'ñ nmīd'ajtim jayīp'aty ca'ni anajty nmībijcīm. Jadu'n nipaady nej jihuīy ajt njībicjot njībic-huinma'ñ ti y'ögy quipxy müid Cristo co yí' y'o'cy cruudzcīxy. Cristo ti y'ögy müid ajt nbocy ycixpi, jīgīx jēbi n'ijxmajtzīm pocytunī huinma'ñ, etz jīgīx jēbi je pocytunī ca' xyjac'ane'mīm ajt njot nhuinma'ñ. ⁷ Com pīnjaty ti y'ögy, yí' ypocytunī ca' ti mic'ajt jacmīdīty ma yjot yhuinma'ñ. ⁸ Pen jadu'n nipaady nej jihuīy ti n'o'cim quipxy müid Cristo, paady ndzīnāhuaanim njugy'adaanim quipxy müid yí'. ⁹ Nejhuīyīm co Cristo ti yjugypījcy co y'o'cy, e ca' yí' y'öga'ñ jadüg'oc. Yí' o'cin ca' ti mic'ajt jacmīdīty ma Jesucristo. ¹⁰ Co Cristo ti y'o'cy müid jäy ypocy ycixpi, chi y'ögy tüg tecypajc müid nidüg'óciy jäy ajcxy ycixpi. Co Jesucristo yjugypījcy, chi tüg'óciy huídibi yí' ytumyb ma yí' chinaydac yjugy'ajttac, yí' ytumyb müid Dios ycixpi. ¹¹ Nañ jadu'n miich ajcxy mhuinma'ñypīdaaccīx jadu'n nej jihuīy ti m'öccīxy, e yí' ypocytunī ca' ti mic'ajt jacmīdīty ma miich ajcxy mdzīnaayin. E jadachambi xī tiempo tzīnaaygīx müid Dios ycixpi quipxy müid Jesucristo ĩch ajt nHuindzin.

¹² Paady ycixpi ca' huaad xy'ane'mgīxy je jībic-huinma'ñ huídibi ajcxy mninīcx yjanijot'ajtpy. ¹³ Ca' huaad mgīyējccīxy yí' mninīcx ma pocytunī. Naygīyējīgīx ma Dios, ixmajtzcīx yí' pocytunī. Jadu'n nipaady nej jihuīy ti m'öccīxy, e ti mjugypījccīxy jadüg'oc. Hue' janchtiy cīyējccīx yí' mninīcx ma Dios, jaydēbi mdzīnāaygīxipy müid ajcxy tudägy mjot mhuinma'ñ, e cuydungīx Dios chojcīn. ¹⁴ Jadachambi xī tiempo ca' miich ajcxy mdzīnaaygīxy pocymüid, jadu'n nej jecy'ajty ajcxy mdzīnaaygīxy co anajty ajcxy mguydungīxy Dios ycötujcīn je jecyīp. Hue' janchtiy tzīnaaygīx müid Dios ycixpi, com Dios mij may'ajt ti tuñ müid miich ajcxy.

Tüg ijxpejt huídibi yajpatp ma n'ijtim yajtuñ

¹⁵ ¿Ti huaad nduunīm? ¿Nej jēbi huaad njacpocytuunīm? Com Dios mijmay'ajt ti tuñ co ti jöch ajt nbocy etz nxīhuin, e Dios ycötujcīn, je jecyīp, ca' xyjacyajpocycāhuim. Ca' huaad njacpocytuunīm. ¹⁶ ¿Mnejhuīyb miich ajcxy jada tiy'ajt? Co ixīipy pīnjaty ñaygīyēgyīi co ytuna'ñ müid tüg huindzin huídibi mic yajtumb, copīcy co je tumbi capxymīdohūipy je yhuindzin. Nañ tim jadu'n nipaady müid pocytunī. Pen mnaygīyējccīp müid pocytunī, huin'it anajty pocy xy'ane'my ma mdzīnaayin, ixti mabaad anajty m'ögy müid mbocy ycixpi. Co mnaygīyējīgīxipy ma Dios, huin'it ajcxy mgapxymīdohūipy Dios, e

mdzinähuij ajcxy tudägy. ¹⁷ Jecy'ajty miich ajcxy anajty pocy xy'ane'mgixy, co jibic-huinma'ñ mdungixy. Nyajnajxpyich jäygidaacin ma Dios co jadachambi tiempo ti mgöbijccixy cixyot huinjot Dios ytiy'ajt huidibi xyaj'ixpijccixp, e mgapxymidoogixy Dios. ¹⁸ Cristo ti xyaj'a'oyiijy ajcxy mjot mhuinma'ñ, ca'ydi mjactzinaaygixy pocymiid. Ti mhuinma'ñ mbidaaccixy co mgapxymidohuaangixy Dios e mdzinähuaangixy tudägy. ¹⁹ (Ngapxhuijpyich miich ajcxy cham miid naaxhuiñyäjy y'ayuc ytiy'ajt, com ca' yajxon mhuinjihuuygixy Dios y'ayuc ytiy'ajt.) Jadu'n nej jecy'ajty co ca' anajty mmibijccixy Cristo, ooy anajty mnaygiyéjigixy xii ya ma jibic-huinma'ñ, e mdundigooygixy xii ya miid mninix. Ooy miich anajty ajcxy miidity jibicpi ma mjot mhuinma'ñ, ooy anajty mdundigooygixy. Jadachambi xii tiempo naygiyéjigix ma Jesucristo, jigix jëbi huaad mdungixy miid tudägy jot tudägy huinma'ñ, etz jigix jëbi huaad mdzinaaygixy miid huadz jot huadz huinma'ñ.

²⁰ Co anajty yi jibic jot jibic-huinma'ñ xy'ane'mgixy, chi ca' je oyot oyhuinma'ñ anajty xy'oc'ané'mgixni. ²¹ ¿Ti jotcuje'ajtin miich ajcxy ti mbaatcixy co jibic jot jibic-huinma'ñ mdungixy huidibi jadachambi tiempo mdzöydu'n'ajtip ajcxy? Yi jibic jot jibic-huinma'ñ xyyajnicxp ajcxy ma yi o'cin. ²² Jadachambi xii tiempo Dios ti yaj'oyiy nej jëbi m'ixmajtzcixipy yi pocytunii, ca' huaad mjactzinaaygixy pocymiid. Ti m'ahuimbijtcixy Dios ytumbi, jadayaabi tzinaayin xymöhuip ajcxy mjotcuje'ajtin. Tiydudägy cham tzinaaygix miid Dios ycixpi, e mbaadip ajcxy jugy'ajtin huidibi ca' ycixipy ytigoyipy nimina. ²³ Yi pocytunii ycoju'ñ yi' je' yi o'cin. Per je huidibi Dios xyñimooyim, hue' je' je' jugy'ajtin huidibi ni caminaxii ycixipy ytigoyipy co n'ijtim miid ajt nHuindzin Jesucristo.

7

Tüg ijxpejt huidibi yajpatp ma picychinaayin

¹ Miich ajcxy migügtijc huidibi ti m'ixpicy Dios ycötujcin huidibi Moisés yjaay, mnejhuuyb miich ajcxy co yi naaxhuiñyäjy ycötujcin ymiid mic'ajt ma ajt ndzinaayin, ixti mabaad anajty n'o'cim. ² Paady co tüg töxyjäy ycivilbicy miid tüg yëydijc, ca' huaad ixmach ñäy mabaad china'y yjugy'aty. Co janchtiy anajty je töxyjäy ñiyëydijc ti y'öcni, huin'it anajty ca' ocmiidñ ñäy y'ane'min. ³ Ooy anajty mij ytundigoy je töxyjäy co ypijipy miid huingbi yëydijc pen jugy'ajtni je ñäy. Cooni janchtiy anajty ñiyëydijc ti y'ögy, huin'itni janchtiy jëbi ypijy miid huingbi yëydijc, e ca'p je' anajty ytundigoy.

⁴ Miich ajcxy nmigügtijcich, judíojäy huidibi mibijcp Cristo, jayijp co anajty ca'ni mmibijccixy Cristo, je Dios ycötujcin huidibi Moisés yjaay xy'ane'mgixp anajty ma mdzinaayin. Jadachambi xii tiempo yi jadu'mbi cötujcin ca' yi xyjac'ané'mgixni. Jadachambi Cristo ytiy'ajt xy'ane'mgixp, je Cristo huidibi Dios yajjugypijc jadüg'oc co y'o'cy. Jadu'n miich ajcxy nipaady nej je töxyjäy huidibi ñiyëydijc ti y'ögy, e ti ypijctigach. Cristo miich ajcxy xyñigohuajc'ajtp, jigix jëbi mdzinaaygixy miid Dios ycixpi. ⁵ Jayijp ca'ni anajty nmibijcim Jesucristo ooy anajty nguyduunim huidibi ajt nninix ñijot'ajt. Je huin'it tiempo anajty je jibic-huinma'ñ xy'ane'mim ma ajt ndzinaayin. Je' je' je' jibic-huinma'ñ huidibi Dios xycapx'adujcim miid ycötujcin. Miid co jibic-huinma'ñ xy'ane'mim anajty ajt ma ndzinaayin etz xyajnicxaanim anajty ma yi o'cin. ⁶ Jadachambi xii tiempo Dios ycötujcin huidibi Moisés xymooyim, ca' ti mic'ajt miidity ma ich ajt, ti n'ixmajtzim. Jadu'n nipaady nejhuuy ti n'o'cim, e njugypijcim jadüg'oc. Paady nguyduunim je jemybi tiy'ajt huidibi je Espíritu Santo xyajnejhuuyim. Canan je' anajty nguyduunim je jecy'ajtpy cötujcin.

Je pocy huidibi ijtp ma ich

⁷ ¿Nej n'ocminaanim? ¿Nej janch co je cötujcin huidibi Moisés xymooyim xyajpocytuunim anajty? Ca' yjadu'nity. Co ixypy ca' anajty nmididyich Moisés ycötujcin, ca' ixypy ich ti nnejhuuyich co ti ndundigooyich ma Dios ytiy'ajt. Co ixypy anajty ca'

n'ocnejhuïyich Moisés ycötujcin ma jadu'n ymïnañ: “Ca' mmigüg ni ti m'adzojciipy.” Ti ixypiy ndundigooyich, e ca' ixypiy nejhuïyich ma ti ndundigooyich. ⁸ Mïid co ïich jecy'ajty ooy anajty nnijot'atyich pocytunï, paady ycixpi ïich anajty ooy ndundigooyich. E jadu'n anajty nïgi ooy n'adzocyich, e jamïnam anajty Dios ycötujcin co ca' migüg ni ti m'adzojciipy. Co ixypiy Dios ca' jadu'n cötujcin ti pidägy, ni ca' ixypiy njihui'ñybicyich co ndundigooyich. ⁹ Jayijp co ca'ni anajty nhuinjihuïyich Dios ycötujcin, huin'it tiempo ca' anajty njihui'ñybicyich nbocy. E co nbatyich Dios ycötujcin, chi njihui'nybijcyich nbocy, e nañ ti nejhuïyich co tigoyaamich njugy'ajtin. ¹⁰ Dios ypidac ycötujcin jaydëbi nbáadibich jugy'ajtin huïdibi ca' ycixipy ytigoyipy. Per ca' jadu'n ti oyïy mïid ïich. Yi cötujcin ti xyajpocycäyich anajty, e jadu'n tigoyaambich anajty njugy'ajtin. ¹¹ Jadu'n anajty huinma'ñ nmïididyich co nguydundähuaamybich Dios ycötujcin huïdibi Moisés yjayhuï'm. Pero com ca' njatyich nej nguydundähuiyich, chi nbocycäyich ma Dios. Je pocytunï ti xyhuin'ññich, e mïid je' ycixpi nbadaamybich anajty yi o'cin.

¹² Tüg'óciy Dios yley etz Dios ycötujcin huïdibi cojay ijtp, huädz yi', tudägy yi', ooy yi'. ¹³ ¿Nej tigoyaambich anajty njugy'ajtin mïid co anajty nmïityich Dios oybi cötujcin? Ca' yjadu'nity. ¿Nej je Dios ycötujcin je oybi ti huimbïdzimy jibic mïid ïich co xyajtigoyaamich anajty njugy'ajtin? Ca' yjadu'nity. Nicxpich anajty ma yi o'cin mïid nbocyich ycixpi. Je Dios ycötujcin xyajnejhuïyich co o'cin nbadaamybich mïid nbocyich ycixpi. Jadu'n Dios pidacy ycötujcin ya naaxhuïñ, jigix jëbi jäy ajcxy nejhuïhuïpy co mij ajcxy ooy ytundigooy mïid Dios.

¹⁴ Nejhuïyim co yi Dios ycötujcin huïdibi Moisés xymooyim, jiiyby yi' choon ma Dios, paady yi' ooy y'oyity. ïich nninïcx yi' je' huïdibi nijot'ajtp yi pocytunï, paady ndzinäyich pocymïd. ¹⁵ Ca' nhuinjihuïyich huïdibi ndumyibich. Yi oybi huïdibi njatunaamybich, ca' njatyich nej ndunipyich. Yi jibicpi huïdibi ca' y'oychojcnity, yi' ndumyibich. ¹⁶ Co nduñich huïdibi ca' ndzocyich, jadu'n niqüexigy co Dios ycötujcin ooy oy yi', tudägy yi'. ¹⁷ Canan jotcujc ïich jadu'n co nbocytuñich. Yi pocy'adzojcin huïdibi nmïidich ma njot nhuinma'ñ, yi' yi' xyajtundigooybich. ¹⁸ Nejhuïybich co ca' ti oybi yajpaady ma ïich nninïcx. Ooy njatzocyich co oybi njatuna'ñich, per ca' njatyich nej oybi ndunipyich. ¹⁹ Je oybi huïdibi njatunaamybich, ca' njaty nej ndunipyich. Je jibicpi huïdibi ca' ndzocyich, je' ndumyibich. ²⁰ Co yi' nduñich huïdibi ca' ndzocyich, yi' je' je pocytunï huïdijaty njot'ajtibich nhuinma'ñ'ajtibich, yi' xyajtundigooybich.

²¹ Nbaatypich tüg tïy'ajt, co njatunaamybich oyhuinma'ñ, jiiipy jibicpi nbaadyich ma njot nhuinma'ñich. ²² Jotjoty huinma'ñjoty ooy nmïxondägyich Dios ycötujcin. ²³ E nañ mïidich jotjoty huinma'ñjoty yi jibicpi huïdibi mï'ijxtinaayb je oybi. Yi tundigoyï yajpatp ma ïich nninïcx. Yi nninïcxich yajpatp pocymïd.

²⁴ Paady ca' njotcücigyich. ¿Pïn jëbi xyñihua'ñich xyajnïdzögibich ma jadayaab nninïcxich huïdibi xyajnïcxpich ma yi o'cin? ²⁵ Dioscojuyip nyajnaxypich ma Dios co Dios, mïid ajt nHuïndzin Jesucristo, xyñihuaanim ma jada jibicpi huïdibi ajt nninïcx xyñi'jot'ajtim. Paady mïid n'oyjot n'oyhuinma'ñ nguyduñich Dios ycötujcin. Mïid nninïcxich nijot'atyich pocytunï.

8

Je jugy'ajt mïid je Dios yjihui'ñ ymïc'ajt ycixpi

¹ Jadachambi tiempo janchtïy Dios ca' tzaachytuna'ñ yi jäy ajcxy huïdijaty tú'ciy ijtp mïid Cristo Jesús, huïdibi ajcxy cuydumb Espïritu Santo chojcin, e ca' ajcxy tungixy nej je ninïcx nijot'ajtcixy. ² Je Espïritu Santo ti xyyajpidzimim ma yi pocytunï etz ma yi o'cin huïdibi yi jecy'ajty cötujcin ti xymooyim. Je Espïritu Santo xyajtzïnaayim huinixï, ïich ajt huïdibi ijtp tú'ciy mïid Jesucristo. ³ Mïid co ïich ajt ooy ninïcx ñijot'aty jibicpi, paady Dios xymooyim ycötujcin jecy'ajty jaybety. Per je naaxhuïñjäy yajtigoy ajcxy je

cötujcin ymajaa, e ca' ymadacy nicxy xyajtzinaayim miid tudägy jot huinma'ñ. Paady Dios yquejxy yci'm'ung huidi ti chinäy ya naaxhuiñ miid ñinicx jadu'n nej ñich ajt nmidity nninicx, jigix jëbi ndzinaayim miid huädz jot huinma'ñ. Jadu'n Dios y'ung chinay miid ñinicx, per ca' ni ti bocy anajty midity. E yi' ti y'ögy miid ajt nbocy ycixpi, e jadu'n yajtigoy je pocy huidibi ajt nīgix'ajtim. ⁴ Jadu'n Dios ytuuñ jigix jëbi xyajtzinaayim miid tudägyjot tudägyhuinma'ñ jadu'n nej yi' ycötujcin y'ane'my. Miid co nmid'ajtim Dios yjihui'ñ ymic'ajt ma ajt njot nhuinma'ñ, paady jëbi huaad ndzinaayim miid tudägy-jot tudägy-huinma'ñ.

⁵ Yi jäy ajcxy huidibi ca' midity Dios yjihui'ñ ymic'ajt ma yjot yhuinma'ñ, hue' ajcxy ycapxymidooyb je jibicpi huidibi ajcxy ñinicx ñijot'ajtpy. Yi jäy ajcxy huidibi tzinaayb miid Dios yjihui'n ymic'ajt ma yjot yhuinma'ñ, hue' ajcxy ycapxymidooyb je Espiritu Santo. ⁶ Yi jäy ajcxy huidibi capxymidoob je jibicpi huidibi ajcxy ñinicx ñijot'ajtpy, hue' ajcxy ypadaangixyp o'cin. Yi jäy ajcxy huidibi capxymidoob je Espiritu Santo, hue' ajcxy ypadaangixyp jugy'ajtin huidibi ca' ycixipy ytigoyipy, etz nañ ypadaangixyp jotcujc'ajtin. ⁷ Yi jäy ajcxy huidibi capxymidoob je jibicpi huidibi ajcxy ñinicx ñijot'ajtpy, hue' ajcxy Dios ymidzip'ajtpy, ca' capxymidohuaangixy Dios ycötujcin. Ni ca' jajtcixy nej ajcxy capxymidóogixipy Dios ycötujcin. ⁸ Ca' Dios jäygidägy yi' ajcxy chinaayin huidibi ajcxy capxymidoob je jibicpi huidibi ajcxy ñinicx ñijot'ajtpy.

⁹ Per miich ajcxy ca' mgapxymidoogixy je jibicpi huidibi mninicx nijot'ajtpy. Com miich ajcxy mmid Dios yjihui'ñ ymic'ajt ma mjot mhuinma'ñ, e mguydungixpy je Espiritu Santo chojcin. Huenpinity huidibi ca' midity Cristo yjihui'ñ ymic'ajt ma yjot yhuinma'ñ, ca' yi' y'ity miid Cristo. ¹⁰ Pen miich ajcxy ijtp miid Cristo, yi mjogy'ajtin ajcxy ca' ycixipy ytigoyipy nimina, miid co Cristo ti xyaj'ahuimbijtcixy tudägy ma Dios yhuinduu. Yi mnaaxnicx cixamb tigoyamb yi'. ¹¹ Pen ijtp ma miich ajcxy mjot mhuinma'ñ je' yjihui'ñ ymic'ajt je huidibi yajjugypijc jadüg'oc je Cristo co y'o'cy. Nañ jadu'n miich ajcxy Dios xyajjugypigaangixy jadüg'oc, co anajty ti m'öccixy, miid yi' yjihui'ñ ymic'ajt huidi yajpaatp ma miich ajcxy mjot mhuinma'ñ.

¹² Miid co nmid'ajtim Dios yjihui'ñ ymic'ajt paady ycixpi, miich ajcxy migügtijc, copicy ngapxymidoohuim je Espiritu Santo, e ca' huaad ngapxymidoohuim je jibicpi huidibi ajt nninicx ñijot'ajtpy. ¹³ Pen ooy ajcxy xytimy'ane'mgixy je jibicpi huidibi ajcxy mninicx ñijot'ajtpy, co m'öccixipy, yi mjogy'ajtin cixip tigoyip yi'. Per pen miid Dios yjihui'ñ ymic'ajt miich ajcxy myajtigoy je jibicpi huidibi mninicx ñijot'ajtpy, co m'öccixipy, yi mjogy'ajtin ajcxy ca' yi' ycixipy ytigoyipy.

¹⁴ Tüg'óciy pinjaty ajcxy capxymidoob je Espiritu Santo, Dios yi' ung'ajtip ajcxy. ¹⁵ Je Espiritu Santo huidibi miich ajcxy xy'adigiygixp xyjottigiygixp, ca' xychaachtungixy e nañ ni ca' mdzinähuaangixy miid tzig'iñ jihui'ñ. Ca' miich ajcxy jadu'n paady nej tumbidijc huidibi ooy tzigiygixy yhuindzin. Co je Espiritu Santo yajpaady ma ajcxy mjot mhuinma'ñ, jadu'n nipaady nejihuiy miich ajcxy Dios xy'ung'adyi. E com nmid'ajtim Dios yjihui'ñ ymic'ajt, je' jadu'n xyajminaanim: “¡Dios Teedy!” ¹⁶ Je Espiritu Santo tiy'ajt yejcp ma ajt njot nhuinma'ñ, je' jadu'n xyajminaanim co Dios xy'ung'ajtim. ¹⁷ Pen ñich ajt Dios xy'ung'ajtim, chi nbadaanim it lugar quipxyi miid Cristo jiiby tzajpjoty ma Dios yajpaady. Pen minajxim nyajnajxim tzaachypi jadu'n nej Cristo minajxy yajnajxy tzaachypi, chi nbadaanim Dios y'oy'ajtin quipxyi miid Cristo.

¹⁸ N'a'ixiybich co yi tzaachypi yi ayo'n huidibi minajxim nyajnajxim ya naaxhuiñ, ca' yi' ytim ytijity, ca' ninej yquipxyjatytyi je oy'ajtin etz mijjotcujc'ajtin huidibi Dios xyaj'ixaanim je huin'it xi co Cristo anajty ymiñ jadüg'oc. ¹⁹ Tüg'óciy tijaty ya naaxhuiñ huidibi Dios ti yajcojy yaj'oyiy, y'aa'ijxpy yjijp'ijxpy ajcxy mina Dios ymöhuáanigixy y'oy'ajtin ymij'ajtin yi jäy ajcxy huidibi ajcxy Dios ung'ajtip. ²⁰ Tüg'óciy tijaty Dios ti yajcojy yaj'oyiy ya naaxhuiñ, hue' je' yjugy'ajtin cixamb tigoyamb, ögam tidzam. E canan ci'm jadu'n tzocy, hue' je' Dios jadu'n ti yajnigödugiy. Per ca' yjugy'ajtin ycixipy ytigoyipy

tu'ciyi hue' ajcxy y'aa'ijxpy yjijp'ijxpy co padaangixy oy'ajtin jadüg'oc. ²¹ Co anajty Dios yaj'oyiy nej jëbi ajcxy chinaaygixy, e ca' y'öccixipy, ca' ytütcixipy, etz ca' ypügixipy, chi ajcxy padaangixy oy'ajtin etz jotcuyc'ajtin quipxyi müd je jäy ajcxy huidibi Dios ung'ajtip. ²² Com nejhuüiyim co ixti chambaad tüg'óciy huidijaty Dios yajcojy yaj'oyiy ya naaxhuiñ yjihuiyb tzaachypi, e ca' yjotcuyc'ajtcixy. Tim jadu'n nipaady nej tüg töxyjäy paady tzaachypi co yhuaad'ajtni mina y'ung yajma'xung'adañ. ²³ Canan yi naaxhuiñybi huidi Dios yaj'oyiy yi'yi tzaachypi jihuiyb, nañ jadu'n ich ajt huidijaty müd'ajtp Dios yjihuiñ ymic'ajt, huidibi Dios xymooyim jayijp'aty ca'ni anajty nyajtigajtzim nninïcx. Nañ ich ajt tajim mayim njüiyim nyaaxim ixti cooni anajty Dios xyajtigadzaanim ajt nninïcx etz xycöbigaanim ma yi' y'it jiiyby tzajpjoty, e xymüd'idaanim ajt jadu'n nej yci'm'ung. ²⁴ Müd co n'aa'ijxim njijp'ijxim co Dios xyajnidzögaanim ajt n'alma, paady ti nbaatim jugy'ajtin huidibi ca' ycixipy ytigoyipy. Co ixypy ti nbaatim huidibi anajty njijp'ijxim, ca' ixypy njacjijp'ijxim co nbadaanimni. Com ca' pin jacjijp'ijxni co padaanip je huidibi ti ocpatpi. ²⁵ Per co njijp'ijxim co nbadaanim huidibi ca' nmüd'ajtim, huiñ'it n'ahuixim müd mecxtujcin cooni nbaatim.

²⁶ Tim jadu'n nej jotcuyc'ajtin nbadaanim co njijp'ijxim huidibi Dios xymöhuaanim, nañ tim jadu'n je Espiritu Santo xypubejtim xypudigüiyim co njotmetzcüiyim, com ca' najtim nej jëbi huaad Dios nmibijctzoohuim nej ypadyii. Paady je Espiritu Santo xycodinaayim ma Dios, ymibijctzooyb je Dios mictägy müd ich ajt ycixpi müd jiiyin yaaxin, huidi ca' huaad yajcapxpizimy müd müydacin. ²⁷ Dios ñejhuüiyb ti jot ti huinma'ñ jäy ajcxy ymüd. E Dios nañ huinjihuüiyb tüg'óciy ayuc huidibi je Espiritu Santo yajnajxyp ma yi'. Je Espiritu Santo ypijctzooyb may'ajt jabom jabom ma Dios müd tüg'óciy je mibijcpidijc ycixpi. Nañ jadu'n pijctzoy jadu'n nej Dios tzocy jäygidägy.

Mij madaacin ma mibijcin

²⁸ Yi jäy ajcxy huidibi mijpidacp Dios, huidibi ajcxy Dios ti huin'ixy, jëbi chinaaygixy jadu'n nej Dios jäygidägy ajcxy chinaayin. Nejhuüiyim co huentimtiijity huidibi yi' ajcxy ymajxpy yajnajxpy, pen jibicpi o pen oybi, Dios jadu'n ti a'ixiy co huen minajxcixy yajnajxcixy müd yi' ajcxy y'oy'ajtin ycixpi. ²⁹ Je' yi' ajcxy huidibi Dios ti yhuin'ixyii, je' yi' ajcxy huidibi Dios ñejhuüiy jayijpni co ymibiga'ñyii y'ayuc. Dios jadu'n tumb ma yi' ajcxy yjot yhuinma'ñ jaydëbi yquipxyjatytiy ajcxy yjot yhuinma'ñ müd Dios y'ung, jadu'n nej yi' yjot yhuinma'ñ müdity. ³⁰ Yi mayjäy huidibi Dios yajnidgödugüiy ca'ni anajty naaxhuiñybi chondacy co ytuna'ñ müd yi', yi' ajcxy Dios huin'ixxi. Yi mayjäy huidibi Dios ti yhuin'ixxigixy, nañ Dios yi' ajcxy yaj'ahuimbijtip tudägy. E yi' mayjäy huidibi Dios ti yaj'ahuimbity tudägy, nañ Dios yi' yajquipxyjatytihuaanip ajcxy y'oy'ajtin müd yi' y'ung y'oy'ajtin.

³¹ ¿Ti jada' njacjijp'ijxim ti jada' njactzojcin? Ca' ni ti. Pen Dios ich ajt xypubejtim xypudigüiyim, ¿pin ich ajt jëbi xymimadaacim? Janch ni ca pin. ³² Dios ixti yci'm'ung ti yecy müd ich ajt ycixpi, co oy y'o'cy müd ich ajt ycixpi, co oy y'o'cy ma yi' cruudz müd nidüg'óciy ajt nbocy ycixpi. Paady janch janch co Dios xymöhuaanim tüg'óciy oybi quipxyjaty müd yi' y'ung, Jesucristo. ³³ ¿Pin jada' jëbi ocxiy je jäy ajcxy huidibi Dios ti huin'ixy? Ca' ni pin. Com Dios ci'm yi' ti yaj'ahuimbijttäy tudägy. ³⁴ ¿Pin yi' ajcxy jëbi ocyajpocycäy? Ca' ni pin. Com Cristo o'c je' müd ajt nbocy ycixpi, etz yjugypijcy jadüg'oc, e jadachambi xi tiempo yajpaady a'oy'amy ma Dios ymijc, e yi' ane'mdaayb tüg'óciy. E Cristo ich ajt xyñibijctzohuiiyim, ypijctzooyb may'ajt ma Dios müd ich ajt ycixpi. ³⁵ Com Cristo ooy xychojcin xyjihuiiyim, paady ni nej ca' xy'ixmadzaanim. Huen ti ndimpaatim ca' xy'ixmadzaanim. Oy ixypy tzaachypi ayo'n nminajxim nyajnajxim, oy ixypy tajin mayin nbaatim; oy ixypy jäy xy'ixhuidijtim xypahuidijtim; oy ixypy yuu ayo'n nbaatim; oy ixypy huit tucxy nyajmajajtim; oy ixypy tzig'iñ nyajnajxim; oy

ixyipy jäy xytimyyaj'o'cim. Oy ti ayo'n ndimbaatim, Cristo ca' xy'ixmadzaanim. ³⁶ Com jadu'n ymiñ jaybety ma Dios ñecy ma jadu'n ymiñañ:

Miid miich, Huindzin Dios ycixpi, je nmidzipich xyjatytimyyaj'ogaambich xim tzuum. Jadu'n ich ajcxy nej cöbixy huidibi yajnicxip ma yaj'öctac co yaj'öga'ñyii.

³⁷ Ca' ti ayo'n nbadaanim. Nmimadactähuaanim tüg'óciy ayo'n, miid co Cristo xychojcim xyjihuiyim. ³⁸⁻³⁹ Janch nejhuiybich tiydudägy co Dios xychojcim xyjihuiyim. Ca' ji ni pin jëbi huaad xypijc-huäcxim ma Dios chójcin, oy ixypy nja'o'cim; oy ixypy njajugy'ajtim; oy ixypy xymidzip'ajtim ángel ajcxy etz jacjadyii huidibi mic'ajt miid jii by tzajpjoty. Ca' ajcxy jëbi huaad xypijc-huäcxim ma Dios, ni ti huidibi ji ijtp cham, ni je huidibi mimb cidacp, ni yi' jëbi xycapijc-huäcxim ma Dios chojcin. Ajt nHuindzin Jesucristo ti xyajnejhuiyim jadu'n nej Dios xchojcim xyjihuiyim co y'o'cy ma yi' cruudz miid ajt nbocy ycixpi.

9

Dios ti huin'ixy yi Israel jäy ajcxy

¹⁻² Nmüidich je Cristo ytiy'ajt, nyajnijayiybich miich ajcxy yi' ytiy'ajt, ca' n'indägyich, co ooy ndajy nmayich miid n'amigügtijcich ycixpi je Israel jäy co ajcxy ca' cöbigañ je Cristo. Nañ Dios yjihuiñ, je Espíritu Santo, tiy'ajt yejcp ma ich njot nhuinmañ co jadu'n tajin mayin njihuiyich miid yi' ajcxy ycixpi. ³ Com tajy may nayjihuiyijich miid ich n'amigügtijc, ich nmigogajp, ixti njaccodinähuaamybich ajcxy ma Dios miid ypocy ycixpi, ixti jëbi ixypy Cristo nja'ixmachich miid yi' ajcxy ycixpi, ixti jëbi ixypy Dios xychaachytuñich miid yi' ajcxy ypocy ycixpi, co ixypy jëbi Dios pocyhuijmecy ajcxy. ⁴ Com hue' je' ajcxy Israel y'ap'ajtip y'oc'ajtip, Israel jäy ajcxy. Hue' anajty ajcxy Dios ti ycöbigyii jadu'n nej jihuiy yci'm'ung, Dios anajty ajcxy ti ñi'ijxcidägyii, y'ijx ajcxy Dios y'oy'ajtin. Dios nimay ajcxy co ycuend'adip. Dios ajcxy jadu'n yajni'ixiyi nidüg'óciy tiy'ajt nej ajcxy jëbi huaad Dios huindzigiy, e Dios yajhuinhuaniiy Israel jäy ajcxy je Cristo. ⁵ Nañ hue' ajcxy ymij'ap'ajtip ymijteedy'ajtip ich ajt nmij'ap nmijteedy; je Abraham, Jacob, etz David, e ma je' ymiñ ajcxy, ji ymiñ je Cristo, e je' je' Dios ajtp, yi' tüg'óciy ane'mdaayb jii by tzajpjoty etz ya naaxhuiñ. Je Cristo capxpaady y'idipy huinixii.

⁶ Co jadu'n minañich co may ajcxy Israel jäy ca' ajcxy Dios yjäy'adyii tiydudägyi, ca' jadu'n mina'nañich co Dios ca' cuyduñ yi' y'ayuc huidibi yajhuinhuaniiy Abraham etz Moisés. ⁷ Canan nidüg'óciy Abraham y'ap y'oc padañ je oy'ajt huidibi yajhuinhuaniiy Abraham, com jadu'n yjaybetyity ma Dios ñecy. Dios jadu'n nimay Abraham: “Yi mmang, Isaac, ti huin'ixyich jëbi y'ap y'oc paady je oy'ajt huidibi ti nyajhuinhuaniiy.” ⁸ Co Dios jadu'n nimay Abraham, paady ycixpi nejhuiyim co ca' nidüg'óciy Abraham y'ap y'oc jëbi naydijyii Dios y'ung. Jëyi Isaac y'ap y'oc jëbi ñaydijyii Dios y'ung com Dios yajhuinhuaniiy co may'ajt tunañ miid yi' ajcxy. ⁹ Com jadu'n yjaybetyity ma Dios ñecy co Dios nimay Abraham: “Nihuibidaamybich ma je tiempo huidibi ti n'agapxtucyich, e huin'it mdöxyjc Sara y'ungbaadip.”

¹⁰ Ji jadüg tiy'ajt. Ich ajt nmij'ap Isaac ytöxyjc Rebeca metz ymang paty. ¹¹ Dios yhuin'ijx je jacmutzpi ca'ni anajty yma'xung'aty, e ca'ni anajty ñiguëxigy ti huinmañ ymiid, oyhuinmañ o jibic-huinmañ. Dios ninigoob anajty jayijpni ti huin'ixy je jacmutzpi. ¹² Com Dios ñimay je Rebeca co je jacmutzpi y'ane'mamyb y'ajch ma ca'ni anajty Jacob yma'xung'atyñi. ¹³ Tim jadu'n nej jaybety ymiñ ma Dios ñecy, Dios jadu'n minañ: “Jac nigü ti ndzocyich Jacob, ca'ydi Esaú.”

¹⁴ ¿Nej n'ocminaanim? ¿Dios ca' tiybi tuñyi? Ca' yjadu'nity. Dios tiydudägy ytuñ. ¹⁵ Com jadu'n Dios nimay Moisés: “Nba'ayohuipyich ninigoobi pinjaty ndzojcpyich.” ¹⁶ Co Dios jadu'n nimay Moisés paady nejhuiyim co canan paady ycixpi Dios pa'ayohuañ jay miid co ajcxy chachñaymija'ijxigixy co tunaangixy oyhuinmañ. Hue' je' Dios pa'ayo'n tuñ miid

jäy ajcxy ninigoob co jadu'n tzocy. ¹⁷ Com jadu'n jaybety ymiñ ma Dios ñecy co Dios jadu'n nimay je Egipto rey:

Ɔich miich ti nmöy m'ane'min, jigix jëbi jäy ajcxy ixipy je mij ayo'n huidibi ndunaamybich ma miich mnaax mgajp, huin'it jäy ajcxy capxpaady xyaj'idipy huindu'ñybi ñaaxhuiñ.

¹⁸ Dios ypa'ayooyb je' pinjaty chojcpy, e nañ jadu'n yjot yajjuuni pin jadu'n yajmidzojcpy.

¹⁹ Huin'it miich ajcxy xyñimähuibich: “Peni janch yjadu'nity, ¿ti co Dios jadu'n jadüg'oc pocy'ixy jäy? ¿Pin jada' occapxhuimbidi nej yi' tzocyi?” ²⁰ Miich jäy, ¿mbin miich co ti myajcapxycoja'ñ myaj'ayucjoja'ñ miid Dios? ¿Nej jëbi pochytudz nimäy je pin anajty ti yajcojyii? “¿Nej co jadu'n ti xyajcojyich?” ²¹ Tüdzajcojpi yi' yaj'oyiyb je mo'ntz nej tim tzocy. Pen yajcojamyb tüdz oybi tzoopatyi, yajcojpy je'. Peni yajcojamyb tüdz huidibi ca' ojjatyity, yajcojpy je'.

²²⁻²⁴ Tim jadu'n nej je tüdzajcojpi yaj'oyiy mo'ntz nej tzocy, nañ jadu'n Dios tuñ miid jäy nej tzocy. Dios ti yajcojy jäy, e miid ymic'ajt jëb tzaachytuñ miid ypocy ycixpi. E co jadu'n tzaachytunipy, chi ñiguëxigipy yi' ymic'ajt. Dios ooy jecy ti jamimecxtucy ajcxy huidibi paatip co Dios chaachytuniyb ajcxy. Com Dios ti yajcojy jäy paady jëb nañ jadu'n pa'ayoohuipy etz may'ajt tunipy miid yi' ajcxy, jëbi ajcxy paadip yi' y'oy'ajtin. Dios ñich ajt ti xyhuin'ijxim nijëjity judíojäy, etz nijëjity huidibi ca' yjudíojäyity, jëbi ajt n'alma nidzoocin paady. ²⁵ Com jadu'n jaybety ymiñ ma Oseas ñecy ma Dios jadu'n yminañ:

Yi jäy ajcxy huidibi ñich ca' anajty njäy'adyii, njäy'adäänibich cham. Yi jäy huidibi ca' anajty ndzocyich, ndzogäänibich cham.

²⁶ E nañ jadu'n jadüg'it Oseas cojay: “E je jäy ajcxy huidibi anajty tzinaayb ma canaag naax cajp huidibi anajty ca' Dios yjäy'adyii, jëb ñaydiyii Dios yjäy, je Dios huidibi huinixii tzinaayb.”

²⁷ Nañ jotmay miid co Isaías jada tiy'ajt ycojay ma ñecy ma jadu'n yminañ: “Oy ixipy ajcxy ti yamayiy jadu'n nej tzaa'ung yajpaady ma mejy ypa', nihueeñ ajcxy y'alma ñidzoocin padañ. ²⁸ Com Dios mic ooy cötujcin miidity, e ca' mimecxtugipy jäy ajcxy ypocytunii huinixii. E mic'amy tzaachypii möhua'ñ naaxhuinyjäy miid ypocy ycixpi co anajty xii tiempo paatni mabaad agapxtujcy.” ²⁹ Isaías ñajtzcapxiy jadu'n jecy'ajty:

Pen ca' ixipy je Huindzin Dios huidibi ane'mdaayb jii by tzajpjoty etz ya naaxhuiñ, capubejty yi' Israel jäy, co ca' ycajacyajtzooci nijëjity ajcxy, ycacödigoyday yi' ajcxy, tim jadu'n nej je jäy ajcxy yjajty jim ma Sodomo cajp etz Gomorra cajp, cödigoyday ajcxy.

Yi judíojäy ajcxy etz Jesucristo y'ayuc ytiy'ajt

³⁰ Jadu'n jëbi mhujinhuixigixy huidibi ti nyajnijayiygixy jadu'n nej Dios ytun miid jäy ajcxy. Yi jäy ajcxy huidibi ca' yjudíojäyity, huidibi ca' cuyduñ Dios ycötujcin je jecyip, co ajcxy mijpidägy je Cristo, chi ajcxy paady tudägy'ajtin ma Dios. ³¹ Per yi judíojäy ajcxy huidibi jii'ijxp co tudägy'ajtin padaangixy miid co tzachcuydungixy Dios ycötujcin je jecyip, ni ca' ajcxy mimadägy cuydundähuiipy, e ca' ajcxy tudägy'ajtin paady ma Dios.

³² ¿Na'amy co ca' ajcxy mimadägy cuydundäy Dios cötujcin? Je' co ajcxy ca' mijpidägy huidibi Dios ti tuñ miid yi' ajcxy ycixpi. Hue' ajcxy tijy co tudägy'ajtin padaangixy ma Dios miid co tzachcuydungixy Dios ycötujcin je jecyip. Hue' ajcxy ayo'n ypadamyb co ca' Cristo cöbijccixy, tim jadu'n nej jäy ayo'n paady co yconepy ma tüg tzaa. ³³ Com jadu'n jaybety ymiñ ma Dios ñecy, ma Dios jadu'n yminañ:

Nguexaamybich jim Jerusalén tüg jäy. Mayjäy ca' mijpidäga'ñ je jäy, e ayo'n ajcxy ypadamyb ma ñich. Tim jadu'n nej ixipy ti nbidägyich tüg tzaa ma jäy ajcxy huaad yconejpcixy, e chi yciday ajcxy. Tüg'óciy jäy pinjaty mijpidaacp je jäy huidibi nbidägaamybich jim Jerusalén, hue' ajcxy yi' ca' ayo'n padañ ma ñich, nbocyhuinmecxaamybich yi' ajcxy.

10

¹ Miich ajcxy nmigügtjicich, ooy ndzocyich cixyjot huinjot co yi Israel jäy nidüg'óciy padañ y'alma ñidzoocin. Ooy ñich ñigi Dios nmibijctzoy miid yi' ajcxy ycixpi. ² Jëbi ndiy'ajt yecyich co yi Israel jäy ooy ajcxy Dios jayajmij'ajtcixy. Hue' janchtiy ca' ajcxy huinjihuïy; Dios ytiy'ajt. ³ Com nejhuiyb ajcxy co Dios yajpocyñihuädzamyb jäy ajcxy, hue' ajcxy ca' huinjihuïy nej Dios yhuinma'ñ mädity. Ci'm anajty chachhuinma'ñ ixtaaygixy nej ajcxy jëbi ñayyajpocyñihuädzigixipy. Ca' anajty ajcxy cöbicy Dios ytiy'ajt nej jëbi huaad ñayyajpocyñihuädziyb.

⁴⁻⁵ Yi judíojäy ajcxy ca' huinjihuïygixy co je Cristo y'oy ya naaxhuiñ, e chi yajtigooyi Dios ycötujcin ymic'ajt huidibi Moisés yjay, jigix jëbi tüg'óciy jäy pinjaty mijpidacp Cristo ytiy'ajt, huin'it ajcxy paadip tudägy'ajtin. Moisés yjayhui'm ma jadu'n ymina'ñ: "Je pinjaty cuydumb je Dios ytiy'ajt, jim mic'ajt paadipy miid chinaayin ycixpi." ⁶⁻⁷ Per yi jäy ajcxy huidibi mijpidaacp Cristo etz cuyduni yi' ytiy'ajt, yi' ajcxy ymina'ñ: "Ca' huaad judíojäy ajcxy yminaangixy jotjoty huinma'ñyoty: ¿Pin ocpättigihuij tzajpjoty nicx je Cristo yajtzoön? o ¿Pin nicxamb ca'oydactuuby ma ajcxy öcpidijc y'ity e yajjugypigaanip je Cristo?" ⁸ ¿Nej Dios y'ayuc ymina'ñ? Jadu'n Dios y'ayuc ymina'ñ: "Ti mmidoy miich ajcxy Dios y'ayuc ytiy'ajt ma mgi'm'ayuc, ti jäy ajcxy capxhuäcxy ma miich, ti mmido'mbijccixy." Pues jada je' je y'ayuc tiy'ajt nej jëb mijpidaaccixy Cristo, huidibi tiy'ajt ñich ajcxy ngapxhuäcxp. ⁹ Pen miich mgapxypidzimyb mayjäy agujc co miich ajcxy Jesús mHuindzin'adyii, etz mmibijcipy ajcxy ma mjot mhuinma'ñ co Dios ti yajjugypijcy Jesús co y'o'cy, huin'it m'alma paadip ñidzoocin ma Dios. ¹⁰ Co mmijpidägipy Jesús cixyjot huinjot huin'it Dios xyajpocyñihuädziy. Co mgapxypidzimipy mayjäy agujc co miich mijpidägy Cristo Jesús, huin'it yi' m'alma ñidzoocin padañ.

¹¹ Com jaybety jadu'n miiñ ma Dios ñecy, ma jadu'n ymina'ñ: "Nidüg'óciy jäy huidijaty mijpidacp je Cristo, ca' ajcxy ayo'n padañ ma Dios." ¹² Jëbi nidüg'óciy jäy mijpidägy je Cristo Jesús com Dios tú'ciy yajhuinhuaniiy pocyñihuaatzin ma yi judíojäy etz ma huidi ca' yjudíojäyity. Ji tüg Huindzin je Jesucristo huidibi niHuindzin'ajttaayb. Jesucristo may'ajt oy'ajt tunam mijcajee miid huentimpinjäyity pinjaty pijczoob pubejtin ma Dios miid yi' yxii. ¹³ Com jadu'n jaybety ymiiñ ma Dios ñecy, ma jadu'n ymina'ñ: "Nidüg'óciy jäy pinjaty Dios mibijctzoob miid Huindzin Jesucristo yxii, yi' ajcxy y'alma paadip ñidzoocin." ¹⁴ ¿Nej jëbi jäy ajcxy occohuaniiy Jesucristo co huen y'alma ñidzögy, pen ca' anajty ti mibijci je ytiy'ajt? Pues ca' yjadu'nity. ¿Nej jëbi jäy mibicy Jesucristo peni ca'ni ajcxy amido'ijti y'ayuc? Pues ca' yjadu'nity. ¿Nej jëbi jäy ajcxy midoogixy Jesucristo y'ayuc, pen ca' pin capxhuäcxy ma yi' ajcxy? ¹⁵ ¿Nej jëbi jäy ajcxy capxhuäcxy Jesucristo y'ayuc ytiy'ajt, pen ca' pin yquexyii ayuccapxhuäcxpi? Com jaybety jadu'n ymiiñ ma Dios ñecy, ma jadu'n ymina'ñ: "Ooy oy jäy ñayjihuiyii co pinjaty mimimb mija'tp oybi tiy'ajt, pinjaty capxhuäcxp oybi tiy'ajt ma yi' ajcxy."

¹⁶ Per ca' nidüg'óciy jäy mibicy je oybi tiy'ajt, com Isaías jadu'n cojay ma ñecy ma jadu'n ymina'ñ: "Huindzin Dios, ¿pin ti mijpidägy ñich ajcxy n'ayuc?" ¹⁷ Cooni jäy ajcxy capxhuäcxy Jesucristo ytiy'ajt ma jäy chinaaygixy, huin'it ajcxy ymibijccixy com ti amido'ijtcixy je tiy'ajt.

¹⁸ Per n'amidooybich miich ajcxy: ¿Nej ca' jada' yi judíojäy ajcxy midoy Dios ytiy'ajt? Janch jadu'n ti ajcxy jamidoy, com jaybety jadu'n ymiiñ ma Dios ñecy ma jadu'n ymina'ñ: Ti capxhuäcxy ajcxy Dios y'ayuc ytiy'ajt huindu'mybi naaxhuiñ. Ti ajcxy Dios y'ayuc midodaayi huindu'mybi naaxhuiñ.

¹⁹ Jadüg'oc n'amidoogixy: ¿Nej ca' Israel jäy jada' ajcxy nejhuiy Dios ytiy'ajt? Ñejhuiyb ajcxy. Com jecy'ajty Moisés ycojay ma ñecy ma Dios jadu'n ymina'ñ:

Nyajpocyñihuaatzähuiyich yi jäy ajcxy huidibi ca' ñich njäy'adyii, e huin'it miich ajcxy cohuindoyii mjihuïhuipy miid yi' ajcxy ycixpi. Ndunipyich may'ajt miid yi' ajcxy, e huin'it miich yi' ajcxy mmijotmädip.

- 20 Jadu'n jadüg'it Isaías cojay ma yí ñecy, ma Dios jadu'n ymíñañ:
Yí jáy ajcxy huidibí ca' xy'ixtäyich, tí xypaadyich ajcxy. Tí nyajñiguëxigüyich ndiy'ajt ma yí jáy huidibí ca' xyñidíy xyajtíyich.
- 21 Com jadu'n jaybety ymíñ ma Dios ñecy, ma Dios jadu'n nigapxy yí Israel jáy co jadu'n ymíñañ:
Jabom jabom tí njamimecxtucyich yí Israel jáy ajcxy. Tí njayajñimäyich ñich ndiy'ajt, e ca' ajcxy mijpidägy. Hue' ajcxy ca' xycapxymidooyich, xymijotmij'öcpich ajcxy.

11

Yí Israel jáy ajcxy huidibí tí ypocyníhuaatzcixy

1 Paady n'amidoogixy: ¿Nej tí jada' Dios ix'ixñí ixtijñí yí Israel jáy ajcxy? Pues ca' yjadu'níty, Dios ca' yí ixmachñí Israel jáy ajcxy. Com nañ Israel jáy ñich. Abraham nmij'ap'ájtibich nmijteedy'ájtibich e nañ jim ngogájpídyich ma anajty Benjamín yco-gajpíty. 2-3 Dios ca' ixmach yí yjáy huidibí yhuin'ixx jecy'ajty co jáy'ada'ñyíi jigix jébi may'ajt oy'ajt tunípy míid yí ajcxy. ¿Nej ca' ajcxy mnejhuíy nej jaybety ymíñ ma Dios ñecy jadu'n nej Elías nigapxy yí Israel jáy ma Dios? Jadu'n ymíñañ:

Huindzín Dios, tí yí Israel jáy ajcxy yaj'öctäy huidibí anajty miich m'ayuc xycapxhuäcxip. Tí ajcxy yajhuindigoydäy je tzaa macxy ma anajty jáy xyhuindzigíy. Naydügpajc ñich tí njachuí'myích njaccapxhuäcxíyich miich m'ayuc, e nañ xyaj'ögaamích jáy ajcxy.

4 E chi Dios y'adzooy nímay Elías:

Ca' mim naydügity, jí ñich ahuing nmíidídyich yujcpícy jahuíxtujc mil yéydíjc huídí xy'ojadajtpích xyhuindzigíyíyích chambaad, huídibí ca'ñí huingoxtinäy yí Baal, yí dios falso, ca'pí tí mic'ajt míidíty ní tí tzöc'ajt ca míidíty.

5 Tím jadu'n nej Dios míidíty anajty huíxtujc mil yéydíjctíjc jecy'ajty co anajty Elías yjugy'aty, nañ tím jadu'n cham ma ñich ajt nxí ndiempo Dios ymíid níjéjity judíojáy huídibí tí pa'ayoy, e paady ycíxpi tí yhuin'ixyíi jébi yí jáy'adyíi. 6 Com co íxyípy ajcxy yajxon cuyduní Dios ycötujcín, ca'p ní tí pa'ayo'n Dios jactunaani míid yí ajcxy, com co tí anajty jim Dios y'ayuc ycuydündäyíi.

7 ¿Tí tí ytunyíi tí yjadyíi míid yí Israel jáy ajcxy? May ajcxy ca' may'ajtin oy'ajtin paady ma Dios jadu'n nej ajcxy jíjp'ixxcixy. Jéyí ajcxy huídí Dios huin'ixxí tí ajcxy paatcixy oy'ajt ma Dios. Yí jacjadyíi Israel jáy ajcxy Dios níg ooy yajjotmij'öccixy. 8 Com jadu'n jaybety ymíñ ma Dios ñecy jadu'n nej Dios yajjotmij'ögy yí Israel jáy, ma jadu'n ymíñañ:

Tím jadu'n ajcxy nipaady nej jáy ajcxy huídibí tí ymí'öctígooyíñí, jadu'n nipaady nej jáy huídibí huíintzíp, jadu'n nipaady nej huídibí cönatíp.

9 David nañ jadu'n ycojay jecy'ajty ma ñecy, ma jadu'n ymíñañ:

Huindzín Dios, cham je jáy tzachnixondägy yí tzínaayín yí jugy'ajtin, ca' ajcxy xyjäymeck. Tímíitiñí ajcxy ayo'n móhuípy; tím jadu'n nej iyujc ayo'n paady co yajtüxuuch o co yjut cögäy.

10 Yajma'tí ajcxy yjot yhuinma'ñ, huen ahuimbijtcixy jadu'n nej jáy huíntzpi. Mó ajcxy tzaachypí huinixí huínítiempo, tím jadu'n nej jáy ajcxy tzaachypí jíhuíy huídibí jemxypí tzimíccixp.

Yí ypocyhuinmeecxín huídibí ajcxy ca'p yjudíojáyity

11 Co jadu'n yí maybí Israel jáy ca' cöbíjccixy Dios ytiy'ajt, ¿nej mdíjy, tí Dios y'ixmachyíi ajcxy tüccí'yí, e yajtigoya'ñ ajcxy? Pues ca' yjadu'níty, ca' Dios ixmach yí Israel jáy ajcxy tüccí'yí. Co yí Israel jáy ca' cöbíjccixy Dios ytiy'ajt nej Cristo y'o'cy míid yí ajcxy ypocy ycíxpi, paady cöbícy yí huídibí ca' yjudíojáyity, jébi ajcxy y'alma nízooicín paady. Jadu'n Dios ytuñ jigix jébi yí judíojáy ajcxy cohuindoyí jíhuíhuípy, e chí nañ jadu'n mijpidägípy ajcxy Jesucristo. 12 Pen yí mayjáy ajcxy huídíjaty ca' y'israeljáyity mój'oy'ajtin

mijjotcuyc'ajtin ti paady, mïid co yi jacmaybi Israel jäy ca' cöbijccixy Jesucristo, chi nïgi oy'ajtin jotcuyc'ajtin pada'n yi naaxhuiñyäjy ajcxy co anajty nidüg'óciy Israel jäy yjothuimbijttaaygixy etz cöbijctaaygixy je Cristo.

¹³ Cham nijayñygyxy miich ajcxy huïdi ca' yjudíojäyity, com Dios ti xyquexyich ngapx-huäcxich yi' y'ayuc ma yi jäy ajcxy huïdibi ca' yjudíojäyity. Ooy nyajcopicyich jada ndungich, jigix jëbi judíojäy oy'ajtin paady nañ jadu'n. ¹⁴ Ca' jecyity co ñch n'amigügtijc, yi judíojäy ajcxy, cohuindoyñ ajcxy jihuñhuipy, co anajty mayjäy huïdi ca' yjudíojäyity mijpidägy ñch n'ayuc. Co jadu'n ajcxy cohuindoyñ jihuñhuipy, chi ajcxy nañ jadu'n mijpidägipy Jesucristo. ¹⁵ Com pen je naaxhuiñyäjy huïdibi ca' yjudíojäyity, huïdibi Dios jecy'ajty ca' jäygidaci ajcxy chinaayin, pen ti ajcxy cöbijci Dios ytiy'ajt, pen ti ajcxy oy'ajtin paady ma Dios, mïid co Dios ti ixmach yi Israel jäy huïdibi ca' cöbicy yi' ytiy'ajt, chi yi Israel jäy co ajcxy jadüg'oc yjothuimbidity etz cöbigipy Dios ytiy'ajt, nañ jadu'n ooy yjotcugihuipy ajcxy, jadu'n nejjihuïy ti ajcxy y'ögy etz nej jihuïy ajcxy ti yjugypicy jadüg'oc. ¹⁶ Com co Abraham, Isaac etz Israel Dios anajty jäy'ajtíp, paady nañ jadu'n tüg'óciy Israel jäy Dios jäy'adyii, mïid co Israel y'ap'ajtíp y'oc'ajtíp ajcxy. Tim jadu'n nejjihuïy judíojäy ajcxy tzajcaagy puuducy möy Dios, nañ jadu'n je ytujectuc huïdibi jac-huï'm nañ Dios je' yje', e nañ tim jadu'n nej co jäy ajcxy möy Dios quipy ytictz, tüg'óciy je' Dios je'ajtäyii quipy y'aacxy.

¹⁷ Hue' je' nijëjity Israel jäy ca' mijpidägy Dios ytiy'ajt, paady ñajtz'ixñiyi, e may'ajt oy'ajt tuñ mïid huingbi jäy huïdi ca' israeljäyity. Tim jadu'n nej jihuïy tüg oyguipy huïdi tim'ajtp yajpubuxy y'aacx, e je ma ti yajjijppujxtüty, je' yjijp yajpidägy ma huingbi quipy y'aacx. Miich ajcxy huïdi ca' yjudíojäyity huïdibi ti mibicy je Cristo, ti mbaady Dios y'oy'ajt tim jadu'n nej judíojäy ajcxy jecy'ajty mïidity Dios y'oy'ajt. ¹⁸ Ca' huaad amij agix mnayjihuiñygyxy, e ni ca' huaad m'ixtijcixy yi judíojäy huïdibi ca' mijpidaaccixy je Cristo. Miich ajcxy yi m'oy'ajt ti mbaady ma Dios, tim jadu'n nej je quipy y'aacx mic'ajt paady ma yi quipy ytictz.

¹⁹ Ca' yjecyity co miich ajcxy mina'naangixy co Dios najtz'ixñiy yi judíojäy huïdibi ca' mibicy Cristo, jaydëbi miich ajcxy mnaydiyii co Dios xyjäy'adyii. ²⁰ Tiy'ajt jadu'n nej miich mina'ñ. Dios ñajtz'ixñiy yi maybi judíojäy mïid co ajcxy ca' mibicy Jesucristo. E Dios miich ti xycöbicy mïid co ti mmibicy Jesucristo. Per ca' huaad miich amij agix mnayjihuiñygyxy mïid co Dios ti xycöbicy. Naygüend'adii yajxon ma Dios ytiy'ajt, tzig'i Dios. ²¹ Com Dios ñajtz'ixñiy yi judíojäy ajcxy mïid co ca' ymijpidägyii yi' ytiy'ajt. Nañ jadu'n miich ajcxy yi' xyñajtz'ixñihua'ñ, pen ca' mmijpidaaccixy yajxon yi' ytiy'ajt. ²² Cuentipic jadu'n nej Dios may'ajt oy'ajt tuñ mïid nijëjity jäy, etz mic' tzaachytuñ nijëjity jäy. Dios mic' tzaachytuñ je judíojäy huïdibi ca' ycapxymidooy, etz may'ajt oy'ajt tuñ mïid miich ajcxy huïdi capxymidoob. Jaccuydun yajxon Dios ytiy'ajt, e nïgi Dios may'ajt oy'ajt xytuunipy, pen ca' mguyduni yi' ytiy'ajt, huin'it Dios xyñajtz'ixñihuipy. ²³ E nañ jadu'n yi judíojäy ajcxy huïdi ca' mibijccixy Jesús, co ajcxy yhuinma'ñ yajtigadzipy, e mijpidägipy Jesús, huin'it Dios ycöbigiñyb jadüg'oc, etz Dios mïid ymic'ajt jëbi may'ajt oy'ajt tunipy mïid yi' ajcxy. ²⁴ Com pen miich ajcxy huïdi ca' yjudíojäyity huïdibi jecy'ajty anajty ca' Dios jäy'adyii, pen miich ajcxy Dios mic'amy ti xycöbicy, nañ jadu'n jactzojc cöbiga'ñ huïdibi ajcxy judíojäyip, pen ycöbijcy ajcxy.

Jadu'n nej Dios yajnidzoocogixñihua'ñ Israel jäy ajcxy

²⁵ Miich ajcxy nmigügtijcich, nyajnijayñyb ajcxy jadu'n nej Dios tuna'ñ mïid yi Israel jäy, jaydëbi ca' miich ajcxy amij agix mnayjihuiñygyxy, etz jaydëbi mnejhuñhuipy jada tiy'ajt huïdibi ca' pin nejhuiy, co yi Israel jäy ajcxy ooy ajcxy y'aamijity yjotmijity, ca' ajcxy capxymidooy Dios. E jadu'n ajcxy y'ida'ñ mabaad anajty yca'pxy je mayjäy, ca'pi y'israeljäyity je huïdibi mijpidägam Jesucristo ytiy'ajt. ²⁶ Nejhuiñyim co Dios may'ajt oy'ajt

tunamb jadüg'oc m̄id tüg'óciy Israel jäy ajcxy, com jadu'n jaybety ymiñ ma Dios ñecy ma Dios jadu'n ymina'ñ:

Jacjiini tüg Israel jäy ymina'ñ huídibi yajnüdözögamb ajcxy ma yí' ypocy. Yí' yajtigoyaanip Israel jäy ypocy.

²⁷ Jadüg'it jaybety ymiñ ma Dios jadu'n ymina'ñ: Jadu'n nyajhuinhuan̄iyich yí' Israel jäy co yí' ajcxy ypocy nyajtigooybich.

²⁸ Co yí' Israel jäy ca' mijpidaaccixy Jesucristo ytiy'ajt, chi Dios ajcxy ñajtz'ixiyyi. E co ñajtz'ixiyyi ajcxy, paady ycixpi miich ajcxy Dios ti yxcöbicy, co ti mmijpidaaccixy Jesucristo. Per chambaad Dios jactzojctay yí' Israel jäy m̄id co Dios huin'ixy yí' Abraham, Isaac etz Jacob jecy'ajty jēbi yí' yjāy'adyii. ²⁹ Dios ti huin'ixy yí' Israel jäy ajcxy jēbi yí' yjāy'adyii, etz tüg'óciy huídi yajhuinhuan̄iy co möhua'ñ, co may'ajt tuna'ñ m̄id yí' ajcxy ycixpi. Ymöhuipy yí', ytunipy yí'. Dios ca' y'ayuc yajxigy. ³⁰ Miich ajcxy huídi ca' yjudíojäyity jecy'ajty ca' anajty mmijpidaaccixy Dios. Jadachambi x̄i tiempo Dios miich ajcxy ti xypa'ayoy, m̄id co yí' Israel jäy ca' mijpidägy Cristo ytiy'ajt. ³¹ Yí' judíojäy jadachambi x̄i tiempo ca' mijpidaaccixy Dios ytiy'ajt, tim jadu'n nej jecy'ajty miich ajcxy ca' anajty mmijpidaaccixy Dios ytiy'ajt. Jacjiini Dios pa'ayoohuin tuna'ñ jadüg'oc m̄id yí' judíojäy ajcxy tim jadu'n nej ytuñ m̄id miich ajcxy jadachambi x̄i tiempo. ³² Com Dios anajty ti yajpocycädäy tüg'óciy jäy co ajcxy ycapxycömidodacy, yí' judíojäy etz nañ huídi ca' yjudíojäyity, paady ycixpi Dios pa'ayo'n tuñ m̄id nidüg'óciy jäy, judíojäy etz nañ huídi ca' yjudíojäyity, tüg'óciy pin mijpidacp yí' ytiy'ajt.

³³ ¡Ooy ycodzigijity Dios! Dios ooy mijcajee may'ajt oy'ajt tuñ m̄id jäy ajcxy ycixpi. Dios ooy mijcajee mijhuinma'ñ ti tuñ m̄id jäy ajcxy ycixpi. Dios ooy mijcajee ycohuinma'ñity. Ca' ni pin jēbi huinjihuıydäy je ayuc huinma'ñ huídi Dios ym̄id. Etz nañ ca' ni pin jēbi huinjihuıydäy huídibi Dios ytumyb. ³⁴ Com jaybety jadu'n miñ ma Dios ñecy ma jadu'n ymina'ñ:

Ca' ni pin jēbi huinjihuıydäy nej Dios yhuinma'ñ m̄idity. Ca' ji ni pinjäy huídi ti capxhuijy Dios.

³⁵ Ca' ji ni pinjäy huídi tijaty ti ocmooybi Dios. Dios ca' ni ti nuucxy m̄idity m̄id ni pinjäy.

³⁶ Tüg'óciy huídijaty ñch ajt ya nbaatim, ac jiiby choondäy ma Dios. Yí' tüg'óciy ti yaj'oyıydäy, e yí' je'ajttaayip tüg'óciy. ¡Tzoc Dios capxpaatim ojadajtim huinix̄i huin̄itiempo! Jadu'n jadu'n. Amén.

12

Je jugy'ajtin cixyot ma Dios

¹ E jadu'n nmigügtijcich, cham ñch miich ajcxy nimaaygixy mictägy, com co Dios ti xypa'ayoogixy, paady ycixpi nay'ayéjicigix naygyéjicigix amuumdügjot ma Dios. Cuychinayı yí' ytiy'ajt yajxon jabom jabom. Tzinaaygix m̄id huädz mjot mhuinma'ñ, jadu'n nej Dios jēbi jäygidägy yí' mdzinaayın. Jada je tiy'ajt nej jēbi Dios m'ojadajtcixy tiydudägy. ² Ca' ajcxy mguydungixy mguychinaaygixy yí' naaxhuiñjäy ajcxy yjibicjot yjibic-huinma'ñ huídibi tzinaaygixp jadachambi x̄i jadachambi tiempo. Com Dios ti xymooygixy jemybi mjot jemybi mhuinma'ñ, paady mguydunipy ajcxy yí' ytiy'ajt. Ixpıjccix Dios ytiy'ajt, jigix ajcxy mnejhuıhuıpy huídibi tiy'ajt Dios chojcyp mguydunipy, etz jigix mhuinjihuıhuıpy je oyhuinma'ñ, je tudägypi huinma'ñ huídibi Dios yjäygidacpy, je huinma'ñ huídi huädzip ca'pxyip.

³ Com Dios may'ajt oy'ajt ti tuñ m̄id ñch etz ti xymöyich jada tung co ngapxhuäcxich yí' y'ayuc, paady ñch miich ajcxy nimäy nidüg'óciy co ca' huaad amij agix mnayjihuiıyigixy, ca' huaad nigı anaxy mnaygömaayigixy ci'm. Nidüg nidüg ci'm huinmaaygixy yajxon huídi tung jēbi myajnicxcixy, jadu'n nej Dios huıjy'ajt cujc'ajt ti xymooygixy. ⁴ Jadu'n nej ñch ajt nninıcx ym̄id yhuin y'ahuac etz yci' ytecy, je ninıcx abıcy ytung m̄idity, je huıın abıcy ytung m̄idity, je y'ahuac abıcy ytung m̄idity, etz je ci' tecy abıcy ytung m̄idity. ⁵ Nañ

tim jadu'n ñich ajt huidi mijpidacp Cristo, e ni may ñich ajt, e tügpicy jäy ñich ajt com tú'ciy nmibijcim. E nije' nije' Dios huijy'ajt cujc'ajt ti xymooyim abicyjaty, nej jëbi nije' nije' Dios ytung nyajnicxim.

⁶ Com abicyjaty Dios ti xymooyim huijy'ajt cujc'ajt, paady copicy nyajtuunim nije' nije' je huijy'ajt cujc'ajt huidi Dios ti xymooyim. Pen Dios ti xymooyim huijy'ajt cujc'ajt jëbi ngapxhuäcxim yi' y'ayuc, copicy ngapxhuäcxim mibaad ixpijcin nmïd'ajtim. ⁷ Pen Dios huijy'ajt cujc'ajt ti xymooyim co jëbi nbubejtim nmigügtijc, copicy nmigügtijc nbubejtim. Pen Dios huijy'ajt cujc'ajt ti xymooyim jëbi nyaj'ixpijcin nmigügtijc, copicy ndung'ajtim yaj'ixpijii. ⁸ Pen Dios huijy'ajt cujc'ajt ti xymooyim co jëbi ngapxhuijim nmigügtijc, co jëbi njot'amijmooyim nmigügtijc, copicy ngapxhuijim nmigügtijc, etz njot'amijmooyim nmigügtijc agujc jotcujc. Pen nyejcin tijaty ma nmigügtijc, copicy agujc jotcujc nyejcin. Je huidi ajcxy nigohuajc'ajtp mibijcpidijc copicy yajxon y'ané'mgixipy. Pen Dios huijy'ajt cujc'ajt ti xymooyim co jëbi nbubejtim jäy ajcxy huidibi ayo'n mïd jotmay mïd, copicy agujc jotcujc nbubejtim pinjaty ayo'n mïd jotmay mïd.

Nej mibijcpidijc huaad jugy'ajtcixy chinaygixy

⁹ Naychójcigixy nayjihuiyigixy miñ xyipy amuumdügjot, ca' y'ametz yjotmetzity. Ca' mnijot'ajtcixy jibic jot jibic-huinma'ñ. Nijot'ajtcix nigi oyjot oyhuinma'ñ. ¹⁰ Naychójcigix nayjihuiyigix amuumdügjot, jadu'n nej ypadyii mnaymigüg'ájtigixipy ma Jesucristo. Nayyajmij'ájtigix nigi nidüg nidüg miich ajcxy.

¹¹ Naymic'ijxigix cixyjot huinjot, ca' mnuux'ajtcix. Tungix amuumdügjot mïd mHuindzin Jesucristo ycixpi.

¹² Tzinaaygix agujc jotcujc, com mnejhuiyb ajcxy co mbada'ñ oy'ajtin ma Dios. Mecxtujccix yi' tzaachypi ayo'n huidibi mmïnajxyp myajnajxyp. Mibijctzoogix Dios jabom jabom.

¹³ Naybubéjtigix miñ xyipy, pen yajmayajtpy migüg tijaty. Nayyajjättácigix miñ xyipy oy yajxon.

¹⁴ Nibijctzohui' ma Dios huidibi ajcxy xy'ixhuidijtp xypahuidijtp. Nibijctzohui' mmidzip huen Dios may'ajt oy'ajt tuñ mïd yi' ycixpi. E ca' mnibijctzohuiy co huen ayo'n paadipy.

¹⁵ Tzoc jotcujc nayjihuiyim co ajt nmigügtijc jotcujc ñayjihuiyii. Tzoc mïdtajim mïdmayim nmigügtijc pen tajp mayb.

¹⁶ Ooy yajxon nayyaj'íjtigix naygodigiiyigix. Ca' amij agix mnayjihuiyigixy. Migüg'adiyb yi' mmigüg huidi ayoob. Yung naxy mïd'at mjot mhuinma'ñ, ca' mnaygömáayigixy.

¹⁷ Co jäy xymidundigóoygixipy, ca' huaad jibic myaj'ahuimbijtcixy. Hue' janchtiy oybi ajcxy mdunipy jadu'n nej jäy jëbi jäygidägy. ¹⁸ Oy nayyaj'íjtigix mïd nidüg'óciy jäy mabaad mmadägy. ¹⁹ Miich ajcxy migügtijc, co jäy jibic xymidundigóoygixipy, ca' nañ jadu'n ajcxy myaj'ahuimbidity, mimecxtugipy ajcxy, com Dios yi' tzaachytunip yi' jäy ajcxy huidi anajty xymidundigóoygixp. Com jaybety jadu'n ymiñ ma Dios ñecy jadu'n ymiñ: "Íich nyaj'ahuimbiditych nej anajty jäy xymidundigóoygixy." ²⁰ Co jäy xymidundigóoygixipy myaj'ahuimbidity ajcxy oybi, com jaybety jadu'n ymiñ ma Dios ñecy, ma jadu'n ymiñ:

Pen yi' mmidzip yubo'cip, myajcayipy myaj'ügipy, pen yi' mmidzip tidziyipy, myajni'ügipy.

Co jadu'n mdunipy mïd mmidzip huin'it tzöydu'n jihuihuipy.

²¹ Pen myaj'ahuimbijtpy jibic co jäy xymidundigoy, ti anajty jibic-huinma'ñ xymimadägy. Hue' janchtiy yajtun mecxtujcin etz oyhuinma'ñ, e jadu'n jibicpi mïmadägyipy mïd oybi.

13

¹ Copicy co nidüg'óciy jäy capxymidóogixipy yi cajp tungmüdpí etz yi gobierno tungmüdpí. Ca' ji ni tüg tungmüdpí huidibi jébi y'ane'my pen Dios ca' a'ixiy. Com Dios jadu'n cötujcin ti yajhui'my co huen jii'aty tungmüdpídj, paady ycixpi tungmüdpídj nidüg'óciy jim mic'ajt paady ma Dios. ² Paady jäy ajcxy pinjaty ca' ycapxymido y ma tungmüdpídj, hue' tundigooyb ma Dios e tzaachypi ajcxy ypadaamyb. ³ Yi miltungmüdpí ca' yi' ajcxy adzigiy yi jäy huidijaty oyhuinma'n müd. Hue' janchtiy yi' ajcxy chaachytunipy yi jäy huidi jibic-huinma'n müd. Pen mdzojcp co ca' tzaachypi mbaadipy ma yi tungmüdpí, hue' janchtiy oybi mdunipy, e huin'it m'idipy jotcuje. ⁴ Com Dios ti pidägy jada tungmüdpí müd müch ajcxy ycixpi, jigix jébi jotcuje ajcxy mdzinaaygixy. Pen mdundigooyb huin'it je tungmüdpí mdzigihuipy, com yi' ymüd mic'ajt jébi tzaachytuñ jäy ajcxy huidibi tundigooyb. Com Dios ytung ytuunipy etz ycu yduunipy Dios ycötujcin jadu'n nej Dios xyñajtz'ane'müyim, copicy co tzaachytuñ je jäy ajcxy huidibi tundigooyb. ⁵ Paady ycixp copicy mgapxymidohuipy tungmüdpídj, jigix ca' müch ajcxy Dios xychaachytunipy e nañ jotcuje mnayjihuihuipy co ca' anajty ti ti mdundigoy. ⁶ Yi tungmüdpídj Dios ycixpi ajcxy ytuñ, e ymüd ajcxy ycötujcin, paady ycixpi copicy mmigüedipy ajcxy.

⁷ Mgüedipy ma yi tungmüdpídj huidibi xypaatp. Co ajcxy cajp meñ yajmucy, migüedipy. Co je gobierno tungmüdpí pidägy impuestos, migüedipy. Jäy ajcxy huidijaty tungmüdpí myajmij'adipy, etz huidi miltungmüdpí mgömayipy. ⁸ Ca' pin minuucxy'adiyb. Tzoc jihui' mmigügtijc, e mgüedipy oy'amy huidibi mnuucxyp. Co yi mmigügtijc mdzogipy mjihuipy ti anajty mguydundäy Dios ycötujcin. ⁹ Jadu'n Dios ycötujcin jaybety ymüñ, ma jadu'n ymüna'n: "Ca' mmigapxtigoyipy huingbi töxyjäy. Ca' mmigüg mmeedzipy. Ca' mjäy'aj'ögipy. Ca' mmigüg m'adzojcpy ti ymüd." Pen mdzojcpy mjihuipy migüg nej müch ci'm mnaychogyi ti anajty mguydundaay Dios y'ane'min ycötujcin. ¹⁰ Je naychojcin je nayjihuiy'in ca' p je' ti jibicpi ti tzaachypi tuñ ma je migüg, co jadu'n jada mguydundähuipy ti anajty Dios ycötujcin mguydundaay.

¹¹ Com müch ajcxy mnejhuipy co huingon je xü je tiempo mina Jesucristo mina'n jadüg'oc ya naaxhuiñ, paady ycixpi jip'ijxcix ajt nHuindzin Jesucristo co tzoje yminipy. E jadachambi ti yjac-huingoni mina müna'n müch ajt nHuindzin Jesucristo, ca' ydi co oga'n nmibijcin. ¹² Canaag jimijt jäy ajcxy ahuijxy jip'ijxpy co Dios yajnidzöga'nüyi ajcxy y'alma, jadachambi ti yhuingoni je xü je tiempo mina n'alma ajt nidzoocin padaanim. Paady ycixp tzoc ixmajtzim yi jibic-huinma'n yi huidibi jäy ycu ydumyby huidibi ca' Dios ytiy'ajt nejhuipy. Tzoc cuychinaayim cuyjugy'ajtim Dios ytiy'ajt. ¹³ Tzoc tzinaayim jugy'ajtim tudägy. Tzoc cuyduunim Dios ytiy'ajt. Ca' huaad jadu'n ndzinaayim amügyjäy. Ca' huaad n'agootzhuidijtim xiicyaax xiictinaayim. Ca' huaad ndundigooyim müd huingbi töxyjäy. Ni ca' huaad ndziptuunim ahua'nduunim. Ni ca' huaad nmigüg nmi'ixtinaayim. ¹⁴ Tzoc cuychinaayim cuyjugy'ajtim Jesucristo ytiy'ajt. Tzoc tzinaayim tiydudägy jadu'n nej Jesucristo tiydudägy ti chinäy ya naaxhuiñ. Ca' nguyduunim ti jibicpi ajt n'aa njot yja'adzojcpy.

14

Ca' migüg mbocy'ixy

¹ Müch ajcxy nmigügtijcich, copicy mgöbigipy aguje jotcuje ma müch mnayyöymüjcgixy ajcxy yi migügtijc huidibi mibijcp je Cristo, per ca' tiydudägy huinjihuipy je Cristo ytiy'ajt. Mgöbigipy per ca' mhuingapxpedipy, ca' ti myaj'ayucyoonipy müd yi' ajcxy. ² Ti migügtijc huidibi minamb co Dios ca' ti jicxy capx'aducy, etz jébi ajcxy jicxy huenytim ti jicxyity. Etz nañ ji migügtijc huidibi minam co Dios ti capx'aducy tzüch, paady ajcxy jicxy'adyi je'jada'ajty aay ujtz. ³ Yi migüg huidibi tzüch tzützp ca' huaad

ixtijy je ymīgüg huıdibı yjıcxpy je'jada'ajty aay ujtz. E nañ ni yı mīgüg huıdibı jıcxp aay ujtz ca' huaad ixtijy yı mīgüg huıdibı tzüch tzu'tzp, com Dios ycöbıjctaayb je jäy ajcxy huıdibı tı mıbıcy Jesucristo. ⁴ Ca' huaad miıch ajcxy mımähııpy yı mmīgüg co ca' oytuñ, tim jadu'n nıpaady nej co tüg jäy nımähııpy huıngbı jäy ytumbı co ca' oy ytuñ. Dios cı'm nımähııp huıdı ajcxy mıbıjcp Jesucristo, pen oytuñ o ca' oytuñ. Dios ypubejtyp pınjaty mıbıjcp, paady madaacp ajcxy ma chinaayın.

⁵ Nıjējıty ajt nmīgügtıjc ymınañ co ooy ycopıcyıty n'amay'ajtim nıjējıty xıı, jacjadyıı jäy ymınañ co ca' ycopıcyıty n'amay'ajtim jada xıı. Huen nidüg nidüg yci'mhuınmañ yajtuñ pen y'amay'adamyb, o pen ca' amay'adañ nıje' nıje' xıı. ⁶ İch ajt nmīgügtıjc huıdı amay'ajtp nıjējıty xıı, hue' ajcxy tıjy co Dios jadu'n tzojcp. E nañ İch ajt nmīgügtıjc huıdı tzüch tzu'tzp, hue' ajcxy tıjy co Dios jadu'n tzojcp, etz nañ yajnıjxyp Dioscojuyıp ma Dios mııd yjıcxpy ypıcy ycıxpı. Nañ tim jadu'n ajt nmīgügtıjc huıdı ca' tzüch tzüdzañ, hue' tıjy co Dios jadu'n tzojcp, etz nañ yajnıjxyp Dioscojuyıp mııd yjıcxpy ypıcy ycıxpı.

⁷ Ca' İch ajt nayyajtınaayım amıdzoocı'm, nañ jadu'n ca' İch ajt cı'm ndzojcin co n'o'cim. ⁸ Pen njactınaayım hue' anajty nguyduunım ajt nHuındzin Jesucristo chojcin. Pen n'o'cim yı' anajty jadu'n tı yajcöducy. Pen njactınaayım, o pen n'o'cim, tú'cıy nıpaady, com Jesucristo nHuındzin'ajtim ma yı tınaayın etz ma yı o'cin. ⁹ Paady ycıxp Cristo y'o'cy etz yjugypıjcy jadüg'oc jıgıx jëb nihuındzin'ajttäy yı' yjäy huıdibı jactınaayb jacjuy'ajtp, etz jıgıx jëb nihuındzin'aty yı tııbı y'ögy.

¹⁰ ¿Na'amy co mmīgüg mdzachpocy'ıxy? o ¿Nej co mmīgüg mdzach'ıxtıjy? Ca' jadu'n y'oyıty co ajcxy jadu'n m'ıdıch. Com nidüg'ócyı ajt njädaanıı ma Dios ytıydundac. ¹¹ Com jadu'n jaybety ymıñ ma Dios ñecy, ma jadu'n ymınañ:

Janch janch co İch, je tügpaıjcpı Dios, jadu'n nımınañıch co tüg'ócyı naaxhuıñyjäy xyhuıngoxtınaıhuıbıch xyhuındzıgıhuıbıch, etz nañ tüg'ócyı naaxhuıñyjay xycapxpaadıbıch co İch je' tügpaıjcpı je Dios.

¹² Com Dios nhuındzin'ajtim, paady ycıxp nidüg'ócyı İch ajt nayguëxıctähuaanıı ma Dios yhuınduu, chı Dios xy'amıdohuaanıı nej tı ndzınaayım tı njugy'ajtim nidüg nidüg.

Ca' mīgüg myajhuınmañıydıgooyıxy

¹³ Paady ycıxpı ca' huaad naynıxııc naynıgapxım mıñ xyıpy. Hue' janchtıy mııch pıdaaccıx mhuınmañ co ca' tı mdüngıxyıpy huıdı mmīgügtıjc ca' jäygidägy, huıdı mmīgüg yajpocycähuııb. ¹⁴ Nnejhuııybıch tıydudägy co ajt nHuındzin Jesucristo ytıy'ajtp xyajnejhuııyım co jëbı njııcxım huen tım huıdı jıcxpy tım huıdı pıcy. Je jıcxpy je pıcy ca' ma ycobocy. Per pen tüg mīgüg yhuınmañ pıdacp co Dios ca' jäygidägy co yı' yjıcxpy nıjējıty jıcxpy pıcy, pues ca' yhuaadıty co yı jadu'mbı jäy jıcxpy huıdı yı' ytıjpy co ca' huaad njıcxım. ¹⁵ Pen ca' m'oy'ıty mııd tüg mīgüg co tı mjıcxpy je jıcx pıcy huıdibı yı' ytıjpy co Dios ca' jadu'n yajcöducy, chı ca' anajty mdzocy mjıhuııy yı mmīgüg nej ypadyıı. Com nañ Cristo tı y'ögy mııd yı mmīgüg ypocy ycıxpı, paady ca' huaad myajtıgoy yı mmīgüg, mııd co mjıcxpy huıdı yı' ca' jäygidägy. ¹⁶ Ca' ajcxy m'a'ıxııygyıxy co jıbıc yajnıgapx yajnımydägyıpy huıdibı mııch ajcxy myajnıjxp co y'oyıty. Oy mııch mjahuınjıhuııy Dios ytıy'ajtp, per ca' huaad mdunıpy huıdı yı mmīgüg ca' jäygidägy, e huınıtı xyñıgapxıpy jıbıc. ¹⁷ Canan Dios jadu'n ytıy'ajtp xyñajtz'ane'mııyım huıdıjaty huaad njıcxım n'uucım, o huıdı ca' huaad njıcxım n'uucım. Hue' janchtıy tı xyñajtz'ane'mııyım nej jëbı tıydudägyı ndzınaayım njugy'ajtim. Nej jëbı jotcuıjc n'ıjtim mııd ajt nmīgügtıjc. Nej jëbı jotcuıjc nayjıhuııyım mııd Dios ymıc'ajtp ma njot nhuınmañ. ¹⁸ Co jadu'n nguyduunım nej Cristo ytıy'ajtp tı xyñajtz'ane'mııyım, huınıtı jäygidägyıpy Dios etz nañ jadu'n jäygidägyıpy jäy ajcxy nej anajty nduunım.

¹⁹ Tzoc panıcxım je huınmañ jadu'n nej jëbı ndzınaayım agııjc jotcuıjc mııd ajt nmīgügtıjc, ca' ma tı tzip tı capxy nmııd'ajtim. Tzoc yajtuunım je huınmañ jadu'n nej jëbı huaad naybubejtim nidüg nidüg nej jëbı huaad nguychinaayım Dios ytıy'ajtp. ²⁰ Ca' huaad nayajtıgooyım Dios ytung mııd tzip capxy jadu'n nej huıdı jëbı huaad ndzıdzım, etz

huidibi ca' huaad ndzüdzim. Janch tıy'ajt co Dios ca' ti jıcxıy ti pıcy capx'aducy, per pen njıcxım huıdıjaty njıjıty ajt nmıgügıtcıy yajcobojcpy, e jadu'n nyajhuınma'ñydıgooyım ajt nmıgüg, chı nmıduıdıgooyım Dios ytıy'ajt. ²¹ Tıy'ajt jadu'n co ca' huaad tzüch ndzüdzim etz ca' huaad vıno n'uucım, o jactıjaty huıdıbı ajt nmıgüg yajcobojcpy. Com co jadu'n ajt n'ıdıdzım, hue' anajty ajt nmıgüg nyajhuınma'ñydıgoyaanıma ymıbjıcın. ²² Mııch ajcxıy huıdıbı huınjıhuıyb Dios ytıy'ajt co Dios ca' capx'aducy ti jıcxın ti pıjıcın, ca' mnımydacconaxıpy mııd jäy ajcxıy. Dios ñejhuııyb co mııch mhıınjıhuııy yı' ytıy'ajt. Jıbı jıtcıjıc mdzınıhuıpy pen mguychınaayb je huınma'ñ huıdıbı mııch mnejhuııygıxyp co ytudägyıty, e huın'ıt ca' jıbıc mnayjıhuııyb ajcxıy. ²³ Tundıgooyb yı' mıgügıtcıy huıdıbı jıtcıjıc jıcxp njıjıty jıcxıy pıcy, mııd co tzıgııyb yı' co Dios ymıjıtmadııyb co ti jıcxıy huıdı ytıjpy co ycobocy. Tundıgooyb jadu'n com ca' ti cuydunı Dios ytıy'ajt nej cı'm ti yajñıguejy. Pen ca' nguyduunım jadu'n nej nıhuınjıhuııyım Dios ytıy'ajt, tundıgooyım anajty.

15

Tzojıx mıgügıtcıy, ca' ñaydüg mnaychogyıı

¹ İch ajt huıdıbı tıydudägy nmıbjıcım etz nıhuınjıhuııyım Dios ytıy'ajt, copıcy nmımecxtıjıcım ajt nmıgügıtcıy huıdıbı ca' nı huınjıhuııy yajxon Dios ytıy'ajt. Ca' huaad ti nduunım mııd ngı'm jäygıdaacın ycıxpı. ² Copıcy nyajtuunım oyhuınma'ñ mııd ajt nmıgügıtcıy, jadu'n nej jıbı ajt nmıgüg jäygıdägy, etz jadu'n nej jıbı nbubejıtm ajt nmıgüg mııd ymıbjıcın. ³ Com nañ Cristo ca' ti ytuñ mııd ycı'm jäygıdaacın ycıxpı, com jaybety jadu'n mıñ ma Dios ñecy, ma je Cristo nımay Dios Teedy: “Mııch mmıdzıp ajcxıy huıdıbı xyñıgapxp xyñı'ojııyb, xyñıgapxpıch xyñı'ojııybıch ajcxıy nañ jadu'n.” ⁴ Com tüg'ócıy Dios y'ayuc huıdıbı ycojay jecy'ajty, hue' cojay mııd ĩch ajt ycıxpı, jıgıx jıbı Dios ytıy'ajt nbaatım. Dios ytıy'ajt xyajnejhuııyım co Dios jadu'n tzojıy co nmımecxtıjıcım ajt nmıgügıtcıy. Nañ Dios y'ayuc xyjıt'amıjımooyım, e nañ xyajnejhuııyım jadu'n jıbı njıjı'ıjxım pubejıın ma Dios. ⁵ Com Dios, yı' je' huıdı xypubejıtm mııd mecxtıjıcın, e nañ xyjıt'amıjımooyım, paady huen Dios may'ajt tunıpy ma mııch ajcxıy mjıot mhıınma'ñ, jıgıx jıbı mmııd'ıdıpy tú'cıy mjıot mhıınma'ñ nej Jesucristo yjıot yhuınma'ñ mııdıty, e jadu'n jıbı mnayyaj'oy'ıjtıgıxy jıtcıjıcıy ca' ma tzip capxy. ⁶ Dios mııch ajcxıy xypubedıpy xypudıgıhuıpy, jıgıx jıbı myajtıgııygıxy mjıot mhıınma'ñ, etz tú'cıy m'ojadıjıtcıxıpy mhıındzıgııygıxıpy Dios Teedy etz ĩch ajt nıhuındzın Jesucristo.

Jesucristo y'ayuc yajcapxhuäcxy ma huıdıbı ca' yjudıojäyıty

⁷ Naygöbıjıcıgıx nıdüg nıdüg agıjıc jıtcıjıc, tım jadu'n nej Cristo xycöbıjıccıxy agıjıc jıtcıjıc. Co mnaygöbıjıcıgıxıpy nıdüg nıdüg agıjıc jıtcıjıc, huın'ıt Dios capxpaady y'ıdıpy. ⁸ Janch tıy'ajt co Cristo y'oy ya naaxhuıñ, oy pubejıty judıojäy ajcxıy, e jadu'n cuyduñ Dios ytıy'ajt huıdı yajhuınhuanıy Abraham, Isaac etz Jacob jecy'ajty co jadu'n tuna'ñ mııd yı' ajcxıy ycıxpı. ⁹ Nañ jadu'n Cristo ooy pubejıty yı' huıdıbı ca' yjudıojäyıty, jaydebı ajcxıy capxpaadıpy Dios, mııd co ti ypa'ayoyıı ajcxıy. Com jaybety jadu'n ymıñ ma Dios ñecy, ma jadu'n David ymınañ:

Com mııch Huındzın Dios tı xycıhua'ñıch paady mııch ngapxpaady ma yı' jäy ajcxıy huıdıbı ca' yjudıojäyıty. İch mııch nıhuın'ıhuıpy mııd himnos.

¹⁰ E nañ jaybety jadu'n ymıñ ma Dios yñecy:

Jıtcıjıc'ajıtcıxy quıpxy mııd Dios yjäy mııch ajcxıy huıdı ca' yjudıojäyıty.

¹¹ E nañ jaybety jadu'n ymıñ ma Dios ñecy, ma jadu'n ymına'ñ:

Capxpaatcıx yı' Huındzın Dios mııch ajcxıy huıdı ca' yjudıojäyıty. Capxpaatcıx yı' Huındzın Dios mııch ajcxıy nıdüg'ócıy naaxhuıñyjäy.

¹² E Isasıas ycojay nañ jadu'n ma yı' ñecy, ma jadu'n ymına'ñ:

Ma'xung'adamb tög Isai y'ap y'oc, e yi' ane'mamb yi jäy huidibi ca' yjudíojäyity. Co yi jäy ajcxy huidibi ca' yjudíojäyity mijpidägipy je mij'ane'mbi, hue' ajcxy yjijp'ixpy co möhuaanip oy'ajt.

¹³ Nmibijctzooybich Dios müd miich ajcxy ycixpi huidijaty mibijcp Jesucristo, com njijp'ixxim co Dios xymöhuaanim oy'ajtin. Nmibijctzooybich Dios müd miich ajcxy ycixpi co huen xyajjotcugihup ajcxy, e nañ co huen xyajpoocxipy mjot mhuinma'ñ. Nmibijctzooybich Dios co huen xypubejtcixy xypudigüygixy müd yi' yjihui'ñ ymic'ajt, jaydëbi mijjp'ixipy ajcxy co mbaadip oy'ajtin mijcajee ma Dios.

¹⁴ Miich ajcxy migügtijc, jotcuyc nayjihuiyijich müd miich ajcxy ycixpi, com nehuiybich co miich ajcxy müdity oyjot oyhuinma'ñ, e nañ mhuijihuüyb ajcxy tög'óciy Dios ytiy'ajt, paady jëbi mnayyaj'ixpüjigixy nidüg nidüg. ¹⁵⁻¹⁶ Jotmic'amy ti nya-jjäymejtcoodyich miich ajcxy nijëjity Dios ytiy'ajt ma jada necy huidi nyajnijayiyb ajcxy cham, com Dios may'ajt oy'ajt ti tuñ müd ñich, e ti xyhuin'ixyich jaydëbi nduñich Jesucristo ytung ma yi jäy ajcxy huidi ca' yjudíojäyity. Jadu'n nduñich müd Dios ycixpi, co ngapxhuäcxyich je oybi tiy'ajt jadu'n nej Jesucristo y'o'cy müd jäy ajcxy ypocy ycixpi. Jadu'n Jesucristo ytuñ jigix jëbi Dios cöbigipy yi mayjäy ca'pi yjudíojäyity huidi ti mibicy Jesucristo etz huidibi yi Espiritu Santo ti yajhuäch je jibicp ma ajcxy yjot yhuinma'ñ.

¹⁷ Com Jesucristo ytiy'ajt yajpaatp ma ñich njot nhuinma'ñ, paady ycixp ooy jotcuyc nayjihuiyijich co nduñich müd Dios ycixpi. ¹⁸ Jada janchtiy ñich nyajmüdmüydacy miich ajcxy je may'ajt huidi Cristo ti tuñ co ngapxhuäcxyich yi' y'ayuc. Ca' nyajmüdmüydaaccixy huidi Cristo ytumyb müd jacpinjaty. Müd co ngapxhuäcxyich Cristo y'ayuc, e nañ mijhuinma'ñ ndumybich müd Cristo ymic'ajt, paady mayjäy ycapxymidooyb Dios huidi ca'p ajcxy yjudíojäyity. ¹⁹ Ti ngapxhuäcxyich tög'óciy Cristo ytiy'ajt nej jëbi ajcxy y'alma ñidzoocin paadip. Jim nyajtzondacyich Jerusalén, e ti nhuidijttäyich canaag agajp mabaad nja'tyich jim Ilirico ñaaxjot. E Dios yjihui'ñ ymic'ajt xypubejtich xypudigüyich co ñich mijhuinma'ñ nduñich, etz Dios ytiy'ajt nyéjicibich. ²⁰ Ooy nijot'atyich co ngapxhuäcxyibich Jesucristo ytiy'ajt ma anajty ca' pin jayijp capxhuäcxyñi. Hich oga'n Jesucristo y'ayuc jim nminicxi ma yi jäy ajcxy huidi ca' anajty midoy Jesucristo ytiy'ajt. Jadu'n nduñich, jigix ca'ydi njijptigiyiyich ma huingbi anajty jayijp ti capxhuäcxi Jesucristo ytiy'ajt. ²¹ Com jaybety jadu'n ymiñ ma Dios ñecy, ma Dios jadu'n ymina'ñ:

Yi jäy ajcxy ymidohuaanip Cristo y'ayuc huidibi ca'ni anajty midoogixy. Yi jäy ajcxy yhuinjihuihuaamyb je Cristo ytiy'ajt huidibi ca'ni anajty nehuiyigixy co yjijity je Cristo.

Pablo huinmay co ñicxa'ñ jim Roma

²² Com ooy ndzachcapxhuäcxyich Cristo ytiy'ajt canaag agajp, paady ca' nyajnibadiyich ñicxybyich ma miich ajcxy. ²³ Canaag jimijt ndzachnijot'atyich anajty ñicxa'ñich ma miich ajcxy. Ixti chamni ti nhuidijttäyich majaty anajty nhuidida'ñich. ²⁴ Paady njijp'ixypich co jëbi nnaxihuibich ma miich ajcxy co anajty ñicxyich jim España ñaaxjot. Huäcxibaambich jim ma miich ajcxy jëbi hueeni ajcxy ngapxim nmiydaacim. Nañ hue' njijp'ixypich co xypubedaambich miich ajcxy müd ndu'amgixpich. ²⁵ Jayijp nñicxa'ñich jim Jerusalén, chiini nñicxa'ñich ma miich ajcxy. Nminicxaamybich jim Jerusalén hueeni meen huidibi nyegaamybich ma yi mibijcpidijc jim Jerusalén müd ayoobtijc ycixpi. ²⁶ Com yi mibijcpidijc ya Macedonia etz Acaya ñaaxjot ti ajcxy yhuinma'ñ pidaaccixy co ajcxy pubeda'ñ yi ayoobtijc jim Jerusalén huidibi mijpidacp Jesucristo. ²⁷ Ooy ajcxy jotcuyc ñayjihuiyii co ymigügtijc pubeda'ñ jim Jerusalén. Paatip co pubedipy ajcxy, com ma yi judíojäy ajcxy, jim ajcxy ti paady Dios ytiy'ajt, paady paatip ajcxy huidi ca' yjudíojäyity co pubedipy yi judíojäy ajcxy. ²⁸ Co anajty ti nyajcidigiydaaygixy je meen huidibi yi migügtijc ya Macedonia etz Acaya ti yajmujccixy müd je mibijcpidijc ycixpi huidibi yajpatp jim Jerusalén, huin'it nñicxa'ñich jim España ñaaxjot. Nnaxihuaambich

ma miich ajcxy co anajty jim nnicxich. ²⁹ Nejhuuybich co anajty jim naxiyich ma miich ajcxy, je Cristo xypubedipich je ymic'ajt, e nyegipich Cristo ymic'ajt ijxpejt etz nyaj'ixpigipyich miich ajcxy je Cristo ytiy'ajt.

³⁰ Miich ajcxy nmigügtijcich, com miich ajcxy mijpidaaccixyp ich ajt nHuindzin Jesucristo, e com miich ajcxy muid Dios yjihui'ñ ymic'ajt ma m'aa mjot, e nañ xychojcpich xyjihuiybich, paady ycixp nbijctzooyich may'ajt, yajtügyigyxy m'ayuc mhuinma'ñ muid ich, jëbi tú'ciy Dios nmibijctzoohuim mictägy muid ich ycixpi. ³¹ Mibijctzoogix Dios co huen xyñihua'ñich xycohua'ñich ma yi judíojäy ajcxy jim Judea naaxjot, huidibi xyca'ixaambich co ajcxy ca' mijpidägy Jesús. Nañ mibijctzoogix Dios co yi mibijcpidijc jim Jerusalén cöbigipy ajcxy oy yajxon je pubejtin huidibi ich jim ngiyegaamy. ³² Mibijctzoogix Dios co huen xypubedipy xypudigihuibich, jëbi nícxibich ma miich ajcxy agujc jotcujc, ca' ti jotmay, pen Dios jadu'n tzojcp, etz nañ jëbi nhuäcxibipich jim ma miich ajcxy agujc jotcujc, e jim ich nhuinma'ñ nyajpocxip. ³³ Mibijctzooybich Dios muid miich ajcxy ycixpi, je Dios huidibi jotcujc'ajtin yejcp, co huen miich ajcxy xypubedipy xypudigihuipy. Jadu'n jadu'n. Amén.

16

Capxpooxïn nidüg nidüg ma pinjaty y'ixy'ajtyp

¹ Cham ich miich ajcxy nyajnibijccixy, cöbijccixy je ajt nmigüg töxyjäy je Febe co anajty ñicxy ma miich ajcxy. Yi' je' nidügti huidibi pubejtin tumb ma je mibijcpidijc jim Cencrea. ² Mdunipy may'ajt mgöbigipy Febe muid ajt nHuindzin Jesús ycixpi. Com jadu'n ycopicyity co jäy huidibi mibijcp Jesucristo huen naymigüg'ájtigixy. Mbubedip mbudigihuip jadu'n nej yi' jotmay müdity. Yi Febe ti ooy mayjäy pubety, e nañ ti xypubetyich.

³ Nguejxypyich capxpooxïn ma jada necy muid yi Priscila etz Aquila huidibi ich anajty muid ooy oy nduñ co ngapxhuäcxyich Cristo ytiy'ajt. ⁴ Yi Priscila etz Aquila yojx ytooc ajcxy yjugy'ajtin muid ich ycixpi, ca'ydi n'ögyich. Nyajnaxypich jäygidaacin ma Dios muid yi' ajcxy ycixpi, co ti xypubetyich ajcxy. E nañ jadu'n tüg'óciy jäy ajcxy huidibi ca'pi yjudíojäyity yajnaxcixy jäygidaacin ma Dios muid yi' ajcxy ycixpi. ⁵ Nguejxypich capxpooxïn nañ jadu'n ma jada necy muid yi mibijcpidijc ajcxy huidijaty naymujjcp ma Priscila etz Aquila ajcxy ytijc. Etz nañ nguejxypyich capxpooxïn ma yi Epeneto huidibi ooy ndzocyich. Yi' je' tim jayijp huidibi mijpidaac Cristo jim Acaya ñaaxjot. ⁶ Etz nañ nguejxypich capxpooxïn ma María, yi' ooy ti ytuñ muid miich ajcxy muid Cristo ycixpi. ⁷ Etz nañ nguejxypyich capxpooxïn ma yi Andrónico etz Junias. Ich n'amigüg ajcxy huidibi ti ypujxtijc inäy quipxy muid ich. Capxpaady ajcxy y'ity muid yi apóstoltijc. Jacjayijp ajcxy mijpidacy Jesucristo ca'ydi ich.

⁸ Etz nañ nguejxypich capxpooxïn ma yi Amplias, huidibi ooy yajxon mijpidägy ajt nHuindzin Jesucristo. ⁹ Nañ nguejxypich capxpooxïn ma yi Urbano huidibi xymüdtuñich co ich anajty ngapxhuäcxyich Jesucristo ytiy'ajt. Nañ jadu'n nguejxypich capxpooxïn ma yi Estaquis huidibi oy ndzocy njihuüyich. ¹⁰ Nañ nguejxypyich capxpooxïn ma yi Apeles, huidibi ooy tiy'ajt ti yecy co yi' ymibijcpy Cristo tiydudägy. Nañ nguejxypich capxpooxïn ma yi Aristóbulo etz jac pinjaty huidibi yajpatp ma yi' ytijc. ¹¹ Nañ nguejxypich capxpooxïn ma ich n'amigüg yi Herodiön. Etz nañ nguejxypich capxpooxïn ma yi Narciso yjuugy ymigüg huidibi mijpidacp ich ajt nHuindzin Jesucristo. ¹² Nañ nguejxypich capxpooxïn ma yi Trifena etz Trifosa huidijaty tumb ma ajt nHuindzin Jesús ytung. Nañ nguejxypich capxpooxïn ma Pérsida, je migüg huidi oy ndzocyich, etz nañ huidi ooy ytuñ ma ajt nHuindzin Jesucristo ytung. ¹³ Nañ nguejxypich capxpooxïn ma yi Rufo, je huidibi yi mibijcpidijc ycömaayb. Nañ nguejxypich capxpooxïn ma yi' ytaj, com jadu'n njihuüyich jadu'n nej jihuiy yi' ndaj'adyiijich. ¹⁴ Nañ

nguejxpyich capxpooocxin ma yi Asíncrito, yi Flegonte, yi Hermas, yi Patrobas, yi Hermes etz ñan tüg'óciy yi mibijcpidijc huidi jim yajpatp ma yi' ajcxy. ¹⁵ Nañ nguejxpyich capxpooocxin ma yi Filólogo, yi Julia, yi Nereo etz yi' y'uch töxyjäybi, yi Olimpas, etz nañ tüg'óciy yi mibijcpidijc huidibi yajpaatp jim ma yi' ajcxy.

¹⁶ Naygapxpóocxigix xic xon nidüg nidüg. Naygimájtzigix miñ yxipy agujc jotcuje. Tüg'óciy huidibi mibijcp Jesucristo ma yi jacjaydyii cajp, yquejxyp ajcxy capxpooocxin ma miich ajcxy.

¹⁷ Miich ajcxy migügtijc, may'ajt nbijctzooybich naygüend'adi' ajcxy ma yi jäy ajcxy huidibi mimiimb ayuc ca'pi ytiy'ajtiy, huidibi nigoob yjäyajtziptuna'ñ yjäybije-huäcxa'ñ, huidibi ca' ixa'ñ yi Dios ytiy'ajt huidibi ti m'ixpijccixy. Puuhuäctüd miich yi' ajcxy. ¹⁸ Com yi jäy ajcxy huidibi ymigügtijc yajhuinma'ñ ydigoooyb, ca' ajcxy tuñ Jesucristo ytung. Hue' ajcxy yaj'ixpijcp huidi yci'mhuinma'ñ yci'mdzojcín. Je' ajcxy huin'ñigixp je jäy ajcxy huidibi ca' mijcajee y'ixpiyity. Yi ayuc huidibi ymihuudijtyp, jadu'n yajmidoy nej jihuiy oy ytiyity yjanchity, per ca' yi' yjanchity. ¹⁹ Com mayjäy ti xyajmidooyich jadu'n nej miich ajcxy mgapxymidooy Jesucristo, paady jotcuje nayjihuiyijich müd miich ajcxy ycixpi. Ndzocypich co miich ajcxy mnejhuihuipy huidibi oyhuinma'ñ jaydëbi mdúngixipy ajcxy etz ca' jibic-huinma'ñ mdúngixipy. ²⁰ Dios oyhuinma'ñ etz mic'ajt ti xymooyim jëbi ndzinaayim müd ajt nmigügtijc agujc jotcuje, ca' ma tzip capxy. Tim huingon je xii je tiempo mina Dios yajcödígoya'ñ yi mujcu' ymic'ajt, e yi' xypubedip xypudigihuip jëbi mmimadägipy yi ca'oybi. Nmibijctzooybich Dios müd miich ajcxy ycixpi co ñch ajt nHuindzin Jesucristo huen may'ajt oy'ajt tuñ müd miich ajcxy jabom jabom.

²¹ Je Timoteo huidibi tumb müd ñch co ngapxhuäcxich Jesucristo ytiy'ajt xyajniguejxp ajcxy capxpooocxin. Nañ jadu'n Lucio, Jasón etz Sosípater ñch n'amigüg ajcxy, xyajniguejxp capxpooocxin.

²² ñch Tercio huidibi cojaayb Pablo y'ayuc ma jada necy, nañ nguejxpyich capxpooocxin ma miich ajcxy, com ñch nañ jadu'n nyajpaadyich ma ajt nHuindzin Jesucristo.

²³ Nañ jadu'n Gayo xyajniguejxp capxpooocxin, yi' xyajjättacich. E nañ je jäy ajcxy huidibi mijpidacp Jesucristo huidibi ajcxy nayyöymujcip ma Gayo ytiy'ajt yquejxyp ajcxy capxpooocxin ma miich ajcxy. Erasto je cajp ytesorero etz ajt nmigüg huidibi yxii Cuarto, nañ xyajniguejxp ajcxy capxpooocxin.

²⁴ Nmibijctzooybich Dios müd miich ajcxy ycixpi jabom jabom co ñch ajt nHuindzin Jesucristo huen may'ajt oy'ajt tuñ ma miich ajcxy. Amén.

Je capxpooocxin ma yaj'ñbaady yajcapxpaady Dios

²⁵ Tzoc cömayim Dios, tzoc ojadajtim, tzoc huin'ñhuim müd himnos. Dios müd ymic'ajt jëbi xypubedipy xypudigihuipy ajcxy, jaydëbi ajcxy tiydudägy mmibigipy Jesucristo, ca'ydi mjotmetzcüygixy. Tim jadu'n nej je oybi tiy'ajt huidibi ngapxhuäcxpich tim jadu'n nej je Jesucristo ytiy'ajt huidibi jacjadyii jäy ycapxhuäcxixyp. Jada je tiy'ajt huidibi jecy'ajty ca' pín huinjhuuy huidibi Dios ti xyajnejhuuyim. ²⁶ Dios ti xyajhuinjhuuyim nej yhuimbizimy je ayuc huidibi je profetas ajcxy ycojay jecy'ajty. Dios huidibi tzinaayb huinixii huinitiempo, ane'mb co huen yajcapxhuäcxy jada tiy'ajt oybi ma tüg'óciy naaxhuiñyäj, jigix jëbi mayjäy mijpidägip etz capxymidoohuipy Dios.

²⁷ Müd co Jesucristo ooy mijhuinma'ñ tuñ müd ñch ajt ycixpi, paady tzoc cömayim, tzoc ojadajtim etz tzoc huin'ñhuim müd himnos huinixii huinitiempo yi tügpajcpi Dios huidibi ñejhuiydaayb tüg'óciy. Jadu'n ngapxcixyich. Amén.

1 CORINTIOS

Yi Midügpí Necy Huídibí San Pablo Yajniejx Je Mibíjcpídjic Jim Corinto

1-2 Ich Pablo, Dios jadu'n tzojcp co Jesucristo xyajníbicyich co ngapxhuäcxibyich yí' y'ayuc. Ich etz ajt nmigüg Sóstenes nijayíybich miich ajcxy tüg'ócy huídibí jim Corinto huídibí mijpidacp Dios etz ñayyöymújcgixy jim miid Dios ycixpi. Nijayíybich miich ajcxy huídibí Dios ti yaj'ahuimbijttäy tudägy miid Jesucristo co y'o'cy miid ajcxy mbocy ycixpi. Nijayíybich miich ajcxy huídibí Dios ti huin'ixy, jaydëbi mmid'idipy huädz jot huädz huinma'ñ. Nañ jadu'n nijayíybich tüg'ócy je jäy huenyma'amyity huídibí Dios mibíjctzoob ojadajtp miid ich ajt nHuindzin Jesucristo yxii. 3 Ndzojcypich co ich ajt nDios Teedy etz ajt nHuindzin Jesucristo oy'ajt may'ajt tunipy miid miich ajcxy, etz xyajjotcugíhuipy ajcxy.

Oy'ajt miid Cristo ycixpi

4 Nyajnajxypich Dioscojuyip ma Dios jabom jabom miid miich ajcxy ycixpi, miid co Dios may'ajt oy'ajt ti tuñ miid miich ajcxy ycixpi ma Jesucristo. 5 Co ti mmijpidaaccixy Jesucristo, oybi ti mbaatcixy ma tüg'ócy mdzinaayin mjogy'ajtin. May'amy capxy ayuc oybi ti mbaatcixy, etz may'amy huinma'ñ oybi ti mbaatcixy. 6 Ma miich ajcxy mdzinaayin mjogy'ajtin etz mgapxy m'ayuc ñiguëxigipy Cristo ytiy'ajt etz ymic'ajt. 7 Dios miich ajcxy ti xymöy tüg'ócy ymic'ajt. Ca' ti myajtigoy'ijtcixy ma mdzinaayin mjogy'ajtin huídibí Dios ñijeycpy, ma je' m'ahuijxcixy co Dios yajnieguëxiga'ñ jadüg'oc ya naaxhuiñ ajt nHuindzin Jesucristo. 8 Jesucristo miich ajcxy xyhuijtz'ijtp tudägy, ixti cooni ycixipy tigoyipy je naaxhuiñybi, e co anajty yí' tiyduñ naaxhuiñyjäy ajcxy miid ypocy ycixpi, ca' miich ajcxy mbocycáhuipy. 9 Dios yjatyimycuydunipy yí' y'ayuc miid miich ajcxy, ca' xy'ixmadzaangixy ni mina xii, com yí' ti xyhuin'ijxcixy co miid mnaymigüg'ájtigixy yí' y'ung, ich ajt nHuindzin Jesucristo.

Naybjc-huäcxí ma je mibíjcpídjic

10 Migügtijc, ich miich ajcxy nmínucxtacyp miid Jesucristo yxii co tungixy may'ajt nay'ayuc-huinjihuiñyigix, e ca' mnaybjc-huäcxigixy. Tzinaaygix xic xon miid tú'ciy mjot mhuinma'ñ. 11 Miich ajcxy migügtijc, ti je Cloé y'amigügtijc xyajnimäyich co ooy miich ajcxy mnaychip'íjxigixy, e ca' mnay'ayuc-huinjihuiñyigixy. 12 Miid jada ycixpi nmína'ñich co nijëjity miich ajcxy jadu'n mínaangixy: "Ich Pablo nmijnicxpejtpyich." E nijëjity ymínaangixy: "Ich Apolos nmijnicxpejtpyich." E nijëjity ymínaangixy: "Ich Pedro nmijnicxpejtpyich." E nijëjity ymínaangixy: "Ich Cristo nmijnicxpejtpyich." 13 ¿Nej Cristo ti ñaybjc-huäcxiiijí? Ca'. ¿Nej Pablo yajcruudzpejti miid miich ajcxy ycixpi? Ca'. ¿Nej ti miich ajcxy mníbejtcixy miid Pablo yxii? Ca' yjaduníty. 14 Nyajnajxypich Dioscojuyip ma Dios co ca' jac ni pin ich ti ngayajníbety. Jëda'ajty ti nyajníbetyich Crispo etz Gayo. 15 Jadu'n ti nduñich je'gixpi co ca' huaad jäy ajcxy ymínaangixy co ti ajcxy ñíbety miid Pablo yxii. 16 Nañ jadu'n ti nyajníbetyich yí' Estéfano miid yí' yjuugy ymigüg ajcxy. Jac ni je' ca' njäyechich pen ti nyajníbetyich. 17 Com Cristo ca' xyquejxyich jäy yajníbejtpi. Hue' janchtiy ti xyquexyich co ngapxhuäcxibich yí' y'ayuc ytiy'ajt oybi. Ca' nyajtuñich ixpijty y'ayuc yhuinma'ñ. Co ixipy nyajtuñich ixpijty y'ayuc yhuinma'ñ, naadigí'ajt ixipy co Cristo y'o'cy ma yí' cruudz miid ajt nbocy ycixpi.

Cristo ymiid Dios ymic'ajt etz yí' y'ixpijcin etz ytiy'ajt

18 Yi jäy ajcxy huídibí y'alma tigoyam, loci huinma'ñ yí' tijcixy co Cristo y'o'cy ma yí' cruudz miid ajcxy ypocy ycixpi. Per ich ajt pinjaty y'alma nüzögam, hue' mínaanim co

jada ayuc t̄iy'ajt m̄id Cristo yc̄ixpi, ym̄id ȳi' Dios ymic'ajt. ¹⁹ Com jaybety jadu'n ma Dios ñecy, ma Dios jadu'n ym̄ina'ñ:

Nyajtigoyaamybich ȳi' x̄p̄icyt̄ijc y'ayuc yhuinma'ñ.

Nj̄ib̄ijc̄ibich ȳi' cohuinma'ñȳj̄ȳdj̄c ajcxy yhuinma'ñ.

²⁰ ¿Ti mic'ajt ym̄id ȳi' cohuinma'ñȳj̄ȳdj̄c ajcxy? ¿Ti mic'ajt ym̄id ȳi' x̄p̄icyt̄ijc? ¿Ti mic'ajt ym̄id ȳi' hūidib̄i ajcxy nay'ixquix̄p̄ m̄id x̄p̄ijc̄in? Ca' ti mic'ajt m̄id̄ity ȳi' ajcxy, com Dios ti yaj'ahuimbity ȳi' naaxhuiñ y'ix̄p̄ijc̄in tzuu huinma'ñ loci huinma'ñ. ²¹ Com Dios jadu'n ti tzocy co j̄ȳ ajcxy ca' padaangixy Dios yt̄iy'ajt ma ȳi' naaxhuiñj̄ȳ ajcxy y'ix̄p̄ijc̄in. Dios ȳj̄ȳgidacpy co j̄eb̄i j̄ȳ ajcxy y'alma ñ̄dz̄oḡipy co ajcxy m̄ib̄iḡipy je Dios y'ayuc hūidib̄i ngapxhūac̄xyp̄ich. Je Dios y'ayuc yt̄iy'ajt hūidib̄i ñ̄ch ajcxy ngapxhūac̄xyp̄, ȳi' ȳi' naaxhuiñj̄ȳ ajcxy huin̄jih̄ȳḡixyp̄ nej tzuu huinma'ñ loci huinma'ñ.

²² Ȳi' jud̄ioj̄ȳ ajcxy ooy tzachtzojcc̄ixy co Dios tun̄ipy īxpejt̄ m̄ijhuinma'ñȳbi. Ȳi' griego j̄ȳ y'ixtaayḡixyp̄ ayuc huinma'ñ etz huenhūidiib̄ity īxp̄ijc̄in. ²³ ñ̄ch ajcxy ngapxhūac̄xich co Cristo y'o'cy ma ȳi' cruudz m̄id j̄ȳ ajcxy ypocy yc̄ixpi. Ȳi' mayb̄i jud̄ioj̄ȳ ajcxy ca' m̄ijp̄id̄agaangixy ca' c̄ob̄igaangixy ñ̄ch ajcxy n'ayuc. Etz ȳi' mayb̄i j̄ȳ ajcxy hūidib̄i ca'p̄ yjud̄ioj̄ȳity, hue' t̄ijc̄ixy co tzuu huinma'ñ loci huinma'ñ ñ̄ch ajcxy n'ayuc. ²⁴ Per ȳi' j̄ȳ ajcxy hūidib̄i Dios ti yhuin'ij̄xiḡixy, huen yjud̄ioj̄ȳity, o huen ycajud̄ioj̄ȳity, hue' ajcxy t̄ijc̄ixy co je Cristo ym̄id anajty Dios ymic'ajt etz ym̄id anajty Dios y'ayuc yt̄iy'ajt. ²⁵ Co īxp̄icyt̄ijc̄ t̄ijc̄ixy co Dios ytung, tzuu huinma'ñ loci huinma'ñ je', n̄gi jac'oyhuinma'ñ ȳi' hūidib̄i Dios tumyb, ca'ydi hūidib̄i j̄ȳ ajcxy ytumyb. Co īxp̄icyt̄ijc̄ ym̄inaangixy co Dios ca' ymic'ajt m̄id̄ity, n̄gi jacmic'ajt m̄id ȳi', ca'ydi hūidi j̄ȳ ajcxy ym̄id.

²⁶ M̄iḡugt̄ijc̄ ajcxy, huinmay miich ajcxy jadu'n nej Dios ti xyhuin'ij̄xc̄ixy. Ni may miich ajcxy hūidib̄i ca' y'ix̄p̄icȳity, tim nihueeni hūidib̄i īxp̄icȳip̄ ma miich ajcxy. Ni may miich ajcxy hūidib̄i ca' ti mic'ajt, ca' ti ane'm̄in m̄id̄ity. Ni hueeñ miich ajcxy hūidib̄i mic'ajt m̄id etz ane'm̄in m̄id. Ni may miich ajcxy hūidib̄i oyñ̄ip̄in̄j̄ȳity. Ni hueeni miich ajcxy hūidib̄i y'ap yteedy rey'ajtp. ²⁷ Per Dios ti huin'ixy ȳi' j̄ȳ ajcxy hūidib̄i ca' y'ix̄p̄icȳity co jadu'n yajtzo'yduna'ñ ȳi' īxp̄icȳj̄ȳ ȳi' cohuinma'ñj̄ȳ. Dios ti huin'ixy ȳi' j̄ȳ ajcxy hūidib̄i ca' ti mic'ajt m̄id̄ity, m̄id co jadu'n yajtzo'yduna'ñ ȳi' j̄ȳ ajcxy hūidib̄i mic'ajt m̄id, ane'm̄in m̄id. ²⁸ Dios ti huin'ixy hūidib̄i j̄ȳ ajcxy ca' m̄ij'ij̄x̄ m̄ijp̄idaacc̄ixy, hūidib̄i j̄ȳ ajcxy yt̄ijpy co ca' y'oȳity. Dios jadu'n tuuñ co yajc̄od̄igoya'ñ ȳi' hūidib̄i j̄ȳ ajcxy m̄ij'ij̄xp̄ m̄ijp̄idacp, je hūidib̄i j̄ȳ ajcxy yt̄ijpy co y'oȳity. ²⁹ Jadu'n Dios ytuñ co ca' tzocy co ni p̄in̄j̄ȳ ca' ñ̄ayḡom̄aȳiyb̄ ci'm ma ȳi' yhuinduu. ³⁰ Per Dios ci'm yaj'oȳiȳ nej j̄eb̄i miich ajcxy myajpatc̄ixy m̄id Cristo Jesús. Dios ci'm yaj'oȳiȳ nej j̄eb̄i ajt nbaatim īxp̄ijc̄in ma Cristo. Nañ jadu'n yaj'oȳiȳ nej j̄eb̄i Cristo xyaj'ahuimb̄ij̄tim tud̄agy, jayd̄eb̄i Dios xyc̄ob̄ijc̄im nej tud̄agy j̄ȳ. Nañ jadu'n Dios yaj'oȳiȳ nej j̄eb̄i huaad nbaatim ajt nhūadz̄jot nhūadz̄huinma'ñ ma Cristo. Nañ jadu'n Dios yaj'oȳiȳ nej j̄eb̄i Cristo xyñ̄ihuaanim ajt n'alma etz njugy'ajtin. ³¹ Paady yc̄ixpi jaybety ymiñ ma Dios ñecy, ma jadu'n ym̄ina'ñ: "P̄in̄jaty nayḡom̄ayaan̄ip̄ ci'm, huen nayḡom̄aȳii m̄id co m̄ib̄icy ajt nHuindz̄in Dios."

2

Je y'ayuc yt̄iy'ajt, je Cristo hūidib̄i cruudzpejt

¹ Per co n'oȳich ma miich ajcxy jayhuin, ngapxhūac̄xyich anajty Dios y'ayuc yt̄iy'ajt, oy'amy nyaj'ix̄p̄ijcȳich, ca' nyajtuñ̄ich īxp̄icȳj̄ȳ ajcxy y'ayuc, etz nañ jadu'n ca' nyajtuñ̄ich tzipjatyp̄i ayuc. ² Co jim n'ijtȳich ma miich ajcxy jayhuin, chi nhuinma'ñȳbidacȳich co ca' jac ti ayuc ti huinma'ñ nyajm̄id̄m̄iyd̄agaangixy, j̄e'ȳi' jancht̄iy nyajm̄id̄m̄iyd̄agaangixy Jesucristo etz jadu'n nej je' yajcruudzpejt̄i m̄id j̄ȳ ajcxy ypocy yc̄ixpi. ³ Co jim ñ̄ch anajty nyajpaadȳich ma miich ajcxy, chi ooy yung naxy nayb̄idaac̄ich, ooy ndz̄iḡiȳ nj̄ihūiȳich. ⁴ E co nm̄id̄m̄iydaacȳich miich ajcxy, co ngapxhūac̄xyich Dios yt̄iy'ajt ma miich ajcxy, ca'p̄i ñ̄ch miich ajcxy nyajm̄ib̄icy m̄id īxp̄icyt̄ijc̄ y'ayuc m̄id tzipjatyp̄i ayuc. Je Esp̄iritu Santo xypubejtp̄ich anajty co ajcxy nyaj'ij̄xy

Dios ymic'ajt, e paady ycixpi ti ajcxy mmibijccixy Dios y'ayuc. ⁵ Jadu'n je Espiritu Santo xypubetyich anajty, jigix miich ajcxy mijpidaagipy Dios, ca' nminaanim miid co ti mmidoogixy oyjatypi ayuc huudibi jäy ajcxy ti cojy ti macxy. Ti mmijpidaaccixy Dios com ti m'ijxcixy ti mjihuuygixy Dios ymic'ajt.

Dios xyajnejhuuyim yi' ytiy'ajt miid y'Espiritu Santo

⁶ Oy co ti nyajmibicyich miich ajcxy miid ayuc huudibi ca' chipjatyity, per nañ jadu'n nyaj'ixpicyich oyjatypi ayuc tzipjatypi ayuc yi' mibijcpidijc ajcxy tibi yhuinma'n ymiinni ymejchni. Tigachjaty ich n'ayuc ndiy'ajt e ca' ñaybadyii miid naaxhuiñjäy ajcxy y'ayuc ytiy'ajt huudibi ca' mibijccixy huudibi tzinaayb jugy'ajtp jadachambi xii jadachambi tiempo. Ich n'ayuc ndiy'ajt ca' ñaybadyii miid je jäy ajcxy y'ayuc ytiy'ajt huudibi ane'mb ya naaxhuiñ, yi' jadu'mbi jäy yi' ajcxy yjugy'ajtin cixamb tigoyamb tüccí'yi. ⁷ Ich ajcxy nyaj'ixpijcpy Dios y'ayuc ytiy'ajt huudibi ca' ni pin jecy'ajty nejhuuy huinjhuuy, je ayuc tiy'ajt huudibi Dios ymiid coyüch, je ayuc tiy'ajt huudibi Dios ti cojy ti macxy jecy'ajty ca'ni anajty naaxhuiñybi chondacy. Dios ycoj ymacx jada ayuc, jaydebi ajt n'alma ñidzoocim huinixii huinitempo. ⁸ Ni tüg mij'ane'mbi huudibi tzinaayb jadachambi xii jadachambi tiempo, ca' huinjhuuy jada ayuc. Co ixypy ajcxy huinjhuuy, ca' ajcxy cayajcruudzpejty je Huindzin Dios y'ung, je huudibi miid Dios y'oy'ajtin ymij'ajtin. ⁹ Com ca' ajcxy huinjhuuy Dios y'ayuc, paady ycixpi jaybety ymiñ ma Dios ñecy, ma jadu'n ymina'n:

Ni tüg jäy ca' ixxy, ni tüg jäy ca' midoy, ni tüg jäy ca' yhuinma'ñybaady jadu'n nej Dios ni'ixxy miidity miid je jäy ajcxy ycixpi huudibi yi' mijpidaacip yajmij'ajtip.

¹⁰ Miid co nmijpidaacim Dios, paady ycixpi Dios yaj'oyii nej jebi je Espiritu Santo xyajnejhuuyim yi' ytiy'ajt. E je Espiritu Santo yhuinjhuuydaayb ñejjihuydaayb tüg'óciy, xti yhuinjhuuydaayb nej Dios yhuinma'n ti pidägy co tuna'n, je huudibi ca' pin nejhuuy.

¹¹ Ca' pinjäy jebi huinjhuuy nej jadügpä jäy yjot yhuinma'n miidity. Je jäy yci'mhuinma'n jebi huinjhuuy nej je' yci'mjot yci'mhuinma'n miidity, ca' jac pin. Nañ jadu'n ca' jac pin jebi huinjhuuy nej Dios yjot yhuinma'n miidity. Dios yci'mjihui'n huinjhuuyb nej Dios yjot yhuinma'n miidity. ¹² Dios ca' xyaj'adiguyim xyajjottiguyim huingjäy yjihui'n ymic'ajt. Hue' Dios xyaj'adiguyim xyajjottiguyim yi' yci'mjihui'n yci'mmic'ajt, paady ycixp jebi nhuinjhuuyim tüg'óciy huudibi ti xymooyim. ¹³ Ich ajcxy nyajmiidmiydacpy miich ajcxy je ayuc tiy'ajt huudibi je Espiritu Santo xyaj'ixpijccixyich. E ca' nyajmiidmiydaaccixy je tiy'ajt huudibi ti n'ixpicyich ya naaxhuiñ huudibi jäy ajcxy ti cojy ti macxy. Nyaj'ixpijccixy Dios y'ayuc ytiy'ajt huudibi je Espiritu Santo xyajnejhuuyich. Ich ti nyaj'ixpicyich yi' ajcxy huudibi miid Dios yjihui'n ymic'ajt ma y'aa yjot.

¹⁴ Pinjaty ca' miidity Dios yjihui'n ymic'ajt, ca' yi' cöbiga'n je tiy'ajt huudibi je Espiritu Santo xyajnejhuuyim. Com yi' ajcxy ytiyp co jada tiy'ajt tzuu huinma'n loci huinma'n yi'. Nañ ni ca' ajcxy Dios ytiy'ajt huinjhuuyi, com ca' ajcxy miidity Dios yjihui'n ymic'ajt huudibi yajnejhuuyb Dios ytiy'ajt. ¹⁵ Je jäy huudibi ymiid'ajtipy Dios yjihui'n ymic'ajt, yi' jebi yajciyöy yajtecyöy tüg'óciy pinjaty yjot yhuinma'n. Per ca' yi' huaad pinjaty yajciyöy yajtecyöy yjot yhuinma'n. ¹⁶ Com jadu'n Dios ymina'n ma ñecy: “¿Pin jäy huinjhuuyb nej Dios yhuinma'ñmiidity? Ca' ni pin. ¿Pin jäy huaad Dios yaj'ixpicy? Ca' ni pin.” Oy ca' pin huinjhuuy jecy'ajty nej Dios yhuinma'ñmiidity, jadachambi ich ajt nhuinjhuuyim nej Cristo yhuinma'ñmiidity.

3

Je huudibi ajcxy mibijcp ytungixy ma Dios

¹ Migügtijc ajcxy, co ti n'oyich ma miich ajcxy, chi nmidmiydaaccixy jadu'n nej jihuy miich ajcxy mhuinma'ñmiidity nej naaxhuiñjäy ajcxy yhuinma'ñmiidity huudibi ca' ymibijccixy. E ca' anajty miich ajcxy miidity je mhuinma'n huudibi je Espiritu Santo

yejcpy. Miich ajcxy mmibijcin ma Cristo jadu'n yi' nipaady nej ma'xungdijc ymibijcin. ² Ti nyaj'ixpijccixy Dios y'ayuc huidibi ca' jëbi tzip mhujnhuuyigixy. Jadu'n nipaady nej jäy ajcxy yaj'ügy leche yi ma'xungdijc, müd co cacöbigañ caayin uucin huidibi jemxy cidacp ma yjot. Ca' miich ajcxy anajty ti mnayñi'ixiiyigixy ma mjot mhujnmañ nej jëbi mhujnhuuyigixy Dios y'ayuc yi tzipjatypi. Chambaadni ca' mnayñi'ixiiyiini ajcxy ma mjot mhujnmañ nej jëbi mhujnhuuyigixy yi tzipjatypi ayuc. ³ Chambaadni miich ajcxy myajtuñ mjot mhujnmañ jadu'n nej naaxhuiñjäy ajcxy müdity huinmañ ca'pi ymibijccixy, chambaad mmi'ijxtinaaygix yi migügtijc, chambaad mnaychip'ixigix naybijc-huäcxigix. Jadu'n m'iditczixy nej jacjadyii jäy ajcxy y'iditczixy huidibi ca' ymibijccixy. ⁴ Com nijëjity miich ajcxy minaangixy: "Hich naygomajtzip ma Pablo." Etz nijëjity minaangixy: "Hich naygomajtzip ma Apolos." Jada je tiy'ajt co ca' mnay'ayuc-hujnhuuyigixy tim jadu'n nej jäy ajcxy ca' nay'ayuc-hujnhuuyigixy huidibi ca' müdity Dios yjihuñ ymic'ajt.

⁵ ¿Pin je' je Apolos? ¿Pin je' je Pablo? Hich Pablo etz Apolos nimetz ajcxy nduñ ma Dios ytung, e hich miich ajcxy nyajmibijccixy Cristo. Hich ajcxy nduñ nidüg nidüg je tung huidibi Dios xymooyich. ⁶ Hich jayijp'aty miich ajcxy ti nyaj'ixpijccixy, e Apolos jac'axam. Jadu'n miich ajcxy nipaady nej tög moc cam huidibi hich ti nnipy, e Apolos jac'axam ti pidägy nii. Per Dios ti yajyeegy je moc. ⁷ Ca' ytimyñejity pin ti yñipy, e pin ti pidägy je nii. Dios yi' tögajc copicyip. Com yi' yajyeecp je moc. ⁸ Yi' huidibi niip etz yi' huidibi nii pidacp, quipxyjaty ajcxy. Dios yegamb je oy'ajt ma nidüg nidüg jadu'n nej anajty ti ytungixy. ⁹ Com hich etz Apolos naymigü'ájtibich ajcxy ma Dios ytung. Jadu'n miich ajcxy nipaady nej Dios ycam huidibi Apolos ti tuñ etz huidibi hich ti nduñ.

Nañ jadu'n miich ajcxy nipaady nej tög tijc huidibi Dios ycojpy. ¹⁰ Dios ti xya-jnibicyich yi' ytung ndunipyich. Ti nyaj'ixpijccixy miich ajcxy Dios y'ayuc ytiy'ajt. Jadu'n hich nipaady nej tög pojtzpi oybi huidibi ti yajtzondägy je tzaadijc poch. Chi huingjäy xyjacyaj'ixpijccixy. Jadu'n yi' nipaady nej huingbi pojtzpi huidibi je tzaadijc poch jacjijppodzhyb. Copicy co nidüg nidüg huidibi yaj'ixpijcp Dios ytiy'ajt yajxon yaj'ixpijccixy. ¹¹ Dios ti pidägy Jesucristo tögajc huidibi huaad nmibijcin, e ca' huaad pidacy huingbi. Jadu'n Jesucristo nipaady nej tög tijcpoch chondägy. ¹² Co pinjaty yaj'ixpijccixy Dios y'ayuc ytiy'ajt tiydudägy, chi jadu'n nipaady nej jihuuy pinjaty tijcpojtzp müd ori, müd plata etz müd tzaa oyjatypi. Pinjaty ca' yaj'ixpijccixy yajxon Dios ytiy'ajt, jadu'n nipaady nej jihuuy pinjaty tijcpojtzp müd quipy, müd miy, etz müd moc'aay. ¹³ Jiini co anajty xii tiempo paady mina Cristo tiydunañ yi' yjäy huin'it ñiguëxigipy nej Dios ytumbi ajcxy ti ytungixy co ti yaj'ixpijccixy. Niguëxigip pen oy ti yaj'ixpijccixy Dios ytiy'ajt, o pen ca' oy ti yaj'ixpijccixy. Jadu'n nipaady nej Dios jün pidägy ma je tijc, e je quipy, je miy, etz je moc'aay tigoydähuipy ma je jün. Etz je ori, plata etz tzaa oyjatypi ca' ytigoydähuipy müd je jün. ¹⁴ Peni oy yajxon pinjaty ti yaj'ixpijccixy Dios ytiy'ajt, chi Cristo premio möhuañ jada jäy co ooy yajxon ti yaj'ixpijccixy. E jadu'n yi' ytung nipaadip nej je ori, plata, etz tzaa'oyjatypi huidibi ca' ytigooy ma je jün. ¹⁵ Pen je Dios ytumbi ca' oy yajxon ti yaj'ixpijccixy Dios y'ayuc ytiy'ajt, chi ca' premio padañ. Jadu'n yi' ytung nipaadip nej je quipy, je miy, etz je moc'aay huidibi ti ytigoy ma je jün. Jadu'n nipaadip müd jada jäy nej jihuuy ti ñaxy jünjoty, e ti ytigoydäy ma je jün tijaty ymüd, je'yi yjogy'ajtin ti yajtzögy.

¹⁶ ¿Nej ca' mnejhuuyigixy? Pen Dios yjihuñ ymic'ajt yajpat ma miich ajcxy, jadu'n nipaady nej jihuuy Dios ci'm ti chinaydacpicy ma miich ajcxy, nej jihuuy miich ajcxy Dios xytijc'adyii. ¹⁷ Pen ji pinjaty huidibi yajhuindigoy Dios chinaydac, huin'it Dios yajtigoyañ jada jäy. Yi Dios chinaydac huadz'it amay'it yi', com Dios ti chinaydacpicy ma miich ajcxy huidibi mibijccixp.

¹⁸ Ix mnayhuin'ünigix ci'm. Pen nidügti miich ajcxy mnaydijyii co oy ixpijccixy ma naaxhuiñjäy y'ixpijcin, copicy jäy digoyipy yi' y'ixpijcin, jigix ixpijccixy Dios ytiy'ajt. ¹⁹ Yi

naaxhuiñyäjy y'ixpijcin jadu'n nipaady mïd Dios nej tzuu huinma'ñ loci huinma'ñ. Paady jadu'n yjaybetyity ma Dios ñecy ma jadu'n ymïna'ñ: “Dios yajpocycãhuip yi xpicityic mïd yci'm'ayuc mïd co chachnaygömayii.” ²⁰ E jadu'n yjaybetyity jadüg'it ma Dios ñecy ma jadu'n ymïna'ñ: “Je Huindzin Dios ñejhuïyb co yi xpicityic y'ayuc yhuinma'ñ ca' choobaady.” ²¹ Ni pin ca' huaad amij agix ñayjihuiyïi, mïd co mijnicxpety oyñipin y'ayuc. Miich ajcxy mïd'ajttaayb tüg'ócïy tijaty. ²² Miich ajcxy mïd'ajtpy Pablo, Apolos etz Pedro. Nañ jadu'n miich ajcxy mïd'ajtpy je naaxhuiñybi, je tzejp, je jugy'ajtin, je o'cin, je xï je tiempo huidibi ji yajpatp, etz huidibi mim cidaacp. ²³ Je Cristo mïd'ajtpy miich je' ajcxy cï'am etz Dios ymïd'ajtpy Cristo cï'am.

4

Je apóstoles ajcxy ytung

¹ Jëbi jadu'n co ñch etz Apolos, ñch miich ajcxy xytijcixy Cristo ytumbi huidibi Dios ti xyajñibíjccixyich, nyaj'ixpijccixyich etz nguend'ajtcixyich yi' y'ayuc ytiy'ajt huidibi jecy'ajty ca' pin nejhuïy huinjihuïy. ² Pinjaty cuend'ajtp huingjäy yje', copicy tiydudägy ytunipy, jaydëbi yi' yhuindzin yjäygidägiyb yi' ytung. ³ Per ca' ooy nduñich cuendi co miich ajcxy xyajcïyöy xyajtecyöyï ñch nbocy. Nañ jadu'n ca' ooy nduñich cuendi co ixyipy tüg juez yajcïyöy yajtecyöyï ñch nbocy. Nañ jadu'n ca' nyajcïyöyich nyajtecyöyich ngi'mbocyich. ⁴ Ca' nayjihuiyijich co nmïdundigooyich miich ajcxy. Ca' jadu'n nmïna'ñich co ca' ma ndundigooyich. Hue' ajt nHuindzin Jesucristo yi' je' xyajcïyöyip xyajtecyöyip ñch nbocy, ca' jac pinjaty. ⁵ Paady ycixpi ixmajtzcix jadu'n nej miich ajcxy xypocy'ijxcixy jayijpni ma ca'ni Jesucristo ymiñ jadüg'oc ya naaxhuiñ. Ahuijxcix co Jesucristo yajñiguëxigaani je jäy ajcxy ypocy huidibi cham ca' ñiguëxigy, huidibi jadu'n nipaady nej jihuiy yüch y'ity agootztuuby. Jesucristo co anajty ymiñ jadüg'oc, chi yajñiguëxigipy nej jäy ajcxy yjot yhuinma'ñ mïdity. E Dios nidüg nidüg jäy cömaya'ñ pen oy ti ytuñ, e ca' cömaya'ñ pen ca' oy ti ytuñ.

⁶ Migügtijc ajcxy, ci'm ti naybidägyiijich mïd Apolos jadu'n nej tüg iixpejt ma jada tiy'ajt huidibi cham ti nyajnijayiyigixp. Jadu'n ti nduñich mïd miich ajcxy m'oy'ajtin ycixpi, jigix jëbi miich ajcxy m'ixpijccixy jadu'n nej jëbi mguydundaygixy Dios ytiy'ajt, e ca' mjactungixy huidibi Dios ycapxcödujc ma ñecy. Nañ jadu'n ñch ti nduñich mïd Apolos nej tüg iixpejt, jigix miich ajcxy ca' mnaygömayiyb ci'm, e ca' mmïnaangixy co mnaygomájtzigixy ma tüg Dios ytumbi, e jadüg m'ixtijcixy. ⁷ ¿Pin ti xyajnajxcixy jadu'n nej jihuiy ajcxy ooy mgömayity? Ca' ni pin. ¿Ti miich ajcxy mïdity, huidibi Dios ca' ti xymooygixy? Ca' ni ti. E pen Dios ti xymooygixy tijaty ajcxy mmïdity, ¿na'amy co mnaygömáygixy ci'm, jadu'n nej jihuiy ci'm ti mganar'ajtcixy tijaty ajcxy mmïdity?

⁸ Jadu'n miich ajcxy mnaybidáacigixy nej jihuiy ti mgüxigixy, nej jihuiy ti mgomeeñygojixy, nej jihuiy mrey'ajtcixy, e ca' mdzojccixy co nyaj'ixpigipyich. ⁹ Miich xytijcixyich nej jihuiy ñch ajcxy apóstoltijc Dios ti xypidaaccixich nej huidibi ca' ytimcapxpaadyity, nej huidibi ypocy co'ögïyb, co ángeles ajcxy etz jäy ajcxy xyñixíccixyich xyñiyáaxcixyich. ¹⁰ Miich ajcxy xytijcixyich co ñch ajcxy apóstoltijc jadu'n nej jäy tzuu locip co ndúngixyich mïd Cristo ycixpi. E miich mnaybidáacigixy co'ayuc cohuinma'ñ co ti mmibijccixy Cristo. Miich ajcxy xytijcixyich co ca' ti mic'ajt ajcxy mïdityich, e miich ajcxy mnaybidaacip nej jihuiy ooy ti mmicpijccixy, nej jihuiy ooy mgömayity, e ñch ajcxy ca' nyaj'ixaangixyich. ¹¹ Chambaad ñch ajcxy nyuubögyiijich etz ndidziyijich. Mïnaajity n'íjtcixyich ca' ñch ajcxy nhuit. Jäy ajcxy xyñi'ojiyigixich etz xyhuingojxy xyjijpcójxcixich, ni ndijc ñch ajcxy ycaca'tcixy. ¹² Ndúngixyich xuuyii mïd ngi'm ngijich. Co pinjaty xyñi'ojiyigixyich, chi n'adzógixyich mïd oy ayuc. Co ñch ajcxy xy'ixhuidityich xypahuidityich, ooy nmecxtújccixyich yi' tzaachypi. ¹³ Co pinjaty jibic xyñigápccixyich, chi huinma'ñ ixtáaygixyich oy'amy mïd mecxtujcin n'ñhuíjccixyich

ngapxhuíjçixyich nej jëbi y'ayuc-huinjihuiygixy. Ca' naaxhuiñjÿäy ajcxy xychójjçixyich. Ixti chambaad jadu'n ajcxy xy'íjçixyich nej püx, jadu'n ñch ajcxy nipaady nej jibicpi huidibi ca' jÿäy ajcxy tzocy.

¹⁴ Ca' ñch miich ajcxy nyajnijayíy jada ayuc co nyajtzöydunaangixy. Hue' janchtiy jada ayuc nyajnijayíyb ajcxy co ngapxhuíjãangixy. Jadu'n ndzojjçixy njihuiygixy nej ndzocyich njihuiyich ngi'm'ung. ¹⁵ Oy ixypy yjanchity co miich ajcxy mïd majc mil huindzindijc huidibi xyaj'ixpíjçixy Cristo ytiy'ajt. Per tügpajcpi je mhuindzin huidibi oga'n xyajmibijcy ajcxy Cristo, ca' nan canaag. ñch jadu'n oga'n ti nyaj'ixpicyich miich ajcxy Jesucristo ytiy'ajt nej jëbi ajcxy m'alma ñïdzögípy. Paady ycixpi jadu'n ñch nipaady nej miich ajcxy mdeedy ma mmibijcin. ¹⁶ ñch miich ajcxy nimaayb mictägy, com ti nyajmibijçixy Cristo oga'n, paady cuydungix ajcxy Dios ytiy'ajt, jadu'n nej ñch nguyduñich.

¹⁷ Paady ycixp nguexyich Timoteo ma miich ajcxy. Yi Timoteo ooy ndzocyich ooy njihuiyich. Ti ñch Timoteo nyajmibicyich Cristo, e ooy xycapxymidooyich yajxon, jadu'n yi' nipaady nej ngi'm'ungich. Yi Timoteo xyajjÿamedzip miich ajcxy je ayuc je tiy'ajt jadu'n nej nyaj'ixpicyich ma tüg'óciy cajp ma yi jÿäy ñaymújçigixy huidibi mijpidaaccixp Jesucristo. ¹⁸ Cham nije' nije' miich ajcxy amij agix mnayjihuiyii co jadu'n mïnaangixy co ca' ñicxy n'ixa'ñich miich ajcxy jadüg'oc. ¹⁹ Per ca' jadu'n mïnaangixy co ca' ñnicxa'ñich ma miich ajcxy. Tzocj ñicxibich ma miich ajcxy, pen Dios jadu'n tzocj. Co anajty jim nmechich, huin'it ca' n'amído'o'ida'ñich yi' ajcxy y'ayuc huidibi amij agix nayjihuiyip. Hue' janchtiy nejhuíhua'ñich pen ymïd yi' ajcxy Dios ymic'ajt chög'ajt. ²⁰ Pinjaty mïd Dios ymic'ajt Dios chög'ajt, je' yajniguëxícp Dios y'ane'min. Pinjaty mïd oyñiti ayuc, ca' je' yajniguëxígip Dios y'ane'min. ²¹ Co ñnicxibich jim ma miich ajcxy, ¿ti ajcxy mdzojjçixyp ndunipyich? ¿Nej oy ñmíncxibich ma miich ajcxy tüg matz jigix ajcxy nhuójjçixipy? o ¿Mdzojçixyp co ñnicxibyich ma miich ajcxy mïd yungnaxy njot nhuinma'ñich, etz oy'amy ajcxy nmigapxipy, jadu'n nej jihuiy ooy ndzojjçixy njihuiygixy?

5

Moy ajcxy castigo tüg jÿäy huidibi anajty ti ytundigooy

¹ Mayjÿäy nejhuiy co ma miich ajcxy jim tüg yëydijc huidibi tundigooyb mïd tüg töxyjÿäy. Nigi yi' ytundigooy ca'ydi huidi ajcxy ca' Dios y'ayuc mijpidaci. Ti nnejhuiyich co jim tüg yëydijc huidibi mïddzinaayb ycoo'uu. ² Jim miich ajcxy mïdity je mijpocytumbi, e miich ajcxy amij agixy mnayjihuiyigixy co ajcxy mdzach'ixpicyity ma Dios ytiy'ajt. Jac'oy co ixypy mdajcixy mmaygixy. Yajpidzimgix ma miich ajcxy yi jÿäy huidibi jadu'n tundigooyb. ³ Ca' ytiymñejity co ca' nyajpaadyich jim ma miich ajcxy. Jadu'n nipaady nej jihuiy ñch njimity, mïd co ooy njihuiyich nej miich ajcxy mjaajtcixy m'ayoogixy. Paady ycixpi ti nyajpocycäyich mïd Jesucristo y'ane'min yi jÿäy huidibi jim ooy mij ytundigooy, tim jadu'n nej ixypy jim nyajpaadyich ma miich ajcxy. ⁴ Huomujctaaygix yi mibijcpidijc, e jadu'n nipaadipy nej jihuiy ñch njimity quipxyi mïd miich ajcxy. Huin'it miich ajcxy mïd'ajtcixipy ajcxy ajt nHuindzin Jesucristo y'ane'min ymic'ajt. ⁵ Mïd je ane'min mic'ajt huidibi Jesucristo ti xymöyich, myajpidzimipy je pocytumbi ma miich ajcxy. Jadu'n mijhuin nipaadipy nej jihuiy myajcidigíygixy je mujcu', jaydëbi yi' ñinícx ytiyogipy, per je' y'alma ñïdzögip mïna anajty ñch ajt nHuindzin Jesús yhuimbity ya naaxhuiñ jaydëbi tiydunipy jÿäy ajcxy mïd ypocy ycixpi.

⁶ Ca' mnaygömaayigixy ci'm mïd huidibi mdungixyp. ¿Nej ca' mnejhuiygixy nej jÿäy mïna'ñ co levadura huidibi ca' y'oyity yajhuindigooyb tüg'óciy yi harina jich? ⁷ Jadu'n je pocytunñ nipaady nej levadura huidibi ca' y'oyity, paady ycixpi yajtigooygix je pocytunñ nej anajty mdundigóoygixy taabi anajty ajcxy ca'ni mmibijçixy. Jadu'n mdungixipy, jigix

jëbi m'ijtcixyp huädz ca' ma pocy. Co jadu'n mdúngixipy, jadu'n nipaadip miich ajcxy nej tzajcaagy oyjatypi. Nejhuüybich co miich ajcxy ti mbocyñihuaatzcixy, com Cristo nayyejci huen yaj'ögyii müd ajt nbocy ycixpi. Jesucristo jadu'n nipaady nej ajt ngöbixy mang huídibi müd nhuindzigüim Dios müd ajt nbocy ycixpi. ⁸ Tzoc tzinaayim müd huädz njot huädz nhuinma'ñ, jadu'n nipaady nej judíojäy co ajcxy amay'ajtcixy yi pascua xii. Tzoc yajtigooyim ma ajt ndzinaayin njugy'ajtin yi jibic jot jibic huinma'ñ. Tzoc cuydunim Dios ytiy'ajt.

⁹ Ti nnijayüygixy jayhuin co ca' huaad migüg'ajtigixy pinjaty huídibi tundigooyb müd töxyjäy ajcxy. ¹⁰ Ca' nan jadu'n nmína'ñich co tücci'yi mbuhuäctútcixipy yi naaxhuiñjäy ajcxy huídibi ca' ymibijccixy, huídibi tundigooygixp müd töxyjäydijc, huídibi ooy y'adzojccixy, huídibi ajcxy meetzp, huídibi ajcxy tzaadzech quipychech ojadajtcixp. Co ixypy tücci'yi mbuhuäctútcixipy yi naaxhuiñjäy ajcxy, copicy co ixypy miich ajcxy mbidzimgix ya naaxhuiñ. ¹¹ Jayhuin ti nijayüygixy co ca' huaad mnaymigüg'ajtigixy müd yi jäy ajcxy huídibi naydijcigixp co ymibijccixy, je huídibi tundigooygixp müd töxyjäydijc, huídibi ajcxy ooy adzojccixy, huídibi ajcxy ojadajtp tzaadzech quipychech, huídibi ooy ycapxtigooygixy, huídibi ajcxy amügy jäy, etz huídibi ajcxy meetzp. Nañ ni ca' huaad mgaymujccixy m'uucmujccixy müd yi' ajcxy. ¹²⁻¹³ Com ca' yhuaadity co iich nyajcüyöyipy nyajtecyöyipy yi jäy ajcxy ypocy huídibi ca' mijpidaaccixy Jesucristo. Dios ci'm yajcüyöyam yajtecyöyam yi' ajcxy ypocy. Hue' janchtiy copicy co miich ajcxy myajcüyöyip myajtecyöyip yi mibijcpidijc ajcxy ypocy. Yajpidzimgixp yi pocytumbi ma miich ajcxy.

6

Tzip capxy ma je juez ajcxy huídibi ca' ymibijccixy

¹ Pen xymidundigooyb tüg mibijcpi, ¿nej oy mnayjihuiyüi co nicxy mxüy yi mmigüg ma yi tungmüdpí huídibi ca' mibijccixy Dios y'ayuc? ¿Cay jac'oy co myaj'abigipy je mibijcpidijc ajcxy, e jim y'oyihuiyüi je ayuc nej anajty ti xymidundigoy? ² ¿Nej ca' mnejhuüygixy co yi jäy ajcxy huídibi Dios ti ypocyhuinméecxigixy, yi' ajcxy yajcüyöyamyb yajtecyöyamyb yi naaxhuiñjäy ajcxy ypocy huídibi ca' mijpidaaccixy Dios? Pen miich ajcxy myajcüyöyip myajtecyöyip yi naaxhuiñjäy ajcxy ymijpocy, ¿nej co ca' mjaajtcixy nej ajcxy myajcüyöyipy myajtecyöyipy yi mibijcpidijc ajcxy ypocy huídibi ca' ytimymij ytimycajeejity? ³ ¿Nej ca' mnejhuüygixy co miich ajcxy myajcüyöyamyb myajtecyöyamyb ixti yi ángeles ajcxy ypocy? Pen miich ajcxy myajcüyöyamyb myajtecyöyamyb yi ángeles ajcxy ypocy, nigí ca' chipity co ajcxy myajcüyöyipy myajtecyöyipy yi mibijcpidijc ajcxy ypocy huídibi tzinaayb jugy'ajtp ma jadachambi xii tiempo. ⁴ Pen miich ajcxy mnaymidundigóoyigixp, ¿nej co nicxy mbidaaccixy yi mxihuín ma yi jäy ajcxy huídibi ca' yajpaady ma miich ajcxy myöymujccixy? ⁵ Jadu'n nnimáaygixyich miich ajcxy, jaydëbi mdzöydu'njihuiyüigixy müd jada ycixpi. ¿Nej ca' yajpaady ma miich ajcxy ni tüg yéydijc huijy ycuipi huídibi jëbi yaj'oyüi je capxy je ayuc ma je mibijcpidijc ajcxy? ⁶ ¿Nej ooy jada ytimycopicyity co yi mibijcpidijc ajcxy ñayxihuigixipy ma je tungmüdpí huídibi ca' mijpidaaccixy Dios?

⁷ Co miich ajcxy mnayxihuigixy ma cajp tungmüdpí, je' je tiy'ajt co ca' ajcxy mguydüngixy Cristo y'ayuc ytiy'ajt. ¿Nej cay jac'oy co mnaymimécxtújcigixipy, ca'ydi co mnayxihuigixy? ¿Nej cay jac'oy co xytigóoyigixipy tijaty, ca'ydi co mnayxihuigixy? ⁸ Ma yjapadyüi ixypy mnaymimécxtújcigixy, chi miich ajcxy ac mibijcpidijc naymidundigóoyigixp, e nañ jadu'n mjanayméetzigixy ti ajcxy ymüid.

⁹ ¿Nej ca' mnejhuüygixy co yi jäy ajcxy huídibi tundigooyb, ca' ajcxy it lugar pada'ñ ma Dios y'ane'my? Ca' mnayhuin'üngixy, ca' ajcxy it lugar pada'ñ ma Dios y'ane'my yi jäy ajcxy huídibi migapxtigooyb töxyjäydijc, huídibi ajcxy ojadajtp tzaadzech quipychech,

huidibi ajcxy migapxtigooyb ymīgüg ytöxyjic, huidibi ajcxy adöxyñi'aa. ¹⁰ Ca' ajcxy it lugar padañ ma Dios y'ane'my huidibi ajcxy meetzp, huidibi ajcxy tijaty adzojcp, huidibi ajcxy amügyjäy'ajtp, huidibi ajcxy capxtigooyb, etz huidibi ajcxy ayucmihuidijt capxmihuidijt. Nidüg'óciy yi jäy ajcxy huidibi jadu'n tundigooyb, ca' ajcxy it lugar padañ ma Dios y'ane'my. ¹¹ Jadu'n anajty nijējity miich ajcxy mdundigooygixy jecy'ajty, per co ti mmibijccixy Cristo, chi Dios ti xyhuinmecxy ajcxy mbocy, e ti yajhuäch je jibicpi ma ajcxy mjot mhuinma'ñ, etz mnayyéjicixy amumdügjot ma Dios. Co miich ajcxy mmijpidaaccixy je nHuindzin Jesús yxi e xy'adigiiygixy xyjottigiiygixy Dios yjihu'iñ ymic'ajt, paady ajcxy ti m' ahuimbijtcixy tudägy ma Dios yhuinduu.

Je tudägy'ajtin huidibi ijtp ma ajt ndzinaayin

¹² Janch tiy'ajt nej jäy ymīnaangixy co jēbi huaad tungixy hueñytijity huidibi ñijot'ajtcixyp. Per ca' tūg'óciy huidibi jäy ajcxy tuñ y'oyjäydaacnity. Janch jadu'n jēbi pinjaty tunipy hueñytijity, per ca' huaad ymīmadägyii je huidibi ajcxy ytumyb. ¹³ Janch tiy'ajt nej jäy ymīnaangixy co je jicxy picy ytungbaady ma je jäy y'aa ymōx, e je aa möx ytungbaady mīd je jicxy picy ycixpi. Per Dios yajcōdigoyamyb je jicxy picy, e nañ jadu'n yajcōdigoya'ñ je jäy y'aa ymōx. Per nañ tiy'ajt co Dios ca' ti yaj'oyty je yēydijc ñinīcx, co midundigooyipy töxyjäydijc. ¹⁴ Dios ti yajjugypicy jadüg'oc ich ajt nHuindzin Jesucristo co y'o'cy. Nañ jadu'n Dios mīd ymic'ajt co xyajjugypigaanim jadüg'oc co anajty ti n'o'cim.

¹⁵ ¿Nej ca' mnejhuīy miich ajcxy co yi mninīcx ajcxy Cristo yi' yje? ¿Nej cay Cristo anajty midundigooybich co nnīcx mīdmāyich yi töxyjäy huidibi jibic-huinma'ñ mīd? ¿Ca' jadu'n y'óyity nimīna! ¹⁶ ¿Nej ca' mnejhuīiygixy co tūg yēydijc puhuägty tūg töxyjäy huidibi jibic-huinma'ñ tumb, tūgity ajcxy y'ijtcixy? Com jadu'n yjaybetyty ma Dios ñecy, ma Dios jadu'n ymīna'ñ: “Nimetz y'idaangixy jadu'n nej tūgpi ninīcx.” ¹⁷ Co tūg jäy mīd y'ity yi Huindzin Jesucristo, huin'it je jäy yjihu'iñ ymic'ajt etz Dios yjihu'iñ ymic'ajt y'ijtcixy tú'ciy.

¹⁸ Ixmajtzcix je jibic-huinma'ñydunī, ca' mdundigooygixy mīd töxyjäy ajcxy jibic-huinma'ñydumbi. Yi jacjadyii pocy huīdi jäy ajcxy ytumyb, ca' yi' ajcxy midundigoy ninīcx. Per co ytundigooygixy mīd töxyjäy ajcxy, huin'it janchtiy yci'mninīcx anajty ymidundigooygixyp. ¹⁹ ¿Nej ca' mnejhuīiygixy co je Espīritu Santo huidibi Dios xy-mooyim, ti chinaydacpicy ma miich ajcxy mjot mhuinma'ñ? Paady ycixpi miich ajcxy ca' ci'm nay'ané'migixy. ²⁰ Tzoohuī Cristo ti cojuy miich ajcxy mbocy, paady ycixpi ooy ycopicyty co oybi mdūngixip mīd mninīcx, jigix Dios cōmay y'idipy mīd co oy anajty ti mdungixy.

7

Capxhuijin ma je pijcin

¹ Cham n'adzohua'ñich je huidibi miich ajcxy ti xyaj'amidoobich ma je necy huidibi ti xyajniguéjxcixyich. Oy jadu'n co tūg yēydijc ca' ypiipy. ² Per com may yēydijc huidibi ooy ytundigoya'ñ mīd töxyjäydijc, paady ycixp jac'oy co nidüg nidüg yēydijc piipy e mīd'idipy yci'mdöxyjic. E nañ jadu'n jac'oy co nidüg nidüg töxyjäy ypiipy, e mīd idipy yci'm ñäy. ³ Copicy je yēydijc chināhuipy mīd ytöxyjic nej ypadyii, nan tim jadu'n je töxyjäy chināhuipy mīd ñäy nej ypadyii. ⁴ Com je töxyjäy ca' ane'my yci'mninīcx, hue' ñay'ané'migixy miñ xyipy. Nañ jadu'n je yēydijc ca' ane'my yci'mninīcx, hue' ñay'ané'migixy ymiñ xyipy. ⁵ Ca' huaad je yēydijc nimay je töxyjäy co ca' mīd mähua'ñ mīd pocxa'ñ. Nañ jadu'n je töxyjäy ca' huaad nimay je ñäy co ca' mīd mähua'ñ mīd pocxa'ñ. Jēbi janchtiy mīnaajity ñay'ayuc-huinjihuīiygixy co amay'adaangixy co Dios mibijctzohuaangixy ycapxtägaangixy. Co Dios mibijctzohuin myajmāygiipy, huin'it jēbi máagixni pócxixni agujc jotcujc, ca'ydi je mujcu' mīmadägyii ajcxy.

⁶ Jada je' t'iy'ajt nej jëbi yëydijc m'iddzinäy ytöxyijc, hue' jada capxhuijin, ca' jada y'ane'minity. ⁷ Jadu'n njadzocyich co miich ajcxy ixypy m'ijtcixy adüg jadu'n nej n'ityich adüg. Per Dios ti xymooyim nidüg nidüg ngi'mhuinma'ñ ngi'mmic'ajt. Paady ji canaagnax jäy yhuinma'ñ, e nidüg nidüg m'iid yci'mhuinma'ñ nej ytunaangixy, pen p'igaangixp o ca' yp'igaangixy.

⁸ Jada ayuc nyajniimaaybich yi adügtijc etz yi co'ögytjic ajcxy. Jac'oy co ajcxy huen tzinaangixy adüg, jadu'n nej ich ndzinäyich. ⁹ Pen ca' ajcxy mimadäga'ñ yi chinaayin adüg, etz nijot'ajtcixy co yp'igaangixy, jac'oy co yp'ijcixipy. Com jac'oy co yp'ijcixipy ca'ydi co cuyd'ungixipy ninicx chojcin.

¹⁰ Jada ayuc nyajniimaaybich huidibi ajcxy ti yp'ijccixy. Ca' y'oyity co töxyjäy tüg ixmach yi' ñäy. Nañ jadu'n ajt nHuindzin Jesús xymooyim jada ane'min. ¹¹ Co tüg töxyjäy ixmach ñäy, copicy co huen tzinäy adüg, e ca' huaad yp'icy m'iid huingbi yëydijc. Jëbi janchtiy jadüg'oc pudigiy ñäy. Nañ jadu'n ni ca' y'oyity co tüg yëydijc ixmadzip ytöxyijc.

¹² Ich jada ngi'm'ayuc jada huidibi nyajniimaaybich je jacjadyii mibijcpidijc. Yi Huindzin Jesús ca' ti ane'min yecy m'iid jadayaabi ycixpi. Pen tüg yëydijc mibijcp tzinäy m'iid tüg töxyjäy huidibi ca' mijpidägy Cristo, jac'oy co ca' ñay'ixmájtzigixipy, pen je töxyjäy jadu'n jotcuje jacm'iddzinähua'ñ je yëydijc. ¹³ Nañ tim jadu'n co tüg töxyjäy huidibi mibijcp tzinäy m'iid tüg yëydijc huidibi ca' mijpidägy Cristo, jac'oy co ca' ñay'ixmájtzigixipy pen je yëydijc jotcuje jacm'iddzinähua'ñ je töxyjäy. ¹⁴ Je töxyjäy ñäy huidibi ca' mijpidägy Cristo, jadu'n yi' nipaady nej jäy huidibi ypocy ti yajnihuäch m'iid co ytöxyijc ti mijpidägy Cristo. Nañ jadu'n je töxyjäy huidibi ca' mijpidägy Cristo, jadu'n yi' nipaady nej jäy huidibi ypocy ti yajnihuäch m'iid co ñäy ti mijpidägy Cristo. Pen ca' ixypy yjadu'nity, yi' ajcxy y'ung y'anäg, hue' ixypy nipaady nej jäy ajcxy y'ung huidibi ca' mibicy. Per com ti je yëydijc etz je töxyjäy yajpocyñihuächyii, nañ jadu'n je y'ung ajcxy ti yajpocyñihuächyii. ¹⁵ Per pen je yëydijc huidibi ca' mibicy Cristo ca' m'iddzinähua'ñ ni jadu'ñyi yi' ytöxyijc huidibi ti mibicy Cristo, huin'it jëbi ñay'ixmájtzigixy. Nañ jadu'n co je töxyjäy huidibi ca' mibicy Cristo, e ca' m'iddzinähua'ñ ni jadu'ñyi yi' ñäy huidibi ti mibicy Cristo, huin'it jëbi ñay'ixmájtzigixy. Com Dios jadu'n tzocy co jotcuje ñaym'iddzinäyigixipy. ¹⁶ Jëbi ñay'ixmájtzigixy com je töxyjäy ca' tiydudägy ñejhuüy pen mimadacy yñäy yajmibigipy Cristo. Nañ jadu'n je yëydijc ca' tiydudägy ñejhuüy pen jëbi ytöxyijc yajmibigipy Cristo.

¹⁷ Oy ixypy ñejity jada t'iy'ajt cuydungixy. Copicy co nidüg nidüg miich ajcxy mdzinähuiipy mjugy'adipy jadu'n nej Dios ti xyajni'ixnygixy mdzinaayin mjugy'ajtin, e jadu'n nej anajty myajpatcixy co Dios xyhuin'ixy jëbi mmibigipy Cristo. Yi jadu'mbi ane'min nyaj'ixpijcpyich yi mibijcpidijc ma tüg tüg cajp. ¹⁸ Yi jäy huidibi ti yajtiy'ajttiy jayijp, e Dios yhuin'ixyii jac'axam, huen jadu'nity, ca' huaad yajtigoy je iixpejt nej ti yajtiy'ajttiy. E yi jäy huidibi ca'ni yajtiy'ajttiy e ti yhuin'ixyii Dios, huen jadu'n y'ity, ca' ycopicyity yajtiy'ajttihuipy. ¹⁹ Ca' ytimyñejity pen miich ajcxy ti myajtiy'ajttiy, o pen ca'ni myajtiy'ajttiygixy. Huidibi copicyip, mguyduunip ajcxy Dios y'ane'min ycötujcin. ²⁰ Nidüg nidüg mibijcpi huen ijtcixy nej anajty yajpatcixy co Dios ajcxy yhuin'ijxyi. ²¹ Pen miich anajty codoogiy tumb ma tüg jäy co Dios ti xyhuin'ixy, ca' mdajy may m'iid yi' ycixpi, hui'm m'iid mhuindzin. E pen mhuindzin a'ixiyb co mbidzima'ñ ahuätztuum, jëbi mbidzimy ma codoogiy anajty m'ity. ²² Pinjaty codoogiy ijtp ma yhuindzin co mibicy ajt nHuindzin Jesucristo, chi Jesús yi' yajnihuädzictüdyii ma yi pocy y'ane'myii. Pinjaty tungixp yci'mdung, co mibicy ich ajt nHuindzin Jesucristo, chi jadu'n nipaady nej jihuüy codoogiy y'ity ma Cristo. ²³ Tzoohui ooy Jesucristo xycojuuyi miich ajcxy mbocy, paady ycixpi cuydungix ajt nHuindzin Jesucristo y'ayuc ytiy'ajt. E ca' mguydungixy naax-huiñyjäy ajcxy y'ayuc ytiy'ajt huidibi ajcxy xypidägip ma pocy xy'ane'mgixy. ²⁴ Migügtijc ajcxy, nidüg nidüg mibijcpi, huen ijtcixy nej anajty yajpatcixy co Dios yhuin'ijxi ajcxy.

²⁵ Jada ayuc nyajñimaaybich yí mibijcpidijc huídibí ajcxy adüg yajpatcixp. Je Huindzin Jesús ca' tí t'y'ajt ahuing tí xymöyich müd müch ajcxy ycixpi. Hue' ajcxy nyajñimaayb ahuing je huinma'ñ huídibí nmüdich. Com Dios tí xypa'ayooyich, paady ycixpi jébi mgöbigipy ajcxy ich n'ayuc ich ngapxhuijin. ²⁶ Jadu'n huinma'ñ nmüdidyich co jac'oy co nidüg nidüg mij'anäg huen jac'ijtcixy nej yajpatcixy. Müd co tzaachypí ayo'n nmñajxim nyajñajxim jadachambi xii tiempo, paady ycixpi ngapxhuijyich jadu'n. ²⁷ Pen mbijcyp tüg töxyjäy, müddzina'. Pen ca' tí pícy tüg töxyjäy, jac'oy co ca' mbigipy. ²⁸ Pen tí mhuinma'ñ mbidägy co mbiga'ñ, jébi mbicy, ca' anajty mdundigoy co mbigipy. Nañ jadu'n tüg töxyjay mutz'anägnip ca' anajty ytundigoy co ypigipy. Janch t'y'ajt jada co yí ajcxy huídibí pijccixp ypadamyb ajcxy jotmay ma chinaayin. Paady ycixp tí nnimaaygixy co jac'oy co ca' mbijccixipy, e ca'ydi tí jotmay mbáatcixipy.

²⁹ Migügtijc ajcxy, jada njacyajñimaaygixpy. Hueeni xii tiempo njactzinähuaanim ya naaxhuiñ. Jadu'n nej je xii je tiempo yjacñicxni müch ajcxy pinjaty tí ypicý, tzinaaygix jadu'n nej ixypy ca' mdöxijc ajcxy müdity. ³⁰ Müch ajcxy huídibí yaaxp etz ayo'n jihuiyb, tzinaaygix jadu'n nej ixypy ca' tí ayo'n müdity. Müch ajcxy huídibí xondacp, tzinaaygix jadu'n nej ixypy ca' mxondaaccixy. Müch ajcxy huídibí ajuuyb adoocp tzinaaygix jadu'n nej ixypy ca' tí ajcxy müdity. ³¹ Müch ajcxy huídibí mic'ajt comeeñ'ajtp, tzinaaygix jadu'n nej ixypy ajcxy ca' tí mgomeeñity.

³² Hue' ndzocyich co ca' tí jotmay müch ajcxy mmüd'adipy ma yí mdzinaayin mjygy'ajtin. Yí jäy ajcxy adügpi ymijottigooyb ajcxy je Huindzin Dios ytung, yajjäygidäga'ñ ajcxy je Huindzin Dios. ³³ Je tübi ajcxy ypijccixy, chi ymijottigooyb ajcxy yí ytung ya naaxhuiñ, jadu'n nej jébi yajjotcuje'ajtcixy ytöxyjic. ³⁴ Nañ tim jadu'n tigachjaty yhuinma'ñ müdity je töxy'anäg huídibí tí ypicý. Je töxy'anäg adügpi ymijottigooyb Dios ytung, etz yecý ñinícx etz yjihui'ñ ymic'ajt cixyot huinjot ma ajt nHuindzin Jesucristo. Per je töxy'anäg huídibí tí ypicý, hue' je' ymijottigooyb tí ga tí ya naaxhuiñ, jadu'n nej huaad jäygidägyii ñäy.

³⁵ Jada jadu'n tí nyajñimaaygixy müd müch ajcxy m'oy'ajtin ycixpi. Ca' nan tzipjaty ane'min tí nmooygixy. Jadu'n tí ngapxhuijcixy jaydëbi jotcuje mdzinaaygixy mjygy'ajtcixy, etz jaydëbi ajcxy amumdüjot mdungixy ma ajt nHuindzin Jesucristo ytung, e ca' mdungixy ametz jotmetz.

³⁶ Pen jí pin jotmay müdity müd ñix ycixpi, müd co yxi yjimijt tí yujc-huäcni, jada je' ooy ytimycapxpaadyty, jébi tuñ huídibí y'a'ixiyb jac'oyip, jébi ypicý, ca' yí ypocyty. ³⁷ Pen jí pinjaty ñix yhuima'ñ jaybicy, e ca' pin ycohuaníyí, nañ ní pin yca'adugyí co tuñ nej tzocyin, e ñijot'ajtyp tudägy'ajt janch cixyot huinjot co yñix yhuima'ñ jaybicy, oybi anajty ytumyb. ³⁸ Je jäy huídibí yñix yajpijcp, oybi anajty ytumyb, e pinjäy yñix cayajpijcp, ñigi anajty oybi tuñ ca'ydi co ypigipy.

³⁹ Copicy co je töxyjäy müddzinähuiipy yí ñäy mabaad yñäy yjygy'aty. Co janch anajty yñäy y'ögy, huin'it jébi ypigipy müd huingbi, pen jadu'n anajty najtztzogíy. Hue' janchtíy copicy co pigipy je pin mibijcp je Huindzin Jesucristo. ⁴⁰ Ooy ñigi je töxyjäy co'ögypi agujc jotcuje chinähuiipy yjygy'adipy pen ca' ypijctigach, jadu'n nmüdidyich nhuinma'ñ, e nmñnaambich co naybaatip ich nhuinma'ñ müd je t'y'ajt huídibí je Espíritu Santo yejcp.

8

Je tzüch huídibí ajcxy yajhuindzigíyib quipychech

¹ Jadüg nax, jada ayuc ajcxy nyajñijayiyb ma yí tzüch ymiñ huídibí jäy ajcxy yajhuindzigíyib tzaadzech quipychech. Janch t'y'ajt co nidüg'óciy ich ajt nmüd'ajtim ixpijcin. Per pen ooy mij nayjihuiyim ajt n'ixpicýty, chi amij agix nayjihuiyim. Per pen naychojcin nayjihuiyim nidüg nidüg, huin'it nyajyeecim nmibijcin. ² Pen jí nidüg ma

miich ajcxy ñaydiyii co y'ixpicity, ca'ni yi' jajtäy ixpijcin huudibi jaccopicy yjadipy. ³ Co tüg jäy yajmij'aty Dios, Dios ñejhuuyb nej jada jäy yjot yhuinma'ñ miiidity.

⁴ Jadu'n jada je tiy'ajt maabi je tzüch huudibi jäy ajcxy ti yajhuindzigüygixy tzaadzech quipychech ajcxy. Nejhuuyim co yi' tzaadzech yi' quipychech ca' ti jugy'ajtin miiidity. Ji tügpajc Dios huudibi tzinaayb jugy'ajtp. ⁵ Janch tiy'ajt co yi' naaxhuiñjäy ajcxy Dios'ajtigixy canaagnax huudibi yajpatp tzajpcix etz ya naaxhuiñ huudibi ca' Diosity. Etz nañ tiy'ajt co may yhuindzin'ajtcixy huudibi ca' yhuindzinity. ⁶ Per ich ajt n'ojadajtim tügpajcpi Dios, je Dios Teedy. Je Dios Teedy co macx tüg'óciy huudibi ji'ajtp. Miiid yi' ycixpi ich ajt ndzinaayim njugy'ajtim. Nañ tim jadu'n nmiiid'ajtim tügpajcpi ajt nHuindzin Jesucristo, e yi' huijtz'ijtaayb tüg'óciy tijaty huudibi ji'ajtp, e nañ yi' ajt xyhuijtz'ijtim.

⁷ Janch tiy'ajt co yi' tzaadzech quipychech ca' ti mic'ajt miiidity, per nije'jity mibijcpidijc ca' huinjihuüy jada tiy'ajt. Nijejity ajcxy jecy'ajty ooy huindzigüygixy tzaadzech, ixti chambaadni tijcixy co yi' tzüch huudibi jäy miiid huindzigüy tzaadzech, tzaadzech yi' yje'. Co ajcxy tzüdzixy yi' jadu'mbi tzüch, jibic nayjihuiyigixy, nayjihuiyigixy nejjihuiy ti ytundigooygixy. Ca' tiydudägy y'ijtcixy ma ymibijcin. ⁸ Ca' Dios xycöbigaanim miiid je' ycixpi co ti njicxim ti ndzüdzm tijaty tzüch, o miiid co ca' ti njicxim ca' ti ndzüdzm tijaty tzüch. Nañ tim jadu'n Dios ca' oybi xymöhuaanim miiid je' ycixpi co ti njicxim ti ndzüdzm ti tzüch, o miiid co ca' ti njicxim ca' ti ndzüdzm tijaty tzüch. ⁹ Oy Dios a'ixiy co jëbi ndzüdzm huenhuudibi tzüchity. Per miiid je migügtijc ycixpi huudibi ca' tiydudägy miiidity ymibijcin, tzoc naygüend'ajtim ca'ydi je' jibic yñayjihuiyii miiid huudibi ich ajt ndunim. ¹⁰⁻¹¹ Tzoc ocpidaacim co miich ajcxy mnejhuüy je tiy'ajt, e xy'ixipy tüg migüg co mgay m'uucy ma tüg mesa jiiyby tigoty me je tzaadzech y'ity. Ca' jecyity co jada jäy huudibi ca' tiydudägy miiidity ymibijcin, etz co xy'ixpaadipy jiiyby, huin'it je' cöbiga'ñ je tzüch huudibi huindzigi'ñ'ajtp. E jadu'n yhuimbizimy co miich jibic ijxpejt ti myecy miiid yi' m'ixpijcin ycixpi, com yi' mmigüg ti ytundigoy miiid huudibi miich ti mduñ. E Cristo ti y'ögy miiid yi' ypocy ycixpi nañ jadu'n. ¹² Co tüg mibijcpi jibic nayjihuiyii miiid co ti xy'ixy ma je caydac mdzuch je tzüch huudibi jäy ajcxy yajhuindzigüyb tzaadzech, miich anajty tundigooyb miiid Cristo ytiy'ajt, miiid co yi' mibijcpi jibic ñayjihuiyii. ¹³ Paady ycixp ca' ndzüdza'ñich ni mina tzüch huudibi tzaadzech yhuindzigi'ñ'ajtp. Pen jadu'n nduñich, jibic ijxpejt anajty nyejcpyich ma nijejity migügtijc, e chi yi' ajcxy yhuinma'ñytigoya'ñ.

9

Je tung huudibi Pablo paatip

¹ Janch janch co jëbi nduñich huentijity huudibi ndzojcpich. Nañ jadu'n janch co Jesucristo ti xyajniibicyich jada apóstol tung. Etz janch co ti n'ixyich ajt nHuindzin Jesucristo. Nañ jadu'n janch co miich ajcxy ijxpejt'ajtp ma ich ndung, com ti ajcxy mmijpidaaccixy je nHuindzin'ajtim Jesús y'ayuc huudibi ti ngapxhuäcxyich ma miich ajcxy. ² Ca' jecyity co jacjadyii jäy ajcxy ca' xycöbiga'ñich jadu'n nej Jesús xy'apóstol'adyiijich. Per com miich ajcxy ti mmijpidaaccixy ajt nHuindzin Jesucristo, etz miich ajcxy mmibijcin nidiy'ajtp co Jesús ti xyyajniibicyich jada tung, paady ycixpi copicy co ich miich ajcxy xycöbigipyich jadu'n nej Jesús y'apóstol.

³ Jadu'n n'adzohuimbityich yi' ajcxy huudibi jibic xyñigapxip ich ndung. ⁴ Com Jesucristo xyajniibijcich jada tung co ngapxhuäcxyich yi' y'ayuc ytiy'ajt, paady ycixpi xypatpich jadu'n co je mibijcpidijc xymöhuibich ngaayin n'uucin. ⁵ Nañ jadu'n xypaatpich co nmiiid'adipyich tüg ndöxyijcich huudibi mibijcp, etz huudibi nmiiidhuudidipyich tim jadu'n nej yi' jacjadyii apóstol ajcxy miiidity, etz je Huindzin Jesús y'uch ajcxy miiidity, etz Pedro. ⁶ ¿Nej miich ajcxy mminaangixy co ich etz Bernabé nimejtzpajc ca' ich ajcxy huaad ixmajtzicixy yi' ndungich co ngapxhuäcxyich Cristo y'ayuc ytiy'ajt? ⁷ ¿Huudibi soldado yi' ma je ejercito ci'm ygasto cojuy? ¿Pin ji cam nidungüyb, e ca' jicixpy je huudibi

ti yaj'ity? Pin ychibo cuend'ajtp, ¿e ca' ügipy je chibo yleche? ⁸ Ca' miich ajcxy mîna'nîpy co jây y'ayuc jada. Nañ jadu'n jaybety y'ity ma Dios ñecy tim jadu'n nej nmîna'ñich. ⁹ Com jaybety jadu'n ymiñ ma Moisés ñecy, ma Moisés jadu'n ymîna'ñ: “Ca' huaad huajyuub y'ajen mbîdaaci ma yam ten moody yî trigo co yajpajc'aty.” ¿Nej jêyi mîd huajyuub ycixpi Dios jadu'n ymîna'ñ? ¹⁰ Canan jêyi mîd huajyuub ycixpi Dios jadu'n ymîna'ñ. Nañ jadu'n Moisés jaybejty jada tîy'ajt mîd ñich ajt ycixpi. Com yî jây ajcxy huidibi naaxjîdzijtzp, etz yî' ajcxy huidibi trigo yajpajc'ajtp, hue' ajcxy yjîp'ijxyp co padaangixy je moc tîm huidibi ajcxy ti nidungîy. ¹¹ Nañ jadu'n ñich ajcxy huidibi Jesús ytung tuunîp, ti ngapxhuäcxyich Dios y'ayuc ma miich ajcxy, e miich ajcxy oybi ti mbaatcixy ma Dios. ¿Nej ca' jadu'n y'oyity co nbaadyich meeñ etz jicxy picy mîd ndungich ycixpi? ¹² Pen jacjadyî Dios y'ayuccapxhuäcxi ti paatcixy meeñ etz jicxy picy ma miich ajcxy mîd ytung ycixpi, ¿nej ca' jêbi nîgi ñich nbaadyich meeñ etz jicxy picy mîdich ndung ycixpi? Oy njamîdidyich je mic'ajt nej nja'ane'mgixy co xymôhuîbyich ajcxy meeñ etz jicxy picy mîd ñich ndung ycixpi, per ca' jadu'n ti n'ane'mgixy. Jadu'n ñich tzaachypi nyajnajxich jim ma miich ajcxy, jaydêbi jây ajcxy cöbijccixy Cristo agujc jotcuje ca' ti adzijpin. ¹³ Mnejhuîyb miich ajcxy co yî' huidibi ajcxy tumb ma Dios ytîjc, paatcixy ninigoobi caayin uucin. Nañ jadu'n yî' pin ajcxy huidibi iyujc yajhuindzigîyb Dios, paatîp ajcxy je huindzigî'ñ tzüch. ¹⁴ Nañ jadu'n je Huindzin Jesucristo ane'my co huen yajcaangixy yaj'uuccixy etz mooygixy yhuît ytucx yî' ajcxy huidibi capxhuäcxcixp yî' y'ayuc ytiy'ajt. ¹⁵ ñich ca' ti nyajtuñich jada mic'ajt jada ane'mîn huîdi nmîdich. Nañ jadu'n ca' jada ayuc nyajnijayîygixy, mîd co ndzocy co padañich tijaty ma miich ajcxy. Jacjotcuje co n'ögîbich mîd yuu, ca'ydi co n'ané'mîbich caayin uucin ma miich ajcxy, e jadu'n tzöydu'n nbáadîbyich jadu'n nej cham naygömayîijich, mîd co ci'm nnyajcayîijich mîd ndungich.

¹⁶ Com ca' huaad naygömayîijich co ngapxhuäcxyich Cristo y'ayuc. Mîd co Cristo xyyajñîbjîcîch jada tung, paady ycixpi copîcy ngapxhuäcxyich Cristo y'ayuc. Ayo'n nbadaamybîch, pen ca' ngapxhuäcxiich Cristo y'ayuc. ¹⁷ Pen ngî'mdzócinîch ycixpi ngapxhuäcxiich Cristo y'ayuc, nijp'ijxypîch ixypîy co jây ajcxy xymîjuyîpyîch. Per ca' yjadu'nîty. Hue' janchtîy je Huindzin Jesucristo xyajñîbjîcîch jada tung, e paady nduñich yî' ytung. ¹⁸ ¿Ti muju'ñ nbáadîbîch mîd ndungich ycixpi? Nbáadîbîch jotcuje'ajtîn co ngapxhuäcxiîch Cristo y'ayuc jadu'ñyî, ca' ymeeñgixyîty. Ca' nyajtuñich je ane'mîn huîdibi Cristo xymóyîch mîd caayin uucin ycixpi.

¹⁹ Ca' jî ni pin jây mic'ajt mîdîty jaydêbi xy'ane'myîijîch. Oy ixypîy ytimyñejîty ti nnyabîdägyîijîch mîd ñich njot nhuinma'ñ jadu'n nej jîhuîy tûg'ócîy jây ajcxy xy'ane'myîch. Jadu'n nduñich jaydêbi jac mayjây ajcxy nyajmîbîgîpyîch Cristo. ²⁰ Co ngapxhuäcxyîch Cristo y'ayuc ma yî judíoîjây, hue' naybîdägyîijîch judíoîjây, jaydêbi nyajmîbîcyîch ajcxy Cristo. Co ngapxhuäcxyîch Cristo ma yî judíoîjây ajcxy huîdibi cuydumyb yî' ajcxy ycötujcîn etz ycostumbre, nañ jadu'n ñich nguyduñîch yî' ajcxy ycötujcîn, jaydêbi nyajmîbîcyîch ajcxy Cristo. Ooy yjanchîty co ca' yî judío ycötujcîn etz ycostumbre xy'ane'myîch. ²¹ Co ngapxhuäcxyîch Cristo y'ayuc ma yî' ajcxy huîdibi ca' yjudíoîjâyîty, chi naybîdägyîijîch jadu'n nej yî' ajcxy. Ca' nan nmînaambîch co ca' nguyduñîch Dios ytiy'ajt. Hue' njatyîmîcuydumybîch Cristo ycötujcîn, jaydêbi nyajmîbîcyîch ajcxy Cristo. ²² Co ngapxhuäcxyîch Cristo y'ayuc ma yî' ajcxy huîdibi ca' tîydudägy ymîbjîccixy, chi naybîdägyîijîch jadu'n nej yî' ajcxy, jaydêbi nyajmîbîcyîch ajcxy Cristo. Ma nidüg'ócîy jây ajcxy ma ngapxhuäcxyîch Cristo y'ayuc, chi nbîdägyîch njot nhuinma'ñ nej yî' ajcxy yjot yhuînma'ñ mîdîty, jaydêbi nijêjîty ajcxy nyajmîbîcyîch Cristo y'ayuc ytiy'ajt. ²³ Jadu'n nduñîch tûg'ócîy mîd Cristo y'ayuc ycixpi, je ayuc nej jêbi jây ajcxy y'alma ñîdzooccixy. Jadu'n nduñîch, jaydêbi nbaadyîch je jotcuje'ajtîn etz oy'ajtîn huîdibi nbaatîm nidüg'ócîy co nmîjîpîdaacîm Cristo.

²⁴ Mnejhuîygîxy co jây ajcxy ñayboyîcquîpxîgîxy co premio padaangîxy, huîn'it nidüg'ócîy ajcxy ñaymîc'îjîgîxy, per tûgpajc huîdi je premio patp. Nañ jadu'n mi-

ich ajcxy mijottigooygix cuydungix Dios y'ayuc ytiy'ajt, jaydëbi Dios xymóoygixipy ajcxy tüg premio. ²⁵ Tüg'óciy pinjaty nayñi'ixiiyip co ñay'ixquipxáanigixy ma iyihuijin, ooy ñayguend'ájtigixy mic, jigix jëbi ymadaaccixy co ganar'adaangixy premio huídibi ca' huinixii ajcxy mi'ijtcixy. Pero ich ajcxy Dios y'ayuc capxhuäcxy, yi' ich ajcxy mijottigooygixy nganar'adaangixyich huídibi ca' nimina ycixipy ytigoyipy. ²⁶ E jadu'n ich ndung mijottigooyich, ca' yhuimbádzity agoodzity, jadu'n nejhuiy ngoxich e nipin ca ypegyii. ²⁷ Nnaychaachytumybich ngi'mninicxich, jaydëbi ngi'mninicx ycapxymidooyich. Jadu'n nduñich co ti ngapxhuäcxyich Cristo ma je mayjáy ajcxy, ca' ydi nyajtigoyipyich nbremio huídibi Dios xymöhuambich.

10

Capxhuijin ma yi pin ajcxy jac-huindzigiyb quipychech

¹ Com ndzojcpich co miich ajcxy migügtijc mnejhuüyigixipy co ajt nmij'ap nmijteedy müd yhuídijty Moisés co Dios nidüg'óciy ajcxy cuend'ajttay, huinhuoy jecy'ajty müd tüg joc. E nañ jadu'n Dios yajnihuañ yajtzoocy nidüg'óciy ajcxy ma ymidzip co ajcxy yajnaxxy je tzaptz mejy cujc'amy. ² Co nidüg'óciy ajcxy panicxy je joc, e co ñidzooctay ajcxy nidüg'óciy ma je mejy, hue' nidüg'óciy ajcxy cöbijcy Moisés y'ane'min, e jadu'n nipaady nej jihuiy ni'amugí ajcxy yñibejty müd Moisés yxi. ³ Nañ jadu'n nidüg'óciy ajcxy caay jicxy je maná huídibi Dios anajty yejcpy, choñ je' anajty tzajpjoty. ⁴ Etz nañ jadu'n y'uuc ajcxy nidüg'óciy je nii huídibi Dios anajty yejcpy, com y'uuc ajcxy je nii huídibi yajpidzim ma je tzaa. E je tzaa hue' je' anajty Cristo, e paady Cristo ymüd'ijtpy etz ypubejtpy ajcxy anajty nidüg'óciy. ⁵ Oy ajcxy Dios ooy yjapubejti, e ni may ajcxy ooy Dios yajjotma'ty, etz jahueen ajcxy yca'octay jim mijtigíduum jecy'ajty, com ca' Dios jäygidacy je' ajcxy yhuinma'ñ.

⁶ Jadu'n nej je ayo'n yjajti müd ajt nmij'ap nmijteedy jecy'ajty, je' iixpejtíp ma ich ajt, ca'ydi n'adzojcm tijaty jibicpi, jadu'n nej je' anajty ajcxy adzojccix jibicpi. ⁷ Nañ jadu'n ca' yhuaadity ca' y'oyity co miich ajcxy m'ojadajtcixy tzaadzech quipychech jadu'n nej nijëjty ajt nmij'ap nmijteedy tuñ jecy'ajty. Com jadu'n yjaybetyity ma Dios ñecy ma jadu'n ymina'ñ: “Ixtactay je jäy ajcxy caaybi uucpi, e huin'it ajcxy ypidigy etz ytiigixy iyiybi ejtzpi.” ⁸ Nañ jadu'n ca' y'oyity co ndundigooyim müd töxyjäy ajcxy jadu'n nej nijëjty nmij'ap nmijteedy tuñ jecy'ajty, e iipx tugüg mil ajcxy y'o'cy tüg xiibi. ⁹ Nañ ni ca' y'oyity co njot'ijxim nhuinma'ñ'ijxim ich ajt nHuindzin Jesucristo, jadu'n nej ajt nmij'ap nmijteedy ajcxy idich jecy'ajty, e may ajcxy tza'ñchüdzi, e ytiigooy ajcxy yjugy'ajtin. ¹⁰ Nañ ni ca' y'oyity co nnigapxim ni'ojiiyim Dios, jadu'n nej nijëjty ajcxy idich jecy'ajty, e müd je' ycixpi Dios y'ángel yaj'o'cy mayjáy ma yi' ajcxy.

¹¹ Tüg'óciy yi jadu'mbi ayo'n yjajti müd ajt nmij'ap nmijteedy, e jaybety yhui'my ma Dios ñecy, jigix n'ijxpejt'ajtim, e jadu'n tiy'ajt nbaatim, ca'ydi ndundigooyim müd Dios, ich ajt pinjaty tzinaayb ma jadachambi xii jadachambi tiempo huídibi janch tim huingónip ma Dios yajcixa'ñ yajtigoya'ñ jada naaxhuiñybi. ¹² Com nmüd'ajtim je tiy'ajt nej nmij'ap nmijteedy ajcxy ytundigooy, paady ycixp pinjaty yci'mhuinma'ñ pidacp co ooy mic'ajt müdity ma ymibijcin, huen naygüend'adyii, ca'ydi ytundigoy etz ypocycähuipy ma Dios. ¹³ Tüg'óciy tzaachypi ayo'n, jot'ijxin huinma'ñ'ijxin huídibi miich ajcxy mminajxyp myajnajxyp, nañ jadu'n jacjadyii mibijcpidijc ajcxy minajxcixy yajnajxcixy. Per yajmij'ajtcix jot'amij'ajtcix Dios, com Dios ca' a'ixihuiip co mjacminájxcixipy mjacya-jnájxcixipy tzaachypi ayo'n anaxy huídibi ca' ajcxy mmimadäga'ñ. Co anajty tzaachypi ayo'n mminajxcixy myajnajxcixy mictägy, huin'it Dios xymöhuipy ajcxy huinma'ñ jadu'n nej jëbi mminaxtagixy myajnaxtagixy yi tzaachypi ayo'n.

14 Paady miich ajcxy migügtijc, huidibi ooy ndzocy njihuüyich, ixmajtzcixy ca' m'ojadajtcixy tzaadzech quipychech. 15 Nyajmüdcapxy nyajmüdmıydacpy ajcxy jadaabi ayuc, com nejhuiybich co miich ajcxy ooy oy huinma'n mmıdity. E jëbi ci'm mhuinmaaygıxy pen tiy'ajt jada ich n'ayuc, o pen ca'. 16 Ma je "Santa Cena" co nyajnaxım Dioscojuyip ma Dios müd je ügy, e n'uucım. Je' je' ñidiy'ajt'ajtpy co Cristo ti xyajtügmüjım ajt njot nhuinma'n co yajcruudzpejti etz ñi'py yteemy yojcy müd ajt nbocy ycıxpı. Nañ jadu'n ma je "Santa Cena" co ndujchuäcxım, e ngaayım je tzajcaagy, je' je' ñidiy'ajt'ajtpy co Cristo xyajtügmüjım ajt njot nhuinma'n müd ñinıcx co ñaygiyejci ma ymıdzip huen yajcruudzpedyii. 17 Oy ajt ooy njanimaayıty, per nidüg'óciy ich ajt ngaayım je tügpı "Santa Cena" tzajcaagy. Jada tzajcaagy tüg yi', paady ycıxpı tügpıcy jäy ich ajt, e jadu'n ich ajt nipaady nej tügpı ninıcx.

18 Oc-huinmaaygıxy miich ajcxy yi Israel jäy ajcxy, co ajcxy tzützcixy je huidibi ajcxy yajhuindzigıyb Dios, chi ajcxy naydücmüjıgıxy müd Dios ycıxpı ma je Dios ojadajttac. 19 Ich nmına'ñich co yi tzaadzech ca' ti mic'ajt mıdity, e nañ jadu'n yi tzüch huidibi yajhuindzigıyb tzaadzech ca' jac nigı oy'ajtin mıdity, ca'ydi jac huidibi tzüch. 20 Jadu'n nmına'ñich, co yi jäy ajcxy huidibi ca' mijpidaaccıxy Dios, co ajcxy yejccıxy yhuindzigi'ñ, hue' ajcxy yajhuindzigıyb ca'oybi, e ca' Dios ajcxy yajhuindzigi'y. E ca' ndzocyich co miich ajcxy migügpıgıpy je ca'oybi. 21 Co miich ajcxy m'uuccıxy je ügy ma je "Santa Cena", ca' huaad m'uuccıxy je ügy huidibi ca'oybi ajcxy yhuindzigi'ñ'ajtpy. Etz co mgaaygıxy je tzajcaagy ma je "Santa Cena", ca' huaad mgaaygıxy je tzajcaagy huidibi ca'oybi yhuindzigi'ñ'ajtp. 22 ¿Nej tzoc yajjotma'tım yi Jesucristo? ¿Nej jacmic'ajt müd jada' ich ajt, ca'ydi yi'?

Je tzojcin huidibi tüg mibıjcpı huaad tuñ müd ymigüg

23 Janch tiy'ajt nej jay ymınaangıxy co jëbi huaad nduñich huentıjıty huidibi nijot'ajtpyich, per ca' tüg'óciy nmigügtıjıch jäygıdaaccıxy huıdı ndumybıch. Janch jadu'n jëbi huaad nduñich huentıjıty huidibi nijot'ajtpyich, per huidibi ndumybıch ca' tüg'óciy xypubetyich ma ich nmıbıjcin. 24 Ca' y'oyıty nnıjot'ajtim ngı'm'oy'ajtin. Oy co nbubejtim nbudıgıyım nmigügtıjı.

25 Jëbi ajcxy mdzüch huen ti tzüch huidibi yajtoocp ma je mercado. Ca' ajcxy myajtıhuıpy ma je tzüch chooñ, ca'ydi jıbic mnayjıhuıyıgıxy. 26 Com Dios y'ayuc jadu'n ymına'ñ: "Je Huıdzın Dios yi' nihuıdzın'ajtp je naaxhuınybi, etz ñihuıdzın'ajttaayb tüg'óciy huidibi ji yajpatp."

27 Pen jim pınjaty huidibi ca' ymıbıcy, xyajnihuohıy tüg caayın uucın ma yi' ytıjı, e pen ti mhuinma'ñ mbıdägy co nıcxı mgaya'ñ ma yi' ytıjı, oy co mgaayıpy mdzüdzıp huentıjıty huidibi ajcxy xymooyb. E ca' mnıdıhuıpy myajtıhuıpy ma je tzüch chooñ, ca'ydi jac pınjaty jıbic ñayjıhuıyı müd huidibi ti mduñ. 28 Per pen je jäy xyñımaayb: "Jada tzüch ti jäy yajhuıdzıgy tzaadzech." Pues ca' mdzüdzıp je tzüch, jıgıx ca' jıbic ñayjıhuıyıyb je migüg huidibi ti xyñımäy co je tzüch ti yajhuıdzıgy tzaadzech. 29 Hue' nımydacypıch je mmıgüg huidibi jıbic nayjıhuıyıyb pen miich mdzu'chpyı tzüch huidibi tzaadzech yhuıdzıgi'ñ'ajtp. Ca' nnımydägyıch nej miich ci'm mnayjıhuıyı. Ca' yjıcyıty co nijıjıty jäy xyñımähuıbıch: "¿Na'amy co xycapx'adujıch tijaty nıgoob müd co huıngbı jäy jıbic ñayjıhuıyı müd jıgıxpı? 30 Pen nyajnaxypıch Dioscojuyip müd tijaty ycıxpı huidibi ngaaybıch n'uucypıch, ¿na'amy co xyñıgapxa'ñıch xyñı'ojıhua'ñıch co ti ngay ti n'ügyıch tijaty?" 31 Paady ycıxpı huentıjıty huidibi mdungıxyp, pen mgaayıxyp m'uuccıxyp, o jac ti ga ti mdungıxy, tungıx tüg'óciy müd Dios y'oy'ajtin ymıj'ajtin ycıxpı. 32 Ca' mdungıxıpy tijaty huidibi yi judıojäy ajcxy müd huıng ñayjıhuıyı. Ca' mdungıxıpy tijaty huidibi yi griegojäy ajcxy müd huıng nayjıhuıyı. Etz ca' mdungıxıpy tijaty huidibi yi mıbıjcpıdıjı ajcxy müd huıng ñayjıhuıyı. 33 Tüg'óciy huidibi nduıybıch, hue' nduñich jıgıx tüg'óciy jäy jäygıdägyıpy huidibi ndumybıch. Ca' ni ti nduñich nej jëbi ich ci'm

nayjägüädägyiijich. Hue' nduñich miid jacjadyii jäy ajcxy y'oy'ajtin ycixpi, jaydëbi ajcxy y'alma ñdzögipy.

11

¹ Jadu'n ndzocyich co miich ajcxy mdunipy jadu'n nej nduñich. E ñich tumbich jadu'n nej Cristo ytuuñ.

Nej huaad töxyjäydijc ajcxy yjäy'ajtcixy co migügtijc naymújçigixy

² Miich ajcxy migügtijc, ngapxpatypich miich ajcxy, com miich ajcxy xyjatytimyjäymejtzpich, etz nañ mguydungixyp je ayuc je tiy'ajt huidibi ñich miich ajcxy ti nyaj'ixpijccixy. ³ Per ndzojcyipich co mhuinjihuüygixipy je tiy'ajt co Cristo nigohuajc'ajtpy nidüg nidüg yi mibijcpi yëydijcpi. E nañ nidüg nidüg yëydijc nigohuajc'ajty ajcxy ytöxyijc. E Dios nañ nigohuajc'ajtpy je Cristo. ⁴ Co tüg yëydijc cöjuuxy cöbe'ñ ñhuäcxy capxhuäcxy je tiy'ajt huidibi Dios ti ymöyii, tüg je' tzo'yduñ anajty naymöyii. ⁵ E co tüg töxyjäy cöjuxtüdy cöbe'ndüdy ñhuäcxy capxhuäcxy je tiy'ajt huidibi Dios ti ymöyii, tüg je' anajty tzo'ydu'n ñaymöyii. Jadu'n je' nipaady nej jihuüy je' ycöme'pxity cödza'm. ⁶ Pen tüg töxyjäy ca' ñaygöbe'na'ñyii, jac'oy co huen yajcöme'pxy cödza'm. Per pen je töxyjäy cho'ydu'n jihuihuamyb co ycöhuay yme'pxity, o co ycöme'pxity cödza'm, jac nigü oy co ñaygöbe'niyb. ⁷ Je yëydijctijc ca' y'oyity co ajcxy ycohuajc cöjuuxy cöbe'ñ mi'idipy ma ajcxy Dios mibijctzoogixy o yaj'ixpijccixy Dios y'ayuc. Com je yëydijc jadu'n yi' nipaady nej Dios, e Dios yajcoj je yëydijc miid yi' y'oy'ajtin ycixpi. Per Dios yajcoj je töxyjäy miid je yëydijc y'oy'ajtin ycixpi. ⁸ Co Dios yajcoj je jayijpi yëydijc, ca' yajtuuñ je töxyjäy ycaachypajc. Hue' janchtiy co Dios yajcoj je jayijpi töxyjäy, je' yajtuuni je ñiyëydijc tüg ycaachypajc. ⁹ Dios yajcoj je töxyjäy miid je yëydijc ycixpi. E ca' nan yajcoj je yëydijc miid je töxyjäy ycixpi. ¹⁰ Paady ycixp copicy co je töxyjäy ajcxy y'ijtcixy cöbe'ñ co Dios mibijctzoogixy o najtzcaxhuüygixy Dios ytiy'ajt. Je' je' je tiy'ajt co yajpaady ajcxy ane'my, nañ jadu'n yi' ángeles ajcxy yajpaatcixy ane'my. ¹¹ Per ca' ñejity, ñich ajt huidibi nmibijcim Cristo, ma ajt ndzinaayin je yëydijc ca' je' yajpaady naydüg, etz ni ca' je töxyjäy yajpaady naydüg, hue' ajcxy naymiiddzináyigixyp. ¹² Com tiy'ajt jadu'n co Dios yajcoj je jayijpi töxyjäy miid je ñiyëydijc ycaachypajc. Etz tiy'ajt jadu'n co je töxyjäy ajcxy yajma'xung'ajtcixy je yëydijc ajcxy. Per Dios ti yaj'oyiydäy, e tüg'óciy jiiyby chondäy ma Dios.

¹³ Miich ajcxy ci'm ocmänaangix oc-huinmaangix, pen oy jadu'n o pen ca' y'oyity jadu'n co tüg töxyjäy Dios mibijctzoy jaygöbe'ñ. ¹⁴ Jëbi tiy'ajt nbaatim huenma'amyity ya naaxhuiñ co je yëydijc huidibi ymiid ycöhuay yoñ ooy cho'ydu'n yecy. ¹⁵ E je töxyjäydijc ajcxy ooy ycömaypidzimigixy co ajcxy miidity ycöhuay yoñ. Com yi' je' huidi ycöbe'n'ajtip. ¹⁶ Pen jim pinjaty ca' mijotcuje'aty ñich n'ayuc, copicy nejhuühuüpy co ñich ajcxy etz nañ jadu'n tüg'óciy jäy huidibi ajcxy mijpidaaccixyp Dios ma tüg'óciy cajp, cuydungixy nej ti nyaj'ixpiyich miich ajcxy, ca' pin jac huingbi costumbre miidity.

Pin tundigooyb "Santa Cenajoty"

¹⁷ Jada ayuc nyajnimähuaangixyp jadu'n nej mdungixy ma mnayyöymújçigixy co Dios m'ojadajtcixy. Ca' ngapxpaadyich miich ajcxy, com jibic yhuimbizimy jadu'n nej mdungixy. ¹⁸ Jayijp nimähuaangixy co nijëjity migügtijc ti xyñimäyich co miich ajcxy mnaybijc-huäcxigixy co mnayyöymújçigixy ma je nayyöymujctac. E ñich nmibijcpiyich ma ga ma co yjanchity nej je migügtijc ajcxy ymäna'ñ. ¹⁹ Ca' yjecyity paady miich ajcxy mnaybijc-huäcxi miid ajcxy mjibic-huinma'ñ ycixpi, jaydëbi ñiguëxigy pin je' janch tiydudägy cuydumb Dios ytiy'ajt. ²⁰ Co miich ajcxy mnayyöymújçigixy ma je nayyöymujctac, jadu'n yhuimbizimy co ca' mguydungixy nej ypadyii ñich ajt nHuindzin Jesucristo ytiy'ajt co mjatungixy je "Huindzin je' ySanta Cena". ²¹ Com co je hora paady ma yam mdungixy je "Huindzin je' ySanta Cena" nidüg nidüg miich ajcxy

mgaaygixy abicyjaty, e ca' mdungix cuendi yi jacjadyii migügtijc, paady nijëjity migügtijc ayuu y'ijtcixy, e nijëjity anaxy ycaaygixy y'uuccixy, ixti ymuucigixy nijëjity. ²² ¿Nej ca' miich ajcxy mïdity mjin mdijc ma jëbi mgaaygixy m'uuccixy? Jadu'n nej miich ajcxy mdungixy ca' mmij'ijxcixy ca' mijpidaaccixy je jäy ajcxy nidüg'ócixy huidibi mijpidacp Dios. E nañ jadu'n myajtzo'ydungixy yi ayoobi jäy huidibi ajcxy ca' ti mïdity. ¿Huam ìich miich ajcxy nimähuipy? ¿Nej jëbi ngömaaygixy miich ajcxy jadu'n nej mdungixy? Ca' huaad ngömaaygixy miich ajcxy co jadu'n m'iditczixy.

Jadu'n nej njäymejtzim ajt nHuindzin Jesús ma yi "Santa Cena"

²³⁻²⁴ Com ìich ajt nHuindzin Jesucristo ci'm xyaj'ixpijcyich je tÿ'ajt huidibi ti nyaj'ixpijcyich miich ajcxy, co je huin'it coodz co agojix ajcxy cÿejcy je nHuindzin Jesús, huin'it je' conigy je tzajcaagy, e co jayijp yajnajxy Dioscojuyip ma Dios, chi tujc-huäcxy je tzajcaagy, e moy nidüg nidüg ydiscipulos ajcxy. E co ajcxy moyday, chi nimay ajcxy: "Caaygix jada tzajcaagy. Jadu'n ìich jada nninïcx huidibi ngÿyegaamybich ma yi o'cin mïd miich ajcxy ycixpi. Jadu'n ìich ti nduñich, jadu'n jada miich ajcxy mdunipy jäymejtzig mïd ìich ycixpi." ²⁵ Co ajcxy ycayday, chi Jesús nañ jadu'n conigy je ügy copï'am, e ymïnañ: "Jada ügy je' jada je Dios y'ayuc jemybi huidibi Dios yajhui'my mïd jäy ajcxy ycixpi, je huidibi ìich nni'py ñidiy'ajt'ajtpy. Naag'oc naag'oc m'uuccixy jada ügy tungixy jäymejtzig mïd ìich ycixpi." ²⁶ Paady naag'oc naag'oc miich ajcxy mgaaygixy jada tzajcaagy, etz m'uuccixy jada ügy, myegipy ajcxy tÿ'ajt jadu'n nej Cristo y'o'cy mïd ajt nbocy ycixpi, ixti cooni anajty Jesucristo yhuimbity ya naaxhuiñ.

Nej huaad ngaayim je "Santa Cena"

²⁷ Paady ycixp pinjaty mïd ca'oyjot ca'oyhuinmañ caaygixy je tzajcaagy etz uuccixy je vino'ügy, huidibi ajt nHuindzin Jesús ñinïcx'ajtpy etz ñi'py'ajtpy, hue' ajcxy ymidundigooygixy ajt nHuindzin Jesús ñaaxnïcx etz yi' yñi'py. ²⁸ Paady ycixpi copicy nidüg nidüg mibijcpidijc jayijp yaj'oyihuipy yci'mjot yci'mhuinmañ, e huin'it jëbi cayipy je tzajcaagy etz ügipy je vino ma je "Santa Cena". ²⁹ Com pinjaty caayb je tzajcaagy etz ügy je vino ma je "Santa Cena", e ca' tuñ cuendi co je' je' ìich ajt nHuindzin Jesús ñinïcx etz ñi'py, hue' je' ci'm ñaymidundigoyii, e Dios tzaachytunib mïd ypocy ycixpi. ³⁰ Paady ycixp may miich ajcxy myuumïdity mba'mmïdity, pumäy mnayjihuyigixy. May miich ajcxy yuu ba'm xyaj'ayoogixy etz may ma miich ajcxy ti m'öccixy. ³¹ Co tÿdudägy njot nhuinmañ nyaj'oyiyim ci'm, ca' ajt nHuindzin Jesucristo xychaachytuunim. ³² Co ajt nHuindzin Jesucristo xychaachytuunim mïd yuu ba'm, paady ycixpi jadu'n xychaachytuunim, jigix ca'ydi nidigooyim ajt n'alma yjugy'ajtin quipxy mïd je naaxhuiñjäy ajcxy huidibi ca' ajcxy Dios tzigiygixy.

³³ Paady ycixpi miich ajcxy migügtijc co ajcxy mgaya'nip m'üga'nip je "Santa Cena" nay'ahuixigixy miñ xyipy, e jadu'n mgäaygixipy amugi'. ³⁴ Pen jim pinjaty ma miich ajcxy ooy yuubögyii, jac'oy co ycaayipy y'ügipy ma yci'mdijc jacjayijp ma ca'ni ymiñ ma je nayoymujctac. Jadu'n mdungixipy, ca'ydi Dios xychaachytuungixy mïd co ca' oy mduungixy je "Santa Cena". Yi jacjadyii ayuc huinmañ jim nyaj'oyihuibich co anajty nicxy ci'm n'ijxcixyich miich ajcxy.

12

Je mic'ajt huidibi Espiritu Santo yejcy ma nidüg nidüg mibijcpidijc

¹ Migügtijc ajcxy, ndzojcpich co miich ajcxy mnejhuihuipy jadu'n nej je Espiritu Santo xymooyim mic'ajt. ² Miich ajcxy mnejhuib co jayijp'ajty co ca'ni anajty mmibijccixy Cristo, ooy anajty je ca'oybi xyajnidigooygixy xyajtüdigoooygixy, co m'ojadajtcixy tzaadzech quipychech huidibi ca' ymidoy ca' ycapxy. ³ Paady ycixpi ndzojcpich co miich ajcxy mnejhuihuipy co pinjaty ymïna'nipy: "¡Ca' oy jäy yi Jesús!" je jäy huidibi jadu'n

minamb, ca' je' anajty yajcapxyii je Dios y'Espíritu. E pinjaty minamb: “¡Jesús ñch ajt nHuindzin!” je' anajty yajcapxip je Espíritu Santo.

⁴ Dios yjihui'ñ ymic'ajt yejcpy ymic'ajt canaag nax, per tügpajc jëyi je Dios yjihui'ñ huidibi mic'ajt yejcp. ⁵ Ji yajpaady canaagnax Dios ytung, per tügpajc ajt nHuindzin Jesús huidibi xyajñibijcim nije' nije' tung. ⁶ Ji yajpaady canaagnax huinma'ñ nej jëbi ndunim Dios ytung. Per tügpajc Dios huidibi xymooyim nidüg nidüg je nhuinma'ñ nej huaad ndunim Dios ytung. ⁷ Dios yajñiguëxigyp ma nidüg nidüg mibijcpidijc je tiy'ajt co ajcxy müidity yi' yjihui'ñ ymic'ajt ma ajcxy yjot yhuinma'ñ. Jadu'n Dios ytuñ müid tüg'óciy mibijcpidijc y'oy'ajtin ycixpi. ⁸ Dios müid yjihui'ñ ymic'ajt ymooyb nijëjity mibijcpidijc ayuc huinma'ñ nej jëbi ajcxy yaj'ixpicy Dios y'ayuc. E nañ jadu'n Dios müid yjihui'ñ ymic'ajt möy nijëjity mibijcpidijc ixpijcin ma yi' ytiy'ajt, per tügpajc je Espíritu Santo huidibi mic'ajt yejcp. ⁹ E nañ jadu'n Dios müid yjihui'ñ ymic'ajt möy nijëjity jäy mibijcin, per tügpajc je Espíritu Santo huidibi mic'ajt yejcpy. E nañ jadu'n jacnaagity möy mic'ajt jaydëbi yajtzögy pa'mjäy. ¹⁰ E nañ jadu'n Dios müid yjihui'ñ ymic'ajt ymooyb nijëjity mibijcpidijc mic'ajt, jaydëbi mijhuinma'ñytungixy milagro tungixy. E jac nijëjity ymooyb mic'ajt, jaydëbi najtzcapxixygyxixy Dios ytiy'ajt. E jac nijëjity Dios ymooyb ixpijcin etz huijy'ajtin, jaydëbi ijxcajpcixy je espíritu huidibi ca' tiy'ajt müidity, etz nañ jadu'n ijxcajpcixy je espíritu huidibi tiy'ajt müidip. E jac nijëjity Dios ymooyb je mic'ajt, jaydëbi capxcixy huingbi ayuc, etz nañ jadu'n jac nijëjity ymooyb je ixpijcin jaydëbi yajñigüejeixy je huingbi ayuc. ¹¹ Per tügpajc je Espíritu Santo huidibi ymooyb nije' nije' mibijcpidijc mic'ajt etz huinma'ñ. Ymooyb nidüg nidüg nej yi' tzocy.

Nidüg'óciy ajt nyajpaatim ma Cristo

¹² Cristo jadu'n yi' nej tüg ninicx, je ninicx ymüid canaag nax huidibi yu'cxp. Oy canaag jamüidity huidibi yu'cxp, per tügpajc ñinicx'aty. ¹³ Co nidüg nidüg ñch ajt nnibejtim, chi ñch ajt nyajpaatim nej tügpicy jäy. Com Dios yjihui'ñ ymic'ajt tügpajc yajpaady ma nidüg'óciyi ñch ajt njot nhuinma'ñ, ca' ñejity pen judíojäy ajt, o pen ca' ajt njudíojäyity; pen jäy xytumbi'ajtim o pen ndunim ngi'ndung; hue' n'ijtim nej tügpicy jäy. Dios xy'adigüyim xyjottigüyim yi' yjihui'ñ ymic'ajt nidüg'óciy ñch ajt, paady ycixpi tú'ciy nyajpaatim, com tú'ciy nmi'ijtim Dios yjihui'ñ ymic'ajt.

¹⁴ Tügpä jäy ñinicx müid canaagnax huidibi yu'cxp, huidibi midoob, huidibi ijpg. ¹⁵ Co ixypy je teczy jadu'n ymina'ñ: “Ca'p ñch ngijity, paady ca' nyajpaadyich ma je ninicx.” ¿Nej paady ycixpi ca' yajpaady ma ninicxin? ¹⁶ O co ixypy je tädzac ymina'ñ: “Ca'p nhuinity, paady ca' nyajpaadyich ma je ninicx.” ¿Nej paady ycixpi ca' yajpaady ma ninicxin? ¹⁷ Co ixypy tüg'óciy je jäy ñinicx y'oc-huin'aty, ¿ma ixypy müidity huidi midooyb? O co ixypy tüg'óciy je jäy ñinicx ytädzac'aty, ¿ma ixypy müidity huidibi jëbi müid tijaty xuugyii? ¹⁸ Dios ti pidaci jäy ytecy yhuin y'ahuac etz jac tijaty ma tügpä ninicx jadu'n nej yi' tzojcy. ¹⁹ Pen huiindi'ajty ixypy ninicx'ajtp, ¿ti ninicx ixypy jada? ²⁰ Dios ti möy nidüg nidüg jäy yci' ytecy, yhuin y'ahuac, yjijpput etz ytädzac, per tügpajc ñinicx'aty.

²¹ Ca' huaad je huiin ixypy nimäy je ci': “Ca' ñch miich nyajmayjaty.” Nañ jadu'n ca' huaad ixypy je cohujc nimay je teczy: “Ca' ñch miich nyajmayjaty.” ²² Tügpä ninicx copicy ca'pxy tijaty müid. Huidijaty je ninicx ymüid oy yjaquëxigü nej jihuiy ca' y'oy'ojadajtnity, per copicy yi'. ²³ Jadu'n ñch ajt njäy'ajtim. Muum ma ajt nninicx ca' oy n'ijxim, paady nayxojxim, jigix jac'oy quëxigip. Nañ jadu'n muum ma ajt nninicx huidi y'oymidzo'yduni, paady nyüdzim müid huit, jaydëbi oy quëxigity. ²⁴ Muum ma ajt nninicx oy n'ijxim paady ca' nyüdzim müid huit. Jadu'n Dios yaj'oyüy ajt nninicx, jigix ma ca' oy y'ijxity, nxojxim müid huit, jigix jëbi oy quëxigü. ²⁵ Jadu'n Dios yajcojy yaj'oyüy ajt nninicx tú'ciy, jigix ca'ydi ñaychiptünigixy nije' nije' huidibi yüc ma ajt nninicx. Tüg'óciy huidibi nmüid'ajtim ma ajt nninicx naybubéjtigixp miñ xyipy. ²⁶ Pen pijcp muum ma je ninicx,

tüg'óciy je ninícx jihuïy je pijcín. Pen muum ma ajt nninícx ooy capxpaady y'ity, chi tüg'óciy je ninícx jotcuyc ñajjihuiyíi.

²⁷ Miich ajcxy nidüg'óciy Cristo xyñinícx'ajtcixyp, e nidüg nidüg miich ajcxy myajpatcixy ma Cristo ñinícx. Jadu'n nidüg nidüg ñich ajt nipaady nej huídi yücxp ma tüg ninícx. ²⁸ Dios yajnibicjpy nije' nije' mibijcpidijc, jigix ajcxy yajnicxip nidüg nidüg yí' ytung. Tim jayijp yajnibijcy je apóstol ajcxy huídibi je mijtung yajnicxip. E mimetz Dios yajnibijcy nijéjity mibijcpidijc huídibi najtzcapxiyby yí' y'ayuc, je midugügpi Dios yajnibijcy nije' nije' je mibijcpidijc huídibi yajixpijcp yí' ytiy'ajt. Dios yajnibijcy mibijcpidijc nijéjity huídibi mij huinma'ñ tumb. E Dios yajnibijcy mibijcpidijc nijéjity huídibi yajtzoocp pa'mjäy. E Dios yhuin'ijx huídibi pubejtp ymigügtijc. E Dios yhuin'ijx je mibijcpidijc huídibi ane'mip je ymigügtijc. E Dios yhuin'ijx je mibijcpidijc huídibi jadip nej capxip huingbi ayuc. ²⁹ Ca' nan nidüg'óciy mibijcpidijc huídibi Dios huin'ijxyp y'apóstol'ajtcixy. Nañ ni ca' nan nidüg'óciy ajcxy najtzcapxiygyxy Dios y'ayuc. E nañ ni ca' nidüg'óciy yí' ajcxy mijhuinma'ñytungixy. ³⁰ Ca' nan nidüg'óciy mibijcpidijc huídibi Dios huin'ijxip ymüd ajcxy mic'ajt cötujc yajtzögipy pa'mjäy. Nañ jadu'n ni ca' ajcxy nidüg'óciy jajtcixy nej yajniguéjixipy huingbi ayuc. ³¹ Pijctzoogix cixyjot huinijot ma Dios je mic'ajt etz je huinma'ñ oybi. ñich miich ajcxy nyajnixihuipy tüg ñi'aa tü'aa jac'oybi.

13

Je tzojcin je ojjäy'ajtin

¹ Co ixypy ngapxyich tüg'óciy jäy ajcxy y'ayuc, etz nañ jadu'n ngapxyich ángeles ajcxy y'ayuc, e ca' ndzocyich ca' njihuïyich nmigügtijcich, jadu'n yhuimbizimiy ñich n'ayuc jadu'n nej tüg tambor o tüg platillo huídibi nigoob ooy ñe'my. ² E co ixypy najtzcapxiyich Dios y'ayuc, etz co ixypy njatyich tüg'óciy ixpijcin huídibi pinjaty nejhuïy etz huídibi pinjaty ca' nejhuïy, etz co ixypy nmijpidägyich Dios ymic'ajt, ixti jébi nyajpidigyich tüg cop, pen ca' ndzocyich njihuïyich nmigügtijcich, ca' ñich ti ndzoohuity. ³ E co ixypy nmoydayich ayoobitijc tüg'óciy tijaty nmüdich, e nañ co ixypy ngiyecyich nninícx ma jäy ajcxy co huen nöctigoydäy, e ca' ndzocyich njihuïyich nmigügtijcich, ni ti oybi ca' nbada'ñich.

⁴ Yi jäy ajcxy huídibi ooy tzocy ooy jihuïy ymigügtijc, hue' ajcxy ooy mecxtujcin müdity, nañ ooy ajcxy yung naxy yjot yhuinma'ñ. Nañ ca' ajcxy ymigüg ti yajcohuindoyii, e nañ ca' ajcxy ñaygömayii ci'm. ⁵ Yi mibijcpidijc huídibi ajcxy tzojcp jihuïyb ymigügtijc, ca' ajcxy oyñinej ycapxcixy, ca' ajcxy yci'm tzojcin adzip tungixy, nañ ni ca' ajcxy yhuindzipity, nañ ni ca' ajcxy ymigüg mijotma'tcixy. ⁶ Yi mibijcpidijc huídibi ajcxy tzojcp jihuïyb ymigügtijc ca' ajcxy yjotcuycity co pinjaty ytundigooy. Jotcuyc ajcxy co pinjaty tudägy yjäy'ajtcixip. ⁷ Co naychojcin nayjihuiyim, huin'it yajtunim mecxtujcin, huin'it nmibijctayim huídijaty tiy'ajtip, huin'it nmibijctaayim co tüg'óciy tijaty oy yhuimbizimipy, huin'it nmecxtujctayim tüg'óciy tzaachypi ayo'n.

⁸ Yi naychojcin nayjihuiyim ca' yí' yciixipy ytigoyipy ni mina. Minip je xii tiempo ma ca' y'ocyaj'ijxnipy y'ocajmidoonipy Dios ycapxy y'ayuc huídi jäy ajcxy ñajtzcapxiygyxyp, nañ ni ycajajmidoohuipy pin huingbi ayuc capxp, ni ycajajtzocy anajty ti diy'ajt. ⁹ Com ca' yca'pxity je ixpijcin huídibi ñich ajt nmüd'ajtim. Nañ jadu'n ca' yca'pxity je Dios y'ayuc huídibi ñich ajt nnajtzcapxiyim.

¹⁰⁻¹¹ Per co anajty nmüd'ajtim ca'pxy Dios y'ayuc ytiy'ajt, chi yciixipy ytigoyipy je ayuc huídibi nmüd'ajtim cham huídibi ca' yca'pxity. Co nmutz'ajtyich nbi'c'anäg'ajtyich, jadu'n anajty ngapxyich nmüdyägyich n'iyiyich nejtyin pi'c'anäcin. Per co oy nmij'anäciyñich, chi n'ixmajtnich je pi'c'anäg'atypi huinma'ñ. ¹² Nañ tim jadu'n nyajnajxim jadachambi xii tiempo ca' n'ixpijctaayim, ca' nhuinjihuiydaayim Dios y'ayuc ytiy'ajt. Jadu'n nipaady nej jihuïy nay'a'ijxnajxim ma tüg iix, huídibi ti chijxni

ti yjibiciiyñi. Co anajty Jesús yhuimbity jadüg'oc, huin'it huädz nhuinjihuiydaayim Dios y'ayuc ytiy'ajt, com naybadaanim müid Jesús ahuin ajjip. Jadachambi magama nhuinjihuiyich. Per co nnaybadiiybich müid Jesús, huin'it nhuinjihuiydähuibich nej Dios y'ixpijcin müidity, tim jadu'n nej Dios nehuiydäy nej ich n'ixpijcin nmüidity. ¹³ Nmibigaanim Cristo huinixii huinítiempo, ca' n'ixmadzaanim nmibijcin ni mina. Nañ njjip'ijxim co oybi nbadaanim ma Dios huinixii huinítiempo. Nañ jadu'n ndzojcin njihuiyim migügtijc huinixii huinítiempo. Hue' jac nigü copicyip co naychojcin nayjihuiyim ca'ydi jac ti.

14

Co huingbi ayuc yajcapxy

¹ Naychójcigixy nayjihuiygixy miñ xyipy. Mijottigooygixy nej mbaatcixy Dios yjihuiñ ymic'ajt canaagnax. Yi Dios yjihuiñ ymic'ajt huidibi jac'oybi, yi' je' yejcpy mic'ajt jaydëbi mnajtzcapxyygixy Dios y'ayuc ytiy'ajt. ² Yi jäy ajcxy huidibi Dios ymic'ajt müid jaydëbi capxy huing ayuc, hue' ajcxy ymigapxyp Dios, e ca' nan jäy, com yi jäy ajcxy ca' huinjihuiygixy je' ajcxy y'ayuc huidibi capxp. Je Espíritu Santo yejcp je ayuc ma je huidibi capxp. Jadu'n nipaady nej jihuiy ameech je' ycapxy. ³ Pinjaty najtzcapxyyb Dios ytiy'ajt, yi' ycapxhuäcxyp Dios y'ayuc ma yi jäy ajcxy, jaydëbi yujcpedipy ajcxy y'ixpijcin ma Dios y'ayuc, nañ jadu'n jaydëbi ajcxy yjotmicpigipy etz yjotcugüygixipy. ⁴ Pinjaty capxp huing ayuc, hue' ci'm naybubedyii. Pinjaty najtzcapxyyb Dios y'ayuc ma yci'm ayuc, hue' ypubejtyp tüg'óciy yi mibijcpidijc.

⁵ Huaad co ixypy nidüg'óciy miich ajcxy mgapxcixy huingbi ayuc. Per jac nigü oy co miich ajcxy mnajtzcapxyygixy Dios ytiy'ajt, ca'ydi co mgapxcixy huingbi ayuc. Pinjaty huidibi najtzcapxyyb Dios y'ayuc, jac nigü oy tuñ, ca'ydi jac pinjaty huidibi capxy huingbi ayuc, pen ca' pinjaty capxticxipy je huingbi y'ayuc, jigix je mibijcpidijc jotcuje'ajtin pátcixip. ⁶ Migügtijc ajcxy, co ixypy nnicxyich ma miich ajcxy, e ngapxyich ixypy huingbi ayuc, ¿ti oybi miich ajcxy mbadamyb ma ich? Pen ca' anajty ti pubejtin nduñich ma miich ajcxy, pen ca' nyajnejhuiygixy Dios ytiy'ajt jemybi, pen ca' nyaj'ixpijccixy Dios ytiy'ajt o pen ca' nnajtzcapxyich Dios y'ayuc, o pen ca' nyecyich ixpijcin.

⁷ Tzoc ocpidaacim tüg'ijxpejt ma je xüxy, jadu'n nej je flauti o je arpa. Pen ca' nmido'mbijcim je nota je tono nidüg'nidüg, ca' nmido'mbijcim ti pieza ti xüxy yajxuxp o yajcoob. ⁸ Nañ jadu'n co soldados ajcxy chiptunaangixy, pen je trompeta ca' huädz yxüxy, ca' ni tüg' soldado ñayñi'ixihuañyii ma je tzip ytunañyii yjadañyii. ⁹ Nañ tim jadu'n müid miich ajcxy, pen mgapxcixyp huingbi ayuc huidibi ca' pin huinjihuiy, ¿nej yajnejhuihupy ti miich anajty mgapxyp? Jadu'n je' anajty yhuimbizimni nej nigoob mdim'ixmiydaaccixy. ¹⁰ Janch co ji yajpaady canaagnax ayuc ya naaxhuiñ ac tigachjaty. Etz janch co nidüg'nidüg' jäy ayuc müidity e ci'm je' ajcxy huinjihuiygixy. ¹¹ Per pen ca' nhuinjihuiyich je ayuc huidibi jäy xyajmigapxpich jadu'n ich yi' nyajnaxyich nej agatz. O pen ca', yi' xyajnaxpich nej agatz. ¹² Paady miich ajcxy co ooy mnijot'ajtcixy Dios yjihuiñ ymic'ajt canaagnax, yajtungix je mic'ajt huidibi pubedam yi mibijcpidijc, jigix yujcpedipy ajcxy ymibijcin etz y'ixpijcin ma Dios y'ayuc.

¹³ Paady pinjaty jajtp nej capxip huingbi ayuc, copicy co Dios mibijctzohupy co mic'ajt ymöhuiib, jaydëbi yajnigüey je ayuc huidibi ycapxamyb. ¹⁴ Pen nmibijctzooybich Dios müid huingbi ayuc, nmibijctzooybich müid ich n'espíritu, per ich nhuinmañ ca' ti jäygidaacin paady. ¹⁵ ¿Ti huaad ndunipyich? Pues copicy nmibijctzooyich n'ojadatyich Dios müid ich njihuiñich, e nañ jadu'n nmibijctzooyich müid ich nhuinmañich. N'ibadaamyich ngapxpadaamyich Dios müid ich njihuiñich etz müid ich nhuinmañich. ¹⁶ Com pen miich mhuin'igixyp mhuingapxtaaccixyp Dios müid yi mjihuiñ, je migüg' huidibi amidoo'ijtp ca' je' huinjihuiy je huing ayuc huidibi mgapxyp, e ca' jëbi ymina'nip

“jadu'n jada, Amén.” Com ca' yi' huinjihuïy ti yi' mgapxyp. ¹⁷ Ca' yjeczyty co oyjaty ayuc ti myajtuñ co ti myajnaxy Dioscojuyip ma Dios, per yi mmügüg huidibi ca' huinjihuïy miich m'ayuc ca' yi' ti jäygidaacin paady. ¹⁸ Nyajnajxypich Dioscojuyip ma Dios co nigü njatyich nej ngápxiyich huingbi ayuc, ca'ydi miich ajcxy nidüg'óciy. ¹⁹ Per co nyajpaadyich ma je mibijcpidijc ti ñayyöymújcigixy, jac'oy co ngapxyich migoox ayuc huidibi mibijcpidijc yhuinjihuïygixyp, ca'ydi co ngápxiyich majc mil huingbi ayuc huidibi ca' pin huinjihuïy.

²⁰ Migügtijc ajcxy, ca' ajcxy mmüd'adipy mhuinma'ñ, jadu'n nej pi'ctijc yhuinma'ñ muidity. Ma yi jibicpi huinma'ñ ymiñ naybidägi jadu'n nej ma'xungdijc huidibi ca' ti jibic huinma'ñ huinjihuïygixy. Müd'adip miich ajcxy oyjot oyhuinma'ñ jadu'n nej mij'anäctijc huidibi yhuinma'ñ ti ymejtznä ti yca'pxni. ²¹ Jaybety y'ity ma Dios ycötujcin necy ma Dios jadu'n ymina'ñ: “Nmigapxaamybich je may Israel jäy müd huingbi ayuc, e huingbi jäy najtzcapxihuamb ich n'ayuc ma yi' ajcxy, per ni jadu'n ajcxy xycatuna'ñich cuendi.” Jadu'n je Huindzin Dios ymina'ñ. ²² Paady je' je Dios ymic'ajt huidibi yajcapxp huingbi ayuc, yejcp Dios ymic'ajt ijxpejt ma yi jäy ajcxy huidibi ca' mibijccixy Dios. Per je Dios ymic'ajt huidibi jäy müd co najtzcapxiy Dios ytiy'ajt, yejcp ijxpejt ma yi mibijcpidijc, ca' yecy ijxpejt ma yi' ajcxy huidibi ca' ymibijccixy. ²³ Ca' yjeczyty jadu'n yjadip, co anajty ti ñayyöymújcigixy je mibijcpidijc, e nidüg'óciy anajty ajcxy ytigüygixy capxpi müd huingbi ayuc huidibi ca' pin huinjihuïy, chi ytigühuip ma ajcxy ñayyöymugyii nijëjity huidibi ca' ymibijccixy. ¿Ca' yi' ajcxy ymina'ngixyipy co je mibijcpidijc anajty ajcxy ti y'ahuimbijtcixy loci? ²⁴ Pen nidüg'óciy je mibijcpidijc ma je nayyöymujctac najtzcapxiygixy Dios ytiy'ajt müd yci'm ayuc, e co ytigühuipy pinjaty huidibi ca' ymibicy, e co yi' midohuipy Dios y'ayuc yjihühuamyb ypocy. E ci'm huinmayip nej anajty ti ytundigooy müd Dios co midohuipy co nidüg'óciy mibijcpidijc anajty najtzcapxiygixy Dios y'ayuc. ²⁵ E Dios y'ayuc yajnejhuïhuib nej anajty ameech ti ytundigooy jotjoty huinma'ñjoty. E chi jada' ycojxtinay'ihuïhuipy, e ojadadipy Dios, e nañ jadu'n ymina'nip co janch Dios miich ajcxy xymüd'ijtp.

Tungixy tüg'óciy müd tudägy'ajt etz yajxon

²⁶ Migügtijc ajcxy, ¿ti huaad mdúngixipy? Co mnayyöymújcigixipy, nijëjity miich ajcxy mhuin'ixipy tüg salmo, tüg ayuc huidibi yaj'ixpigamyb, tüg tiy'ajt huidibi Dios ti xyajnejhuïygixy, etz capxip huingbi ayuc, etz capxticxipy nej yhuimbidezimyb je huingbi ayuc. Tüg'óciy jadu'n tungix, jaydëbi ajcxy jäygidägiipy etz yujcpedipy ajcxy ymibijcin huidibi ti ñayyöymújcigixy. ²⁷ Pinjaty capxamb ma je naymujctac müd huingbi ayuc, huen capxy metz o tugüg jäy je'yi, e huindüg padüg huen capxcixy, ca' y'animayity. E pinjaty capxticxamb je' je' yajnigüeji nej yhuimbidezimyb je ayuc tübi capxcixy. ²⁸ Pen ca' yajpaady ma je nayyöymujctac tüg jäy huidibi capxticxip je huingbi ayuc, jac'oy co ca' ni ti yajcapxipy müd huingbi ayuc, jac'oy co migapxip Dios jotjoty huinma'ñjoty, e ca' capxip mayjäyjoty. ²⁹ Nañ jadu'n mayjäyjoty jëbi metz o tugüg jäy najtzcapxihuip Dios ytiy'ajt, e yi jacjadyii mibijcpidijc huidibi amido'ijtp, jëbi ajcxy huinmay pen janch Dios je' ytiy'ajt huidibi ajcxy ti najtzcapxiy, o pen ca' je' Dios tiy'ajt'adyii. ³⁰ Pen jim mayjäyjoty jadüg jäy Dios yajnejhuïyii nej ycapxip, nej tiy'ajt najtzcapxihuipy, huen je jäy y'amonipy huidibi anajty jayijp ti ytigü najtxcapxiy Dios y'ayuc ytiy'ajt. ³¹ Jëbi miich ajcxy nidüg'óciy mnajtzcapxiygixy Dios ytiy'ajt huindüg padüg, jaydëbi tüg'óciy je mibijcpidijc ixpijccixy Dios ytiy'ajt, e nañ jadu'n jëbi nidüg'óciy yjotmicpijccixipy. ³² Copicy co yi' ajcxy huidibi najtzcapxiyb Dios ytiy'ajt, huen ajcxy nay'ané'migix ci'm, e huen capxcixy mina y'ahuaatzciy. ³³ Dios ca' xyajmidzojcin nicx nhuinma'ñyidigooyim, Dios chojcpy co servicio ndunim agujc jotcuje.

³⁴ Jadu'n nidüg'óciy mibijcpidijc ma canaag cajp yminaangixy co ca' huaad töxyjäydijc ycapxcixy serviciojoty, com Dios ti capx'aducy co ajcxy ca' ycapxipy serviciojoty. Copicy

co je yëydijc ajcxy ane'mip je servicio, e ca' töxyjäydijc ajcxy huaad ane'mgixy je servicio, com jadu'n Dios ycötujcin ymina'ñ. ³⁵ Pen ñejhuñhuamyb ajcxy töxyjäydijc ti ayuc ti t'y'ajt, jëbi ajcxy ñiyëydijc amidoogixy co anajty ajcxy yhuimbijtcixni ma ytijc, com tzo'ydu'n yejcp töxyjäydijc ajcxy co ycapxcixy serviciojoty.

³⁶ Miich ajcxy hue' mdzachnaybidáacigixy nej jihuñy miich ajcxy jayijp tim ne-jhuñyigixy Dios y'ayuc, ca'ydi jac pin. Miich ajcxy mnaybidáacigixy jadu'n nej jihuñy jimyí jadu'n yajcapxhuäcxy Dios y'ayuc, ca' yjacmaajity. ³⁷ Pen jim pinjaty ma miich ajcxy huídibi naybidaacip nejjihuñy Dios ti ymöyii mic'ajt nej jëbi najtzcapxihuipy Dios yt'y'ajt, o ti yhuinma'ñymöyii je Espíritu Santo tijaty t'y'ajt, hue' copicy nañ jadu'n yñejhuñhuipy co je ayuc huídibi ñch miich ajcxy nyajnijayiyb, Dios jada y'ane'min ycötujcin. ³⁸ Pinjaty jim ma miich ajcxy huídibi ca' mijpidäga'ñ etz ni ca' cöbiga'ñ je ayuc t'y'ajt huídibi Dios ti xyaj'ane'myich, Dios ca' cöbiga'ñ yijadu'mbi jäy.

³⁹ Com ñch jada ayuc nyaj'ixpijcpich, paady cham nimaaybich nmigügtijcich, co huen najtzogiiygixy nej mnajtzcapxiygixy Dios yt'y'ajt, e nañ jadu'n ca' mgapx'adúccixipy yí' ajcxy huídibi capxamb huingbi ayuc. ⁴⁰ Hue' janchtiy tüg'óciy tungixy yajxon, etz müd tudägy'ajt, ca' oyñinej mdúngixipy.

15

Co Cristo yjugypijcy jadüg'oc co y'o'cy

¹ Jadügnax, migügtijc ajcxy, ndzojcpich co miich ajcxy mjäyméjtzcixipy je Jesucristo y'ayuc yt'y'ajt huídibi ti ngapxhuäcxyich ma miich ajcxy. Je' je' je ayuc t'y'ajt huídibi miich ajcxy ti mgöbijccixy etz huídí ajcxy tudägy mibijccixyp. ² Jëbi ajcxy m'alma ñídzögipy, pen mguydumyby ajcxy ñch n'ayuc huídibi ngapxhuäcxyich, e pen ca' anajty ti mmibijccixy.

³ Ti ngapxnaxyich ma miich ajcxy je ayuc huídibi Dios jayijp ti xymöyich, etz ti nyajnimaaigyxy huídibi jaccopicyip co Cristo y'o'cy müd ajt nbocy ycixpi, jadu'n nej Dios y'ayuc ymina'ñ huídibi jaybety ijtp ma yí' ñecy. ⁴ Chi ajcxy yajnaxtigiiy Jesús, e codugiig xii yí' yjugypijcy jadüg'oc jadu'n nej Dios y'ayuc ymina'ñ huídibi jaybety ijtp. ⁵ E co je Cristo yjugypijcy, chi ñayguëxíci jayijp ma Pedro, e jac'axam ñayguëxíci ma yí' jacjadyii ni majmetzpi apóstol ajcxy. ⁶ Jahueeni xii tiempo yjacnicxy co je Cristo oy ñayguëxígyii nañ jadu'n ma migox nimigo'pxnaxy mibijcpidijc tügpi tiempo. E may yijadu'mbi mibijcpidijc jacjagy'ajtni chambaad, etz naagity ajcxy ti y'óccixni. ⁷ Jahueeni xii tiempo yjacnicxy co Cristo ñayguëxíci ma Jacobo, etz nañ jadu'n ma nidüg'óciy yí' y'apóstol ajcxy.

⁸ Jac tim axam ñayguëxíci je Cristo nañ jadu'n ma ñch. Jacjayijp Jesús huin'ijxy yí' jacjadyii apóstol ajcxy, etz jac'axam ñch xyhuin'ijxyich. Jadu'n ñch nipaady nej tüg jäy huídibi ooy ti ñinajxni je tiempo co ti yma'xung'aty. ⁹ Jaccapxpaady yí' jacjadyii Jesús y'apóstol ajcxy ca'ydi ñch. Nañ jadu'n ni ca' ñch xypaady co jäy ajcxy xytíjibich Jesús y'apóstol, müd co ooy ti n'ixhuidityich ti nbahuidityich Dios yjäy ajcxy. ¹⁰ ñch nje'ajtpich nej nje'atyich müd co Dios may'ajt müd ñch tuñ. Je mijmay'ajt je mij'oy'ajt huídibi Dios ti tuñ müd ñch, ca' ñaadigí'aty, ti y'oybidzimyby. Nigi mictägy ti nduñich ma Dios ytung, ca'ydi jacpinjaty. Ca' nan co ñch ndzachmadägyich ma Dios ytung. Hue' Dios oy xymüd'ityich, etz ooy may'ajt tuñ müd ñch. ¹¹ Paady pen ti miich ajcxy mbaady Dios yt'y'ajt ma ñch, o ma yí' jacjadyii apóstol ajcxy, ca' ñejity. Je' je' je Cristo y'ayuc huídibi ñch ajcxy ngapxhuäcxyich, e nañ Cristo yí' y'ayuc tibi mmibijccixy.

Co öcypí ajcxy yjugypigipy ajcxy jadüg'oc

¹² Per pen ñch ajcxy ayuc ngapxhuäcxyich co je Cristo yjugypijcy jadüg'oc co y'o'cy, ¿na'amy co nijëjity miich ajcxy minangixy co yí' jäy ajcxy tibi y'o'ccixy ca' ajcxy yjugypigaangixy jadüg'oc? ¹³ Pues pen janch ca' yjugypigaangixy tibi y'o'cy, nañ jadu'n ni Cristo ca' ycajyugypijcy jadüg'oc. ¹⁴ Co ixypy yjanchity co Cristo ca' yjugypijcy,

nañ tim jadu'n je ayuc huídibi ngapxhuäcxpich ca' ti mic'ajt ixyipy müdity. E nañ jadu'n müch ajcxy mmibijcin ca' ixyipy chobaady. ¹⁵ Pen tiy'ajt ixyipy co je öcpi ca' yjugypigaangixy, huin'it je Dios y'ayuc huídibi ngapxhuäcxpich ixyipy yhuimbizimyb aní. Com ngapxhuäcxpich co Dios yajjugypijcy Cristo co y'o'cy, paady pen tiy'ajt ixyipy co pinjaty tibi y'o'ccixy ca' yjugypijcy. Nañ jadu'n ixyipy ca' ytiy'ajtiy co Dios yjugypijcy Cristo. ¹⁶ Pen je öcpidijc ajcxy ca' jugypijccixy etz ca' ajcxy yjugypigaangixy jadüg'oc, nañ jadu'n ni je Cristo ca' ycajugypijcy jadüg'oc co y'o'cy. ¹⁷ Co je Cristo ca' ycajugypijcy jadüg'oc co y'o'cy, chi müch ajcxy mmibijcin ixyipy ca' choobaady. E ca' müch ixyipy ajcxy Dios mbocy xyhuinmecxi. ¹⁸ E pen janch tiy'ajt ixyipy co je Cristo ca' ycajugypijcy, huin'it je mibijcpidijc tibi y'o'ccixy tigoyaangixy y'alma. ¹⁹ Pen janch tiy'ajt ixyipy co nmibijcim Cristo jeyi ma jadachambi tzinaayin ya naaxhuiñ, ca' jac ni ti ixyipy njijp'ijxim co n'o'cim. Jadu'n ich ajt nipaady nej locijäy, e jäy ajcxy nigí xyñixicim xyajxicim, ca' ydi jac ni pin.

²⁰ Per janch co Cristo yjugypijcy jadüg'oc co y'o'cy, je Cristo yi' je' je jayijp jäy huídibi jugypijc jadüg'oc. Co je Cristo yjugypijcy, chi ñicxy jadüg'oc ma Dios yajpaady, e nañ jadu'n müd yi' ycixpi mayjäy yjugypiga'ñ ajcxy co anajty ti y'öccixy, e yñicxaangixy ma Dios yajpaady. ²¹ Com müd tüg jäy, je Adán, chondacy yi' o'cin ya naaxhuiñ. Nañ tim jadu'n müd tüg jäy, je Cristo, chondacy je jugypijcin co jäy y'o'ccixy. ²² Müd jada ycixpi co Adán ytundigooy oga'n, paady nidüg'óciy jäy patcixy yi' o'cin. Müd jada ycixpi co Cristo yjugypijcy jadüg'oc co y'o'cy, paady nidüg'óciy jäy ajcxy yjugypigaangixy jadüg'oc co anajty ti y'öccixy. ²³ Nidüg nidüg jäy yjugypiga'ñ jadüg'oc jadu'n nej anajty ñigueegiyii. Cristo ti yjayijp'aty co yjugypijcy. Tüg'óciy yi' jacjadyii jäy ajcxy huídibi mijncxpejtcixp Cristo, yi' ajcxy jugypigamb jadüg'oc co anajty Cristo yhuimbity ya naaxhuiñ. ²⁴ Co anajty je Cristo yhuimbity ya naaxhuiñ, chi ycixipy ytigoyipy je naaxhuiñybi. Cristo yajtigoyamyb tüg'óciy naaxhuiñyjäy y'ane'min, tüg'óciy naaxhuiñyjäy ycótujcin, etz tüg'óciy naaxhuiñyjäy ymic'ajt. Jesucristo ypijctähuaanip tüg'óciy naaxhuiñyjäy ajcxy y'ane'min, e pidactähuiipy ma Dios y'ane'min, e Dios Teedy je' je' ajttähuiñ. ²⁵ E tim copicy co je Cristo y'ane'mdähuaamyb tüg'óciy, ixti cooni Dios anajty ti mimadactäy tüg'óciy Cristo ymidzip, e ti pidactäy anajty ma Cristo y'ane'min. ²⁶ Jesús yajcixamyb yajtigoyamyb jac'axam je o'cin, ca' ni pin yjac'öcnipy. ²⁷ Com Dios ymimadactähuiip tüg'óciy je Cristo ymidzip, e pidactähuiip ma je Cristo y'ane'min. Per co Dios y'ayuc huídibi jaybety ijtp ymina'ñ co je Cristo ti mimadactäy tüg'óciy, ca' nan hue' je' yajhuinjihuüy co Cristo ti mimadägy Dios. Com Dios yi' je' huídibi ti mimadactäy, e ti pidactäy ma Cristo y'ane'min. ²⁸ Co anajty Dios mimadactay tüg'óciy pinjaty etz tijaty huídibi mic'ajt müd, e co anajty pidactay ma je Cristo y'ane'min, chi je Dios y'ung ypidactähuiipy yi' y'ane'min ma Dios Teedy, etz ane'my yhuima'ñ ma Dios Teedy, je huídibi anajty ti mimadactay. Jadu'n Jesucristo tuna'ñ, jigix jébi Dios müd'ajttäy tüg'óciy mic'ajt etz ane'm'ajt.

²⁹ Pen ca' yjadu'nity, ¿na'amy co mdzachñibejtcixy co öcpi tzachcodinaangixy? Co ixyipy ca' pin yjugypiga'ñ jadüg'oc co anajty ti y'o'cy, ¿na'amy co jäy ñibejtcixy müd öcpi ycixpi?

³⁰ ¿E ti ycixpi co ich ajcxy nyajpatcixy ayo'nduum jabom jabom? ³¹ Migügtijc ajcxy, janch janch ich müch ajcxy nimaangixy co ooy njäygidägyich müch ajcxy. Müd co mmibijccixy je nHuindzin Jesucristo, paady ycixpi ich müch ajcxy nimaangixy co jabom jabom nyajpaadyich öcjip'am. ³² Minaambich jadu'n co ooy nhuindinäy njijptinäyich nmidzip ya Efeso. Tim jadu'n nipaady nej jibic iyujc ahua'n iyujc nhuindinäy njijptinäyich. Pen ca' yjanchity co yi' öcpi ajcxy yjugypigipy jadüg'oc, naadig'ajtp ixyipy co ich ayo'n jabom jabom nhuindinäy njijptinäyich. Nig oy co ixyipy nyajtüyöyim jadu'n nej ayuc y'ityin: "Tzoc caayim uucim, agujc'ajtim jotcujc'ajtim, com jabom huixtic njugy'ajtin ycixaanim müd yi' o'cin."

³³ Ca' mnayyéjçigixy co pñjaty xyhuin'íngixipy. Jadu'n yjadipy nej y'ayuc y'ityin: "Yi migügtjç ajcxy huídibi jibicjot jibic-huinma'ñ mñid, yajtigooyb ajcxy je oyjot oy-huinma'ñ." ³⁴ Ixmajtzçix jibicjot jibic-huinma'ñ etz tzinaaygix tudägy ca' mbocytungixy. Nijëjity miich ajcxy ca' mnejhuüygixy Dios ytiy'ajt. Jadu'n nmína'ñich, jigix ajcxy mdzo'ydu'n mjihuüygixipy.

Nej ajcxy yi ögypi yjugypigipy ajcxy jadüg'oc

³⁵ Ycadimjeyity co nijëjity miich ajcxy xy'amídohuipyich: "¿Ma mic'ajt pátcixipy je o'cpi ajcxy co jëbi yjugypijçcixy jadüg'oc? ¿Huídibi ninícx ajcxy ymi'idamyb?" ³⁶ Ca' miich ajcxy ti mhuinjihuüygixy. Ca' mnejhuüygixy co je moc tím huídibi mniipcixyp ca' ymuxe'ñ ixti cooni anajty jayijp ti ypüch. ³⁷ Ca' miich ajcxy mniipcixy je mocquipy. Hue' miich ajcxy mniipcixyp je tím moc o jacjadyii huingbi tím. ³⁸ E co je tím ymuxy, chi Dios möy je ñinícx, tím jadu'n nej Dios jayijp ti huinmay ti tzocy. E Dios nije' nije' je tím möy je ñinícx tigachjaty. ³⁹ Canaagnax ninícx yajpaady ya naaxhuiñ, ca' ajcxy ytügnaxity. Tigach yi jäy ajcxy mñidity ñinícx, tigachjaty iyujc ajcxy mñidity ñinícx, nañ tigachjaty joon ajcxy mñidity ñinícx, e nañ jadu'n tigachjaty acx ajcxy mñidity ñinícx. ⁴⁰ Yi tzajpjoty tzinaayb ajcxy tigachjaty mñidity ñinícx, nañ jadu'n huídibi ajcxy tzinaayb naaxhuiñ tigachjaty mñidity ñinícx. Yi tzajpjoty tzinaayb ajcxy ñinícx mñid tigachjaty y'oy'ajtin, ca'ydi jadu'n nej yi naaxhuiñ tzinaayb ajcxy y'oy'ajtin. ⁴¹ Yi xii ytücxin yjajin ca' ñaybadyii mñid po' ytücxin yjajin, nañ tím jadu'n je po' ytücxin yjajin ca' ñaybadyii mñid madza' ytücxin yjajin. Etz nije' nije' madza' mñidity ytücxin ca' ñaybadyii mñid jacjadyii madza' ytücxin yjajin. ⁴² Nañ tím jadu'n yjada'ñ mñid yi jäy ajcxy tiibi y'o'ccixy co ajcxy yjugypijçcixy jadüg'oc. Jäy ajcxy yajnaxtigiy je öcpi naaxnícx huídibi yhuindigoopy, e yjugypigipy jadüg'oc mñid tüg ñinícx jemybi huídibi ca' yhuindigoya'ñ nimína. ⁴³ Je öcpi ñaaxnícx co ñaaxtigiy, ca' ti oy'ajtin mñidity, e co yjugypijçcixy jadüg'oc ymñid y'oy'ajtin. Je öcpi ñaaxnícx co ñaaxtigiy, ca' ti mic'ajt mñidity e chi yjugypijçcixy mic'ajt mñid. ⁴⁴ Co je öcpi ñaaxtigiy, hue' yjugypijçcixy, mñid jemybi ninícx ca'p yaj'ixy. Pen ji yajpaady ninícx huídibi Dios ti yajcojy mñid naax, nañ tím jadu'n ji yajpaady ninícx huídibi Dios yajcojpy mñid yjihui'ñ ymic'ajt ca'p yaj'ixy.

⁴⁵ Jadu'n jaybety y'ity ma Dios ñecy ma jadu'n ymína'ñ: "Je jayijp Adán ymñid anajty jugy'ajtin." Je axambi Adán (je' je' je Cristo) je' tüg espíritu huídibi jugy'ajt yejçp. ⁴⁶ Je huídibi Dios yjihui'ñ ymic'ajt mñid ca' je' yjayijp'ajty, je' jayijp'ajt huídibi Dios yajcoj mñid naax; jac'axam je' huídibi Dios yjihui'ñ ymic'ajt mñid, je' je' je Cristo. ⁴⁷ Je jayijpi jäy huídibi Dios yaj'oyiy, hue' je' yaj'oyiy mñid naax (e yajpaady ya naaxhuiñ). Je mimetzpi jäy huídibi Dios yaj'oyiy, ñich ajt nHuindzin Jesucristo, hue' je' choon tzajpjoty. ⁴⁸ Je jäy ajcxy huídibi tzinaayb ya naaxhuiñ, yi' ajcxy ñinícx tú'ciy ñaybadyii mñid Adán ñinícx huídibi Dios yaj'oyiy mñid naax. Yi jäy ajcxy huídibi tzinähuamb tzajpjoty, hue' ajcxy ñinícx tú'ciy ñaybada'ñiyii mñid je Cristo ñinícx huídibi tzinaayb tzajpjoty. ⁴⁹ Jadu'n nej ñich ajt, tügñax nguëxícim mñid Adán huídibi Dios yaj'oyiy mñid naax. Nañ tím jadu'n tügñax nguëxigaanim mñid je Cristo huídibi tzinaayb tzajpjoty.

⁵⁰ Migügtjç ajcxy, hue' nnimähuaangixy co je ninícx huídibi mñid yxixy etz yñi'py ca' yi' y'ida'ñ ma Dios y'ane'my. Je ninícx huídibi çixamb tigoyamb ca' pada'ñ it lugar ma yi' ñinícx ajcxy ity huídibi ca' ycixa'ñ ytigoya'ñ. ⁵¹ Tungix cuendi jada ayuc, nyaj'ixpigaamybich miich ajcxy tüg tiy'ajt huídibi ca' pñ huinjihuüy. Ca' nan nidüg'ócixy ñich ajt n'ögaanim, per nidüg'ócixy ñich ajt Dios nninícx xyajtigadzaanim. ⁵² Co anajty Dios yajxüxy yi' ytrompeta, je huídibi anajty cogixiyñip, chi çixipy je naaxhuiñybi. Chi Dios xyajtigadzaanim ajt nninícx tím tzojcyi, tím tüg jaxigy tüg huinmüpxy. Dios yajxüxamyb yi' ytrompeta, e je jäy tiibi ajcxy y'öccixy jugypigip ajcxy jadüg'oc, e ni ca' mína ajcxy y'öccixnipy. E ñich ajt huídibi jacjugy'ajtni Dios ñich ajt xyajtigadzaanim nninícx. ⁵³ Com ñich ajt nninícx huídibi ögam, huídibi huen tigoyamb, copicy ytigadzip, e nmñid'adaanim ninícx huídibi ca' öga'ñ ca' yhuindigoya'ñ. ⁵⁴ Co anajty ytigajtzim

ajt nninïcx huïdibi cïxamb huïndïgoyamb, nmïid'ajtm anajty jemybi ninïcx huïdibi ca' ycïxa'ñ yhuïndïgoya'ñ nimïna. Co anajty ytïgajtzim ajt nninïcx huïdibi ögam, e nmïid'ajtm jemybi ninïcx huïdibi ca' y'öga'ñ, huïn'it cuydunïpy Dios y'ayuc huïdibi jaybety ijtp huïdibi jadu'n ymïnamb: "Co anajty ajt nHuïndzin Dios mïmadägy yi o'cïn, huïn'it cödïgooyñïp je o'cïn (ca' jacpïn y'oc'o'cnïp). ⁵⁵ ¿Ma yi o'cïn ocjacpada'ñ mic'ajt co tijy xy'ocjactzaachytunaanim? ¿Ma yi o'cïn ocjacpada'ñ mic'ajt co tijy xy'ocmïmadägaanim?" ⁵⁶ Mïid co ti ndundïgooyim, paady ycïxp o'cïn nbaatim. Mïid co ca' ti nguydundaayim Dios ycötujcïn, paady ycïxp o'cïn nbaatim. ⁵⁷ Per nyajnajxim Dioscojuyip ma Dios co mïjmay'ajt ti tuuñ mïid ïch ajt ycïxpi, e ti nmïmadaacim yi o'cïn co ajt nHuïndzin Jesucristo y'o'cy mïid ajt nbocy ycïxpi.

⁵⁸ Paady ycïxp, miich ajcxy mïgügtïjc huïdibi ooy ndzocy njïhuïyïch tiydudägy mmïbijccïx, ca' m'ixtigïhuäccïxy ma mmïbijcïn, ca' m'ixmajtzcïxy yi mmïbijcïn, ca' ajcxy mjotmetzcïygyxy. Tungïx jabom jabom ma Dios ytung agujc jotcujc, com mne-jhuïygyxyp co ca' ñaadïgï'aty ajcxy mdung ma ajt nHuïndzin Jesucristo ytung.

16

Je cuejtïn mïid je hermano ajcxy ycïxpi

¹ Jadu'n nej ymiñ yi meeñ huïdibi miich ajcxy myajmujccïxyp mïid je mïbijcpïdïjc ycïxpi huïdibi jim Jerusalén. Cuydungïx je tiy'ajt huïdibi ti nyaj'ané'mgïxyïch yi mïbijcpïdïjc huïdibi canaagpïcy yajpatp jim Galacia. ² Naag naag domingo, je jayïjpi xii ma je semana y'ixtigïy nidüg nidüg miich ajcxy mbïdägïp abïcy hueeni pi'cmeeni, jadu'n nej anajty ii ti mbaatcïxy. Je pi'cmeeni huïdibi anajty ti myajmujccïxy mgüend'ajtcïxïpy ooy, jigïx co ïch jim njädïp ma miich ajcxy, ca' ycopïcyïty meeñ myajmujcïxïpy. ³ E co anajty jim nmechïch ma miich ajcxy, miich ajcxy myajnïbigïpy nijëjïty mïgügtïjc huïdibi nïcxïp jim Jerusalén. E ïch nguexïpyïch jada mïgügtïjc jim Jerusalén mïid tüg necy etz mïid je meeñ huïdibi anajty miich ajcxy ti myajmujccïxy, jaydëbi yajcïdïgïhuïp je mïbijcpïdïjc jim Jerusalén. ⁴ E pen ooy ytïmycopïcyïty co ïch nañ jadu'n nnïcxïbïch jim Jerusalén, jëbi ajcxy ñïcxïy mïid ïch.

Pablo huïnmay co nïcxa'ñ Macedonia

⁵ Co anajty ndübïcyïch nnïcxaambïch ma miich ajcxy, jayïjpi naxïhua'ñïch Macedonia naaxjot, com copïcy jim Macedonia naxïhua'ñïch. ⁶ Ca' jecyïty co nïcxïy nhuï'myïch ma miich ajcxy jecy jecy. Ca' yjecyïty co nyajnaxïpyïch tüg'ócïy je tïchypoï tiempo mïid miich ajcxy. Co anajty ndzooñïch jadüg'oc ma miich ajcxy, nnïcxïyïch anajty muumjaty, miich ajcxy xytüjïjphuhuïhuïbïch ma ïch anajty nnïcxa'ñïch. ⁷ Ca' nan tzojccïxy n'ida'ñïch mïid miich ajcxy, hue' jatytimy huäcxïbaambïch ma miich ajcxy jecy jecy, pen ïch ajt nHuïndzin Jesús jadu'n tzojcp. ⁸ Per njac-huäcxïbaambïch ya Efeso ixtï cooni Pentecostés xii anajty ti ñajxtäy. ⁹ Com nmïidïch it lugar ya ma jëbi ngapxhuäcxïyïch Cristo y'ayuc, e mayjây huïdibi mïjpidacp ïch n'ayuc, nañ jadu'n mayjây ya ooy mïdzïp'aty Jesucristo y'ayuc ytïy'ajt.

¹⁰ Co Timoteo anajty yjädï ma miich ajcxy, tungïxy may'ajt mgöbïjccïxïpy agujc jotcujc ca' ti mhuïnmaaygyxy, com Timoteo tumb ma ajt nHuïndzin Jesucristo ytung tim jadu'n nej ïch nduñïch. ¹¹ Paady ycïxp ca' huaad miich ajcxy Timoteo mga'oy'ixïpy etz mdüjïjphuhuïhuïpy, jaydëbi ca' ti jotmay mïid'adïpy etz yjactüyöyïp agujc jotcujc, e ymedzïpy ya Efeso ma nyajpaadyïch. Com njïjp'ïjxypïch co Timoteo xyñïjädïbïch quïpxyï mïid jacjadyïi mïbijcpïdïjc.

¹² Jadu'n nej yjajti mïid ajt nmïgüg Apolos. May'ajt nbïjctzoohuïch ma Apolos co yi' mïidnïcxïp nijëjïty jacjadyïi mïgügtïjc huïdibi nïcxamb ma miich ajcxy. Per

ca' yí' yjotcujcity co ñicxip jadachambi tiempo. Hue' janchtiy jacjiini yñicxipy, pen yaj'ahuätzciyb anajty.

Capxpocxin huidibi cijxnip je necy

¹³ Ni'ixí m'idipy ajcxy ma mmibijcin. Naygüend'ájtigix ma mmibijcin. Tiydudägy ajcxy mmibigipy, ca' m'ixtigihuäccixy ma mmibijcin. Naybidáacigix huinmic jotmic ma mhuinma'ñ. Mic m'idipy ajcxy ma mmibijcin. ¹⁴Tüg'óciy tijaty ajcxy mdungixy, tungixp miid tzojcin jihuiyín etz oyjä'ajtin.

¹⁵ Migügtijc ajcxy, mnejhuíyb jadu'n nej Estéfanos miid yjugymigüg ti mibijccixy Jesucristo y'ayuc. Yí' je' jayijp ajcxy mibijcp jim Acaya, e ti yhuinma'ñypidaaccixy co ypubedamyb ajcxy yí' mibijcpidijc. ¹⁶ May'ajt nbijctzooybich ma miich ajcxy co myajmij'ájtciixipy Estéfanos, etz jac pinjaty huidibi pubejtp je mibijcpidijc etz huidibi ajcxy tumb Dios ytung. ¹⁷ Ooy njotcújciyich co Estéfanos, Fortunato, etz Acaico ti ymiñ ma ich ajcxy ya Efeso. Yí' ajcxy xymiid'ijtpich, com ca' anajty y'oyíy nej nmíid'idipyich miich ajcxy. ¹⁸ E yí' ajcxy ti ooy xyajjotcugíyich, e nañ jadu'n miich ajcxy ti mjotcugíyigixy co yí' ajcxy ymiñ ma ich. Paady ycixp copicy co miich ajcxy myajmij'adip yí' ajcxy etz jacjadyii tim jadu'n nej yí' ajcxy.

¹⁹ Yí' mibijcpidijc huidibi canaagpicy ya Asia naaxjot yquejxyp ajcxy capxpocxin ma miich ajcxy. Aquila etz Priscila etz yí' mibijcpidijc huidibi ajcxy yöymujcip ma Aquila ytijc yquejxp ajcxy capxpocxin ma miich ajcxy ma ajt nHuindzin Jesucristo yxí.

²⁰ Tüg'óciy je mibijcpidijc huidibi ya Efeso yquejxp ajcxy capxpocxin ma miich ajcxy. Naygapxpóocxigixy miich ajcxy xic xon.

²¹ Ich, Pablo, njaaybich miid ngi'mgi' ngi'mletra jada capxpocxin huidibi nguejxypich ma miich ajcxy. ²² Pen jim pinjaty ca' mijpidägy ich ajt nHuindzin Jesucristo, huen Dios yajtigooyip ajcxy y'alma. ¡Maranata! Huen tzojc yminiipy ajt nHuindzin Jesucristo.

²³ Huen ajt nHuindzin Jesucristo oy'ajt may'ajt tunipy miid miich ajcxy etz xyconu-ucxip ajcxy. ²⁴ Ndzojcypich njihuíybich miich ajcxy nidüg'óciy huidibi yajpaady ma Jesucristo. Jadu'n jada. Amén.

2 CORINTIOS

Yi Mimetz Necy Huidibi San Pablo Yajniejx Je Mibijcpidijc Jim Corinto

¹ Ich Pablo, Dios jadu'n ti tzocy, paady ycixpi Jesucristo ti xyajniejx co ngapx-huäcxibich yi' y'ayuc. Ich mïid ajt nmigüg Timoteo nguejxypich jada necy ma je mibijcpidijc jim Corinto. Nañ jadu'n nguejxypich jada necy ma tüg'óciy je mibijcpidijc majaty je cajp huidibi yajpatp jim Acaya ñaaxjot. ² Huen Dios Teedy etz ich ajt nHuindzin Jesucristo may'ajt oy'ajt tunipy mïid miich ajcxy etz xyajjotcugiiygixip.

Nej Pablo yjajty y'ayoy

³ Tzoc yajnajxim Dioscojuyip ma Dios, je nHuindzin Jesucristo yTeedy, je Dios Teedy huidibi ajt xypa'ayoohum, je Dios huidibi yejcp jotcuje'ajtin. ⁴ Dios xyajjotcugiiyim co nminajxim nyajnajxim tzaachypi ayo'n jigix jëbi nyajjotcugiiyim jacpinjaty huidibi minajxp yajnajxp tzaachypi ayo'n. Tim jadu'n nej ich ajcxy ti nbaady jotcuje'ajtin ma Dios, nañ tim jadu'n yi' ajcxy padañ jotcuje'ajtin ma Dios huidibi minajxp yajnajxp tzaachypi ayo'n. ⁵ Com tim jadu'n nej ich ajt nminajxim nyajnajxim tzaachypi ayo'n mïid Cristo ycixpi, nañ tim jadu'n mïid Cristo ycixpi nbaatim jotcuje'ajtin. ⁶ Paady ycixpi ich ajcxy nminajxcixy nyajnajxcixy tzaachypi ayo'n, jaydëbi miich ajcxy mbaadip jotcuje'ajtin etz nañ jadu'n ypaadip ajcxy m'alma ñidzoocin. Dios yejcpy jotcuje'ajtin ma miich ajcxy, jaydëbi miich ajcxy mbaadip jotcuje'ajtin etz nañ jadu'n ñidzögip ajcxy yi' m'alma. E co ajcxy mbaadip jotcuje'ajtin etz ajcxy m'alma ñidzoocin, chi jëbi miich ajcxy mmimadägip etz mmecxtugip tzaachypi ayo'n, tim jadu'n nej ich ajcxy nmimadägy etz nmechtüjccixich tzaachypi ayo'n. ⁷ Jotcuje nayjihuiyijich mïid miich ajcxy ycixpi, com njjip'ixpich co mmadägipy ajcxy ma mmibijcin. Com nejhuuybich co miich ajcxy nminajxyp myajnajxyp tzaachypi, tim jadu'n nej ich ajcxy nminajxcixy nyajnajxcixy tzaachypi. E nañ jadu'n Dios yejcpy jotcuje'ajtin ma miich ajcxy, tim jadu'n nej yecy jotcuje'ajtin ma ich ajcxy.

⁸ Migügtijc ajcxy, ich ajcxy ndzojcpich co miich ajcxy mnejhuuihuip jadu'n nej canaagnax tzaachypi ayo'n ti nminaxyich ti nyajnaxyich jim Asia naaxjot. Jayin jahueeni ti ngamimadäga'ñich. Ca' anajty njjip'ixyich co nbidzimipyich juugy ma je jimbi it lugar. ⁹ Jadu'n ich ajcxy nnayjihuiyii nej jäy ajcxy huidibi yajpatcixp o'cjipp'am. Jadu'n ti njatyich, jigix jëbi n'ixpicyich nej ich huaad nigi Dios nyajmij'atyich, je Dios huidibi yajjugypigip yi' jäy ajcxy tiibi y'öccixy. E ca' nan ngi'm mic'ajt nmijpidaacpyich. ¹⁰⁻¹¹ Ti ich ajcxy Dios xyñihua'ñ xycohua'ñ, e xyjacnihua'naamb xyjaccohua'naambich ajcxy ma yi' jäy ajcxy huidibi xyaj'ögaambich ajcxy. E co miich ajcxy xypubejtyich, copicy co jacmibijctzoogix Dios mïid ich ycixpi. Njjip'ixypich co Dios yi' xyjatyimy xyñihua'naambich xycohua'naambich. E pen mayjäy Dios mibijctzoogixy mïid ich ycixpi, nañ jadu'n yajnajxcixyipy ajcxy jäygidaacin ma Dios mïid je may'ajt oy'ajt ycixpi huidibi Dios ytumyb mïid ich ajcxy.

Ti Pablo co yhuäcxijpy, ca' chojc nicxy jim Corinto

¹² Jotcuje nayjihuiyijich mïid jada ycixpi com nejhuuybich co ti ndzinäyich mïid tudägy'ajtin etz mïid oyot oyhuinma'ñ mïid yi' mayjäy ajcxy canaag agajp etz jacnigi ma miich ajcxy. Dios mïid may'ajtin oy'ajtin ti xypubetyich co tudägy ti ndzinäyich, e ca' nguyduñich ngi'mjot ngi'mhuinma'ñich ma ndzinäyainich. ¹³ Ich miich ajcxy nyajnijayiyb je ayuc tiy'ajt huidibi miich ajcxy jëbi mgapxcixy etz mhuinjihuuygixy. E nañ jadu'n njjip'ixypich co miich ajcxy mhuinjihuuyipy ich n'ayuc tüg'óciy. ¹⁴ Jadu'n nej miich ajcxy cham cuje-huäcxy mhuinjihuuygixy ich n'ayuc ndiy'ajt. Jacjiini co

anajty je xii je tiempo ymiñ co ajt nHuindzin Jesús y'ane'mañ ya naaxhuiñ, chi miich ajcxy jotcuyc mnayjihuihuibich miiid iich ycixpi. E nañ tim jadu'n nej iich ajcxy jotcuyc nayjihuihuibich miiid miich ajcxy ycixpi.

¹⁵ Com nejhuibich co miich ajcxy xychojcpich xyjihuibich, paady ycixpi nhuinma'ñ nbidägyich co nicxy n'ixaangixy miich ajcxy jadüg'oc, e jadu'n nyajjotcugihuaangixich miich ajcxy mejtz'oc. ¹⁶ Jadu'n nhuinma'ñ ti nbidägyich co nnicxa'ñich Macedonia. Per jayijp nnaxa'ñich ma miich ajcxy mgajp. E co anajty ndzooñich Macedonia, jadüg'oc nnicxa'ñich ma miich ajcxy. E jadu'n jëbi miich ajcxy xytüjijphuohuibich co anajty nnicxyich jim Judea. ¹⁷ ¿Nej mdiyy, co iich aametz jotmetz nduñich co ca' ti nnicxyich ma miich ajcxy nej anajty ti nmına'ñich? ¿Nej mdiyy, nhuinma'ñ miiididyich jadu'n nej naaxhuiñyây huidibi minamb co ñicxa'ñ, e chi ca' ñicxni? ¹⁸ Per Dios jëbi tiy'ajt yegipy co je ayuc tibi nyajnimaaaygixy, nguydunipyich yi'. Iich n'ayuc janch yi'. ¹⁹ Iich miiid Silvano etz Timoteo ngapxhuäcxixyich Cristo Jesús y'ayuc, je Dios y'ung. E Cristo Jesús y'ayuc janch yi', ycuydumyib je' y'ayuc, tudägy je' ycapxy. ²⁰ Tüg'óciy je ayuc huidibi Dios yejc jecy'ajty miiid iich ajt ycixpi, hue' Cristo Jesús cuydundaayb. Paady co ngapxpaatim n'ojadajtim Dios, chi nmınaanim. “Amén, jadu'n jada,” com Cristo Jesús ti cuydudäy Dios y'ayuc. ²¹ Com je' je' Dios huidibi xyajmibijcim Cristo, e Dios huidibi xyajmiiid'ijtim Cristo. Jadu'n Dios ytuñ miiid iich ajcxy etz nañ jadu'n miiid miich ajcxy. Je' je' Dios huidibi xyajmibijcim etz xypidaacim tügjijp ma yi' ytung. ²² Dios ti pidägy ma ajt njot nhuinma'ñ je tiy'ajt co nyajpaatim ma Cristo Jesús. Co Dios xy'adigiym xyjottigiym yi' yjihuiñ ymic'ajt, chi tiy'ajt yecy co nyajpaatim ma Cristo Jesús.

²³ Dios jëbi tiy'ajt yegipy co miiid tudägy njot nhuinma'ñ nmiydacyich co ca' jadüg'oc nnicxyñich ma miich ajcxy mic'amy, jadu'n nej anajty nhuinma'ñ ti nbidägyich, miiid co ca' ndzocyich nicxy n'ojcixy huiñ jijp. ²⁴ Ca' nnicxa'ñich mic'amy ma miich ajcxy, com ca' adzip nyajmibigaangixy miich ajcxy huidibi copicy ajcxy mmibigipy. Miich ajcxy tiydudägy ti mmibijccixy. Jëyi co nbubedaangixy jaydëbi ajcxy nigä jotcuyc'ajt mmiiid'adipy ma ajcxy mdzinaayin mjygy'ajtin.

2

¹ Paady ycixpi jadu'n nhuinma'ñ ti nbidägyich co ca' nnicxa'ñich mic'amy jadüg'oc ma miich ajcxy, miiid co miich ajcxy nyajtajipy nyajmayipy co ngapxhuijyich miiid ajcxy mbocy ycixpi. ² Com pen iich miich anajty ajcxy nyajtajpy nyajmaayb, ¿pin jada' iich xyajjotcugihuibich? Pues miich ajcxy huidibi tajp mayb, miich ajcxy xyajjotcugihuibich. ³ Paady ycixpi ti nnijayiygixy jadu'n co ca' nnicxa'ñich mic'amy ma miich ajcxy, com ca' jadu'n ndzocyich co iich miich ajcxy nyajtajipy nyajmayipy. Jac'oy co iich miich ajcxy nyajjotcugihuiipy. Com nejhuibich co iich jotcuyc nayjihuiyijich miiid miich ajcxy ycixpi. Nañ jadu'n miich ajcxy jotcuyc mnayjihuihuibich co mnejhuihuipy co ti njotcugihuibich miiid miich ajcxy ycixpi. ⁴ Co ti njayich je necy huidibi ti nguexyich ma miich ajcxy, ooy mij jotmay ti njihuiyich, ixti nyaaxich. Per ca' nan paady ycixpi ti njaayich je necy co nyajtajaangixy nyajmayaangixy. Hue' janchtiy ti njaayich je necy jaydëbi mnejhuigyixy co mijcajee ndzojccixy njihuiyigixy.

Meecxin ma je pin anajty jibicpi ti tuñ

⁵ Per pen jim ma miich ajcxy pinjaty ti yecy tajin mayim co ti ytundigooy, pues ca' nan iich tügpajc tajin mayim jihuibich. Nañ jadu'n miich ajcxy nidüg'óciy mjihuiyigixyp tajin mayin. Jadu'n nmına'ñich co huenjaty tajin mayin miich ajcxy mjihuiyigixy, jigix ca' anaxy ajcxy nyajtajip nyajmayip. ⁶ Yajhuäcxijp je tzaachyp i hidibi miich ajcxy mooyb je migüg huidibi ti ytundigooy. Ti miiid jadu'ñi. ⁷ Jadu'n tzocy cham co miich ajcxy meecx je migüg jadu'n nej ti ytundigooy, etz nañ jadu'n ajcxy myajjotcugihuiipy. Ca' yjegyity co je migüg anaxy oy jihuihuip tajin mayin. ⁸ Paady ycixp may'ajt nbijctzooyich

ma miich ajcxy co myajniguëxigipy ajcxy co mdzocy mjihuïy ajcxy je migüg huidibi ti ytundigooy. ⁹ Ich miich ajcxy ti nijavïy jayhuin müd je migüg ycixpi huidibi ti ytundigooy, jigix jëbi nnejhuïyich, pen mguydumyb miich ajcxy ich n'ayuc, o pen ca' mguydungixy. ¹⁰ Jadachambi co pinjaty ti ytundigooy ma miich ajcxy, e miich ajcxy mhuinmecxi yi' ypocy, nañ jadu'n nhuinmeecxi ich yi' nej ytundigooy. Com ich co nhuinmeecxyich tüg nmigügich nej ti ytundigooy, jadu'n nduñich müd miich ajcxy ycixpi, com Cristo y'ijxyp ñejhuïyb tüg'óciy tijaty nduunim. ¹¹ Jadu'n nhuinmeecxim nmigüg ypocy, jigix Satanás, je mujcu', ca' xymimadaacim. Nejhuïyim yajxon nej Satanás mañ'ajt müdity.

Pablo ca'p anajty yjotcujc'aty jim Troas

¹² Co nja'tyich ma je cajp huidibi xijip Troas, chi ngapxhuäcxa'ñich anajty Cristo y'ayuc ytiy'ajt, etz mij ooy tigiydac nbatyich, nej jëbi nduñich ma ajt nHuindzin Jesucristo ytung. ¹³ Per ca' anajty jotcujc nayjihuiyijich. Com ca' nminaybatich je ich ajt nmigüg Tito jim Troas. Paady ycixp ngapxycijxyich müd je mibijcpidijc ajcxy jim Troas, e nnicxyich jim Macedonia ñaaxjot.

Madaacim ma Cristo

¹⁴ Nyajnajxypich jäygidacim ma Dios co müd Jesucristo ymic'ajt jatytimy nmimadacypich jabom jabom tüg'óciy huidibi xymidzip'ajtpich ma tüg'óciy naax cajp. Nañ jadu'n Jesucristo ti xymöyich yi' y'ayuc huidibi ngapxhuäcxypich ma tüg'óciy naax cajp. Je mayjäy ma canaag cajp ooy jäygidacixy Cristo y'ayuc. Co ngapxhuäcxich Jesucristo y'ayuc xi ya, jadu'n nipaady nej tüg xuucin huidibi ooy oy xuugy, e y'abojïy xi ya. ¹⁵ Co ngapxhuäcxych Cristo y'ayuc ma yi mayjäy huidibi padamb ajcxy y'alma ñidzoocin ooy Dios jäygidägy. E ñañ jadu'n Dios ooy jäygidägy co ngapxhuäcxych Cristo y'ayuc ma yi jäy ajcxy huidibi ajcxy y'alma tigoyaamb. Jadu'n ich ajcxy ndung nipaady nej jihuiy nboomjójcixich jabom jabom ma Dios yhuinduu müd Cristo ycixpi. ¹⁶ Pinjaty mijpidacp Cristo y'ayuc huidibi ngapxhuäcxypich, hue' je' y'alma ñdzögamb. E pinjaty ca' mijpidägy Cristo y'ayuc, hue' je' y'alma tigoyaamb. Ooy chachchipity chachmijhuinma'ñity ich ajcxy ndung. ¹⁷ Ca' ich ajcxy nduñ jadu'n nej jacnaagity ajcxy huidibi Dios y'ayuc mihuidijtip meeñgixy. Cixyjot huinijot ich jäy nyaj'ixpicixy Dios y'ayuc ytiy'ajt. Com Dios ti xyajñibicyich co yi' y'ayuc ngapxhuäcxich. Müd co nyajpaatim ma Cristo, paady ycixp nduunim jadu'n nej jihuiy nyajpaatim jabom jabom ma Dios yhuinduu.

3

Je jemybi ayuc tiy'ajt huidibi Dios xymooyim

¹ Co jadu'n nmina'ñich ¿nej m'ijxcixy nej jihuiy huinjemy nyajtzondäga'ñich ayuc co ndzachnaymayáanigixych ci'm? ¿Nej mdzojccix co ajcxy nyaj'ixipy tüg tiy'ajt necy co nduñich ma Dios ytung? o ¿Nbijctzohuipich tüg tiy'ajt necy ma miich ajcxy, jadu'n nej nijëjity jäy ytungixy? ² Ca' ich ajcxy ndiy'ajt necy ycopicyity. Com jëbi yi mayjäy ajcxy tiy'ajt pigipy ma miich ajcxy mdzinaayin mjogy'ajtin co tudägy ti nyaj'ixpicych miich ajcxy Dios ytiy'ajt. Jadu'n miich ajcxy nipaady nej ich ajcxy ndiy'ajt necy yaayity ma ich ajcxy njot nhuinma'ñ. E jadu'n jäy ajcxy ijxcabipy etz huinjihuïhuipy. ³ Cristo ci'm ti pidägy yi' ytiy'ajt ma miich ajcxy mjot mhuinma'ñ müd je ayuc huidibi ti ngapxhuäcxych ma miich ajcxy. Jadu'n miich ajcxy nipaady nej tüg tiy'ajt necy huidibi Cristo ti jaay. E huidibi ich miich ajcxy ti nyaj'ijxcixy ti nyajñimaaygixy. Miich ajcxy ca' jadu'n ocpaati nej tüg tiy'ajt necy huidibi jäy ti jay müd tinta. Nañ jadu'n ni ca' yjëjity je tiy'ajt huidibi cojayip ma tüg tzaadzech. Hue' miich ajcxy janch nipaady nej tiy'ajt necy huidibi je Dios jugypï yjihui'ñ ymic'ajt ti jaay ma jäy ajcxy yjot yhuinma'ñ.

⁴ Nejhuïybich tiydudägy co janch tiy'ajt nej nmina'ñich co Cristo ti xyajñibicyich jada tung müd Dios ycixpi. ⁵ Ca'p ich ajcxy jëbi ci'm madägy ma Dios ytung. Tüg'óciy mic'ajt

etz tiy'ajt jiiby nbáatcixyich ma Dios, huidibi mïid jëbi ndúungixich yi' ytung. ⁶ Dios ti xymóoygixyich mic'ajt co ndunipyich ajcxy ma yi' ytung. Dios ti pidägy ma ïich ajt jemybi ayuc tiy'ajt, huidibi mïid xy'ane'mim. Jada jemybi ayuc tiy'ajt je Espíritu Santo pidaacp ma ajt njot nhuinma'ñ. E ca' je' yjadu'nity nej je ayuc tiy'ajt huidibi Moisés yjayhui'm jecy'ajty. Mïid je Moisés y'ayuc huidibi jaybety ijtp, Dios xymooyim je o'cin. Mïid je jemybi ayuc tiy'ajt huidibi je Espíritu Santo yejcpy, Dios xymooyim jugy'ajtin huidibi ca' ycixipy ytigoyipy ni mina.

⁷⁻⁸ Je Dios ycötujcin huidibi Moisés yjayhui'm hue' jaybejty oga'n ma tüg tzaa. E je huin'it tiempo ooy Moisés anajty yhuiñyjipp mic y'adixy mïid Dios y'oy'ajtin. E je Israel jäy ajcxy ni ca'p je' anajty huaad y'ijxcixy Moisés yhuiñyjipp, co anajty ooy mic chach'adixy. E jada Dios y'oy'ajtin huidibi Moisés ymïid, ca' jecy y'ijty. Hue' je' tigooyñip anajty oñydägy'amy. Per pen Dios yaj'ijxip anajty yi' y'oy'ajtin co Moisés moy je jäy ajcxy je Dios ycötujcin huidibi ane'm yi' o'cin, nigi mi'idipy Dios y'oy'ajtin je jemybi ayuc tiy'ajt huidibi je Espíritu Santo xymooyim. ⁹ Pen mij anajty oy'ajtin mïidity je cötujcin huidibi tuuñ co y'ane'my ma ïich ajt nbocy n'o'cin. Nigi mij'oy'ajtin mïidity Dios y'ayuc ytiy'ajt je jemybi huidibi minaamb co Dios jëbi xyaj'ahuimbijtim tudägy. ¹⁰ Jëbi nmïinaanim co je jécyp cötujcin y'oy'ajtin ca' yi' ytimytijity co nyajquipxyihuaanim mïid je jac'oybi oy'ajtin huidibi Dios y'ayuc ytiy'ajt jemybi ymïid. ¹¹ Com pen ymïid oy'ajtin je cötujcin huidibi ymic'ajt ca' y'ida'ñ huinixi huinitiempo, nigi oy'ajtin mïidity Dios y'ayuc ytiy'ajt jemybi huidibi ca' ycixipy ytigoyipy nimina.

¹² Mïid co njipp'ijxim je oy'ajtin huidibi Dios xymöhuaanim mïid je jemybi y'ayuc, paady ycixp ngapxhuäcxim Dios y'ayuc huinmic jotmic. ¹³ Ca' jadu'n nduunim nej Moisés idïich jecy'ajty co anajty mïidity yhuiñyjipp huingobe'nïy, jigix ca'ydi Israel jäy ajcxy ixxy nej je' anajty ytigoy je Dios y'oy'ajtin huidibi anajty quëxïcp ma je' yhuiñyjippin. ¹⁴ Per yi' Israel jäy jecy'ajty ca' ajcxy yajxon huinjihuïy ti anajty Dios ytumyb mïid Moisés, ixti chambaadni yi' Israel jäy ajcxy ca' yajxon huinjihuïygixy co ajcxy capxcixy je ayuc huidibi Moisés yjayhui'm. Jadu'n nipaady nejjihuïy Moisés chambaadni y'ityñi huingobe'nïy. Co ajcxy mibigipy je Cristo, huin'it ajcxy huinjihuïhuipy, e jadu'n je' paadipy nej jihuïy Moisés ti ñayhuingobe'ndüdyii. Co yi' Israel jäy ajcxy mibïjccixipy Cristo, e ijxip ajcxy Dios y'oy'ajtin, huin'itni ajcxy huinjihuïhuipy Dios y'ayuc ytiy'ajt je jécyp. ¹⁵ Ixti chambaadni co yi' Israel jäy ajcxy capxcixy je migooxpï libro huidibi Moisés yjayhui'm, ca' ajcxy huinjihuïyi yajxon Dios y'ayuc, jadu'n nipaady nej ajcxy yhuinma'ñ ymädity. ¹⁶ Pinjaty jothuimbijtp, e mibicy ïich ajt nHuindzin Jesucristo, oyñyñip yi' yhuinma'ñ, e yhuinjihuïhuipy Dios ytiy'ajt. ¹⁷ Je Huindzin Jesucristo, yi' je' Dios yjihui'ñ ymic'ajt ymïid. E ma Dios yjihui'ñ ymic'ajt yajpaady, Dios yi' yi' jadu'mbi jäy ajcxy yajnihuätzictutp ma yi' Dios ycötujcin je jécyp. ¹⁸ Paady ycixp tüg'óciy ïich ajt jadu'n nipaady nej tüg ijx ma nni'ijxim ajt nHuindzin Jesucristo y'oy'ajtin. Com ca' jadu'n patni nej jihuïy n'ijtim huingobe'nïy. E nañ jadu'n ïich ajt njacyujcpejtim n'oy'ajtin, jaydëbi nguipxyjatytïyim mïid Cristo. Com jabom jabom ïich ajt nigi nbaatim n'oy'ajtin ma Cristo. Jada je' huidibi je Dios yjihui'ñ ymic'ajt ytumyb ma ajt njot nhuinma'ñ. E ïich ajt nHuindzin Jesucristo ti pidägy Dios yjihui'ñ ymic'ajt ma ajt njot nhuinma'ñ.

4

¹ Com Dios ti xypa'ayooyich, e ti xyajnißicyich co ngapxhuäcxibich yi' y'ayuc ytiy'ajt jemybi, paady ycixp ca' njotmetzcïyich. ² Per ooy ti njippcodijïygixyich ti njippcogapxïygixyich yi' jäy ajcxy y'ayuc huidibi ajcxy ytungixyp etz ycapxcixpy ayüch ameech, etz huidibi oymïdzöyduuni. Ca' ïich ajcxy ti nduñich mïid jibic-huinma'ñ. Nañ jadu'n ni ca' nyajtigájtzcixich Dios y'ayuc. Hue' janchtiy ngapxpïch ajcxy huidibi janchip. Jadu'n nyaj'ixpïjccixyich yi' jäy ajcxy, jaydëbi ajcxy jotcuje ñayjihuiyigixy ma

Dios yhuinduu. ³ Yi jāy ajcxy huídibi nicxy y'alma ytigoyaangixy ca'oydactuuby, ca' ajcxy huinjihuüy Dios y'ayuc oybi nej jēbi ajcxy y'alma nidzögipy. Jada je' je ayuc huídibi ngapxhuäcxixpich. Pinjaty ajcxy y'alma nidzögip yhuinjihuüyb ajcxy jada ayuc. ⁴ Yi' ajcxy huídibi y'alma tigoyaanip ca' mibijccixy Dios y'ayuc, com Satanás huídibi ane'mb ya naaxhuiñ ti yajmädyii ajcxy yhuinma'ñ. Ca' je' ajcxy huinjihuüy Cristo y'ayuc oybi. Cristo tú'ciy yaj'ixy, tú'ciy mic'ajt miidity, nej Dios yaj'ixy nej Dios mic'ajt miidity. E Cristo y'ayuc jadu'n nipaady nej tüg mjtixin huídibi Satanás ti ahuijztucy ca'ydi yticxy ma je' ajcxy. ⁵ Co ñch ajcxy ayuc ngapxhuäcxyich, ca' ñch ajcxy ngapxhuäcxy ngi'm'ayuc ngi'mdiy'ajt. Hue' ñch ajcxy ngapxhuäcxy Jesucristo y'ayuc ytiy'ajt. Ngapxhuäcxyich ajcxy co Jesucristo ñihuindzin'ajtaayb tüg'óciy. E nañ jadu'n ngapxhuäcxyich ajcxy je tiy'ajt co ñch ajcxy jadu'n naydijygyxyich nej jihuüy miich ajcxy xytumbi'adyii miid Cristo ycixpi. ⁶ Je Dios huídibi jecy'ajty ane'm co huen tñcxin ji'aty huídibi codñcxip ma ycoodzity, yi' ti xymooyim y'ayuc ytiy'ajt. Yi' y'ayuc tim jadu'n nipaady nej tüg tñcxin nmíid'ajtim ma ajt njot nhuinma'ñ, jigix jēbi n'ijxim je Dios y'oy'ajtin huídibi quëxícip ma Jesucristo yhuñyijp.

Je jugy'ajtin co nmibijcim

⁷ Je Dios y'oy'ajtin oybi nmíid'ajtim ma ajt njot nhuinma'ñ, ñch ajt ca' ni ti mic'ajt nmíid'ajtim ma ajt ngi'mjot ngi'mhuinma'ñ. Jadu'n Dios pidägyñi yi' y'oy'ajtin ma ñch ajt, tim jadu'n nej jāy ajcxy pidaaccixy pi'cmeñ ma pi'c'idzimboch. ⁸ Oy ñch ajcxy nminaxyich nyajnaxyich may ayo'n, per ca' ndajy nmayich ajcxy anaxy. Ooy nhuinmay'ahuidijtcixyich miid je tzaachypi ayo'n ycixpi, per ca' nhuinma'ñdigóoygyxyich. ⁹ Oy ñch ooy nmidzip xy'ixhuidityich xypahuidityich, per Dios ca' xy'ixmachich. Canaag'oc ñch nmidzip ti xycujy ti xyjibipyich. Per ca' ñch njugy'ajtin ti ytigooy. ¹⁰ Hueñyama'amyity nhuidityich ajcxy nmíidich je tzaach'au ma nninñcxich, ma jāy ajcxy ti xychaachtúungixich. Je' je' je iixpejt co nhuidityich o'cin jip'am, tim jadu'n nej Jesús anajty huidity o'cin jip'am. Ngöbijcypich jada tzaachypi, jigix tüg'óciy jāy ajcxy nejhuñhuip co Jesús xypubejtpich xypudigñyibich. ¹¹ Nami jacjugy'ajtnich ajcxy, o'cjip'am ñch ajcxy nhuidijtcixy jabom jabom miid Jesús ycixpi, jigix jēbi tüg'óciy jāy ajcxy nejhuñhuipy co Jesús xypubejtcixyp xypudigñyigixyp. ¹² Jadu'n ndzinäyich o'cjip'am, jigix miich ajcxy miid'adip jugy'ajtin huídibi ca' ycixipy ytigooyip.

¹³ Jaybety ymiñ ma Dios ñecy ma jadu'n ymina'ñ: “Ti nmibicyich, e paady ycixpi ti ngapxpídzimybich nej ti nmibicyich.” Tim jadu'n nej Dios ñecy ymina'ñ, nañ tim jadu'n ñch ajcxy yminaangixy co nmibijccixyich Dios, e paady ngapxpídzimgixyich nej nmibijccixyich. ¹⁴ Com nejhuñyim jadu'n nej Dios yajjugypijcy Jesús co y'o'cy. Nañ tim jadu'n Jesús xyajjugypigaanim jadüg'oc miid Dios ymic'ajt co anajty n'o'cim. E quipxyi miid miich ajcxy xyajñcximip ma Dios yhuinduu. ¹⁵ Tüg'óciy tzaachypi huídibi nminajxypich nyajnaxypich, hue' nminaxyich nyajnaxyich miid miich ajcxy m'oy'ajtin ycixpi. E co anajty Dios jactuñ may'ajtin miid jacjadyii mayjāy ajcxy, nañ jadu'n mayjāy yajnájxcixipy jāygidaacin ma Dios, jigix jēbi mayjāy ñbáatcixipy capxpáatcixipy Dios.

¹⁶ Paady ycixpi ni mina xii, ñch ajcxy ngajotmetzcihuaangixy. Oy ñch ajcxy nninñcx yjaccöminajc'idich jabom jabom, per ñch ajcxy njot nhuinma'ñ nigí mic'ajt paady jabom jabom. ¹⁷ Je tzaachypi je ayo'n huídibi nminajxim nyajnaxim ya naaxhuiñ, ca' yi' ytimyitijity. Cixip naxip yi'. E miid co nminajxim nyajnaxim tzaachypi ayo'n, huin'it nbaatim oy'ajtin nigí ymijity y'oyity huídibi ca' ycixipy ñaxipy ni mina. ¹⁸ Ca' huaad ñch ajt nhuinma'ñ nbidaacim ma huídijaty cixamb tigoyamb. Tüg'óciy tijaty yaj'ijxp yajhuindñcxp ya naaxhuiñ, cixip tigoyip yi'. Per huídijaty ca' yaj'ixy yajhuindicxy, idíp yi', ca' ycixipy ytigooyip nimina.

5

¹ Com nnejhuuyim co n'o'cim, naaxnicx ajt huudibi nmüd'ajtim ya naaxhuiñ cixamb tigoyamb yi'. Dios ymüd ni'ixi' jiiyby tzajpjoty huingbi ninicx huudibi yi' ti cojy huudibi xymöhuaanim. Je ninicx huudibi xymöhuaanim jadu'n nipaady ma ajt n'alma nej tüg tijc huudibi tinaayb huinixi huiniempo. Tüg tijc huudibi Dios ti cojy, ca' nan huudibi jäy ajcxy ti cojcixy. ² Janch tiy'ajt co ca' ooy jotcuje ndzinaayim ya naaxhuiñ müd ajt nninicx. Ooy njijp'ixim mina nbadaanim ajt je nninicx huudibi nmüd'adaanim jiiyby tzajpjoty. ³ Je' nninicx xyüdzim tim jadu'n nej co tüg jemyhuit nyajtigiiyim, ca' ydi n'ijtim nihuädz. ⁴ Nami njactzinaayim ya naaxhuiñ müd ajt nninicx, ca' ooy jotcuje nayjihuiyim. Ooy xyajtajim xyajmayim je tzaachyp i ayo'n huudibi nmänajxim nyajnajxim. Ca' nan co ca' ndzojcm ajt nninicx, o co nyajtigoyaanim ajt nninicx. Hue' ndzojcm co nmüd'ajtim jemybi jugy'ajtin jemybi ninicx jigix co ajt njugy'ajtin huudibi cixamb tigoyamb, ahuimbidi p yi' jemybi jugy'ajtin huudibi ca' ycixipy ytigoyipy. ⁵ Dios yi' ti yaj'oyiy je jugy'ajtin huudibi nmüd'ajtim cham, jigix jëbi nmüd'ajtim huingbi jugy'ajtin huudibi ca' ycixipy ytigoyipy ni mina. Dios ti xymoyim je Espiritu Santo je' je' tiy'ajt ma ich ajtin co nbadaanim jemybi jugy'ajt jembyi ninicx.

⁶ Jabom jabom ich ajt jotcuje naybidaacim. Nejhuuyim co nami n'jactzinaayim müd ajt nninicx, ca' nmüd'ajtim jemybi ninicx, ca' nyajpaatim ma ajt nHuindzin Jesús chinäy. ⁷ Je' nninicx xyüdzim tim jadu'n nej co tug jemyhuit nyajtigiiyim, ca' ydi n'ijtim nihuädz. ⁸ Jotcuje etz jotmic nayjihuiyim. Nigi jotcuje ixipy nayjihuiyim, e ooy njatzojcm co mic'amy ixipy n'ijxmajtzim jada ninicx, jigix nicxy ndzinaydapijcm ma ajt nHuindzin Jesús chinäy. ⁹ Paady ycixp jadu'n njacjugy'ajtim njactzinaayim jigix jëbi ajt nHuindzin Jesús jäygidägy ajt ndzinaayin. Ca' ñejity pen njactzinaayim ixipy müd ajt nninicx, o pen tzojc n'ijxmajtzim ajt nninicx ixipy, e nicxim ma Jesús yajpaady. ¹⁰ Nidüg'óciy ich ajt nayguëxigaanim ma Cristo tyidundac, e jiiyby nidüg nidüg paadip huudi anajty nipidziimip jadu'n nej anajty ti chinäy, pen oy, o ca' y'oyity.

Je ayuc tiy'ajt huudibi nicy'ajt cidägy'ajt müd

¹¹ Com nejhuuyim co copicy nhuindzigiiyim ajt nHuindzin Jesucristo, paady ycixpi mictägy nyajmibicyich yi mayjäy ajcxy Cristo tyiy'ajt. Dios ñejhuuyb co tudägy ich njot nhuinma'ñich. E nañ jadu'n ndzocyich co miich ajcxy mnejhuuyigixipy co tudägy ich njot nhuinma'ñich. ¹² Ca'p ich ajcxy yam naygapxpáatigixy jadüg'oc co ich ajcxy ooy n'oyjäyity, o co ich ajcxy ooy oy ndúngixyich. Hue' janchtiy lugar nyejcpyich, jaydëbi miich ajcxy xycapxadipyich etz jotcuje mnayjihuiyigixipy müd ich ajcxy ycixpi. Jigix jëbi miich ajcxy m'adzohuip yi jäy ajcxy huudibi capxpatp pinjaty yhuiñyijp ooy oy yquëxigy, e ca' ajcxy tuñ cuendi pen je' müd oyjot oyhuinma'ñ, o pen ca'. ¹³ Pen minamb jäy ajcxy co ich nlocity, huen xyajnájxcixyich loci müd Dios ycixpi. Pen jäy minaangixp co oy huinma'ñ nmüdidyich, jëbi jadu'n ajcxy xyajnájxcixyich jadu'n nej oy huinma'ñ nmüdidyich müd miich ajcxy m'oy'ajtin ycixpi. ¹⁴ Com Cristo ooy xychojcm xyjihuiyim, paady ycixp njatytimycapxymidoohuim Cristo. Com nnejhuuyim ajt nidüg'óciy tyidudägy co Cristo y'o'cy müd ajt nbocy ycixpi, e paady ycixpi jadu'n nipaady nej jihuiy nidüg'óciy ich ajt ti n'o'cim quipxy müd Cristo. ¹⁵ Cristo o'c müd tüg'óciy jäy ajcxy ycixpi, jigix co tüg'óciy jäy ajcxy huudibi jactzinaayb jacjugy'ajtp, ca' ajcxy yajtungixipy yci'mjot yci'mhuinma'ñ ma ajcxy chinaayin. Huen ajcxy tzinaaygixy müd Cristo ycixpi huudibi o'c müd yi' ajcxy ypocy ycixpi, etz yjugypijcy jadüg'oc müd yi' ajcxy ycixpi. ¹⁶ Müd co ndzinaayim müd Cristo ycixpi, paady ycixp ca' ndunim cuendi naaxhuiñyäy ajcxy nej ñayñigápxigixy nayñimiydáacigixy. Jayijp ca'ni anajty nmibijcm, ooy anajty ndunim cuendi nej jäy ajcxy ñayñigápxigixy nayñimiydáacigixy. Jadachambi etz yjacnicxni xii tiempo, ca' ndunim cuendi nej naaxhuiñyäy ajcxy capxcixy miydaaccixy. ¹⁷ Com tigachjaty cham nhuinjihuiyich Cristo, paady ycixp

pɨnjaty yajpatp ma Cristo, jemyjot jemyhuinma'ñ je' ymɨd'ajtnɨp, jadu'n nipaady nej jihuɨy ti ma'xung'aty huinjemy. Je jot je huinma'ñ huɨdibi anajty ymɨd co anajty ca'ni mibicy Cristo, ti je' ñajxtäy, jadachambi ac jemyjot ac jemyhuinma'ñ ti y'ahuimbijttäy.

¹⁸ Tüg'óciy tijaty huɨdibi ya yajpatp, jibby chooñ ma Dios, Dios yaj'oyiyday. Mɨd huɨdijaty Cristo ytuun mɨd ñich ajt ycɨxpɨ, jotcuje n'ijtm mɨd Dios. E Dios xyajñibijcɨch co ngapxhuäcxyɨch Dios y'ayuc jadu'n nej jäy ajcxy jëbi ajcxy jotcuje y'ijtcɨxy mɨd Dios. ¹⁹ Jadu'n nmɨnaanɨm co Dios ymɨd'ijtpy Cristo. E Dios tuun quipxyi mɨd Cristo co yi' yaj'oyɨy je tzip nej naaxhuiñyäjy ajcxy mɨdzip'aty Dios. Dios ca' yajcomidohua'ñ jäy ajcxy ypocy huɨdibi mibijccɨxp Cristo, mɨd co Cristo ti yajpocyñihuächyii. E Dios ti xyajñibicyɨch co ngapxhuäcxyɨch yi' y'ayuc nej jäy ajcxy jëbi paadɨp pocyhuinmeecɨn, etz nañ jadu'n paadɨp jotcuje'ajtn ma Dios. ²⁰ Paady nhuɨdityɨch mɨd Cristo ycɨxpɨ ngapxhuäcxyɨch Cristo y'ayuc. Jadu'n huimbɨdzɨmyb nej jihuɨy miich ajcxy Dios xymɨnucxtaaccɨxy mɨd ñich n'ayuc jigix nmɨbɨjccɨxy py Cristo y'ayuc. Paady ngodinäyɨch Cristo co nmɨnucxtacypɨch miich ajcxy. Jothuimbijtcɨx nej mɨdundigoogyɨxy mɨd Dios ycötujcɨn e Dios xyhuinmeecɨp ajcxy mbocy, jigix jotcuje m'ɨdɨpy ajcxy ma Dios. ²¹ Cristo ca' ma ytundigooy, per mɨd ajt nbocy ycɨxpɨ Dios yajnax je Cristo jadu'n nej tüg pocyjäy. Jadu'n Dios ytuñ mɨd je Cristo, jigix co ñich ajt n'ijtm ma Cristo, nbaatɨm je tudägy'ajtn huɨdibi Dios chojepy nmɨd'ajtm.

6

¹ ñich ajcxy etz miich ajcxy quipxyi nduunɨm ma Dios ytung. Nmɨnucxtacpyɨch miich ajcxy co mgöbɨgɨpy ajcxy je may'ajt je oy'ajt huɨdibi Dios ti tuñ mɨd miich ajcxy ycɨxpɨ, ca'ydi ñaadigɨ'aty Dios ytung. ² Com jadu'n jaybety y'ity ma Dios ñecy ma Dios jadu'n ymɨna'ñ:

Co je xɨi tiempo ti patni, ti ñich miich m'ayuc mɨdoohui. Ti nbubety nbudigɨyɨch je huɨn'it xɨi je huɨn'it tiempo co ti yhuaad'aty mɨna jäy ajcxy y'alma ñɨdzögɨpy. Jadachambi xɨi tiempo ti yhuaad'ajtni mɨna jëbi Dios xyñɨdzocɨm ajt n'alma.

³ Ca' pɨn n'adzipyɨch co nduñɨch ma Dios ytung, jigix ca'ydi pɨnjaty ymɨna'ñ co ca' oy nduñɨch. ⁴ Nañ jadu'n ca' n'adziba'ñɨch miich ajcxy. Nigi ndzocyɨch co ñiguëxigɨp tüg'óciy ñich ndung co nduñɨch mɨd Dios ycɨxpɨ. Ooy nyajtuñɨch mecxtujcɨn. Ooy nmecxtucyɨch ayo'n etz tzaachypɨ. Ooy nyajmayjatyɨch nhuit nducxy ngaayɨn n'uucɨn. Ooy ñich ndzɨnaayɨn chipity. ⁵ Ti ajcxy xycɨ'atyɨch, ti ajcxy xypɨdáacɨxyɨch pujxtigoty. Ti jäy ajcxy xymɨbɨdɨgyɨch, e ooy ajcxy yhuaangɨxy yjihuiygyɨxy. Ti tzaachypɨ nmɨnaxy nyajnaxyɨch ma ndungɨch. Mɨnaajity canaag xɨi ca' nmäyɨch, e mɨnaajity ayuu n'ityɨch. ⁶ Nyajniguëxɨcɨpy ñich ajcxy co ñich ndungɨxyɨch mɨd Dios ycɨxpɨ, mɨd co huädz jot huinma'ñ nmɨdɨdyɨch ajcxy. Ca' ma jibɨcɨpi nmɨdɨdyɨch ajcxy, mɨd co n'ixpɨjccɨxyɨch ma Dios yty'ajt. Ooy mecxtujcɨn nmɨdɨdyɨch ajcxy. Ooy ñich ajcxy nba'ayooyɨch nmɨgügtɨjɨch. Dios yjihui'ñ ymɨc'ajt yajpatp ma ñich ajcxy njot nhuinma'ñ. Ooy ñich miich ajcxy ndzojccɨxy njihuɨygyɨxy cɨxyjot huɨnɨjot. ⁷ Nyajniguëxɨgɨpy ñich ajcxy co ndungɨxyɨch mɨd Dios ycɨxpɨ, mɨd co ngapxhuäcɨxyɨch Cristo y'ayuc yty'ajt tudägyɨpi, e nañ mɨd co nmɨdɨdyɨch ajcxy Dios yjihui'ñ ymɨc'ajt, etz mɨd co nmɨdɨdyɨch ajcxy ca'pxy Dios yty'ajt tudägyɨpi. Mɨd yi' yty'ajt tudägyɨp nyajmibicyɨch jäy ajcxy, etz mɨd yi' yty'ajt naygohua'ñyijɨch ma nmɨdzipɨch. ⁸ Mɨnaajity jay xycapxpáadygyɨch; mɨnaajity jäy ajcxy xyñigapxy xyñi'ojɨygyɨch; mɨnaajity jäy ymɨnaangɨxy co oy nduñɨch; mɨnaajity jäy ymɨnaangɨxy co jibɨcɨ nduñɨch; mɨna ngamɨna jäy xytɨjɨcɨxyɨch co n'ɨndáaccɨxyɨch; e mɨnaajity jäy ymɨnaangɨxy co ty'ajt ngapxpɨch. ⁹ Mɨnaajity jäy ymɨnaangɨxy co ajcxy ca' xy'ixy'ajtigɨxyɨch; e mɨnaajity jäy ymɨnaangɨxy co ooy oy xy'ixy'ajtigɨxyɨch; e mɨnaajity ayo'n jɨp'am o'cɨn jɨp'am nhuɨdɨjtcɨxyɨch. Per jactzɨnaaybɨch ajcxy jadu'n. Ti je tungmɨdɨpi xychaachytungɨxyɨch, per ca' ñich ajcxy xyaj'o'cyi. ¹⁰ Ooy ñich ajcxy njatajɨcɨxy

njamaaygixy, per jabom jabom jotcuje nayjihuiygixyich. Ayoobi ich ajcxy ca' ti meeñ etz ca' ti pidägy nmïd'ájtçixyich. Per nañ jadu'n mayjäy oy'ajtin pada'ñ ma Dios mïd ich ajcxy ndung ycixpi, jadu'n jada oy'ajtin nipaady nej meeñ etz nej pidägy. Oy ca' meeñ etz ca' pidägy nmïdidyich ajcxy, per nmïdich ajcxy tüg'óciy huïdibi nimina ca' ycixy ytigooy.

¹¹ Migügtijc ajcxy, huïdibi yajpatp jim Corinto, ti nmïdcapxcixy ti nmïdmïydaaccixy ma jada necy mïd tüg'óciy tudägy'ajt. Ti ngapxyich nmïydägyich nej njot nhuinma'ñ nmïdidyich. ¹² Ca' ich n'ixmach nej ich miich ajcxy ndzojccixy njihuiygixy cixyjot huinijot. ¹³ May'ajt nbijctzooybich ma miich ajcxy co xyajnimähuïbich nej miich ajcxy mjot mhuinma'ñ mïdity tim jadu'n nej ti nduunich mïd miich ajcxy. Jadu'n may'ajt nbijctzooyich ma miich ajcxy nej ungedeedytjic ajcxy oy'amy y'ung ajcxy ihuïjçixy capxhuïjçixy.

Ich ajt je' ma Dios jugypi chinaayin

¹⁴ Miich ajcxy, ca' mdungmujccixy m'ayoomujccixy mïd jäy ajcxy huïdibi ca' mibijccixy Cristo. Com ca' huaad tudägyjäy ajcxy mïddzinaaygixy jäy ajcxy huïdibi ca' tudägy huinma'ñ mïdity. ¿Nej jëbi je huïdibi tiy'ajtip ytügiy mïd huïdibi ca' ytiy'ajtity? ¿Nej jëbi pinjaty tiy'ajt mïd mïd'idipy pinjaty huïdibi ca' tiy'ajt mïdity? Je huïdibi tiy'ajt mïd jadu'n nipaady nej chinäy ma jin ytiçxin. E je huïdibi ca' tiy'ajt mïdity ñipatp nej jihuïy chinäy agootztuuby. ¹⁵ ¿Nej jëbi Cristo etz Satanás ñay'ayuc-huinjihuiygixy? ¿Nej jëbi tüg mibijçpi yajtügiiy yhuinma'ñ mïd tüg huïdibi ca' ymibicy? ¹⁶ Ca' ni nej jëbi tzaadzech quipychech y'idipy ma Dios ytijc. Com yi' ajcxy huïdibi tzaadzech ojadajtp ca' ajcxy yhuinma'ñ ytügiy mïd Dios ytiy'ajt. Je Dios juugypi ymïd chinaydac ma ich ajt njot nhuinma'ñ, paady ycixp jadu'n ich ajt nipaady nej Dios ytijc. Com jaybety y'ity ma Dios jadu'n ymina'ñ:

Ndzinaydac nbidägaamybich ma yi' ajcxy. Huïdidaamybich ma yi' ajcxy yajpaady. Yi' ajcxy ich xyDios'adaanip. E ich ajcxy yi' njäy'adaanip.

¹⁷ Paady nañ jadu'n ajt nHuindzin Dios ymina'ñ:

Copicy co miich ajcxy m'ixmadziy y' jacjadyii jäy ajcxy, e tzinaaygix abicy. Ca' ajcxy mnijot'adipy je jibicpi, huin'it ich miich ajcxy ngöbigipyich.

¹⁸ Ich miich ajcxy xymïd'adipyich jadu'n nej jihuïy ich miich ajcxy xyTeedy'adyii. E jadu'n miich ajcxy m'idipy nej ich nmang n'anäg. Jadu'n je mijpi Dios ymina'ñ.

7

¹ Miich ajcxy huïdibi ooy ndzocy njihuïyich, com Dios jadu'n ymina'ñ co tzinaydac pidäga'ñ ma ajt njot nhuinma'ñ, paady ycixp tzoc yajhuaatzim ajt njot nhuinma'ñ, etz ma ajt n'espíritu, e jadu'n Dios nhuindzigiiyim etz nyajmij'ajtim cixyjot huinijot.

Co ajcxy jothuimbijt ma Dios huïdibi ajcxy jim Corinto

² Tungix may'ajt xycöbigipich miich ajcxy cixyjot huinijot. Ca' ich ajcxy ni pin ti nmïdundigóoygixyich, nañ jadu'n ca' ni pin ich ajcxy ti nyaj'ixpijccixyich jibic-huinma'ñ. Nañ jadu'n ni ca' ich ajcxy pin ti nhuin'ñich. ³ Ca' jadu'n nmïna'ñich mïd co nya-jpocycähua'ñich miich ajcxy. Com jadu'n jacjayjip ti mïna'ñich co ooy ndzocy njihuïyich miich ajcxy, tú'ciy ajcxy ndzinaayim, e tú'ciy ajcxy n'ó'cimipy. ⁴ Ooy ich miich ajcxy njot'amij'adyiijich. Ooy ich miich ajcxy ngömaaygixy. Ooy jotcuje nayjihuiyiijich mïd miich ajcxy ycixpi. Oy njayajpaadyich tzip agujc ayo'n agujc, per co njäyechich miich ajcxy, jotcuje nayjihuiyiijich.

⁵ Nej ich ajcxy nja'ty ya Macedonia, ca' njotcuje'ájtçixyich. Hue' nyajpaadyich ajcxy tzip agujc capxy agujc huen ma'ámyity. Jäy ajcxy xymidzip'ajtpich, etz nañ jadu'n tzigiiybich jotjoty huinma'ñyjoty. ⁶ Per Dios je huïdibi yajjotcugiiyb yajjotmçpijçp pinjaty tajp mayb, yi' ti xyajjotcugiiyich co Tito yja'ty ya ma ich nyajpaady co jim choñ ma

miich ajcxy. ⁷ Ca' nan ti njotcugiyich mïid tim jëyi co Tito ti xyñijadyich. Hue' ti njotcugiyich co yi' ti xyñimäyich jadu'n nej yi' jotcuje'ajtin ti paady ma miich ajcxy. Yi' ti xyajmïidmïydägyich jadu'n nej miich ajcxy tajin mayin mjihuiiygixy mïid mbocy ycixpi. E nañ jadu'n nej mhuinmaaygixy nej nyajpaadyich. E mïid jada ayuc nigï ti njotcugiyich.

⁸ Hich ca' ndajy nmayich mïid co ïch miich ajcxy ti nyajtajcixy ti nyajmaygixy mïid je necy huidibi ajcxy nyajniguejx. Oy anajty ti njajihuiyich jotmay co nnejhuiyich co miich ajcxy ooy mdajy may tüg xï mejtz xï mïid ïch nnecy ycixpi. ⁹ Jadachambi ooy jotcuje nayjihuiyijich. Ca' nmïinaanim mïid je tajin je mayin ycixpi huidibi miich ajcxy anajty mïid jotcuje'ajtpich, com co je tajin je mayin ajcxy ti xyajjothuimbijtcixy, Dios ti jäygidägy jadu'n nej miich ajcxy ti mmïmadaaccixy je tajin mayin. E ca' ïch ti ndundïgooyich ma miich ajcxy co ajcxy njotmaymoy. ¹⁰ Com Dios yjäygidacpyi co jäy njothuimbijtcixy, mïid co taj may ñayjihuiyigixy mïid ypocy ycixpi. E co ajcxy yjothuimbijtcixy, huin'it ajcxy je y'alma nidzoocin paadipy. E ca' je' huaad nidajim nimaayim co ajcxy y'alma ñïdzögy. Co jäy ajcxy nidajcixy nimaaygixy huïdi yajpat ya naaxhuiñ, e ca' yjothuimbijtcixy, jadu'ñi nicxy je o'cin nipatcixy. ¹¹ Mïid je tügpi jäy ypocy ycixpi ti mbaatcixy je tajin mayin. Miich ajcxy jadu'n ti mmecxtujccixy je tajin mayin jadu'n nej Dios jäygidägy. Tungix cuendi jada' cham nej ti yhuimbïdzïmy. Tïydudägy janch cham ti mïydungixy mïid je pocy ycixpi. Ti xyajjotma'tcixy, e ti xy'adzïgyigixy, e ni'ixïy miich anajty m'ijtcixy co mdzaachytunaangixy je huïdi ti ytundïgooy. E mïid jada ycixpi ti miich ajcxy myajniguëxïccixy, co ca' miich ajcxy ti pocy mmïidity ma jadayaabi huinma'ñ. ¹² Co ïch miich ajcxy jayhuin nijayiy, ca' nmïinaanim mïid je' ycixpi huidibi anajty ti ytundïgooy. Nañ ca' nmïinaanim mïid je' huïdibi anajty ti yajmïidundïgooy. Nijayiyich miich ajcxy, jigix jëbi mnejhuiyigixy je tiy'ajt nej Dios tzocy co nduunich mïid miich ajcxy m'oy'ajtin ycixpi. ¹³ Com miich ajcxy ti mmïjottïgooyb Dios ytiy'ajt, paady ycixpi miich ajcxy ti mbaatcixy jotcuje'ajt, e nañ jadu'n ïch ajcxy ti nbäatcixyich jotcuje'ajt mïid miich ajcxy ycixpi. Nañ jadu'n ooy ti njotcugiyich ajcxy mïid co Tito ooy chachjotcuje'ajty. Oy'amy miich ajcxy ti mgöbijccixy Tito, paady yi' ooy ti yjotcugiy mïid miich ajcxy ycixpi.

¹⁴ Co ti nnimäyich Tito co njot'amij'adyijich miich ajcxy, ca' ti tzo'ydu'n ti nbaadyich, co yi' oy ti xycö'ixïygixy. Nigï oy ti yhuimbïdzïmy mïid co tüg'ócïy ayuc huïdibi ïch miich ajcxy ti nyajnimäy ti yhuimbïdzïmy co yjanchity. Nañ jadu'n ti yhuimbïdzïmy co yjanchity jadu'n nej ti nnimïydacyich miich ajcxy mïid Tito co njot'amij'adyijich miich ajcxy. ¹⁵ Jadu'n nej co Tito oy miich ajcxy xycogapxïy, yi' ooy nigï xychojccixy xyjihuiyigixy co yi' nejhuiy jadu'n nej miich ajcxy mmïjottïgooygixy ïch n'ayuc, jadu'n nej mgapxymïidoohuaangixy. E nañ jadu'n co yi' ijxy nej miich ajcxy yi' mgöbijcy mïid tzigï'ñ jihui'ñ. ¹⁶ Ooy jotcuje nayjihuiyijich, ooy njot'amij'adyijich miich ajcxy.

8

Ycüejticy mïid oyjot oyhuinma'ñ

¹ Jadügnax, miich ajcxy migügtijc, nyajnejhuïhuaamybich nyajmïidmïydägaamybich miich ajcxy, jadu'n nej Dios may'ajt oy'ajt tuñ mïid je mïbijcpïdijc ajcxy huïdibi xï ya yajpatp Macedonia. ² Je mïbijcpïdijc huïdibi ya yajpatp ti ooy ajcxy minaxy yajnaxy tzaachypï etz ayo'n. Per ca' ñejity, ooy ajcxy jotcuje yajpatcixy. Nañ ayoobi ajcxy, per ti ajcxy may meñ yajmujccixy, jadu'n nej jihuiy ajcxy ycomeeñity. ³ Hich testigo co je migügtijc mïid yci'm tzojcin meñ yejccixy, nej jëbi ajcxy ymadaaccixy mïid meñ, ixti anaxy ajcxy yejccixy. ⁴ Ooy xymïnucxtägyich ajcxy co n'a'ixïhuibich ajcxy co jëbi ajcxy meñ yajmujccixy huïdibi mïid pubedaangixy jacjadyii je mïbijcpïdijc. ⁵ Nigï anaxy ajcxy ooy meñ yajmujcy ca'ydi jadu'n nej anajty njïjp'ixyich. Jayïjp ajcxy ñayyejci ma ajt nHuïndzin Jesucristo, e huin'it ajcxy ñayyéjcgixy ma ïch ajcxy jadu'n nej Dios tzocy.

⁶ E chi jada' ñich ajcxy ooy nminucxtacy Tito co huen ñicxy jadüg'oc ma miich ajcxy. Huen ñicxy yajcixy yajmay huídibi ti yajtzondägy ma miich ajcxy. Co huen je meeñ yajmujctäy huídibi cixyjot huinijot müd mbubedaangixy je mibijcpidijc ajcxy huídibi yajpatp jim Jerusalén. ⁷ Miich ajcxy nigí ooy mmadaaccixy, ca'ydi jacpinjaty ma tüg'ociy Dios ytung. Ooy mij mibijcin miich ajcxy müdity. Ooy myaj'ixpijccixy Dios ytíy'ajt. Ooy mmijottigooygixy mguydunaangixy ñich n'ayuc. E nañ jadu'n ooy miich ajcxy xychojccixy xyjihuiygixyich. Nañ ooy ndzocyich co miich ajcxy nigí pubejtin myegipy ma je mibijcpidijc huídibi jim Jerusalén.

⁸ Ca' jadu'n n'ane'myich co mbubéjtcixipy je migügtijc huídi jim Jerusalén. Hue' ndzocyich co miich ajcxy mnejhuíhuipy jadu'n nej yí jacjadyii mibijcpidijc yhuinma'ñ bidaaccixyp ci'm co pubedaangixy je ymigügtijc jim Jerusalén. Jadu'n mdunipy ajcxy jigix jébi nnejhuíhuibich pen janch tíy'ajt jadu'n co mdzojccixy mjihuiygixy yí jacjadyii mibijcpidijc. ⁹ Com miich ajcxy mnejhuígyixyp jadu'n nej ajt nHuindzin Jesucristo mijmay'ajt mij'oy'ajt tuñ müd ñich ajt ycixpi, jadu'n Jesús nipaady nej tüg mijcomeeñybi jiihy tzajpjoty, müd co yí xychojccim xyjihuiyim mijcajee, chi yí ixmajtztay yí y'oy'ajtin jiihy tzajpjoty co ycidacy ya naaxhuiñ etz y'ayooy ya. Miich ajcxy ca' anajty ti müdity jiihy tzajpjoty, per jadachambi mbadaangixyp mij'oy'ajtin jiihy tzajpjoty.

¹⁰ Müd miich ajcxy m'oy'ajtin ycixpi, ma jada necy nmooybich miich ajcxy ngapxhuijin jadu'n nej jébi huaad mdungixy oyjäy'ajtin. Jac'oy co miich ajcxy myajcixipy je huídibi ajcxy myajtzondac jadöjimijt. Miich ajcxy jacjayijp ca'ydi jac ni pinjaty ti myajtzondaaccixy meeñ yajmugii huídi müd mbubedaangixy je mibijcpidijc huídibi yajpatp jim Jerusalén. Nañ jadu'n miich ajcxy jacjayijp ca'ydi jacpinjaty mijottigooygixy co mbubedaangixy jacjadyii mibijcpidijc. ¹¹ Jadachambi tiempo jactungix pubejtin, meeñ yajmujccix cixyjot huinijot jadu'n nej ti myajtzondaaccixy ixti mabaad myajmaygixy je meeñ yajmugii. Nidüg nidüg yejccix nej ajcxy ii müdity. ¹² Pinjaty y'ofrenda yejcp janch cixyjot huinijot Dios ycöbicip yí je' y'ofrenda, jadu'n nej ii müdity. Dios ca' yí pijctzoy huídibi ajt ca' nmüdity.

¹³ Ca' nmina'ñich co oy jadu'n co mbubéjtcixip jacjadyii mibijcpidijc ixti mabaad mnayyajhuí migixy ayo'ndumb. ¹⁴ Hue' yajmína'ñ co quipxyjaty mdzinaaygixy, ni pin cayajconaxipy e ni pin cayajmayjadípy. Jadachambi tiempo miich ajcxy mmüdity ca'pxy je huídibi mnidzinaaygixip, ixti miich ajcxy conajxpi, paady ycixp jébi mbubéjtcixipy migügtijc huídibi yajmayjajtp. Jadüg tiempo miich ajcxy myajmayjadípy, e jacjadyii migügtijc jébi xypubéjtcixipy, e jadu'n yhuimbídzimipy co mnaybubéjtigixy quipxyjaty miñ xyipy. ¹⁵ Com jadu'n jaybety y'ity ma Dios ñecy ma jadu'n ymina'ñ: "Pinjaty anajty may'amy müd, ca' yajconajxy. E pinjaty anajty hueeni müd, ca' yajmayjajty."

Tito müd ymigügtijc ajcxy

¹⁶ Per nyajnajxypich jäygidaacin ma Dios, com Dios ti pidägy ma Tito yjot yhuinma'ñ co mijottigooy miich ajcxy m'oy'ajtin, tim jadu'n nej ñich nmijottigooyich miich ajcxy m'oy'ajtin. ¹⁷ Co may'ajt nbijctzooyich ma Tito co ñicxipy jadüg'oc ma miich ajcxy, agujc jotcuje cöbicy, com ti anajty jayijp yhuinma'ñ pidägy ci'm co ñicxa'ñ jadüg'oc ma miich ajcxy. Jadachambi Tito ñicxip ma miich ajcxy müd ci'mdzojcin.

¹⁸ Quipxy müd Tito nguexy ñich ajcxy yam tüg nmigüg huídibi ooy chachcapxpaadyity majaty mibijcpidijc, co ooy oy ytuñ capxhuäcxí Jesús y'ayuc ytíy'ajt nej huaad jäy ajcxy y'alma nidzoocin paady. ¹⁹ Ca' nan jéyi co je mibijcpidijc yí ycapxpadyii. Nañ jadu'n ti yhuin'ixyii mibijcpidijc ajcxy co jébi yhuidity müd ñich ajcxy, e tunipy pubejtin müd je may'ajtin oy'ajtin huídibi ñich ajcxy ndumybich müd je migügtijc ycixpi jim Jerusalén. Jadu'n nduuñich jaydëbi jäy ajcxy capxpaadip ajt nHuindzin Jesucristo. Etz nañ jadu'n jaydëbi ñiguëxigy co ñich ajcxy nbubeda'ñich ajt nmigügtijc cixyjot huinijot. ²⁰ Ooy ngüend'atyich je meeñ huídibi je mibijcpidijc ti yajmujccixy, jigix ca'ydi pin huaad

xyñigapxy xyñi'ojjyich, jadu'n nej ñich ajcxy meen nyajmújccixyich. ²¹ Jadu'n ñich ajcxy nhuinma'ñ nbidägy co tudägy ndunáangixyich ca' nan jëyi ma ajt nHuindzin Jesús yhuinduu, nañ jadu'n ma je mayjây ajcxy yhuinduu.

²² Nañ jadu'n nguejxypich mïid yí' ajcxy jadüg ajt nmigüg, je huídibi oy ti ytuuñ ma Dios ytung quipxyi mïid ñich ajcxy e nejhuiybich co tudägy ytuñ cixyjot huinijot. E yí' miich ajcxy ooy xyjot'amij'adyii, e oy ytuna'ñ mïid miich ajcxy ma Dios ytung. ²³ Pen jim pinjaty nidiy yajty je Tito, nimaaygix co ñich yí' nmigüg, e yí' mïid nduuñich ma Dios ytung ma miich ajcxy. E nañ jadu'n pen jim pinjaty nejhuihua'ñ pinjây ajcxy yí', yí' jacjadyiibi huídibi ajcxy nicxp mïid Tito. Nimaaygix co je mibijcpidijc ajcxy ya Macedonia ti quexy ajcxy, ytungixy mïid Cristo ymij'ajtin ycixpi. ²⁴ Paady ycixp miich ajcxy yí' mdzójccixipy mjihuigyixyipy je migügtijc ajcxy huídibi mimb mïid Tito, jigix jëbi je mibijcpidijc ma nidüg nidüg cajp ya Macedonia nejhuihuipy co miich ajcxy yí' mdzojccixy mjihuigyixy je mibijcpidijc tiydudägy. E paady ycixp jëbi ñich jotcuyc nayjihuiyijich mïid miich ajcxy ycixpi.

9

Je cüejtin mïid je mibijcpidijc ajcxy ycixpi

¹ Nañ ca' yjaty ycopicyity co ñich miich ajcxy njacnijayigyixy co je mibijcpidijc huídibi xii ya pubejtin tunaangixyp ma Dios yjây huídibi ajcxy jim Judea. ² Com nejhuiybich co miich ajcxy nañ jadu'n mbubedaangixy cixyjot huinijot Dios yjây huídibi ajcxy jim Judea. Paady ycixp jotcuyc ñich jadu'n nnimäyich je mibijcpidijc ya Macedonia jadu'n nej miich ajcxy jim Acaya mhuinma'ñ pidacy jidöjimijt co mbubedaangixy je mibijcpidijc huídibi jim Judea. E mïid co miich ajcxy jayijp mhuinma'ñ ti mbidaaccixy co mbubedaangixy je mibijcpidijc huídibi ajcxy jim Judea, paady ycixp may mibijcpidijc ya Macedonia yhuinma'ñ pidaaccixy co ypubedaangixy nañ jadu'n. ³ Paady nguejxypich Tito mïid jacjadyii migügtijc ma miich ajcxy, jaydëbi xypubéjtcixipy ma je meen yajmugii, jadu'n nej ti mbidaaccixy huinma'ñ. E ñich ca' ti tzo'ydu'n nbáadibich mïid miich ajcxy ycixpi ma jada pubejtin huídibi ajcxy mguexamyb jim Judea. Com ñich ti nnimäyich mayjây co miich ajcxy ni'ixi' m'ijtcixy mïid mbubejtin. ⁴ Ca' yjegyity co nijëjity mibijcpidijc huídibi tzinaayb ya Macedonia ñicxa'nip ajcxy mïid ñich co anajty nnicxyich jim ma miich ajcxy. E co anajty ñich ajcxy jim nmejtzcixy, e chi ajcxy nbáatcixipy ca' anajty ajcxy mni'ixijity. Pues chi ooy tzo'ydu'n njihuñhuibich, com ti anajty ooy njot'amij'ajtigixy. Nañ jadu'n miich ajcxy tzo'ydu'n mjihuñhuip. ⁵ Paady ycixp huinma'ñ nbidägyich co oy jadu'n co nijëjity migügtijc nicxy jayijp xycogapxyigyixy, e huen xypubejtcixy ma yí' meen yajmugii jadu'n nej jidöjimijt ti mgapxytungixy. E co anajty nmechich jim ma miich ajcxy, chi ni'ixi' anajty ajcxy mïidity yí' m'ofrenda, e jëbi jây ajcxy nejhuihuip co yí' m'ofrenda ti myejccixy cixyjot huinijot, ca'ydi jây yminaangixy co ñich miich adzip ajcxy ti n'ane'mgixy co m'ofrenda nyajmújccixipy.

⁶ Jäymetz miich ajcxy jadu'n nej ayuc y'oc'ity: Pinjaty hueni niip, nañ jadu'n hueeni ycosecha yajpidigy. E pinjaty mij niip, nañ jadu'n mij ycosecha yajpidigy. ⁷ Nidüg nidüg mibijcpi yegipy y'ofrenda jadu'n nej anajty ci'm yhuinma'ñ ti pidägy co yega'ñ. E ca' yegipy ametz jotmetz. E nañ jadu'n ni yca'adzip yca'a'écity. Com Dios chojcpy yjihuñyb pinjaty cixyjot huinijot y'ofrenda yejcp. ⁸ Dios jëbi may'ajt oy'ajt tunipy mïid miich ajcxy mijcajee, e miich ajcxy mbáatcixipy tüg'óciy tijaty conuucxin, e ixti mmïid'adipy tüg'óciy huídibi myajmayjajtcixy, e nañ jadu'n conaxpi naadigibi nej huaad jacjadyii mibijcpidijc mbubejtcixy, e mdúngixipy canaagnax oyjây'ajtin. ⁹ Jadu'n jaybety ymiñ ma Dios ñecy, ma jadu'n ymina'ñ:

Yí' oyjâydiyc ajcxy, yí' ajcxy nimooyb ayoobitijc huídibi ajcxy yajmayjajtpy. Yí' oyjâydiyc ajcxy co oyjây'ajtin tungixy, yejccixyp ijxpejt oybi huídibi y'idipy huinixii.

¹⁰ Dios yejcpy je t̄im huĩdibi jāy ajcxy ñiipy, nañ jadu'n Dios yejcpy je j̄icxy p̄icy huĩdibi nidzinaayim nijugy'ajtim. E jadu'n co miich ajcxy oyjāy'ajtin mdungix mijcajee, je m'oyjāy'ajtin ajcxy ñipaadip nej jihuiy mgosecha myajp̄id̄ic̄ic̄ixy may'amy. ¹¹ E jadu'n miich ajcxy m̄id'ad̄ipy t̄ug'óc̄iy jugy'ajtin comeñ'ajtin, jaydēbi m'ofrenda myejcc̄ixy mij'amy. E mayjāy ajcxy Dioscojuyip yajnaxipy ma Dios m̄id je m'ofrenda yc̄ixpi, co anajty nyecyich miich ajcxy m'ofrenda ma yī' ajcxy huĩdibi yajmayjajtp. ¹² Co ñich ajt pubejtin nyejcim ma jacjadyii migūgt̄ijc, canan jēyi co nbubejtim m̄id tijaty yajmayjajtc̄ixyp. Nañ jadu'n yī' ajcxy jēbi yajnax̄ic̄ixy Dioscojuyip canaag'oc. ¹³ Yī' ajcxy capxpadamb Dios m̄id co je m'ofrenda huĩdibi ajcxy ti myejcc̄ixy, yī' je' t̄iy'ajtip co miich ajcxy mgapxym̄idooḡixy Cristo y'ayuc yt̄iy'ajt. Paady yc̄ixp may m̄ib̄ijcp̄id̄ijc ajcxy Dios ojadajtc̄ixipy e nañ jadu'n Dios ñbáat̄ic̄ixipy capxp̄aat̄ic̄ixipy m̄id je pubejtin huĩdibi miich ajcxy anajty myejcpy m̄id yī' ajcxy yc̄ixpi, etz nañ jadu'n m̄id jacjadyii m̄ib̄ijcp̄id̄ijc yc̄ixpi. ¹⁴ E c̄i'm yī' ajcxy Dios ojadad̄ipy m̄ib̄ijctzohuipy m̄id miich ajcxy yc̄ixpi, etz xychójjc̄ixip xyjihuiȳḡixip ooy m̄id co Dios je mijpi conuuc̄xin ti yecy ma miich ajcxy. ¹⁵ Dioscojuyip yī Huĩdzin'ajtim Dios m̄id yī ym̄ijconuuc̄xin huĩdibi ti yecy ma ñich ajtin, ni pin canejhuiy nej jēbi yajnajtzc̄ap̄ix̄iy.

10

Pablo m̄id̄ity cōtujc̄in co y'apóstol'adyii

¹ ñich Pablo nm̄igapxyp̄ich miich ajcxy m̄id yungnaxy njot nhuinma'ñ, jadu'n nej jihuiy Cristo miich ajcxy xym̄id̄m̄ydaacc̄ixy. Com Cristo yungnaxy jot huinma'ñ m̄id̄ity. Nijējty miich ajcxy ym̄inaanḡix co ooy yungnaxy nayb̄id̄äḡyij̄ich co n'ityich m̄id miich ajcxy, e jadachambi co jiguēgy nyajpaadyich, hue' n'ahuimbityich ahua'ñ, ndunaamyb̄ich ti ndunaamyb̄ich. ² May'ajt nb̄ijctzooyb̄ich co anajty ñich miich ajcxy nic̄xy n'ijxc̄ixy, ca' jadu'n ndzocyich co cop̄icy n'ahua'ndäḡib̄ich m̄id nijējty miich ajcxy huĩdibi xyñ̄ihuambejtp̄ich, co nduñich etz ngapxyich ngi'mtzojcin tim jadu'n nej huenpin naaxhuiñjāy ytungixy etz ycapxc̄ixy m̄id yc̄i'mtzojcin. Janch ni'ixi' n'ityich, co anajty jim nmechich, chi m̄id nnayhuĩdināhūiyb̄ich yī' ajcxy huĩdibi jadu'n xyñ̄ihuambejtp̄ich. ³ Janch t̄iy'ajt co ndzinaayich jadu'n nej naaxhuiñjāy chinaayḡixy. Per ca' ndziptuñich nej jāy ajcxy chiptungixy. ⁴ Ca' ñich ajt nyajtunim naaxhuiñjāy ym̄ic'ajt co nnaygohuaanim ma je jib̄ic̄pi huĩdibi xym̄idzip'ajtim. Hue' nyajtunim Dios ym̄ic'ajt, huĩdibi jēbi m̄id nm̄imadaacim t̄ug'óc̄iy huĩdibi ca'oybi m̄id. ⁵ Jadu'n ñich ajcxy ca' nyajtzobadāanḡixyich je ayuc t̄iy'ajt huĩdibi ca' yjanchity, etz je' ayuc pin amij aḡix nayb̄idaacip co Dios y'ayuc yt̄iy'ajt adujci. T̄ug'óc̄iy naaxhuiñjāy y'ayuc yt̄iy'ajt nb̄id̄aacc̄ixyich ma Cristo, jigix t̄ug'óc̄iy jāy ajcxy capxym̄idohuip Cristo. ⁶ Co anajty miich ajcxy mhuinma'ñyb̄idaacc̄ixy co huädz mgapxym̄idohuaanḡixy t̄ug'óc̄iy Cristo y'ayuc yt̄iy'ajt, pinjaty cacapxym̄idooy, hue' ni'ixi' n'ijtc̄ixich co yajmōhua'ñ castigo pinjaty cacapxym̄idoo.

⁷ Miich ajcxy yī' mdzachuend̄itungixy jāy ajcxy nej yjāy'ajtc̄ixy. Pen jim pinjaty ñayjihuiȳii janch agujc jotcujc co Cristo yhuin'ixȳii m̄id ytung yc̄ixpi, huen huinjihuiȳḡixy jotjoty co Cristo ti xyhuin'ijxc̄ixyich nañ jadu'n m̄id yī' ytung yc̄ixpi. ⁸ ñich ca' ti tzo'ydu'n jihuiȳich m̄id co c̄i'm nnaygōmayij̄ich hueeni m̄id co Jesucristo xymooyḡixyich ane'm̄in cōtujc̄in. Com ñich ajt nHuĩdzin Jesucristo ti xymóoyḡixyich jada cōtujc̄in, jigix ñich miich ajcxy nyajyeec̄ip mm̄ib̄ijcin, canan nyajtigoyip ajcxy mm̄ib̄ijcin. ⁹ Ca' jadu'n ndzocyich co yquēx̄iḡipy jadu'n nej jihuiy n'adziḡihuaanḡixy m̄id je necy huĩdibi nyajniḡuejxyp̄ich miich ajcxy. ¹⁰ Ym̄inaanḡixy co ñich nnecy ooy tzaachyaty chach chaach. E ym̄inaanḡixy co ma jāy ajcxy yhuĩduu yung naxy njāy'aty, e ngapxin nm̄ydaac̄inich ca' pin jāygd̄ägy. ¹¹ Per yī jāy ajcxy huĩdibi jadu'n

minaangixp, copicy ajcxy nejhuihuipy co jadu'n nej ich ngapxin necyjoty co nijayiygixy, co nyajpaadyich jiguem, nañ tim jadu'n ngapxa'ñich co anajty n'ityich ma miich ajcxy.

¹² Ca' huaad n'ocnay'ixquipxim o nyajtügüym müid yi' ajcxy ytung huidibi tzach naygömayaanip ci'm. Tzuu huinma'ñ locihuinma'ñ ajcxy ytungixyp, co pin jadu'n nay'ixquipxip naymidoguiplxip müid yci'm'ayuc yci'mhuinma'ñ huidi ii yajtpy ñejhuüyb.

¹³ Ca' ich ci'm naygömayüyb ma ycapadyii, huidibi ich ajcxy ca' xypátcixyich. Dios ich ajcxy xyajnejhuüybich nije' nije' it lugar ma yi' tzocy ndúngixibich. E Dios jadu'n tzojc co nicxy ndungixy jim Corinto ma miich ajcxy myajpatcixy. ¹⁴ Paady ycixpi ndúngixyich jeyi ma Dios xyquexyich, ca' jac ma. Nej ixypy y'octunyii y'ocjadyii, pen ca' ixypy ich jayjip ti n'ityich ma miich ajcxy. Pues ich tim jayjip ngapxhuäcx Dios y'ayuc ma miich ajcxy, e ca' jac ni pin. ¹⁵ Pen huingbi jäy je Dios ytung yajtzondaacip ma tüg cajp, pues ca' ich huaad jim nduüñich, jadu'n nej jihuüy ich ti nyajtzondägyich je tung. Ca' jadu'n nduüñich, hue' njjip'ixypich co miich ajcxy myajyeegip mmibijcin, huin'it jebi njactunipich ma miich ajcxy, jadu'n nej Dios tzocy co ndunipyich. ¹⁶ Co anajty jadu'n ti njactuñich ma miich ajcxy, huin'it xii ya n'ihuäcxa'ñich ngapxhuäcxa'ñich Cristo y'ayuc ytiy'ajt ma je it lugar jactim jiguemjatypi ma miich ajcxy. Per ca' nduna'ñich ma huingbi ti yajtzondägy je tung.

¹⁷ Ooy ycopicyty ngömayim nyajmij'ajtim ajt nHuindzin Jesucristo, e ca' y'oyity co naygömayim ci'm. ¹⁸ Com Dios ca' jäygidägy pinjaty ci'm naygömayip. Hue' Dios jyäygidacyi pinjaty ajt nHuindzin Jesucristo capxpatp.

11

Pablo etz je' ajcxy huidibi y'ayuccapxhuäcxp müid anii

¹ Huaad co miich ajcxy ixypy xy'ocmimextujcich hueeni ich nloci huinma'ñ huidibi ngapxaamybich. Oy ixypy ñejity mimecxtuccich. ² Ooy ndzocy ooy njihuüyich miich ajcxy. Dios ti xymöyich je tzojcin jihuüyin huidibi nmüidich müid miich ajcxy ycixpi. Ndzojcyipich co cixyot huinjot miich ajcxy mmijpidaaccixy Cristo. Co miich ajcxy yajmij'adip Cristo cixyot huinjot, huin'it jadu'n miich ajcxy nipaadipy nej tüg töxy'anäg pi'cnip huidibi pijcp müid tüg yëdyjc. ³ Ndzigiüybich co huingbi jäy xyajhuinma'ñyidigoyaangixy müid ixpicytjic y'ayuc huidibi ca' ytiy'ajtity. E miich ajcxy m'ixmadzaangixy jadu'n nej cixyot huinjot ti mmijpidaaccixy Cristo. Tim jadu'n nipada'ñ miich ajcxy mjadaangixy nej yajty jecy'ajty je Eva co tza'ñ yhuin'ini. ⁴ Com miich ajcxy mgöbijccixy huingbi jäy huidibi tigachjaty yaj'ixpijcp Jesús ytiy'ajt, ca' yjadu'nity nej ich ajcxy nyaj'ixpicyich. Etz nañ jadu'n miich ajcxy jotcuje mgöbijccixy huingbi espíritu, ca' yjéjity je Espíritu Santo huidibi ti mgöbijccixy jayjip'aty. Etz nañ jadu'n mgöbijccixy tigachjaty ayuc tiy'ajt, e ca' y'ocjéjiñ huidibi ajcxy m'alma xyajnidzoocip. Ca' y'ocjéjiñ huidibi ti mmidoogixy ma ich ajcxy. Mic'amy mdzachmijpidaaccixy huingjäy y'ayuc. ⁵ Ca' jadu'n ytiy'ajtity co yi huindzindijc ajcxy huidibi naydíjigixp Jesús y'apóstol huidi jim ma miich ajcxy, co jac mic'ajt müid ajcxy etz yjacmüid ajcxy ixpijcin ma Dios ytiy'ajt, ca'ydi ich. ⁶ Oy ich jada' ca' njatyich nej yajxon ngápxibich, ca' ooy ngo'ayúcgich. Per ca' ñejity com yajxon njatyich nnejhuüyich Dios ytiy'ajt. E ti nyaj'ixcixy nyajnejhuüyigixy co n'ixpicycgich ma Dios ytiy'ajt müid je ayuc huidibi ngapxhuäcxich ma miich ajcxy etz je mijhuinma'ñ huidi nduunich co jim n'ijtyich ma miich ajcxy.

⁷ ¿Nej tundigoyich jada' co ngapxhuäcxyich Jesucristo y'ayuc ma miich ajcxy e ca' nbijctzooyich meñ müid ndungich ycixpi? Jadu'n nnyajnajxich anajty nej tüg midumbi jigix miich ajcxy jac'oy jacjotcuje mdzinähuiip. ⁸ Ti ngöbicyich meñ huidibi jacjadyii mibijcpidijc ti xymöyich huidibi tzinaayb ma huingbi cajp. Yi' ajcxy ymeñ nyajtuunich co nyaj'ixpijcyich miich ajcxy. ⁹ Co n'ijtyich müid miich ajcxy jadöjimijt jadöhuix'am ca' nbijctzooyich ma miich ajcxy huidibi nyajmayajtpyich anajty. Ca' n'adzijpyich ni pin. Yi' migügtjic huidibi ajcxy tzoon Macedonia, yi' ajcxy xymooyich

huidibi anajty nyajmayjajtypich, paady ycixp ca' anajty meeñ nbijctzooyich ma miich ajcxy, ca' n'adzijpich miich ajcxy. E jadu'n njactuna'ñich jadu'n nej nduuñich mïd miich ajcxy co n'ijtyich jim jadöjimijt. ¹⁰ Nejhuuybich co yjanchity co nmïdidyich Cristo ytiy'ajt, nañ tim jadu'n nnejhuuyich co ci'm nbaadyich huidibi mïdnay'ixyijich. E ca' pin ma tüg'óciy je Acaya naaxjot xycapíjicibich jada jotcujc'ajtin. ¹¹ ¿Na'amy co jadu'n nmïna'ñich? ¿Je' co ñich miich ajcxy ca' ndzojccixy? Ca' yjadu'nity. Dios ñejhuuyb co ndzocy njihuuyich miich ajcxy.

¹² Per njacyajtüyöyaamybich je ndungich huidibi ndumyibich, e ca' meeñ nbijctzohua'ñich mïd ñich ndung ycixpi jigix co yi' jacjadyii huindzindijc huidibi yaj'ixpijccixp ma miich ajcxy, ca' jëbi y'ñndaaccixy co yi' ajcxy tú'ciy ytungixy jadu'n nej ñich nduuñich. ¹³ Yi' ajcxy ymïnaangixy co Cristo ti yajnïbjicigixy co ajcxy yi' y'apóstol'adyii, e ca' yjanchity, nigoob ajcxy huin'ingixy yi' mïbijcpidijc. Ñayyajnáxigixy ci'm nej jihuuy Cristo y'apóstol'ájtigixy, e ca' yjanchity. ¹⁴ Nañ ni ca' oy nhuinmaayich co jadu'n idüzcixy, com nañ jadu'n je Satanás ñayyajtigachyii ñayyajnaxyii nej Dios y'ángel huidibi tiy'ajt mïd, e ca' yjanchity. ¹⁵ Paady ycixp nmïbijcpich co yi' jáy ajcxy huidibi tumb mïd je mujcu' nañ jadu'n nayyajnaxyii jadu'n nej jáy tudägypí, e ca' yjanchity. Per Dios chaachytunamyb ajcxy jadu'n nej ypadyii mïd je jibicpi ycixpi huidibi ajcxy ytumyb.

Je tzaachypi je ayo'n huidibi Pablo yjajtyp co y'ayuccapxhuäcxy

¹⁶ Jadüg'oc ñich miich ajcxy nnïmaaygixy: Ni pin ycamïna'nipy co ñich locijity. Per pen nijëjity jadu'n ymïnaangixy, ca' ñejity. Miich ajcxy amidoo'ijtcix ñich n'ayuc, jigix jëbi naygömayijich ci'm. ¹⁷ Ca' ñich ajt nHuindzin Jesucristo xycötujcmöyich, co jadu'n jëbi ngapxyich jadu'n nej cham ngapxa'ñich. Hue' ngapxa'ñich jadu'n nej tüg loci jáy co naygömaya'ñiyijich ci'm. ¹⁸ Mayjáy ajcxy ooy ci'm chachnaygömaya'ñiyijixyp mïd huidibi ti tungixy mïd ycim mïc'ajt ya naaxhuiñ. Nañ jadu'n ñich nnaygömaya'ñiyijich ci'm. ¹⁹ Miich ajcxy mdzachcöbijccixyp loci jáy ajcxy y'ayuc, je' co mdzachnayyajnaxáanigixy jadu'n nej jihuuy ajcxy ooy mdzachcohuinma'ñity. ²⁰ Mgöbijcpi miich ajcxy co jáy ajcxy xytumbi'aduyb nej tim tzojccixy, huidibi ajcxy xyhuinjicxp xyhuimbijcp xyhuimmeetzp, e huidibi ajcxy xy'ane'mgixp, xycamij'ijxcixy xycamijpidaaccixy, ixti mgöbijccixyp co xycojxcixy ma ajcxy mhuiñyjipp. ²¹ Oy njatzo'ydu'njihuuyich co nmïna'ñich co ca' jadu'n nmïdidyich je jotmïc'ajtin, jigix jëbi ñich miich ajcxy nduuñich jibic, jadu'n nej yi' jadu'mbi huindzindijc ti xytungixy.

Per jadu'n nej yi' ajcxy ñaygapxpadyii ci'm, nañ jadu'n naygapxpada'ñiyijich ci'm. Ca' ñejity pen capxpich jadu'n nej tüg loci jáy. ²² Pen hebreojäy yi' ajcxy, hebreojäy ñich nañ jadu'n. ¿Conaax cogajp ajcxy Israel? ñich nañ jadu'n. ¿Abraham ajcxy ymij'ap'ajtpy ymijteedy'ajtpy? ñich nañ jadu'n. ²³ ¿Nej tumb ajcxy mïd Cristo? Nigi nduñyich mïd Cristo, ca'ydi yi' ajcxy. Ca' ñejity oy ngapxyich jadu'n nej tüg loci jáy. Jac mïc ti nduuñich mïd Cristo ca'ydi yi' ajcxy. Canaag'oc codungdijc xychaachytuuñich. Ti nyajci'atyich mïd matz etz mïd coochac janch canaag ci' janch ycamacho'nity. Canaag'oc codungdijc xypidaacyich pujxtigoty, e yi' ajcxy ca'. Canaag'oc o'cin jipp'am ti nyajpaadyich, e yi' ajcxy ca'. ²⁴ Migoox'oc judíojäy ajcxy ytungmïdipi xyci'ajtyich mïd cochac iipx majmoxc mïdaax ci'. ²⁵ Tugüg'oc xychaachytuuñich mïd matz. Tügtecy ajcxy xychaagächich. Tugüg'oc je barco yquïñ mejy'agujc je huidibi ñich anajty nyajnicxuyb. Co je barco yquïñ tügtecy, chi tüg tzuum etz tüg xi' n'ijtyich ma je mejy anajty ooy ypidigy. ²⁶ Ooy viaje nduuñich canaag'oc, e o'cjipp'am n'ijtyich ma mïjnïgom yjadyii, e nañ jadu'n ooy anajty may meetzpi yajpaady ma anajty nhuidityich. Nmïgogajpich, yi' judíojäy, xyjayaj'ögaanich ajcxy. Ti ayo'n nbaadyich ciudadjoty etz ma yuugjot etz mejyoty. E nañ ti ayo'n nbaadyich mïd jáy ajcxy huidibi naybidaacip ajcxy nej ñich ajt nmïgüg,

e ca' anajty yjanchity. ²⁷ Minaajity ooy mic njihuüyich ndung n'ayo'nich. Canaag'oc ti ndzumnaxyich ca' nmäyich. Canaag'oc nxinaxyich müd yuu tidzibi. Janam jatzojc n'ayu'atyich. Minaajity ooy njihuüyich je tüchypi, etz nyajmayjatyich nhuit nducxyich.

²⁸ Müd jada ycixpi etz müd jac-huidijaty, nañ jadu'n jabom jabom ooy mic njihuüyich jadu'n nej yajpaady je mibijcpidijc nidüg'óciy canaag picy xi ya. ²⁹ Pen nijéjity mibijcpidijc yajpaady amutz ma ajcxy ymibijcin, nañ jadu'n üch nayjihuiyijich amutz. Pen nijéjity mibijcpidijc ypocytungixy, üch ndzo'ydu'n njihuüyibich etz jibic nayjihuiyijich müd yi' ajcxy ypocy ycixpi. ³⁰ Pen naygömayaanibich ci'm, naygömayaanibich co amutz njihuüyijich. ³¹ Je Dios üch ajt nHuindzin Jesucristo yTeedy, je huidibi huaad n'ojadajtim n'übaatim ngapxpaatim huinixi huinütiempo, yi' ñejhuüyib co tiy'ajt jadu'n nej ngapxyich. ³² Jecy'ajty co n'ijtyich jim Damasco, je gobernador huidibi anajty tumb müd je rey huidibi yxi Aretas, ypidac soldados ajcxy ma jadyii mijtu' ycajptigiy, jigix jëbi xyajnicxyich mach. ³³ Per je mibijcpidijc ajcxy xycodiyñajxich naaxcixy mijcachjoty ma tüg ventana aguu ma je mijpoch huidibi je cajp müd yjübojtz'ahuidityity. E jadu'n ndzoocyich ma je gobernador yci'am.

12

Huidibi Pablo yhuin'ijx etz nejhuüy

¹ Ni ti ycajajpaady ycajajganar'aty co ci'm ndzachnaygömaayim ndzachnayñigapxim ndzachnayñimiydaacim. Per ca' y'ocnejity nimiydägaamybich ti nhuin'ijxypich cumäyjoty, je huidibi je Huindzin Jesucristo xyajhuin'ijxpich xyajni'ixiybich. ² N'ixy'ajtypich tüg yëydijc huidibi mibijcp Cristo. Cham majmactz jimajt ma Dios yajpättigiyii tzajpjoty ma je midugügpi tzajp. E ca' nejhuüyich pen hue' yajpättigiyi müd ñinix o pen ca'. Dios tügpajc nejhuüyib. ³⁻⁴ Jadüg'oc nmına'ñich co Dios ti yajpättigiy je yëydijc ma je oybi it. E ca' nnejhuüyich pen janch ti ypättigiy müd ñinix o pen ca'. Dios tügpajc nejhuüyib. E jüiby ma je oybi it midoy capxy ayuc huidibi ca' huaad ni pin jäy capxy miydägy nimına. ⁵ Ooy üch amij agix nayjihuihua'ñyijich müd je jadu'mbi yëydijc jadu'n nej jëjin huidibi Dios yajpättigiy tzajpjoty. Per ca' üch ci'm nayñimiydäga'ñyijich naygömaya'ñyijich. Hue' janchtiy nayñimiydägaanibich ci'm nej nduñ n'ayooyich ma üch ndzinaayin. ⁶ Oy ixypy üch ci'm njanayñimiydäga'ñyijich janch oy nej nduñ n'ayooyich, ca'p je' anajty ngapxtigooyich, com je' anajty ngapxpich je janchypi. Per ca' jadu'n naygömaya'ñyijich, com ca' ndzocyich co jäy ajcxy nicxy xycömaayich ñigi anaxy. Huaad jadu'n co ajcxy müd miydacy je migügtijc huidibi ajcxy ijxcixp huidibi ndumyibich o huidibi ayuc ajcxy ymidoogixp huidibi ngapxpich.

⁷ Je capxy ayuc huidibi Dios xyajnejhuüyich jüiby tzajpjoty, ooy anajty chach y'oyity. Paady ycixpi Dios pidacy jadu'n nej jihuiy tüg apy ma üch nninix, jigix ca'ydi amij agix nayjihuiyijich. E je apy jadu'n nipaady nej mujcu' xyajtzaachiyich. ⁸ Tugüg'oc Dios ti nmibijctzooyich co huen xyajpidzimich je huidibi xyajtzaachiybich. ⁹ Per je Huindzin Jesús xyñimaayich: “Jëbi jadu'n co may'ajt ndunipich müd miich ycixpi. Co pinjaty pumäy ñayjihuiyii, huin'it ñigi ñiguëxigy üch nmic'ajt.” Paady ycixpi njotcugiyich co pumäy nayjihuiyijich, jigix ñiguëxigipy Cristo ymic'ajt ma üch ndzinaayin. ¹⁰ Paady ycixpi ooy njotcúcidyich co pumäy nayjihuiyijich, co jäy xyñigapxy xyñi'ojiyich, co ti nyajmayjatyich, co jäy xy'ixhuidityich xypahuidityich, co tzaachypi nyajnaxyich müd Cristo ycixpi. Co nayjihuiyijich pumäy, chi ñigi mic nayjihuiyijich müd Cristo ymic'ajt ycixpi.

Pablo ca' yjotcujc'aty nej je mibijcpidijc ajcxy jim Corinto ytungixy

¹¹ Co üch jadu'n ci'm naygapxpadyijich, tim jadu'n nipaady nej jihuiy üch tüg loci jäy. Adzip miich ajcxy jadu'n xytuñich co copicy naygapxpadyijich ci'm. Hue' yjapaadyii

miich ixypy ajcxy xycömaaybich xycapxpatpich. Hich ca'p ich ti ndzoohuity. Oy ixypy ich ca' ti mic'ajt nmüdidyich, per jatytimy nigi mic'ajt nmüdidyich, ca'ydí yí huindzindijc huídibí ma miich ajcxy, huídibí ajcxy naydijip apóstol, e ca' yjanchity. ¹² Ma je tung huídibí nduunich müd mecxtujcín ma miich ajcxy, ti ooy ñiguëxigy müd canaag ijxpejt, mijhuinma'ñ etz milagros, co ich janch Cristo xy'apóstol'adyijich. ¹³ Ca' jadu'n ytiy'ajtity co mminaangixy co nigi oy ti nduunich ma yí jacjadyii mibijcpidijc ma jacjadyii cajp, ca'ydí jadu'n nej ti nduunich ma miich ajcxy. Pen ti ndundigooyich co ca' ti nbijctzooyich meen müd ich ndung ycixpi ma miich ajcxy, jadu'n nej jacjadyii ajcxy ytungixy, pues tungix may'ajt meexcich ajcxy.

¹⁴ Jadachambi ni'ixi' n'ityich co nnicxa'ñich midugig'ocpi jim ma miich ajcxy. Ca' ti pubejtin nbijctzohua'ñich ma miich ajcxy müd ndungich ycixpi. Ca' ndzocyich miich ajcxy mmeen. Hue' ndzocyich co miich ajcxy xymijnicxpedipyich. Jac'oy co ich miich ajcxy nbubedipy, ca'ydí co miich ajcxy xpubedipyich. Jadu'n ich nipaady müd miich ajcxy nej tüg ungededy. Je ungededy ypubejtpy y'ung, e ca' nan je ung pubejtyp yteedy. ¹⁵ Hich jotcujc nyajtundahuibich ma miich ajcxy tüg'óciy tijaty nmüdich, ixti ngi'mmic'ajtich tüg'óciy nyajtunaamybich müd miich ajcxy ycixpi, jigix jébi nbubedipyich miich ajcxy. Oy janiguëxigy co ich miich ajcxy njadzojccixy njajihuüygixy, e miich ajcxy ca' xychójccixyich xyjihüüygixyich.

¹⁶ Nijëjity miich ajcxy mminaangixy co janch tiy'ajt co ca' ti pubejtin ti nbijctzooyich ma miich ajcxy, nijëjity yminaangixy co janch nihuinma'ñ ti nyajcägyich ma tüg trampí müd anii. ¹⁷ ¿Nej ti ich miich ajcxy nhuin'üngix müd je migügtijc huídibí ajcxy nyajñigüejx? ¹⁸ Nbijctzoohuich may'ajt ma Tito co huen nicxy xycogapxüygixy jadüg'oc. E nyajpugüexüyich jadüg'ajt nmigüg huídibí müd ñicxy quipxyi. ¿Nej ti miich ajcxy Tito xyhuin'üngixy? ¿Nej ca' yjanchity co ich etz Tito quipxyjaty ich ajcxy nhuinma'ñ nmüdity, e tú'ciy ndungixyich?

¹⁹ Ca' yjeyity co miich ajcxy mhuinma'ñybidáaccixy co ich ajcxy ndzach-nayñigapxtúutigixy ma miich ajcxy. Ca' yjadu'nity. Ngápcixpich nmiydáaccixpich ma Dios yhuinduu je ayuc tiy'ajt huídibí Cristo xymóoygixich. E tüg'óciy huídibí ndungixpich, hue' ndungixich jigix yeegip miich ajcxy mmibijcín. ²⁰ Com tzigüybich co anajty nicxy n'ijxcixyich miich ajcxy, ca' jeyity co nbadaamybich je tiy'ajt co miich ajcxy ca' mhuinma'ñmüdity jadu'n nej jébi njäygidägyich yí mhuinma'ñ ajcxy. E miich ajcxy nañ jadu'n ca' mjäygidáaccixipy nej ich nhuinma'ñ müdidyich. Tzigüybich co miich jada' ajcxy mnaychiptünigixy, ca' mnay'ixáanigixy nidüg nidüg, mnaymijotmá'tigixy; mnayñi'ojüygixy, e mbiitzcapxcixy; co ooy amij agix mnayjihüüygixy, e ca' mnay'ayuc-huinjihüüygixy, ca' oy m'ijtcixy. ²¹ Tzigüybich co jadüg'oc nicxy n'ixyich miich ajcxy, chi ajt nDios xyajjihüüybich tzo'ydu'n müd miich ajcxy ycixpi, etz njihuüybich tajin mayin müd miich ajcxy mbocy ycixpi, e com ca'ni mjothuimbijtcixy mjäydigooygixy je mjibic-huinma'ñ jadu'n nej mmigapxtigooygixy e mmidundigooygixy huingbi töxyjäydijc, etz jadu'n nej mmidundigooygixy migüg ytöxyijc, etz jadu'n nej jibic-huinma'ñ miich ajcxy mmüdity.

13

Ane'min capxhuijin etz capxpoocxin huídibí cijxnip je necy

¹ Jada je' ymidugig'oc co ich miich ajcxy nicxy ngo'ixihuaangixyp. Pen miich ajcxy mxihuaangixyp tüg migüg ma ich co ti ytundigooy müd Dios ytiy'ajt, hue' tzocy müd metz o tugüig testigos. ² Co je mimejtz'ocpi ich miich ajcxy oy ngo'ixiy, chi nnimaayich yí ajcxy huídibí ti ytundigooygixy anajty, e nañ jadu'n nnimaayich je huídibí jacpocytungixp co ich anajty jadüg'oc nicxy miich ajcxy n'ijxcixy, ca' nyajtuna'ñich mecxtujcín ma yí huídibí ajcxy pocytungixp. E cham co nyajpaadyich jigüegy ma

miich ajcxy, nnägapxpejtpyich ma jada necy co jadüg'oc nicxy n'ixa'ñich miich ajcxy, ca' nmimecxtuga'ñich yi' ajcxy huidibi pocytungixp. ³ E jadu'n miich ajcxy mmüid'adipy tiy'ajt co ngapxnajxich Cristo y'ayuc. E Cristo ca' je' yjadu'nity nej tög jäy huidibi ca' mic'ajt müidity. Hue' je' yajniguëxigyp ymic'ajt ma miich ajcxy. ⁴ Janch tiy'ajt co jadu'n ajcxy yajcruudzpejty Jesucristo nej jihuiy ca' anajty mic'ajt müidity. Per jadachambi Jesucristo jugy'ajtp müid Dios ymic'ajt. Nañ tim jadu'n co n'ijtim müid Jesús, jadu'n yquëxigy nej jihuiy ca' mic'ajt nmüid'ajtim. Per co n'ida'ñich müid miich ajcxy, nmüid'adaanibich Dios ymic'ajt müid co nyajpaadyich ma Cristo.

⁵ Ci'm naydiy'ajtpijcigix nidüg nidüg, pen janch tiydudägy mmibijccixy Cristo. Ci'm huinmaaygix ma ajcxy mgi'mdzinaayin, pen janch mmibijccixy. ¿Nej ca' mdimjihui'mybijccixy, pen müid ajcxy Cristo ma mjot mhuinma'ñ? Pen ca' yjadu'nity hue' anajty Cristo mmibijccixy nögixy cohujc. ⁶ Per nijjp'ijxypich co miich ajcxy mnejhuihuipy co yjanchity co Cristo ti xyajñibicyich yi' ytung, e ca' n'ündägyich. ⁷ Dios nmibijctzooybich müid miich ajcxy ycixpi, jigix ca' ti jibic-huinma'ñ mdüngixipy. Canan co ñch ajcxy ndzachcömaybidzimmaangixyich, o co ñch ajcxy nigü nmüidity Dios ytiy'ajt ca'ydi jac ni pinjaty. Jadu'n ndüngixyich, jigix miich ajcxy mdunipy oybi. Ca' ñejity oy jadu'n yquëxigipy nej jihuiy ñch ajcxy ca' oy mij n'ixpicycigich. ⁸ Com ca' huaad ni ti nej ndunim huidibi ca' yjanchity huidibi ca' ytiy'ajtity. Hue' tzocy co tög'óciy huidibi ndunim, naybadüb müid Dios ytiy'ajt. ⁹ Paady jotcuyc ñch ajcxy co nyajpáatcixyich nej jihuiy ca' ñch ajcxy mic'ajt nmüidity, jigix miich ajcxy mic'ajt mmüid'adipy ma mmibijcin. Nmibijctzoohuaamybich ajcxy Dios müid miich ajcxy ycixpi, jigix ajcxy mmibijcin mi'ijtcixipy ca'pxy. ¹⁰ Jada necy ñch jayijp nguexamyb ma miich ajcxy, ma yam ca'ni nicxy n'ijxcixyich miich ajcxy jadüg'oc, jigix ca'ydi adzip ahua'n anajty nyajtuuñ ñch n'ane'min ma miich ajcxy. ñch ajt nHuindzin Jesucristo ti xymöyich mic'ajt, jigix jëbi ñch miich ajcxy nyajyeegipy ma mmibijcin. Ca' nyajtigoyaanich miich ajcxy yi mmibijcin.

¹¹ Migügtijc ajcxy, capxcijxpich müid miich ajcxy, huen Dios xypubéjtcixipy xypudigüygixyipy. Mijottigooygix cuydunaangix tög'óciy Dios ytiy'ajt ma mdzinaayin. Jotcuyc'ajtcix. Chinaaygix müid tú'ciy mjot mhuinma'ñ. Naymüid'ijtigixy agujc jotcuyc. Huen ajcxy Dios xymüid'ijtcixy. Je Dios huidibi jotcuyc'ajtin yejcp, e nañ jadu'n Dios xychojctáaygixipy xyjihuiydáaygixipy. ¹² Naygapxpóocxigix xic xon. ¹³ Tög'óciy Dios yjäy huidibi ya, yquejxyp ajcxy capxpóocxin ma miich ajcxy.

¹⁴ Huen ajt nHuindzin Jesucristo may'ajt oy'ajt tunipy müid miich ajcxy ycixpi. Huen Dios xychojccixy xyjihuiygyxy. Huen Dios yjihuiñ ymic'ajt ity ma nidüg'óciy miich ajcxy mjot mhuinma'ñ. Jadu'n ngapxycixyich. Amén.

GÁLATAS

Yi Necy Huidibi Pablo Yajniejx Je Mibijcpidijc Jim Gálatas

¹ Hich Pablo, Jesucristo xyquejxich co ngapxhuäcxibyich yi' y'ayuc. Ca' nmīnaanīm jāy ajcxy xyajñibijcīch jada tung. Jesucristo etz Dios Teedy ajcxy ti xyajñibicyich jada tung. Je' je' je Dios huidibi yajjugypijc Jesucristo co y'o'cy. ² Hich etz tūg'óciy mīgūgtijc ajcxy huidibi ya yajpatp ma hich nyajniejxpīch jada necy ma nidūg'óciy pīnjaty mijpidacp Jesucristo, huidijaty naymujcīp ma nidūg nidūg cajp jim Gálatas naaxjot. ³ Nmibijctzooybīch Dios Teedy etz hich ajt nHuindzīn Jesucristo co huen oy'ajt etz may'ajt tuñ ma miich ajcxy etz nañ jadu'n xyajjotcugīhuīp ajcxy. ⁴ Hich ajt nHuindzīn Jesucristo ti nayyoxiyi ti naydogyīi cī'm anajty ma yi' o'cīn mīd hich ajt nbocy ycīxpi. E jadu'n ti xyñihuaanīm ma je jāy ajcxy huidibi jībīc huinma'ñ ymīd huidibi tzīnaayb ajcxy ma jadachambī xīi tiempo. Jadu'n Jesucristo tuñ mīd hich ajt ycīxpi, com hich ajt nDios Teedy jadu'n tzojcp. ⁵ ¡Ooy y'oyīty co Dios Teedy huen mij etz cōmay y'idīpy huinixīi huinītiempo! Jadu'n jada. Amén.

Ca'p ji huingbī tīy'ajt huidibi jāy y'alma yajñidzocp

⁶ Ooy ndzachhuinmaayīch jadu'n nej tim tzojcy ti mijjpyōyduťcīxy je Huindzīn Dios ytīy'ajt. Dios xyhuin'ijxcīxy jigīx jēbī mmībijccīxy je oy'ajt je may'ajt huidibi Jesucristo ytuun mīd miich ajcxy ycīxpi. E miich ajcxy ti mhuinma'ñ myajtigajťzīxy, e ti mmībijccīxy huingbī jāy ajcxy y'ayuc, jadu'n nej ca' jēbī m'alma nīdzoocīn padaangīxy. ⁷ Ca' nmīnaanīm co ji jadūgnax Dios ytīy'ajt. Hue' je'nijējīty jāy ajcxy ti xyajhuinma'ñyidigooygīxy, ooy ajcxy yajtigadzaangīxy je Dios y'ayuc ytīy'ajt nej Jesucristo xyajñidzōgaanī ajcxy m'alma. ⁸ Co ixīpy hich, o co ixīpy nidūg hich ndiscīpulo, o co ixīpy tūg āngel huidibi tzajpjoty tzomb capxhuäcx ixīpy ma miich ajcxy ayuc tīy'ajt tigachjaty huidibi ca' ñaybadyīi mīd je tīy'ajt huidibi nyaj'ixpij c ajcxy oga'n'aty, ca' mgōbījccīxīpy yījadu'mbī ayuc huidibi ajcxy xyajñidigoyaangīxy xyajtūdigoyaangīxy, Dios tzaachytunīb yi' ajcxy y'alma. ⁹ Ti jayījp nyajñīmay, e cham jadūg'oc nīgapxpetyīch, pen ji pīnjaty capxhuäcxī ma miich ajcxy tīy'ajt tigachyaty pī, huidibi ca' ñaybadyīi mīd je tīy'ajt je tībī miich ajcxy m'ixpijccīxy, copīcy Dios chaachytunīpy jada jāy mīd ypocy ycīxpi huidibi xychachyajñidigooygīxp xychachyajtūdigooygīxp.

¹⁰ Co jadu'n nmīna'ñīch, ¿nej mdījy co ndzocyīch co jāy ajcxy xyjāygidāgīpy o co Dios xyjāygidāgīpy? ¿Nej ndzachyajjot'adaanīch jāy ajcxy? Ca' huaad nduunīch huidibi jāy ajcxy chojcp, yi' janchtīy ndumybīch huidibi Dios chojcp. Co ixīpy nduunīch huidibi jāy ajcxy yjāygidacpy, ca' ixīpy nguyduunīch Cristo ytīy'ajt.

Nej Pablo oy paady je apóstol'at

¹¹ Paady ndzocyīch mīgūgtijc co mnejhuīhuīp ajcxy jada co je Dios y'ayuc ytīy'ajt huidibi ngapxyhuäcxīch anajty ma miich ajcxy jadu'n nej jēbī ajcxy m'alma nīdzōgīpy, ca' yi' ayuc'adyīi tīy'ajt'adyīi huidibi jāy cī'm ti cojcy ti maacxcīxy. ¹² Com je Dios y'ayuc ytīy'ajt huidibi nmīdīch, ca' ti nbaadyīch ma jāy ajcxy, nañ ca' nmīnaanīm jāy ajcxy ti xyaj'ixpiyīch. Jesucristo cī'm ti xyajhuinjīhuīyīch jada tīy'ajt.

¹³ Com miich ajcxy mnejhuīyīgīxp jadu'n nej jecy'ajty hich ti ndzīnāyīch, co hich anajty nmījpidāgyīch yi' judío jāy ajcxy ycostumbre. E mnejhuīyīgīxp jadu'n nej jecy'ajty n'ixhuidijtyīch nbahuidijtyīch mīctāgy je jāy ajcxy nidūg'óciy huidijaty anajty mijpīdaaccīxp Dios ytīy'ajt. ¹⁴ Nīgī hich anajty n'ixpīcyīdyīch ma yi' judío jāy ajcxy y'ixpij cīn ca'ydi jac pīnjaty judío jāy, ca'ydi jac pīnjaty nmīgūgtijcīch huidibi tūgnax yjīmījt mīd hich. Com ooy anajty nīgī ndzachmījpidāgyīch n'ap ndeedyīch y'ayuc. ¹⁵ E Dios xyhuin'ijxīch jayījpnī ca'nī anajty ma'xung'atyñīch co ndūnībīch yi' ytung. Mīd co Dios ooy ti

xychocyich ti xyjihuíyich, paady xyhuooyich mïid ytung ycixpi. ¹⁶ Dios xyajnejhuíyich yi y'ung y'ayuc ytiy'ajt, jigix ngapxhuäcxibich yi y'ayuc ma yi jäy ajcxy ca'pi yjudíojäyity ajcxy. Ca' pinjaty n'ixtaayich huidibi jëbi xyaj'ixpicyich Dios ytiy'ajt, hue' Dios ci'm xyaj'ixpicyich yi ytiy'ajt. ¹⁷ Nañ jadu'n ni ca' nbättigíyich jim Jerusalén ma yajpaady y'apóstoles ajcxy huidibi anajty ajcxy Dios ti yhuin'ixyii. Chi tiiyi nnicxyich jim Arabia ñaaxjot. Co ñich jim hueeni n'ijtyich, chi nhuimbijtyich jim Damasco.

¹⁸ Cooni tugíig jimijt nhuäcxijpyich huin'itni nbättigíyich jim Jerusalén. Chi n'oyich ma Pedro anajty yajpaady, e chi jim nmïid'ijtyich jëyi majmocx xii. ¹⁹ E ca' nmïnaybaattich yi jacjadyii apóstoles. Jëyi ñich mïid naybaati je Jacobo, je Huindzin Jesús y'uch. ²⁰ Je huidibi cham ñich miich ajcxy niyajjayíygixyp, tiy'ajt yi'. Y'ijxyp ñejhuíyb Dios co ca' n'ïndägyich.

²¹ Co ndzooñich Jerusalén, chi nnicxyich Siria naaxjot etz jim Cilicia naaxjot. ²² Je huin'it tiempo yi Cristo yjäy ajcxy huidibi nayyöymujcip cajp cajp jim Judea naaxjot, ca' ajcxy anajty xy'ix'adyiijich huingíxy jipcíxy. ²³ Jëyi ajcxy nejhuíy anajty co jäy chachmïnaangixy: "Yi jäy huidibi anajty xychach'ixhuidijtim xychach-pahuidijtim, cham yi' tzachcapxhuäcxy je Cristo ytiy'ajt, je tiy'ajt huidibi anajty ytimyyajcödígoyamyb." ²⁴ Co je mibijcpidijc oy jadu'n tiy'ajt nejhuíyigixy, chi ajcxy yajnaxy Dioscojuyip ma Dios mïid ñich ycixpi.

2

Jacjadyii Jesús y'apóstoles ajcxy cöbijccixy yi Pablo

¹ Co majmactz jimijt, chi jadüg'oc nnicxyich jim Jerusalén quipxyi mïid Bernabé. Nañ jadu'n Tito xypanicxyich. ² Dios jadu'n ti xyajnejhuíyich co copicy nïcixibich jadüg'oc jim Jerusalén. Chi jim nyajmïidmïydacyich nijëjity jäy huidibi Jesús ti yhuin'ixyii ajcxy, je huidibi ajcxy nigohuajc'ajtp anajty je mibijcpidijc. (Ahuingujc ñich ajcxy nxiicmujcy ngapxmujcy, ca'ydi ymayjäy'agujcity.) Nyajmïidmïydactaayich je Dios y'ayuc ytiy'ajt huidibi ngapxhuäcxypich ma yi jäy ajcxy ca'p yjudíojäyity. Jadu'n ngapxticxyich n'ayucich ndiy'ajtich, jigix ca'ydi ajcxy xycapx'aducyich, e ti anajty jadu'ñyi ñaadigi'aty ñich ndung huidibi jayijp ti nduunich etz huidibi njactunaamybich anajty. ³ Je jäy ajcxy huidibi nigohuajc'ajtp anajty je mibijcpidijc jim Jerusalén yjäygidac ajcxy ñich n'ayuc jadu'n nej ngapxticxyich, e nañ ni ca' ajcxy ymïnañ adzip co copicy yajtiy'ajttihuiipy je Tito huidibi xypa'oyich jim, com griegojäy je' anajty, paady ca' yajtiy'ajttiy anajty. ⁴ Ca' ixypy pin huaam ycamïnañ jim Jerusalén co Tito ca' yajtiy'ajttiy, co ca' nijëjity mibijcpidijc ycatigíy ayüch ameech huidibi ca' ymibijccixy cixyot huinijot Cristo ytiy'ajt. Hue' ajcxy amido'ijtcixy n'ayucich nej huaad xyijpcogapxiygixyich. Ca' ajcxy yjotcujcity co ngapxhuäcxyich co nmibijcim Jesucristo, e ca' copicy nguydunim judíojäy ycostumbre. Yi' ajcxy adzip xyajnihuidzaambich yi judíojäy ycostumbre, jadu'n nej jäy codoogíyí ajcxy adzip ytuungixy ma yhuindzin ytung. ⁵ Ni catügjaxígy ajcxy xycamimadacyich, e ni xycayaj'amoñ ñich ajcxy, com hue' ndzocyich co huen Dios y'ayuc ytiy'ajt oybi ity huadz ma miich ajcxy ca' ma anii.

⁶ Yi apóstoles ajcxy huidibi Jesús ti yhuin'ixxigixy huidibi ajcxy nigohuajc'ajtp yi mibijcpidijc, ca' ajcxy ni ti tiy'ajt xyjacmöyich jemybi huidibi ca' jayijp nnejhuíyich. (Peni capxpaady ajcxy o peni ca' ycapxpaadyity, ca' nduunich cuendi. Com Dios ca' huin'ixpety jäy ajcxy tyduñ.) ⁷ Co oy ajcxy nejhuíy co Dios ti xyquexyich ngapxhuäcxyich yi y'ayuc ytiy'ajt ma yi jäy ajcxy huidijaty ca' yjudíojäyity, tim jadu'n nej ti quexy Pedro co capxhuäcxi yi y'ayuc ma yi judíojäy ajcxy, ca' ñich yi' ajcxy anajty n'ayucich xyijpcogapxiyich, ooy ajcxy jäygidacy yi n'ayucich ndiy'ajtich. ⁸ Yi Dios huidibi Pedro quejx huen yi' y'ayuc capxhuäcxy ma yi judíojäy ajcxy, nañ jadu'n ñich xyquejxich co yi' y'ayuc ngapxhuäcxibich ma yi jäy ajcxy ca'p yjudíojäyity.

⁹ Je Jacobo, je Pedro etz Juan ajcxy, je huidi nigohuajc'ajtcixp yi mibijcpidijc, co ajcxy nejhuüy jadu'n nej anajty Dios may'ajt oy'ajt ti tuuñ müd üch, chi ajcxy xycöbijcyich agujc jotcujc Bernabé etz üch. E chi üch ajcxy müd nay'ayuc-huinjihüüyi co jëbi üch etz Bernabé nïcxiwich ma yi ca'p yjudíojäyity ajcxy, etz jëbi yi Jacobo, Pedro etz Juan ajcxy ñicxcixy ma yi judíojäy ajcxy. ¹⁰ Jëyi ajcxy may'ajt pijctzoy ma üch etz Bernabé co jadu'n pa'ayo'n ndunipyich ma yi judíojäy ayoobitijc. E chi üch ngo'adzoy co ndunamybich jadu'n agujc jotcujc.

Pablo ogy yi Pedro jim Antioquía

¹¹ E jadu'n anajty müd ti n'ocnay'ayuc-huinjihüüyibich ixti coon Pedro ycidacy jim Antioquía. Chi jim nnimaayich huinjijp co ti anajty jim Dios ytiy'ajt midundigooyi co puhuäctuatni je huidibi ca' yjudíojäyity, ca' y'ocmüdcaymujcni. ¹² Com co ca'ni anajty ymiñ jim Antioquía je judíojäy ajcxy huidibi anajty tzomb ma Jacobo jim Jerusalén, chi Pedro müdcaymujcni je jäy ajcxy ca'p judíojäyity. Co ajcxy ymiñ choon Jerusalén, chi Pedro oy puhuäctuatni je huidibi ca'p yjudíojäyity, ca' y'ocmüdcaymugaani anajty. Com Pedro tzigüyb anajty co ñi'ojihuüyb je judíojäy huidibi minamb co ooy ycopicyity yajtiy'ajttihuüpy tüg'óciy jäy ajcxy huidibi mibijccixp Jesucristo. ¹³ Co Pedro jadu'n oy y'idich, chi je jacjadyi judíojäy ajcxy huidi anajty jimip nañ tim jadu'n oy y'idütcixy. Oy ajcxy janehuüy tiy'ajt, e huädz cuydungixy. Ixti Bernabé nañ jadu'n y'idüch nej Pedro, com ca' anajty yjotmicity. ¹⁴ E co üch jadu'n oy n'ixyich co ca' ajcxy cuydungixy yajxon Jesucristo ytiy'ajt, chi üch nnimaayich Pedro mayjäy'agujc: “Peni müch judíojäy, e ti m'ixmajtznü judíojäy ycostumbre co ti mibicy Jesucristo, e ti m'occuydumyb je huinma'ñ huidibi judíojäy ca' cuydungixy, ¿nej tijy cham co adzip mdzachminaandägy co yi' ajcxy huidibi ca'p yjudíojäyity, copicy cuydúngixipy judíojäy ycostumbre, huidijaty müch ti m'ixmajtznü?”

Yi judíojäy ajcxy quipxyjaty müd jacpinjaty

¹⁵ Jadu'n njacnimaayich Pedro: “Üch etz müch judíojäy üch ajt, huidibi ndaj'ajtim ndeedy'ajtim nañ judíojäy. E ca' üch ajt njadu'nity nej jäy ajcxy ca'pi yjudíojäyity, huidibi ca' cuydungixy Dios ycötujcin je jecyip huidibi Moisés yjayhuim. ¹⁶ Müch Pedro üch ajt nnejhuüyim co jäy ajcxy ca' jëbi Dios yajpocyñihuächyü müd tim jëyi co ajcxy cuydungixy Dios ycötujcin je jecyip huidibi Moisés yjayhuim. Co yi jäy ajcxy mibijccixy Jesucristo, huin'it janchtiy Dios yajpocyñihuätzüyb ajcxy. Nañ tim jadu'n üch ajt, ti nmibijcim je Cristo jigix jëbi Dios xyajpocyñihuaatzim. E ca' jëbi huaad Dios xyajpocyñihuaatzim ajt müd tim jëyi co ti nguyduunim Dios ycötujcin je jecyip. Ca' ni tüg jäy huidijaty jëbi Dios yajpocynihuächyü, müd tim jëyi co cuyduuni Dios ycötujcin je jecyip.”

¹⁷ Co ajt nhuinma'ñ nbidaacim co nmibijcim Cristo jigix Dios jëbi xyajpocyñihuaatzim, huin'it je judíojäy yminaangixy co jibic-huinma'ñ nyajtuunim co ca' njaccuyduunim yi' ajcxy ycostumbre. ¿Nej mdijy je Cristo xyajtundigooyim jadu'n nej judíojäy yminaangixy? Ca' yjadu'nity. Ca' jëbi huaad je Cristo xyajtundigooyim. ¹⁸ Co ixypy nmijpidaacim jadüg'oc Dios ycötujcin je jecyip, je huidibi ti n'ixmajtzim, jada ixypy ijxpejt'ajtp co ndundigooyim ma Cristo ytiy'ajt. ¹⁹ Jecy'ajty co nguyduunich anajty Dios ycötujcin je jecyip, huin'it ca' anajty nbaadyich tiy'ajt nej jëbi huaad Dios xyajpocyñihuaachich, e jadu'n nipaady nej jihuüy ti n'ögyich. Paady ycixpi ti n'ixmachich je jecyip cötujcin, e ti nmijpidägyich Jesucristo ytiy'ajt jigix jëbi njactzinäyich müd Dios ycixpi. ²⁰ Jadu'n nayjihüüyijich jadu'n nej jihuüy ti n'oc'ocpich, jadu'n nej jihuüy ti ngrudzpetyich quipxy müd Cristo. Jadachambi ca' n'octzinaayñich müd ngim jugy'ajtin ycixpi. Hue' je' je Cristo ymic'ajt etz ytiy'ajt ti chinaydacpicy ma üch njugy'ajtin. E jadu'n nej cham njactzinäyich müd üch nninïc, jactzinaaybich müd Dios y'ung ycixpi, nmijpidacypich Dios y'ung. Dios y'ung ti xychocyich ti xyjihüüyich, e ti nayyoxyii

naydogyii ma yi o'cin miid ich nbocy ycixpi. ²¹ Ca' nniyajtigoya'ñich je may'ajtin je oy'ajtin huidibi Dios ti tuuñ miid ich ycixpi. Co ixypy jëbi Dios xyajpocyñihuaatzim miid co ajt nguydunim Dios ycötujcin jëyi, huin'it ixypy ti ñaadigi'aty je Cristo co y'o'cy miid ajt nbocy ycixpi.

3

Je ycötujcin huidibi Moisés yejc o je mibijcin

¹ Janch loci miich ajcxy migügtijc huidibi tzinaayb jim Gálatas naaxjot. Ti jäy ajcxy xyajhuinma'nydigooygixy miid jibic-huinma'ñ. Paady ycixp mdzach'ixmadzaangixy je Dios ytiy'ajt. Ich oy njacapxhuäcxyich ma miich ajcxy mhuinduu je tiy'ajt jadu'n nej Cristo yajcruudzpejti miid ich ajt nbocy ycixpi. ² Yi' nyaj'amidooyb: ¿Nej ti mbaatcixy Dios yjihui'ñ ymic'ajt miid co mdzachcuyduuni Dios ycötujcin je jecyip? o ¿Nej ti mbaatcixy Dios yjihui'ñ ymic'ajt miid co ti mmidoogixy Jesucristo y'ayuc e ti mmibijccixy? Hue' janchtiy ti mbatcixy Dios yjihui'ñ ymic'ajt co ti mmibijccixy Jesucristo, ca' nminaanim co ti mguydungixy Dios ycötujcin je jecyip. ³ Co Dios oga'n yjihui'ñ xy'adigiyygixy xyjottigiygixy, chi mguychinaaygixy Jesucristo ytiy'ajt nej Dios yjihui'ñ xyhuinma'nymooygixy. ¿Nej co cham miich ajcxy mloci huinma'ñ mdzachtungixy? Jadachambi jadüg'oc mdzachtunaangixy mgimhuinma'ñ. ⁴ ¿Nej naadigigixpi miich ajcxy tzaachypi ti mminajxcixy ti myajnajxcixy miid Cristo ytiy'ajt ycixpi? Janch naadigi' jadu'n tzaachypi ti mminajxcixy ti myajnajxcixy, pen janch tücciyi ti m'ixmájtzcixni Cristo ytiy'ajt. ⁵ Jada nyaj'amidoogixyp: ¿Nej ti Dios yjihui'ñ ymic'ajt xy'adigiyygixy xyjottigiygixy etz tuñ mijhuinma'ñ ma miich ajcxy miid co ti mguydungixy Dios ycötujcin je jecyip? Ca' yjadu'nity. Hue' Dios xy'adigiyygixy xyjottigiygixy etz tuñ mijhuinma'ñ miid miich ajcxy miid co ti mmidoogixy Jesucristo ytiy'ajt etz ti mmibijccixy.

⁶ Jadu'n ymiñ cojay ma Dios ñecy co Abraham mibijcy Dios, e co yi' mijpidacy Dios y'ayuc jadu'n nipaady nej jihuiy Dios yhuinmecxi ypocy, jigix jëbi y'ity tudägy ma Dios yhuinduu. ⁷ Jadu'n yjajty miid Abraham. Je' ymibijc Dios, e yajpocyñihuaatzi Dios, jëbi ñaydiyii tudägy jäy ma Dios yhuinduu. ⁸ Dios jecy'ajty yajnihuinmayiy co yajpocyñihuaadza'ñ je jäy ajcxy huidibi ca' yjudíojäyity, jëbi ajcxy ñaydiyii tudägy jäy ma Dios yhuinduu, miid co ajcxy mijpidägipy je may'ajt huidibi Dios ytunamyb miid yi' ajcxy ycixpi. Paady ycixpi jaaybety ymiñ ma Dios ñecy co jadu'n Dios miidmiydac Abraham jecy'ajty co yi' huidibi ca' yjudíojäyity ypaadipy ajcxy y'alma nidoocin, com jadu'n Dios ymiñañ: “Miid miich tüg m'ap m'oc may'ajt oy'ajt nduna'ñich miid naaxhuiñyjäy ajcxy ycixpi.” ⁹ Paady ycixpi jadu'n nej jäy ajcxy tüg'óciy pinjaty mibijcp Dios, Dios may'ajt tunamb miid yi' ajcxy ycixpi co mibijccixy, tim jadu'n nej may'ajt tuun miid Abraham.

¹⁰ Dios chaachytunamy jäy ajcxy miid ypocy ycixpi, pinjaty huinma'ñ tzachpidacp co y'alma nidoocin padaangixy miid co cuydungixy Dios ycötujcin je jecyip. Com jadu'n jaybety ymiñ ma Dios ñecy: “Dios chaachytunamyb jäy ajcxy miid ypocy ycixpi, pinjaty ca' mijpidägy tüg'óciy Dios ycötujcin, etz nañ jadu'n pinjaty ca' cuydundäy jada cötujcin.”

¹¹ Jadachambi miid je ayuc huidibi ti nyajnijayiygixy ma jada necy, jëbi miich ajcxy mnejhuñhuip co ca' ni pin jäy jëbi Dios yajpocyñihuaächyii miid huidijaty ti tungixy co cuydungixy Dios ycötujcin je jecyip. Com jadu'n ymiñ jaybety ma Dios ñecy ma Dios jadu'n ymiñañ: “Yi jäy ajcxy pinjaty mibigip ich n'ayuc, yi' ajcxy nyajpocyñihuaadzaamybich jëbi ajcxy y'alma paadip nidoocin.” ¹² Dios ca' jadu'n ymiñañ ma yi' ycötujcin huidibi Moisés yjayhuim co jëbi nmijpidaacim, e huin'it Dios xyajpocyñihuaatzim. Hue' je' ymiñañ ma ycötujcin co jëbi xychaachytuunim miid ajt nbocy ycixpi. Com jadu'n ymiñ jaybety ma Dios ñecy: “Yi jäy ajcxy pinjaty cuydumb Dios ycötujcin huidibi Moisés ycojay, copicy cuydundähuip, ni ma ycatundigoyipy.”

¹³ Cristo xyñihuaanim xyyajtzoocim ma anajty Dios xychaachytunaanim m̄id co ca' nguydundaayim Dios ycotujcin je jecyip. Cristo ci'm ti yajnicxy je tzaachypi huidibi Dios ajt xymohuaanim anajty. Com jadu'n jaybety ymiñ ma Dios ñecy: “Pinjaty anajty yajmijxotzpejtp ma tüg cruudz, hue' anajty je' yco'ayooyb ypocy tiñbi tuñ.” ¹⁴ Cristo o'c je' m̄id ñich ajt nbocy ycixpi, jigix Dios jēbi cuyduñ yi' y'ayuc jadu'n nej yaj'ahuan̄y Abraham jecy'ajty, co may'ajt tuna'ñ m̄id yi' jāy ajcxy ycixpi huidibi ca'p yjudío jāyity, etz nañ jadu'n may'ajt tuna'ñ m̄id ñich ajt ycixpi, jigix jēbi ñich ajt nbaatim je Dios yjihui'ñ co nmibijcim je Cristo.

Je cōtujcin huidibi Moisés yejc etz huidibi Dios y'ahuan̄y

¹⁵ Migügtijc ajcxy, ngapxt̄cxaamybich jadu'n nej Dios ti tuñ m̄id tüg ijxpejt nej jāy ajcxy ytuñ. Co ixypy tüg jāy necy yajcojy ma nigapxy jadu'n nej ypidāgy yajhu'i'mañ, e co yajcojtāy je necy, e chi firmij̄y, e nañ jadu'n je testigo ajcxy yfirmij̄y, huin'it ca' huaad pinjaty nix̄gy yajx̄gy jada tiy'ajt, e nañ jadu'n ni ca' huaad yaj'unḡy. ¹⁶ Cuend̄itunḡixy Dios y'ayuc ytiy'ajt, Dios ma yi' y'ayuc yaj'ahuan̄y Abraham etz tüg yi' y'ap y'oc co may'ajt tuna'ñ m̄id yi' ajcxy jēyi. Ca' nm̄inaanim Dios y'ayuc ym̄ina'ñ co Dios yaj'ahuan̄y Abraham co may'ajt tuna'ñ m̄id tüg'óc̄iy yi' y'ap y'oc. Hue' je'Dios y'ayuc ym̄ina'ñ co may'ajt tuna'ñ m̄id tüḡpajc yi' y'ap y'oc, je' je' je Cristo. ¹⁷ Dios ca' yi' nix̄gy yajx̄gy ytiy'ajt huidibi jayijp ymoy Abraham co yajniguejxy ycotujcin yi' Moisés. Co Abraham y'o'cy, ti anajty ñajzn̄in̄icxiyñi m̄idaax m̄igo'px ja'iipx̄majc jimijt, chiini oy Dios möy Moisés yi' ycotujcin. Tim jadu'n nej ca' huaad yajtigach je jāy ñecy ma nigapxy jadu'n nej ypidāgy yajhu'i'mañ, nañ tim jadu'n ca' huaad Dios yajtigach y'ayuc huidi yajnimay Abraham jadu'n nej may'ajt tuna'ñ m̄id naaxhuiñy jāy ajcxy ycixpi. ¹⁸ Dios y'ahuan̄y yi' ytiy'ajt ma Abraham jecy'ajty co may'ajt tuna'ñ m̄id yi' y'ap y'oc ycixpi etz m̄id tüg'oc̄iy naaxhuiñy jāy ajcxy ycixpi. Co ixypy jēbi jāy padaanḡixy y'alma ñidzoocin m̄id huidibi ajcxy ytumyb co ajcxy cuyduuni Dios ycotujcin je jecyip, ca' ixypy may'ajt ti tuñ co ti quexy je Cristo ya naaxhuiñ co jāy yajnihuaadz̄ip.

¹⁹ ¿Ti ycixpi Dios co moy Moisés je cōtujcin huidibi ycojaj? Hue' je' Dios moy jada cōtujcin jigix jēbi niguēx̄gy co jāy ajcxy ca' ycapxym̄idooḡixy. Tunamb anajty Dios ycotujcin huidibi Moisés ycojaj mabaad ti quexy ya naaxhuiñ yi' y'ung, je' je' je Cristo, je Abraham y'ap y'oc huidibi yajpocyñihuätzp jāy ajcxy. Dios ycotujcin hue je' yajniguejx Moisés m̄id ángeles ajcxy. E chi Moisés capxnajxy ma ymigügtijc ajcxy. ²⁰ Co Dios ti quexy yi' oybi y'ayuc ya naaxhuiñ m̄id y'ung, paady ycixpi Dios ca' tzocy co huingbi capxnax̄ipy yi' y'ayuc. Dios etz Dios y'ung tú'c̄iy yi'.

Tigixpi Dios je Moisés cōtujcin yejc

²¹ ¿Nej mdijy ca' ñaybadyii yi' Dios ycotujcin huidibi Moisés ycojaj, m̄id je ayuc huidibi Dios yajnimay Abraham? Naybaatip ajcxy y'ayuc. Co ixypy cayejcy Dios cōtujcin ma jēbi jāy ajcxy y'alma ñidzoocin padaanḡixy, huin'it ixypy jēbi nbocyñihuaatzim co ixypy nguyduunim yajxon jada cōtujcin. ²² Ca' yjanchity co jēbi Dios xyajpocyñihuaatzim m̄id co tijaty nduunim. Com ma Dios y'ayuc ymiñ cojaj co nidüg'óc̄iy jāy ajcxy ti ytund̄igooy, ac pocy ym̄id ajcxy. Jadu'n Dios y'ayuc ym̄ina'ñ, jigix jēbi Dios yajpocyñihuaäch tüg'óc̄iy pinjaty mijpidacp Jesucristo, jadu'n nej yajnimay Abraham jecy'ajty co jadu'n tuna'ñ.

²³ Ca'ni anajty Cristo ymiñ ya naaxhuiñ, huin'it anajty Dios ycotujcin ytuñ, yajpocycāy jāy ajcxy, e ca' Dios yajcom̄idoy jāy ajcxy ypocy. Jadu'n nej jihuiy jāy ixypy ypujxtijc'iñaaygixy e ahuijxcixy m̄ina je juez ytiydun̄aanigixy. Jadu'n anajty n'ijtim jadu'n nej jihuiy nbujxtijc'iñaayim, ixti cooni Jesucristo ymiñ ya naaxhuiñ yajpocyñihuaatzp. ²⁴ Jadu'n anajty Dios cuend'aty yi' judío jāy anajty m̄id ycotujcin huidibi Moisés ycojaj. Tim jadu'n nej jāy cuend'aty huingjāy y'ung. Jadu'n anajty Dios cuend'aty judío jāy ajcxy ixti cooni Jesucristo ymiñ ya naaxhuiñ jēbi yajpocyñihuaäch jāy ajcxy. ²⁵ Jadachambi co

Jesucristo ti y'oy ya naaxhuiñ, e ti nmibijcim (tzojcingix) yi' ytiy'ajt, paady ycixpi cham ca' n'oc'ijtm cuend'aty mïd Dios ycötujcin huidibi Moisés ycojaj.

²⁶ Com miich ajcxy ti mmijpidaaccixy Jesucristo ytiy'ajt, paady ycixp jëbi nidüg'óciy miich ajcxy naydijigixy Dios y'ung. ²⁷ Tüg'óciy miich ajcxy huidijaty ti mnibejtcixy, ti mnibejtcixy jigix jëbi mdügmujccixy mïd Cristo, jadachambi nïducy m'ijtcixy mïd Cristo. ²⁸ Nidüg'óciy miich ajcxy ti mgöbijccixy Jesucristo jadu'n nej ajcxy mHuindzin. Jadu'n miich ajcxy judíojäy etz nañ jadu'n ca'pi yjudíojäyity, nañ jadu'n miich ajcxy midumbidijc etz miich ajcxy huidibi ci'm nay'ane'mip, miich ajcxy yëdijctijc etz miich ajcxy töxyjäydijc; tú'ciy miich ajcxy myajpattaaygixy ma mHuindzin Jesucristo. ²⁹ Huenpinity miich ajcxy co mmijpidaaccixy Jesucristo, huin'it jëbi ajcxy mnaydijiyb Abraham y'ap y'oc, e huin'it jëbi mbáatcixipy tzinaydac jiiyby tzajpjoty, je huidibi Dios yaj'ahuaniiy Abraham, Abraham y'ung y'anäg etz Abraham y'ap y'oc.

4

¹⁻² Cha jadüg ijxpejt nyajnimäyich miich ajcxy huidibi capxticxp Dios ytiy'ajt. Tüg comeeñjyä ymang hue' anajty mutzni pi'cni je' anajty jëdaanip yteedy ypidägy. E chi yteedy tüg jäy yajniibicy huidibi jëbi cuend'aty je pidägy etz je pi'c'anäg mabaad paady je tiempo mina ycidiigihuigy je pidägy. Je comeeñjyä y'ung com co anajty ca'ni yeegy, ane'my anajty y'ity, tim jadu'n nej ane'my y'ity je jäy huidibi midumb. ³ Tim jadu'n nej je comeeñjyä y'ung anajty y'ity ane'my, nañ tim jadu'n ñch yi judíojäy ajcxy ane'my anajty n'ijtcixyich co anajty ca' tiydudägy naydijiygixyich Dios y'ung. ⁴⁻⁵ Co oy Dios yajhuaad'ajtni, chi oy quejxni y'ung ya naaxhuiñ. Yi' y'ung ma'xung'ajt judíojäy, jigix jëbi codinäy jäy ajcxy ma Dios ycötujctac. Nañ jadu'n yi' ma'xung'ajt judíojäy jigix jëbi yajpocyñihuäch yi jäy ajcxy huidibi ti yajpocycähugixy Dios ycötujcin huidibi Moisés ycojaj. Dios ti quexy y'ung jigix jëbi xycodinaayim mïd ajt nbocy ycixpi, e jadu'n Dios jëbi xycöbijci jadu'n nej jihuiy xyci'm'ung'ajtim.

⁶ Jadachambi mïd co naydijim Dios y'ung, paady ycixp Dios ti xy'adigiiyim ti xyjottigiiyim yi' yjihuiñ ymic'ajt, paady ycixp ajt minaanim co Dios ajt nDeedy'ajtim etz nminaanim: “¡Padre Nuestro!” ⁷ Mïd co miich ajcxy ti nmibijccixy Jesucristo, jadachambi ca' ane'my m'oc'ijtcixyñi ma Dios ycötujcin je jecyip, jadu'n nej je jäy ytumbidijc mïdity ane'my. Paady ycixp jëbi Dios xymóoygixipy jugy'ajtin huidibi ca' ycixipy ytigoyipy, jadu'n nej Dios mïdity jugy'ajtin. Jadachambi miich ajcxy Dios xy'ung'ajt, etz jëbi mbáatcixipy pidägy ma Dios.

Pablo yjotmaybaady mïd je mibijcpidijc ycixpi

⁸ Jecy'ajty ca' anajty mnejhuigyixy Dios ytiy'ajt tiydudägy, ooy anajty m'ojadajtcixy ooyñiti huidibi ca' ymic'ajt mïdity. E ca' anajty m'ojadajtcixy je Dios tzajpjotyyp huidibi mic'ajt mïdity. ⁹ Jadachambi ti mnejhuigyixy Dios ytiy'ajt etz Dios ti xycöbijccixy. ¿Nej co jadüg'oc mdzachnihuimbidaangixy yi judíojäy ycötujcin, ca'p ti mic'ajt mïdity, huidibi ti m'ijxmajtcixy? E jadüg'oc xy'ane'mygyixy je judíojäy ycötujcin. ¹⁰ Jadachambi mdzachcuydunaangixy judíojäy ycostumbre, jadu'n nej ajcxy myajmij'ajtcixy xii'bo' xiijimijt. ¹¹ Huinmaaybich ooy mïd miich ajcxy ycixpi co naadigi ti nyaj'ixpicyich miich ajcxy. Ninigoob ayoohuañ ñch ndung ma miich ajcxy.

¹² Migügtijc ajcxy, cham may'ajt nbijctzooyich ma miich ajcxy. Yajtügiiygix yi mhuinmañ jadu'n nej ñch nhuinmañ. ñch ti nyajtügiyich nhuinmañ mïd miich ajcxy mhuinmañ co ti n'ixmachich yi judíojäy ycostumbre. Je taab anajty n'ityich mïd miich ajcxy, ca' miich anajty ajcxy ñch n'ayuc xyjijpcogapxiyi. ¹³ Miich ajcxy mnejhuigy co anajty n'ityich ma miich ajcxy, pumäy ñch anajty nyajpaady mïd yuu pa'm ycixpi, paady ycixp ñch jim jecy nhuäcxijpyich, ngapxhuäcxyich Jesucristo ytiy'ajt je jayijp'aty. ¹⁴ Mïd ñch nba'm ycixpi ooy n'adzijpy miich ajcxy ma mjin mdijc, e miich ajcxy ca' ti xy'ixtijy

e ni ca' miich ajcxy xymidzippich. Jadu'n ñch miich ajcxy xycöbijcy agujc jotcuje, tim jadu'n nej ixypy ti mgöbijccixy Jesucristo ci'm. ¹⁵ Jadachambi çti ti ytunyii ti yjadyii co ca' mmijotcuje'ajtcixy ñch n'ayuc? Com nyejcich tiy'ajt co je taabi anajty oga'n jim n'ityich ma miich ajcxy co janch xypubedaambich miich ajcxy. Ixti mgi'm huiin anajty ajcxy mjayajpidzimaangixyp etz xymöhuaangixyich anajty co ñch ngaa'a'ixiy. ¹⁶ ¿Nej ñch ti n'ahuimbityich miich ajcxy mmidzip mïd co ti nyajnimaaangixy huidibi janchip?

¹⁷ Yi huindzindijc jim ma miich ajcxy huidibi xychachyaj'ixpijccixp huidibi ca' ytiy'ajtiy, ca' ajcxy oyhuinma'ñ mïdity. Hue' ajcxy tzachtzocy co miich ajcxy m'ixmájtzcixip ñch n'ayuc ndiy'ajt. Hue' ajcxy tzachtzocy co miich ajcxy y' mgömayipy. ¹⁸ ñch njajotcujeich jadu'n co huingbi huindzin ajcxy jëbi xyaj'ixpijccixy. Nigoobi co ixypy jëbi ajcxy m'oy'ajtin mbaatcixy. Ca' oy copicyity co ñch ci'm miich ajcxy nmïd'ijttihuipy. ¹⁹ Migügtijc huidibi ooy ndzocy njihuüyich jadu'n nej jihuüy ngi'm'ung'ájtigixy, ooy tzaachypi ndzachjihuiyich mïd miich ajcxy ycixpi jadüg'oc. Jadu'n tzaachypi njihuüyich jadu'n nej ungday tzaachypi jihuüy co y'ung yajma'xung'ada'ñ. Njihuihuaamybich tzaachypi ixti cooni miich ajcxy anajty Cristo mhuinma'ñ xyaj'oyiyi. ²⁰ Ooy ñch njanay'ixpada'ñyii ma miich ajcxy cham cham. Njamïdcapxaangixy njamïdmïydägaangixy, chi ixypy tiy'ajt njacyajnimaaangixy jac huädz. Ooy ñch ndajy nmayich mïd miich ajcxy ycixpi, nej n'ocjacnimaaangixyipy.

Je Agar etz Sara y'ixpejt

²¹ Miich ajcxy huidibi mdzachcuydunamyb Dios ycötujcin je jecyip. Nmimaangixy ajcxy, ¿nej ca'ni ajcxy midoogixy huidibi Dios ycötujcin nigapxypi? ²² Com Dios y'ayuc huidibi jaybetyip jadu'n ymina'ñ co Abraham ymïd anajty metz ymang. Tüg je'anajty ytaj'ajtip huidibi ypödumb'ajtpy. Je jadügpi ymang anajty ytaj'ajtip huidibi ytimytöxijc'ajtpy. ²³ Je huidibi je pödumbi y'ung'ajti, hue' je' ypi'c'ajty jadu'n nej pi'ctijc jadyii yma'xung'ajtcixy. Je huidibi Abraham ytöxyijc y'ung'ajti Dios je' mïd ymic'ajt ypi'c'ajty, Dios ycuyduun y'ayuc huidibi yajhuinhuanïy Abraham. ²⁴ Jada jihuimbit ayuc jadu'n yhuimbizimyb: jada Abraham ytöxyjäy ajcxy metz iixpejt'ajtp jadu'n nej Dios ti ytuñ mïd y' yjäy. Je ypödumbi huidi anajty yxiï Agar, y' mïd yquipxïy y' Dios ycötujcin huidibi Dios ymoy Moisés ma je cop huidi yxiï Sinaí. E tüg'óciy jäy ajcxy huidibi cuyduungixp Dios ycötujcin huidibi Moisés ycojay, ane'my ajcxy je' yaj'idyyi, tim jadu'n nej tüg comeeñyjäy ane'my yaj'ity y' ytumbi ajcxy. ²⁵ Agar y' nigix'ajtp je cop Sinaí jim Arabia ñaaxjot ma Dios moy Moisés je cötujcin. Agar je töxyjäy huidibi anajty pödumb, je' mïd yquipxïy y' judíojäy huidibi tzachcuyduungixp Moisés ycötujcin, etz nañ yquipxïy mïd Dios y'it ya naaxhuiñ jim Jerusalén. Yi judíojäy etz y'ung y'anäg ajcxy huidibi tzach cuyduungixy Moisés ycötujcin je jecyip, ane'my ajcxy y'ity ma jada cötujcin, tim jadu'n nej jäy ajcxy huidibi tumb ma comeeñyjäy, e y'ane'my ajcxy y'ijtcixy. ²⁶ Je Sara huidibi Abraham ytöxyijc'ajtpy, y' mïd yquipxïy ñch ajt huidibi cuydumb je Cristo ytiy'ajt, e je Cristo y' yajpatp tzajpjoty. ²⁷ Com jaybetyity ymiñ ma Dios ñecy co mayjäy paada'ñ oybi ma Dios, com Dios jadu'n ymina'ñ:

Jotcugi' jadüg'oc miich Sara huidibi ca' y'ungbaady. Xic yäx miich mïd jotcuje'ajtin, miich huidibi ca' ungmoy. Nigi ymayihua'ñ miich m'ap m'oc ca'ydi Hagar y'ap y'oc.

²⁸ ñch ajt huidibi nmijpidaacim Jesucristo tügïyim mïd Abraham ymang Isaac. Com jadu'n nej Dios cuyduuñ y'ayuc huidibi yajhuinhuanïy Abraham co Isaac yma'xung'ajty, nañ tim jadu'n Dios cuyduuñ y' y'ayuc mïd ñch ajt co je Cristo y'oy ya naaxhuiñ. ²⁹ Tim jadu'n nej Abraham ymang Ismael jecy'ajty midzip'ajty Abraham ymang huidibi Dios yajhuinhuanïy Abraham; nañ tim jadu'n y' jäy ajcxy huidibi tzachcuyduungixp Dios ycötujcin je jecyip, ooy ajcxy tzach midzip'adyii y' jäy ajcxy huidibi mijijcp Jesucristo. ³⁰ Oc-huinmay miich ajcxy nej jaybetyity ymiñ ma Dios ñecy co jadu'n Dios nimay Abraham:

Yajpidzim ma mdijc je mbödumbi mïid ymang. Com ca' jadu'n ytiy'ajtiy co je pödumbi ymang paadipy miich mbidägy. Yi' je' padamb je mbidägy huidibi miich mdöxyijc ymang'ajtpy.

³¹ Migügtijc ajcxy, ca' ïch ajt n'ocjadu'niñ nej je pödumbi y'ung y'anäg ajcxy huïdi ane'my ijtp. Jadu'n ïch ajt nipaady nej Abraham ytöxyijc y'ung y'anäg huidibi ca' y'ane'my y'ity.

5

Cristo ti xyajnihuaatzim ma je cötujcin huidibi Moisés yejc

¹ Je Cristo ti xyajpidzimim ma Dios ycötujcin je jecyïp ma anajty n'ijtim y'ane'my, jigix jëbi tzojcingix nguyduunim yi' ytiy'ajt. Mibijccixy tiydudägy Cristo ytiy'ajt, ca' m'ixmajtcixy. Ca' mni'ahuimbijtcixipy jadüg'oc Dios ycötujcin je jecyïp ma anajty m'ijtcixy tim jadu'n nej comeeñyäj ytumbi ajcxy y'ijtcixy ane'my.

²⁻³ Amïdoo'ijtcix ïch n'ayuc. Jadachambi ïch Pablo minaambich pen miich ajcxy mgöbigamyb jada ayuc co copicy myajtiy'ajtihuipy, huin'it ñaadigï'ada'ñ co mmibijccixy Jesucristo ytiy'ajt. Ca' Jesucristo may'ajt tuna'ñ mïid miich ajcxy pen jadu'n m'idïdza'ñ. Jadüg'oc nmïna'ñich co pinjaty jadu'n ycuydunamyb tüg Dios ycötujcin, copicy ycuydundähuipy tüg'óciy. ⁴ Pen mijjp'ijxyp ajcxy co Dios xyajpocyñihuátzaangixy mïid co mguyduungixy tüg Dios ycötujcin, jadu'n nipaady nej jihuïy ti m'ixmajtcixni Cristo y'ayuc ytiy'ajt. Pen ca' mmijpidaaccixy je may'ajt oy'ajt huidibi Cristo ti tuñ ninigoob mïid miich ajcxy ycïxpi, huin'it ca' Dios xyajpocyñihuátzcixipy. ⁵ Njijp'ijxim co Dios xyajpocyñihuádzaanim jigix jëbi naydijim tudägy ma Dios yhuïnduu mïid co nmibijcim Cristo etz mïid co je Espïritu Santo xypubejtim. ⁶ Co nmibijcim ajt Jesucristo, Jesucristo ca' cuendituñ pen ti nyajtiy'ajtiyïm o pen ca'. Jëyi yi' tzocy co naychojcin nayjihuyïm nidüg nidüg, e jada je' je ijxpejt co nmibijcim yi' ytiy'ajt.

⁷ Jayijp'aty oy yajxon anajty m'occuydungixp Jesucristo ytiy'ajt. ¿Pin ti xy'agapxiyigixy co ca' mgapxymïdohuaangixy tiy'ajt? ⁸ Yi' jäy ajcxy huidibi ti xy'agapxiyigixy ca' ajcxy tiy'ajt patcixy ma je Dios huidibi ti xyhuin'ijxim jigix jëbi nmibijcim Cristo. ⁹ Miich ajcxy mnejhuïyb co jäy pidaaccixy levadura ma harina jich je levadura yajtiyiydaayb je jich. Nañ tim jadu'n jada anïi huidibi jäy ajcxy ti pidaaccixy ma miich ajcxy yajtiyidähuamyb miich ajcxy mjot mhuinma'ñ. ¹⁰ Com ïch nmibijcpich co ajt je nHuïndzin Jesucristo oyhuinma'ñ xymöhuipy ajcxy, paady ycïxp njijp'ijxypich co miich ajcxy mmibigaamyb ïch ngapxy ïch n'ayuc. Dios chaachytunipy je jäy ajcxy huidibi ti xyajhuinma'ñyidigooygixy. Oy ooy yjamij yjajanchity ajcxy, ca' ytimyñëjity, Dios yi' ajcxy tzaachytunïb.

¹¹ Migügtijc ajcxy, co ixypy yjanchity co ïch ngapxhuäcxyich co copicy nidüg'óciy jäy yajtiy'ajtihuipy, ¿nej co je'ni chambaad judïojäy xychach'ixhuidityich xychachpahuidityich? Pen ca' ixypy xy'ixhuidityich xypahuidityich jadu'n nipaady nej jihuïy nyaj'ixpicyich co je Cristo ca' y'o'cy mïid ïch ajt nbocy ycïxpi. ¹² Yi' huïdi ajcxy xyajhuinma'ñyidigooygixyp, ooy ixypy y'oyity co ixypy ajcxy xypuhuäctuatni tüccïyi.

¹³ Dios miich ajcxy ti xymijhuoogixy ma yi' ytiy'ajt jemybi jigix jëbi m'ixmajtcixni je Dios ycötujcin je jecyïp, etz tzojcingix mijpidägipy Cristo ytiy'ajt. Dios ti ajcxy mdü'aa xy'ahuaatzi, per ca' huaad mduungixy je jibicpi huidibi mjot mhuinma'ñ chachñijot'ajtcixpy. Hue' a'oy naymi'oyjäy'ajtigix nidüg nidüg, naybubëjtigix miñ xyipy.

¹⁴ Dios y'ayuc ymïna'ñ: "Mi'oyjäy'adipy mmijjin mmïdijc, tim jadu'n nej miich ajcxy mdzocy co mmijjin mmïdijc xymi'oyjäy'adipy." Co jadu'n ajcxy mnaymi'oyjäy'adïyb miñ yxipy, ytimyñipatyp jadu'n nej jihuïy ti mguydundäy tüg'óciy je Dios ycötujcin. ¹⁵ Pen miich ajcxy mnaymidundigooyip etz mnaymijotma'tip miñ xyipy, ca' yjetyity co ci'm anajty jadu'n mdzachnayyajhuinma'ñyidigooygixy miñ xyipy.

Je jugy'ajt huidibi yi Espïritu Santo yejcpy

¹⁶ Jada capxhuijin ñich miich ajcxy nyajnijayñiyb. Cuychinaaygix je Dios ytiy'ajt jadu'n nej je Espíritu Santo xyhuinma'ñymooygixy ajcxy. Ca' mguyduungixy je jibic-huinma'ñ huidibi mdzachnijot'ajtcixyp ci'm. ¹⁷ Je jibic-huinma'ñ huidibi mdzachnijot'ajtcixyp, hue'ymidzip'ajtpy je oybi huinma'ñ huidibi je Espíritu Santo xymooygixp. Dios y'ayuc obyí ca' ñaygodigiyii miiid miich ajcxy mjibic-huinma'ñ. Paady ycixp miich ajcxy ooy mjacuydunaangixy Dios y'ayuc, e ca' ajcxy mmimadäga'ñ ñicxy mguydundaaygixy. ¹⁸ Pen tzojcingix mguyduungixy je Cristo ytiy'ajt huidibi Dios yjihui'ñ xymooyb ajcxy, huin'it ca' copicy mguyduungixipy Dios ycötujcin je jecyip.

¹⁹ Com nnejhuiydaayim jadu'n nej jäy ajcxy yjot yhuinma'ñ tzachnijot'ajtcixy jibicpi. Jadu'n nej yëydijctijc tzachmigapxtigoyaangixy töxyjäydijc; e nañ jadu'n nej töxyjäydijc ajcxy ooy yëydijctijc tzachmiiid'ügangixy etz miiid'edzaangixy etz ma yjiibi ji ajcxy yhuinma'ñyidigooygixy. ²⁰ E nañ nnejhuiyim jadu'n nej jäy ajcxy tzach'ojadajtcixy tzachhuingoxtinaaygixy je huidibi jäy ajcxy ci'm ti yajcojy, etz nej jäy ajcxy tzach'ojadajtcixy tzachyajtunaangixy caxpojcpidijc, nej jäy ajcxy ymigüg tzachmijotma'tcixy; nej jäy ajcxy ca' tzip yjot'ambijccixy miiid yinjaty huenjaty ayuc; nej jäy ajcxy tzachmidzip'ajtcixy ymigügtijc; nej jäy ajcxy tzachyajca'oy'ijxcixy ymigüg co tijaty miiidity; nej jäy ajcxy chachnaybijc-huäcxáanigixy, huidibi abicy tzachmiiid'adamb yjäy. ²¹ E nañ nnejhuiyim jadu'n nej jäy ajcxy abijctigihuaangixy tijaty ymigüg ymiiid; nej jäy ajcxy ymigüg yaj'o'ccixy; nej jäy ajcxy nijot'ajtcixy ügii etz adzuuhuididii agoodzhuididii, etz yi jäy ajcxy huidibi tzachnijot'ajtcixp yi jadu'mbi huinma'ñ. ñich miich ajcxy cham nja-cyajnimaaygixy jadu'n nej ñich jayijp'aty ti n'ocnigapxpich, co yi jäy ajcxy huidibi yi jadu'mbi jibic-huinma'ñ chachnijot'ajtcixp jadu'n nej cham ti nijayñiygixy, ca' ajcxy tzinaydac paadaangixy ma Dios y'ane'my.

²² Hue' ajt jadachambi nejhuiydaayim je oybi huinma'ñ huidibi Espíritu Santo yejcyp. Co yi jäy ajcxy huidibi ymiiid Dios yjihui'ñ ymic'ajt ma yjot yhuinma'ñ, hue' ytungixyp ajcxy yi oyjäy'ajtin miiid ymigügtijc; miiid ajcxy xondaacin etz miiid ajcxy jotcuyc'ajtin; etz ymimecxtujcixyp ymigügtijc; etz chojccixyp yjihuiyigixyp ymigügtijc; etz ytungixp oybi; etz tudägy yjäy'ajtcixyp, ²³ nicy xeemy yjäy'ajtcixy ma ymigügtijc; etz ci'm yajxon ñay'ané'migixy ma yi oybi. Ca' ji huingbi cötujcin huidibi jada oybi huinma'ñ jijpcogapxihiipy. ²⁴ Tüg'óciy jäy ajcxy pinjaty Jesucristo Huindzin'ajtp, miiidacpy ajcxy yi jibic-huinma'ñ huidibi ci'm nijot'ajtcixyp miiid Cristo ymic'ajt. ²⁵ Miiid co nmiiid'ajtim je Espíritu Santo ymic'ajt ma ajt ndzinaayin njugy'ajtin, paady ycixp tzoc tzinaayim jadu'n nej xy'ane'mim xyhuinma'ñymooyim je Espíritu Santo.

²⁶ Ca' huaad amij agix ndzachnayjihuiyim, etz nañ jadu'n ca' huaad nmigügtijc nyajjotma'tim; etz ca' huaad ni ti nyajca'oy'ijxim.

6

Naybubéjtigixy miñ xyipy

¹ Migügtijc ajcxy, pen mbatpy tüg migüg huidibi jibic-huinma'ñ ti ymimadägyii, miich ajcxy huidibi miiidacyp yi jibic-huinma'ñ miiid Dios ymic'ajt mbubéjtcixipy jada migüg, e co mbubéjtcixipy jada migüg, ñigi jotmic mmigapx miiid oy gapxy oy ayuc. Naygüend'adii ajcxy ci'm, ca'ydi jibic-huinma'ñ xymimadaaccixy. ² Naybubéjtigix nidüg nidüg pinjaty ayo'n jotmay miiid. Co jadu'n mdüngixipy, hue' anajty ajcxy mguydungixyp Cristo ycötujcin huidibi ti xymooyim ajt.

³ Pen ji pin ñayjihuiyii amij agix etz chach naygömaya'ñyii ci'm co chach y'oyjäyity, ca' je' choobaady ma Dios yhuinduu. ⁴ Jëbi nidüg nidüg jäy ñayjihui'ñybigyii nej chinäy yjugy'aty, pen oy o peni ca'y'oyity. Peni ycuychinaayb yajxon Dios ytiy'ajt oybi, jotcuyc ñayjihuihuiyb je' ci'm e ca' huaad yajquipxiy chinaayin miiid huingbi. ⁵ Nidüg nidüg jäy

ci'm chinaayin jëbi yajnicxy nej Dios jäygidägy. Ca' huaad ni'ijxtüdy nej ymigüg jibic-huinma'ñ müdity.

⁶ Yi jäy ajcxy pinjaty ti ixpicy Dios y'ayuc ytiy'ajt, copicy co möhuipy tijaty yajmayjajtpy je huindzin tiibi yaj'ixpiyyii.

⁷ Ix ajcxy ci'm mnayhuin'ingix com Dios ca' yi' ni pin huaad nixigy yajxigy. Com pen miich ajcxy jibic-huinma'ñ mdumyb, Dios xychaachytunip ajcxy. Pinjaty oybi tuumb, nañ ypaadipy oybi, e pinjaty jibicpi tumb, nañ jibicpi ypaadipy. ⁸ Pinjaty jibic huinma'ñ tum jadu'n nej jibicpi tzachnijot'aty, co y'ögipy yi' y'alma ñicxip ayoodactuuby. Pinjaty cuydumb Dios ytiy'ajt jadu'n nej je Espiritu Santo huinma'ñ ymöyii, co y'ögipy yi' y'alma huingbi jugy'ajtin ypaadamyb huidibi nimina ycaacixy ycaatigooy huidibi je Espiritu Santo möhuib. ⁹ Peni nduunim jabom jabom oy huinma'ñ ca' huaad ndziipim, jëbi nmecxtujcim ixti cooni anajty nbaatim oybi ma Dios. E ca' huaad njotmetzciiyim. ¹⁰ Tzoc oyyäy'ajtin tuunim ma nidüg'óciy jäy ajcxy, jadu'n nej Dios xyhuinma'ñymooyim. Nigi tzoc pubejtim nmigügtijc huidibi mibijcp mijpidacp Cristo.

Ane'min, capxhuijin etz capxpooxin huidibi cijxnip je necy

¹¹ Ijxcix huindixcix jada letra mijjatypí huidibi ñich ci'm njaayb, com ndzojcpyich co mnejhuigyixipy nej yam nijayigyixy. ¹² Yi jäy ajcxy huidibi mibijcp co Cristo o'cy ma yi' cruudz müd ajt nbocy ycixpi etz nañ jadu'n mijpidacp yi' tiy'ajttihuü, hue' ajcxy tzach ñaygömayaanigyixy ma yi' judíojäy ajcxy, jigix ca' pin y'ixhuididiiyb ypahuididiiyb. ¹³ Yi huidi ajcxy tzach mijpidacp tiy'ajttihuü, nañ ni ca' ajcxy cuydundäy tüg'óciy jada Dios ycötujcin je jecyip. Hue' yi' ajcxy tzojccixy co miich ajcxy myajtiy'ajttihuip jigix ajcxy jëbi ñaygömáayigyixy müd co miich ajcxy ti myajtiy'ajttiiygixy. ¹⁴ Yi jäy ajcxy huidibi jim yaj'ixpijcp anii, ci'm ajcxy chach ñaygömayaanigyixy. Per ñich ca' jadu'n naygömaya'ñyijich müd huidibi ndumybich huidibi nyaj'ixpijcpyich. Hue' janchtiy ngapxpadaamybich ñich ajt nHuindzin Jesucristo ytiy'ajt, jadu'n nej yajcruudzpejti müd ajt nbocy ycixpi. Co ti nmibicyich Cristo Jesús, huin'it ti n'ixmachich je naaxhuiñyjäy yjibic-huinma'ñ. E paady cham ni nga'ocnijot'ajtnich yi' jibic-huinma'ñ. ¹⁵ Co nmibijcim Jesucristo, oy ixypy ti nyajtiy'ajttiiyim o oy ixypy ca' ti nyajtiy'ajttiiyim, ca' ma choobaady. Huidibi tzoubatp yi' je' co nmibijcim Jesucristo, etz co nmüd'ajtim jemybi jot huinma'ñ. ¹⁶ Huen Dios xyajjotcugihuipy etz xypa'ayoohuipy, etz nañ jadu'n yajjotcugihuipy etz pa'ayoohuipy nidüg'óciy jäy huidijaty cuydumb Cristo ytiy'ajt, tüg'óciy Dios yjäy janchypí tiydudägyipí.

¹⁷ Jadu'n nej jadachambi, etz jadu'n nej xii tiempo jacmiimb jaccidaacp, ca' ñich pin huaad xyjac'amayiyich, com nmüdich je tiy'ajt ma nninixich jadu'n nej jäy ajcxy ti xyhueenduüñich ti xychaachytuuñich müd co ti nduüñich müd Jesucristo ycixpi.

¹⁸ Migügtijc ajcxy, huen ñich ajt nHuindzin Jesucristo tunipy nigi may'ajt oy'ajt ma miich ajcxy. Jadu'n jada ngapxycixyich. Amén.

EFESIOS

Yi Necy Huidibi San Pablo Yajnigujx Je Mibijcpidijc Jim Efeso

¹ Hich Pablo, Dios jadu'n tzojcp co Jesucristo ti xyajñibicyich co n'apóstol'adipyich. Jada necy cham nguejxypich jim Efeso ma yi jäy ajcxy huidibi Dios yjäy'ajtíp, yi' ajcxy huidibi mibijcp tudägy Cristo Jesús etz huidibi ajcxy yajpatp ma yi'. ² Huen ajt nDios Teedy etz ajt nHuindzin Jesucristo may'ajt oy'ajt tunipy müd miich ajcxy etz xyajjotcugihuip ajcxy.

Nej je Espíritu Santo conucxy Cristo yjäy

³ Tzoc iibaatim capxpaatim Dios iich ajt nHuindzin Jesucristo yTeedy. Müd co nyajpaatim ma Cristo, paady Dios ti xyconuucxim müd tüg'óciy huidijaty tzomb tzajpjoty. ⁴ Dios ajt xyhuin'ijxim jecy'ajty, ca'ni anajty cojy macxy je naaxhuiñybi. Je' xyhuin'ijxim jigix jëbi nyajpaatim ma Cristo, etz jigix jëbi nyajpaatim ma Dios yhuinduu huadz oy njot nhuinma'ñ, ca' ti bocy nmüd'ajtim. ⁵ Müd co Dios ooy xychojxim xyjihuiyim, paady ycixp yi' capxcödujcy jecy'ajty, ca'ni anajty naaxhuiñybi yajcojy yaj'oyiy, co xycöbiganim nejjuhuïy yci'm y'ung. Co Dios jadu'n quejxy je Cristo ya naaxhuingixy, chi yi' yaj'oyiy nej jëbi xycöbijxim nej yci'm y'ung, e jadu'n xymüd'adaanim tzajpjoty. Dios jadu'n ytuñ jadu'n nej yi' anajty tzocyin. ⁶ Tzoc iibaatim capxpaatim Dios ooy müd co mijmay'ajt mij'oy'ajt tuuñ müd iich ajt ycixpi, co quejxy y'ung ya naaxhuiñ müd iich ajt nbocy ycixpi, jigix jëbi nyajpaatim ma yi' y'ung, je' y'ung huidibi ooy tzocy jihuïy. ⁷ Müd co Dios ooy xychojxim xyjihuiyim paady ycixpi yi' y'ung ñi'py teemy yojcy co y'o'cy müd ajt nbocy ycixpi, ti ajt n'alma xyajñidzoocim etz nbocy ajt ti xyhuinmeecxim. Co jadu'n ytuuñ, chi Dios mijmay'ajt mij'oy'ajt tuuñ müd iich ajt ycixpi. ⁸ Co Dios jadu'n mijmay'ajt mij'oy'ajt tuñ müd iich ajt ycixpi, ti xyajhuinjihuïyim ti xyajnejhuïyim yi' ytiy'ajt yi' yhuinma'ñ. ⁹ Dios yjäygidacpy jadu'n co ti xyajnejhuïyim nej anajty müdity capxcöducy huidibi ca' pin jecy'ajty huinjihuïy. Nañ jadu'n Dios ti xyajnejhuïyim nej ti yhuinma'ñypidacy jecy'ajty nej ytuna'ñ anajty müd Cristo. ¹⁰ Je huidibi Dios jecy'ajty ti yajnihuinmayiy co tuna'ñ anajty, ytunamyb yi' mina anajty je tiempo ti yhuaad'ajtni. Dios ti yajnihuinmayiy anajty co pidäga'ñ tüg'óciy huidi yajpatp tzajpjoty etz tüg'óciy huidibi yajpatp ya naaxhuiñ ma tüg'ane'min, e je Cristo je' ane'mamb nigohuajc'adamb tüg'óciy.

¹¹ Tüg'óciy tijaty tuni yjajti jiiiby tzajpjoty etz ya naaxhuiñ Dios jayijp capxcödujcy. Hich ajt huidibi nyajpaatim ma Cristo, Dios ti xyhuin'ijxim jecy'ajty co oga'n je naaxhuiñybi chondacy jigix jëbi nbaatim tüg'óciy huidibi Dios xymöhuaanim. E tüg'óciy jada nicxy yjaty tim jadu'n nej Dios jayijp capxcödujcy, e Dios ytumyby jadu'n nej yi' tzocy etz nej jäygidägy. ¹² Jadu'n Dios cuydumyby müd iich ajt ycixpi, huidibi jayijp ti nmibijcim ti nmijpidaacim Cristo, jigix jëbi nguydunim ma ajt ndzinaayin Dios ytiy'ajt, e jadu'n mayjäy capxpaadip etz ojadadip Dios müd yi' ymij'ajtin etz yi' y'oy'ajtin ycixpi. ¹³ Nañ jadu'n miich ajcxy co mmidooy je ayuc tiy'ajt nej jëbi m'alma ñidzögipy ajcxy, e ti mmibijccixy Cristo, huin'it ajcxy myajpaatcixy ma yi', e je Dios yjihui'ñ ymic'ajt huidibi miich ajcxy müd ma mjot mhuinma'ñ, je' nidiy'ajt'ajtp co myajpaatcixy ma Dios. Jada je' je Espíritu Santo huidibi Dios y'ahuaniiy jecy'ajty co xymöhuaanim. ¹⁴ Jada Dios yjihui'ñ ymic'ajt jada je' nidiy'ajt'ajtp co nbadaanim it lugar ma Dios y'it. Dios xymöhuaanim it lugar ma yi' y'it co anajty xii tiempo yhuaad'ajtni huin'it Dios nihua'na'ñ yajñidzöga'ñ pinjaty yjäy'ajtíp ajcxy. Jadu'n Dios tuna'ñ, jigix jëbi iich ajt n'iibaatim ngapxpaatim Dios müd y'oy'ajtin ycixpi.

Pablo mibijctzoy Dios co huen ajcxy yajmoy huijy'ajt cujc'ajt

15-16 Com ti nnejhuüyich jadu'n nej tydudägy miich ajcxy ti mmibijccixy ich ajt nHuindzin Jesús, e nañ jadu'n ti nnejhuüyich jadu'n nej mdzojccixy mjihuüyigixy tüg'óciy huídibi mibijccixp Jesucristo. Paady ycixp jabom jabom co Dios nmibijctzooyich, nyajna-jxpich jäygi daacín ma Dios miid miich ajcxy ycixpi. ¹⁷ Mibijctzooybich Dios, nHuindzin Jesucristo yTeedy, je mijpi Dios Teedy, co yi' xymöhuip ajcxy je huinma'ñ je ixpijcin huídibi je Espíritu Santo yejcpy, etz nañ jadu'n xyajnejhuíhuipy xyajhuinjihuíhuipy ajcxy jac'oy yi' y'ayuc, e tüg'óciy nej yi' ti ytuuñ. ¹⁸ Dios nmibijctzooybich miid miich ajcxy ycixpi, co xyaj'aniiyip ajcxy mjot mhuinma'ñ miid yi' ytiy'ajt, jigix jébi mnejhuüyigixipy tijaty huídibi ajcxy m'ahuijxyp ma Dios, nidüg'óciy miich ajcxy huídibi Dios ti huin'ixy. Nañ jadu'n jigix jébi mnejhuüyigixy nej ymijity yjanchity je pidägy huídibi Dios yegamyb miid tüg'óciy ajcxy huídibi Dios yjäy'ajtíp. ¹⁹⁻²⁰ Dios nmibijctzooybich jigix jébi ajcxy mnejhuíhuipy jadu'n nej Dios ymic'ajt miidity. Je' ymic'ajt ca' ycixipy ytigoyipy, e ni pin ca quipxipy. Etz yi' ymic'ajt tumb ma ich ajt njot nhuinma'ñ nidüg nidüg co ajt nmibijcim. Dios ti xyajnejhuüyim yi' ymic'ajt huídibi ymiid may'amy co yajjugypijcy jadüg'oc Cristo co y'o'cy, etz nañ jadu'n ti pidägy Jesucristo mij'ane'mbi jüby tzajpjoty. Yi' iñaayb a'oy'amy ma Dios ymijc, etz ane'mdäy tüg'óciy naaxhuiñ etz tzajp quipxyi miid Dios. ²¹ Cristo jac mij'ane'min ymiid, jac mic'ajt miid, ca'ydi jacpinjaty huídibi jayajpatp tzajpjoty, etz huídibi jayajpatp ya naaxhuiñ, huídibi cham tzinaayb etz huídibi jacjiini tzinähuaamni. Jesucristo cömay y'ity nigi, ca'ydi jac pin huídibi cham tzinaayb, etz huídibi jacjiini tzinähuaamni. ²² Dios ti pidägy tüg'óciy ane'min ma Cristo jébi ane'mdäy. Jadu'n nipaady nej jihuüy Cristo nihuäcpejtäy tüg'óciy ane'min. E nañ jadu'n Dios ti pidägy Cristo jigix jébi nigohuajc'adipy tüg'óciy mibijcpidijc. ²³ Je mibijcpidijc jadu'n nipaady nej Cristo ñinix, paady ycixpi yi' ajcxy yajcixy yajca'pxy je Cristo y'oy'ajtin ymij'ajtin. E je Cristo yajcijxtaayb yajca'pxtaayb tüg'óciy tijaty ji ajtp.

2

Dios chojcpy yjihuüyb jäy ajcxy, paady ñidzooccixy y'alma

¹ Ca'ni miich anajty ajcxy mmibijccixy Cristo, ooy anajty mdundigooygixy miid Dios ytiy'ajt, ooy anajty ajcxy mbocymiidity, e jadu'n nipaady nej jihuüy ti m'o'ccixy miid mbocy ajcxy ycixpi etz Dios xyajjugypijccixy huinjemy miid jemybi jugy'ajtin. ² Co ca'ni anajty miich ajcxy mgöbijccixy mmijpidaaccixy Cristo, ooy anajty mguydungixy naaxhuiñjäy ajcxy ytiy'ajt, etz nañ mgapxymidoogixy anajty ajcxy je ca'oybi huídibi ane'mb je poj naaxhuiñ, je ca'oybi huídibi tumb ma yi jäy ajcxy yjot yhuinma'ñ huídibi ca' capxymidoogixy Dios. ³ Ma je tiempo tibi ñaxy, nañ jadu'n anajty ndzinaayim jadu'n nej yi' jacjadyii naaxhuiñjäy ajcxy huídibi capxymidoob yi' ca'oybi. Ngapxymidoohuim anajty nninix chojcin. Ndundigooyim anajty miid ngi'mjot ngi'mhuinma'ñ. Nguipxyiyim anajty miid yi' jacjadyii naaxhuiñjäy ajcxy huídibi Dios tzaachytunaanip miid ypocy ycixpi, etz nañ jadu'n nihuaad'ajtim co Dios xychaachytuunim miid ajt nbocy ycixpi. ⁴⁻⁵ Oy ixipy ich ajt mihuaadity tzaachypi miid ajt nbocy ycixpi, per Dios mij ooy ti xypa'ayoohuim, e mij ooy ti xychojcin ti xyjihuiyim, paady ycixp tuuñ may 'ajt miid ich ajt ycixpi co yajjugypijcy je Cristo. E jadu'n quipxyi miid Jesucristo ich ajt nbaatim jemybi jugy'ajtin huídibi ca' ycixipy ytigoyipy ni mina. Jadu'n Dios may'ajt tuuñ miid ich ajt ycixpi co anajty nbadaanim o'cin miid ajt nbocy ycixpi. Miid co Dios may'ajt oy'ajt tuuñ miid miich ajcxy ycixpi, paady miich ajcxy ti mbatcixy jemybi jugy'ajtin huídibi ca' ycixipy ytigoyipy ni mina. ⁶ Com jadu'n nipaady nej Dios xyajjugypijcim quipxy miid Jesucristo, paady ycixp Dios xymöhuaanim it lugar jüby tzajpjoty quipxy miid Jesucristo. ⁷ Jadu'n nej xi tiempo mimb cidacp Dios jadu'n oy tuñ jigix jébi tiy'ajt nmiid'ajtim jadu'n nej Dios xychojcin xyjihuiyim etz xypa'ayoohuim mijcajee, etz mijmay'ajt mij'oy'ajt tuun miid ich ajt ycixpi co nyajpaatim ma Cristo. ⁸ Miid co Dios miich ajcxy ti xychojccixy

ti xyjihuiyigixy, paady ycixp yi m'alma ajcxy ti patcixy nidzoocin co ti mmibijccixy Jesucristo. Ca' nminaanim co tijaty ti mdungixy, paady ycixp yi m'alma ajcxy ti patcixy nidzoocin. Hue' janchtiy Dios ti xymooygixy ninigoob ajcxy m'alma nidzoocin. ⁹ Ca' nminaanim huin'it jäy ajcxy y'alma nidzoocin paadip co oybi tungixy. Hue'janchtiy Dios jadu'n ci'm ti yaj'oyiy ninigoob nej jäy ajcxy jëbi patcixy y'alma nidzoocin, jigix ca' pin jëbi huaad amij agix ñayjihuyii. ¹⁰ Com Dios ci'm ti oyduñ ich ajt njemybi tzinaayin jugy'ajtin müid je may'ajt huidibi Cristo ytuun co y'o'cy müid ajt nbocy ycixpi. Jadu'n Dios tuuñ müid ich ajt ycixpi, jigix jëbi nduunim oyyäy'ajtin ma ajt ndzinaayin. Dios, jecy'ajty ca'ni naaxhuiñybi anajty chondacy, cojy macxy je tity'ajt jadu'n nej yi' tzocy co nduunim oyyäy'ajtin.

Jotcuyc cham n'ijtim müid Dios, com Cristo xyajpocyhuaatzim

¹¹ Jadu'n miich ajcxy ocjäymejtzcodi nej miich ajcxy anajty myajpatcixy co anajty ca'ni mmibijccixy Jesucristo. Ca' miich anajty ajcxy mjudíojäyity, e ni ca' miich anajty ajcxy myajtiy'ajtiyigixy nej huaad mnaydíjigixy Dios yjäy. Paady ycixp yi judíojäy ajcxy ymínañ co Dios je' yjäy ajcxy, e miich ajcxy ca', müid yi'da'ajty co miich ajcxy ca' myajtiy'ajtiyigixy. ¹² Co ca'ni anajty mmibijccixy Cristo, je huin'it tiempo, ca' anajty ajcxy myajpatcixy ma Cristo, etz ni ca' anajty judíojäy xycöbijccixy, etz ni ca' anajty mbadaangixy huidibi Dios y'ahuaniy ma yi judíojäy ajcxy, etz ni ca' anajty ti mjijp'ijxcixy ma Dios, etz ni ca' miich anajty ajcxy myajpatcixy ma Dios. ¹³ Jadachambi, miich ajcxy huidibi jecy'ajty anajty ca' myajpatcixy ma Dios, jadachambi ajcxy myajpaady ma Jesucristo müid co yi' ñi'py teemy yojcy müid miich ajcxy mbocy ycixpi. ¹⁴ Jesucristo ci'm yaj'oyiy je tzip je capxy nej anajty ich ajcxy judíojäy etz miich ajcxy huidibi ca' yjudíojäyity naymidzip'ajtim, e cham jotcuyc n'ijtim. Jesucristo ci'm yajtigoy je judíojäy ycötujcin huidibi anajty tzipcojy capxycojy ma ich ajcxy etz ma miich ajcxy. Jesucristo yajtügmuyc judíojäy, etz huidi ca' yjudíojäyity. ¹⁵ Jesús müid yci'm ninicx yajtigoy je jecy'ajtypi cötujcin co oy yaj'ögyii cruudzcixy. Co Jesús y'o'cy, huin'it yajtügmuycy judíojäy etz huidibi ca' yjudíojäyity. Huin'it oy yaj'ahuimbity tügpicy jäy jemybi huidibi Dios yjäy'ajtip. E jadu'n ajcxy yajcixy yajmay je tzip capxy. ¹⁶ Co Cristo oy yaj'ögyii cruudzcixy, huin'it yajcixy yajnajxy je tzip capxy jadu'n nej yi judíojäy anajty midzip'adyii yi' ajcxy huidibi ca' yjudíojäyity. Etz nañ huin'it Cristo yajtügmuycy yi judíojäy müid huidibi ca' yjudíojäyity. Paady ycixp Dios ycöbiga'ñyii judíojäy ajcxy etz huidibi ajcxy ca' yjudíojäyity agujc jotcuyc.

¹⁷ Je Cristo miin anajty ya naaxhuiñ etz capxhuäcxy oybi tity'ajt jadu'n nej jëbi ajt nbaatim jotcuyc'ajtin ma Dios. Ycapxhuäcxyp anajty ma miich ajcxy huidibi ca' yjudíojäyity, huidibi ca' anajty müidity Dios ytiy'ajt. Etz nañ jadu'n ycapxhuäcxp Dios ytiy'ajt anajty ma ich ajcxy judíojäy huidibi jamüd anajty Dios ytiy'ajt. ¹⁸ Müid co Cristo may'ajt ti tuuñ co xy'adigiyim xyjottigiyim Dios yjihui'ñ ymic'ajt, paady ycixp nidüg'ócixy ich ajt nyajpaatim ma Dios jadu'n nej tügpicy jäy, tanto judíojäy etz nañ jadu'n huidibi ca' yjudíojäyity. ¹⁹ Paady ycixp miich ajcxy jadachambi myajpaady ma Dios. Jadu'n miich ajcxy myajpaady ma Dios tim jadu'n nej je jäy ajcxy huidibi tzinaayb ma yci'mgajp, ca' yjadu'nity nej adzinaaybi ajcxy. Paady ycixp tú'ciy miich ajcxy mnaygomájtzigixy ma Dios müid judíojäy ajcxy. Jadu'n miich ajcxy etz judíojäy ajcxy nipaady cham nej jihuy ajcxy mdügjuugy mdügmiüg. ²⁰ Miich ajcxy ti mjijpidaaccixy je tity'ajt huidibi Jesús y'apóstol ajcxy ti capxhuäcxy etz je tity'ajt huidibi Dios y'ayucnajtzcapxiybi ti capxhuäcxcixy. E yi' ajcxy ytiy'ajt jadu'n nipaady nej poch'ijx ma chondägy. E Jesucristo yi' jëdu'n yajpatp nej tüg tzaa huidibi jaccopicyip ma je poch'ijx chondägy. ²¹ Dios jadachambi tiempo ycojyp ymacxyp jadügpicy jäy huidibi yjäy'adaanip huidibi tügjijp mijpidaaccixy Cristo, huidibi tú'ciy ijtcixyp müid Cristo. Jadu'n jadyaabi tügpicy jäy nipatcixy nej tüg tijc ma jäy ajcxy Dios ojadajtcixy. ²² Miich ajcxy myajpatp ma Cristo

quipxyi m̄id nidüg'óciy yi mayjay ajcxy huídibi m̄ijp̄idacp Dios etz huídijaty m̄i'ijtp je Esp̄iritu Santo ma ajcxy yjot yhuinma'ñ, jadu'n miich ajcxy mjogy'ajtin nipaady nej Dios chinaydac.

3

Pablo yi' je' m̄id cōtujcin co capxhuācxy Dios y'ayuc ma p̄in ca' yjudíojäyity

¹ Ich Pablo, nyajpatp̄ich pujxtigoty m̄id co nduuñich ma Jesucristo ytung ma miich ajcxy huídibi ca' yjudíojäyity. Paady ycixp nm̄ibijctzooybich Dios m̄id miich ajcxy m'oy'ajtin ycixpi. ² Mnejhuñyb ajcxy com Dios m̄ijmay'ajt ti tuuñ m̄id miich ajcxy ycixpi, paady yi' ti xyajñibicyich ngapxhuācxbich ma miich ajcxy yi' y'ayuc ytiy'ajt. ³ Dios ti xyajnejhuñyich yi' ytiy'ajt huídibi jecy'ajty yüch y'ijt. Jada tiy'ajt yinjaty hueeñjaty ñich miich ajcxy ti nnijayñygixy jayijp'aty. ⁴ Co miich je necy mgapxip, huin'it ajcxy mnejhuñhuipy co ñich nnejhuñyich je Cristo ytiy'ajt huídibi ijtp yüch. ⁵ Jada tiy'ajt maabi Jesucristo, Dios ca' ni p̄in yajnejhuñy jecy'ajty. Jadachambi xii tiempo Dios m̄id je Esp̄iritu Santo yajnejhuñy Jesucristo ytiy'ajt je Jesús y'apóstoles ajcxy etz je Dios y'ayuc najtzcapxñybi ajcxy. ⁶ Jada je' je tiy'ajt huídibi jecy'ajty yüch anajty ijtp, co yi' jäy ajcxy huídibi ca' yjudíojäyity ypadamyb ajcxy Dios y'oy'ajtin quipxyi m̄id yi' judíojäy ajcxy, etz nañ jadu'n yi' ajcxy yajpaady ma Dios tú'ciy m̄id yi' judíojäy ajcxy, etz nañ jadu'n yi' ajcxy padaangixy oybi huídibi Dios jecy'ajty yajñimay yi' judíojäy co möhuaangixy pinjaty m̄ibijccixp Jesucristo.

⁷ Dios m̄ijmay'ajt ti tuñ m̄id ñich ninigoob co ti xyajñibicyich jada tung, e xymöyich mic'ajt co ngapxhuācxbich Jesucristo y'ayuc ytiy'ajt oybi ma yi' jäy ajcxy huídibi ca' yjudíojäyity. ⁸ Ich jactimmudzip ma yi' maybi m̄ibijcp̄idijc ca'ydi jacp̄in, per ca' ñejity. Dios may'ajt oy'ajt ti tuuñ ma ñich, e ti xyp̄idägyich ma yi' ytung co ngapxhuācxyich jada oybi tiy'ajt ma jacjadyii jäy ajcxy jigix jēbi ajcxy patcixy ma Cristo Jesús m̄ij'oy'ajtin, huídibi ca' p̄in huinjhuñy jadu'ñyi ym̄ijity. ⁹ Dios ti xyajñibicyich co ngapxticxbich ma tüg'óciy jäy ajcxy je Dios y'ayuc ytiy'ajt oybi huídibi yüch anajty ijtp. Yi' je' je ayuc huídibi Dios ti cojy ti macxy jecy'ajty, jadu'n nej yi' tuna'ñ je oybi m̄id tüg'óciy jäy ajcxy. Yi' je' Dios huídibi ti yajcojtäy tüg'óciy tijaty ya naaxhuiñ etz jiiby tzajpjoty yajpatp. ¹⁰ Jadu'n Dios capxcōdujcy co je tzajpjoty tzinaaybi ajcxy huídibi ane'm̄in etz mic'ajt m̄id, tiy'ajt padaangixy ma yi' m̄ibijcp̄idijc jadu'n nej Dios m̄ijhuinma'ñ canaagnax tuñ m̄id jäy ajcxy nidüg'óciy huídibi m̄ibijccixp Cristo Jesús. ¹¹ Jadu'n Dios ti cuyduuñ m̄id ajt nHuindzin Jesucristo jadu'n nej jecy'ajty capxcōdujcy. ¹² M̄id co nyajpaatim ma Jesucristo paady ycixp agujc jotcujc nm̄igapxim nm̄ihuingonim Dios. M̄id co nm̄ibijcim Jesucristo paady ca' ndzigñiyim ndzo'yduunim ma Dios yhuinduu. ¹³ Paady ycixp may'ajt nbijctzooyich m̄id miich ajcxy co ca' ñigi m'ixtigñhuāccixy ma ajcxy mm̄ibijcin. Etz ca'ajcxy xyñidajipy xyñimayipyich co tzaachypi nm̄inaxyich nyajnaxyich m̄id miich ajcxy ycixpi. Com m̄id co ti nyajnaxyich tzaachypi m̄id miich ajcxy ycixpi, paady jēbi miich ajcxy oy'ajtin mbatcixy.

Cristo chojcpy yjihuñyb jäy ajcxy

¹⁴ Com Dios m̄ijmay'ajt ti tuuñ m̄id judíojäy etz m̄id huídibi ca' yjudíojäyity, paady njatyhuingojxtinaaybich Dios, ñich ajt nHuindzin Jesucristo yTeedy, e nm̄ibijctzooybich Dios m̄id miich ajcxy ycixpi. ¹⁵ Tüg'óciy tzajpjoty tzinaayb etz tüg'óciy naaxhuiñyjäy huídibi m̄ibijccixp Dios, jēbi nidüg'óciy ym̄inaangixy: “Dios ñich ajt nDeedy.” ¹⁶ Paady nm̄ibijctzooybich Dios Teedy m̄id miich ajcxy ycixpi, co Dios je huídibi mic'ajt etz oy'ajt ym̄id m̄ijcajee, co xymöhuipy mic'ajt ma ajcxy mm̄ibijcin m̄id yi' yjihuññ ymic'ajt huídibi yajpatp ma ajcxy mjot mhuinma'ñ. ¹⁷ Dios nm̄ibijctzooybich m̄id miich ajcxy ycixpi co Cristo ymic'ajt yajpaadip ma miich ajcxy mjot mhuinma'ñ m̄id co mm̄ibijccixy Cristo. Jadu'n Cristo ymic'ajt yajpaadip ma ajcxy mjot mhuinma'ñ, jigix

jëbi miich ajcxy huidibi mmibijccixp Cristo, jëbi mdzójciixipy mjihuüygixipy mijcajee huinixii huinítiempo je mibijcpidijc etz tüg'óciy jacjadyii jäy. ¹⁸ Nañ jadu'n Dios nmibijctzooybich mïd miich ajcxy ycixpi co miich ajcxy etz tüg'óciy mibijcpidijc mnejhuüygixipy jadu'n nej Cristo xychojcm xyjihuiyim mijcajee. E yi' chojcin yjihuiyin jadu'n nipaady nej tüg'óciy jac cixip jac mijip, jac yooñip jac cicyip ca'ydi ni huidi tijc. ¹⁹ Nmibijctzooybich Dios co xyajnejhuüygixyip xyajhuinjihuüygixipy nej Cristo xychojcm xyjihuiyim mijcajee nidüg'óciy ñich ajt, ixti ca' huaad nhuinjihuüydaayim jadu'n nej Cristo xychachchojcm xychachjihuiyim. Nmibijctzooybich Dios co xypubéjtcixip, ixti mabaad mïd'ajttaaygixy Dios y'oy'ajtin.

²⁰ Jadachambi, cömay Dios y'ity huidibi mic'ajt mïd, etz huidi yejcp mijcajee jac'anaxy ca'ydi nej njapijctzoohuim etz nej njahuinmaayim, mïd je ymic'ajt ycixpi huidi tumb ma ñich ajt. ²¹ Huen tüg'óciy mibijcpidijc ajcxy jäymejtzciy ojadájtciy Dios etz Cristo Jesús jabom jabom huinixii huinítiempo. Jadu'n jada. Amén.

4

Tú'ciy n'ijtim mïd Espíritu Santo ycixpi

¹ Nyajpatpich pujxtigoty mïd ajt nHuindzin Jesucristo ytung ycixpi. Paady ycixp may'ajt nbijctzooybich co miich ajcxy mdzinaaygixipy jadu'n nej mihuaad jäy chinaaygixy huidibi Dios ti yhuin'ijxigixy, com Dios miich ajcxy ti xyhuin'ijxcixy. ² Pidaaccix mjot mhuinma'ñ yung naxy, nicy xeemy jäy'ajtcixy, naymecxtújcigix miñ xyipy, naymi'oyjäy'ajtigixy, jigix ñiguëxigip co mnaychójcigixy mnayjihuiygixy miñ xyipy. ³ Mïd'adipy ajcxy mjot mhuinma'ñ tú'ciy mïd je Espíritu Santo ypubejtin jigix jëbi mdzinaaygixy jotcuje ca' ma tzip capxy. ⁴ Nidüg'óciy mibijcpidijc tú'ciy yajpatcixy ma Cristo etz tügpajc Espíritu Santo huidibi yajpaady ma ajt njot nhuinma'ñ. Dios ti xyhuin'ijxim, jigix jëbi quipxyjaty njipp'ijxtaayim je oybi huidibi nbadaanim jiiiby tzajpjoty. ⁵ Ji yajpaady tügpajc ajt nHuindzin Jesucristo, etz tügpajc je ayuc tiy'ajt huidibi jëbi nmijpidaacim, etz tügpajc nnibejtim mïd Jesucristo yxi. ⁶ Ji yajpaady tügpajc Dios Teedy huidibi cuendi'ajtp yajtzinaayb nidüg'óciy mibijcpidijc. Yi' je' huidibi nihuindzin'ajttaayb. Yi' je' huidibi may'ajt tumb mïd nidüg'óciy ajcxy, etz yi' ymic'ajt yajpatp ma nidüg'óciy ajcxy yjot yhuinma'ñ.

⁷ Dios may'ajt oy'ajt ti tuñ mïd nidüg'óciy ñich ajt co Cristo xymooyim mic'ajt, jigix jëbi nidüg'óciy tuunipy Dios ytung nej ypadyii. ⁸ Paady ycixp jaybety ymiñ ma Dios jadu'n ymina'ñ:

Co Cristo ypättigiy tzajpjoty, chi ymïdpättigiy may machjäy, e nañ jadu'n Cristo moy jäy ajcxy mic'ajt (dones).

⁹ ¿Nej co jadu'n Dios y'ayuc ymina'ñ co je Cristo ypättigiy tzajpjoty? Hue' je' jadu'n ymina'ñ mïd co je Cristo jayjip ycidacy etz ooy ayooy ya naaxhuiñgixy. ¹⁰ Je Cristo yi' je' huidibi cidaac ya naaxhuiñ chooñ tzajpjoty, nañ jadu'n ypättigiy jadüg'oc tzajpjoty jactim'o'c'am. E yi' je' ymic'ajt yajpatp ma tüg'óciy huidijaty jiiiby tzajpjoty etz tüg'óciy huidijaty ya naaxhuiñ. ¹¹ Je Cristo ymooygixyp nidüg'óciy yi' ytumbi mic'ajt. Nijëjity mooygixy mic'ajt jëbi nidiy'ajt'ajtigixy co je' je' je Cristo. Nijëjity mooygixy mic'ajt jëbi najtzcapxiiygixy Dios y'ayuc. Nijëjity mooygixy mic'ajt jëbi capxhuäcxcixy yi' y'ayuc. Nijëjity mooygixy mic'ajt jëbi capxhuijcixy yi' mibijcpidijc mïd Dios ytiy'ajt. Nijëjity mooygixy mic'ajt jëbi yaj'ixpijccixy Dios ytiy'ajt. ¹² E jadu'n je Cristo mic'ajt moydaaygixy yi' yjäy, e jadu'n yajni'ixiydaaygixy mïd ytung ycixpi. E mïd yi' ajcxy ytung yjacyu-jcpedipy yi' mibijcpidijc y'ixpijcin, ixti mabaad jac mïd'adipy ajcxy Cristo y'oy'ajtin. ¹³ Jadu'n Cristo mic'ajt xymooyim, jigix jëbi nidüg'óciy ñich ajt ytügiyim nmibijcin, etz nañ jadu'n quipxyjaty n'ixpijtaayim Dios y'ung y'ayuc ytiy'ajt. E jadu'n nmi'ijtim cixy ca'pxy njot nhuinma'ñ, nmi'ijtim Jesucristo ytiy'ajt cixy ca'pxy. ¹⁴ Ca' n'idaanm mïd ajt

nhuinma'ñ nej pi'ctijc yhuinma'ñ ymüidity. Je pi'ctijc ajcxy janam jadojic yhuinma'ñ ytigajtcixy. Jadu'n ajcxy nipaady nej je miy huidibi je poj yajpojmiyib yajpojxijpy. Co cixy ca'pxy nmüid'ajtim Cristo ytiy'ajt, ca' pinjaty xyhuin'ünim müid huing ayuc oymibijcniç huidibi ca' yjanchity. ¹⁵ Hue' janchtiy ngapxim je tiy'ajt tiybi müid tzojcin jihuüyin, jaydebi njacyeem ajt nmibijcin etz njacnejhuüyim tüg'óciy Cristo ytiy'ajt jadu'n nej ytuuñ ya naaxhuiñ, je Cristo huidibi nigohuajc'ajtp tüg'óciy mibijcpidijc. ¹⁶ Cristo etz je mibijcpidijc nipatp nej tüg ninicx. Cristo ñipatp nej je ninicx cohujc huidibi ane'mb etz mic'ajt mooyb je ninicx. Etz yi mibijcpidijc ñipatp ajcxy nej je ninicx huidibi Cristo y'ane'myb etz mic'ajt möy. Ma Cristo tüg'óciy mibijcpidijc mic'ajt patcixy huidibi yajtügiyip ajcxy ymibijcin etz nañ jadu'n yaj'itigixy tügmucy. Nidüg nidüg mibijcpi ymic'ajt patcixy ma Cristo, jëbi tungixy Cristo ytung nej ypadyi. E jadu'n yeecixy nidüg'óciy ma ajcxy ymibijcin, etz nañ jadu'n yajyeecixy chojcin yihuüyin müid ymigütiç.

Je jemybi jugy'ajt huidibi nbaatim ma Cristo

¹⁷ Paady ycixp nnimäyich miich ajcxy etz nyajnibijccixy müid ajt nhuindzin Jesucristo ycotujcin, co ca' huaad mdungixy loci huinma'ñ huidibi ca' choubaady ma Dios, jadu'n nej jacjadyi jay ytungixy huidibi ca' mijpidaaccixy ajt nHuindzin Jesucristo. ¹⁸ Ca' huaad mdzinaaygixy jadu'n nej jacjadyi jay ajcxy chinäy müid loci huinma'ñ. Ca' ajcxy yajpaady ma Dios, je huidibi jugy'ajtin yejcp huinixibi. Ooy ajcxy yjotjuuñity, ca' ajcxy ixpigaangixy Cristo ytiy'ajt. ¹⁹ Ca' ajcxy ti tzo'ydu'n jihuüy co ytundigooygixy. Ooy ajcxy minicxnajcixy yi jibic-huinma'ñ. Ooy ajcxy nijot'ajtcixy mijcajee co tungixipy tüg'óciy tijaty jibic-huinma'ñ. ²⁰ Per miich ajcxy ca' ti m'ixpijccixy loci huinma'ñ etz jibic-huinma'ñ co ti m'ixpijccixy Cristo ytiy'ajt, ²¹ pen janch miich ajcxy ti mmidoogixy y' y'ayuc, pen ti m'ixpijccixy je tiy'ajt huidibi yajpatp ma Cristo. ²² Ti miich ajcxy m'ixpiçy co copicy m'ixmajtcixipy yi jibic-huinma'ñ nej anajty mnijot'ajtcixy jibicpi jayijp ca'ni anajty mmibijccixy Jesús. Jadu'n nej anajty ci'm ajcxy m'alma myajdigoyaangixy müid je jibicpi huidibi anajty ajcxy mnijot'ajtcixyp, ci'm anajty mnayhuin'ünigixy. ²³ Ixmajtcix jibicjot jibic-huinma'ñ. Pidaaccix mjot mhuinma'ñ co mguydunaangixy Cristo ytiy'ajt jemybi. ²⁴ Müid'ajtcix jemybi jot jemybi huinma'ñ com Dios ti yajtigajch huinjemy ajcxy mjot mhuinma'ñ müid tudägy'ajtin etz huadz'ajtin.

²⁵ Paady ycixp ca'huaad m'ündaaccixy, nidüg nidüg cápxcix huidibi janchip müid migütiç, müid co quipxyjaty nyajpaatim ma Jesucristo.

²⁶ Pen miich ajcxy mmijotma'tpy yi mmigüg, ca' mmigüg migapxtigooygixy midundigooygixy, mic'amy ajcxy mjäydigóoygixipy yi mjotmädi yajijp ca'ni anajty xii ycidacyñi. ²⁷ Ca' mnayyéçigixy ma je mujcu' co je mujcu' xymimadägyy.

²⁸ Yi jay ajcxy huidibi meetzcixp, huen ixmajtcixy meedzi, etz ijxtähuipy ytung. Co ytunipy ma ci'mdung jëbi pubedipy ajcxy ymigütiç huidibi yajmayajtcixp tijaty.

²⁹ Ca' mgápxcixipy jibic ayuc. Cápxcix oy ayuc huidibi jëbi migüg ajcxy jäygidaaccixy, huidibi pubejtp etz yajyeegy je mibijcin, huidibi yejcp oy'ajtin ma pin ajcxy amido'ijtp.

³⁰ Ca' huaad mgapxcixy mmiydaaccixy ayuc huidibi yajjotmaybijcp je Espiritu Santo huidibi Dios yjë'ajtpy. Je Espiritu Santo huidibi miich ajcxy müid ma mjot mhuinma'ñ, yi' je' huidibi tiy'ajt yejcp co miich ajcxy Dios yjäy'ajtigixy, co anajty Cristo ymiñ ya naaxhuiñ jadüg'oc huin'it mbadaangixy jugy'ajtin etz tzinaayin huidibi ca' ycixipy ytigoyipy ni mina.

³¹ Yajqueecix yi jibicpi ma ajcxy mjot mhuinma'ñ, jadu'n nej co mjot mhuinma'ñ ta'm mjihuüygixy, jadu'n nej co tzojic mjotma'tcootcixy, jadu'n nej co mnaymijotmä'tigixy, jadu'n nej co mnayhuin'ójigixy nayijp'ójigixy. Ca' huaad mmigüg mnigapxcixy mni'ojüygixy. Ca' jibicpi mnijot'ajt'adütcixy müid ajcxy mmigüg ycixpi. ³² Hue' janchtiy oybi mhuinmäaygixipy müid mmigüg ajcxy ycixpi. Nayba'ayóohuigixy nidüg nidüg.

Nayméecxigix nidüg nidüg. Com nañ jadu'n Dios ti huinmecxy miich ajcxy mbocy mïid co myajpatcixy ma Cristo.

5

Nej jëbi chinaaygixy yi Dios yjäy ajcxy

¹ Com miich ajcxy ñipatpy nejjihuïy Dios y'ung'ájtigixy, e Dios ooy xychojccixy xyjihuiygixy, paady copicy naychójcigixy nayjihuiygixy miñ xyipy, jadu'n nej Dios ti xychojccixy ti xyjihuiygixy. ² Jabom jabom ma mdzinaayin naychójcigix nayjihuiygix nidüg nidüg, tim jadu'n nej Cristo xychojcm xyjihuiyim, e yjugy'ajt yejcy mïid ajt nbocy ycixpi, e jadu'n Dios jäygidacy nej Cristo ytuñ.

³ Mïid co miich ajcxy Dios xyjäy'ájtigixy, paady tzinaaygixy mïid huadz mjot mhuinma'ñ. Ca' huaad m'oc'ibáatcixyñi m'occapxpáatcixyñi yi töxyjäy migapxtigoyi, etz yi jibic ayuc capxi, yi jibic-huinma'ñ nijot'adii etz yi meen adzogi. ⁴ Mïid co mDios miich ajcxy xyjäy'ajtp, paady ycixp ca' huaad mgápxcixipy ayuc huidibi tzo'ydu'ñ yejc, ni ca' huaad mgápxcixipy huidi ca' y'oyjäygidaacnity, etz ni ca' huaad mguxiiccixy m'anidaaccixy, com yi jibic ayuc ca' Dios jäygidägy. Tzoc yajnaxim jäygidacin ma Dios com Dios ti xyajhuaatzim ajt njot nhuinma'ñ. ⁵ Janch tiy'ajt jada co pinjaty tundigooyb mïid huingbi töxyjäy, pinjaty jibic-huinma'ñ mïid, ca' ajcxy padaangixy pidägy etz oy'ajtin ma Cristo etz ma Dios y'ane'min. Pinjaty meen adzojcp, Dios ca' tzocy, tim jadu'n nej yi' ca' tzocy pinjaty ojadajtp tzaadzech etz quipychech. ⁶ Ca' mnayyéjcgixy co jäy ajcxy xyhuin'ingixipy mïid ayuc huidibi ca' ytiy'ajtity ca'p choubaady. Mïid co jäy ajcxy capxcixy ayuc huidibi ca' ytiy'ajtity, paady ycixpi Dios tzaachytuna'ñ tüg'óciy jäy ajcxy huidibi capxcömïdodacp yi' y'ayuc. ⁷ Ca' huaad miich ajcxy mnaymigüg'ájtigixy, ca' mïid mnayyöymújcgixy yi jadu'mbi jäy ajcxy huidibi ca' capxymïdoogixy Dios.

⁸ Jayijp ca'ni anajty mmibijccixy Cristo, ca'ni anajty Cristo ytiy'ajt ajcxy mnejhuïy, e jadu'n nipaady anajty nej jihuiy myajpaady ajcxy agootztuum. Jadachambi mnejhuïygixyp Cristo ytiy'ajt, e jadu'n nipaady nejjihuïy mdzinaaygixy ma tüg tücxin. Paady ycixp jatyim cuydungixyp Cristo ytiy'ajt ma yi mdzinaayin mjogy'ajtin ajcxy, jadu'n nej jëbi huaad quëxigy co mmibijccixy Cristo. ⁹ Co nmïid'ajtim Cristo ytiy'ajt, chi nduunim huidibi y'oyip, huidibi tudägyip, huidibi tiy'ajtip. ¹⁰ Ixpijccix je tiy'ajt huidibi Dios yjäygidacpy. ¹¹ Ca' miich ajcxy mnaymigüg'ájtigixy mïid yi jäy ajcxy huidibi yajpatcixp agootztuum, huidibi tungixy huidibi Dios ca' jäygidägy. Miich ajcxy capxhuijccix mïid Dios ytiy'ajt yi' ajcxy huidibi agootztuum tzinaayb. ¹² Tzo'yduunim ajt co jay nigapxcixy nimiyaaccixy je jibicpi huidibi ajcxy ytumyb ayüch ameech. ¹³ Co n'ixquipxim yi jadu'mbi jäy ajcxy ayuc mïid Dios y'ayuc, chi niguëxigy pen janch tiy'ajt o pen ca' ytiy'ajtity, jadu'n nipaady nej ti nyajpidzimim je ajcxy ayuc ma yi agootztuum, etz nbidaacim ma yi tücxin. ¹⁴ Paady ycixpi Dios y'ayuc jadu'n ymïnañ:

Mäyhuijip miich ajcxy huidibi jadu'n nipatp nejjihuïy mdzachmaagixyp. Jugypijccix miich ajcxy huidibi jadu'n nipaady nejjihuïy ti m'öccixy. Cristo xycodíxcixipy mïid yi' ytiy'ajt.

¹⁵ Paady naygüend'ájtigixy huidibi tiy'ajt yajtungixp ma yi chinaayin. Tzinaaygix jadu'n nejjihuïy mnejhuïygixy Cristo ytiy'ajt, e ca' mdzinaaygixy jadu'n nej huidibi ajcxy ca' nejjihuïygixy Cristo ytiy'ajt. ¹⁶ Ni'ix'ijtcix jabom jabom jëbi mguydungixy Cristo ytiy'ajt. Jadachambi xii tiempo mayjäy ytundigooygixy mïid Cristo ytiy'ajt. ¹⁷ Ca' loci huinma'ñ myajtungixy, per nejhuïygixyp nej Dios tzocy co mdúngixipy. ¹⁸ Ca' huaad m'ijtcixy amügy jäy, com yi jocni xyajnicxixipy ayo'nduum. Nigi oy mi'ijtcixy Dios yjihui'ñ ymic'ajt may'amy ma ajcxy mjot mhuinma'ñ. ¹⁹ Naymigápxigixy miñ xyipy mïid yi salmo ayuc, mïid yi himnos. Huin'igix Dios mïid je iy huidibi je Espiritu Santo

xymooygixyp. Huin'igix etz ojadajtcix Dios cixyjot huinijot. ²⁰ Jatyim yajnajxcixy jabom jabom jäygidaacin ma ajt nDios Teedy ma ajt nHuindzin Jesús yxii, miid tüg'ócixy ycixpi nej ndunim n'ayoohuim.

Nej huaad chinaaygixy pinjaty picychinaaygixy

²¹ Miid co miich ajcxy mhuindzigiy Dios, paady ycixp miich ajcxy mnayyajmij'ajtigixy mnaygapxymidoohuigixy miñ xyipy.

²² Miich ajcxy töxyjäydijc yajmij'ajtcix capxymidoogix yi mñäy ajcxy, tim jadu'n nej myajmij'ajtcixy mgapxymidoogixy ajt nHuindzin Jesucristo. ²³ Com je töxyjäy ñäy nigohuajc'ajtp ma ytöxyijc ymiñ, tim jadu'n nej Cristo nigohuajc'aty ma yi mibijcpidijc ymiñ. Yi Cristo yi'je' huidibi nihuänamb yajnidzögamb yi mibijcpidijc. ²⁴ Tim jadu'n nej yi mibijcpidijc capxymidoogixy Cristo, nañ tim jadu'n tzocy co je töxyjäy ajcxy capxymidoogixipy yi ñäy ajcxy.

²⁵ Nañ jadu'n tzocy co je yëydijc huen tzocy jihuüy ytöxyijc, tim jadu'n nej Cristo tzocy jihuüy yi mibijcpidijc, e paady ycixp yejc yi' yjugy'ajtin miid yi' ajcxy ycixpi. ²⁶ Cristo yejc yjugy'ajtin miid je mibijcpidijc ycixpi, jigix jëbi huinmecxy ajcxy ypocy, yajhuaatzip ajcxy yjot yhuinma'ñ. Cristo yajhuaatzi yi mibijcpidijc ajcxy yjot yhuinma'ñ miid yi'y'ayuc etz co nibejt ajcxy miid ni. ²⁷ Jadu'n Cristo yajhuäch yi mibijcpidijc ajcxy yjot yhuinma'ñ, jigix jëbi ajcxy nayguëxigiyb ma yi' yhuinduu miid huädz yjot yhuinma'ñ. Je mibijcpidijc ajcxy nipaady nej tüg nijen huidibi huädzip, ca' ma ytijy ymachity. ²⁸ Jadu'n tzocy co je yëydijc huen tzocy jihuüy ytöxyijc tim jadu'n nej ci'm naychogyii. Yi yëydijc huidibi tzojcp jihuüyb ytöxyijc nañ jadu'n ci'm ñaychogyii. ²⁹ Ca' ji ni pin huidibi ca' ñaychogyii ci'm. Hue' janchtiy ycuend'ajtpy etz yajcüxyii yajpedyii yci'm ninicx, tim jadu'n nej jäy ajcxy cuend'ajtcixy yci'm ñinicx nañ tim jadu'n Cristo ycuend'ajtpy yi mibijcpidijc. ³⁰ Jadu'n Cristo cuend'ajtpy yi' yjäy, com jadu'n ajcxy nipaady nej yi' ñinicx. ³¹ Com copicy je yëydijc tzogip jihuühuip ytöxyijc jadu'n nej Cristo tzocy jihuüy yi mibijcpidijc. Paady ycixp je yëydijc ixmadzipy ytaj yteedy, e ypuDIGIHUIPY ytöxyijc, e jadu'n ajcxy chinähuipy nej jihuüy ytügpajcity. ³² Ooy chachmijhuinma'ñity jada tiy'ajt huidibi yüch anajty ijtp, e yi' iich jadu'n tijpy yi Cristo etz je mibijcpidijc. ³³ Cuendipijccix jada tiy'ajt co nidüg nidüg miich yëydijctijc ajcxy huidibi pijccixp copicy mdzogipy mjihuühuipy ajcxy mdöxyijc, tim jadu'n nej ci'm ajcxy mnaychogyii, e nañ jadu'n copicy co nidüg nidüg töxyjäydijc yajmij'adipy ñäy.

6

¹ Pi'ctijc ajcxy huidibi mibijcp Jesucristo, copicy mgapxymidoohuipy ajcxy mdaj mdeedy, com tiy'ajt jadu'n. ² Yi Dios ycötujcin huidibi minaamb: “Yajmij'ajtcix mdaj mdeedy”, yi' ooy ytimycopicyity. Nañ jadu'n co nguyduunim jada cötujcin, huin'it Dios jecy xyajtzinaayim. ³ Co miich ajcxy jadu'n myajmij'adipy mdaj mdeedy, huin'it Dios xymöhuipy ajcxy jotcujc'ajtin, e nañ jadu'n xyajtzinaaygixipy jecy ya naaxhuiñ.

⁴ E miich ajcxy huidibi ungedeedy'ajtcixp, ca' nigoo myajjotma'tcotcixy yi m'ung ajcxy. Ane'ngix yajyeccix yi m'ung ajcxy miid Dios y'ayuc ytiy'ajt, jaydëbi capxymidoogixipy ajcxy Dios.

⁵ Miich ajcxy huidibi tumbi'ajtp ya naaxhuiñ, capxymidoogix yi mhuindzin ajcxy, etz tungix miid tudägy'ajtin, etz yajmij'ajtcix etz tzigiygix. Tim jadu'n nej jihuüy mgapxymidoogixy yi mHuindzin Jesucristo.

⁶ Tungix yajxon miid ajcxy mhuindzin. Ca' janch xypaat oy mic mduungixy co ajcxy mhuindzin jim xyhuindicxcixy, e chi co je' yjihuäcni, chi nigoo mhuäccixni mdinäaygixni. Tungix jadu'n nej huaad jäy ytuungixy yi huidibi mijpidaaccixp Jesucristo. Tungix cixyjot huinijot jadu'n nej Dios tzocy mdüngixipy.

⁷ Tumbidijc ajcxy, tungix mdung cixyjot huinijot, tim jadu'n nej jihuüy mdungixy je Huindzin Jesucristo ytung, e ca' yjädungity. ⁸ Mnejhuüyb miich ajcxy co ajt nHuindzin Jesucristo oybi möhua'ñ nidüg nidüg jadu'n nej ti ytuuñ, ca' ñejity pen yci'mdung ytumyb, o pen ytumb müd tüg huindzin.

⁹ Miich ajcxy huidibi nihuindzin'ajtp tumbidijc, oy'amy ane'mgix mdumbi ajcxy. Ca'm'adzigiüygiipy ca' mdzaachytungixipy. Ajihuüyigixy co miich ajcxy etz nañ jadu'n mdumbi ajcxy müd ajcxy mHuindzin tzajpjoty, e yi mHuindzin tzajpjotyqi quipxyjaty tiyduna'ñ nidüg'óciy miich ajcxy.

Je mic'ajt huidibi je mibijcpidijc ajcxy ypatcixyp müd Dios yjihu'ñ

¹⁰ Jadügnax, migügtijc ajcxy, yi mmic'ajt mbaadip ajcxy ma ajt nHuindzin Jesucristo. Com Jesucristo ooy mic'ajt müdity, paady jëbi miich ajcxy mbatcixy yi mmic'ajtin ma yi'. ¹¹ Naygohuaanigixy miich ajcxy ma je mujcu' müd tüg'óciy tiy'ajt huidibi Dios xymooyim, huidi müd naygohuaanim ma je mujcu', e jadu'n ca'ydí je mujcu' xymimadaacim müd anii. Jadu'n Dios ytiy'ajt nipaady nej tujt etz pujxnijen huidibi soldados ajcxy müd naygohuaanigixy tzipjoty. ¹² Hue' janchtiy xymidzip'ajtim poj naaxhuiñ, ca'oybi, mujcu'dijc, etz tüg'óciy mic'ajt müdpi huidibi midzip'ajtp Dios ya naaxhuiñ etz jüby tzajpjoty, ca'p ñch ajt nmidzip'ajtim naaxhuiñjy. ¹³ Paady ycixp yajtungixy tüg'óciy mic'ajt etz tiy'ajt huidibi Dios ti xymooyigixy, jigix jëbi mmimadaaccixy je ca'oybi co anajty xyajtundigoyaanigixy. E jadu'n jëbi mimadaaccixy je ca'oybi müd ajcxy mmibijcin. E co anajty ti mmimadactaayigixy, huin'it m'ijtcixipy mic ma ajcxy mmibijcin. ¹⁴ Ca' m'ixtigihuaccix ma ajcxy yi mmibijcin. Nayñi'ixiiyigix müd Dios ytiy'ajt, jadu'n nej jäy ajcxy ñayhuüindädzigixy co ytunaanigixy. Nayñi'ixiiyigix tim jadu'n nej soldados ajcxy ñayñi'ixiiyigixy müd pujx nijen ma caach co chiptunaanigixy. ¹⁵ Nayñi'ixiiyigix müd Dios y'ayuc, jigix jëbi ajcxy nicxy mgapxhuäcxi Dios y'ayuc huidibi jotcuje'ajtin yejcp. Co jadu'n mdungixipy, jadu'n nibaadip tim jadu'n nej soldados ajcxy ñayñi'ixiiyigixy co yajtigiiyigixy yzapato co ytüyöyaanigixy. ¹⁶ Yi' huidibi jac copicyip ca'ydí jac ni ti, mibijccix tiydudägy Jesucristo. Müd ajcxy yi mmibijcin jëbi mnaygohuaanigixy ma je mujcu'. Miich ajcxy mmibijcin jadu'n nipaady nej tüg escudo huidibi je soldados ajcxy yajtumyb co ñaygohuaanigix ma je tip huidibi yajnajtztübiyb müdi jin. ¹⁷ Nayñi'ixiiyigix müd Cristo ytiy'ajt huidibi müd ajcxy m'alma xyajnidzoocip, tim jadu'n nipaady nej soldados ajcxy ñaygohuaanigixy co pidaaccixy ypujx cöjup co chiptunaanigixy. Naygohuaanigix miich ajcxy müd Dios y'ayuc huidibi jadu'n nipatp nej tüg espada huidibi je Espiritu Santo ti xymooyigixy. ¹⁸ Mibijctzoogix Dios müd tüg'óciy ycixpi huidibi ajcxy mdumyb. Mibijctzoogix etz pijctzoogix may'ajt ma Dios jabom jabom müd je Espiritu Santo ypubejtin. Huijy ycuje m'ijtcixipy, ca' mjotmetzcüyigixipy. Mibijctzoogix Dios müd tüg'óciy mibijcpidijc ajcxy ycixpi. ¹⁹ Nañ jadu'n mibijctzoogix Dios müd ñch ycixpi, co huen xymöyich ayuc etz jotcuje'ajtin, jigix jëbi ngapxhuäcxibich huinmic jotmic yi' y'ayuc ytiy'ajt huidibi ca' pin jecy'ajty nejhuüyigixy. ²⁰ Dios ti xyajñibicyich jada tung jëbi nyajnicxyich yi' y'ayuc ytiy'ajt ma je mayjäy ajcxy. Paady ycixp nyajpaadyich pujxtigoty cham. Tungix may'ajt mibijctzoogix Dios müd ñch ycixpi co xyajjotmicpigipyich jigix jëbi ngapxhuäcxyich yi' y'ayuc huinmic jotmic.

Capxpooxín huidibi cogixiiyñip

²¹ Ooy ndzocy njihuüyich je Tíquico, nañ jadu'n yi' ooy xypubejtyich ma ajt nHuindzin Jesucristo ytung. Yi Tíquico miich ajcxy xyajmüdmüydägiipy tüg'óciy je tiy'ajt nej nya-jpaadyich ya, etz tüg'óciy tung huidibi ya ndumybich. ²² Nguexaamybich Tíquico ma miich ajcxy jigix jëbi xymüdmüydägiipy ajcxy jadu'n nej nyajpaadyich ya, e müd jada tiy'ajt jëbi miich ajcxy mjotcugiiyigixy.

²³ Huen Dios Teedy etz ajt nHuindzin Jesucristo may'ajt tunipy mid miich ajcxy, jigix jëbi jotcuje mdzinaaygixy, etz nañ jadu'n jëbi mnaychójcigixy mnayjihuíyigixy miñ xyipy, etz jigix jëbi mjacmibijccixy Cristo. ²⁴ Huen Dios may'ajt oy'ajt tunipy mid miich ajcxy huídibi yajmij'ajtcixp ajt nHuindzin Jesucristo huinixi huinitiempo. E ca' m'ixmájtzcixip nimina nej ajcxy mijpidaaccixy Jesucristo. Jadu'n jada. Amén.

FILIPENSES

Yi Necy Hu'idibi San Pablo Yajnigujx Je Mibijcpidijc Jim Filipos

¹ Hich Pablo m'id Timoteo tumbich ma Jesucristo ytung. Jada necy ich ajcxy nguejxpy ma t'ug'ociy hu'idibi mibijcp Dios jim Filipos hu'idibi yajpaatp ma Jesucristo. Nañ jadu'n jada necy nyajniguexyich y' ajcxy mijtungm'ip' etz mutztungm'ip' ma Dios ytung. ² Huen ich ajt nDios Teedy etz ajt nHuindzin Jesucristo may'ajt etz oy'ajt tunipy m'id miich ajcxy y'ixpi etz xyajjotcug'ixipy.

Pablo mibijctzoy Dios m'id je mibijcpidijc y'ixpi

³ Naag'oc naag'oc njäymechich miich ajcxy njatytimyajnaxpyich jäy'idaacin ma Dios m'id miich ajcxy y'ixpi. ⁴ Njatytimjotcujc'ajtpich ooy naag'oc naag'oc Dios nmibijctzooyich m'id miich ajcxy y'ixpi. ⁵ Jotcujc'ajtpich com miich ajcxy ti xy-pubéjtcixyich co ngapxhuäcxich Jesucristo y'ayuc ytiy'ajt. Jadu'n ti xy-pubéjtcixyich maabi nyajtzondägyich ngapxhuäcxich Jesucristo y'ayuc ixti chambaad. ⁶ Nejhuüybich tiydudägy co Dios ti yajtzondägy y' oybi ytung ma miich ajcxy mjot mhuinma'ñ, etz jactunaamni ma miich ajcxy mjot mhuinma'ñ ixti mabaad Jesucristo anajty ymiiñ jadü'oc ya naaxhuiñ m'id y'ane'min etz ymic'ajt. ⁷ Ooy ytudägyity co jadu'n jotcujc'ajtpich m'id miich ajcxy y'ixpi, com ooy ndzocy njihuüyich miich ajcxy. Dios may'ajt oy'ajt ti tuñ co ti xyajnbicyich jada tung, etz miich ajcxy myajpaady quipxy m'id ich ma Dios ytung, m'id co miich ajcxy xyjäymechich etz nañ xy-pubetyich ajcxy, huenma'amy ich nyajpaady, oy ixypy pujxtigoty, oy ixypy ma tungm'ip' yhuinduu co nnigapxpetyich Dios y'ayuc ytiy'ajt etz nañ nnigapxpetyich co yjanchity. ⁸ Dios ñejhuüyb jadu'n nej mijcajee ooy ndzocy njihuüyich miich ajcxy m'id je tzojcin jihuüyin hu'idibi Jesucristo ti xymöyich. ⁹ Nmibijctzooybich Dios m'id miich ajcxy y'ixpi co xy-pubedipy ajcxy jigix jëbi nig' mdzogipy mjihuüipy migügtijc, etz jigix ajcxy nig' m'ixpigipy je tiy'ajt tudägyipi, etz nañ nig' mhuinjihuüipy t'ug'ociy nej Dios tzocy co nduunim. ¹⁰ Nañ nmibijctzooybich Dios m'id miich ajcxy y'ixpi jigix jëbi mnejhuüygixipy, etz nañ jigix jëbi mhuin'ixcixipy hu'idibi jac'oy mdung'ixipy. Co oy mdung'ixipy, huin'it jëbi mdzináaygixy m'id huadz jot huadz huinma'ñ, e ca' ni ti jotmay miich anajty ajcxy mm'idiñ, co anajty je xü je tiempo paady co Jesús anajty miñ ya naaxhuiñ jadü'oc m'id y'ane'min m'id ymic'ajt. ¹¹ Dios nmibijctzooybich m'id miich ajcxy y'ixpi co ajcxy mbattähuip t'ug'ociy oyjot oyhuinma'ñ, je oyjot oyhuinma'ñ hu'idibi Jesucristo t'ug'ajc jëbi xymooygixy. E jadu'n jäy ajcxy capxpaadip Dios etz nañ huin'igixip Dios co ajcxy ixipy nej tudägy mdzinaaygixy.

M'id ich, yi njugy'ajtich, y' y' Cristo

¹² Ndzojcpyich co miich ajcxy mnejhuüipy co m'id je tzaachyp' y'ixpi hu'idibi nm'anaxyp nyajnaxypich ya pujxtigoty, nig' mayj'ay ti midoy Jesús y'ayuc ytiy'ajt. ¹³ Jadu'n ti yhuimb'izim' co t'ug'ociy soldadtijc etz jacjadyii jäy ya ma je gobierno ymijtijc ti nejhuüydäy ajcxy co nbujxtijc'inäyich m'id co nduunich ma Jesucristo ytung. ¹⁴ Nañ jadu'n m'id co nbujxtijc'inäyich, paady y'ixpi y' jacjadyii mibijcpidijc ti yjotm'icp'ijccixy ma ajt nHuindzin Jesucristo tung, etz ycapxhuäcx'adichpy ajcxy Dios y'ayuc ytiy'ajt, ca' ma tzig'iñ jihuiñ.

¹⁵ Janch tiy'ajt jada co nijëjity jäy capxhuäcx' je Cristo y'ayuc ytiy'ajt m'id co ca' xyajmidzojccixy, etz nañ m'id co xyajmidzip'ajtcixy. Nañ tiy'ajt jada co jacjadyii migügtijc xychojcp xyjihüyb ajcxy, e capxhuäcx' ajcxy je Cristo y'ayuc ytiy'ajt m'id oyjot oyhuinma'ñ. ¹⁶ Janch tiy'ajt co nijëjity migügtijc capxhuäcx'ixy Jesucristo y'ayuc

müid co ñaygömaya'ñyii ci'm, ca' nmınaanim ycapxhuäcxp ajcxy cixyjot huinijot. Yi' ajcxy y'ixtaayb nej xyajtajípy xyajmayípyich, jadu'n nej ñich pujxtigoty n'ityich. ¹⁷ Yi' ajcxy huídibi xychojcpich xyjihuiyibich ycapxhuäcxpy ajcxy Cristo y'ayuc com ñejhuíyb ajcxy co ñich yam n'ityich pujxtigoty, müid co ti nhuinma'ñ nbídägyich co nnigapxpeda'ñich Jesucristo y'ayuc ytiy'ajt. ¹⁸ Pen jäy ajcxy capxhuäcxp Cristo y'ayuc müid co ñaygömaya'ñixy ci'm, o pen ycapxhuäcxp müid oyjot oyhuinma'ñ, ca' ñejity, jotcuje'ajtpich co capxhuäcxy ajcxy Jesucristo y'ayuc.

¹⁹ Com nnejhuíybich co müich ajcxy mmibijctzoogixy Dios müid ñich ycixpi, e nañ nnejhuíybich co Jesucristo yjihui'ñ ymic'ajt xypubetyich, paady ñigi njotcugíyich, e nañ njjpp'ijxypich co nbídizima'ñich pujxtigoty. ²⁰ Ndzojcypich etz nañ njjpp'ijxypich co nmimadactähua'ñich tüg'óciy ma ñich mdzinaayin, e ca' ti tzöydu'n nbáadibich ma Dios yhuinduu. Ndzojcypich nañ njjpp'ijxypich co njaccapxhuäcxibich Jesucristo y'ayuc huinmic jotmic, jigix Jesucristo ycomay'idípy. Ca' ñejity pen jactzinaayb, o pen n'o'cpich. ²¹ ñich ndzinaayin njuugy'ajtin Cristo yi' ycixpi, e peni n'o'cpich, ti ñich anajty mij nmadägy. ²² Pen njactzinaaybich, mayjäy oybi pada'ñ müid ñich ndung ycixpi. Ca' nnejhuíyich huídibi jac'oy nhuin'ixipyich co tzojc n'ögibich, o co njactzinähuibich. ²³ Ooy chachchipy nnejhuíhuíbyich huídibi jac'oy nhuin'ixipyich, co n'ögibyich, o co njactzinähuíbyich. ñich ci'm nayjihuíyijich ñigi jotcuje co ixypy tzojc n'ögyich, jigix ixypy mic'amy nicxy n'ityich jiiyby tzajpjoty ma Cristo yajpaady. ²⁴ Per jaccopity müid müich ajcxy m'oy'ajtin ycixpi, co njactzinähuibich. ²⁵ Com nnejhuíybich co copicy njacpubeda'ñich müich ajcxy, paady nnejhuíybich co njactzinähuibich, e jigix jëbi nbubejtcixy ma Dios ytung etz ma yi mmibijcin. E jadu'n müich ajcxy ñigi mjotcuje'adipy ma mmibijcin. ²⁶ Müich ajcxy huídibi yajpaatp ma Jesucristo, ñigi jotcuje m'idípy co nicxy n'ida'ñich jadüg'oc ma müich ajcxy.

²⁷ Jëyi janchtiy co mdzinaayin mjogy'ajtin mi'ijtcixy jadu'n nej Cristo y'ayuc ytiy'ajt y'ane'my. Pen nicxpich anajty ci'm ma müich ajcxy, o pen ca' nnicxyich, per ndzocypich co xypáadibich tiy'ajt co müich mic m'ijtcixy ma mmibijcin, tú'ciy cixyjot huinijot mdungixy. Mic mjanchmidinaaygixy ni'amugi' yi mmibijcin, jadu'n nej ti mmijpidaaccixy Jesucristo ytiy'ajt, ²⁸ e ca'ajcxy mdzigihuij co jäy ajcxy xymidziptzóongixipy, jada je' tiy'ajt co tigoyamb ajcxy y'alma, e nañ jada je' tiy'ajt co müich ajcxy chóocixipy yi m'alma, e nañ jadu'n jada tiy'ajtip co Dios y'ity müid müich ajcxy. ²⁹ Dios may'ajt oy'ajt ti tuñ müid müich ajcxy ycixpi co yaj'oyíy nej jëbi müich ajcxy mibijccixy Jesucristo etz nañ nej jëbi tzaachypí mminajxcixy myajnajxcixy müid Jesucristo ycixpi. ³⁰ ñich etz müich ajcxy quipxyi ti mminajxim ti nyajnajxim tung ayo'n müid Jesucristo ycixpi. Müich ajcxy ti m'ixy ti mnejhuíy jadu'n nej ñich ndung n'ayo'n ti nminaxy ti nyajnaxyich, co jim anajty n'ityich ma müich ajcxy. E nañ müich ajcxy mnejhuíyb nej ñich chambaad nminaxy nyajnaxyich ndung n'ayo'nich müid Cristo ycixpi.

2

Cristo yung'ajt ñax'ajt etz ymij'ajt

¹ Pen Cristo müich ajcxy mjot'amijmooyb müid yjihui'ñ müid ymic'ajt, pen ti jotcuje'ajtin mbatcixy müid co Cristo xychojccixy xyjihuiyigixy, pen yi' yjihui'ñ ymic'ajt ijtp ma müich ajcxy, pen mdzocjccixyp mjihuiyigixyp etz nañ mba'ayoogixy migügtijc, ² jotcuje'adipich müid co mdzinaaygixy ooy yajxon, xic xon, tügyi mnaychójcigixy mnayjihuíyigixy miñ xyipy, tzinaaygixy quipxyjot quipxyhuinma'ñ. ³ Ca' ajcxy ti mdunípy müid mgi'mdzocjin ycixpi. Nañ ni ca' amij agix naybidáacigixy co ti mdungixy. Tüg'óciy huídibi mdungixyp, mdunípy ajcxy müid yung naxy mjot mhuinma'ñ. Nidüg nidüg myajmij'adipy ñigi

migügtijc, ca'ydi nej miich ci'm mnayyajmij'adyii. ⁴ Ca' huaad pin naydügpajc yci'm'oy'ajt ixtây, nañ jadu'n tzocy co migügtijc myajmidzogipy y'oy'ajt.

⁵ Pidaaccix mjot mhuinma'ñ tú'ciy jadu'n nej Jesucristo anajty yhuinma'ñ mïdity co ya naaxhuiñ chinay. ⁶ Oy Jesucristo yjaDiosity ti yhuinma'ñypidägy co jëbi ixmach yi' ymij'ajtin huidibi anajty yjamïd. ⁷ Jesucristo ahuingujc pidaactay je mij'ajt huidibi anajty ymïd, e chi jadu'n chinay nej tüg tumbi co oy jadu'n ypi'c'aty jadu'n nej jäy. ⁸ E co jadu'n ñaybidaaci nej naaxhuiñyjäy, chi yung naxy pidacy yjot yhuinma'ñ, e nañ capxymïdoy Dios ixti mibaad ñayyejci, huen jäy yaj'ögyii. E ooy anajty cho'ydu'nity co jäy yaj'o'ci cruudzcïxy. ⁹ Paady ycixp Dios ti cömay jacnïgi Jesucristo, e ti pidäci yi' yxii jaccömay, ca'ydi jacpinjäy yxii. ¹⁰ Jadu'n Dios ti cömay Jesús, jigix jëbi tüg'óciy tzajpjoty tzinaaybi etz tüg'óciy naaxhuiñyjäy, etz tüg'óciy jäy ajcxy huidibi ti ñaaxtigïy, co anajty ajcxy nidüg'óciy mïdoogixy co Dios capxpaatip Jesús yxii, chi ycojxtinaay'ihuiydähuipy ajcxy ma yi' yhuinduu, etz y'ojadadipy ajcxy Jesús nidüg'óciy. ¹¹ E co nidüg'óciy ajcxy cöbigipy etz yajmij'adipy Jesucristo jadu'n nej ajcxy yHuindzin, jadu'n Dios Teedy ycömay'ida'ñ.

Yi pin ajcxy Cristo mibijcp, yi' yi' ajcxy jadu'n nej tüg tïcxin jajin

¹² Migügtijc ajcxy huidibi ooy ndzocy njihuïyich, com Jesucristo jadu'n iixpejtin ti yecy, capxymïdoogich cham co jïguëgy nyajpaadyich ma miich ajcxy, tim jadu'n nej jayhuin ïch miich ajcxy xycapxymïdooy co n'ijtyich ma miich ajcxy. Naymijottigöoyigix jabom jabom mguydungixy Jesucristo ytiy'ajt etz mmi'ijtcix huädz mjot huädz mhuinma'ñ. Tungix Dios ytung mïd yung naxy ajcxy mjot mhuinma'ñ, e huindzigïyigix Dios. ¹³ Com Dios yi' tumb jabom jabom ma miich ajcxy mjot mhuinma'ñ, jigix jëbi miich ajcxy mdunipy yi' ytung yi' chojcin cixyjot huinijot jadu'n nej Dios tzocy.

¹⁴ Tungix cixyjot huinijot Dios ytung, ca'y'aametzity yjotmetzity, nañ ni ca' mïd tzip ejcin. ¹⁵⁻¹⁶ Jadu'n mdunipy ajcxy ca'ydi pinjaty yxigixy co ti mdundigooygixy. Miich ajcxy Dios xy'ung'adiib, ca' mnigix'adiyb ajcxy ti jibicpi. Tzinaaygix mïd oyjot oyhuinma'ñ ma yi' jäy ajcxy yajpaady huïdi jibic-huinma'ñ tumb huidibi tundigooyb ma Dios ytiy'ajt. Co miich ajcxy myajhuäcxy Dios y'ayuc ytiy'ajt huidibi alma yjugy'ajtin mooyb ma jibicjäydijc ajcxy, jadu'n nipaady nej tüg madzä ytiicxy coodz. Pen jadu'n mdungixy, co anajty Cristo ymiiñ jadüg'oc ya naaxhuiñ, jotcujc'adipich co anajty nnejhuïyich co ca' ïch ndung etz nxii ndiempo yñadigï'aty co n'ijtyich ma miich ajcxy. ¹⁷ Co n'ögibich mïd Cristo ytung ycixpi, jadu'n nipaady nejjihuïy ïch nni'py ti ndem ti nyocyich mïd miich ajcxy ycixpi co ti ngapxhuäcxich Dios y'ayuc ma miich ajcxy. E co miich ajcxy ti mmijpidaaccixy ïch n'ayuc, jadu'n nipaady nejjihuïy miich ajcxy ti myoxy ti mdoogy yi' mjogy'ajtin ma Jesucristo. Jotcujc'ajtpich jadu'n co miich ajcxy mjogy'ajtin ti myoxy ti mdoogy ma Jesucristo. ¹⁸ Nañ jadu'n miich ajcxy mjotcujc'adipy quipxy mïd ïch.

Timoteo etz Epafrodito

¹⁹ Pen ïch ajt nHuindzin Jesús tzojcpy, njijp'ijxypich co jëbi nguexipyich Timoteo ma miich ajcxy, jaydëbi njotcujc'adipyich co anajty yi' xyajnimiiñich tiy'ajt nej miich ajcxy myajpaady. ²⁰ Timoteo tügpaajc huïdibi huinma'ñ tú'ciy mïd jadu'n nej ïch nhuinma'ñ nmïdidyich, etz nañ huïdibi janch naybidaacip mïd miich ajcxy m'oy'ajtin ycixpi. ²¹ Yi' jacjadyii migügtijc huïdibi yajpatp ma ïch, yajcopijcpy ajcxy yci'm'oy'ajtin, e ca' ajcxy yajcopicy Jesucristo ytung. ²² Miich ajcxy mnejhuïyb jadu'n nej Timoteo tudägy ytuñ mïd ïch co ngapxhuäcxich Jesucristo y'ayuc ma miich ajcxy, tim jadu'n nej tüg ung ytuñ mïd yteedy. ²³ Paady ycixp njijp'ijxypich co jëbi nguexyich Timoteo ma miich ajcxy mina anajty nnejhuïyich nej ycixipy ïch njotmay huïdibi nmïdich ya. ²⁴ Nañ nmibijcypich ajt nHuindzin Jesucristo co yaj'ahuädzïp ïch nni'a ndü'a co jëbi ïch ci'm nicxy tzojc n'ixyich miich ajcxy.

²⁵ Nañ jadu'n nhuinmaayich co copicy jadüg'oc nguexipyich ajt nmügüg Epafrodito ma miich ajcxy, yi' huidibi xypubejtpich ma ndung n'ayo'nich ya. Yi' huidibi miich ajcxy ti mguexy ma ñich, jëbi xypubetyich ma tüg'óciy huidijaty nyajmayajtypich. ²⁶ Epafrodito ooy nijot'aty co jëbi nicxy y'ixaangixy miich ajcxy nidüg'óciy. Ooy yi' ytajy ymaay co miich ajcxy ti mnejhuüy co ypiyü. ²⁷ Janch tiy'ajt co Epafrodito ooy ti ypiyü, jago jago ti yca'ögy. Per Dios ti pa'ayoy Epafrodito, e nañ jadu'n ti xypa'ayooyich, jigix ca'ydi niigi ayo'n jotmay nbaadyich. ²⁸ Paady ycixp niigi ndzocyich co jëbi nguexipyich Epafrodito ma miich ajcxy jadüg'oc, jigix miich ajcxy mjotcugihuip co m'ixipy. E nañ jadu'n jëbi yquëgy ñich ndajin mayin müd yi' ycixpi. ²⁹ Cöbijccix Epafrodito jotcuyc, jadu'n nej tüg' mügüg huidibi yajpaatp ma ajt nHuindzin Jesús. Yajmij'ajtcix tüg'óciy migügtjic huidibi yjugy'ajtin vojxp toocp müd Jesucristo ytung ycixpi, jadu'n nej yi' ti ytuñ. ³⁰ Com jago jago Epafrodito ti yca'ögy müd Cristo ytung ycixpi. Tzip tzaach yjugy'ajtin ti minaxy ti yajnaxy co ti xypubetyich ya. Com miich ajcxy ca' ci'm jëbi xypubéjtcixyich ya, paady yi' miich ajcxy ti xycodinäy.

3

Je tudägy'ajt je janchypi

¹ Jadügnax, migügtjic ajcxy, jotcuyc'ajtcix co myajpatcixy ma ajt nHuindzin Jesucristo. Ca' ti adzjipin njihuüyich co nnigapxpetyich jada tiy'ajt jadüg'oc huidibi jayhuin ti nya-nijayiygixy. Jadu'n nduñich müd miich ajcxy m'oy'ajtin ycixpi. ² Naygüendi'ajtigix müd yi' ajcxy y'ayuc huidibi ajcxy tundigooyb co ajcxy yajcopijcy yi' tiy'ajt huidibi pidacp ma jäy ñinix müd tzujc. Jibic jäy yi' ajcxy, jadu'n ajcxy nipaady nej uc. ³ Yi' jäy ajcxy huidibi tiydudägy mibijcp Dios, ca' nminaanim je' yi' ajcxy huidibi tiy'ajttiyip ñinix. Yi' Dios yjäy ajcxy janchypi, yi' ajcxy cixyjot huinijot mibijcp mijpidacp Dios ytiy'ajt jadu'n nej ñich ajt. ñich ajt n'ojadajtim Dios müd ajt n'espíritu, etz müd ajt njot nhuinma'ñ. Jotcuyc'ajtim com je' co nyajpaatim ma Cristo Jesús, e ca' nyajcopijcim tijaty tiy'ajt huidibi jäy ajcxy ytumyb. ⁴ Co ixypy ytiy'ajtiy yi' jadu'mbi huinma'ñ, jëbi ixypy naygömayijich ci'm, com jecy'ajty ca' anajty ni pin huidibi niigi cuyduun yi' jadu'mbi tiy'ajt ca'ydi ñich. ⁵ Co nductujcxijjyich ma anajty ti nma'xung'atyich, chi oy nyajtiy'ajttiyich. Raza hebrea ñich, Benjamín nmij'ap'ajtpyich nmijteedy'ajtpyich. Nma'xung'ajtic hebreojäy. ñich ndajndeedy hebreojäy ajcxy anajty. Nañ nmijpidaacich fariseo y'ixpijin, jadu'n nej ajcxy yajniguejy judíojäy ycötujcin. ⁶ ñich janchmictägy anajty nguyduñich ngi'mhuinma'ñich, ixti mabaad anajty n'ixhuidity nbahuidityich mictägy yi' jäy ajcxy huidibi anajty mijpidacp Jesucristo. Ti nguydundäyich tüg'óciy judíojäy ycötujcin. Ni pin ca' huaad yxiyich co ti ndundigooyich ma yi' ajcxy ycötujcin. ⁷ Tüg'óciy yi' judíojäy yhuinma'ñ huidibi ti nyajcopicyich anajty, jadachambi ca' ytimychobaady müd ñich, co ti nmijpidägyich Cristo ytiy'ajt. ⁸ Jadachambi janchtiy, huidijaty anajty nyajcopijcypyich, ti nnajtz'ixiydäyich, jigix jëbi nnejhuühubich etz nguydunipich yajxon ajt nHuindzin Jesucristo oybi y'ayuc ytiy'ajt. Müd co ti nmijpidägyich Jesucristo, paady nnajtz'ixiydaayich tüg'óciy huidibi anajty nyajcopijcypyich, yi' jadu'mbi huinma'ñ cham ca' chobaady müd ñich, jadu'n nipaady nej pux. Jadu'n nduñich müd Jesucristo ytiy'ajt oy'ajt ycixpi. ⁹ E jadu'n nduñich jigix jëbi nyajpaadyich ma Jesucristo. Jadu'n ti nnajtz'ixiydäyich je tudägy'ajtin huidibi ti nbaadyich co ti nguyduñich Moisés ycötujcin je jecyip. Nañ jadu'n nduñich jigix jëbi nbaadibich je tudägy'ajtin huidibi Dios yajcyp co nmibijcim nmijpidaacim Jesucristo. ¹⁰ Ndzojcpyich co njacnejhuühubich Cristo y'ayuc ytiy'ajt. Nañ ndzojcpyich co njacnejhuühubich Cristo ymic'ajt, jadu'n nej yjugypijcy co y'o'cy. Nañ ndzojcpyich co njacminaxipyich njacyajnaxipyich tzaachypi jadu'n nej Jesús minaxy yajnaxy tzaachypi, ixti mabaad jadu'n njatyich jadu'n nej Cristo yjaty co

y'o'cy. ¹¹ E paady ycixpi njjip'ijxpyich co n'ögibich njugypigipyich jadüg'oc co anajty Dios yajjugypicy yi jäy ajcxy tiibi y'öccixy.

Naymic'ijxim jigix nbaatim huidibi Dios ti xyaj'ahuanayim

¹² Ca' nmīnaanīm jadu'n nmīna'ñich co ti nmīmadactäyich nej Cristo ti mīmadactäy. Nañ ni ca' jadu'n nmīna'ñich co ñich njot nhuinma'ñ ti nyajhuätztäyich. Njactumnich, jigix jēbi Cristo y'oy'ajtīn nbāadibich. Com Jesucristo ti xyhuin'ixyich jayijp, jaydēbi jada oy'ajtīn nbāadibich. ¹³ Migügtjic ajcxy, ca'ñich cī'm naygōmayijjich, co ti nmīmadactäyich Cristo y'oy'ajtīn. Jada janchtiy ndumbyich, njäydigoydaaybich tüg'óciy huidibi ti ñaxy, e mictägy nduunich jēbi nbāadibich je oy'ajtīn huidibi Dios jiiyby tzajpjoty xymōhuaambich mīid co nyajpaadyich ma Jesucristo. ¹⁴ Mictägy nduunich mīid tüg'óciy nmic'ajtich, jigix jēbi nbāadibich je oy'ajtīn huidibi Dios jiiyby tzajpjoty xymōhuaambich. Jadu'n nipaady nejihuīy mīid pīn nayboyicquipxyijjich co nbada'ñich tüg' premio.

¹⁵ ñich ajt ti nhuinma'ñ ycijxni yca'pxni, tzoc panīcxim je ixpijcin huidibi nmīid'ajtim. E pen nidügti miich ajcxy tigachjaty huinma'ñ mīidity, Dios xyajnejhuīhuip ajcxy je tiy'ajt.

¹⁶ Jada janchtiy, je tiy'ajt huidibi ti nbaatim copicy nguýdundaayim, ca' n'ixmajtzim.

¹⁷ Migügtjic ajcxy, panīcxix ñich n'ijxpejt jadu'n nej ti ndzinäyich ma miich ajcxy. Nañ jadu'n miich ajcxy ijxpejt mbigipy ma yi' ajcxy chinaayin huidibi ijxpejt ti patcixy ma ñich. ¹⁸ Canaag'oc ti nnīmaaygixy, e nnīmaaygixy jadüg'oc mīid tajin mayin co may nmigügtjic chinaaygixy jadu'n nej jihuīy mīdzip'ajtcixy je Cristo huidibi o'c cruudzcixy mīid ajt nbocy ycixpi. ¹⁹ Dios yajtigoyip je'ajcxy y'alma. Yi' ajcxy ypidacpy yhuinma'ñ ma yi' caayin uucin jicxy ypic, ma yjapadyii huen yjot yhuinma'ñ pīdaaccixy ma Dios. Yi' ajcxy chachñaygōmāayigixy cī'm ma yjapadyii tzo'ydu'n jihuīyigixipy. Hue' pīdaaccixy yhuinma'ñ ma naaxhuīñ jäy chinaayin. ²⁰ ñich ajt hue' nyajpaatim njäy'ajtim tzajpjoty, e njjip'ijxim co ñich ajt nHuindzin Jesucristo mīinaamb ya naaxhuīñ jadüg'oc, chona'ñ tzajpjoty, je huidibi xyajñdzōgaanim ajt n'alma. ²¹ Jesucristo xyajtigadzaanim ajt nninīcx pocymīdipi, e xymōhuaanim tüg' ninīcx jemybi oybi, tim jadu'n nej yi' ñinīcx mīidity. Cristo xyajtigadzaanim ajt nninīcx mīid yi' ymic'ajt huidibi mīid ane'mdäy mīmadactäy.

4

Jotcuje'ajtcixy ajcxy ma je mHuindzin Jesús

¹ Com Jesús xyajtigadzaanim ajt nninīcx, paady ycixpi migügtjic huidibi ooy ndzocy njihuīyich, tiydudägy mībijccix ajt nHuindzin Jesucristo, ca' m'ixtigihuāccixy ma mmībijcin. Migügtjic ajcxy huidibi ooy nicxy nja'ixa'ñich, ooy njotcuje'atyich mīid miich ajcxy ycixpi. Mīid miich ajcxy ycixpi nbada'ñich n'oy'ajtīn ma Dios.

² Nbijctzooybich may'ajt ma Evodia etz ma Síntique co huen ajcxy ixmajtzicixy yi' tzip etz huen naymigügpījcigixy jadüg'oc, com hue'ajcxy yajpaady mībijcpi ma Cristo.

³ Miich migüg'oc huidibi ti xypubetyich ma Cristo ytung, may'ajt nbijctzooybich ma miich co mgapx'oyihuipy je tzip ma ajcxy je metzpi töxyjäy. Yijjibi metzpi töxyjäy tumb anajty ajcxy quipxyi mīid ñich co ngapxhuācxyich Jesucristo y'ayuc ytiy'ajt. Yi' ajcxy xypubejtich quipxyi mīid Clemente etz yi' jacjadyii huidibi anajty tumb quipxyi mīid ñich. Jada metzpi töxyjäy ajcxy yxii ycojayiy ymīñ ma Dios ñecy, je necy ma Dios mīidity cojay je jäy ajcxy yxii huidibi padamb jugy'ajtīn huinixibi.

⁴ Jotcuje'ajtcix huinixii, mīid co myajpatcixy ma ñich ajt nHuindzin Jesucristo. Jadüg'oc nīgapxpetyich co huen jotcuje'ajtcixy. ⁵ Jadu'n tzīnaaygix jadu'n nej jēbi jäy ajcxy nejhuīyigixy co miich ajcxy myajtungixy mecxtujcin ma mdzīnaayin. Com huīgon je xii je tiempo mīna ymīina'ñ ñich ajt nHuindzin Jesucristo jadüg'oc.

⁶ Ca' ni ti mnīdajcixy mnīmaygixy. Capxpīdzīmdaaygix ma Dios tüg'óciy ti jotmay miich ajcxy mmīid. Mībijctzoogix Dios, e nañ yajnajxcix jäygīdaacin ma Dios. ⁷ Co Dios mmībijctzóogixipy, huīn'it ajcxy yi' xymōhuip jotcuje'ajtīn mījcajee, e mayñaxhuīñjäy

ajcxxy ooy yhuinmay ahuididipy miiid miich ajcxxy m'oy'ajtin yciixpi. Co myajpaady ajcxxy ma Cristo Jesús, paady yciixpi Dios xyajtzinähuiipy ajcxxy jotcuyc etz xymöhuip ajcxxy huinmañ tudägyipi.

Tzojccix nijot'ajtcix huidibi oyip

⁸ Jadügnax, migügtijc ajcxxy, pidaaccix mhuinmañ ma tüg'óciy tiy'ajt huidibi janchip, tüg'óciy tiy'ajt huidibi jébi nyajmij'ajtim. Pidaaccix mhuinmañ ma tüg'óciy tiy'ajt huidibi tudägyip. Pidaaccix mhuinmañ ma tüg'óciy huinmañ huidi huädziip etz tüg'óciy huinmañ huidi oy jäygidacni. Pidaaccix mhuinmañ ma tüg'óciy huinmañ huidibi jébi yajcapxpaady. Huinmaaygix tüg'óciy jada oybi huinmañ etz huidibi huaad njäygidaacim.

⁹ Yajtungix je tiy'ajt huidibi ti nyaj'ixpijciixy, etz je cötuyc huidibi ti nmooygixy, etz je ayuc huidibi ti mmidoogixy co ti ngapxyich. Etz nañ tungix je iixpejt huidibi ti nyecyich. Cuydungix jada tiy'ajt, huin'it yi Dios yajpaadipy ma miich ajcxxy etz xyajjotcuyc'idipy ajcxxy.

Filipenses ajcxxy y'ofrendi miiid Pablo yciixpi

¹⁰ Hich ajt nHuindzin Jesucristo ti ooy xyajjotcugiyich co je tiy'ajt xypaadyich co miich ajcxxy xyjäymechich jadüg'oc. Ca' nmīnaanīm nmīnañich co miich ajcxxy ti xyjäydigoydaayñich. Hue' anajty ycanibidzimy nej jébi xypubejtcixyich. ¹¹ Ca' nmīnaanīm jadu'n nmīnañich co ooy ti jaty nyajmayajtnich. Com ti nhuinmañ nbidägyich co njotcuyc'adipyich miiid tijaty nmīdich, oy tim mīnaaxi tim mīnaatiempo. ¹² Com hich ci'm nejhuñyibich nej jay ajcxxy y'ayoy yjottigooy, e nañ nejhuñyibich nej jäy ajcxxy chinäy co miiid'aty tijaty may'amy. Ti nnejhuñydäyich nej jébi ndzinäyich, nej jébi nyajnajxich xii tiempo; pen cu'xyi ngaayich, o pen ca' cu'xyi ngayich, pen nmīdich conax, o pen ca' ti nmīdidyich. ¹³ Jébi ndzinähuibich jotcuyc huenti huennejity, com Cristo xymic'ajtmooybich. ¹⁴ Ooy oy ti mdungixy co ti xypubejtcixyich ma hich n'ayo'n njotmay.

¹⁵ Jadu'n nej miich ajcxxy huidi jim Filipos mnejhuñyb ajcxxy, je taabi nyajtzondacyich co ngapxhuäcxyich Jesucristo y'ayuc ytiy'ajt, co ndzooñich jim Macedonia miich ajcxxy ti xymiyoxyich, e jac tigati ti mguejxcixy ma hich. E miich ajcxxy jim Filipos huidibi mibijcp Jesús, miich ajcxxy tügpajc xypubejtich ca' jac ni pin. ¹⁶ Co n'ijtyich jim Tesalónica miich ajcxxy xyajnigüeijxyich pubejtin metz'oc tugig'oc, e jadu'n miich ajcxxy xypubejtyich miiid huidibi anajty nyajmayajtpich. ¹⁷ Ca' nmīnaanīm ooy ndzachjipp'ixynich pubejtin, jada janchtiy ndzojcpyich co miich ajcxxy nigi oy'ajtin mbaadipy co anajty mmejtzcixy ma Dios yhuinduu. ¹⁸ Ti ooy yhuaadiy yi mbubejtin ixti nyajconajxpich. Miiid je pubejtin huidibi ti myajmiguejxcixy Epafrodito cham nmīdidyich ca'pxy, ca'ti n'ocyajmayajtnich. Miiid jada pubejtin huidibi miich ajcxxy ti xymöyich, ti ooy njäygidägyich, tim jadu'n nej Dios jäygidacy je poomjoc huidibi yajhuindzigñyi. ¹⁹ Hich nDios miich ajcxxy xymöhuip tüg'óciy huidibi miich ajcxxy myajmayajtpy. Mijcajee yi' miich ajcxxy xymöhuip yi oybi mijpi oy'ajtin huidibi yi' ymiiid ma yi Jesucristo. ²⁰ Huen hich ajt nDios Teedy cömay'idipy huinixii huinítiempo! Jadu'n jada. Amén.

Capxpooxñ huidibi cijxnip je necy

²¹ Tungix may'ajt capxpooxcix miiid hich yciixpi tüg'óciy migügtijc huidibi yajpatp ma ajt nHuindzin Jesucristo. Je migügtijc huidibi yajpatp miiid hich nañ jadu'n xyajnigüeijxcixy capxpooxñ. ²² Tüg'óciy je mibijcpidijc huidibi yajpatp ya cajpjoty xyajnigüeijxp ajcxxy capxpooxñ, yi' ooy ytimyjajjipity huidibi ajcxxy yajpatp ma je mij ane'mbi César ycötujctac xyajnigüeijxyp ajcxxy capxpooxñ.

²³ Huen hich ajt nHuindzin Jesucristo may'ajt oy'ajt tunipy miiid tüg'óciy miich ajcxxy. Jadu'n ngapxycixyich. Amén.

COLOSENSES

Yi Neczy Huidi San Pablo Yajniejx Je Mibijcpidijc Jim Colosas

¹ Hich Pablo, Dios jadu'n tzojcp, paady Jesucristo ti xyajniejxich jëbi ngapxhuäcxyich yi 'y'ayuc. ² Hich mïid ajt nmigüg Timoteo cham nguexyich jada necy ma miich ajcxy huidibi tzinaayb jim Colosas. Hue' nguexyich jada necy ma miich ajcxy huidibi Dios yjây'ajtip e mmibijccixy yi Cristo. Huen ïch ajt nDios Teedy etz ajt nHuindzin Jesucristo may'ajt oy'ajt tunipy mïid miich ajcxy etz xyajjotcugïygixip.

Pablo mibijctzoy Dios mïid mibijcpidijc ycixpi

³ Jabom jabom co ïch ajcxy Dios nmibijctzoy, chi nyajnaaxich jäygidäacïn ma Dios, nHuindzin Jesucristo ajt yTeedy, mïid miich ajcxy ycixpi. ⁴⁻⁵ Ti nnejhuiyich jadu'n nej miich ajcxy ti mmibijccixy Cristo Jesús, e nañ jadu'n nej mdzojccixy mjihuïygixy tüg'óciy migügtijc. Mïid co miich ajcxy mjijp'ixy co Dios mïidity tijaty yujcicy tzajpjoty huidibi miich ajcxy mbadamyb, paady ycixpi ajcxy mmibijccixy Cristo Jesús, e paady ycixpi mdzojccixy mjihuïygixy migügtijc. Co jayhuin migügtijc capxhuäcxy Jesucristo y'ayuc ytiy'ajt ma miich ajcxy, huin'it ti mnejhuiygixy co Dios mïidity tzajpjoty huidi njijp'ijxyp mbadaangixp. ⁶ Jadayaabi tiy'ajt huidibi migügtijc ti capxhuäcxy ma miich ajcxy, nañ yajcapxhuäcx'aditzni ma tüg'óciy naax cajp etz mayjäy mijpidaaccixy. Miich ajcxy ti mmibijccixy jadu'n nej oga'n yajnimiydacy e chambaadni co Dios may'ajt ti tuñ mïid jäy ajcxy ycixpi, e nañ miich ajcxy mnejhuiyb tiydudägy Dios ytiy'ajt. ⁷ Jada tiy'ajt ti xyajnejhuiygixy je Epafras, ïch ajt nmigüg huidibi ooy ndzocy njihuïyich, huidibi tudägy tumb ma Dios y'ayuc quipxyi mïid ïch. Epafras ti xycodinäyich ma miich ajcxy, e tiydudägy miich ajcxy xyaj'ijxpijcy Cristo ytiy'ajt. ⁸ Epafras ti xyajnejhuiyich tiy'ajt jadu'n nej miich ajcxy myajpatcixy, etz jadu'n nej je Espiritu Santo ymic'ajt xymooygixy, jigix ajcxy mdzogipy mjihuïhuipy tüg'óciy migügtijc.

⁹ Mïid jada ycixpi ïch ajcxy jabom jabom Dios nmibijctzooyich mïid miich ajcxy ycixpi, jadu'n nduufich chondacy co oga'n nnejhuiyich co miich ajcxy ti mmijpidaaccixy Jesucristo, ixti chambaadni. Dios nmibijctzooybich co ajcxy mhujnjihuïhuipy mnejhuïhuipy tüg'óciy Dios chojcin. Dios nmibijctzooybich co yi' Espiritu Santo miich ajcxy xyaj'ijxpijcy xyajnejhuïhuipy ajcxy tüg'óciy yi' ytiy'ajt etz yi' chojcin. ¹⁰ Dios nmibijctzooybich jaydëbi mguyduunip ajcxy Dios ytiy'ajt jadu'n nej huaad mibijcpidijc chinaaygixy huidibi yajpaatp ma ajt nHuindzin Jesús, mabaad Dios jäygidägy yajxon ajcxy mdzinaayin mjogy'ajtin. E nañ jaydëbi ajcxy mdunipy oyjäy'ajtin. E nañ jaydëbi jabom jabom yjacyujcpejtcixy yi' m'ixpijcin ma Dios. ¹¹ Dios nmibijctzooybich jigix yi' xymöhuipy ajcxy mic'ajt jadu'n nej yi' mïidity ymic'ajt mijpi, jigix jëbi miich ajcxy jotcuyc myajnaaxipy etz mecxtujctähuip tüg'óciy tzaachypï etz ayo'n. ¹² Dios nmibijctzooybich co miich ajcxy agujc jotcuyc myajnaaxipy Dioscojuyip ma Dios Teedy, com Dios Teedy ajt xyajpocynïhuaatzim, e jadu'n ti xyñi'ixiyim jëbi nbaatim tüg it lugar tzajpjoty quipxyi mïid tüg'óciy mibijcpidijc huidibi tiydudägy tzinaaygixp mïid Dios ytiy'ajt, jadu'n nipaady nejihuïy nej miich ajcxy mdzinäy ma je tiicxin. ¹³ Ti Dios xyajnihuädzictuutim ma yi' jibic-huinma'ñ ma je mujcu' xy'ane'mim, jadu'n nipaady nejihuïy ti xyajpidzimim agootztuum. Ti Dios xypidaacim ma y'ung y'ane'my, je' y'ung huidibi yi' ooy tzocy ooy jihuïy. ¹⁴ Dios y'ung ti xyajnihuädzictuutim ma yi' jibic-huinma'ñ co ñi'py temy yojcy ma yi' cruudz mïid ajt nbocy ycixpi, e ti xypocyhuinmeecxim.

Co Cristo y'o'cy mïid ajt nbocy ycixpi, chi jotcuyc n'ijtim mïid Dios

¹⁵ Ca' p̄in ti ixy Dios. P̄injaty ti ixy Dios y'ung, jadu'n nipaady nej ti ixy Dios. Dios y'ung yi' je' anajty t̄im jayj̄ip ma anajty Dios ca' ti yaj'oȳiñi. ¹⁶ Dios y'ung ti cojtay t̄üg'óciy tijaty yajpaatp̄ j̄iiby tzajpjoty etz ya naaxhuiñḡixy. Dios y'ung cojtay t̄üg'óciy huídibi j̄ebi huaad n'ijxim etz nañ cojtay huídibi ca' huaad p̄in ixy. Dios y'ung p̄idaactay t̄üg'óciy y'ane'm̄in t̄üg'óciy mic'ajt ya naaxhuiñ, etz nañ jadu'n p̄idactay ane'm̄in m̄iid yi' tzajpjoty tzinaaybi. Dios y'ung ti yajcojt̄äy ti yaj'abad̄iyd̄äy tijaty m̄iid ȳigixp̄. ¹⁷ Je Cristo jayj̄ip y'ane'm'ajt ymic'ajt ti paady, ca' jac ni p̄in. Je Cristo yaj'ijtpy t̄üg'óciy huídijaty ya yajpatp̄ huijtz'ijttaayb. ¹⁸ Je Cristo ñihuindzin'ajttaayb ñigohuajc'ajttaayb, etz y'ane'mdaayb t̄üg'óciy j̄äy huídibi m̄ibijcip̄ m̄ijp̄idaacip̄. Je Cristo yajtzinaayb yajjugy'ajtpy t̄üg'óciy m̄ibijcp̄id̄ijc, com yi' je' huídibi jayj̄ip ti yjugyp̄icy co y'o'cy. Paady ycixp̄ yi' c̄otujc̄in m̄ijp̄i m̄iidity. ¹⁹ Dios hue' tzojcy co t̄üg'óciy yi' ymic'ajt etz ym̄ij'ajt yajpaadip̄ ma yi' y'ung. ²⁰ Je naaxhuiñȳäy etz je tzajpjoty tzinaayb ajcxy ca'oy'ijtcixy m̄iid Dios m̄iid je m̄ijpocy ycixp̄i. Dios oy j̄äygid̄ägy ooy jotcujc̄ nayjihuiñȳi co y'ung y'o'cy cruudzc̄ixy m̄iid je m̄ijpocy ycixp̄i e jadu'n oȳiñ nej j̄ebi je naaxhuiñȳäy etz je tzajpjoty tzinaaybi ajcxy oy'ijtcixy m̄iid Dios.

²¹⁻²² Miich ajcxy co anajty ca' m̄m̄ibijccixy je Cristo, ca' anajty oy m'ijtcixy m̄iid Dios. E jadu'n anajty m'ijtcixy nej t̄üg m̄idzip ma Dios, m̄iid co j̄ib̄ic̄pi anajty mdungixy, etz m̄iidity ajcxy j̄ib̄ic̄ ma mjot mhuinma'ñ. Per jadachambi je Cristo ti capx'oȳiñ miich ajcxy je m̄dzip m'ejc̄in huídibi ajcxy m̄iid Dios, co ti chin̄äy ya naaxhuiñ m̄iid ñin̄ic̄x, e nañ co ti y'ögy m̄iid miich ajcxy mbocy ycixp̄i. M̄iid co Cristo y'o'cy m̄iid miich ajcxy mbocy ycixp̄i, jayd̄ebi myajp̄aatc̄ixipy ma Dios yhuinduu janch oyj̄äy, janch huätzj̄äy, ca' ti pocy m̄m̄iidity, ca' ti x̄ihuin yjac-hui'my ma Dios m̄iid miich ajcxy ycixp̄i. ²³ Pen myajcop̄ijccixyp̄ t̄iydud̄ägy je Cristo y'ayuc ytiy'ajt huídibi ti m̄m̄idoogixy, jadu'n nej m̄ijp̄'ijxcixy co je Cristo xyajñdzögaani ajcxy yi' m'alma. Je ayuc huídibi miich ajcxy ti m̄m̄idooy, je' je' huídibi m̄igügt̄ijc ti capxhuäcxy etz ycapxhuäcx'adiichñi ma t̄üg'óciy naax cajp̄, jadu'n nej j̄ebi j̄äy ajcxy y'alma yajñdzögipy. Nañ jadu'n ñich, Pablo ngapxhuäcxyp̄ich jada ayuc quipxy m̄iid nm̄igügt̄ijc̄ich.

Pablo c̄otujcmoy co ytunipy ma m̄ibijcp̄id̄ijc ajcxy

²⁴ Jotcujc̄ nnayjihuiñȳiñich co tzaachyp̄i m̄inaxy nyajnaxyich m̄iid nnin̄ic̄xich m̄iid miich ajcxy ycixp̄i e jadu'n njacyajcixy njacyajca'px̄ich je tzaachyp̄i huídibi Cristo yajtzondac co yi' tzaachyp̄i m̄inaxy yajnaxy m̄iid je m̄ibijcp̄id̄ijc ycixp̄i e je m̄ibijcp̄id̄ijc ni paady nej Cristo ñin̄ic̄x. ²⁵ Dios ti xyyajñib̄icyich co ndunipyich m̄iid yi' j̄äy ajcxy huídibi m̄ijp̄idaacip̄. Dios ti xyp̄id̄ägyich ma jada tung, j̄igix ngapxhuäcx̄ibich t̄üg'óciy Dios y'ayuc ytiy'ajt ma t̄üg'óciy j̄äy ajcxy. ²⁶ Jecy'ajty canaag j̄imij̄t ti ñaxy co Dios ca'ni anajty yajñiguëx̄igy yi' ytiy'ajt. Cham Dios ti yajñiguëx̄igy yi' ytiy'ajt ma yi' j̄äy ajcxy huídibi yi' yj̄äy'ajtpy. ²⁷ Dios oy nihuinmaȳi co anajty yajnejhuñhua'ñ yi' j̄äy ajcxy nidüg'óciy je oybi ayuc t̄iy'ajt huídibi jecy'ajty ca' p̄in nejhuñȳi. Yi' je' je' t̄iy'ajt co Cristo yajpaady ma miich ajcxy mjot mhuinma'ñ, paady ycixp̄i j̄ebi miich ajcxy mbaadip̄ oy'ajtin j̄iiby tzajpjoty.

²⁸ ñich ajcxy ngapxhuäcxyp̄ich Cristo y'ayuc, n'ñhuijpyich ngapxhuijpyich, nyaj'ixp̄ijc̄pyich yajxon yi' Cristo ytiy'ajt ma t̄üg'óciy j̄äy ajcxy, jayd̄ebi nyajquëx̄iḡibich ma Cristo yhuinduu nidüḡ nidüḡ m̄ibijcp̄id̄ijc ca'pxy yhuinma'ñ. ²⁹ M̄iid jada ycixp̄i nduñich m̄ict̄ägy m̄iid t̄üg'óciy je nm̄ic'aj̄tich huídibi Cristo xymooybich jabom jabom.

2

¹ Ndzojcp̄yich co miich ajcxy mnejhuñhuipy jadu'n nej m̄ict̄ägy nduñich m̄iid tajin maȳin m̄iid miich ajcxy ycixp̄i, etz m̄iid yi' m̄ibijcp̄id̄ijc huídibi j̄im Laodicea ycixp̄i, etz nañ t̄üg'óciy m̄ibijcp̄id̄ijc ycixp̄i huídibi ti xy'ixyich ahuin ajj̄p. ² M̄ict̄ägy nduñich jayd̄ebi yi' m̄ibijcp̄id̄ijc paadipy jotcujc'ajtin ma y'ay yjot, etz jayd̄ebi ajcxy ñaychójc̄iḡixipy ñayjihuiñȳiḡixipy mabaad j̄ebi m̄i'ijtcixy yjot yhuinma'ñ t̄u'ciy. M̄ict̄ägy nduñich jayd̄ebi

je mibijcpidijc m'ijtcixy mij jotcuyc'ajtin co ajcxy huinjihuıydähuııb Dios ytiy'ajt, je tiy'ajt huıdıbı jecy'ajty anajty ca' pin nejhuiy, je Dios ytiy'ajt maabi Cristo Jesús. ³ Ma je Cristo jim tüg'óciy tiy'ajt janchypi etz ixpijcın janchypi yajpaady. Jadu'n yi' ytiy'ajt etz y'ixpijcın nej tüg'ajty. ⁴ Jadu'n nımaaygıxy jigıx ca' pin oy cohui'nıni e midigıhuıpy oy ayuc ma miıch ajcxy ooy ymıbjcni, e ca'yjanchıty. ⁵ Ooy ııch ngadıı jıııty, ixna' guëxna' ma miıch ajcxy myajpatcıxy. ııch njot nhuinma'ñ ca' yi' jim ytiyogı'ıty ma miıch ajcxy myajpatcıxy. Jotcuyc nayjihuıyijich co n'ıjxcıxy yajxon myajtıyöygıxy tüg'óciy etz mıc yi' mmıbjcın mıdıty ajcxy ma Cristo.

⁶ E mııd jada ycıxpı jadu'n nej miıch ajcxy ti mgöbıjccıxy je Huındzin Jesús oga'n'aty, jadu'n ajcxy jactzınaaygıx jacjugy'ajtcıx ma yi'. ⁷ Je tiy'ajt etz je mıc'ajt jim yi' mbaatcıxy ma Cristo. Yjacyujcpedıpy ajcxy yi' m'ixpijcın ma Cristo ytiy'ajt jabom jabom. Ca' m'ixtıgıhuäccıxy ma yi' mmıbjcın. Jacmıbjcıx jadu'n nej anajty ti nyaj'ixpijccıxy Cristo ytiy'ajt. Jatyım myajnájxcııpy jäygıdaacın ma Dios cıxyjot huııjot jabom jabom.

Je jemybi jugy'ajtin huıdıbı Cristo xyajni'ixııım

⁸ Ooy naygüend'ajtıgıx, ca' myajhuı'nıngıxy, co huıngjäy xyajhuıma'ñtıgıooygııpy mııd huıngbı ayuc huıngpı ixpijcın huıdıbı jäy cı'm ti cojy ti macxy, huıdı ca' choobaady, huıdı nigoo xychachhuı'nıngıxp mııd canaag ayuc huıma'ñ jadu'n nej poj naaxhuıñ huıma'ñ. Yi' jadu'mbı ixpijcın huıdıbı jäy ti cojy ti macxy ca' ajcxy paady ma Cristo.

⁹ Tüg'óciy nej Dios yajpaady nañ jadu'n yajpaady ma Cristo. ¹⁰ Com je Cristo ñihuındzin'ajttaayb tüg'óciy ane'mın ya naaxhuıñ, etz nañ jadu'n tzajpjoty, paady ycıxpı co miıch ajcxy myajpaady ma Cristo, miıch ajcxy mııd'ajttaayb tüg'óciy huıdı Cristo ymııd. ¹¹ Co anajty Cristo miıch ajcxy xyjäy'adyii, chi yi'pidacy ma ajcxy mjot mhuinma'ñ je tiy'ajt co myajpatcıxy ma Dios. Hue' je' yajtıgooyb yi' pocytunı huıma'ñ. Jada je' je tiy'ajt huıdı Cristo Jesús ypıdac, ca' miıch ajcxy xyjäy'adyii. Ca' miıch ajcxy mdıy'ajtııy ma mnıncıx. Tıgach Jesús ytuunı mııd miıch ajcxy, ca' yjadu'nıty nej judıoıäy ajcxy tiy'ajt pıdaaccıxy ma ñıncıx mııd tzujc. ¹² Co ti mnıbejtcıxy mııd Cristo yxıı, jadu'n nıpaady nejıhuıy ti mnaaxtıgııygıxy quıpxyı mııd Cristo co yi' ñaaxtıgııy. Co ti mmıjıpıdaaccıxy Dios ymıc'ajt jadu'n nıpaady nejıhuıy quıpxyı mııd Cristo ti mjugypıjccıxy co Dios yajjugypıjcy y'ung co y'o'cy. ¹³ Co ca' anajty miıch ajcxy Dios xyjäy'adyii, mııd miıch anajty ajcxy pocytunı huıma'ñ jadu'n miıch anajty m'ijtcıxy nej öcpi. E co ti mmıjıpıdaaccıxy Cristo, Dios ti xyhuımeecıı ajcxy tüg'óciy mbocy, e jadu'n nıpaady nejıhuıy Dios ti xyajjugypıjccıxy quıpxyı mııd Cristo. ¹⁴ Co Cristo y'o'cy ma yi' cruudz mııd ajt nbocy ycıxpı, jadu'n nıpaady nejıhuıy Dios ti xyjödzm xıhuı huıdı anajty xychaachtunaanııı. Co Dios anajty yajtıgooy ııch ajt nxıhuıı, jadu'n nıpaady nejıhuıy ti mıjxojtzpety je xıhuıı necy ma Jesús ycruudz. ¹⁵ Co Cristo y'o'cy cruudzcıxy, chi ycödıgooy je ca'oybı ymıc'ajt, etz je poj naaxhuıñbı ymıc'ajt. Chi je Cristo yajtzo'yduñ je ca'oybı etz je poj naaxhuıñbı co yajcıxy yajnaxy ma jäy yhuıduu.

Tzıjccıx njıot'ajtcıx tüg'óciy huıdıjaty tzomb ma Dios tzajpjoty

¹⁶ Ca' mdungıxy cuenti co pınjaty ajcxy xy'agapxıhuıpy etz xyñımahıpy:

—Amay'at jada jııcy pıcy, etz amay'at jada xıı, etz amay'at je jemybo', etz amay'at yi' Sábado xıı. ¹⁷ Jecy'ajty jäy jadu'n ti yajtuñ yıjadu'mbı huıma'ñ, jayıjpnı ca' anajty Jesucristo ymııñı ya naaxhuıñ. Jadachambı xıı tiempo Jesucristo ytiy'ajt tügpajc yi' je' ooy ycıpıcyıty. ¹⁸ Ca' huaad yi' jäy ajcxy xypıci je Cristo y'oy'ajtin huıdıbı ajcxy mbadamıyb. Yi' ajcxy huıdı oygohuı'nıni naybıdaacıp jadu'n nejıhuıy ooy yung naxy ajcxy yjäy'ajtcıxy, e ca' yjanchıty. Yi' ajcxy yi' y'ojadajtpy ángeles. Yi' ajcxy naygöıııpy co ti tiy'ajt patcıxy ma cumäy, nıııgoob ajcxy amıj agıx ñayjıhuııygıxy mııd co tzachmıjıpıdaaccıxy ycı'mhuıma'ñ etz ñıncıx chojcın. ¹⁹ Yi' jadu'mbı jäy ca' ajcxy yajpatcıxy ma Cristo, je huıdıbı nigohuıj'ajtp tüg'óciy mıbjcpıdıjı. Je mıbjcpıdıjı Cristo

yajyeecp ma ajcxy ymibijcin jadu'n nej Dios tzocy, e yi' ajcxy patcixy tüg'óciy mic'ajt etz tiy'ajt ma yi'. Miid co Cristo nigohuajc'aty je mibijcpidijc, paady ajcxy y'ijtcixy tügpiçy, jadu'n ajcxy nipaady nej tüg jäy ñinixc miid ycohuajc huidi ane'm je ñinixc etz miid emy huidibi yajyücxtaayb je ninixc.

²⁰⁻²¹ Co miich ajcxy ti mmibicy Cristo, jadu'n nipaady nejihuïy ti m'öccixy quipxyi miid Cristo, e nañ ti mbidzimgixy ma yi naaxhuiñyäj yhuinma'ñ xyaj'ane'mgixy. ¿Na'ámy co chambaad mjactzinaaygixy jadu'n nej jihuïy yi naaxhuiñyäj yhuinma'ñ xy'ane'mgixy? ¿Na'amy co mjaccuydungixy yi jäy ajcxy ycötujcin huidibi minaamb co ca' huaad mgonigy jada, ni ca' huaad mjicxy jada, ni ca' huaad nidoñ yijimbi? ²² Tüg'óciy huidibi ngonçim, njicxim, e nnidonim, co ytundäy, chi ytigoydäy. Yi jadu'mbi huinma'ñ ci'm jäy ajcxy cojcixy macxcixy, e nañ ci'm jäy ajcxy yaj'ijxpjccixy huidibi ca' yajpaady ma Cristo. ²³ Yi jadu'mbi cötujcin jadu'n yquëxigy nej ooy y'oyity ooy y'oymibijco'cnity, e ca' yjanchity. Co jäy ajcxy cuydungixy ooy ajcxy ñaybidáacigixy tudägy, etz nañ chaachyungixy ñicx ycohuajc. Yi jadu'mbi cötujcin ca' ti mic'ajt miidity, com co ca' jadu'n jëb yajtigoy jibic-huinma'ñ yi jadu'mbi cötujcin.

3

¹ Miich ajcxy huidibi ti mmibicy je Cristo jadu'n nipaady nejihuïy ti mjugypjccixy quipxyi miid Cristo, e jemybi jugy'ajtin ti myajtzondaaccixy. ² Ixtaaygix je tiy'ajt huidibi tzomb tzajpjoty ma je Cristo yajpaady ma Dios ymijc a'oy'amybi, e yi' je' je mij'ane'mbi. ³ Co ti mmibijccixy je Cristo jadu'n nipaady nejihuïy co ti m'o'ccixy miid yi', etz ma je Cristo jemybi jugy'ajtin miich ajcxy ti mbaady. Jadachambi yi mjugy'ajtin Cristo miid c'am, e yi' yajpaatp ma Dios. ⁴ Co anajty je Cristo ñayguëxigyii jadüg'oc ya naaxhuiñ, huin'it xi miich ajcxy mnaybada'ñyii miid yi' jiiy tzajpjoty ma yi oybi it.

Je jecy jugy'ajt etz je jemybi jugy'ajt

⁵ Yajtigooygix je jibic-huinma'ñ huidibi miich ajcxy miid, huidibi naaxhuiñyäj ajcxy yhuinma'ñ'ajtip. Ca' huaad miidcapxtigoyipy töxyjäydijc. Ca' huaad jibic-huinma'ñ mdunipy. Ca' huaad mdungixy ninixc chojcin, etz huidibi ca'p y'oyhuinma'ñity. Ca' huaad m'adzogipy comeen'adii, com ñipaaty jadu'n nej ajcxy huidibi tzaadzech quipy-chech ojadajtp. ⁶ Miid co jäy ajcxy jadu'n ytundigooygixy, paady ycixpi jacjiini Dios tzaachytunip jäy ajcxy huidibi ca' ycapxymidoogixy yi' ycötujcin. ⁷ Nañ jadu'n miich ajcxy jayijp co ca'ni anajty mmijpidaaccixy je Cristo, mdzinaaygixy anajty miid jibic-huinma'ñ quipxy miid je jacjadyii naaxhuiñyäj co anajty mguydungixy yi jäy ycötujcin huidibi ca' ytiy'ajtity. ⁸ Jadachambi ixmajtzcix miich ajcxy yi jibic-huinma'ñ jadu'n nej co migüg mmijotma'tcixy, jadu'n nej co ooy mjot'ambijccixy, jadu'n nej co jibic mdungixy, jadu'n nej co migüg mnigapxcixy ni'ojiiygixy, jadu'n nej co jibic ayuc mgapxcixy. ⁹ Ca' huaad mnayhuin'ñigixy miñ xyipy. Co ti mmibijccixy Cristo ti m'ixmajtzcixy je jibicjot je jibic-huinma'ñ huidi anajty ajcxy miid. ¹⁰ Jemybi jot jemybi huinma'ñ ti mbatcixy e Dios yjacyejcy p jemybi jot jemybi huinma'ñ jabom jabom ma miich ajcxy co m'ixpjjccixy yi' ytiy'ajt. Jadu'n Dios tzocy co mjot mhuinma'ñ mbidáacixipy jadu'n nej Cristo jot huinma'ñ miidity, je Cristo huidibi ti yaj'oyiy je jemybi jot jemybi yhuinma'ñ. ¹¹ Co jäy ajcxy mijpidägy Cristo, chi tú'ciy ajcxy yajpaady ma Dios, ca' ñejity co nijejity ajcxy miid griegojäy y'ixpijin etz jacjadyii miid judíojäy y'ixpijin, ca' ñejity pen ti myajtiy'ajttiy o ca' mdiy'ajttiyity. Ca' ñejity co nijejity ajcxy jigüegy choon, e ca' y'ixpicity, etz jacjadyii ooy adzip ahua'n ñaybidáacigixy. Ca' ñejity co nijejity ajcxy moso'ajtp etz jacjadyii huidibi ci'm naymiduunip. Nidüg'óciy ajcxy tú'ciy ñaybidägyii co ajcxy mijpidägy Cristo. Nidüg'óciy mibijcpidijc tú'ciy pattay ajcxy mic'ajt oy'ajt ma Cristo, e nañ Cristo yajpaady ma nidüg'óciy ajcxy yjot yhuinma'ñ.

12 Com Dios miich ajcxy ti xyhuin'ixy, e ti xychojccixy ti xyjihuiyigixy, e Dios ti xyajhuädzi ajcxy mjot mhuinma'ñ, paady ycixpi pidaaccix mjot mhuinma'ñ co mba'ayoohuaangixy migügtijc. Pidaaccix mjot mhuinma'ñ co oyjäy'ajtín mdunaangixy etz co nicy xemy mnaybidägaangixy. Pidaaccix mjot mhuinma'ñ yung naxy etz mímecxtujccixy migügtijc ajcxy. 13 Naymímecxtújcigix nidüg nidüg. Co mmigüg ajcxy xymidundigooyipy jëbi mhuinmeecxipy tim jadu'n nej ñich ajt nHuindzin Jesucristo ti mecxy miich ajcxy mbocy. Com Cristo ti xyhuinmeecxcixy, paady copicy miich ajcxy meecxip yi migüg huidibi ajcxy xymidundigooyb. 14 Mnaychójcigix mnayjihuiyigix nidüg nidüg. Co mnaychójcigixipy nayjihuiyigixipy, chi jëb huaad mdzinaaygixy mïid mjot mhuinma'ñ tú'ciy. 15 Je jotcujc'ajtín huidibi Dios xymooyim, huen ajcxy xy'ane'mi mjot mhuinma'ñ. Dios ti xyajñibjccixy, jaydëb tú'ciy m'ijtcixy mïid mjot mhuinma'ñ. Mjatytim yajnaxipy ajcxy jäygidaacin ma Dios jabom jabom.

16 Naybidáacigix co je Cristo y'ayuc ytiy'ajt yajtigüydähuamyb ajcxy mjot mhuinma'ñ. Nayyaj'ixpijcgix etz nay'ihuüjigix naygapxhuüjigix mïid je Cristo y'ayuc ytiy'ajt, jadu'n nej Dios ijxpjcin yecy. ñigix Salmo etz ñigix himno etz yi iy huidibi je Espíritu Santo ypidägip ma mjot mhuinma'ñ, e jadu'n jäygidaacin m'ijtcixy ma ajcxy mjot mhuinma'ñ mïid Dios ycixpi. 17 Huen ti ayuc huidibi ajcxy mgapxyp, huen ti tung huidibi ajcxy mdumby, hue' capxcix tungix mïid ajt nHuindzin Jesús yxi. Etz jatytim yajnaxcixy Dioscojuyip ma Dios Teedy ma Jesucristo yxi.

Je mibijcpidijc ajcxy chinaayin ma ypicchinaaygixy

18 Miich töxyjäydijc ajcxy, capxymidoogix mñäy ajcxy com jadu'n ñich ajt nHuindzin Jesucristo tzocy co mgapxymidoohuipy ajcxy mñäy. 19 Miich yëydijctijc ajcxy, tzojccix jihuiyigix ajcxy mdöxyijc, ca' ejcin mmï'idipy mïid mdöxyijc. 20 Miich ajcxy ung anäg, mgapxymidoohuipy ajcxy mdaj mdeedy mïid tüg'óciy. Jadu'n Dios jäygidägy co ung anäg ajcxy capxymidooy ytaj yteedy. 21 Miich ajcxy ungdeedy ca' oyñinej mmigapxcixy m'ung m'anäg ajcxy. Co jadu'n oyñinej m'ojipy m'ung ajcxy, ca' yjeyity co nicxy ajcxy taj may chinaaygixy yjugy'ajtcixy. 22 Miich ajcxy tumbidijc, capxymidoogix yi mHuindzin, ca' janch xypaat oy mic mdungixy co mhuindzin jim xyhuindüxcixy, e chi co je' yjihüacni, chi nigoo mhuäccixni mdinaaygixni. Hue' janchtiy oy tungixy mïid oyjot oyhuinma'ñ, com je' je' je tiy'ajt co Dios mhuindzigüygixy. 23 Je tung huidibi mdungixyp, tungix cixyjot huinjot. 24 Com miich ajcxy mnejhuüyb co Cristo xymöhuaangixy it lugar tzajpjoty, paady ycixpi oy tunggix jigix Cristo jäygidägipy huidibi ajcxy mdumyb. 25 Dios chaachytunipy pinjaty tundigooyb. Ca' Dios huin'ijxpety tzaachytunipy jäy.

4

1 Miich ajcxy yajtumbidijc, yajtungix mdumbi nej ypadyii etz nej ytudägyity, com miich ajcxy mnejhuüyb co nañ mïid miich ajcxy tüg mHuindzin jüby tzajpjoty.

2 Jabom jabom Dios mibijctzoogix, ca' m'ixmajtcixy Dios mibijctzoohuín. Huijy ycujc m'idipy ajcxy etz jatytim yajnaxcixy jäygidaacin ma Dios co anajty mgapxtaaccixy. 3 Nañ jadu'n miich ajcxy tun may'ajt mibijctzoogix Dios mïid ñich ajcxy ycixpi. Mibijctzoogix Dios co huen it lugar xymöhuibyich ma jëbi ngapxhuäcxyich Dios y'ayuc ytiy'ajt. Ngapxhuäcxyñich je Cristo ytiy'ajt huidibi jecy'ajty anajty ca' pin nejhüy. Mïid co ngapxhuäcxyich Cristo ytiy'ajt, paady ycixp nyajpaadyich pujxtigoty. 4 Mibijctzoogix Dios mïid ñich ycixpi, jigix jëbi ngapxhuäcxyich je Cristo ytiy'ajt huädz oy, nej jäy ajcxy jëb huädz huinjihuiyigixy, jadu'n nej ypadyii ngapxhuäcxybyich.

5 Tiydudägy mdzinaaygixipy mïid yi jäy ajcxy huidibi ca' mibijccixy Cristo. Yajnjigüëccix miich ajcxy Dios ytung jabom jabom, ca' huaad xi tiempo myaj'ayoogixy. 6 Yi mgapxin yi mmiydaacin yajtungix oy'amy huindzigi'ñ'amy nej jëbi huaad jäy ajcxy jäygidaaccixy. Copicy mhuinmayipy ajcxy jayijp nej jäy huaad m'adzoogixy.

Je capxpooxɨn huɨdɨbɨ cogɨxɨyɨñɨp je ñecy

⁷Tíquico co ñicxɨpy jɨm ma miich ajcxy, yɨ' xyyajmɨdmɨydáaccɨxɨpy tɨg'ócɨy nej ytunyɨi yjadyɨi ma ñich. Ooy ndzocy njihuɨyɨich ñich ajt nmɨgüg Tíquico. Yɨ' ooy tudägy ytuuñ quipxyɨ mɨd ñich ajcxy ma ajt nHuɨndzɨn Jesucristo ytung. ⁸Paady yam nguexyɨich Tíquico ma miich ajcxy jɨgɨx ajcxy xyajmɨdmɨydägɨpy nej yam ñich ajcxy nyajpaatcɨxy, etz nañ jɨgɨx xyjotmicmɨgápɨxɨxɨpy. ⁹Quipxyɨ mɨd Tíquico yam nguexyɨich Onésimo, tɨg ajt nmɨgüg huɨdɨbɨ ooy ndzocy njihuɨyɨich, huɨdɨbɨ tudägy tɨ ytuuñ mɨd ñich ajcxy. Onésimo miich ajcxy yɨ mmɨgogajp. Tíquico y Onésimo xyajmɨdmɨydägɨp ajcxy tɨg'ócɨy tijaty tuunɨp jajtɨp yam ma ñich ajcxy.

¹⁰Je Aristarco, huɨdɨbɨ pujxtɨjc ññaayb quipxyɨ mɨd ñich, cham quexy capxpooxɨn ma miich ajcxy. Marcos, je Bernabé y'uch, cham quexy capxpooxɨn nañ jadu'n ma miich ajcxy. Tɨ ñich ayuc nguexyɨich jayhuɨn ma miich ajcxy co ixɨpy ñicxy Marcos ma miich ajcxy, mgöbigɨpy ajcxy agujc jotcujc. ¹¹Nañ jadu'n je Jesús huɨdɨbɨ jäy ytɨjpy Justo, cham quexy capxpooxɨn ma miich ajcxy. Yɨ Aristarco, Jesús etz Marcos yɨ' ajcxy ni tugɨgpajc, judíojäy huɨdɨbɨ tumb mɨd ñich ma Dios ytung co ngapxhuäcxyɨich Dios y'ane'mɨn. Yɨ nidugɨgpi ñich ooy tɨ xyajjotcujc'atyɨich. ¹²Je Epafras, miich ajcxy mmɨgogajp je Cristo ytumbɨ, nañ jadu'n cham quexy capxpooxɨn ma miich ajcxy. Je Epafras jabom jabom Dios mɨbɨjctzoy mɨd miich ajcxy ycɨxpi. Yɨ' mɨbɨjctzoob Dios co miich ajcxy cuydunda' tɨg'ócɨy je Cristo y'ayuc ytɨy'ajt, etz co nayyéjɨgɨx amumdügjot ma Dios, e jadu'n ajcxy mguyduɨpy nej Dios tzocy. ¹³Ñich jɨbɨ tɨy'ajt nyecyɨich co Epafras ooy jotmay jihuɨy mɨd miich ajcxy ycɨxpi, etz nañ ooy nidajy nimay mɨd yɨ' ajcxy ycɨxpi huɨdɨbɨ tzɨnaayb jɨm Laodicea etz jɨm Hierápolis. ¹⁴Je Lucas, je doctor, huɨdɨbɨ je mɨbɨjcpɨdɨjc ooy tzojccɨxy ooy jihuɨygyxɨy etz Dimas nañ cham ajcxy quexy capxpooxɨn ma miich ajcxy.

¹⁵Yajnajxcɨx ñich ngapxpooxɨn ma yɨ mɨbɨjcpɨdɨjc jɨm Laodicea. Nañ yajnajxcɨx ñich ngapxpooxɨn ma yɨ Ninfas etz ma yɨ mɨbɨjcpɨdɨjc huɨdɨbɨ yöymujccɨxp ma yɨ' ytɨjc. ¹⁶Co anajty jada necy tɨ mgapxtaaygɨxy, tungɨx may'ajt quejxnajxcɨx jada necy ma yɨ mɨbɨjcpɨdɨjc ajcxy jɨm Laodicea. Huen ajcxy nañ jadu'n capxcɨxy jada necy, nañ jadu'n miich ajcxy capxcɨx je necy huɨdɨbɨ tɨ nguexyɨich jɨm Laodicea. ¹⁷Tungɨx may'ajt mnɨmähuiɨpy je Arquipo co huen cuydundäy je tung huɨdɨbɨ ñich ajt nHuɨndzɨn je Cristo tɨ yajnɨbedyɨi.

¹⁸Ñich Pablo, ñich cɨ'm njaaybɨich jada capxpooxɨn ma miich ajcxy. Ca' ajcxy mjäydgoyɨpy co ñich nbujxtɨjc ññäy. Huen Dios may'ajt oy'ajt tunɨpy mɨd miich ajcxy ycɨxpi. Jadu'n ngapxcɨxyɨich. Amén.

1 TESALONICENSES

Yi Jayijp Necy Huidi San Pablo Yajniejx Je Mibijcpidijc Jim Tesalónica

¹ Hich Pablo mïd Silvano etz Timoteo cham nguexyich jada necy ma miich ajcxy jim Tesalónica huidibi yajpaatp ma Dios etz ma ajt nHuindzin Jesucristo. Huen ich ajt nDios Teedy etz ajt nHuindzin Jesucristo may'ajt oy'ajt tunipy mïd miich ajcxy etz xyajjotcugiygixip.

Je mibijcin huidibi anajty yejcpy ijxpejt

² Jabom jabom ich ajcxy nyajnaxyich jäygidaacin ma Dios mïd tüg'óciy miich ajcxy ycixpi. Jabom jabom ich ajcxy Dios nmibijctzooyich mïd miich ajcxy ycixpi nidüg'óciy. ³ Co Dios Teedy nmibijctzoooygixyich, chi njäymeichich jadu'n nej miich ajcxy ti mmibijccixy Jesucristo, etz jadu'n nej oy mdungixy ma yi' ytung. Nañ njäymeichich jadu'n nej oyyä'ajtïn mdungixy etz jadu'n nej mdzojccixy mjihuuygixy mmigügtijc. Nañ jäymeitzpich jadu'n nej miich ajcxy mjijp'ixy jabom jabom co ich ajt nHuindzin Jesucristo xymöhuaangixy it lugar jiiby tzajpjoty, e ca' mjetmetzcuygixy. ⁴ Migügtijc ajcxy, ich ajcxy nejhuuyb co Dios xychojccixy xyjihuygixy, e nañ ich ajcxy nejhuuyb co Dios ti xyhuin'ijxcixy. ⁵ Co ich ajcxy jayhuin ngapxhuäcxy Jesucristo y' ayuc ytiy'ajt ma miich ajcxy, chi ca' jëyi Dios y'ayuc ngapxhuäcchich, nañ nduunich mihuinma'n mïd Dios yjihui'n ymic'ajt. Jotcujc nduunich ma miich ajcxy. Miich ajcxy mnejhuuyb co tudägy nduunich jigix jëbi mmijpidáaccixipy Jesús y'ayuc ytiy'ajt.

⁶ Oy anajty ooy mjayaj'ixhuidijtcixy mjayajpahuidijtcixy co Dios y'ayuc ytiy'ajt jemybi ajcxy ti mgöbijccixy, e chi ajcxy ti mbadüdigiygixy ich je n'ijxpejt, e nañ jadu'n ajt nHuindzin Jesús y'ijxpejt. ⁷ Co tzaachypi ti mminajxcixy ti myajnajxcixy mïd Jesucristo ycixpi, chi tiy'ajt ti myejccixy ma tüg'óciy mibijcpidijc jim Macedonia naaxjot etz jim Acaya naaxjot jadu'n nej jëbi ajcxy nañ jadu'n mijpidaaccixy Jesucristo y'ayuc ytiy'ajt. ⁸ E jadu'n miich ajcxy ti myejccixy je ijxpejt mïd Jesús y'ayuc ytiy'ajt, canan jëyi jim Macedonia etz Acaya, nañ ti myejccixy ijxpejt ma canaag'it naax cajp. Je mayjäy ti nejhuuydäy jadu'n nej miich ajcxy ti mmibijccixy Jesús y'ayuc ytiy'ajt, paady ycixpi ca' ycopyity nicxy ich ajcxy njacyajnimäy je mayjäy jadu'n nej miich ajcxy ti mmibijccixy. ⁹ Je mayjäy ma canaag'it naaxcajp ooy ñaymïdmïydáacigixy jadu'n nej ich oy ngogapxyich miich ajcxy, etz nañ jadu'n nej ich miich ti xycöbijccixyich e nañ je mayjäy ñaymïdmïydáacigixy jadu'n nej ti m'ixmajtcixy yi tzaadzech ojadadi, e ti mbadüdigiygixy je Dios juugypi janchypi etz tudägy. ¹⁰ Nañ jadu'n je mayjäy ajcxy ñaymïdmïydáacigixy jadu'n nej miich ajcxy m'ahuijxcixy mjijp'ijxcixy co Jesús, Dios y'ung, yhuimbida'n ya naaxhuiñ, chona'n tzajpjoty. Je huidibi Dios ti yajjugypijc co ti y'ögy. Yi' je' je Jesús huidi ti xycohuaanim ma yi mijpi tzaachypi huidibi Dios yquexamyb mïd co jäy ajcxy chach pocytungixy.

2

Pablo ytung huibidi anajty ymïd jim Tesalónica

¹ Migügtijc ajcxy, mnejhuuyb ajcxy co ca' ñaadigi'aty, co ich oy ngapxhuäcxy Dios y'ayuc ytiy'ajt ma miich ajcxy. ² Miich ajcxy mnejhuuyb co jayijp ca'ni anajty nmechich ma miich ajcxy ich ajcxy ooy tzaachypi etz ayo'n ti nyajnajxcixy jim Filipos. Ti jäy xyhuin'ojy xyjijp'ojyich. Co nmechich ma miich ajcxy, ca' ñejity co tzaachypi ti mminaxyich ti nyajnaxyich jayijp, chi Dios ti xyajjotmïcpicyich, jigix huinmic jotmic ngapxhuäcchich Jesús y'ayuc ytiy'ajt. Ti ngapxhuäcxyich Dios y'ayuc ma miich ajcxy,

oy ñich jäy anajty xyca'ixa'ñ xycatzoga'ñ. ³ Ca' ñich ngapxhuäcxyich anñ, ni jibic ayuc, e ni ngamiydägyich jibic ayuc jibic huinma'ñ nej huaad nhuin'ñngixy. ⁴ Ca' ti nhuin'ñngixy. Dios ti xyajñibicyich co ngapxhuäcxbich yí' y'ayuc ytiy'ajt, e jadu'n nguyduuñich. Ca' nduuñich co huen jäy ajcxy jäygidägy ñich ndung. Jada janchtiy ndumybich jigix Dios jäygidägipy ñich ndung. Com Dios yí' ñejhuñiyb nej jäy tüg'óciy yjot yhuinma'ñ mñidity. ⁵ Miich ajcxy mnejhuñiyb co ca' nyajxondaaccixy mñid ayuc oyjatypí huidi ca' choobaady. Nañ ni ca' ñich ajcxy nhuinma'ñ 'ijxtäy nej jëbi ñich ajcxy nmeeybaat. E Dios nañ ñejhuñiyb co yjanchity jada. ⁶ Nañ ni ca' ñich ajcxy njjip'ixy co jäy ajcxy xycömayipyich, ni miich ajcxy etz ni jac-huingbi jäy. Com je Cristo ti xyquexyich co ngapxhuäcxbich yí' y'ayuc, paady ycixp jëbi ixypy n'ane'myich co ixypy miich ajcxy xyajmij'atyich etz xypubetyich, per ca' jadu'n ti nduuñich. ⁷ Oygixy oy'amy ti nduuñich ma miich ajcxy, jadu'n nej tüg ungdaj mñidity y'ung y'anäg mñid oyjot oyhuinma'ñ. ⁸ Ti ñich miich ooy nd-zojccixy njhuñiygixy, canan jëyi Dios y'ayuc ytiy'ajt ti nmooygixy, nañ naygyegáanibich anajty ma yí' o'cin mñid miich ajcxy ycixpi. ⁹ Co jayhuin ngapxhuäcxyich Dios y'ayuc ma miich ajcxy, mjäymejchpy miich ajcxy jadu'n nej ñich ajcxy nduuñ n'ayooyich anajty xñm tzuum mñid ñich ajcxy ngaayin n'uucin ycixpi. Ca' anajty n'adzibaangixy, paady ñich ajcxy nduuñ n'ayooyich xñm tzuum mñid ñich ajcxy ngaayin n'uucin ycixpi.

¹⁰ Miich ajcxy huidibi mñibjcp mnejhuñiy ajcxy, e nañ ñejhuñiyb Dios, co ñich ajcxy ndzinaayich ma miich ajcxy tudägy, huadz ñich anajty ajcxy njot nhuinma'ñ mñidityich. Ca' ma ndundigooyich ajcxy nej pin xy'ocñihuambedipyich ajcxy. ¹¹ Mnejhuñiyb miich ajcxy nej n'ñhuijciy ngapxhuijciy etz njotmñicmñigapxcixy nidüg nidüg, tim jadu'n nej tüg ungedeedy ñhuijy capxhuijy y'ung y'anäg. ¹² Ti ngapxhuijciy co ooy chach copicyity co mdzinaaygixipy nej Dios jëbi jäygidägipy yí' mdzinaayin. Com yí' miich ajcxy ti xyhuin'ijxcixy jëbi mdigñiygixipy ma yí' chinaaydac, ma yí' mñidity y'oy'ajtin ymij'ajtin.

¹³ Paady ycixpi nyajnajxpich jäygidaacin ma Dios jabom jabom, jadu'n nej miich ajcxy anajty ti mmido'mbijccixy etz ti mgöbijccixy Dios y'ayuc ytiy'ajt huidi ngapxhuäcxiich ma miich ajcxy. Ti mmibijccixy anajty co ñich ajcxy ti ngapxhuäcxy Dios y'ayuc ytiy'ajt. Canan je' ti ngapxhuäcxyich ayuc huidi jäy ti cojy ti macxy. E janch tiy'ajt co Dios y'ayuc ytiy'ajt cham ytuñ ma miich ajcxy mjot mhuinma'ñ, miich ajcxy huidibi mñibjcp.

¹⁴ Migügtijc ajcxy, jadu'n ti mjaicixy jadu'n nej yajty mñid je judíojäy huidibi anajty tzinaayb jim Judea co ajcxy mijpidägy Dios y'ayuc ytiy'ajt, chi je ymñigogajp ajcxy ooy y'ixhuidijti ypahuidijti. ¹⁵ Je judíojäy ymidziptzoon ñich ajt nHuindzin Jesús, e chi yaj'o'cy ajcxy, tim jadu'n nej ajcxy y'ap yteedy yaj'o'cy huidijaty anajty Dios y'ayuc najtzcaxñiyip jecy'ajty. Etz nañ jadu'n ajcxy xyajpidzimyich jim ma ajcxy judíojäy chinäy. Dios ca' jadu'n jäygidägy jadu'n nej ajcxy ytundigooy, nañ ooy ajcxy ymñjotmädyii tüg'óciy jäy.

¹⁶ Yi judíojäy ajcxy ti capx'adujccixy co ca' huaad ngapxhuäcxyich je Cristo ytiy'ajt ma yí' jäy ajcxy huidibi ca' yjudíojäyity, nej huaad ajcxy y'alma ñidzóoccixipy. Co jadu'n ajcxy ytundigooy, chi ajcxy ooy nigi ypocy ñibety ma Dios. Per Dios ti ooy chip y'ejcin pidacy ma judíojäy mñid ajcxy ypocy ycixpi.

Pablo ñijot'ajtp co ñicxy cogapxñhuaangixy yí' mñibjcpidijc

¹⁷ Migüctijc ajcxy, cham hueeni xñ tiempo ti ñaxy ma ca' n'oc'ijxcixni ajcxy, per ca' ñich miich ajcxy njäydigoy. Ooy ñich ajcxy nja'ñicxa'ñ ma miich ajcxy jadüg'oc, e ca' y'oyñy nej ñich ajcxy ñicñiybich ma miich ajcxy. ¹⁸ Ooy ñich ajcxy njanicxa'ñ anajty ma miich ajcxy. E ñich, Pablo, c'i'm anajty njanicxa'ñich mejtz'oc tugñg'oc, e je mujcu' nñ'aa ndü'aa ti xy'adujcich. ¹⁹ ¿Ti mij'ajt miich ajcxy mdijy njjip'ijxpich? ¿Ma mdijy ajcxy nbada'ñich njotcujc'ajtin n'oy'ajtin? Co anajty ajt nHuindzin Jesucristo yhuimbity ya naaxhuiñ, nbadaamybich jotcujc'ajtin etz oy'ajtin mij'ajtin mñid je tñibi nduuñich ma miich ajcxy co ti mmijpidaaccixy Dios y'ayuc ytiy'ajt. ²⁰ Mñid miich ajcxy ycixpi nmñidich jotcujc'ajtin etz xondaacin.

3

1-2 Miiid jada tajin mayin co iich anajty ca' nmimadäga'ñ miiid miich ajcxy ycixpi, paady iich ajcxy nhuinma'ñ nbidägy co jëbi nhui'ma'ñich naydüg jim Atenas, etz jëbi nguexyich iich ajt nmigüg Timoteo ma miich ajcxy. Timoteo nañ jadu'n ytuñ ma Dios ytung quipxyi miiid iich co ngapxhuäcxyich je Cristo y'ayuc ytiy'ajt oybi. Yi Timoteo ñgapxpedipy iich n'ayuc etz xyjotmicmigapxip ajcxy, jigix jac mic ajcxy myajpaadip ma mmibijcin. ³ Jadu'n Timoteo ytunipy ma miich ajcxy jigix ca' mhuinma'ñytigooogyixip miiid je tzaachypi huidibi ajcxy mminajxyp myajnaxyp. Miich ajcxy mnejhuuyb co copicy myajnaxipy ajcxy tzaachypi miiid Jesucristo ycixpi. ⁴ Co oga'n n'ijtyich ma miich ajcxy, chi iich miich ajcxy nnimaayich co tzaachypi mminajxcixipy myajnajxcixipy miiid Jesucristo ycixpi. E miich ajcxy cham mnejhuuygyixyp co janch tiy'ajt jadu'n nej nnimaayixy, miiid co cham tzaachypi mminajxcixy myajnajxcixy. ⁵ Com nejhuybich co tzaachypi mminajxyp myajnaxyp ajcxy, paady ycixpi tajpich maybich miiid miich ajcxy ycixpi. E com ca' nmimadäga'ñich je tajin je mayin, paady ycixp ti nguexyich Timoteo ma miich ajcxy jaydëbi tiy'ajt xypaadibich pen tydudägy miich ajcxy mmibicy. Tziguybich anajty co ndiyy je mujcu' ti xyajhuinma'ñytigoogyixy, etz jadu'n anajty ñaadigi'ada'ñ iich ndung ma miich ajcxy.

⁶ Jadachambi Timoteo ti xyñihuimbityich, choon ma miich ajcxy jim Tesalónica, etz ti xyajnejhuuyich jadu'n nej miich ajcxy mmidity mmibijcin, etz nañ ti xyajnejhuuyich jadu'n nej mnaychójcixy mnayjihuuyigixy nidüg nidüg. Timoteo nañ jadu'n xyñimaaybich jadu'n nej miich ajcxy xyjäymechich etz xychocy xyjihuyich, etz nañ ooy miich ajcxy xyja'ixáangixyich jadüg'oc, jadu'n nej iich miich ajcxy nañ jadu'n ooy nja'ixaangixy. ⁷ Migügtijc ajcxy, ooy capxy agujc ayuc agujc nyajpaadyich. E co Timoteo ti mimiñ je oybi ayuc tiy'ajt jadu'n nej miich ajcxy mjacpanicxy tydudägy yi mibijcin, chi mij ooy ti njotcugiyich. ⁸ Jadachambi jëbi njactzinäyich jotcuyc, com ti nnejhuuyich co miich ajcxy ca' m'ixtigihuäccixy ma mmibijcin. ⁹ Nyajnaxpich jäygidaacin ma Dios yhuinduu miiid miich ajcxy ycixpi, miiid co janch jotcuyc nayjihuyiijich co miich ajcxy ca' m'ixtigihuägy ma mmibijcin. ¹⁰ Xim tzuum mmibijctzooyich Dios miiid tüg'óciy njot nhuinma'ñich, jigix Dios xyaj'ahuáatzibich nni'aa ndü'aajich, jëbi nnicxyich ci'm ma miich ajcxy, jaydëbi njacyaj'ixpigipy ajcxy Dios y'ayuc ytiy'ajt, e jadu'n jëbi ajcxy mjacyajca'pxy mmibijcin ma mjacyajtigoy'ijtcixy.

¹¹ Njipp'ixypich co Dios Teedy ci'm etz ajt nHuindzin Jesús xyaj'ahuáatzibich nni'aa ndü'aa jigix nicxy n'ijxcixy jadüg'oc. ¹² Iich ajcxy ndzojcpy co ajt nHuindzin Jesucristo xyjacmóogyixipy tzojcin jihuiyin, jigix nigí ajcxy mnaychoguyb mnayjihuihuuyb miñ xyipy, e nañ nigí mdzójcxipy mjihuuygyixipy tüg'óciy je mayjäy, tim jadu'n nej iich miich ajcxy ndzocy njihuuy. ¹³ Iich ajcxy ndzojcpy co Dios xyaj'ijtip ajcxy mjot mhuinma'ñ tücci'y ma Jesucristo ytiy'ajt, e ca' m'ixtigihuäccixy, jigix co anajty iich ajt nHuindzin Jesús ymiiñ jadüg'oc ya naaxhuiñ miiid tüg'óciy je mibijcpidijc huidibi miiid huädz yjot yhuinma'ñ, jëbi miich ajcxy mnayguëxiguyb ma Dios Teedy yhuinduu miiid huädz mjot mhuinma'ñ, ca' ti xihuun ma Dios miiid miich ajcxy.

4

Je tzinaayin jugy'ajtin huidibi Dios yjäygidacy

¹ Jadüg nax, migügtijc ajcxy, jadachambi may'ajt nbijctzooyich, e nyajnibijccixy miiid ajt nHuindzin Jesucristo ycixpi co ajcxy mjaccuychinahuipy Dios y'ayuc ytiy'ajt, jadu'n nej ti nyaj'ixpicxyich miich ajcxy, etz mjactzinahuipy ajcxy jadu'n nej jëbi Dios jäygidägy ajcxy mdzinaayin, jadu'n nej ti mdungixy.

² Miich ajcxy mnejhuuyb je cötujcin huidibi ti nyaj'ixpijccixy. Jada cötujcin iich ajt nHuindzin Jesucristo ti xyajnibicyich. ³ Miich ajcxy mnejhuuyb je cötujcin jadu'n nej

Dios tzocy co huädz jot huädz huinma'ñ myajtúngixipy ma yi mdzinaayin mjogy'ajtin. Ca' huaad mmigapxtigoogyixy tüg töxyjäy. ⁴ Miich ajcxy mnejhuüyb Jesús ycötujcin co copicy nidüg nidüg yéydijc pigipy tüg töxyjäy etz yajmij'adip ytöxyijc, etz nañ mïddzinähuipy mïd oyjot oyhuinma'ñ. ⁵ Ca' Dios jadu'n tzocy co je yéydijc nijot'aty töxyjäy mïd jibic-huinma'ñ, jadu'n nej yi jäy ajcxy y'idich huídibi ca' nejhuüy Dios ytiy'ajt. ⁶ Ca' huaad ni pin migapxtigooyi ymigüg ytöxyijc, com Dios yi' tzaachytunib mijcajee pinjaty migapxtigooyb ymigüg ytöxyijc. Jada cötujcin ti nyajni'ixiygixy jayhuin. ⁷ Com Dios jadu'n ti xyhuin'ixim jigix oyjot oyhuinma'ñ ndunim, canan co ndunim jibic jot jibic-huinma'ñ. ⁸ Co tüg jäy ytundigooy mïd huingbi töxyjäy huídibi ca' töxyijc'adyii, hue' je' ñixiicpy yajxiicpy Dios ycötujcin, canan jäy ycötujcin ñixiicpy yajxiicpy, e nañ ñixiicpy yajxiicpy je Espiritu Santo huídibi Dios ti quexy ma ñch ajt.

⁹ Miich ajcxy mnejhuüyb je cötujcin co copicy mdzogipy mjihuühuipy ajcxy mmigügtijc huídibi tzinaayb jim Macedonia ñaaxjot. Migügtijc ajcxy, may'ajt nbijctzooybich co jacnaychójcigix jacnayjihuüyigix. ¹⁰ Janch tiy'ajt jadu'n co miich ajcxy mdzocy mjihuüy tüg'óciy je migügtijc huídibi tzinaayb jim Macedonia ñaaxjot. Nmigügtijc ajcxy, may'ajt nbijctzooybich co jacnaychójcigixy nayjihuüyigixy etz mnayyajmij'ajtigixy mij cajee. ¹¹ Jatyim tzinaaygix nicy xeemy, agujc jotcujc. Pidäg ajcxy mjot mhuinma'ñ ma mgi'mdzinaayin, etz nañ jatyim naymidúunigix. Jada tiy'ajt ti najtzcapxiyi ajcxy jayhuin. ¹² Tungix mgi'mdung, jigix yi jäy ajcxy huídibi ca' ymibicy xyajmij'adip ajcxy, etz nañ jadu'n ca' myajmayjadipy ajcxy ni ti.

Co anajty je Huindzin Jesús ymiñ ya naaxhuiñ jadüg'oc

¹³ Migügtijc ajcxy, ndzojcpich co miich ajcxy mhuinjihuühuip je tiy'ajt ma je' yajpaady y'alma je migügtijc tiibi y'öccixy, jigix ca' mdájciixipy mmáygiixipy, jadu'n nej je jäy ajcxy nidajciixy nimaygixy huídibi ca' mibijccixy co Jesús yajjugypiga'ñ jadüg'oc je tiibi ajcxy y'o'ccixy. ¹⁴ Jadu'n nej ñch ajt nmibijcim co Jesús yjugypijcy co y'o'cy, nañ jadu'n Dios yajjugypijctähua'ñ je öcpidijc huídijaty ajcxy mibijc Jesús.

¹⁵ Paady ycixpi ñch miich ajcxy nnimaaygixy co ajt nHuindzin Jesús tiy'ajt ti yecy co ñch ajt huídibi jacjogy'ajtp co anajty Jesús yhuimbity ya naaxhuiñ, tügmucy xyajnicxaanim mïd yi mibijcpidijc tiibi y'o'ccixy. Ca' ñch ajt njayjip'adaanim yi tiibi y'o'ccixy, yi' ajcxy jayjip'adamb. ¹⁶ ñch ajt nHuindzin Jesús ci'm yhuimbida'ñ ya naaxhuiñ chona'ñ tzajpjoty mïd ycötujcin, mïd ymic'ajtin, e yi' mic capxamb ane'mamb. Huimbida'ñ Jesús quipxyi mïd tüg ángel mjtungmïdipi huídibi nañ jadu'n mic capxamb ane'mamb. E co anajty yhuimbity, chi Dios yajxuxa'ñ yi' ytrompeta, e tim huin'ítiy Jesús xyajpidictähuaanim ya naaxhuiñ, e chi ajt naybadaanim mïd Jesús jocjoty. ¹⁷ E chi ñch ajt huídijaty anajty jactzinaayim, naybadaanim mïd ajt nHuindzin Jesús jocjoty quipxyi mïd je'ajcxy huídibi anajty ti yjugypicy jadüg'oc. E jadu'n ndzinähuaanim huinixii huinítiempo mïd ajt nHuindzin Jesús. ¹⁸ Mïd jada ayuc tiy'ajt nayyajjotcugüiyigix miñ xyipy.

5

¹ Migügtijc ajcxy, ca' ycopicyity njacnijayüygixipy jadu'n nej je xii je tiempo yca'pxa'ñ. ² Miich ajcxy mnejhuüyb co ñch ajt nHuindzin Jesucristo yhuimbida'ñ ya naaxhuiñ tzaachytuna'ñ yi mayjäy mïd ypocy ycixpi. Jesús miinaamb mina anajty je mayjäy ca' ti ocjijp'ixni. Jadu'n ymiina'ñ jadu'n nejjuhuüy tüg meetzpi ymiñ coodz co ymeedza'ñ. ³ Co anajty je mayjäy ymiinaangixy: “Cham ooy jotcujc ndzinaayim, ca' ma tzip capxy”, chi timitiina jotcömoñi Dios yajtigoya'ñ je naaxhuiñybi. Timitiina ayo'n ñimiiniyb jäy ajcxy. Tim jadu'n nipaady nej töxyjäydijc timitiina ypa'mbety co tiempo ti yhuaad'ajtni co y'ung yajma'xung'ada'ñ. E ni pin huaad cacöguëgipy je tzaachypi co Dios anajty ymiñ ya naaxhuiñ yajtigoydähua'ñ yi mayjäy. ⁴ Per migügtijc ajcxy mïd miich ajcxy

Dios ytiy'ajt, paady miich ca' jadu'n myajpáatcixni nejjihuüy mdzinaaygixy agootztu-uby. Ca' ajcxy mgixípy mgüedípy mına anajty Jesús miñ jotcōmoñi, jadu'n nej jäy nigoobi ycixy ycuency co ti ymeechyii. ⁵ Com tüg'óciy miich ajcxy Dios y'ayuc ytiy'ajt mhuinjihuüygyxy, jadu'n nipaady jadu'n nejhuüy ti mgoximüygixy ti mgodüccixy. Hich ajt ca' njacyajpaatim agootztuuby. ⁶ Paady ycixpi ca' huaad njäydingooyim Dios ytiy'ajt, ca' huaad nmi'óctigooyim jadu'n nej yi jacjaydyii jäy ajcxy huidibi ca' cuendituñ Dios y'ayuc ytiy'ajt, jadu'n yi' ajcxy nipaady jadu'n nejjihuüy ajcxy ti ymi'óctigoy. Ijtcix ni'ixi miid tüg'óciy Dios y'ayuc ytiy'ajt. Mi'ijtcix huijy cujc mjot mhuinma'ñ. ⁷ Yi jäy ajcxy huidibi maab, coodz ajcxy ymäy. Yi jäy ajcxy huidibi muucip, coodz ajcxy ymúucigixy. ⁸ Hich ajt huidibi nnejhuüyim Dios ytiy'ajt, copicy huijy ycujc ajt ndzinaayim, e nañ copicy nmibijcim Jesucristo e nañ naychójcigix nayjihuiyigix miñ xyipy, jadu'n nipaady nej soldadtijc ñaygohuáanigixy miid pujx huidibi ymiid ma ycaach. E miid co njjip'ijxim co Dios xyajnidzōgaanim ajt n'alma, jadu'n nipaady nejjihuüy soldadtijc ñaygohuáanigixy miid ypujxcōjup. ⁹ Com Dios xyajjugy'ajtim co xychaachytunaanim xyajtigoyaanim, Dios xyajjugy'ajtim nej n'alma jēbi paatim nidzoocin co nmijpidaacim ich ajt nHuindzin Jesucristo. ¹⁰ Jesucristo ti y'ögy miid ajt nbocy ycixpi, jigix jēbi huaad ndzinaayim jiiiby tzajpjoty quipxyi miid yi', ca' ñejity pen ti anajty n'o'cim o pen jiiini anajty njugy'ajtim co anajty Jesucristo yhuimbity ya naaxhuiñ. ¹¹ Paady ycixpi jacnayjotmicmigápxigix, e nañ jacnaybubéjtigix nidüg nidügti, tim jadu'n nej cham mdungixy.

Pablo capxhuijy yi mibijcpidijc ajcxy

¹² Migügtijc ajcxy, may'ajt nbijctzooybich co yajmij'ajtcixy ajcxy yi migügtijc huidibi tumb ma miich ajcxy miid Dios y'ayuc ycixpi. Yi' ajcxy huidibi xyajni'ixiib Dios y'ayuc ytiy'ajt, yi' ajcxy xycapxhuijip miid ajt nHuindzin Jesucristo y'ayuc ytiy'ajt. ¹³ Copicy myajmij'ajtcixipy ooy, etz nañ mdzójcixipy miid je Dios ytung ycixpi huidibi ajcxy ytumyb ma miich ajcxy. Tzinaaygix jotcuyc ca' ma tzip capxy.

¹⁴ Nañ jadu'n, migügtijc ajcxy, nyajnbijcpy ajcxy co myaj'ojip yi migüg ajcxy huidibi ca' ti dung tuna'ñ, etz nañ mjotmicmigápxip huidibi ajcxy tajp maayb, etz nañ mbubedipy ajcxy huidibi hueeni miid ymibijcin, etz yajtungix mecxtujcin miid tüg'óciy migügtijc.

¹⁵ Hich miich ajcxy nimaayb co ca' ni pin huaad yaj'ahuimbidi jibic ma ymigüg huidibi ti ymidundigoyii. Nañ jadu'n nimaaygixy co naymi'oyjäy'ajtigix nidüg nidügti. Nañ jadu'n oyjäy'ajtin mdunipy ajcxy miid tüg'óciy naaxhuiñjäy.

¹⁶ Jatytim miid'ajtcix jotcuyc'ajtin jabom jabom. ¹⁷ Capxtaaccix etz mibijctzoogix Dios jabom jabom. ¹⁸ Yajnajxcix jäygidaacin ma Dios pen ji ajcxy mjajtcixy ayoogixy nejjaty, com Dios ooy yjotcuycity co je migügtijc huidibi mibijcp Cristo Jesús yajnaxy ajcxy jäygidaacin ma yi' jabom jabom miid tüg'óciy huidibi tuunip jajtíp ma yi' ajcxy.

¹⁹ Capxymidoogix je Espíritu Santo, co ngacapxymidoohuim je Espíritu Santo huin'it nyajtigooyim Dios yjihui'ñ ymic'ajt huidibi yajpatp ma ich ajt. ²⁰ Yajjotcuyc'ajtcix huenpinity pin Dios y'ayucpidzimb ma miich ajcxy. ²¹ Jēyi janchtiy m'ixipy peni quipxyiib miid Dios y'ayuc huidibi ajcxy ycapxyp. Mijpidaaccix je ayuc tiybi. ²² Ixmajtcix tüg'óciy jibic ayuc jibic-huinma'ñ.

²³ Dios nmibijctzooybich, je Dios huidibi yejcpy jotcuyc'ajtin, co ajcxy xyajhuaatztaayip mjot mhuinma'ñ ma yi' jibicpi. Dios nmibijctzooybich co yi' ci'm xycuendi'ajtip huadz oy yi' m'alma ajcxy, etz yi' mjihui'ñ, etz mnïc x mgohuajc, ca' ma pocy yquëxigy, ixti mabaad anajty ich ajt nHuindzin Jesucristo ymiñ ya naaxhuiñ. ²⁴ Je Dios huidibi ti xyajmibijccixy, tudägy yi', e ycuydunipy yi' y'ayuc miid miich ajcxy.

Capxpooxin huidibi cijxnip je necy

²⁵ Migügtijc ajcxy, mibijctzoogix Dios miid ich ajcxy ycixpi.

²⁶ Naygapxpóocigix xic xon nidüg nidüg miid oyjot oyhuinma'ñ.

²⁷ Nhuindzin Jesucristo ajt ti xyajñibicyich jada tung, paady nyajñibijccixy co jada necy mgápxcixipy ni'abidzimy ma tüg'óciy mibijcpidijc.

²⁸ Dios nmibijctzooybich co ñich ajt nHuindzin Jesucristo xyconuucxip ajcxy. Jadu'n jada. Amén.

2 TESALONICENSES

Yi Mimetz Necy Huidi San Pablo Yajnigüeix Je Mibijcpidijc Jim Tesalónica

¹ Ich Pablo mid Silvano etz Timoteo cham nguexyich jada necy ma je migügtijc huidibi ajcxy jim Tesalónica yajpatp, etz yajpatcixy ma ich ajt nDios Teedy etz ajt nHuindzin Jesucristo. ² Huen ich ajt nDios Teedy etz ich ajt nHuindzin Jesucristo may'ajt oy'ajt tunipy mid miich ajcxy etz xyajjotcugiygixip.

Dios tydunipy yi pocyjäydijc ajcxy co anajty Cristo ymiñ jadug'oc

³ Migügtijc ajcxy, njatytimyajnajxypich jabom jabom jäygidaacin ma Dios mid miich ajcxy ycixpi. E jadu'n copicy nyajnagyich jäygidaacin ma Dios, com miich ajcxy mibijcipy Jesucristo nigí jabom jabom, etz nañ nigí jabom jabom naychójcigixy najjihuüyigixy nidüg nidüg. ⁴ Com miich ajcxy ooy nuucxy meecxy m'ijtcixy ma yi tzaachypi etz ayo'n huidibi ajcxy mmijnajxyp myajnajxyp, e nañ ooy mmijpidaaccixy Jesucristo, paady ycixpi ngapxpaadyich miich ajcxy ma yi migügtijc huidibi mijpidaacp Dios majaty tüg tüg cajp. ⁵ Miich mmibijcin etz mmecxtujcin yi' je' ijxpejtíp co Dios ytudägyity mid ajcxy ytyduunin, e xycöbiccixy co jëbi mdigiygixipy ma yi y'ane'mdac mid mmibijcin ycixpi. Mid jada ycixpi miich ajcxy mmijnajxcixy myajnajxcixy tzaachypi ayo'n.

⁶ Mid co Dios ytudägyity, yi' tzaachytunamb yi jäy ajcxy huidibi miich ajcxy xy'ixhuidijtp xypahuidijtp. ⁷ E nañ yi' ajcxy xymöhuipy jotcuje'ajtin tim jadu'n nej xymöhuáangixyich jotcuje'ajtin je huin'it xii co anajty ajt nHuindzin Jesucristo ñayguexigyii co anajty miiñ ya naaxhuiñ jadüg'oc chooñ anajty tzajpjoty. Nañ je ángeles ajcxy mic'ajt midpi miinaamb quipxyi mid Jesucristo. Miinaamb Jesús mid ane'min cötujcin e yajtigoydähua'ñ pocyjäydijc, tim jadu'n nej tüg mijjin yajhuindigoydäy huen ytiijity. ⁸ Jesucristo chaachytunamyb je mayjäy ajcxy huidibi ca'p cöbicy Dios, etz huidibi ca' mijpidaägy ajt nHuindzin Jesucristo y'ayuc ytiy'ajt oybi. ⁹ Yi jäy ajcxy huidibi miich ajcxy xy'ixhuidijtp xypahuidijtp, Dios yi' tzaachytunaanip ajcxy y'alma huinixii huinitempo. Dios ypidägaanip yi' ajcxy y'alma jiguëgy ma ni camanaxii ajcxy ijxcixyp je nHuindzin Jesucristo etz yi' y'oy'ajtin etz ymic'ajtin. ¹⁰ Jadu'n yjadipy je huin'it xii huin'it tiempo co anajty ajt nHuindzin Jesús miiñ ya naaxhuiñ, Jesús je mibijcpidijc yajmij'adañ etz huindzigihua'ñ, e nañ jadu'n miich ajcxy myajmij'adipy etz mhuindzigihuipy mid co anajty y'ayuc ajcxy ti mmibijcci, je ayuc huidibi ti ngapxhuäcxyich ma miich ajcxy.

¹¹ Paady ycixpi jabom jabom Dios nmibijctzooyich mid miich ajcxy ycixpi, jaydëbi tudägy ajcxy mdzinähuipy, e Dios huidibi ti xyhuin'ijxcixy yjäygidägyipy yi' miich ajcxy mdzinaayin. Nañ jadu'n Dios nmibijctzoogixy mid jada ycixpi co yi' cuydunipy huidibi miich ajcxy mbijctzooyb m'amidooyb mid oyjot oyhuinma'ñ. E nañ ycuydunipy yi' huidibi miich ajcxy mdumyib mid mmibijcin. ¹² Com Dios jadu'n tunamb ma miich ajcxy mjot mhuinma'ñ, paady ycixpi ajt nHuindzin Jesucristo yxii capxpaady y'idipy ma miich ajcxy mdzinaayin etz nañ jadu'n miich ajcxy capxpaady m'idipy ma Jesucristo. Jadu'n yjadipy com ich ajt nDios etz ajt nHuindzin Jesucristo may'ajt oy'ajt tuñ ma miich ajcxy.

2

Je jibic jäy huidibi huin'imb mayjäy

¹⁻² Migügtijc ajcxy, cham nyajmidmydaaccixy je xii je tiempo co anajty ajt nHuindzin Jesucristo huimbidaani jadüg'oc ya naaxhuiñ, etz naybadaanim mid yi'. Nminucxtaapcyich miich ajcxy, ca' mhuinma'ñyigoogyixy co pinjaty ymina'ñ co Jesucristo ti yhuimbity. Ca' mmibijccixy, ca' jada ayuc yjanchity. Ca' mdungixy cuendi yi'

jäy ajcxy y'ayuc huídibi minamb co tüg espíritu ti yajnejhuíygixy co yjadu'nity, o co muum a'ijxnaxy amídoonaxy capxy ayuc, o co muum íjxpídzimy jada ayuc ma tüg necy huídibi ajcxy ytiipy co ñch nnecy'adyii. ³ Ca' myajhuin'ingix janch ni nej. Jayijp ca'ni anajty je xii je tiempo yhuaad'atyñi ma anajty Jesucristo ymiina'n jadüg'oc ya naaxhuiñ, mayjäy ajcxy midziptzona'n Dios tiydudägy co ñayguëxigíyib tüg jibic jäy mic jäy huídibi Dios yajcödigoyamy tücci'yi. ⁴ Jada jibic jäy ymidziptzonamyb tüg'óciy tijaty huídibi jäy Dios'ajtpy, e nañ ymidziptzonamyb huídibi jëbi yaj'ojadaty. E nañ yi' naybidägañb amij agix jadu'n nejhuíy yjacmijity ca'ydí Dios. E nañ yi' ypidägamb y'ane'mdac ma Dios ytiyc, e naybidägañp nejhuíy Diosity.

⁵ ¿Nej ca' mjäymejtzcixy co jadu'n nimíydacyich tüg'óciy jada tiy'ajt jayhuin je taab anajty n'ityich ma miich ajcxy? ⁶ Jadachambi miich ajcxy mnejhuíyb pin yajhuäcxijp jada mic jäy jada jibic jäy, jigix ca'ydí ñayguëxigíyii jayijpni ma ca'ni tiempo yhuaad'atyñi mina Dios a'ixihuip co ymiinipy. ⁷ Je mic jäy je jibic jäy cham ñi'ixíyb ameech je jibicpi huídibi ytunamyb, jëyi ytigoy'ityñi mina je tü'aa y'ahuächyii, je huídibi yajhuäcxijpip. ⁸ Co anajty je jibic jäy ytü'aa y'ahuäch, chi ajt nHuindzin Jesús yajcödigoyipy müd tüg puxujin. Jesús yajcödigoyipy je jibic jäy müd yi' y'oy'ajtin etz ymij'ajtin co anajty yhuimbity ya naaxhuiñ. ⁹ Je jibic jäy, yi' je' ymüd je mujcu' yhuinma'n etz ymic'ajt, e ytunamyb mijhuinma'n etz íjxpejt huídibi anijip. ¹⁰ Je jibic jäy ytunamyb tüg'óciy tijaty jibic-huinma'n jigix jëbi huin'ñinip yi jäy ajcxy huídibi y'alma tigoyipy, müd co ca' ajcxy cöbijccixy, e nañ ca' tzojccixy Dios y'ayuc ytiy'ajt huídí müd jëbi y'alma ñidzoocixy. ¹¹⁻¹² E je' ycixpi co ca' ajcxy cöbiga'n Dios ytiy'ajt, paady Dios y'ixmadzáanigixy huen yajhuin'ingixy, huen mibijccixy je mujcu' y'aniñ, e müd jada ycixpi jëbi Dios yajtigooyi yi' ajcxy y'alma nidüg'óciy huídibi ca' mibiga'n Dios ytiy'ajt. Jacjotcujc ajcxy co jibic-huinma'n tungixy.

Je jäy ajcxy tibi Dios yhuin'ixyii jigix ypocyñihuädziy

¹³ Migügtijc ajcxy huídibi ajt nHuindzin Jesucristo ooy tzocy jihuíy, jabom jabom nyajnaxyich jäygidaacin ma Dios müd miich ajcxy ycixpi, müd co Dios ti xyhuin'ijxcixy oga'n'aty, jigix jëbi m'alma ñidzoocixy müd Dios yjihui'n ymic'ajt, etz nañ müd Dios y'ayuc ytiy'ajt huídibi ti mmibijccixy. Je Dios yjihui'n ymic'ajt xyajhuaatzip ajcxy mjibicjot mjibic-huinma'n. ¹⁴ Paady ycixpi Dios ti xyhuin'ijxcixy, e nañ xyajmibijccixy müd yi' y'ayuc ytiy'ajt huídibi ñch ajcxy ngapxhuäcxyp, jigix jëbi mbáatcixipy oy'ajtin ma ñch ajt nHuindzin Jesucristo.

¹⁵ Paady migügtijc ajcxy, mibijccix tiydudägy, ca' m'ixtigíhuäccixy, e ca' mjäydingooygixy je tiy'ajt huídibi ñch ajcxy ti ngapxhuäcxy ma miich ajcxy, etz jadu'n nej ti nnimaaygixy necyjoty. ¹⁶⁻¹⁷ Huen ñch ajt nHuindzin Jesucristo ci'm etz ajt nDios Teedy may'ajt oy'ajt tunipy müd miich ajcxy, e xyajjotmicpíjccixipy etz xyajmibijccixipy tiydudägy, jigix oybi ayuc mgápccixipy etz mdunipy ajcxy tüg'óciy oybi huinma'n. ñch ajt nDios Teedy etz ñch ajt nHuindzin Jesucristo xychojcm xyjihuíyim, e ti xymooyim jotcujc'ajtin huinixibi, e nañ ti tuñ may'ajt oy'ajt müd ñch ajt ycixpi, jaydëbi njijp'ijxim oy'ajtin jilby tzajpjoty.

3

Mibijctzoogix Dios müd ñch ajcxy ycixpi

¹ Jadügnax, migügtijc ajcxy, tungix may'ajt mibijctzoogix Dios müd ñch ajcxy ycixpi, jigix jëbi ngapxhuäcxibich huinmic jotmic Jesús y'ayuc ytiy'ajt huingnaax huinggajp. E nañ mibijctzoogix Dios jëbi yi jäy ajcxy mijpidägipy Jesús y'ayuc ytiy'ajt oybi, tim jadu'n nej miich ajcxy ti mmijpidaaccixy. ² Nañ mibijctzoogix Dios müd ñch ajcxy ycixpi, jigix ñch ajcxy Dios xyñihua'nipy xycohua'nipy ma yi jäy ajcxy huídibi jibic-huinma'n ymüd, huídibi jibic ñch ajcxy xytunamb, com mayjäy ca' mijpidägy Jesús y'ayuc ytiy'ajt. ³ ñch ajt nHuindzin Jesucristo tudägy yi', e xypubedip xypudigihuip

ajcxy jigix miich ajcxy ca' mjetmetzcihuipy ma yi mmibijcin, e nañ xypubedip ajcxy, jigix ca' xymimadaaccixipy je jibicjáy huidibi Dios ca' capxymidoy. ⁴ Hich ajt nHuindzin Jesús jotcuje'ajtin ti xymóoygixyich mïd miich ajcxy ycixpi. Nmibijcipyich co miich ajcxy mguydumyb je Dios y'ayuc ytiy'ajt huidibi nyaj'ixpijccixy etz mjaccuydunaamyb ajcxy. ⁵ Com ca' ñch njaty nej njijpcogapxihuibich, chi nguejxyich cogapxy, nnejhuïhua'ñich nej anajty ajcxy myajpatcixy ma yi mibijcin, tzigïyb ñch anajty co nicxy mujcu' xypidaaccixy jibictuum, chi ñch anajty ajcxy ndung ti ñaadigi'aty.

Ooyycopicyity co nduunim ma ajt ndung

⁶ Migügtijc ajcxy, mïd ajt nHuindzin Jesús yxiï etz ymic'ajt jada ane'min ajcxy nya-jnïbijcipy, co copicy ajcxy m'ixmadzipy yi mmigüg huidibi ca' ytuna'ñ ma yci'mdung, etz huidibi ca' cuyduñ Dios ytiy'ajt jadu'n nej ñch tiy'ajt ti nyecy. ⁷ Miich ajcxy mnejhuïyb jadu'n nej ñch ti ndzinäyich ti njugy'atyich co ti n'ityich ma miich ajcxy. E jëbi tiy'ajt ajcxy mbigipy ma ñch ndzinaayin nej jëbi miich ajcxy mdzinaaygixy. Co anajty ñch njimity ma miich ajcxy, ca' ñch n'ixmajch ngi'mdung. ⁸ Tüg'óciy ñch ajcxy ngaayin n'uucin ngojuuyich. Nduñ n'ayooyich anajty xim tzuum, co anajty ca' n'adziba'ñich ni tüg. ⁹ Dios ti xymöyich mic'ajt ane'min co ixipy ajcxy mbubejtin ti nbijctzoohui o ti nbijctzoohui ixipy ajcxy mgaayin m'uucin, per ca' ñch ajcxy jadu'n ti ndungixyich, jigix ijxpejt ajcxy mbigipy ma ñch ajcxy. ¹⁰ Com co anajty n'ityich ma miich ajcxy jada cötujcin ajcxy nyajnïbijc co pinjaty ca' ytuna'ñ, ca' ajcxy myajcayipy myaj'ügipy. ¹¹ Jadu'n ñch ti nnejhuïy co nijëjity miich ajcxy ca' mdunaangixy mgi'mdung, jëyi myöygixy mnajxcixy jäyjin jäydijc. ¹² Yi jadu'mbi jäy ajcxy nyajnïbijcipyich mïd ñch ajt nHuindzin Jesús yxiï co huen tungixy jabom jabom ma yci'mdung, ca' huaad pin adzijpcix anajxcix jigix jëbi paadip ajcxy ycaayin y'uucin.

¹³ Migügtijc ajcxy, oybi jatyim tungixy jabom jabom, ca' mjetmetzcïyigixipy. ¹⁴ Pen nidügti ma miich ajcxy ca' tuñ cuendi jada ayuc huidibi ajcxy nyajnijayïyb, ijxcix pin je', e chi ca' mjactúngixip cuendi, e ni ca' mïd myöymujc mnaxmújcxipy, jigix chöydunipy. ¹⁵ Ca' ajcxy huaad midzip'ajtcixy yi jäy ajcxy huidibi ca' yajxon cuyduñ Dios ytiy'ajt. Hue' janchtiy mgapxhuijcxix oy'amy jadu'n nej tüg mibijcpi.

Capxpooxïn huidibi cijxnip je necy

¹⁶ Huen ñch ajt nHuindzin Jesucristo huidibi jotcuje'ajtin yejcp, ci'm xyajjotcugïyigixipy jabom jabom oytim minaaxijity oytim yma'amyity. Huen je Huindzin Dios xypubejtcixy xypudigïyigixy.

¹⁷ Hich, Pablo, jada capxpooxïn ci'm njaayich. Jadu'n nfirmajïyich tüg'óciy ñch nnecy, e jadu'n miich ajcxy mnejhuïhuipy co ñch jada necy'adyii. ¹⁸ Huen ñch ajt nHuindzin Jesucristo may'ajt oy'ajt tunipy mïd tüg'óciy miich ajcxy. Jadu'n jada. Amén.

1 TIMOTEO

Yi Jayijpi Necy Huidibi San Pablo Yajnigujxy Timoteo

¹ Hich Pablo, Cristo Jesús xyaj'apóstol'ajtpich. Yi Dios huidibi xyñihuaanim xyaj-nidzoocim ajt n'alma, etz Cristo Jesús huidibi xymöhuaanim jugy'ajtin huinixibi, yi' ajcxy ti xyajñibicyich co yi' y'ayuc ngapxhuäcxibich. ² Cham hich miich nijayiy Timoteo. Jadu'n njihuüy nej hich miich ngi'm'ung'adyii, co miich Dios ytiy'ajt ti mbaady ma hich. Huen Dios Teedy etz Cristo Jesús hich ajt nhuindzin may'ajt tunipy mid miich, huen xypa'ayoohuipy etz xyajjotcugihuipy.

Nijëjity jäy yaj'ixpicy huidibi ca' ytiy'ajtity

³ Hui'mi' miich jim Efeso, jadu'n nej nimay je taabi anajty ndzonañich jim Efeso nñicxañich anajty Macedonia. Hui'mi' jim, jigix mgapx'adugipy je jäy huidibi najtz-capxuyb je ayuc ca'p ytiy'ajtity. ⁴ Mgapx'adugipy je nigoobi y'ayucity. Mgapx'adugipy yi' ajcxy huidibi tzachnigapxp tzachnimiydacy y judiojäy ajcxy y'ayuc jadu'n nej huidibi ñi'ap'ajtpy ñideedy'ajtpy ajcxy. Yi jadu'mbi ayuc nigoob yajhuinma'ñydigoy pinjaty ixpijcp Dios ytiy'ajt.

⁵ Jadu'n Dios tzocy co huen jäy ajcxy naychojtäyyii mid oyjot oyhuinma'ñ. Huen ajcxy Dios yajmij'aty janch cixyot huinijot. Co pin yajmij'aty Dios janch cixyot huinijot, ooy ajcxy oy ñayjihuyigixy. ⁶ Nijëjity jäy ajcxy ti ixmajtzn je Dios ytiy'ajt, ti ajcxy jijptigiyiñi je ayuc huinma'ñ huidibi ca'p choobaady. ⁷ Ooy yi' ajcxy jayaj'ixpiga'ñ yi Dios ycötujcin, ni ca' huinjihuyigixy huidibi ycapxcixyp, ni huidibi ajcxy ñigapxpejtpy.

⁸ Hich ajcxy nnejhuuyim co yi Dios ycötujcin oy yi' pen nyajtunim nej ypadyii nej ytiy'ajtity. ⁹ Nejhuuyim co yi Dios ycötujcin ca' yi' tzaachytuñ oyjäydijc, jëyi tzaachytuñ pin ca' capxymidooy Dios, pin midundigooyb Dios ycötujcin. Je Dios ycötujcin chaachytumyb jäy huidibi ca' cuydungixy, jäy ajcxy huidibi ca' ytudägyity, jäy huidibi ca' capxymidoogixy Dios, jäy huidibi pocytungixy, jäy huidibi ca' huindzigi'ñ yajtungixy mid Dios, jäy ajcxy huidibi capxtigooyb, huidibi ytaj yteedy yaj'öccixy, huidibi jäy yaj'öccixy. ¹⁰ Je Dios ycötujcin chaachytumyb pin migapxtigooyb töxyjäydijc etz yëydijctijc, huidibi miyëydijc ymähua'ñ. Dios nañ chaachytumyb je jäy huidibi jäy majtzp etz toognaxy, chaachytumyb indaacpidijc etz nihuambejtpidijc. Je Dios chaachytumyb jacjadyii jäy huidibi y'ayuc ca' ytiy'ajtity nej Dios tiy'ajt midity. ¹¹ Jadayaabi tiy'ajt huätzpi oybi tüguyb mid Jesucristo y'ayuc ytiy'ajt oybi huidibi hich nDios, je conuucxy yTeedy, ti xyajñibicyich co ngapxhuäcxibich.

Pablo yjäygidacy co Dios may'ajt ti tuñ mid yi'

¹² Ooy njäygidägyich co hich ajt nhuindzin Cristo Jesús ti xyajmicpicyich, yi' ti xyijxtiyyich, yi' ti xyajñibicyich Dios y'ayuc co ngapxhuäcxpich. ¹³ Hich jecy'ajty jibic anajty nigapxy ni'ojiiyich Jesús. N'ixhuidijty nbahuidijtyich Jesús yjäy. Hich yi' ajcxy nmidundigooyich. Ti yi' Dios xypa'ayooyich com hich jadu'n anajty ti n'adich mid co nganejhuiyyich je tiy'ajt, ngamibicyich Jesús ngamijpidägyich Jesús. ¹⁴ Paady ycixpi hich ajt nHuindzin Dios may'ajt oy'ajt ti tuñ mijcajee mid hich, co ti xyajmibicyich Jesús. E Jesús ti xymöyich tzojcin jihuiyyin mid yi' yjäy ycixpi.

¹⁵ Ooy jada yjanchity, e nidüg'óciy jäy ajcxy jëbi mibijccixy co Cristo Jesús miñ ya naaxhuiñ co yajpocynihuädza'ñ pocyjäydijc. E hich nigü pocy nmídidyich ca'ydi ni pinjäy. ¹⁶ Mid jada ycixpi Dios ti xypa'ayooyich ti xymimecxtucyich, jigix co jäy ajcxy ijxip nej Dios ti ytuñ mid hich, huin'it ajcxy mijpidägyipy yi' y'ayuc etz ypaadipy jugy'ajtin huinixibi ma Jesús. ¹⁷ Paady chojcpy co ngömayim Dios, je rey huidibi ane'mb

huinixi, huidibi niminaa yca'o'cy, etz nipin ca'ixy. Je Dios tügpajc huidibi Dios'ajtp huen ycomay'idipy cham etz tüg'óciy xii tiempo huidibi mimb cidacp.

¹⁸ Timoteo, ooy ich miich ndzocy njihuüy. Jada ayuc ich miich nyajnimaydaayb. Mihuindinähuiip Dios y'ayuc ca' mhuinma'ñyidigoyipy. Mguydunipy jadu'n nej Dios y'ayucnajtzcapxiiybi xy'ihuijy xycapxhuijy co mdung mñimajch. ¹⁹ Mihuindinähuiip Dios y'ayuc ytiy'ajt, huin'it ca' jibic mnayjihuihuüyb, jadu'n nej ajcxy jadyii huidibi nejhuüyb je tiy'ajt, e ca' cuydungixy, e jadu'ñyi yhuinma'ñyidigooygixy. ²⁰ Jadu'n nej Himeneo miid Alejandro ajcxy jaty, huidibi ich ti nyajc'idigiiygixy je mujcu', jigix ajcxy yhuinma'ñymedzipy, ca'ydi yajjotma'tcixy Dios.

2

Jadu'n nej jëb Dios nibijctzoohuim

¹ Yi' njatyyajnimayb co ooy ycopicyity capxtaaccixy nibijctzoogixy Dios etz yajna-jxcixy Dioscojuyip miid tüg'óciy jäy ajcxy ycixpi. ² Copicy nibijctzoohuim ma Dios: reydiyc, ane'mbidijc etz codungdiyc, jigix jëbi jotcuyc ndzinaayim, ca' ma tzip. Co jadu'n nduunim, yi' anajty ngoduunim Dios y'ayuc, etz huin'it tiydudägy ndzinaayim. ³ Com yi' jadu'mbi huinma'ñ ooy yi' y'oyity, e Dios huidibi ich ajt n'alma yajnidzoocp, oy yi' jäygidägy. ⁴ Dios chojcpy co tüg'óciy je jäy ajcxy huen y'alma nidzooccixy, huen ijxcixy nejhuüygixy Dios y'ayuc ytiy'ajt. ⁵ Tüg je' je nHuindzin'ajtim Dios, etz tüg je' je huingapxpi huidibi jëbi ytigüy ma Dios miid ich ajt ycixpi, etz huidibi jëb Dios y'ayuc capxnajxy ma ich ajt: je huingapxpi, je' je' je jäy, je Cristo Jesús. ⁶ Cristo Jesús nayyojxi naydooci miid ich ajt nbocy ycixpi, ñaygiyejci huen jäy yaj'ögyii, jigix jëb ich ajt nbidzimim ma je mujcu' anajty c'am xymiid'ajtim. Jadu'n nej Dios cham jäy yajnejhuüy co je tiempo yhuaad'ajtni, ⁷ paady Dios ti xyajnibicyich ngapxhuäcxibich y'ayuc ytiy'ajt, etz Jesús xy'apóstol'adyiijich. Je tiy'ajt jada ngapxpich, ca' n'indägyich. Ti xyajnibicyich jada tung nej jëb huaad nyaj'ixpicich, nej jëb huaad nibijccixy Dios, etz nyaj'ixpicich Dios ytiy'ajt ma yi' jäy ajcxy huidibi ca' yjudiojäyity.

⁸ Ndzojcypich co yi' yëydijctijc huen nibijctzoogixy ojadajtcixy Dios ma tüg'óciy nay-mujctac miid oyjot oyhuinma'ñ, ca' y'adzip y'ahuan'nity, ca' y'ametz yjotmetzity. ⁹ Nañ jadu'n ndzocypich co yi' töxyjäydijc huen yhuit yxojx yajtungixy nej ypadyii, huidibi quipxpaady ajcxy paatip. Huen yhuit yxojx pidaaccixy nej töxyjäydijc huidib tudägyip. Huen ycohuary cüdägy caaxigy nej ypadyii, ca' ymigügtijc huinnaxtugipy miid yhuit yxojx, ca' nayxójigixy miid oori, miid perla, e miid tijaty ooy choohuity. ¹⁰ Ca' huaad töxyjäydijc ñaygömáygixy miid yhuit yxojx, huen janch yajcömaygixy miid y'oyjäy'ajtin, jadu'n nej je jäy ajcxy tungixy huidibi ti ñaygiyéjigixy cixyot huinijot ma Dios. ¹¹ Co jäy ajcxy yaj'ixpicy Dios y'ayuc ma je naymujctac, huen töxyjäydijc ajcxy amoyñi amidoo'ijtcixy miid yungnaxy yjot yhuinma'ñ. ¹² Yi' töxyjäydijc ca'p niducyich yaj'ixpigipy jäy ajcxy ma je naymujctac. E ni ca' ypadyii nicxy yëydijc ane'my. Huen ajcxy amoyñi y'ity. ¹³ Dios jayijp yajcojy Adán, jac'axam Eva, paady ycopicy yi' yëydijctijc huen ane'my yi' töxyjäydijc. ¹⁴ Adán ca' yajtzu'ijxy. Eva yajtzu'ijx, je' ca' Dios capxymidoy. ¹⁵ Paady yi' töxyjäydijc ca' ypadyii nicxy nigohuajc'aty yi' nibijcpidijc. Dios jotcuyc ñayjihuiyii miid co jëyi y'ung'ijxcixy, etz yajmij'ajtcixy Dios, etz tzojctaaygixy ymigügtijc, etz huen ajcxy cuydungixy Dios y'ayuc ytiy'ajt, etz huen tudägy jäy'ajtcixy miid oyjot oyhuinma'ñ.

3

Nej jëbi ytungixy huidibi ajcxy nigohuajc'ajtp

¹ Tiy'ajt jada nej jäy yminaangixy. Pen ji pin najtzogüy nigohuajc'ada'ñ yi' nibijcpidijc tüg yi' oybi anajty ytunamyb. ² Pin nigohuajc'ajtp yi' nibijcpidijc ooy ycopicyity je' jadu'n

naydijib huidibi ca' ti tundigoy, huidibi tög töxyjäy müd ca'p ycanaagity, huidibi huijycujc jäy'ajtp, huidibi müd oybi yhuinmañ etz tudägypí yhuinmañ, huidibi oyjäy'ajtin tumb, huidibi jajtp nej jäy ajcxy yaj'ixpígipy. ³ Pin nigohuajc'ajtp chojcpy tög jäy huidibi ca' y'amügity, huidibi ca' yhuindzipity, huidibi yajtumb mecxtujcin, huidibi ca' chipcapxy y'ahua'ngapxy, huidibi ca' ti adzocy. ⁴ Pin nigohuajc'ajtp chojcpy tög jäy huidibi tiydudägy tzinaayb ma yjin ytijc, huidibi y'ung y'anäg yajtzinaayb nicy xeemy. ⁵ Pen ca' jaty nej y'ung y'anäg migapx ane'mip ma yjin ytijc, ¿nej oc'ane'mañ yi mibijcpidijc? ⁶ Nañ ca'p yjéjity huidibi namni mibicy Dios y'ayuc ytiy'ajt. Ycadimjegyity nicxy ooy amij agix ñayjihuiyii, e nicxy camadägy je ane'min, e yjadipy jadu'n nej Satanás yjajty co jibic tumb ñayyajhui'mi müd Dios. ⁷ Chojcpy tög jäy huidibi nidüg'ócíy je mayjäy oy ixpí. Pen ca' yjadu'nity nicxy pin yxíyii, e chi jada anajty je mujcu' ti ymimadägyii co jäy jibic ñigapxiyb.

Yi mutz tungmüd nañ chojcpy huidibi oyjot oyhuinmañ müd

⁸ Yi mutz tungmüd huidibi yajpat ma mibijcpidijc chojcpy jäy tudägypí, huidibi nicy xeemy jäy'ajtp, huidibi ca' jäy'aty aguejtmñ aguejtxipy, huidibi ca' y'amügity, huidibi ca' y'adzocy ca' y'ameeñity. ⁹ Huen naybidáacigixy cixyot huinjot ma je tiy'ajt janchypí. Je tiy'ajt huidibi je mayjäy ca' huinjihuiy. Je tiy'ajt huidibi ñch ajt nmibijcim. Je' chojcpy pinjaty huidibi ca' ti jibicpi jot'adyii huinmañ'adyii. ¹⁰ Pinjaty mutztung yajnicxamb, jayijp jot'ix huinmañ'ix pen tudägy yhuinmañ. Huin'it jébi mdungmöy. ¹¹ Yi mutz tungmüdpi ytöxyijc chojcpy co huen tudägy jäy'aty, huidibi ca' ñigapx ñi'ojíy ymigüg, huidibi nicy xeemy jäy'ajtp, huidibi cuydundaayb tög'ócíy. ¹² Yi jäy huidibi mutztung yajnicxamb chojcpy tög jäy huidibi picy chinaayb, huidibi ca'p müdity metz o tugig töxyjäy, huidibi y'ung y'anäg yajtzinaayb nicy xeemy, huidibi tiydudägy tzinaayb ma yjin ytijc. ¹³ Yi mutz tungmüdpi huidibi yajxon ytung cuydungixy, cömay yi' ajcxy idipy ma mibijcpidijc. Nañ ñigi ajcxy ixpíj'idích Cristo y'ayuc.

Dios mijhuinmañ tuun müd ñch ajt ycixpi

¹⁴ Jada necy ñch miich nyajnigüeexyp. Njijp'ijxypich co tzojc nnicxa'ñich jim ma miich. ¹⁵ Pen ca' y'oyíy nej tzojc nnicxibich ma miich, ti yam nyajnijayíy je janchypí. Müd jada necy huaad jébi nidüg nidüg mibijcpi yjäy'ájtigixy ma yi mibijcpidijc huidibi mijpidacp Dios juugypí, je Dios huidibi huijtz'ijttaayb etz cohuandaayb je tiy'ajt janchypí. ¹⁶ Janch tiy'ajt jada co mij yi' yi Dios y'ayuc ytiy'ajt huidibi ti xyajnejhuíyim, je huidibi jecy'ajty ca' pin nejhuíy. Je tiy'ajt huidibi xyajnejhuíyim co quexy y'ung ya naaxhuiñ. Dios y'ung hue' je' yaj'ijxy müd ñinícx. Tudägy nayguëxíci müd Dios yjihuiñ ymic'ajt. Je Dios y'angeles ajcxy ti ixyii. Ti yajnigapxy yajnimíydägy Dios y'ung ma huidibi ca' yjudiojäyity nañ ti jäy yajmij'ajtcixy Dios y'ung ya naaxhuiñybi. E ti ycöbigyii tzajpjoty ma yi oybi it.

4

Mayjäy ixmadzañ yi Dios ytiy'ajt

¹ Yi Espíritu Santo minaan co anajty je xi tiempo ycixañ, mayjäy ixmadzaangixy yi Dios y'ayuc ytiy'ajt. Mijpidaaccixy anajty jäy ajcxy y'ayuc huidibi yi huin'ñmbi etz ca'oybi ytiy'ajt müd. ² Jada jäy ajcxy müd anñ anajty naybidáacigixy nej ytudägyity, e ca' anajty yjanchity. Ca' ajcxy nej ñayjihuiyii co ajcxy ytigíy anñdaacpi. Ti jadu'n yhuinmañypidaaccixy janch mic. ³ Yi' ajcxy ymínañ co ca' huaad jäy ypijccixy, etz ca' huaad caaygixy nijéjity caayin uucin. Yi caayin uucin Dios yi' ti conucxy jigix jébi jäy ajcxy huidibi mibijccixy etz huinjihuiygixy je tiy'ajt, jébi yajnajxcixy Dioscojuyip ma Dios etz cöbigipy ajcxy agujc jotcujc je caayin uucin. ⁴ Tüg'ócíy huidibi Dios ti yaj'oyíy, oy yi'. Ca' huaad pin ymínañ co ca' y'oyity. Agujc jotcujc ngöbijcim, jéyi nyajnajxim Dioscojuyip ma

yí'. ⁵ Dios ymína'ñ co huen huídibi caayin huídibi uucin ooy y'oy yí'. Jëyi co nyajnajxim Dioscojuyip, e huin'it Dios conuucxy je caayin uucin.

Ca' ajcxy mmijpidägip yi nigoobi'ayucity

⁶ Pen miich ajcxy jada ayuc jada tiy'ajt myajniimaayb yi migügtijc, oy anajty mduñ ma Cristo ytung. Co jadu'n myaj'ixpicy Dios y'ayuc janch cixyjot huinijot, chi anajty myajyeegy yi mmibijcin. Ca' mjäydigoyipy yi oybi ayuc huídibi nyajniimaayb, huídibi ayuc mbanicxyp mbayöyp. ⁷ Ca' mmijpidägy yi nigoobi'ayucity huídibi ca' choobaady ma Dios. Panicxi' payöyi' Dios ytiy'ajt. ⁸ Jac'oy co n'ixpicim Dios y'ayuc, ca'ydi co ninicx ymic'ajt nbaatim. Co yajyujctäy jäy ñinicx, chi ñinicx ymic'ajt paady jëyi. Co n'ixpicim nguyduunim Dios ytiy'ajt, chi tiy'ajt nbaatim nej ya naaxhuiñ ndzinaayim, etz nañ jadu'n nbaatim jadüg jugy'ajtin ma Jesús co anajty n'o'cim. ⁹ Jada tiy'ajt huídibi ti nyajnimäy, janch tudägy jada, jëbi ngöbijtaayim, e nidüg nidüg jëbi mibijccixy. ¹⁰ Paady nduunim n'ayoohuim oy pin xyca'ixaanim. Njijp'ijxim co je Dios huídibi jugy'ijtp xyajnidzogaanim n'alma. Jëyi yajnidzögipy ajcxy y'alma huídibi mijpidaacip Dios y'ayuc.

¹¹ Yajniima' yi migügtijc huen cuydundaaygixy jada ayuc. Yaj'ixpic jada tiy'ajt. ¹² Huen jäy ajcxy m'ayuc xymijpidaaci, oy miich mutz anäcinity. Myegipy ijxpejt ma migügtijc nej jëb huaad ycapxcixy ymiydaaccixy, nej jëb huaad ytungixy, jadu'n nej jëb huaad oyjäy'ajtin tungixy, jadu'n nej jëb huaad mibijcin yajtungixy ma Dios, jadu'n nej jëb huaad huädz yhuinma'ñ müd'ajtcixy. Co jadu'n mdunipy, huin'it ajcxy mijpidägipy miich m'ayuc. ¹³ Mabaad ñich anajty nicxy ma miich, capx Dios ñecy ma yi naymujctac, capxhuäcx etz yaj'ixpic yi tiy'ajt. ¹⁴ Yajtun yi huij'ajt cujc'ajt huídibi Dios xymoy je taabi je mibijcpidijc mijtungmüdpí xycinixajy, e xy'ayucmoy xymic'ajtmoy ajcxy müd je Espíritu Santo ymic'ajt.

¹⁵ Naybidägi yajcopijc tüg'óciy huídibi ti nyajnimäy, e niguëxigipy mayjäyduum co ti yajxon m'ixpicy je tiy'ajt. ¹⁶ Nayguend'adii miich ooy ci'm, nañ jadu'n naygüend'adii ma yi Dios ytiy'ajt, ca' m'ixmach Dios y'ayuc. Co miich jada mdunipy ci'm anajty nayyajnidzögyii, nañ jadu'n anajty myajnidzoocixy huídibi anajty ajcxy amidoo'ijtp miich m'ayuc.

5

Nej jëbi huaad migügtijc m'ñhuijipy mgapxhuijipy

¹ Ca'p huinjijp m'ojip mij'anäctijc. Oy'amy ñhuijcixy capxhuijcixy jadu'n nej jihuüy mdeedy'adyii. Nañ jadu'n yi yujcyecytijc ñhuijcixy capxhuijcixy oy'amy jadu'n nej jihuüy mgi'mjuugy mgi'mmigüg. ² Yi mij'anäctijc ajcxy töxyjäybí nañ jadu'n oy'amy m'ñhuijcixy capxhuijcixy, jadu'n nej jihuüy yi' ajcxy mdaj'adyii mdzitz'adyii. Yi töxy'anäctijc ajcxy mutz'anäcniip müd'ijtcixy müd tudägyi mjot mhuinma'ñ.

³ Huen yi mibijcpidijc ajcxy yajmij'adipy etz pubedipy yi töxyjäydijc ajcxy co'ögypi, huídibi janch ni ypin ycaca'ty. ⁴ Pen jim töxyjäydijc co'ögypi huídibi müd y'ung etz y'oc'ung, huen ajcxy jaty nej ytaj ñambiid yajmij'adipy, huen oybi yajhuimbidity müd ytaj etz ñambiid. Com yi jadu'mbi huinma'ñ Dios yjäygidacpy. ⁵ Je töxyjäy co'ögypi ca'p pin tim müdity, yi' yjijp'ijxyp co Dios ypubediyb etz Dios ymibijctzooyb y'ojadajtpy jabom jabom xim tzuum. ⁶ Je co'ögy töxyjäy huídibi tzinaayb müd mayñax xondaacin, jadu'n Dios yajnaxyii jadu'n nej jihuüy y'ögity ytigoyity. ⁷ Yajniima' ajcxy huen cuydungixy Dios ytiy'ajt, jigix ca' jibic ajcxy yajnigapxy. ⁸ Pen ji pin huídibi yajmij'ajtp Dios, e ca' pubeda'ñ y'amigüg, pen ca' y'ung ytöxyijc yajxon ixxy may'aty, ca' yi' cuyduni Dios y'ayuc ytiy'ajt. Nigi anajty yjibicity nej ti y'idich ca'ydi jadu'n nej huídibi ca' ymibicy.

⁹⁻¹⁰ Yi töxyjäy co'ögypi ajcxy tiibi ytugi'px jimijtiy, jëbi mgojayiyi yxi ma yi lista huídibi yi mibijcpidijc ypubedamyb. Yi mibijcpidijc ypubedamyb pen tüg ñäy anajty müddzinäy, pen ojot oyhuinma'ñ ymüid, pen ti y'ung yajxon yajyeegy, pen ti migügtijc mi'oyjäy'aty,

pen ti may'ajt tuñ m̄id Dios yjāy, pen ti pa'ayooy hūidibi ayoob hūidibi jottigooyb, pen ti yajtūyōy yajxon nej ytiy'ajtiy.

¹¹ Yi co'ōgy tōxyjāy mutz'anācnībi ca' mgojayīyipy yxī ma yi lista hūidibi yi m̄ibijcp̄idijc ypubedamyb. Pen capxytumb co tuna'ñ m̄id Cristo yc̄ixpī tijaty tung ma naymujctac, ycajeyity co je oybi anajty yam y'octumȳb, chi nijot'ajtnī ypigaani, chi ytung ixmajtzn̄ip.

¹² Co yi m̄ibijcp̄idijc ajcxy ca' jāygidaāci yi' ytung, chi jibic ñayjihuīyii co ca' cuyduñ y'ayuc nej ti ycapxytuñ m̄id yi Cristo Jesús. ¹³ Jadūgnax ca' ytung yajcopicy, jēyi yhūidijtnī jayj̄in jaydījc, e ca' yi'yity, nañ jadu'n ym̄igūg nigapxnī ni'oj̄īyñī, capxnī miydaacnī hūidibi ca' y'oyity. ¹⁴ Ndzojcp̄yich co yi tōxyjāy co'ōgy mutz'anācnībi huen pijccixy, huen tzinaaygixy jugy'ajtcixy yajxon, huen ung'ijxcixy anāc'ijxcixy, huen yajxon cuend'ajtcixy yj̄in ytījc, jigix ca' ajcxy nīhuambedīyb ni'oj̄ihuīyb hūidibi ca' Dios y'ayuc ixaanī midohuaanī. ¹⁵ Nijējity tōxyjāy ajcxy co'ōgy pī ti ixmajtzcixnī Dios y'ayuc ytiy'ajt, e ti ajcxy j̄ijptigiȳiygixnī yī mujcu' yhuinma'ñ.

¹⁶ Pen ji m̄ibijcp̄idijc yēydījcp̄i o tōxyjāybī m̄idity y'ajuugy y'amigūg co'ōgy pī, yi' je' paatip ixipy may'adipy je y'ajuugy y'amigūg co'ōgy pī, e ca' yaj'idipy ma yi m̄ibijcp̄idijc nīgixp. E jadu'n je' huaad je m̄ibijcp̄idijc ajcxy pubejtcixy co'ōgy pī ca' p ti tim m̄idity.

¹⁷ Yi' ajcxy hūidibi nigohuajc'ajtp yi m̄ibijcp̄idijc hūidibi yajxon tumb capxpaady y'idipy. Nīgi ajcxy capxpaady y'idipy hūidibi Dios y'ayuc capxhuācxip etz yaj'ixpicy.

¹⁸ Jadu'n yjaybetyity ma Dios y'ayuc: "Ca' huaad huajyuub y'ajen nbidaacim ma yam ten moody trigo m̄iy co yajpajc'ada'ñ yī trigo tim." Nañ jadu'n jadūg'it yjaybetyity: "Yi hūidibi tumb paatip yi' ymuju'ñ." Jadu'n jada ayuc yhuimb̄idz̄imy: Yi' hūidibi yaj'ixpījcp Dios y'ayuc paatip huen yajmujuy.

¹⁹⁻²⁰ Ca' mic'amy mdiydunipy pin tungm̄idpī ma yi m̄ibijcp̄idijc pen tūgpajc hūidibi xīhuip. Ca' mdiydunipy pin tungm̄idpī ixti coonī metz o tugūg testigo yquēxigipy pen janch ti ytundigooy. Pen ytundigooy yi hūidibi nigohuajc'ajtp, capxp̄idzim mayjāydumb jigix jacjadyiī chigi'ñ pijccixipy. ²¹ Jada tiy'ajt miich nyajnīmaayb, Dios Cristo Jesús etz yi' y'angeles ajcxy hūidibi Dios ti huin'ijxcixy ñidiy'ajt'ajtcixy co yjanchity jada ayuc. Co mban̄icxip jada tiy'ajt, ca' huin'ixpety mdiydunip mdzaachytunip m̄ibijcp̄idijc.

²² Ca' mic'amy m̄gin̄ixajipy co myajtungbīga'n̄ip jāy hūidibi ca' m'ixy'adyii. Ycajeyity ypocytunipy, e tū'ciy mbocycāhuaangixy miich m̄id yi'. Miich nayguend'adīi jigix ca' mbocycāhuipy.

²³ Miich Timoteo, pen pijcp̄ mjot, tzo'y'adīi hueen vino, com jac'oy yi' ca'ydī co m'ūgipy huādz̄ nīi.

²⁴ Jadyii jāy hūidibi jibic-huinma'ñ m̄id yajnejhūihuipy yi' ajcxy yjibic-huinma'ñ ma anajty ca'nī yajtiydungixy. Jacjadyii jāy ca' yajnejhūiy yjibic-huinma'ñ ixti coonī yajtiydungixy. ²⁵ Nañ jadu'n jadyii jāy yajnejhūihuip co oyjāy'ajtin anajty ti tungixy, jacjadyii jāy ca' mic'amy yajnejhūihuipy co oyjāy'ajtin ti tungixy. Yi oyjāy'ajtin ca' p yi' yhuim̄ipy coyūch.

6

¹ Tūg'óciy tumb̄idijc hūidibi ajcxy m̄ibijcp̄ hūidibi ajcxy ijtp cojuȳy codooḡiy, huen yajxon yajm̄ij'ajtcixy yhuindz̄in. Pen ca' jadu'n tungixy, chi je huingjāydijc jibic nigapx-aanī ni'oj̄ihuaanī yī Dios etz yi' ytiy'ajt. ² Pen yi tumb̄i m̄id yhuindz̄in hūidibi yajm̄ij'ajtp Dios, ca' y'oyity co nīxigipy yajxigipy yhuindz̄in. Huen ajcxy nīgi yajxon yajm̄ij'ajtcixy, com hue' je' Dios yjāy. Yi hūidibi nīhuindz̄in'ajt ypadamyb je oybi hūidibi je' ytumb̄i ytung'ajtpy. Jada tiy'ajt yaj'ixpic etz capxhuācx.

Jotcujc'ajtin nbaatim ma Dios ytiy'ajt

³⁻⁴ Pen ji pin huingbī tiy'ajt yaj'ixpicy hūidibi ca' ñaybadyii m̄id je Huindz̄in Jesucristo y'ayuc ytiy'ajt, e ni ycanaybadyii m̄id je tiy'ajt hūidibi īch ajt nm̄ijp̄idaacim, hue' jada

nej tög jät huidibi amij agixip huidibi ca' ni ti nejhuüy. Chachnijot'aty tzip capx, e jadu'n yhuimbizimy jada tzip capxy co migüg ca' yaj'oy'ixy, chi ñaymidziptzoongixy nihuambejtcixy etz jibic nigapxcixy ymigügtjc. ⁵ Yi jadu'mbi jät huidibi ca' mijpidägy Dios ytiy'ajt cojpy ymacxpy tzip capxy huidibi ca' ycixy ytigoy. Yhuinma'ñydgoy ajcxy, ca' huinjihuüyigixy tiy'ajt. Hue' ajcxy yaj'ixpicy Dios y'ayuc mid co ycomeen'adaangixy. Puhuäctuat miich jadu'mbi jät ajcxy. ⁶ Co Dios y'ayuc ytiy'ajt nguydunim, huin'it jotcuje ndzinaayim, etz nbaatim oy'ajt mijpi. ⁷ Ni ti ñch ajt ya naaxhuiñ ca' ti nmiinim co nma'xung'ajtim, nañ ni ti ngaminicxim co n'o'cim. ⁸ Pen nmüd'ajtim caayin uucin huit tucxy, jëbi njotcuje'ajtim mid y'yi. ⁹ Je' ajcxy huidibi ooy nijot'aty comeen'adi, hue' je' ajcxy jibic tumb ajcxy ycähua'ñ. Je' ajcxy chachtunamyb huidibi ca' oyhuinma'ñity, huidibi nayjotmayduunip. Ayo'n ajcxy ypadamyb, tigoyamb ajcxy y'alma. ¹⁰ Yi meeny'adzojcin y' je' y' jibic-huinma'ñ cop'ajtip. Mid y' meeny'adzojcin may y' jät huidibi jäydgoy Dios ytiy'ajt. Hue' je' ajcxy nayjotmayduunip.

Timoteo, tiydudägy mdzinähuipy miich

¹¹ Timoteo, Dios yjät, cöguög y' jät huidibi mid y' jadu'mbi jibic-huinma'ñ. Tiydudägy mdzinähuipy, cuyduni Dios y'ayuc ycotujcin, mijpidäg Dios y'ayuc ytiy'ajt, tun oyyäy'ajtin, mihuindina' y' tung, mid'at mjot mhuinma'ñ yung naxy. ¹² Mic mjot mhuinma'ñ pidäg ma Dios ytiy'ajt, ca' mjotmetzcy. Tun jadu'n nej jät huidibi nayboyicquixigixy naymic'ixigixy. Nijot'at cixyot huinjot y' jugy'ajtin huidibi m'alma ypadamyb ma Dios. Dios xyajnicicy jigix mgapxhuäcxip jada tiy'ajt. Ti miich mgapxypidzimy nej mmibicy mayjäyoty. ¹³ Dios je huidibi yajjugy'ajttaayb tög'ocy, y' nidiy'ajt'aty co ooy ycopicyity jada ayuc jadu'n nej cham nyajnimaayb. Nañ jadu'n je Cristo Jesús je huidibi tiy'ajt capxypidzim ma Poncio Pilato ñidiy'ajt'ajt co oy ycopicyity jada ayuc jadu'n nej cham nyajnimaayb. ¹⁴ Copicy cuydun jada ayuc ane'min. Huädz mguydundähuipy, huädz myaj'ixpigipy je tiy'ajt jigix ca' pin jibic ni'ojihuipy Dios ytiy'ajt. Jadu'n mdunipy ixti cooni ñch ajt nHuindzin Cristo Jesús ñayguëxigiyb ya naaxhuiñ jadüg'oc. ¹⁵ Dios yajniguëxigamyb Cristo Jesús mina anajty je tiempo yhuaad'aty. Dios je' je mij'ane'mbi, je mijpi rey, etz je mijpi huindzin. Yi' je' je Huindzin Dios huidibi ane'mdaayb. ¹⁶ Yi' je' tügpajc je jugy'ajt cop ymid. Yi' ijtp ma je tucxin je jajin huidibi ca' pin huaad ninej mihuingoñ. Janch ni tög jät ti ca' ixy, e ni ca' ixa'ñ. Yi' je' cömay'idipy etz y' ane'mdaayb tög'ocy. Amén. Jadu'n jada.

¹⁷ Yi comeenydjic huidibi jadachambi tiempo tzinaayb jugy'ajt, nima' miich y' ajcxy co ca' huaad amij agix ñayjihuüyigixy, ni ca' nigä adzojccixy anaxy y' meen huidibi jadu'ñy tigoydaayb. Huen ajcxy mijpidägy y' Dios huidibi xymooyim tög'ocy mijmay mijcajee jigix njotcuje'ajtim. ¹⁸ Huen y' comeenydjic oybi tungixy, jigix ajcxy cömay ypidzimipy co oyyäy'ajtin tungixy. Huen ajcxy pa'ayoogixy ymigügtjc huidibi ca' ti midity mid oyjot oyhuinma'ñ. ¹⁹ Co ajcxy jadu'n tungixpy, chi padaangixy je oybi huidibi miimb gidaacp. Ypadamyb ajcxy je jugy'ajtin huinixibi.

Timoteo, mijpidäg jada tiy'ajt

²⁰ Timoteo, mijpidäg jada ixpicin huidibi ti myajnic'aty. Ca' mmijpidägipy y' nigoobi y'ayucity, y' huidibi ca' Dios huindzigiy. Ca' mmijpidägipy y' jät huidibi ajcxy naybidaacip jadu'n nej jihuüy ooy ycohuinma'ñity, e ca' yjanchity, huidibi midzip'ajtp Dios ytiy'ajt.

²¹ Jadu'n nej nje' ajcxy panicxcixy jada ca'pi ytiy'ajity, e jadu'ñi ñitigoy.

Huen Dios je oy'ajtin tuñ mid miich. Amén. Jadu'n jada.

2 TIMOTEO

Yi Mimetzpi Necy Huidibi San Pablo Yajnigiejx Timoteo

¹ Hich Pablo, Dios ti xyajñibicyich huen Cristo Jesús xy'apóstol'adyiijich. Yi ti xyquexyich co yi' y'ayuc ngapxhuäcxibich. Dios ti yajhuinhuanigyixy yi jäy co pin mijpidägy Cristo Jesús yajjugypigipy co anajty ti y'ögy. ² Ooy ich miich ndzocy njhuüy nej ngi'm'ung'adyi. Dios Teedy etz ich ajt nHuindzin Cristo Jesús huen tuñ oy'ajt may'ajt müd miich, huen xypa'ayooy, huen xyyajjotcugiy.

Pablo jotcuyc co Timoteo ti mijpidägy Dios y'ayuc

³ Nyajnajxypich Dioscojuyip ma Dios co miich ti mmijpidäg yi' y'ayuc. Nmibijctzooybich Dios müd miich ycixpi jabom jabom xim tzuum. Janch cixyjot huinjot nyajmij'atyich Dios, paady ooy oy nayjihuyiijich. Nañ jadu'n n'ap ndeedy jecy'ajty janch cixyjot janch huinjot yajmij'ajty Dios. ⁴ Ooy miich nicxy njaco'ixihuañ jigix njotcugihuibich. Ooy njajäymejtcoodyiijich nej miich mjny myaax müd ich ycixpi je taabi jim ndzooñich. ⁵ Njäymejtzpich jadu'n nej miich mmijpidägy yi Dios janch cixyjot huinjot co xymüd'ityich. Nañ njäymejtzpich co jayjip mnambiid Loida etz yi mdaj Eunice mijpidacy Dios janch cixyjot huinjot. Minambich co chambaad miich mmijpidägy Dios janch cixyjot huinjot.

⁶ Jada nyajjäymejtcootpy: Nijot'at yi mic'ajtin huidibi Dios ti xymöy, je taab anajty Dios ytung mnimadzaani co ngi'nixajy, jigix Dios ytung jacyajxon mduunipy. ⁷ Dios ca' xyajhuindzigy'aty, hue' xyajjotmic'ajtp. Müd Dios ymic'ajt jeb mnaychójcigixy mnayjihuyigixy, jeb oyjot oyhuinmañ myajtuungixy. ⁸ Paady ca' mmidzöyduñiyb ich ajt nHuindzin Cristo Jesús ytiy'ajt. E nañ ca' xymidzöyduñiybich co ti nbujxtjic iñayich müd ich ajt nHuindzin Cristo Jesús ytiy'ajt ycixpi. Mecxtuc yi ayo'n yi tzaachypí huidibi myajnajxpy co mgapxhuäcxy yi Cristo Jesús ytiy'ajt. Dios xyajjotmicpigipy. ⁹ Canan paady ti xyajñidzoocim n'alma co ajt ndzach'oyjäyity. Com Dios jadu'n ti yajnihuinmayiy tunañ oy'ajtin müd ich ajt ycixpi co quejxy Cristo Jesús ya naaxhuiñ. Dios jayjip ti huinmay co quexañ je Cristo Jesús ca'ni anajty pin ya naaxhuiñ. ¹⁰ Dios ti cham jada oy'ajtin yajnigüëgy co yaj'ijxy ya naaxhuiñ ich ajt nnihuambi nyajñidzoocpi, je Cristo Jesús, huidibi ti yajcödigooy yi o'cin. E ti yajnejhuüy yi jäy müd yi' ytiy'ajt nej jeb huaad ndzinaayim huinixi ma yi Dios y'it oybi.

¹¹ Dios ti xyajñibicyich co y'ayuc ngapxhuäcxich, etz xy'apóstol'adyiijich jigix nyaj'ixpigipyich yi huidibi ajcxy ca' yjudíojäyity. ¹² Paady ycixpi tzaachypí nbaadyich. Per ca' ndzo'yduñich, com ich nejhuüyb pin nmijpidacpyich, nejhuüybich co yi' ymüd cötujcin etz mic'ajt jeb xycuend'adipyich, ixti huin'it xi minaa Cristo Jesús tiydunañ yi naaxhuiñjy.

¹³ Mijpidäg je tiy'ajt tiydudägypi huidibi ti nyaj'ixpicy, jada je' tiy'ajt iixpejt nej jeb mbanicxy mbayöy. Yajmij'at Cristo Jesús, ca' m'ixmajtzi yi' ytiy'ajt, mdunipy oyjäy'ajtin jadu'n nej yi' tzocy. ¹⁴ Mihundina' yi oybi ayuc tiy'ajt huidibi ti nyaj'ixpicy. Huen je Espíritu Santo huidibi miich müd jotjoty huinmañjoty xypubedipy xypudigihuiipy.

¹⁵ Ti jada' mnejhuüy co tüg'óciy yi mibijcpidijc jim Asia naaxjot ti ixmach je tiy'ajt jadu'n nej ti nyaj'ixpicyich. Yi Figelo etz Hermógenes etz jacjadyii jadu'n ajcxy ti y'adiitcixy. ¹⁶ Yi Huindzin Jesús yi' pa'ayoohuipy yi Onesífero yjuugy ymigüg, com ooy ich mij xypa'ayooyich etz xypubejtyich, ca' xymidzo'yduñiyiijich co nmach'iñayich. ¹⁷ Co Onesífero oyja'ty ya Roma, chi mictägy xy'ixtaayich cooni xypatyich. ¹⁸ Huen yi Huindzin Dios ypa'ayoohuigy Onesífero co anajty Cristo Jesús tiydunañ naaxhuiñjy. Huädz miich mnejhuüy nej yi Onesífero xypubejtyich jim Efeso.

2

Huen Cristo Jesús may'ajt tunipy m̄id miich Timoteo

¹ Miich Timoteo, jadu'n njihuïy nej ngi'm'ung ngi'm'anäg. Huen Cristo Jesús may'ajt tunipy ma miich, huen xyajjotmicpigipy. ² Miich ti mm̄idoy may'ayuc tiy'ajt huidibi ti nyaj'ixpicy. Jada ayuc mayjäy midoy e jëb ajcxy nidiy'ajt'ajtcixy. Jada tiy'ajt miich mgapxnaxipy mgapxhuäcxipy ma jacjadyii yëydijctijc huidibi oyhuinma'ñ ym̄id, jigix yi' ajcxy nañ jadu'n capxnaxipy ma jacjadyii jäy.

³ Miich m̄imadäg yi ayo'n yi tzaachypi huidibi m̄minajxyp myajnajxyp, jadu'n nej tüg Cristo Jesús ysoldado huidibi oy tumb. ⁴ Yi soldado huidibi soldad'ajtp ca' huaad huingbi tung nicxy tuñ, jigix je' yjotcuje'adipy pin anajty ti ypidägyii soldado, nañ jadu'n miich adügiijp Dios ytung mdunipy. ⁵ Pin jäy nayboyicquipxip ca' yi' premio pada'ñ, oy ti yjamadägy, pen ca' cuyduñ yi tiy'ajt. Nañ tzocy co miich mguydunipy yi tiy'ajt. ⁶ Je jäy huidibi tumb ma ycam ytu' je' jayijp huidib huen yajpidägy yi ujtztim̄ huidibi ti y'ity. Nañ jadu'n miich co Dios ytung mduunip mbaadip yi oy'ajtin. ⁷ Yajxon mhuinmayipy huidibi nyajnimaaayb, yi Huindzin Cristo Jesús xyajnejhuïydähuipy tüg'óciy je' ytiy'ajt.

⁸ Jäymetz jadu'n nej Jesucristo, yi David y'ap y'oc, y'o'cy, chi Dios yajjugypijcy jadügtecy. Jada je' je ayuc tiy'ajt oybi huidibi nnajtzcapxiybich. ⁹ M̄id yi' ycixpi n'ayooyich etz tzaachypi nyajnajxyich. Nbujxtijc ñäyich jadu'n nej jihuïy njibicjäyich. Oy njapujxtijc ñäyich ca' ñejity, Dios y'ayuc ca' yi' mach y'ity, yajcapxhuäcx'aditzp n̄gi. ¹⁰ Paady ñch tüg'óciy jada tzaachypi ngöbijctäy nmecxtujctäy, jigix jëbi je jäy ajcxy huidibi Dios ti yhuin'ijxigixy chinähuipy ajcxy huinixii ma yi' y'it oybi, Cristo Jesús yajnidzögib yi' ajcxy y'alma.

¹¹ Tiy'ajt jada ayuc:

Pen ti ñch ajt n'o'cim m̄id Cristo ycixpi, yi' m̄id ndzinaayim tzajpjoty.

¹² Pen nyajnajxim tzaachypi ayo'n m̄id Jesús ycixpi, nañ quipxyi m̄id yi' n'ane'maanim. Pen ca' ya Jesús y'ayuc ngöbijcim, nañ ca' jib tzajpjoty xycöbigaanim.

¹³ Oy ñch ajt nyajmij'ajtim Cristo Jesús o ngayajmij'ajtim, Dios ycuydundaayb yi' y'ayuc. Com ca' huaad yci'm ayuc yajxigy.

Naybidägi cixyjot huinijot ma Dios ytiy'ajt

¹⁴ Yajjäymejtzcood yi m̄ibijcpidijc jada tiy'ajt huidibi ti nyajnimäy. Nima' je jäy ajcxy co je Huindzin Dios ca' oy'ixy tzip capxy ayuc huidibi ca' choobaady. M̄id yi' tzip capxy ca' ni ti oybi nbaatim, jëyi yajhuinma'ñyidigoy huidibi amidoo'ijtp. ¹⁵ Naybidägi cixyjot huinijot ma Dios y'ayuc ytiy'ajt, nej jëb huaad cömay mbidzimy ma Dios, jadu'n nej Dios ytumbi huidibi ca' ni ti midzöydunyii, huidibi Dios y'ayuc ytiy'ajt yajxon yajhuinjihuïydaayb ym̄igügtijc. ¹⁶ Ca' mgöbigipy yi ayuc huidibi ca' ytiy'ajtity, yi nigoob ayuc huidibi yajtüyöyp mayjäy ajcxy, yi tiy'ajt huidibi ca' Dios ytiy'ajt'adyii. ¹⁷ Yi' huidibi ajcxy y'ayuc ca' ytiy'ajtity yajhuinma'ñyidigooyb ym̄igügtijc. Yi' ajcxy m̄id jibic ayuc yajhuinma'ñyidigoy yi mayjäy ajcxy, jadu'n nej pützpa'm̄ huidibi ninicx jicxp oñydägy. Jadu'n nej ti yjaty m̄id Hemeneo etz Fileto co ajcxy yhuinma'ñyidigooy. ¹⁸ Yi' ajcxy anajty Dios y'ayuc cuyduuni, chi oyhuinma'ñyidigooyñi. Chi ajcxy ym̄inängixni co je tübi y'öccixni, ti ajcxy je' yjugypicy, e jadu'n ajcxy yajhuinma'ñyidigoy nijejity jäy. ¹⁹ Huidibi Dios ti cojy ti macxy, niminaxii ycacixy ycatigooy, com yi' ytiy'ajt ijtp yi' huinixii. Tiy'ajt jada co yi' Huindzin Dios y'ijxajpy pinjaty yjäy'ajtpy. Tüg'óciy pin m̄ijpidacp yi' nHuindzin Jesucristo y'ayuc, huen jiphuäctüdy yi' jibic-huinma'ñ yi' jibic-tung.

²⁰ Ma tüg mij comeeñydijc jim oori taasi, oori texy, etz oori cuchara, etz tijaty oyjatypi. Nañ ym̄id jim naax taasi, naax texy, quipy cuchara etz jactijaty ca'p y'oyjatity. Yajtuñ yi' oori taasi etz oori texy ma tugi caayin uucin oybi. Yajtuñ yi' naax taasi etz naax texy oyñiminaa. ²¹ Jadu'n yi' pin jäy jibic-huinma'ñ ixmajtzp etz tuñ oyhuinma'ñ, jadu'n

yi' nej oori taasi oori texy. Cömay'idip yi' ma yi Dios. Huädz yi' yjot yhuinma'ñ, jëbi nHuindzin'ajtm Dios yajtunipy ma tüg'óciy oybi tung.

²² Ixmatz miich yi yujcyeec'anäg ajcxy yjibic-huinma'ñ. Tudägy mdzinähuiipy. Yajmij'ajtcix Dios cixyjot huinijot. Mdunipy oyjäy'ajtm. Ixmatz yi tzip. M'ojadadipy yi Huindzin Dios müid oyjot oyhuinma'ñ. ²³ Ixmatz yi nigoobi'ayucity yi loci huinma'ñ, ca' yi' y'oyity. Mnejhuüyb co yi nigoobi'ayuucity tzipcojp capxycojp yi'. ²⁴ Yi Huindzin Dios ca' yi' tzocy co yi' ytumbidijc nicxy tzip capxy yajtzondägy. Hue' janchtiy tzocy huen jäy'ajtcixy yung naxy müid tüg'óciy jäy etz pe'cy y'idipy müid yaj'ixpijcin. Nañ chojcpy co mímecxtugipy ymügügtijc ajcxy. ²⁵ Miich müid yung naxy mjot mhuinma'ñ capxhuij je jäy huidibi midzip'ajtp je tiy'ajt. Ycadimjecyity co Dios ytiy'ajt nijothuimbijtcixipy, e nejhuüygixyipy je tiy'ajt oybi. ²⁶ Co anajty ajcxy ti ymejtzcixy yhuinma'ñ, chi ajcxy ycöguëgüyb je mujcu' huidibi ajcxy ycapxymidooyb ma anajty ymüid'ajtcixy cïjoty etz ycapxymidoogixpy yi Dios.

3

Jäy jotmay müid y'idaangixy

¹ Miich mnejhuüyb ma je xü tiempo anajty ycixaani jadaanip ayo'n, je jäy ajcxy jotmay müid y'idaangixy. ² Ji adipy jäy huidibi adzojcp, huidibi amij agix nayjihuiyipy, jäy huidibi ameeñ, jäy huidibi ci'm naygömayiib, huidibi oyñinej capxtigooyb ma Dios, jäy huidibi ca' capxymidohua'ñ ytaj yteedy, jäy huidibi ni ti ca' jäygidäga'ñ, jäy huidibi ca' yajmay'aty Dios. ³ Co anajty tiempo ycixaani, ji adipy jäy huidibi ca' ymügüg ixa'ñ tzoga'ñ, jäy huidibi ca' pa'ayo'n müidity, jäy huidibi ymügüg nihuambejtp, jäy huidibi oy ahua'nity, jäy huidibi midzip'ajtp yi oybi. ⁴ Ji adipy jäy huidibi ymügüg agojix midundigooyb, jäy huidibi ytunamyb ti ytunamyb, ca' ajcxy tuñ cuendi capxhuijin, jäy huidibi amij agix nayjihuiyipy, huidibi tzachnijot'ajtcixy mayñaxy xondaacin, e ca' cuyduna'ñ Dios ytiy'ajt. ⁵ Ji adipy jäy huidibi naybidáacigixp jadu'n nej jihuüy ajcxy mijpidaaccixp Dios ytiy'ajt e ca' yjanchity. Chi ma ajcxy chinaayin ma ajcxy yjugy'ajtm ñiguëxïcp co ca' tiy'ajt yajtuñ. Cöguëg yi jadu'mbi jäy. ⁶ Ma yi jadu'mbi jäy ajcxy jim chooñity huidibi coyöyib conaxib ma je töxyjäy huidibi ca' ytudägity, huidibi oy ypocyjäyity, huidibi jibic-huinma'ñ nijot'ajtp. ⁷ Yi jadu'mbi töxyjäy ajcxy panïcxp payöyp canaagnax huinma'ñ, e niminaa ajcxy cahuinjihuihuipy yi Dios ytiy'ajt. ⁸ Jadu'n nej Janes etz Jambres midziptzoon je Moisés, yi jadu'mbi yëydijc ajcxy nañ jadu'n midziptzoonip yi tiy'ajt. Jibicjot jibic-huinma'ñ ajcxy ymüid. Ñaybidägiib ajcxy jadu'n nej jihuüy cuydungixy yi tiy'ajt, e ca' cuydungixy. ⁹ Ca' ajcxy mimadägipy nej huin'ünipy Dios yjäy. Niguëxigipy yi' ajcxy yjibic-huinma'ñ jadu'n nej Janes etz Jambres yjajty.

Tüg'óciy Dios ñecy Dios ci'm ti huinma'ñymöy je huidibi jaay

¹⁰ Miich ti mhuinjihuüydäy nej ñch ti nyaj'ixpiy Dios y'ayuc nej njäy'atyich, nej nhuinma'ñ nduüñich, nej Dios nmijpidägyich cixyjot huinijot, nej ñch jäy nmímecxtucyich, nej oyjäy'ajtm nduüñich, nej ti nmihuindinäyich Dios ytung. ¹¹ Miich m'ixyp mnejhuüyb nej ti nyaj'ixhuidityich nej ti nyajpahuidityich, miich mnejhuüyb je ayo'n je tzaachypï huidibi ti mïnaxyich ti nyajnaxyich jim Antioquia, jim Iconio, etz jim Listra. Jadu'ñyibaad yi ayo'n tiibi nbaadyich Dios ti xyñihua'ñ ti xycohua'ñich. ¹² Huen pin huidibi yajxon cuydumb Dios ycapxy y'ayuc jadu'n nej Cristo Jesús ti xyyaj'ixpiyich, nañ tim jadu'n ajcxy yaj'ixhuididipy yajpahuididipy. ¹³ Yi jibic jäydijc huidibi naybidáacigixp jadu'n nej jihuüy cuydungixy yi tiy'ajt, e ca' yjanchity, nigi jibic y'ididzaangixy. Huin'ünaangixy ymügügtijc ajcxy, e ñayhuin'ünánigixy ci'm.

¹⁴ Miich Timoteo, ixmatz yi jadu'mbi jäy ajcxy etz panïcx yi tiibi m'ixpiy, yi tiibi myajñibic'aty. Mnejhuüyb co ñch ti nyaj'ixpiyich je tiy'ajt. ¹⁵ Com miich pi'cni mutzni

ti mjayty ti mnejhuüy yi Dios ñecy. Jada necy ti xyajnejhuüy nej huaad mijpidägy yi Cristo Jesús, e ñigi jadu'n jëb huaad yi m'alma nüdzoocin paady. ¹⁶ Tüg'óciy Dios ñecy Dios ci'm ti huinma'ñymöy je huidibi jaay. Paady jëbi nyajtuunim co jäy nyajni'ixiyim nyaj'ixpijcin. Jëb nyajtuunim co nijpcogapxiiyim huidibi ca' ytiy'ajtity, etz co n'ñhuijim ngapxhuijim. Jëb nyajtuunim co nyaj'ixpijcin nej jëb huaad tiy'ajt nbanicxim, ¹⁷ jigix yi jäy ajcxy huidibi mijpidacp Dios ytiy'ajt, jëb ni'ixi' y'idipy, tunipy tüg'óciy oybi huinma'ñ oybi tung.

4

¹ Ooy ycopicyity mido'mbic jada ayuc jadu'n nej cham ñich miich nijayiy. Dios etz ñich ajt nHuindzin Cristo Jesús tiy'ajt yejc co copicy jada ayuc. Cristo Jesús ytiydunamyb yi jäy ajcxy juugypí etz yi jäy ajcxy tiibi y'o'ccixy, e chi yajjugypigipy jadüg'oc ajcxy. Yi' yajtiydunamb ajcxy co anajty ymiñ ya naaxhuiñ pidäga'ñ y'ane'min. ² Nyajnibijcypy mgapxhuäcxip Dios y'ayuc ytiy'ajt hueñytimyminaajity, oy pin midoohua'ñ o camidoohua'ñ. Copicy co mijpcogapxihuiipy huidibi ca' ytiy'ajtity, capxhuij pin yinjaty huenjaty camadacp, ñhuij capxhuij yi jäy ajcxy miid Dios y'ayuc ytiy'ajt. Mimecxtuc etz yaj'ixpic yi jäy ajcxy. ³ Minip je xii je tiempo ma jäy ajcxy ca' cöbiga'ni oybi tiy'ajt. Nijëjity miid yci'mdzojcin miid yci'm-huinma'ñ ixtähuij ajcxy yhuindzin huidibi yaj'ixpigib nej ajcxy jäygidägy, oy ca' ytiy'ajtity. ⁴ Chi ajcxy anajty jipphuäctúuticixni camidoohua'angixni je Dios y'ayuc ytiy'ajt. Mijpidaacni anajty ajcxy ñigi yi ñigoobi'ayucity. ⁵ Miich huijy ycujc m'idipy. Mecxtujcta' nej jäy ajcxy xy'ixhuidity xypahuidity. Yajnima' jäy ajcxy Dios ytiy'ajt, jëb ajcxy mijpidägipy etz jothuimbidity ajcxy Dios. Yaj'ixpic Dios y'ayuc ytiy'ajt nej ypadyii.

⁶ Jadu'n miich cham njacnimäy, je' co ti yhuaad'ajtni je tiempo minaa ndzonaanich ya naaxhuiñ xyaj'ögaamich jäy, ti nayxoxiyiijich naydogyiijich miid Cristo Jesús ycxipi. ⁷ Ti ñich ooy mic nmihuindinay Dios y'ayuccapxhuäcxii ma anajty ypadyii. Ti nyajcixy nyajmayich je tung huidibi anajty xypatpich. Ooy ti nyajmij'atyich Cristo Jesús, ni ca' ti n'ixmajchich yi' y'ayuc ytiy'ajt. ⁸ Cham njipp'ijxypich co Cristo Jesús je tiydumbi tudägyipi xycömayipyich jii by tzajpjoty, miid co tiydudägy ti ndzinayich ti njugy'atyich.

Pablo pijctzoy may'ajt ma Timoteo co tzojc yminipy ma yi'

⁹ Tun may'ajt tzojc yminipy ma ñich. ¹⁰ Yi Demas ti ñich yam xycögueecni co yjactzojcpy yi mayñax xondaacin ya naaxhuiñ. Hue' ti ñicxy jim Tesalónica. Crescente nañ hue' ti ñicxni Galacia. Yi Tito ti ñicxy Dalmacia. ¹¹ Jëyi naydügpajc Lucas yam miid ñich. Co mminipy, miidminipy Marcos, com ooy ti xychachpubetyich ma Dios ytung. ¹² Yi Tíquico ti nguexyich jim Efeso. ¹³ Je jocxhuit huidibi nyajhui'miiyich jim Troas ma Carpo ytijc miminipy. Nañ jadu'n mimindähuiipy je necy. Je' ooy ytimycopicyity yi pergamino necy.

¹⁴ Alejandro je ca'tzpi ti yi' ooy mij xymidundigooyich. Yi nhuindzin'ajtim Dios paatip nej yajmidzogyii. ¹⁵ Naygüend'adii ca' miich yi' mmijyöybedipy, com ooy mic ti jippcogapxiy Dios y'ayuc huidibi ñich ajcxy nyaj'ixpijcpy.

¹⁶ Co yi' oga'n xyxiyich ma je mij tungmiidpi, naydüg ayuc nmihuindinaayich. Nipin xycapubejtyich, ñigi ajcxy xycögueectaayich. Huen Dios ocmeecxy nej ajcxy ti y'iditczixy. ¹⁷ Ca' y'ocnejity Dios ti xypubetyich ti xypudigiyich. Dios ti xyajjotmicpicyich, jigix ngapxhuäcxtähuibich ytiy'ajt ma tüg'óciy jäy. Jëb tüg'óciy jäy huidibi ca' yjudiojäyity huen mido'mbijctaaygixy Dios ytiy'ajt. Dios ti xyñihua'ñich ti xycohua'ñich ma yi' o'cin. ¹⁸ Yi Huindzin Dios yi' xyñihua'ñ xycohua'ñibich ma tüg'óciy jäy huidibi ajcxy jibic-huinma'ñ miid. Yi'xycuend'adipich, ca' ni ti xyjadipyich, cooni anajty njadyich jii by tzajpjoty ma y'ane'my. ¡Huen Dios cömay idipy janch huinixii huinitempo!

Pablo ymigügtijc capxpooxni yajniquexy

¹⁹ Yajnax ñich ngapxpooxni ma yi' Prisca etz ma Aquila etz ma Onesífero yjuugy ymigüg. ²⁰ Erasto ti je' yhui'my jim Corinto. Je Trófimo com pijcip anajty, ñich je' n'ixmajch

jim Mileto. ²¹ Tzojc mjatyminiꝑy ma ca'ni t̃chꝑy ymiini. Yquejxyp ajcxy capxpooꝑx̃in ma miich, je Eubulo, je Pudente, je Lino, je Claudia etz jacjadyii miꝑgũgtijc.

²² Huen je Huindz̃in Cristo Jesús xꝑubed̃iꝑy xꝑud̃ig̃ihuꝑy. Huen Dios tuñ may'ajt miid miich ajcxy. Amén. Jadu'n ngapxc̃iꝑyich.

TITO

Yi Necy Huidibi San Pablo Yajnigüejsx Tito

¹ Hich Pablo, Dios jada miid nduunich, Jesucristo xy'apóstol'ajtpich. Yi' ti xyquexyich ma yi jäy ajcxy huidibi Dios ti yhuin'ixyii, jigix ajcxy mibigipy yi' ytiy'ajt. Nañ nyajnimähuibich nej jëb ajcxy cuyduuni Dios ytiy'ajt. ² Jadu'n nduunich jigix co anajty y'o'ccixy, chi jadüg'oc yjugypíjccixipy e tzináaygixipy huinixii. Dios yajhuinhuaniy je jäy ajcxy je jugy'ajtin huinixiibi, ca'ni anajty naaxhuiñybi chondägy. Jada tiy'ajt jëb nmijpidaacim com Dios ca' yi' y'anüädägy. ³ Jada jugy'ajtin huidibi ijtp huinixii, Dios ti yajnejhuüy je jäy ajcxy cham co je tiempo ti yhuaad'ajtni, miid yi' y'ayuc huidibi ngapx-huäcxibich. Je Dios huidibi xyajnidzoocim ich ajt n'alma ti xyajnißicyich co yi' y'ayuc ngapxhuäcxpyich. ⁴ Miich Tito, cham nijayiy jadu'n nej jihuüy nijayiyich ngi'm'ung. Com tú'ciy nmij'ixim nmijpidaacim Dios. Huen Dios ich ajt nDeedy tzajpjtopy etz Cristo Jesús ich ajt nihuambi yajtzoocpi tuñ may'ajt oy'ajt miid miich, huen xypa'ayooy etz xyajjotcuyc'adipy.

Myajnißigipy yëdyjc huidibi jëb nigohuajc'aty ymigügtijc

⁵ Paady ich miich jim Creta ñaaxjot nyajhui'my, jigix mjacyajnißihuipy je migügtijc jadu'n nej ich ca' ti nyajni'ixiydäyich ajcxy. Tügpi cajp nidüg nidüg myajnißigipy yëdyjctijc huidibi nigop'adib nigohuajc'adib yi' mibijcpidijc, jadu'n nej ti nyajnimäy. ⁶ Yi' myajnißigipy yi' huidibi ca' ti tundigoy; huidibi tüg töxyjäy miid, ca'p ycanaagity; huidibi y'ung ajcxy ca' nijot'aty mayñaax tzinaayin; huidibi y'ung ajcxy ycapxymidooyb. ⁷ Copicy huidibi nigohuajc'adamb yi' mibijcpidijc huen jäy'aty tiydudägy, ca' huaad ti tundigoy; huen yajxon cuend'adipy huidibi Dios yje'ajtpy; jäy huidibi ca' ycöjuuñity; huidibi ca' yhuindzipity; huidibi ca' y'amügity; huidibi ca' chip'ixtäy; huidibi ca' y'adzocy. ⁸ Yi' jëbi myajnißigipy huidibi oyjäy'ajtin tuñ miid hueñyitimypinity; huidibi ooy y'amigügit; huidibi huijycujc; huidibi tiydudägy yhuinma'ñ; huidibi huindzigüß Dios; huidibi ci'm yajxon naygüend'ajtip. ⁹ Huen cixyot huinijot naybidáacigixy ma je ayuc tiy'ajt huidibi ti ixpijccixy, jigix jëbi ajcxy jot'amijmöhuiipy jacjadyii jäy ajcxy miid tiy'ajt janchypi, e capxjotcidägy ajcxy je pin ajcxy ca' ixa'ñ Dios y'ayuc.

¹⁰ Com ji may judíojäy huidibi ca' ycapxymidoogixy, huidibi nigoobi tijaty ayuc tzachnimiydacp; huidibi ajcxy huin'imb ymigügtijc, jadu'n nej yi' ajcxy huidibi minamb co copicy tüg'óciy mibijcp; huen yajtiy'ajtiy ymang ajcxy, jadu'n nej judíojäy tungixy.

¹¹ Copicy co mgapx'adugipy yi' ajcxy huidibi ymigügtijc yajco'innyb tüg jñn tüg tijc; huidibi ajcxy yaj'ixpijcp mujuy; huidibi ca' tiy'ajt yaj'ixpijccixy.

¹² Nidüg yi' ajcxy cohunma'ñybi nigapxy ymigügtijc ymina'ñ co yi' Creta jäy ooy ajcxy y'anijity, ooy ajcxy huinducity, ooy ajcxy ñuuxity, ooy ajcxy ycaaxity. ¹³ Tiy'ajt jadu'n nej jada cohunma'ñyjäy ymina'ñ. Yaj'oj ajcxy mictägy, huen huinjihuuygixy yajxon Dios y'ayuc. ¹⁴ Ca'p ajcxy mijpidaacipy yi' judíojäy ycostumbre etz ni ca' ajcxy mijpidaacip yi' y'ane'min huidibi jäy ci'm ti nihuinma'ñ'aty, huidibi ajcxy ti jippyöyduutni Dios y'ayuc ytiy'ajt.

¹⁵ Pin jäy huädz yjot yhuinma'ñ miid, oy ti jacuyduñ costumbre, o oy ca' ti cuyduñ, Dios yjäygidacpy yi' co oyjot oyhuinma'ñ miidity. Pin jäy ca' huädz yjot yhuinma'ñ miidity, oy ti jacuyduñ costumbre, Dios ca' jäygidägy yi' com jibic ajcxy yjot yhuinma'ñ miidity, ca' ajcxy nej ñayjihuiyigixy. ¹⁶ Yi' jadu'mbi jäy hue' ñaybidáacigixy jadu'n nej jihuüy nej ooy Dios ytiy'ajt ajcxy mijpidaaci, chi ma huidibi ajcxy ytumyb ji yajnigüex'ccixy co ca' ajcxy cuydungixy Dios ytiy'ajt. Dios ca' yi' oy iix ajcxy yhuinma'ñ, ca' ajcxy capxymidoogixy Dios, ca' ajcxy Dios ytung mihuaadity.

2

Nej jëb huaad chinaaygixy yjugy'ajtcixy

¹ Miich huädz myaj'ixpigipy yi migügtijc nej jëb huaad cuydungixy Dios ytiy'ajt. ² Miich m'ihuijip mgapxhuijip yi mijjäydijc huen ca' ajcxy y'amügyjäy'adipy; huen huijycujc jäy'ajtcixy; huen müd'ajtcixy oyjot oyhuinma'n; huen mijpidaaccixy Dios ytiy'ajt cixyot huinjot; huen oyjäy 'ajtin tungixy müd huentimypinjäyity; huen ajcxy mecxtujcin yajtungixy ma yi chinaayin. ³ Nañytimjadu'n mijjäydijc ajcxy töxyjäybi huen ajcxy jadu'n jäy'ajtcixy nej huidibi ajcxy Dios yajmij'ajtp; ca'p ajcxy ymigügtijc nigapxip ni'ojihuiy, ni ca' ajcxy nihuambedipy; nañ ni ca' ajcxy y'amügyjäy'adipy; huen ymigügtijc ihuijicixy capxhuijicixy müd ayuc oybi tudägy. ⁴⁻⁵ Yi mijjäydijc ajcxy töxyjäybi huen ihuijicixy capxhuijicixy yi mutz'anäg töxyjäydijc ajcxy nej jëb huaad chinaaygixy yjugy'ajtcixy; nej jëb huaad ytijc näy yajmij'ajtcixy; nej jëb huaad tzojccixy jihuiygixy y'ung y'anäg; nej jëb huaad oyjot oyhuinma'n yajtungixy. Ihuij capxhuij yi töxyjäy mutz'anäcpi co huen tiydudägy chinaaygixy, ca' ti jibic-huinma'n ajcxy mibidzimipy. Huen ihuij capxyhuij ajcxy nej jëb huaad yjin ytijc cuend'ajtcixy yajxon; nej jëbi y'amigüg'ajtcixy, nej jëb huaad capxymidoogixy näy. Pen jibic-huinma'n anajty ajcxy ytumyb, chi anajty Dios ytiy'ajt yajnigapxy yajni'ojiy.

⁶ Miich Tito, nañ jadu'n jaty ihuij jaty capxhuij yujcyecpidijc etz anäctijc nej jëb huaad oyjot oyhuinma'n yajtungixy, ca' huaad ytundigooygixy ycapxtigooygixy. ⁷ Tito, tiydudägy mdzinähuipy, oyjot oyhuinma'n myajtunipy. Jim yi migügtijc ijxpejt pigipy ma miich, nej jëb huaad ytungixy. Huädz ajcxy myaj'ixpigipy yi tiy'ajt, huijycujc m'idipy. ⁸ Tito, m'ihuijip mgapxhuijip yi migügtijc müd oy'ayuc oyhuinma'n, jigix co pinjäy jipcogapxihuaanip miich m'ayuc, chi tzo'ydu'n jihuihua'n, e jadu'n ca' jadipy nej jibic xyñigäpxcixipy xyñi'ojiygixipy.

⁹⁻¹⁰ Je tumbidijc huidibi ijtp cojuyiy codoogy, huen yhuindzin imidoogixy capxymidoogixy nej ypadyii. Huen tungixy nej huaad yhuindzin jäygidägy, ca' adzo'nmay yjäy'adipy. Ca' meedzip tijaty yhuindzin yjé'ajtpy, huen yajmij'adipy yajxon yhuindzin, huen yajxon ytung tundaayi. Pen jadu'n ajcxy yhuindzin midungixy yajxon, huin'it cömay y'idipy yi Dios ytiy'ajt, je Dios huidibi xyajnüdzoocim ajt n'alma.

¹¹ Cham n'ijxim nnejhuuyim nej Dios may'ajt ti tuñ müd tüg'óciy jäy ajcxy ycixpi, co ti yaj'oyiy nej jëb huaad hueñypinity pinjaty mijpidaacip yi' y'ayuc, ypadamyb ajcxy y'alma nüdzoocin co anajty y'o'ccixy. ¹² Dios cham ti xyajnejhuuyim pen tzögamb ich ajt n'alma, chojcpy co n'ixmajtzim je jibic-huinma'n huidibi Dios ca' jäygidägy. Ca' huaad ooy nijot'ajtim yi mayñaxpi tzinaayin ma jadachambi xi tiempo yjacyo. Copicy ndzinaayim huijycujc etz tudägy, e nguydunim Dios y'ayuc ytiy'ajt. ¹³ Njijp'ijxim mina Jesucristo, je huidibi xy'ane'mdaayim, ymiina'n ya naaxhuiñ jadüg'oc müd ich ajt ycixpi. Njotcuguyim ich ajt co n'ijxim ymiiñ müd y'oy'ajtin ymic'ajtin, yi Dios huidibi yajnüdzoogam ich ajt n'alma. ¹⁴ Yi Cristo Jesús ti ñayoxyii ti ñaydoogyii co y'o'cy ma yi cruudz müd ich ajt ycixpi. Yi' ti xyjuybidzimim ma anajty yi mujcu' ci'am xymiid'ajtim, co anajty ti nbocytuunim. Yi' ti xyajpocyñihuätztaayim nidüg'óciy, jigix Dios xyjäy'ajtimip müd huädz jot huädz huinma'n, jëb nduunim oyjäy'ajtin cixyot huinjot.

¹⁵ Tito, jada tiy'ajt migügtijc myajnimaydähuipy. M'ihuijip mgapxhuijip ajcxy yajxon. Dios ti xymöy cötujcin co m'ojipy pinjaty xycacapxmidoob, jëb ajcxy yi m'ane'min xyajmij'ajtip.

3

Huen mijnicxpejtcixy yi gobierno ytungmüdp

¹ M'ihuijip mgapxhuijip yi migügtijc huen capxymidoogixy yi gobierno ytungmüdp etz cajpjäy ytungmüdp. Huen capxymidoogixy jadu'n nej y'ane'myii ajcxy. Huen

tungixy huidibi tiydudägyip huidibi ajcxy yaj'ane'mip. ² M'ihuijip mgapxhuijip yi migügtijc ajcxy ca'p ajcxy ni pin nigapx ni'ojihui, nañ ni ca' tzipcapxy ajcxy ixtähui, huen ñaybidáacigixy amigüg, huen mimecxtujctaaygixy yi ymigügtijc ajcxy, huen nicy xyeemy jäy'ajtcixy müid yi mayjäy ajcxy.

³ Jecy'ajty ma ca'ni anajty nmijpidaacim Cristo Jesús, hue' anajty nyajpaatim müid jibic-huinma'ñ. Ca' anajty n'imidoohuim ngapxmidoohuim. Je mujcu' anajty ti xyhuin'ñnim, paady anajty nniidigooyim ndüdigoooyim. Ndzachnijot'ajtim mayñaxpi tzinaayin, ni ngajajtim anajty nej n'ixmajtzim yi jadu'mbi huinma'ñ. Jibic-huinma'ñ nduunim. Jadu'n njäy'ajtim nijot anajty n'iditizim, nga'oy'ixim anajty nmigügtijc. Paady jäy anajty xymüiddziptzoonim, chi naymijotma'tcootim miñ xyipy. ⁴ Jadu'n anajty nduunim ixti cooni Cristo Jesús ñayguëxiigyb ya naaxhuiñ, etz nnejhuüyim jadu'n nej Dios ñch ajt nihuambi yajtzoocpi may'ajt oy'ajt ti tuñ müid tüg'óciy jäy ajcxy ycixpi. ⁵ Yi xyajnidzoocim ajt n'alma canan co ñch ajt ndzach'oyjäyity. Hue' je' jadu'n ti tuñ müid co pa'ayo'n ti yajtuñ müid ñch ajt ycixpi. Ninigoob ti tuñ may'ajt oy'ajt müid ñch ajt ycixpi. Chi yaj'oyüñi ajt njot nhuinma'ñ huinjemy müid je Espíritu Santo huidibi xyajtigüym njot nhuinma'ñ, e jadu'n ajt njugy'ajtin ndzinaayin chondaacni huinjemy. ⁶ Dios ti yecy yi Espíritu Santo janch mijcajee ma ñch ajt njot nhuinma'ñ. Jadu'n Jesucristo xytuunim, je huidi ñch ajt nihuaanim yajtzoocim. ⁷ Yi ti xyaj'ahuimbijtim tudägy müid je may'ajtin oy'ajtin huidibi ti tuñ co yi' ti y'ögy müid ñch ajt ycixpi. Jëyi cham y'oy'ahuijxnity mina anajty nbadaanim je jugy'ajtin huidibi Dios müid huidibi ca' ycixipy ni mina xii.

⁸ Jada ayuc jada tiy'ajt ndzojcpyich co müich mnigapxpedipy. Ooy ycopicyity co yi' ajcxy huidibi mijpidacp Dios huen oyjäy'ajtin tungixyp. Ooy y'oyity co oyjäy'ajtin tungixyp ajcxy. Yjäygidägyipy yi jäy ajcxy müid je oyjäy'ajtin huidibi anajty ajcxy ytumyb etz ypaadipy ajcxy oy'ajt. ⁹ Ixmatz yi jäy ajcxy huidibi nigapxy nimiydägy yi nigoobi'ayucity, yi huidibi ca' choobaady. Nañ jadu'n yi' ajcxy huidibi nigapxp nimiydacp huidibi ñi'ap'ajtpy ñideedy'ajtpy. Ca' mijjptigiyihuiipy yi tzip capxy ma yi judiojäy ycötujcin huidibi ajcxy ypanicxyp. Yi jadu'mbi tzip capxy ninigoob yi', ca' yi' ni ma choobaady, ca' jugy'ajt müidity.

¹⁰ Yi jadu'mbi jäy huidibi tzip capxy ixtaayb, müid tüg'oc mejtz'oc myaj'ojipy pen ca' ycapxcöbicy, tim ix'oj, huen nicxy. ¹¹ Mnejhuüyb co yi' jadu'mbi jäy ajcxy ti ixmajtzicixy je tiy'ajt, tundigooyb yi' ajcxy, ci'm jadu'n naysajpocycähuiyigixy.

Pablo nimay Tito co müid naybadaanip

¹² Nyajnigüexipich nidüg, aver huidibi ñch anajty n'ocquejxyp yi Artemas o yi Tíquico. Co yi' jim yjadipy, chi müich xyjatyñiminipyich mic'amy jim Nicópolis com jim nyaj-naxa'ñich yi tich poj tiempo. ¹³ Co yi' Zenas, yi huingapxpi, etz Apolo ajcxy jim yjadipy, quejxnajxcix müich yi', e mooygixy ytu'amgixpi ca'ydi ti yajmayajtcixy tü'am. ¹⁴ Huen yi nmigügtijc'ajt ixpijccixy nej jäy y'oyjäy'aty, huen pubejtcixy pin tijaty yajmayajtp. Pen ca' jadu'n tungixy, Dios ca' yi' jäygidacip yi' ajcxy yhuinma'ñ.

Pablo ycapxycixy müid Tito

¹⁵ Yi migügtijc ajcxy huidibi ya yquejxyp ajcxy capxpooocxin ma müich. Nquejxpich ngapxpocxin ma tüg'óciy yi nmigügtijc ajt huidijaty jim yajmij'ajtp Cristo Jesús. Huen Dios mij may'ajt tunip müid müich ajcxy ycixpi. Amén. Jadu'ñyi ngapxcixyich.

FILEMÓN

Yi Necy Huidibi San Pablo Yajniguejx Filemón

¹ Hich Pablo etz Timoteo, ich ajt nmigüg, nijayiybich miich Filemón huidibi ooy ndzocyich, huidibi quipxyi müd nduunim. Nmach'iñäyich müd co nyajmij'atyich Cristo Jesús. ² Nañ jadu'n nijayiybich yi Apía, ich ajt nmigüg töxyjäybi, etz yi Arquipo, huidibi capxhuäcx Dios y'ayuc tú'ciy müd ich ajcxy, etz tüg'óciy yi migügtijc huidibi naymújciigixp ma miich mdijc Dios ojadajtcixy. ³ Huen Dios Teedy etz yi Huindzin Jesucristo tuñ may'ajt oy'ajt ma miich ajcxy etz xyajjotcugíyigixipy.

Pablo capxpaady Filemón co mijpidägy Dios

⁴ Nyajnajxpyich Dioscojuyip ma Dios müd miich ajcxy ycixpi. Njatyimjäymejtzcipich miich ajcxy jabom jabom co Dios nmibijctzooyich. ⁵ Ti ich ayuc nmidoj jadu'n nej miich mdzocy mjihuüy yi Huindzin Jesús etz tüg'óciy pinjaty yajmij'ajtp Jesús. ⁶ Nañ jadu'n nmibijctzooybich Dios müd miich ajcxy ycixpi, huen oyjäy'ajtin mdunipy müd je migügtijc, jadu'n nej Dios ti xyajnejhuüy yi tiy'ajt jigix ajcxy tiy'ajt paadipy ma miich nej jeb ajcxy cuyduñ Cristo y'ayuc. ⁷ Hermano, ti ich ooy njotcugíyich müd yi m'oyjäy'ajtin huidibi miich mdumyb co ti mbubety yi Dios yjäy.

Pablo pijctzoy tüg may'ajt ma Filemón müd Onésimo ycixpi

⁸⁻⁹ Njapijctzoohuamybich tüg may'ajt ma miich. Oy njamüdyich cötujcin huidibi Jesús xymooyich jeb nja'ane'my co miich mgöbigipy Onésimo oy'amy. Per ca' jadu'n n'ane'mañ müd co ooy ndzocy ooy njihuüyich miich. Paady cham may'ajt nbijctzooyich ma miich co mgöbigipy yi Onésimo oy'amy. Hich Pablo, ti nmijjäyñich. Cham jäy ti xpidägyich pujxtigoty müd co ngapxhuäcxich Jesús y'ayuc ytiy'ajt. ¹⁰ Cham may'ajt nbijctzooyich ma miich co mba'ayoohuipy yi Onésimo. Jadu'n njihuüyich nej n'ung'adyiijich müd co yi' ti mijpidägy Jesús ya ma ich nbujxtijc'iñäyich co ti nyajnimäyich Dios y'ayuc.

¹¹ Tiibi xii tiempo ñaxy co yi Onésimo ca' yi' ti xy'imidoy ti xycapxymidoj. Jadachambi janchtiy capxymidoohuam jadu'n ma miich etz jadu'n ma ich. ¹² Cham nyajnigüexy Onésimo. Ooy njajihuüyich co yam nguexyich. ¹³ Ooy ich yam njayaj'ida'ñich ma ich jigix ixipy yam xymüdtuñich. Ytimyñipaapty ixipy jadu'n nej miich xymüdtuñich ma yam nbujxtijc'iñäyich müd co ngapxhuäcxich je jemybi oybi ayuc nej Jesucristo yjaty ayooy. ¹⁴ Per ca' ich n'a'ixiyich nicxy nyajhu'i'myich, pen ca' miich jadu'n mina'ñ. Ca'p ndzocyich adzip ahua'ñ tijaty miich mdunipy. Jeyi ndzocyich co miich oy'amy xypubedipyich. ¹⁵ Ca' yjeyity paady ycixpi ti xycöguëgy jebi mijpidägy Jesús. Hueeni xii tiempo ti y'ity ya, e cham co yhuimbidipy ma miich, müd y'idipy jim huinixii. ¹⁶ Ca' jadu'n m'ocmüd'ajtnip cham jadu'n nej jac'oyñipin cojuyiy codoogiy tumbi. Hue' je' mmü'adip jadu'n nej Jesús yjäy huidibi ooy mdzocy mjihuüy. Pues ooy ich yi' ndzocy njihuüyich. Jac nigü cham miich mdzogipy mjihuüipy müd co yi' cham y'oyjäyity, etz co cham mijpidägy yi Huindzin Jesús.

¹⁷ Pen janch miich xymigüg'adyiijich cöbic yi Onésimo jadu'n nej ich miich ixipy xycöbicyich. ¹⁸ Pen ti yi' yinjaty huenjaty xymidundigoy o xyminucx'adyii ich miich nmigüedipy. ¹⁹ Hich Pablo, ich miich njaaybich nfirmajiyich müdich ngi'mgi' ngi'mletra. Hermano, nmigüedipyich nej Onésimo xyminucx'adyii. Oy ich yam ca' n'übaady ngapxpaady co miich xyminucx'adyiijich müd co Dios ytiy'ajt ti mbaady ma ich. ²⁰ Xypubedipich müd Onésimo. Yi nHuindzin'ajtim Jesús yjäygidägyipen jadu'n mduñ. Mdunipy may'ajt müd Onésimo müd Jesús ycixpi, e jadu'n ich jeb huaad njotcujc'atyich.

²¹ Nnejhuñybich co ooy m'ñimidoy mgapxmidoy, e jadu'n nej yam njacnijayïy, jac'anaxy mduna'ñ. ²² Nañ jadu'n yam ñimäy. Tun may'ajt ni'ixï tüg jättac. Njijp'ijxypich co nbujxtijcpidzimipyich tzojc mïid co miich ajcxy Dios mibijctzoogixy mïid ñich ycixpi, e jadu'n jëbi ñicxibich ma miich.

Pablo ycapxycíjxy mïd Filemón

²³ Nañ nbidacpyich necyjoty yam. Xycapxpooxcp Epafrañ ñich nmibujxtijc jäy mïd Cristo Jesús ycixpi. ²⁴ Nañ xycapxpoox Marcos, Aristarco, Demas etz Lucas. ñich yï' ajcxy xypubejtp ya. ²⁵ Huen yï nHuindzin'ajtim Jesucristo may'ajt oy'ajt tunipy ma miich ajcxy, jëb miich ajcxy oy m'ity. Amén. Jadu'n ngapxcíxyich.

HEBREOS

Yi Necy Huidi Pinjaty Yajniejx Je Hebreo jäy

¹ Jecy'ajty Dios ayuc yejcy ma ajt nmij'ap nmijteedy canaag'oc etz canaagnax müd je yprofetas ajcxy, je' ajcxy huidibi najtzcaxiij Dios y'ayuc. ² E jadachambi ma xii tiempo yhuingooni co je naaxhuiñybi ycixani, Dios ayuc yecy ma ich ajt müd je' y'ung. Dios müd y'ung yaj'oyiij je naaxhuiñybi etz tüg'óciy tijaty huidibi yajpatp. E Dios ti y'ung yajmigo'ixmadziydäy tüg'óciy. ³ Dios y'ung ymüd Dios y'oy'ájtín, yi' je' Dios ytücxin'ajtpy yjajin'ajtpy. Yi' je' codinaayb etz yajniegüexigy nej je' je Dios. Dios y'ung huijtz'ijtaayb tüg'óciy müd je' y'ayuc etz ane'min mic'ajt müdpi. Co Dios y'ung ti xyajhuaatzim ajt nbocy, chi cöbijcy je mij'ane'min jiiyby tzajpjoty, jadu'n nej jihuüy y'ixtacy a'oy'amy ma je mijpi Dios ymijc jiiyby tzajpjoty.

Dios y'ung jacmij yi'ca'ydi ángeles ajcxy

⁴ Je Dios y'ung jac mij je' ymic'ajt y'ane'min müdity, ca'ydi je ángeles ajcxy. Com yi' je' Dios y'ung, paady ycixpi mic'ajt müdity jaydëbi ane'my huidibi Dios yje'ajtpy, e ca'ydi yi' ángeles ajcxy yi' jadu'mbi mic'ajt müd. ⁵ Com Dios ca' yi' ni tüg ángel nimay:

Ich miich n'ung'ajtpy. Ich miich ti nyajpi'c'aty jadachambi xii.

Nañ jadu'n ca' Dios ni tüg ángel nimay:

Miich xyteedy'adübiich, ich miich n'ung'adüyb.

⁶ Co Dios y'ungoob oy quexy ma naaxhuiñyjäy chinäy, chi yi' ane'min pidacy:

Huen je ángeles ajcxy nidüg'óciy huindzigihuipy pa'tjihuihuipy je' y'ung.

⁷ E müd je ángeles ycixpi, Dios ymina'n:

Yi ángeles jadu'n yi' ajcxy nej poj. Yi' ajcxy huidibi tzajpjoty tzinaayb, jadu'n yi'ajcxy nej huidzuc, nej jiiñye'n.

⁸ Jadu'n Dios ymina'n müd y'ung ycixpi:

Miich, Dios'ajtp, miich m'ane'min huinixii huinítiempo yi' y'idipy. Müd mdudägy'ajtin miich m'ane'mipy.

⁹ Ti mdzocy je tiy'ajt tiybi, e ca' ti m'ixa'n je jibicpi. Paady ycixpi Dios, miich mDios, ti xyhuin'ixy, e ti yejctäy nigí ma miich je jotcuyc'ajtin je xondaacin, ca'ydi ma yi' mmi'ane'mbidijc.

¹⁰ Dios nañ jadu'n ymina'n:

Miich, Huindzin Dios, oga'n'aty mbidac nej naaxhuiñybi chondacy, e müd miich mmic'ajt myaj'oyiij je tzajp.

¹¹ Cijxtähuip yi' naaxhuiñybi etz yi' tzajp, per miich hui'mip huinixii huinítiempo. Jadu'n yi' naaxhuiñybi etz yi' tzajp y'amijiydähuipy nej huit.

¹² Jadu'n miich yi' naaxhuiñybi etz yi' tzajp m'anëgipy nej tüg huit yaj'anëgyin. Jadu'n miich yi' naaxhuiñybi etz yi' tzajp myajtigadzipy nej jäy ajcxy yajtigach yhuít. Chi miich je'ni m'idipy, je mxii mjimijt ni mina ycacixipy ycatigoyipy.

¹³ Ni camina Dios canimay ni tüg je ángeles ajcxy:

ña' ma ich nmijc a'oy'amy, ixti mabaad ich miich je mmidzip nmimadactäyich, jadu'n yi'ajcxy nipaadipy nej yi' miich mddecypocxpejt'adyii.

¹⁴ Tüg'óciy je ángeles ajcxy ac espíritu yi' ajcxy, e ytungixy ma Dios, yquexyöyigixy jigix pubedipy je jäy ajcxy huidibi ajcxy y'alma padam ñidzoocin.

2

Ca' n'ijxnajx nmidonajxim nigoo yi' pocyhuinmeecxin

¹ M̄id jadayaabi t̄iy'ajt yc̄ixpi, oy co yajxon n'ocj̄äyuḡīȳim Dios yt̄iy'ajt huīdibī ti nm̄idoohuim, jiḡix ca' nj̄ijpȳöyduutim je Dios yt̄iy'ajt huīdibī jadu'n nipatp nej t̄ü'aa oybi. ² Pen je ayuc t̄iy'ajt huīdibī ángeles ajcxy yejc jecy'ajty, hui'm je' co yjanchity. E pinjaty pocyumb, e ca' cuyduuni Dios yt̄iy'ajt, Dios chaachytunipy je' nej padyii m̄id ypocy yc̄ixpi. ³ ¿Nej t̄ijy ñch ajt co Dios ycastigo nga'ocpaatim, pen je' je' yam ca' nm̄ijp̄idaacim je Dios yt̄iy'ajt jadu'n nej j̄ebī xyajnidzoocim ajt n'alma? Yī Huindzin Jesús jayijp'aty ci'm nigapxy Dios yt̄iy'ajt jadu'n nej j̄ebī Dios xyajnidzoocim ajt n'alma. E jac'axam je discípulos ajcxy nañ jadu'n najtzcax̄iy Jesús y'ayuc, e nigapxpejty ajcxy co yjanchity je Jesús y'ayuc, e chi capxnajxy ajcxy jada t̄iy'ajt ma ñch ajt. ⁴ Jadu'n anajty capxhuäcxcixy Jesús y'ayuc ma ñch ajt, chi Dios yajniguëx̄icp Jesús y'ayuc co yjanchity co tuñ ijxpejt, mijhuinma'ñ etz milagro. E co Dios xymooyim je yjihui'ñ ymic'ajt, chi nije' nije' nbaatim mic'ajt ma Dios. E jadu'n Dios tuñ nej yi' tzocy.

Jesucristo jadu'n je' anajty nej ajcxy yjuugy ym̄igǖg

⁵ Dios ca' yi' ángeles ajcxy ti c̄otujcin möy co y'ane'mity ya naaxhuiñ, jadu'n nej x̄ii tiempo min cidägy, je x̄ii je tiempo huīdibī ñch ajt nnimiydaacim. ⁶ Hue' janchity ji t̄üg'ti yjaybetyity ma Dios ñecy, ma ym̄ina'ñ:

Miich Dios, ¿ti yi' je naaxhuiñj̄äy, co miich yi' ajcxy mj̄äymedz̄iyb? ¿Ti yi' je naaxhuiñj̄äy, co miich je' ajcxy mjotmay'adyii?

⁷ Janch con x̄ii tiempo miich ti mm̄öy yi' naaxhuiñj̄äy ajcxy e nañ ti mm̄öy jacminacy ymic'ajt y'ane'm'ajt ca'ydi yi' ángeles ajcxy. Per jac'axam miich mm̄öhua'ñ naaxhuiñj̄äy ajcxy ñgi ymic'ajt y'ane'm'ajt, ca'ydi je ángeles ajcxy. T̄üg'óc̄iy huīdijaty miich ti myaj'oȳiy anajty ti mb̄idact̄ahuip yi' ma yi' naaxhuiñj̄äy ajcxy ane'm̄in.

⁸ E co anajty ti mb̄idact̄äy anajty ma yi' ajcxy y'ane'm̄in, jadu'n nipaady nej jihuiy t̄üg'óc̄iy tijaty huīdibī ti myaj'oȳiy, y'idipy ma yi' ajcxy ytecpa't.

E jadu'n yi', co Dios moyday ane'm̄in je Cristo. Dios ni ti yi' ca'ixmach nicxy yca'ity ma yi' y'ane'm̄in. Oy ixyp̄y ca'ni cham n'ijxim co t̄üg'óc̄iy tijaty ya naaxhuiñ etz tzajpjoty ca'ni amugi' ycapxyc̄öbigyii. ⁹ Dios ti xyaj'ijxim co Jesús m̄id mij'ajt ane'm'ajt. Je ángeles ajcxy ñgi mic'ajt oy'ajt anajty m̄idity, ca'ydi Jesús co yi' chinay ya naaxhuiñ. Jadu'n Dios tuñ jayd̄ebī Jesús y'ögy m̄id j̄äy ajcxy ypocy yc̄ixpi. Jadachambi Dios ti möy Jesús mij oy'ajtin, etz mij ooy ti c̄ömay m̄id je tzaachy'o'cin huīdibī ypaat.

¹⁰ T̄üg'óc̄iy huīdijaty ya yajpatp, ji'ajtp yi' m̄id Dios yc̄ixpi etz Dios ymic'ajt yaj'ijtaayb t̄üg'óc̄iy huīdibī ji'ajtp. Dios tudägy ytuuñ co yajca'pxi Jesucristo y'oy'ajtin m̄id je tzaachyp̄i huīdibī ti minaxy ti yajnaxy. M̄id co Jesucristo tzaachyp̄i ti minaxy ti yajnaxy, paady yc̄ixp j̄äy ajcxy padaangixy Cristo y'oy'ajtin. ¹¹ M̄id co Jesucristo, je huīdibī j̄äy ajcxy yajpocyñ̄huaatzp, jiīby mic'ajt ti paady ma Dios Teedy, paady yc̄ixp yi' ajcxy huīdibī patc̄ixp pocyñ̄huaatzin nañ jim mic'ajt patc̄ixy ma Dios Teedy. E m̄id co Jesucristo etz yi' yj̄äy mic'ajt patc̄ixy ma Dios Teedy, paady yc̄ixp Dios y'ung je Jesucristo ca' ti tzo'ydu'n jihuiy co yi' ym̄ina'ñ co je m̄ibijcp̄id̄ijc jadu'n nipaady nej yi' yjugyt̄ijc ym̄igǖgt̄ijc. ¹² Paady je Cristo ym̄ina'ñ ma yjaybetyity:

Miich Dios, ñch miich ngapxpad̄ipyich ma nm̄igǖgt̄ijc̄ich. N'ñhuipyich iy m̄id miich yc̄ixpi ma je j̄äy ajcxy ti n̄ayyöym̄j̄c̄igixy.

¹³ Nañ jadu'n Cristo ym̄ina'ñ ma yjaybetyity:

Nm̄ijp̄id̄äḡibyich Dios.

E jadüg'oc ym̄inaanip:

Cha ñch, m̄id je ung anäg ajcxy t̄ibī Dios xym̄öyich.

¹⁴ Ma j̄äy ajcxy yt̄ügquëx'ajtcixy, t̄ügpī yxiixy, t̄ügpī ni'py je' ajcxy. Nañ jadu'n Jesús ym̄id je' anajty yxiixy ñi'py jadu'n nej j̄äy ajcxy ym̄idity jiḡix j̄ebī y'ögy, e jadu'n je' yajhuindigoyd̄ahuipy je huīdibī anajty jamic'ajtm̄id co j̄äy yaj'öḡiyb, je' je' je' mujcu'.

¹⁵ E jadu'n je Cristo yajnihuädz̄ictuty t̄üg'óc̄iy pinjaty anajty cojuȳiy codooḡiy y'ijtp ma je

mujcu', m̄id co tziḡiygixy yī y'o'cin. ¹⁶ Janch co Jesús ymiiñ ya naaxhuiñ, ca' nm̄inaanim co pubeda'ñ je ángeles ajcxy, je' janchtiy ypubedamyb Abraham y'ap y'oc. ¹⁷ E m̄id jada ycixpi, Jesucristo jadu'n anajty m̄idity ñin̄icx etz yjugy'ajtin tú'ciy m̄id je jugytijc ym̄igügtijc nin̄icx etz jugy'ajtin, jigix jēbi yī' naydügpaic codināy naaxhuiñyāy ajcxy ma Dios yhuinduu m̄id tudāgy'ajt etz pa'ayoohuin. Etz nañ jadu'n jigix jēbi huindziḡiy Dios m̄id yci'm ñin̄icx m̄id jāy ajcxy ypocy ycixpi, e jadu'n yajpocyhuaatztāhuip yī mayjāy ajcxy. ¹⁸ Com Jesucristo ci'm tzaachypī minajx yajnajx, etz nañ jadu'n je mujcu' Jesucristo jot'ijxy huinma'ñ'ijxy, paady ycixp Jesucristo jēbi pubety pinjaty jadu'n tzaachypī minajxp yajnajxp, etz ma yjot'ixyīi yhuinma'ñ'ixyīi je mujcu'.

3

Jesús jacn̄igī mijity yī' ca'ydī Moisés

¹ M̄id co Jesucristo jadu'n ti tuñ, paady ycixp miich ajcxy m̄igügtijc huīdibi cixyjot huīnijot mijpidacp Jesucristo, je huīdibi ajcxy Dios ti xyhuin'ijxcixy co xyje'adāanigixy. Pidaaccix mhuinma'ñ yajxon ma je Cristo Jesús, je huīdibi nejhuiyīm co Dios ti quexy ya naaxhuiñ, je huīdibi tūgpajc mijtungm̄id ma Dios, huīdibi tūgpajc xycodinaayīm ma Dios. ² Jesús tudāgy yī' ti y'ity ma Dios yhuinduu, je Dios huīdibi ti yajñibigyīi je mijtung, tim jadu'n nej Moisés y'ijty tudāgy ma je ytung m̄id tūg'ócīy jāy huīdibi anajty ti cōbijccixy Dios ycōtujcin ma Moisés. ³ Jesús ym̄ihuaad n̄igī huīndziḡi'ñ etz cōmayin, ca'ydī Moisés. Tim jadu'n nej pin tūg tijcojpi je' je' ijtp cōmay, ca' nm̄inaanim je tijc ijtp cōmay. ⁴ Tūg tūg tijc jim je' pin cojp. Per Dios yī' ti yajcojtāy yaj'oyīydāy tūg'ócīy huīdibi jī'ajtp. ⁵ E jadu'n je Moisés tudāgy je' ytuuñ m̄id tūg'ócīy jāy huīdibi ti paady Dios ycōtujcin ma yī'. Je Moisés je' ytung'ajti yeycy je tiy'ajt huīdibi anajty Dios jac'axam yegamyb. ⁶ Je Cristo tudāgy ytuñ m̄id tūg'ócīy iich ajt huīdibi mijpidacp Dios, tim jadu'n nej tūg jāy y'ung tudāgy ytuñ ma yteedy ytijc yteedy ypidāgy. Jadu'n iich ajt nbaady nej Dios ytijc, e Cristo tudāgy ytuñ m̄id iich ajt, pen tudāgy nm̄ibijcim Dios y'ayuc, ca' n'ixmajtzim ajt nm̄ibijcin. Pen nm̄ijpidaacim Dios agujc jotcujc ixti mabaad n'o'cim m̄id je' ycixpi huīdibi n̄ijp'ijxim ma Dios.

Dios yjāy ajcxy ypoox̄in

⁷ Paady ycixp jadu'n yjaybetyity ma Dios ñecy ma je Espíritu Santo jadu'n ym̄inañ: Jadachambi pen m̄idooyb miich ajcxy nej Dios ym̄ina'ñ, ⁸ ca' ajcxy m'ijtcixy jotjuuñ jadu'n nej je' anajty ajcxy jotjuuñ y'ity, je' ajcxy huīdibi m̄ibid̄igy Dios jecy'ajt (co ajcxy y'ijty jim mijtiḡiduum). Je x̄i je tiempo jecy'ajty co ajcxy jot'ijxy huinma'ñ'ijxy Dios. ⁹ Chi Dios ym̄ina'ñ: Miich ajcxy mm̄ij'ap mm̄ijteedy ajcxy jim mijtiḡiduum xyjot'ijx xyhuinma'ñy'ijxich ajcxy jecy'ajty. Ca' ajcxy jāymech co ajcxy y'ijxy anajty canaag mijhuinma'ñ huīdibi ndumybich anajty m̄id yī' ajcxy ycixpi huixchiguipx jimijt. ¹⁰ Paady njotma'tyich m̄id miich ajcxy mm̄ij'ap mm̄ijteedy jecy'ajty, e nm̄inaañich: "N̄id̄igoy tūdigoy ajcxy jabom jabom ma yjot yhuinma'ñ. E ca' ajcxy nejhuihuaangixy anajty iich nm̄i'aa ndū'aa." ¹¹ Paady yī' ajcxy nm̄ijotma'tyich, e janch janch nm̄imaayich ajcxy, e ca' n'indāgyich, co ca' ajcxy ytiḡihuipy ma iich nbocxtac. ¹² Migügtijc, naygüend'ájtigix nidüg nidüg co ni tūg miich ajcxy mgam̄id'adip jibicjot jibic-huinma'ñ, e ni m̄ga'ixmajtzcxipy Dios juugypi y'ayuc, m̄id co ca' mm̄ibijccixy. ¹³ Hue' janchtiy nayjot'am̄ijmóoyigixy miñ xyipy jabom jabom nami x̄i tiempo yjacn̄icxñi. Jadu'n miich ajcxy mdunipy, ca'ydī ajcxy yī pocytun̄i xyhuin'ingixy, e chi anajty mnaybidāacigixy jotjuuñ. ¹⁴ Pen nm̄ibijcim nm̄ijpidaacim Cristo y'ayuc t̄ibi nbaatim oga'n'aty, e ca' n'ixtiḡihua'cim mabaad n'o'cim, chi jēbi n'ijtim m̄id Cristo.

¹⁵ Je' je' je huídibi jaybetyity ma Dios y'ayuc: Cham, pen mmidooyb miich ajcxy nej Dios ymína'ñ, ca' ajcxy m'ijtcixy jotjuuñ, jadu'n nej je' anajty ajcxy huídibi Dios mijotma'tp anajty m'id co ajcxy m'ibidígy Dios.

¹⁶ ¿Pinjaty ajcxy huídibi jecy'ajty midou Dios y'ayuc e m'ibidígy Dios? Nidüg'óciy je' ajcxy huídibi tzomb Egipto naaxjot jecy'ajty m'id Moisés. ¹⁷ ¿Pinjaty je Dios ymijotma't jadu'n huixchiguipx jimijt? Je huídijaty ajcxy tundigoy m'id Dios ytiy'ajt, e je' ajcxy cijx y'octaaygixy jim m'ijtigíduum. ¹⁸ ¿Pinjaty Dios ñimay co ni camina ytigíhuipy ma je Dios y'it ylugar ma jébi ypooxcixy m'id yí'? Je' ajcxy huídibi ca' ycapxymidoy. ¹⁹ Paady nnejhuuyim co janch ca' ajcxy jajty nej ytigíygyixyipy ma Dios y'it ylugar m'id co ajcxy ca' m'ibijcy Dios y'ayuc.

4

¹ Com nm'idni ajt Dios y'ayuc, jadu'n nej ti xyaj'ahuanuyim co ndigíyim ma yí' chinaydac yjugy'ajttac, e nboocxim m'id yí'. Paady ooy tzocy co ndzigíyim Dios. Ca' jecyity co nidüg miich ajcxy ca' mdigíhuipy m'id co ca' mm'ibijccixy Dios y'ayuc. ² Nañ jadu'n ti ñch ajt nm'idoohuim je Dios y'ayuc oybi, tim jadu'n nej yí' ajcxy jecy'ajty ti midooy. Per ca' Dios y'ayuc ma ti ypubedyii ajcxy co ti jamidoogixy je tiy'ajt. Com hue' ajcxy ymidou, e ca' ajcxy mijpidacy. ³ Ich ajt com ti nm'ibijcim je Dios y'ayuc oybi, ñch ajt je' tigíyimip ma je it huídibi Dios ti tijy ma jébi nboocxim m'id yí'. Com Dios jadu'n ymína'ñ:

Paady yí' ajcxy nmijotma'tyich, e nmimäyich ajcxy, n'ibaadyich ngapxpaadyich n'ayuc, co ni camina xii yí' ajcxy ypocxtac capaadipy ma ñch.

Tüg'óciy huídibi Dios yajcojy yaj'oyiy, hue' ti yajcojy ti yaj'oyiy jayijpni ca'ni anajty naaxhuiñybi chondacy. ⁴ Com ma yjaybetyity je tiy'ajt jilby muumity nigapxy je mihuixtujcxibi ma jadu'n ymína'ñ:

Dios ypooxcy je mihuixtujcxibi m'id je' ytung ycixpi tiibi anajty tuñ.

⁵ E jadüg it yjaybetyity ma Dios ñecy ma jadu'n ymína'ñ:

Ca'p yí' ajcxy ytigíygyixyipy ma ñch nbocxtac.

⁶ Hue' janchtiy Dios yjacm'id'ajtyñi it lugar ma ypocxtac ma jébi pinjaty ytigíhuip. Yí' ajcxy huídibi tzinay jecy'ajty huídibi jayijp midou Dios y'ayuc, ca' je' ajcxy ytigíy ma Dios ypocxtac, m'id co ajcxy capxycomidodacy Dios. ⁷ Paady ycixpi Dios ti pidägy tüg xii tüg tiempo mina jébi pinjaty tigíhuipy ma yí' ypocxtac. Je' jadachambi xii tiempo Dios ti pidägy. Dios ti xyñimaayim nej David ymína'ñ tzach com jecy, nej miñ jaybety huídibi ti yajnigapxy co jadu'n ymína'ñ:

Jadachambi pen midooyb miich ajcxy nej Dios ymína'ñ, ca' ajcxy mnaybidáacigixy jotjuuñ.

⁸ Co Josué je Israel jäy ajcxy camoy je pooxin, ca' Dios canigapxy huingbi xii mina ytigíhua'ñ ajcxy ma Dios ypocxtac. ⁹ Paady ycixp, jadu'n yjac-hui'myñi jadüg xii tiempo mina Dios yjäy ytigíhua'ñ ma Dios ypocxtac. ¹⁰ Com pinjaty tigíyib ma Dios ypocxtac hue' je' ypocxy m'id je' ytung ycixpi tiibi anajty tuñ, tim jadu'n nej Dios ypooxcy je mihuixtujcxibi m'id je' ytung ycixpi tiibi anajty tuñ. ¹¹ Hue' tzocy co naymic'ijxim nej huaad ndigíyim ma je Dios ypocxtac, ca' yjecyity co nijéjity miich ajcxy mbaduunipy nej ajcxy y'idich huídibi ajcxy ca' m'ibijcy Dios y'ayuc, e ca' mdigíygyixyipy ma Dios ypocxtac.

¹² Com yí' Dios y'ayuc ijtp yí' huinixii huinitempo, e ym'id mic'ajt. Nigi yajtigiyñajxtäy ninicx, jot almi, ca'ydi tüg espada huídibi mejtz'adu'm'amy jijpiz etz yjijpxu'ñity. E Dios y'ayuc nejhuídaayb nej jäy ajcxy yjot yhuinma'ñ m'idity, e tüg'óciy tijaty ajcxy ñijot'ajtcixyp. ¹³ Ca' ji ni ti huídibi Dios ti yajcojy nicxy ñayyüchyii ma yí' yhuinduu. Tüg'óciy nej ajt njot nhuinma'ñ nm'idity ñiguëxictähup yí' ma Dios, je Dios ma ñch ajt nguendi ngíyegaanim, yí' ijxtaayb ajt njot nhuinma'ñ.

Jesús yí' je' je' mijhuingapxpi ma Dios

¹⁴ Jesús, je Dios y'ung, yí' je' tūgpajc jacmijtungmüid huidibi xycodinaayim ma Dios müid ajt nbocy ycixpi. E Jesús ti ytiyíy ma Dios yhuinduu, paady ycixp tzoc ijtim tudägy ma ajt nmibijcin. ¹⁵ Pues com Jesucristo, je huidibi tūgpajc mijtungmüidip ma Dios, je huidibi xycodinaayim etz xyhuingapxim ma Dios, com Cristo tzaachypi etz ijxta'ni canaagnax ti yajnaxy, tim jadu'n nej ich ajt tzaachypi etz ijxta'ni nyajnajxim, per je' ca' ma ti bocy tuuñ. Paady ycixpi jēbi Cristo ajt xypa'ayoohuim co ajt nyajnajxim tzaachypi etz ijxta'ni. ¹⁶ Tzoc agujc jotcuyc nmihuingoonim je Dios y'ane'mdac e n'ojadajtim nmibijctzoohuim Dios, jaydēbi co anajty jotmay nmüid'ajtim, chi Dios may'ajt oy'ajt tunipy müid ich ajt ycixpi.

5

¹ Tüg tüg mijtungmüidpi huidibi huingapxp jäy ajcxy ma Dios, hue' je' yajhuin'ijxp ma yēdyictijc, etz yajniğapxpejty, jaydēbi yhuingapx jäy ajcxy ma Dios etz yajnaxipy Dioscojuyip müid jäy ajcxy ma Dios, etz yegipy huindzigí'ñ ma Dios müid jäy ajcxy ypocy ycixpi. ² Je mijtungmüidpi jäy ajcxy yajniğijc huidibi huingapxp jäy ajcxy ma Dios, jēbi yí' ajcxy pa'ayooy huenpinity huidibi pocy ymüid, com nañ jadu'n yí' ajcxy pocy jihuíy. ³ E müid yci'mbocy ycixpi copicy yegipy huindzigí'ñ ma Dios etz müid jacjadyii jäy ajcxy ypocy ycixpi.

⁴ Ni pin huaad ci'm ycanaymöyii je jadu'mbi tung co yhuingapxity ma Dios. Dios yhuin'ijxpy pinjaty huingapxip ma yí' müid jäy ajcxy ycixpi, tim jadu'n nej Dios huin'ijxy Aaron jecy'ajty etz yajniğijcy yí' jadu'mbi tung. ⁵ Jadu'n yajty müid je Cristo, ca' ci'm nayñbijctzoohuíy ma yí' jadu'mbi tung. Dios yajniğijci co huingapxip müid jäy ajcxy ycixpi, e ti ymöyii je mij'ajt jadu'n nej anajty ti nimäy: Miich je' ich n'ung. Ich miich mjogy'ajt ti mmöy cham.

⁶ Nañ jadu'n ymına'ñ jadüg'it ma Dios ñecy:

Miich je' mhuingapxyp je jäy ajcxy ma Dios huinixi huinítiempo, tim jadu'n nej Melquisedec ytuuñ.

⁷ Co Cristo chinay ya naaxhuiñ, chi ooy mijuydägy minucxtägy Dios, chi ooy mibijctzoy janch mic je Dios huidibi jēbi ycohua'ñyii ma je o'cin. Müid co ooy mibijcy ooy huindzigíy Dios müid yung naxy yjot yhuinma'ñ, paady Dios ymidoohui. ⁸ Je Cristo oy je' anajty Dios ja'ung'adyii, yjajti nej ycapxymidoohuipy Dios, müid je' ycixpi nej anajty ti y'ayoy ya naaxhuiñ. ⁹ Co Cristo yajca'pxy yí' y'oy'ajtin müid je tzaachypi huidibi yminajxy yajnaxxy, chi ni'ixi' anajty y'ity jēbi cop'adyii alma nidoocin huinixi, jaydēbi tüg'óciy pinjaty capxymidoob Cristo, ypaadip ajcxy y'alma nidoocin. ¹⁰ Dios jadu'n yajniğijcy Jesús co yajnicxip je jac mijpi tung ma yí' co huingapxip jäy ajcxy ma Dios, tim jadu'n nej Melquisedec ytuñ jecy'ajty.

Je ayo'n co njijpyöyduutim yí' mibijcin

¹¹ Ooy ich miich ajcxy mij nmüidmüydäga'ñ ma jadayaabi tiy'ajt, per ooy chachchip nimiydaacnity, com ca' miich ajcxy mic'amy mhuinijihuíhuipy Dios ytiy'ajt. ¹² Jadu'n nej jada xi tiempo ti yjejni ma miich ajcxy oga'n ti mmibicy. Hue' miich ixypy ajcxy mniyaj'ixpijnip Jesucristo ytiy'ajt je tzipjatypi. Per miich ajcxy mdzojcyñi co myajnajtzcapxihuipy huinjemy je Dios y'ayuc huidibi ca' chipity. Ti miich ajcxy m'ahuimbijttaaygixy ca' mic majaa ma mmibijcin. Hue' jēyi miich ajcxy jadu'n nipaady nej pi'ctijc huidibi leche uucp, e ca' jadu'n paady nej mij'anactijc huidibi caagy caayb. ¹³ Pinjaty yajpatp ma jada ixpijnip huidibi ca' chipity, jadu'n yí' nej ma'xungdijc com ca' jajtcixy je ayuc tiy'ajt tiybi. ¹⁴ Je' tzipjatpyi tiy'ajt je je' winjihuygixp, je' huidibi ymibijkin mij may mid'ajtkixpin, jadu'n nej je' huidibi y'aa ytiitz jim ajkixyin je' titzpi jich kaagy je' ykaaygixpy, je' ko yajatkixpy je' nej winjiwuygixichin je' huidibi oy, etz je' huidibi ka'oyin.

6

¹ Paady tzoc niği yajyujcpejtım n'ixpijcin ma Dios ytiy'ajt, tzoc ajt yajyeecım nmibijcin, jigix jadu'n nipaadip jadu'n nej jäy tıibi yhuinma'ñ yca'pxtaayñi. Ca' n'agapxiyo'cim canaag'oc jabom jabom je tiy'ajt huidibi ti nbaatım co oga'n nmibijcim Cristo. Ca' janam jatzojc n'ixpijco'cim huidibi oga'n ti n'ixpijcin jadu'n nej co njothuimbijtim nej anajty ndunım jibicpi huidibi xyajnicxim ma yi o'cin, e jadu'n nej nmibijcim Dios oga'n. ² Ca' jadüg'oc n'ixpijco'cim je ixpijcin miid je niibejtın ycixpi, etz jadu'n nej yajcınixajy je mibijcpidijc jaydebi paadip ajcxy je Dios yjihui'ñ ymic'ajt, etz jadu'n nej yi öcpi ajcxy yjugypigipy co anajty ti öccixy, etz jadu'n nej Dios tzaachytuna'ñ huinixi pocyjäydijc. ³ Chi njac'ixpijcin Dios y'ayuc je tzijpatypi, pen Dios jadu'n tzojcpy.

⁴ Com pinjaty ti huinjihuıy Dios y'ayuc ytiy'ajt, e jäygidägy huidibi Dios yejcpy, etz miidıty Dios yjihui'ñ ma y'ay yjot, jadu'n je' nipaady nejjihuıy chinay ma jın ytıcxın. ⁵ Etz ti ajcxy jäygidägy Dios y'ayuc ytiy'ajt, e ti jihuiyigixy Dios yjihui'ñ ymic'ajt huidibi yajtzınaayip ajcxy y'alma ma je xii je tiempo huidibi miimb cidacp. ⁶ Yi jadu'mbi jäy, pen tundigooyb ajcxy jadüg'oc miid Dios ytiy'ajt, e ixmach ajcxy nej anajty ti mibijccixy Jesucristo, ca'p jebi jadüg'oc jothuimbijtcixy ma Dios miid pocy ycixpi e pijctzoogixy pocyhuinmeecxin jadüg'oc. Co ixypıy jadu'n ajcxy tuñ, chi huimbıdzımy nej ajcxy jadüg'oc yajcruudzpejtcixy je Dios y'ung miid ajcxy ypocy ycixpi, e nixiiccixy yajxiiccixy nej Jesucristo y'o'cy miid ajcxy ypocy ycixpi. ⁷ Jadu'n yi' ajcxy nej naax ni'uuctıch naag'oc naag'oc ytu'y. E pen je naax yejcpy ooy cosecha ma pin ti niıpy ti ytuñ, Dios je' anajty yconuucxin ymiid. ⁸ Pen actım apy etz actım jıbic ujtz ypidzımy ma je naax, ca' je' ti tzoohuıty, e Dios je' yajtigoyamb etz nöctähuıp ma je mij jın. (Jada naax jadu'n jada' nipaady jadu'n nej jäy huidibi ti ixmach ymibijcin.)

Yi huidibi nmibijcim yi' xyhuijtz'ıjtım tudägy

⁹ Migügtıjc ajcxy huidibi ooy ndzocyıch, oy iıch ajcxy jadu'n njamıdmıydägyıch miıch ajcxy, janch nejhuiybıch co ca' ajcxy ti m'ixmach yi mibijcin, etz nejhuiybıch co oybi conuucxin mbaadaangıxyp ma Dios etz m'alma ajcxy nidzoocın paadaangıxy. ¹⁰ Com Dios ooy yi' ytudägyıty, e ca' yi' jäydgıoy huidibi miıch ajcxy mdumyb miid yi' ycixpi, jadu'n nej oıyjäy'ajtin ti mdungıxy miid jacjadyii mibijcpidijc, e chambaad jadu'n mdungıxy. ¹¹ Hue' iıch ajcxy ndzocyıch co miıch ajcxy nidüg nidüg mnixondaaccıx tungıx oıyjäy'ajtin ıxtı mabaad m'öccixy, jigix mbaadıpy ajcxy tüg'öcıy huidibi ajcxy mjıjp'ıjxyp ma Dios. ¹² Ca' iıch ajcxy ndzojccixy co miıch ajcxy m'ahuimbıdıpy nuux. Padungıx miıch ajcxy jadu'n nej ajcxy ytungıxy huidibi mibijcp Jesucristo etz huidibi yajtungıxp mecxtujcin, jaydebi mbaatcixy tıibi Dios xyaj'ahuanıyigıxy.

¹³ Co jecy'ajty Dios moy Abraham je' y'ayuc, ci'm je' nigapxpejty y'ayuc, com ca'anajty ji jac mijpi pin nigapxpedıpy je' y'ayuc. ¹⁴ Chi Dios Abraham nimay: "Janch co iıch miıch ngonucxıp, e nmöhuıpy may m'ap'ung m'apmang." ¹⁵ E jadu'n Abraham y'ahuijxy miid mecxtujcin, e jadu'n ycıdigıyıyı huidibi anajty Dios ti yaj'ahuanıyii. ¹⁶ Co ajcxy jäy ycapxcıxy co yjanchıty, jim je' pin niıgapxpejtp je y'ayuc, je pin jacmıjıp, je' nigapxpejtpy jada ayuc. E co nigapxpety je' y'ayuc, chi je ayuc yıty, e ca' huaad pinjaty ymına'ñ co ca' yjanchıty. ¹⁷ Paady ycixpi Dios nigapxpejty yci'm'ayuc, miid co anajty yajnejhuıhua'ñ je jäy ajcxy co cuyduna'ñ y'ayuc tıibi ahuanıy. ¹⁸ Ji yajpaady mejtnax Dios y'ayuc huidibi ca' huaad capxtıgach, e Dios ca' y'anıdägy nimına. E co Dios jadu'n tuñ, chi xyajjotcugıyım mij, iıch ajt huidibi n'ixtaayım e ndzojcin yi' ypubejtın. E ti nmıjıpıdaacım yi' y'ayuc jadu'n nej jıjp'ıjxim co xymöhuaanıı ajt n'alma jugy'ajtin huidibi ca' ycııpy ytigoyıpy ni mina. ¹⁹ E miid co njıjp'ıjxim co Dios xymöhuaanıı ajt n'alma jugy'ajtin huidibi ca' ycııpy ytigoyıpy, paady ajt n'alma jotcuıc ıjtım ca' ma tzigı'ñ jihui'ñ. Jadu'n Dios y'ayuc nipaady miid iıch ajt ycixpi nej tüg pujx huidibi je barco huon'ıjtp mejyoty, ca'ydı nej yjaty je barco. İch ajt njıjp'ıjxim co ndıgıhuaanıı ma Dios y'ıt tzajpjoty, tim

jadu'n nej je judío sacerdote mįjtungmįđpį ytįgįy anajty jecy'ajty ma Dios y'it ma je Dios ytįc, je it huđđbį anajty adįyducyįp mįđđ huit. ²⁰ Tįgįhuaanim ĩch ajt ma je Dios y'it tzajpjoty ma Jesůs ytįgįy mįđđ ĩch ajt ycįxpį, Jesůs tį yaj'ahuäch nej jębį ndįgįyįm ma Dios y'it. E jadu'n Jesůs naydųgpajc huįgapxy etz codįnįy mayjįy ma Dios yhuınduu huįnįxį huįnįtiempo. Jesůs ytung tįm jadu'n nįpaady nej Melquisedec ytuń jecy'ajty.

7

Yį Jesůs tįm jadu'n ymįjįty nej Melquisedec

¹ Je Melquisedec hue' je' anajty rey'ajtp ma je cajp huđđ yxį Salem, e je' anajty huįgapxp ma je mįjįpį janchypį Dios tzajpjoty. Co anajty Abraham yhuimbity co anajty oy tį chiptuń, ma anajty je reyđįc oy tį yajqueec-huächxtįy tį mįmadactįy, chį Melquisedec chooń oy jįjpcoyųyį Abraham, e chį ooy Dios mįjyudacy minucxtacy mįđđ Abraham ycįxpį. ² Huđđbį anajty Abraham tį paady ma anajty oy tį chiptuń, chį je' pįjįc-huächxy majcpįcy, chį pugooń tųg-pįcy mooy je Melquisedec. Melquisedec yxį hue' yhuimbįđzįmy “rey tudįgyį”. E com co anajty yrey'aty jįm Salem, hue' Salem yhuimbįđzįmy “jotcuįc'ajtįn”, paady jębį nįmįnaanįm jadu'n, “je rey huđđbį jotcuįc'ajtįn yeįcp”. ³ Je Melquisedec ca'p anajty yajnejhuįy ytaj yteedy, ni y'ap yteedy. Ni ycaya-jnįmįydįgy nej ypi'c'ajty etz nej y'ųgy. Tįm jadu'n je' anajty yajpaady nej je Dios y'ung, tųg huđđbį huįgapxp jįy ajcxy ma Dios huįnįxį huįnįtiempo.

⁴ Occuendįtungįxy mįch ajcxy nej je Melquisedec anajty ooy ymįjįty. Je Abraham, ĩch ajt nįmį'ap nįmįteedy cį'm mooy Melquisedec je tųg pįcypį huđđbį anajty tį pįjįcį je rey ajcxy ma oy chiptuń. ⁵ Nej Moįsės ycųtųjįcįn y'ane'my je' anajty ajcxy yhuįgapxy ma Dios ytįc je pįnjaty Levį y'ung'ajtpy y'anäch'ajtpy, y'ap'ung'ajtpy y'apmang'ajtpy. Je' ajcxy cųtųjįc mįđđ co jįy ajcxy yajcuend'adįpy tųgpįcy je majc-pįcypį huđđbį xį diezmo. Oy je' anajty ajcxy ja'ajugy'adyį ja'amįgųg'adyį, com hue' anajty ajcxy Abraham y'ap y'oc nidųg'ųcįy. ⁶ Per Melquisedec oy je' anajty ca' Levį ap'adyį teedy'adyį, yajcųejt je Abraham tųgpįcy je majc-pįcypį. Je' je' anajty huđđbį cįđįgįyį tįbį anajty Dios yaj'ahuanįyį. Jadu'n Melquisedec yajpuhuanįy Dios je Abraham. ⁷ Ni pįn ycaminanįp co ca' yjanchįty co je pįn conuucxįn yeįcp, jac mįj je', ca'yđđ je pįn yajconuucxp. ⁸ Ya ma ĩch ajt, pįn cįđįgįyįp tųgpįcy je majcpįcypį (diezmo), hue' je' ajcxy jįy huđđbį ōcp. Per jadu'n nej anajty Melquisedec, jadu'n ymįna'ń ma yjįybetyįty co je' yjactzįnaayńį. ⁹ E jębį yajmįna'ń co je Levį etz jadu'ńyįbaad je y'ap y'oc huđđbį ajcxy huįgapxp ma Dios, e yajcųejtcįxy Israel jįy huđđbį Dios patįp, nań jadu'n nįpaady nej jįhuįy ymįgųety je' ajcxy je Melquisedec huįn'it co Abraham ymįgųejtį. ¹⁰ Jadu'n nįpaady nej jįhuįy Abraham ńįgįx'ajtyńį y'ap'ajtįn yteedy'ajtįn Levį etz jacjadyį je huđđbį anajty ajcxy ca'ńį ypi'c'atyńį yma'xung'atyńį co oy Melquisedec yjįpcobadįyį.

¹¹ Je Israel cajp yajcđįgįyį je' je Dios y'ane'mįn ycųtųjįcįn je Levįta ajcxy huđđbį anajty huįgapxp je mayjįy ma Dios, je' je' anajty ajcxy Aarón y'ap y'oc. Chį jada' co jada ajcxy janch ca'ocyaj'ahuimbįjtįy tudįgy pįnjaty anajty je Dios ycųtųjįcįn payųyb, ca'p tįm je' anajty ycopįcyįty co ycajacqųęxįgy jadųg huđđbį codįnįhuįp je mayjįy ma Dios, ca' y'ocje'jįń ma ymįń Aarón y'ap y'oc. Je jadųgpį huđđbį codįnįhuįmyb je mayjįy ma Dios, hue' copįcy co tú'cįy naybadįyb mįđđ Melquisedec. ¹² Co ytįgadzipy pįnjaty huįgapxp ma Dios, nań jadu'n ytįgadzip je tįy'ajt je cųtųjįcįn. ¹³ ĩch ajt nHuįndzįn Jesucristo, je huđđbį ńįmįydacy ma Dios ńęcy co huįgapxa'ń je mayjįy ma Dios, huįgbį ap huįgbį Teedy je' anajty, ca' y'ocLevįjįn. E ni tųg yį' y'amįgųg ca' yhuįgapxy ma Dios. ¹⁴ Huädz yajnejhuįy co ĩch ajt je nHuįndzįn Jesůs hue' je' anajty ymįj'ap'ajty ymįjteedy'ajty je Judį. Moįsės ca' yį' capxpaty Judį y'ap y'oc co nįmįydacy pįnjaty anajty huįgapxp je mayjįy ma Dios ytįc.

¹⁵ Jacniguëxícip jada ooy co jadüg ytigüy huídibi tumb ma Dios, huídibi tú'ciy naybaatip miid Melquisedec. ¹⁶ Ca'p Jesucristo yajtungbijci co huingapxip je mayjäy ma Dios miid je cötujcin huídibi mínaamb co yi' y'amigügtijc pátip yi' jadu'mbi tung, je huídibi ajcxy yjugy'ajtin cixip tigoyip. Hue' je Jesucristo chinaayin yjugy'ajtin ca' ycixipy ytigoyipy ni mína, paady ycixp Jesucristo yajtungbijci huingapxip je mayjäy ma Dios. ¹⁷ Com miid je' ycixpi jadu'n Dios tiy'ajt yejcy co jadu'n ymína'ñ: Miich je' cham mhuingapxyp je mayjäy ma ñch. Tüg nax miich mhuingapxin nej Melquisedec anajty yhuingapxy.

¹⁸ E jadu'n je oga'nbi je ane'min cötujcin huídibi Moisés yejc, ca' y'octuni cham, ca' jac ti mic'ajt miidity co jaydëbi yajtzögipy jäy ajcxy y'alma. ¹⁹ Je Dios ycötujcin huídibi Moisés jayhui'm jecy'ajty, ca'p je' ni ti yaj'oybidzimy yajhuätzpidzimy. Miid je huingapxpi ycixpi huídibi nmíid'ajtim cham jac'oy yi' huídibi njijp'ijxim ma Dios.

²⁰ Co Dios Jesucristo yajtungbicy, chi nīgapxpejty yci'm ayuc co yjanchity. ²¹ Jacjadyii ajcxy huídibi anajty tungixp ma Dios ytijc, hue' je' ajcxy tungmooyi, e ca' Dios nīgapxpejty yi' ajcxy y'ayuc. Per co Jesucristo ytungbijcy, chi Dios nīgapxpejty yci'm'ayuc. Com jaybety jadu'n ma Dios ñecy ma jadu'n ymína'ñ:

Je Huindzin Dios ti nīgapxpejty yci'm'ayuc, e ni mína ycajotmetzcíhuipy.

Jadu'n Dios nimay y'ung:

Miich mhuingapxamyb etz mgodināhuamyb je mayjäy ma ñch huinixii huinítiempo. Jadu'n miich mdunipy nej Melquisedec ytuuñ.

²² Com Dios nīgapxpejty yci'm'ayuc co yjanchity co Jesucristo ytungbijcy, paady yi' Jesús yi' je' majamoy mic'ajtmoy je jemybi ayuc huídibi yajhui'm miid jäy ajcxy ycixpi, je jac'oybi cötujcin. ²³ Jacjadyii huídibi anajty yhuingapxcixy ma Dios ytijc, nimay anajty ajcxy ooy. Com co tüg y'o'cy, chi huingbi ytigüy ma je' ytung. ²⁴ Jesús com ca' yi' yjugy'ajtin ycixipy ytigoyipy ni mína, paady ca' ytung ixmach, etz ca' yi'ytungmöy ni pin. ²⁵ Miid je' ycixpi Jesucristo mic'ajt miidity jaydëbi yajnidzoocipy jäy ajcxy y'alma huinixii huinítiempo, pinjaty mibijctzooyb Dios ma Jesucristo yxi. Jesucristo jëbi tunipy jadu'n, com yi' yjugy'ajtin ca' ycixipy ytigoyipy ni mína. E yi' Dios mibijctzodib miid jäy ajcxy ycixpi jabom jabom huinixii huinítiempo.

²⁶ Je Jesús je' je' tūgpajc je mijtungmiidpi ma Dios, huídibi ñch ajt nyajmayajtim, je huídibi miid huädz yjot huädz yhuinma'ñ, e ca' je' miidity ni ti jibicpi ni ti pocy. Je' ca' tūgnax y'ity miid pocytumbidijc. Nigi je' ymijity ycixity, ca'ydi jac ti huídibi yajpat tzajpjoty. ²⁷ Ca' Jesús yjadu'nity nej ajcxy jacjadyii huídibi tuun ma Dios ytijc jecy'ajty, co yaj'öccixy iyujc, e je' ajcxy yejcpy huindzigi'ñ jabom jabom, midüg co je' ajcxy ñayyajpocyníhuächyii, e chi jada' miid jäy ajcxy ypocy ycixpi. Jesús tūgtecpajc je' yejc huindzigi'ñ miid mayjäy ycixpi, co je' ci'm ñayyejci ma yi' o'cin jadu'n nej tüg huindzigi'ñ.

²⁸ Je Dios ycötujcin huídibi Moisés yjayhui'm jecy'ajty, hue' y'ane'my co huen tungmöy jäy ajcxy huídibi pocy miid, co mijtungmoy ma Dios ytijc. Chi jac'axam Dios yajhui'my jemybi ayuc jemybi cötujcin, e nīgapxpejty yci'm'ayuc co yjanchity. E miid je jemybi ayuc Dios tungmoy yci'm'ung, huen yajnicxip je mijpi tung ma yi' y'it, je Dios y'ung huídibi ijtp huinixii ca' ti bocy miidity.

8

Jesús yi' je' je' mijhuingapxpi ma yi' Dios y'ayuc jemybi

¹ Huídibi ooy nigi ycopicyity, huídibi yajnimiydaacp, co ñch ajt nmíid'ajtim pin xy-codinaayim ma Dios, je' je' je' Cristo, je huídibi jiiby ijtp mij'ane'mbi tzajpjoty, jadu'n nipaady nej jihuüy yi' y'ñäy a'oy'amy ma Dios ymijc. ² Jiiby je' ytuñ ma je janchypí Dios y'it ylugar, je amaaybi, huídibi oyhuindzigi'y ijtp. Je it huídibi Dios yajcoj, e ca' nmínaanim jäy ajcxy yajcoj. ³ Tüg'ócüy pinjaty huingapxp ma Dios, yajnicxycy je' paady, e copicyity co cýegipy ofrenda etz tijaty huindzigi'ñ ma Dios miid jäy ajcxy ypocy

ycixpi. Paady ooy ycopicyity nañ jadu'n co Jesucristo yegipy ofrenda etz huindzig'iñ ma Dios miid jäy ajcxy ypocy ycixpi. ⁴ Co Jesucristo ixypy ya yocajpaady naaxhuiñ, ni ycahuingapxy ixypy mayjäy ma Dios. Com jiini ya yajpaady pin huingapxip ma Dios ytijc, pin yejcp ofrenda etz huindzig'iñ jadu'n nej Moisés ycötujcin y'ane'my. ⁵ Jadayaabi huingapxpi ajcxy ytungixy ma Dios ytijc ya naaxhuiñ. Je' je' tüg iixpejt nej Dios y'it jiiiby tzajpjoty, jadu'n yi' nipaady nej tüg anecpi huidibi tzomyb jiiiby tzajpjoty. Co Moisés jecy'ajty Dios ytijc je' coji miid huit, chi Dios ñimaayi: “Cuenditun yajxon co anajty mgojy je tijc tügnax jadu'n nej je iixpejt huidibi nyaj'ijx jim copcixy.” ⁶ Per je migtung huidibi Jesús ytumyb ma Dios miid jäy ajcxy ycixpi, jac'oydung yi' ca'ydí je tung huidibi je jäy ajcxy ytumyb huidibi migtung miid ma Dios ytijc ya naaxhuiñ. Com jemybi etz jac'oy etz jacmic'ajt miid je cötujcin huidibi Dios ymoy Jesús, ca'ydí je cötujcin huidibi Dios ymoy Moisés jecy'ajt. Com hue' je' jac'oy alma nidzoocin Dios yaj'ahuanñy jäy ajcxy ma je jemybi cötujcin.

⁷ Co je jayjip'atypi cötujcin huidibi Moisés ymooyi cayaj'oyidaayi jäy ajcxy ypocy miid Dios, ca' yi' ixypy ycopicyity je mimetzpi cötujcin huidibi Dios ymoy jäy huinjemy. ⁸ Per Dios y'ijx co je jäy ajcxy ca' yajxon cuydungixy je cötujcin huidibi Moisés ymoy, jadu'n nej ymina'ñ ma yjaybetyity ma Dios ñecy miid je' ajcxy ycixpi, ma jadu'n ymina'ñ:

Jadu'n je Huindzin Dios ymina'ñ: “Mimb xii tiempo ma huingbi cötujcin nmöhuibich yi' Israel jäy etz Judá jäy ajcxy.

⁹ Ca' y'ocjadu'niñ nej ich ngötujcin huidibi nmooyich je' ajcxy y'ap yteedy jecy'ajty, je huin'it tiempo taabi nyajtzoofich ajcxy jim Egipto naaxjot. Ca'p je' ajcxy cuyduñ je cötujcin huidibi ajcxy nmooyich, e paady ca' nduunich cuendi yi' ajcxy.” Jadu'n ymina'ñ je Huindzin Dios.

¹⁰ Jadu'n je Huindzin Dios ymina'ñ:

Je cötujcin huidibi nyegaamybich ma Israel jäy ajcxy co anajty yjadu'mbi xii tiempo ti ñaxy, jadu'n je'. Nbidägibich ngötujcin ma yi' ajcxy yhuinma'ñ, e jadu'n nipaady nej jihuñy ti njayich n'ayuc ma ajcxy y'ay yjot. E ich yi' ajcxy xyDios'adib, e yi' ajcxy njäy'adiybich.

¹¹ Tüg'óciy ajcxy nejhuñhuipy pin ich. Ni pin ji cayaj'ixpigipy pin je' je Huindzin Dios, ni pin, ni ymigüg, ni ymijin ymidijc, ni pi'ctijc ni mij'anactijc. Com nidüg'óciy ajcxy nejhuñhuipy pin ich; ypi'city ymutzity, ymijjäyity, etz ymij'anacity.

¹² E ich yi' ajcxy nmeecxip yjibicjäy'ajtin, ni camina ngajac'ajihuñhuibich ajcxy ypocy. Jadu'n Dios ymina'ñ.

¹³ Co Dios je' ycötujcin jemybi nimiydägy, je' je' co yaj'amijñyñi je jayjip'atypi cötujcin. Je huidibi amijñyñip ca' je' y'octuunip, tzojc yi' yaj'ijxtigoyaani.

9

Je Dios ytijc huidi ya naaxhuiñ etz Dios y'it huidi tzajpjoty

¹ Je Dios ycötujcin jayjip'atypi ymiid je' anajty ñidy'ajt nej huaad ytuñ ma Dios ytijc ya naaxhuiñ, ma jäy ajcxy huindzigihuipy Dios. ² Je Dios ytijc jadu'n je' ycojity. Je jayjipi cuarto hue' anajty xijity Lugar Santo, jiiiby anajty y'ity je candelero etz je mesa ma tzajcaagy y'ity ma Dios yhuinduu. ³ Jixci'py'amy ma je mimetzpi huit y'agiyducyity jiiiby jadüg'it huidibi xijip Lugar Santísimo (ma Dios ni'ixcidägy je jäy). ⁴ Jiiiby anajty tüg mij mesa ac tim ori je' anajty ma ajcxy ypoomjojccixy, e ma je' jim anajty y'ity tüg cajoon ac ori je' anajty yñinix huidityi. Jiiiby cajoonjoty anajty y'ity tüg tu'tz ac ori huidibi anajty miid je jicxy iixpejt huidibi Dios Israel jäy ajcxy ymooy jecy'ajty. Etz jiiiby anajty Aarón ytajc huidibi huñp huam. Etz jiiiby anajty je tzaa y'ity ma je' anajty ycixjayity Dios y'ane'min. ⁵ Ma je cajoonnix jim anajty je querubines ñgojtüdyity huidibi Dios y'oy'ajtin miid. Je querubines anajty codinaayb Dios, e je' anajty ajcxy yajnidoogyb miid yqueec

je cajonnícx ma ajcxy je huindzigi'ñ ñi'py ypidacy mïd jäy ajcxy ypocy ycixpi. Ca' huaad yjacyajnimïydacy mijcajee jadachambi tijaty huindibi anajty yajpatp jiihy ma Dios ytijc.

⁶ Jabom jabom co anajty jadu'n y'ijttäy ni'ixi', chi je huingapxpi ytigüygixy ma Dios ytijc ma je jayijpi cuarto, je Lugar Santo, tuñ ajcxy huindzigi'ñ etz cuydungixy yi' ajcxy ytij'ajt mïd Dios ycixpi. ⁷ Jimijt jimijt ma je mimetzpi cuarto huindibi je huit adiydujcp, jiihy ytigüy tügtecypajc je huingapxpi huindibi jacmijtungmïd ma Dios ytijc. E co jiihy ytigüy, chi midigüy huaj ñi'py, huindibi mïd huindzigi'ñ Dios mïd yci'mbocy ycixpi etz mïd tüg'óciy jäy ajcxy ypocy ycixpi etz mïd ajcxy ypocy ycixpi co ca' nejhüügixy co ytundigoogyixy. ⁸ Mïd jada ycixpi je Espiritu Santo xyajnejhüüym co je tungmïdipi huindibi huingapxi je mayjäy ma Dios, ma ajcxy jacyajtungixy anajty je jayijp cuarto ma Dios ytijc, chi ca'ni je' anajty y'ahuächñi nej jëbi pinjaty ytigüy ma je it lugar Santísimo ma Dios yhuinduu. ⁹ Je Dios ytijc huindibi ijtp anajty ya naaxhuiñ ca' je' yjëjty je janchypi. Hue' je' anajty ijxpejt'ajtp huindibi Dios y'it'ajtpy tzajpjoty. Jiihy je tungmïdipi huindzigi'ñ Dios mïd ofrendas etz mïd huindzigi'ñ. Per jada huindzigi'ñ ca' yajtigoy je pocytunï ma je jäy ajcxy yjot yhuinma'ñ. ¹⁰ Je judíojäy ytij'ajt huindibi tuun ma Dios ytijc jecy'ajty, hue' je' ñigapxy caayin uucin, etz jadu'n nej ajcxy ñayajpocyñihuáatziigixy mïd nï etz canaag costumbre huindibi ajcxy cuydumyb. Jadu'n ajcxy ytuñ ixti cooni Dios yajtigajztay tüg'óciy yi' ycotujcin.

¹¹ Per ti y'oy ya naaxhuiñ je Cristo, e yi' je' cham ijtp jacmijtungmïdipi ma Dios, yi' ti mimiñ jemybi cötujcin jac'oybi. E yi' je' codinaayb je mayjäy ma Dios y'it tzajpjoty, je it jac'oybi jacmijpi, jacca'pxypi, ca' nminaanim jäy ti cojy, e ca' yaajty naaxhuiñ. ¹² Cristo ti ytigüy ma je Dios y'it, je lugar Santísimo. Ca' ti ytigüy mïd co jiihy yajquëxiga'ñ pi'cchivo ñi'py o toro ñi'py, hue' yci'mni'py jiihy yejcpy ma Dios. Jadu'n ti ytigüy tügtecy tigüy huinixi huinitempo, etz xyajnidzoocim ajt n'alma huinixi. ¹³ Ooy yjanchity co yi' toro ñi'py etz je chivo ñi'py etz yi' cuyjam co ajcxy nöccixy huaj nix ma je Dios ojadajtac, co ajcxy je pocyjäy yajnihuäxcixy je ni'py etz yajnidujtcixy je cuyjam ymïd mic'ajt co yajpocyhuáatziigixy ñinícx, per jotjoty ca' yajhuäch. ¹⁴ (Je huingapxpi huindibi tumb ma Dios ytijc ya naaxhuiñ ca' ymadägy co jäy yajpocyhuädziipy mïd toro ñi'py), Jesucristo nigi ti ymadägy yajpocyhuäch jäy ajcxy mïd yci'mni'py. Com Jesucristo ymïd je Dios yjihui'ñ ymic'ajt huindibi ca' ycixipy ytigoyipy ni mina, chi ñaygiyejci ci'm ma Dios mïd Dios yjihui'ñ ymic'ajt, jadu'n nej tüg huindzigi'ñ huätzpi, com ca' ni ma ni ti tundigoy. E mïd yci'mni'py Jesucristo xyajhuaatzim je jibicpi ma ajt njot yhuinma'ñ, ca' ydi ndunim huindibi Dios ca' jäygidägy, e jadu'n ajt huaad ndunim ma je Dios juugypi ytung.

¹⁵ Paady yi' Jesucristo yi' je' huingapx'ajtp ma Dios mïd ñch ajt ycixpi mïd je jemybi ycotujcin huindibi Dios yajhui'm. Yi' Jesucristo co y'o'cy, yi' ajt je' nbocy xymeecxim tübi ndundigooyim ma je jayijp'atyp cötujcin huindibi Moisés jayhui'm. E jigix pinjaty Dios ti yhuin'ixy, jëbi ajcxy ycidigüyii je tzinaydac ma jëbi n'ijtim huinixi. Je tzinaydac huindibi Dios ti xy'ahuanüym. ¹⁶ Co tüg jäy jijp'ixy y'o'cin, e yajcojy tüg testamento, ooy ycopicyty co yajnejhüüipy pen janch je' ti y'ögy je pin yajcoj je tij'ajt jigix je' ytigühiipy tumbi je tij'ajt. ¹⁷ Co tüg jäy jijp'ixy y'o'cin e yajcojy tüg testamento, ca' je' ti mic'ajt mïdity je testamento pen jugy'ajtni pin je' anajty ti yajcojy. Huin'itni janchity co anajty ti y'ögy, huin'it je testamento mic'ajt mïdity. Je jemybi tij'ajt huindibi Dios xyajhui'my jadu'n yi' nipaady nej jäy testamento yajcojy co anajty jijp'ixy je y'o'cin, e co Jesús y'o'cy, huin'it mic'ajt moy je Dios ytij'ajt je jemybi. ¹⁸ Paady ycixpi jecy'ajty co Dios Moisés moy cötujcin, yajtzoobaat je' mïd iyujc ñi'py. ¹⁹ Moisés je' capxhuäch je Dios ytij'ajt ma tüg'óciy mayjäy. Chi jada' huijtzigy tüg lana tzaptzpi mïd tüg quipy aacx huindibi ooy oy yxuogy. Je' yajxooc ma huaj mang ñi'py etz chivo ñi'py teemhüidity mïd nï, chi Moisés yajnihui'ch je libro mïd je ni'py, je libro huindibi anajty ti capxy etz nañ jadu'n jäy ajcxy yajnihui'ch je ni'py. ²⁰ Co Moisés jadu'n ytuñ, chi yminañ: “Jada je' je' ni'py huindibi yajtzoobaatp je

ane'min je tiy'ajt huídibi Dios ti yecy ma miich ajcxy.” ²¹ Moisés nañ jadu'n ñi'pyñihui'ch je cochac tijc ma anajty yDios ojadajtcixy, e tüg'óciy tumbejt huídijaty jiiby tumb. ²² Dios ycötujcin, je jecyip, ymina'ñ co tüg'óciy huídijaty yajtungixyp co Dios ojadajtcixy, copicy yajhuädzi'py müd ni'py. E pen ca' ajcxy teemy yocy ni'py, Dios ca' huinmecxa'ñ yi' ajcxy ypocy.

Co Cristo y'o'cy müd ajt nbocy ycixpi, yi' yajnicxy ajt nbocy

²³ Ooy jada anajty ycopicyity iyujc ñi'py huindzigi'ñ, jigix yhuädzi'p huídijaty tumb ma Dios ytijc ya naaxhuiñ, je huídibi ijxpejt'ajtp anajty nej Dios y'it jiiby tzajpjoty. Per je Dios y'it huídibi jiiby tzajpjoty chojcpy jac'oybi huindzigi'ñ ca'ydi huídibi ya naaxhuiñ. ²⁴ Com Cristo ca' je' ytigiy ma Dios ytijc huídibi jäy ajcxy ti cojy. Je tijc huídibi jäy ajcxy ti cojy, je' je' ñigojtutün je it lugar janch janchypi huídibi jiiby tzajpjoty. Cristo tigiy ma je Dios y'it ylugar jiiby tzajpjoty, ma je' cham xycodinaayim ma Dios yhuinduu. ²⁵ Je judío mijtungmüdpí huídibi huingapxp ma Dios ytijc, huinjimijty ytigiy ma je Dios ytijc co yecy ni'py huídibi ca' ci'mni'py'adyii. Cristo ca' yi' ñay'ahuaníyii y'ögipy canaag'oc, jéyi tügtecpajc ytigiy ma Dios y'it müd yci'mni'py. ²⁶ Co ixypy ca' yjadu'nity, canaag'oc Cristo ixypy patni chaachy'öcün maabi naaxhuiñybi chondagy. Per jadachambi ma xii tiempo ycixaani ytigoyaani, Cristo tügtecpajc ñayguëxici ya naaxhuiñ, jigix codinähui'py tüg'óciy jäy ma Dios müd ajcxy ypocy ycixpi. Jadu'n Cristo tuuñ jigix yajtigoyipy pocytunii. ²⁷ Dios ane'min pidac ya naaxhuiñ co nidüg nidüg jäy paadip yi' o'cin tügtecpajc. E Dios ti pidägy je xii je tiempo mina tiyduna'ñ nidüg nidüg jäy müd ypocy ycixpi. ²⁸ Je Cristo jotcuyc tügtecpajc nayyejci ma je o'cin co yajpocyñihuaatzäy je mayjäy. Chi jada' ñayguëxiga'ñyii je mimejtz'ocpi ya naaxhuiñ, e ca' nmīnaanīm co yajpocyñihuaatzaanip jadüg'oc je mayjäy, hue' je' nihua'namyb ycohua'namyb tüg'óciy pinjaty jip'ijxip cixyjot huinijot co je' miina'ñ müd yi' ajcxy ycixpi.

10

¹ Je Dios ycötujcin huídibi Moisés jayhui'my jecy'ajty, hue' je' anajty ñidiy'ajt je oybi huídibi miinamb. Ca'p je' anajty yjéjty je oybi. Paady je cötujcin huídibi Moisés yjayhui'm ca' je' jébi huädz yaj'ahuimbity pinjaty pocy ytumb, pinjaty mijhuäcp anajty ma Dios müd je iyujc huídibi ajcxy Dios yajhuindzigi'yb, huídibi ytun'ahuimbijtcixyp jimijt jimijt. ² Co ixypy je cötujcin y'ocmadägy huídibi Moisés yjayhui'm yaj'ahuimbity ixypy huädz ajcxy je pocy ytumbi, ca' ixypy je jadu'mbi huindzigi'ñ y'ocyajtuuni jimijt jimijt. Com pin je jadu'mbi huindzigi'ñ yejcp, co ixypy je' ypocy yajnicxtäy, ca'p je' ma ñayjihuihu'yb ti bocy müdity jadüg'oc. ³ Co jadu'n yaj'öccixy je iyujc müd ypocy ycixpi, je' je' je tiy'ajt co ajihuygootigixy ypocy jimijt jimijt. ⁴ Com yi' huaj mang ñi'py etz yi' chivo ñi'py ca' mic'ajt müdity co pocyajnicxtähui'py nimina.

⁵ Paady co Cristo ymiiñ ya naaxhuiñ, chi nīmay je Dios:

Ca' miich ni ti huindzigi'ñ mdzojcnī ma ymiiñ iyujc'ögy, ti miich xyñi'ixii'yich tüg ninīcx.

⁶ Ca' m'ocjäygi'daacni huindzigi'ñ iyujc huídibi yajno'cp. Ca' miich m'ocjäygi'daacni co jäy xyajhuindzigi'y iyujc müd ypocy ycixpi.

⁷ Chi nmīna'ñich: “Dios, cha nmīñich jigix miich mdzojcin yajcuydunipy, jadu'n nej yjaybetyity ma miich mnecy müd ñch ycixpi.”

⁸ Tim jayjip, Cristo ymina'ñ co Dios ca' octzojcnī, ni cajäygidägy je iyujc ögy huídibi yajhuindzigi'yip, ni je huídibi yajno'cp, jigix je pocyñicxtähui'py, oy yi' yjajéjty huídibi ñigapxy yajtunipy ma je Dios ycötujcin huídibi Moisés yjayhui'm. ⁹ Chi jada' jadüg'it yjaybetyity co Cristo jadu'n ymina'ñ: “Cha ñch nmīñ, jigix miich mdzojcin yajcuydunipy, miich huídibi Dios'ajtp.” Hue' mīnaanīm, yajtigoy je cötujcin huídidi ane'mb co jäy ajcxy huindzigi'y iyujc müd ypocy ycixpi, etz mic'ajt mo' je jemybi cötujcin huídibi Jesucristo xymooyim. ¹⁰ Dios jadu'n ti xyajhuaatzim ajt nbocy, com Jesucristo ti tuuni Dios chojcin co ci'm ñinīcx tügtecpajc yejcy ma yi' o'cin müd tüg'óciy jäy ypocy ycixpi.

11 Tüg'óciy judío sacerdote huidibi tungmüd ma Dios ytijc jabom jabom jadu'n tun'ahuimbijtcixy tügpi huindzigi'ñ, huidibi ni camina yajnicxtaayi jäy ajcxy ypocy.

12 Yi Jesucristo tügtecypajc yi' yejcy ñinïc ma yi o'cin huinixii huinitiempo, chi jada' y'ixtacy a'oy'amy ma Dios ymijc ma ane'mdäy tüg'óciy. 13 Jiiby tzajpjoty Jesucristo cham y'ahuixy, ixti cooni Dios yi' ymidzip mímadaactaayip, e jadu'n ajcxy nipaadipy nej jihuiy Jesucristo ytecypocxpejt. 14 Müd tügpajc je huindzigi'ñ huidibi Jesucristo yejc, tudägy yaj'ahuimbijttäy huinixii huinitiempo pinjaty ti ypocyhuäch. 15 Yi Espíritu Santo nidiy'ajtp ma ich ajt jadu'n nej Cristo ti tuñ. Com jaybety miiñ ma Dios ñecy ma Dios jadu'n ymina'ñ:

16 Je huin'it xii je huin'it tiempo nyajmihui'maamybich je Israel jäy jemybi ayuc jemybi tiy'ajt. Nbidägibich ngötujcin ma ajcxy yjot, e njayamybich ngötujcin ma ajcxy yhuinma'ñ.

17 Chi jac'axam Dios ymina'ñ:

Ni camina njäy medzaanich ajcxy ypocy, etz jadu'n nej ajcxy ytundigooy.

18 Co je pocy ti yajhuinmecxtäy, ca'p ycopicyity yjacyajtunipy tijaty huindzigi'ñ müd pocyhuinmeecxin ycixpi.

Chojcny nmihuingoonim yi Dios

19 Paady miich ajcxy migügtijc, jëbi ich ajt ndigiiyim agujc jotcujc ma Dios yajpaady müd co Jesucristo ti temy ti yocy ñi'py müd ich ajt nbocy ycixpi. 20 Cristo ti yaj'ahuäch je ñi'aa je tü'aa müd ich ajt ycixpi müd yci'm ninïc, je ñi'aa tü'aa jemybi oybi huidibi tigiiyb ma Dios y'it. E je' yñinïc jadu'n nipaady nej je huit huidibi anajty adujcp je Lugar Santísimo ma Dios ytijc ya naaxhuiñ, je huit huidibi cichhuäch co Cristo y'o'cy.

21 Jesucristo yi' je' je migtungmüdpü huidibi xycodinaayim ma Dios ytijc jiiby tzajpjoty.

22 Paady ycixpi jëbi nmihuingoonim Dios müd oyjot oyhuinma'ñ, etz müd je mibijcin janchypi. Cristo ajt ti xyajhuaatzim njot nhuinma'ñ co ñi'py temy yojcy müd ajt nbocy ycixpi jigix ca'ydi nayjihuiyim pocymüd, jadu'n nej jihuiy ti ndziihuim müd huädz ñi.

23 Tzoc tudägy n'ijtim ma nmibijcin, ca' nyajtigajtzim nmibijcin, com Dios cuydunipy yi' tiibi xyaj'ahuaniiyim. 24 Tzoc nhuinma'ñypidaacim co njot'amijmooyim ajt nmigügtijc, jaydëbi naychojcin nayjihuiyim miñ xyipy, e nduunim oyjäy'ajtin. 25 Ca' n'ixmajtzim je nayyöymugii, jadu'n nej ajcxy nijëjity costumbre müdity co ca' ajcxy yöy ma naymujctac. Nigi tzoc nayjot'amijmooyim, e jadu'n nej cham yaj'ijxni co yhuingooni ma je Huindzin Jesucristo ymiinaani jadüg'oc ya naaxhuiñ, chona'ñ tzajpjoty.

26 Pen ich ajt jacpocytunim tzojcingixy ma anajty ti nejhuuiyim Dios ytiy'ajt, ca'p ji huingbi huindzigi'ñ huidibi xyajpocyhuaatzim. 27 Je' janchtiy njacjijp'ijxim müd tzig'iñ jihui'ñ je tzaachypi co anajty Dios xytidyunim, e xypidaacim mijjinjoty huidibi yajhuindigoydähuamb Dios ymidzip. 28 Co pin cacuyduun Dios ycotujcin huidibi Moisés yjayhui'm, e jim metz o tugüg testigo co yjadu'nity, yajmoy je' y'o'cin ca' müd'ajty ti pa'ayoohuin. 29 ¿Nej miich ajcxy minaangixy? ¿Nej cay jac'öctiy je tzaachypi mihuaad'ajtcixy? Je pinjaty ca' ixa'ñ Dios y'ung etz nixiici yajxiici Cristo ñi'py huidibi yajpocyñihuaatzp, jadu'n nej je jemybi ayuc ymina'ñ huidibi Dios yajhui'm. Etz nañ jadu'n ajcxy ni'ojiiygixy Dios yEspíritu huidibi may'ajt oy'ajt tumb müd je' ajcxy. 30 Nejhuuiyim co je Huindzin Dios ymina'ñ: "Ich xypatp ndzaachytunipyich jäy ajcxy müd ypocy ycixpi. Ich yi' nyajcomidohuipy ajcxy ypocy." Etz nañ jadu'n yjaybetyity ma Dios ñecy: "Yi Huindzin Dios yi' yjäy tiydunipy." 31 ¡Ooy chach mij y'ayo'nity pen je Dios juugypü xychaachytunim müd ajt nbocy ycixpi!

32 Per ajjihuiygixy miich ajcxy je xii je tiempo tiibi ñaxy, je taabi miich anajty ajcxy ti xycidigiiygixy je tiy'ajt janchypi, ñipatyp je' anajty nej tüg tücxin jain ajcxy müdity. Ti ooy mhuindinaaygixy mijiptinaaygixy tzaachypi ayo'n müd yi mmibijcin ycixpi.

33 Nijëjity miich ajcxy ti myajhuingapxnajxcixy, e ti myaj'ojcixy mayjäyduum. Nañ jadu'n

jacjadyii ti abaatcixy tzaachypí jadu'n nej je tibi ajcxy ooy yajtzaachytungixy. ³⁴ Ti miich ajcxy myajtungixy pa'ayo'n ma pinjaty anajty pujxtigotyip, e janch agujc jotcuyc ajcxy ti myajtungixy mecxtujcin co ajcxy xypici tijaty anajty ajcxy muid. Nejhuuyim co jüby tzajpjoty miich ajcxy muidity ti jaty jac'oybi huidibi huinixi huinitempo ijt. ³⁵ Jacmijpidaaccixy Dios, ca' mjetmetzcuygixy. Co mmijpidaaccixipy Dios, huin'it ajcxy mbaadipy oybi may'amy ma Dios. ³⁶ Chojcpsy co miich ajcxy myajtungixipy mecxtujcin co mguydunaangixy nej Dios tzocy, e Dios xyajcidiguygixip huidibi yi' ti ahuanüy. ³⁷ Jaybety jadu'n ma Dios ñecy ma jadu'n yminañ:

Tzojc, janch tzojc ymiina'ñ je huidibi tzonamb tzajpjoty, e ca'p je' jecyñity.

³⁸ Jadu'n Dios ymina'ñ:

Pinjaty iich ti ngöbicy co ytudägyjäyity, tzinähuij je' muid ymibijcin. E pen ixtigihua'cp ma ymibijcin, ca' jadu'n njotcuyc'adipyich muid je'.

³⁹ Ca'p iich ajt njëjity huidibi ixtigihua'cp ma nmibijcin, e ytigoy y'alma, je' iich ajt pin mibijcp, e jadu'n n'alma paadipy nidzoocin.

11

Yi mibijcin

¹ Jotcuyc nayjihuyim jadu'n co huidibi nmibijcim janch yi', oy co ca' n'ijxim. Je huidibi nmibijcim je' xymooyim jotcuyc'ajtin muid huidibi njijp'ijxim ma Dios. Je huidibi nmibijcim nejhuuyim co janch janch jadu'n, oy ca' n'ijxim. ² Com muid co ajt nmij'ap nmijteedy ajcxy mibijci Dios y'ayuc paady Dios cöbijcy ajcxy jadu'n nej tudägyjäy.

³ Muid ajt nmibijcin ycixpi nejhuuyim co Dios oyduñ tüg'óciy huidibi jii'ajtp muid y'ayucti'ajty, jigix huidibi cham n'ijxim je' yi' yaj'oyüy huidibi ca' yaj'ixy.

⁴ Muid co Abel mibijcy Dios, paady Abel ymoy Dios huindzigi'ñ jac'oybi ca'ydi Caín, e Dios cöbijci Abel yhuindzigi'ñ, e muid je' ycixpi Abel ooy ycömaybidzimy ma Dios co anajty ytudägyity. E jadu'n oy Abel ti yja'o'cini, jadu'n nipaady nej jihuy yjacmüdyägyñi chambaad. Com muid je' mibijcin huidibi anajty ymuid yejc ijxpejt ma iich ajt.

⁵ Muid co Enoc mibijcy Dios paady yajnicxi jadügpí tzinaydac ni yca'o'cy, ni ca' ajcxy paty, com Dios anajty ti yajnicxyii. Jadu'n ymina'ñ ma yjaybetyity ma Dios ñecy, ca'ni anajty yajnicxyii: "Dios jäygidacpy anajty Enoc chinaayin." ⁶ Pen ca' nmuid'ajtim mibijcin ni jadu'ñyi, ca' Dios jäygidägy ajt ndzinaayin. Com co nmihuingonaanim Dios, hue' tzocy co nmibijcin co Dios yjijity, e co yaj'ahuimbidity oybi muid pin mibijcip.

⁷ Muid co Noé mibijcy Dios, paady Dios ñimaayi jayijp co ytuna'nyii yjada'nyii mijniigom huidibi anajty ca'ni yaj'ixy. Co Dios ymigapxi, chi Noé yjotmaybaady e yaj'oyiy je barco ma yi' etz y'ung y'anäg ñigomdzögipy. Muid co anajty Noé muidity mibijcin, paady yajpocycäy je naaxhuiñyjäy ajcxy ca'pi ymibicy. Chi Dios cöbijcy Noé jadu'n nej tudägyjäy muid co mibijci Dios y'ayuc.

⁸ Muid co Abraham anajty Dios mibicy, paady Dios yhuin'ijxi e ycapxymidouhui. Chi je' choñ ma ñaax ycajpin ñicxy ma je it lugar huidibi Dios anajty möhuaanip co je'adüyb. Choñ, ni ca' anajty nejhuuy ma ñicxy. ⁹ Muid co Abraham mibijcy Dios, paady chinaydacpijcy nej tüg huingjäy ma je naax huidibi Dios yaj'ahuanüy, huidibi ca' yjëjity. Chinay ma huittijc, nañ jadu'n ajcxy y'idüch Isaac etz Jacob huidibi ajcxy nañ jadu'n Dios yaj'ahuanüy je naax. ¹⁰ Abraham je' anajty y'ahuijxyp mina jëbi chinaydacpijcy ma Dios y'it ylugar huidibi jadu'n nipatp nej tüg cajp huidibi muid y'ijx ta'tzpijcy y'oyduñity, je huidibi Dios ñihuinmayiy, je huidibi Dios yajcojy yaj'oyüyb.

¹¹ Sara hue' anajty pumäy, ti anajty ymijäyünyñi, ti ñajxni tiempo mina jëbi y'ung'ixy. Per muid co mibijcy Dios y'ayuc huidibi ti ñimaayi co y'ung'ixa'ñ anajty, chi paty mijaa co y'ungdzimigip. E chi y'ung'ijxy com ymibijc co Dios anajty cuyduna'ñ tibi ahuanüy.

¹² Muid tügpí jäy, je Abraham, ti choondacy tügpicy y'amigügtijc huidibi oy ti ymayiy.

Abraham, oy anajty je' ti yjahuingoni mina y'ogaani, chi ooy y'ung y'anäg, y'ap'ung y'apmang janchmay paty, jadu'n ymayity nej madza' etz ymayity nej pu' ma mejypa', janch ni ycamicho'nity.

¹³ Tüg'óciy je jäy ajcxy huidibi ya yajnimiydacp, öctay ajcxy ni ycacidigiyyi je tzinaydac huidibi anajty Dios ti yaj'ahuaníyii. Míid co ajcxy mibijcy Dios, paady nejhuíy ajcxy co jacjiini Dios ymöhuiyb je huidibi ti yaj'ahuaníyii. Com ymibijc ajcxy Dios, paady jotcuyc ñayjihuiyi co Dios möhua'ñyii jacjiini huidibi ti yaj'ahuaníyii. Yminañ ajcxy co anajty y'adzinaaygixy ya naaxhuiñ. ¹⁴ Pinjaty jadu'n minamb co adzinaaybi ajcxy yajpaady, hue' yajhuimbídzimy co chinaydac yjugy'ajttac ajcxy y'ixtaayb. ¹⁵ Co ixypy ajcxy jäymejtzó'cigixy je naax ma anajty ti choongixy, janch ycahuimbijty ajcxy jim jadüg'oc. ¹⁶ Per je' ajcxy ñigi anajty nijot'ajtcixy it lugar jac'oybi, je' je' je tzajpjoty. Míid jada ycixpi Dios ca' yí cho'yduñ co ñaydiyii Dios ma je' ajcxy. Com ti ni'ixíyí ajcxy chinaydac jiby tzajpjoty.

¹⁷ Abraham mibijcy Dios, e co Dios Abraham y'ixmajtzi, chi yajmiiñ Isaac co anajty yajhuindzigíhua'ñ Dios. E janch cixyjot je y'ung tügpajc anajty yecy, je y'ung huidibi Dios ti yaj'ahuaníyii anajty. ¹⁸ Dios ñimay Abraham co míid Isaac míid'ada'ñ may y'ap y'oc. ¹⁹ Abraham yhuinmaayb anajty ooy co Dios tügpajc cötujcmíidip yajjugypigipy öcpi. Paady jébi íich ajt nmíinaanim co Abraham ycidigiyyi jadüg'oc y'ung co anajty ti yjugypicy co anajty ti y'ögy.

²⁰ Isaac mibijcy Dios, paady Isaac Dios mibijctzoy míid Jacob etz Esau ycixpi co huen ajcxy oybi paadip ma je tiempo huidibi mim cidacni. ²¹ Jacob ymibijcy anajty Dios, paady co anajty y'ogaani, chi ahuaníy conuucxin ma nidüg nidüg José y'ung y'anäg. E jadu'n Dios ooy huindzigíy ojadajty yam ñaygodajc'adyii míid ytajc co anajty ooy ti ymijjäyíyí. ²² José co anajty Dios mibicy ma anajty y'ogaani, yminañ co Israel jäy ajcxy anajty ypidzimaangixy comjey co jim Egipto, chi yajhuí'my tíy'ajt nej ypajc ytuníyb co anajty choñ ajcxy jim Egipto.

²³ Míid co anajty ajcxy mibicy Dios, paady co Moisés yma'xung'ajty, chi ytaj yteedy yützi tugíig po'. Com co ajcxy ijxy co anajty ooy y'oyity je ma'xung, ca' ajcxy anajty tzigíy je rey y'ane'min co anajty yaj'öctähua'ñ tüg'óciy ungmá'xung yéydijcpi. ²⁴ Míid co Moisés mibijcy Dios, paady co oy ymí'anäcojni, ca' tzojcy co ñaydiyíyb co rey ñíx y'ung'adiib. ²⁵ Hue' janchtiy Moisés ñigi nijot'ajty co ayo'n tzaachypí minaxipy yajnaxipy quipxy míid Dios yjäy, ca'ydi co nixondägipy je jugy'ajtin ma je rey ytíjc huidibi Dios ca' jäygidägy. ²⁶ Moisés ñigi ñayjihuiyi jotcuyc co tzaachypí ayo'n anajty minaxy yajnaxy míid Cristo ycixpi, ca'ydi co míid'ajttähuiipy jugy'ajt comeeñ'ajt jim Egipto. Com Moisés ti anajty yhuinma'ñypidägy co Dios yega'ñ je oybi. ²⁷ Míid co Moisés mibicy anajty Dios paady choñ jim Egipto, ni catzigíy co anajty rey yjotmädy, jadu'n y'ijty tudägy nej jihuiy íxy je Dios ca'pi yaj'ixy.

²⁸ Míid co mibijcy Dios paady Moisés tuuñ je pascuaxí, chi ni'ane'mdíy co huen tíjc'aguu tüg tüg yajni'pyíy, jigix co je ángel huidibi yaj'öcp, ca'p je' je israelitajäy y'ungoob yaj'o'cipy. ²⁹ Míid co ajcxy mibijcy Dios paady je israelitas ajcxy yajnaxxy je tzaptz mejy jadu'n nej jihuiy ñajxcixy huindíztuuy, e co ajcxy je Egipto jäy nañ jadu'n yjanaxañ, cíjx ajcxy ñí'o'ctäy.

³⁰ Míid co ajcxy mibijcy Dios, paady ycidäday je poch ma je Jericógajp, taab anajty je israelitas ajcxy ti jühuidíjtcixy huixtujc xí. ³¹ Míid co Rahab, je töxyjäy jíbic tziinaaybi, mibijcy Dios, paady ca' y'o'cy quipxy míid je huidibi anajty ca' capxymidoogixy Dios. Com co je' yajjättacy ma ytícin je huidibi anajty ti choongixy ma Israel jäy ajcxy anajty yajpaady, co anajty ayüch ameech yajcíyöygixy yajtecyöygixy Canaán naaxjot.

³² ¿Ti njacmíydägíbich? Nyajtígo'yídaamybích tiempo co nimíydägíbich Gedeón, Barac, Sansón, Jefe, David, Samuel, e jacjadyii Dios y'ayucnajtzcaxíybi. ³³⁻³⁴ Míid co

ajcxy mibijcy Dios, paady ymimadac ajcxy ymidzip canaag picy, ane'my ajcxy yajxon yi cajpjäy, ypaat ajcxy pubejtin huidibi Dios anajty ti yaj'ahuaniiyigixy. Yaj'adujc ajcxy caa y'ahuac, yajxeem ajcxy jin huidi anajty ooy ymijity, tzooc ajcxy co anajty yaj'ogaangixy miid espada. Pinjaty anajty pumäyip ypaat je' ajcxy ymic'ajt ymijaa, mij je' ajcxy ooy y'ijtcixni ma chiptungixy, e ymimadactay ajcxy maymidzip. ³⁵ Jim anajty töxyjäy yjätigixy huidibi ajcxy cidigiiyi y'ung juugy huidibi anajty ti jugypicy co anajty ti y'ögy. Jadyii ajcxy y'o'cy ahuoni' agidzi', ca'p ajcxy paty nidoocin. Jadu'n ajcxy paty o'cin, jaydëbi patcixy jugy'ajtin etz tzinaayim jac'oybi ma Dios. ³⁶ Jadyii Dios y'ayucnajtzcaxiybi ooy ñixiici yajxiici, yajci'ajty, etz tzumy mach ypujxtijc'iñäy. ³⁷ Jadyii Dios y'ayucnajtzcaxiybi y'o'cy ajcxy tzaagögäch, jadyii yaj'ajidiy ajcxy janch tim cup y'ijxmajtzajcxy, jadyii yaj'o'ci miid espada. Ymiñ xyijpy xii yaa yhuidiitcixy ymiid ajcxy ñinixc yüch miid cöbixy'ac etz miid chivo'ac, ayooob jäy ajcxy, jotmay miid, yajtzaachtungixy yajca'oydungixy. ³⁸ Yi jadu'mbi Dios y'ayucnajtzcaxiybi ajcxy ni je naaxhuiñyäjy anajty camihuaadity. Miid ymidzip pahuiditcixy, paady yhuidiitcixy anajty titznaaxtuum etz yuugjoty, chinaaygixy naaxpa'tci'py etz majaty ang. ³⁹ Nidüg'óciy je' ajcxy oy cömay ajcxy yjanajxy miid co mibijcy ajcxy Dios, ca' ajcxy paty tiibi anajty Dios y'ahuaniiy. ⁴⁰ Com Dios jac'oybi je' anajty yegamyb miid ñich ajt, paady ca' ajcxy paty je oybi tiibi Dios y'ahuaniiy. Ti anajty Dios nihuinmayiy co yajca'pxaani yi' ajcxy ytudägy'ajtin quipxyi miid ñich ajt co Cristo y'o'cy miid ñich ajt nbocy ycixpi.

12

Tzoc ñich ajt nhuinma'ñybiidaacim ma Jesús

¹ Com nmüid'ajtim canaag ijxpejt nej jäy jecy'ajty mibijcy Dios, paady ñich ajt jadu'n nipaady nej jihuiy huinduy jajixci'py nmüid'ajtim jäy huidibi ti yajniguëxigy ymibijcin. Paady ycixp tzoc ahuing pidaacim je huidiatya xy'adzijpim ma ajt nmibijcin, e nañ jadu'n tzoc ahuing pidaacim je pocy huidibi xyajhuinma'ñydidgooyim, e tzoc naymic'ijxim cuydunim yi tiy'ajt miid mecxtujcin ma ajt ndzinaayin, jadu'n nej jäy ñaymic'ijxigixy co nayboyicquixigixy. ² Tzoc nhuinma'ñybiidaacim ma Jesús. Jim ijxpejt nbaatim ma Jesús nej jëbi nmibijcim Dios. Jesús yi' je' ti xyajnejhuuim Dios ytiy'ajt. Yi Jesús yi' y'ayoo anajty ma je cruudz, ni ca' yi' tuñcuendi je jadu'mbi o'cin oymidzo'yduunip. Com co Jesús ñejhuuim anajty co jadu'n y'oc'ayoohipy, chi ypaadipy jotcuic'ajtin ma Dios y'ane'my. E cham je' yajpaady ma Dios ymijc ma Dios y'ane'mdac.

³ Huinmaaygixy miich ajcxy je Jesús y'ijxpejt, nej pocyjäydijc chaachytuungixy etz ñi'ojiiygixy, etz ca' y'ixaani, paady ca' mdzijpcigixy ni mgamijotmetzciiygixy. ⁴ Ca'ni miich ajcxy ayo'n tzaachypí myajnaxy mabaad ni'py ajcxy mxhibidyii jadu'n nej Cristo yajty. ⁵ ¿Nej ti miich ajcxy mjäydidgooygixy je capxhuijin huidibi Dios ti xymooygixy nej jihuiy yci'm'ung? Jadu'n ymina'ñ ma Dios ñecy:

Miich n'ungich, ca' mbidägy nej jihuiy ca' ytim ytiijity je tzaachypí huidibi Dios miid xycapxhuijy, ni ca' mjotmetzciihuipy co xyaj'ójipy.

⁶ Dios ycapxhuijpy yi' pinjaty chojcpy yjihuiyb. Dios chaachytumby yi' ajcxy co ytundigooy, pinjaty yi' ti cöbicy nej jihuiy yci'm'ung.

⁷ Mímadaaccix miich ajcxy je castigo, com Dios jadu'n yi' xymüidity ajcxy nej jihuiy yci'm'ung. ¿Nej ji jada' tüg ung, e ca' yteedy chaachytuniiyb co ytundigooy? ⁸ Pen ca' miich ajcxy Dios ti tzaachypí xymooygixy, jadu'n nej yi' moy castigo tüg'óciy y'ungdijc y'anäctijc, ca' miich ixypiy ajcxy Dios xy'ung'adyii tiydudägy. Jadu'n miich ajcxy m'idipy nej tüg pi'c'anäg huidibi yteedy ca' y'ixa'ñyii. ⁹ Jadüg nax, taabi anajty ajt nbi'cnity, ñich ajt ndeedy ya naaxhuiñ xy'ñhuijim xycapxhuijim anajty, e xychaachytuunim co ca' ngapxymidoohuim nhuindzigiiyim ajcxy. ¿Nej co ca' huaad n'ijtim ane'my ma ajt ndeedy huidibi tzajpjoty yajpatp? E jadu'n jëbi nbaatim je jugy'ajtin huidibi ca' ycixipy

ytigoyipy nimina. ¹⁰ Hich ajt ndeedy ya naaxhuiñ xy'ñhuijim xycapxhuijim anajty mïd jada conbi jugy'ajt ycixpi, jadu'n nej je' anajty ajcxy oy'ixy. Nañ jadu'n Dios ñch ajt xychaachytuunim mïd ajt n'oy'ajt ycixpi etz jigix nmïd'ajtim huädz jot huädz huinma'ñ nej Dios ymïdity huädz yjot huädz yhuinma'ñ. ¹¹ Oy yjanchity co ca' ti tzaachypï ndzojçim ma yam nbaatim je tzaachypï, com ooy ndzachjihuïyim je tzaachypï, e ca' jotcuçj nayjihuiïyim. Per pinjaty ixpijçpi Dios chojçin mïd je tzaachypï ycixpi, chi je' yhuimbizimïygixy tüg jugy'ajtin tädägypï etz jotcuçjçpi.

Je huidibi ayo'ngojp co Dios y'ayuc ngacöbigaanim

¹² Paady miich ajcxy jotmicpijccix ma mmibijçin, jadu'n nipaadip nej jihuiï myajpidicçixy mgi' tiibi y'anucxiïyñi, etz mgoxcohuajc mic'ajt paady huidibi anajty ca' mic'ajt mïdity. ¹³ Ixtaaygix nï'aa tü'aa tïybi ma mdzinaayin, jadu'n nipaadip nej jihuiï yi mdecy huidibi mädiç ti chögy, e camina jadüg'oc yhuuidip.

¹⁴ Tzinaaygix mïd oyjot oyhuinma'ñ mïd nidüg'óciy jäy. Ca' mdungixipy ti tzip. Mïd'ajtcix tüg tzinaayin huätzpi, pen ca' jadu'n mdungixy, ni pin ca'ixipy je Huindzin Jesucristo. ¹⁵ Ooy cuenditungixp co ni pin cajijpyödüdiçpy je pubejtin huidibi Dios ti ahuanïy, jigix nañ jadu'n ni pin ycayajpaadipy janch mät yjot yhuinmañ, e yajhuindigoydäy yajmättäy jacjadyi ymïgügtijç, tim jadu'n nej tüg ujtç ta'mbi ypa'mduñ.

¹⁶ Ni tüg miich ajcxy ca' huaad ti ayuc mïd'aty mïd huingbi töxyjäy huidibi ca' miich mdöxyijç'adyi. Ca' nañ jadu'n m'ixtijipy je ayuc huidibi Dios yajhui'my mïd miich ajcxy ycixpi, jadu'n nej y'idich Esaú. Mïd tüg caayin uuçin Esaú toocnax je huidibi anajty möhuanip yteedy co y'unggoobity. ¹⁷ Miich ajcxy mnejhuïyb co Esaú tocy huidi anajty paatip co japada'ñ je conuuçxin huidibi anajty yteedy möhuanip, ca' jadu'n Dios cöbijçy, chi Esaú ooy yjayaaxni, per ca' anajty ñihuinma'ñ nej yjothuimbidiç mïd je' ycixpi tiibi anajty tuñ.

¹⁸ Ca' miich ajcxy ti mjaty ti m'ixy, nej jecy'ajty yi israelitas ajcxy yjajty etz y'ixy co ajcxy mihuingoñ je cop Sinaí ma anajty Dios ti pidägy mij jin, ma anajty ooy yhuidzucy yjidity etz mijpoj mïtigoy ñaxy, ma anajty ooy y'agoodziy anaxy. ¹⁹ Ni mgamidoy ajcxy je trompeta ni je Dios y'ayuc huidibi anajty ajcxy je' migapxip. Pinjaty je' midou je ayuc ypijctzou ajcxy may'ajt co ca' huaad yjacmigápçigixy com ooy anajty çigïygixy. ²⁰ Je' je' anajty ycixpi co anajty ca' mïmadägaangixy je ane'min cötujçin huidibi anajty minamb: "Pin anajty ytecy pidacp ma yi cop, hue' yi' y'oyaj'o'cnity cögäch mïd tzaa o mïd quipyijpxu'ñ, oy ixipy y'iyujcity." ²¹ Oy çigïyñi huidibi anajty yaj'ixp, Moisés ç'i'm minaan: "Tziyuuybich yam mïd tziç'i'ñ."

²² Per miich ajcxy jadu'n nipaady nej jihuiï ti mihuingoongixy yi cop huidibi yxi Sión etz je Dios juugypï ycajp. Je' je' je Jerusalén tzajpjotyç ma canaag mil je ángeles ajcxy yöymujccixy. ²³ Ti miich ajcxy mihuingoongixy ma ti yöymujccixy je jaccömaaybi jäy huidibi ajcxy yxi cojaay ma Dios ñecy jüby tzajpjoty, je huidibi ajcxy huin'ib huingapxtacp Dios. Ti miich ajcxy mihuingoongixy Dios je huidibi nijuez'ajtp tüg'óciy. Nañ jadu'n ti miich ajcxy mihuingoongixy je' ajcxy je oyjäydijç y'espíritu huidibi Dios ti yaj'ahuimbijttäy tudägy. ²⁴ Miich ajcxy ti mihuingoñ yi Jesús, yi huidibi xycodinaayim ma Dios mïd je jemybi cötujçin huidibi Dios yajhui'my mïd ñch ajt ycixpi. Yi Jesús huidibi mic'ajtmoy je Dios y'ayuc jemybi, co ñi'py teemy vojcy mïd ajt nbocy ycixpi. Yi Jesús co ç'i'm ñi'py teemy vojcy mïd jäy ajcxy ypocy ycixpi, niçi oy yi' ca'ydi co Abel iyujç ñi'py teemy vojcy mïd ypocy ycixpi.

²⁵ Paady ycixp ooy cuenditungix miich ajcxy, ca'ydi yaj'ixtijy Dios, je pin ti xyajmihui'mim jemybi y'ayuc. Je jäy ajcxy huidibi tzinay jecy'ajty, ca'p je' ajcxy çocy co ajcxy ixtijy Dios co jecy'ajty yjamigapxi ajcxy ya naaxhuiñ. O'ctiy ñch ajt ca' ndzoocim, pen nmooyim ajt njiç je Dios, je pin y'ayuc xyajmihui'mim huidi tzoon tzajpjoty.

²⁶ Co Dios y'ayuc yejcy jecy'ajty, chi yajtziyuuy ooy naax. Jadachambi Dios ymina'ñ: "Jadügtecypajc nyajtziyuuya'ñich je naax, e ca' nmīnaanīm naaxti'ajty, nañ jadu'n nya-jtziyuuya'ñich je tzajp." ²⁷ Co jadu'n Dios ymina'ñ: "Jadügtecypajc nyajtziyuuya'ñich je naax." Hue' yajhuinjihuīy co ytīgoydāhuīpy huīdijaty yūcxp huīdibi Dios yaj'oyīy, e je' huī'mīp je huīdijaty ca' yu'cxy. ²⁸ Paady je Jesucristo ycōtujcīn huīdibi Dios xyajmīhui'mīm, ca' yī' huaad ytīgoy. Tzoc yajnajxim Dioscojuyip mīid Jesús y'ayuc ycīxpi, e nyajmīj'ajtm n'ojadajtm Dios mīid tudāgy'ajt etz mīid huīndzīgī'ñ nej je' jāygidāgyīn. ²⁹ Ich ajt nDios jadu'n yī' nej tūg jīin huīdibi nōctaayb tūg'ōciy.

13

Nej jēbi nyajjāygidāacīm Dios

¹ Mīich ajcxy huīdibi mībijcp Jesucristo, ca' mjāydigōoygīxy co ajcxy mnaychójcīgīxīpy mīñ xyīpy nej jihuīy ajcxy mdūgquēxyity. ² Ca' ajcxy mjāydigōoygīxīpy co oyjāy'ajtm mdūngīxīpy mīid pīnjaty ajcxy xycojādīyb. Mīid co oyjāy'ajtm ajcxy tuūñ, chī nijējity ajcxy yajjāttacy āngeles ajcxy, nī ca' ajcxy huīnjihuīy co āngeles anajty tī yajjātaaccīxy.

³ Mjāymedzīp ajcxy pīnjaty tzumy'īñāayb mach'īñāayb jadu'n nej jihuīy mīich ajcxy nañ jadu'n mdzumy'īñāaygīxy mmach'īñāaygīxy quīpxy mīid je' ajcxy. Jāymeedzīp mīich ajcxy pīnjaty tzaachypī ayo'n mīnajxp yajnajxp, com nañ jadu'n mīich ajcxy mīidīty je nīnīcx huīdibi jēbi y'ayoy.

⁴ Huen nidūg'ōciy jāy huīndzīgīygyīxy yajmīj'ajtcīxy je pījcīn casada'ajtm. Huen je yēydīc etz je ytōxyīc naymīdtzīnāaygīxy yajxon, com Dios yī' tzaachytunīpy pīnjaty tundīgooyb mīid huīngbī tōxyjāy.

⁵ Ca' m'adzojccīxy meeñ. Mījotcujc'ajtcīxy tī ajcxy īi mīid. Dios tī je' ymina'ñ: "Camīna xīī ich mīich ajcxy n'īxmadzīpy, nī ich mīich ajcxy ngajāydgōyīpy." ⁶ Jadu'n jēbi nmīnaanīm agujc jotcujc: "Yī Huīndzīn Dios yī' xypubejtpīch, ca' ndzīgīhua'ñich jāy nej xyjatuna'ñich."

⁷ Jāymejtzīx mīich ajcxy je pīnjaty tī xyñīgohuajc'ajtcīxy, je pīnjaty tī xyajmīdmīydaaccīxy Dios y'ayuc ytiy'ajt. Huīnmaaygīx nej je' ajcxy anajty ytudāgy'aty, padungīx nej je' anajty ajcxy mīidīty ymībijcīn.

⁸ Jadu'n nej Jesucristo oybī tuñ jecy'ajty, nañ tm jadu'n oybī tuñ chambaad, etz oybī tuna'ñ huīnīxī huīnītiempo, ca' yī' yajtīgadzīp yī yhuīnma'ñ nī mīna. ⁹ Ca' mīich ajcxy myajhuīn'īngīxy mīid canaag īxpījcīn huīdibi ca' ytūgnaxīty mīid Jesucristo ytiy'ajt. Nīgī oy co ajt nbīdaacīm nhuīnma'ñ ma je Dios y'ayuc, nej yī' xychojcm xyjīhuīyīm, nej yī' may'ajt tuñ mīid ich ajt. Ca' mbīdaacīm mhūnma'ñ ma je cōtujcīn huīdibi adujcp nijējity caayīn uucīn. Nī tī jotcujc'ajt ajcxy capaty pīnjaty panīcxp yī jadu'mbī cōtujcīn.

¹⁰ Je judío tungmīdpī huīdibi huīndzīgī'ñ tumb anajty ma Dios yhuītīc je jecyīp, ca' yī' jēbi yjactuunī ma ich ajt nmībijcīn jadu'n nej Jesucristo tuñ huīndzīgī'ñ mīid ich ajt ycīxpi. ¹¹ Je judío mījtungmīdpī ma Dios ytīc ypidac īyujc ñī'py ma je Lugar Santīsimo nej tūg huīndzīgī'ñ huīdibi yajpocyñīhuaatzp je mayjāy. Je īyujc ōgy ñīnīcx jīguem je' yajnōgy, ca' jīūbyity cajpjoty ma je Dios anajty huīndzīgīygyīxy. ¹² Tm jadu'n nej je judío sacerdote yajnōgy je huīndzīgī'ñ īyujc ñīnīcx cajp nīnaxy, nañ tm jadu'n Jesús paty tzaachy'o'cīn cajp nīnaxy jīgīx mīid je' ycī'mnī'py pocyñīhuādzīp je mayjāy. ¹³ Tzoc mījpīdaacīm je Jesús tībī y'ōgy cajp nīnaxy mīid ich ajt nbocy ycīxpi. Tzoc mīnajxim yajnajxim je canayyajmīj'adīī je canay'īxa'nīī, tm jadu'n nej Jesús mīnajx yajnajx je canayyajmīj'adīī je canay'īxa'nīī.

¹⁴ Ya naaxhuīñ ca' ya ajt nmīdīty tūg ciudad ma jēbi n'ījtm huīnīxī huīnītiempo, je' ich ajt njīp'ījxm je tzīnaayīn huīdibi mīimb cīdaacp. ¹⁵ Paady ycīxp chojcpy co Dios n'ojadajtm nmībijctzoohuīm jabom jabom huīnīxī mīid Jesucristo yxīī. Co jadu'n n'ojadajtm nmībijctzoohuīm Dios jadu'n nīpaady nej tūg huīndzīgī'ñ nmooyīm. Tzoc īi mībijctzoohuīm, tzoc ojadajtm mīid ajt ngī'm'ahuac ngī'm'ayuc. ¹⁶ Ca' mjāydigōoygīxīpy

co oybi mdúngxixipy etz naybubéjtigix naybudigíyigix miñ xyipy. Co jadu'n mdúngxixipy jadu'n nipaady nej tüg huindzigi'ñ ti myejccixy ma Dios huidibi yi' ooy jáygidägy.

¹⁷ Capxymidoogix pinjaty xyñigohuajc'ajtcixp etz yajmij'ajtcixp, com yi' miich ajcxy xycuend'ajtip yi' m'alma. Nejhuuyim co ciyegaangixy ycuendi ma Dios nej ajcxy ti xycuend'aty. Pen oybi miich ajcxy mdumyb mïd yi' ajcxy, jotcuje ajcxy ñayjihuihuuyb. Pen jibic miich ajcxy mduñ mïd yi' ajcxy, tajip mayip ajcxy. E pen yi' ajcxy tajp maayb, chi miich ajcxy ca' ni ti jotcuje'ajt mmïd'adipy.

¹⁸ Mibijctzoogix Dios mïd ïch ycixpi etz je pinjaty xymïdhuidijtpich. Jatytim naymic'ïjxibich tudägy nduunich ma tüg'óciy ïch ndung, paady ycixp jotcuje nayjihuyiijich. ¹⁹ May'ajt nbijctzooybich ma miich ajcxy co Dios mmibijctzoogix mïd ïch ycixpi, jigix Dios a'ixihuiipy co nïcxibich tzoje ma miich ajcxy.

Oy'ajt etz capxpooxïn huidibi cogixïyñip je necy

²⁰ Dios nmibijctzooybich mïd miich ajcxy ycixpi. Je Dios huidibi yajjugypijc jadüg'oc ïch ajt nHuindzin Jesucristo co y'o'cy, je huidibi cuend'ajtp je maymibijcpidijc. Co Jesucristo ñi'py teemy yojcy, chi mic'ajt moy je jemybi cötujcïn huidibi Dios ti xyajmihui'mim. Dios ti pidägy Jesucristo jadu'n nej je cuend'ajtpi jac'oybi ma je maymibijcpidijc. Jadu'n yi' nipaady nej tüg cöbixy cuend'ajtpi huidibi cuend'ajtp may ngöbixy. ²¹ Je Dios huidibi xyajjotcuje'ajtim je' huen xyaj'ahuimbijtcixy huädz etz oyjäy ma tüg'óciy ajcxy mmibijcïn etz ma tüg'óciy ajcxy mdzinaayïn, jigix ajcxy mdunipy nej yi' tzocy. Dios huen tuñ ma ïch ajt njot nhuinma'ñ mïd Cristo ymic'ajt nej yi' tzocy. ¡Huen Cristo y'idipy mij cömay huinixii huinitempo! Amén. Jadu'n jada.

²² Nmïgügtijc, nbijctzooybich may'ajt yajtungixy mecxtujcïn ma jada ayuc capxhuijin. Ti ajcxy ii con nijayïyigixy. ²³ Nejhuuyigix miich ajcxy co ajt nmïgüg Timoteo y'ity ahuätztuum. Pen tzoje yjädy ya ma nyajpaadyich, chi yi' xymïdnïcxibich co ïch anajty miich ajcxy nïcxy n'ïjxcixy.

²⁴ Nguejxpyich ngapxpooxïn ma nidüg'óciy pin ajcxy xyñigohuajc'ajtp etz je mïgügtijc ajcxy huidibi mibijccixyp. Je mïgügtijc huidibi ajcxy yajpatp ya Italia yquejxyp ajcxy capxpooxïn ma miich ajcxy.

²⁵ Dios ajcxy xyconuucxip nidüg'óciy miich ajcxy. Amén. Jadu'n jada.

SANTIAGO

Yi Necy Huidi Santiago Yajnigujx Je Judío Mibijcpidijc

¹ Hich Santiago, ndzojcingix ich nduñ ma Dios etz je Huindzin Jesucristo ytung. Cham jada necy nyajnuexyich yi Israel jäy huidi ajcxy yajmij'ajtp Dios, huidi ajcxy xim yam yajpatp cajp cajp müid co yqueecpidizimy ajcxy Judea naaxjot co ymidzip ajcxy chach'ixhuididiyi chachpahuididiyi ajcxy.

Je tiy'ajt huilib tzoon ma Dios

² Migügtijc ajcxy co yi mmidzip ajcxy xychach'ijxmadzaangixy nej miich ajcxy mjot mhuinma'ñ müidity, co yi' ajcxy xy'ixhuidijtcixy xypahuidijtcixy, co xyñigapxcixy xyñi'ojiiygixy, co xyajhuinma'ñydgoyaangixy, ca' mdajipy mmayipy ajcxy, jotcuyc ajcxy mnayjihuihuüyb. ³ Miich ajcxy mnejhuüyigixyp co jadu'n mmimecxtujccixyp je tzaachyp i ayo'n huilibi mmajncixyp myajncixyp müid co ti mmijpidaaccixy Jesucristo, huin'it mbáatcixipy mic'ajt, jigix jébi mmadactaygixy tüg'óciy jibic-huinma'ñ. ⁴ Copicy miich ajcxy mmadactáaygixipy tüg'óciy jibic-huinma'ñ, ca' ma mdundigóoygixipy, e huin'it huadz mjot mhuinma'ñ müid'adipy ajcxy, ca' ti myajtigoy y'idipy ajcxy.

⁵ Pen nidüg miich ajcxy myajmayjaty oyhuinma'ñ, co jäy ajcxy xychach'ijxmadzaani mjot mhuinma'ñ nej müidity, mibijctzou Dios huen xymöy je oyhuinma'ñ, com yejcpy yi' oyhuinma'ñ müid tüg'óciy jäy co pijctzoy. Ca' yi' cohuindugyüi, ca' huaad xy'ojim co nbijctzohuim oyhuinma'ñ. ⁶ Copicy pijctzohui Dios huivy'ajt cujc'ajt cixyot huinijot, ca' y'ametz yjotmetzity. Pinjaty ametz jotmetz Dios mibijctzooob, ca' tú'ciy müidity yjot yhuinma'ñ, janam jatzojc yajtigach yhuinma'ñ jadu'n nej je mejy co ypidigy y'ixtägy müid je poj. ⁷ Co jäy ajcxy ametz jotmetz mibijctzoogixy Dios, Dios ni ti jadu'n cayecy. ⁸ Yi jadu'mbi jäy ajcxy ametz jotmetzpi canaagnax yhuinma'ñ ajcxy müidity, ca' tügjijp yhuinma'ñ pidaaccixy ma Dios.

⁹ Yi ayooitijc huilibi mijpidaaccixyp Dios, ooy jäygidägaangixy co Dios ypubedüyb ypubigihuyb. ¹⁰ Yi comeñjyay ajcxy huilibi mijpidaacp Dios, ooy jotcuyc ajcxy ñayjihuihua'nyii co ajcxy ymeñ ytíctähuipy jadu'ñyi. Com yi' ajcxy ymeñ tigoyamb yi' jadu'n nej tüg pijy co ñiicxni müid xii an. ¹¹ Co xii ypejtni, chi ooy y'andaacni mic, e chi je jinboj ypidizimy, chi je pijyquipy ytích, chi yhuingädaayñi je pijy, e jadu'ñyi ytigoydäy je pijy oy'ajtin. Jadu'n nej yjaty yi pijy, ñan tim jadu'n yjada'ñ comeñydijc ajcxy, jadu'ñyi ñitigoyaangixy yjugy'ajtin.

Co yjot yhuinma'ñ chach'ijxmadza'ñyii

¹² Jotcuyc pinjaty mmimecxtujctaayb jadu'n nej ajcxy yjot yhuinma'ñ chach'ijxmadza'ñyii. Co jadu'n mmimecxtujctáaygixipy, Dios möhuüb ajcxy jugy'ajtin huinixibi, huilibi yajhuinhuanüy tüg'óciy jäy ajcxy huudijaty Dios tzojcp yajmij'ajtp. ¹³ Co pin nijot'aty co tuna'ñ ti jibicpi, ca' ymina'nipy co Dios anajty jadu'n yajtundigoyaani. Dios ca' ti jibicpi tuñ müid jäy ajcxy. E nañ ni pin ca' huaad ijxmach Dios nej yjot yhuinma'ñ ymidity. ¹⁴ Ci'm ajcxy jadu'n ñaydunyüi, co tzachnijot'ajtcixy canaagnax jibic-huinma'ñ. ¹⁵ Co jäy ajcxy nijot'ajtcixy jibic-huinma'ñ, pocy anajty ytungixy. Ti ajcxy anajty ooy ypocynibejtni co nicxy y'ó'ccixni.

¹⁶ Migügtijc ajcxy, huilibi ooy ndzocy njihuüyich, ca' mnayhuin'ünigixy. ¹⁷ Hich ajt nDios Teedy huilibi tzajpjoty tzinaayb, yi' huilibi yajcojtaay xii madza' huilibi jajp tixxp, yi' je' yejctaayb tüg'óciy tijaty oybi, tüg'óciy yhuinma'ñ huilibi ich ajt nmüid'ajtim. Dios ca' yi' yjot yhuinma'ñ yajtigach jadu'n nej yi' xii madza' yjajin ytícxin ytigach. ¹⁸ Dios y'oydumyub huinjemy ich ajt njot yhuinma'ñ müid yi' y'ayuc ytüy'ajt, jigix jébi ich ajt

nmí'ijtm oyjot oyhuinma'ñ. Yi jäy ajcxy huídibi yajmij'ajtcixp Jesucristo, Dios nīgi tzocy ajcxy ca' jac ti huídibi oyduñ.

Je tìy'ajt tìydudäcypì

¹⁹ Migügtjic huídibi ìch ooy ndzocy njihuïyich, mnejhuïhuïpy miich ajcxy jada co ooy ycopicyity mmido'mbijctähuïpy ajcxy Dios y'ayuc ytìy'ajt, ca' mjäydgóoygixipy, ca' mgapxmayïygixipy, pen mjotmätcotp ajcxy ca' anajty mguydungixy Dios ytìy'ajt. ²⁰ Je jäy huídibi jotma'tp, ca' je' tuñ huídibi Dios yjäygidacyp. ²¹ Ixmajtztaaygix yi jìbic ayuc, ca' mnijot'ajtcixy yi jìbic-huinma'ñ. Cöbjccix mïid oyjot oyhuinma'ñ yi Dios y'ayuc ytìy'ajt, yi huídibi Dios ti yajnicödugiy, huin'it jëbi ajcxy m'alma nïdzoocin paady.

²²⁻²⁴ Cuydungix ajcxy Dios y'ayuc ytìy'ajt, ca' ajcxy mjotcujc'adipy mïid yìyì co m'amidoo'ijtcixy, hue' anajty nigoo mnayhuin'ïnigixy. Peni nigooob Dios y'ayuc m'amidoo'ijtcixy, e ca' mmijpidaaccixy ca' mguydungixy, naadigi' anajty m'amido'ijtcixy. Jadu'n miich ajcxy nipaady nej pìn yhuïñyjìp aa'ijxnajxp ma tügì ijx. Co ñay'aa'ijxnajxtäyìi, chi yjihuägy, e mic'amy jäydgoydäy nej yhuïñyjìp ti icy. Naadigi' anajty ti ñay'aa'ijxnaaxyii. ²⁵ Pen miich ajcxy yajxon m'ixpijcy Dios ytìy'ajt, je tìy'ajt huídibi yaj'oyihuip ajcxy mjot mhuinma'ñ, pen mmijpidaaccixyp, pen mguydungixyp Dios y'ayuc, e ca' mjäydgóoygixy, chi jada' Dios xyconuucxip ajcxy mïid jëgixpi huídibi anajty mguydungixyp.

²⁶ Pen ji pìn ñayjihuïyìi co cuyduni Dios ytìy'ajt, e ca' ñay'ahuijtzygìi, cì'm anajty ñayhuin'ïñyìi, tundigooyb anajty, e ca' yjanchity co mijpidaaci Dios ytìy'ajt. ²⁷ Pen miich ajcxy huädz mijpidaaccixy Dios etz mguydungixy yì' ytìy'ajt jadu'n nej jëbi Dios jäygidägy, hue' tzocy co mbubéjtcixipy mba'ayóogixipy co'ögy'ungdijc, etz co'ögy ytöxyjäydijc ma ayo'n jotmay ajcxy patcixy. E ca' huaad jìbic-huinma'ñ mjactungixy, jadu'n nej jadyii naaxhuïñyjäy y'iditczixy, huídi ca' mijpidaaccixy Dios.

2

Ca' huin'ijxpety migüg myajmij'ajtcixipy

¹ Migügtjic ajcxy, co m'ojadaajtcixy co mmijnicxpejtcixy ìch ajt nHuindzin Jesucristo, yì huídibi tzajpjoty ane'm, ca' ajcxy huin'ijxpety migügtjic myajmij'ajtcixipy. ² Pen jim jäy ytigiy ma mnayyöymújcigixy comeeñybi mïid oori cijüitz, etz mïid yhuít yxoix janch oybi, etz pen nañ tìgìyb tüg jäy ayoob huídibi yhuít ytucxy cìtz tuc nìbüdy xipüdy. ³ Chi miich ajcxy je' jac nīgi myajmij'ada'ñ je comeeñybi huídibi oyxoxy, e chi mnimähua'ñ: “Íña' miich ya ma jada oybi ñaaybejt.” E je ayoob jäy mnimähuaangixy: “Íña' naaxcíxy o jim jadu'n tina.” ⁴ Co jadu'n m'iditzip ajcxy, ca'p anajty jadu'n ytìy'ajtity. Mdundigooygixy anajty ma Dios ytìy'ajt co huin'ijxpety ajcxy migüg mdzogipy. Hue' anajty myajtungixyp jìbic-huinma'ñ co jadu'n m'ixtjicixipy jäy huídibi ayoob.

⁵ Migügtjic ajcxy, Dios ti huin'ixy yì ayoobitjic, jëbi ajcxy mijpidägy Dios etz jëbi ajcxy paadipy it lugar ma Dios y'it tzajpjoty. Jadu'n Dios yajhuinhuanìy pìnjaty tzojçip jihuïyìp co it lugar möhua'ñ jìiby tzajpjoty. ⁶ Myajtzo'yduungixyp miich ajcxy ayoobitjic. ¿Nej cayì comeeñyjäy ajcxy huídibi miich ajcxy xychachxìp ma cötujctac, e xyajnicxcixy ma tungmìdipi yhuinduu, oy ajcxy mdzocy mgatzocy? ⁷ ¿Nej ca yjèjity ajcxy huídibi jìbic nigapxp ni'ojìyb Jesucristo, je oyjäy huídibi miich ajcxy myajmij'ajtcixyp?

⁸ Pen janch miich ajcxy mguydungixy je tìy'ajt huídibi jaybety ma Dios ylibro: “Mdzogipy mjihuïhuïpy mmigügtjic hueñytimypinity, jadu'n nej miich ajcxy cì'm mnaychogyii mnayjihuïyìi.” Pen jadu'n anajty mdungixy, tüg anajty oybi mdungixyp. ⁹ Pen huin'ijxpety ajcxy anajty jäy myajmij'ajtcixy jadu'n nej yhuít yxoxy ajcxy mïidity, mdundigooygixyp, e ti anajty mnayyajpocycähuigixy ma Dios ytìy'ajt. ¹⁰ Pen tüg jäy cuydundaayì Dios ycötujcìn, co nicxy tüg cacuyduñ, jadu'n nipaady nej jihuïy anajty janch

ni tög cötujcin ti cacuyduñ. ¹¹ Je Dios je cötujcin ti pidägy co ca' huaad mmigapxtigooyipy töxyjäydijc, etz nañ ti cötujcin pidägy co ca' huaad njäyyaj'o'cim. Pen mmigapxtigooyb töxyjäydijc, oy ca' ti mjäyyaj'ögy, ti anajty mdundigooy mij ma Dios ytüy'ajt. ¹² Capxcix miydaccix, tungix nej jëbi huaad jäygidägy ñich ajt nHuindzin Jesucristo nej je' cuyduñ yí ytüy'ajt. ¹³ Ca' ti pa'ayoohuin paadipy ma Dios, pin ca' tuñ ti pa'ayoohuin ma ymigügtijc. Pin pa'ayoohuin tumb ma ymigügtijc, je' capxpaady y'idip co anajty Dios tüyduñ yí yjäy.

Je mibijcpi etz je ojjäy'ajtin

¹⁴ Migügtijc ajcxy, ni ti m'alma capada'ñ pen miich mmınaamb co myajmij'ajtyp Dios, e pen ca' myajnigüexigy ni ma co oybi mduñ. Ca' Dios yajnödzoğa'ñ yí m'alma miid co nigooob mmına'ñ co Dios mmijpidägy, e ca' mguyduni yí ytüy'ajt. ¹⁵⁻¹⁶ Pen miich ajcxy miid tög migüg yëydijcpi o töxyjäybi huidibi yajmayajtp yhuít ytucxy caayin uucin, e chi nigoo miich ajcxy mnimähuiipy: “Ñicx agujc jotcujc, Dios xypubedipy xypudigihuiipy, ca' mdich'ögipy ca' myuu'ögipy.” E miich ca' anajty ti ti mmöy huídijaty yajmayajtpy. ¿Ti ojjäy'ajtin anajty ti mduñ? ¹⁷ Pen miich minamb co myajmij'ajtyp Dios, e ca' ojjäy'ajtin mduñ miid mmigügtijc, ytimyñipaty jadun nej ixypy ca' mmibicy yí Dios ytüy'ajt.

¹⁸ Ca' yjeczy co tög jäy xyñimähuibich jadun: “Miich mdzachmijpidacpy yí Dios ytüy'ajt, e ñich ndumybich oybi.” ñich n'adzohuiipyich yí jadumbi jäy co ca' jadun ytüy'ajtiny nej miich mina'ñ. Pen ca' miich mmijpidägy Dios y'ayuc, ca' mjadipy nej mdunipy oybi jadun nej Dios huaad jäygidägy. Co ñich oybi nduñ, jadun ñigüexigy co nmijpidägyich Dios. ¹⁹ Miich mmibijcpy co Dios ji tügpajc, e oy jadun co mmibicy. Nañ jadun yí ca'oybi ajcxy mibijcpi etz chigüyb ajcxy Dios. ²⁰ Loci miich, ca' mhuinjihuñhua'ñ je tüy'ajt. Co pinjaty mibicy Dios, e ca' yajnigüexigy co oybi tuñ, ca' tiydudägy mibicy Dios. ²¹ Je Abraham yejc tög ijxpejt nej jëbi huaad ngapxymidoohuim Dios co jecy'ajty je' ymang Isaac cüeyc nej tög huindzigi'ñ ma Dios. ²² Je Abraham ymibijc co Dios yjiijity etz nañ ycapxymidou nej Dios ñimaayi. Paady nejhuñyim co yjanchity co Abraham mijpidacy je' Dios miid co cuyduñ jadun nej Dios ñimaayi. ²³ E jadun oy cuyduñäy nej yjaybetyity ma Dios ñecy: “Yí Abraham ymijpidac Dios, paady Dios ymecxtaayi ypocy, e ycöbijci jadun nej jihuñy ca' anajty ytundigoy.” Paady ycixpi Abraham oyñaydiyii: “Co Dios minaymigüg'adyii.”

²⁴ Cham nejhuñygyx co Dios ycöbijcpi jäy huídibi cuydungixp yí ytüy'ajt, e ca' mnınaanim miid jëyi co ymibijccixy. ²⁵ Tim jadun nej Abraham yjajty, nañ tim jadun yjajty miid je töxyjäy huídi anajty yxñ Rahab, huídibi anajty ooy ti ytundigoy miid mayyëydijc. Je Rahab ycoyüdz ma ytijc nimetz jäy huídibi anajty Israel jäy yaj'ijx'ijtyp, e chi yajqueegüy ma huingbi tü'aa, e jadun ajcxy yajtzoocy ma ymidzip. Miid co jadun ojjäy'ajtin tuñ miid je Israel jäy, chi Rahab oy paady je nüdzoocin ma Dios. ²⁶ Je ninicx huídibi ca' alma miidity, ca' ni ti mic'ajt miidity. Nañ tim jadun pinjaty mibijcpi co Dios yjiijity, e ca' cuyduñ Dios ytüy'ajt, yí ymibijcin ca' Dios cuendipicy.

3

Co pinjaty nigapxy ni'ofiy ymigüg

¹ Migügtijc ajcxy, huinmaygix yajxon pen janch mnajtztzogüygixy co ajcxy mni-huindzin'adaangixy Dios y'ayuc. Com ñich ajt huídibi nyaj'ixpijim Dios y'ayuc, pen tundigooyim nigü mij nyajtiydunaanim. ² Nidüg'óciy ñich ajt ndundigooyim minajity. Pen ji pin ca' y'idigooy ycapxtigooy, yí tiydudägy anajty yjäy'aty, jëbi ñaygüend'adyii yajxon, e ca' huaad y'ocjactundigooyñi. ³ Ypidacpy jäy freno ma cohuay y'ahuac jigix jëbi ane'my je cohuay nej tzocy. Nañ jadun tzocy co jäy ajcxy huen y'ahuac ahuijtcixy jadun nej jäy cohuay ane'my miid freno. ⁴ Nañ jadun yí barco oy mabaad ooy yjamijity, per ooy poj ytijminyii ytijxibyii. Je barco yaj'ane'm yajxon miid tög pi'c pujx yindi'cni huídib xiijip timón. Yajxon ytüyöy je barco ma je' timdzocy je huídibi ane'mip. ⁵ Nañ

jadu'n yjaty m'iid yi tootz, janch tim yindi'cni yi', per ooy mij cajee tuñ jibicpi, jëbi y'iidigooy ycapxtigooy mij cajee. M'ijxyp miich ajcxy nej tim yindi'cni jin mij ooy nögy quipychaa miy'ujtz. ⁶ Yi jäy ajcxy y'ahuac nañ tim jadu'n nej pi'c jin, m'iid nhuin n'ahuac mijcajee n'iidigooyim ngapxtigooyim. Co jadu'n n'iidigooyim ngapxtigooyim, chi jëbi mijcajee midundigooyim mayjäy. Co n'iidigooyim ngapxtigooyim, etz nayya-jpocycähuim, chi ñiguëxigy canaagnax jibic-huinma'ñ huidibi nm'iid'ajtim. Jada jibic-huinma'ñ jim yi' nbaatim ma je mujcu' huidibi tzinaayb ma yi infierno. ⁷ Yi naaxhuiñyjäy ti mimadaaccixy yi iyujc animal huidibi queegicp queec-huidijtp, naag iyujc ahua'nbi, etz iyujc n'ijotyp. Ti ooy yajmaxiygixy yajxon iyujc huindzicyp etz ahua'nibi. ⁸ Yi naaxhuiñyjäy oy ti mimadaaccixy yi iyujc animal, per nitüg ycaca'ty pin yajxon y'ahuac ahuijtzigipy, ac'iidigooygixp capxtigooygixp ajcxy. Pin ymigüg nigapxy ni'ojhyb, huin'it je ymigüg ooy jibic ñayjihuihua'ñyii, jadu'n nej jihuiy veneno ti möy ymigüg. ⁹ M'iid jada' nhuin n'ahuac ajt ngapxpaatim ich ajt nHuindzin Jesucristo etz ich ajt nDios Teedy. Nañ jadu'n m'iid nhuin n'ahuac nigapx ni'ojhyim nmigügtijc. Dios ti yajcojy yi jäy m'iid oyjot oyhuinma'ñ jadu'n nej yi' oyjot oyhuinma'ñ m'iidity, paady ca' y'oyity co n'iidigooyim ngapxtigooyim. ¹⁰ M'iid nhuin n'ahuac ajt m'iid ngapxim oybi ayuc etz jibic ayuc. M'iid nhuin n'ahuac yi' m'iid ngapxpaatim etz ni'ojhyim nmigügtijc. Ca' jadu'n y'oyity co jadu'n n'aditzim. ¹¹ ¿Nej jëbi jada' ma tüg n'igop ypidzimy ni päcpi etz ni ta'mbi? ¹² Migügtijc ajcxy, ¿nej jëbi jada' yi higueri ytim'aty aceituna etz yi muuxy'aadz ytim'aty higos? Nañ tim jadu'n ma ni ymuxy tamtzpi, ca' jim ypidzimy ni päcpi. Paady ycixp ca' y'oyity co jäy ajcxy capxcixy oybi etz jibicpi.

Je tiy'ajt janchyp

¹³ Pen miich ajcxy huijycujc m'ayjihuiy, pen oyhuinma'ñ ajcxy mm'iid, yajtungix m'oyhuinma'ñ ma mdzinaayin mjogy'ajtin. Ca' huaad ci'm ñaygömáayigixy. M'iid je oyjäy'ajtin huidibi ajcxy mdumyb huen jäy ci'm nejhuiyigixy co oyhuinma'ñ miich ajcxy m'iid'ajtcixyp. ¹⁴ Pen ta'm mjot mhuinma'ñ mjihuiyigixy, pen mga'oy'ijxcixyp ymigügtijc, pen mhunnaxtugaangixyp ymigügtijc, pen jadu'n mjihuiyigixy mhuinmaayigixy, huin'it ca' huaad m'aygömáayigixy ci'm co mdzachcuydungixy Dios ytiy'ajt, com ca' yjanchity, nigoo m'anidaaccixy. ¹⁵ Jada jibic-huinma'ñ ca' jada choon ma Dios huidibi tzinaayb tzajpjoty. Ya naaxhuiñ jada jibic-huinma'ñ yajpaady, m'iid co jäy tzachnijot'ajtcixy jibic-huinma'ñ. Yi mujcu' yejcpy jada jibic huinma'ñ, e ca' nminanim co Dios yecy jada jibic-huinma'ñ. ¹⁶ Paady ycixp co jäy ajcxy ycanay'ixa'ñyii, co huinnaxaangixy ymigüg, chi ca' oy y'ijtcixy, oy ajcxy ñaymidundigoooyigixy mijcajee. ¹⁷ Je huijy'ajt cujc'ajt huidibi Dios yejcpy, ooy yi'. Yi Dios huidi tzinaayb tzajpjoty oyhuinma'ñ ym'iid. Pen nyajtuunim je tiy'ajt huidibi Dios ti xymooyim, chi jotcujc ndzinaayim, ca' ma tzip capxy, etz nmimecxtujcim nmigügtijc, etz yung naxy jot huinma'ñ nm'iid'ajtim, etz nba'ayoohuim nmigügtijc, etz nduunim oyjäy'ajtin, etz tudägy nhuinma'ñ nm'iid'ajtim. E ca' nigoo naybidaacim jadu'n nej jihuiy nmijpidaacim Dios, e ca' yam yjanchity. ¹⁸ Co nyajtuunim je huijy'ajtin cujc'ajtin huidib Dios yejcpy, chi jotcujc ndzinaayim m'iid tudägy njot nhuinma'ñ, jadu'n nej jëb Dios jäygidägy.

4

Co pinjaty nijot'ajtcixy mayñax tzinaayin

¹ ¿Ma'amy ajcxy mdijy choon je tzip capx huidibi yajpatp ma miich ajcxy? Tüg'óciy yi jadu'mbi jibicpi yajpatp ma ajcxy mjot mhuinma'ñ, paady ycixp m'ganay'ayuc-huinjihuiyigixy, e tzipcapxy myajcojcxixy myaj'abadiyigixy. ² Ooy miich ajcxy tijaty m'jatzojccixy, e ni ti mgapaatcixy, e huin'it mjäy'aj'öccixy. Ooy m'adzojccixy tijaty migüg yj'ajtyp, paady ycixpi mdziptungixy, etz m'ganay'ixáanigixy. Ca' ti jotcujc'ajtin mbaatcixy, com ca' ajcxy mbijctzoogixy ma Dios. ³ Co mjamibijctzoogixy Dios, chi

ca' ti mbaatcixy, m̄id co mb̄ijctzoogixy m̄id jib̄ic-huinma'ñ. Mb̄ijctzoogixyp co mya-jtunaangixy ma ca' ypadyii. ⁴ Mdundigooyb ajcxy. ¿Nej ca' mnejhūiygixy co Dios ca' jāygidāgy pen mdzachnijot'ajtyp ajcxy yi mayñax tzinaayin? Pinjaty nijot'ajtcixyp yi mayñaxpi tzinaayin, jadu'n yi' ajcxy nej yi jacjadyii jāy ya naaxhuiñ hūidibi ca' yajmij'ajtcixy Dios ytiy'ajt. Hue' je' ajcxy y'ahuimbity Dios ymidzip. ⁵ Nej miich ajcxy mdijy, naadigi' ymiñ jaybety ma Dios yñecy: “Je Esp̄ritu Santo hūidibi Dios ti xy'adigīiyim ti xyjottigīiyim ooy xychojcim xyjihuīiyim mijcajee.” ⁶ Dios ninigoobi may'ajt oy'ajt tuuñ m̄id iich ajt ycixpi, paady ycixpi ymina'ñ ma Dios ñecy co ca' yi' oy'ixy pinjaty amij agix nayjihuīiyip. Dios yejcpy may'ajt oy'ajt ma yi jāy ajcxy hūidibi yung naxy jot huinma'ñ m̄idity. ⁷ Naybidāacigix cixyot huinijot ma yi Dios. Mic m̄ihuindinaaygix yi mujcu', e jihūāgipy yi' ma miich ajcxy. ⁸ Ojadajtcix Dios m̄id oyjot oyhuinma'ñ, e Dios xypubedipy xypudigīihuipy ajcxy. Miich ajcxy pocyjāydijc, ixmajtcix yi jib̄ic-huinma'ñ. Yajhuaatcix yi mjot yi mhuinma'ñ miich ajcxy hūidibi ametz jotmetz m̄ibijcp. ⁹ Tajcix maygix, amutzcīiygix. Huen yi mxiicin yi mxondaacin ahuimbity j̄iyin yaaxin. E yi mjotcujc'ajtin huen ahuimbity taj̄i mayi. ¹⁰ Pidaccix yung naxy yi mjot yi mhuinma'ñ ma yi mHuindzin Dios, e yi' may'ajt oy'ajt tunipy m̄id miich ajcxy ycixpi.

Ca' huaad nigapxcixy ni'oj̄iygixy ymigūgtijc

¹¹ Migūgtijc ajcxy, ca' mnayñigāpxigixy mnayñi'oj̄iyigixy miñ xyipy. Pen mnigapxyp mni'oj̄iyb mmigūgtijc, hue' mnixicpy myajxiicpy Dios ytiy'ajt hūidibi m̄inaamb co myajmij'adipy yi mmigūg jadu'n nej mnayyajmij'adyii ci'm. Pen mnixigamyb myajxigamyb Dios ytiy'ajt, ca' anajty mguyduñ yi tiy'ajt, e jadu'n yhuimb̄idzimyb nej ixipy miich m̄ina'ñ co Dios ytiy'ajt ca' yi' y'oyity. ¹² Dios tūgpajc hūidibi ane'm̄in pidāgy, e yi' je' tūgpajc hūidibi tiydunamb pocyjāy. Yi Dios tūgpajc hūidibi yajtzōgip o yajtigoyip jāy ajcxy y'alma. Paady ycixpi miich ajcxy ca' ypadyii nicxy migūg mnigapxcixy mni'oj̄iygixy.

Dios tūgpajc nejhūiy nej je jabombi mimb cidacp

¹³ Tungix cuendi iich n'ayuc miich ajcxy hūidibi m̄inamb: “Cham o jabom n̄icxim ma yij̄imbi naax cajp, e jim nyajnajxim jimij̄t agujc jotcujc, jim negocio nduunim, ooy mijcajee nbaatim.” ¹⁴ E miich ajcxy ni mganejhūiygixy ti je' anajty je jabombi mimb cidacp. Je jugy'ajtin ni pin ca' nejhūiy nej pin chināhua'ñ yjugy'ada'ñ. Jadu'n miich ajcxy mjogy'ajtin nej joc co y'ocquēxigy cham, e tim tūgaxigy ti ñitigooyñi. ¹⁵ Jac'oy ajcxy m̄mina'ñip: “Pen Dios jadu'n tzojp, pen xymooyim jugy'ajtin, jēbi cham o jabom nduunim tijaty.” ¹⁶ Miich ajcxy ci'm mdzachyajnihuinmaaygixy ti mdunamyb, ci'm mdzachnaygōmayyii ajcxy. Ca' jadu'n y'oyity co ci'm mnaygōmāayigixy; co ci'm mnaybidāacigixy amij agix, ni Dios mgam̄ibijccixy. ¹⁷ Pin janejhūiyb je oybi, e ca' tuñ, pocytumb anajty.

5

Je comeñyjāy yjugy'ajtin nitigoyam

¹ Comeñydijc, oc'amidoo'ijtcix nej cham n̄mina'ñich. Amutzcīiygix, tajcix maygix co xyñim̄inaangixy ayo'n. ² Miich ajcxy m̄meeñ etz ajcxy mjogy'ajt ñitigoyamb yi', miich ajcxy mhuit mducxy ti uucxyting yj̄icxtāyii. ³ Miich ajcxy m'oori, ajcxy mplata, ajcxy m̄meeñ naadigi' ti myujpijccixy ti m'amay'ajtcixy. Ti ixipy myajtungixy m̄id oyjāy'ajtin. Co ti myujcp̄ijccixy ti m'amay'ajtcixy ji jadu'n je tiy'ajt co mdundigooygixy ma Dios. M̄id co yi m̄meeñ ca' ti myajtungixy m̄id oyjāy'ajtin, paady ycixpi ayo'n mbadaangixy m̄id je xīi tiempo hūidibi mimb cidacp, m̄ina Dios tiydunaangixy pocyjāydijc. Nitigoyamb miich ajcxy m'oy'ajtin. ⁴ Mdundigooygixyp co ca' ca'pxy ti mmujuuygixy mdumb̄idijc hūidibi ti myajtungixy ma ajcxy mgamdu'. Yi mdumb̄idijc cham ooy miich ajcxy xīy ma Dios. Yi Dios, je Huindzin mijpi, hūidi ane'mdaayb tūc'óc̄iy j̄iiby tzajpjoty etz ya

naaxhuiñ, yi' ñejhuiydaayb nej miich mdumbi ajcxy ymīnaangixy. ⁵ Ti miich ajcxy agujc jotcujc mdzīnaaygixy ya naaxhuiñ mīd mayñax xondaacīn. Ti miich ajcxy mgūxyii mbedyii, ti ajcxy m jotcujc'ajtcixy. Cham m'ahuijxcixyp yi tzaachypī yi ayo'n huiḍibi ajcxy mbadamyb ma Dios, jadu'n nej huaj nīcxpī ahuixy co jāy ajcxy chūdza'ñyii. ⁶ Miich ajcxy comeñyājyḍijc ti miich ajcxy mxīgixy mnīhuambejtcixy, mdzaachtungixy ti myaj'ōccixy jāy ajcxy tudāgypī, e ca' yi' ajcxy xymīhuimbijty.

Je mecxtujcīn etz je capxtāgī

⁷ Migūgtijc ajcxy, yajtungixy mij yi mecxtujcīn mabaad anajty je Huindzīn Jesús ymiñ jadūgtecy ya naaxhuiñ. Tīm jadu'n nipaady nej naymīdumbīḍijc ahuijxcixy je tīibi nidungīygixy, ahuijxcixy mīd mecxtujcīn je oga'n tuu etz je poj tuu huiḍi mīd je' ypīdāgy yhuindīhuipy. ⁸ Mīd'ajtcix nañ jadu'n ooy mecxtujcīn, etz ca' m jotmetzcīygixy, com huingomb je tiempo mīna ymiina'ñ je Huindzīn Jesús ya naaxhuiñ jadūgtecy. ⁹ Migūgtijc ajcxy, ca' jadūg jadūg mnayñigāpxīgixy nayñi'ojīyīgixy. Pen jadu'n mdungixy Dios miich ajcxy xyajpocycāhuipy, com tīm huingonīp je xīi je tiempo mīna Dios tīyduna'ñ jāy ajcxy mīd ypocy ycīxpī. ¹⁰ Migūgtijc ajcxy, pījccix je i xpejt jadu'n nej tzaachypī mīnajxy yajnajxy je profetas ajcxy huiḍibi ajcxy hīhuācxp capxhuācxp je Huindzīn Dios y'ayuc. ¹¹ Mīnaanīm jadu'n, mīd co ajcxy ooy mīmecxtucy nej jāy jībic ytuuñ mīd yi' ajcxy, e chī jotcujc cham yajpaady ma Dios. Ti jada' m jaty mīdoogixy je ayuc nej Job ayo'n tzaachypī mīnajxy yajnajxy, e ymīmecxtujc je'. Mīd co ooy anajty mījpīdāgy Dios, paady Dios pa'ayoy Job, e conuucx mījcajee.

¹² Migūgtijc ajcxy, co tijaty ayuc m'adzohuimbīḍipy, tīydudāgy ajcxy m'adzohuipy: “Janch jadu'n o ca' yjadu'nīty”, ca' ajcxy m'īndāgīpy. Ca' Dios nīgoo m'ībaadīpy mgapxpaadīpy. Nī ca' m'ībaadīpy mgapxpaadīpy yi naaxhuiñybi o tijaty ya naaxhuiñ. Huin'it ca' mnayyajpocycāhuīyb ma Dios.

¹³ Pen jī pīn ma miich ajcxy ti ayo'n mīḍity, huen mībijctzoogixy Dios mīd yi jāy ycīxpī huiḍibi ayo'n mīd. Pen miich ajcxy jotcujc nayjihuīyīp, huen huin'īgixy Dios. ¹⁴ Pen jī pīn nidūgtī ypīgyii ma miich ajcxy, huoomīngix yi' huiḍibi ajcxy nīgohuajc'ajtp yi mībijcpīḍijc, jīgix ajcxy mībijctzoohuipy Dios mīd je pa'mjāy ycīxpī, etz pīdāgīpy hueenī aceite ma je jāy ycohuajc etz capxpaadīpy yi Huindzīn Jesús yxīi. ¹⁵ Mīd co miich ajcxy mmījpīdaaccixy e mmībijctzoogixy Dios, paady ycīxpī tzōgīpy yi pa'mjāy. Chī je Huindzīn Dios yejcnīp mīc'ajt oy'ajt, etz ymecxtaayīpy yi' ypocy huiḍibi anajty ti tuñ. ¹⁶ Capxpīdzīm yi mbocy nidūg nidūg. Ñayñībijctzoohuīyīgix nidūg nidūg ma Dios, jīgix ajcxy mdzōgīpy. Pen tūg tudāgypī jāy ymībijctzooyb yi Dios cīxyjot huinījot, madāgīpy yi' mīd y'oracīōn. ¹⁷ Elías nañ tīm jadu'n anajty yjothuinma'ñ mīḍity nej hīch ajt. Janch cīxyjot huinījot mībijctzooy Dios ca'jity ytūy, e ca' je' jadu'n ytuuy tugīg jīmījt ja tudujc po'. ¹⁸ Chī jadūg'oc Elías mībijctzoy Dios co huen tūy, chī Dios yajtuuy, e chī ya naaxhuiñ yhuindīy je jāy ajcxy ypīdāgy.

¹⁹⁻²⁰ Migūgtijc ajcxy, pen jī miich ajcxy nidūg ñīḍīgoy ytūḍīgoy ma yi Dios ytīy'ajt, e huin'it tūg quēxīgīpy pīn ymīgūg yajhuimbīḍipy ma Dios ytīy'ajt, nejhuīygix miich ajcxy co pīn huiḍi yajhuimbījtp ymīgūg ma Dios ytīy'ajt, huiḍibi ti ñīḍīgooy ti ytūḍīgooy, ti je' anajty tūg alma yajtzōgy ma yi o'cīn, e ti anajty yajpocyñīhuaatzāy.

1 PEDRO

Yi Neczy Huidibi San Pedro Yajniejx Je Judio Mibijcpidijc

¹ Hich Pedro, Jesucristo ti xyajñibicyich ngapxhuäcxibich yi' y'ayuc. Jada necy nya-niguejxyp miich Israel jäy huidibi adzinaayb xim yam jim Ponto naaxjot, jim Galacia naaxjot, jim Capadocia naaxjot, jim Asia naaxjot etz jim Bitinia naaxjot. ² Miich ajcxy migügtijc Dios Teedy ti xyhuin'ijxcixy, jayijp Dios ti nejhuüy co xyjäy'ada'ñyii ajcxy. Dios ti yajtigiyiy yi' yjihui'ñ ymic'ajt ma miich ajcxy mjot mhuinma'ñ, huen oyjot oyhuinma'ñ myajtunipy ajcxy jadu'n nej Dios huinma'ñ xymooygixy. Dios miich ajcxy ti xyhuin'ixy jigix mgapxymidohuipy Jesucristo, je huidib ñi'py teem cuj miid miich ajcxy ycixpi. Pidaaccix mhuinma'ñ co mgapxymidohuaangixy Dios jadu'n nej jecy'ajty je Israel jäy ytuñ, je taab anajty Moisés yaj'ögy iyujc etz yajñixidicxy ajcxy nidüg nidüg je ni'py, je' anajty ajcxy ytiy'ajt'ajtipy co capxymidohuaangixy Dios. Huen Dios may'ajt oy'ajt mijcajee tunipy ma miich ajcxy, chi jotcuyc mdzináaygixipy.

Jijp'ijxcix jugy'ajtin huinixibi

³ Yi Dios, hich ajt nHuindzin Jesucristo yTeedy, huen capxpaady y'ity, miid co may'ajt oy'ajt ti tuñ miid hich ajt co ti oyduñ huinjemybi hich ajt njot nhuinma'ñ, jëbi n'ijtim Dios yjäy. Jadachambi ooy njijp'ijxim je jugy'ajtin huinixibi, miid co Jesús yjugypijcy huinjemy ma anajty ti y'ögy. ⁴ Nañ ooy njijp'ijxim tijaty Dios xymöhuaanim jilby tzajpjoty, huidibi ca' yhuindigoy, huidibi ca' yjibicüy, etz huidibi ca' ycixy ytigoy. ⁵ Dios xycuend'adip ajcxy miid yi' ymic'ajt, ixti jiini co anajty ajcxy je m'alma nidzoocin padaangixy, co anajty je naaxhuiñ ycixy ytigoy. Mbadaangixy m'alma nidzoocin miid co ti mmijpidaaccixy Dios ytiy'ajt.

⁶ Paady miich ajcxy ooy jotcuyc'ajtcixp. Oy cham tzaachypi m'ocminajxcixy m'ocyajnajxcixy miid co jäy tzach'ijxmadza'ñ miich ajcxy mjot mhuinma'ñ. Nigi ooy jotcuyc nayjihuiyigixy co ajcxy yi' m'alma nidzoocin pada'ñ. ⁷ Dios y'ixamyb ñejhuihuamyb pen janch miich ajcxy cixyjot huinjot mmijpidaaccixy yi' y'ayuc. Paady miich ajcxy ayo'n tzaachypi mminajxcixy myajnajxcixy jëbi nigi myajhuaatzcixy mjot mhuinma'ñ, tim jadu'n nej jäy yajhuaatzcixy yi' oori miid jin. Dios nigi tzocy miich ajcxy huidib yi' ytiy'ajt mijpidaaccip, ca'ydi oori. Pen tudägy miich ajcxy mhuinma'ñ, pen ca' mhuinma'nytigajtcixy co tzaachypi mminajxcixy myajnajxcixy, chi capxpaady ajcxy m'idipy etz mbaadipy ajcxy jotcuyc'ajtin co anajty Jesús ñayguëxigyii jadügtecy ya naaxhuiñybi.

⁸ Oy miich ajcxy ca' ti m'ijxcixy Jesucristo, per myajmij'ajtpy ajcxy, e cham oy ca' m'ijxcixy Jesucristo, myajmij'ajtip ajcxy yi' ytiy'ajt. Co ajcxy mmijpidaaci Jesucristo ytiy'ajt, chi ajcxy ooy mnayjihuiyii nigi jotcuyc anaxy. Je jotcuyc'ajtin huidib mmid Dios je' yejcp. ⁹ Paady ycixpi ti mmijpidaaccixy Jesucristo co ajcxy m'alma xyajñdzögaani.

¹⁰ Jadu'n nej Jesucristo xyajñdzögaani miich ajcxy m'alma je Dios y'ayuc najtzcapxiiybi ooy anajty jecy'ajty janejhuihuaangixy nej Dios y'ayuc ñiguejy, e ca' ajcxy huinjihuüy, je huin'it tiempo anajty ajcxy capxhuäcxp Dios y'ayuc jadu'n nej Dios may'ajt tuna'ñ miid miich ajcxy ycixpi. ¹¹ Je Dios y'ayucnajtzcapxiiybi jecy'ajty ooy ajcxy jahuinmay, ooy ajcxy jahuinjihuihuaañ nej yhuimbizimy je ayuc huidibi ajcxy ymiid jotjoty huinma'nyjoty, je ayuc huidibi Jesucristo yajmiguejx yi' yjihui'ñ ymic'ajt, je Espíritu Santo, jadu'n nej ajcxy najtzcapxiiy co je Cristo tzaachypi minaxa'ñ yajnaxa'ñ, etz co ñicxa'ñ jadüg'oc tzajpjoty. ¹² Dios yajnejhuüy yi' y'ayucnajtzcapxiiybi co je' huidib ajcxy ycapxhuäcx jiini je' ytuna'nyii yjada'nyii, ca' ajcxy ixa'ñ. Migügtijc ajcxy, Dios ti yajtunyyii ti yajjadyii ma miich ajcxy je mxii mdiempo nej anajty je' y'ayucnajtzcapxiiybi

najtzcaxxiy jecy'ajty je tiy'ajt. E jadachambi jadu'n nej Dios ti yajtuñyii ti yajjadyii ti jäy capxhuäcxtäy ma ñich ajt nidüg'óciy. Je jäy huídibi capxhuäcx je tiy'ajt ymiid anajty ajcxy je Dios yjihui'ñ ymic'ajt huídibi Dios anajty yajniguejxip, chooñ tzajpjoty. Ixti je ángeles huídibi ajcxy tzajpjoty tzinaayb yjanejhuihua'ñ nañ jadu'n nej Dios ti yajtuñyii ti yajjadyii ma miich ajcxy, e ni ca' ajcxy nejhuíy.

Chojcpy Dios co tudägy ndzinaayim

¹³ Paady ycixp ni'ixi pidaaccix mjot mhuinta'ñ. Huijy ycuje ajcxy mdzinähuip. Jijp'ijxcix je may'ajtin oy'ajtin huídibi Dios tunamyb miid miich ajcxy ycixpi co anajty Jesucristo yhuimbity ya naaxhuiñ. ¹⁴ Capxymidoogix Dios jadu'n nej pi'c'anäg capxymidoogixy ytaj yteedy. Ca' huaad m'octundigóoygixni jadu'n nej anajty mdundigoogixy co anajty ca'ni mnejhuíygyxy Dios ytiy'ajt. ¹⁵ Oyjot oyhuinma'ñ ajcxy myajtunipy jadu'n nej Dios oyjot oyhuinma'ñ yajtuñ, je huídibi ti xyhuin'ixy ajcxy. ¹⁶ Com jadu'n ymiñ jaybety ma Dios ñecy, jadu'n Dios migapxy je' yjäy: "Mi'idip ajcxy oyjot oyhuinma'ñ jadu'n nej ñich nmi'ityich oyjot oyhuinma'ñ."

¹⁷ Miich ajcxy m'ojadajtpy je Dios Teedy. Dios ca'p tzaachytuna'ñ yi jäy ajcxy huin'ixpety. Hue' je' chaachytunipy ajcxy nidüg nidüg jadu'n nej ajcxy yhuinma'ñymiidity, pen jibic-huinma'ñ ymiid, chi tzaachytunipy ñigi. Paady ycixp tiydudägy ajcxy mdzinähuipy. Tzigiiygix Dios. ¹⁸ Je Dios canan hue' ti xyajpocyñihuaatzim co ti cojuy ñich ajt nbocy miid oori o plata, jadu'n nej anajty nbocytuunim co nmijpidaacim n'ap ndeedy y'ayuc ytiy'ajt huídibi ca' ytiy'ajity. ¹⁹ Hue' janchtiy Dios ti xyajpocyñihuaatzim miid Cristo co y'o'cy cruudzcixy, e chi ñi'py teemy yojcy miid ñich ajt nbocy ycixpi. Jadu'n nej anajty Israel jäy ñayajpocyñihuaatzigixy co yaj'ögy tüg boregi ung, huídibi ca' anajty ti jibicpi miidity, e chi ñi'py teemi cuji. ²⁰ Jadu'n nej Cristo y'o'cy miid ñich ajt nbocy ycixpi, Dios jayijpni jadu'n yajnihuinmayiy co jadu'n tuna'ñ, ca'ni anajty naaxhuiñybi chondägy. Jecy'ajty ca'ni anajty pin nejhuíy, e jadachambi Dios ajt ti xyajnejhuíyim. ²¹ Paady ycixp miich ajcxy mijpidägy Dios. Dios yajjugypijc huinjemy je Cristo co y'o'cy, e Cristo cömay ooy ypidzimy jiihy tzajpjoty. Yajmij'ajtcix Dios etz jijp'ijxcix co Dios xyajnidzögaanip ajcxy m'alma.

²² Ti myajhuaatzcixy mjot mhuinta'ñ co ti mmijpidaaccixy Dios ytiy'ajt. Naychójcigix nayjihuiyigix nidüg nidüg cixyjot huinjot, ca' y'ametz yjotmetzity. ²³ Com ti Dios oyduñ miich ajcxy mjot mhuinta'ñ huinjemybi miid yi' y'ayuc ytiy'ajt, co ti mmijpidaaccixy je tiy'ajt huídibi tudägyip, je huídibi ca' ycixy ytigoy, huídibi huinixi ijtp, je tiy'ajt huídibi jugy'ajt vejcpy. ²⁴ Jadu'n ymiñ jaybety ma Dios y'ayuc:

Je jäy ninicx nidigooyb yi' etz je ninicx y'oy'ajtin nidigooyb yi'. Tim jadu'n nej tüg pijy co ñidecy ytitzni, chi je pijy jadu'ñyi yca'ni, e chi jadu'ñyi je pijy y'oy'ajtin ytigooy.

²⁵ Dios y'ayuc ytiy'ajt huinixi y'ity, ca' ycixy ytigooy nimina.

Jada je ayuc je tiy'ajt huídibi Dios yjäy ycapxhuäcxyp ma miich ajcxy.

2

¹ Paady ycixp copicy co m'ixmájtzcixipy yi jibic-huinma'ñ nej migüg ajcxy jibic mnigapxcixy. Ca' m'aniidáaccixipy. Ca' ajcxy mnybidägiiyb jadu'n nej jihuiy ooy m'oyjäyity, e ca' yjanchity. Ca' mmigüg ajcxy ti myajca'oy'ixipy. Ca' ajcxy m'iidigoyipy mgapxtigoyipy. ² Jadu'n nej yi ma'xungdijc tzocy chidz, nañ tim jadu'n miich ajcxy tzojccixy jot'ajtcixy Dios y'ayuc ytiy'ajt, jigix jëbi ca'pxy yi mhuinta'ñ mi'idipy ajcxy miid je ixpijcin huídibi Dios xymoogixp, e chi ajcxy m'alma paadipy nidzoocin. ³ Nidzögip miich ajcxy m'alma, peni janch ti mmijpidaaccixy je Huindzin Jesucristo y'ayuc, etz ti mnejhuíygyxy nej Dios may'ajt oy'ajt ti tuñ miid miich ajcxy ycixpi.

Cristo je tügpajcpi jaccopicyip

4-5 Yajmij'ajtcix yi Huindzin Jesucristo. Dios ti yhuin'ixyii jëbi yHuindzin'aty ma naaxhuiñyäjy etz ooy tzocy. Yi naaxhuiñyäjy ca' ajcxy ti tuñcuend, tim jadu'n nipaady nej tüg tzaa huidibi pojtzpidijc ninigoob ca' yajtuna'ñ ma yi tzaadijc ycojy. Yajmij'ajtcix miich ajcxy je Huindzin Jesucristo. Dios yaj'oyi huamyb miid miich ajcxy tügpicy jäy huidibi yi' yjäy'adaanip, huidibi ojadadaangixp Dios, huidibi Dios ytung tunaangixp.

6 Jadu'n yjaybetyity ma Dios ylibro, Dios jadu'n ymina'ñ:

Jim ma Israel jäy nbidägebich tüg mij'ane'mbi huidibi ti nhuin'ixyich, huidibi ooy ndzocyich, e pinjaty je' mijpidacp ooy njäygidägebich. Je mij'ame'mbi jadu'n je' nipaady nej tüg tzaa oybi huidibi tigihuamb ma tijtaatz co tzaadijc ycojy.

7 Miich ajcxy huidibi mijpidacp Jesús, miid miich ajcxy je mij'ame'mbi ooy je' ymijity yjanchity. Per yi' ajcxy ca' mijpidägy Jesús, je' yi' ajcxy ycuydumyb nej ymina'ñ ma jaybetyity:

Pinjaty ca' capxymidohua'ñ Dios, ca' ajcxy ixaangixy je Cristo, e jadu'n ajcxy nipaady nej pojtzpidijc huidibi ca' yajtunaangixy tüg tzaa oybi co tzaadijc cojcixy. Yi Cristo yi' je' je' mij'ane'mbi huidibi ane'mdähuamb tüg'óciy.

8 Nañ jadu'n yi' ajcxy huidibi ca' mijpidägy Jesús cuydumyb nej ymina'ñ ma yjaybetyity: Jadu'n je Cristo nipaady nej tüg tzaa ma jäy ajcxy ycönejpcixy etz ycidaagixy.

Je jäy ajcxy huidibi ca' mijpidägy Jesús, jadu'n nipaady nej jihuïy ycönejpcixy ma tüg tzaa co ajcxy ca' tungixy cuendi Jesús y'ayuc, paady ycixpi padaangixy tzaachypi miid ypocy ycixpi, jadu'n nej Dios ti yajcöducy.

Je huidibi Dios yjäy'adyii

9 Miich ajcxy huidibi yajmij'ajtp Jesucristo, ca' miich ajcxy mjadu'nity nej yi' ajcxy huidibi ca'capxymidoy Dios. Dios miich ajcxy ti xyhuin'ijxcixy. Je rey Jesús je' miich ajcxy ytung mduunip. Oyjot oyhuinma'ñ miich ajcxy myajtumyb. Dios miich ajcxy xyjäy'ajtip. Miich ajcxy je' xypaat mnidiy'ajt'adipy jadu'n nej Dios ti xyajpidzimgixy ma anajty mdundigooygixy, e ti xyajhuinjihuïygixy je' ytiy'ajt nej jëb huaad mguydungixy. Jadu'n nipaady nej jihuïy Dios ti xyajtzoongixy agootztuuyb, e ti xyajtigiïygixy ma ytiicxy yjajy. 10 Co anajty ca'ni mmijpidaaccixy Jesucristo, ca' anajty Dios xytungixy cuendi. Cham co ti mmijpidaaccixy Jesucristo, Dios ti xypa'ayoogixy. Dios miich ajcxy xyjäy'ajtp cham.

Yajtungix Dios y'ayuc ma mdzinaayin

11 Migügtijc ajcxy huidibi ooy ndzocy njihuïyich, jada nyajniimaaygixyp, jadu'n nej tüg adzinaaybi huidibi ca' chinäy ma ycajp, huidibi nihuidijtp, ca' tüg it mdzinaaygixy, copicy co ca' mnijot'adipy ajcxy yi' jibic-huinma'ñ, jadu'n nej je jäy ajcxy ma m'adzinaaygixy nijot'ajtcixy jibic-huinma'ñ. Je jibic-huinma'ñ ca' ñaygodigüygixy miid oyhuinma'ñ.

12 Tiydudägy mdzinähuipy ajcxy, yajtungix oyhuinma'ñ miid je jäy ajcxy ma miich ajcxy m'adzinaaygixy, je jäy ajcxy huidibi ca' nejhuïygixy Dios ytiy'ajt. Oy ajcxy ca' xy'ixaangixy etz jibic xyñigapxcixy xyñi'ojiiygixy, miid co oyjäy'ajtin mdungixyp, chi ajcxy jäygidägipy, etz miich yi' ajcxy xycapxpátcixipy ma Dios, mina anajty Dios ñinmiñyii ajcxy.

13 Miid je Huindzin Jesucristo ycixpi, capxymidoogixy tüg'óciy gobierno tungmiidpi etz cajt tungmiidpi y'ane'min ycötujcin, nañ capxymidoogixy jadu'n nej je mij'ane'mbi y'ane'my. 14 Nañ capxymidoogix tungmiidpi ajcxy huidibi je mij'ane'mbi yquejxyp jigix tzaachytunipy je' ajcxy huidibi tundigooyb etz capxpaadipy je' ajcxy huidi oyhuinma'ñ ytumyb. 15 Dios chojcyp co tiydudägy mdzinäaygixipy, jigix jëbi je jäy ajcxy huidibi ca' huinjihuïygixy Dios ytiy'ajt, huidibi tzuu huinma'ñ miid, ca' ajcxy mihuinma'ñybaady nej jibic xyñigapxip.

16 Tzinaaygix jadu'n nej jäy chinäy huidibi cuydumb Dios ytiy'ajt, huidibi ti ixmach yi ayuc tiy'ajt huidibi ca' ytiyity. Pen mmidundigooyb ajcxy tunmiidpi y'ane'min

ycötujcín, ca' huaad mnaybidáacigixy jadu'n nej jihuüy Dios xylugarmooygixy jigix jëbi mdundigooygixy. Copicy mdzináhuipy ajcxy jadu'n nej Dios ytumbi huidibi oy tumb. ¹⁷ Migüg'adii ajcxy tüg'óciy jäy. Naychójcigix nayjihuüyigix nidüg nidüg huidijaty yajmij'ajtp Dios. Yajmij'ajtcix Dios. Capxymidoogix yi mij'ane'mbi.

Jadu'n nej Cristo tzaachypi yajnajx

¹⁸ Tumbidijc ajcxy, imidoogix capxymidoogix mhuindzindijc. Pen oyjäy yi mhuindzin huidibi yung naxy yjot yhuinma'n muidity, o pen ahua'njäy jibicjäy, ca' yñejity, capxymidoogix. ¹⁹ Yjäygidägipy Dios pen mmecxtujctaaygixyp nej jäy ajcxy xychaachtungixy muid co oyhuinma'n miich ajcxy mmuidity. ²⁰ Pen ti anajty mdundigooygixy, e paady anajty myajtzaachtungixy, ca' pin xycömáaygixipy xycapxpáadygixipy, oy ti mjamecxtujctaaygixy huidijaty tzaachypi. Pen ooy mdungixy etz tzaachypi mbaatcixy, chi janchtiy Dios jäygidägipy nej mmimecxtujctaaygixy. ²¹ Dios chojcpy co mmecxtujctáaygixipy je tzaachypi huidibi mminajxyp myajnajxcixyp muid co oybi mdungixy. Paady ycixpi je Cristo tzaachypi ayo'n minajxy yajnajxy muid ich ajt ycixpi, e yejc iixpejt jadu'n nej jëbi huaad mminajxcixy myajnajxcixy tzaachypi ayo'n, nañ nej jëbi huaad mbanixcixy mbayöygixy yi' y'ixpejt. ²² Je Cristo ca' je' ma ytundigooy, e nañ ca' pin huin'ñ. ²³⁻²⁴ Je Cristo co jäy ajcxy y'o'ji, ca' je' y'adzouhuimbijty; e co jäy ajcxy chaachytuuni, ca' mijotmäthuimbijty je jäy ajcxy, nigí Dios yajpuhuanüy. Com Dios je' paatip nej chaachtuna'n huidi ajcxy tundigooyb. Je Cristo ci'm yajnicx ich ajt ndzaachypi co y'o'cy cruudzcixy. E muid co jadu'n y'o'cy cruudzcixy muid ajt nbocy ycixpi, chi jëbi n'ixmajtzim jibic-huinma'n etz tudägy jëbi ndzinaayim. Muid co Cristo je tzaachypi minajxy yajnajxy muid ich ajt nbocy ycixpi, paady nidzoocim ajt n'alma. ²⁵ Miich ajcxy jecy'ajt mnuidigooyb mdudigooyb anajty ajcxy ma Dios, mgi'mhuinma'n anajty ajcxy myajtumyb nidüg nidüg, jadu'n nej jäy yborregí ñuidigoy ytudigoy ma yuugjot. Cham miich ajcxy ti mnijothuimbijtcixy Dios, ti ajcxy mhuinma'ñymech ti mmijpidaaccixy Jesucristo je huidibi xycuend'ajtp ajcxy.

3

Nej huaad chinaaygixy pinjaty ti pijccixy

¹⁻² Jadu'n nej tumbidijc capxymidooy yhuindzin, nañ tim jadu'n miich ajcxy töxyjäydijc capxymidoogixy mñäy. Pen mñäy ca' capxymidooy Dios, ca' mijpidäga'n Jesucristo, muid co miich oyjot oyhuinma'n myajtunipy muid yi', ycadimjetyity huin'it mñäy yhuinma'ñymedzip etz mijpidägipy Jesucristo, co y'ixipy nej miich mmuidity tudägy'ajtin. ³ Töxyjäydijc ajcxy, ca' mnaygömayüyb muid mhuit mxojx oyjatpyi tzoujatpyi, muid oori cijjitz etz oori taatziy, muid co mgöhuay mdzachcüdägy muid cüd oyjatyp. ⁴ Hue' janchtiy jäy miich ajcxy xycömayip muid co oyjot oyhuinma'n anajty myajtungixy, muid co yung naxy mjot mhuinma'n ajcxy muidity. Co jadu'n mdungixipy jada je' oy jäygidaacni ma Dios huinixii. Yi mhuit yi mxojx etz oori taatziy cixip tigoyip yi'. ⁵ Nañ tim jadu'n anajty jecy'ajty je töxyjäydijc huidibi anajty ajcxy cömay ijtp, yajtuuñ anajty ajcxy oyjot oyhuinma'n, ymijpidacyp anajty ajcxy Dios, nañ ycapxymidooyb anajty ajcxy ñäy. ⁶ Jadu'n nej Sara capxymidooy Abraham. Sara xigoyäxy Abraham: "Iich nhuindzin." Pen myajtumyb miich ajcxy oyjot oyhuinma'n jadu'n nej Sara, jadu'n miich ajcxy anajty nej jihuüy Sara ajcxy xy'ung'adyii, pen ooybi mdunipy ajcxy, ca' ti ajcxy mdzigihuipy.

⁷ Nañ jadu'n miich ajcxy yëydijctijc, yajtungix pa'ayo'n muid mdöxyijc, yajmij'ajtcix. Com jac mic miich ajcxy ca'ydi yi töxyjäydijc. Dios may'ajt ti tuñ tú'ciy muid miich ajcxy, paady ycixpi copicy yajxon naymiddzináayigix jigix Dios cuendipigipy etz xymöhuipy tijaty ajcxy myajmibijctzooyb.

Co pinjaty xymidundigooy, ca' myaj'ahuimbidipy

8 Jada ayuc cham njacyajnimaydaayb nidüg'óciy miich ajcxy. Tú'ciy mjot mhuinma'ñ mi'ijtcix, naymigüg'ájtigix yajxon, naychójcigix nayjihuiyigix nidüg nidüg, nayba'ayouhuigix nidüg nidüg, pidaaccix yung naxy mjot mhuinma'ñ. 9 Co ajcxy migüg xymidundigoyipy, ca' myaj'ahuimbidityu' jadun nej anajty ti xytuñ. Co ajcxy migüg xyñi'ojihuipy, ca' myaj'ahuimbidityu' jadun nej anajty ti xyñi'ojiy. Nigi nibijctzohui' ma Dios mid yi' ajcxy ycixpi, nigi mi'oyjáy'at mmigüg. Huin'it nigi Dios xyconuucxip. 10 Com jiiyby ymiñ jaybety ma Dios ñecy:

Pinjaty jotcuyc tzinahuamb e yajnaxa'ñ xii tiempo agujc jotcuyc, nay'ahuijtzägiib ca'ydi y'iidigooy ycapxtigooy, ca'ydi y'aniidägy.

11 Huen jihüägy ma je jibicpi e huen oyjáy'ajtin tuñ. Huen ixmach tüg'óciy tzipcapxy, ca' tzipcapxy ixtähuipy.

12 Je Huindzin Dios ycuend'ajtpy yi' je jäy huidibi tiydudägy tzinaayb etz ypubejtcixyp ypuDIGYigixyp migügtijc co tijaty mibijctzoy. Dios ymijotma'tpy je jäy ajcxy huidibi jibic-huinma'ñ tumb.

13 Pen mdumyby oyjot oyhuinma'ñ ajcxy, huin'it ca' pin ajcxy xymijotmädiy. 14 Co oyjot oyhuinma'ñ myajtunipy ajcxy e huin'it jäy xychaachtungixy, huin'it Dios xyconuucxip ajcxy, e ca' mdzigiyigixipy, ni ca' mhuinma'ñyDIGYigixipy. 15 Mijpidaaccix yi Jesucristo ich ajt nHuindzin Dios cixyot huinijot. Pen ji jäy xy'amidoogixy: ¿Ti co mdzachmijpidaaccixy Jesucristo? Tiydudägy m'adzouhuipy mid yung'ajt nax'ajt jadun nej mijjp'ijxcixy co Jesucristo xyajndzögaani ajcxy yi m'alma. 16 Ca' mgapxipy ajcxy je ayuc huidibi xyajtzo'yduunip. Pen jäy ajcxy xymi'iidigooyigixp xymigapxtigooyigixp, chi ajcxy jihuihuamyb tzo'ydu'n mid co ca' yjanchity nej ajcxy ymina'ñ com oybi anajty ti mdungixy. 17 Pen Dios miich ajcxy jadun xyajnijot'ajt co tzaachypi mmínájxcixipy myajnáxcixipy, jac'oy co tzaachypi mmínájxcixipy myajnáxcixipy mid yi m'oyjáy'ajtin ycixpi, e ca' anajty tzaachypi mmínájxcixy myajnáxcixy mid co anajty ti mduDIGYigixy.

18 Je Cristo nañ jadun tzaachypi minajxy yajnaxxy co y'o'cy cruudzcixy mid jäy ajcxy ypocy ycixpi. Oy je' anajty ca' tibocy midity, chi je' ti codinäy je jäy ajcxy ypocy, e jadun ich ajt ti naymi'oyiyim midi Dios. Oy je Cristo ñinix y'o'cy, per je' y'alma ca' je' y'o'cy, jugypijcy je' jadügtecy mid jemybi ninix. 19 Huin'it co Cristo y'o'cy, chi je' y'alma ñicxy, e capxhuäcxy yi' y'ayuc ma jäy y'alma ajcxy huidibi jibictuuyb ijtp. 20 Je jäy ajcxy je' jiiyby y'alma ijtp jibictuuby huidibi anajty ca' capxymidoy Dios. Je taab Noé yajcojy je mij barco, ooy Dios ajcxy jecy ymimectujci, huen tijy cayjothuimbijty ajcxy. Jeyi niductujc je jäy choocy ma je mijtuu je mijnigom. Je' co je jacjadyii ca' ajcxy yjothuimbijty. 21 Jadun nej je nidujctujcpi ajcxy mijpidacy Dios y'ayuc, e chi ajcxy choocy, nañ tim jadun ich ajt co nniibejtim je' ich ajt ndiy'ajt'ajtim co nmijpidaacim Jesucristo je huidibi co y'o'cy jugypijc mid jemybi ninix, etz ti xyajhuaatzim njot nhuinma'ñ jigix ooy oy nayjihuiyim, etz nañ jadügtecy co anajty n'o'cim xyajjugypijcim mid jemybi ninix. Co nniibejtim, je' je' je' tiy'ajt co Dios ti xyajhuaatzim njot nhuinma'ñ. 22 Je Cristo ti je' ñicxy tzajpjoty. Jiiyby je' cham y'ity mij'ane'mbi ma Dios, yi' je' ane'mb je ángeles ajcxy huidi tzajpjoty tungmid etz huidijaty mic'ajt mid tzajpjoty.

4

Yajtungix je mic'ajt huidibi Dios ti xymooyigixy

1 Je Cristo ayo'n tzaachypi minajx yajnaxx co yhuidijty ya naaxhuiñybi, e chi yajtuuñ oyjot oyhuinma'ñ mid jäy ajcxy ycixpi. Paady ycixpi copicy miich ajcxy myajtunipy oyjot oyhuinma'ñ mid migügtijc jadun nej Cristo yajtuuñ. Pen miich ajcxy mmínajxyp myajnáxyp tzaachypi mid co oyjot oyhuinma'ñ myajtuñ, chi ca' mjacnijot'ajtip ajcxy jibic-huinma'ñ. 2 Jadun nej ajcxy mjactzinähua'ñ mjacjugy'ada'ñ, ca' huaad mjacnijot'ajtcixy je jibic-huinma'ñ. Hue' janchity mdunipy ajcxy jadun nej Dios tzocy. 3 Jecy'ajty co

anajty ca'ni mnejhuuygixy Jesucristo ytiy'ajt, jibic-huinma'n anajty ajcxy myajtumy ma mdzinaayin mjogy'ajtin, jadu'n nej jäy ajcxy jacjadyii huidibi ca'ni nejhuygixy Dios ytiy'ajt. Chi anajty myajtungixy canaagnax je jibic-huinma'n, ooy ajcxy mnijot'ajtcixy maynax jibic-huinma'n. Ooy anajty anaxy mdzach'üccixy vino, huin'it anajty ooy ajcxy ymügyii. Ooy anajty mnixondaaccixy coodz huididii, huin'it anajty ooy m'uuccixy anaxy. Ooy mnijot'ajtcixy xii, ooy anajty m'ojadajtcixy tzaadzech quipychech huidibi Dios ca' jäygidägy. ⁴ Paady ycixpi je jäy ajcxy huidibi ca' nejhuygixy Dios ytiy'ajt, ca' ajcxy jäygidägy co ca' miich ajcxy cham jadu'n m'idich jadu'n nej yi' ajcxy y'idich, chi ajcxy jibic xyñigapxcixy xyñi'ojiiygixy. ⁵ Ca' mdungixy cuendi yi' ajcxy, com Dios paatip nej ytiyduna'n ajcxy. Je Dios je' tiydunamb nidüg'óciy jäy ajcxy huidibi cham jugy'ajtp, etz tiibi y'öccixy. ⁶ Paady ycixpi ti yajnimäy Jesucristo ytiy'ajt je jäy tiibi y'öccixy jigix yajtiydunipy ajcxy müd Dios ytiy'ajt jadu'n nej yajtiyduna'n yi' ajcxy huidibi jacjugy'ajtp cham. Jëbi huaad ajcxy yjugypijccixy jadügtecy etz y'idipy ajcxy jadu'n nej Dios y'ity.

⁷ Ti ytimyhuingoni je xii je tiempo mina ycixaani ytigoyaani tüg'óciy tijaty ya naax-huiñybi. Paady ycixp tzocy co tiydudägy etz huijycujc mdzinaygixipy, etz tzocy co mjac'ojadadipy mjacmibijctzoohipy ajcxy Dios. ⁸ Ooy ycopicyity co jacnaychójcigix jacnayjihuiygix nidüg nidüg. Müd co mnaychójcigixy, paady ycixpi jëbi mnayméecxigixy. ⁹ Naymi'oyjäy'ajtigix nidüg nidüg agujc jotcujc, ca' y'ametz yjotmetzity. ¹⁰ Yajtungix müd je migügtijc jadu'n nej Dios xymooygixy ixpijcin nidüg nidüg. Naybubéjtigix naybudigiiygix miñ xyipy jadu'n nej jäy ajcxy huidibi yajxon Dios ytiy'ajt padungixp. ¹¹ Pen Dios ti xymooygixy ixpijcin jigix jëbi capxhuäcxy yi' y'ayuc, yajxon Dios y'ayuc mgapxhuäcxip. Pen miich xypaat pujigii jëdzigii, yajxon mdunipy ajcxy jadu'n nej Dios huinma'n ti xymooygixy. Co yajxon Dios ytiy'ajt mguyduunipy, huin'it Dios cömaya'n miich ajcxy, müd co ti mmijpidaaccixy Jesucristo. Je Jesucristo je' cömay'idip etz ane'mip huinixii huin'tiempo.

Mimecxtujccixy tzaachypi ayo'n

¹² Migügtijc ajcxy huidibi ooy ndzocy njihuiyich, ca' ooy mhuinmay'ahuidijtcixy co jäy xy'ixhuidijtcixy xypahuidijtcixy, co jäy xychaachtunaangixy jigix jëbi ñiguëxigipy pen janch mmibijccixy Jesucristo. ¹³ Ca' ajcxy mdajipy mmayipy, jotcujc ajcxy mnayjihuihuuyb jigix jëbi nañ jadu'n tzaachypi mminajxcixy myajnajxcixy nej Cristo minajxy yajnajxy tzaachypi. Co anajty jadügtecy Jesucristo ñayguëxigyii ya naax-huiñ müd ymic'ajt y'oy'ajt, jëbi ajcxy jotcujc mnayjihuihuib. ¹⁴ Pen xymi'iidigooyb xymigapxtigooyb jäy ajcxy, müd co miich ajcxy ti mmijpidaaccixy Jesucristo, jotcujc mnayjihuihuipy, müd co miich ajcxy müd je Dios yjihui'n etz Dios ymic'ajt ma mjot mhuinma'n. ¹⁵ Pen nidüg miich ajcxy ayo'n tzaachypi mbaatcixy, oy ca' anajty ti mjäy'aj'öccixy, oy anajty ca' ti mmeetzcixy, oy anajty ca' ti mdundigooygixy, oy anajty ca' ti mnaybidáacigixy ma huingjäy ti ytundigooy, ¹⁶ pen miich ajcxy tzaachypi mminajxyp myajnajxp müd co ti mmijpidaaccixy Jesucristo, ca' ti tzo'ydu'n mjihuihuipy, nigü Jesucristo cömay'idipy.

¹⁷ Ti xii tiempo tim paatni mina Dios tiyduna'n je jäy ajcxy huidibi cuydumb je' ytiy'ajt. Pen Dios ich ajt huidi nmibijcim xytiyduunim e nbaatim hueeni tzaachypi, nigü tzaachypi padaangixy ajcxy huidibi ca' mijpidaaccixy Dios. ¹⁸ Pen je jäy huidibi oyjot oyhuinma'n müd mic tzaach padaangixy je' y'alma nidzoocin, ¿ti jada ytunaangixy pinjaty jibic-huinma'n müd, pinjaty pocytungix? ¹⁹ Pen tzaachypi mminajxyp myajnajxyp ajcxy müd co Dios jadu'n chojcyp, ca' ajcxy mjotmetzcihuipy, nigü ajcxy panixcix payöygix oyhuinma'n, nigü cixyot huinijot mijpidägipy ajcxy Dios; com yi' miich ajcxy xyajcoj, e yi' xycuend'ajtcixp; com Dios yi' je' tudägy etz ñidinaayb je' y'ayuc.

5

Pedro capxhuijp je mibijpidijc

¹ Jada ñch miich ajcxy yajñimaayb huídibi nigohuajc'ajtp je mibijcpidijc, ñch nañ jadu'n nigohuajc'ajtpyich mibijcpidijc. ñch n'ijxyich co je Cristo ayo'n tzaachypí minajxy yajñajxy. Nañ jadu'n ñch yí' nmíid'idaamybich jadüg'oc co anajty ymiñ ya naaxhuiñ míid y'oy'ajtín ymij'ajtín. ² Jada ñch miich ajcxy nyajñimaayb: yaj'ixpijccix etz cuend'ajtcix Dios yjáy agujc jotcuyc. Ca' myaj'ixpigípy ajcxy ametz jotmetz, cuend'ajtcix Dios yjáy, tim jadu'n nej jáy ycöbixy cuend'aty. Ca' meeñgíxy myaj'ixpigípy ajcxy. Míid oyjot oyhuinma'ñ myaj'ixpijccixy. ³ Ca' adzip ahua'n m'ane'mípy Dios yjáy. Hue' janchtíy ijxpejt oybi yejccix. Cuydungix Dios ytíy'ajt. ⁴ Co anajty Jesucristo, je huídibi ni-huindzin'ajttaayb tüg'óciy, ñayguëxígyii ya naaxhuiñ jadüg'oc, chi cömay miich ajcxy mbidzimípy. Tim jadu'n nej jáy ajcxy co y'iyíyigíxy e co ymadaaccixy, chi cömay ypidzim ajcxy. Miich ajcxy cömay nañ jadu'n m'idípy huinixí.

⁵ Myajmij'adípy anäctíj ajcxy, je' ajcxy huídibi nigohuajc'ajtp je mibijcpidijc. Ooy ycopícyity co nidüg'óciy miich ajcxy mnayyajmij'ájtigíxy miñ xyípy míid oyjot oyhuinma'ñ. “Dios ca' je' jáygidägy pinjaty amij agíx jáy'ájtigíxy. Dios ypubejtyp míid y'oyjot pinjaty yung naxy yjot yhuinma'ñ míid.” ⁶ Mgapxcöbígípy ajcxy tiydudägy Dios, je mij'ane'mbi, chi Dios xycömayípy mína anajty. ⁷ Mibijctzougíx Dios míid tüg'óciy tijaty jotmay ajcxy míid'ajtyp, chi jébi Dios xypubedípy xypudígíhuípy ajcxy.

⁸ Huijycujc m'idípy ajcxy. Níxi' m'idípy ajcxy. Com je mujcu' huídibi xymíidzip'ajtim, ooy je' xy'ix'ijxim xypa'ijxim. Hue' xyajhuinma'ñyidigoyaaním, tim jadu'n nej je caa co ixtay ti chüdzaamyb. ⁹ Huindina' jijptina' ajcxy je mujcu'. Yí jacjadyii jáy huídibi mijpídaaccixy Jesucristo, nañ yminajxcixyp yajñajxcixyp tzaachypí nañ jadu'n. ¹⁰ Co anajty ajcxy hueeni tzaachypí ti m'ocyajnaxy, huin'it Dios xyaj'oyíyípy ajcxy yí mjot yí mhuinma'ñ, xyajmibígípy ajcxy yí ytíy'ajt, xyajjotmícpígípy ajcxy. Com Dios yí' je' huídibi may'ajt ti tuñ mijcajee míid nidüg'óciy jáy ajcxy. Yí' je' huídibi ti yaj'oyíy nej jébi cömay huinixí n'íjtim míid Jesucristo jibby tzajpjoty. ¹¹ Huen Dios y'oy'ajtín etz ymij'ajtín idípy huinixí.

Capxpooxín yajñajxp

¹² Jada necy nyajñigüejxy ajcxy míid Silvano ñch ajt nmígüg huídibi ndijpyich co ooy yajmij'aty Jesucristo. Hueeni jada ayuc huídibi nyajñijayíyb, nañ ti nbidägyich necyjoty capxhuijín etz ti nbidägyich necyjoty yí Dios ytíy'ajt tudägyp, nej Dios may'ajt oy'ajt tuuñ míid miich ajcxy ycíxpi. Mijpídaaccix nígi Dios ytíy'ajt, ca'ydi mhuinma'ñyidigooygíxy.

¹³ Je jáy huídibi ya Babilonia huídibi ajcxy yajmij'ajtcixp Jesucristo, je jáy ajcxy huídibi Dios ti huin'ixy, xyajñigüejxp ajcxy capxpooxín. Nañ jadu'n Marcos ñch nmígüg, je huídibi njíhuíybich nej jíhuíy ngí'm'ung'adyíjich xyajñigüejxp capxpooxín nañ jadu'n. ¹⁴ Naygapxpóocxígíx xíc xon nidüg nidüg miñ xyípy. Je' je' je tíy'ajt co mnaychójcígíxy mnayjíhuíyígíxy miñ xyípy.

Jotcuyc mnayjíhuíhuíyb ajcxy nidüg'óciy huídib yajmij'ajtp Jesucristo. Amén.

2 PEDRO

Yi Mimetzpi Necy Huidibi San Pedro Yajniguejx Yi Mibijcpidijc

¹ Hich Simón Pedro, tumbich ma Jesucristo ytung. Yi' xy'apóstol'ajtpich etz ngapx-huäcxpyich yi' y'ayuc. Cham hich miich ajcxy jada necy nyajnijay#ygixy huidibi ajcxy ti mbaatcixy mibijcin janch oybi, tim jadu'n nej hich ajcxy ti nbáatcixyich mibijcin janch oybi. Hich ajt nDios je Jesucristo huidibi xyajnidzoocim ajt n'alma tudägy je', e tudägy ytuñ muid hich ajt nidüg'óciy. ² Huen Dios mijmay'ajt tunipy muid miich ajcxy, etz jotcuyc'ajtin xymöhuipy mijcajee, muid co tiy'ajt ti mbaatcixy ma Dios etz ma je Jesús hich ajt nHuindzin.

Je mibijcpidijc chinaayin jugy'ajtin

³ Dios muid je' ymij'ajt ti xymooyim tüg'óciy huidibi nyajmayajtim ma ajt njugy'ajtin, nej huaad nguyduunim yi' ytiy'ajt etz nej yi' huaad nyajmij'ajtim. Dios jadu'n mijmay'ajt tuun muid hich ajt ycixpi co ti xyajnejhuuyim Jesucristo y'ayuc ytiy'ajt. Je Jesucristo ti xyhuin'ijxim jigix jébi nmuid'ajtim yi' ymij'ajtin y'oy'ajtin, etz jigix jébi nduunim oyjäy'ajtin nej Jesucristo tuuñ. ⁴ Dios ti xymooyim huidibi janch oydi'cni e janch copicyip jigix jébi miich ajcxy mbaatcixy Dios yjihuñ ymic'ajt huidibi xyajtzinaaygixy muid huadz jot huinmañ, etz jigix jébi muid jada ycixpi tibi xyaj'ahuanuyim, miich ajcxy mijpyöyduutcixy je jibicpi huidibi naaxhuiñyäy ajcxy ñijot'ajtcixyp. ⁵⁻⁷ Com Dios muid ymic'ajt ti xymooyim huidibi nyajmayajtim, paady ycixp miich ajcxy naymic'ijxigixy co ajcxy mmibijcin mjacyajmijtigüygixipy tudägy'ajtin; e muid mdudägy'ajtin mja-cyajmijtigüygixipy ajcxy Dios y'ixpijin; e muid je Dios y'ixpijin mjacyajmijtigüygixipy yi' Dios yjihuñ ymic'ajt ma ajcxy mjot mhuinmañ huidibi muid mmimadägyipy ajcxy yi' jibicjot jibic-huinmañ; e muid je mic'ajt ma ajcxy mjot mhuinmañ jacyajmijtigühuipy ajcxy mecxtujcin; e muid je mecxtujcin mnejhuuyigixipy nej jéb huaad myajmij'ajtcixy etz mdzigüygixy Dios; e muid je mecxtujcin mjacyajmijtigüygixipy je tzojcin je jihuiyin muid migügtijc; e nañ mijtigühuipy nañ jadu'n je mibijcin nej jéb huaad Dios myajmij'ajtcixy etz nej jéb huaad cixyot huinijot mjacyajtungixy oyjäy'ajtin.

⁸ Pen ma miich ajcxy mdzinaayin mjugy'ajtin yajpattäy e ymijy ymayy, yi' mjugy'ajt ajcxy ca' yi' ñaadig'aty; nañ ca' anajty ajcxy naadigi' ti mmibijccixy hich ajt nHuindzin Jesucristo, ti mnejhuuyigixy yi' y'ayuc ytiy'ajt. ⁹ Pin jada ca' capxymidooy tüg'óciy jada yaabi capxhuijin ma yjugy'ajtin, jadu'n yi' nipaady nej tüg huiintzpi o huidibi y'ijxin con, ti jäydgoy co Jesucristo ti yajpocyñihuaatzp. ¹⁰ Paady ycixp miich ajcxy migügtijc, naymic'ijxigixy tungix tüg'óciy jada jigix mnejhuuipy ajcxy tiydudägy co Dios ti xyajmibijccixy e ti xyhuin'ijxcixy. Pidaaccix mhuinmañ co jada tiy'ajt huen copicy, huen tictztigüy ma miich ajcxy mjugy'ajtin. E pen mdumyb ajcxy jadu'n, nimina mgapocycägixipy. ¹¹ E jadu'n miich ajcxy myajmöhüipy tiydudägy tigüydac mijpi ma hich ajt nHuindzin Jesucristo y'ane'my, je huidibi xyajnidzoocim ajt n'alma. E yi' y'ane'min ca' ycixipy ytigoyipy nimina.

¹² Paady ycixp hich miich ajcxy jatyimy yajjäymejtzcoodaangixy jada tiy'ajt. Oy miich ajcxy jada tiy'ajt mjajajtcixy mjanejhuuyigixy, e tudägy ajcxy mmibijccixy etz mmi'ijtcixy je tiy'ajt huidibi miich ajcxy cham muid. ¹³ Minaambich co yjanchity nami njactzinaayñich co hich miich ajcxy nmöhuipy capxhuijin. ¹⁴ Hich ajt nHuindzin Jesucristo ti xyajnejhuuyich co tzojc n'ixmadzipyich jada njugy'ajtin (n'ögibich). ¹⁵ Paady

ycixp naymic'ixyijich mictägy ma miich ajcxy co ngapxhuijcixy jigix co anajty n'ögyich mjäymetziyb ajcxy tüg'óciy jada tiy'ajt.

Yi' ajcxy huudibi y'ijxy je Cristo ymij'ajtin y'oy'ajtin

¹⁶ Hich miich ajcxy ti nyaj'ixpicy je tiy'ajt maabi nHuindzin Jesucristo, jadu'n nej Dios ymij'ajt mädity, e jadu'n nej je' yhuimbidañ jadüg'oc ya naaxhuiñ. E ca' hich ajcxy nyaj'ixpicy nigoo'ayuc anii'ayuc huudibi ci'm ti ngojyich ti nmacxyich. Mäid hich ngi'mhuin ti n'ijxcixyich je Huindzin Jesús ymij'ajtin. ¹⁷ N'ijx hich ajcxy co je Dios Teedy mooy ajt nHuindzin Jesucristo oy'ajt etz mij'ajt. E nañ nmidooyich ajcxy ayuc choñ ma je oybi Dios y'it, xyñimaayi: “Jada je' hich n'ung huudibi ooy ndzocyich njihuüyich, e ooy jotcuje nayjihuüyijich mäid yi' ycixpi.” ¹⁸ Hich ajcxy nañ jadu'n ci'm ti nmidóogixyich je ayuc huudibi anajty tzomb tzajpoty. Jim hich ajcxy anajty quipxyi mäid je Huindzin Jesús ma je amay gop.

¹⁹ Nañ jadu'n nmäid'ajtim je ayuc jac'oybi jactiyybi. Je' je' je tiy'ajt je ayuc huudibi ajcxy yjay je Dios y'ayucnajtzcapxiybi jecy'ajty. Oy miich ajcxy oybi mduñ co m'amidoo'ijtcixy je oybi tiy'ajt maabi Jesucristo huudibi jadu'n nipaady nej tüg jün tixcp agootztuum etz jadu'n nipaady nej je xii co yximiydäy, etz jadu'n nipaady nej je mijmadza' jayhuixtucpi co ypidziomy. Jada tiy'ajt xycodhixip ajcxy mjot mhuinmañ. ²⁰ Cuendtungix miich ajcxy jada: tüg'óciy je tiy'ajt, huudibi Dios ytiy'ajtmäidpi yejc huudibi ijtp jaybety ma Dios ylibro, ca' huaad pin yajniğejip mäid yci'mhuinmañ. ²¹ Com je Dios y'ayucnajtzcapxiybi camina je' ajcxy ayuccapxhuäcxy mäid yci'mdzojcin yci'mhuinmañ. Dios anajty ajcxy huin'ixyip jëbi ayuccapxhuäcxy mäid Dios ycixpi com je Espíritu Santo anajty ajcxy mooyip ayuc huudibi ajcxy ycapxhuäcxyp.

2

Yi' ajcxy huudibi yaj'ixpijcp anii

¹ Per nañ ji anajty nañ jadu'n ayucnajtzcapxiybi huudibi anajty ajcxy anädaacp ma je Israel jäy. E nañ jadu'n yji'adipy ayuccapxhuäcxpi huudibi anii yaj'ixpigipy ma miich ajcxy. Je' ajcxy ayüch ameech yaj'ixpigipy yci'm'ayuc yci'mhuinmañ huudibi ajcxy yajhuinmañyidigooyipy je mibijcpidijc. Yminañ ajcxy co ca' yjanchity je Huindzin Jesús y'ayuc, je huudibi yajnidzooc ajt n'alma, e jadu'n ci'm ñay'ayo'nmóoyigixy mäid Dios mic'amy. ² Mayjäy ooy panicxañ je jibicpi huudibi ajcxy ytungixyp, e mäid je' ajcxy ycixpi yajniğápxipy yajnimiydägipy ajcxy jibic je huudibi ajcxy cuydumb je tiybi ayuc, je Jesucristo y'ayuc oybi. ³ Mäid co anajty tzach'adzojccixy meen, chi anajty xyhuimbijccixy xyhuimmeetzixy mäid ajcxy y'ixpijcin ca'p yjanchity. Per je pocycähuin ajcxy ahuijxip, ca' ma ñidzooy. Ti yjejni maabi ajcxy ypocycan ma Dios. Dios tzaachytunib ajcxy mäid ypocy ycixpi.

⁴ Dios ca' je' huinmecxxy je ángeles ajcxy huudibi tundigooygixp. Hue' janchtiy ycötijnajxtaayb ayoodactuuyb etz yajhui'my agootztuuyb, cadeniñy y'ijtcixy cuend'aty, ixti cooni anajty paady xii tiempo co anajty yajtiydunañ naaxhuiñyjäy mäid ypocy ycixpi. ⁵ Nañ ni ca' Dios huinmecxxy je naaxhuiñyjäy huudibi tundigooy jecy'ajty. Chi quejxy ayo'nduu etz mijniğom ma je jibicjäydijc. Jëyi yajtzoocy je Noé huudibi capxhuäcx je tiy'ajt. Quipxy mäid Noé yajtzoocy jahuixtuc y'amigügtijc. ⁶ Dios nañ jadu'n tzaachytuñ mäid ypocy ycixpi etz yajhuindigoy mäid jün metz cajp, Sodoma etz Gomorra, ixti cooni yajhui'my accuyjam jigix y'idipy je ijxpejt ma je jibicjäydijc huudibi ajcxy jac'axam jactzinähuam jacjugy'adam. ⁷ Dios yajtzooc je Lot, hue' je' anajty janch oyjäy, e janch ymäid anajty jotmay co anajty je jibicjäydijc ajcxy ijxi chinaayin yjugy'ajtin janch jibic. ⁸ Jabom jabom anajty je Lot, je jäy oyjäybi huudibi anajty tzinaayb quipxyi mäid je jibicjäydijc, ni ca' anajty jotcuje'aty co anajty ixxy midoy nej anajty ytundigooygixy je jäy ajcxy ca'pi ytudägyity. ⁹ Dios mäid mic'ajt jëbi nihuañ yajtzögy pinjaty mibijccixp

cixyjot huinjot co je mujcu' yjot'íjxigixy huinma'ñ'íjxigixy. Nañ jadu'n Dios mic'ajt miidity jigix jëbi yaj'ijtcixy je jibicjäydijc miid tzaachypi ayo'n, huidibi ymöhuamy co anajty naaxhuiñjây tiyduñ miid ypocy ycixpi.

¹⁰ Dios ymiid mic'ajt jëbi tzaachytunipy pinjaty tumb jibic-huinma'ñ nej ñinícx nijot'ajtcixy, e ca' ixaangixy je Huindzin Jesús y'oy'ajtin ymij'ajtin. Amij agix etz jotmic ajcxy nayjihuiyii. Ytumb ajcxy yci'mjot yci'mhuinma'ñ. Ni ycatzigiiygixy co oyñinej ajcxy ni'ojiiygixy pinjaty mic'ajt miid ma Dios ytung. ¹¹ Oy je ángeles ajcxy miidity mijcötujcin etz ane'min, ca'p je' ajcxy yjot yhuinma'ñ miidity nicxy ni'ojiiygixy ma Dios yhuinduu pinjaty mic'ajt miid ma Dios ytung.

¹² Per jadayaab jibicjäydijc ajcxy jadu'n ajcxy yi' nej iyujc, ca' yhuinma'ñ; nigoob ytimyhuidity etz yma'xun'ajtcixy jigix jäy ymadziiyb etz yaj'ögiiyb. Ñixiicpy yajxiicpy ajcxy yi' huidib ca' huinjihui'y. Per nañ tim jadu'n ajcxy y'ögipy nej iyujc y'ögy ytigoy.

¹³ Cobadihuaangixy jadu'n nej ti ytundigooygixy. Hue' nayjihuiiygixy capin yjadu'nity, yxondaaccixy tüg jaxicyjaty. Jadayaab jäy ajcxy pocy ypa'tcipy ajcxy yi' chinaaygixy yjugy'ajtcixy. Tüg tzo'ydu'n co ajcxy nañ jadu'n xymijyöybejtcixy ma m'amugiiygixy.

¹⁴ Co ajcxy huindüxcixy töxyjäydijc, chi ajcxy ooy nijot'ajtcixy co miid tundigoya'ñ. Ca'p ajcxy chíjpigixy y'anucxiiygixy miid pocytunü. Yajtundigooygixy pinjaty amützip ma mibijcin, ooy ajcxy yhuijty ycuicity ycohuinma'ñity ma meeñ'adzoogii. Dios yajtigoyiib ajcxy y'alma. ¹⁵ Tigoyjäy yi' ajcxy, je' co ti ñiidigajtcixy ti ytüdigajtcixy ma je tiybi je janchypi tiy'ajt. Je' ajcxy ypanicxy ypayöyp je profeta Balaam y'ijxpejt, je Beor y'ung, co ooy ymeeñybada'ñ anajty miid yjibic-huinma'ñ. ¹⁶ Chi Balaam oy yaj'ojiy ypocy tüg töxyburro, ycapxy jadu'n nej tüg jäy, e jadu'n je' yajhuäcxijpy je profeta Balaam miid je' ylocihuinma'ñ.

¹⁷ Com jada jäy ajcxy ca' panicxixy je janchypi tiy'ajt, paady ycixp jadu'n ajcxy nipaady nej tüg nipozojut ca'pi ñii miidity, etz jadu'n ajcxy nipaady nej joc huidibi poj yajyöyip (ca' ytu'y). Dios möhuiib ajcxy tzaachypi miid ypocy ycixpi, idam ajcxy agootztuuyb huinixii huinitiempo. ¹⁸ Com ycapxyp ajcxy ayuc huidibi ca' choubaad. E miid je jibic-huinma'ñ ycixpi huidibi ajcxy chachnijot'ajtpy yajtundigooygixy pinjaty tiibi choongixy ma je huidibi ajcxy tzinaayb miid jibic-huinma'ñ. ¹⁹ Yi' ajcxy yaj'ixpijcp je mayjäy co jëbi tungixy huentim ti huidibi ajcxy ñijot'ajtpy. Per yi' ajcxy huidib jibic-huinma'ñ yaj'ixpijcp, ci'm ajcxy ñay'íjtigixy pocypa'tcipy, je pocy tzach'ane'mb ajcxy yjot yhuinma'ñ, ixti jadu'n nipaady nej jihuiy ajcxy ane'my y'ity. ²⁰ Pinjaty ti ymibijccixy ti ñejhuiiygixy je Huindzin Jesucristo ytiy'ajt huidibi yajnüdzoocp ajcxy y'alma, e jadu'n ti yjihuäccixy ma je naaxhuiñjây yjibictzinaayin yjibicjugy'ajtin, pen jadüg'oc anajty y'ayöyiyñip ma je jibicpi, e je jibicpi ymimadägyii ajcxy, o'ctiy anajty nigí yhui'mgixy ca'ydí nej je jayijp'atypi. ²¹ Nigí oy co ixypy je' ajcxy ca' ytimnejhuiiygixy je janchypi tiy'ajt. Com ti ocnejhuiiygixyp, e chi jada' y'ixtigihuäccixy ma je huätzpi Dios ycötujcin huätzpi Dios ytiy'ajt tiibi anajty y'ocjamóoyigixy. ²² Per je' yi' ajcxy ytimycuydummy nej je ayuc y'ity: "Je uc yci'm'ich ñihuimbijtpy, e je idzim huidibi namdziidaayb, nicxy je' yajtznip yquitnup mo'ntzjoty jadüg'oc."

3

Je Huindzin Jesús huimbidaamb ya naaxhuiñ

¹ Miich ajcxy migügtijc huidibi ich ooy ndzocyich ooy njihuiyich, jada je' je mimetzpi necy huidibi ajcxy nyajnijayiyb. Ma jada metzpi necy hue' ich ndzoga'ñich co nya-jhuinma'ñymedzip ajcxy ma Dios ytiy'ajt miid jada capxhuijin huidibi ti njaayich. ² Ti nnijayiiygixy jigix m'ajihuihuuyb ajcxy je ayuc huidibi ajcxy pa'tcipy'aty ñajtzcapxiiy je Dios y'ayucnajtzcapxiiybi ajcxy huidibi huädz yhuinma'ñ anajty ymiid. Nañ ajihuiiyigix

je Huindzin Jesucristo je' y'ane'min huídibi yajnídzoocp ajt n'alma, je ane'min huídibi apóstoltijc miich ajcxy xyajnímaayb.

³ Nejhuíygixy miich ajcxy jada jayijp ma yam ca'ni yhuaad'ajtni mina naaxhuiñ ycixipy, miinip jáy ajcxy huídibi nixigip yajxigip huídibi Dios yjé'ajtpy. Chínaaygixy yjugy'ajtcixy anajty mïd jibic-huinma'ñ huídibi ci'm ñijot'ajtcixyp. ⁴ Chi ajcxy ymina'nip: "¿Ti co mdzachmibijccixy co Cristo yhuimbida'ñ jadüg'oc ya naaxhuiñ? Nej ajcxy je' y'o'ctay je mij'ap je mijteedy, je'ni y'ijttäy tüg'óciy jadu'n nej naaxhuiñybi chondacy. Paady ca' yjanchity co je Cristo yhuimbida'ñ jadüg'oc ya naaxhuiñ," jadu'n yminaangixy. ⁵ Yi' ajcxy ca' huinjihuíhuaangixy cuendtunaangixy co mïd Dios y'ayuc yi' tzajp j'ajtp anajty yi' tzachjegyip, e mïd Dios y'ane'min huin'it je naax oy yguëxigy huídibi ijtp anajty ñijoty. ⁶ Nañ jadu'n mïd Dios y'ayuc je jecy'ajtpy naaxhuiñyjáy y'ayo'nbaty, ñijicxtay nidüg'óciy e ytigoyday ñijoty. ⁷ Per Dios mïd yi' y'ayuc yaj'ijtpy jada naaxhuiñybi etz tzajp huídibi cham j'ajtp ixti coon yajtigoydáhuipy mïd jïn. Je jïn huin'it je' nöctähua'ñ co anajty yhuaad'ajtni ma Dios tïyduna'ñ je camadacpidijc je jibicjäydijc, etz yajtigoya'ñ ajcxy y'alma.

⁸ Jadügnax miich ajcxy migügtijc huídibi ooy ndzocy njihuíyich, ca' mjäy digooygixy co ma yi' Huindzin Dios, tüg xii jadu'n yi' nej tüg mil jimijt, e tüg mil jimijt jadu'n yi' nej tüg xii. ⁹ Ca' nmínaaním co yi' Dios yajhuäcxibaamyñi yi' mina cuyduna'ñ huídibi yi' ti ahuaníy, jadu'n nej nijëjty jáy a'ixiygixy. Dios yajtumy mecxtujcïn mïd miich ajcxy, com hue' yi' tzocy co ni tüg jáy ayo'n paadipy. Yi' chojcpy co nidüg'óciy jáy huen jothuimbijtcixy etz ixmajtzcixy pocytuní.

¹⁰ Co anajty je Huindzin Jesús ymiiñ jadüg'oc ya naaxhuiñybi chaachytunipy je' tüg'óciy jibicjäydijc, hue' je' ytuníyb yjadíyb ma anajty ca' pin jijp'ixy, jadu'n nej tüg meetzpi ymiiñ coodz co meedza'ñ tijaty. Huin'it je tzajp yhuindigoydáhuipy mïd tüg ne'min jidijtin oychigíyñip. E tüg'óciy huídibi mïd ndzínaayím njugy'ajtim toydáhuip yi' mïd jïn, yi' naax toydáhuip yi', etz tijaty yajpatp ya naaxhuiñ toydáhuip nañ jadu'n.

¹¹ Com tüg'óciy tijaty huídibi j'ajtp yhuindigoydáhua'ñ mïd jïn, paady ycixpi nígi copicy miich ajcxy co mdzínaaygixp tudägy e myajmij'ajtcixyp Dios. ¹² Ahuixcix ajcxy je xii tzuu mina Dios anajty yajhuaad'aty co yajhuindigoya'ñ je naaxhuiñybi. Naymic'íjxigix co tzojc yminipy yi' jadu'mbi xii tzuu. Co yhuaad'ajtnip huin'it xii, je tzajp yhuindigoydáhuip mïd jïn; je xii po', je poj p xemembi, je tuu enee jadu'ñyi yticxtáhuipy yjy dáhuipy jïnjoty. ¹³ Per ñch ajt n'ahuíxim je jemybi tzajp jemybi naax huídibi Dios ti xyaj'ahuaníyím, tüg tzínaaydac janch'oybi ma ca' ti jibicpi.

¹⁴ Paady ycixp miich ajcxy migügtijc huídibi ñch ooy ndzocyich njihuíyich, nami m'ahuíxyp miich ajcxy co Dios yajhuindigoyaanip jada naaxhuiñ, naymic'íjxigix ma tüg'óciy ajcxy yi' mdzínaayín co mguydunipy ajcxy Dios ytiy'ajt jigix ajcxy Dios xy-paadipy, ca' ajcxy ti tzip ti gapxy, ni ti jibicpi, e ni ti pocy, ac huädz jot huädz huinma'ñ anajty mïd'ajtcixy. ¹⁵ Cuenditungix je mecxtujcïn huídibi ñch ajt nHuindzin Jesucristo yajtumy mïd ñch ajt jigix jëbi xyajnídzoocím ajt n'alma. Nañ jadu'n yi', ñch ajt nmigüg Pablo huídibi ooy ndzojcím, ti miich ajcxy xyñijayíygixy, jadu'n nej ixpijcïn Dios ti ymöyí ma yi' y'ayuc. ¹⁶ Ma tüg'óciy Pablo ñecy tibi xyajnigüejcixy, jada tiy'ajt ti xyajmïdmíydaaccixy. Nijëjty Pablo ñecy ooy chachchiphuinjihuíyñity, e nijëjty jáy ajcxy tigach ajcxy huinjihuíy Pablo y'ayuc, ca' ajcxy huinjihuíy nej Pablo yjamína'na'ñ. Huingjaty ajcxy ñigüej Pablo y'ayuc, e ci'm ñayyajhuinma'ñy digóoyigixy.

¹⁷ Paady ycixp miich ajcxy migügtijc huídibi ooy ndzocy njihuíyich, miich mnejhuíydaaygix jada tiy'ajt. Nayguend'ájtigix ca'ydi jibicjäydijc mïd y'aní xyajnidigajtcixy xyajtúdigajtcixy, e ca'ydi m'ixtigíhuäccixy ma ajcxy mmibijcïn jadu'n nej tïydudägy ti mmibijccixy. ¹⁸ Huen ñch ajt nHuindzin Jesucristo huídibi yajnídzoocp ajt n'alma nígi may'ajt oy'ajt tunipy mïd miich ajcxy, e nañ nígi yujcpedipy ajcxy yi' m'ixpijcïn ma yi' ytiy'ajt. Huen Jesucristo cōmay y'idipy etz m'ídiipy oy'ajtin mij'ajtin

jadachambi xii tiempo etz jadu'n nej xii tiempo miimb cidacp. Jadu'n ngapxycíxyich.
Amén.

1 SAN JUAN

Yi Jayijpi Necy Huidibi San Juan Yajnigiejxy Je Mibijcpidijc Nidüg'óciy

¹ Dios y'ayuc jiiyim anajty co naaxhuiñybi chondacy. E tiy'ajt nyejcypich jadu'n nej nmidooyich ci'm yi' y'ayuc, jadu'n nej n'ijxyich mïid ngi'mhuiinich, jadu'n nej nhuindicxyich yi' ci'm, e nañ jadu'n nej nnidoñich mïid ngi'mgijich. Nyajnijayiybich miich ajcxy jada necy jadu'n nej je Cristo je Dios y'ung yjugy'ajtin yega'ñ huidibi ca' cixa'ñ tigoya'ñ niminaabi. ² Ti ñayguëxigyii ya naaxhuiñ je Dios y'ung huidibi ymïid jugy'ajtin huidibi ca' niminaabi ycixipy ytigoyipy. Ti n'ixyich ajcxy jigix jëbi tiy'ajt nyéjccixyich co ti ñayguëxigyii ya naaxhuiñ, etz ti n'ixyich jigix jëbi nyajnimaaygixy nej jëbi huaad huingbi jugy'ajtin nbaatim co anajty ti n'o'cim. Je Dios y'ung, je huidibi jiiyby ijtp ma Dios Teedy, nayguëxici je' ma ich ajcxy. ³ Je huidibi ich ajcxy n'ijxich nmidohuich, cham miich ajcxy nyajnimaaygixy jigix jëbi ajt tú'ciy n'ijtim ma Dios ytiy'ajt, etz nañ jigix jëbi tú'ciy ajt n'ojadajtim Dios etz je' y'ung. ⁴ Paady ycixp jada tiy'ajt nyajnijäyiy ajcxy jigix ajcxy jotcuyc'ajtin mbattáaygixipy mïid jada ayuc tiy'ajt.

Dios yi' je' je tücxin jájin

⁵ Jadayaabi Dios y'ayuc ytiy'ajt Jesucristo ti xyajnimäyich e nañ cham ich miich ajcxy nyajnimaaygixy. Dios huädz ytiy'ajt mïidity, ca' ma Dios anïdägy. Jadu'n Dios nipaady nej tüg jïin ytiicxy ma tüg it e ni ca' ni mina ypich. ⁶ Co nmïinaanim co Dios ajt mïid n'ijtim tú'ciy, e ca' yjanchity, ca' anajty ajt Dios ytiy'ajt nyajtuunim, jadu'n nipaady nej jihuiy ndzinaayim agootztuum. Nigoo n'ïindaacim, ca' anajty ajt nguyduunim Dios ytiy'ajt. ⁷ Co nguyduunim Dios ytiy'ajt jadu'n nej yi' ytiy'ajt mïidity, jadu'n nipaty nej jihuiy ndzinaayim ma jïin ytiicxy. Huin'it jëbi ajt n'ijtim tú'ciy miñ xyipy, e Dios xyajpocynihuaatztaayim co Jesucristo y'o'cy etz ñi'py teemy gujy mïid ich ajt nbocy ycixpi.

⁸ Co ixypy nmïinaanim co ca' nbocytuunim, nigooob nayhuin'ïnim ci'm, e ca' jadu'n Dios ytiy'ajt yajpaady ma ich ajt njot nhuinma'ñ. ⁹ Pen ngapxypidzimim ajt nbocy ma Dios, yi' ñidinaayb yi' y'ayuc huidibi ti xyajnimaayim co ymecxamy ajt nbocy, e nañ tudägy ytuñ mïid ich ajt ycixpi. Dios xyhuinmeecxim ajt nbocy etz xyajhuaatzim njot nhuinma'ñ jëbi n'ixmajzim jibic-huinma'ñ. ¹⁰ Co ajt nmïinaanim co ca' nbocytuunim, hue' anajty Dios nyajnajxim anï, e ca' anajty ti ngöbïicim cixyjot huinijot yi' ytiy'ajt.

2

Cristo, ich ajt nhuingapxi ma Dios

¹ Miich ajcxy migügtijc huidibi ooy ndzocy njihuiyich jadu'n nej ixypy ngi'm'ungich ngi'm'anäcich, cham jada tiy'ajt nyajnijayiygixy, jigix ca' ajcxy mdundigóoygixipy. Pen jï nidügti miich ajcxy huidibi tundigooyb, jada migüg huidibi tundigooyb huen mibijctzoy Dios ma Jesucristo yxi mïid ypocy ycixpi. Jesucristo yi'je' huingapxp ma Dios Teedy mïid ajt nbocy ycixpi. Tudägy je', e jëbi xyhuingapxim ma Dios Teedy. ² Com Jesucristo ti y'ögy mïid ich ajt nbocy ycixpi, paady ycixp jëbi capx'oyiy ma Dios mïid ich ajt ycixpi e xycapx'oyiyim ich ajt nbocy etz nañ capx'oyiyip tüg'óciy naaxhuiñy jäy ajcxy ypocy, yi' jäy ajcxy pinjaty yi' y'ayuc ytiy'ajt mijpidaacip.

³ Co Jesucristo ytiy'ajt nguyduunim yajxon, huin'it nejhuiyim tiydudägy jadu'n nej Dios may'ajt oy'ajt ti tuñ mïid ich ajt ycixpi. ⁴ Co ixypy pinjaty ymïina'ñ co ñejhuiyï Jesucristo ytiy'ajt e ca' cuychinaayï yi' ytiy'ajt hue' yi' tzach anïdaacpi, e ca' mïidity Dios ytiy'ajt. ⁵ Yi' jäy ajcxy pinjaty cuychinaayb cuyjugy'ajtp yajxon Jesucristo y'ayuc ytiy'ajt,

janch tiydudägy anajty yajmij'aty Dios. Co nguychinaayim nguuyjy'ajtim yajxon Jesucristo ytiy'ajt, huin'it jëbi nejhuiyim co nyajmij'ajtim Dios. ⁶ Yi jäy ajcxy pinjaty minamb co ymüid Jesucristo y'ayuc ytiy'ajt ma je' y'ay yjot, copicy ajcxy chinaaygixyipy jugy'ajtcixipy tim jadu'n nej Jesucristo chinay jugy'ajty.

Je jemybi ane'min

⁷ Miich ajcxy migügtijc huidibi ooy ndzocy njihuïyich, ca' nmïnaanïm jemybi tiy'ajt ajcxy nyajnimähuamy ma jada necy. Je' jada je tiy'ajt huidibi jecy'ajty ti mnejhuïyigixy co oga'n ajcxy mmijpidacy Jesucristo. Jada tiy'ajt jecy'ip jada je' huidibi cham ajcxy mmidooyb jadüg'oc. ⁸ Nañ jemy jada tiy'ajt nañ jadu'n huidibi nyajnimaaaygixyp ma jada necy. Jada je'je tiy'ajt huidibi Jesucristo ymüid ma yjot yhuinma'ñ etz nañ ïch ajt nmüid ma ajt njot nhuinma'ñ. Yi jecy'ip ayuc huidibi ca' ytiy'ajtiy, ti yi' ñaxy e cham Dios ytiy'ajt tiydudägy nyajtuunim, jadu'n nej jihuïy je coodzpi ti ñaxy e cham ti yximïy.

⁹ Yi jäy ajcxy huidibi minam co Dios y'ayuc ytiy'ajt ajcxy cuyduuni e ca' ixáanigixy ymigügtijc, ca' yi' ajcxy tiydudägy Dios y'ayuc yajtuuni, jadu'n yhuimbïdzimy jadu'n nej jihuïy agootztuuy ijtcixy. ¹⁰ Yi jäy ajcxy pinjaty tzojcp jihuïyb ymigügtijc hue' yi' yajpaatcixy müid Dios ytiy'ajt ma ajcxy yjot yhuinma'ñ, jadu'n nipaady nej jihuïy y'ijtcixy ma xï ytiicxy, ca' ajcxy ñïdigoy ytüdigoy ma Dios ytiy'ajt. ¹¹ Yi jäy ajcxy pinjaty ca' ymigüg ixaangixy, ca' yi' ajcxy Dios ytiy'ajt ajcxy yajtuuni, jadu'n nipaady nej jihuïy agootztuuby y'ijtcixy, ca' ajcxy chinaaygixy nej Dios ytiy'ajt yja'ané'migixy, ca' ajcxy nejhuiyigixy huidibi tiy'ajt jëbi yajtungixy, com jibic-huinma'ñ chachtuumyb ajcxy huidibi ca' Dios tiy'ajt'adyii.

¹² Miich ajcxy migügtijc huidibi ooy ndzocy njihuïyich ajcxy jadu'n nej ixypy ngi'm'ung ngi'm'anäcïch, com Dios ti miich ajcxy mbocy xyhuinmecxtayi co Jesucristo y'o'cy müid ajcxy mbocy ycixpi, paady ycixp cham nnijayïygixy. ¹³ Cham nnijayïygixy miich ajcxy mij'anäctijc, com ti mmijpidaaccixy Jesucristo huidibi jii'ajt co naaxhuiñybi oga'n choondacy etz chambaad yjii'atyñi. Cham nnijayïygixy miich ajcxy anäctijc, com ti mmimadaaccixy je ca'oybi.

Cham nnijayïygixy miich ajcxy pi'ctijc mutztijc com ti mmijpidaaccixy Dios Teedy. ¹⁴ Cham nnijayïygixy miich ajcxy mij'anäctijc, com ti mmijpidaaccixy ajcxy Jesucristo huidibi jii'ajt co naaxhuiñybi oga'n chondacy etz yjii'atyñi chambaad. Cham nnijayïygixy miich ajcxy anäctijc, com mic mjot mhuinma'ñ müidity ajcxy etz Dios ytiy'ajt yajpatp ma ajcxy mjot mhuinma'ñ, paady ycixp ajcxy ti mmimadaaccixy yi ca'oybi.

¹⁵ Migügtijc, ca' anaxy m'adzöjccixip yi huidibi müid ndzinaayim ya naaxhuiñ. Yi jäy ajcxy huidibi adzojctaayb anaxy yi huidi müid ndzinaayim, ca' ajcxy Dios Teedy yajmij'ajtcixy. ¹⁶ Ca' anaxy m'adzöjtähuipy ajcxy tüg'óciy huidijaty ya naaxhuiñ yajpatp, jadu'n nej njot nhuinma'ñ tzojcm, jadu'n nej tijaty n'ijxim, jadu'n nej huidibi amij agix müid ndzachnayjihuïyim. Com yi jadu'mbi huinma'ñ ca' yajpaady ma Dios Teedy, hue' yi' yajpaady ya naaxhuiñ. ¹⁷ Huidijaty ya naaxhuiñ yajpatp cixipy tigoyipy yi', nañ jadu'n ytigoya'ñ huidijaty yi huinma'ñ y'adzojcpy. Yi jäy ajcxy pinjaty Dios ytiy'ajt yajtuunip jadu'n nej Dios tzocy, jugy'adipy ajcxy e co y'ó'ccixipy, ca' ajcxy y'alma ytigóoygixipy.

Je tiy'ajt etz je anï

¹⁸ Miich ajcxy migügtijc huidibi ooy ndzocy njihuïyich nej ixypy ngi'm'ung ngi'm'anäcïch, tim cijxnip tiempo ya naaxhuiñ. Ti jada mnejhuïyigixy co miinaam jäy ajcxy huidibi nayyajnaxaanip nej Cristo' e ca' yjanchity. Müid co cham ji mayjäy ajcxy huidibi nayyajnaxip jadu'n nej Cristo, paady nejhuiyim co tim cijxnip yi tiempo müid ïch naaxhuiñyjäy ajt ycixpi. ¹⁹ Yi jäy ajcxy huidibi nayyajnaxaanip jadu'n ixypy nej Cristo, naybïjc-huäcxaanip yi' ajcxy müid ïch ajt, ca' anajty ajcxy ytügy yi' ajcxy yhuinma'ñ müid ïch ajt nhuinma'ñ, tüg'mucy ixypy ajt xymüid'ijtim. Ji jadu'n ñiguëxy co ca' ytügy yhuinma'ñ müid ïch ajt nhuinma'ñ co ti ajcxy xypuhuäctuum.

²⁰ Ti miich ajcxy xy'adigiy xyjottigiy Dios yjihuiñ ymic'ajt, paady miich ajcxy mhuinjihuüy tüg'óciy Dios y'ayuc ytiy'ajt. ²¹ Ca' nmínaaním paady miich ajcxy nijayiygixy co ca' mhuinjihuüygyxy Dios ytiy'ajt. Paady nnijayiygixy miich ajcxy jigix mnejhuüygyxyip Dios ytiy'ajt etz mnejhuüygyxyip co yi jäy ajcxy huidibi indaacp, ca' yi' ajcxy Dios ytiy'ajt mĩdity.

²² Yi' je' indacp huidibi minamb co Jesús ca' yi' yjējity je Cristo huidibi Dios yquejx. Yi' indacpi je'midzip'ajtp Jesucristo etz ca' mibicy Dios Teedy etz nañ ca' mibijci Dios y'ung. ²³ Je jäy ajcxy huidibi indacp minam co Jesús ca' yjējity je Cristo, e nañ ca' ajcxy mĩdity Dios Teedy ytiy'ajt. Yi' jäy ajcxy huidibi minam co Jesús yjējity je Cristo je Dios y'ung, nañ ymĩd ajcxy Dios Teedy ytiy'ajt.

²⁴ Je ayuc tiy'ajt huidibi miich ajcxy mmĩdou co oga'n ajcxy mmijpidacy Jesucristo, jada ayuc tiy'ajt mguydúngixyipy e ca' mjäydigóoygixipy. Pen mmi'ijtcixp yi' ayuc huidibi Dios yjäy oga'n ajcxy xyaj'ixpijc, huin'it jēbi miich ajcxy myajpatcixy ma Dios y'ung etz je' yajpaady ma Dios Teedy. ²⁵ Dios ti xyajhuinhuaniyim co xyajtznāhuaaním ajt n'alma huinixii huinĩtiempo.

²⁶ Jada tiy'ajt ajcxy nyajnijayiyb jigix ca' mmijpidáaccixipy yi' ajcxy y'ayuc huidibi xyajhuinmañydigoyaam ajcxy. ²⁷ Yi' Dios yjihuiñ ymic'ajt huidibi ti xy'adigiygyxy ti xyjottigiygyxy ijttib yi' ma miich ajcxy mjot mhuinmañ. Paady ycixp ca' myajmayjajtcixy pin xyaj'ixpigip ajcxy com je Espĩritu Santo xyaj'ixpigip ajcxy. Je Espĩritu Santo xyajni'ixiydaayb ajcxy tüg'óciy Dios ytiy'ajt, tiydudägy yi', ca' yi' y'anijity. E jadu'n nej je' xyajni'ixiygyxy, jadu'n mguydunipy ajcxy. Mi'ijtcix Dios yjihuiñ ymic'ajt ma mjot mhuinmañ ajcxy.

²⁸ Miich ajcxy migügtijc, mi'idipy ajcxy Jesucristo ytiy'ajt ma mjot mhuinmañ jigix co ñayyajnigüexigiyb Jesucristo ya naaxhuiñ jadüg'oc, huin'it jotcuje ajt nnayjihuiyim etz ni ca' jibic nayjihuiyim co anajty xyñimiinim. ²⁹ Ti mnejhuüygyxy co yi' Jesucristo tiydudägy ytuñ, e ti mnejhuüygyxy nañ jadu'n co tüg'óciy yi' jäy huidibi tiydudägy tumb, yi' je' ajcxy Dios y'ung'ajtip.

3

Dios #ch ajt xy'ung'ajtim

¹ Jihuiñybiccix tüg'óciy je mijpi may'ajt Dios Teedy ti tuñ mĩd #ch'ajt ycixpi jigix jēbi naydijim Dios y'ung. Yi' naaxhuiñyjäy ajcxy huidibi ca' mijpidaaccixy Jesucristo ca' ajcxy nejhuüygyxy huinjihuüygyxy Jesucristo ytiy'ajt, paady ycixp ca' ajcxy nejhuüy huinjihuüy co Dios xy'ung'ajtim. ² Miich ajcxy migügtijc huidibi ooy ndzocy njihuüyich, jadachambi Dios #ch ajt xy'ung'ajtim. Jadachambi ca'p y'ocnigüexigyñi nej #ch ajt jiini n'idaaním. Co anajty Jesucristo ymiiñ jadüg'oc ya naaxhuiñ, huin'it nguipxyjatytiiyim mĩd je', com n'ixaaním ajt Jesucristo jadu'n nej je' yajpaady. ³ Tüg'óciy jäy ajcxy huidibi jipp'ijxp co Jesucristo ymiinañ jadüg'oc ya naaxhuiñ, copicy yajhuädzipy ajcxy yjot yhuinmañ. Huen mi'ijtcixy ojot oyhuinmañ jadu'n nej Jesucristo mi'ity ojot oyhuinmañ.

⁴ Tüg'óciy jäy ajcxy huidibi pocytumb, hue' ajcxy ymidundigooyb Dios ycötujcin. Co ajcxy ytundigoy, ca' ajcxy ymadägy nej cuydunipy Dios ycötujcin. ⁵ E mnejhuüyb miich ajcxy co yi' Jesucristo ti ñayguexigyii ya naaxhuiñ jigix jēbi xyajpocynĩhuaatzim. Jesucristo ca' anajty ti pocy mĩdity, ca' anajty ma ti ytundigoy. ⁶ Tüg'óciy jäy ajcxy huidibi cuydundāhuam Jesucristo ytiy'ajt, ca' huaad pocytuñ. Yi' jäy ajcxy huidijaty pocytundib, ca'ni'ixy ajcxy yi' Jesucristo, nañ ca'ni' ajcxy huinjihuüy yi' ytiy'ajt. ⁷ Miich ajcxy migügtijc huidibi ooy ndzocy njihuüyich jadu'n nej ngi'm'ung ngi'm'anäcich, ix ni pin xycahuin'ingix. Yi' jäy ajcxy huidibi ojot oyhuinmañ yajtumb, tiydudägy yi' ajcxy chinäy yjugy'ajty, tim jadu'n nej Jesucristo tiydudägy chinay yjugy'ajty. ⁸ Yi' jäy ajcxy huidibi tzachpocytundibni, yi' ajcxy mujcu' yjäy'ajtip. Com jadu'n nej chondacy je

naaxhuiñybi oga'n yi mujcu' jëni anajty jadu'n chachpocytuñ. Paady ycixp Dios quejxy y'ung ya naaxhuiñ co je mujcu' yhuinma'ñ yajcödigoyaani.

⁹ Yi jäy huidibi Dios ajcxy ti ymöyii jemybi jot jemybi huinma'ñ, ca' ajcxy ypocytundiyy com je'co tú'ciy ajcxy yjot yhuinma'ñ mïidity, jadu'n nej anajty Jesucristo yjot yhuinma'ñ mïidity, ca' huaad ajcxy ypocytundiyy com Dios ti ymöyii ajcxy jemybi jot jemybi huinma'ñ. ¹⁰ Paady ycixp yñiguëxigy yi jäy ajcxy pinjaty Dios y'ung'ajtip etz pinjaty mujcu' ung'ajtip. Yi huidibi ajcxy ca' tiydudägy cuydungixy Dios ytiy'ajt etz ca' ajcxy ixa'ñ ymïgügtijc, etz ca' ajcxy tzocy jihuïy ymïgügtijc, hue' ca' ajcxy Dios ymöyii jemybi jot jemybi huinma'ñ, mujcu' ajcxy y'ung'ajtip.

Naychojcm nayjihuiyim miñ xyipy

¹¹ Jada je' je ayuc tiy'ajt huidibi miich ajcxy ti mmïdoogixy co oga'n ajcxy mmïjpidacy Jesucristo co copicy naychojcm nayjihuiyim nidüg nidüg. ¹² Ca' huaad jadu'n n'iditzim nej Caïn y'idich co anajty mujcu' huinma'ñ mïidity, chi y'uch yaj'o'cy. ¿Nej co y'uch yaj'o'cy? Je' co anajty je' jibic-huinma'ñ yajtuñ, e je' y'uch oyhuinma'ñ anajty yajtumyb paady ycixp je y'uch yaj'o'cy.

¹³ Miich ajcxy mïgügtijc, ca' ooy ndzachhuinmaay ajcxy co ca' yi naaxhuiñyäjy ajcxy xy'ixa'ñ, huidibi ajcxy ca' Dios y'ayuc mïjpidacï. ¹⁴ Com ich ajt nnejhuiyim co je nmïgügtijc ajcxy ndzojcm njihuiyim co n'o'cim, huin'it njugypigaanim e ndzinähaanim jiihy tzajpjoty huinixi huin'tiempo. Yi jäy ajcxy pinjaty ca' ymïgügtijc ixa'ñ ajcxy co ajcxy y'ögipy, huin'it ca' ajcxy chinähua'ñ jiihy tzajpjoty. ¹⁵ Huenpinjäyity huidibi ca' ymïgüg ixa'ñ, nipatpy nej ytundigoy jadu'n nej jäyyaj'o'cpi ytundigoy e nañ jadu'n nejhuiyim, co je' y'ögipy, ca' chinähua'ñ jiihy tzajpjoty. ¹⁶ Ya ixyipy jëbi ich ajt ijxpejt nbjicim nej huaad mïgügtijc ndzojcm njihuiyim, jadu'n nej Jesucristo ijxpejt yejcy co ñayyojxi ñaydooci co y'o'cy mïd ich ajt nbocy ycixpi. Paady ycixp ich ajt jëbi huaad ndzojcm njihuiyim nmïgügtijc, oy jada ndimco'ögiiyim. ¹⁷ Janch pinjaty yjamïd ymadaacïn, e yja'ixpy co ymïgüg tigati yajmayjaty, e amij agix ñayjihuiyii, ca' pa'ayo'n mïidity, ca' pubeda'ñ ymïgüg, ca' je' anajty tzocy jihuïy ymïgüg jadu'n nej Dios chogyii yjihuiyii. ¹⁸ Miich ajcxy mïgügtijc huidibi ooy ndzocy njihuiyich jadu'n nej ixyipy ngi'm'ungich, mïd oyjäy'ajtin etz mïd Dios ytiy'ajt tzoc yajxon naychojcm nayjihuiyim miñ xyipy. Ca' nmïnaanïm nigoo ngapxim nmïydaacim ahuac aguuy.

Cixyjot huinjot naybidaacim ma Dios

¹⁹ Co nyajtuunim oyjäy'ajtin mïd ich ajt nmïgügtijc, huin'it nejhuiyim co Dios ytiy'ajt nguyduunim e jotcuyc nayjihuiyim co Dios n'ojadajtim. ²⁰ Co jibic njot nhuinma'ñ ajt njihuiyim, mïd co ca' oyjäy'ajtin nduunim, jac nigï Dios jibic ñayjihuiyii com yi' jacmïjhuinma'ñ mïd, ca'ydi ich ajt, e yi' nejhuiydaayb tüg'óciy tijaty ajt nduunim. ²¹ Miich ajcxy mïgügtijc huidibi ooy ndzocy njihuiyich, co ca' ti jibicpi njihuiyim ma ajt njot nhuinma'ñ mïd co oybi nduunim, huin'it jotcuyc ajt n'ijtim mïd Dios. ²² E huentimtiijity huidibi ich ajt Dios nyajmïbijctzoohuim, yi' xymooyim mïd co yi' y'ayuc nguyduunim, e nduunim je huidibi yi' yjäygidacpy. ²³ Dios jada ti xyajnajtz'ane'mïyim co tzoc mïbijcm mïjpidacim yi' y'ung Jesús etz tzoc naychojcm nayjihuiyim miñ xyipy, jadu'n yi' ti xyajnajtz'ane'mïyim. ²⁴ Yi jäy ajcxy pinjaty cuydumb Dios ytiy'ajt, yajpatp ajcxy ma Jesucristo e nañ Jesucristo yajpatp ma je'ajcxy. Nejhuiyim co Jesucristo ytiy'ajt yajpaady ma ich ajt mïd co je Dios yjihui'ñ ymic'ajt ti xy'adigiiyim xyjottigiiyim.

4

Dios yjihui'ñ ymic'ajt etz je ca'oybi yjihui'ñ

¹ Miich ajcxy mïgügtijc huidibi ooy ndzocy njihuiyich, ca' ajcxy mmïbijctähuipy tüg'óciy jäy huidibi Dios y'ayuc capxhuäcxip. Mïdo'mbijccixy jayijp peni janch ajcxy mïdity Dios

yjihui'ñ ymic'ajt. Com ji mayjäy ya naaxhuiñ huidibi minam co Dios y'ayuccapxhuäcxi yi' ajcxy e ca' yjanchity. ² Jada je' je tiy'ajt ma huaad mjihui'ñybijccixy pen janch müdity ajcxy Dios yjihui'ñ ymic'ajt, yi' ajcxy huidibi Dios y'ayuccapxhuäcxi: tüg'óciy jäy huidibi capxhuäcxp co Jesucristo yma'xung'ajty ya naaxhuiñ müd ñinícx, Dios yi' ytiy'ajt ymüid. ³ E tüg'óciy jäy ajcxy huidibi ca' ñigapxpety ajcxy co Jesucristo chinäy ya naaxhuiñ müd ñinícx, ca' yi' Dios ytiy'ajt müdity. Ti müich ajcxy ayuc müdoogixy oga'n co miinaam yi naaxhuiñjäy ajcxy müd je mujcu' yjihui'ñ ymic'ajt, huidibi müzip'ajtp Jesucristo. E ti je'du'n ajcxy ymiingixy. Jada je'du'n ajcxy huidibi ca' nigapxpejtcixy co Jesucristo yma'xung'ajty ya naaxhuiñ müd ñinícx.

⁴ Migügtijc huidibi Dios yjihui'ñ ymic'ajt ti xy'adigüygixy ti xyjottigüygixy, e ti müich ajcxy mmimadaaccixy yi' huidibi ajcxy nigapxpejtp co Jesucristo ca' ma'xung'ajty ya naaxhuiñ müd ñinícx. Com Dios huidibi müich ajcxy xy'ane'mb, jac mij yi' ca'ydí je mujcu', paady müich ajcxy ti mmimadaaccixy je mujcu'. ⁵ Je hui'idi ajcxy jadu'n jaminaamb co Dios y'ayuc capxhuäcxi e ca' yjanchity ya naaxhuiñ ajcxy tiy'ajt ti patcixy ma je mujcu', paady ycixp yi' naaxhuiñ yhuijy'ajtin ajcxy tzachcapxhuäcx, e yi' naaxhuiñjäy tzachmijpidaaccixy etz amidoo'ijti ajcxy y'ayuc. ⁶ Hich ajt tiy'ajt ti nbaatim ma Dios. Tüg'óciy jäy ajcxy huidibi Dios ytiy'ajt huinjihuüyip, y'amidoo'ijtyp ajcxy hich ajt n'ayuc. Yi' jäy ajcxy huidibi ca' Dios ytiy'ajt müdity, ca' ajcxy amidoo'ijtcixy hich ajt n'ayuc, paady ycixp n'ijxcajpm je jäy ajcxy huidibi tudägyip, etz je jäy ajcxy huidibi nigoo tzach'anüdaacp.

Dios ooy xychojcm xyjihuiüym

⁷ Müich ajcxy migügtijc huidibi ooy ndzocy njihuüyich, tzoc oy yajxon naychojcm nayjihuiüym miñ xyipy. Dios ti yecy ymic'ajt ma ajt njot nhuinma'ñ jigix jëbi ajt naychojcm nayjihuiüym miñ xyipy. Tüg'óciy jäy huidibi ymigügtijc chojccixyp yjihuiüygixyp, ti Dios yjihui'ñ y'adigüygixy yjottigüygixy etz ñejhuüyip yhuinjihuüyip ajcxy Dios y'ayuc ytiy'ajt. ⁸ Pinjaty ca' ymigüg tzocy jihuüy, ca' yi' nejhuüyi huinjihuüyi Dios ytiy'ajt, com Dios tüg'óciy yi' tzojctäy. ⁹ Jada je'je tiy'ajt co Dios ajt xychojctaayim co je y'ung huidibi tügpajcpi ymüid, quejxy ya naaxhuiñ jigix hich ajt nbaatim Dios yjihui'ñ ymic'ajt müd yi' ycixpi. E Dios yjihui'ñ ymic'ajt ca' ycixa'ñ ytigoya'ñ nimina, paady hich ajt njugy'ajtin ca' ycixa'ñ ytigoya'ñ. ¹⁰ Dios ti xychojcm ti xyjihuiüym, paady quejxy y'ung ya naaxhuiñ jigix jëbi xycodinaayim ma yi' Dios ycötujctac müd hich ajt nbocy ycixpi. Ca' nminaanim müd co Dios ti ndzachmijpidaacim ooy mijcajee, hue' janchity yi' ninigoob may'ajt tuñ müd hich ajt ycixpi.

¹¹ Müich ajcxy migügtijc huidibi ooy ndzocy njihuüyich, müd co Dios jadu'n ajt ti xychojcm ti xyjihuiüym mijcajee oga'n, paady ycixp tzoc hich ajt naychojcm nayjihuiüym miñ xyipy. ¹² Ni minaabi pin ca' ixyni Dios. Co naychojcm nayjihuiüym miñ xyipy, huin'it Dios yjihui'ñ ymic'ajt ijttiy ma hich ajt njot nhuinma'ñ. Jadu'n Dios yjihui'ñ ymic'ajt xypubejtim xypudigüym, jëbi nigi naychojcm nayjihuiüym nidüg nidüg jadu'n nej Dios jäygidägy. ¹³ Nejhuüym hich ajt co nyajpatim ma Dios, e nañ jadu'n Dios yajpaady ma hich ajt, müd co yi' yjihui'ñ ymic'ajt ti xy'adigüym ti xyjottigüym. ¹⁴ E hich ajcxy, ti hich ajcxy yi' Jesucristo n'ixyich, paady hich ajcxy nidiy'ajt'ajtyich co je Dios Teedy quejxy y'ung ya naaxhuiñ co yajnüdzöga'ñ tüg'óciy naaxhuiñjäy co anajty Dios nbocy ajt xyajcomidoohuanim. ¹⁵ Tüg'óciy jäy huidibi nigapxp co Jesús je' yi' Dios y'ung, Dios yajpatp ma yi' e nañ yi' yajpatp ma Dios.

¹⁶ Hich ajt nnejhuüym etz nmijpidaacim jadu'n nej Dios ajt xychojcm xyjihuiüym nidüg'óciy. Dios chojctaayb yi' nidüg'óciyi yi' jäy. Pinjaty tzojccixp jihuüygixp ymigügtijc, hue' yajpatp yi' ajcxy ma Dios e nañ Dios yajpatp ma yi' ajcxy. ¹⁷ Müd co yajxon nmijpidaacim Dios paady jotcujc nnaxaanim ma Dios ycötujctac, mina anajty xyajcomidouhum ajt nbocy. Com tú'ciy hich ajt nyajpaatim ya naaxhuiñ, tim jadu'n nej yi'

Jesucristo. ¹⁸ Co nmijpidaacim Dios, huin'it ca' ajt nmidzigiiyim nmidzo'yduunim. Peni yajxon nmijpidaacim Dios, huin'it jëbi tzig'i'ñ nyajqueecim. Yi jäy ajcxy huidibi tzigiiyb etz tzo'ydum, ca' ajcxy Dios mijpidägy yajxon.

¹⁹ Com Dios jayijp ti xychojcm ti xyjihuiiyim, paady ycixp tzoc ajt naychojcm nayjihuiiyim nidüg nidüg etz nañ nmijpidaacim Dios. ²⁰ Yi jäy ajcxy pinjaty jadu'n minamb co mijpidaaccixy Dios, e ca' ymigüg tzogaangixy ixaangixy, hue' je' ajcxy anidaacp. Com peni ca' jajtcixy nej tzójccixipy jihuiiyigixipy yi ymigügtijc huidibi ajcxy ixy'ajtpy, ca' ajcxy jadip nej mijpidaaccixipy Dios huidibi ca' ixy'ájtigixy. ²¹ E Dios ñch ajt xyñajtz'ane'miiyim co pin Dios mibijcp mijpidacp, huen nañ jadu'n ymigügtijc tzocy jihuiy.

5

Yi pin huidibi ca' ixa'ñ midohua'ñ Cristo y'ayuc

¹ Tüg'óciy jäy huidibi mibijccixp co Jesús je' je' je Cristo huidibi Dios yquejx ya naaxhuiñ, Dios ajcxy y'ung'ajtip. Tüg'óciy jäy huidibi mibijccixp mijpidaaccixp Dios Teedy, nañ jadu'n huen tzojccixy yjihuiiyigixy je' ajcxy huidibi Dios y'ung'ajtip. ² Co ndzojcm njihuiiyim huidibi Dios y'ung'ajtip, je' jada je' je iixpejt co nañ jadu'n jëbi nmijpidaacim Dios etz jëbi nguyduunim nej xyñajtz'ane'miiyim. ³ Co nmijpidaacim Dios, huin'it nguyduunim jadu'n nej Dios xyñajtz'ane'miiyim e yi' y'ayuc ca' ooy chipity co nguyduunim. ⁴ Com tüg'óciy yi jäy ajcxy huidibi Dios ti y'adigiiyi ti yjottigiiyi yjihui'ñ ymic'ajt, ymihuindinaayb ajcxy yi jibic-huinma'ñ ya naaxhuiñ. Co nmibijcm Dios, huin'it jëbi mihuindinaayim yi jibic-huinma'ñ ya naaxhuiñ. ⁵ Yi jäy ajcxy pinjaty mibijcp co Jesús Dios je' y'ung, yi' ajcxy mihuindinaayb yi jibic huinma'ñ ya naaxhuiñ.

Je ayuc huidibi nidiy'ajt yi Dios y'ung

⁶ Yi Jesucristo je' je' je' huidibi miin ya naaxhuiñ, je' je' je' huidibi niibejt etz ñi'py teemy gujy co y'o'cy miid jäy ajcxy ypocy ycixpi. Ca' nminaanim jëyi anajty ti ñibety, hue' nañ jadu'n ti y'ögy miid ajt nbocy ycixpi. ⁷ E yi Espíritu Santo yi' tiy'ajt yejcp co Dios Jesús y'ung'adyii, com je Espíritu Santo yi' Dios ytiy'ajt ymiid. ⁸ Ji tugügnax huidibi tiy'ajt yejcp co Dios Jesús y'ung'adyii: je Espíritu Santo, je niibejtin, etz Jesús ñi'py co teemy cujy miid ñch ajt nbocy ycixpi. E jadu'n nidugüig ñaybaatigixy tügnax, e tügnax ytiy'ajt yejccixy. ⁹ Mijpidaacim ñch ajt jäy y'ayuc co Dios Jesús y'ung'adyii, ñigi copicy co nmijpidaacim Dios ytiy'ajt huidibi ti yecy miid y'ung ycixpi, com jac mic'ajt miid yi' ca'ydi jäy ajcxy. ¹⁰ Yi jäy huidibi mijpidaaccixp Dios y'ung, ymi'ijtpy ajcxy je tiy'ajt ma yjot yhuinma'ñ. Yi jäy ajcxy huidibi ca' mibijccixy mijpidaaccixy je Dios y'ayuc ytiy'ajt, hue' ajcxy yajnajxcixy Dios nej anidägyin co ca' mibijccixy yi Dios ytiy'ajt co y'ung nigapxy. ¹¹ Jada je' tiy'ajt co Dios ti xymooyim ajt n'alma yjugy'ajtin huidibi ca' ycixipy ytigoyipy nimina. Dios y'ung ca' y'alma ycixipy ytigoyipy nimina, paady yi' ti yaj'oyiy nej jëbi ajt n'alma y'ijtim huinixii huinitiempo. ¹² Pinjaty ti mijpidaaccixy Dios y'ung, yi' ajcxy y'alma ca' ycixipy ytigoyipy nimina. Pinjaty ca' mijpidägy Dios y'ung, yi' ajcxy y'alma cixipy ytigoyipy co y'ögipy.

Capxycijxin etz capxhuijin

¹³ Jadayaabi ayuc ajcxy nyajnijayiyigixp ma jada necy jigix jëbi mijpidaaccixipy Dios y'ung, etz jëbi mnejhuiiyigixy tiydudägy co mjugypijccixipy jadügtecy co anajty ti m'o'ccixy e ca' ajcxy m'alma ycixipy ytigoyipy.

¹⁴ Jada jotcuja'ajtin ñch ajt nmiiid'ajtim co nmibijctzoohuim Dios jadu'n nej Jesucristo xyñajtz'ane'miiyim, yi' ñch ajt jëbi xymidouhuim. ¹⁵ Miid co nnejhuiiyim co yi' ajt xymidouhuim ma tijaty Dios nyajmibijctzoohuim, paady ycixp nejhuiiyim co nmiiid'ajtim tijaty anajty ti nyajmibijctzou.

¹⁶ Co pinjaty ixy co ymügüg ypocytuñ huidibi huaad jëbi Dios meecxy, huen mibijctzooyi Dios müd yi' ycixpi, e Dios yajtzinähuiyb pen ca' anajty ooy ymijpocyity je tübi anajty tuñ. Com ji tüg mijpocy huidibi Dios ca' huinmecxy. Pen ti mijpocytuñ ca' huaad Dios ocjacmibijctzooni com ca' yi' y'oc-huinmecxaani. ¹⁷ Tüg'óciy jibic-huinma'ñ huidibi jäy ytumyb, pocy yi', per ji jibic-huinma'ñ huidibi jäy ytumyb, huidi jëbi Dios huinmecxy e ca' y'alma ytigoyip.

¹⁸ Nejhuüyım co tüg'óciy pinjaty Dios ti ymöyii jemybi jot huinma'ñ, ca' yi' y'ocpocytuni. Yi Dios y'ung, huidibi ti ymóoyigixy jemybi jot huinma'ñ, cuend'ajtip yi' ajcxy, ca'ydi je mujcu' xyajhuinma'ñy digóoyigixy.

¹⁹ Nejhuüyım ich ajt co Dios jadu'n xy'ane'mım njot nhuinma'ñ etz nejhuüyım co tüg'óciy jacjadyii naaxhuiñy jäy huidibi ca' mijpidaaccixy Dios, je mujcu' jadu'n yjot yhuinma'ñ y'ane'mıp ajcxy.

²⁰ E nejhuüyım co yi Dios y'ung ya y'oy naaxhuiñ e ti xyajnejhuüyım yi' y'ayuc ytiy'ajt, jigix jëbi nejhuüyım huinjihuüyım yajxon je Dios janchypi tudägypi. Nmi'ijtim ma ich ajt ndzinaayın je janchypi je tudägypi je Dios y'ung je Jesucristo. Jada jëdu'n je tydudägypi Dios, etz je Dios yjugy'ajtin caminaabi ycacixy ycatigoy. ²¹ Miich ajcxy migügtijc huidibi ooy ndzocy njihuüyich jadu'n nej ixyipy ngi'm'ung ngi'm'anäcich, ca' nigoo mdzachDios'ájtigixy tijaty huidibi ca' ni ti mic'ajt müdity, jadu'n nej Dios Teedy tzajpjotypi ymic'ajt müdity.

2 SAN JUAN

Yi Mimetzpi Necy Huidibi San Juan Yajnigujx Tüg Mibijcpi Töxyjäybi

¹ Hich Juan huidibi nigohuajc'ajt Dios yjäy. Nyajnigujxpich miich töxyjäy jada necy, miich Dios xyjäy'ajtp, e ti mmijpidaäy Jesucristo. Nañ nyajnigujxypich jada necy tüg'óciy miich m'ung m'anác ajcxy. Ooy ndzocy njihuüyich miich ajcxy. Ca' nmīnaanīm hich naydügpajc ndzojcyyp njihuüyibich miich ajcxy, nañ jadu'n tüg'óciy jäy ajcxy, huidibi huinjihuüyigixp Dios ytiy'ajt, xychojccixp xyjihuüyigixp ajcxy. ² Hich miich ajcxy ndzojccixyp njihuüyigixyp com Dios ytiy'ajt yajpatp ma hich ajt njot nhuinma'ñ, etz yi' ijtp huinixi ma hich ajt. ³ Huen Dios Teedy etz hich ajt nHuindzin Jesucristo, yi Dios y'ung oy'ajt may'ajt tuñ mīd miich ajcxy, huen xypa'ayoogixy huen xyajjotcugiiygixy mīd co mguydungixy yi' ytiy'ajt etz mnaychójcigixy mnayjihuüyigixy miñ xyipy.

⁴ Ti nmīnaybadyiijich nijējity miich m'ung m'anác, e ooy njotcugiiyich mīd co tiydudäy ajcxy payöyi Dios ytiy'ajt, jadu'n nej Dios Teedy ajt ti xyñajtz'ane'miym.

⁵ Cham njacnīmāyich miich ajcxy co jēbi ajcxy mnaychójcigixy mnayjihuüyigixy miñ xyipy. Ca' nmīnaanīm huinjemy jada tiy'ajt huidibi cham nyajnijayiiygixipy. Je' jada je ayuc huidibi oga'n'aty ti nbaatim co ti nmibijcim Jesucristo. ⁶ Co ndzojcm njihuüyim nmigügtijc, jada je' tiy'ajt co nguyduunim nej Dios ajt ti xyajnajtz'ane'miym. Jada huidibi Dios ti xyajnajtz'ane'miym huidibi miich ajcxy ti mbaatcixy, co oga'n ti nmibijccixy Jesucristo, copicy co ajcxy mnaychójcigixipy mnayjihuüyigixipy.

Yi jäy ajcxy huidibi anīdaaccixp

⁷ Com ji mayjäy ya naaxhuiñ huidibi huin'ñmb yi jäy ajcxy. Yi' ajcxy ti puhuäctüdy mibijcpidijc, yaj'ixpijcp ajcxy co Jesucristo ca' ñayguëxici ya naaxhuiñ mīd ñinīcx. Jadayaabi jäy ajcxy yhuin'ñmyb yhueñypinity etz Jesucristo ymidzip'ajtyp ajcxy.

⁸ Naygüendi'ajtigix ci'm. Ix mgamijpidaaccixy yi' ajcxy y'ayuc. Co ajcxy myajhuin'ñngixipy, huin'it anajty myajtigooygixy je oy'ajt huidibi mbadaangixyp ma Cristo. Co mguydüngixipy Jesucristo ytiy'ajt, huin'it mbáatcixipy tüg oy'ajt ca'pxypi jilby tza-jpoty.

⁹ Tüg'óciy jäy huidibi ca' cuydungixy je Jesucristo y'ayuc ytiy'ajt, ca' ajcxy mīdity Dios ytiy'ajt ma ajcxy yjot yhuinma'ñ. Je jäy ajcxy huidibi cuydundiib je Cristo y'ayuc ytiy'ajt, ymīd ajcxy Dios Teedy etz je y'ung ytiy'ajt ma ajcxy yjot yhuinma'ñ. ¹⁰ Peni ji pinjaty ñicxy ma miich ajcxy huidibi yaj'ixpijcp huidibi ca' ytiy'ajtity, ca' ajcxy mgöbiguipy ma mdijcin, e ni ca' ajcxy mjijp'ixihuipy. ¹¹ Com Dios yjäy pinjaty anajty jijp'ixiib je jäy ajcxy huidibi yaj'ixpijcp huidibi ca' ytiy'ajtity, hue' je' tundigooyb ma Dios ytiy'ajt. Hue' je' anajty paady jadu'n nej jihuiy ti jijptigiiyñi ajcxy je huingbi ixpijcin huidibi ca' ytiy'ajtity.

Capxycixin

¹² Oy hich ooy mij may miich ajcxy njamīdmiydägaangixy per ca' miich ajcxy jadu'n nijayihuaangixy necy'am. Hue' janchtiy njijp'ixyich co ci'm nninīcxaangixy jim, e nmīd miydägaangixy au'am jigix ajcxy ooy jotcujc mnayjihuüyigixipy.

¹³ Je mdzi' y'ung ajcxy huidibi ya yajpatcixp xyajnigujxp ycapxpocxin, je huidi ajcxy Dios nañ jadu'n ti yhuin'ijxigixy. Jadu'n ngapxycixyich mīd miich. Amén.

3 SAN JUAN

Yi Necy Huidibi San Juan Yajnigiejx Gayo

¹ Señor Gayo:

Nguejxypich capxpcxin ma miich. Ich miich nyajnigiejxyp jada necy. Nnigo-huajc'ajtypich ma je mibijcpidijc. Ooy ndzocy njihuïyich miich.

² Miich migüg, ooy nmigüg'adyii. Dios nmibijctzooybich mid miich ycixpi, huen agujc jotcuyc mdzinahuïpy etz mmic'idipy m'oy'idipy. Nejhuïybich co oy m'ity ma Dios. ³ Com oy ti njotcugiyich co je mibijcpidijc ajcxy ymiñ ya huidibi jim tzoona ma miich ajcxy, e yi' ajcxy xtyi'ajtmooyich jadu'n nej tydudägy mdzinäy e nañ jadu'n nej yajxon mguyduni Dios ytiy'ajt. ⁴ Ooy njotcúcidyich jac nigí co tiy'ajt nbaadyich jadu'n nej nmigügtijcich cuydungixy Dios ytiy'ajt.

⁵ Miich migüg huidibi ooy ndzocy njihuïyich, ooy njäygidägyich co oyjäy'ajtin mduñ mid je migügtijc. Nigi oy co oyjäy'ajtin mduñ mid je migügtijc huidibi ca' m'ixy'adyii. ⁶ Yi mibijcpidijc, huidibi ti choon ma miich ajcxy, ti tiy'ajt yejccixy ma je mibijcpidijc ya jadu'n nej miich oyjäy'ajtin mdzachtuñ. Ooy oy mduñ co mmöy yi migügtijc yi ytü'amgixpi e mguejxnaxy yajxon jadu'n nej Dios jäygidägy. ⁷ Yi jadu'mbi jäy huidibi mguejxnajxyp anajty hue' Dios y'ayuc ycixpi yhuicity, e ca' yi' ajcxy ti pijctzoy ma je jäy ajcxy huidibi ca' Dios ytiy'ajt nejhuïyi. ⁸ Copicy nbubejtim ajcxy je mibijcpidijc ajcxy huidibi Dios y'ayuc ycixpi yhuicity. Co jadu'n nbubejtim, chi jadu'n paady nej jihuïy tú'ciy nduunim mid yi' ajcxy ma Dios y'ayuc capxhuäcxii.

Je Diótrfes yjibic-huinma'ñ

⁹ Ti nnijayiyich jayhuin je mibijcpidijc huidibi nayoymújcigixp jim. Jim yajpaady tüg jäy huidi xii Diótrfes huidibi ca' cöbiga'ñich n'ayucich etz ngötújcínich. Amij agix jada jäy chachñayjihuïyi, yi' ci'm tzach'ane'mam ma miich ajcxy. ¹⁰ Paady ycixp co nnicxibich jim ma miich ajcxy nyajnimähuamy ajcxy tüg'óciy yi jibic-huinma'ñ huidibi Diótrfes ytumyb, jadu'n nej jibic xyñigapxy xyñi'ojiyich etz jadu'n nej anii yajixpicy. E nañ ni yi' ca' mmidity jotcuyc'ajtin jadu'n nej chach'idich. Nigi ytundigoy co ca' yajjättäga'ñ ajt nmigügtijc huidibi Dios mid ycixpi yhuicity. E co ich ajt nmigüg pinjaty yajjättäga'ñ, chi yi' capx'aducy e yajpidzimy je mibijcpidijc jäy yajjättäc, e ca' je' cöbiga'ñ ma miich mnayoymujctac.

¹¹ Miich hermano, huidibi ooy ndzocy njihuïyich, ca' mguydunipy jada jibic-huinma'ñ. Cuydun janchtiy yi oybi huinma'ñ. Yi jäy ajcxy huidibi oybi tungixp, yi' ajcxy ymid Dios ytiy'ajt ma yjot yhuinma'ñ. Yi jäy ajcxy huidibi jibic tungixp, ca' yi' ajcxy Dios ytiy'ajt nejhuïyi.

Je Demetrio tüg y'ijxpejt oybi

¹² Yi jäy, huidibi yxii Demetrio, tüg'óciy jäy ajcxy yminaangixy co ooy y'oyjäyity, e janch yajpaady ma Dios ytiy'ajt. Ich nañ jadu'n nmina'ñich co ooy y'oyjäyity yi Demetrio, e miich mnejhuïyb co ich ajt ndiy'ajt janch janch yi'.

Capxycixin

¹³ Ooy ich anajty miich mijcajee ayuc njayajmidmıydäga'ñ. Per ca' nijayihua'ñ necy'am. ¹⁴ Hue' janchtiy njijp'ixyich co nnicxa'ñich tzojc ma miich ajcxy, e nmıydäga'ñich miich ajcxy ci'm.

¹⁵ Jotcuyc'ajtcix. Yi mibijcpidijc ajcxy huidibi ya yajpatp yajnaxpy ajcxy capxpcxin ma miich ajcxy. Tun may'ajt yajnaxigich ngapxpcxin ma nmigügtijcich jim nidüg nidüg etz xibety xibety. Cham ngapxycixyich, Juan je Apóstol.

SAN JUDAS

Yi Necy Huidibi Judas Nijayiy Je Huidibi Dios Ti Huin'ijxigixy

¹ Hich Judas, tumbich ma Jesucristo ytung, Jacobo xy'uch'ajtpich. Nijayiybich miich ajcxy nidüg'óciy huidibi Dios Teedy ti huin'ijxcixy jëbi mibijccixy yi' y'ayuc huidibi jëbi xyajpocyñihuaatzcixy. Nijayiybich miich ajcxy tüg'óciy huidibi Jesucristo ycuend'aty ymüid. ² Huen Dios miich ajcxy mijcajee xypa'ayoogixy etz xyajjotcugiygixy etz chojccixy xyjihuiygixy.

Yi' ajcxy huidibi yaj'ixpijcp anü

³ Miich ajcxy migügtijc huidibi ooy ndzocyich njihuüyich, müid je nidzoocin ycixpi müid ajt n'alma huidibi miich ajcxy etz hich cham nmüid'ajtm, ooy chachycopicity co nijayihuibich miich ajcxy müid yi mibijcin ajcxy ycixpi, e ngohuanüyb ajcxy co jëbi mic m'ijtcixy ma ajcxy yi mibijcin e ca' m'ixtigihua'ccixy ma yi ayuc tiy'ajt huidibi Dios yejc ma tüg'óciy naaxhuiñyäjy. ⁴ Naagity jäy ajcxy ti ytiygixy ma miich ajcxy ayüch ameech müid anü. Jecy'ajty Dios tiy'ajt yejcy ma yi' y'ayuc co yi' jadu'mbi jäy tigoyam ajcxy y'alma müid ypocy ycixpi. Hue' yi' ajcxy jibic jäy huidibi ca' huindzigiygixy Dios. Anüdaacp yi' ajcxy co yminaangixy co Dios ti xypa'ayoohuim etz ti xyhuinmeecxim ajt nbocy paady ycixpi jëbi nduunim huen tijity huidibi nijot'ajtm. Ca' cöbijccixy je Dios huidibi nHuindzin'ajtm, etz ca' cöbijccixy hich ajt nHuindzin Jesucristo.

⁵ Oy miich ajcxy ti mjanejhuiydaaygixy jada tiy'ajt, per nyajjäy metzcodamy ajcxy jadu'n nej Dios jayijp yajpidzimy jecy'ajty jim Egipto je Israel jäy ajcxy, e jac'axam tzaachytuuñ müid o'cin je huidibi anajty ajcxy nijëjity ca' ymibijccixy. ⁶ Je ángeles huidibi ajcxy ca' yhui'my ma Dios ytung huidibi ajcxy capxycömidodacy Dios, y'ixmajztay ajcxy y'it chinaydac. Dios je' cham müid'ajtp ajcxy ahuing. Mach ajcxy y'ity agoodztuuby huinixii huinütiempo ixti cooni je mij xii anajty Dios ti yajhuaad'aty, mina anajty tiydunañ naaxhuiñyäjy ajcxy müid ypocy ycixpi. ⁷ Jadu'n nej Sodoma etz Gomorra etz jacjadyii mij cajp huinduy agonbi ytundigoyday ajcxy ma jejimbi cajp ycuudungixyp ñinücx chojcin, naygiyejci ajcxy ma je jibic-huinma'ñ. Yëydijctijc ytundigooygixy müid huingbi yëydijc. Je' jadu'n hui'm ixpejt ma tüg'óciy jäy co je tzaachypi ajcxy paatcixy.

⁸ Jim yajpaady ma miich ajcxy jäy huidibi nejhuüyb co Dios jecy'ajty tzaachytuuñ ángeles ajcxy etz cajp jäy huidibi ajcxy tundigooy. Yi' ajcxy chinaayin jadu'n yi' nej tüg cumäy. Yajjibicüygixy je ñinücx müid pocytunü. Jijpcogapxüygixy je Dios ycotujcin, nigapxcixy ni'ojüygixy je huidibi ajcxy Dios mooyip mij'ajtin. ⁹ Je arcángel, Miguel, je ángel huidibi mij'ane'min müid, co anajty ychiptuñ müid je mujcu', yajcapxyoongixy yaj'ayucyoongixy je Moisés ñinücx, ca'p je' müid'ajty huinma'ñ nücxy yajpocycäy je mujcu' müid nay'ojü. Jëyi janch co nimay: “Yi Huindzin Dios miich xy'ix'ojip.” ¹⁰ Per jada jäy ajcxy jibic ooy nigapxcixy huidibi ca' nejhuüygixy. Tügüyb ajcxy yhuinma'ñ müid iyujc animal yhuinma'ñ, etz iyujc animal ca' ajcxy müidity huinma'ñ tiydudägyi. Ci'm jada jäy ajcxy ñayyajhuinma'ñydidigóoygixy, e jadu'n ajcxy y'alma yajtigoyaangixy.

¹¹ Ypadamyb ajcxy tzaachypi mijcajee müid pocy ycixpi com je' yi' ajcxy ypadamyb nej Caín y'idüich. Müid co meñ tzach'adzojccixy, paady ñidigooygixy ytüdigooygixy jadu'n nej Balaam ñidigoy ytüdigoy jecy'ajty, e jadu'n ajcxy y'ayoogixy jadu'n nej Coré, co y'o'cy co ycacapxymidohuañ anajty co Moisés oy y'ayucijpcogapxüyi. ¹² Yi jadu'mbi jäy tzo'ydu'n yejcp ma miich ajcxy co mgaaygixy m'uuccixy tügmucy müid yi' ajcxy, e jadu'n ixpejt yejccixy co mnaychójcigixy. Caaygixp uuccixp tügmucy müid miich ajcxy agujc jotcujc per ni ca' ajcxy müidity huindzig'iñ müid ymigügtijc. Jadu'n ajcxy nipaady nej cöbixycuend'ajtpi huidibi ci'm ñaygüend'ajtigixyp, e ca' tungixy cuendi je cöbixy. Jadu'n

ajcxy nej joc huídibi ca'pi nñ mñdity, huídibi je poj yajhuídijtip. Jadu'n ajcxy nej quipy huídibi ca' ytim'aty mña yjapadyi, jayijp y'ocniicxy, e chi jada ytich, e ytimypidigy mñd ñidictz. ¹³ Yi' ajcxy ytundigoyi ooy cho'ydu'n yecy, tim jadu'n nipaady nej je mejy y'oobigy co ypidigy. Jadu'n ajcxy nipaady nej madza' huídibi ytu' ti yajtigach. Hue' y'ijtcixy pocypa'tci'py huinixi huinítiempo, mij'agootztuuyb y'idipy ajcxy.

¹⁴⁻¹⁵ Nañ jadu'n Enoc, je mihuixtujcpi co anajty Adán ti yjayijp'aty, ymíañ co Dios yhuinma'ñymooyi mñd jada ycixpi, e ymíañ: “N'ijxich je Huindzin Dios co anajty ymíñ mñd janch canaag mil je huídibi ajcxy tudägyity etz huätzip. Co anajty tiyduna'ñ ajcxy tüg'óciy naaxhuiñyäjy mñd ypocy ycixpi, chi yajpocycähua'ñ je jibic jäydijc ajcxy jadu'n nej ajcxy ti ytundigooygixy mñd yjibicjäy'ajt etz mñd jibic ayuc tibi mñd nigapxcixy ni'ojiygixy Dios.” ¹⁶ Jada jibic jäydijc ca' ajcxy ni ti mijotcujc'ajtcixy, ooy nigapxcixy ni'ojiygixy ymigügtijc. Jëyi ajcxy yci'm jotcujc'ajt ixtaaygixy. Ycapxcixy amij agix. Ooy oy nigapxcixy nijëjity jäy mñd co ti oybi padaangixy ma je' ajcxy.

Judas capxhuijp je' ymigügtijc ajcxy

¹⁷ Per miich ajcxy migügtijc huídibi ñch ooy ndzocy, jäymejtzcix je ayuc huídibi jécyip ti najtzcaxiygixy je Huindzin Jesucristo y'apóstoles ajcxy. ¹⁸ Je apóstoles miich ajcxy xyñimay: “Ma anajty xi tiempo ycixaani, jl'adip jäy ajcxy huídibi nixigipy yajxigipy huídibi Dios yje'ajtpy, e chináaygixipy jadu'n nej yi' ajcxy ci'm tzachnijot'ajtcixy jibic-huinma'ñ.” ¹⁹ Je' ajcxy yajnaybijc-huäcxib mibijcpidijc co ca' ajcxy mñdity je Dios yjihui'ñ ymic'ajt.

²⁰ Per miich ajcxy migügtijc huídibi ooy ndzocyich njihuüyich, ijtcix miich ajcxy tudägy ma yi mmibijcin. Jäymejtzcix mibijctzoogix Dios mñd je Espíritu Santo ypubejtin.

²¹ Naygüend'ájtigix jigix jëbi Dios xychojccixy xyjihuiygixy ajcxy, e ahuijxcix je xi mña anajty ñch ajt nHuindzin Jesucristo xymöhuaanim je jugy'ajtin huídibi ca' ycixipy ytigoyipy ni mña mñd co ti xypa'ayoohuim.

²² Capxjotcidaaccix pinjaty ca' ti mijpidägy janchypidägy. ²³ Yajmñdmíydaaccix jac-jadyi migügtijc jigix ajcxy jëb paatcixy nañ jadu'n nízoozin mñd ajcxy y'alma. Jadu'n anajty paady nej jihuiy myajpidzimgixy jijnjoty. Yajtungix pa'ayo'n mñd jacpinjaty pocytumbi. Naygüend'ájtigix ma yi' ajcxy ypocytuní, ca' mbocytungixy nañ jadu'n. Jadu'n yi' ajcxy ypocytuní nipaady nej huit huídibi ti yjibicci'y.

Judas capxycíxy mñd je' ymigügtijc

²⁴⁻²⁵ Je Dios tügpajcpi, je Dios huídibi xyajñdzoocim ajt n'alma, je huídibi yajtaayb ñejhuiydaayb, ymíñ je' mic'ajt etz cötujcin jëbi miich ajcxy xycuend'adipy jigix ca' mbocycägixipy, etz je' ymíñ mic'ajt jigix jëbi xyajja'tcixy agujc jotcujc ma Dios yhuinduu, ma yi' yajpaady mñd y'oy'ajtin ymij'ajtin ca' ti mbocymñdity ajcxy. Yi' paatip je oy'ajtin etz mij'ajtin etz mic'ajt etz cötujcin mñd nHuindzin Jesucristo ycixpi, tñyip etz cham etz huinixi. Amén. Jadu'n ngapxycíxyich.

EL APOCALIPSIS O Je Huidibi Dios Yajhuin'ijx San Juan

¹ Jayhui'my ity ma jada necy je Jesucristo y'ayuc ytiy'ajt huidibi ca' pin nejhuüy huiñihuüy jecy'ajty. Dios moy Jesucristo jada tiy'ajt jigix yajni'ixiydähuipy je Dios ytumbi ajcxy ti anajty tunaanip jadaanip ya naaxhuiñ, e ca' ooy jecy yhuäcxiba'ñ mina ytuna'ñyii yjada'ñyii. Jesucristo yquejxy jada ayuc tiy'ajt miid tüg ángel ma Juan. E je ángel yajhuin'ijxy Juan jada y'ayuc etz ijxpejt. ² E Juan yecy tiy'ajt janchypi tüg'óciy jadu'n nej anajty ti huiñixy ti huiñimido. E Juan ñidiy'ajt'ajtpy jada Dios y'ayuc etz nañ jadu'n nidiy'ajt'aty je ayuc tiy'ajt huidibi Jesucristo yajnejhuüy.

³ Janch jotcuyc je' pinjaty capxp jada necy etz pinjaty mido'mbije jada Dios y'ayuc huidibi Juan nidiy'ajtpy etz ñajtzcapxiyb. E jotcuyc je' pinjaty cuydumb tüg'óciy huidibi jaybety ma jada necy, com je xii je tiempo huingooniñ je' mina ytuna'ñyii yjada'ñyii.

Juan nijayiy huixtujc'itpi mibijcpidijc

⁴ Ich Juan nijayiybich yam je mibijcpidijc huixtujcpicypí huidibi yajpatp jim Asia naaxjot. Huen Dios etz je huixtujcpí espíritu huidibi yajpatp ma je' y'ane'mdac may'ajt oy'ajt tunipy miid miich ajcxy etz xymóoygixipy jotcuyc'ajtin. Dios je' huidibi cham ijtp, je huidibi jecy'ajty ijt, etz je huidibi miinaamb. ⁵ Huen Jesucristo may'ajt oy'ajt tunipy miid miich ajcxy etz xymóoygixipy jotcuyc'ajtin. Jesucristo je huidibi tiydudägy Dios ytiy'ajt yeci, je jayijpi jäy huidibi ti yjugypicy jadüg'oc co y'o'cy, je' nigohuajc'ajtp tüg'óciy pinjaty jugypigip jadüg'oc co anajty ti y'öccixy. Jesucristo nigohuajc'ajtp etz ane'my tüg'óciy reydiyc huidibi ane'mb ya naaxhuiñ. Je Cristo, huidibi xychojcm xyjihuiyim, ti xyñihuaanim miid ñi'py ma je tzaachypi huidibi mihuaad'ajtim miid ajt nbocy ycixpi. ⁶ Jesucristo ti xycötujcmooyim etz ti xytungmooyim miid Dios Teedy, huiidi yi' yteedy'ajtpy. Jadu'n ich ajcxy ndung etz ngötujcin nipaady nej je tung etz cötujcin huidibi reydiyc etz teedytije ajcxy ymiid. Huen Jesucristo y'idipy cōmay huiñixii huiñitiempo etz huen yi' y'ane'min cötujcin y'idipy huiñixii huiñitiempo. Jadu'n jada. Amén.

⁷ Cuendtungix ich n'ayuc, ¡Cristo miinaamb jocjoty e tüg'óciy je mayjäy y'ixa'ñyii! E y'ixamyb je' ajcxy huidijaty Cristo yaj'ayoo yajtzaachypijc. Tüg'óciy naaxhuiñyjäy yjihuihua'ñ yäxa'ñ ytaja'ñ ymaya'ñ miid je'ycixpi. Jadu'n jada. Amén.

⁸ Jadu'n je mijpi Dios huidibi tüg'óciy mic'ajt miid ymina'ñ:

—Ich je' huidibi yajtzondacp je naaxhuiñybi, je tzajp etz je huidibi jaccogixiyb. Jadu'n ich nej letra A huidibi yajtzondacp je alfabeto etz je letra Z huidibi cogixiyb ma je alfabeto. Ich je' huidibi cham'ijtp, etz huidibi jecy'ajtyp ijt etz huidibi miinaamb.

Juan ijxy yi Cristo oybi ymijity

⁹ Ich Juan, miich ajcxy mmigüg, quipxyi miid miich ajcxy nminaxy nyajnaxyich ayo'n tzaachypi. Quipxyi miid miich ajcxy ndzinäyich ma Dios y'ane'my. Etz quipxyi miid miich ajcxy nyajtuñich je mecxtujcin ma ndzinaayin huidibi Jesucristo ti xymooyim. Jim ich anajty mach n'ityich ma je naax huidibi mejy agujc, huidibi xii Patmos, miid Dios y'ayuc ytiy'ajt ycixpi, je ayuc tiy'ajt huidibi Jesucristo xyajnejhuüyim. ¹⁰ Jadu'n tügtecy ti njatyich, hue' anajty tüg domingo xii co ich Dios n'ojadaotyich, e Dios yjihuiñ ymic'ajt ti anajty xymimadactayich njot nhuinma'ñich. Chi nmidooyich jixci'py'amy tüg huidibi mic capx, jadu'n yi' ycapxin nmidooyich nej tüg trompeta yxüxy. ¹¹ Chi je huidibi xymigapxpich anajty yminañ:

—Ich je' huidibi yajtzondacp etz je huidibi yajcogixiyb tüg'óciy tijaty ya naaxhuiñybi etz tzajpjoty. Jadu'n ich nej je letra A huidibi yajtzondacp je alfabeto etz je letra Z huidibi yajcogixiyb je alfabeto. Cojaay miich ma tüg libro huidibi mhuiñ'ijxyp, e quex je necy

jim Asia naaxjot ma je huixtujc picypí mibijcpídiyc ma je huixtujcpi cajp: Efeso, Esmirna, Pérgamo, Teatira, Sardis, Filadelfia etz Laodicea.

¹² Chi n'ijxhuimbityich n'ixa'ñich pin ñich anajty xymigapxpíich. Co nnayji'ijxich, huin'it nhuin'ijxyich huixtujc candelero ac tim oori. ¹³ E cujc'amy ma je huixtujc candelero nhuin'ijxyich tim jadu'n nej je jäy huídibi tzoón tzajpjoty (je Cristo), yxoxyity mïid tüg huit yjädy anajty mabaad ytecy, e yhuññity ma ycaach mïid tüg oorihuin. ¹⁴ Yi' ycohuajc etz ycöhuay janch poob, jadu'n nej lana huídibi janch poob, jadu'n nej nieve ypoobity, e je yhuññ jadu'n nej jñnye'n. ¹⁵ Je' ytecy tim jadu'n nej latón huídibi janch oy, nej jihuïy jñnjoty ornojoty yam ypidzimy. E je ymiydaacin janch mic, tim jadu'n nej canaag mijññi y'a'ñich y'agimimy. ¹⁶ E ymïid anajty ma a'oygi' huixtujc madza'. E ypidzimy ma y'ahuac tüg espada mejtz'adu'm'amy yjipity. E yhuññijip jadu'n anajty nej xñ janch mic y'añ.

¹⁷ Co je' nhuin'ijxyich, chi janch ögy oy ngidägyich ma ytecy ymijc, chi xycñixajyich mïid y'a'oygi', chi xyññimaayich:

—Ca' mdzigiy; ñich je' huídibi jayijp'ajtp ya naaxhuiñ etz tzajpjoty etz ñich je' je huídibi cogixñhuamb. ¹⁸ Jugy'ajtpich; ti n'ögyich, e ti njugypicyich jadüg'oc, e jugy'adipich huinixñ huinítiempo. Nmïidich mic'ajt jigix ane'mibich yi' o'cin etz je it ma je öcpi ajcxy y'alma ity. Jadu'n nipaady nej jihuïy nmïididyich je öcpi it ahuaazti. ¹⁹ Cojay cham tijaty mhuin'ijxpy mhuinmidooyb, jadu'n nej huídibi tunaanip jadaanip jadachambi xñ tiempo, etz huídibi tunaanip jadaanip jacjiini. ²⁰ E jadu'n yhuimbizimy je tiy'ajt janchypí huídibi ca' pin nejhuïy maabi je huixtujcpi madza' tiibi mhuin'ixy ma ñich n'a'oygi', etz je huixtujcpi oricandelero. Je huixtujcpi madza', je' je' je ángeles ajcxy huídibi cogapxy'ajtp mïid Dios ycixpi ma je huixtujcpi picypí mibijcpídiyc. E je huixtujcpi candelero huídibi ti m'ixy, je' yi' je huixtujcpi picypí mibijcpídiyc.

2

Je ayuc huídi yajmoy yi mibijcpídiyc jim Efeso

¹ Nijayi' miich je ángel huídibi cogapxy'ajtp jim ma je huídibi ajcxy mibijcp jim Efeso: “Ñima' ajcxy co jadu'n ymíañ je huídibi huixtujc madza' mïid ma y'a'oygi', je huídibi jim yajpatp agujc'amy ma je huixtujcpi candelero, je' jadu'n minamb: ² ñich nejhuïybich tüg'óciy ti miich ajcxy mdumyb, jadu'n nej mictägy mdungixy ma Dios ytung, etz jadu'n nej mmimecxtujccixy migügtijc. Nejhuïybich co ca' m'ocmímecxtugaani ajcxy jibicjädyijc, e ti m'ijxmajtzicixy je ajcxy huídibi naydijip co Cristo ti huin'ijxigixy, per ca' je' ajcxy ytudägyity, e miich ajcxy ti mnejhuïy co ajcxy ooy y'anñdaaccixy. ³ Nejhuïybich co ooy ayo'n mij miich ajcxy mmínajxcixy myajnajxcixy mïid ñich ycixp, etz ooy mij mecxtujcin ajcxy myajtungixy, etz ooy janch mic mdungixy mïid ñich ycixp, e ca' ti mmídzijpigixy ñich ndung. ⁴ Per nejhuïybich ma miich ajcxy mdungigoy. Ca' miich ajcxy xyajmij'atyich mijcajee, jadu'n nej anajty xyajmij'atyich ajcxy mijcajee co oga'n ajcxy mibijcy. ⁵ Mïid jada ycixpi jäymetz miich ajcxy ma oy m'agánajxcixy. Jothuimbijtcix, e tungix nej anajty m'octungixp co oga'ñ ajcxy mmibijcy. Pen ca' ajcxy jadu'n mdungixy, chi tzojc ñicxibich ma miich ajcxy, chi huingbi nbidägibyich ma miich ajcxy xyjapaady, tim jadu'n nipaady nej jihuïy nbicyich yi' mgandelero. Jadu'n ndunipyich pen ca' anajty mjothuimbity ajcxy. ⁶ Per njäygidaacypich jadu'n nej miich ajcxy m'ijxtigoydaaygixy njäydgoydaaygixy je jibicjädyijc ajcxy yhuinma'ñ. Nej je nicolaítas ajcxy ytungixy, miich ajcxy ca' mjäygidaaccixy e nañ jadu'n ñich ca' njäygidägyich. ⁷ Pinjaty ytádzac mïid huen amídooyity nej je Espíritu Santo ymíañ ma je mibijcpídiyc huídibi yajpatp xi ya. Pinjaty madacp ma ymibijcin, ñich yi' nmöhuipy tzinaayin jugy'ajtin ma Dios y'ane'my, jaydeb jotcuyc chinähuiipy ma Dios y'it, jadu'n nipaady nej jihuïy ajcxy jicxy je quipytim ma Dios y'it huídibi jugy'ajtin yejcp.”

Je ayuc huïdi yajmoy yi mibijcpidijc ajcxy jim Esmirna

⁸ Nijayi' je ángel, je cogapxy'ajtpi huïdibi yajpatp ma je mibijcpidijc jim Esmirna: "Jadu'n ymina'nñ je huïdibi yajtzondac je naaxhuiñybi etz tzajp etz huïdibi cogixihuiip, je huïdibi o'c e yjugy'aty jadüg'oc: ⁹ Ich nejhuñybich tüg'óciy ti miich ajcxy mdumyb. N'ijxajpyich nnejhuñybich je m'ayo'n mjetmay ajcxy, jadu'n nej ti myaj'ixhuïdijtcixy ti myajpahuidijtcixy. Nejhuñybich co ayooob jäy miich ajcxy, per müd miich ajcxy Dios y'oy'ajtin, e jadu'n nipaady miich ajcxy nej comeeñydijc. Nejhuñybich co nijëjity jäy miich ajcxy xyñigapxyp xyñi'ojñyb. Ñaydijyii ajcxy co yjudíojäyity, e ca' yjanchity. Hue' ajcxy müd y'ijtcixy je mujcu'. ¹⁰ Ca' ni ti mdzigiy miich ajcxy nej mjadaangixy m'ayoohuaangixy. Yi mujcu' miich ajcxy nijëjity xyajpujxtijccähuamb, m'ocyaj'ijxmadzangixy pen janch miich ajcxy nidüg'óciy myajpatcixy ma Dios. Jadu'ñyi miich ajcxy m'ayohuipy majc xii. Ijtcix tudägy mabaad ajcxy m'öccixy. E ñch miich ajcxy je jugy'ajtin huinixibi nmöhuipy jadu'n nej premio co ti mmadaaccixy ma mmibijcin. ¹¹ Pinjaty müd ytädzac, huen mido'mbijccixy nej je Espíritu Santo nimäy je pinjaty mibijcp Dios. Pinjaty mimadacp cuyduñ Dios y'ayuc ytiy'ajt, ca' je' y'alma ayoohuipy ayoodactuuyb, ca' y'öga'nñ mimejtz'ocpi."

Je ayuc huïdi yajmoy yi mibijcpidijc jim Pérgamo

¹² Nijayi' je ángel huïdibi cogapxy'ajtp jim ma je mibijcpidijc ajcxy jim Pérgamo: "Nijayi' je ayuc co jadu'n ymina'nñ je huïdibi y'espada müd mejtz'adu'm'amyb yjijpity: ¹³ Ich nejhuïydaaybich jadu'n nej miich ajcxy mdzinaaygix mjugy'ajtcix. Nejhuñybich co miich ajcxy mdzinaaygixy mjugy'ajtcixy ma tüg cajp ma je mujcu' y'ane'my. Per mi'ijtyñi je nxijich, e ca' m'ixmach je mmibijcin ma ñch. Ni mga'ixmajch je mmibijcin je huin'it xii co Antipas yaj'o'ci jim ma miich ajcxy, tüg ñch nmigüg, je tudägypi testigo, jim je' y'o'cy ma mujcu' chinäy. ¹⁴ Nmüddich tigati huïdibi ca' n'oy'ixyich ma miich ajcxy huïdibi mdumyb ajcxy jim Pérgamo. Nijëjity miich ajcxy ca' m'ixmadza'nñ je Balaam y'ixpijcin, je huïdibi yaj'ixpijc jecy'ajty co huen jicxcixy je huïdibi anajty tzaadzech quipychech ti yajhuindzigiygixy. E nañ jadu'n yaj'ixpic co huen tundigooygixy müd huingbi töxyjäy. ¹⁵ Nañ jadu'n miich ajcxy mmüddity nije' jäy huïdibi ajcxy ca' ixmadzaangixy nicolaítas y'ixpijcin, je ixpijcin huïdibi ñch ca' ndim'ixa'nñich. ¹⁶ Paady jothuimbijtcixy miich ajcxy, yajtigajtzn ajcxy mjet mhuinma'nñ. Pen ca' jadu'n mdunipy, nícxibich jim tzojc ma miich ajcxy. Chi jada' ndziptunipyich müd yi' ajcxy huïdibi midundigooyb ñch ngötujcin huïdibi ngapxpich. Ich n'ayuc jadu'n nipaady nej espada. ¹⁷ Pin ytädzac müd, huen mido'mbicy je ayuc huïdibi je Espíritu Santo ñigapxyp ma je huïdibi ajcxy Dios y'ayuc ytiy'ajt mibijcip. Pin jada' tiydudägy mimadacp cuyduunni Dios ytiy'ajt, ñch yi' nmöhuipy oy'ajtin huïdibi Dios yjè'ajtpy. Jada oy'ajt jadu'n nipaady nej maná huïdibi yüch ijtp ma Dios chinaydac. Nañ jadu'n ñch yi' nmöhuibich tüg pi'cpoobtzaa, e ma je poobtzaa jim yaayity tüg xii jemybi huïdibi ca' ni pin ijxcabipy, jëyi janchtiy ijxcabip je xii pin anajty cöbijcp je tzaa."

Je ayuc huïdi yajmoy yi mibijcpidijc jim Tiatira

¹⁸ Nijayi' je ángel huïdibi cogapxy'ajtp ma je mibijcpidijc jim Tiatira: "Nima' ajcxy, jadu'n je Dios y'ung ymina'nñ, je huïdibi yhuin müd jadu'n nej jihuiy jünye'n, e ytecy jadu'n müddity nej bronze tiibi ytoyhuäch ma jün: ¹⁹ Jadu'n yi' ymina'nñ: Nejhuñybich tüg'óciy ti ajcxy mdumyb. Nejhuñybich jadu'n nej miich ajcxy mijcajee myajmij'ajtcixy Dios etz mdzojccixy mjihuñygixy ymigügtijc; jadu'n nej mmibijccixy mmijpidaaccixy Dios y'ayuc ytiy'ajt; jadu'n nej mictägy mdungixy ma Dios ytung; etz jadu'n nej myajtungixy mecxtujcin ma mdzinaayin; etz nejhuñybich co cham nigü mdungixy ma Dios ytung, ca'ydí jadu'n ajcxy nej myajtzondacy. ²⁰ Ji tüg huïdibi miich ajcxy mdumyb huïdibi ñch ca' n'oy'ixyich. Mdzachmimécxtujccixy yi töxyjäy Jezabel huïdibi naydijip co ycapxyp Dios y'ayuc e ca' yjanchity. Je' yajnidigooyb yajtündigooyb ñch ndumbi müd anii. Jadu'n je' ymina'nñ co jëbi huingbi töxyjäy migapxtigooygixy e co jëbi caaygixy

jüxcixy je huídibi ajcxy yajhuindzigüyb quipychech tzaadzech. ²¹ Ti üich je Jezabel nmöy tiempo co ixypy yothuimbity, per yi' ca' ixmadza'n yjibic-huinma'n. ²² Jadachambi nyajcähua'nüich je Jezabel cijx'am müd pa'm, e jadu'n ajcxy nmöhua'nüich ayo'n je yëydjc ajcxy huídibi müd chachtundigoy. Jadu'n ndunipyich pen ca' ajcxy yothuimbijtcixy nej ajcxy chachpadungixy je jibic-huinma'n huídibi je Jezabel ymüid. ²³ E nyaj'öctähuibich tüg'óciy ajcxy pinjaty panixp cixyot huinjot je Jezabel y'ixpijcin jigix nidüg'óciy je mibijcpidjc ajcxy nejhuydáhuipy co üich je' nejhuydaayb tüg'óciy jäy ajcxy yjibic-huinma'n. Chi nmöhuibich oybi nidüg nidüg jäy pen ti anajty oybi tuñ, o nmöhuibich nidüg nidüg jibicpi pen ti anajty jibicpi tungixy. ²⁴ Per jacjadyii müich ajcxy jim Tiatira ca' mbanixcixy mbayöygyxy Jezabel y'ixpijcin, e ni ca' mmijpidaaccixy huídibi ajcxy ytijpy mujcu' y'ixpijcin huídibi tzip huinjihuüyb. Üich müich ajcxy nimaayb co ca'p üich müich ajcxy huingbi ixpijcin njacmóoygixipy. ²⁵ Mi'ijtcixy je Dios ytiy'ajt huídibi müich ajcxy müd, ixti cooni anajty nhuimbityich. ²⁶ Pin madacp ma ymibijcin etz pin cuydumb üich ndiy'ajt mabaad anajty je' y'ögy, üich je' nmöhuibich je cötujcin, jaydeb ane'my naaxhuiñyjäy ajcxy. ²⁷ Üich je' nmöhuiipy je ane'min cötujcin ma naaxhuiñyjäy huídibi Dios Teedy, üich nDeedy, ti xymöyich. E je' ane'mipy müd Dios ymic'ajt. E je' yajhuindigoydáhuipy naaxhuiñyjäy y'ane'min, tim jadu'n nej jäy püy pochutu'tz müd pujxtajc. ²⁸ Nañ jadu'n üich je' nmöhuiipy üich nmic'ajt huídibi nipaady nej je madza' jayhuixtujc. ²⁹ Pin ytádzac müd, pin midoohuamb, huen midoy nej je Espíritu Santo ymína'n ma yi mibijcpidjc nidüg'óciy.”

3

Je ayuc huídidi yajmoy yi mibijcpidjc jim Sardis

¹ Nijayi' je ángel huídibi cogapx'ajtpi ma yi mibijcpidjc ajcxy huídibi yajpatp jim Sardis: “Jadu'n ymína'n je pin müd je huixtujcpi Dios y'espíritu, huídibi müd je huixtujcpi madza': Üich nejhuiyb ti mdumyb. Nejhuiybich co cömay ajcxy m'ijtcixy co mmüidity yjugy'ajtin huinixüibi e ca' yjanchity. Jadu'n müich ajcxy nipaady nej öcpi. ² Cuenditungix müich ajcxy yi mmibijcin, com jago jago ajcxy mgayajtigoydäy yi mmibijcin. Jayajmicpijccixy yi mmibijcin huídibi ajcxy njacmüidity. Ti üich n'ixy co huídibi ajcxy mdumyb ca' yi' yhuädzity ytudägyity ma Dios yhuinduu. ³ Jäymejtzcootcixy je Cristo ytiy'ajt je tüibi m'ixpijccixy, je tüibi mmidoogixy. Panixcix Cristo ytiy'ajt e jothuimbijtcixy ma yi oybi. Pen ca' mgüendtungixy yi mmibijcin, nicxibich ma müich ajcxy jadu'n nej tüg meetzpi, ni mganejhuihuüygixipy anajty nnixyich. ⁴ Müich jacmüdni mibijcpi ajcxy jim Sardis huídibi ca'ni ajcxy ymibijcin yajtigooygixy, ca'ni ajcxy ytundigooygixy, tim jadu'n nipaady nej jihuüy ajcxy müdity poob huit huídibi ca' yjibicüy. Yi' ajcxy xymüid'idipich müd huädz jot huädz huinma'n, tim jadu'n nipaady nej ypoob huit ajcxy müdity, com ajcxy ypadyii jadu'n. ⁵ Pin mimadacp cuyduñ etz mijpidägy Dios y'ayuc ytiy'ajt, ymüid'adipy ajcxy je huätzpi jot huinma'n, huídibi jadu'n nipatp nej poob huit ajcxy müdity. E ni ca' ajcxy yxi yajjödzip ma je libro ma ycojaayity je tudägypi jäy ajcxy yxi. E üich yi' ajcxy ngapxquëxüccixy yxi ma nDeedyich yhuinduu, e nañ jadu'n ma nDeedyich y'ángeles yhuinduu ajcxy. ⁶ Pin midoohuamb, pin ytádzac müd, huen midoy nej je Espíritu Santo ymína'n majaty je huídibi ajcxy Dios y'ayuc ytiy'ajt mibijcip.”

Je ayuc huídidi yajmoy yi mibijcpidjc jim Filadelfia

⁷ Nijayi' je ángel huídibi capxy'ajtpi ma je mibijcpidjc jim Filadelfia: “Jada ayuc tiy'ajt ñigapxyp je tügpajcpi huätzpi, tügpajcpi janchypü, huídibi ane'my Dios yjäy jadu'n nej David ane'my Dios yjäy jecy'ajty. Je huídibi yaj'ahuatp e co yaj'ahuäch ni pin ca' huaad yaj'aducy. Je huídibi yaj'aducp e co yi' yaj'aducy, ni pin ca' huaad yaj'ahuäch: ⁸ Cuenditungix nej nmína'nüich: Üich nejhuiybich nej mdungixy. Ti nyecyich mic'ajt ma müich ajcxy huídibi nipaady nej tüg tügydac ahuätzpi ma müich mhuinduu, huídibi

ni pin ca' huaad yaj'aducy. Nejhuuybich co hueeni Dios yjihu'iñ ymic'ajt miich ajcxy miidity. Per ti mguydungixy ich n'ayuc, e ca' nxijich xycoyützi. ⁹ Cuenditungix nej nmina'nich. Yi' ajcxy huidibi mijpidacp Satanás y'ayuc, je huidibi anidacp ajcxy co ñaydíjigixy judíojäy, e ca' yjanchity. Ich yi' ajcxy nmimadägibich jigix yi' ajcxy miich xyhuingojxtinähuiipy xyajmij'adipy. E chi nejhuñhuip ajcxy co ich miich ajcxy ti ndzocy. ¹⁰ Míid co ti myajtungixy mecxtujcin ma mdzinaayin, ti mguydungixy ich n'ayuc n'ane'min. Paady ich nihua'nip yajtzögip miich ajcxy ma anajty jäy ajcxy mictägy xyjot'ijxcixy xyhuinma'n'ijxcixy ajcxy. Miinipy je xi je tiempo mina je mujcu' jot'ixipy huinma'n'ixipy tög'óciy je mayjäy huidibi yajpatp ya naaxhuiñ. ¹¹ Ich tzojc nnicxa'nich jibby naaxhuingixy. Mi'ijtcixy yi' Dios y'ayuc huidibi miich ajcxy miid jigix ni pin xycapijcip ajcxy mbremio, huidibi ti mganar'ajtcixy ma Dios. ¹² Pin mimadacp cuyduñ Dios y'ayuc ytiy'ajt etz cuyduñ yajxon, ich yi' nbidägibich mij'ane'mbi ma ich nDios y'it, jadu'n yi' nipaadip nej tög pilar huidibi midinaayb jemxypi ma Dios ytiyc. E yi' ni camina ypidzimipy ma Dios y'it, e njayiyibich ma yi' ñinix ich nDios yxi, e nañ jadu'n njáayibich je ich nDios ycajp yxi, je Jerusalén jemybi huidibi tzoon tzajpjoty ma Dios yajpaady. E nañ jadu'n njáayibich nxi jemybi ma yi' ñinix. ¹³ Pin ytádzac miid huen midoy ti je Espíritu Santo ñigapxyp ma tög'óciy je mibijcpidijc.”

Je ayuc huidi yajmoy yi mibijcpidijc jim Laodicea

¹⁴ Nijayi' je ángel huidibi cogapxy'ajtpi ma je mibijcpidijc jim Laodicea: “Jadu'n ymina'n je huidibi janchip tudägyip, je huidibi tudägy yejcp Dios ytiy'ajt e ca' yajtigach y'ayuc, je huidibi yajtzondac tög'óciy tijaty huidibi Dios ti oyduñ: ¹⁵ Nejhuuybich nej mdungixy. Nejhuuybich co miich ajcxy mibijccixy huenjaty, ca' myajtigoydaygixy yi' mmibijcin, e ni ca' ooy mij mmibijccixy. Jadu'n miich ajcxy nipaady nej ni' hidibi ni ca' ytiichity, e ni ca' y'anity. Jac'oy ixypy co ooy mij mmibijccixy, o co ca' ixypy mdimmibijccixy. ¹⁶ Míid co tim yinjaty tim huenjaty ajcxy mmibijccixy, ca' ooy mmibijcin ymijity ajcxy, e ni ca' ajcxy mmibijcin ytigoydaaygixy, miid jada ycixpi ich miich ajcxy nijpcogapxihiipy miid je ndzip n'écinich, tim jadu'n nej jäy ajcxy ixtzujy huidibi y'ahuac yca'tzojcpy. ¹⁷ Miich ajcxy minamb co ooy ajcxy mgomeeñity, ooy ajcxy mij mdzinaayin mjogy'ajtin mmidity, e ca' ti ajcxy myajmayajtcixy, e ni ca' miich ajcxy nejhuuygixy co ayo'nduum myajpatcixy. Jadu'n miich ajcxy nipaady nej ayoobitijc, nej huiintzpi, nej huidibi nihuädz ixhuädz hidijtp. ¹⁸ Paady ich miich ajcxy nimaaygixy co copicy ajcxy mbaadip ma ich Dios ytiy'ajt janchypi, hidibi jadu'n nipaadipy nej jihuñy ajcxy mjuuygixy huädz oori ma ich, hidibi ti y'oybidzimy miid jin jigix mgomeeñ'ajtcixip. Nañ jadu'n ich miich ajcxy nimaaygix co copicy ajcxy mbáatcixip pocyhuinmeecxin ma ich, hidibi jadu'n nipaady nej jihuñy huit oyjatypi poopjatypi mjuuygixy ma ich, jigix mxóxcixipy mninix ca'ydí tzo'ydu'n mbáatcixipy. Nañ jadu'n ich miich ajcxy nimaaygix co mbaadip tiy'ajt ma ich nlibro, hidibi jadu'n nipaady nej jihuñy huindzooy mjuuygixy, jigix mdzoydúngxipy mhuin e huin'it ajcxy m'ijxcixipy huädz. ¹⁹ N'ojypich etz ndzaachytumyb tög'óciy pinjaty ndzojcpyich njihuuybich, paady ycixpi miich ajcxy mhuindina'mjijptina' mic ich ndiy'ajt etz jothuimbijtcix nej mbocytungixy. ²⁰ Cuenditungix nej cham nimaaygix. Jadu'n nipaady nej jihuñy ndinayich ma nidüg nidüg jäy ytiyc'aguu e ngojxnojcich ajcxy ytiyc agi'. Nbijctzooybich co xyajtigihuibich ajcxy ma ytiycin. Pinjaty xyöcmidoobich, e yaj'ahuäch ytiyc, tighuibich ma yi', e cayipich miid yi', e yi' miid ich. ²¹ Pinjaty cuydundaayb Dios y'ayuc ytiy'ajt, ich je' nmöhuipy it lugar tzajpjoty quipxyi miid ich ma ich n'ane'mdac. Ti nguydundaayich Dios y'ayuc, e nmidich it lugar ma ich nDeedy y'ane'mdac, paady ycixp jebi nmöhuibich miich ajcxy it lugar ma nyajpaadyich. ²² Pin ytádzac miid, pin midoohuamb, huen midoy hidibi je Espíritu Santo ycapxyp majaty mibijcpidijc hidibi canaagpicy yajpatp.”

4

Ibaatcixy capxpaatcixy yi Dios huudibi tzajpjoty tzinaayb

¹ Co jada jadu'n yjajti, chi nhuindicxyich tzajpjoty, e nhuin'ijxyich tüg tije aguu ahuädz jii by tzajpjoty. E nmidooyich tüg ayuc janch tim jadu'n nej tüg trompeta yxüxy huudibi ich anajty jayijp ti xy'ocmigapxpi, xyñimäyich:

—Pet ya ma ich, cham nyajni'ixihua'n tijaty copicy tunaanip jadaanip co anajty jadayaabi xii tiempo ñaxy.

² Chi Dios yjihui'n ymic'ajt xymimadactaayich njot nhuinma'nich, e nhuin'ijxyich tüg ane'mdac jii by tzajpjoty. E ma je ane'mdac jim anajty tüg inäy. ³ E je huudibi anajty jim inäy ma je ane'mdac, jadu'n anajty yquexigy nej tüg tzaa janch oybi janch adicxp. E jühuidity ma je ane'mdac je Dios yhuätz'ajt quexigy nej tüg i'nich janch oycolor huudibi janch adicxp nej tüg tzaa tzuxjatypi. ⁴ Nañ jadu'n jühuidity ma je ane'mdac jii by anajty iipx madaax silla, e ma je silla inäy iipx madaax mijjáy, ac poob huit miiid. E ymiiid anajty ajcxy ma ycohuajc coroni ac tim oori. ⁵ Ma je ane'mdac anajty ypidzimy huudzuc, e ooy anajty enee yjidijtín ñe'my. E ma je ane'mdac huinduu jii by anajty Dios yjihui'n ymic'ajt je huixtujcpi, huudibi quexig nej huixtujc tzinhuaty huudibi ooy mic ytichxy. ⁶ E je tigtot ma je ane'mdac huinduu jadu'n quexigy nej vidrio mejy, janch huädz janch adicxp.

E cujc'amy jühuidity ma je ane'mdac madaax iyujc huudibi miiid mayhuiin jahuinduu jajixcipy. ⁷ Je midügpi iyujc tim jadu'n anajty nej tüg jamgaa. Je mimetzpi iyujc tim jadu'n nej tüg huajmang. Je midugügpí tim jadu'n anajty yhuiñyjijp nej jäy. Je mimadaaxpi tim jadu'n nej me'ty yqueec-huidityin. ⁸ Je nimidaaxpi iyujc ymiiid anajty ajcxy nidüg nidüg tudujc yqueec, e ymiiid anajty ajcxy yhuiin queecnigixy etz queecpa'tci'py. E ca' anajty ajcxy ypocxy xim tzuum, chachminaangixy:

Santo, Santo, Santo, je Huindzin Dios huudibi tüg'óciy nejhuiydaayb, huudibi tüg'óciy mic'ajt miiid, je huudibi anajty ji'ajtp, je huudibi cham ji'ajtp, etz je huudibi miinaamb.

⁹ Je iyujc ajcxy huin'igixy etz huindzigiygixy etz yajmij'ajtcixy Dios, etz yajnajxcixy Dioscojuyipy ma Dios je huudibi anajty inäy ma je ane'mdac, je huudibi tzinaayb jugy'ajtp huinixii huinítiempo, e ni camina y'ögipy. ¹⁰ Co je iyujc ajcxy jadu'n ytuñ, chi je iipx madaaxpi mijjáy ycojxtinaydaaccixy ma je' yhuinduu huudibi anajty inäy ma je ane'mdac. E ooy anajty huindzigiygixy je huudibi tzinaayb huinixii huinítiempo. Pidaaccixy anajty ajcxy ycorona ma je' yhuinduu, cham chachminaangixy:

¹¹ Miich, ich ajt nHuindzin, ich ajt nDios, miich mihuaad co mmiiidity tüg'óciy oy'ajtin mij'ajtin etz mic'ajtin, mihuaad co miich nyajcömayip, mihuaad co miich miiid'ity tüg'óciy mic'ajtp etz mij'ajtp. Jadu'n miich mihuaad, com miich ti myajcojy, ti myaj'abadíy tüg'óciy huudibi ji'ajtp. Com miich jadu'n ti mdzocy, paady ycixpi tüg'óciy tijaty ji'ajttäy.

5

Je libro etz je Dios y'ung, je Cordero

¹ Chi jada' nhuin'ijxyich ma je huudibi anajty inäy ma je ane'mdac miiidity anajty ma y'a'oygi' tüg libro abugucy, yaayity jotjoty'amy etz nigixy'amy, yco'aducyity miiid huixtujc selli. ² Chi nañ jadu'n nhuin'ijxyich tüg ángel huudibi mij cötujcín miiid, yajtiy miiid ycapxin janch mic:

—¿Pin jada' janch tudägyip co yaj'ahuädzip jada libro etz migiidziydähuipy yi yseli?

³ Ni tzajpjoty, ni naaxhuiñ, ni naaxpa'tci'py ycacá'ity pin tudägyip huudibi mihuaad je libro co yaj'ahuädzip, o oy nigoodi'ajty ja'ixaanip. ⁴ Ich janch yaaxpich miiid tajin mayin anajty, com ca' anajty yajpaady pin je libro mihuaad co yaj'ahuädzip, o oy nigoodi'ajty huindicxy. ⁵ Chi nidüg je mijjáy xyñimaayich:

—Ca' myäxy. Chi je' je mic'ajt mïdipi ma yi judíojaý, je David y'ap y'oc huídibi nipatp nej tüg ama'ycaa, yi' ti mimadactäy tüg'óciy jibicpi. Yi' mihuaad yi libro yaj'ahuädzip, etz miguejyidähuipy je huixtujcpi yselli.

⁶ Chi nhuindicxpejtyich, e agujc'amy ma je ane'mdacin, etz agujc'amy ma je mïdaaxpi iyujc, etz agujc'amy ma je mijjäydijc ajcxy, jim anajty ytinäy je Dios y'ung, je Cordero. Ooy anajty ñiguëxigy chaachi'au nej anajty ayo'n tzaachypí ti yajnaxy. Ymïd anajty huixtujc ymu'n, e huixtujc yhuin, je' je' je huixtujcpi Dios yjihui'ñ ymic'ajt huídibi yquejx huindu'my naaxhuiñ. ⁷ Chi je Cordero, je Dios y'ung, ninicxy je huídibi anajty iñaayb ma je mij'ane'mdac, e chi oy cychoy je libro huídibi je mij'ane'mbi anajty ymïd ma je a'oy'amybi yci'. ⁸ Co je' anajty ti cychoy je libro, chi je mïdaaxpi iyujc etz je iipxmïdaaxpi mijjäy ycojxtinay'ahuíyday ajcxy ma je Dios y'ung, je Cordero, yhuinduu. Ymïd anajty ajcxy nidüg nidüg y'arpa etz oori copí ujtziy mïd poom, je' je' anajty nipaady nej ajcxy chajpcapxy capxy je huídibi ajcxy mibijcp Dios. ⁹ Janch y'íyib anajty ajcxy iy jemybi, ymïnaangixy:

Miich mihuaad co mgyigy yi libro, e mmiguejydaayi je huixtujcpi yselli. Com miich ti myaj'ögyii, ti mgojuy jäy ajcxy ypocy ma Dios mïd mgi'mni'py. Ti mgojuy ma Dios nidüg'óciy jäy ajcxy ypocy, huen huídibi razity, pinjaty capx huen huídibi ayucity, pinjaty tzomb huen huídibi cajpity huen huídibi naciónity.

¹⁰ Miich ti xymóoygixyich ane'min etz je tung mijpi nej huaad ñch ajcxy n'ojadajtcixy nmibijctzoogixy Dios, jigix jëbi ñch ajcxy n'ane'mgixy yi naaxhuiñjäy etz n'ojadajtcixy nmibijctzoogixy Dios mïd jäy ajcxy ycixpi.

¹¹ Chi ñch oy nhuin'ixyich e nhuinmïdooyich may ángeles ajcxy ycapxin ymïydaacin jühuidity ma je ane'mdac, ma je iyujc ajcxy yajpatcixy, etz ma je mijjäy ajcxy yajpatcixy. E janch canaag millon je ángeles anajty ajcxy. ¹² Janch mic' je' anajty ajcxy chachmïnaangixy:

Je Dios y'ung, je Cordero, je huídibi öc mïd jäy ajcxy ypocy ycixpi, yi' mihuaad paadip ane'm'ajtin, comeen'ajtin, ixpijcin, mic'ajt, cömayin, oy'ajt mij'ajt, etz huin'ñhuin huinyaaxin.

¹³ E tüg'óciy iyujc animal je huídijaty Dios ti yajcojy ti yaj'abadiy huídibi jüby tzajpjoty, etz huíbi ya naaxhuiñ etz naaxpa'tci'py, huídibi jüby mejyjoty, nhuinmïdooyich co tüg'óciy ajcxy chachmïnaangixy:

Tzoc huin'ñhuim tzoc cömayim, tzoc mooyim oy'ajtin etz mij'ajtin huinixi huinítiempo je Dios y'ung, je Cordero, etz je huídibi iñaayb ma je ane'mdaacin.

¹⁴ Je mïdaaxpi iyujc anajty chachmïnaangixy:

—Jadu'n huen tuñyii jadyii. Amén.

Chi nañ jadu'n je iipxmïdaaxpi je mijjäy ajcxy ycojxtinaygidactay, chi ajcxy ooy huindzigíy patjihuíy je huídibi huinixi huinítiempo tzinaayb.

6

Je huixtujcpi selli

¹ Huin'it nhuin'ijxyich je Dios y'ung, je Cordero, quejtzciich tüg selli ma je huixtujcpi chi nmïdooyich, co nidüg je mïdaaxpi iyujc ycapxy, jadu'n nmïdooyich nej enee yjidity, chi ymïnañ:

—Min ya, e chi m'ixipy.

² Chi nhuindicxpejtyich, chi nhuin'ijxyich tüg poob cohuay. E je huídibi yaj'iñaayb je poob cohuay ymajtz'ijtpy anajty tüg tip ma yci'. Chi je' yajmoy tüg coroní co yrey'adipy. Chi jada' choñ tziptunaangixy jigix jacmïmadägipy ymïdzip.

³ Co je Dios y'ung, je Cordero, yaj'ahuaach je mïmetzpi selli ma je necy, huin'it nmïdooyich je mïmetzpi iyujc ma je mïdaaxpi ymïnañ:

—Min ya, e chi m'ixipy.

⁴ Chi ypidzimy jadüg cohuay tzaptzpi ycolor. E huídibi yaj'iñaayb je cohuay chaptzpi, ycidigiiyi cötujcin co je naaxhuiñjáy canayyajjotcujc'adüüb ajcxy, e ñayaj'öcigixipy miñ xyipy. E yajmooy tüg espada mijpi.

⁵ Co je Dios y'ung, je Cordero, agiitzuudy je midugigpi selli ma je necy, chi nhuinmidooyich je midugigpi iyujc ma je madaaxpi, ymina'ñ:

—Min ya, e chi m'ixipy.

Chi nhuindicxpejtyich, chi nhuin'ijxyich tüg cohuay tzixypi. E je huídibi anajty yaj'iñaayb je cohuaychixy, ymüid tüg pujxtzim ma yci'. ⁶ Huin'it nhuinmidooyich tüg ayuc choñ ma je madaaxpi je iyujc ajcxy yajpaatcixy, ymina'ñ:

—Tüg denario meeñ chohuüy tüg libra trigo; nañ jadu'n tüg denario meeñ chohuüy tudujc libra cebada, ca' myaj'ayoohuipy aceite etz vino.

⁷ Co je Dios y'ung, je Cordero, yaj'ahuaach je mimadaaxpi selli ma je necy, chi nhuinmidooyich co je mimadaaxpi iyujc ma je madaaxpi ymina'ñ:

—Min ya, chi m'ixipy.

⁸ Huin'it nhuin'ijxyich tüg cohuay nitzuxy pu'tz, e je huídibi anajty yaj'iñaayb je cohuay, hue' anajty yxi öcpi. Aham anajty ymiiñ je huídibi ane'mb je it ma je öcpi ñimucy. Chi ajcxy yajmoy cötujcin je huídibi yaj'iñaayb je cohuay, jigix yaj'ó'ccixipy je tügpicypi ma je madaaxpicypi naaxhuiñjáy ajcxy. Chi yaj'ögip ajcxy müid tzip, müid yuuba'm, etz müid iyujc ahua'nbi huídibi ya naaxhuiñ.

⁹ Co Dios y'ung yaj'ahuaach je mimigooxpi selli ma je necy, chi nhuin'ijxyich pa'tci'py'amy ma y'ane'mdac yhuinduu, je' ajcxy y'alma huídibi ajcxy yaj'öcpat müid Dios y'ayuc ycixpi, huídibi anajty ajcxy capxhuäcxcixp etz nidiy'ajt'ajtcixp Dios y'ayuc. ¹⁰ Je' anajty ajcxy huídibi yaj'ögy patp müid Dios y'ayuc ycixpi chachminaangixy janch mic:

—Huindzin, janch mijpi janch huätzpi, huídibi cuydundaayb yi m'ayuc huídibi myejc ma ich ajcxy. ¿Jadu'ñyi jada' mjac-huäcxiba'ñ mina anajty yi jäy ajcxy mdiydunaangixy mdzaachytunaangixy müid ypocy ycixpi huídibi xyaj'o'c ich ajcxy, yi' ajcxy huídibi tzinaayb naaxhuiñgixy?

¹¹ Huin'it ajcxy yajmoy nidüg nidüg poobhuit, e yajnimay ajcxy co huen jacpooxcixy jayinjaty jahuenjaty, ixti cooni anajty yajca'pxy je mibijcpidijc micho'n, je' ajcxy huídibi quipxy müid müich ajcxy tumb ma Dios ytung, je' ajcxy huídibi yaj'ögy paadipy müid Dios y'ayuc ytiy'ajt ycixpi, tim jadu'n nej müich ajcxy ti mbaatcixy yaj'ögy.

¹² Chi n'ijxyich co je Dios y'ung, je Cordero, yaj'ahuaach je midudujcpi selli ma je necy, huin'it ooy naax yhuiñyxijty, chi je xii yajty janch tzixy, jadu'n nej tzixyhuit huídibi co'ögytjic ypidacpy, e je po' y'ahuimbijty nej ni'pyin. ¹³ Chi madza' ooy yca'y naaxcixy tim jadu'n nej piidztim tzuxpi ycäy co micpoj mixidiy. ¹⁴ Chi je tzajp yjihuäcni jadu'n nej tüg libro'abidity. Tüg'öciy tungop huídibi naaxhuiñgixy etz huídibi mejy'agujc, cijx chondägy ypidictäy ma anajty y'ity. ¹⁵ Huin'it ñayyütztaayi je reydiyc, je mijtungmüidpidijc, generaltjic, comeeñydijc, pinjaty ymic'ajt müid, je tumbidijc etz je midumbidijc ñayyütztaayi ajcxy nidüg'öciy majaty tzaajut tzaa'ang. ¹⁶ Tzachnimaaygixy anajty tungop tzaajot:

—Nigägootcich nigägootcich, ca'ydi ich ajcxy njac'ijxi yhuiñyjijp je huídibi iñaayb ma Dios y'ane'mdac, e nañ ca'ydi nbáatcixyich je tzaachypi ayo'n huídibi yegamyb Dios y'ung, je Cordero.

¹⁷ Com ti je xii je tiempo yhuaad'ajtni mina Dios etz Dios y'ung y'ahua'ndägaangixy etz tzaachytunaangixy naaxhuiñjáy. ¿Pin je' ocmimadäaip ajcxy chip y'ejcín?

7

Huídibi anajty ajcxy tiy'ajtmüid ma je Israel jäy ajcxy

¹ Chi co jadu'n yjajti, chi nhuin'ijxyich madaax ángeles ajcxy ytinaaygixy ma madaax'itpi naaxhuiñybi ytatzciy. Adujccixy anajty je madaax'it poj ca'ydi ypojy ya naaxhuiñ, ni ma mejy, ni ma quipy. ² Chi nhuin'ijxyich jadüg ángel ymiiniy anajty xibiidzimy'amy, miiidity ma yci' je Dios juugypí yselli. Jadayaabi ángel ooy mic miyaaxy je jamidaaxpi ángeles ajcxy huidibi anajty ajcxy ti yciidigiigixy je mic'ajt je cõtujcin nej huaad yajhuindigooygixy tijaty ya naaxhuiñ etz ma ni mejy.

³ Chi je ángel ymina'ñ:

—Ca' ti ayo'n mdungixy naaxhuiñ, ni ma mejy, ni ma quipy chaa, ixti cooni anajty Dios ytiy'ajt y'ijxpejt nbiidaacim ma je' ajcxy yhuimbocin, je tibi ajcxy huin'ixy huidibi tungixp ma Dios ytung.

⁴ Chi nmidooyich jadu'ñyi je' tibi anajty ajcxy Dios ytiy'ajt y'ijxpejt ti ymóoyigixy. Migo'px jahuixchigui'px madaax mil je' ñaybaati huidibi anajty ajcxy tiy'ajt miiid ma yhuimboc ma nidüg'óciy Israel jäy ajcxy. ⁵⁻⁸ Majmetz mil anajty ajcxy tiy'ajt y'ijxpejt miiidity je Judá jäy, majmetz mil je Rubén jäy, majmetz mil je Gad jäy, majmetz mil je Aser jäy, majmetz mil je Neftalí jäy, majmetz mil je Manasés jäy, majmetz mil je Simeón jäy, majmetz mil je Leví jäy, majmetz mil je Isacar jäy, majmetz mil je Zabulón jäy, majmetz mil je José jäy, etz majmetz mil je Benjamín jäy.

Je mayjäy ajcxy huidibi yxoxip miiid poob huit

⁹ Chi jada' nhuin'ijxyich janch mayjäy chooñ ma canaag nación, hue' ajcxy canaagnax raza'adyii, e capxy ajcxy canaagnax ayuc, etz chooñ ajcxy ma canaag cajp. Hue' je mayjäy ytinay'ahuiday ma je mij'ane'mdac huinduu, etz ma Dios y'ung, je Cordero yhuinduu. Janch mayjäy ñimujcy ma je Dios y'ung yhuinduu, ni pin je' anajty huaad camichoudäy ajcxy. Ac poob huit anajty ajcxy miiid yxoxyity, e ymiiid anajty ajcxy tiixy'aay ma yci'. ¹⁰ E janch mic anajty ajcxy miyaaxcixy Dios, chachminaangixy: Hich ajt nDios yi' je' tügpajc huidibi xyajpocyhuaatzim. Hich ajt nDios yi' je' huidibi ane'mdaayb tüg'óciy, e nañ jadu'n yi' y'ung, je Cordero.

¹¹ E nidüg'óciy je ángelestijc anajty ajcxy ytinaaygixy jühuidityi ma je Dios y'ane'mdac. E cham je mijjäy ajcxy etz je madaaxpi iyujc huijoj'ihuüy ajcxy ma je ane'mdac huinduu, huindzigiiygixy yajmij'ajtcixy je Dios. ¹² Chachminaangixy: Jadu'n jada. Amén. Hich ajt nDios, je' mihuaad huinixi huinitiempo tüg'óciy je iihuin, je xondaacin, je oy'ajtin, je ixpijin, je jäygidaacin, je cömayin, je ane'min, je mij'ajtin. Amén. Jadu'n jada.

¹³ Huin'it nidügti je mij jäy ycapxy, e xy'amidooyich:

—¿Pin jada ajcxy jada' huidibi poob huit miiid yxoxyity, e ma yi' jada' ti choongixy?

¹⁴ Chi ich je' n'adzooy:

—Huindzinich, miich mnejhuuyb.

Huin'it je' xy'adzooyich:

—Jada je' ajcxy tibi je mij ayo'n minajxcixy yajnajxcixy, e ti ypocyhuaatzcixy miiid je Dios y'ung, je Cordero ñi'py, tim jadu'n nej jihuüy yhuit ti yajhuaatzcixy janch poob ma Dios y'ung ñi'py. ¹⁵ Paady yi' ajcxy yajpaady ma Dios chinaydac yjugy'ajttac, e ytungixy xim tzuum ma Dios ytiyc tzajpjoty. E yi' Dios y'ung huidibi iñaayb ma je mij'ane'mdac, yi' yi' mi'ijttaayb cuend'aty ma yi' yhuinduu. ¹⁶ Ca'p ajcxy jacjihuüygixipy yuu tidzibi, ni xi'an ycajacnögiiyb ajcxy, ni anbi ycajacyajtzibiiyb ajcxy. ¹⁷ Com je Dios y'ung, je Cordero, huidibi cujc'amy yajpatp ma je Dios y'ane'mdac, je' yi' cuend'ajtp ajcxy, jadu'n nej jihuüy cöbixy cuend'aty, e yajnicxip ma je ni huätzpi ymuxy huidibi yejcp jugy'ajtin. Dios yajquägipy yi' ajcxy ytajin ymayin jigix ca' yjaciiygixipy yjacyáaxcixipy miiid tajin mayin.

8

Je mihuixtujcpi selli etz je poomjogi'ñ ac oori

¹ Co Dios y'ung, je Cordero, yaj'ahuaach je mihuixtujcpi selli, huin'it y'ijty oy jahuengi cup hora amoñi jii by tzajpjoty. ² Chi nhuin'ijxyich Dios y'ángeles huixtujc ajcxy ytinaaygixy anajty ma Dios yhuinduu, e yajmoy ajcxy huixtujc trompeta. ³ Huin'it jadüg ángel miiñ, chi je' ytinaay'ihuñy ma mesi huinduu ma je Dios ojadajtac. Je ángel ymüid anajty tüg poomjogi'ñ ac oori. Chi ymooyi poom may'amy huidibi jojcp. E je poomjoc tigüyb ma Dios yhuinduu quipxi müid juydacin nuucxtacin huidibi je jäy ajcxy ytumyb huidibi Dios ti huin'ixy ajcxy. ⁴ Ma je ángel yci'am jim je poomjoc choñ ñicxy ma Dios yhuinduu quipxy müid je oración huidibi ajcxy ytumyb je tübi ypocyhuaatzcixy. ⁵ Huin'it je ángel majch je poomjogi'ñ, chi yaj'ujch müid jinbajc huidibi anajty jim ma je Dios ojadajttaacin, chi najtzjibibüy naaxcixy, huin'it ooy yajmidooy jidiñtin micpi etz huizuc e je naax ooy yücxy.

Je maytrompeti

⁶ Je huixtujcpi ángeles ajcxy huidibi anajty müid je huixtujcpi trompeti, ñayni'ixüyi ajcxy co yajxüxaangixy.

⁷ Je midügpü ángel yajxuxy je ytrompeti, e huin'it ooy eneedütz yca'y mihudidü jin etz ni'py. Chi oy ycäy naaxcixy. E jahuengi cujc-huäcxy oy nögy je naax, je quipy etz je aay ujtz tzuxjatypi etz nöctay müy.

⁸ Je mimetzi ángel yajxuxy ytrompeti, chi ooy ycäy mejyjoty jadu'n nej tüg mijcop janch tooyb anajty müid jin, e jahuengi cujc-huäcxy je mejy oy y'ahuimbity ni'py. ⁹ E jahuengi cujc-huäcxy oy y'ögy huidijaty anajty tzinaayb ma je mejy. E je maybarco huidijaty anajty ma je mejy, nañ jadu'n jahuengi cujc-huäcxy oy ytimyhuindügoydäy.

¹⁰ Chi je midugügpü ángel yajxuxy je' ytrompeti, e huin'it oy tüg madza' mijpi ycäy. Je madza' jadu'n nipaady nej tüg mijjin huidibi nayyajcodücxim. Je madza' oy ycäy ma jahuen cacujc-huäcxy mijni, etz ma ni müxy. ¹¹ Je madza' hue' je' anajty xü'adyii ta'm'ujtz. E je ni jahuen cacujc-huäcxy oy yajtni ta'm, jadu'n yta'mity nej ta'm'ujtz, e ooy jäy may y'o'cy müid je ni ycixpi co anajty ti y'ahuimbity ta'm.

¹² Je mimadaaxpi ángel yajxuxy je' ytrompeti, e huin'it jahuen cacujc-huäcxy je xü oy yhuindügooy, e nañ jadu'n je po' etz je madza' jahueng cacujc-huäcxy oy yhuindügooy. E müid jadu'n ycixpi je po' etz je madza' yhui'ngixy jahuen cacujc-huäcxy agootz, e jahuen cacujc-huäcxy ytiñcxin ocyejñi ajcxy xim tzuum.

¹³ Chi nhuin'ijxyich tüg me'ty anajty yqueec-huidity cuptzajp, e nmidooyich co ymüina'ñ janch mic:

—¡Ay! ¡Naaxhuiñjyäj ajcxy ayoobidijc! co anajty trompeti yajxüxy je jatugügpü ángeles ajcxy, huin'it ayo'n ypada'ñ je naaxhuiñjyäj ajcxy, ayo'n ypadamy ajcxy, ayo'n ypadamy ajcxy.

9

¹ Chi je migooxpi ángel yajxuxy je' ytrompeti, chi nhuin'ijxyich tüg madza' anajty ti ycäy naaxcixy. E chi je madza' yajmoy je ahuaasti huidibi müid yaj'ahuädzic je ayoodac ma Dios cuend'aty müidity je ca'oybidijc. ² Chi je ángel yaj'ahuaach je jut ma je ayoodac, e ma je jut jii by ypidzimy jadu'n nej jinjoc huidibi pidzim ma tüg horni. ³ E ma je joc ypidzimy ooy maymu' naaxhuiñygy chachqueec-huidijtcixy ooy, e je mu' ajcxy ymooyi mic'ajt, jadu'n nej ca'ty müidity ytijp. ⁴ Chi je' ajcxy yajcötujcmoy co ca' ni ti aay ni ti ujtz yajhuindügooygixipy huidibi yajpatp naaxhuiñ, ni ujtz ni quipy. Jëyi janchtiy ycötujcin mooyi co huen yajtzaachihuiipy je jäy ajcxy huidibi ca' müidity Dios ytiy'ajt y'ijxpejt ma yhuimboc. ⁵ Ca' ajcxy yajcötujcmoy co yjäyyaj'ó'ccixipy, jëyi co janchtiy ayo'n ajcxy yegipy migoox po'. E je ayo'n huidibi anajty ajcxy yejcpy jadu'n je' nej co ca'ty jäy yajtzaachüy

müid ytijp. ⁶ Je huin'it xii je huin'it tiempo jäy ajcxy ooy anajty o'cin ja'ixtaaygixy e ni ca' pátcixipy. Ooy anajty janijot'ájtciy o'cin, e cöguëgiib ajcxy je o'cin.

⁷ Je maymu' jadu'n je' anajty yquëxigy nej maygohuay huídibi ni'ixi'ijtcixp co yajnicxáanigixy ma tzip ytuna'ñyii. Ymüid anajty je maymu' ma ycohuajc jadu'n anajty quëxigy nej oori coroni. E je maymu' yhuin'ijp jadu'n yquëxigy nej jäy yhuin'ijp. ⁸ Je maymu' ymüid anajty ycohuay jadu'n nej töxyjäy ycohuay, e ytütz jadu'n nej jamгаа ytütz. ⁹ E je maymu' ymüid anajty ajcxy jadu'n nej pujx huídibi müid ñinicx cohuaangixy. E co ajcxy queec-huidity, ooy ajcxy yqueec yaj'amüy jadu'n chachne'müy nej je carro huídibi cohua yajcxy yjugujcpy co ñicxixy ma tzip ytuñyii. ¹⁰ Je maymu' ymüid anajty ajcxy ypixy tim jadu'n nej ca'ty ypixy, e ma ajcxy ypixy ymüid anajty ytijp. E ma ajcxy ypixy müidity anajty je mic'ajt co jäy ajcxy yajtzaachihiipy migoox po'. ¹¹ E je maymu' je' ajcxy yrey'ajtpy je ángel huídibi nigohuajc'ajtp je ayoodac, hue' xii'adyii hebreo'amy Abadón, e griego'amy yxii'ity Apolión, hue' je yxii yhuimbizimy: je huídibi yajhuindigooyb.

¹² Najx je' je ayo'n jayijpi, e ytigoy'ity je jametzpi ayo'n co je jayijpi ti y'ocjadyii.

¹³ Je müdudujcpi ángel yajxuuxy je ytrompeti, chi nmidooyich tüg ayuc chooñ ma je müdaaxpi huaj mu'n ity ma je altar ac óoribi, huídibi anajty ijtp ma Dios yhuinduu. ¹⁴ Je ayuc ymüid'ñ:

—Nima' je müdudujcpi ángel huídibi anajty trompeti müid: “Najtzmazdi' yi müdaaxpi ángeles huídibi ajcxy coxoch ijtp ma Eufates müjñiba'.”

¹⁵ Huin'it oy yajcoguejtutuucixy je müdaaxpi ángeles, jigix yjäy'aj'o'ccixipy jahuen cacujc-huäcxy huídibi yajpatp ya naaxhuiñ. Je müdaaxpi ángeles ni'ixi' je' anajty y'ijtcixy, je huin'it hori, je huin'it xii, je huin'it po', je huin'it jimijt co anajty yaj'ögaangixy jahuen cacujc-huäcxy je naaxhuiñybi jäy ajcxy. ¹⁶ E nmidooyich co ajcxy michoy je soldadtijc huídibi anajty ajcxy cohuaangixy. E hue' mejtz migopx millón anajty ajcxy ñaybattáayigixy je soldados ajcxy.

¹⁷ Jadu'n nhuin'ijxyich je cohua yajcxy, e müid je ñijäy ajcxy huídibi anajty yaj'ñaaayb. E je ñijäy ymüid anajty ajcxy pujx ma ycaach, je' müid ñinicx cohuaangixy. E je pujx hue' anajty ycolor tzaptz, azul etz pu'tz. Je cohua yajcxy jadu'n anajty ycohuajc nej jamгаа ycohuajc, e ma ajcxy y'ahuac ypidzimy nej jün, nej jünjoc, etz nej azufre. ¹⁸ E müid jada jahueng cacujc-huäcxy naaxhuiñyjäy chach'o'cy ajcxy müid je jün, je jünjoc etz je azufre ycixpi huídibi anajty pidzimb ma je cohua yajcxy y'ahuac. ¹⁹ Je cohua yajcxy ymüid anajty mic'ajt ma y'ahuac etz ma püxy. Com je' ajcxy ypixy jadu'n je' anajty nej xoox müid ycohuajc, e je cohua yajcxy chach'ahua'ndaaccixy müid ypixy.

²⁰ E je jacjadyii jäy ajcxy huídibi ca' y'o'cy müid jadayaabi ayo'n, ca' ajcxy yjothuimbijty ma Dios, ca' ajcxy ixmajch je jibicpi huídibi ytungixp. E ni ca' ajcxy ixmajch nej ajcxy je ca'oybi huindzigiygixy. Nañ jadu'n ca' ajcxy ixmajch nej ajcxy huindzigiygixy huídijaty ajcxy oyduñyip müid plata, müid bronce, etz tzaadzech etz quipychech. Je huídijaty ajcxy y'oydumyib etz ñidzejtutuucixy, ni yca'ijxcixy, ni ycamidoogixy, ni yca'yöygixy.

²¹ E ni ca' je jäy ajcxy yjothuimbijtcixy ma Dios, ca' ajcxy ixmajch jadu'n nej ajcxy chachjäy'aj'o'ccixy, jadu'n nej ajcxy tzachcaxpojccixy ymügügtijc, jadu'n nej ajcxy huingbi töxyjäy tzachmügapxtigooygixy, etz jadu'n nej ajcxy chachmeetzcixy.

10

Je ángel müid je mutz libro

¹ Nhuin'ijxyich co chooñ tzajpjoty tüg ángel micpi müiducyity müid joc, e müidity i'ñch ma ycohuajc. Je yhuin'ijp yquëxigy nej xii. Je' ytecy jadu'n yquëxigy nej müijñnye'n. ² E ma yci' müidity tüg libro yëphuäcxy, e pidacy y'a'oydecy mejyhuingixy, e y'anajtytecy pidacy naaxhuiñgixy. ³ Chi je ángel oy janch mic yaaxquency jadu'n nej tüg jamгаа yäxy. E co anajty jadu'n ti yaaxquëgy, chi oy yajmüidoy huixtujc jidijtin huídibi ycapx yci'm'ayuc.

⁴ Co je huixtujcpi jidiytin oy ycapxtaaygixy, chi ñich anajty njaaya'ñich huídibi ti capxy. Chi nmidooyich tüg ayuc chooñ tzajpjoty xyñimaayich:

—Mi'it jada ayuc yüch huídibi yi huixtujcpi jidiytin ti capxy, ca' mjaay.

⁵ Chi je ángel huídibi nhuin'ijxich co mejyhuingíxy etz naaxhuiñyíxy ytinäy, yujcxajy yci' a'oy'amybi tzajpcíxy. ⁶ Chi je ángel capxcödujcy co je Dios huídibi jugy'ajtp huinixii huinítiempo, je huídibi yajcojy je tzajp, je naaxhuiñyibi, je mejy etz tüg'ócíy huídibi jilby yajpattaayb; e je Dios jadu'n ymina'ñ:

—Ca' jada yjac-huäcxibani mina nguexa'ñich tzaachypí ayo'n ya naaxhuiñ. ⁷ Co yhuaad'ajtnip je xii je tiempo ma anajty je mihuixtujcpi ángel yxuux yajxutzondägy, chi cuyduunip je Dios y'ayuc ytiy'ajt huídibi ca'pin anajty huinjihuíy, je ayuc huídibi je Dios ytumbidijc je profetas ajcxy ñajtzcapxiy jecy'ajty.

⁸ Je ayuc huídibi nmidoohuich, je huídibi anajty ti chooñ tzajpjoty, ycapxy je' jadüg'oc, e xyñimaayich:

—Ñicx miich etz ciyíg yi libro huídibi yëphuäcxy yi ángel ymüd ma yci'. Je' je' je ángel huídibi anajty tinaayb mejyhuingíxy etz naaxhuiñyíxy.

⁹ Chi n'óyich ma je ángel nbijctzooyich co huen xymöyich je pi'clibro, chi je' xyñimaayich:

—Matz e cojicxnax, e xyajta'mmiiyip mjot e ma miich m'ahuac mjihuíhuipy päg jadu'n nej ceripäg.

¹⁰ Huin'it ñich je pi'clibro ngiyígy huídibi je ángel anajty ymüd ma yci', e chi ñich je' ngöjicxnajxy. Ma ñich n'ahuac njihuíyich janch päg jadu'n nej ceripäg. Co oy ngojicxnajxtäyich, chi oy y'ahuimbijtni janch ta'm ma ñich njot. ¹¹ Chi mic'amy nyajñimaayich:

—Ñicx miich capxhuäcx jadüg'oc je ayuc huídibi Dios ti xymöy, je huídibi ti mgapx-huäcxy ma je mayñaax maygajp, ma je mayñaciones, huídibi canaag ayuc capxcixp, etz ma je reydiyc ajcxy.

11

Je metzpi testigo

¹ Chi jada' nyajmooyich tüg paxy, jahuengi jadu'n anajty yquëxígy jadu'n nej baari huídibi quipx yajhuamb. Chi ajcxy xyñimaayich:

—Pidíg e quipxta' yi Dios ytijc, nañ jadu'n quipx je mesi ma Dios yajhuindzigíy, etz nañ jadu'n míchou naag jäy ajcxy jilby Dios huindzigíygy. ² Je Dios ytiba' ahuing miich je' pidäg, ca' mguipxipy. Com yi' yi' ti ycidigíyüi yi jäy ajcxy huídibi ca' yjudíojäyity. Yi jäy ajcxy huídibi ca' yjudíojäyity ymimadägamyb ajcxy je Jerusaléngajp ma Dios müidity tzínaydac etz ane'mamb ajcxy jilby huixchiguípx metz po'. ³ Ñich metz testigo nguexipyich ma je cajp ma Dios müidity tzínaydac, e yi' ajcxy capxhuäcxamb ñich n'ayuc tüg mil jametzmigo'px jatugi'px xii. Yxoxyity ajcxy müid huit nücuyjaam ixcuyjaam.

⁴ Je metzpi testigo jadu'n nipaady nej je metzpi olivo cop etz je metzpi candelero huídibi tinaaygixp ma je Dios yhuinduu, je huídibi ñaaxhuiñyibi ane'mb. ⁵ Pen ji pin nej jaty midundigoya'ñ je metzpi testigo, je' ajcxy yajpidzimip je' ajcxy jin ma y'ahuac, yjicxtähuipy yjündähuipy je' ymidzip. E jadu'n je' y'ögipy pinjaty anajty je metzpi testigo midundigooyb. ⁶ Je metzpi testigo ymüd yi' ajcxy cötujc co ahüäctúccixity je tzajp, ca'ydí ytüy jadu'ñyí tiempo anajty ñhuäcxixy capxhuäcxixy Dios y'ayuc ytiy'ajt. E nañ jadu'n ymüd ajcxy cötujcin co ñii yaj'ahuimbijtcixipy ni'py. Yi' ajcxy yajtunib yaj'jadib canaagnax ayo'n ya naaxhuiñ, naag'oc anajty ytímdzóccixy. ⁷ E co anajty je metzpi testigo ajcxy yajmaaygixy ytung, chi je iyujc huídibi anajty pidzimb ma je ayoodac, je abismo, je' je' tziptuunip müid je metzpi testigos etz yaj'öctähuip je metzpi testigo. ⁸ Chi je metzpi testigo ñinícx ajcxy yhuimípy mijñigujc mjtügujc jim ma je mij ciudad ma

je Huindzin Jesucristo yajcruudzpejti, je cajp huidibi tundigooy mïid Dios tim jadu'n nej Sodoma etz Egipto ytundigooy jecy'ajty. ⁹ Nijëjity jäy ajcxy huidibi xi ya conaaxip cogajpïp, oy ypinjäyity, oy ti ayuc capxcixy, y'ixipy ajcxy tugüg xii jagup je metzpi testigo ñaaxnïc x mïjtügujc, e ni ca'a'ixihuiipy ajcxy co yajnaaxtigihuiyb. ¹⁰ Huidijaty ajcxy tzi naayb ya naaxhuiñ ooy yxondáaccixipy etz yjotcugüiygixipy mïid je' ycixpi co je metzpi Dios ytestigos ajcxy anajty ti y'o'ccixy. Chi je mayjäy ajcxy miñ xyipy ñaymóoyigixipy tijaty, e ñayyajnigüéjigixipy tijaty. Com je metzpi yëydijc huidibi nidiy'ajt'ajtp anajty Dios ytiy'ajt, ti anajty ooy ayo'n yejccixy ma naaxhuiñjy äy ajcxy. ¹¹ Codugügxi jacup naxy, chi Dios cijx yajjugypïctäy je metzpi öcpi, e chi ajcxy jadüg'oc ypidigy, e pinjaty je' i jx, ooy je' ajcxy chachchigüiy. ¹² Je metzpi testigo huidibi nidiy'ajt Dios, midoy ajcxy tüg ayuc janch mic jüby tzajpjoty anajty ñimáayigixy:

—Pejtcix yeeby cix.

Chi ajcxy ypa'ttigüiy tzajpjoty ma tüg joc, e i jxi ajcxy ymidziptijc. ¹³ E janch huin'ítüy ooy naax yücx y mïid tüg mic ujx. E tüg picypï je majc picypï jäy jim Jerusalén oy ymijähuiygixy. E mïid je ujx ycixpi y'o'cy ooy mayjäy, ñaybaati je öcpi huixtujc mil yëydijc. E jacjadyii jäy ooy chigüygixy yjihuiygixy, e ojadajtcixy mibijctzoogixy ooy je Dios tzajpjoty.

¹⁴ Ti ñaxy je mimetzpi ayo'n, chi tzojc ymiiñ je midugügpi.

Je mihuixtujcpi trompeti

¹⁵ Chi je mihuixtujcpi ángel yajxuxy je' ytrompeti, e huin'it oy yajmidooy may'ayuc tzajpjoty mic ymïnañ:

Je ane'min huidibi ya naaxhuiñ, yi' je' cham mïid ajt nHuindzin Dios etz yi' yCristo, e yi' je' ane'mip huinixi huinitempo.

¹⁶ Je iipxmidaaxpi mijjäy huidibi anajty ajcxy iñaayb ma y'ane'mdac ma Dios yhuinduu, cijx je' ajcxy yhuijoj'ihuiydaaygixy, e chi ajcxy ooy Dios ibaty capxpaty, ymïnaangixy:

¹⁷ Huindzin Dios, Dioscojuyip nyajnájxcixpich ma miich, huidibi jac mic'ajt mïid ca'ydï jac pin. Miich tüg'ócüy mdundaayb mjajtaayb mnejhuiydaayb. Miich je' huidibi ijt naayb, e ti m'ijtnäy, e m'ida'ñyi, com miich ti m'ijxcugüiy je mgötujcin, e ti m'bidägy m'ane'min.

¹⁸ Mayñaax maygajp mayñaaxhuiñjy äy ooy yjotmäty ajcxy, mïid co ti xii hori paady co miich mdzaachytuna'ñ je jäy ajcxy mïid ypocy ycixpi. Ti je xii je hora paady co miich mdäyduna'n je jäy ajcxy tiibi y'o'ccixy. Ti je xii je hori paady co miich mmöhua'ñ je mdumbidijc ypremio, je mdumbidijc huidijaty najtzcaxüiy ajcxy miich m'ayuc, huidijaty tudägy'ajtin ti patcixp ma miich, je huidijaty miich mxii xychigüiyip, huen ymij'ana'city huen ymutz'ana'city. Ti je xii je hora paady co miich myajtigoya'ñ je pinjaty yajhuindigooygixyp naaxhuiñjy äy ajcxy.

¹⁹ Je huin'it tiempo oy Dios je ytiyc y'ahuäch jüby tzajpjoty, e chi nhuin'ijxyich je caax ma Dios ycötujcin y'ity. Nañ jadu'n oy nhuin'ijxyich huizuc, etz nmidooyich co ooy ñe'my, etz nmidooyich enee yjidiñin, etz njihuiyich tüg ujx, etz ooy yca'y eneeditiz mijatypi.

12

Tüg töxyjäy etz je ama'y tza'ñ

¹ Je huin'it hora oy yquëxigy tzajpcixy tüg i jxpejt mijpi. Tüg töxyjäy ñidigooyity mïid xii, jadu'n nej jihuiy mïid tüg huit ñimochity, e jadu'n yquëxigy nej jihuiy anajty po' yajhuäcpety, e ymïid ma ycohuajc tüg corona ac oori huidibi majmetz madza' mïid.

² Jadayaabi töxyjäy hue' anajty ungmijäy'ajtp, e janch yaax tinaayb je' anajty mïid je tzaachypi, mïid co y'ung anajty yajma'xung'ada'ñ. ³ Huin'it oy yquëxigy jadüg tiy'ajt i jxpejt tzajpcixy. Tüg ama'y tza'ñ janch mij, tzaptz ycolor, e mïidity huixtujc ycohuajc,

majc ymu'n, e tüg corona majaty ycohuajc. ⁴ Je mij tza'ñ mïid je' ypïxy jugujcmujcy jahueng cacujc-huäcxy je madza' jim tzajpcïxy. Chi je' najtzyemïyday je maymadza' naaxhuiñygyxy. Je mij tza'ñ oy yhuäcxipy ma je töxyjäy yhuinduu huïdibi anajty ungbadamb tzojc, chi tzüdza'ñ je pi'c'ungma'xung janch tim jëyi anajty yma'xung'aty. ⁵ Chi je töxyjäy yajma'xung'ajty tüg pi'cyëydijc, huïdibi ane'mïp mïid Dios ymic'ajt, ymïid yi' tüg pujxtajc huïdibi ijxpejt ajt co mij ane'mïn mïidity ya naaxhuiñ. E yajpijcy je y'ung, chi yajnicxi ma Dios etz ma je' y'ane'mdac. ⁶ Chi je töxyjäy yqueecy ñicxy mijtigïduum, ma anajty Dios ti ñi'ixïyï y'it ylugar co jim y'idipy, e jim ymöhuiyb ycaayïn y'uucin tüg mil jamejtmïgo'px jatugi'px xi.

⁷ Je huin'it tiempo tüg tzip yjajti tzajpjoty mïid je' ycïxpi. Chi Miguel huïdi mij cötujcïn mïid, mïid jadyï y'ängeles ajcxy, ooy chiptuñ mïid je ama'y tza'ñ etz yi' y'ängeles ajcxy. ⁸ E ca'p je ama'y tza'ñ ajcxy ymadacy ma je tzip, e ca'p je' ajcxy mïid'ajty tigïydac tzajpjoty. ⁹ E jadu'n Dios yajqueecy je mujcu', je ama'y tza'ñ mijjäybi, jïiby tzajpjoty. Je' je' je ama'y tza'ñ huïdibi xi'ajtp diablo etz Satanás, je huïdibi huin'ïmb tüg'óciy naaxhuiñyjäy. Je mujcu', je ama'y tza'ñ, mïid je' y'ängeles ajcxy oy yajcötijnajxtäy ya naaxhuiñ.

¹⁰ Je huin'it hora nhuïnmidooyich tüg ayuc janch mic tzajpjoty chooñ, ymïnañ:

—Ti je xi je tiempo nigoody mïna Dios ti nihua'ñ ti yajnidzögy jäy ajcxy ma je mujcu'; mïna Dios ti yajniguëxïgy yi' ymic'ajt; mïna Dios ti yajniguëxïgy yi' y'ane'mïn; etz mïna Cristo ytigïy ane'mbi mïid ymic'ajt. Com ti Dios cötijnaxy je mujcu' huïdibi tzachxïp ïich ajt nmïgügtijc, je mïbijcpidijc. Je mujcu' anajty tzachxïp ajcxy xïm tzuum ma Dios. ¹¹ Hch ajcxy nhermanotijc ti yi' mïmadaaccïxy je mujcu' mïid je Dios y'ung ñi'py, etz mïid je' y'ayuc ytïy'ajt tïibi mïbijccïxy, je huïdibi ajcxy nidïy'ajtcïxp ma yi mayjäy. Ca' ajcxy tzïgïy anajty co yjugy'ajt ytigïooygïxïp. Nïgi ni'ixï y'ijtcïxy anajty mïid ymïbijcïn oy ytïmy'ó'ccïxipy. ¹² Jotcujc'ajtcïx etz jotcugïygyx huïdibi jïiby tzïnaaygïxp tzajpjoty. Ayo'n ypadamyb ajcxy huïdibi tzïnaayb naaxhuiñygyxy etz mejyjoty. Com je mujcu' ti je' ycidägy ma miich ajcxy mïid chip y'ejcïn. Com je mujcu' ñejhuïyb co tim jayïnjaty jahuenjaty xi tiempo jacmïidity.

¹³ Co je mujcu' ijxy co ti yajcötijnaxy ya naaxhuiñygyxy, chi ooy pahuïdijttacy je töxyjäy huïdibi anajty ti yajpi'c'aty pi'cyëydijc. ¹⁴ Chi je töxyjäy metz me'tyqueec mijpi yajmoy, jigix cöguëgïpy je ama'y tza'ñ, ñicxïp agueegïccïp mijtigïduum ma je ama'y tza'ñ ca' ñijädïby. Jim mijtigïduum yajmoy ycaayïn y'uucin tugïg jimïjt ja cup. ¹⁵ Chi je ama'y tza'ñ ooy nï yajpidzïmy ma y'ahuac, jigix y'ahuïmbidïpy mij nï huïdi je töxyjäy pagujïp mij nïjoty. ¹⁶ E yi naax ooy je töxyjäy pubejty, chi je naax y'ahuäcxy, e uuctïtztay je nï huïdibi anajty je ama'y tza'ñ ti yajpidzïmy ma y'ahuac. ¹⁷ Mïid jada ycïxpi je ama'y tza'ñ ooy y'ahua'ndacy mïid je töxyjäy, chi ñicxy tziptumbi mïid je töxyjäy y'ap y'oc huïdibi jacjimïp, je' ajcxy huïdibi cuydumb Dios y'ane'mïn ycötujcïn, je' ajcxy huïdibi cuydumb je ayuc huïdibi Jesucristo anajty capxhuäcxyp.

13

Je metzpi ca'oy'iyujc

¹ E jim ndïnay'ïhuïyïch ma pïjot mejypäbi. Chi nhuïn'ijxyich co tüg iyujc janch oy chigïyñi ypidzïmy mejyjoty ymïid anajty huixtujc ycohuajc, e majc ymu'n. E ma ymu'n mïidity majc corona. E ma ycohuajc mïidity anajty cojaay yxï huïdibi yajjotma'tp Dios. ² Jadayaabi ca'oy'iyujc huïdibi nhuïn'ijxyich, jadu'n anajty yquëxïgy nej tüg cuuxyubïjy. E ytecy jadu'n anajty yquëxïgy nej osi ytecy, e y'ahuac jadu'n anajty yquëxïgy nej jamгаа y'ahuac. Chi je ama'y tza'ñ oy cötujc möy, mic'ajt möy, mij'ane'mïn möy, je ca'oy'iyujc. ³ E n'ijxyich tüg ycohuajc ma je ca'oy'iyujc co mij chaachïjty, nej jïhuïy je' yaj'ögïb. Chi je chaachï'au oy choogy, e tüg'óciy naaxhuiñyjäy ooy janch jïhuïygyxy huïnmaaygyxy mïid

jada ycixpi co ti choocy. Chi je mayjäy ajcxy panicxy je ca'oy'iyujc. ⁴ Je mayjäy ajcxy ooy huindzigiiygixy je ama'y tza'ñ, je mujcu', com je' co anajty ti möy cötujcin ane'min je ca'oy'iyujc. Chi ajcxy nañ jadu'n ooy huindzigiiygixy je ca'oy'iyujc, chachminaangixy:

—¿P'in jada' ocjadu'nip nej jadayaabi ca'oy'iyujc, e p'in jada' octziptuunip miid yi'? Ca' p'in.

⁵ Chi je ca'oy'iyujc yajmooyi mic'ajt, jaydëbi amij agix capxip etz nigapxip Dios oy jibic, nej huaad Dios yajjotmäty. E nañ jadu'n mic'ajt moy, jaydëbi miid'adipy ane'min cötujcin huixchiguipx metz po'. ⁶ E jadu'n je' tuuñ. Nigapxy ni'ojiiy ooy Dios. Nigapxi Dios yxii oy ca'oy, etz nigapxi ni'ojiiy Dios ytijc. Nañ jadu'n nigapxy ni'ojiiy huidibi ajcxy jiiyby tzinaayb tzajpjoty. ⁷ Chi mic'ajt ymooyi, jigix chiptuunip miid je huidijaty mibijcp Dios, huidijaty miid ity Dios, ixti mibaad mimadaaccixy. Nañ jadu'n mooyi cötujcin mic'ajt, jigix ane'mip naaxhuiñyäjy huen huidibi razaity huen huidibi cajpity, huidibi capxcixp huen huidibi ayucity. ⁸ Tüg'óciy mayñaaxhuiñyäjy ajcxy huidijaty janch ni ycamiiñ yxii jaybety ma je jugy'ajt libro huidibi je Dios y'ung, je Cordero, ymiid. Dios yhuinma'ñypidacy jayijp ca'ni naaxhuiñybi anajty chondägy co y'ung y'oga'ñ miid jäy ajcxy ycixpi, jaydëbi cijxjaayi ajcxy yxii ma yi jugy'ajt libro.

⁹ Pinjaty tädz'ac miid, pinjaty mido'mbigamb jada ayuc, huen mido'mbijccixy. ¹⁰ Pen Dios ti yhuinma'ñypidägy co pinjaty ymigüg yajnicx mach, nañ jadu'n je' ajcxy nicxip mach ci'm. Pinjaty ymigüg yaj'öcp nañ jadu'n y'ögip jadu'n nej ymigüg anajty yaj'ögy. Paady ycixp yi' ajcxy huidijaty mibijcp Dios, huen yajtungixy miid ymigügtijc mecxtujcin etz mibijcin.

¹¹ Huin'it nhuin'ixyich jadüg ca'oy'iyujc chooñ naaxjoty, e ymiid anajty metz ymu'n, tim jadu'n nej pi'ccöbixymang ymu'n. E je' jadu'n anajty ycapxy nej je ama'y tza'ñ ycapxy. ¹² Je mimetzpi ca'oy'iyujc ymiid ane'min huidibi je jayijpi ca'oy'iyujc ti ymöyii. Je mimetzpi ca'oy'iyujc jadu'n ane'my co je poj naaxhuiñ etz je naaxhuiñyäjy huen ojadajtcixy huindzigiiygixy je jayijp'atyp i ca'oy'iyujc huidibi anajty je chaachi'au ti chögy.

¹³ Nañ jadu'n ooy anajty tijaty mijhuinma'ñ tuñ, ixti jiiñ yajcödigiiyb tzajpcixy, yajcäy naaxcixy ma jäy ajcxy yhuinduu. ¹⁴ E miid je mijhuinma'ñ huidibi je mimetzpi ca'oy'iyujc ytuñ ma je jayijpi ca'oy'iyujc yhuinduu, chi je' huin'iiñ huidijaty ajcxy tzinaayb naaxhuiñ. Nañ jadu'n je' pidacy y'ane'min co yajniogjtútcixipy je ca'oy'iyujc huidibi anajty tzachijip miid espada, e ca' y'ögy, jadu'n anajty jactzinäy. ¹⁵ Je mimetzpi ca'oy'iyujc yajmic'ajtmoy co yajjugy'adip je tzaadzech tiibi anajty yajniogjtútcixy, jigix je' ycapxipy etz nañ jadu'n jigix je' ane'min pidägipy co yaj'öctähuipy pinjaty ca' y'ojadadyii. ¹⁶ Chi je mimetzpi ca'oy'iyujc ane'my yi pi'ctijc, mij'anäctijc, mijjäydijc, comeeñydijc, ayooobitijc, tumbidijc, midumbidijc etz jac pinjaty co huen ajcxy tiy'ajt iixpejt jadu'n pidaaccixy ma ajcxy y'a'oygi', o pen ca', ma yhuimboc. ¹⁷ Jadu'n ytuñ jigix ni ca'p anajty pin huaad ti juy toogy, pen ca' je' ajcxy ymiid je ca'oy'iyujc tiy'ajt y'ixpejt, o yxii, o je' yxii ñinúmero.

¹⁸ Jadayaabi ayuc chojcpy ixpijcin, pinjaty huinjihuuyb jëbi mihuinma'ñybaady ti número je ca'oy'iyujc miid. Je' je' je número huidibi tüg jäy miidity. Je jäy ñinúmero hue' je' tudujc migo'px jatugipx tudujc.

14

Je nimigo'px jahuixchiguipx milbi yëydijc ajcxy y'iy

¹ Chi jada' nhuin'ixyich cumäyoty je Dios y'ung, je Cordero, anajty ytinäy ma je cögop huidi yxii Sión. Ymiid anajty migo'px jahuixchiguipx madaax mil jäy huidibi anajty ajcxy miid cojay ma yhuimboc je Dios y'ung yxii, etz yi' yTeedy yxii, je Dios Teedy. ² Nhinmidooyich tüg ayuc chooñ tzajpjoty, jadu'n nmidooyich nej mijniñ y'a'ich, nej enee yjidity. Hue' je' anajty nmidooyich nej mayjäy y'arpa yajcoogixy. ³ Ooy anajty ajcxy iiigixy tüg iy jemybi ma je mij'ane'mdac yhuinduu, ma je midaaxpi iyujc

jugy'ajtm#d#p#i yhuinduu, nañ jadu'n ma je mijj#y#y ajcxy yhuinduu. Jac ni pin je' anajty ca' huaad ixp#cy je iy, j#y#i ajcxy je huixch#gu#p#x midaax milbi j#b#i ixp#jcc#xy je iy, je hu#d#i#b#i ajcxy Dios ti yhuin'ixy#i etz ti yajn#dz#z#gy ya naaxhuiñ. ⁴Jada je' ajcxy hu#d#i#b#i ca' ajcxy mi#gapxt#igooy#g#ixy t#oxy#j#y#d#j#j#c, hu#dz# tud#gy ajcxy yjot yhuinma'ñ mi#d#i#y, ca' ajcxy pi#jcc#xy. E ypan#cxyp ajcxy je Dios y'ung, je Cordero, oy tim ma'amy ñ#cx#y. Yi' ajcxy je jay#j#p'atyp#i j#y#y ya naaxhuiñ hu#d#i#b#i Dios ti yjuyb#dz#i#my ma anajty ijtc#xy codoog#y# mi#d#y#p#oc#y#y#i. Jadu'n ajcxy nipaady ma Dios Teedy etz ma je' y'ung, je Cordero, nej je tim jay#j#p#i je almas ajcxy hu#d#i#b#i ti yajp#dz#i#my ya naaxhuiñ. ⁵Ni ti an#i#i ti ycayajpaady ma je' ajcxy. Com ca' ajcxy tiboc#y# mi#d#i#y, ca' ti x#hu#in ajcxy mi#d#i#y ma Dios y'ane'mdac.

Je nidug#i#gp#i #ngeles ajcxy y'ayuc yti#y'ajt

⁶Chi nhuin'ijxy#ch jad#g# #ngel yqueec-hu#d#i#y#y cuptzajp, e ym#d# anajty Dios yti#y'ajt jemy#i oy#i hu#d#i#b#i ijtp huin#x#i#i. Hue' je' yajcapxhu#cx#p ma hu#d#i#b#i anajty ajcxy tz#naay#g#xp naaxhuiñ, hu#d#i#y#y naci#n, huen hu#d#i#b#i j#y#i#y, hu#d#i#b#i capxp huen hu#d#i#b#i ayuc#y, hu#d#i#b#i tz#naay#b ma huen hu#d#i#b#i cajp#y. ⁷E je #ngel ym#n#a'ñ anajty janch m#ic:

—Tz#i#g#y#g#ix Dios, huin'#g#ix huinyaa#cx#ix c#may#g#ix Dios. Ti paady je x#i#i je hor#i# m#i#n#a Dios ti#y#d#n#a'ñ yajt#i#g#o#y#a'ñ y#i' ajcxy hu#d#i#b#i j#b#ic tumb. Ojadajtc#ix je hu#d#i#b#i yaj'oy#i#y je tzajp etz je naax, je mejy etz majaty n#i# ym#ux#y.

⁸Co je mi#d#g#p#i #ngel ycapxtaay, chi je mi#metz#p#i #ngel ym#n#a'ñ:

—Ti ym#ic'ajt yti#goyd#y#y je Babilonia je mi#j#p#i cajp. Yi Babilonia j#y#y ti yajhuinma'ñy#d#i#goyd#y#y je naaxhuiñj#y#y mi#d#y#j#b#ic-huinma'ñ, paady y#i Babilonia j#y#y ayo'n mi#d#i#y#y cham, com je Dios ti ymi#j#otm#tt#y#i#i ajcxy. Jadu'n Babilonia nipaady nej t#g# t#oxy#j#y#y hu#d#i#b#i huin'#i#mb y#y#d#i#j#t#j#c mi#d#y# an#i#i etz jocn#i#i.

⁹⁻¹⁰Co je mi#metz#p#i #ngel ycapxtay, chi je mi#d#ug#i#gp#i #ngel ym#n#a'ñ janch m#ic:

—Pen pinjaty hu#d#z#i#g#i#y#b yajmi#j'ajt#p je ca'oy'iyujc etz je ñ#gojtuut#in etz nañ jadu'n c#b#i#jcc#xy je ca'oy'iyujc yti#y'ajt y'ijxpejt ma yhuimboc o ma yci', hue' Dios tzaachytun#i#b y#i jadu'm#b#i j#y#y ajcxy mi#ct#gy, ypaad#p ajcxy Dios chip y'ejc#in. Tim jadu'n nipaady nej j#h#u#i#y Dios yaj'#g#y#i#i ajcxy je vino n#i# hu#d#i#b#i y#i' ti ni'ix#i#y. Dios ti ni'ix#i#y je it ma ajcxy ayo'n pada'ñ, tim jadu'n nipaady nej je tasi ma Dios yvinon#i#i ijtp. Chi je' ajcxy ayo'n paad#p#y ma ytoy je mi#j#i#n mi#d#y# azufre ma je Dios y'#ngeles yhuinduu etz je Dios y'ung, je Cordero, yhuinduu. ¹¹Je j#n#joc hu#d#i#b#i anajty p#dz#i#mb ma anajty je mayj#y#y ayo'n paatc#xy, p#dz#i#m#p je' huin#x#i#i huin#ti#empo. E ni p#oc#x#in ycaca'ty x#i#m tzuum mi#d#y# je pinjaty anajty hu#d#z#i#g#i#y#b pa't#j#h#u#i#y#b je ca'oy'iyujc etz mi#d#y# ahu#i#nax, o pen yc#b#i#j#c#p#y anajty je ca'oy'iyujc yx#i#i ycojay#i#y ma yhuimboc o ma yci'. ¹²Com Dios chaachytunamyb je j#y#y ajcxy hu#d#i#b#i ijtp mi#d#y# je ca'oy'iyujc, paady yc#x#p cop#cy co y#i j#y#y ajcxy hu#d#i#b#i ijtp mi#d#y# Dios huen cuydung#ixy yajxon Dios y'ane'm#i#n yc#t#uj#c#in etz huen mi#b#i#jcc#xy mi#j#p#i#daacc#xy tud#gy Jes#s, etz nañ jadu'n yajtung#ixy mecxtuj#c#in ma ajcxy chinaay#in.

¹³Nmi#d#o#h#u#i#ch t#g# ayuc tzajpjoty chooñ xyñ#m#y#i#ch anajty:

—Coyaj jada ayuc: “Jadachambi etz jacn#cx#p#i x#i#i tiempo, jotcu#j# ajcxy hu#d#i#jaty #cc#ixp co mi#b#i#jcc#xy je Hu#d#z#in Jes#s.” Je Esp#i#ritu Santo ym#n#a'ñ co jadu'n tunamb jadamb, p#oc#x#n#p ajcxy nej ytung#ixy, e co ajcxy yj#d#i#p#y tzajpjoty, chi ajcxy nejhu#i#hu#p je' ajcxy tzajpjoty tz#naay#b#i jadu'n nej je mi#b#i#j#c#p#i ajcxy anajty oy#i#i ti tung#ixy.

Co Jes#s anajty miñ ti#y#duñ tzaachytuñ j#b#ic#j#y#d#j#c

¹⁴Chi jada' nhuin'ijxy#ch t#g# joc janch poob. E ma je joc n#ic#x# iñ#y#y t#g# yqu#x#i#gy nej je j#y#y hu#d#i#b#i tzoon tzajpjoty (je Cristo). Je' ym#d# anajty ma ycohuajc t#g# corona ac oori, e ma yci' mi#d#i#y#y t#g# hoz janch j#j#p#i. ¹⁵E ypi#dz#i#my ma je Dios chinaydac jad#g# #ngel, je' tzachmi#y#xy anajty janch m#ic je hu#d#i#b#i anajty iñ#aay#b jocn#i#g#ixy, ym#n#a'ñ:

—Pi#d#g#y#i# m#hoz, e yajp#i#d#i#g#y#i# cosecha, com ti paady je x#i#i je hor#i# etz je cosecha ti chamni j#i#y#y naaxhuiñ.

¹⁶ Huin'it je' pidacy je' yhoz ya naaxhuiñ, je huidibi anajty iñaayb jocnigixy, chi ya naaxhuiñ yajpidigy je y cosecha.

¹⁷ Nañ tim jadu'n huin'it jadüg ángel ypidzimy ma je Dios chinaydac jiiby tzajpjoty. Nañ jadu'n je' anajty muidity yhoz janch jipp. ¹⁸ Chi jadüg ángel ypidzimy ma je Dios ojadajttac huidibi anajty cõtujc muid ma je jin. Chi yaaxi janch mic je huidibi anajty je' yhoz janch jippi muid, chi nimay:

—Pidäg yi mhoz janch jippi ma yi muuxycha'm cosecha huidibi yajpatp jiiby naaxhuiñ, com ti ooy chamni.

¹⁹ Chi je ángel yajnaxxy je' yhoz naaxhuiñ, chi yajpidigy je camuuxycha'm cosecha, chi tüg'itay yajnigidacy ma huaad yajhuinmxcy. Hue' je' yhuimbizimy co je' je' je mij ayo'n je miztaachypi huidibi Dios yquexamyb muid jäy ajcxy ypocy ycipi. ²⁰ Je camuuxycha'm hue' je' oy yajhuinmxcy Jerusalén cajppa'. Ma anajty ti y'ocnidacpi ypidzimy ooy ni'py janch com, ycoody mabaad je cohuay ajcxy muidity yfreno, e ymijhuin'ajtin hue' anajty muidity tugig migo'px kilómetro.

15

Yi ángeles ajcxy muid je huixtucnajxpi ayo'n

¹ Huin'it nhuin'ijxyich jadüg tiy'ajt ijxpejt janch mippi tzajpjoty, e janch oy huinmaayni. Huixtuc ángeles anajty muidity ci'am je huixtucpi tzaachypi ayo'n huidi cogixiyñip, e muid jadu'n ycixa'ñ ytigoya'ñ Dios chip y'ejin.

² E nhuin'ijxyich jadu'n nej tüg mejy ac vidrio, e je vidrio mihuididii jin. E jim anajty je jäy ajcxy huidijaty madac co ca' huindzigiy anajty je ca'oy'iyujc etz je' y'ahuinax, je huidijaty ca' ajcxy cöbijci je ca'oy'iyujc yxiñ ñinúmero. E jim anajty ajcxy ytinaaygixy nigixy ma je mejy ac vidrio huidibi janch adicxp ajajp anajty, ymuid ajcxy je arpas huidibi ajcxy Dios mooyi. ³ Ooy anajty igixy je Moisés y'iy, je Dios ytumbi etz nañ jadu'n anajty igixy je Dios y'ung, je Cordero, y'iy huidibi minamb:

Mij ooy, etz janch mijhuinma'ñ huidibi miich ti mduñ. Huindzin, miich Dios huidibi jac mic'ajt muidip ca'ydi jac pin. Janch tudägy miich mnii'aa mdu'aa. Miich rey'ajtp huindu'myñaaxhuiñ huinixii huin tiempo.

⁴ ¿Pin miich xyca'octzigihuamb, Huindzin? ¿Pin miich xyca'occömayaanip mxii? Tug'óciy naaxhuiñy jäy xyajmij'adipy xyhuindzigihuipy, com miich naydügpajc je huätzpi Dios, com miich nyaj'ixp mgötujcin co ytudägyty.

⁵ Co jadu'n yajti, chi n'ijxyich co y'ahuaach je Dios y'it jiiby ma Dios ytijc huidibi yajpatp tzajpjoty, ma y'ity je tzaa ma yjaybetyty Dios ycõtujcin. ⁶ E ma je Dios yajhuindzigiy yajpa'tjihuiy, jiiby ypidzimy huixtuc ángeles. Ymuid anajty ajcxy yci'am huixtuc ayo'n tzaachypi. Hue' anajty ajcxy yxoxity muid huit janch oybi janch huätzpi, e janch adicxp ajajp anajty. Ymuid anajty ajcxy oorihuñ mabaad ycaachyjipp. ⁷ Nidüg je midaaxpi iyujc jugy'ajtmuidpi moy je huixtucpi y'ángeles huixtuc tasi ac tim oori, janch ujtz je tasi muid je Dios chip y'ejin. ⁸ E je it ma Dios yajhuindzigiy yajpa'tjihuiy yajpa'tjihuiy ujtztay je' muid je jinjoc huidibi jadu'n ñipaty nej je Dios y'oy'ajtin etz Dios ymic'ajtin. E ni pin anajty huaad ca' jiiby ytigiy ma je Dios ytijc jiiby tzajpjoty, ixti cooni je' ycixtahuipy je huixtucpi ayo'n, je tzaachypi huidibi je huixtucpi ángeles ajcxy ymuid.

16

Je tasi huidibi ujtz muid ayo'n tzaachypi

¹ Chi nmidooyich tüg ayuc choon ma Dios ytijc jiiby tzajpjoty, nimay anajty janch mic je Dios y'ángeles nihuixtucpi:

—Nix ajcxy yajyojctuatcix jiiby naaxhuiñ yi huixtucpi tasi huidibi ujtzyty muid Dios chip y'ejin.

² Chi ñicxy je midügpi y'ánel, chi je' ytasi yajtemduty jii by naaxhuiñ ujtz mïd may'ayo'n. E tüg'óciy je mayjäy huídibi anajty ajcxy mïd ma yhuimboc je ca'oy'iyujc ytiy'ajt, pinjaty anajty je ñigojtuutin huindzigiyip pa'tjihuiyip, chi je' ajcxy ypaati ñibidzim tüg nibüdz janch jibicpi, e huídibi janch pijcp.

³ Je mimetzpi y'ánel yajyojctuty je' ytasi huídibi anajty ujtz mïd ayo'n mejyhuingíxy. Chi je meji y'ahuimbijty ni'py, jadu'n nej jihuiy ócpi ñi'py. E huídijaty iyujc jii by tzinaayb mejyoty, cijx je' y'öctäy.

⁴ Je midügpi y'ánel yajyojctuty je' ytasi huídibi anajty ujtz mïd may'ayo'n maajaty je mijñi, etz maajaty ni ymuxy, nañ jadu'n ac ñi'py je' y'ahuimbijttay. ⁵ Chi nmidooyich co je ánel ymina'ñ huídibi ane'mb je ni:

—Huindzin Dios, tudägy mduñ co ti mdiyduñ je naaxhuiñyäy ajcxy mïd ypocy ycixpi, e jadu'n ti mguexy mij ayo'n ya naaxhuiñ, Huindzin Dios, janchypí huätzpi miich, huídibi ijtnaayb etz ti m'ijtnäy. ⁶ Com je naaxhuiñyäy ajcxy tundigooy co ajcxy teemi yojci je mibijcpidijc ñi'py, je huídibi mhuin'ijx, je huídibi ajcxy miich m'ayuc najtzcapxiyb anajty. Paady ycixp miich je ni huídibi yi naaxhuiñyäy y'uuccixyp, ti myaj'ahuimbity ni'py, com jadu'n ajcxy mihuaadity je tzaachypí mïd ajcxy ypocy ycixpi.

⁷ Nmidooyich co pinjaty ma je it ma yajhuindzigíy Dios, ymina'ñ:

—Janch jadu'n, Huindzin Dios, huídibi tüg'óciy mic'ajt mïd, mïd mdiy'ajt etz mïd mdudägy'ajtin, ti mdiyduñ je naaxhuiñyäy ajcxy mïd ypocy ycixpi.

⁸ Je mimadaaxpi Dios y'ánel yajyojctuty ma je xii je' ytasi huídibi anajty ujtz mïd Dios chip y'ejcín. Chi je xii yajmoy ymic'ajt co jäy nögiib mïd je' yjñ. ⁹ E tüg'óciy jäy ajcxy yxidzaydaayi janch mic. E ni ca' ajcxy yhuinma'ñ yajtigajch, ni ca'ojadajtcixy ni ca' cömaygixy Dios. Nigi ajcxy ooy jibic Dios nigapxy ni'ojiiy, je Dios huídibi ane'mdaayb tüg'óciy ayo'n mïd ymic'ajt.

¹⁰ Je mimigooxpi y'ánel yajtemduty je ytasi, huídibi anajty ujtz mïd Dios chip y'ejcín, ma je ca'oy'iyujc y'ane'my etz ma tüg'óciy it lugar ma je ca'oy'iyujc y'ane'mín, e huin'it oy ycoodziygidactäy. Yi jäy ajcxy ooy ytoodz oc'adzützmúccixni mïd je ayo'n tiibi anajty ytuñyii yjadyii. ¹¹ Per ni jadu'n ajcxy ca'ixmajch je jibicpi huídibi anajty ajcxy ytumyb. Nigi ajcxy ooy oyñinej ycapxcixy etz ni'ojiiygixy Dios tzajpjotypi mïd je jübii pa'mii etz je nibüdz ycixpi.

¹² Je midudujcpi y'ánel yajtemduty je ytasi huídibi anajty ujtz mïd Dios chip y'ejcín ma je Eufrates mijñi. Chi je mijñi ytiich jigix jébi ajcxy je reydiyc ñaxy huídibi ajcxy tzoomb xiibidzimy'amy.

¹³ Chi huin'ijxyich co ypidzimy ma je ama'y tza'ñ y'ahuac, etz ma je ca'oy'iyujc y'ahuac, etz ma je profeta falso y'ahuac ypidzimy tugüg ca'oybi. E je tugügpi ca'oybi jadu'n anajty yquëxigy nej tugüg Tuc. ¹⁴ E je tugügpi Tuc hue' ajcxy ca'oybi ymïd, e tungixy anajty mijhuinma'ñ mïd je mujcu' ymic'ajt. E oy ajcxy huoomucy huídijaty anajty rey'ajtp huindu'my naaxhuiñ, jigix je' ajcxy chiptúngixipy mïd je mijpi Dios huídibi tüg'óciy mic'ajt mïd, co anajty je xii je tiempo yhuaad'ajtni huídibi Dios ti yajnigödugiy.

¹⁵ Jadu'n Dios ymina'ñ:

—Cuenditungix ich n'ayuc. Ameech nhuimbida'ñich naaxhuiñ jadu'n nej meetzpi ameech nicxy meech tijaty. Paady ycixp jotcujc pinjaty ni'ixi xy'ahuixpich, je huídibi ypocy ti ymecxyii, e tudägy'ajtin ti paady ma ich jigix ca' jadu'n paadip nej tüg jäy huídibi yhuít ti meechyii, e jadu'n je' yhui'my nihuädz, e tzo'ydu'n jihuiy co jäy yhuindixyii.

¹⁶ Chi je tugügpi ca'oybi huoomujctay ajcxy je reydiyc ma tüg it huídibi yxi Hebreo'amy Armegeción.

¹⁷ Je mihuixtujcpi angel yajyojctuty je' ytasi jim pojoty, e ma je it ma ajcxy huindzigíy Dios etz ma je' y'ane'mdac tzajpjoty, jii by tüg ayuc choñ janch micpi ymina'ñ anajty:

—Ti ytuñyii yjadyii.

¹⁸ Huin'it ooy yjajti huidzuc, ne'min micpi etz jidijtin, ooy naax yücxy müd tüg ujx janch micpi, niminaabi jadu'n ycajadyii maabi jäy chinay'ijtigixy naaxhuiñ. ¹⁹ Chi je mij ciudad, je Jerusalén, oy yhuäcxy tugüg picy, nañ jadu'n je may ciudad huidibi huindu'myñaaxhuiñ, cijx ymijähuidäy. Chi Dios jäymejtzcoty je Babilonia cajp nej je jäy ajcxy jim ytundigooygixy, e chi quejxy may ayo'n jim müd chip y'ejcín ycixpi. ²⁰ Tüg'óciy je naax mejy'agujcpi ytigoyday. Etz tüg'óciy tungop naaxhuiñgixy cijx je' ytigoyday. ²¹ Nañ jadu'n ooy ycäy chooñ tzajpjoty eneedütz mijjatypí majaty jäy ajcxy, janch jempxy anajty je eneedütz, tügjatypí huixchigüipxy kilo. Chi jäy ajcxy ooy oyñinej nigapxy ni'ojñi je Dios müd je eneedütz ycixpi, com ooy je' mij chachajti je ayo'n je castigi.

17

Je töxyjäy jibictzinaaybi chaachypí ycastigi

¹ Nidüg je huixtujcpi ángeles huidibi anajty ajcxy müd je huixtujcpi ytasí ymiiñ. Chi ajcxy ymiydacy müd ñch, xyñimaaygixich:

—Min yam, miiñ nyajni'ixiy je tzaachypí huidibi ypadamyb je töxyjäy pocytumbi, huidibi ñnaayb mejyhuingixy. ² Je reydiyc ya naaxhuiñ ti ooy ytundigooygixy müd jada töxyjäy, e je naaxhuiñjäy ajcxy ti ooy huinma'ñyidigooygixy müd jada töxyjäy ypocytuní huinma'ñ, jadu'n nej jihuiy ajcxy ooy ti ymúucigixy.

³ E Dios yjihuiñ ymic'ajt xyajcumäyich e cumäyjoty xyajnicxyich je ángel mijtigüduum. E jim n'ijxyich tüg töxyjäy yaj'ñäy tüg ca'oy'iyujc huidibi ycolor tzaptz, e janch niducy müd pinjaty yxñi cojaayip huidibi yajjotma'tp Dios, e ymüd anajty huixtujc ycohuajc etz majc ymu'n. ⁴ Je töxyjäy hue' anajty yxojx müdity müd huit janch oyjatypí, ycolor ucy etz tzaptz, ooy anajty yaj'oyguëxigy müd oori, müd pi'ctzaa janch oybi etz perla. Ymüd anajty ma yci' tüg tasi ac tim oori janch ujtz je' anajty müd jibic-huinma'ñ huidibi ca' y'oyjäygidaacnity, huidibi pocytuní huinma'ñ müd. ⁵ E ymüd anajty cojaay tüg xñi ma yhuimboc huidibi ca' pin huinjihuiy. Je letra jadu'n ymína'ñ: “Je mijpi Babilonia, huidibi nigop'ajtip pocytuní huinma'ñ etz tüg'óciy tijaty ca' y'oyjäygidaacnity ya naaxhuiñ.” ⁶ Mic'amy ñch oy nhuinma'ñ nyajmiñ nyajmech co je töxyjäy hue' je' anajty ti yaj'o'ccixy je huidibi ajcxy mibijcp Dios etz huidibi ajcxy Jesús yjäy'ajtip, e jadu'n nipaady nej jihuiy je töxyjäy ti ooy ymügyii müd je mibijcpidijc ñi'py. Co jadu'n nhuin'ijxyich, chi ooy ngijxy ngüejtyich njihuiy nhuinmaayich. ⁷ Chi je ángel xyñimaayich:

—¿Nej co mgixy mgüety? ñch miich nyajnimähuiy nej yhuimbidzimy huidibi ca' pin huinjihuiy ma yí töxyjäy etz ma yí ca'oy'iyujc huidibi yaj'ñäy, huidibi ycohuajc huixtujc müd etz majc ymu'n. ⁸ Yi ca'oy'iyujc huidibi ti m'ixy, je' yí tñbi chinäy e cham ca'p je' ma. Chi ypidzimipy ayoodactuuyb, jayijp ma anajty ca'ni nicxy y'ayoy ytigoy tücci'yi. E je jäy ajcxy huidijaty tzinaayb naaxhuiñ, e ca'p yxñi y'ity cojaay ma je jugy'ajt libro huidibi oyñi ca'ni anajty naaxhuiñybi chondägy. Ooy je' ajcxy huinmáaygixipy jihuiygyixipy co ijxcixipy je ca'oy'iyujc huidibi jecyip ti y'octzinaaybi, e cham ca' je' ma, e chi jada' jadüg'oc yhuimbidañ.

⁹ Ya ii tigati pin jëbi huinjihuiy je huixtujcpi cohuajc, je' je' je huixtujcpi copjot ma je cajp y'ity. E je cajp jadu'n je' nipaady nej jada töxyjäy pocytumbi. ¹⁰ Je huixtujcpi cop jadu'n ajcxy nej huixtujcpi rey. Ma je huixtujcpi rey migoox je' ajcxy tñbi ymic'ajt ytigooygixy. Nidüg je' cham y'ane'my. Je jadügpi ca'ni je' ymiiñ. E co je' ymiinipy je huidibi cogixiyb, ca'p je' mijcajee yhuäcxibipy. ¹¹ Je ca'oy'iyujc huidibi jecyip tzinay, e cham ca' ma, je' je' je miductujcpi rey, oy je' yjajëjity nidüg ma je nihuixtujcpi rey. Huin'it je' ñicxnipy ayooobi jottigooybi tücci'yi ayoodactuuby.

¹² Je majcpi mu'n tñbi m'ixy, je' je' je majcpi rey huidibi ca'ni ajcxy ytigüygixy ane'mbi. E cidigihuib ajcxy ycötujcín co yrey'ájtciixipy tüg hora quipxy müd je ca'oy'iyujc. ¹³ Jada majcpi rey ajcxy tú'ciy ajcxy y'ijtcixy, tú'ciy ajcxy yhuinma'ñ, e yegipy ajcxy y'ane'min

ycötujcín ma je ca'oy'iyujc. ¹⁴ Tziptuunip ajcxy miid je Dios y'ung, je Cordero. E je Cordero ymimadactáhuipy je' je majcpi rey ajcxy. Com je' je' tügpajc Huindzinip ma pin janaydíjip huindzin. Je' je' tügpajc reyip jac mic'ajt miidpi ma je reydijc ajcxy. E pinjaty Cristo miid y'ity, Dios je' ti huin'ixy, e tudägy je' panicxy Dios y'ung.

¹⁵ Nañ jadu'n je ángel xyñimaayich:

—Yi mejy tiibi m'ixy ma je töxyjäy pocytumbi iñäy, hue' je' jadu'n nipaady nej maygajp, nej mayñación ma mayjäy chinaygixy huidibi capxcixp canaagnax ayuc. ¹⁶ Je majcpi mu'n tiibi m'ixy ma je ca'oy'iyujc, je' ajcxy ca'ixa'nip catzoga'nip je töxyjäy pocytumbi. Chi ajcxy ix'ijxnip je töxyjäy pocytumbi, yajhui'mipy ajcxy nihuädz. Chi ajcxy je töxyjäy pocytumbi ñinix tzu'tzipy, e nöccixipy miid jin. ¹⁷ Dios ti pidägy ma ajcxy y'aa yjot huen tungixy nej Dios tzocy, miid co anajty ti pidaaccixy tú'ciy yhuinma'ñ. E cötujc möhuaangixy ane'min möhuaangixy co yrey'adipy je ca'oy'iyujc, ixti cooni yajcuydundáhuipy je ayuc huidibi Dios anajty ti capxy. ¹⁸ Je töxyjäy tiibi mhuin'ixy, je' je' je mij cajp huidibi ane'mdaayb je reydijc ajcxy huindu'myñaaxhuiñ.

18

Babilonia cajp oy yhuindigooy

¹ Co jada jadu'n yjajti, chi huin'ixyich jadüg ángel ycidägy naaxhuiñgixy, chooñ tzajpjoty miid ymij'ane'min ymijcötujcín, e ooy je naax yaj'aniiy miid je ytücxin yjajin.

² Chi je ángel ooy mic yaaxqueecy ymina'ñ anajty:

—Ti ymic'ajt ytigooy, ti ymic'ajt ytigooy je mijpi Babilonia cajp, e hue' ti y'ahuimbity mujcu' chinaydac, etz canaagnaxpi ca'oybi ymaadac chinaydac, etz ti y'ahuimbity joonmaadac joondzinaaydac, je joon ajcxy huidibi ca' yhuädzity, huidibi ca' y'oyjäygidacnity.

³ Com ti je mayjäy huidibi tzinaayb ma tüg'óciy nación yhuinma'ñydigooygixy miid je Babilonia yjibic-huinma'ñ pocytunii huinma'ñ. Ti je reydijc huidibi ane'mb ya naaxhuiñ miid ytundigooygixy je Babilonia. Nañ jadu'n je ajuybi adoocpi ajcxy, huidibi ya naaxhuiñ yajpatcixy, ti oy ymeeñybatcixy miid je Babilonia pocytunii ñegocio. Je Babilonia jadu'n yi' nej tüg töxyjäy jibic-huinma'ñ miidpi.

⁴ Chi nmidooyich jadüg ayuc chooñ tzajpjoty, e ymina'ñ anajty:

—Pidzimgix ma yijibi cajp com ich miich ajcxy njé'ajtpy, jigix miich ajcxy ca' m'aminmugipy ma yi' ajcxy ypocy, e ni xycapaadip miich ajcxy je ayo'n tzaachypi huidibi Dios yquexamyb ma je Babilonia cajpjäy. ⁵ Yi jadu'mbi cajpjäy ypocy ti oy mayiyñi e Dios yi' ajcxy tzachytunib miid ajcxy ypocy ycixpi. Dios yjäymejchp yi' yjibic-huinma'ñ ajcxy huidibi ti tungixy. ⁶ Dios ymoyhuimbidity je tzaachypi yi Babilonia cajpjäy, jadu'n nej ajcxy yi' je' tzaachytuñ Dios yjäy ajcxy, Dios ymoyhuimbidity je Babilonia cajp tzaachypi mejtz jadu'ni ca'ydi jadu'n nej yi' ti yecy. ⁷ Mo' yi Babilonia cajp yi tzaachypi ayo'n, tim jadu'n nej yi' ti ñaymöyii ma yi chinaayin etz ñayjihuiyi amij agix. Yi' ymina'ñ jotjoty huinma'ñyoty: “Ich mij'ane'mbi ich. Ca' nyajpaadyich nej tüg co'ögytöxyjäy miidity tajin mayin. Ni nga'ixipyich jiiyin yaaxin.” ⁸ Miid je' ycixpi tügxiiyi ymiinipy je mij'ayo'n o'cin, tajin mayin, jiiyin yaaxin etz yuuba'm ma je Babilonia cajp. Chi ninöghuipy je Babilonia cajp miid jin. Com yi Huindzin Dios ooy yi' ymijity, e yi' ti yajpocycäy yi Babilonia cajp, huidibi nipatp nej tüg töxyjäy pocytumbi.

⁹ Je reydijc ya naaxhuiñ huidibi jibic-huinma'ñ pocytunii huinma'ñ tungixp quipxy miid je Babilonia jäy, chi ajcxy ytájcixipy ymáygixipy yjiiygixipy yáaxcixipy co anajty ijxcixyp je Babilonia cajp jinjoty co anajty ytooybicy. ¹⁰ Jiguem ajcxy yjacmij'ijxcixipy miid co anajty chigiiygixy co páatcixipy ayo'n quipxy miid Babilonia, e ymináangixipy:

—¡Ay, miich Babilonia mij cajp, huidibi ooy mgapxpaadyity, ooy mmijity, ooy mmic'ajt miidity! Per janch tim tüg jaxigy ti xyñimiñ je' ayo'n huidibi Dios ti quexy miid mbocy ycixpi.

11 Je ajuybidijc adoocpidijc huídibi ajcxy naaxhuiñ jíygiixipy yáaxcixipy ajcxy miid je Babilonia cajp ycixpi, com ca'p anajty pin juuyip ajcxy yjuy ytoocy. 12-13 Je ajuybidijc adoocpidijc ajcxy ymiid oori, plata, tzaa oyjatypi, perla oyjatypi, lino huit oyjatypi, sedi huit oyjatypi, rey yhuit, huit color tzaptzpi, nañ jadu'n ymiid ajcxy canaagnaxpi quipy huídibi oyjaty xuucp, pajc vaso, quipy vaso oyjatypi, cobre vaso, pujx vaso, marmol vaso. Ymiid ajcxy canela, etz tijaty ooy oy xuucin miidity, poom, mirra, perfume, vino aceite, trigo tim, iyujc animal huídibi tziimy yajyöyb, cöbixy, cohuay, carreti, tumbi huídibi codoogiyip, etz jacjadyii jäy juugypí. 14 Je ajuybidijc adoocpidijc ajcxy ñimähuipy je Babilonia jäy ajcxy:

—¡Ca' ajcxy m'ocmüdiñ je tim tza'm huídibi ajcxy mjot yjatzojcipy, ca' ma anajty y'ocyajpatni. Ti tigoydäy miich ajcxy mjogy'ajt, je mgomeeñ'ajt, etz m'ijxin huídibi anajty miich ajcxy mmüid, ca' ma ocyajpatnip jadüg'oc!

15 Je huídijaty anajty huit ixtaayb meeñ ixtaayb, e ti ycomeeñygojcixy ma yijimbi cajpin, jiguem ajcxy yhuim'dähuiipy miid tzig'i'ñ jihui'ñ, co nañ jadu'n je tzaachypí castigi padaangixy. Yäxip ajcxy etz nidájcixipy nimáaygixipy je Babilonia cajp. 16 Chi ajcxy ymínaanipy:

—¡Ay! ¡Miich mij cajp huídibi ayo'n patp! Jadu'n miich anajty nej tüg töxyjäy huídibi xoxyip miid huit oyjatypi, huídi ycolor ucy etz tzaptz, yaj'oyguëxigy miid oori, miid pi'ctzaa oyjatypi, miid perla. 17 ¡Janch tim tüg jaxigy, janch tim tüg hori, ti ycixy miich mmijjugy'ajtin mmijcomeeñ'ajtin!

Tüg'óciy pinjaty nihuindzin'ajtp barco etz pinjaty barcojoty viajetumb, marinerotijc ajcxy etz huídibi ajcxy tumb ma je mejy, ti je' ajcxy yhuim'daaygixy jiguëgy. 18 Co ajcxy ijxy nej anajty ytoy yjocy je mij ciudad, chi ajcxy ymíañ:

—¿Huídibi cajp jada' ji jadu'nip nej jada anajty jadayaabi mij cajp?

19 Chi ajcxy ooy naax ñayajcöhuoogiiyi miid jotmay, cham ooy yaaxcixy, ytajcixy ymaygixy, e mic chachmínaanixy:

—¡Ay! ¡Je mijpi oybi cajp huídibi ayo'n patp, ma je tüg'óciy pinjaty anajty ymiid barco ma mejy, ti ycomeeñygojcixy anajty miid je'! ¡Janch tim tüg mij jaxigy, tim tüg hori, ti yhuindigoydäy miich mmijjugy'ajtin mgomeeñ'ajtin!

20 Jotcugiiygix miid je Babilonia cajp ycixpi, miich tzajpjoty tzinaayb ajcxy, etz miich ajcxy huídibi Dios xyhuin'ijx co jébi m'apóstol'ajtcixy, etz nañ jadu'n miich ajcxy huídibi najtzcapxiy Dios y'ayuc ytiy'ajt, etz nañ jadu'n pinjaty ijtp ma Dios. Com co Dios ti yajpocycäy Babilonia cajp, je' yi' ti yaj'adigach jadu'n nej ajcxy xymüddundigoy.

21 Huin'it tüg ángel janch mic'ajtmüdpí conigy tüg tzaa, jadu'n nej tüg molino paandzaa mijpi, chi je' cogädziy mejyjoty, e ymíañ:

—Nej jada tzaa ti ytigooyin, nañ tim jadu'n je mijpi oybi Babilonia cajp ytigoydähuiipy. E janch ni mína pin cajac'ixipy. 22 E ni camina ajcxy mgajac'mídohuipy jim Babilonia co pin arpí coob etz flauta yajxuuxp trompeti yajxuuxp mijnií mijtu'. E ca' jacyajpaadip pinjaty ti dung ii jajtp, ti oficio jajtp, ni mgamídohuipy je molino paandzaa ñe'mín. 23 Ni mína ti ycatícxipy jadüg'oc ma je Babilonia cajp. Ni mína ycajamídohuipy jadüg'oc je xii je xondaacin huídibi jajtip co jäy ypicy. Oy je Babilonia ajuuybi y'adoocpi ajcxy anajty ooy yjamícjäyity ya naaxhuiñ, e ti ajcxy huin'üñ mayñaxhuiñyjäy miid ajcxy brujerías.

24 Jim ma je Babilonia cajp jim yajpaady je' ajcxy ñi'py je tübi ajcxy Dios y'ayuc najtzcapxiyi, je huídibi ajcxy huin'ixyip ma Dios etz tüg'óciy mibijcpídjic tübi yaj'ögypaatcixy naaxhuiñgixy.

19

1 Co jadu'n yjajti, chi nmídooyich may'ayuc micpi co mayjäy ajcxy ooy ycapxcixy ymíydaaccixy tzajpjoty, ymíañ ajcxy:

¡Aleluya! Fich ajt nDios yi' tügpajc ti xyajnidzoocim ajt n'alma. Yi' je' tügpajc mij'oy'ajt miid.

² Com janch etz tudägy Dios y'ane'min ycötujcin. Ti je' möy ycastigo je Babilonia cajp huídibi ti yajhuinma'ñydygoy je naaxhuiñyäjy müd je ycatudägy'ajtin ycixpi. Yi' je' ti yaj'adigach ma je Babilonia cajp je Dios ytumbi, huídibi yaj'ögy ajcxy, pat jim.

³ Chi ajcxy jadüg'oc ymínaanip:

—¡Aleluya! Je jünjoc huídibi jim Babilonia co ytoy je cajp, pa'ttiñihuip tzajpcíxy huinixii huínitiempo, ca' yjün ypídzip ni mína.

⁴ E je iipx madaaxpi mijjáy etz je madaaxpi iyujc, huídibi jugy'ajt müd ñaygojtinaygídaaci naaxcíxy, chi ajcxy ooy Dios ojadajty huídibi anajty ane'mb ma je mij'ane'mdac, e ymínaangixy:

—¡Jadu'n jada! ¡Aleluya!

⁵ Huin'it yajmidooy jiiby ma je Dios y'iñaydac ycötujctac tüg ayuc ymína'ñ: Huindzigíyigix íbatcix capxpatcix ích ajt nDios nidüg'óciy pinjaty tumb müd yi', pinjaty yi' tzigíyib, huen mutztijcity huen ymij'anáctijcity.

Je jotcuyc'ajtin huídibi nbadaanim co anajty Cristo yjáy nimiñ

⁶ Nmidoohuich nañ jadu'n nej jihuüy ooy mayjáy ycapxy ymíydägy, nej canaag mijñii y'aíich, nej enee micpi yjidity, ymínaangixy:

¡Aleluya! Ti y'ane'mdigíy jiiby naaxhuiñ je Huindzin Dios huídibi tügpaic mijip.

⁷ Agujc'ajtim jotcuyc'ajtim, tzoc cömaayim Dios, tzoc mooyim mij'ajt. Com ti paady je xii je tiempo mína Dios y'ung naybadáanigixp tümugáanigixp müd yi' yjáy, tim jadu'n nej jihuüy ypíga'ñ müd yi' ajcxy. Ti Cristo yjáy ñayñi'ixíyigixy, jaydēbi ñaybaatigixip ytügmújccixip müd yi', tim jadu'n nej tüg jáy ñayxoxiyii co ypíga'ñ.

⁸ Dios ti a'ixiy co Cristo yjáy ajcxy ñayxoxiyb müd yhuit oyjatypi, huídibi adíicxp ajajp. Je huit xojx oyjatypi jadu'n nipaady nej je tudägy'ajtin huídibi je mibijcpidijc ti paatcixy ma Dios.

⁹ Chi je ángel xyñímaayich:

—Jaay jada ayuc. “Jotcuyc ajcxy pinjaty huooyip ma yajhuinxíiduna'ñ Dios y'ung, je Cordero, co naydügmugáanigixy müd yi' yjáy ajcxy.”

Chi je ángel xyñímaayich:

—Jada je' Dios y'ayuc janchypi.

¹⁰ Chi ngojtinay'ihuüyich ma je ángel yhuinduu co njahuindzigíhuaañich. Chi je' xyñímaayich:

—Ca' jadu'n m'idíich. Dios ích xytumbi'ajtp jadu'n nej miich etz nej jacjadyii migügtijc huídibi mijpídaaccixp cixyjot huínijot je ayuc tiy'ajt janchypi huídibi Jesús ycapxhuäcx. Huindzigí' Dios.

Jadayaabi ayuc tiy'ajt janchypi huídibi Jesús ñidíy'ajt'ajt, yi' je' je Dios y'ayuc huídibi je profetas ajcxy ñajtzcaxíy.

Je mij'ane'mbi huídibi poobcohuay yaj'iñaaayb

¹¹ Chi nhuin'ixyich tzajp'ahuädz, chi yquëxígy tüg poobcohuay, e je pin anajty yaj'iñaaayb hue' anajty naydijyii je tudägypí je janchypi. Je huídibi tiydumb naaxhuiñyäjy müd tudägy'ajtin etz huídibi tziptumb müd tudägy'ajtin. ¹² E je' huídibi yaj'iñaaayb je poobcohuay, je' yhuin jadu'n je' nej jünnye'n, e ymíid anajty ma ycohuajc maycoroni huídibi nidíy'ajt'ajtp co yrey'aty ma tüg'óciy jáy. E je' ymíid anajty tüg xii cojaay, e je' anajty naydügpajc nejhuyb yxii ca' jac pin. ¹³ Hue' anajty yxoxyity müd huit y'uucyity müd ni'py, e je' yxii hue' anajty xii'adyii Dios y'ayuc. ¹⁴ Je ángeles ajcxy huídibi soldad'ajtp tzajpjoty ypayoyii anajty ajcxy ac poobcohuaygixpi, yxoxyity ajcxy müd sedi huit janch oybi, poobi etz huätzpi. ¹⁵ Je huídibi yaj'iñaaayb je poobcohuay, ma yi' y'ahuac ypídzimy anajty tüg espada janch jipi, e je' müd yajtzaachíhua'ñ je maynaaxhuiñyäjy. E je' ane'ma'ñ müd Dios ymic'ajt. E müd yi' y'ayuc castigi möhua'ñ je mayjáy müd ypocy ycixpi

huidibi tzinaayb ma je may it lugar ya naaxhuiñ. Yi' y'ayuc jadu'n yi' nej tüg espada janch jiji. E yi' miid'adaanip je mijpi Dios chip y'ejin, je Dios huidibi tüg'óciy mic'ajt miid. E mictägy tzaachypi castigi yega'n ma je mayñaaxhuiñjyä miid yocoy ycixpi, jadu'n je maynaaxhuiñjyä nipaady nej jihuñy Dios y'ung tenmicx uvas miid ytecy. ¹⁶ E ymiid anajty cojaay ma yhuít etz ma ypuy jadayaabi ayuc: “Reydijc ajcxy yrey. Huindzindijc ajcxy yHuindzin.”

¹⁷ Huin'it nhuin'ijxyich tüg ángel ytinäy xi'agujc, chi ooy janch mic miyaaxy tüg'óciy je joon huídijaty queec-huídijtp tzajpcujc yminañ:

—Miingix naymujctáayigix ma Dios adzuu'ibi yecy. ¹⁸ Miingix, jigix mdzúdzicixipy reydijc ajcxy ñinicx, capitán ajcxy etz micjäydijc ajcxy ñinicx, cohuay chüch etz nañ jadu'n je' ajcxy ñinicx huidibi yaj'iñaayb. Mdzúdzip tüg'óciy jäy ñinicx: tumbidijc midumbidijc, je huindzindijc, comeeñydijc etz je ayoobidijc.

¹⁹ Chi nhuin'ijxyich je ca'oy'iyujc etz je rey ajcxy huidibi yajpatp ya naaxhuiñ miid tüg'óciy ypubejtpidijc ysoldadotijc ajcxy. Nhuin'ijxyich co ti ñayyöymújcigixy co chiptunaangixy midziptzonaangixy je huidibi poobcohuay yaj'iñaayb quipxyi miid je' ypubejtpidijc ysoldadotijc ajcxy. ²⁰ Chi je ca'oy'iyujc ymachycäy quipxyi miid je profeta ca'pi yjanchity, je tiibi anajty tuñ mijhuinmañ ma je ca'oy'iyujc yhuinduu. Miid je mijhuinmañ ycixpi je profeta, ca'piy yjanchity, ti anajty ooy huin'ññ tüg'óciy je huídijaty ajcxy nayyejci co je ca'oy'iyujc ytiy'ajt iixpejt cöbijci ma yhuimboc etz co huindzigixy je ñidzejtztuutin. Jadu'n je ca'oy'iyujc etz je profeta, ca'piy yjanchity, yajcötijnajxy ajcxy ma jün ytoy miid azufre, jadu'n je jün nej tüg meyy huädz jün. ²¹ Jacjadyii jäy hue' ajcxy o'cin patcixy miid espada huidibi anajty pidzimb ma je' y'ahuac je huidibi anajty poobcohuay yaj'iñaayb. E tüg'óciy je joon etz luud huidibi ajcxy queec-huídijtp cijx je' ajcxy ytimycuuxtáayigixy ytimypejttaayigixy miid may öcpi chüch.

20

Je mil jimijtpi

¹ Huin'it nhuin'ijxyich tüg ángel ycidägy chooñ tzajpjoty mädity je ahuasti huidibi miid yaj'ahuäch je mij jut huidibi oy yciyity, ymiid anajty nañ jadu'n tüg mijcadena ma yci'. ² Jadayaabi ángel majch je ama'y tzañ huidibi yajtijp mujcu' etz Satanás, chi yajcadenitigixy, e yajhui'my mach tüg mil jimijtp. ³ Chi je ángel cötijnajxy je mujcu' ma je mij jut, chi cö'agixy. Chi tüg selli pidacy ma je mij jut aguu. Pidacy je mujcu' ma je mij jut, ca'ydi jac-huin'ññ je mayñaaxhuiñjyä, ixti cooni tüg mil jimijtp yca'pxipy. E co jadu'n anajty mil jimijtp ti ñaxy, ooy ycopicyity co yajnajtzmazihuiipy je mujcu' tzojccixy.

⁴ Chi canaag ane'mdac nhuin'ijxyich ma anajty ajcxy iñäy tiibi ajcxy patcixy cötujcin co tiydungixipy naaxhuiñjyä. Nañ jadu'n nhuin'ijxyich ajcxy y'alma huidibi anajty ajcxy ti yajyöctzujctuuatcixy miid co ajcxy capxhuächy je Dios y'ayuc ytiy'ajt huidibi Jesús ñidiy'ajt'ajt. Ca'p je' ajcxy anajty huindzigixyigixy je ca'oy'iyujc, ni je' ñidzejtztuutin. E nañ jadu'n ni ca' ajcxy cöbijci je ca'oy'iyujc ytiy'ajt ma yhuimboc ni ma yci'. Co ajcxy y'o'cy, chi yjugypigipy ajcxy jadüg'oc etz ane'mip ajcxy quipxyi miid Cristo tüg mil jimijtp. ⁵ Je jacjadyii je öcpi, huidibi ca'p mijpidacy Cristo, ca' je' ajcxy yjugypigipy, ixti cooni anajty ti ñaxy tüg mil jimijtp huin'itni. Co tüg'óciy je mibijcpidijc yjugypigipy jadüg'oc, jada je' je ogá'nibi tiempo mina öcpi ajcxy yjugypijccixy, e ca' y'oc'ó'ccixnñp jadügtecy. ⁶ Jotcujc etz huädz, ca' tibocoy mädity, je' ajcxy öcpidijc huidibi jugypigipy co Jesús yajjugypigipy yi tügpiy öcpi huidibi jayijp'adamb. Je mimetzpi o'cin ca' ni ti mic'ajt mädity ma je' ajcxy. Hue' janch ajcxy ytung'adixy huingapxi ma Dios etz Cristo. E je' ajcxy Cristo quipxy miid y'ane'mip tüg mil jimijtp.

⁷ Co anajty ti ñaxy je mil jimijtp, huin'it je Satanás yajcoguejttüdiipy ma ymach'ity. ⁸ Chi Satanás nicxy huin'ññ je mayñaaxhuiñjyä huindu'mybi ñaaxhuiñ. Je' nicxy huin'ññ Gog jäy etz Magog jäy. E yi' ajcxy y'ane'mbidijc yajmujctähuaññ soldado ajcxy, jigix

chiptúngixipy mïid je Dios y'ung. Jadu'n je' ajcxy soldados ymayity jadu'n nej pu' ymayity huïdibi mejypä'ám. ⁹ E jadu'n ajcxy ypediïy ma ymïjhuinity naax, chi ajcxy yajnaadujcy je it ma chinaaygixy huïdibi Dios ti huin'ïjxigixy etz yajnaadujccixy je ciudad huïdibi Dios chojcpy. Chi Dios quejxy jïin huïdibi tzoomb tzajpjoty, huïdibi oy ñöcigixy huädz huädz je may soldados ajcxy. ¹⁰ Je mujcu', huïdibi anajty ti huin'ïñ je mayjäy, oy yajcötijnaxy ma je mij jïin ytoy mïid azufre. Ma anajty ti yajcötijnaxy je ca'oy'iyujc etz je profeta, ca'piy yjanchity. Jïiby je' ajcxy ayo'n tzaachypï paadipy xïm tzuum huinixï huinitiempo.

Je tïyduunin ma je mij'ane'mbi yhuinduu

¹¹ Nhuin'ïjxyich tüg mij'ane'mdac janch poob, mïid je huïdibi anajty ññaayb ma je'. Ma je' yhuinduu naax etz tzajp queectigoyday yajxon, ni ca' y'ocyajpatni it lugar ma je naax etz tzajp y'ïjtcixipy. ¹² Chi nhuin'ïjxyich je öcpi ajcxy, mij'anäcpi mutz'anäcpi, ytinaaygixy ma Dios yhuinduu. Chi yajciyhuäcxtay maylibro. E nañ jadu'n yajciyhuäcxy jadüg libro huïdibi mïid je jäy yxï cojay huïdijaty ajcxy jugy'ajtin huinixï mïid. Chi je' ajcxy yajtiyduñ je öcpi ajcxy nej anajty ajcxy ti chinaaygixy ya naaxhuiñ, jadu'n nej yjaybetyity ma je maylibro. ¹³ Je mejy ycïeyctay je' je öcpi ajcxy huïdibi anajty jïiby yajpatp. E je o'cin etz je öcpijut ycïeyctay je' je öcpi huïdibi jïiby yajpatp, e tüg'öciy je' yajtiydunday nidüg nidüg nej anajty ti chinaaygixy. ¹⁴ Je o'cin etz je it ma je öcpi y'ity yajnajztijiyday jïinjoty ma je mijjïin ytoy. Je' je' je mïmetzpi o'cin ma je mijjïin ytoy. ¹⁵ E huïdijaty anajty ajcxy ca' yxï ymïñ ma je libro huïdibi jugy'ajtin huinixïbi mïid, hue' je' ajcxy yajnajztijiy jïinjoty ma je mijjïin ytoy.

21

¹ Huin'it nhuin'ïjxyich tüg tzajp jemybi etz tüg naax jemybi, com je jayïjpi tzajp etz je jayïjpi naax ti je' anajty ytigoydäy, e ni ma anajty mejy ycacädy. ² ñich, Juan, nhuin'ïjxyich je ciudad huätzpi jemybi, je Jerusalén, ycidägy anajty chooñ tzajpjoty ma Dios yajpaady, janch oyduñ anajty, jadu'n nej tüg töxyjäy ñay'oyduñyï ñayxoxyï co ypïga'ñ mïid yëdyjc. ³ Nmïdoohuïch tüg ayuc mïcpi chooñ anajty tzajpjoty, e ymïnañ:

—Cuenditun ñich n'ayuc. Dios tzïnaydac pïgamb ma naaxhuiñyjäy ajcxy. Yï' tzïnahuiipy mïid yï' ajcxy, e yï' ajcxy Dios yjäy'adïyb. E Dios ci'm idaamb mïid yï' ajcxy jigix yï' ajcxy Dios'adïyb. ⁴ Dios yajquëgïb ajcxy ytajïn ymayïn etz yajtïdzïb ajcxy yhuinnï, e ca'p yjadïb o'cin ni jïyïn ni yaaxïn, ni jotmay, ni pïn ycajïhuïhuïp je ju'pïn je pa'mïn. Com je huïdibi anajty ijtnaayb, ti je' ñaxy.

⁵ Huin'it je' ymïnañ huïdibi anajty ññaayb ma je mij'ane'mdacïn:

—Cuenditungix ñich n'ayuc. Huinjemy ngojtïgadza'ñich tüg'öciy huïdibi jii'ijtp.

Nañ jadu'n ymïnañ:

—Jaay jada ayuc. Com jadyaabi ayuc ooy jada yjanchity, e ooy yï' jot'amïj'ajt mïidity.

⁶ Huin'it je mij'ane'mbi xyñïmaayich:

—Ti tüg'öciy ytunyï yjadyï. ñich je' nyajtzondacp tüg'öciy tijaty, etz ñich nyajcogixïyb tüg'öciy tijaty, tim jadu'n nej je letra A huïdibi yajtzondacp je alfabeto etz je letra Z huïdibi yajcogixïyb je alfabeto. Pïnjaty tzojcp jemybi jugy'ajtin ñich yï' nmöhuïp. Jadu'n nipaady nej jïhuïy ajcxy ytidzïyigixy, e nyaj'ügïch ma ymuxy je nï huïdibi yejcp jugy'ajtin, ni ca' ajcxy mïmeeñyduunïp ni jadu'ñi. ⁷ Pïnjaty mïmadactaayb jïbic-huinma'ñ etz pocytunï, yï' je' cïdigïhuïb huïdibi një'ajtpy, e ñich yï' xyDios'adïb, e yï' ñich n'ung'adïyb. ⁸ Je huïndzïcytïjc ajcxy, pïnjaty ca' ymïbicy ñich ndïy'ajt, pïnjaty tumb huïdibi ca' y'oyjäygïdaacnity, pïnjaty jäy yaj'öcp, pïnjaty mïgapxtïgooyb töxyjädyjc, pïnjaty tumb capxpogï, pïnjaty mïjpidacp huïjyjäy yhuinma'ñ, pïnjaty huïndzïgïyb quipychech tzaadzech, etz pïnjaty anïdäc, je' ajcxy nidüg'öciy nibïdzïmïb ñïcxipy ma mijjïin ytoy mïid azufre, huïdibi quëxïcp nej jïnmejy. Je' je' je mïmetzpi o'cin.

Yï jemybi Jerusalén

⁹ Huin'it nidüg ángel je nihuixtujcpi huidibi anajty mïid huixtujc tasi ujtzjatypi mïid je huixtujcpi ayo'n tzaachypï huidibi jac'axam tunaanip jadaanip, je' xyñimaayich:

—Min, e cham nyajni'ixihua'ñ je mibijcpidijc huidibi tügmugamb mïid Dios y'ung, je Cordero, jadu'n nej tüg yëydijc ytügmucy mïid ytöxyijc co ajcxy ypicy.

¹⁰ Je huidibi Dios yjihui'ñ ymic'ajt xyaj'ijxich cumäyjoty, chi je ángel cümäyjoty xyajnicxyich ma tüg cop mijpi etz cixpi, chi xyaj'ijxyich je mijpi ciudad santa. Je ciudad santa hue' je' yxii Jerusalén, e ycidägy anajty choon tzajpjoty jiiby ma Dios yajpaady. ¹¹ Je mij ciudad santa janch adicxp je' anajty mïid Dios y'oy'ajtin. Jim jadu'n anajty y'adicxy nej tüg tzaa janch oybi nej mármol, janch yaj'ijxnajxp nej ijxin. ¹² Jühuidityi anajty mïidity je ciudad santo ac poch janch mij etz cixy. Je poch ymïid anajty majmetz y'aguu. E ma je majmetzpi y'aguu majmetz ángel ajcxy y'ijtcixy, tügpi ángel ma tügjaty ciudad aguu. Etz yjaybetyity je' ajcxy yxii je majmetzpi Israel tribu, tügpi tribu yxii yjaybetyity ma tüg tüg poch y'aguu. ¹³ Tugüg anajty y'aguu mïidity xibidzim'amy, tugüg y'aguu ma tichypo ymiiniy, tugüg y'aguu ma jinboj ymiiniyin, etz jatugüg y'aguu ma xigidägy'amy. ¹⁴ Je poch huidibi anajty ymïid je cajp, ymïid anajty majmetz tzaa huidibi y'ijx'ajtip, e majmetzpi tzaa ymïid anajty cojaay je nimajmetzpi apóstoles ajcxy yxii huidibi Jesús, je Cordero, yhuin'ijx, tügpi apóstol yxii ma tüg tüg tzaa.

¹⁵ Je ángel huidibi anajty miydacp mïid ich, ymïid anajty tüg quipx ac tim oori je' anajty. Je' anajty mïid quipxa'ñ je cajp, je poch y'aguu, etz je poch. ¹⁶ Je cajp, je ciudad, hue' je' anajty cuadradi; nej anajty yon'ajt, nañ jadu'n anajty y'agon'ajt, etz nañ jadu'n ycix'ajt. Chi je ángel quipxy je ciudad santa mïid je' yquipx. E hue' quipxy mejtz mil jamejtz migo'px kilómetros, y'ayon'ajtin ycix'ajtin etz y'agon'ajtin quipxyjaty je' anajty. ¹⁷ Huin'it je ángel quipxy je poch, hue' quipxy migo'px jahuixchiguipx midaax cinuux, jadu'n nej naaxhuiñyäj ajcxy ycinuux, huidi je ángel yajtumyb.

¹⁸ Je poch hue' je' anajty ypochity mïid tzaa oyjatypi, e je cajp hue' je' anajty ac tim oori, yguëxigy nej ixx huätzpi. ¹⁹⁻²⁰ Je tzaa huidibi je poch y'ijx'ajtip hue' je' anajty y'oyduñity huidi mïid y'oyguëxigy, tzaa janch oyjatypi canaagnax color. Je jayijpi poch y'ijx hue' anajty y'oyduñity mïid jaspe tzaa, je mimetzpi poch y'oyduñity mïid safiro tzaa, je midugügpi poch y'oyduñity mïid ágate tzaa, je mimadaaxpi y'oyduñity mïid esmeralda tzaa, je mimigooxpi poch y'oyduñity mïid ónice tzaa, je midudujcpi poch y'oyduñity mïid coralina tzaa, je mihuixtujcpi poch y'oyduñity mïid crisólito tzaa, je mituctujcpi poch y'oyduñity mïid berilo tzaa, je midaxtujcpi poch y'oyduñity mïid jacinto tzaa, je mimajmetzpi poch y'oyduñity mïid amatista tzaa. ²¹ Je majmetzpi poch'aguu hue' anajty y'oyduñity mïid tügpi perla. E je mijtu' huidibi najxp cajpcujc hue' y'oyiy mïid oori huätzpi, e yquëxigy nej vidrio huätzpi yaj'ijxnajxp.

²² Ma je Jerusalén cajp jemybi ca'p nhuin'ijxyich ni tüg templo, ni tüg tijc ma jäy ajcxy Dios ojadajtcixy. Com je Huindzin Dios, yi huidibi tügpajc mijip, etz je' y'ung, je Cordero, jadu'n yi' ajcxy nipaady nej tüg templo nej tüg it ma mayjäy ajcxy y'ojadajtigixy Dios etz je' y'ung. ²³ Je jemybi Jerusalén ca'p je' anajty yajmayjaty xii po' huidibi yaj'anihuiip yajticxihuiip je ciudad, com je Dios y'oy'ajtin etz je' y'ung y'oy'ajtin yi' je' ajcxy nej je ticxin jajin huidibi amb ticxp ma je Jerusalén jemybi. ²⁴ Je mayñaaxhuiñyäj huidibi ticpatcixy y'alma nidzoocin naxipy tigihuiipy ajcxy mïid je jemybi Jerusalén yticxin yjajin huidi anajty ti ymöyii. Je ane'mbidijc ajcxy ya naaxhuiñ ymimiinipy ajcxy mij'ajt, oy'ajt, etz cömay'ajt ma je jemybi Jerusalén. ²⁵ E je cajp aguu ni camina je' agiy yca'idipy xim, com jim ca' jim ycoodz'idipy, paady ni mina yca'agi' y'idipy. ²⁶ Jim je naaxhuiñyäj, canaag agajp, minicxip ajcxy ymij'ajt y'oy'ajt ycoamay'ajt ma je Jerusaléngajp, je jemybi. ²⁷ Ca'p jim ytigihuiipy ni pin huidibi ca' ypocynihuächñi, ni pin huidibi tumb ca'pi y'oyjäygidaacnity, etz huidijaty jäy huin'imb. Jëyi jim tigihuiip pinjaty ijtp yxii cojay ma

je libro huídibi Dios y'ung, je Cordero, ymíid, ma cojay y'ity je jáy ajcxy yxí huídibi ymíid jugy'ajtín huinixíbi.

22

¹ Huin'it je ángel xyajni'ixíyich tüg mijní huätzpi, je ní huídibi yejcp jugy'ajt huídibi ca' ycixip ytigoyip. Janch huádz janch tícx je' anajty je ní nej tüg íxín. E je ní jim anajty ymuxy ma Dios etz je Cordero y'ane'mdac. ² Jada mij ní hue' je' anajty ñaxy cuidad mijtügujc, etz ma je mejtz'adu'm'amybi mijníba', jim anajty je quipy huídibi jugy'ajt míid, huídibi tíim'ajt majmetz'oc tügpi jimíjt, po' po' ytiim'aty, e je quipy y'aay hue' anajty ytuñ jigix huaad naaxhuiñyáy choocxíy. ³ Ca'p jim y'adipy ni ti ayo'n ni ti jotmay míid pocytuní ycixpi. Je Dios etz je' y'ung je' jim y'ane'mdac ycötujctac yajpaadipy. E je' ytumbidíjc je' ajcxy jim yajmij'adiib ojadadiib. ⁴ Y'íjxípy ajcxy je Dios y'ung yhuiñyjíp etz ymínícxip ajcxy je' yxí ycojay ma ajcxy yhuimboc. ⁵ Ca'p jim ycootzihuity. E pinjaty jim tzinaayb ca'p ajcxy yajmayjadipy linterna jin, lamparajin, ni xíidícxpi, com Dios ích ajt nHuindzin yí' yí' ajcxy codícxíib. Je Huindzin Dios etz je' y'ung je' ajcxy jim ane'míp huinixí huinítiempo.

Huingooní yí Jesucristo ymín'aa

⁶ Huin'it je ángel xyñímaayích:

—Jadayaabi ayuc tíy'ajt ma jada necy, ooy jada yjanchity, e jébi miich myajmij'adipy. Je Huindzin, je Dios huídibi ayuc moy je profetas ajcxy jecy'ajty, quejxy y'ángel jigix yajni'ixíhuipy je' ytumbidíjc tijaty tzojc tunaaníp jadaaníp.

⁷ Jesucristo jadu'n ymínañ:

—¡Miimbich tzojc! Jotcujc pinjaty tumb cuendi etz cuydumb Dios y'ayuc ytiy'ajt huídibi jaybetyíp ma jada libro.

⁸ Ích Juan, nmídoohuích etz nhuin'íjxích jadayaabi huídibi jaybety ma jada necy. E co oy jadu'n nhuin'ixíyich, chi nhuíjoj'íhuíyích ma je ángel ytecymíjc huídibi anajty yam xyajni'ixíyích. ⁹ Chi je' xyñímaayích:

—Ca' jadu'n m'ídích. Ích, Dios xytumbí'ajtp jadu'n nej miich etz jacjadyí migügtíjc huídibi Dios y'ayuc najtzcapxíyíp, e tüg'ócy pinjaty tumb cuendi huídibi jaybetyíp ma jada necy. Huindzígí' etz ojadat Dios.

¹⁰ Chi je' xyñímaayích:

—Capxhuácxí je Dios y'ayuc huídibi tí mjay ma jada necy, ca' myüdzíp. Com tí yhuingoñ je tiempo mína Dios cuyduna'ñ yí y'ayuc huídibi yjayhuí'm ma jada necy.

¹¹ Pinjaty ca' ytuđgyíty, huen jadu'n jacyajpaady míid ycatuđgy'ajt. Pinjaty jíbícjot jíbíc-huinma'ñ tumb, huen nígí jíbícjot jíbíc-huinma'ñ tuñ. E pinjaty tudágyí tumb, huen jactuñ tudágy'ajtín. Pinjaty huádz yjot huádz yhuinma'ñ míid, huen huádz yjot huádz yhuinma'ñ jacmí'ity ma Dios.

¹² Chi je Cristo ymínañ:

—Tímetiini nhuimbídyích jadüg'oc naaxhuiñ. Co anajty tí nmííñích, huin'it nya-jjotcugíhuíích pinjaty oybí tí tuñ, e ndzaachytunípyích pinjaty jíbícpi tí tuñ. ¹³ Ích je' tí njayíjp'atyích ya naaxhuiñ, etz ích je' cogíxíhuamb, tím jadu'n nej je letra A chonđgy ma je alfabeto etz je letra Z ycogíxíy ma je alfabeto. Ích tí nyajtzondacyích je naaxhuiñ etz nyajcíxyích.

¹⁴ Jotcujc ajcxy pinjaty tí ypocyníhuách, jadu'n nipaady nej ajcxy yhuít tí pujcíxy e míid ajcxy yhuít huätzpi. Com tí ajcxy ypocyníhuaatzcíxy, paady jébi jícxícxíp je ujtz tza'm huídibi jugy'ajt yejcpy huídibi ca' ycixípy ytigoyípy ní mína, e jadu'n jébi ytigíy ma je jemybí Jerusaléngajp. ¹⁵ Dios ca' yí' ajcxy cóbígá'ñ ma je jemybí Jerusalén etz huí'míp ajcxy cajppa' tüg'ócy pinjaty huídibi jíbíc-huinma'ñ míid, pinjaty ca' míbicy Dios, pinjaty míjpidacp huíjyáy yhuinma'ñ brujo yhuinma'ñ, pinjaty ajcxy mígapxtígooyb

midundigooyb töxyjäydijc, pinjaty ajcxy jäy yaj'öcp, pinjaty ajcxy huindzig#yib quipy-chech tzaachech, etz tüg'óciy pinjaty tzachnixondacp an# ayuc.

¹⁶ Ich Jesús huidibi capxp. Ti nguexyich n'ángel ma miich jigix jada t#y'ajt capxt#cxipy majaty mib#jcp#dijc ma tüg tüg c#j. Ich je' i#x'ajtp cop'ajtp ma je rey David miiñ. Etz #ch je' nmij'ap'ajtpyich nmijteedy'ajtpyich je rey David. Jadu'n #ch nipaady nej je mijmadza' huidibi yajt#j. jayx#m.

¹⁷ Je Esp#ritu Santo etz je mib#jcp#dijc huidibi jadu'n nipatp nej Cristo ytöxy#jc yminaang#xy:

—Min ma Jesucristo.

E pin am#doo'ijtp #ch n'ayuc ymin#angixipy:

—Min ma Jesucristo.

E pin tzojcp jugy'ajtin huidibi ca' yc#xipy ytigoyipy nimina, jadu'n nej jihuy ytidz#y# e tzocy jada n#i, huen miiñ, e nmöhu#byich jugy'ajtin, jadu'n nej jihuy nyajni'ügich je n#i huidibi jugy'ajtin m#id e ni ca' m#imeeñydunipy ni jadu'ñyi.

¹⁸ Tüg'óciy pinjaty am#doo'ijtp Dios y'ayuc yt#y'ajt huidibi jaybetyip ma jada libro, #ch miich ajcxy nimaaybich co pinjaty jacyaj'anajxp jada ayuc ma jada necy, Dios jac'anaxy möhu#b tzaachypi ayo'n, ca'ydi huidi jaybetyip ma jada libro. ¹⁹ E pin puuhuitzp hueeni jada Dios y'ayuc huidibi jaybetyip ma jada Dios ylibro, Dios yi' jötz#b yx# huidi cojaayip ma je jugy'ajt libro. Nañ jadu'n ypuhuidz#y# huidi anajty japaatip ma je jemybi Jerusaléngajp, huidi jada libro ñimiydacpy.

²⁰ Yi Jesucristo huidibi jada ayuc capxp, yi' minamb:

—Ca' ooy jecy njac-hu#cxiba'ñich co nhuimbidipyich naaxhuiñ jadüg'oc.

Jadu'n jada. Amén. ¡Min, Huindzin Jesús!

²¹ Huen je nHuindzin Jesucristo may'ajt oy'ajt tunipy m#id miich ajcxy huidibi mib#jcp. Jadu'n ngapxyc#xyich. Amén.